

# Manobo, Ilianen



Manobo, Ilianen: Ke meupiya ne tudtul mekeatag ki Hisu  
Kristu New Testament

## **Manobo, Ilianen**

# **Manobo, Ilianen: Ke meupiya ne tudtul mekeatag ki Hisu Kristu New Testament**

copyright © 1989 Wycliffe Bible Translators, Inc.

Language: Manobo, Ilianen

Contributor: Wycliffe Bible Translators, Inc.

All rights reserved.

2025-05-13

---

PDF generated using Haiola and XeLaTeX on 13 May 2025 from source files dated 13 May 2025  
8fce2a78-a796-51ec-acdb-22430c0b7b13

## Contents

|                            |     |
|----------------------------|-----|
| Mateo . . . . .            | 1   |
| Marcos . . . . .           | 58  |
| Lucas . . . . .            | 94  |
| Juan . . . . .             | 155 |
| Ke Nenged-ulaula . . . . . | 197 |
| Ruma . . . . .             | 251 |
| 1 Kurintu . . . . .        | 278 |
| 2 Kurintu . . . . .        | 304 |
| Gelasiya . . . . .         | 320 |
| Ipisu . . . . .            | 330 |
| Pilipus . . . . .          | 339 |
| Kulasi . . . . .           | 345 |
| 1 Tiselunika . . . . .     | 351 |
| 2 Tiselunika . . . . .     | 356 |
| 1 Timoteo . . . . .        | 359 |
| 2 Timoteo . . . . .        | 366 |
| Tito . . . . .             | 371 |
| Filemon . . . . .          | 374 |
| Hibruhanen . . . . .       | 376 |
| Santiago . . . . .         | 397 |
| 1 Pedro . . . . .          | 404 |
| 2 Pedro . . . . .          | 411 |
| 1 Juan . . . . .           | 416 |
| 2 Juan . . . . .           | 422 |
| 3 Juan . . . . .           | 423 |
| Hudas . . . . .            | 424 |
| Ke Imperayag . . . . .     | 426 |

## **Ke Meupiya ne Tudtul Mekeatag ki Hisu Kristu ne Miguhud ni Mateo**

*Ke Kepuun ni Hisu Kristu  
(Lucas 3:23-38)*

<sup>1</sup> Ini se guhud te kepuun ni Hisu Kristu, kevuwaran ni David wey kevuwaran dema ni Abraham.

<sup>2</sup> Si Abraham ke amey ni Isaac,  
ne si Isaac ne amey ni Jacob,  
si Jacob ne amey ni Hudah wey ke menge suled din.

<sup>3</sup> Ne si Hudah ne amey en ni Paris ki Sara,  
(si Tamar ke iney ran);

ne si Paris ne amey ni Iserum,  
ne si Iserum ne amey ni Aram;

<sup>4</sup> ne si Aram ne amey ni Aminadab,  
ne si Aminadab ne amey ni Naasun,  
ne si Naasun ne amey ni Salmun,

<sup>5</sup> ne si Salmun ne amey ni Buus  
(si Rahab ke iney rin),

si Buus ne amey ni Ubid  
(si Ruth ke iney rin),

si Ubid ne amey ni Isai,  
<sup>6</sup> ne si Isai ne amey ni Datu David.

Si David ke amey ni Salomon  
(ke iney rin ne esawa rengan ni Uriya);

<sup>7</sup> Si Salomon ne amey ni Rubuam,  
si Rubuam ne amey ni Abiyas,

si Abiyas ne amey ni Asa,

<sup>8</sup> si Asa ne amey ni Husapat,  
si Husapat ne amey ni Huram,

si Huram ne amey ni Usiyas,  
<sup>9</sup> si Husiyas ne amey ni Hutam,

si Hutam ne amey ni Akas,  
si Akas ne amey ni Isikyas,

<sup>10</sup> si Isikyas ne amey ni Manasis,  
si Manasis ne amey ni Amun,

si Amun ne amey ni Husyas,

<sup>11</sup> ne si Husyas ne amey ni Hikunyas wey ke menge suled din. Ini se hewii ne neviyag ke menge Israyil diyà te inged ne Bebilunya.

<sup>12</sup> Guna su diyà dan en te inged ne Bebilunya ne nevuwad si Hikunyas ne iyan din anak ne si Selatil,

si Selatil ne amey ni Serubabil,

<sup>13</sup> si Serubabil ne amey ni Abiyud,

si Abiyud ne amey ne Iliyakim,

si Iliyakim ne amey ni Asur,

<sup>14</sup> si Asur ne amey ni Saduk,

si Saduk ne amey ni Akim,

si Akim ne amey ni Iliyud,

<sup>15</sup> si Iliyud ne amey ni Iliasar,

si Iliasar ne amey ni Matan,

si Matan ne amey ni Jacob,

<sup>16</sup> si Jacob ne amey ni Jose, ke esawa ni Maria ne iney ni Hisus ne ed-ingaranan ki Mesiyas, ne iyan din meana ne impasad te Eleteala ne Ebperetuen te langun.

<sup>17</sup> Ketà be ne igenat ki Abraham taman te kineanak ki David ne sepulù wey epat ne lapis. Ne igenat ki David taman te kinekeviyag dan diyà te inged ne Bebilunya ne sepulù wey epat ded ne lapis. Ne igenat te kinekeviyag dan taman te kineanak ki Hisu Kristu ne sepulù ded dema wey epat ne lapis.

*Ke kineanak ki Hisu Kristu  
(Lucas 2:1-7)*

<sup>18</sup> Iring kayi se ned-ulaula te kineanak ki Hisu Kristu. Nepesaran en se ed-esawaen ke iney rin ne si Maria ni Jose, ugaid ne warà den pà mekedtimpung ne netuenan ni Maria te mehingey sikandin egenat te gehem te Kedeseenan ne Ebpetuntul te Menusiyà.

<sup>19</sup> Si Jose ini ne egkeesawa rin ne metidtu ne etew, ugaid ne warà din metueni ke engkey se amey rut te vatà. Tembù be nepegitung din se kenà din edleusan te ed-esawa si Maria asal ed-usayen dà te meeles su apey kenà meyeyai si Maria.

<sup>20</sup> Ne gewii rin te ebpepegitung kayi ne nekelipereng sikandin ne mibpekita ke suluhuen te Kerenan kayi te tehinep din se egkahi te, "Jose, sikuna ne kevuwaran ni David, kenà ka egkeandek ne ebpegesawa ki Maria su arà se ibmehingey rin ne egenat te gehem dut te Kedeseenan ne Ebpetuntul te Menusiyà.

<sup>21</sup> Ne ed-anak sikandin te meama ne iyan nu id-ingaran ne si Hisus su sikandin ke ebpehahaun te minge etew rin dut te minge salà dan," ke se suluhuen.

<sup>22</sup> Langun kayi ne ned-ulaula su apey metuman ke impekahi rengan te Kerenan dut te ebpelambas te lalag din ne egkahi te,

<sup>23</sup> "Ebmehingey ini se raha ne warà pà mebeyugi ne ed-anak te meama ne iyan id-ingaran ne si Imanwil" (ne iyan din meana ne "Ke Eleteala ne kayi en te kenitew").

<sup>24</sup> Guna su nekehimerat si Jose ne midtuman din ke insuhù dut te suluhuen te Kerenan ne mid-esawa rin si Maria.

<sup>25</sup> Ugaid ne warà din pà uvaya si Maria taman te warà pà mid-anak. Guna su mid-anak en ne mid-ingaranan ni Jose ini se batà ne meama ki Hisus.

## 2

*Nekeuma ke Menge Etew ne riyà ebpuun te Edsilaan su Ebpengarap ki Hisus*

<sup>1</sup> Diyà in-anak si Hisus te inged ne Bitlihim lusud te Hudiya te gewii te iyan egkamal te inged ne datù ne ed-ingeranan ki Hirudis. Warà meuhet ne ruen minge etew ne metau te bituen riyà ebpuun te Edsilaan ne nekeuma riyà te Hirusalim.

<sup>2</sup> Nekeuma ran ne mid-insà dan se egkahi te, "Endei ke behu pà ne in-anak ne vatà ne midtendù ne edetuen te minge etew ne Hudiyanen? Su nekita rey ke bituen ne edlepew riyà te inged dey ne rapit te Edsilaan ne tuus te in-anak en sikandin, tembù be mibpengkayi key su ebpegarap key kandin."

<sup>3</sup> Guna su nering ni Hirudis ini ne warà meupiya ne itungan din, ne iring ded dema ketà ke langun ne minge etew te inged ne Hirusalim.

<sup>4</sup> Ketà ne miburun din ke langun ne minge mepurù te terebpepengesa te minge Hudiyanen wey ke minge meysterù te penduan dan ne mid-insaan din sikandan te, "Endei igkeanak ke Impasad te Eleteala rengan ne Ebperetuen te langun?"

<sup>5</sup> "Diyà te inged ne Bitlihim lusud kayi te Hudiya," ke sikandan, "su ini ke impesurat dut te ebpelambas te Lalag te Eleteala rengan se egkahi te,

<sup>6</sup> 'Sikiyu ne minge etew te inged ne Bitlihim lusud te Hudiya,  
misan deisek ke inged niyu ne kenà sikiyu ke mewri  
dut te minge inged ketà;  
su riyà te keniyu ne ruen edlepew  
ne ebpeheewit dut te minge sakup ku  
ne minge kevuwaran ni Israyil.' "

<sup>7</sup> Guna su nering ni Hirudis ini ne midtawag din ke behu pà ne nekeuma ne riyà ebpuun te Edsilaan te in-eles din ne mid-insaan din sikandan ke keenu medlepew ini se bituen ne nekita ran, ne netuenan din ketà te kandan.

<sup>8</sup> Ketà ne impependiyà din en sikandan te Bitlihim se egkahi te, "Pendiya kew en ne ey-eyari niyu te ebpemengà arà se vatà. Ne embiya egketuen niyu ne lived kew kayi ne peketueni niyu kedì su apey a mekependiyà su ebpegarap a rema."

<sup>9</sup> Nering den dà ini ne mid-ipanew ran en. Ne gewii te ed-ipanew ran ne ketà en maa ke bituen ne nekita ran te riyà dan pà te Edsilaan su mid-una kandan taman te edrenged en ketà te neubpaan te batà.

<sup>10</sup> Nekita ran dà ke bituen ne nehalew ran nevenar.

<sup>11</sup> Midlusud dan ketà te valey ne nekita ran ke vatà wey ke iney rin ne si Maria ne midlumpeng dan se ebpegarap kandin. Ne ketà ne mibukaan dan ke midtehuan te ibehay ran kandin ne indenà dan diyà te kandin ke bulawan, mepurù ne rukut, wey periyemut ne ed-ingaranan te mira.

<sup>12</sup> Ne guna su ed-uli dan en ne impesabut kandan te Eleteala impepevayà te tehinep te kenà dan en medlived diyà te ki Hirudis. Ne ketà ne riyà dan en mibpevayà te seveka ne ralan te kineuli dan en.

*Impelahuy ni Jose wey si Maria ke vatà Diyà te inged ne Ihiptu*

<sup>13</sup> Guna su migenat en ke minge meama ne riyà ebpuun te Edsilaan ne mibpetehinep en ke suluhuen te Kerenan ki Jose se egkahi te, "Enew ke en ne kua nu ke vatà wey ke iney rin ne pelahuy kew riyà te inged ne Ihiptu. Ne kenà kew awà diyà taman te kenà ku ebpeulien sikiyu su ebpemengaan ni Hirudis ayan se vatà su ed-imetayan din."

<sup>14</sup> Ne arà dà ne mid-ewew si Jose ne mid-ewit din ke vatà wey ke iney rin te arà dà ne kerukileman te ebpendiyà te inged ne Ihiptu.

<sup>15</sup> Ne riyà dan mid-ubpà taman te minatey en si Hirudis.

Ned-ulaula ini su apey metuman ke impekahi te Kerenan rengan dut te ebpelambas te Lalag din ne si Husiyas ne egkahi te, "Impeuli ku ke Anak ku riyà ebpuun te inged ne Ihiptu."

*Mibpeimetayan ni Hirudis ke minge Batà ne Meama Diyà te Bitlihim*

<sup>16</sup> Guna su netuanen ni Hirudis te negaga rà sikandin te itungan dut te minge meama ne riyà ebpuun te Edsilaan ne neregereg sikandin te langet din. Ne insuhù din te ebpeimetayan ke langun ne minge vatà ne meama diyà te inged ne Bitlihim wey ketà te nekelingut ne minge inged ne egenat te deruwa pà ne rahun taman te behu pà ne in-anak su mid-antap din dut te nerineg din ketà te minge etew ne riyà ebpuun te Edsilaan ne nekederuwa en ne rahun igenat dutun te nekita ran ke bituen.

<sup>17</sup> Ne ketà ne netuman en ke impekahi rut te ebpelambas te Lalag te Eleteala rengan ne si Jeremias ne egkahi te,

<sup>18</sup> "Duen nerangkub ne egkerineg diyà te inged ne Rama,

ne edsinehew wey ebpenderawit.

Su ebpenderewatan ni Raquel ke minge anak din,

ne kenè ne egkelangan ke hinawa rin

su warè en ke minge anak din."

*Ke Kineuli en en ni Jose Riyà Ebpuun te Ihiptu*

<sup>19</sup> Guna su minatey en si Hirudis ne mibpetehinep en maa ke suluhuen te Kerenan ki Jose diyà te inged ne Ihiptu,

<sup>20</sup> ne migkahi te, "Enew ka ne kua nu ke vatà wey ke iney rin ne uli kew en diyà te inged ne Israyil su minatey en ke minge etew ne egkiyug ne ebpeimatey rut te vatà."

<sup>21</sup> Ne mid-ewew si Jose ne migkuwa rin ke vatà wey ke iney rin ne mid-uli dan en diyà te inged te Israyil.

<sup>22</sup> Ugaid ne guna su nerineg ni Jose te si Arkilew se egkamal dut te inged ne Hudiya nekesambi dut te amey rin ne si Hirudis ne neandek sikandin ne ed-uli ketà. Ne mibpetehinep ma ke Eleteala ne mibaag kandin ne ketà ne riyà dan mibpesinaru te lusud te Geliliya,

<sup>23</sup> ne mid-ubpà dan ketà te inged ne ed-ingaranan te Nesarit. Ned-ulaula rin ini su apey metuman ke impekahi rut te ebpelambas te Lalag te Eleteala rengan ne egkahi te, "Ed-ingaranan sikandin te etew te Nesarit."

### 3

*Ke Kinesesabut ni Juan ke Ebpembunyag*

*(Marcos 1:1-8; Lucas 3:1-18; Juan 1:19-28)*

<sup>1</sup> Ketà ne hewii ne nekeuma si Juan ne Ebpembunyag kayi te tanà ne kenà egkeubpaan te minge etew diyà te lusud te Hudiya, ne impesabut din ke Lalag te Eleteala riyà te minge etew ne ed-uvey kandin.

<sup>2</sup> Migkahi sikandin diyà te minge etew te, "Pemedsendit kew ne engkeri niyu ke minge meraat ne ulaula niyu su mehaan en Edatù ke Eleteala kenitew."

<sup>3</sup> Si Juan ini ke nekahi ni Isayas ke mibpelambas te Lalag te Eleteala rengan se egkahi te,

"Duen etew riyà te tanà ne kenà egkeubpaan te minge etew

ne ebpenawag dut te minge etew

ne ed-uvey kandin, ke sikandin te,

'Mahaan ebpekeuma ke Kerenan,

ne ihewani niyu ke ralan,

ne tidtuwa niyu ke ibayà din,

ne iyan din meana ne tilaka niyu ke hinawa niyu

su apéy kew egkepenehana te kebpekeuma rin.' "

<sup>4</sup> Si Juan ini ne iyan din belegkas ne mid-avel ne bulvul te binatang ne ed-ingeranan te kemilu, ne iyan din insebitan ne lundis ded dut te binatang. Ne iyan din keuyehan se tepuri wey teneb.

<sup>5</sup> Ne merakel ne minge etew ne mibpendiyà su ebpemineg kandin ne riyà ebpemuun te inged ne Hirusalim, ne riyà ebpemuun te lusud te tivuuk ne inged te Hudiya, wey langun ne minge inged ne nekepesuvà te wayig ne Hurdan.

<sup>6</sup> Ne intarem dan te nekedsendit dan dut te langun ne meraat ne ulaula ran ne arà pà ne mibpebunyang dan ki Juan diyà te wayig ne Hurdan.

<sup>7</sup> Guna su nekita ni Juan ke merakel ne Peresiyu wey Sadusiyu ne mibpengkayi su ebpebunyang ne migkehiyan din sikandan te, "Iring kew te minge uled ne ebpelahuy dut te apuy! Mehaan en egkeuma ke kedusa te Eleteala keniyu. Engkey se midtarem keniyu te ebpekeliyu kew ketà te ebpebunyang kew?"

<sup>8</sup> Embiya benar ne mid-engkeran niyu ke meraat ne ulaula niyu, ne ipekita niyu kayi te ulaula niyu.

<sup>9</sup> Ne kenà kew egkahi te sikiyu ne kenà edusaan te Eleteala su geina te kevuwaran kew ni Abraham. Su igkahi ku keniyu," ke si Juan, "misan ini se minge batu ne egkepebaluy te Eleteala ne etew ne tuney ne kevuwaran ni Abraham ne igkesambì keniyu.

<sup>10</sup> Ne sikiyu ne iring te minge kayu ne kenà ebahas te meupiya, tembù be ebpilayen. Ne iring te nekekeyew en ke adsa su ebpemilayen su idtimbang diyà te apuy.

<sup>11</sup> "Wayig se ibunyang ku keniyu ne tuus te mid-engkeran niyu ke meraat ne ulaula niyu," ke si Juan. "Ugaid ne ruen ebpeketundug kediey ne mepuru pà kediey, su misan ke telumpà din ne kenà a edait ne ebitbit. Ne iyan din ibunyang keniyu ke Kedeseenan ne Ebpetuntul te Menusiyà ne ebunyanan din ke ruma te apuy.

<sup>12</sup> Geina te ibpesivey rin ke minge etew ne ebperetiyaya rut te minge etew ne kenà ebperetiyaya," ke si Juan. "Ugaid ne ruen ebpeketundug kediey ne mepuru pà kediey, su misan ke telumpà din ne kenà a edait ne ebitbit. Ne iyan din ibunyang keniyu ke Kedeseenan ne Ebpetuntul te Menusiyà ne ebunyanan din ke ruma te apuy.

<sup>13</sup> Warà meuhet ne nekeuma en si Hisus kayi te wayig ne Hurdan se riyà ebpuun te lusud te Geliliya su ebpebunyang ki Juan.

<sup>14</sup> Ugaid ne kenà perem ebunyang si Juan kandin, ke sikandin te, "Meambe ke ebpengkayi ka te kedi se ebpebunyang? Su iyan edait ne ebpebunyang a kenikew."

<sup>15</sup> Ne midtavak si Hisus kandin te, "Ed-iringen ta en kayi ne bunyahi ad nikuna su apéy ta metuman ke langun ne insuhù te Eleteala." Ne ketà ne migkiyug si Juan ne mibunyanan din en si Hisus.

<sup>16</sup> Guna su nebulnyahan en si Hisus ne migaun en ketà te wayig. Ne nevukaan ke langit ne nekita rin ke Kedeseenan ne Ebpetuntul te Menusiyà ne midragid te melepati ne mibpehunrenenà ne midlatun kayi te kandin.

<sup>17</sup> Ketà ne ruen suwara ne riyà ebpuun te langit ne nerineg din se egkahi te, "Sikew ke Anak ku ne igkelimù ku nevenar, ne utew en ne ingkesuatsuat ku sikew."

## 4

### *Ke Kinepenggeram ki Hisus*

(*Marcos 1:12-13; Lucas 4:1-13*)

<sup>1</sup> Ne ketà ne mid-ewit en si Hisus dut te Kedeseenan ne Ebpetuntul te Menusiyà diyà te tanà ne kenà egkeubpaan te minge etew su ebpenggeraman dut te datù te pekaid.

<sup>2</sup> Ne lusud te epat nepulù ne andew wey kerukileman ne warà bulug mekekaan sikandin, ne nevitil nevenar.

<sup>3</sup> Ne mid-uvey kandin si Setanas ke datù te pekaid ne mibpenggeraman din se egkahi te, "Embiya sikuna en ke Anak te Eleteala ne pebeluya nu ini se minge batu ne pan ne egkekaan."

<sup>4</sup> Ne migkahi si Hisus te, "Iyan insurat ne Lalag te Eleteala ne egkahi te, 'Kenà egkeenen dà se igkeuyag te etew, ugaid ne iyan ebpekeuyag kandin ne uman senge tahà ne lalag te Eleteala.' "

<sup>5</sup> Ne ketà ne mid-ewit dut te datù te pekaid si Hisus diyà te inged ne Hirusalim ne ed-ingeranan te Berekat ne Siyudad ne rutun ne miduma rin si Hisus diyà te migketikangan dut te Nekebpuru ne Valey te Eleteala.

<sup>6</sup> Ne migkahi ke datù te pekaid te, "Embiya benar ne sikew ke Anak te Eleteala ne umpak ka ruen. Su ruen impesurat ne Lalag te Eleteala ne egkahi te,

'Edsuhù ke Eleteala te menge suluhuen din  
ne ebpetugenuren keykew.  
Ne edsepirawen ka nikandin  
su apey kenà egkerudruri  
ke paa nu te batu.' "

<sup>7</sup> Ne migkahi si Hisus te, "Ugaid ne ruen dema Lalag ne impesurat te Eleteala ne egkahi te, 'Kenà kew baal te ralan ne ibpenggeram te gehem dut te Kerenan ne Eleteala niyu.' "

<sup>8</sup> Neipus ketà ne mid-ewit maa si Hisus dut te datù te pekaid diyà te metmetikang ne buvungan ne impekita rin ki Hisus ke langun ne menge inged kayi te ampew te dunya wey ke kekewesai ran.

<sup>9</sup> "Ini se kebayaàbayaà kayi te langun ne inged ini ne ibehey ku keykew," ke se datù te pekaid, "wey langun ini ne kekewesai embiya ebpenimbuel ka ne ed-arap ka kedì."

<sup>10</sup> Ne migkahi si Hisus te, "Awà ka kayi, Setanas! Duen impesurat ne Lalag te Eleteala ne egkahi te, 'Iyan niyu rà erapa ne Kerenan ne Eleteala niyu, ne sikandin dà se edsenguren niyu.' "

<sup>11</sup> Ne ketà ne mid-ewaan en dut te datù te pekaid sikandin ne nekeuma en ke menge suluhuen te Eleteala ne midtuganur kandin.

*Midrudsù si Hisus te Ebpesabut Mekeatag te Kedatù te Eleteala te Menge Etew  
(Marcos 1:14-15; Lucas 4:14-15)*

<sup>12</sup> Guna su nerineg ni Hisus te impevilanggù en si Juan ke Ebpembunyag ne mibpendiyà sikandin te inged ne Geliliya.

<sup>13</sup> Nekeuma sikandin diyà te inged ne Nesarit ugaid ne warà ketà mid-ubpà su mibpendiyà sikandin te inged ne Kapirnewum diyà te beyvey te ranew te Geliliya diyà te tanà ne imbehey rengan dut te keep-epuan ni Sibulun wey Neptali.

<sup>14</sup> Ned-ulaula rin ini su apey metuman ke impesurat ki Isayas ke mibpelambas te Lalag te Eleteala rengan ne egkahi te,

<sup>15</sup> "Tanà te Sibulun wey tanà te Neptali  
diyà te beyvey te rahat,

diyà te ripag te wayig ne Hurdan,  
ne ed-ingeranan te Geliliya ne ed-ubpaan te kenà Hudiyänen!

<sup>16</sup> Ke menge etew ne ed-ubpà ketà  
ne rengan ne iring te nerusireman,  
ugaid ne nekekita en te mesmesihey ne rayag.

Uya, ini se riyà te merusirem  
ne mid-ubpà te alung te kepepatey,  
ugaid ne mid-endlahan en te rayag!"

<sup>17</sup> Ne igenat ketà ne midrudsù en si Hisus se ebpesabut te menge etew, ke sikandin te, "Pedsendit kew en ne engkeri niyu en ke meraat ne ulaula niyu su mehaan en ebpekeuma ke Kedatù te Eleteala keniyu."

*Mibpemili ni Hisus ke Epat ne Etew ne Ebpemiyala te Eduma Kandin  
(Marcos 1:6-20; Lucas 5:1-11)*

<sup>18</sup> Gewii te mid-ip-ipanew si Hisus diyà te beyvey te Ranew te Geliliya ne nekita rin ke deruwa ne teleari, si Simon (ne ed-ingeranan ki Pedro) wey si Andres ke ari rin. Ebpemiyala ran diyà te ranew su arà ke helevek dan.

<sup>19</sup> Ne migkehiyan dan ni Hisus te, "Pengkayi kew en ne duma kew kediey," ke sikandin, "su serà se ebpemiyalaan niyu guntaani, ugaid ne ebpenuruen ku pà sikiyu te iyan niyu mulà egkeutel ne menge etew ne eduma kedì."

<sup>20</sup> Arà dà ne mid-ewaan dan en ke biyala ran su miduma ran en ki Hisus.

<sup>21</sup> Guna su midlevundus en si Hisus ne nekita rin se deruwa pà maa ne teleari ne si Santiago wey ke ari rin ne si Juan, ke menge anak ni Sibidiyu. Diyà dan te avang dan ne elin ke amey ran ne ebpengumbayà te biyala ran. Midtawag dan ni Hisus,

<sup>22</sup> Ne arà dà ne mid-ewaan dan en ke amey ran dutun te avang ne miduma ran en ki Hisus.

*Impesabut ni Hisus Ke Meupiya ne Tудtul wey Nengeulian Din Ke Menge Ederaru  
(Lucas 6:17-19)*

<sup>23</sup> Ne mid-eneb-eneb en si Hisus dut te langun ne menge inged diyà te lusud te inged ne Geliliya se ebpenurù ketà te menge valey ne ebpedgian te menge Hudiyänen te penduan dan. Impesabut din te menge etew ke Meupiya ne Tудtul mekeatag te Kedatù



te Eleteala kandan, ne nengeulian din ke piya engkey en ne sakit wey menge daru te menge etew.

<sup>24</sup> Ne nekeeneb en ke bantug ni Hisus diyà te tivuuk ne inged te Siriya ne mibpeneheewit te menge etew diyà te kandin ke langun ne egkerasey te piya engkey ne sakit wey daru, menge midsuukan te vusew, menge ebevuyen, wey menge etew ne minatey se lawa rin, ne nengeulian ni Hisus ke langun dan.

<sup>25</sup> Ne medmerakel ne menge etew ne miduma kandin egenat te lusud te inged ne Geliliya, lusud te inged ne Dikapulis, inged ne Hirusalim, lusud te inged ne Hudiya wey menge inged diyà te ripag te wayig ne Hurdan.

## 5

*Ke Impesabut ni Hisus Mekeatag te ke Benar ne Kehelawan  
(Lucas 6:20-23)*

<sup>1</sup> Guna su nekita ni Hisus ke denda ne menge etew ne miduma kandin ne midtekereg sikandin diyà te buvungan ne rutun mibpinuu. Ne mid-uvvey kandin ke menge edumdumaan din.

<sup>2</sup> Ne mibpenurù din sikandan se egkahi te,

<sup>3</sup> “Dayirayi ke menge etew ne netuenan dan te kenà dan ebpekeulaula te meupiya

ke kenà dan edtevangen te Eleteala,

su sikandan ke ebpekeamung dut te Edetuan te Eleteala!

<sup>4</sup> Dayirayi ke menge egkemutuwan,

su edlenganen te Eleteala ke hinawa ran!

<sup>5</sup> Dayirayi ke menge mepeembavà te hinawa rin,

su ebpeketelimà dan te impasad te Eleteala!

<sup>6</sup> Dayirayi ke menge ebpeuna te hinawa ran

se kedtuman te kiyug te Eleteala,

su edtevangen dan te Eleteala te kedtuman kayi!

<sup>7</sup> Dayirayi ke menge iiruwen te menge ruma ran,

su egkeyruwan dan dema te Eleteala!

<sup>8</sup> Dayirayi ke menge kenà egkereruwa se hinawa rin,

te kedtumana ran te metidtu ne ulaula,

su sikandan se ebpekekita te Eleteala keuremà!

<sup>9</sup> Dayirayi ke menge ebpedmedtuntey te menge etew,

su sikandan ke ed-engkunan te Eleteala ne anak din!

<sup>10</sup> Dayirayi ke menge ebpekesekitan te kedtuman dan

te engkey se metidtu diyà te etuvangan te Eleteala,

su sikandan ke ebpekelusud dut te Edetuan te Eleteala!

<sup>11</sup> Dayirayi kew ke ebpenempelaen kew, wey ebpekesekitan kew, wey edtevuwan kew te langun ne edsusunan te mereatey ne ulaula su sabap te keduma niyu kediey.

<sup>12</sup> Kehalew kew misan iring kayi te ini kew te ampew te dunya su dekelà se idlalew keniyu diyà te langit. Su iring ded dema ke impekaid dan dut te menge mibpelambas te Lalag te Eleteala rengan.”

*Insempità ni Hisus te ini se Keduma Kandin ne Ebpekeiring te Timus wey Sulù  
(Marcos 9:50; Lucas 14:34-35)*

<sup>13</sup> “Sikiyu ne eduma kedi,” ke si Hisus, “ne iring kew te timus ne ibmeupiya te nanam te egkeenen su iyan kew ibmeupiya dut te langun ne menusiya. Ugaid ne upama ke egkeawà en ke nanam din, ne warà en dalan te kebmetimus din pà maa. Warà egkeetahan din, tembù be idtimbag dà ne egiekan dà te menge etew.

<sup>14</sup> “Ne iring kew te sulù ne ebpeketyew diyà te langun ne menusiya. Su ruen beseanan ne egkahi te, ‘Ke inged ne riyà meketahù te puntur te buvungan ne kenà ebpekeeles.’

<sup>15</sup> Su warà etew ne midtemtem te sulù ne ebpelengkevan din etawa ibperalung din, ugaid ne riyà din ibpeluukluuk te saag su apey egkerayahan ke etew ne edlusud.

<sup>16</sup> Ne iring ded te sulù ne impeluukluuk te saag ne ebpekerayag te langun ne menge etew ketà te lusud te baley, ne pekereyaha niyu ke sulù niyu riyà te menge etew su apey ran mekita ke meupiya ne ed-ul-ulaan niyu ne ebpekereyù dan dut te Amey niyu ne Eleteala diyà te langit.”

*Ke Penurù ni Hisus Mekeatag te Penduan ne Intahak ni Moises*

<sup>17</sup> “Kenà niyu pegitunga,” ke si Hisus, “te iyan ku impengkayi te ampew te dunya ne apey egkeawà ke penduan ne intelau ni Moises rengan wey ke impenurù te minge mibpelambas te Lalag te Eleteala rengan. Kenà ku iyan impengkayi se id-awà ku ini, ugaid ne mibpengkayi a su apey ku meup-upiani metuman ke langun ne nekahi.

<sup>18</sup> Tentenuri niyu ini, su taman te duen pà langit wey tanà ne warà senge tahà ne egkeawà dut te penduan. Su egkeawà ke langit wey tanà ne warà pà meawà ke penduan.

<sup>19</sup> Tembù be piya entei ne etew ne edsurang te misan deisek dà dut te penduan ne ibpenurù din te ruma se edsurang iring kandin, ne sikandin ke egkevaluy ne kevevaan ne etew diyà te minge etew ne Edetuan te Eleteala diyà te langit. Ugaid ne ke etew ne edtuman dut te penduan ne ibpenurù din te ruma se kedtuman, ne egkevaluy sikandin ne mepurù ne etew diyà te minge etew ne Edetuan te Eleteala diyà te langit.

<sup>20</sup> Su idtarem ku keniyu,” ke si Hisus, “wey kew rà ebpekeamung diyà te minge etew ne Edetuan te Eleteala diyà te langit embiya iyan kew pà metidtu diyà te etuvangan din dut te minge meyerù te penduan wey minge Peresiyu.”

*Ke Penurù ni Hisus te Kenà Egkeapes te Ruma Ta wey Edlalat te Meraat*

<sup>21</sup> Ne migkahi pà maa si Hisus te, “Iyan niyu nerineg ne impenurù te minge lukes tew rengan ne egkahi te, ‘Kenà kew ed-imatey, su ke etew ne ed-imatey ne egkesuhat te kukuman.’

<sup>22</sup> Ugaid ne igkahi ku keniyu te piya entei ne egkeapes te ruma rin ne egkesuhat dema te kukuman. Ne piya entei ne egkahi te ruma rin te, ‘Warà itungan nu!’ ne ebpeneheewitan sikandin diyà te punggus en dut te kukuman. Ne piya entei ne egkahi te ruma rin te, ‘Buneg ka ne warà rantek nu!’ ne dait ne ebpekednerakà sikandin.

<sup>23</sup> “Tembù be embiya diyà ke en te edenaan su ebehey ka te Eleteala ne netenuran nu te ruen nesakit se hinawa rin kenikew,

<sup>24</sup> ne itahak nu pà arà se ibehey nu ne beyai nu pà ne pekid-ulit ka pà ketà te ruma nu, ne arà pà ne lived ka su ebehey ke en diyà te Eleteala.

<sup>25</sup> “Ne embiya ruen etew ne edwagib kenikew ne ed-ewiten ka riyà te kukuman, ne gaangan ke en pekidtunteng kandin te kenà ka pà ebpekeetuvang diyà te kukuman. Su embiya ebpekeetuvang ka en diyà te kukuman, ne ibehey ka en diyà te uwis, ne ibehey ka riyà te minge pulis ne ke minge pulis ne ebilanggù keykew.

<sup>26</sup> Idtarem ku keniyu,” ke si Hisus, “kenà kew ebpekelihawang ketà taman te kenà niyu egkevayaran ke langun ne keselaan nu.”

*Ke Penurù ni Hisus Mekeatag te Etew ne Edlangkadlangkad te Esawa Rin*

<sup>27</sup> Ne migkahi pà maa si Hisus te, “Iyan niyu nerineg dema ne impenurù dengan te, ‘Kenà kew edlangkadlangkad te esawa nu.’

<sup>28</sup> Ugaid ne igkahi ku keniyu te piya entei ne meama se edtengteng te meritan ne kenà din esawa ne igkeerihi rin, ne timbang te nepengingniyuhan din en arà se meritan.

<sup>29</sup> Su embiya iyan ebpekepeneheewit keykew te kebpekedsalà nu ke kewanan ne mata nu, ne lesika nu ne itimbang! Su iyan pà tumù ne dibdivaluy rà se mata nu tumin dè be ke langun ne lawa nu ne igkeantug diyà te apuy nerakà.

<sup>30</sup> Ne embiya iyan ebpekepeneheewit keykew te kebpekedsalà nu ke kewanan ne belad nu, ne tempera nu ne itimbang nu! Su iyan pà tumù ne egkesarir ka tumin dè be ke langun ne lawa nu ne igkeantug diyà te apuy nerakà.”

*Ke Penurù ni Hisus Mekeatag te Etew ne Ebpekidbelag te Esawa rin*

(Mateo 19:9; Marcos 10:11-12; Lucas 16:18)

<sup>31</sup> Ne migkahi maa si Hisus te, “Impesurat rema dengan te, ‘Embiya ruen meama ne ebpekid-engked te esawa rin, ne edsurat pà te ebpeketuanan te ebpekid-engked en sikandin.’

<sup>32</sup> Ugaid ne igkahi ku keniyu embiya ruen meama ne ebpekid-engked te esawa rin, misan kenà edlangkadlangkad ini se esawa rin kandin, ne ini se meama se puunan te salà te esawa rin su embiya edsaup ed-esawa ke meritan ne timbang te nekelangkadlangkad en sikandin. Ne engketà ded dema timbang te nekelangkadlangkad en ke meama ne ed-esawa kandin.”

*Ke Penurù ni Hisus Mekeatag te Pasad te Minge Etew*

<sup>33</sup> Ne migkahi pà maa si Hisus te, “Nerineg niyu red dema se impenurù te minge lukes tew dengan, ‘Kenà niyu perisa ke impasad niyu, su embiya ruen impasad niyu te Kerenan ne tumana niyu iya.’

<sup>34</sup> Ugaid ne igkahi ku keniyu, embiya ruen ibpasad niyu ne kenà kew sesapà. Kenà kew sesapà te langit su arà ke ubpaan te Eleteala,

<sup>35</sup> ne kenà kew sesapà kayi te ampew te dunya su ini ne iring te edtembaran te paa rin. Ne kenà ka sesapà te inged ne Hirusalim su arà ke inged dut te pinekemepurù ne Datù.

<sup>36</sup> Ne kenà kew rema sesapà te ulu niyu su warà gehem niyu te ebpekeputi te misan senge waru rà ne bulvul niyu etawa ebpekeitem.

<sup>37</sup> Embiya iyan netahù te hinawa niyu se 'uya' ne kehiya niyu te 'uya', ugaid embiya iyan netahù te hinawa niyu se 'kenà' ne kehiya niyu rà te 'kenà'. Su embiya ed-umanan niyu pà te sapà ne riyen en arà ebpuun te datù te pekaid."

*Ke Penurù ni Hisus te Kenà ki Edsulì te Menge Kunterà ta  
(Lucas 6:29-30)*

<sup>38</sup> "Nerineg niyu rema," ke si Hisus, "ke impenurù dengan se egkahi te, 'Embiya ruen etew ne ebpekereraat te mata te ruma rin, ne edereetan dema ke mata rin. Ne embiya ruen ebpekehevang te ngipen te ruma rin ne egevangen dema te ngipen din.'

<sup>39</sup> Ugaid ne igkahi ku keniyu te kenà kew edsulì dut te etew ne mid-ulaula te mereatey keniyu. Upama ke ruen edtabpì te buked nu, ne kenà nu ivangen ke edtebpìen din ke divaluy.

<sup>40</sup> Ne embiya ruen ed-ewit keykew riyà te kukuman ne edlugkasan ka rin en te kemisita nu, ne kenà nu ivangen kandin te egkuwa ketà, ugaid ne ivehey nu kandin ke kumbalà nu rema.

<sup>41</sup> Ne embiya ruen sundaru ne ebpehes keykew te ebpevava te kesengkapan din taman te senge kilumitru se keriyù din, ne bevaa nu misan taman te deruwa ne kilumitru.

<sup>42</sup> Ne embiya ruen ebuyù keykew, ne behayì nu. Ne embiya ruen edsambey keykew, ne pesembaya nu."

*Ke Penurù ni Hisus Mekeatag te Kedlimù ta te Menge Kunterà ta  
(Lucas 6:27-28, 32-36)*

<sup>43</sup> "Nerineg niyu rema," ke si Hisus, "ke nekahi ran dengan te, 'Limui nu ke minge sepatat nu ne keepesi nu ke minge kunterà nu.'

<sup>44</sup> Ugaid ne igkahi ku keniyu te limui niyu ke minge kunterà niyu, ne ipengeningeni niyu te ebpeneuven te Eleteala ke minge etew ne ebpekesakit kenikew.

<sup>45</sup> Su embiya ini se ed-ul-ulaan niyu, ne egkekita kayi te keniyu te sikiyu ne minge anak en te Amey niyu ne Eleteala diyà te langit. Su ini se Eleteala ne kenà iyan din dà ebpesilaan te andew ke minge metidtu rà su elin ded dema ke minge etew ne meraat se ulaula rin. Ne ebpeuranan din ded dema ke minge metidtu wey ke minge etew ne ed-ulaula te meraat.

<sup>46</sup> Su embiya iyan niyu rà igkelimù ke minge etew ne egkelimù keniyu, ne meambe ke ebpenareng kew te kebpenaub te Eleteala keniyu? Misn ke ebpevyad te buwis ne limbungan ne igkelimù dan dema ke minge etew ne egkelimù kandan.

<sup>47</sup> Ne embiya iyan niyu rà edshipaan ke minge sepatat niyu, ne engkey se kegkeryui keniyu? Warà! Su misan ke minge etew ne kenà ebperetiyyaya te Eleteala ne ed-ulaula red dema te iring ketà.

<sup>48</sup> Tembù be sikiyu ne pekeimpit kew te ulaula niyu riyà te minge etew, su ke Amey niyu riyà te langit ne impit ke langun ne ulaula rin."

## 6

*Ke Penurù ni Hisus Mekeatag te Kebehey ta te Menge Egkeayuayu*

<sup>1</sup> Migkahi pà maa si Hisus te, "Itahù niyu ini te itungan niyu te kenà iyan niyu kebpeneningeni te Eleteala ne apey kew mekita te minge etew. Su embiya ini se ed-ul-ulaan niyu ne kenà niyu egketelimà ke idlalew ketà dut te Amey niyu riyà te langit.

<sup>2</sup> "Tembù be embiya ruen ibehay niyu te egkeayuayu ne kenà niyu ibpekitakita te minge etew iring dut te minge etew ne egkiyug ne ebpekita te keupiya ran. Su sikandan ini ke ebehey ran ne riyà den dà ibehay te lusud te valey ne ebpedgian te penduan dan wey riyà te ralan su apey egkekita ne egkeryù dan te minge etew. Ugaid ne igkahi ku keniyu te ini se mid-ulaula ran ne nekuwa ran en ke lalaw ran.

<sup>3</sup> Ugaid ne embiya ruen ibehay niyu te egkeayuayu, ne kenà niyu peketueni te misan sepatat niyu,

<sup>4</sup> su apey ini se ibehay niyu ne warà ruma ne egketau. Ne ke Amey niyu rà se nekekita dut te mid-ulaula niyu ne iyan edlalew keniyu."

*Ke Penurù ni Hisus Mekeatag te Kebpeneningeni  
(Lucas 11:2-4)*

<sup>5</sup> “Ne embiya ebpengeningeni ka,” ke si Hisus, “ne kenà ka ed-iring te engkungkun ne metidtu. Su embiya ebpengeningeni ran ne egkiyug dan ne ed-itindeg diyà te lusud te valey ne ebppedgian te minge Hudiyanen te penduan dan wey riyà te lirig te kelesada su apey egkekita te minge etew. Ugaid ne igkahi ku keniyu te ini se mid-ulaula ran ne nekuwa ran en ke lalew ran.

<sup>6</sup> Ugaid ne sikiyu, ke ebpengeningeni kew ne lusud kew riyà te sungkù niyu ne lelekeb kew ne pengeningeni kew riyà te Amey niyu ne Eleteala ne kenà egkekita. Ne ke Amey niyu ne iyan dà ebpekekita keniyu ne iyan edlalew keniyu.

<sup>7</sup> “Ne kayi te kebpengeningeni niyu,” ke si Hisus, “ne kenà niyu edlumlumbayi ke pengeningeni niyu iring dut te minge etew ne kenà ebperetiwaya te Eleteala. Su iyan dan kunaan ke ebpemingehen te Eleteala ke pengeningeni ran ke ebpekelayaten dan.

<sup>8</sup> Kenà kew ve ed-iring kandan! Su sikiyu, ne netuenan en te Amey niyu ke kurang niyu te warà kew pà mebuyù.

<sup>9</sup> “Embiya ebpengeningeni kew ne iringa niyu kayi,  
‘Ah, Amà diyà te langit,

berekat ne edati te menusiya ke ngaran nu.

<sup>10</sup> Ne berekat ne ebayàbayà ka rut te langun ne menusiya, su apey metuman ke kiyug nu kayi te ampew te dunya iring dut te diyà te langit.

<sup>11</sup> Behayi key te sesangan ne egkekaan dey te ini ne andew.

<sup>12</sup> Ne pesehara nu ke salà dey iring dut te nepesehad dey en ke nekedsalà kenami.

<sup>13</sup> Ne ipekeriyù key nikuna dut te minge mevaher ne penggeram, ne pekelangi key dut te datù te pekaid.’

<sup>14</sup> Su embiya ebpeseharen niyu ke minge etew ne nekedsalà keniyu,” ke si Hisus, “ne egkepesehad kew rema te Eleteala ne Amey niyu ne riyà te langit.

<sup>15</sup> Ugaid ne embiya kenà niyu egkepesehad ke minge etew ne nekedsalà keniyu, ne kenà dema ebpeseharen ke salà niyu dut te Amey niyu ne riyà te langit.”

*Ke Penurù ni Hisus Mekeatag te Kedlimpas te Kegkaan su apey kenà ki Mevangen se Ebpengeningeni*

<sup>16</sup> Ne migkahi pà maa si Hisus te, “Embiya edlimpas kew te egkaan su ebpengeningeni, ne kenà kew ebpekerumbahat te paras niyu iring dut te minge etew ne engkungkun ne metidtu. Su sikandan ke edlimpas dan te egkaan ne ebpeparas dan te merupaas su apey mekita te edlimpas dan te egkaan. Ne igkahi ku keniyu te kayi te ini se mid-ulaula ran ne nekuwa ran en ke lalew ran.

<sup>17</sup> Ugaid ne iyan meupiya ke edlimpas kew te egkaan ne pendapug kew ne penuwat kew,

<sup>18</sup> su apey kenà metueni te minge etew te edlimpas kew te egkaan. Ne iyan dà netau ke Amey niyu ne Eleteala ne kenà egkekita. Ne iyan sikandin edlalew kenikew dut te mid-ulaula nu te sebseveka nu.”

*Ke Penurù ni Hisus Mekeatag te Kedlimud ta te Kekewesai Tew Riyà te Langit (Lucas 12:33-34)*

<sup>19</sup> “Kenà kew edlimud te kekewesai niyu kayi te ampew te dunya,” ke si Hisus, “su kayi ne ruen egketketen, ne ruen edtengisen, ne ruen minge tekawen ne edlusud te minge valey niyu su ebpemenakew.

<sup>20</sup> Ugaid ne iyan meupiya,” ke si Hisus, “ne edtuman kew te kiyug te Eleteala ne egkevaluy ne ruen kekewesai niyu riyà te langit ne kenà egketketen, ne kenà edtengisen, ne warà tekawen ne edlusud su ebpemenakew.

<sup>21</sup> Su piya endeì niyu idtahù ke kekewesai niyu, ne ketà dema ke hinawa niyu.”

*Ke Sempità ni Hisus Mekeatag te Engkey se Ebpekerayag te Lawa ta (Lucas 11:34-36)*

<sup>22</sup> Ne migkahi pà maa si Hisus te, “Ke mata te etew ne iring te sulù dut te lawa rin su embiya merayah se kedtengteng din ne iyan din meana ne metidtu se ulaula rin, ne iring te egkerayahan ke langun ne lawa rin.

<sup>23</sup> Ugaid ne embiya edsehulepunen se kedtengteng din ne iyan din meana ne mereatey se ulaula rin, ne iring te egkerusireman ke langun ne lawa rin!”

*Ke Penurù ni Hisus te Kenà Egkepakey ne Deruwa ke Edtehiuripen keyta (Lucas 16:13; 12:22-31)*

<sup>24</sup> “Warà edsugsuhuen,” ke si Hisus, “ne deruwa se edtehiuripen kandin. Su embiya deruwa se ebpengunguripen kandin, ne egkeepesan din ke seveka ne ed-edatan din ke

seveka. Etawa ebperumaduma sikandin dut te seveka ne kenà din edsehipaan ke seveka. Su iring be kayi embiya iyan dekelà te hinawa nu ne kureta, ne kenà ka ebpeketuman te kiyug te Eleteala.

<sup>25</sup> “Tembù be iyan ku igkahi keniyu,” ke si Hisus, “kenà kew meuru te egkekaan wey ed-inumen ne igkeuyag niyu etawa ke engkey se ibevelegkas niyu. Su ke hinawa wey lawa niyu ne imbehey te Eleteala, ne maa kenà belielehà pà arà dut te egkekaan niyu wey belegkas niyu?”

<sup>26</sup> Keniyan niyu rè ma te menge uwak, warà kebpemula ran, ne warà ked-ehani ran, ne warà edtehan dan te egkekaan dan, ugaid ne ke Amey nu ne riyà te langit se ebpesavud kandan! Ne meambe, kenà belielehà kew pà dut te menge pepenuk?

<sup>27</sup> Ne engkey keniyu se nekesumpat te umur din te impepeyà te kegkeuru rin?

<sup>28</sup> “Embiya kenà ka ebpekegaga kayi, ne meambe ke egkeuru ka te ibevelegkas nu? Keniyan niyu rè ma te kevukaran ke engkey se kedtuvù dan. Kenà dan egelevek ne kenà dan ed-avel.

<sup>29</sup> Ne misan iring ketà ne igkahi ku keniyu te misan ke kewasa ne datù dengan ne si Salomon, ne ke keupiya te belegkas din ne warà dà mekesusuluwan dut te keupiya te seveka keniyan ne kevukaran.

<sup>30</sup> Embiya Eleteala se ebpeparas te kevukaran te sagbet iring ketà, misan mehaan dà se kedtuvù din su egkekita niyu guntaan ne keremà ne nehangu en ne egkevinsulan en, ne maa iyan kew pè be kenà behayi te ibevelegkas niyu? Sikiyu ne deisek se kedsarig niyu!

<sup>31</sup> “Ketà be ne kenà kew meuru se egkahi te, ‘Engkey se egkekaan wey egkeinum dey? Ne engkey se ibevelegkas dey?’

<sup>32</sup> (Su ini imbe ke layun intahù te hinawa rut te menge etew ne kenà ebperetiyya te Eleteala.) Ugaid ne sikiyu, ne kenà kew meuru su netuenan dut te Amey niyu ne Eleteala ke engkey se kurang niyu.

<sup>33</sup> Iyan niyu ipeuna te hinawa niyu ke kiyug te Eleteala wey ke Kedatù din keniyu, ne arà pè be ne ebhayan kew te Eleteala dut te langun ne kurang niyu.

<sup>34</sup> Tembù be kenà kew meuru ke engkey se egketemanan niyu dut te menge hewii ne egkeuma. Su uman hewii ne idsengebias ke kerehenan din, ugaid ne wey niyu en pegitunga ke egkeuma en.”

## 7

### *Ke Penurù ni Hisus Mekeatag te Kedsawey ta te Menge Ruma Ta (Lucas 6:37-38, 41-42)*

<sup>1</sup> Ne migkahi pà maa si Hisus te, “Kenà kew edsawey te ruma ne etew apey kenà kew edsewayan te Eleteala.

<sup>2</sup> Su edtimbangtimbangen kew te Eleteala iring te kedtimbangtimbang niyu te ruma ne etew. Ne iyan din meana ne taman ne kerekelà te kedtimbangtimbang niyu te ruma ne etew, ne arà en dema ke kerekelà ne kedtimbangtimbang te Eleteala keniyu.

<sup>3</sup> “Engketà be,” ke si Hisus, “ne meambe ke edturikan nu ke salà te ruma nu ne iring te pesek, ugaid ne warà ma te hinawa nu te ruen salà nu ne iring te gedgeran kerekelà din?”

<sup>4</sup> Engkey se kedtikà nu te egkahi riyà te ruma nu te id-awà nu ke pesek din, ugaid ne ruen ma nekepeseke kenikew ne iring te gedgeran kerekelà din ne kenà nu egketuusan?

<sup>5</sup> Engkey en ayan ne kedtarùtarù nu! Unai nu pà te ed-awà ke nekepeseke kenikew ne iring te gedgeran, ne an pà ne ebpekekita ke en ne ebpengawà te pesek te ruma nu.”

### *Ke Sempità ni Hisus Mekeatag te Menge Etew ne Warà Adat din te Eleteala wey ke Lalag din*

<sup>6</sup> “Kayi te kebpenurù niyu ne kenà niyu ibpehes te ebpepeming dut te menge etew ne warà adat din. Su ebpekeiring kew te idtimbang niyu riyà te asu ke kearen ne egkeedatan te Eleteala, ne eberiyung dan ne ebuntalen kew. Ne kenà niyu idtimbang ke pirlas niyu riyà te menge bavuy su egiekan dan dà ini.”

### *Mekeatag te Ebpemuyù diyà te Eleteala (Lucas 11:9-13)*

<sup>7</sup> Migkahi si Hisus te, “Embiya ebpengeningeni kew riyà te Eleteala ne buyù kew ne ebhayan kew rin. Pemengà kew ne ruen arà egketuen niyu. Penehetiat kew ne ebpuwasan kew rin.

<sup>8</sup> Su langun ne ebuyù diyà te Eleteala ne ebhayan, ne ke etew ne ebpemengà ne ebpeketuen, ne ke etew ne ebnehetiat ne ebpuwasan ke lekeb kandin.

<sup>9</sup> “Menu sikiyu ne munge lukes, embiya ebuyuan ka te anak nu te pan, maa batu se ibehey nu?”

<sup>10</sup> Etawa ebuyuan ka rin te serà, maa uled se ibehey nu?”

<sup>11</sup> Sikiyu ne menusiya ne kenà metidtu ne metau kew ne ebehey te meupiya riyà te anak niyu, na iyan pè be ke Amey niyu ne Eleteala ne riyà te langit kenà mebehey keykew te meupiya embiya ebuyù kew riyà te kandin.

<sup>12</sup> “Ne misan engkey ne egkiyuhan niyu ne ibped-ulaula te munge etew keniyu, ne iring ketà dema se ul-ulaa niyu riyà te kandan. Su ini se meana dut te penduan ne intelau ni Moises wey ke munge penurù dut te munge ebpelamabas te Lalag te Eleteala rengan.”

*Ke Melihet wey ke Meluag ne Gumawan  
(Lucas 13:24)*

<sup>13</sup> “Lusud kew riyà te melihet ne gumawan,” ke si Hisus, “ne ebpendiyà te umur ne kenà edtaman. Su meluag ke gumawan ne merayun ke dalan ne ebpendiyà te apuy nerakà, ne merakel ke edtuntul ketà.

<sup>14</sup> Ugaid ne melihet ke gumawan wey mepasang ne ibayà ke dalan ne ebpendiyà te umur ne kenà edtaman, ne merelag dà se ebpekietuen ketà.”

*Ke Sempità ni Hisus Mekeatag te munge Etew ne Kenà Benar ne Ebpelambas te Lalag te Eleteala*

*(Lucas 6:43-44)*

<sup>15</sup> “Uram kew dut te munge etew ne engkungkun ne ebpelambas te Lalag te Eleteala. Su ebpendiyà dan te keniyu ne iring te paras te bilibili ne meamuk, ugaid ne riyà te hinawa ran ne iring dan te mewalew ne asu ne ebpekekaid.

<sup>16</sup> Egkekilala niyu ke kenà benar ne ebpelambas te Lalag te Eleteala kayi te ulaula ran. Su iring te kayu, kenà ebahas ke sepinit te paras ne kenà ebahas ke degiyangas te igira.

<sup>17</sup> Iring din ded dema ke kayu ne meupiya se kegueyhuey rin ne iyan din dà bahas ne meupiya. Ugaid ne ke kayu ne ruen sakit din ne iyan din bahas ne meraat.

<sup>18</sup> Su ke kayu ne meupiya se kegueyhuey rin ne kenà ebahas te mereatey, ne ke kayu ne ruen sakit din ne kenà ebahas te meupiya.

<sup>19</sup> Ne langun ne munge kayu ne kenà ebahas te meupiya ne ebpiayen ne idrapug su ebinsulan.

<sup>20</sup> Tembù be igkahi ku keniyu te egkekilala niyu ke kenà benar ne ebpelambas te Lalag te Eleteala kayi te ed-ul-ulaan dan.”

*Mekeatag te Munge Etew ne Kenà Ebpekelusud dut te Munge Etew ne Edetuan te Eleteala*

*(Lucas 13:25-27)*

<sup>21</sup> Ne migkahi si Hisus te, “Kenà langun te munge etew ne edtawag kedi te ‘Is Kerenan, Kerenan’ ne ebpekelusud dut te munge etew ne Edetuan te Eleteala ke kenà sikandan dà arà se edtuman dut te kiyug te Amey ku ne Eleteala ne riyà te langit.

<sup>22</sup> Su embiya egkeuma arà se hewii te kegkukum te Eleteala ne merakel se ebpeyiruwiru kedi se egkahi te, ‘Is Kerenan, Kerenan, mibpesabut key te Lalag te Eleteala impepeyayà te gehem te ngaran nu, ne mibpenegseg dey ke vusew ne ed-amung-amung te munge etew, ne merakel pà se mekegeyip ne neveelan dey!’

<sup>23</sup> Ugaid ne iyan ku igkahi kandan te, ‘Sikiyu ne meraat se ulaula, kenà ku egketuanan sikiyu. Awà kew kayi!’ ”

*Ke Deruwa ne Etew ne Ebevaley  
(Lucas 6:47-49)*

<sup>24</sup> “Tembù be,” ke si Hisus, “langun dut te nekerineg te lalag ku ne mibperumaruma, ne ebpekeiring dan te bereitungan ne etew ne riyà mebevaley te meresen.

<sup>25</sup> Ne midadsang ke uran ne midalem ke wayig ne nesuhat te keramag ini se valey, ugaid ne warà ini mepiley su riyà mekeitindeg te meresen.

<sup>26</sup> “Ugaid ne langun ne munge etew,” ke si Hisus, “ne nekerineg te lalag ku ne kenà dan ebperumaruma, ne iring dan te etew ne warà itungan din ne mebevaley riyà te pantad.

<sup>27</sup> Ne midadsang ke uran ne midalem ke wayig ne nesuhat te keramag ini se valey, ne arà dà ne nerundus en su neawet dà dut te keramag.”

*Ruen Gehem te Kebpenurù ni Hisus*

<sup>28</sup> Nekeipus si Hisus se ebpenurù te munge etew ne neinuinu ran nevenar,

<sup>29</sup> su kenà iring dut te kebpenurù te minge etew ne ebpenurù te penduan te minge Hudiyanen su ruen gehem din ini se penurù din.

## 8

*Neulian ni Hisus ke Senge Etew ne Kevuwaen ne muna pa te It-it*  
(*Marcos 1:40-45; Lucas 5:12-16*)

<sup>1</sup> Guna su midtupang si Hisus ketà te buvungan ne mibpenuruan din te minge etew, ne medmerakel se miduma kandin.

<sup>2</sup> Ne ruen etew ne egkevuwaen ne muna pa te it-it ne mid-uevy ki Hisus. Ne midlumpeng en sikandin diyà te sineruwan ni Hisus se ebpemuyù te, "Mama, embiya perem egkiyug ke rà ne egkeulian nu ini se meredsik ne sakit ku."

<sup>3</sup> Ne midampen ni Hisus sikandin se egkahi te, "Uya, egkiyug a," ke sikandin. "Meulii ka!" Arà dà ne neawà en ke sakit dut te meama su neulian en.

<sup>4</sup> Ne migkahi si Hisus kandin te, "Kenà nu ve imbe kegkehiya ini te misan endei en, ugaid ne riyà ka tilandeng te terebpelengesa ne ibpekita nu kandin te neulian ke en. Ne ivehey nu te Eleteala ke ibpelengesa ne insuhù dengan ni Moises su apey metueni te langun te neulian ka."

*Neulian ni Hisus ke Edsugsuhuen dut te Senge Etew ne Kepitan*  
(*Lucas 7:1-10*)

<sup>5</sup> Guna su nekeuma si Hisus diyà te inged ne Kapirawum, ne ruen kepititan ne kenà Hudiyanen ne egkamal te minge sundaru ne mid-uevy kandin se ebpemuyù te tavang din.

<sup>6</sup> "Mama," ke sikandin, "duen edsugsuhuen ku ne ederaru riyà te valey ku su minatey ke divaluy ne lawa rin ne merasey nevenar se egeramen din."

<sup>7</sup> Ne migkahi si Hisus te, "Ebpendiyan a su apey ku meulii sikandin."

<sup>8</sup> "Mama," ke se kepititan, "misan kenà ke en edlaus diyà te valey ku, su kenà a dait ne ebmeneyikan nu. Su dekelà se gehem nu ne misan igkahi nu te, 'Meulii sikandin,' ne egkeulian ini se edsugsuhuen ku."

<sup>9</sup> Nesebutan ku ini su siaken ne ruen mepurù ku ne meperumaruma a kandin. Ne ruen minge sundaru ne egkemalan ku ne meperumaruma ran kediey. Su egkahi e rà te, 'Diyà kew,' ne iring dan te ebelesiken. Ne engketà ded ke egkahi a te, 'Kayi kew,' ne seperék mata ne kayi ran en. Ne embiya edsuhuen ku ini se edsugsuhuen ku te, 'Ul-ulaa nu ini,' ne arà en iya rema se ed-ul-ulaan din. Iring de be kayi," ke se kepititan, "misan eddelehan nu rà ne egkeulian ini se edsugsuhuen ku."

<sup>10</sup> Nerineg ni Hisus ini ne neinuinu nevenar sikandin ne migkehiyan din ke minge etew ne miduma kandin te, "Sevenarbenar ne igkahi ku keniyu te warà e pa mekeuma te etew ne iring kayi kerekela se sarig din kediey misan kayi te langun ne kevuwaran ni Israyil."

<sup>11</sup> Ini ve se idtarem ku keniyu ne merakel se minge etew ne egenat te edsilaan taman te edsenlepan ne ebpekeuma su ebpekepinuu te egkaan duma en ni Abraham wey ke anak din ne si Isaac wey ke apù din ne si Jacob diyà te minge etew ne Edetuan te Eleteala.

<sup>12</sup> Ugaid ne merakel ne minge kevuwaran ni Israyil ne mibpenehanaan perem te Eleteala dut te Edetuan din ne ibpendiyà te merusirem, ne ketà ne ebpekependerawit wey ebpekeingitel."

<sup>13</sup> Ne migkahi si Hisus dut te kepititan te, "Uli ke en. Su ke sarig nu kedì ne netuman en." Ne ketà dà dema ne ke edsugsuhuen din diyà te valey ne neulian en.

*Neulian ni Hisus ke Mibpenderaru ne Etew*  
(*Marcos 1:29-34; Lucas 4:38-41*)

<sup>14</sup> Ne mibpendiyà si Hisus te baley ni Pedro ne ketà ne nekita rin ke enuhang ni Pedro ne meritan ne ed-id-irehà su edetengen.

<sup>15</sup> Ne midampen ni Hisus ke velad din ne neawà en ke rateng din, ne mid-enew sikandin ne mid-ilitù en te ibpekaan kandan.

<sup>16</sup> Guna su midsanlep en ke andew ne ruen merakel ne minge etew ne midsuukan te vusew ne mibpeneheewit dan kayi te ki Hisus. Ne mibpenegseg ni Hisus ke minge vusew te impepeyayà dà te lalag din, ne nengeulian din langun ne ebpenderaru.

<sup>17</sup> Mid-ulaula rin ini su apey metuman ke impesurat ki Isayas ne ebpelambas te Lalag te Eleteala rengan se egkahi te, "Sikandin en iya ke nekeulì te daru tew, ne nekeawà te minge sakit tew."

*Ke Menge Etew ne Egkiyug Perem ne Eduma ki Hisus*

*(Lucas 9:57-62)*

<sup>18</sup> Guna su nekita ni Hisus ke medmerakel ne minge etew ne edlingut kandin ne migkehiyan din ke edumdumaan din te, “Kuwa kiyu en su ed-apet kiyu riyà te ripag te ranew.”

<sup>19</sup> Ketà ne ruen senge etew ne mibpenurù te penduan ni Moises ne mid-uvey kandin ne migkahi te, “Meyterù, eduma a kenikew misan ebpependei ka.”

<sup>20</sup> Ne migkahi si Hisus kandin te, “Ke minge laku ne ruen takub ne ed-ul-ulian dan, ke minge pepenuk ne ruen kandan ne salag, ugaid ne ke Impeanak te Menusiya ne misan endei en memekeirehà su warà ubpaan din.”

<sup>21</sup> Ne ruen dema senge etew ne edumdumaan ni Hisus ne migkahi te, “Mama, ed-uli e pà ne embiya egkepupusan en te ebpeneytayen ke amey ku ne arà pà ne eduma a kenikew, su siaken ded se edleveng kandin.”

<sup>22</sup> “Kenà,” ke si Hisus, “su дума ka kedì. Ne iyan nu pelevenga rut te minatey ke minge ruma nu ne kenà ebperetiyya kediey.”

*Impeengked ni Hisus ke Keramag Diyà te Ranew*

*(Marcos 4:35-41; Lucas 8:22-25)*

<sup>23</sup> Ketà maa ne mid-untud si Hisus te avang ne miduma ke minge edumdumaan din.

<sup>24</sup> Ne midtekwetekew se mevaher ne keramag ne nekesuhat ketà te ranew ne nelikuvungan en te baleg ini se avang dan. Ugaid ne nekelipereng si Hisus.

<sup>25</sup> Ne mid-uvey ran si Hisus ne mibpukew ran en se egkahi te, “Tevangi key, Kerenan, su egkekahem ini se avang ne egkeherà ki en!”

<sup>26</sup> Ne migkahi si Hisus te, “Meambe ke nengeandek-andek kew? Kurang kew te sarig kedì!” Ne mid-enuw en ne pineengked din en ke keramag wey minge baleg, ne midlengen en ke ranew.

<sup>27</sup> Ne neinuini ke minge edumdumaan din se egkahi te, “Engkey ini ne etew? Su misan ke keramag wey minge baleg ne ebperumaruma rut te lalag din!”

*Neulian ni Hisus ke Deruwa ne Etew ne Midsuukan te Menge Vusew*

*(Marcos 5:1-20; Lucas 8:26-39)*

<sup>28</sup> Nekerunggù en ensi Hisus diyà te ripag te ranew riyà te sakup te inged te Gadara, ne ketà ne ruen midsinuhung kandin ne deruwa ne etew ne riyà ebpuun te minge surung ne penlelevengan. Midsuukan te vusew ini se deruwa ne etew ne laus ne ebpekekaid ne igkeandek en sikandan te minge etew ne warà en edtikà ne ebpevayà ketà te ralan.

<sup>29</sup> Ne migkuleyi dan te, “Sikuna ke Anak te Eleteala, ne engkey ma se kememeniya nu kediey? Maa mibpengkayi ka su ebpemekeiran key nu misan kenà pà ini ke timpu?”

<sup>30</sup> Ruen ketà te uvey ran medmerakel ne bavuy ne ebmemenumal.

<sup>31</sup> Ne mibpemuyù ke minge vusew ki Hisus te, “Embiya edsegsehen key nikuna ne ketà key nu ipeawuk te minge bavuy.”

<sup>32</sup> Migkahi si Hisus kandan te, “Kuwa kew en!” Ketà dà ne mid-ewaan dan en ke meama ne mibpengasuk dan en dut te minge bavuy, ne mibpemelelahuy en ke minge bavuy se ed-umpak diyà te dempilas ne nengelened dan en diyà te ranew.

<sup>33</sup> Nekita ini rut te minge etew ne edtuganur ketà te minge bavuy ne mibpemelelahuy ran en diyà te inged su impemenuktul dan ini wey ke ned-ulaula rut te minge etew ne midsuukan te vusew.

<sup>34</sup> Guna su netuenan dut te minge etew ketà te inged ne midsamasama ran mibayà ki Hisus. Guna su nekeuma ran ne mibpemuyù dan kandin te menu ke med-awà sikandin ketà te inged dan.

## 9

*Neulian ni Hisus ke Meama ne Minatey ke Lawa Rin*

*(Marcos 2:1-12; Lucas 5:17-26)*

<sup>1</sup> Ne mid-untud en maa si Hisus te avang ne mid-apet dut te ranew ne mid-uli diyà te inged din.

<sup>2</sup> Ne ruen minge etew ne nekeuma ne ed-ewit te etew ne mid-irehà diyà te duyanà ne minatey se tevi ne lawa rin. Guna su netuenan ni Hisus te rekela ke sarig dan kandin ne migkehiyan din en ke minatey se tevi ne lawa rin te, “Kenà ka egkeuru, Mama. Nepesehad en ke keberedusaan nu.”

<sup>3</sup> Ketà ne ruen dema ebpinpinuu ne minge etew ne ebpenurù te penduan ne guna su nerineg dan ini ne iyan netahù te hinawa ran te, “Ini ne etew ne edsumpalit te Eleteala!”



<sup>4</sup> Ugaid ne netueanan en ni Hisus ke netahù te itungan dan, ne migkahi en sikandin diyà te kandan te, "Meambe ke netahù te itungan niyu se iring keniyen ne meraat?"

<sup>5</sup> Endei rapit se melemu," ke si Hisus, "te egkahi riya te minatey se lawa rin te, 'Ke menge salà nu ne nepesahad en' etawa ve ke egkahi te, 'Enew ka ne luluna nu ke ikam nu na ipanew ke en'?" ke sikandin.

<sup>6</sup> "Ugaid ne guntaani ne ibpekita ku keniyu te ruen gehem dut te Impeanak te Menusiyà te ebpesahad te salà kayi te ampew te dunya." Ketà ne migkehiyan din ke etew ne minatey ke lawa rin te, "Mama, enew ke en ne luluna nu ke ikam nu ne uli ke en!"

<sup>7</sup> Ne mid-enew en ke etew, ne midlulun din ke ikam din ne mid-uli en.

<sup>8</sup> Guna su nekita rut te langun ne menge etew ketà ne nengeandek dan, ne nereyù dan ke Eleteala su imbehey rin te menusiya ini se gehem ne iring kayi.

*Mibpemili ni Hisus si Mateo te Eduma Kandin  
(Marcos 2:13-17; Lucas 5:27-32)*

<sup>9</sup> Ne mid-awà en si Hisus ketà, ne gewii rin te ed-ipanew ne nekita rin ke senge etew ne meama ne ebpeyaday te buwis ne ed-ingaranan ki Mateo ne ebpinnu riya te upisina din. Ne migkehiyan ni Hisus sikandin te, "Duma ka kediey." Arà dà ne mid-itindeg si Mateo ne miduma en kandin.

<sup>10</sup> Ne senge hewii ne pinekaan si Hisus wey ke menge edumdumaan din diyà te valey ni Mateo, ne merakel ne ebpeyaday te buwis wey ke menge kenè en birang ne menge etew ne nekeuma ne elin dan ki Hisus se migkaan ketà.

<sup>11</sup> Guna su nekita rut te menge Peresiya ne dutun te uvey te valey ne nevurunan te ini se menge etew su egkaan, ne netegtehad ne mibpendiyà dan te menge edumdumaan ni Hisus ne mid-insà te, "Meambe ke edseveka sikandin se egkaan ketà te menge etew ne ebpeyaday te buwis wey ke menge kenè en birang ne menge etew?"

<sup>12</sup> Neringe dà ni Hisus arà ne migkehiyan din en sikandan te sempità te, "Ke menge etew ne warà daru rin ne kenà dan ebpendiyà te terevawì, ugaid ne ke menge etew rà ne duen daru rin.

<sup>13</sup> Ne iring din ded be rema kayi ini se menge etew su kenà iyan ku kinepengkayi se iyan ku ebpeuveyen ke menge metidtu kun se ulaula rin, ugaid ke menge etew ne kenà en birang apey ran mekedsendit," ke si Hisus. "Ne ketà ne pegpegitunga niyu ke engkey se meana rut te impesurat ne Lalag te Eleteala ne egkahi te, 'Kenà ku iyan egkiyuhan ke menge binatang ne ibehey niyu kedì ne ibpelengesa, ugaid ke kegkeyru niyu rut te menge ruma niyu.' "

*Ruen Menge Etew ne Mid-insà ki Hisus ke Meambe ke Kenà Edlimpas te Egkaan ke Menge Edumdumaan Din  
(Marcos 2:18-22; Lucas 5:33-39)*

<sup>14</sup> Ne ruen menge edumdumaan ni Juan ke Ebpembunyag ne nekeuma kayi te ki Hisus ne mid-insà te, "Sikami wey ke menge Peresiya ne layun edlimpas te egkaan, ugaid ne ke menge edumdumaan nu ne kenà edlimpas te egkaan. Ne meambe ini?"

*Impeiring ni Hisus ke Hinawa Rin te Ibpengesawa*

<sup>15</sup> Ne midtavak si Hisus te, "Embiya ruen egkewingen, maa edlimpas ves maa te kegkaan ke menge etew ne pinetelavuk te ini pà ke ibpengesawa te kandan? Kenà en iya! Ugaid ne ruen hewii ne egkeuma ne egkeawà ke ibpengesawa diyà te kandan, ne ketà dan pà edlimpas te egkaan."

*Insempità ni Hisus te Kenà Egkepakey ne Ebpegembiten ke Behu ne Penurù din wey ke Raan ne Penurù dut te Keep-epuan Dan*

<sup>16</sup> Ne migkahi maa si Hisus te, "Kenà edait ne idapi nu ke behu ne saput ketà te neredit en ne velegkas, su embiya ebpedepiyen nu ne ketà te kebpiii nu ne egkenseng ke vehu ne saput ne egkevindas ke redit en ne velegkas ne tuwas pà te keluag te bisey rin.

<sup>17</sup> Ne iring din ded dema," ke si Hisus, "ke behu ne tebà su kenà egkepakey ne riya nu idtahù te raan en ne edteuhan ne mibeelan ne lundis. Su embiya arà se ed-ul-ulaan nu ne edsevu ke tebà ne ebetu ke lundis ne midtehuan, ne edturayas ke tebà ne egkereetan, ne egkereetan dema ke midtehuan ne lundis. Tembù be iyan nu iya tehui te behu pà ne tebà ini se edteuhan ne behu pà ne mibeelan apey kenà egkereetan arà se tebà wey ke midtehuan."

*Neulian ni Hisus ke anak ni Jairo wey ke Meritan ne Mid-amì dà te Belegkas Din  
(Marcos 5:21-43; Lucas 8:40-56)*

<sup>18</sup> Gewii te edlalag pà si Hisus kayi ne nekeuma se senge etew ne egkeunutan te minge Hudiyane ne midlumpeng en diyà te etuvangan ni Hisus se egkahi te, "Behu pà ne minatey ke anak ku ne meritan, ugaid ne pengkayi ke en apey nu dempena sikandin ne egkeuyag ded."

<sup>19</sup> Ne mid-ititdeg si Hisus ne midumaan kandin te ed-uli abpeg ke minge edumdu-maan din.

<sup>20</sup> Ne ruen meritan ketà dema ne nerasey nevenar su nekedsepulù en wey deruwa ne rahun se kebpemundasa rin te lengesa ne kenà egkeengked. Mibpenelektelek en sikandin diyà te uriyan ni Hisus ne mid-amì din dà ke belegkas ni Hisus.

<sup>21</sup> Su kehingginawa rin te, "Embiya egkeami ku rà misan ke belegkas din ne egkeulian en ini se sakit ku."

<sup>22</sup> Midlingi si Hisus ne nekita rin ini se meritan ne migkahi te, "Bayi, kenà ka egkeuru! Neulian ke en su sabap dut te kinesarig nu kediey." Arà dà ne neulian en ke meritan.

<sup>23</sup> Ketà ne mibpendiyan en si Hisus te baley te egkeunutan te minge Hudiyane. Guna su nekita rin ke minge ebpemumulendag te ediyaga te minatey, ne nerineg din en se ebpemenderawit,

<sup>24</sup> ne migkehiyan din sikandan te, "Awà kew langun! Warà minatey ayan se watà su nekelipereng dà sikandin!" Nerineg dan dà ini ne mid-engitan dan en sikandin.

<sup>25</sup> Guna su mibpengawà en ke minge etew ne midlusud en si Hisus diyà te mibpereyasan dut te watà ne migeweran din ke velad te watà ne mid-enuw en se ed-ipanew.

<sup>26</sup> Ne nekeeneb en ke tudtul mekeatag dut te ini ne ned-ulaula diyà te langun ne nekeerivey ne inged ketà.

*Neulian ni Hisus ke Deruwa ne Etew ne Nepisek*

<sup>27</sup> Ne mid-awà si Hisus ketà ne gewii rin te ed-ipanew ne ruen deruwa ne etew ne pisek ne edtundug kandin. Midtawag dan kandin se ebpemuyù te, "Ey, sikuna ne kevuwaran ni David, ikeyru key nikuna!"

<sup>28</sup> Guna su nekepemenayik en si Hisus diyà te valey ne mid-uvay ke deruwa ne etew ne nepisek. Ne mid-insaan din sikandan te, "Menu, ebperetiyyaya kew ve te egkeulian ku sikiyu?"

"Uya, Mama, ebperetiyyaya key," ke se minge pisek.

<sup>29</sup> Ne midampen ni Hisus ke mata ran ne migkahi te, "Sabap te kebperetiyyaya niyu ne meulii kew en!"

<sup>30</sup> Arà dà ne nekekita ran en. Ne mid-il-ilutan ni Hisus te egkahi kandan te, "Kenà niyu penudtula ini te misan etei!"

<sup>31</sup> Ugaid ne mid-awà dan ketà ne nasi dan en in-eneb ke tudtul mekeatag ki Hisus diyà te langun ne nekeerivey ne inged ketà.

*Neulian ni Hisus ke Senge Etew ne Emew*

<sup>32</sup> Gewii te ed-awà en ke minge etew ne ruen maa minge etew ne nekeuma kayi te ki Hisus ne ed-ewit te senge etew ne neemew su midsuukan te vusew.

<sup>33</sup> Ugaid ne guna su midsegseg en ni Hisus ke vusew ne mibpemekaid, ne nekelalag en ini se meama. Ne negeyip nevenar ke langun ne minge etew ketà ne mibpein-insey ran te, "Taman te taman en ne warà tew pà mekita se iring kayi kayi te bansa tew te Israyil."

<sup>34</sup> Ugaid ne migkahi ke minge Peresiyu ketà te, "Ke unuten te minge vusew se mibehey kandin te gehem te kebpenegeg te minge vusew."

*Neyruwan ni Hisus Ke Menge Etew*

<sup>35</sup> Ne mid-eneb ni Hisus te ebayà ke langun ne reisek dekelà ne minge inged. Mibpenurù diyà te minge valey ne ebppedgian te minge Hudiyane te penduan dan, ne impesabut din kandan ini se Meupiya ne Tudtul te Kedetui te Eleteala te minge etew, wey nengeulian ke minge etew ne ebpendararu te misan engkey en ne ebppergeramen.

<sup>36</sup> Ne uman din mekita ke medmerakel ne etew ketà ne egkeyruwan din sikandan su merungkug dan wey mekeyruwiru su iyan dan neiringan ne minge bilibili ne warà tumetuganur.

<sup>37</sup> Ne migkahi si Hisus diyà te minge edumdumaan din te, "Medmerakel se minge etew ne warà pà meketelimà dut te Meupiya ne Tudtul mekeatag te Eleteala. Iring dan te nelutuan ne parey. Meluag nevenar ini se pareyanan, ugaid ne warà utew ruma ne ebpegehani.

<sup>38</sup> Pemuyù kew riyà te kemuney te pareyanan te medsuhù pà sikandin te ruma ne ed-ehani diyà te pareyanan din."

## 10

*Mibpemili ni Hisus ke Sepulù wey Deruwa ne Edumdumaan Din*  
(*Marcos 3:13-19; Lucas 6:12-16*)

<sup>1</sup> Ne miburun ni Hisus ke sepulù wey deruwa ne edumdumaan din ne mibehayan din te gehem te kebpekesege seg te vusew ne ed-amung-amung te munge etew, wey gehem ne ebpekeuli te misan engkey ne daru wey sakit.

<sup>2</sup> Ini ke munge ngaran dut te sepulù wey deruwa ne edumdumaan din ne mid-ingaranan ni Hisus te epustulis: ke egkeuna ne si Simon (ke ed-ingaranan dema ki Pedro) wey ke ari rin ne si Andres; si Santiago wey ke ari rin si Juan ke munge anak ni Sibidiyu;

<sup>3</sup> Si Felipe wey si Bartolome; si Tomas wey si Mateo ke ebpevayad te buwis; si Santiago ke anak ni Alpiyu, wey si Tediya;

<sup>4</sup> si Simon ke Patriat ne iyan din meana ne diralem se lengesa rin dut te inged din, wey si Hudas Iskeriyuti ke ed-ulug ki Hisus te ked-imetayi.

*Impeipanew ni Hisus ke Sepulù wey Deruwa ne Edumdumaan Din*  
(*Marcos 6:7-13; Lucas 9:1-6*)

<sup>5</sup> Ini se sepulù wey deruwa ne impeipanew ni Hisus ne midteleanan din te, “Kenà kew ebpendiyà te munge inged te munge etew ne kenà Hudiyanan wey munge inged te Semeriya.

<sup>6</sup> Ugaid ne diyà kew te munge ruma tew ne munge kevuwaran ni Israyil ne iring te munge bilibili ne nelaag.

<sup>7</sup> Diyà kew pesabut kandan te mehaan en ebpekeuma ke Kedetui te Eleteala te munge etew.

<sup>8</sup> Bewii niyu ke munge ederaru, benawa niyu ke munge minatey, bewii niyu ke munge kevuwaen, wey penegseha niyu ke munge vusew ne ed-amung-amung te munge etew. Ini se netelimà niyu ne riyà ebpuun te Eleteala ne warà niyu mevayari, ne kenà niyu rema buyui ke egketevangan niyu.

<sup>9</sup> Kenà kew ewit te bulawan, pirak etawa pelatà kayi te kemuyut nu.

<sup>10</sup> Kenà kew ewit te kempiru te ked-ipanew niyu, etawa idsambi ne belegkas wey telumpà, wey misan tuked. Su ke egelevék ne dait ne ebhayan te igkeuyag din.

<sup>11</sup> “Piya endei ne inged ne egkeumaan niyu, misan dekelà ne inged etawa deisek dà, ne pemengà kew te etew ne ebpepemenayik keniyu, ne ketà kew rà rateng taman te ked-awà niyu ketà te inged.

<sup>12</sup> Embiya ebpepemenayik kew te valey ne penubtuvari niyu ke ed-ubpà ketà te valey te, ‘Ebpeneuven kew te Eleteala!’

<sup>13</sup> Ne embiya edtelimaen kew rut te etew ketà te valey, ne ke kinopenuvadtuvad niyu ne egketuman ketà te kandan. Ugaid ne embiya kenà dan edtelimà keniyu, ne ke kinopenuvadtuvad niyu ne keniyu red.

<sup>14</sup> Ne embiya ruen inged ne warà ketà ne edtelimà keniyu etawa kenà dan ebpepemenayik dut te ibpesabut niyu, ne ewai niyu sikandan wey pendegdeha niyu ke lipupuk diyà te munge paa niyu.

<sup>15</sup> Sevenarbenar ini se idtarem ku keniyu,” ke si Hisus, “muna pà ke kedusai te Eleteala kandan ketà te hewii ne kedtimbang din te menusiya dut te kinerusa rin te munge mehinged ketà te Sudum wey Gemura.”

*Migkahi ni Hisus ke Keresayan wey Kebpekeseakit ne Ebpekeuma kayi te Menge Etew*  
(*Marcos 13:9-13; Lucas 21:12-17*)

<sup>16</sup> “Peming kew,” ke si Hisus, “su edsuhuen ku sikiyu riyà te munge etew ne ebpekekaid, ne iring kew te munge bilibili ne ebpekeseuruk diyà te senge ingeren en ne mewalew ne asu. Tembù be ingat kew ne pekeibpes kew iring te uled, ugaid ne kayi te ulaula niyu ne iring kew te melepati ne meamuk.

<sup>17</sup> Uram kew su ebpenigkemen kew te munge etew ne ibpepemenayik kew diyà te kukuman. Ne ebpenruuhen kew riyà te valey ne ebpengedian te penduan te munge Hudiyanan.

<sup>18</sup> Ne edtuyuken kew riyà te munge egkeunutan wey munge mepurù su atag dut te kedsarig niyu kediey, ugaid ne ini en imbe ke ralan te kebpesabut niyu kandan wey ke munge kenà Hudiyanan dut te Meupiya ne Tudtul mekeatag kediey.

<sup>19</sup> Ketà te ibpepemenayik kew riyà te kukuman, ne kenà kew meuru ke ebmen-menuwen niyu se kedlalag niyu te kedtindeg te hinawa niyu wey engkey se ralan te kegkahi niyu, su ketà ne iyan niyu egkekahi ne lalag ne ibpekahi keniyu.

<sup>20</sup> Su iyan niyu egkekahi ne kenà keniyu ne lalag, ugaid ne lalag ne riyà ebpuun te Kedesenan ne Ebpepentul te Menusiya ne midsuhù te Amey tew ne Eleteala.

<sup>21</sup> “Su ketà ne hewii ne ruen menge etew ne misan ke temperà dan te pused ne ed-uluhen dan su ebpeimetayan, ne iring din ded dema ke ed-ul-ulaan te amey dut te menge anak din. Ne ruen menge anak ne ebpekid-atu te menge lukes dan su ebpeimatayan dan.

<sup>22</sup> Ne egkunteraan kew te langun su atag te keduma niyu kediey, ugaid ne ke etew ne kenà edsuway te keduma rin kediey taman te kayi pà sikandin te ampew te dunya ne ebpekehaked te umur ne kenà edtaman.

<sup>23</sup> Embiyà ebpekesekitan kew nikandan diyà te senge inged su sabap te kebpesabut niyu ne pelahuy kew riyà te ruma pà ne inged. Su sevenarbenar ne igkahi ku keniyu te kenà niyu pà egkepasad ke helevek niyu riyà te langun ne menge inged te Israyil ne edlived en ke Impeanak te Menusiyà.

<sup>24</sup> “Su warà etew,” ke si Hisus, “ne ebpepenurù pà ne iyan en mepurù dut te ebpenurù kandin, ne warà uripen ne iyan en mepurù dut te mibpengunguripen kandin.

<sup>25</sup> Tembù be ebmeahalew ke etew ne ebpepenurù pà ke egketamat din en ke ibpenurù kandin su apey ebpekeiring en sikandin dut te ebpenurù kandin. Ne iring din ded dema ke uripen ke ebpekeiring en dut te mibpengunguripen kandin. Ne embiya ke pengulu dut te telteleanak ne ed-ingaranan ki Bilsibul ke egkeunutan te busew ne iyan pè be kenà tuwas pà ne meraat ke id-ingaran dut te menge anak din.”

*Ke Engkey se Dait ne Igkeendeki  
(Lucas 12:2-7)*

<sup>26</sup> “Iyan se kenà kew meandek,” ke si Hisus, “dut te menge etew. Su langun te netelewan guntaani, ne ebpekepehawahawa red keuremà.

Ne langun ne impegelesà, ne egkepayahan ded.

<sup>27</sup> Ini se ingkahi ku keniyu te merusirem, ne ipenudtul niyu en diyà te kerayahan.

Ne ini se lalag ku ne sikiyu rà se nekerineg, ne ibpesabut niyu riyà te langun ne menge etew.

<sup>28</sup> Ne kenà kew meandek dut te menge etew ne iyan dà egkepatey se lawa niyu, ugaid ne kenà dan ebpekepatey te himukud niyu. Ugaid ne iyan niyu ikeandek ne Eleteala, su kenà lawa niyu rà se egkepatey rin su ruen gehem din te kebpekeantug te himukud niyu riyà te apuy nerakà.

<sup>29</sup> Su ruen deisek ne pepenuk ne egkepemasa te lelima ne timan ne deruwa rà ne tumbaha. Ne misan iring ketà se kevavà te elehà din, ne warà seveka kandan ne egkeulug diyà te tanà embiyà kenà egkiyug ke Amey niyu ne Eleteala.

<sup>30</sup> Ne iyan kew pè be melipati te Eleteala su misan ke edtiweruwan te bulvul niyu ne nevirang din en.

<sup>31</sup> Engketà be ne kenà kew meandek su iyan kew pà belielehà diyà te kandin dut te merakel ne pepenuk.”

*Ke Imbaag ni Hisus Mekeatag Dut te Menge Etew ne Ebparew Kandin  
(Lucas 12:8-9)*

<sup>32</sup> “Piya engkey ne etew,” ke si Hisus, “se ebpayag diyà te menge etew se ebpesakup kediey, ne iyan ku rema ibpayag diyà te suluhuen te Amey ku ne Eleteala diyà te langit ne ed-engkunen ku sikandin te kediey ne sakup.

<sup>33</sup> Ugaid,” ke si Hisus, “piya engkey ne etew se ebparew riyà te menge etew te sakup ku sikandin, ne kenà ku rema ed-engkunen te sakup ku sikandin diyà te menge suluhuen te Amey ku ne Eleteala diyà te langit.”

*Ke Kebperetiyyaya ki Hisus ke Puunan te Kebpemekedsinggey te Hinawa Dut te Telteleanak*

*(Lucas 12:51-53; 14:26-27)*

<sup>34</sup> “Maa, iyan niyu kunaan,” ke si Hisus, “ke ini se kinepengkayi ku ne ed-ewit a te kebmelinew kayi te kelibutan? Kenà iring ketà! Su idtarem ku keniyu te kenà kebmelinew, ugaid ne kayi ebpuun te kinepengkayi ku ne ebpekunkuntereey ke itungan dut te menge etew.

<sup>35</sup> Su sabap te mibpengkayi a ne egkunterà ke menge anak ne meama dut te amey ran, ne egkunterà ke menge anak ne meritan dut te iney ran, ne egkunterà ke enuhang ne meritan dut te ambey ran,

<sup>36</sup> ne iyan memasang ne egkekunterà te menge etew ke megeget ne sikandan ded ne ebpenusuled.

<sup>37</sup> “Embiyà ruen etew ne iyan pà dekelà se limù din dut te amey rin wey iney rin kenà siaken, ne kenà edait sikandin ne edumdumaan ku. Iring din ded dema ke etew ne iyan pà dekelà se limù din dut te anak din kenà siaken, ne kenà edait sikandin ne edumdumaan ku.

<sup>38</sup> Ke etew ne egkiyug ne eduma kediey ne iyan iya se lipati rin ke kandin ne kiyug ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin. Su embiya kenà, ne kenà edait sikandin ne edumdumaan ku.

<sup>39</sup> Su ke etew ne egkenuhun te umur din, ne ebpatey lavew. Ugaid ke etew ne iyan din ibpatey se keduma rin kediey te kebepemesabut dut te Meupiya ne Tudu, ne ruen umur ne ibehey kandin ne warà edtemaninan din.”

*Mekeatag te Kebehey te Eleteala te Lalew  
(Marcos 9:41)*

<sup>40</sup> “Piya entei ne etew,” ke si Hisus, “ne edtelimà keniyyu, ne midtelimà dema kediey. Ne misan entei ne etew ne edtelimà kediey, ne kenà siak dà se midtelimà din su ke Amey ku rema ne Eleteala ne midsuhù kediey ne midtelimà din ded.

<sup>41</sup> Ne piya entei ne etew ne edtelimà te etew ne ebpelambas te Lalag te Eleteala su midtendù te Eleteala ini se etew ne ebpelambas te lalag din, ne egkevehayan te Eleteala arà se etew te lalaw iring dut te lalaw te midtendù din ne ebpelambas te lalag din. Ne iring din ded dema ke etew ne edtelimà te metidtu ne etew su sabap te ketidtu rin, ne egkevehayan te Eleteala te lalaw iring te lalaw dut te metidtu ne etew.

<sup>42</sup> Ne benar ini se egkehiyen ku keniyyu, misan meadsil dà ne wayig se ibpeinum dut te senge etew ne edumdumaan ku su atag dut te keduma rin kediey, ne ruen lalaw rin. Misana ke kevevaan en dut te edumdumaan ku ini se pineinum din.”

## 11

*Ke Menge Midsuhù ni Juan Diyà te ki Hisus  
(Lucas 7:18-35)*

<sup>1</sup> Nekepasad si Hisus te kepenuhù din dut te sepulù wey deruwa ne edumdumaan din, ne mid-awà sikandin ketà ne mibpendiyà te menge sepiring ded ne inged su ebpenurù wey ebpesabut te Lalag te Eleteala.

<sup>2</sup> Ugaid ne riyana en te bilengguan si Juan ke Ebpembunyag. Ne guna su nerineg din ke mekegeyip ne mid-ulaula ni Hisu Kristu, ne ruen menge edumdumaan din ne midsuhù din diyà te ki Hisus te ebpeinsaen.

<sup>3</sup> Nekeuma ran ne migkahi ran te, “Menu, sikuna ke impesabut ni Juan ne ibpepengkayi te Eleteala etawa ruen duma pà ne egkepenareng dey?”

<sup>4</sup> Ne midtavak si Hisus te, “Uli kew en diyà te ki Juan ne penudtula niyu kandin ini se nekita niyu ne mid-ulaula ku wey ini se nerineg niyu ne migkahi ku.

<sup>5</sup> Iyan niyu peketueni kandin ne kayi ebpuun te kediey ne nekulit en se kebpekekita rut te menge pisek, nekepanew en ke menge pungkù, neulian en ke menge kevuwaen, nekerineg en ke menge bengel, neuyag en ke menge minatey wey impesabut ku ke Meupiya ne Tudu diyà te menge ayuayu,” ke si Hisus.

<sup>6</sup> “Ne peketueni niyu kandin te dayirayi nevenar ke etew ne kenà eduwaruwa kediey.”

<sup>7</sup> Guna su nekehenat en ke menge edumdumaan ni Juan, ne midlalag en si Hisus mekeatag ki Juan diyà te denda ne menge etew ne nevurun, ke sikandin te, “Ketà te kinependiyà niyu te ki Juan diyà te tanà ne kenà egkeubpaan te menge etew, ne engkey se mibpenareng niyu? Maa, ebpenareng kew te ebpekekita kew te etew ne iring te karan ne edsemberen te keramag?”

<sup>8</sup> Engkey ve iya, etew ne mibevelegkas te nepenù te rayandayan? Kenà buwa, su ke etew ne mibevelegkas te iring ketà ne riyà niyu rà egkekita te turuhan te menge ratu.

<sup>9</sup> Na, engkey ve iya se mid-intengan niyu? Engkey, etew ne ebpelambas te Lalag te Eleteala? Arà imbe! Ugaid ne igkahi ku keniyyu te arà se nekita niyu ne labi pà dut te etew ne ebpelambas te Lalag te Eleteala.

<sup>10</sup> Su si Juan ini ke nekahi te Eleteala rut te impesurat ne Lalag din rengan se egkahi te,

‘Duen edsuhuen ku ne ibpeuna ku keykew  
te kebpekepenehana rut te menge etew te kebpekeuma nu.’

<sup>11</sup> Sebenarvenar ini,” ke si Hisus, “warà pà etew ne in-anak kayi te ampew te dunya ne ebpekerepeng ki Juan ke Ebpembunyag. Ugaid ne misan ke kevevaan en ne etew dut te langun ne Edetuan te Eleteala diyà te langit keuremà ne muna pà sikandin ki Juan.

<sup>12</sup> Igenat dut te kebpsabut ni Juan taman guntaani ne mibpekepesangan ini se menge Edetuan te Eleteala riyà te langit, ne ruen menge etew ne edtehel ed-ahew te Kedatù.

<sup>13</sup> Su ini se Edetuan te Eleteala ne impesabut dengan dut te langun ne ebpelambas te Lalag te Eleteala wey riyà te penduan ni Moises taman te hewii ne migemew en si Juan.

<sup>14</sup> Ne impesabut dan dema te edlived ded si Elias, senge etew ne ebpelambas te Lalag te Eleteala rengan. Ne embiya egkiyug kew ne ebperetiyaya dut te impesabut dan, ne si Juan ne si Elias ded.

<sup>15</sup> Tembù be," ke si Hisus, "itaan niyu ke telinga niyu kayi te migkahi ku ini!"

<sup>16</sup> "Ugaid ne ini se menge etew te huntaani en," ke si Hisus, "engkey se ebpeiringan ku? Iring dan en iya te menge vatà ne ebpemimpinuu riyà te kevrurunan. Ed-umew ini se senge puntuk diyà te menge ruma ran te,

<sup>17</sup> 'Midlebpad key, ugaid ne warà kew medsayew!

Mibminudar key, ugaid ne warà kew medsinehew!'

<sup>18</sup> Iring din ded dema ke kebpsakeuma ni Juan, su nekita niyu te edlimpas te kegkaan si Juan ne kenà dema ed-inum te piya engkey ne ebpeketeveveg ne iyan niyu migkahi se, 'Midsuukan sikandin te vusew!'

<sup>19</sup> Ne mibpengkayi ke Impeanak te Menusiyà ne nekita niyu te migkaan sikandin wey med-inum ne iyan niyu maa migkahi se, 'Tengtengi niyu ma ayan se midelungan te bitil! Ne metehel ne ed-inum! Ne teleduma kayi te ebpeyavad te buwis wey misan ke menge etew ne kenà en birang.' Ugaid, ke si Hisus, ketà te menge ulaula te menge etew ne tidu ne mibperetiyaya te Eleteala ne nekeheram te limù din, ne egkekita te utew metau ke Eleteala te langun ne petiralan din."

*Mekeatag te menge Etew ne Warà Med-engked te meraat ne Ulaula Ran  
(Lucas 10:13-15)*

<sup>20</sup> Ne midsewayen ni Hisus ke menge etew ketà te inged ne merakel se impekita rin ne menge mekegeyip, su warà dan engkeri ke menge meraat ne ulaula ran.

<sup>21</sup> "Sikiyu ne menge etew riyà te inged ne Kurasin," ke si Hisus, "mekeandek-andek se egketemanan niyu! Ne sikiyu riyà te inged ne Bitsaida, mekeandek-andek dema se egketemanan niyu! Su embiya ke menge etew rà diyà te menge inged ne Tiru wey Sidun se nekekita kayi te menge mekegeyip ne mid-ulaula ku riyà te keniyu, ne neuhet dà ne mid-ewaan dan en ke meraat ne ulaula ran ne mibevelegkas dan en te sakù ne mid-ewuwan dan ke ulu ran su tuus te nekedsendit dan.

<sup>22</sup> Tentenuri niyu ini su ketà te hewii ne kedtimbang te Eleteala te menusiya ne iyan pa dekelà se kedusa te Eleteala keniyu rut te menge mehinged te Tiru wey Sidun.

<sup>23</sup> Ne sikiyu rema ne menge etew riyà te inged ne Kapirnewum," ke si Hisus, "egkesuat kew perem ne ebpekesugkur diyà te langit, ugaid ne ibpeantug kew riyà te apuy nerakà. Su ini se mekegeyip ne mid-ulaula ku ne impekita ku keniyu ne embiya ingkepekita ku rà ini riyà te inged ne Sudum, ne warà dan dereeti te Eleteala ne kemulu ran pa guntaani.

<sup>24</sup> Tembù be tentenuri niyu ini su ketà te hewii ne kedtimbang te Eleteala te menusiya, ne muna pa se kedusai rin keniyu rut te mehinged diyà te Sudum!"

*"Pengkayi kew te kediey," ke si Hisus, "ne Imeley kew"  
(Lucas 10:21-22)*

<sup>25</sup> Ne ketà ne mibpengeningeni si Hisus se egkahi te, "Ew Amà, sikuna ke Kerenan diyà te langit wey kayi rema te ampew te dunya. Dekelà se kebpsesalamat ku kenikew su impayag nu ke ketau nu rut te menge etew ne warà egketùtuanan din, ne in-eles nu ini se ketau nu rut te menge etew ne dekelà se netueanan din.

<sup>26</sup> Uya, dekelà se kebpsesalamat ku kenikew, Amà, su ini se mid-ulaula nu ne ini ke kiyug nu."

<sup>27</sup> Ne migkahi si Hisus diyà te menge etew te, "Ke Amey ku se mibpesarig kediey te langun taman. Warà netau kedì te Anak a te Eleteala liyu rà te Amey ku ne Eleteala. Ne warà netau te Amey ku ne Eleteala liyu rà te siaken ne Anak din wey ke menge etew ne egkiyuhan ku te ebpayag mekeatag dut te Amey ku."

<sup>28</sup> "Pengkayi kew te kediey," ke si Hisus, "langun niyu ne nengeluhat wey nengevehatan, su ebpeimelayan ku sikiyu.

<sup>29</sup> Isangan niyu ke ingkul ku diyà te keniyu ne iyan din meana ne guru kew kayi te kedì ne tumana niyu ke penurù ku, ne ebpeimeley kew su siaken ne metmetulanged wey dekelà se kegkeyru ku.

<sup>30</sup> Su ini se penurù ku ne melemu ne edtumanen, ne meagkap ini se ibpevava ku keniyu."

## 12

### *Ke Impenurù ni Hisus Mekeatag te Hewii ne Id-imeley*

*(Marcos 2:23-28; Lucas 6:1-5)*

<sup>1</sup> Senge hewii te Sepetu, ke Hewii ne Id-imeley, ne midtarà en si Hisus diyà te pareyanan. Nevitil ini se menge edumdumaan ni Hisus ne mibpengetu ran ke tiugkayan ne mibpengurib su idsungit dan.

<sup>2</sup> Nekita rà ini dut te menge Peresiyyu ne migkehiyan dan en si Hisus te, “Tengtengi nu ma ayan se menge edumdumaan nu su nekesurang en ayan se ed-ul-ulaan dan dut te Penduan tew ne egkahi te warà egelevék te Andew te Id-imeley.”

<sup>3</sup> Ne migkehiyan ni Hisus sikandan te, “Maa, warà niyu ves mevasa ke impesurat te Eleteala mekeatag te mid-ulaula ni David, ke ratù tew rengan? Su ruen hewii ne sikandin wey ke menge sundaru rin ne nengevitil dan.

<sup>4</sup> Ne midlusud si David diyà te Valey te Eleteala ne migkuwa rin ke egkeenen ne indenà diyà te Eleteala ne migkaan din ne mibehayan din ke menge ruma rin. Ugaid ne kayi te Penduan tew ne kenà arà egkekaan te piya entei ne etew su ke menge terebpelengesa rà te Eleteala.

<sup>5</sup> Nevasa niyu red ura kayi te Penduan tew ne impesurat ki Moises ne egelevék ded ke menge terebpelengesa riyà te Nekebpuru ne Valey te Eleteala ketà te Hewii ne Id-imeley misan ebpekesurang dut te Penduan tew te arà ne hewii, ugaid ne warà mekedsalà.

<sup>6</sup> Benar ini se igkahi ku keniyu,” ke si Hisus, “te ruen nekeuma en kayi ne muna pà se gehem din dut te Nekebpuru ne Valey te Eleteala.

<sup>7</sup> Su ruen impesurat ne Lalag te Eleteala ne egkahi te, ‘Kenà ku iyan egkiyuhan ke menge binatang ne ibehay niyu kedì ne ibpelengesa, ugaid ke kegkeyru niyu rut te menge ruma niyu.’ Embiyya nesebutan niyu ke meana kayi te impesurat ini,” ke si Hisus, “ne warà kew mekekahi geina te nekedsalà ini se menge etew ne warà meraat ne mid-ulaula ran.

<sup>8</sup> Su ke Impeanak te Menusiyyà ke ebayàbayà se egkahi te engkey se edait ne ed-ul-ulaan dut te Hewii ne Id-imeley.”

### *Ke Meama ne Nekeyengkeng ke Belad Din*

*(Marcos 3:1-6; Lucas 6:6-11)*

<sup>9</sup> Mid-awà si Hisus ketà ne mibpendiyà te baley ne ebpededian te menge Hudiyanen te penduan dan.

<sup>10</sup> Ne ruen ketà senge etew ne meama ne nekeyengkeng se belad din. Duen dema ketà menge Peresiyyu ne ebpenipat ki Hisus su ebpemengà dan te kebpekesurang din te penduan dan kayi te Hewii ne Id-imeley apey ruen id-isuhat dan kandin ne kevenar. Ne mid-insà dan ki Hisus te, “Kayi te penduan tew menu, idtuhut be kenitew se ebpemawi te Hewii ne Id-imeley?”

<sup>11</sup> Ne migkahi en si Hisus kandan te, “Embiyya ruen senge etew keniyu ne ruen bilibili rin ne neulug diyà te meralem ne kalut te Hewii ne Id-imeley, ne maa kenà niyu edegdehawan te ebpehaun su geina ne Hewii ne Id-imeley?”

<sup>12</sup> Ne muna pà ne belielehà ke etew dut te bilibili! Tembù be kayi te penduan tew ne kenà ki ebpekesurang ke edtevangana ta te ruma ta misan Hewii ne Id-imeley.”

<sup>13</sup> Ne migkehiyan en ni Hisus ke meama ne nekeyengkeng ke velad din te, “Mama, ketenga nu ayan se velad nu.” Ne ketà ne migketeng dut te meama ke velad din ne neulian en, ne warà ded bira rin dut te divaluy ne velad din.

<sup>14</sup> Ketà ne mid-awà ke menge Peresiyyu ne mibpemengà dan se ralan te kegkeimetayi ran ki Hisus.

### *Si Hisus ke Mibpemili ne Edsugsuhuen te Eleteala*

<sup>15</sup> Guna su nerineg ni Hisus ini se netahù te itungan rut te menge Peresiyyu, ne mid-awà sikandin ketà te inged ne denda ne menge etew se miduma kandin. Ne neulian din ke langun ne ebpenderarù,

<sup>16</sup> ugaid ne mibenduan ni Hisus sikandan te kenà dan peketuani te ruma ne etew ini se mid-ulaula rin.

<sup>17</sup> Iyan din kinekahi kayi su apey metuman ke impesurat te Lalag te Eleteala ne impekahi ki Isayas te,

<sup>18</sup> “Ini ke sugsuhuen ku ne mibpemili ku, sikandin ke igkelimù ku, ne ebpekesuhat sikandin te hinawa ku. Ebpelumunan ku sikandin

dut te Kedeseenan ne Ebpetuntul te Menusiyyà,

ne ini se metidtu ne kukuman ku  
ne ibpesabut din diyà te langun ne menusiyà.

<sup>19</sup> Ugaid ne kenà sikandin ebpekidlawan etawa ebpemensag,  
ne kenà sikandin edwaakwaak en se edlalag  
diyà te kevruran te menge etew.

<sup>20</sup> Embiya idsempità ta ke ulaula rin kayi te menusiyà,  
ne kenà din ebedtien en ke etew ne iring te subpang ne migeri en,  
ne edtulengeran din ke etew  
ne iring te ebmelatmelat ne sulù ke sarig din,  
ne kenà ed-engked ke tavang din taman te egketalew rin  
langun ne kenà metidtu.

<sup>21</sup> Ne kayi te kandin ne ebpekesarig  
ke langun ne menusiyà."

*Iyan Kunaan te Menge Etew ne Riyà Ebpuun te ki Bilsibul ke Unuten te Busew ini se Gehem ni Hisus*

*(Marcos 3:20-30; Lucas 11:14-23)*

<sup>22</sup> Ne ruen menge etew ne mid-ewit kayi te ki Hisus te etew ne nepisek wey neemew  
su midsuukan te vusew. Midsegseg ni Hisus ke vusew kayi te meama ne neulian en, ne  
nekelalag wey nekekita en.

<sup>23</sup> Nengegeyip ke menge etew ketà ne ke sikandan te, "Menu, sikandin be buwa ini ke  
nekahi te Eleteala ne kevuwaran ni David ke datù tew rengan?"

<sup>24</sup> Guna nerineg ini rut te menge Peresiyu ketà ne migkahi ran te, "Si Bilsibul ke unutan  
te menge vusew se mibehey kandin te gehem te kebpenegseg te menge vusew."

<sup>25</sup> Ugaid ne netueanan ni Hisus ke netahù te itungan dan ne migkahi en te, "Upama ke  
ruen datù te inged ne iyan ded ed-oney ebpevunuey ke menge sakup din, ne egketunggad  
arà se inged din. Ne iring din ded dema ke ruen pehinged etawa telteleanak ne iyan  
ded ed-oney egkewaha, ne warà ebpengkusan din ke kenà egkevrurahey.

<sup>26</sup> Iring din ded be ketà ke midetuan ni Setanas ke unuten te menge vusew.  
Embiya iyan ded ed-oney ebpevunuey ke sakup din ne kenà meuhet se kedatù din su  
egketunggad arà se edetuan din.

<sup>27</sup> Embiya benar ne iyan ku ibpenegseg te vusew ke gehem ni Bilsibul, ne endei ve  
ebpuun ke gehem dut te edumaruma keniyu te ebpenegseg te vusew? Sikandan be ayan  
se ebpekekahi te warà mekesuhat ke egkehiyen niyu.

<sup>28</sup> Ugaid ne iyan benar ne riyà ebpuun te Kedesenan ne Ebpetuntul te Menusiyà ini  
se gehem ku te ebpenegseg te vusew. Sabap kayi ne egketueanan niyu te neuma en ke  
hewii te Kedatù te Eleteala keniyu.

<sup>29</sup> "Ugaid ne netalew ku en si Setanas ke unuten te menge vusew," ke si Hisus, "tembù  
be ebpekesegseg a te menge sakup din. Su warà etew ne ebpekelusud te valey te etew ne  
mevaher apay ebpenakew te menge kearen din embiya kenà din ed-unaan pà te ebakù  
arà se etew ne mevaher. Ugaid ne embiya nevakù din en, ne arà pà ne ebpekekuwa  
sikandin dut te kearen.

<sup>30</sup> "Su ke etew ne kenà ku ruma ne kunterà ku," ke si Hisus. "Ne ke etew ne kenà  
ed-amung kediey te eburun kayi te menge etew, ne ebpemburahey.

<sup>31</sup> Tembù be igkahi ku keniyu," ke si Hisus, "te egkepesahad te Eleteala ke langun ne  
menge salà te menge etew ne misan engkey ne meraat ne edlelehan dan kandin. Ugaid  
ke etew ne edlalag te meraatey mekeatag dut te Kedesenan ne Ebpetuntul te Menusiyà,  
ne kenà en vulug egkepesahad te Eleteala ke salà din.

<sup>32</sup> Ne misan engkey en ne etew ne edlalag te meraatey mekeatag dut te Impeanak te  
Menusiyà ne egkepesahad te Eleteala te salà din, ugaid ne misan engkey ne etew ne  
edlalag te meraatey mekeatag dut te Kedesenan ne Ebpetuntul te Menusiyà, ne kenà en  
vulug egkepesahad te Eleteala ke salà din taman te taman."

*Ke Ulaula te Menge Etew ne Ebpekeiring te Ebahas ne Kayu*  
*(Lucas 6:43-45)*

<sup>33</sup> "Upama ke iring te kayu," ke si Hisus, "embiya meupiya se kegueyhuey rin ne kayu,  
ne kenà ebahas te meraatey. Ne engketà ded maa ke kayu ne ruen sakit din, ne kenà  
ebahas te meupiya. Ketà be ne egketueanan ta embiya meupiya ke kayu kayi te bahas  
din.

<sup>34</sup> Engketà ded dema te sikiyu. Iring kew te menge uled ne ebpekekaid, ne warà  
meupiya ne egkekahi niyu geina te memeraatey ini se netahù te hinawa niyu. Su piya  
engkey se intahù te etew te hinawa rin, ne ini se egemew te bebà din.



<sup>35</sup> Su ke etew ne meupiya se ulaula rin, ne meupiya rema se kedlalag din su meupiya se intahù te hinawa rin. Ugaïd ke etew ne meraatey se ulaula rin, ne meraatey rema se kedlalag din su iyan din intahù te hinawa rin ne meraatey.

<sup>36</sup> Tentenuri niyu ini su ketà te hewii ne kedtimbang te Eleteala te menusiya, ne ibpetavak te Eleteala te menge etew ke uman senge tahà ne nelalag dan ne warà rantek din.

<sup>37</sup> Su ke langun ne menge lalag niyu ne migemew te bèbà niyu, ne ketà kew edtimbang ke edusaan kew ve etawa kenà.”

*Mibuyù ki Hisus ke Menge Peresiya te Ed-inteng Dan te Ed-ul-ulaan Din ne Mekegeyip (Marcos 8:11-12; Lucas 11:29-32)*

<sup>38</sup> Ketà te menge etew ne nevrurun ne ruen menge meysterù te penduan wey menge Peresiya ne migkahi te, “Meyterù, egkiyug key ne ed-inteng te mekegeyip ne ed-ul-ulaan nu tuus te gehem nu.”

<sup>39</sup> Ugaïd ne migkahi si Hisus te, “Sikiyu ne menge etew te guntaani en, meraatey nevenar se ed-ul-ulaan niyu su warà kebperetiyya niyu te Eleteala! Ugaïd ne warà en ma tuus ne ibpekita keniyu liyu rà ketà te netemanan ni Jonas ne mibpelambas te Lalag te Eleteala rengan.

<sup>40</sup> Su mid-iveleng te dekelà ne serà si Jonas ne taman te tetelu ne hewii ne riyà dà sikandin te hetek te rekela ne serà. Ne engketà ded dema ke Impeanak te Menusiya ne riyà sikandin te diralem te tanà lusud te tetelu ne hewii.

<sup>41</sup> Su ketà te akir din ne hewii te kedtimbang te Eleteala te menusiya ne ed-itindeg ini se menge etew ne riyà ebpuun te Niniva rengan su ed-isuhat keniyu te kewagib. Su sikandan mulà ne neringe dan dà ke Lalag te Eleteala ne impesabat ni Jonas kandan ne nekedsendit dan en ne mid-ewaan dan en ke meraat ne mid-ulaula ran. Guntaan ne ruen mepurù pà ki Jonas ne kayi te keniyu, ugaïd ne kenà niyu edtelimaan ke penurù din ne kenà kew ebpedsendit te meraat ne ulaula niyu.

<sup>42</sup> Su ketà te akir din ne hewii te kedtimbang te Eleteala te menusiya,” ke si Hisus, “ne duen Bai ne riyà ebpuun te inged ne Siba ne ed-itindeg ne ed-isuhat te kewagib dut te sikiyu ne menge etew guntaan. Su mibpengkayi sikandin se riyà ebpuun te divaluy te pehiliran su apey mekerineg dà ki Salomon ke Ratù dengan ne metmetau. Ne ruen en guntaan seveka ne mepurù pà ki Salomon ne ini en te keniyu!”

*Ke Kedlived te Busew Dut te Etew ne Midsuukan Din (Lucas 11:24-26)*

<sup>43</sup> Ne migkahi pà maa si Hisus te, “Embiya ruen busew ne edsuuk te etew ne ed-awà en, ne riyà ebpevayà te memara ne tanà su ebpemengà te ubpaan din. Ne embiya warà egketuen din,

<sup>44</sup> ne iyan egketahù te hinawa rin se, ‘Edliveran ku red ke mid-ubpaan ku.’ Nekeuma ini se busew, ne nekita rin te metilak en wey nekeulit en ke langun ketà te lusud.

<sup>45</sup> Ne midlihawang pà sikandin su mid-ewit te pitu ne vusew ne tuwas pà kandin keraat, ne langun dan ne ketà dà mid-ubpà. Ne ini se egketemanan dut te etew ne muna pà se kepasang din dut te neuna. Engketà ded dema se egketemanan dut te menge meraat ne etew te guntaani en.”

*Ke Impetimbang ni Hisus te Iney Rin wey Menge Suled Din (Marcos 3:31-35; Lucas 8:19-21)*

<sup>46</sup> Edlalag pà si Hisus ne nekeuma en ke iney rin wey ke menge ari rin ne meama. Ne riyà dan dà te luwal meketaman ne mibpesuhuan dan dà si Hisus.

<sup>47</sup> Ne senge etew ketà se migkahi ki Hisus te, “Ke iney nu wey ke menge ari nu ne riyà te lihewangan su ebpekibalak dan keykew.”

<sup>48</sup> Ne migkahi si Hisus te, “Duen pà ibpekita ku keniyu ne iring te iney ku wey ke menge suled ku.”

<sup>49</sup> Ne interù din ke menge edumdumaan din ne ke sikandin te, “Sikandan ini ke iney ku wey ke menge suled ku!

<sup>50</sup> Su misan engkey se ebperumaruma te kiyug te Eleteala, ne sikandan en imbe ke menge suled ku ne meama, ke menge etevey ku, wey ke iney ku.”

## 13

*Mibpenempità si Hisus Mekeatag te Etew ne Midsawed te Beni (Marcos 4:1-9; Lucas 8:4-8)*

<sup>1</sup> Arà ne hewii ne mid-awà si Hisus ketà te valey ne mibpendiyà te beyvey te ranew, ne ketà mibpinuu su ebpenurù.

<sup>2</sup> Ne geina te medmerakel ne menge etew ne midlingut kandin ne mid-untud sikandin te avang diyà te gebgevasan su ebpenurù. Ne riyà dà te beyvey te ranew ke menge etew ne ebpevineg kandin.

<sup>3</sup> Ne merakel se impenurù din kandan ne impepevayà te sempità.

<sup>4</sup> "Ruen etew," ke si Hisus, "ne mibpendiyà te pengengewiran din su edsawed te beni.

<sup>5</sup> Ne ketà te kinesawed din ne ruen beni ne nengeulug diyà te kilid te ralan ne midtuktuk en te menge pepenuk.

<sup>6</sup> Ruen ruma ne insawed din ne riyà nengeulug te kebetuwan ne mevavew se tanà din. Ne geina te mevavew ini se tanà din, ne mehaan dà se kinetuvù din.

<sup>7</sup> Ugaid ne guna su mid-endawan en ne petuluy ne migkuley ke dawun din geina te warà meketuneb ke raliid din, ne neebmas en.

<sup>8</sup> Ke ruma pà ne riyà nengeulug te sepinitan ne guna su midtuvù en ini ne migkubmusan en dut te sepinit.

<sup>9</sup> Ugaid ne ruen ruma pà ne riyà nengeulug te meupiya ne tanà, ne midredeb ne meselinuvù se tuvù din, ne nekevahas te meupiya su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani.

<sup>10</sup> Itaan niyu ke telinga niyu," ke si Hisus, "kayi te migkahi ku ini."

*Midseysey ni Hisus Ke Atag Dut te Menge Sempità*

*(Marcos 4:10-12; Lucas 8:9-10)*

<sup>11</sup> Ne mid-uvay ki Hisus ke menge edumdumaan din ne migkahi ran te, "Meambe ke ibpepevayà nu ke lalag nu te sempità ke ebpenurù ka kayi te menge etew?"

<sup>12</sup> Migkahi si Hisus te, "Sikiyu ne edurumaruma kediey, ne ebpepebutan en te Eleteala rut te in-ehis dengan mekeatag te Kedatù te Eleteala te menge etew, ugaid ke ruma ne menge etew ne ibpenurù kandan te ibpepevayà te menge sempità.

<sup>13</sup> Su ke etew ne idtahù din te hinawa ke ibpesabut kandin te Eleteala, ne ed-umanan pà te Eleteala ini se kebpekesabut din su apey mehaked din ke muna pà dut te ebpegingewaan din. Ugaid ke etew ne kenà din idtahù te hinawa ke ibpesabut kandin te Eleteala ne egkeawà arà se reisek ne nesebutan din.

<sup>14</sup> Tembù be ebpenurù a kandan ne ibpepevayà te sempità su apey ran mekesabut. Su edtengteng dan, ugaid ne kenà dan ebpekekita;

ne ebpevineg dan, ugaid ne iring be te warà dan mekerineg.

<sup>15</sup> Ne netuman en kayi te kandan ke impekahi te Eleteala ki Isayis ne egkahi te, 'Lelayun dan ebpevineg, ugaid ne kenà dan egkesebutan.

Ne lelayun dan edtengteng, ugaid ne kenà dan ebpekekita.

<sup>16</sup> Su ini se menge etew ne meresen se ulu ran,

ne timbang te midsabpeng dan ke telinga ran, wey midlipereng dan ke mata ran.

Su embiya kenà, ne ebpekekita ran en,

ne ebpekerineg dan en,

ne ebpekesabut dan en,

ne ke hinawa ran ne edlived en kayi te kediey,

ne ibpekepeliyu ku en sikandan dut te salà dan.' "

<sup>17</sup> Ne migkahi pà maa si Hisus te, "Ne sikiyu, dayirai kew nevenar su nesebutan niyu ini se nekita niyu wey ini se nerineg niyu.

<sup>18</sup> Sebenarvenar ne ini se egkehiyen ku keniyu te kenà pira rà se ebpelambas te Lalag te Eleteala wey menge metidtu ne etew te Eleteala rengan ne ed-inteng perem kayi te nengekita niyu te guntaan en, ugaid ne warà dan en mekita. Ne ebpevineg dan perem kayi te nengerineg niyu te guntaan en, ugaid ne warà dan en mekerineg."

*Mibpesebutan ni Hisus Ke Meana Dut te Sempità Mekeatag te Etew ne Midsawed te Beni*

*(Marcos 4:13-20; Lucas 8:11-15)*

<sup>19</sup> "Na pemineg kew" ke si Hisus, "su apey niyu mesebuti ke engkey se meana keniyen te sempità ku mekeatag te etew ne midsawed te beni.

<sup>20</sup> Su ini se beni ne insawed din ne ini ke lalag mekeatag te Edetuan te Eleteala. Ne ke ralan ne neuluhan te beni ne arà ke menge etew ne nekerineg te Lalag te Eleteala, ugaid ne warà dan mesebuti ne warà meketahù te hinawa ran. Nekeuma si Setanas ke datù te pekaid ne midgedehawan din te ed-ahew ke lalag ne nerineg dan.

<sup>21</sup> Ne ke kebetuwan ne neuluhan te beni, ne arà ke menge etew ne nekerineg te Lalag te Eleteala ne ingkehalew ran te ebpevineg ne mibperetiyya ran.

<sup>22</sup> Ugaid ne mehaan dà su warà mekedalid diyà te hinawa ran. Ne wey ran penggerami ni Setanas dut te peretiyya ran te Lalag te Eleteala, ne midlekà dan en.

<sup>22</sup> Ne ke sepinitan ne neuluhan te beni, ne arà ke menge etew ne nekerineg te lalag te Eleteala, ugaid ne gewii ran te ebpetindalan ne merakel se egkubmus dut te Lalag ne nerineg dan, iring te kemutuwan dan te ked-ubpà-ubpà wey ke kegkelilingey ran dut te kearen dan, ne warà en mekeuma te kebehas dan.

<sup>23</sup> Ne ke meupiya ne tanà ne neuluhan te beni, ne arà ke menge etew ne nekerineg te Lalag te Eleteala ne impetuneb dan te hinawa ran su nesebutan dan. Ne mibahas dan su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani."

*Ke Sempità ni Hisus Mekeatag te Utan ne Insawed Dut te Kunterà Din Ke Datù te Pekaid*

<sup>24</sup> Ne mibpenurù si Hisus te seveka maa ne sempità, ke sikandin te, "Ke Kedatù te Eleteala rut te menge etew ne iring te etew ne mibpesawed te meupiya ne beni diyà te pengengewiran din.

<sup>25</sup> Senge kerukileman ketà te nekelipereng dan langun, ne nekeuma ini se kunterà din ne midsawed te utan ketà te pengengewiran din ne mid-awà en.

<sup>26</sup> Guna su midtuvù ke pinemula ne ebmemehingey en, ne midtuvù en dema ke utan.

<sup>27</sup> "Ne mid-vey ke edsugsuhuen kayi te kemuney ne migkahi en te, 'Mama, meupiya ne beni ke impesawed nu riya te pengengewiran nu, ne endei ve ebpuun arà se menge utan ne midtuvù ketà?'

<sup>28</sup> " 'Riya ebpuun ini te kunterà ku,' ke se kemuney kayi te tanà.

"Ke se menge edsugsuhuen din te, 'Menu, Mama, ibpevarut nu kenami ayan se utan?'

<sup>29</sup> " 'Kenà,' ke se kemuney, 'su gewii te kebarut niyu te utan ne kema ke ebpekeragkes ke meupiya ne pinemula.

<sup>30</sup> Ebeleharen tew pà taman te egkeuma en ke ked-ehani, ne ebpeunaan ku pà te ebpepamarut rut te ebpegehani ne ibpepemagkes ku kandan su ebinsulan. Ne anpà ne ibpeehani ku ini se pinemula ku ne ibpetahù ku kayi te kemalig ku.' "

*Insempità ni Hisus ke Kedatù te Eleteala te Menge Etew Dut te Pinekemerimet ne Lahas ne Ed-ingeranan te Mustasa*

*(Marcos 4:30-32; Lucas 13:18-19)*

<sup>31</sup> Ne mibpenurù maa si Hisus te ruma pà ne sempità. "Ini se Kedatù te Eleteala kayi te menge etew," ke sikandin, "ne ebpekeiring te merimet nevenar ne lahas ne ed-ingeranan te Mustasa ne ibpemula te etew.

<sup>32</sup> Ini ke pinekemerimet ne lahas kayi te ampew te dunya, ugaid ne embiya ibpemula ini ne ebpeketuvù ne egkevaluy ne iyan dekelà dut te langun ne pinemula. Ne edsubpang te derekelà, ne rutun ebpenesalag ke menge pepenuk."

*Insempità ni Hisus ke Kedatù te Eleteala te Menge Etew dut te Ibpelevag te Pan*

*(Lucas 13:20-21)*

<sup>33</sup> Ne mibpenurù pà lavew si Hisus te ruma pà ne sempità. Ke sikandin te, "Ini se Kedatù te Eleteala kayi te menge etew ne iring te ibpelevag te pan. Migkuwa ini te meritan ne insawug din dut te senge asad ne tapung su apey ebpeketuvù ke mibawug din ne tapung."

<sup>34</sup> Langun ini ne impesabut ni Hisus diyà te denda ne menge etew ne impepeveyà din te sempità. Warà misan engkey en ne impemenudtul din kandan ke kenà impenempità din.

<sup>35</sup> Mid-ulaula rin ini su apey metuman ke impesurat ne Lalag te Eleteala dut te ebpelambas te lalag din rengan ne egkahi te,

"Ebpenurù a kandan te kayi ibpepeveyà te menge sempità;

ibpenudtul ku kandan arà se warà pà mepayahi igenat dut te kinelimbaha kayi te kelibutan."

*Midseysey ni Hisus ini se Sempità Din Mekeatag te Utan ne Insawed Dut te Kunterà Din Ke Datù te Pekaid*

<sup>36</sup> Ketà ne mid-ewaan ni Hisus ke denda ne menge etew ne mibpemenayik sikandin diyà te baley. Midtundug kandin ini se menge edumdumaan din ne ke sikandan te, "Ibpayag nu kenami ke engkey se meana dut te sempità nu mekeatag te utan ne insawed diyà te pengengewiran."

<sup>37</sup> Migkahi si Hisus te, "Ke meama ne midsawed te meupiya ne beni ne sikandin ke Impeanak dut te Menuisiyà;

<sup>38</sup> ne ke pengengewiran ne ini se kelibutan. Ne ke meupiya ne beni ne arà ke menge etew ne Edetuan dut te Eleteala. Ke utan ne arà ke menge etew ne sakup ni Setanas ke egkeunutan te menge vusew,

<sup>39</sup> ini se kunterà dut te kemuney te pengengewiran su midsawed te utan, ne sikandin ke egkeunutan te menge vusew. Ke hewii te ked-ehani ne arà ke ketepusan kayi te kelibutan, ne ke ebpengehani ne sikandan ke menge suluhuen te Eleteala.

<sup>40</sup> Ne arà se utan ne ebpmemeruten ne ebinsulan dan, ne arà ke egketemanan dut te sakup te egkeunutan te busew kayi te ketepusan te kelibutan.

<sup>41</sup> Su kayi te ketepusan te kelibutan ne edsuhuen dut te Impeanak te Menusiyà ke menge suluhuen din su ibpeawà ketà te Edetuan din ke langun ne mibpeneheewit te keppekedsalà te ruma ran wey langun ne mid-ulaula te meraat

<sup>42</sup> ne ibpeantug diyà te apuy nerakà. Ne ketà dan ebpekependerawit wey ebpekengingitel.

<sup>43</sup> Ugaid ne ke menge metidtu ne etew su sakup te Eleteala, ne ed-anlag dan iring te andew diyà te Edetuan te Amey ran ne Eleteala. Ne itaan niyu ke telinga niyu kayi te nerineg niyu."

*Insempità ni Hisus Ke Kedatù te Menge Etew Dut te In-eles ne Kearen diyà te Pengengewiran*

<sup>44</sup> Migkahi pà maa si Hisus te, "Ini se Kedatù te Eleteala ne iring te kearen ne in-eles diyà te pengengewiran. Netuen ini te senge etew ne nesuatsuat nevenar sikandin, ne midtelevan din ne mid-uli en. Ne mibpasa rin ke langun taman ne kearen din, ne midlived sikandin ne mibpemasa rin arà se pengengewiran."

*Insempità ni Hisus ke Kedatù te Eleteala Dut te Senge Timan ne Ebeliehen ne Mepmepurù ne Ed-ingaranan te Pirlas*

<sup>45</sup> "Ini se Kedatù te Eleteala," ke si Hisus, "ne ebpekeiring dema te etew ne ebpmengà te menge pirlas ne ebpmesaan din.

<sup>46</sup> Guna su neketuen sikandin te seveka ne pirlas ne mepmepurù nevenar, ne arà dà ne mibpasa rin ke langun taman ne kearen din ne mibpemasa rin arà se pirlas."

*Insempità ni Hisus ke Kedatù te Eleteala Dut te Biyala*

<sup>47</sup> "Ne seveka rema ne ebpekeiring te Kedatù te Eleteala," ke si Hisus, "ne ini se biyala ne id-antug diyà te ranew su apew ebpekeutel te langun ne edsusunan te serà.

<sup>48</sup> Guna su nepenuen ini se biyala, ne midtuyuk dan en diyà te geunan. Ne mibpinuu ran su ebpengeraman dan ke serà. Su ke meupiya ne serà ne id-awuk diyà te ambung su ibpendehang dan, ne ke kenà meupiya ne idtimbang dan.

<sup>49</sup> Iring be ketà dema se egketemanan kayi te menge etew ketà ke kegkepupus te ini se kelibutan su ebpemengkay ke menge suluhuen te Eleteala ne ibpedsivey ran ke menge etew ne meraat se mid-ulaula rin dut te menge etew ne metidtu.

<sup>50</sup> Ne ini se menge meraat ne etew ne ibpeantug diyà te apuy nerakà, ne ketà dan ebpekependerawit wey ebpekengingitel."

*Ke Upama ni Hisus Mekeatag te Etew ne Metau ne Ebpenurù te Raan wey Behu ne Penurù*

<sup>51</sup> Ne mid-insaan ni Hisus ke edumdumaan din te, "Menu, egkesebutan niyu ini se langun ne mibpengahi ku?"

"Uya," ke se menge edumdumaan din.

<sup>52</sup> Ketà ne migkahi maa si Hisus te, "Ne geina te nesebutan niyu en arà, ne misan engkey ne etew ne ebpenurù te penduan ne miduma kayi te Kedatù te Eleteala ne iring sikandin dut te senge etew ne kemuney te valey ne merakel se kearen din megidsan se raan wey behu. Iring sikandin ketà su metau ne ebpenurù te raan ne penurù wey igkepenurù din dema ke behu."

*Warà Mibperetiyya te Penurù ni Hisus Diyà te Inged Din ne Nesarit (Marcos 6:1-6; Lucas 4:16-30)*

<sup>53</sup> Guna su nekepasad en si Hisus te kepenerurù din te ibpepeyayà te menge sempità, ne mid-awà en sikandin ketà te inged

<sup>54</sup> ne mid-uli en diyà te inged din ne mibpenurù diyà te baley ne ebpengedian te menge Hudiyanen te penduan dan. Ne nengegeyip ke menge etew ne nekerineg te penurù din. Ke sikandin te, "Endei rin be buwa mekuwa ini se ketau rin? Ne ebmenuwen din te ebaal ini se menge mekegeyip?"

<sup>55</sup> Maa, kenà uvag sikandin ke anak te pandey? Ne maa, kenà si Maria ke iney rin wey si Santiago, si Jose, si Simon wey si Hudàs ke menge ari rin?

<sup>56</sup> Ne maa," ke sikandan, "kenà ini red dema med-ubpà ke langun ne etevay rin? Endei rin be buwa mehuruwi ini se ketau rin?"

<sup>57</sup> Ketà ne mid-engkenà dan kandin.

Ne migkehiyan ni Hisus sikandan te, “Ke etew ne ebpelambas te Lalag te Eleteala ne egkeedatan te piya endei sikandin egketahù, liyu rà dut te muney ne inged din wey ke kereremigey rin.”

<sup>58</sup> Tembù be kenà utew merakel ne mekegeyip ne ingkepekita ni Hisus ketà te inged din su warà mibperetiyyaya ke minge etew kandin.

## 14

*Ke Guhud Mekeatag te Kinepatey ni Juan ke Ebpembunyag  
(Marcos 6:14-29; Lucas 9:7-9)*

<sup>1</sup> Nerineg ne Hirudis ini se tudtul mekeatag te mid-ulaula ni Hisus su arà ne hewii ne sikandin ke egkeunutan ketà te Geliliya.

<sup>2</sup> Migkahi sikandin kayi te minge kedserihan din te, “Neuyag ded maa si Juan ke Ebpembunyag, tembù be ruen gehem din te kebpekevaal te minge mekegeyip.”

<sup>3</sup> Ini se nekahi ni Hirudis su sikandin en iya ke mibpeimatey ki Juan su sikandin pà ke mibpesigkem, ne mibpevakù ne mibpevilanggù. Iyan din kineul-ulaa kayi su mid-esawa rin si Hirudiyas ke ipag din misan si Hirudiyas ne esawa rut te tuney ne suled din ne si Felipe.

<sup>4</sup> Su uman dà ebpengegekhiyi ni Juan si Hirudis te, “Kenà meupiya ne ed-esawaan nu ke ipag nu su esawa en te tuney ne suled nu!” ke si Juan.

<sup>5</sup> Ne ebpeimetayan perem ni Hirudis sikandin, ugaid ne neandek sikandin te minge Hudiyanen su migkahi ran te ebpelambas te Lalag te Eleteala si Juan.

<sup>6</sup> Ugaid ne guna su neuma ke hewii te kineanaka ki Hirudis ne ruen kevruran, ne ketà ne pinesayew ke anak ni Hirudiyas ne raha. Ne ingkesuatsuat ni Hirudis ini,

<sup>7</sup> Tembù be mibpesaran din ke midsayew te, “Langun tew te nevruran kayi ne titihus te misan engkey se ebuyuen nu ne ibehey ku keykew!”

<sup>8</sup> Ne intelaan en neraan te iney kayi te raha ne midsayew te ibpevuuyù diyà te ki Hirudis ke ulu ni Juan ke Ebpemunyag. Tembù be migkahi sikandin te, “Iyan ku ebuyuen te guntaani ne ivehey nu kediey ke ulu ni Juan ke Ebpemunyag!”

<sup>9</sup> Nerineg dà ni Hirudis ne nekebmutu sikandin, ugaid ne tehaad te ingkepasad din en diyà te etuvangan te pinetelavuk din, ne impetuman din en ke mibuyù dut te raha.

<sup>10</sup> Ketà be ne mibpepungelan din en si Juan diyà te bilengguan.

<sup>11</sup> Ne impetahù din en te pelatu ke ulu ni Juan ne mibpeneheneewit en ini ne imbehey en diyà te raha, ne imbehey en dema dut te raha diyà te iney rin.

<sup>12</sup> Guna su nerineg ini dut te minge edumdumaan ni Juan, ne mibayaan dan diyà te bilengguan ke bangkey rin ne inleveng dan. Neipus dan ne mibpendiyà dan te ki Hisus su impenudtul dan ini se netamanan.

*Pinekaan ni Hisus ke Lelima Nengivu ne Etew  
(Marcos 6:30-44; Lucas 9:10-17; Juan 6:1-14)*

<sup>13</sup> Guna su nerineg eni Hisus ke tudtul dut te netamanan ni Juan, ne mid-awà dan ketà ne mid-untud dan te avang te sikandan dà se ebpendiyà te warà etew rin. Guna su netuenan dut te minge etew te mid-avang-avang en ensi Hisus ne mibpenggenat dan en se ebpeimeyvey ran su edtelukun kandin.

<sup>14</sup> Guna su nekerunggù en ensi Hisus ne iyan dan nekita se merakel ne minge etew ne nevruran, ne neyruran din nevenar sikandan ne neulian din ke ebpendararu.

<sup>15</sup> Guna su meapun en nevenar ne mid-uey en kandin ke minge edumdumaan din se egkahi te, “Meapun en ini ne warà dè be minge etew kayi te inged ini. Iyan tumù ne ibpeipanew nu en ke minge etew su apey ran ebpekependiyà te endei se ruen minge valey ne ebpekepemas ran te egkekaan dan.”

<sup>16</sup> Ne migkehiyan dan ni Hisus te, “Kenà dan en ebpeipanewen,” ke sikandin, “su sikiyu se ebpekaan kandan.”

<sup>17</sup> “Ini se kuwa tew,” ke sikandan, “ne lelima rà ne timan ne pan wey deruwa ne timan ne serà.”

<sup>18</sup> Ne migkahi si Hisus te, “Ewita niyu kayi.”

<sup>19</sup> Ketà ne pinepinuu rin diyà te gumegebà ke minge etew. Ne migkuwa rin ke lelima ne timan ne pan wey ke deruwa ne timan ne serà, ne midlingakà sikandin diyà te langit ne impeselamat din te Eleteala. Ne mibpenevitevi din en ke pan ne imbehey rin en dut te minge edumdumaan din su ibpetukid diyà te merakel ne etew.

<sup>20</sup> Migkaan dan langun ne nengevulung dan. Guna su nekeipus dan en se egkaan, ne mibpunpun dut te sepulù wey deruwa ne edumdumaan din ke nesamà ne iyan din nepunpunan ne sepulù wey deruwa ne binevey ne nengepenù.

<sup>21</sup> Ne ke munge etew ne migkaan ketà ne munge lelima nengivu ke meama, liyu pà ke munge meritan batà.

*Mid-ipanew si Hisus Diyà te Divavew te Wayig te Ranew*  
(Marcos 6:45-52; Juan 6:15-21)

<sup>22</sup> Ne pineuntud en ni Hisus te avang ke munge edumdumaan din su ibpeuna rin en sikandan te ed-apet te ranew su ibpepeuli din pà ke munge etew.

<sup>23</sup> Guna su impeipanew rin en ke munge etew, ne midtekereg en sikandin te sebseveka rin diyà te buvungan su ebpengeningeni. Guna su egkesagkup en ne ketà pà si Hisus te sikandin dà.

<sup>24</sup> Ugaid ke munge edumdumaan din ne meriyù en se ebpengavang-avang ne diyan en te kalud te ranew ne nesuhat te mevaher ne baleg su egkesurang dan ke mevandes ne keramag.

<sup>25</sup> Egkepkepawà ketà ne midtelukun en si Hisus kandan se ed-ip-ipanew riyà te divavew te wayig.

<sup>26</sup> Guna su nekita sikandin dut te munge edumdumaan din se ed-ip-ipanew riyà te divavew te wayig, ne nengeandek dan nevenar. "Gimukud!" ke sikandan, ne migkuleyi dan te kegkeandek dan.

<sup>27</sup> Ketà ne migkahi si Hisus kandan te, "Pedtihel kew te hinawa niyu su siaken ini! Kenà kew meandek!"

<sup>28</sup> Ne migkahi en si Pedro te, "Kerenan, embiya benar ne sikuna ayan, ne peipenawa a kayi te divavew te wayig te ebpeengkeniyan te kenikew."

<sup>29</sup> "Pengkayi ke en!" ke si Hisus. Ne ketà ne midrenà si Pedro dut te avang ne mid-ipanew en diyà te divavew te wayig se ebpendiyà te ki Hisus.

<sup>30</sup> Ne guna su neheram din ke mevandes ne netekew sikandin meandek ne idteledted en sikandin. "Kerenan, tevangi a!" ke sikandin.

<sup>31</sup> Arà dà ne migeweran ni Hisus sikandin ne migkahi en te, "Kurang bes ke kepberetiyaya nu kediey! Meambe ke ruen keduwaruwa nu?"

<sup>32</sup> Ne mid-untud dan ketà te avang ne mid-engked en ke keramag.

<sup>33</sup> Guna su diyan dan en te avang, ne mibpengarap ini se munge edumdumaan din kandin. "Benar iya ne Anak ka te Eleteala!" ke sikandan.

*Neulian ni Hisus ke Menge Ebpendareru Diyà te Inged ne Hinisarit*  
(Marcos 6:53-56)

<sup>34</sup> Guna su mid-apet dan en te ranew ne iyan dan nerungguan ne inged ne Hinisarit, <sup>35</sup> ne petuluy ne nekilala dut te munge etew si Hisus. Tembù be pinesugkew ran ke munge etew ne ebpendareru ketà te nekeerivey ne inged, ne mibpeneheewit dan kayi te ki Hisus.

<sup>36</sup> Ne ini se mibpeneheewit te ebpendareru ne mibuyù ki Hisus te menu ma ke mekeami ke ebpendareru misan dut te belegkas din dà, ne langun ne nekeami ketà ne neulian.

## 15

*Mid-insà ke Menge Peresiyu ki Hisus ke Meambe Ke Kenà Eduma ke Menge Edumdumaan Dut te Penurù te Keep-epuan Dan ne Hudiyänen Mekeatag te Kebpenlùlù*  
(Marcos 7:1-13)

<sup>1</sup> Senge hewii ne ruen munge Peresiyu wey munge meyerù te penduan ne riyà ebpuun te Hirusalim ne mibpengkayi te ki Hisus.

<sup>2</sup> Ne migkahi ran te, "Meambe ke kenà edtuman ini se munge edumdumaan nu rut te impenurù ne betasan ne intelau dut te keep-epuan tew? Su matag dan en migkaan ne warà dan tumana ke edtenuran te kedlùlù!"

<sup>3</sup> "Ne sikiyu," ke si Hisus, "meambe ke iyan niyu edtumanen ke betasan ne intelau keniyu rut te munge keep-epuan niyu, ne midsurang kew ma rut te penurù te Eleteala?"

<sup>4</sup> Su migkahi te Eleteala te, 'Edati niyu ke amey niyu wey ke iney niyu.' Ne ingkahi rema te, 'Misan engkey ne etew ne edlalag te meraatey dut te amey rin etawa iney rin ne ibpeimetayan.'

<sup>5</sup> Ugaid ne sikiyu," ke si Hisus, "ne iyan niyu ibpenurù ne embiya ruen etew ne ruen igketavang din dut te amey rin etawa iney rin ne egkepakey ne egkehiyen din te 'Imbehey ini te Eleteala'

<sup>6</sup> ne ketà ne kenè en sikandin ebpeketavang dut te amey rin wey iney rin. Kayi ve te penurù niyu ini ne mid-iniyuhan niyu ke Lalag te Eleteala su iyan niyu ibpeiseg ke betasan ne intelau dut te keep-epuan niyu.

<sup>7</sup> Sikiyu ne uvag en kun ne ebperetiyyaya! Benar iya ke lalag mekeatag keniyu ne impesurat te Eleteala ki Isayas ne mibpelambas te Lalag te Eleteala rengan su migkahi te,

<sup>8</sup> 'Ini se menge etew,

ne kayi rà te bivig dan se ked-arap dan kediey, ugaid ne ke hinawa ran ne medmeriyù kediey.

<sup>9</sup> Warà ded be lalew rin se kebpengarap dan kediey, su ke ibpenurù dan ne mibèbeelan dà te etew,

ugaid ne egkehiyen dan ne kayi ebpuun te penduan ku.' "

*Ke Menge Ebpekeredsik te Etew*

*(Marcos 7:14-23)*

<sup>10</sup> Ne pineuvey en ni Hisus ke menge etew se egkahi te, "Pemineha niyu ve ini," ke sikandin, "se edlelehan ku su apey niyu egkesebutu.

<sup>11</sup> Kenà iyan ebpekeredsik te etew ini se egkeenen ne ebpekeawuk te bèbà din, ugaid ne iyan ebpekeredsik te etew ini se netahù te hinawa rin ne ebpekelihawang kayi te bèbà din."

<sup>12</sup> Ne mid-uvey kandin ke menge edumdumaan din ne migkahi te, "Maa, netueanan nu red te neepesan ka te menge Peresiyu dut te migkahi nu geina?"

<sup>13</sup> Ne migkahi si Hisus te impepevayà te sempità te, "Langun ne pinemula ne warà ipemula te Amey ku ne riyà te langit ne eberuten.

<sup>14</sup> Belehara niyu sikandan! Su iring dan te menge pisek ne edtuyuk te pisek ded dema. Ne embiya ruen pisek ne edtuyuk te pisek ded dema, ne elin dan egkeulug diyà te lepak."

<sup>15</sup> Ne migkahi si Pedro te, "Ipayag nu kenami ke meana rut te sempità nu geina."

<sup>16</sup> Ne migkahi si Hisus kandan te, "Iring kew rà dut te ruma ne etew ne mevavew se kebpekesabut dan.

<sup>17</sup> Meambe, warà niyu ves mesebuti te ini se egkeenen ne ebpekeawuk te bèbà te etew ne ebpevayà te hetek din ne an pà ne edlihawang diyà te kandin?

<sup>18</sup> Ugaid iyan ebpekeredsik te etew ne ini se netahù te hinawa rin ne ebpekelihawang te bèbà din.

<sup>19</sup> Su ini se neketahù te hinawa rin ke ebpuunan te meraat ne itungan ne ebpekepene-heewit kandin te meraat ne ed-ul-ulaan iring te ked-imatey, kedlangkadlangkad te esawa rin, ne ruma pà ne meredsik ne ed-ul-ulaan, kebpentakew, kedtarutarù wey kedlalag te ebpekereraat te pekinagan te ruma ne etew.

<sup>20</sup> Langun din ini ne ebpekeredsik te etew, ugaid ne kenà ebpekeredsik te etew ke egkaan sikandin te warà mekepenlùlù ne ayan ke betasan te menge Peresiyu."

*Ke Guhud Mekeatag te Sarig te Senge Etew ne Meritan ki Hisus*

*(Marcos 7:24-30)*

<sup>21</sup> Ne mid-awà si Hisus ketà ne mibpendiyà te inged ne uvey te menge inged ne Tiru wey Sidun.

<sup>22</sup> Ne ruen nekeubpà ketà ne meritan ne riyà ebpuun te inged ne Kenaan ne midtelavuk ki Hisus. "Kerenan, sikuna ne inenakan ni David," ke sikandin, "igkeyru a nikuna! Su ruen anak ku ne meritan ne midsuukan te busew ne egkepesangan nevenar."

<sup>23</sup> Ugaid ne warà kegkehiyan ni Hisus. Ne ketà ne mid-uvey ki Hisus ke menge edumdumaan din ne mibpemuyù te, "Ipeuli nu ayan se meritan su edtundugtundug kenitew ne ebpekeuringer."

<sup>24</sup> Ne migkahi si Hisus te, "Midsuhà a te Eleteala te iyan dà ebpetevangan ke menge kevuwaran ni Israyil ne iring te menge bilibili ne nengelaag."

<sup>25</sup> Guna su nering ini kayi te meritan ne mid-uvey rin en si Hisus ne midlumpeng en diyà te sineruan din ne ebpemuyù te, "Kerenan, tevangi a nikuna!"

<sup>26</sup> Ne mibpenempità si Hisus kandin te, "Kenà edait ne egkuan ta ke ibpekaan te menge vatà ne idsavud te menge asu."

<sup>27</sup> "Benar ayan, Kerenan," ke se meritan, "ugaid ne misan ke menge asu ne ebpenelisim dut te mumu te menge vatà ne ebpengeulug diyà te lemisaan dut te ebpengemuney."

<sup>28</sup> Ne migkehiyan ni Hisus ke meritan te, "E, Bayi, mevaher nevenar se kedsarig nu te Eleteala! Ini se mibpemuyù nu ne ibehey ku keykew." Arà dà ne neulian en ke anak dut te meritan.

*Neulian ni Hisus Ke Denda ne Ebpendararu*

<sup>29</sup> Mid-awà si Hisus ketà ne mibpemeyvey te Ranew te Geliliya. Ne midtekereg diyà te buvungan ne mibpinuu.

<sup>30</sup> Ne denda ne menge etew se mibpengkayi te kandin se ebpenheewit te menge pungkù, menge pisek, menge nekeyengkeng, menge emew, wey ruma pà ne ebpende-aru. Ne riyà dan indenà te etuvangan ni Hisus, ne neulian din ke langun dan.

<sup>31</sup> Ne nengegeyip ke menge etew ketà te nekita ran te nekelalag en ke menge emew, neketidtu en ke nekeyengkeng, nekeipanew en ke menge pungkù wey nekekita en ke menge pisek. Ne ketà nekereyù dan te Eleteala ne iyan ebperengerapan dut te bansa ne Israyil.

*Pinekaan ni Hisus ke Epat Nengivù ne Etew  
(Marcos 8:1-10)*

<sup>32</sup> Ne pineuvey ni Hisus ke menge edumdumaan din ne migkahi te, "Igkeyruwi ku nevenar ini se menge etew," ke si Hisus, "su nekedtetelu en ne hewii se kinepekiduma ran keytew ne warà en egkekaan dan. Kenà meupiya ne ebpeulien te kenà dan ebpekekaan su kalu ke ruen edlunusan diyà te ralan."

<sup>33</sup> Migkahi ke menge edumdumaan ni Hisus te, "Endei ki mulà ebpekekuwa te egkekaan ne ibpekaan tew kayi te merakel ne menge etew se ini kiyu te inged ne warà bulug etew rin?"

<sup>34</sup> "Engkey ma taman ne kerakel te lutù tew?" ke si Hisus.

"Pitu rè be ne timan ini se lutù tew ne pan," ke sikandan, "ne ruen pipira ne timan ne serà."

<sup>35</sup> Ne pinepinuu ni Hisus ke menge etew diyà te tanà.

<sup>36</sup> Ne migkuwa rin ke pitu ne timan ne pan wey menge serà ne impeselamat din en diyà te Eleteala. Ne mibpenevitevi din en ke pan, ne imbehey rin en dut te menge edumdumaan din su ibpetukid diyà te menge etew.

<sup>37</sup> Langun dan ne migkaan, ne nengevulung. Ne ketà ne mibpupunpun dut te edumdumaan din ke nengesamà ne iyan din nepunpunan se pitu ne binevey.

<sup>38</sup> Ne epat nengivu ke menge etew ne migkaan ketà liyu ke meritan batà.

<sup>39</sup> Arà pà ne impeuli ni Hisus ke menge etew. Ne mid-untud en ensi Hisus te avang ne mid-avang-avang dan en se ebpendiyà te inged ne Magadan.

## 16

*Ke Menge Etew ne Metau ne Ebpenipat te Hewii Ugaid ne uvag Kun Warà Dan Mesebuti Ke Tuus Dut te Ned-ulaula te Arà ne Hewii  
(Marcos 8:11-13; Lucas 12:54-56)*

<sup>1</sup> Ne ruen menge Peresiyu wey menge Sadusiyu ne mibpendiyà te ki Hisus se ebpekidlewanà kandin su ebeelan dan te litag si Hisus. Tembù be mibuyù dan te mebaal si Hisus te mekegeyip ne tuus te midsuhù sikandin te Eleteala.

<sup>2</sup> Migkahi si Hisus te, "Embiya edsanlep ke andew ke ebpemurawag ne egkahi kew te, 'Ebpengupiya ke hewii.'

<sup>3</sup> Ne embiya egkepkepawà ke ruen pemurawag wey kivel ne egkahi kew te, 'Ed-uran.' Embiya edtengteng kew diyà te langit ne metau kew nevenar ne ebpenipat te hewii, ugaid ne kenà niyu egkekilala ke menge tuus mekeatag kediey guntaan.

<sup>4</sup> Sikiyu ne menge etew te guntaani en, ne meraatey nevenar se ed-ul-ulaan niyu su warà kebperetiayaya niyu te Eleteala! Menu, ebuyù kew te ebaal a te mekegeyip ne tuus te gehem ku? Kenà, su warà en tuus ne ibpekita keniyu liyu rà ketà te netemanan ni Jonas ne mibpelambas te Lalag te Eleteala rengan."

Ketà ne mid-ewaan din sikandan.

*Ke Meraat ne Penurù Dut te Menge Peresiyu wey Sadusiyu ne Impeiring ni Hisus te Ibpelevag te Pan  
(Marcos 8:14-21)*

<sup>5</sup> Mid-apet ke menge edumdumaan ni Hisus te ranew, ugaid ne nelipat dan ne ed-ewit te lutù dan ne pan.

<sup>6</sup> Ne mibpenempità si Hisus kandan te, "Andam kew," ke sikandin, "ne ingati niyu te kenà kew egkepeneheewit te ibpelevag te pan dut te menge Peresiyu wey Sadusiyu."

<sup>7</sup> Ugaid ne geina te warà dan mesebuti ne mibpelelelahay ran te, "Iyan din kinepekekahi kayi ne geina te warà kiyu mekeewit te lutù tew ne pan."

<sup>8</sup> Ne netuenan ni Hisus ke engkey se ibpelelelahay ran ne migkehiyan din en sikandan te, "Meambe ke iyan niyu egkepengasak se warà niyu kebpekeewit te pan? Kurang nevenar ke kedsarig niyu kediey?"



<sup>9</sup> Maa, warà kew pè bes mekesabut? Maa, kenà niyu en egketenuran ke kinepenevitevi ku rut te lelima ne timan ne pan ne impekaan ku rut te lelima nengivu ne menge etew? Maa, pira ne binevey se nepenù te nengesamà ne nepunpun niyu?

<sup>10</sup> Ne menu, kenà niyu en egketenuran ke kinepenevitevi ku rut te pitu ne timan ne pan ne impekaan ku rut te epat nengivu ne menge etew? Maa, pira ne binevey se nepenù te nengesamà ne nepunpun niyu?

<sup>11</sup> Meambe ke warà niyu mesebuti te kenà ini se pan ne warà niyu meewit se egkehiyan ku? Su ingati niyu te kenà kew egkepeneheewit te ibpelevag te pan dut te menge Peresiyyu wey Sadusiyyu."

<sup>12</sup> Arà pà ne nekesabut ke menge edumdumaan din te iyan din ebpeingatan kandan ne kenà arà se ibpelevag te pan, ugaid ne arà se ibpenurù te menge Peresiyyu wey Sadusiyyu.

*Ke In-insà ni Hisus Dut te Edumdumaan Din Ke Engkey Sikandin*

*(Marcos 8:27-30; Lucas 9:18-21)*

<sup>13</sup> Ketà ne mibpendiyà en ensi Hisus te inged uvey te inged ne Sisariya Pilipus. Guna su nekeuma ran en ne mid-insaan ni Hisus ke menge edumdumaan din te, "Engkey kun ke Impeanak te Menusiya riyà te pegitungan te menge etew?"

<sup>14</sup> "Ruen egkahi te sikuna si Juan ke Ebpembunyang," ke sikandan. "Ne ruen duma ne egkahi te sikuna si Elias ke mibpelambas te Lalag te Eleteala rengan. Ne ruen pà ruma ne egkahi te sikuna si Jeremias etawa seveka ne mibpelambas te Lalag te Eleteala rengan."

<sup>15</sup> "Ne menu sikiyu," ke si Hisus, "engkey e ma diyà te pegitungan niyu?"

<sup>16</sup> Ne midtavak si Pedro te, "Sikuna ke Impasad ne Ebperetuen te langun ne menge etew dut te Eleteala ne warà kemetayan din, ne sikuna ke Anak din."

<sup>17</sup> "Mibpenaub ka, Simon ne anak ni Juan!" ke si Hisus. "Su benar ini se migkahi nu, ugaid ne kenà etew se mibpayag kayi te kenikew su ke Amey ku riyà te langit.

<sup>18</sup> Tembù be ebpeketuenan ku kenikew te ed-ingeranan ku sikew ki Pedro (ne iyan din meana ne 'batu'). Iring ka te batu ne ebpeunsaran ku te simbaan ku su ini ke langun ne menge etew ne mibperetiyya kediey. Ne misan ke gehem dut te kemetayan ne kenà ebpeketungad kandan.

<sup>19</sup> Ibehey ku kenikew ke ketau te kebpemenudtul diyà te langun ne menusiya dut te Meupiya ne Tudtul mekeatag dut te Kedatù te Eleteala ne embiya idsempità ta ini ne iring te ibehey ku kenikew ke gungsi te gumawan ne ebpependiyà te lusud te Edetuan te Eleteala. Ne ini se idawey nu kayi te kelibutan ne arà se indawey en dema te Eleteala riyà te langit. Engketà ded dema ke idtuhut niyu kayi te kelibutan ne arà ke intuhut en dema te Eleteala riyà te langit."

<sup>20</sup> Ne mid-il-ilutan ni Hisus te egkahi kandan te kenà dan ibpenudtul te misan engkey ne etew te sikandin ke Impasad te Eleteala ne Ebperetuen te menge etew.

*Mibpayag en Neraan ni Hisus ke Kebpatey Rin*

*(Marcos 8:31-9:1; Lucas 9:22-27)*

<sup>21</sup> Igenat dè be ketà ne mibpehayyan en ni Hisus ke menge edumdumaan din mekeatag te egketemanan din. Ke sikandin te, "Iyan iya se ebpekependiyan a te inged ne Hirusalim ne edresayan a nevenar su ebpeheweran a te menge pekilukesen te Hudiyanen, menge mepurù te terebpepengesa, wey ke menge meyerù te penduan. Ed-imetayan a, ugaid ne ketà te iketelu ne hewii ne egkevanew e red."

<sup>22</sup> Nerineg ni Pedro ne impesivey rin si Hisus ne pineengked din se egkahi te, "E Kerenan, berekat ne ibpemekeriyyù dà ini te Eleteala! Kenà ayan med-ulaula kenikew!"

<sup>23</sup> Ugaid ne midlingè si Hisus ne migkehiyan din si Pedro te, "Awà ka su iring ka ki Setanas! Maa, ebngenen a nu kayi te ibpetuman kediey? Su ke itungan nu ne kenà diyà ebpuun te Eleteala, ugaid ne kayi rà te itungan te menusiya."

<sup>24</sup> Ne migkahi si Hisus dut te menge edumdumaan din te, "Embiya ruen etew ne egkiyug ne eduma kediey, ne iyan iya se pekelipati rin ke kandin ne kiyug wey tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin pà se keduma rin kediey.

<sup>25</sup> Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey ne ruen umur ne ibehey kandin ne warà edtemanan din.

<sup>26</sup> Menu, embiya ruen etew ne ebpekehaked te langun taman kayi te ampew te dunya, maa engkey se rantek din embiya egkerasey ke himukud din diyà te apuy nerakà? Warà! Su warà misan engkey ne kearen ne igkevehey te etew apew rin meawi ke gimukud din.

<sup>27</sup> Su sikandin ke Impeanak te Menusiya ne mehaan ne edlived kayi te ampew te dunya ne edumaan te menge suluhuen din wey ruen raman din ne iring te raman te

Amey rin ne Eleteala. Ne ketà ne eberasan din ke minge etew dut te mid-ulaula ran kayi te ampew te dunya ke meupiya etawa meraat.

<sup>28</sup> Tentenuri nu ini," ke si Hisus, "ruen ruma niyu kayi ne kenà pà ebpatay taman ketà te hewii ne egkekita ran ke Impeanak te Menusiyà ne ebpekeuma su Edatù te menusiyà kayi te ampew te dunya."

## 17

*Nedsalin ke Kebparas ni Hisus  
(Marcos 9:2-13; Lucas 9:28-36)*

<sup>1</sup> Guna su nekede-enem en new hewii, ne pineruma ni Hisus ensi Pedro wey ke teleari ne si Santiago wey si Juan ne midtekereg dan diyà te mehantur ne buvungan te sikandan dà.

<sup>2</sup> Guna su ketà dan en ne midtengtengan dan si Hisus ne netekew nedsalin ke kebpeparas din su mid-anlag ini se buked din iring te andew. Ne mibpeneringsing ke velegkas din te keputi.

<sup>3</sup> Netekew ran dema nekita se deruwa ne etew se ebpekidlalag ki Hisus, si Moises wey si Elias, ke minge mibpelambas te Lalag te Eleteala rengan.

<sup>4</sup> Ne migkahi en si Pedro ki Hisus te, "Kerenan, meupiya su kayi ki! Embiya egkiyug ka ne edsesabung a kayi te tetelu, seveka te keykew, seveka te ki Moises, wey seveka rema te ki Elias."

<sup>5</sup> Edlalag pà si Pedro, ne ruen mermerayag ne sehulapun ne nekelikuvung kandan ne ruen suwara ne ketà ebpuun te sehulapun ne migkahi te, "Ini ke Anak ku ne igkelimù ku nevenar, ne ebpekesuhat nevenar sikandin te hinawa ku. Pemineha niyu ke edlelahen din!"

<sup>6</sup> Guna su nerineg kayi te minge edumdumaan ni Hisus ke suwara ne nekelumpeng dan su neandek dan nevenar.

<sup>7</sup> Ne mid-uvay ran ni Hisus ne migeweran din se egkahi te, "Enew kew, ne kenà kew meandek!"

<sup>8</sup> Guna su midlingakà dan ne warà дума ne nekita ran su si Hisus dà.

<sup>9</sup> Gewii ran te edtupang ne mibenduan dan ni Hisus te, "Ini se nekita niyu ne kenà niyu imbe ibpenudtl te misan entei taman te egkevanew en ke Impeanak te Menusiyà."

<sup>10</sup> Ne ketà ne mid-insà kandin ke minge edumdumaan din te, "Meambe ke egkehiyen te minge meysterù te penduan te iyan ed-una ebpengkayi ne si Elias ke etew ne mibpelambas te Lalag te Eleteala rengan, ne arà pà ke Impasad te Eleteala ne Edatù?"

<sup>11</sup> "Benar ne ed-una ebpengkayi si Elias," ke si Hisus, "su ed-endamen din ke langun te kebpekeuma dut te Impasad te Eleteala ne Edatù."

<sup>12</sup> Ugaid ne igkahi ku keniyu te nekeuma en si Elias asal warà dan mekilala, ne nasi dan midrasey sikandin te endei se kiyug dan. Engketà ded dema te kedresaya ran dut te Impeanak te Menusiyà."

<sup>13</sup> Arà pà ne nekesabut ke minge edumdumaan ni Hisus te iyan din egkehiyen ne mekeatag ki Juan ke Ebpembunyang.

*Neulian ni Hisus ke Vatà ne Midsuukan te Busew  
(Marcos 9:14-29; Lucas 9:37-43a)*

<sup>14</sup> Guna su midlived en ensi Hisus diyà te merakel ne etew ne ruen ketà mid-uvay ki Hisus, ne midlumpeng diyà te sineruwan din,

<sup>15</sup> ne migkahi te, "Mama, igkeyru nu ke anak ku! Ebevuyen sikandin ke edsuuk en ke busew ne egkerasey nevenar su ruen ke egkepiley riya te apuy wey ruen ke riya te wayig.

<sup>16</sup> Ne mid-ewit ku en sikandin kayi te minge edumdumaan nu su ebpevewian ku, ugaid ne warà dan megaga."

<sup>17</sup> Migkahi si Hisus te, "Sikiyu ne minge etew guntaan, ne warà kebperetiyya niyu te Eleteala wey minge suer kew!" ke sikandin. "Neuhet en se kebpekiduma ku keniyu, ne engkey pà se taman ne kebperetiyya niyu? Engkey pà taman se keuhet din se kedtigkeri ku keniyu? Ipengkayi niyu ayan se vatà!"

<sup>18</sup> Ne pineawà ni Hisus ke vusew ne mid-awà en diyà te kandin, ne arà dà dema ne neulian en.

<sup>19</sup> Ne mid-uvay ki Hisus ke minge edumdumaan din te sikandan dà ne mid-insà te, "Meambe ke warà dey megaga te edsegseg ke vusew ne midsuuk ketà te vatà?"

<sup>20</sup> "Warà niyu megaga," ke si Hisus, "su kurang nevenar ke kedsarig niyu te Eleteala. Tentenuri niyu ini su embiya ruen kebperetiyya niyu te Eleteala ne reisek, misan iring dà dut te reisek ne lahas te mustasa ne ebpekegaga kew te merehen ne egketemanan.

Su embiya idsempitå ta ne ebpekegaga ka ne ebpearat te buvungan ke egkehiyan niyu te, 'Meawå ka.' [

<sup>21</sup> Migkahi maa si Hisus te, 'Ayan ne vusew ne kenå egkesegseg embiya kenå kew ed-una ebpengeningeni wey edlimpas te egkaan.]"

*Impayag pà maa ni Hisus Ke Kebpatey rin*  
(*Marcos 9:30-32; Lucas 9:43-45*)

<sup>22</sup> Guna su nevrurun en ke langun ne edumdumaan ni Hisus diyå te Geliliya ne migkahi si Hisus kandan te, "Mehaan en ibpalad ke Impeanak te Menusiyå diyå te minge kunterå din

<sup>23</sup> ne ed-imetayan sikandin, ugaid ne ketå te iketelu ne hewii ne ebenawen ded sikandin." Ne ketå ne nekebmutu nevenar ke minge edumdumaan din.

*Ke Midlalat ni Hisus Mekeatag te Kebayad te Buwis Diyå te Nekebpuru ne Valey te Eleteala*

<sup>24</sup> Guna su nekeuma en si Hisus wey ke minge edumdumaan din diyå te inged ne Kapirnewum, ne mid-uwey ki Pedro ke minge ebpevyad te buwis dut te Nekebpuru ne Valey te Eleteala, ne mid-inså dan te, "Menu, ebayad ayan se meyererå niyu te buwis dut te Nekebpuru ne Valey te Eleteala?"

<sup>25</sup> "Uya," ke si Pedro.

Guna su mibpemenayik en si Pedro diyå te baley ne mid-unaan en ni Hisus te egkahi te, "Diyå te itungan nu, Pedro, entei se ebayad te buwis diyå te egkamal te inged kayi te ampew te dunya? Engkey, ke mehinged kayi te inged din etawa ke riyå ebpuun te meriyå?"

<sup>26</sup> "Ke riyå ebpuun te meriyå," ke si Pedro. "Embiya iring ketå," ke si Hisus, "ne kenå ki ebpekevyad diyå te Nekebpuru ne Valey te Eleteala su iyan ebpengemuney ketå ne ke Amey ta ne Eleteala.

<sup>27</sup> Ugaid ne kenå meupiya," ke si Hisus, "ke ebmeraat ke hinawa rut te ebpevyad te buwis keyta. Pendiya ka te ranew ne pemunuwit ka ne ke egkeuna ne edtugtug diyå te bunuwit nu ne bigkata nu en. Ne ketå te bèbå te neutel nu ne egkekita nu ke kureta ne ereg ne ibayad ta te buwis. Kua nu ini ne pendiyå ka te Nekebpuru ne Valey te Eleteala su ivayad nu ini te buwis ta."

## 18

*Mid-inså ki Hisus ke Menge Edumdumaan Din ke Engkey se Mepurå Diyå te Menge Eteu ne Edetuan te Eleteala*

(*Marcos 9:33-37; Lucas 9:46-48*)

<sup>1</sup> Ketå ne hewii ne mid-uwey ki Hisus ke minge edumdumaan din se egkahi te, "Engkey se mepurå diyå te minge etew ne Edetuan te Eleteala riyå te langit?"

<sup>2</sup> Ketå ne mid-umew si Hisus te senge etew ne vatå ne impeitindeg din kayi te etuvangan dan

<sup>3</sup> ne migkahi te, "Tentenuri niyu ini embiya kenå kew edsambå te itungan niyu iring te itungan kayi te vatå ini ne kenå ebpegitung te kebmeperurå din, ne kenå kew ebpekelusud dut te minge etew ne Edetuan te Eleteala.

<sup>4</sup> Su ke etew ne mepurå diyå te Edetuan te Eleteala ne sikandin ke mepeembavå se hinawa rin iring kayi te vatå.

<sup>5</sup> Su misan engkey ne etew ne edtelimå te kevevaan en ne etew iring kayi te vatå su atag te keduma rin kediey ne iring te siaken se midtelimå din."

*Ke Ebpenheewit Keyteu te Ebaal te Meraat*  
(*Marcos 9:42-48; Lucas 17:1-2*)

<sup>6</sup> "Ne mekeatag be te ini se minge vatå ne mibperetiyaya kediey," ke si Hisus, "ne embiya ruen etew ne ebpekevelavag dut te sarig te vatå ne iring kayi ne iyan pà meupiya ne ebperiwetuan ke lieg din te mevehat ne batu ne id-antug diyå te rahat tumin dè be ke egkevelevahan ke sarig te vatå kediey.

<sup>7</sup> Keyru nevenar te minge etew kayi te ampew te dunya su ruen kebpenggeram kandan te ebpekedsalå. Kenå egkepakey ne kenå egkeuma ini se kebpenggerami te minge etew, ugaid ne ke etew ne ebpenggeram te ruma rin su apey ebpekedsalå ne mekeyruwiru nevenar!

<sup>8</sup> "Embiya iyan ebpekepeneheewit keykew te ebpekedsalå nu ke belad nu etawa paa nu, ne tempera nu ne itumbag nu! Su iyan pà tumå ne egkesarir ka tumin dè be ke deruwa red ke velad nu wey paa nu ne igkeantug ka diyå te apuy nerakå.

<sup>9</sup> Ne embiya iyan ebpekepeneheewit keykew te kebpekedsalà nu ke mata nu, ne lesika nu ne itimbag! Su iyan pà tumù ne dibdivaluy se mata nu tumin dè be ke deruwa red ke mata nu ne igkeantug ka riyà te apuy nerakà.”

*Ke Sempità ni Hisus Mekeatag te Bilibili ne Nelaag ne Netuen Ded ne Impeiring Din Dut te Etew ne Mibpendsit te Salà Din*

(Lucas 15:3-7)

<sup>10</sup> “Urami niyu,” ke si Hisus, “te kenà kew edsudì kayi te eduma kediey ne iring te vatà se kedsarig dan. Su ke minge suluhuen ne ebantey kandan ne layun diyà te etuvangan te Eleteala ne Amey ku diyà te langit. [

<sup>11</sup> Su mibpengkayi te ampew te dunya ke Impeanak te Menusiyà su apey ebpeiyu te menusiyà ne nelaag.]

<sup>12</sup> “Engkey se pegitungan niyu ne ed-ul-ulaan te senge etew ne ruen mehatu ne bilibili rin ne seveka se nelaag? Ini imbe se ed-ul-ulaan din, ed-ewaan din arà te siyew nepulù wey siyew ne ebpemenabtab su ebpenuntulen din arà se seveka ne nelaag taman te egketuen din.

<sup>13</sup> Igkahi ku keniyu,” ke si Hisus, “te embiya egketuen din en arà se nelaag ne dekelà pà se kegehalew rin kayi te seveka ne netuen din dut te siyew nepulù wey siyew ne warà nelaag.

<sup>14</sup> Ne engketà ded dema ke Amey tew ne Eleteala su kenà din egkiyuan ne misan seveka dut te mibpesakup kandin ne egkelaag.”

*Ke Penurù ni Hisus Mekeatag te Kebpesahad te Salà te Menge Ruma Ta*

<sup>15</sup> “Embiya ruen duma nu ne nekedsalà kenikew,” ke si Hisus, “ne pendiyà ka te kandin ne kehiya nu ke salà din te deruwa kew rà. Embiya ebpevenar sikandin ne netevangan nu sikandin su ebpeked-uliey kew te meupiya ne itungan.

<sup>16</sup> Ugaid ne embiya kenà ebpehimbendar sikandin, ne kuwa ka te senge etew etawa deruwa ne etew ne ebpeketitihus te kebityara niyu apey niyu egkerumai ke impesurat ne Lalag te Eleteala.

<sup>17</sup> Ne embiya kenà sikandin ebpemineg kandan, ne peketueni nu en dut te langun ne egkevurun ne ebperetiyya te Eleteala. Ne embiya kenà sikandin ebpemineg kandan, ne iringa niyu en sikandin te kenà niyu ruma te ebperetiyya te Eleteala etawa iringa niyu en sikandin dut te tenlimbungen ne ebpevyad te buwis.

<sup>18</sup> “Tembù be igkahi ku ini keniyu,” ke si Hisus, “te ini se idawey nu kayi te kelibutan ne arà se indawey en dema te Eleteala riyà te langit. Engketà ded dema arà se iduhut niyu kayi te kelibutan ne arà ke iduhut en dema te Eleteala riyà te langit.

<sup>19</sup> “Ne igkahi ku maa keniyu: embiya duen deruwa keniyu kayi te ampew te dunya ne egkseveka ne ebpemuyù te Eleteala te misan engkey en, ne ibehey kandan dut te Amey ku ne Eleteala riyà te langit.

<sup>20</sup> Su embiya ruen deruwa etawa tetelu ne etew ne egkevurun su atag dut te kedsarig dan kediey, ne ketà a red dema te kandan.”

*Ke Sempità ni Hisus Mekeatag te Edsugsuhuen ne Warà Mibpesahad te Ruma Rin*

<sup>21</sup> Ketà ne mid-uvey si Pedro ki Hisus ne mid-insà te, “Keranan, kepipira a ebpesahad ke ebpekesalà ke ruma ku kediey? Maa, kepipitu rè be?”

<sup>22</sup> “Kenà kepipitu rà,” ke si Hisus, “su enggivuwan.

<sup>23</sup> Su ke Kedatù te Eleteala dut te minge etew ne ebpekeiring kayi. Duen senge etew ne datù ne ebpevyad en te minge utang kandin dut te minge edsugsuhuen din.

<sup>24</sup> Guna su nekerudsù en se ebpevyad, ne ruen senge etew kandan ne mid-ewit kayi te ratù ne nekeutang kandin te enggungivuwan ne pirak.

<sup>25</sup> Tehaad te kenà sikandin ebpekevyad, ne migkahi en dut te datù te ibpepasa sikandin, iring te uripen abpeg ke esawa rin wey minge anak din wey ke langun taman ne kearen din, su apey mevyari ke utang din.

<sup>26</sup> “Ne midlumpeng sikandin kayi te etuvangan dut te datù se ebpemuyù te, ‘Kenà e pà nikuna sesawì su edlahud e pà,’ ke sikandin, ‘ne ebayaran ku sikuna te langun.’

<sup>27</sup> Ne neyruwan sikandin dut te datù, ne warà din en peveyari ke utang din ne pineuli din en sikandin.

<sup>28</sup> “Guna su mid-ipanew en ini se edsugsuhuen ne nesinuhung din en ke ruma rin te edsugsuhuen ne nekeutang kandin te deisek dà. Ne migeweran din en su ebpekelen din en se egkahi te, ‘Beyari nu en ke utang nu kediey!’

<sup>29</sup> “Ne midlumpeng en ini se duma rin te edsugsuhuen se ebpemuyù te, ‘Kenà e pà nikuna sesawì su edlahud e pà,’ ke sikandin, ‘ne ebayaran ku sikuna te langun.’

<sup>30</sup> “Ugaid ne warà migkiyug, nasi pà te impevilanggù din ne kenà sikandin ebpekelihawang taman te kenà din egkevayaran ke langun ne utang din.

<sup>31</sup> Guna su nekita ini dut te ruma pà ne edsugsuhuen ne nengeepes dan ne mibpendiyà dan en te datù ne intarem dan ke langun.

<sup>32</sup> “Ne impetawag sikandin dut te datù ne migkehiyan din te, ‘Warà rantek nu ne edsugsuhuen! Warà ku en pevaryari keykew su in-awà ku en te itungan ku ke langun ne utang nu kediey su atag dà dut te mibpemuyù ka kediey.

<sup>33</sup> Ne meambe ke warà ka meyru dut te ruma nu ne edsugsuhuen te iring dut te kinekeyru ku keykew?’

<sup>34</sup> Neepes nevenar ke datù ne impevilanggù din en ini se edsugsuhuen ne kenà ebpekelihawang sikandin taman te kenà ebpekevayad te langun ne utang din.

<sup>35</sup> “Ne engketà imbe rema,” ke si Hisus, “ke ed-ul-ulaan keniyu dut te Amey ku ne diyà te langit ke kenà niyu ebpeseharen ke minge ruma niyu se edlipatan en ke meraat ne mid-ulaula ran keniyu su iawà niyu en iya te pegitungan niyu.”

## 19

### *Ke Kebpenurù ni Hisus Mekeatag te Ebpekid-engked te Esawa (Marcos 10:1-12)*

<sup>1</sup> Nekeipus si Hisus te ebpenurù ne mid-awà ketà te pruvinsiya te Geliliya ne mibpendiyà te pruvinsiya ne Hudiya.

<sup>2</sup> Ne mibpenduma kandin ke denda ne minge etew, ne nengeulian din ke ebpenderarur.

<sup>3</sup> Ne ruen minge Peresiya ne mibpengkayi te ki Hisus su ebaal dan te idseligkat kandin. “Menu, idluhut be te penduan tew,” ke sikandan, “se ebpekid-engked ke meama te esawa rin te misan engkey ne ibuun din?”

<sup>4</sup> Migkahi si Hisus te, “Meambe, warà niyu ves mevasa ke impesurat ne Lalag te Eleteala ne egkahi te, ‘Ingenat te aney en ne midlimbag te Eleteala ke meama wey meritan?’

<sup>5</sup> ne migkahi ke Eleteala te, “Tembù ed-ewaan dut te meama ke amey rin wey iney rin su riyà ebpekidseveka sikandin te esawa rin, ne ini se teled-esawa ne nevaluy ne seveka.”

<sup>6</sup> Ketà ne kenà dan en deruwa ne etew su neseveka rà. Tembù be ini se deruwa ne midseveka te Eleteala ne kenà egkepebelag dut te piya enteì ne etew,” ke si Hisus.

<sup>7</sup> Ne mid-insà ke minge Peresiya te, “Embiya iring ketà ne meambe ke inluhut ni Moises dut te meama ne ebpekid-engked te esawa rin embiya ed-una edsurat te kesebenaran te ebpekid-engked en sikandin, ne arà pà ne egkeengkeran din ke esawa rin?”

<sup>8</sup> Ne midtavak si Hisus kandan te, “Inluhut ini ni Moises se kebpekid-engked niyu su meresen ke ulu rut te minge keep-epuan niyu su warà dan mebpemineg te kebpenurù din, ne engketà kew red dema. Ugaid ne kenà arà ke kiyug te Eleteala rut te pehaney en ne midlimbag din ke meama wey meritan.

<sup>9</sup> Tembù be igkahi ku keniyu embiya ruen meama ne ebpekid-engked te esawa rin, misan kenà edlangkadlangkad ini se esawa rin kandin, ne edsaup ded maa ed-esawa ne nelangkadlangkad te esawa rin.”

<sup>10</sup> Migkahi ke minge edumdumaan ni Hisus te, “Embiya iring ketà se egketemanan te teled-esawa, ne iyan tumù ne kenà ebpees-eseweey te etew.”

<sup>11</sup> Migkahi si Hisus te, “Duen minge etew, meama wey meritan, ne intandà kandan te Eleteala se kenà ebpeesewaan ne meupiya arà kandan, ugaid ne kenà meupiya arà dut te ruma.

<sup>12</sup> Su merakel ke puunan te meambe ke kenà dan ed-esawa. Duen kenà ebpekeesawa su ketà te kineanak kandan ne netuenan en te kenà dan ebpekeesawa. Ne ruen duma ne kenà ebpekeesawa su migkapun dan te minge etew. Ne ruen duma pà ne kenà ed-esawa su apey ran ebpekepesabut dut te Lalag te Eleteala mekeatag te Kedatù din dut te minge etew. Piya enteì se ebpeketuman kayi te penurù ku ini, ne tumana rin en iya.”

### *Midpenubtuvaran ni Hisus Ke Menge Vatà (Marcos 10:13-16; Lucas 18:15-17)*

<sup>13</sup> Ne ruen ketà minge etew ne mibpemava te minge anak dan diyà te ki Hisus su ibperampen dan kandin su ebpepenubtuvaran dan, ugaid ne midawey ini dut te minge edumdumaan din.

<sup>14</sup> Ugaid ne migkahi si Hisus te, “Kenà niyu dewaya sikandan! Ugaid ne ibpepengkayi niyu te kediey ke minge vatà, su ke minge etew ne Edetuan te Eleteala ne iring ke sarig dan kediey kayi te minge vatà ini.”

<sup>15</sup> Ketà ne midampen din sikandan su ebpenubtuvaran din, ne mid-awà en.

*Ke Kewasa ne Meama ne Migkiyug ne Ebpekehaked te Umur ne Warà Edtemanan Din (Marcos 10:17-31; Lucas 18:18-30)*

<sup>16</sup> Duen senge etew ne kenakan ketà ne mibpendiyà te ki Hisus. “Meyterù,” ke sikandin, “engkey iyan se meupiya pà ne ed-ul-ulaan ku apey a mekekuwa te umur ne warà edtemanan din?”

<sup>17</sup> Ne midtavak si Hisus te, “Meambe ke id-insà nu kedi ke engkey se meupiya pà ne ed-ul-ulaan nu?” ke si Hisus. “Su sebseveka rà ke meupiya se ed-ul-ulaan din ne Eleteala rà. Embiya egkuwa ka te umur ne warà edtemanan din, ne tumana nu ke langun te penduan te Eleteala.”

<sup>18</sup> Ke se kenakan te, “Engkey ne minge penduan?”

Ne midtavak si Hisus te, “Ke penduan ne iring te, ‘Kenà ka ed-imatey, kenà ka edlangkadlangkad te esawa nu, kenà ka ebpenakew, kenà ka edtarùtarù,

<sup>19</sup> edati nu ke amey nu wey ke iney nu, wey ikelimù nu ke ruma nu iring te keggelimù nu te hinawa nu,’ ” ke si Hisus.

<sup>20</sup> “Langun keninyan ne midumaan ku,” ke se kenakan, “engkey pè ma se kurang ne ed-ul-ulaan ku?”

<sup>21</sup> “Embiya iyan nu kiyug ne warè en kurang te ed-ul-ulaan nu,” ke si Hisus, “ne uli ka ne pesaa ke langun ne kearen nu ne ipemehey nu ve ke elehà din diyà te minge ayuayu su apey ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedi.”

<sup>22</sup> Nering ini rut te kenakan ne mid-ipanew en se merungkug su kewasa nevenar.

<sup>23</sup> Ketà ne migkahi si Hisus kayi te edumdumaan din te, “Benar ini te merehen nevenar dut te kewasa ne etew se kebpesakup din te minge etew ne Edetuan te Eleteala.

<sup>24</sup> Ne igkahi ku pà lavew keniyu te embiya id-upama ta ne iyan pà melemu ne ebpevayà diyà te vudsi te rahum ini se binatang ne kemilu tumin dè be ke kebpesakup te etew ne kewasa dut te minge etew ne Edetuan te Eleteala.”

<sup>25</sup> Guna su nering ini kayi te minge edumdumaan din ne ingkegeyip dan nevenar ne mid-insà dan te, “Embiya iring ketà se kerehen din te etew ne kewasa te kebpesakup din dut te minge etew ne ebeyveyaan te Eleteala, ne engkey rè be buwa se ebpekehaked te umur ne warà edtemanan din?”

<sup>26</sup> Ne midtengteng si Hisus kandan ne migkahi en te, “Embiya etew rà ne kenà dan ebpekegaga ne egaked te umur ne warà edtemanan din, ugaid ne Eleteala se ebpekegaga ne ebehey kandan su egkegaga te Eleteala ke langun taman.”

<sup>27</sup> Ketà ne migkahi si Pedro te, “Netuanan nu te mid-ewaan dey ke langun taman dey su miduma key keykew. Ne engkey ve se lalew rey?”

<sup>28</sup> Ne migkahi si Hisus kandan te, “Sebenarvenar ne ini se egkehiyen ku keniyu te embiya egkeuma ke hewii te egkevehu en ini se kelibutan, ne Sikandin ke Impeanak te Menusiyà ne ebpinuu en diyà te ebpinuuwan te punggus ne datù se Edatù te langun. Ne sikiyu ke sepulù wey deruwa ne edumdumaan ku ne ebpepinuuwan ku sikiyu se egkamal dut te sepulù wey deruwa ne bansa te inenakan ni Israyil.

<sup>29</sup> Ne misan entei ne etew se neewaan din ke ubpaan din, minge suled din, minge etevey rin, ke amey rin etawa iney rin, minge anak din etawa ke tanà din su atag dut te keduma rin kediey, ne ebpeketelimà sikandin te kemehatus egketakep se neewaan din ne ebhayan pà te umur ne warà edtemanan din.

<sup>30</sup> Ugaid ne merakel ne minge etew guntaan,” ke si Hisus, “ne mepurù se ketengdanan din ne ketà te akir din ne hewii ne sikandan ke pinekemevavà te langun. Ne ruen minge etew guntaan ne mevavà dan nevenar, ne ketà te akir din ne hewii ne sikandan se pinekebmepurù se ketengdanan din.”

## 20

*Ke Sempità ni Hisus Mekeatag te Menge Etew Ne Egelevék te Eleteala*

<sup>1</sup> Ne mibpenempità si Hisus se egkahi te, “Ini se Kedadù te Eleteala te minge etew ne iring kayi. Ruen senge etew ne meluag se impemula rin ne wahed ne ed-ingaranan te paras. Mibpaneypaney ini se kemuney se ebepemengà te edsukeyan din ne egelevék kayi te pemulaan din.

<sup>2</sup> Guna su ruen en nekita rin ne in-upakat din en te edsukeyan din te senge elad ne pelatà su arà ke nelayaman ne sukey te senge hewii, ne pinehelevék din en kayi te pemulaan din.

<sup>3</sup> “Guna su edluuk en ebpemenayik ke andew ne midlived pà ke kemuney diyà te pedian ne ruen nekita rin ne ebpinuu su warà helevék din.

<sup>4</sup> Tembù be migkahi ini se kemuney te, 'Gelevek kew rema diyà te pemulaan ku ne edsukeyan ku sikiyu te sesangan.'

<sup>5</sup> Ne mibpendiyà dan en.

"Guna su neudtu en ke andew ne midlived pà maa se ebpemengà te ruma ne egelevek kandin, ne engketà ded ke mid-ulaula rin te edluuk en ebpemenaug ke andew.

<sup>6</sup> Guna su meapun en nevenar ne ketà te midlived pà sikandin diyà te pedian ne ruen ruma ne nekita rin ne ebpimpinuu rà. 'Meambe ke ebpimpinuu kew rà kayi ne kenà niyu ebpekinuhunan ke hewii?' ke sikandin.

<sup>7</sup> " 'Su warà ebpehelevek kenami,' ke sikandan.

"Ne migkahi sikandin kandan te, 'Gelevek kew rema diyà te pemulaan ku.'

<sup>8</sup> "Ketà te ebpengirum-irum en ne migkahi ini se kemuney ketà te kedserihan din te, 'Tewaha nu ke mibpenggelevek ne sukayi nu en. Unai nu te edsukey ke mewri ne pinelusud ku, ne arà pà ke neuna.'

<sup>9</sup> "Ne ini se menge etew ne pinelusud din te egelevek te meapun en ne midsukeyan te sukey te senge hewii.

<sup>10</sup> Guna su edsukayen en ini se neuna ne pinelusud din, ne iyan dan pegitungan ne labi pà ke egkekuwa ran su migelevek dan te neep-epunan. Ugaid ne andang ded ne sukey te senge hewii ke nekuwa ran.

<sup>11</sup> Nekuwa ran ke sukey ran ne mibpemivig dan dut te kemuney.

<sup>12</sup> Ke sikandan te, 'Meambe ke neked-iring dà ke sukey rey dut te mewri ne pinelusud nu te senge uras dà se kinehelevek dan? Ugaid ne sikami,' ke sikandan, 'ne kayi en minatey ke andew te peka rey.'

<sup>13</sup> "Ne migkahi en ini se kemuney te, 'Suleren, warà a midlimbung keniyu, su migkiyug kew ma ne egelevek dut te andang ne sukey te senge hewii.

<sup>14</sup> Na, telimaa niyu en ini se sukey niyu, ke se kemuney, ne uli kew en. Su kediey ne kiyug ini se mewri ne pinelusud ku ne edsukayan ku te iring ded dut te insukey ku keniyu.

<sup>15</sup> Meambe, kenà ku egkeveyveyaan ke kedì ne kureta? Maa, egkeima kew su metulanged a dut te menge etew?'

<sup>16</sup> "Ne migkahi pà maa si Hisus te, "Duen merakel ne menge etew ne mepurù se ketengdanan din guntaan ne ketà te akir din ne hewii ne sikandan ke pinekemevavà. Ne ruen merakel ne menge etew ne kevevaan guntaan, ne ketà te akir din ne hewii sikandan se pinekemepurù se ketengdanan din."

*Iketelu en ne Kebpayag ni Hisus Atag te Kebpatey Rin*

*(Marcos 10:32-34; Lucas 18:31-34)*

<sup>17</sup> Ketà ne mibpendiyan en ensi Hisus te Hirusalim. Ne impesivey ni Hisus ke sepulù wey deruwa ne edumdumaan din ne gewii ran te ed-ip-ipanew ne migkehiyan din sikandan te,

<sup>18</sup> "Netuenan niyu en," ke si Hisus, "ne ebpendiyà kiyu te Hirusalim ne ketà sikandin ke Impeanak te Menusiya ne ibpalad en diyà te menge mepurù te terebpelengesa wey ke menge meyerù te penduan. Ne ebpegumpung dan en te kukuman te ed-imetayan sikandin,

<sup>19</sup> ne arà ne ibpalad dan diyà te menge etew ne kenà Hudiyenen, ne ed-undaunda kandin, ebpenlambit kandin, arà pà ne ed-imetayan. Ugaid ne ketà te iketelu ne hewii ne egkevanew red sikandin."

*Ke Mibuyù te Esawa ni Sibidiyu*

*(Marcos 10:35-45)*

<sup>20</sup> Ne mibpengkayi te ki Hisus ke esawa ni Sibidiyu abpeg ke deruwa ne anak din ne meama ne midlumpeng sikandin kayi te sineruwan ni Hisus su ruen ebpemuyuen din.

<sup>21</sup> Ne mid-insà si Hisus te, "Engkey se ebpemuyuen nu?"

"Ini se ebpemuyuen ku," ke sikandin, "ne ketà te akir din ne hewii te kedatù nu en ne pepinuuwa nu ini se deruwa ne anak ku ne ruma nu te edatù, seveka riyà te egkekewanan nu ne seveka riyà te egkehivang nu."

<sup>22</sup> "Matag niyu en ini ebuyua," ke si Hisus, "ne warà niyu mesebuti an se ebuyuen niyu. Maa, ebpeketigker kew ve dut te kemeresayan ne mehaan ku ne ibpevyà?"

"Uya," ke sikandan, "egketigkeran dey."

<sup>23</sup> "Benar iya ne edresayen kew iring dut te kemeresayan ku," ke si Hisus, "ugaid ne warà ketengdanan ku te ebpemili ke engkey se ebpepinuuwen ku kayi te egkekewanan ku wey kayi te egkehivang ku. Su ini ne intaìl dut te Amey ku ne Eleteala dut te mibpemili din."

<sup>24</sup> Guna su nerineg kayi te sepulù ne edumdumaan ni Hisus arà se ebuyuen dut te esawa ni Sibidiyu, ne nengeepes dan kayi te deruwa ne teleari.

<sup>25</sup> Tembù be midtawag dan langun ni Hisus se egkahi te, "Netuenan tew se ini te minge pengulu te inged kayi te ampew te dunya ne metehel ne edsuhù te langun ne minge etew, ne ini se minge unuten ne kandan dà ne kiyug se edumaan.

<sup>26</sup> Ugaid ne sikiyu," ke si Hisus, "ne kenà kew ed-iring ketà. Su embiya ruen seveka keniyu ne egkiyug ne ebmepurù, ne iyan iya se mebpeembavà te hinawa rin wey ebpevayàbayà dut te minge ruma rin;

<sup>27</sup> ne embiya ruen seveka keniyu ne egkiyug te sikandin se ebpekeuna te langun niyu, ne iyan iya se mebpeembavà te hinawa rin wey ebpevayàbayà dut te minge ruma rin.

<sup>28</sup> Med-iring sikandin dut te Impeanak te Menusiyà te kenà iyan din kinepengkayi te ampew te dunya ne apew metevangi te menusiyà. Ugaid ne iyan din kinepengkayi ne apew rin metevangi sikandan, ne egkeimetayan su apew merakel se egkevelukasan."

*Neulian ni Hisus Ke Deruwa ne Meama ne Pisek*

*(Marcos 10:46-52; Lucas 18:35-43)*

<sup>29</sup> Guna su ed-awà en ensi Hisus te inged ne Hiriku ne ruen merakel ne minge etew ne mibpenduma kandan.

<sup>30</sup> Ne diyà te kilid te ebpevayaan dan ne ruen deruwa ne meama ne pisek ebpinuu. Guna su nerineg kayi te deruwa ne pisek te edsahad si Hisus ne midtawag dan te, "Igkeyru key nikuna! Su sikuna ke inenakan dut te datù tew rengan ne si David!"

<sup>31</sup> Ke merakel ne minge etew ketà se midawey kandan te mebpeeneng-eneng dan ugaid ne lemban en ne egkeilit se ebpemensag te, "Kerenan, igkeyru key nikuna! Su sikuna ke inenakan dut te datù tew rengan ne si David!"

<sup>32</sup> Guna su nerineg ni Hisus ne mid-itindeg pà ne midtawag din sikandan se egkahi te, "Engkey ma se ebpetevangan niyu kediey?"

<sup>33</sup> Ne migkahi ke minge pisek te, "Kerenan, kiyug dey ne mekekita key red perem!"

<sup>34</sup> Neyru si Hisus kandan ne midampen din ini se minge mata ran. Arà dà iya ne nekekita ran en, ne miduma ran en ki Hisus te ked-ip-ipanew ran.

## 21

*Ke Kinelusud ni Hisus Diyà te Hirusalim ne Mid-untud te Nati ne Kudà su Tuus ini te Datù Sikandin Dut te Minge Hudiyanen*

*(Marcos 11:1-11; Lucas 19:28-40; Juan 12:12-19)*

<sup>1</sup> Guna su ebpelundani ran en te Hirusalim ne nekeuma ran en te inged ne Bitpahi ne egkelingakà ke buvungan ne ed-ingaranan te Uliwuwen. Midsuhù en ni Hisus ke deruwa ne edumdumaan din te ebpeunaan dan,

<sup>2</sup> ke sikandin te, "Una kew en be ketà te inged ne an te unaan ta, ne ketà te kebpekeuma niyu ne egkekita niyu se in-iket ne kudà wey ke nati rin. Ekari niyu be ne ewita niyu kayi," ke si Hisus.

<sup>3</sup> "Ne embiya ruen ed-insà keniyu ke maan ke ed-ekaran niyu ne iyan niyu kehiya te, 'Ke Kerenan dey se ebpegingawà kayi te egkeunturan din' ne segugoneey ne ibehy rin keniyu."

<sup>4</sup> Ne ned-ulaula ini su apew metuman ke impesurat te Eleleala dut te senge etew ne mibpelambas te lalag din rengan ne egkahi te,

<sup>5</sup> "Kehiya niyu diyà te minge etew te Hirusalim te, 'Ebpekeuma en ke datù niyu! Meamuk sikandin

ne ed-untud te nati te kudà, uya, ed-untud te anak te kudà, ke binatang ne eduranan.' "

<sup>6</sup> Tembù mid-una mid-ipanew ini se deruwa ne edumdumaan din ne midtuman dan ke migkahi ni Hisus.

<sup>7</sup> Ne mid-ewit dan en ini se kudà wey ke nati rin kayi te ki Hisus, ne midebpasan dan te kumbalà dan ne mid-untud en ketà si Hisus.

<sup>8</sup> Merakel ne minge etew ketà se midtulid te minge kumbalà dan te ebpepevayaan ki Hisus, ne ke ruma ne mibpenibpù dan te minge subpang ne rawunen su intulid dan diyà te ralan su ini ke tuus te adat te minge Hudiyanen dut te minge mepurù dan.

<sup>9</sup> Ne ke minge etew ne mid-una ki Hisus wey engketà ded ke midtundug kandin ne migkerag te,

"Edeyuen tew ke inenakan ni David!

Menu ma ke ebpeneuven te Eleleala

ini se midtendù din ne edatù te langun!



Edeyuen tew ke Eleteala!”

<sup>10</sup> Ketà te kedlud en ni Hisus te Hirusalim, ne mibmehurub ke langun ne menge etew dutun. “Engkey ini etawa?” ke sikandan.

<sup>11</sup> Midtavak ini se menge miduma ki Hisus te, “Si Hisus ini ne ebpelambas te Lalag te Eleteala ne riya ebpuun te Nesarit diyà te lusud te Gellia.”

*Mibpenegseg ni Hisus ke Ebpemendahang Diyà te Nekebpuru ne Valey te Eleteala*  
(*Marcos 11:15-19; Lucas 19:45-48; Juan 2:13-22*)

<sup>12</sup> Guna su nekeuma en si Hisus diyà te Hirusalim, ne midlusud sikandin diyà te Nekebpuru ne Valey te Eleteala ne mibpemenegseg din en ke menge etew ne ebpememasa wey ke menge ebpemendehang ketà. Ne mibpenunggad din ke menge lemisaan dut te menge etew ne ebpenambi te kureta wey ke menge ebpeminuuwan dut te menge etew ne ebpemendahang te menge melepati ne ibpemelengesa rut te menge Hudiyane diyà te Eleteala.

<sup>13</sup> Ne migkehiyan din sikandan te, “Duen en ura impesurat ne Lalag te Eleteala ne egkahi te, ‘Ini se baley ku ne ed-ingaranan te baley ne ebpengeningeniyen te menge etew.’ Ugaid ne sikiyu,” ke si Hisus, “ne mibaluy niyu en ini ne ubpaan te menge tenlimbungen!”

<sup>14</sup> Ne gewii te diyà si Hisus te Nekebpuru ne Valey te Eleteala ne mid-uvey kandin ke menge pisek wey menge pungkù ne neulian din.

<sup>15</sup> Ne negeepes nevenar ki Hisus ke menge mepurù te terebpelengesa wey ke menge meyerù te penduan te nekita ran ini se mekegeyip ne mid-ulaula ni Hisus wey ke menge vatà ne egkerag te kedeyù dan kandin te, “Edeyuen tew ini se inenakan dut te datù tew rengan ne si David!”

<sup>16</sup> Tembù be migkehiyan dan si Hisus te, “Menu, nerineg nu red ayan se migkahi ran?” “Nerineg ku,” ke si Hisus. “Ne maa, warà niyu bes mevasa ke impesurat ne Lalag te Eleteala ne egkahi te, ‘Misan ke deisek ne menge vatà ne mibpenurù te Eleteala te edeyù kandin.’ ”

<sup>17</sup> Ketà ne mid-awà en si Hisus se ebpendiyà te inged ne Bitanya ne dutun en mid-irehà.

*Ke Kayu ne ed-ingaranan te Igira ne Mibpenrewakan ni Hisus*  
(*Marcos 11:12-14, 20-24*)

<sup>18</sup> Nepawà ketà te kedlived dan diyà te Hirusalim, ne nevitil si Hisus.

<sup>19</sup> Ne nekekita sikandin te kayu ne igira uvey te ibpevyà dan. Mid-uvey rin su ed-inteng sikandin ke ruen bahas din, ugaid ne warà nekita rin su tibal rawun. Ne migkehiyan ni Hisus ke kayu te, “Igenat guntaani ne kenà ke en imbe ebpekevahas!” Arà dà ne nehangu en ke kayu.

<sup>20</sup> Nekita ini rut te menge edumdumaan din ne negeyip dan. Ke sikandan te, “Meambe ke megmehaan nehangu ke kayu?”

<sup>21</sup> “Sebenarvenar ne ini se egkehiyan ku keniyu,” ke si Hisus, “embiya edsarig kew te Eleteala te warà keduwaruwa te hinawa niyu, ne ebpekegaga kew te iring kayi te mid-ulaula ku ini kayi te kayu. Ne kenà ketà dà taman su misan ke kenà egkegaga te menusiya ne egkegaga niyu iring te egkehiyan niyu ini se buvungan te, ‘Awà ka keniyen ne riya ka te rahat,’ ne egketuman ini se egkehiyan niyu.

<sup>22</sup> Tembù be,” ke si Hisus, “idtarek ku keniyu te embiya ruen ebuyuen niyu te Eleteala, ne eheta niyu ke hinawa niyu te warà keduwaruwa rin ne egketelimà niyu ini.”

*Mid-insaan si Hisus Mekeatag te Kewagib din dut te Mibpenegseg Din ke Menge Ebpemendahang Diyà te Nekebpuru ne Valey te Eleteala*  
(*Marcos 11:27-33; Lucas 20:1-8*)

<sup>23</sup> Guna su nekeuma ran en maa diyà te Hirusalim, ne midlived en maa si Hisus ketà te Nekebpuru ne Valey te Eleteala. Gewii rin te ebpenurù kayi te lusud ne ruen menge mepurù te terebpelengesa wey menge pekilukesen te Hudiyane ne mid-uvey kandin ne mid-insaan dan si Hisus te, “Ini se mid-ulaula nu kayi te Nekebpuru ne Valey te Eleteala, engkey se kewagib nu te ed-ulaula te iring kayi? Ne engkey se mibehey keykew te kewagib?”

<sup>24</sup> Midtavak si Hisus te, “Duen seveka rà ne id-insà ku keniyu, ne embiya egketavak niyu ne idtarek ku keniyu ke engkey se mibehey kedi te kewagib kayi te mid-ulaula ku.

<sup>25</sup> Ente se mibehey ki Juan ke Ebpembunyag te kewagib te ebpembunyag, diyà be te Eleteala etawa kayi rà dè duen te menusiya?”

Ne mibpein-insee te ran te, “Engkey se idtavak tew? Su embiya iyan tew egkehiyen se, ‘Riyà ebpuun te Eleteala,’ ne ed-insà maa sikandin te, ‘Meambe ke warà kew mebperetiyyaya ki Juan?’

<sup>26</sup> Ugaid ne embiya egkahi ki te, ‘Kayi red ebpuun te menusiya,’ ne egkekeiran ki su mibperetiyyaya ke langun ne munge etew te mibpelambas te Lalag te Eleteala si Juan.”

<sup>27</sup> Ketà be ne midtavak dan ki Hisus te, “Kenà dey egketuenan.”

Ne migkahi rema si Hisus kandan te, “Embiya iring ketà, ne kenà ku rema egkehiyen ke engkey se mibehey kedì te kewagib te mid-ulaula kayi.”

*Ke Sempità ni Hisus Mekeatag te Deruwa ne Teleari ne Meama*

<sup>28</sup> Mibpenurù pà maa si Hisus te, “Peg-pegitunga niyu ke engkey se meana rin ini se sempità ku. Duen senge etew ne deruwa se anak din me meama. Mid-uvay rin ini se kakey ne migkahi te, ‘Gelevék ka, Mama, diyà te pemulaan ta.’

<sup>29</sup> “‘Ah, kenà a!’ ke se anak din. Ugaid ne nekepepegitung ded ne ketà ne mibpendiyà te pemulaan dan.

<sup>30</sup> “Ne mid-uvay rut te meama ini se ari ne anak din ne engketà ded maa ke migkahi rin. ‘Uya, Amà,’ ke se anak din, ‘ebpendiyan a.’ Ugaid ne warà medtuman.

<sup>31</sup> “Na, endei ve rapat kayi te deruwa ne teleari,” ke si Hisus, “se midtuman dut te suhù te amey ran?”

“Ke kakey,” ke sikandan.

“Idtarem ku keniyu,” ke si Hisus, “te ini se munge etew ne kenà meupiya kayi te etuvangan niyu iring te munge ebpevyad te buwis wey munge meritan ne warà en keeleran din ne ebpekring dut te kakey dut te teleari su edtuman dan guntaan te Lalag te Eleteala ne tembù be egkeuna ran keniyu ne ebpekelusud dut te munge etew ne Edetuan te Eleteala.

<sup>32</sup> Su mibpengkayi te keniyu si Juan ke Ebpembunyag,” ke si Hisus, “su ebpenurù te metidtu ne ralan diyà te Eleteala, ne warà kew mebperetiyyaya. Ugaid ne ini se ebpevyad te buwis wey ke munge meritan ne warà en keeleran din ne mibperetiyyaya ran mulà. Ne sikiyu, misan nekita niyu en te nesembian dan ke ulaula ran su sabap te kebperetiyyaya ran, ne warà kew mebpsendit wey mebperetiyyaya kandin.”

*Ke Sempità ni Hisus mekeatag te Menge Etew ne Pinetuganur te Pemulaan (Marcos 12:1-12; Lucas 20:9-19)*

<sup>33</sup> “Pemineg kew pà,” ke si Hisus, “te ruma pà ne sempità ku. Ruen senge etew ne ruen tanà din ne mibpemulaan din te wahed ne ed-ingaranan te paras. Ne mid-alad din arà, ne mibaal te edtehuan dut te egkekeres ne bahas te paras, ne midsebungan din te ebpeubpaan dut te ebpeventayen din. Ne ruen pinekamal din dut te impemula rin, ne arà pà ne mid-ipanew se ebpendiyà te meriyù ne inged.

<sup>34</sup> Guna su midsabpet en ke pinemula rin, ne midsuhù din ke munge edsugsuhuen din su ibpekuwa ke kandin ne umun.

<sup>35</sup> Ugaid ne nekeuma ini se midsuhù din, ne migeweran dut te pinekamal din ne mibedasan dan ne ruen mid-imetayan dan ne ruen mibpenrumbag dan te watu.

<sup>36</sup> Ne misan iring ketà, ne ruen pà maa midsuhù din ne merakel pà dut te neuna. Nekeuma ran ketà ne engketà ded lavew ke imped-ulaula rut te pinekamal te pemulaan.

<sup>37</sup> “Ketà te ketepusan en ne iyan din en midsuhù ne ke anak din. Ke hingginawa rin te, ‘Kenà egkepakey ne kenà dan ed-edatan ini se anak ku.’

<sup>38</sup> “Ugaid ne guna su nekeuma ini se anak din ne mibpeglelelahay ke munge pinekamal din te, ‘Ini en bes ke anak dut te kemuney kayi te tanà. Kuwa kew en su ed-imetayan tew su apey sikitew en se ebpekegkemuney kayi te tanà.’

<sup>39</sup> Arà dà ne migeweran dan ne miguyud dan diyà te luwal dut te pemulaan ne mid-imetayan dan en.

<sup>40</sup> “Na,” ke si Hisus, “ketà te ked-uli dut te kemuney te tanà, ne engkey ve se ibped-ulaula rin dut te pinekamal din?”

<sup>41</sup> Midtavak dan te, “Ebeyaan din arà se munge meraat ne etew ne ebpengimetayan din ne ebpekemalan din te ruma ne etew ne ebehey kandin te umun din ke egkeuma te kedsebet.”

<sup>42</sup> Ne migkahi pà maa si Hisus te, “Maa, warà niyu ves mevasa ke impesurat ne Lalag te Eleteala mekeatag te ini? Su nekahi ketà te,

‘Ke pelaus ne mid-eng-engkeran dut te munge etew ne ebpevaley su kunaan dan ke warà rantek din, ne iyan en iya ini nepemili ne segkad te valey.

Ini se mid-ulaula te Kerenan,  
ne mekegeyip nevenar!’

<sup>43</sup> “Igakahi ku keniyu,” ke si Hisus, “te ini se umun niyu kayi te Edetuan te Eleteala ne id-awà kayi te keniyu ne ibehey diyà te ruma ne menge etew ne ebperumaruma te Lalag te Eleteala.

[  
<sup>44</sup> Ne geina te siaken ini se segkad ne egkerupet ke langun ne egkeulug ketà, ugaid ne egkepipinì ke langun ne egkepilayan din.]”

<sup>45</sup> Guna su nerineg dut te menge mepurù te terebpelengesa wey ke menge Peresiya ini se sempità ni Hisus, ne netuenan dan te sikandan ke nesuhat ketà,

<sup>46</sup> tembù be ibpesigkem dan perem si Hisus. Ugaid ne neandek dan dut te merakel ne etew su mibperetiya ini se menge etew te ebpelambas te Lalag te Eleteala si Hisus.

## 22

*Ke Sempità ni Hisus Mekeatag te Kevuruan te Kewingan ne Ibpeiring Din dut te Kevuruan te Eleteala te menge Etew ne Edetuan Din*

*(Lucas 14:15-24)*

<sup>1</sup> Mibpenempità pà maa si Hisus te kebpenurù din kayi te menge etew.

<sup>2</sup> “Ke Kedatù te Eleteala dut te menge etew,” ke si Hisus, “ne iring kayi. Duen senge etew ne datù ne mibair te kevuruan te kegkawang te anak din ne meama.

<sup>3</sup> Ne midsuhù din ke menge edsugsuhuen din diyà te menge etew ne mid-inggat din te ebpesabut kandan te ibpetelavuk dan te kevuruan. Ugaid ne warà dan sehipaa ke menge edsugsuhuen.

<sup>4</sup> “Ketà ne midsuhù pà maa te ruma ne edsugsuhuen din se egkahi te, ‘Kehiyi niyu ke menge etew ne neinggat ku te ebpehendam en su nelutù en ke sapi wey menge nati. Kuwa kew en su ebpekaan en!’

<sup>5</sup> “Ugaid ne warà dan medsehipà su iyan dan midsinaru ke kandan ne ed-ululaan. Ini se senge etew ne mibpendiyà te pengengewiran din, ne ke senge etew ne diyà te tindà din,

<sup>6</sup> ne ruma pà dut te neinggat te datù ne migawed dut te menge edsugsuhuen din ne mibedasan ne mid-emetayan dan.

<sup>7</sup> Nerineg ini dut te datù ne neepes nevenar sikandin ne midsuhù din ke menge sundaru rin ne mibpeimetayan din arà se mid-imatey rut te edsugsuhuen din ne mibpevinsulan din ke inged dan.

<sup>8</sup> “Ne midtawag din ini se menge edsugsuhuen din ne migkahi te, ‘Nekepehendam en ke ibpekaan ku te kevuruan te kegkawang te anak ku, ugaid ne arà se menge etew ne mid-inggat ku ne kenà dan ebpekekaan su mid-engkenà dan dut te kineinggat ku kandan.

<sup>9</sup> Pekehaan kew tuntula niyu ke menge meluag ne dalan ne ebpevayaan te merakel ne etew ne inggata niyu ke langun ne menge etew ne egkeuma niyu te ibpetelavuk kayi te kevuruan.’

<sup>10</sup> Ketà ne mibpendiyà ke menge edsugsuhuen ne midtuntul dan ke dalan, ne langun ne neumaan dan ne meupiya se ulaula rin etawa meraan ne mid-inggat dan te edtelavuk te kevuruan. Guna su nekeuma ran, ne nepenù en ke baley dut te egkewingan.

<sup>11</sup> “Midlusud ini se datù ne mibair te kevuruan su ed-intengan din ke menge etew ne midtelavuk ne nekita rin ini se senge etew ne warà mekebevelegkas te belegkas ne idtelavuk te kewingan.

<sup>12</sup> ‘Mama,’ ke se datù, ‘engkey se kinepekelusud nu kayi te warà ka mibevelegkas te idtelavuk te kewingan?’ Ugaid ne warà migkahikahi ke meama.

<sup>13</sup> “Ketà ne migkehiyan dut te datù ke menge edsugsuhuen din te, ‘Bekua niyu ke belad din wey ke paa rin ne iantug niyu riyà te kerusireman. Ne ketà ne ebpekependerawit wey ebpekeinggitel.’ ”

<sup>14</sup> Ne migkahi pà maa si Hisus te, “Merakel ne menge etew se ed-inggaten te edlusud kayi te Edetuan te Eleteala, ugaid ne merelag se egkepemili din.”

*Edlitahen perem si Hisus dut te Menge Peresiya atag te Ked-insà dan Mekeatag te kebayaad te Buwis*

*(Marcos 12:13-17; Lucas 20:20-26)*

<sup>15</sup> Ketà ne mid-awà ke menge Peresiya ne mid-upakat dan te edseligkaten dan te menge insà si Hisus.

<sup>16</sup> Ne ruen en midsuhù dan diyà te ki Hisus ne menge edumdumaan dan wey menge sakup ni Hirudis. “Meyerù,” ke sikandan, “netuenan dey te edlalag ka te benar. Ne

ibpenurù nu ke benar mekeatag te kiyug te Eleteala rut te minge etew. Ne kenà ka egkepeneheewit dut te lalag te minge etew su warà etew ne ebpelebiyen nu.

<sup>17</sup> Kehiya nu kenami ke engkey se pegitungan nu kayi te id-insà dey kenikew. Maa ibpekerimpas kiyu ve dut te penduan tew embiya ebayad ki te buwis riyà te ratù tew diyà te inged ne Ruma, etawa kena?"

<sup>18</sup> Ugaid ne netueanan ni Hisus ini se meraat ne netahù te itungan dan ne migkahi te, "Sikiyu ne uvag kun ne ruen id-insà niyu kedi! Ugaid ne iyan se ebaal kew rà te ralan te kegkelitag niyu kediey!

<sup>19</sup> Peintenga a niyu kun te kureta ne ibayad te buwis!" Impekita ran kandin ke kureta, <sup>20</sup> ne migkahi sikandin te, "Engkey ki paras wey ngaran kayi?"

<sup>21</sup> "Paras wey ngaran dut te ratù tew kayi te inged ne Ruma," ke sikandan.

"Embiya iring ketà," ke si Hisus, "ne ivehey niyu diyà te datù ayan se buwis kandin, ne ivehey niyu riyà te Eleteala ke endei rema ke kandin."

<sup>22</sup> Neringe dan ini se migkahi ni Hisus ne ingkeinuinu ran nevenar, ne mid-ewaan dan en sikandin.

*Mid-insà ke minge Sadyusiyu ki Hisus Mekeatag te Kegkevanew te Minge Minatey (Marcos 12:18-27; Lucas 20:27-40)*

<sup>23</sup> Arà ne hewii ne ruen minge Sadyusiyu ne mibpengkayi te ki Hisus. (Ini se minge Sadyusiyu ke minge etew ne warà mebperetiyaya te egkevanew pà te Eleteala ke minge minatey.)

<sup>24</sup> "Meyterù," ke sikandan, "impenurù dengan ni Moises te, 'Embiya ruen meama ne ebpatay ne neketahak te esawa rin ugaid ne warà anak dan, ne ebpemeluwen dut te suled din ne meama su apey ruen ded anak dut te minatey ne ebpekesumpat.'

<sup>25</sup> Su ruen nekeubpà kayi," ke sikandan, "pitu ne meama ne telteleari ne mid-esawa en ke kakey, ugaid ne minatey te warà dan med-anak. Ne mibpemalu en dut te nesikupu rin arà se ipag dan.

<sup>26</sup> Ugaid ne minatey red dema te warà dan med-anak. Ne engketà ded dema ke iketelu. Ne engketà ded ke nesamà, langun dan te pitu ne etew se nekepemalu ketà te ipag dan, ugaid ne warà dan med-anak.

<sup>27</sup> Netaman ne minatey en ini se meritan.

<sup>28</sup> Ne ini ve se id-insà day keykew," ke se minge Sadyusiyu. "Embiya benar ne egkevanew red te Eleteala ke minge minatey keuremà, ne entei ve rapat kandan se tehiesawa ketà te meritan? Su langun dan te pitu ne telteleari ne nekedtundug se nekeesawa kandin."

<sup>29</sup> Ne migkahi si Hisus kandan te, "Warà en iya ebpekesuhat ne itungan niyu! Su warà niyu mesebuti ke impesurat ne Lalag te Eleteala, ne warà niyu mesebuti ke rekela ne gehem din.

<sup>30</sup> Su ketà te hewii ne kegkevanew te minge minatey, ne warà en kebpees-eseweey su iyan dan en egkeiringan ke minge suluhuen te Eleteala riyà te langit ne kenà ebpees-eseweey.

<sup>31</sup> Ne ini se id-insà niyu mekeatag te kegkevanew te minge minatey, ne maa warà niyu ves mevasa ke migkahi te Eleteala keniyu kayi te impesurat din? Su migkahi te,

<sup>32</sup> 'Siaken ke Eleteala ne ebpengerapen ni Abraham, ni Isaac, wey si Jacob.' Tembù be netueanan tew," ke si Hisus, "te misan minatey ran en ne biviyag dan pà diyà te etuvangan te Eleteala su iyan dà ebpekepengarap te Eleteala ke biviyag, kenà ke minatey."

<sup>33</sup> Guna su neringe ini dut te minge etew, ne negeyip dan nevenar dut te kebpenurù din.

*Duen Meyterù te Penduan ne Edlitag Perem ki Hisus atag te Insà Din ke Engkey se Pinekemepurù ne Penduan*

*(Marcos 12:28-34; Lucas 10:25-28)*

<sup>34</sup> Guna su neringe kayi te minge Peresiyu te nekepeeneng-eneng ke minge Sadyusiyu dut te penurù ni Hisus, ne mibpengkayi ran te ki Hisus.

<sup>35</sup> Senge etew kandan se edlitag ki Hisus dut te minge insà din su metmetau sikandin ne meyerù te penduan dan.

<sup>36</sup> "Meyterù," ke sikandin, "engkey ma rut te penduan tew se pinekemepurù te langun?"

<sup>37</sup> Ne midtavak si Hisus te, "Iamin nu ke hinawa nu te edlimù te Kerenan ne Eleteala nu, ne iamin nu ke baher nu wey ke itungan nu te ed-ulaula ke engkey se ebpekesuhat te hinawa rin.'

<sup>38</sup> Ini ke pinekemepurù ne penduan ne egkeuna rut te langun.

<sup>39</sup> Ne ini ke ikeruwa ne pinekemepurù dut te langun: 'Ikelimù nu ke ruma nu iring te kegkelimù nu te hinawa nu.'

<sup>40</sup> Ne langun te penduan ne intelaan ni Moises kenitew wey ke impenurù dut te mibpelambas te Lalag te Eleteala rengan ne kayi ebpuun se deruwa ini."

*Impesabut ni Hisus te Sikandin ke Impasad te Eleteala ne Ebayàbayà te Langun (Marcos 12:35-37; Lucas 20:41-44)*

<sup>41</sup> Ketà te kinekevurun te menge Peresiyu ne mid-insaan dan ni Hisus te,

<sup>42</sup> "Menu, engkey se pegitungan niyu mekeatag dut te Mesiyas, ini se Impasad te Eleteala rengan ne Ebperetuen te langun? Engkey ki inenakan sikandin?"

"Inenakan sikandin dut te ratù tew rengan ne si David," ke sikandan.

<sup>43</sup> "Benar," ke si Hisus, "ne geina te iring ketà ne meambe ke migkahi si David te arà se Impasad te Eleteala ne Ebperetuen te langun ne Kerenan din? Su midlumunan te Kedesenan ne Ebpetuntul te Menusiyà si David ne impesurat din te,

<sup>44</sup> " 'Migkahi ke Eleteala ketà te Kerenan ku te,

Kayi ka pinuu te rapit te egkekewanan ku

taman te ebpeggiekan ku

ke menge kunterà nu.'

<sup>45</sup> Na," ke si Hisus, "embiya ini ke nekahi ni David te arà se Impasad te Eleteala ne Ebperetuen te langun ne Kerenan din, ne maa egkepakey ve ne kayi red ini te inenakan din?"

<sup>46</sup> Ne warà etew ne ebpekekahi ketà. Ne inggenat dè be ketà ne warà en ebpeketikà ne ed-insà ki Hisus.

## 23

*Duen Imbaag ni Hisus Mekeatag te Ed-ul-ulaan te Menge Meyterù te Penduan wey ke Menge Peresiyu*

*(Marcos 12:38-39; Lucas 11:43, 46; 20:45-46)*

<sup>1</sup> Ne migkehiyan ni Hisus ke denda ne etew wey ke menge edumdumaan din te,

<sup>2</sup> "Ini se menge meysterù te penduan wey ke menge Peresiyu te ruen ketenged din te edseysey rut te Penduan ne intelaan ki Moises.

<sup>3</sup> Iyan iya se medtuman kew te langun ne penurù dan, ugaid ne kenà kew ed-iring dut te ed-ul-ulaan dan su kenà dan edtumanen ke ibpenurù dan te menge etew.

<sup>4</sup> Ebpekevahatan dan ke menge etew te penduan ne kenà dan egkegaga te edtuman, ugaid ne warà misan deisek dà ne idtavang dan te edtuman ketà.

<sup>5</sup> "Langun ne ed-ul-ulaan dan ne iyan dan ked-ulaula ne ibpereyùdeyù dan dut te menge etew. Intengi niyu ma ke derekelà ne imbeveinkeleng dan wey ke imbagkes te velad dan ne midtehuan te insurat ne Lalag te Eleteala! Ne engketà ded ayan se melayat ne peyapey te belegkas dan!

<sup>6</sup> Embiya edtelavuk dan te kevurunan ne riyà dan ebpinuu te insivey ne meupiya ne ebpepinuuwan te egkeedatan, ne embiya riyà dan en te valey ne ebpegedian te penduan dan ne ebpemili dan te meupiya ne ebpepinuuwan diyà te sineruwan.

<sup>7</sup> Iyan dan kiyug ne ed-edatan dan te menge etew riyà te kevurunan, ne kiyug dan dema ne ed-ingaranan te 'Meyterù.'

<sup>8</sup> "Ugaid ne sikiyu ve ne kenà kew peingaran te 'Meyterù,' su langun niyu ne iring te ebpenusuled su seveka rà ke Meyterù.

<sup>9</sup> Liyu rà te tuney ne amey niyu, ne kenà kew ed-amey te piya entei kayi te ampew te dunya su seveka rà ke amey niyu ne Eleteala riyà te langit.

<sup>10</sup> Ne kenà kew rema peingaran te Pengulu su seveka rà ke pengulu niyu ne arà dà se Mesiyas ke Impasad te Eleteala ne Ebperetuen te langun.

<sup>11</sup> Ne embiya ruen seveka keniyu ne egkiyug ne ebmepurù ne iyan iya se mebpeembavà te hinawa rin wey ebpevayàbayà dut te langun.

<sup>12</sup> Su piya engkey ne etew ne ebpepurùpurù te hinawa rin ne ibpevavà te Eleteala, ugaid ne piya engkey ne etew ne mepeembavà te hinawa rin ne ibpepurù sikandin te Eleteala."

*Mid-isuhat ni Hisus te Kewagib ke Menge Meyterù te Penduan wey Menge Peresiyu*

*(Marcos 12:40; Lucas 11:39-42, 52; 20:47)*

<sup>13</sup> Ne migkahi pà maa si Hisus te, "Mekeyruwiru kew ne menge meysterù te Penduan wey menge Peresiyu su edusaan kew dut te Eleteala! Uvag en kun ne eduma kew te kiyug te Eleteala! Ugaid ne ebelevahan niyu ke ibayà te menge etew ne ebpesakup perem te Eleteala. Sikiyu ne kenà kew ebpesakup dut te Kedatù te Eleteala, ne ed-alang kew pà maa dut te menge etew ne edlusud perem. [

<sup>14</sup> Mekeyruwiru kew ne minge meyerù te Penduan wey minge Peresiya su edusaan kew te Eleteala! Uvag en kun ne eduma kew te kiyug te Eleteala! Ne ebpedleyedley kew te kebpengeningeni niyu te Eleteala su uvag kun se rekela se sarig niyu te Eleteala. Ugaid ne kayi te ed-ul-ulaan niyu ne misan iring te edtavang kew te minge valu ne meritan, ne iyan niyu ma kedtavang su apey niyu meahew ke kearen dan.]

<sup>15</sup> “Mekeyruwiru kew ne minge meyerù te Penduan wey minge Peresiya su edusaan kew te Eleteala! Uvag en kun ne eduma kew te kiyug te Eleteala! Medmeriyu se edipanean niyu te tanà wey edlayag kew te rahat su ed-eneb te penurù niyu apey ruen ebpekeperumaruma keniyu. Ne embiya ruen ebpekeperumaruma keniyu, ne nasi en be maa ne warà pelahuy rin te ebpekependiyà te apuy nerakà dut te sikiyu.

<sup>16</sup> “Mekeyruwiru kew! Su iring kew te pisek ne edtuyuk te pisek ded dema! Mibpenurù kew te, ‘Embiya ruen etew ne idsesapà te edreviten din ke Nekebpuru ne Valey te Eleteala, ne misan kenà din edtumanen ne warà kereetayan din. Ugaid ne embiya edsesapà te edreviten din ke bulawan ketà te lusud te Nekebpuru ne Valey te Eleteala, ne iyan iya se medtuman sikandin te ini se insapà din.’

<sup>17</sup> Warà itungan niyu su kayi te ini se ed-ul-ulaan niyu ne iring kew te pisek! Meambe, endei rapit se mevahat ne idsesapà niyu, ke bulawan etawa ke Nekebpuru ne Valey te Eleteala? Su ini se Nekebpuru ne Valey te Eleteala ne berekat, ne nevaluy ne berekat ke bulawan su kayi intahù.

<sup>18</sup> Ne impenurù niyu rema te, ‘Embiya ruen etew ne idsesapà te edreviten din ke edanaan te ibpelengesa te Eleteala, ne misan kenà din edtumanen ne warà kereetayan din. Ugaid ne embiya ruen etew ne idsesapà te edreviten din ke indenà ne ibpelengesa, ne iyan iya se medtuman sikandin te ini se insapà din.’

<sup>19</sup> Benar iya ne iring kew te pisek! Meambe, endei rapit se mevahat ne idsesapà niyu, ke indenà ne ibpelengesa etawa ke edanaan te ibpelengesa? Su ini se edanaan se ibpelengesa ne berekat, ne nevaluy ne berekat ke langun ne indenà ne ibpelengesa ketà.

<sup>20</sup> Tembù be embiya ruen etew ne idsesapà te edreviten ke edanaan te ibpelengesa, ne ebpekeragkes en ke langun ne indenà ne ibpelengesa ketà.

<sup>21</sup> Engketà ded dema ke ruen etew ne idsesapà ne edreviten ke Nekebpuru ne Valey te Eleteala, kenà ke Nekebpuru rà ne Valey te Eleteala ke idsesapà din su elin dema ke Eleteala ne ed-ubpà ketà.

<sup>22</sup> Ne engketà ded dema ke ruen etew ne idsesapà ne edreviten din ke langit, ne kenà ke langit dà ke idsapà din su elin dema ke Eleteala su ketà ebpinuu se edatù te langun.

<sup>23</sup> “Mekeyruwiru kew ne minge meyerù te Penduan wey minge Peresiya su edusaan kew te Eleteala! Uvag kun ne eduma kew te kiyug te Eleteala! Ebehey kew te Eleteala te kandin ne umun ne ikesepulù dut te pinemula niyu ne peninù iring te tandlad wey bawing, ugaid ne warà niyu tumana ke didis en dut te Penduan. Su kenà metidtu ke ulaula niyu ne kenà kew egkeyru te minge ruma niyu, ne kenà kew egkeserihan. Benar ne ebehey kew te Eleteala te kandin ne umun, ugaid ne warà niyu ma tumana ke didis en dut te Penduan.

<sup>24</sup> Ne iring kew te pisek ne edtuyuk te pisek ded dema! Embiya idsempità ta ne iring te id-awà niyu ke rengit diyà te ed-inumen niyu kayi te betasan niyu te edtuman te kenà utew benar ne penurù te Penduan. Ugaid ne iring te ed-iveleng kew te dekelà ne binatang ne kemilu kayi te warà niyu kedtuman dut te didis en te Penduan.

<sup>25</sup> “Mekeyruwiru kew ne minge meyerù te Penduan wey minge Peresiya su edusaan kew te Eleteala! Uvag en kun ne eduma kew te kiyug te Eleteala! Su iring kew te minge basu wey pelatu ne midlinisan diyà te luwal, ugaid ne kayi te diralem niyu ne meredsik su iyan niyu ed-ul-ulaan ne edlimbung kew te minge ruma niyu ne ed-ahew kew te minge kearen dan.

<sup>26</sup> Sikiyu ne minge Peresiya, benar iya ne iring kew te pisek! Unai niyu te edlinis ini se meredsik ne kenà egkekita ne kayi te diralem niyu su apey ebmetidtu ini se ed-ul-ulaan niyu!

<sup>27</sup> “Mekeyruwiru kew ne minge meyerù te Penduan wey minge Peresiya su edusaan kew te Eleteala! Uvag en kun ne eduma kew te kiyug te Eleteala! Iring kew ma te simintù ne edtehuan te lungun ne mibintulaan te meputi su apey meupiya ne edtengtangan, ugaid ne diyà te lusud ne nepenù te minge tulán wey sahu.

<sup>28</sup> Ne iring kew ve ketà! Su iyan niyu ibpekita te minge etew ne metidtu kew, ugaid ne diyà te diralem niyu ne nepenù kew te meredsik su uvag en kun ne eduma kew te kiyug te Eleteala.”

*Migkehiyen ni Hisus ke menge Meyterù te Penduan wey ke Menge Peresiyu te Edusaan dan te Eleteala atag dut te Meraat ne Ed-ul-ulaan Dan*  
(Lucas 11:47-51)

<sup>29</sup> “Mekeyruwiru kew ne menge meysterù te Penduan wey menge Peresiyu su edusaan kew te Eleteala! Uvag en kun ne eduma kew te Eleteala! Su mibpengumbayaan niyu ke simintù ne edtehuan te lungun dut te menge mibpelambas te Lalag te Eleteala rengan, ne mideyreyanan niyu ke menge pantyun dut te menge metidtu.

<sup>30</sup> Ugaid ne egkahi kew te, ‘Embiya ketà key en te gewii rut te keep-epuan dey, ne kenà dey ed-ul-ulaan ke mid-ulaula ran ne kenà dey ed-imetayan ke menge mibpelambas te Lalag te Eleteala.’

<sup>31</sup> Ew, na tembù pà nekahi niyu arà su telimà niyu te sikiyu iya ke menge inenakan dut te mid-imatey ketà te menge mibpelambas te Lalag te Eleteala rengan!

<sup>32</sup> Na kua niyu en be, imesara ke meraat ne ulaula te menge keep-epuan niyu!

<sup>33</sup> “Iring kew te pispis te uled! Ebmenu kew te ed-elihu te kedusa keniyu diyà te apuy nerakà?

<sup>34</sup> Ne ebpeketaan ku keniyu te ruen etew ne edsuhuen ku kayi te keniyu ne ebpelambas te Lalag te Eleteala, menge etew ne dekelà se netueanan din mekeatag te Eleteala, wey menge etew ne ebpenurù. Ugaid ne ruen ed-imetayan niyu, ne ruen idlansang niyu riya te kayu, ne ebpembedasan niyu ke ruma diyà te lusud te baley ne ebpengedian te penduan niyu, wey ke ruma ne ebpenuntulen niyu riya te menge inged su ebpemekeiran niyu.

<sup>35</sup> Tembù be edusaan kew te Eleteala atag dut te kineimatey te langun ne menge etew ne kenà egkevenaran igenat dut te kineimatey ki Abel taman en dut te kineimatey ki Zacarias ke anak ni Berekiyas ne mid-imetayan te keep-epuan niyu diyà te elet te edenaan te ibpelengesa te Eleteala wey ke mibpheletan diyà te Nekebpuru ne Valey te Eleteala.

<sup>36</sup> Sebenarvenar ne ini se egkehiyen ku keniyu,” ke si Hisus, “sikiyu ne menge etew guntaan, ne igkeragkes kew te Eleteala te kedusa rin dut te kinepengimatey ran dengan.”

*Bayuk ni Hisus te Kegkerurunù din dut te Menge Mehinged te Hirusalim*  
(Lucas 13:34-35)

<sup>37</sup> “Ey, igkerurunù ku sikiyu ne menge mehinged te Hirusalim!

Su sikiyu ke mibpengimatey  
te menge etew ne mibpelambas te Lalag te Eleteala,  
wey mibpenrumbag niyu te batu  
ke menge etew ne midsuhù te Eleteala kenian te keniyu!  
Kenà kepipira ku rà perem eburuna sikiyu  
su edtugenuren ku sikiyu  
ebpekeiring te upa ne edlekup te anak din,  
ugaid ne kenà kew ebpelekup kediey!

<sup>38</sup> Na guntaan ne ed-ewaan en te Eleteala ke inged niyu.

<sup>39</sup> Ne ini se igkahi ku keniyu,  
igenat guntaani ne kenà a niyu en egkekita  
taman te egkeuma arà se hewii  
ne ebpekekahi kew te, ‘Edeyuen tew ini se nekeuma,  
ne midsuhù te Eleteala ke Kerenan tew.’ ”

## 24

*Migkahi ni Hisus ke Kegkerundus Dut te Nekebpuru ne Valey te Eleteala diyà te Hirusalim*

(Marcos 13:1-2; Lucas 21:5-6)

<sup>1</sup> Guna su mid-awà en si Hisus ketà te Nekebpuru ne Valey te Eleteala ne mid-uey ke menge edumdumaan din ne midterù dan ke menge pengawid dut te melmeluag ne Nekebpuru ne Valey te Eleteala.

<sup>2</sup> “Uya,” ke si Hisus, “intengì niyu ma ini se rekelà ne valey ne batu ke pengengawid din. Su idtarem ku keniyu te ruen hewii ne egkeuma ne ini se egkekita niyu ne egkerundus ne warà seveka rà ne watu ne egkesamà su egkevurahey an langun.”

*Migkahi ni Hisus ke Keresayan wey Kebpekesakit ne Ebpekeuma kayi te Menge Etew*  
(Marcos 13:3-13; Lucas 21:7-19)

<sup>3</sup> Guna su riyen dan en te buvungan ne ed-ingaranan te Ulivuwen ne mibpinuu si Hisus, ne mid-uey kandin ke menge edumdumaan din te sikandan dà. “Ikahi nu kenami,” ke sikandan, “ke keenu egketuman ini se migkahi nu ne kegkerundus dut

te Nekebpuru ne Valey te Eleteala. Ne engkey se idtuus dey su apew rey egketueni ke mehaan en egkepupus ini se kelibutan ne egkeuma arà ke hewii ne edlived ka kayi te ampew te dunya?"

<sup>4</sup> Ne migkahi si Hisus te, "Uram kew su apew kew kenà meekali dut te menge etew ne metau ne edliyuk.

<sup>5</sup> Su merakel se edlepew ne engkungkun ne siaken en ne egkahi ran te, 'Siaken en ini ke Impasad te Eleteala ne Edatù te langun ne menge etew!' Ne ketà," ke si Hisus, "ne merakel ne menge etew se ebpekeperetiyya te tarù dan.

<sup>6</sup> Ne egkerineg niyu se ebpevunbunuey diyà te meriyù merani, ugaid ne kenà kew meandek. Su ini pà iya se egkeuna ne egked-ulaula, ugaid ne warà pà meuma ke hewii te kebpuusa kayi te kelibutan.

<sup>7</sup> Ebpekekebunuey pà ke idsenge inged ne engketà ded dema ke idsenge retuan. Ne egetab se bitil wey edlinug te mevaher te piya endei en.

<sup>8</sup> Ugaid ne rudsuan dà ini dut te keresayan ne egeramen niyu, iring dut te belilit te meritan ne ed-anak.

<sup>9</sup> "Egkeepesan kew te langun ne menusiya su atag te keduma niyu kediey. Ebpenigkemen kew ne ibpalad kew riyà te ruen ketengdanen din ne edresayan kew nikandan wey ruen pà ebpengimetayan.

<sup>10</sup> Ketà te arà ne hewii ne merakel se edlekà te kebperetiyya ran kediey, ne ebpeked-epesey ran wey ebpeul-uluhey ran diyà te ruen ketengdanen din.

<sup>11</sup> Ne merakel se edlepew ne engkungkun ne ebpelambas te Lalag te Eleteala, ne merakel se menge etew ne ebpekepehimbena dut te tarù dan.

<sup>12</sup> Ne tehaad te ed-iseg ke meraat ne ulaula kayi te ampew te dunya, ne edlugkà ke limù dut te merakel ne etew.

<sup>13</sup> Ugaid ke etew ne misan egkerasey en sikandin ne kenà edsuwey dut te keduma rin kediey taman te ini pà sikandin te ampew te dunya, ne ebpekehaked te umur ne warà edtemanan din.

<sup>14</sup> Ne iyan pà ibpeuna ibpesabut kayi te tivuuk ne kelibutan ini se Meupiya ne Tudtul mekeatag te Kedatù te Eleteala dut te menge etew ne arà pà ne egkeuma ke hewii te kebpuusa kayi te kelibutan."

*Imbaag ni Hisus Mekeatag te Kebpekeuma Dut te Ebpekekaid ne Ebpekelusud Diyà te Nekebpuru ne Valey te Eleteala su Edsevuen Din ke Ed-edatan  
(Marcos 13:14-23; Lucas 21:20-24)*

<sup>15</sup> Ne migkahi pà maa si Hisus te, "Ruen migkahi ni Daniel rengan, senge etew ne mibpelambas te Lalag te Eleteala, te ruen ebpekeuma ne 'Ebpekekaid' ne ebpekelusud diyà te Nekebpuru ne Valey te Eleteala su edsevuen din ke ed-edatan. (Sikiyu ne ebpekevasa kayi te insurat din ne pegpegitunga niyu ke meana rin.)

<sup>16</sup> Ketà te egkeuma arà ne hewii ne ke menge etew ne riyà te pruvinsiya te Hudiya ne mebpelahuy ran diyà te buvungan.

<sup>17</sup> Ne ke etew ne riyà te ruwangen te valey rin ne kenà din en lilingaya ke keleglahan din su mebpelahuy en sikandin.

<sup>18</sup> Ne ke etew ne riyà te pengengewiran din, ne kenè en med-uli se egkuwa te kumbalà din.

<sup>19</sup> Ne egkeyruwan ke menge meritan ne mehingey te arà ne hewii wey ke menge meritan ne edseruru.

<sup>20</sup> Ipengeningeni niyu te Eleteala te kenà ini med-ulaula te hewii te kedrengreng etawa Hewii te Id-imeley!

<sup>21</sup> Su ini se kemeresayan ne ebpekeuma ne warà repeng din igenat dà dut te aney en limbaha ini se kelibutan, ne kenà en egkerepengan te misan keenu.

<sup>22</sup> Ugaid ne sabap dut te raat te nanam te Eleteala ne migkurangan din en ke menge hewii rut te kemeresayan su embiya warà, ne warà egkesamà ne biviyag. Uya, su geina ne rekèlè te limù din dut te menge etew ne mibpemili din, ne migkurangan din ke hewii rut te kemeresayan.

<sup>23</sup> "Su ketà ne hewii embiya ruen egkahi te, 'Ini en ke Impasad te Eleteala ne Ebperetuen te langun ne menge etew!' etawa ruen egkahi te, 'Ayan en sikandin!' ne kenà kew peretiyya su apew kew kenà egkelimbungi.

<sup>24</sup> Su ruen ebpenlepew ne menge etew ne engkungkun te sikandan ke Impasad te Eleteala ne Ebperetuen etawa sikandan ke ebpelambas te Lalag te Eleteala. Ne ebpekita ran te mekegeyip ne ed-ul-ulaan su apew ran perem meekali ini se menge etew ne mibpemili te Eleteala.



<sup>25</sup> Tembù be idtarem ku keniyu ini," ke si Hisus, "su apew niyu meingati te kenà pà ini egked-ulaula.

<sup>26</sup> "Su embiya ruen egkahi keniyu te, 'Diyen en te tanà ne kenà egkeubpaan te minge etew ini se Impasad te Eleteala ne Ebperetuen,' ne kenà kew peretiyaya ne kenà kew pendiyà. Etawa ruen egkahi te, 'Kayi en sikandin ed-eles-eles su warà pà mibpepayag,' ne kenà kew peretiyaya.

<sup>27</sup> Su ketà te kedlived te Impeanak te Menusiyà kayi te ampew te dunya ne iring te kehaan din te kilat ne ebpeketayew te langun ne linengkevan egenat te edsilaan taman te edsenlepan.

<sup>28</sup> "Su iring dut te besaanen ne egkahi te, 'Piya endei se ruen minatey rin, ne ketà eburun ke minge uwak.' "

*Tuus te Mehaan en ke Kedlived dut te Impeanak te Menusiyà kayi te Ampew te Dunya (Marcos 13:24-27; Lucas 21:25-28)*

<sup>29</sup> "Ne ketà ke egkeipus en arà ne minge hewii te kemeresayan," ke si Hisus,

" 'Ne ebmerusirem ke andew,

ne kenà en edsilà ke vulan,

ne ebpeungeulug ke minge bituen genat te langit,

ne egkeparin en dut te netehuan din ke edtenuran ne minge bituen.'

<sup>30</sup> "Ne ketà ne edlepew riyà te langit ke tuus te edlived en ke Impeanak te Menusiyà. Ne egkekita te langun ne menusiya te ebpekeuma en sikandin ne egkerumaan te sehulapun, ne egkekita rema ke gehem din wey raman din ne ed-anlag, ne ketà ne ebpeninehew ke minge etew.

<sup>31</sup> Ne ibperahing en ke budyung ne edsuhuen din ke minge suluhuen din diyà te epat ne pediyulu te dunya su apew ran egkevurun ke langun ne mibpemili te Eleteala igenat te pehiliran taman te binunsuran."

*Ke Sempità ni Hisus Mekeatag te Kayu ne Igira ne In-upama Rin te Tuus te Mehaan en te Kedlived Dut te Impeanak te Menusiyà*

*(Marcos 13:28-31; Lucas 21:29-33)*

<sup>32</sup> "Keniyen niyu rè ma te kayu ne igira," ke si Hisus, "su ruen ibpenurù din keyta. Embiya nekepasad en te edrawrew ne ed-umbus en wey ebpenlumbey, ne tuus te ed-andew en.

<sup>33</sup> Ne engketà ded dema embiya egkekita niyu en se netuman en ke langun ne tuus ne impenurù ku keniyu, ne egketuenan niyu te mehaan en se kedlived dut te Impeanak te Menusiyà.

<sup>34</sup> Tentenuri niyu ini se egkehiyen ku keniyu su ruen pà kayi te keniyu guntaani ebpekesaut pà ketà te kegetuman din ini.

<sup>35</sup> Su egkeawà ini se langit wey tanà ugaid ne ini se migkahi ku ne kenà bulug ebperis."

*Warà Metueni ke Hewii te Kedlived dut te Impeanak te Menusiyà Kayi te Ampew te Dunya*

*(Marcos 13:32-37; Lucas 17:26-30, 34-36)*

<sup>36</sup> "Ugaid ne ini se idtarem ku keniyu," ke si Hisus, "warà netau te hewii etawa endei egketahù ke andew ke kedlived kayi ke Impeanak te Menusiyà su ke Amey ku rà ne Eleteala. Misan ke suluhuen te Eleteala diyà te langit wey misan dema siaken ke Anak te Eleteala ne warà netau ke keenu se edlived din.

<sup>37</sup> Su ketà te kedlived dut te Impeanak te Menusiyà kayi te ampew te dunya, ne ebpekeiring ke minge ed-ul-ulaan te minge etew rut te ed-ul-ulaan te minge etew rengan te gewii pà ni Noa.

<sup>38</sup> Su rengan te warà pà ke dalem, ne warà sanggel dan se ebpegevurun su egkaakaan dan ne ebpenginum wey ebpees-eseweey taman te arà en ne hewii te midlusud en ensi Noa ketà te rekèl ne avang ne ed-ingaranan te arka.

<sup>39</sup> Ugaid ke minge etew ne warà utew mekesabut ke engkey se egketemanan dan taman te netekew en ke dalem ne neherà dan langun. Ne iring din ded be ketà ke edlived ke Impeanak te Menusiyà kayi te ampew te dunya.

<sup>40</sup> Su ketà ne hewii ke ruen deruwa ne meama ne ebpeemungey diyà te pengengewiran, ebpekeruma kedi ke senge etew ne egketahak ke seveka.

<sup>41</sup> Engketà ded dema ke ruen deruwa ne meritan ne ebpeemungey te egaling, ne ebpekeruma kedi se senge etew ne egketahak ke seveka.

<sup>42</sup> "Uram kew ve ne ebpenehana kew en, su warà niyu metueni ke hewii ne edlived ke Kerenan niyu.

<sup>43</sup> Ugaid ne ini se idtahù niyu te hinawa," ke si Hisus, "embiya ebpekeingat ke kemuney te valey ke keenu ebpekeuma ke tekawen, ne ebpenehana neraan sikandin su apey kenà ebpekelusud te valey rin ke ebpenakew.

<sup>44</sup> Ne engketà kew red dema, penehena kew neraan su ebpekeuma ke Impeanak te Menusiyà dut te endei se netehuan te andew ne kenà niyu ebpenerengen."

*Ke Sempità ni Hisus Mekeatag te Edsugsuhuen ne Ebpekemalen ne Meperumaruma te Idsuhù Kandin wey ke Kenà Meperumaruma*

*(Lucas 12:41-48)*

<sup>45</sup> Ne ketà ne mibpenempità si Hisus te, "Ke edsugsuhuen ne egkedserihan wey metmetau su edtuman dut te edsuhù kandin, ne ebpekemalen en dut te ruma ne edsugsuhuen. Ne sikandin se ebehey te egkekaan dut te ruma ne edsugsuhuen ketà te kegkaan dan.

<sup>46</sup> Meupiya nevenar se hinawa dut te edsugsuhuen ne ebpekemalen ke ebpekeuma ke ebpengemuney kandin ne iyan din egkekita se midtuman din ke langun ne insarig kandin.

<sup>47</sup> Idtarem ku keniyu," ke si Hisus, "te ini se edsugsuhuen ne ebpekemalen ne midtuman te langun ne insarig kandin, ne sikandin en se ebpekekamal dut te langun ne kearen te ebpengemuney kandin.

<sup>48</sup> Ugaid ne embiya kenà meupiya ne edsugsuhuen su warà te hinawa rin ke insuhù kandin ne kehingginaawa rin te, 'A kalu ke meuhet pà ebpekeuma ke ebpengemuney kenami.'

<sup>49</sup> ne ketà ne mibpemedasan din en ke ruma ne edsugsuhuen ne migkaakaan dè be sikandin wey ebpinginum elin dut te menge hubug.

<sup>50</sup> Ne ketà ne netekew mekeuma ini se ebpengemuney kandin te hewii ne warà din penerenga su warà din metueni ke endei egketahù ke andew te kedlived din.

<sup>51</sup> Ne ebpekepesangan sikandin te edrasey dut te ebpengemuney kandin su idragkes sikandin dut te menge meraat ne etew ne engkungkun ne eduma te kiyug te Eleteala. Ne ketà ne ebpekependerawit wey ebpekengingitel."

## 25

*Ke Sempità ni Hisus te Sepulù ne Menge Raha ne In-upama rin dut te Menge Etew ne Egkiyug ne Eduma te Edetuan te Eleteala*

<sup>1</sup> Ne mibpenempità pà maa si Hisus te, "Ketà te edlived ku kayi te ampew te dunya, ne ke menge etew ne egkiyug ne ebpekiduma dut te menge etew ne Edetuan te Eleteala ne iring kayi. Ruen sepulù ne etew ne menge raha ne ebpengemkem te sulù dan su edtelevuken dan ini se kenakan ne ibpengesawa.

<sup>2</sup> Lelima kandan se lengab wey lelima red maa se bereitungan ebpenehana.

<sup>3</sup> Ini se lelima ne lengab ne migkuwa ran te sulù, ugaid ne warà lana ne mid-ewit dan ke egkeibperan ke sulù dan.

<sup>4</sup> Ugaid ke lelima ne bereitungan ne mid-ewit dan mulà te edtehuan te lana.

<sup>5</sup> Ne nelangan se kebpekeuma rut te kenakan ne ibpengesawa, ne edtureturen en ke menge raha ne edtahad ne nekelipereng dan en.

<sup>6</sup> "Ne ketà te edluuk en ke kerukileman ne ruen migkerag te, 'Ini en ke kenakan ne ibpengesawa! Pengkayi kew en su sinuhunga niyu en sikandin!

<sup>7</sup> "Nekehimerat ini se sepulù ne menge raha ne mibpengumbayaan dan ke sulù dan.

<sup>8</sup> Na, neibperan en te lana ini se sulù dut te lelima ne lengab ne migkahi ran en diyà te menge ruma ran te, 'Behayi key pà te lana su egkeevukan en ini se sulù dey.'

<sup>9</sup> " 'Kenà egkepakey,' ke se bereitungan ne menge raha, 'su kenà ebpekegaga kenitew ini. Pendiya kew te tindà ne pemasa kew.'

<sup>10</sup> "Ketà ne mibpendiyan en te tindà ke lelima ne menge lengab. Ne lius dan dà ne nekeuma en ke kenakan ne ibpengesawa. Tembù be ke lelima rà ne etew ke nekepenehana ne nekeruma dut te kenakan diyà te baley ne egkewingan. Guna su nekepemenayik dan en ne mibpintuan en ke gumawan.

<sup>11</sup> "Ne iseg-iseg ne nekeuma en ini se lelima ne menge raha ne lengab ne mibpenehetiat dan en se egkahi te, 'E, Mama, pelusura key.'

<sup>12</sup> "Ugaid ne migkahi ke kenakan ne ibpengesawa te, 'Kenà, su kenà ku egketuenan sikiyu.'

<sup>13</sup> "Iring kayi," ke si Hisus, "ke ed-ul-ulaan te menge etew ketà te kedlived ku kayi, tembù be layun kew pempenehana su warà niyu metueni ke hewii etawa endei egketahù ke andew te kebpekeuma ku."

*Ke Sempitā ni Hisus Mekeatag te Menge Edsugsuhuen ne midserihan te kureta su Ebpeisehen ne In-upama rin dut te Menge Etew ne Egkiyug ne Eduma te Edetuan te Eleteala (Lucas 19:11-27)*

<sup>14</sup> Ne mibpenempitā pā maa si Hisus te, “Ini se kedlived ku kayi te ampew te dunya ne ebpekeiring te senge etew ne mibpendiyā te meriyū ne inged. Ne ketā te warā pā mekehenat ne midtawag din ke munge edsugsuhuen din ne insarig din kandan ke kearen din.

<sup>15</sup> Uman senge etew kandan ne mibehayan din te endei se taman ne egkegaga rin. Kayi te senge etew ne dekelā se egkegaga rin, ne mibehayan din te lelima nengivu. Kayi te ruma ne mibehayan din te deruwa nengivu su arā se egkegaga rin. Ne ketā te iketelu ne mibehayan din te sengivu su arā dema ke egkegaga rin. Ne ketā ne mid-ipanew en sikandin.

<sup>16</sup> Ini se edsugsuhuen ne nekekuwa te lelima nengivu, ne midahewrahew en migkuwa te dehanan din ne netaman ne nekeuntung en sikandin te lelima pā nengivu.

<sup>17</sup> Ne engketā ded dema ke edsugsuhuen ne nekekuwa te deruwa nengivu, su nekeuntung sikandin te deruwa pā nengivu.

<sup>18</sup> Ugaid ne ini se edsugsuhuen ne migkuwa te sengivu, ne migkekalut dā ne inleveng din ke kureta ne insarig kandin.

<sup>19</sup> “Guna su neuhet en ne mid-uli en ke ebpengemuney kayi te munge edsugsuhuen. Ne midtawag din sikandan su ed-intengan din ini se insarig din kandan.

<sup>20</sup> Nekeuma ini se edsugsuhuen ne midserihan te lelima nengivu ne migkahi te, ‘Kerenan, ini en ke lelima nengivu ne insarig nu kedi, ne ruen pā ini lelima nengivu ne neuntung ku keniyān te kureta nu ne impemuunan ku te kedtītindātindā ku.’

<sup>21</sup> “Migkahi ini se ebpengemuney te, ‘Ara be! Meupiya ka su mibpegelep ke ves su midtīnidtuwanan nu ini se insarig ku keykew. Geina te egkeserihan ka te deisek ne kureta, ne ed-umanan ku pā ke idsarig ku kenikew te rekelā pā. Pengkayi ka su apey ka ebpekeamung te kegkehalew ku!

<sup>22</sup> “Ne midlusud en maa ke edsugsuhuen ne midserihan te deruwa nengivu ne migkahi te, ‘Kerenan, ini en ke deruwa nengivu ne insarig nu kedi, ne ruen pā ini deruwa nengivu ne neuntung ku keniyān te kureta nu ne impemuunan ku te kedtītindātindā ku.’

<sup>23</sup> “Migkahi ini se ebpengemuney te, ‘Ara be! Meupiya ka su mibpegelep ke ves su midtīnidtuwanan nu ini se insarig ku keykew. Geina te egkeserihan ka te deisek ne kureta, ne ed-umanan ku pā ke idsarig ku kenikew te rekelā pā. Pengkayi ka su apey ka ebpekeamung te kegkahalew ku!’

<sup>24</sup> “Ne midlusud en maa ke edsugsuhuen ne midserihan te sengivu ne migkahi te, ‘Kerenan, warā ku ipemuunan ke kureta nu te kedtītindātindā su netuenan ku te memasang ka ne etew. Ebpepemulaan nu ke munge edsugsuhuen nu su apey ka ebpekekuwa kayi te helevek dan. Ne ed-untung ka te kenā keykew ne helevek ke midtītindātindā.

<sup>25</sup> Neandek a kenikew ne inleveng ku rā ini se kureta nu. Ini red ke kureta ne insarig nu kediey.’

<sup>26</sup> “ ‘Warā rantek nu ne pehulen ne edsugsuhuen!’ ke se ebpengemuney. ‘Netuenan nu ves te ebpepemulaan ku ke munge edsugsuhuen ku su apey a ebpekekuwa te helevek dan, ne ed-untung a te kenā kedi ne helevek te editindātindā.

<sup>27</sup> Ne meambe ke warā nu intahū diyā te bangkū ini se kureta ne insarig ku kenikew su apey ketā te kedlived ku ne egketelimā ku ke kureta ku te ruen iseg din?’

<sup>28</sup> “Ne migkahi ke pengemuney kayi te ruma ne edsugsuhuen din te, ‘Kua niyu arā se kureta ne keniyān te kandin ne ivehey niyu ketā te edsugsuhuen ne mibpeiseg te sepulū nengivu ini se kureta rin.

<sup>29</sup> Su ke etew,’ ke si Hisus, ‘ne egkeserihan dut te insarig kandin, ne ed-umanan pā apey edsawadsawad pā ke kandin. Ugaid ke etew ne kenā egkeserihan, ne ed-ewien pā misan ke reisek ne insarig kandin.

<sup>30</sup> Ne ini se edsugsuhuen ne warā rantek din ne iantug niyu ipekeriyū diyā te merusirem, ne ketā ebpekependerawit wey ebpekengingitel.’ ”

*Kedenā ni Hisus te Kukuman Dut Impeanak te Menusiyā ketā te Kedlived Din Kayi te Ampew te Dunya*

<sup>31</sup> “Ketā te edlived kayi te ampew te dunya,” ke si Hisus, “ke Impeanak te Menusiyā ne edumaan te langun ne munge suluhuen din, ne ebpinuu sikandin ketā te ebpinuwan te punggus ne ratū su edatū te langun ne menusiyā.

<sup>32</sup> Ne eburunen din ke langun ne menusiya diyà te etuvangan din, ne ketà ne ebpedisivayen din te deruwa ne puntuk ne ebpekeiring dut te tumetuganur ne ebpemilien din ke bilibili ne idsivey rin ke kambing.

<sup>33</sup> Ne ke menge etew ne ebpekeiring te bilibili su metidtu ne kayi rin idtahù te egkekewanan din, ne ke menge etew ne ebpekeiring te kambing ne kayi rin te egkehivang din.

<sup>34</sup> "Ne egkahi en ini se punggus ne ratù kayi te menge etew te egkekewanan din te, 'Sikiyu ne mibehayan te keupianan dut te Eleteala ne Amey ku, ne lusud kew dut te Kedetuan te Eleteala ne impenehana keniyu igenat dut te kinelimbaha te kelibutan.

<sup>35</sup> Su ketà te nevitil a ne mibehayan a niyu te egkekaan, ne nemeraan a ne pineinum a niyu. Ne ketà te nekeuma a riya te keniyu ne misan kenà a niyu egkekilala ne pinepemenayik a niyu.

<sup>36</sup> Ne ketà te warà belegkas ku, ne mibehayan a niyu te belegkas. Ne nekedaru a, ne midtuganur a nikiyu. Ne nevilanggù a, ne midlauly a nikiyu.'

<sup>37</sup> "Ne egkahi ini se menge metidtu kayi te egkekewanan te, 'Kerenan, keenu ka nevitil ne pinekaan dey sikuna, etawa nemeraan ka ne pineinum dey sikuna?

<sup>38</sup> Keenu ka mibpengkayi te kenami ne misan warà dey mekilala sikuna ne pinepemenayik dey sikew? Ne keenu ka mewerai te belegkas ne mibehayan day sikuna? <sup>39</sup> Keenu ka medaru etawa nevilanggù ne midlauly rey sikuna?'

<sup>40</sup> "Ne egkahi ke punggus ne ratù te, 'Sebenarvenar ne ini se egkehiyen ku, ketà te mid-ulaula niyu ini diyà te misan engkey dut te kevevaan en ne eduma kedi ne iring te mid-ulaula niyu ini kayi te kediey!'

<sup>41</sup> "Ne ketà ne egkehiyan din ke menge etew kayi te egkehivang din te, 'Sikiyu ne mibpenrewakan te Eleteala su nesuhat kew te sakit te hinawa rin, awà kew kayi te kediey! Pendiya kew te apuy nerakà ne kenà egkeevukan ne impenehana ki Setanas ke datù te pekaid wey ke menge sakup din.

<sup>42</sup> Su nevitil a ne warà a niyu behayi te egkekaan, ne nemeraan a ne warà a niyu peinama.

<sup>43</sup> Ne ketà te nekeuma a riya te keniyu, ne warà a niyu pepemenayika. Ne warà belegkas ku, ne warà a niyu behayi. Nekedaru a, ne warà a niyu tugenura. Nevilanggù a, ne warà a niyu leuya.'

<sup>44</sup> "Ne ketà ne egkahi ini se menge etew kayi te egkegivaang te, 'Kerenan, keenu ka nevitil etawa nemaaran, etawa nekeuma ka kayi te kenami, etawa warà velegkas nu, etawa nekedaru ka, etawa nevilanggù ka ne warà key medtavang keykew?'

<sup>45</sup> "Ne egkahi ke punggus ne ratù te, 'Sebenarvenar ne ini se egkehiyen ku keniyu, uman kew warà medtavang dut te kevevaan en ne eduma kedi ne iring te mid-ulaula niyu ini kayi te kediey!'

<sup>46</sup> "Tembù be," ke si Hisus, "ini se menge etew ne ibpependiya te apuy nerakà su edusaan te warà edtemanan din. Ne ini se menge metidtu ne ibpependiya te surugà su ruen umur dan ne warà edtemanan din."

## 26

*Mibentaan ke menge Mepurù te Terebpepengesa wey ke menge Egkeunutan te Hudiyanen te Kedsigkem ki Hisus su Ebpeimetayan*

*(Marcos 14:1-2; Lucas 22:1-2; Juan 11:45-53)*

<sup>1</sup> Guna su nekeipus si Hisus se ebpenurù ne migkehiyan din ke edumdumaan din te,

<sup>2</sup> "Netuenan niyu te deruwa rà ne hewii ne kegkeuma ke Pista ne edtenuran tew te Kedsehari te Suluhuen dut te menge apù tew rengan. Ne arà en ke kebpalad dut te Impeanak te Menusiya diyà te menge etew ne ibpelansang en diyà te pinebelavag ne kayu."

<sup>3</sup> Ne arà dema ne hewii ne miburun ke menge mepurù te terebpepengesa wey ke menge pekilukesen te Hudiyanen diyà te turuhan ni Kayipas, ke pinekemepurù dut te langun ne terebpepengesa

<sup>4</sup> su ebpemengà dan te ralan te kedsigkem dan ki Hisus te kenà egketuenan dut te menge etew su apey ran ebpeimetayi.

<sup>5</sup> "Ugaid ne iyan be kayi se kenà ta ini ed-ul-ulaan te ebpekeatuk dut te pista," ke sikandan, "su kema ke egkekita rut te menge etew ne egkeepes dan keytew ne egkehuvut en ketà."

*Mibperiyemutan en Neraan ke Lawa ni Hisus te Kedleveng Kandin*

*(Marcos 14:3-9; Juan 12:1-8)*

<sup>6</sup> Guna su riyà si Hisus te inged ne Bitanya ne riyà sikandin te valey ni Simon, senge etew ini ne kevuwaen muna pà te it-it ne neulian.

<sup>7</sup> Gewii te egkaan si Hisus ne nekeuma en ini se meritan ne mid-ewit te pelenaan ne mibeelan te elibastru ne midtehuan te periyemut ne mepurù nevenar. Ne mid-uey en kandin ne imbusbus din en ke periyemut kayi te ulu ni Hisus.

<sup>8</sup> Nekita ini rut te edumdumaan din ne neepes dan. "Babeba! Meambe ke midereetan din dà ini se periyemut?" ke sikandan.

<sup>9</sup> "Iyan tumù ne indahang din ini ne ruen dekelà ne kureta ne igkepemehey pà diyà te menge ayuayu."

<sup>10</sup> Nesehipà ni Hisus ke edlelahen dan ne migkehiyan din sikandan te, "Meambe ke edsewayan niyu sikandin? Su meupiya nevenar ini se mid-ulaula rin kediey.

<sup>11</sup> Su ke menge ayuayu ne egketevangan niyu su lelayun kew red ebpemekeduma, ugaid ne siaken ne kenà ad meuhet kayi te keniyu.

<sup>12</sup> Su iyan din kinevusbus te periyemut kayi te lawa ku ne ibpenehana te kedleveng kediey.

<sup>13</sup> Sebenarvenar ne ini se egkehiyan ku keniyu," ke si Hisus, "te misan endei kayi te ampew te dunya ibpesabut ini se Meupiya ne Tudtul mekeatag kediey, ne egkepenudtul ded dema ini se mid-ulaula rin kediey ne kenà sikandin egkelipatan."

*Mibpendiyà si Hudas Iskeriyuti te Menge Mepurù te Terebpepengesa su Ebpekidsungkit ke Ebmemeuwen Din te Ed-ulug si Hisus*

(Marcos 14:10-11; Lucas 22:3-6)

<sup>14</sup> Ne senge etew rut te sepulù wey deruwa ne edumdumaan ni Hisus, si Hudas Iskeriyuti, se mibpendiyà te menge mepurù te terebpepengesa

<sup>15</sup> ne migkahi te, "Pira se ibehay niyu kediey embiya ibpalad ku si Hisus diyà te keniyu?" Ne nesebutan dan en te tetelu nepulù ne pirak ne pelatà se imbehey ran en ki Hudas.

<sup>16</sup> In-awà dè be ketà ne ebpemengaan en ni Hudas te ralan te kegkeulug din ki Hisus su apey ran mesigkem en.

*Mibpekidseveka te Edlavung si Hisus wey ke Menge Edumdumaan Din te Kedlavung te Pista te Kedtenuri ran te Kedsehari te Suluhuen te Eleteala dut te Menge apù dan*

(Marcos 14:12-21; Lucas 22:7-13; Juan 13:21-30)

<sup>17</sup> Ne ketà te egkeuna ne andew te Pista te menge Hudiyanen te Egkaan te Pan ne Warà Insawug ne Ibpelevag ne mid-uey ki Hisus ke menge edumdumaan din se egkahi te, "Endei rey ve ini ebpegetura se idlavung te Pista te kedtanud tew te Kedsehari te Suluhuen dut te menge apù tew rengan?"

<sup>18</sup> Ne migkahi si Hisus te, "Pendiya kew te inged ketà te senge etew ne meama ne kehiya niyu kandin te, 'Kiyug te meyerù tew te ini se baley nu ke edlevungan din wey ke menge edumdumaan din te ini se Pista su mehaan en ed-awà kayi te kelibutan.' "

<sup>19</sup> Ne midtuman en dut te menge edumdumaan ni Hisus ke migkahi rin, ne mibpegatur dan en te idlavung dan te Pista te Kedsehari te Suluhuen.

<sup>20</sup> Guna su merukilem en ne nekeuma en ensi Hisus ne mibpinuu en sikandin wey ke menge edumdumaan din su egkaan dan.

<sup>21</sup> Ne gewii ran te egkaan ne migkahi si Hisus te, "Benar ini se egkehiyan ku keniyu, ruen senge etew kayi te keniyu se ed-ulug kediey."

<sup>22</sup> Ne ketà ne mibmerungkug ini se menge edumdumaan din ne uman senge etew ne mid-insà te, "Entei, Kerenan, kenà ma siaken?"

<sup>23</sup> Ne migkahi si Hisus te, "Ini se ebpekidtuhen ne edeluwit en te pan din ke ed-ulug kediey.

<sup>24</sup> Su egkeimetayan ke Impeanak te Menusiyà iring dut te nekahi te impesurat ne Lalag te Eleteala rengan, ugaid ne meraat nevenar se egketemanan din ini se etew ne ed-ulug kandin. Iyan pà tumù ne warà ianak sikandin."

<sup>25</sup> Ne si Hudas ke ebpesigkem ki Hisus ne migkahi te, "Entei, Meyterù, kenà ma siaken?" Ne migkahi si Hisus te, "Na, wey migkahi nu en iya."

*Ke Ketepusan ne Kinelavung te Kerenan Tew wey ke Edumdumaan Din*

(Marcos 14:22-26; Lucas 22:14-20; 1 Kurintu 11:23-25)

<sup>26</sup> Gewii te egkaan dan ne migkuwa ni Hisus ini se egkeenen dan ne pan ne impeselamat din te Eleteala, ne mibpenevitevi din ne imbehey rin diyà te menge edumdumaan din se egkahi te, "Kua niyu ini ne keena niyu, su ini ke lawa ku."

<sup>27</sup> Ne ketà ne migkuwa ni Hisus ke ed-inumen ne impeselamat din te Eleteala ne imbehey rin kandan se egkahi te, "Inum kew kayi, langun niyu.

<sup>28</sup> Ini ke lengesa ku," ke si Hisus, "ne ebpeketudà ne ibavas te menge etew, su tuus ini te egketuman en ke impasad te Eleteala rengan te ebpekepelihau en ke menge etew dut te keberedusaan dan.

<sup>29</sup> Egkehiyen ku ini keniyu te kenà ad maa ed-inum kayi te ed-inumen ini taman te kenà egkeuma ke hewii keuremà te ebpekeamung kew en te Edetuan te Amey ku ne Eleteala ne ketà ne egkevehu en ke ed-inumen tew."

<sup>30</sup> Nekepasad dan ketà ne migkanta ran te kedeyù dan te Eleteala ne riyà dan en mebpsinaru te buvungan ne ed-ingaranan te Ulivuwen.

*Impayag neraan ni Hisus ke Kebparew ni Pedro te Teleduma Ran*  
(*Marcos 14:27-31; Lucas 22:31-34; Juan 13:36-38*)

<sup>31</sup> Ne migkahi pà maa si Hisus dut te edumdumaan din te, "Ini ne kerukileman ne langun niyu ne ebelahuy ne edtehaken a niyu su ruen Lalag te Eleteala ne impesurat din ne egkahi te,

'Ebpeimetayan ku ke tumetuganur  
rut te menge bilibili,

ne egurunsuwey ke menge bilibili rin.'

<sup>32</sup> Ugaid," ke si Hisus, "ne embiya egkevanew ad, ne ed-una ad keniyu riyà te inged ne Geliliya."

<sup>33</sup> Ne migkahi si Pedro te, "Misan edtehaken ka rut te langun dan, ne siaken ne kenà!"

<sup>34</sup> Ugaid ne migkehiyan sikandin ni Hisus te, "Tentenuri nu ini te kenà pà ed-ukarà ke manuk te ini en ne kerukileman ne ketetelu a nu en ibparew te kenà a nu ruma."

<sup>35</sup> Ugaid ne migkahi si Pedro te, "Kenà a ebpekekahi te iring ketà te kenà ki teleduma misan ebpekeunung a keykew te ed-imetayan!" Ne langun dut te menge edumdumaan ni Hisus, ne engketà ded dema se migkahi ran.

*Mibpengeningeni si Hisus diyà te Gitsimani*  
(*Marcos 14:32-42; Lucas 22:39-46*)

<sup>36</sup> Ne ketà ne midlevundus en si Hisus wey ke menge edumdumaan din diyà te inged ne ed-ingaranan te Gitsimani. Guna su riyà dan en ne migkehiyan din sikandan te, "Pinuu kew rè be kayi su ebpengeningeni a keniyà te ubpu."

<sup>37</sup> Ne miduma rin si Pedro wey ke teleari, ke menge anak ni Sibidyu. Ne nemutu nevenar sikandin wey nerurunù ke hinawa rin.

<sup>38</sup> Ne migkahi sikandin kandan te, "Merasey nevenar ini se hinawa ku su iring te egkevidtew en. Kayi kew rè be ne unung kew kediey."

<sup>39</sup> Ne midlaus pà sikandin diyà te unaan dan ne midlangkeb en se ebpengeningeni te Eleteala te, "E, Amà, embiya egkepakey kenian te kenikew, ne ipesahad nu en kediey ini se keresayan ku! Ugaid ne misan iring en ketà se kiyug ku, ne iyan nu tumana ke keykew ne kiyug."

<sup>40</sup> Neiseg-iseg ketà ne midliveran din ke tetelu ne etew ne edumdumaan din ne iyan din neumaan se nekelipereng dan. Ne migkehiyan din si Pedro te, "Meambe ke kenà kew ebpekektigter te ed-unung kediey te senge uras dà?"

<sup>41</sup> Kenà kew lipereg, ugaid ne pengeningeni kew," ke si Hisus, "su apey kew kenà ebpekeruma kayi te ebpenggeram keniyu. Su meveher perem ke hinawa niyu te eduma te lalag ku, ugaid ne midtaman dè be te kenà eduma ke lawa niyu."

<sup>42</sup> Ne mid-awà en maa si Hisus ne midsaup mibpengeningeni se egkahi te, "E, Amà, embiya kenà egkepakey ne ibpesahad kediey ini se keresayan ku, ne metuman en."

<sup>43</sup> Ne ketà ne midlived en maa sikandin kayi te tetelu ne edumdumaan din ne iyan din neumaan se nekelipereng dan su midseharan dan en te turug.

<sup>44</sup> Ne mid-awà en maa si Hisus ne mibpengeningeni en maa te iketelu te arà ded ne pengeningeni rin.

<sup>45</sup> Ne midliveran din maa ke menge edumdumaan din te iketelu en ne migkahi te, "Maa, nekelipereng kew pè bes lavew? Ini en ke keppalad dut te Impeanak te Menusiya diyà te menge etew ne beniyagà.

<sup>46</sup> Enew kew en," ke si Hisus, "su ini en ke etew ne ed-ulug kediey. Kuwa kiyu en su edtelavuk ki."

*Ke Kedsigkem ki Hisus*  
(*Marcos 14:43-50; Lucas 22:47-53; Juan 18:3-12*)

<sup>47</sup> Gewii te edlalag pà si Hisus ne nekeuma en si Hudas, senge etew ini rut te sepulù wey deruwa ne edumdumaan din. Ne nerumaan dut te denda ne menge etew ne mibmemetareng dan te menge sundang wey menge behuval, su midsuhù dan dut

te minge mepurù te terebpelengesa, ke minge meyerù te penduan, wey ke minge pekilukesen te minge Hudiyanen.

<sup>48</sup> Ugaid ne ketà te warà dan pà med-ipanew ne ruen ingkahi ni Hudas kandan te, "Ke etew ne ed-uvayen ku ne ed-erekan ku ne arà imbe ke ebpemengaan niyu. Sigkema niyu!"

<sup>49</sup> Nekeuma rà si Hudas ne mid-uvey rin en si Hisus se egkahi te, "Mebmelinew se egketemanan nu, Meyterù!" Ne arà pà ne mid-erekan din.

<sup>50</sup> Ne migkahi si Hisus te, "Suled, degdehawi nu en ini se impengkayi nu!"

Ketà ne migeweran dan en si Hisus ne midsigkem dan en, ne midesdesenan dan te egawed.

<sup>51</sup> Ugaid ne ruen senge etew dut te ruma ni Hisus se mid-ulavut te sundang din ne midtibas din en ke sugshuen dut te pinekebmepurù te terebpelengesa ne nesempingan en te telinga rin.

<sup>52</sup> "Iipi nu ke sundang nu," ke si Hisus, "su ke etew ne ebpengimatey te sundang ne sundang ded dema ke id-imatey kandin.

<sup>53</sup> Maa, warà nu ves metueni te egkepakey ne ebuyù a te tavang diyà te Amey ku ne Eleteala, ne segugunee ne ibpempengkayi rin ke egngivuwan ne suluhuen din?"

<sup>54</sup> Ugaid," ke si Hisus, "ne kenà a su embiya ed-ul-ulaan ku arà ne memenu ve se kegketuman dut te impesurat ne Lalag te Eleteala ne egkahi te iyan iya se metuman te iring kayi?"

<sup>55</sup> Ne migkehiyan ni Hisus ke minge etew ne edsigkem kandin te, "Maa, tulisan a ne ebmetereman niyu te sundang wey behuval te edsigkem kediey? Su uman ded ma hewii ne riyān a te Nekebpuru ne Valey te Eleteala se ebpenurū, ne warà e ma nikiyu sigkema ketà.

<sup>56</sup> Ugaid ne egked-ulaula ini langun su apey egketuman en ke Lalag te Eleteala ne impesurat dut te minge etew ne mibpelambas te lalag din dengan." Arà dà ne mibpelahuy en ke minge edumdumaan din ne intahak dan en sikandin.

*Mibpenehewit si Hisus Diyà te Valey te Kukuman  
(Marcos 14:53-65; Lucas 22:54-55, 63-71; Juan 18:13-14, 19-24)*

<sup>57</sup> Ne mid-ewit si Hisus dut te minge etew ne midsigkem kandin diyà te baley ni Kayipas, ke Pinekemepurù te langun ne minge Terebpelengesa. Su rutun nevurun ke minge meyerù te penduan wey ke minge pekilukesen te minge Hudiyanen.

<sup>58</sup> Ugaid ne si Pedro, ne midtundugtundug ded kandan taman te nekeuma sikandin diyà te lama te valey dut te pinekemepurù te minge terebpelengesa. Ne rutun ne midlusud sikandin dut te lama ne mibpekid-amur en mibpinuu dut te minge bantey te baley su edtengtangan din ke engkey se ibped-ulaula ran ki Hisus.

<sup>59</sup> Ne ini se minge mepurù te terebpelengesa wey langun ne Perekukum ne mibpegelep dan mibpemengà ke engkey se id-isuhat dan ne kewagib ki Hisus misan kenà benar, su apey ran egkeimetayi.

<sup>60</sup> Ne misan duen merakel ne etew ne midtitihus te kenà benar, ne warà netuen dan ne dait ne id-imatey ki Hisus.

Netaman ne ruen en deruwa ne etew ne mid-etuvang ki Hisus

<sup>61</sup> ne migkahi te, "Nering dey," ke sikandan, "se egkahi ini se etew te, 'Egkerundus ku ini se Nekebpuru ne Valey te Eleteala ne mibeelan te etew, ugaid ne ketà te tetelu ne hewii ne igkepeitindeg ku en ke behu ne valey ne kenà bineelan te etew.'" "

<sup>62</sup> Ketà ne mid-itindeg en ke Pinekemepurù te minge terebpelengesa ne migkehiyan din si Hisus te, "Engkey ve se keykew ne egkekahi? Engkey, benar ini se id-isuhat dan ne kewagib keykew?"

<sup>63</sup> Ugaid ne mibpeeneng-eneng dà si Hisus.

Ne migkahi pà maa ini se Pinekemepurù dut te minge terebpelengesa te, "Ini ka te etuvangan te Eleteala ne sesapà ka embiya sikuna ke Anak din ne Impasad din ne Ebperetuen te langun."

<sup>64</sup> Ne migkahi si Hisus te, "Benar ayan se nekahi nu su siaken en iya. Ne sebenarvenar ini se egkehiyan ku keniyu te kenà meuhet ne egkekita niyu ke Impeanak te Menusiya ne ebpekepinuu riyà te egkekewanan te Eleteala ne warà repeng te gehem din. Ne ketà te edlived sikandin kayi ne egkekita niyu te edumaan te sehulapun."

<sup>65</sup> Nering dà dut te Pinekemepurù te Terebpelengesa ke migkahi ni Hisus ne mibisey rin en ke kumbalà din te kegkeepes din. Ne migkahi te, "Nekesumpalit en sikandin te Eleteala kayi te lalag din. Kenà ki en ebpemengà te ruma pà ne titihus su nering niyu en ini se kedsumpalit din!

<sup>66</sup> Ne engkey en se keniyu ne kukuman?"

Ne midtavak dan te, "Egkewegiban sikandin ne ed-imetayan en."

<sup>67</sup> Ne ketà ne mibpengilevan dan ke buked ni Hisus, ne mibedasan dan. Ne ruen midtabpi kandin

<sup>68</sup> ne migkahi te, "Na, embiya sikuna ke Impasad te Eleteala ne Ebperetuen te langun, ne kehiya nu ke entei se midtabpi keykew."

*Imparew ni Pedro te Teleduma Ran ki Hisus*

*(Marcos 14:66-72; Lucas 22:56-62; Juan 18:15, 25-27)*

<sup>69</sup> Ne kayi pà lavew te lama kayi te valey te Pinekemepurù te Terebpelengesa si Pedro, ne ruen meritan ne edsugsuhuen ketà te valey ne mid-uevey kandin. Ne migkahi te, "Sikuna rema ne ruma ka ni Hisus ke ebpuun te Gelliliya."

<sup>70</sup> Ugaid ne mibparew si Pedro ketà te etuvangan te langun ne menge etew se egkahi te, "Kenà ku egkesebutan ayan se egkehiyen nu."

<sup>71</sup> Ne mid-ip-ipanew en sikandin se ebpendiyà te bengawan te lama. Nekita en maa si Pedro te senge etew ne meritan ne edsugsuhuen ketà ne migkahi diyà te menge etew ne nevurun te, "Ayan se etew ne teleduma ki Hisus ne riyà ebpuun te Nesarit."

<sup>72</sup> Nerineg ni Pedro, ne mibparew rin ded maa se egkahi te, "Mekahat e pà te sapà ku ke teleduma key!"

<sup>73</sup> Neiseg-iseg manen ne mid-uevey ketà ke menge etew ki Pedro ne migkahi te, "Benar iya ne teleduma kew," ke sikandan, "su kayi rà te lalag nu ne egketuusan en!"

<sup>74</sup> "Dusa kedi," ke si Pedro, "ke embiya teleduma key kenian te etew ne egkehiyen niyu!"

Arà dà iya ne mid-ukarà en ke manuk.

<sup>75</sup> Ne ketà ne netenuran ni Pedro ke migkahi ni Hisus kandin te, "Kenà pà ed-ukarà ke manuk te ini en ne kerukileman, ne ketetelu a nu en ibparew te kenà ki teleduma." Ne midlihawang si Pedro ne midrahukrahuk te kedsinehew rin.

## 27

*Mid-ewit dan si Hisus Diyà te ki Pilatu*

*(Marcos 15:1; Lucas 23:1-2; Juan 18:28-32)*

<sup>1</sup> Mesmeselem pà ne nevurun en ke langun ne menge mepurù te terebpelengesa wey ke menge pekilukesen te Hudiyanen ne neumpung dan en ke engkey se ed-ul-ulaan dan te ked-imatey ki Hisus.

<sup>2</sup> Ne mibakù dan te kedina si Hisus ne mibpeneheewit dan sikandin diyà te ki Pilatu, ke gubinedur ne Rumanu.

*Ke Kinepatey ni Hudas Iskeriyuti ke Mid-ulug ki Hisus*

*(Nenged-ulaula 1:18-19)*

<sup>3</sup> Guna su netuenan ni Hudas, ini se senge etew ne mid-ulug ki Hisus, te riyen en si Hisus te etuvangan ni Pilatu su egkukumen en te ebpeimetayan ne nekedsendit nevenar sikandin kayi te mid-ulaula rin. Ne mibpendiyà te menge mepurù te terebpelengesa wey menge pekilukesen te menge Hudiyanen ne in-uli din ke tetelu nepulù ne pirak ne pelatà.

<sup>4</sup> "Nekesalà a," ke sikandin, "su impesigkem ku arà se etew ne warà salà din!"

<sup>5</sup> Ne migkahi ran te, "Engkey se kenami ketà? Keykew rà ayan!"

<sup>6</sup> Ne insewirà din ke kureta diyà te lusud te Nekebpuru ne Valey te Eleteala, ne mid-ipanew en se ed-ehet te lawa rin ne mid-iket te lieg din ne mid-umpak.

<sup>7</sup> Ne mibpemurut dut te menge mepurù te terebpelengesa ini se kureta se egkahi te, "Ini se kureta ne imbayad te ibpeimatey te etew ne ebpekesurang ki te Penduan tew embiya idtahù ta ini kayi te edtehuan te kureta kayi te Nekebpuru ne Valey te Eleteala."

<sup>8</sup> Na geina te iring ketà ne mibpengasak dan ke engkey se ebpeetahan dan kayi te kureta, ne neumpungan dan te ibpemasa te tanà dut te etew ne ediyun te kuren su ebheluyen ne penlelevangan te menge etew ne ebpekevehu ne ebpatey ketà.

<sup>9</sup> Tembù be igenat ketà ne hewii ne mid-ingaranan arà se tanà te "Tanà ne Mibayaran te Lengesa" ne iyan din meana ne nepemasa te imbayad te ebpeimatey.

<sup>10</sup> Ne ini se ned-ulaula ne netuman ke impesurat te Eleteala ki Jeremias senge etew rengan ne mibpelambas te Lalag din se egkahi te, "Migkuwa ran ke tetelu nepulù ne kureta ne pelatà, ini se mid-umpungan te menge etew te Israyil ne ibayad te ebpeimatey kandin,

<sup>11</sup> ne arà se impemasa ran te tanà te etew ne ediyun te kuren. Ini se impesabut kediey te Kerenan," ke si Jeremias rengan.

*Mid-ewit Dan si Hisus Diyà te ki Pilatu ke Gubinedur ne Rumanu*

*(Marcos 15:2-5; Lucas 23:3-5; Juan 18:33-38)*



<sup>11</sup> Ne mibpeneheewit dan si Hisus diyà te ki Pilatu ke gubinedur ne impeetuvang dan ki Pilatu su ed-insaan. “Menu,” ke si Pilatu, “sikuna en iya ke ratù te menge Hudiyanen?” “Uya, ayan iya se migkahi nu,” ke si Hisus.

<sup>12</sup> Ugaid ne langun ne in-isuhat dan kandin ne kewagib dut te menge mepurù te terebpepengesa wey ke menge pekilukesen te menge Hudiyanen ne warà din tevaka.

<sup>13</sup> Ne ketà ne migkahi en maa si Pilatu ki Hisus te, “Menu, kenà ke en be edtavak kayi te langun ini ne in-isuhat dan kenikew?”

<sup>14</sup> Ugaid ne warà en megkahikahi si Hisus te misan senge tahà dà, ne ketà ne neinuini nevenar si Pilatu.

*Migkukum Dan te Ed-imetayan si Hisus*

*(Marcos 15:6-15; Lucas 23:13-25; Juan 18:39-19:16)*

<sup>15</sup> Ne iyan nelayaman ni Pilatu te uman egkeuma ke Pista te Kedsehari te Suluhuen ne ruen ibpelihawang din ne senge etew ne vilanggù ne ebuyuen dut te menge etew.

<sup>16</sup> Ketà dema ne hewii ne ruen senge etew ne nevilanggù ne ed-ingaranan ki Barabas su nevantug te meraat ne mid-ulaula rin.

<sup>17</sup> Guna su ruen en denda ne menge etew ne nevrurun ne mid-insà si Pilatu te, “Menu, endei rapit se ibpelihawang ku, Si Barabas etawa si Hisus ke Impasad te Eleteala ne Ebperetuen te langun?”

<sup>18</sup> Iyan din migkahi ini su netuenan din se ini se id-isuhat ne kewagib ki Hisus dut te menge mepurù te terebpepengesa ne sabap dut te kegkesihi ran kandin.

<sup>19</sup> Ikeruwa rin ne gewii te kebpinuu diyà te kukuman ne ruen nekeuma ne telaan te esawa rin ne egkahi te, “Kenà ka ebpekid-ubpu dut te meraat ne idwagib dan keniyen te etew ne warà salà din. Su geina te merukilem ne ruen tehinepen ku mekeatag kandin ne nepesangan a.”

<sup>20</sup> Ugaid ne ini se menge mepurù te terebpepengesa wey ke menge pekilukesen te Hudiyanen ne mibpemitiyeraan dan ke menge etew te iyan dan buyua ki Pilatu ne ibpelihawang si Barabas ne ebpeimetayan si Hisus.

<sup>21</sup> Ne migkahi en maa si Pilatu ke gubinedur te, “Menu, endei rapit kayi te deruwa ini se egkiyuhan niyu ne ibpelihawang ku?”

“Si Barabas!” ke sikandan.

<sup>22</sup> “Embiya iring ketà se egkiyuhan niyu,” ke si Pilatu, “ne ebmemenuwen ku be si Hisus ini se Impasad te Eleteala ne Ebperetuen te langun?”

“Ibpelansang nu riyà te ebpebelevahen ne kayu!” ke se menge etew.

<sup>23</sup> “Meambe?” ke si Pilatu. “Engkey se meraat ne mid-ulaula rin?”

Ugaid ne nasi en ne mid-iseg se kebpemensag dan te, “Ibpelansang nu sikandin diyà te ebpebelevahen ne kayu!”

<sup>24</sup> Guna su nesebutan ni Pilatu te kenà en egkepakey ne ibpeengked ke menge etew su deisek dà ne egkehuvut en, ne migkuwa sikandin te wayig ne mibpenlùlù sikandin te velad din dutun te etuvangan te menge etew su tuus ini te kenà sikandin ebpekid-ubpu dut te ked-imetayi ki Hisus. Ke sikandin te, “Warà kediey ke egkevudsi te lengesa keniyen te etew! Keniyu rà ayan!”

<sup>25</sup> Ne migkahi ke langun ne menge etew te, “Dusai key en abpeg ke menge kevuwaran dey ke egkevudsi ke lengesa rin!”

<sup>26</sup> Ketà ne impelihawang en ni Pilatu si Barabas. Ne si Hisus embe ke imperuug din ne imbehey rin en kandan te ibpelansang diyà te pinebelavag ne kayu.

*Pinebparas si Hisus te Datù Dut te Menge Sundaru te Kedsumpalit dan kandin su uvag kun Datù*

*(Marcos 15:16-20; Juan 19:2-3)*

<sup>27</sup> Ne impelusud en te menge sundaru si Hisus dut te turuhan te gubinedur, ne miburun ketà ke langun ne menge sundaru.

<sup>28</sup> Ne midluungan dan te velegkas din ne pinelelembung dan te merihà su uvag kun ne ratù.

<sup>29</sup> Ruen impetengkulu kandin ne mibeelan dan ne ruhiyen ne wahed, ne ruen kayu ne mibpeweran dan kayi te kewanan din. Ne ketà ne mibpenimbuel dan kayi te sineruwan din su uvag kun ed-adat dan kandin se egkahi te, “Mebereumur ka ne ratù te menge Hudiyanen!”

<sup>30</sup> Ne mibpengilevan dan sikandin, ne migkuwa ran ke kayu kayi te velad din ne imbadas dan dut te ulu rin.

<sup>31</sup> Guna su neipus ke kedsumpalit dan kandin, ne midluungan dan en ke merihà ne impelelembung kandin ne inseluub dan ded ke kandin ne belegkas ne mid-ewit dan en sikandin diyà te ebpelensangan kandin.

*Inlansang si Hisus Diyà te Pinebelavag ne Kayu  
(Marcos 15:21-32; Lucas 23:26-43; Juan 19:17-27)*

<sup>32</sup> Guna su riyà dan en te ralan te kebpenehewita ran en kandin ne ruen etew ne ed-ingaranan ki Simon ne riyà ebpuun te Sirini ne nesinuhung dan, ne mibpehes dan te ibpetiang ke pinebelavag ne kayu ne edtiangen ni Hisus.

<sup>33</sup> Nekeuma ran diyà te dapit ne mid-ingaranan te Gulguta, ne iyan din meana ne "Tulan te Ulu."

<sup>34</sup> Ne ketà ne ebpeinumen dan perem si Hisus te binu ne midsewuhan dan te mepait ne wawì, ugaid ne guna su neheraman din ne warà din inuma.

<sup>35</sup> Arà dà ne inlansang dan en si Hisus diyà te pinebelavag ne kayu. Neipus dan ne mibunuthunutan dan ke velegkas din ke entei se ebpekegkemuney kandan.

<sup>36</sup> Ne mibpinuu ran se ebantey kandin.

<sup>37</sup> Ne riyà te divavew te ulu rin ne impikit dan ke midsuratan te in-isuhut dan ne kewagib ki Hisus se egkahi te, "Si Hisus ini Ke Ratù te menge Hudiyanen."

<sup>38</sup> Ne ruen deruwa ne tulisan ne inlansang dan dema дума ki Hisus, seveka kayi te egkekewanan din, ne seveka kayi te egkehivang din.

<sup>39</sup> Ke menge etew ne midsahad kandin ne mibpendungkàdungkà dan te ked-undaunda ran kandin se egkahi te,

<sup>40</sup> "Na, endei embe ke migkahi nu ne egkerundus nu ini se Nekebpuru ne Valey te Eleteala ne ketà te tetelu ne hewii ne igkepeitindeng nu manen ke vehu pà? Embiya benar ne Anak ka te Eleteala, ne ibpelihauan nu ke hinawa nu! Pemenaug ke en keninyan te midlansangan keykew!"

<sup>41</sup> Ne engketà ded dema ke ked-undaunda rut te menge mepurù te terebpelengesa, menge meysterù te penduan wey ke menge pekilukesen te Hudiyanen se ebpelelelahey ran te,

<sup>42</sup> "Nekepelihauan kun sikandin te menge ruma rin, ugaid ne ke kandin ne hinawa ne kenà din egkegaga. Menu, kenà sikandin ke ratù te menge Hudiyanen? Embiya ebpekeperemenaug sikandin keninyan te midlansangan kandin, ne ebpekeperetiyyaya ki te sikandin ke Impasad te Eleteala ne Ebperetuen te langun.

<sup>43</sup> Migkahi rin te Eleteala se edserihan din ne migkahi rin pà te Anak sikandin te Eleteala. Na ed-intengan ta ve ke Eleteala se edtavang kandin!"

<sup>44</sup> Ne misan dema ke deruwa ne tulisan ne inlansang diyà te idsengeriveluyà din ne elin en ne ed-undaunda kandin.

*Ke Kinepatey ni Hisus*

*(Marcos 15:33-41; Lucas 23:44-49; Juan 19:28-30)*

<sup>45</sup> Ne ketà te neudtu en ke andew ne mibmerusirem en ke tivuuk ne kelibutan lusud te tetelu ne uras.

<sup>46</sup> Ketà te tetelu ne uras ne migkuleyì si Hisus te merahing se egkahi te, "Ili, ili, lama seabaktani?" Ne iyan din meana se, "Ey, Eleteala ku, Eleteala ku, meambe ke mid-ewaan a nu?"

<sup>47</sup> Ne ruen menge etew ne nekeitindeng ketà ne nekerineg kandin ne migkahi te, "Pemineha niyu ma su ebpengumawen din en si Elias."

<sup>48</sup> Senge etew ketà se midahewrahew migkuwa kayi te in-ered te tebà ne midtiyuk din en te deisek ne terekayu ne insugkar din diyà te bèbà ni Hisus su ibpeesep.

<sup>49</sup> Ugaid ne ruen migkahi te, "Na ed-intengan tew ve ke edlepew si Elias se ebpeawà kandin ketà!"

<sup>50</sup> Ne migkuleyì en maa si Hisus te merahing ne nependusan en sikandin te hinawa.

<sup>51</sup> Diyà te Nekebpuru ne Valey te Eleteala ne ruen mekepal ne sapat ne impehelet dut te insive ne ed-ubpaan te Eleteala, ne ketà te kinepatey ni Hisus ne nevindas kayi te luuk ini igenat te divavew taman te diralem. Ne midlinug ne nengetevi ke derekelà ne watu.

<sup>52</sup> Ne ruen menge penlelevangan ne surung ne nengepuwasan, ne merakel ke minatey ne mibperetiyyaya ki Hisus ne nengevanew en.

<sup>53</sup> Ne mibpenlihawang dan dut te leveng dan ne ketà te nevanew en si Hisus ne mibpendiyà dan te inged ne Hirusalim ne riyà dan mekita te merakel ne etew.

<sup>54</sup> Ne ini se kepitan wey ke menge ruma rin ne sundaru ne ebantey ki Hisus, ne nengeandek dan nevenar dut te neheram dan ke linug wey nekita ran ke langun ne ned-ulaula ketà. Ke sikandan te, "Benar ini ne Anak te Eleteala!"

<sup>55</sup> Ne ruen dema ketà merakel ne menge meritan ne miduma ki Hisus ne egenat te Geliliya ne midtavang kandin. Ed-it-itindeng dan ini diyà te malù meriyù su edtengteng kandin.

<sup>56</sup> Ne elin ketà si Maria Magdalena, si Maria ke iney ni Santiago ki Jose, wey ke esawa ni Sibidiyu.

*Ke Kineleveng ki Hisus*

(*Marcos 15:42-47; Lucas 23:50-56; Juan 19:38-42*)

<sup>57</sup> Guna su malù en edsanlep ke andew ne ruen nekeuma ne senge etew ne meama ne kewasa ne riyà ebpuun te Eremetiya. Iyan din ngaran ne si Jose ne sakup dema sikandin ni Hisus.

<sup>58</sup> Mibpendiyà sikandin te ki Pilatu ne mibuyù din ke bangkey ni Hisus, ne insuhù en ni Pilatu te ibpevehey.

<sup>59</sup> Ne migkuwa rin en ke vangkey diyà te midlensangan kandin, ne mibukusan din te behu ne malung ne meputi,

<sup>60</sup> ne in-awuk din en ketà te behu pà ne leveng ne imbangbang diyà te dempilas ne intail ne kandin ne leveng. Ne ruen dekelà ne batu ne midlilid din ne inlekeb ketà te bengawan te leveng ne mid-ewaan din en.

<sup>61</sup> Ne si Maria Magdalena wey senge etew pà ne Maria ne mibpinuu ketà se edsinaru dut te leveng.

*Mibpeventayan ke Leveng ni Hisus*

<sup>62</sup> Ne ketà te neketundug ne andew, ne Sepetu ini, ne mibpendiyà te ki Pilatu ke menge mepurù te terebpepengesa wey ke menge Peresiyu,

<sup>63</sup> ne migkahi kandin te, "Datù, netenuran dey te biviyag pà arà se teruen ne migkahi te, 'Egkevanew e red ketà te iketelu ne hewii.'

<sup>64</sup> Tembù be peventayi nu nevenar ke leveng din lusud te tetelu ne hewii, su kalu ke penekawa ke vangkey rin dut te menge edumdumaan din ne ebpenudtulan dan ke menge etew te nevanew sikandin. Ne embiya arà se egkehiyen dan ne ebpehimbenaren dut te menge etew ne egkeumanan pà ke kegkelimbungi rut te menge etew."

<sup>65</sup> "Kuwa kew en te menge sundaru," ke si Pilatu, "ne peventayi niyu nevenar ke leveng."

<sup>66</sup> Ne ketà ne mibayaan dan en ke leveng ne midtehuan dan te tuus ke batu ne inlekeb su apay ran egketueni ke newaleng te misan deisek dà, ne mibpeventayan dan en te menge sundaru.

## 28

*Ke Kinekevanew ni Hisus*

(*Marcos 16:1-10; Lucas 24:1-12; Juan 20:1-10*)

<sup>1</sup> Guna su neipus ke Hewii te Id-imeley ne mehaan en egkepawà te hewii te Akad ne mibpendiyà si Maria Magdalena wey ke senge etew ne Maria su ed-intengan dan ke leveng ni Hisus.

<sup>2</sup> Ne ketà ne ruen midtekew ne linug, ne ruen mibpehunrerenà ne suluhuen te Eleteala ne midlilid din ke batu ne inlekeb dut te leveng ne mibpinuuwan din en.

<sup>3</sup> Ne ke paras din ne egkinrab iring te kilat, ne mibpeneringsing te keputi te velegkas din.

<sup>4</sup> Ne migkerker ini se menge ebantey te kegkeandek dan ne nevidtawan dan iring te minatey en.

<sup>5</sup> Ugaid ne migkahi ke suluhuen kayi te menge meritan te, "Kenà kew meandek!" ke sikandin. "Su netuenan ku te ebpemengà kew ki Hisus ke inlansang dan diyà te pinebelavag ne kayu.

<sup>6</sup> Ugaid ne warè en kayi su nevanew en iring dut te migkahi rin. Pengkayi kew ne intengi niyu ini se midtehuan dan kandin.

<sup>7</sup> Ne pekehaan kew se ed-ipanew ne penudtula niyu riyà te menge edumdumaan din te nevanew en sikandin ne mid-una en sikandin keniyu riyà te Geliliya ne riyà kew ebpemekegkita. Na kenà niyu lipati ini se migkahi ku keniyu."

<sup>8</sup> Arà dà ne migaangaan mid-awà ke menge meritan dut te leveng. Nengeandek dan ugaid ne netehuan dan te dekelà ne kegkehalew ne mibpelelahuy ran se ebpenudtul diyà te menge edumdumaan ni Hisus.

<sup>9</sup> Ugaid ne gewii ran te ed-ipanew ne midtekew mibalak si Hisus kandan ne migkahi en te, "Mebmerinew se egketemanan niyu!" Ne mid-uvey ran kandin ne midlumpeng dan se egawed te paa rin te ebpengarap kandin.

<sup>10</sup> "Kenà kew meandek!" ke si Hisus. "Beyai niyu ke menge edumdumaan ku ne pependiyana niyu sikandan te Geliliya ne diyan a nikandan egkekita."

*Midselipsipan dut te Menge Mepurù te Terebpelengesa te dekelà ne pirak ke Menge Sundaru ne Mibantey te Leveng ni Hisus apey ran Mekepenudtul te Nepenakew ke Bangkey ni Hisus*

<sup>11</sup> Ne ketà te kineipanew en dut te minge meritan se ed-awà kayi te leveng, ne mibpendiyan en te Hirusalim ke minge sundaru ne ebantey te leveng su mibpenudtulan dan ke minge mepurù te terebpelengesa te langun ne ned-ulaula kayi.

<sup>12</sup> Arà dà ne miburun en dut te minge mepurù te terebpelengesa ke minge pekilukesen te Hudiyänen ne mibpengasak dan ke engkey se ed-ul-ulaan dan. Guna su neupakat dan en ne mibehayan dan te dekelà ne pirak ke minge sundaru

<sup>13</sup> ne migkahi ran te, "Penudtula niyu diyà te minge etew te mibpenakew dut te minge edumdumaan ni Hisus ke bangkey rin te merukilem te gewii niyu te nekelipereng.

<sup>14</sup> Ne embiya egkerineg ini dut te gubinedur," ke sikandan, "ne kenà kew egkeuru su sikami rà se ebpetuntesy kandin su apey kew kenà ed-isuhata."

<sup>15</sup> Ne midtelimà dut te minge sundaru ini se kureta ne midtuman dan arà se insuhù kandan. Tembù be taman te ini en ne hewii ne ini red ke ebpemenudtulen te minge Hudiyänen.

*Mibpekita si Hisus Dut te Sepulù wey Seveka ne Edumdumaan Din*

*(Marcos 16:14-18; Lucas 24:36-49; Juan 20:19-23; Nenged-ulaula 1:6-8)*

<sup>16</sup> Ne ini se sepulù wey seveka ne edumdumaan ni Hisus, ne mibpendiyà dan te Geliliya ketà te buvungan ne migkahi ni Hisus kandan.

<sup>17</sup> Guna su nekita ran sikandin ne mibpengarap dan kandin, misan duen kandan eduwaruwa se hinawa ran ke si Hisus ini se nekita ran.

<sup>18</sup> Ugaid ne mid-uey si Hisus kandan ne migkahi te, "Langun ne gehem te kebayàbayà diyà te langit wey kayi te ampew te dunya ne imbehey en kediey."

<sup>19</sup> Na, pendiyà kew te langun ne minge etew kayi te ampew te dunya ne penurua niyu sikandan ke memenu se kebpsakup dan kediey. Ne pembunyahi niyu ke minge etew ne ebpesakup kediey te tuus te keduma ran te Eleteala, wey siaken ke Anak din, wey ke Kedeseenan ne Ebpetuntul te Menusiyà.

<sup>20</sup> Ne penurua niyu sikandan te kedtuman dut te langun ne impenurù ku keniyu. Ne ini se idtahù niyu te hinawa te layun a eduma keniyu taman te taman.

## Ke Meupiya ne Tudtul Mekeatag ki Hisu Kristu ne Miguhud ni Marcos

*Ke Kebpesabut ni Juan ne ed-ingeranan te Ebpembunyag  
(Mateo 3:1-12; Lucas 3:1-18; Juan 1:19-28)*

- <sup>1</sup> Ini ve ke Meupiya ne Tudtul mekeatag ki Hisu Kristu, ke Anak te Eleteala.
- <sup>2</sup> Iyan din ini rudsuan ne nekedsuhatey dut te impesurat te etew ne mibpelambas te Lalag te Eleteala ne si Isaias su impesurat kandin te Eleteala se egkahi te,  
“ ‘Duen edsuhuen ku ne ibpeuna ku keykew,’  
ke se Eleteala,  
‘te kebpekepenehana rut te menge etew  
te kebpekeuma nu.’  
<sup>3</sup> Su riyà sikandin te tanà ne kenà egkeubpaan te etew  
ne ebpenawag dut te menge etew  
ne ed-uvey kandin, ke sikandin te,  
‘Mehaan ne ebpekeuma ke Kerenan,  
ne ihewani niyu ke ralan,  
ne tidtuwa niyu ke ibayà din,  
ne iyan din meana ne tilaka niyu ke hinawa niyu  
su apey kew egkepenehana te kebpekeuma rin!’ ”
- <sup>4</sup> Ne netuman en ini ke impesurat te Eleteala ki Isaias mekeatag ki Juan su riyà sikandin mid-ubpà te tanà ne kenà egkeubpaan te etew se ebpembunyag wey ebpeketuenan dut te menge etew, ke sikandin te, “Pedsendit kew ne ewai niyu ke meraat ne betasan niyu ne pebunyag kew en,” ke sikandin “ne egkepesahad en te Eleteala ke salà niyu,” ke si Juan.
- <sup>5</sup> Ne merakel ne menge etew ne mibpendiyà su ebpemineg kandin ne riyà ebpemuun te lusud te inged ne Hudiya wey riyà ebpuun te inged ne Hirusalim. Ne intarem dan te nekedsendit dan dut te langun ne meraat ne ulaula ran ne arà pà ne mibpebunyag dan ki Juan diyà te wayig ne Hurdan.
- <sup>6</sup> Si Juan ini ne iyan din belegkas ne mid-avel ne bulvul te binatang ne ed-ingaranan te kemilu, ne iyan din insebitan se lundis ded dut te binatang. Ne iyan din keuyehan se tepuri wey teneb.
- <sup>7</sup> Ne migkahi sikandin diyà te menge etew te, “Duen ebpeketundug kediey ne mepurù pà kediey, su misan ke telumpà din ne kenà a edait ne ed-ekar dà.
- <sup>8</sup> Ebunyahan ku sikiyu te wayig, ugaid ne sikandin ne ebpeketundug kediey ne ibunyag din keniyu te ked-ulin dut te Kedesenan ne Ebpetuntul te Menusiyà.”

*Ke Kinebunyag wey Kinepenggeram ki Hisus  
(Mateo 3:13-4:11; Lucas 3:21-22; 4:1-13)*

- <sup>9</sup> Ne warà dà meuhet ne nekeuma en si Hisus se riyà ebpuun te inged ne Nasarit lusud te inged ne Geliliya, ne mibunyahan sikandin ni Juan diyà te wayig ne Hurdan.
- <sup>10</sup> Guna su egemew en si Hisus diyà te wayig ne nekita rin en ke langit ne nevukaan ne mibpehunerena en kayi te kandin ke Kedesenan ne Ebpetuntul te Menusiyà ne midragid te melepati.
- <sup>11</sup> Ketà ne ruen suwara ne riyà ebpuun te langit ne nerineg din se egkahi te, “Sikew ke Anak ku ne igkelimù ku nevenar, ne ebpekesuhat ka nevenar te hinawa ku.”
- <sup>12</sup> Arà dà se nerineg din ne seguguneey ne impendiyà sikandin dut te Kedesenan ne Ebpetuntul te Menusiyà diyà te tanà ne kenà egkeubpaan te etew.
- <sup>13</sup> Ne rutun mid-ubpà sikandin taman te nekede-epat nepulù ne hewii, ne mibpenggeraman sikandin ni Setanas ke datù te pekaid, ke ebpekedsalà. Ne ruen dema mehintelunan ne binatang ketà ne ebpekekaid, ugaid ne ruen ma menge suluhuen te Eleteala ne mibpendiyà te ki Hisus su edtuganur kandin.

*Mibpemili ni Hisus ke epat ne Etew ne Ebpemiyala te Eduma Kandin  
(Mateo 4:12-22; Lucas 4:14-15; 5:1-11)*

- <sup>14</sup> Guna ve su impevilanggù en si Juan ni Hirudis, ke ratù dut te inged din, ne midlived en si Hisus diyà te lusud te inged ne Geliliya se ebpesabut dut te Meupiya ne Tudtul te Eleteala.

<sup>15</sup> Ke sikandin te, “Netuman en ke hewii ne impasad dut te keep-epuan tew,” ke sikandin, “su neuma en ke hewii te kedetui te Eleteala keniyu.” “Engkeri niyu en ke meraat ne ulaula niyu ne peretiyayaa niyu en ke Meupiya ne Tuduul,” ke sikandin.

<sup>16</sup> Senge hewii ketà ne mid-ip-ipanew si Hisus diyà te veyvey te Ranew te Geliliya ne nekita rin si Simon wey ke ari rin ne si Andres se ebpe Miyala riyà te veyvey te ranew su arà ke helevek dan.

<sup>17</sup> Ne migkehiyan en ni Hisus sikandan te, “Pengkayi kew en ne duma kew kediey,” ke sikandin, “su serà se ebpe Miyalaan niyu guntaani, ugaid ne ebpenuruen ku pà sikiyu te iyan niyu mulà egkeutel ne menge etew ne eduma kedì.”

<sup>18</sup> Arà dà ne mid-ewaan dan en ke biyala ran su miduma ran en ki Hisus.

<sup>19</sup> Guna su neketantal en si Hisus ne nekita rin en si Santiago wey ke ari rin ne si Juan, ke menge anak ni Sibidyu, se riyà te avang dan ne ebpengumbayà te biyala ran.

<sup>20</sup> Nekita ran dà ni Hisus ne mid-umew rin en te ebperumaan dan kandin. Arà dà ne mid-ewaan dan en ke amey ran ne si Sibidyu abpeg ke menge etew ne midsukayan dan te ebpe Miyala su miduma ran en ki Hisus.

*Midsegseg ni Hisus ke Busew ne Midsuuk te Etew  
(Lucas 4:31-37)*

<sup>21</sup> Nekeuma ran diyà te inged ne Kapirnowum ne guna su neuma en ke Hewii te Idimeley rut te menge Hudiyanen ne mibpendiyan en si Hisus dut te valey ne ebpegedian te menge Hudiyanen te penduan dan ne mibpenurù.

<sup>22</sup> Guna su neringe dut te menge etew se kebpenurù din ne neinuinu ran nevenar, su kenà iring dut te kebpenurù te menge etew ne ebpenurù te penduan te menge Hudiyanen su ruen gehem din ini se penurù din.

<sup>23</sup> Ketà ne ruen meama ne midlusud te kevurunan dan ne midsuukan te vusew ne migkuleyì te,

<sup>24</sup> “Hisus ne riyà ebpuun te Nesarit, engkey se kememeniyà nu kayi te sikami ne vusew? Maa, edereetan key nikuna? Egkekilala ku sikuna su sikuna ke Berekat ne Midsuhù te Eleteala.”

<sup>25</sup> Ne migkehiyan en ni Hisus ke vusew te, “Engked ka rà, ne awà ka keniyen te meama ayan!”

<sup>26</sup> Arà dà ne pinekerker en te mevaher dut te vusew ke meama ne pinekuleyì din te merahing, ne mid-ewaan din en ke meama.

<sup>27</sup> Ne rekela se kinekegeyip dut te langun ne menge etew ketà ne mibpein-inseey ran te, “Engkey ve vuwa ini? Kema ke ini en ke behu ne penurù. Su utew rekela se gehem din su ebpeawà te menge vusew ne ebpe mineg dan kandin.”

<sup>28</sup> Arà dà iya ne nekeeneb en ke bentuhan dut te mid-ulaula ni Hisus diyà te lusud te langun ne inged te Geliliya.

*Neulian ni Hisus ke Merakel ne Etew  
(Mateo 8:14-17; Lucas 4:38-41)*

<sup>29</sup> Guna su mid-awà en si Hisus wey ke edumdumaan din ketà te valey ne ebpegedian te menge Hudiyanen te penduan dan ne diyà dan en medturedu te valey enni Simon ki Andres, ne miduma rema ensi Santiago ki Juan.

<sup>30</sup> Seretà din ketà ne mid-irehà ke enuhang ni Simon ne meritan su edetengen. Nekeuma rà si Hisus ne migkehiyan dan en sikandin mekeatag dut te ederaru.

<sup>31</sup> Mid-uvey en si Hisus diyà te kandin, ne migeweran din en ke velad din, ne pineenew rin en. Arà dà ne neawà en ke rateng din, ne mid-ilutù en sikandin te ibpekaan kandan.

<sup>32</sup> Guna su midsanlep en ke endew ne mibpeneheewit en kayi te ki Hisus te menge etew ke langun ne ebpe mekedaru, wey ke menge midsuukan te vusew.

<sup>33</sup> Ne langun te menge etew ketà te inged ne nevrun kayi te lama te valey ne midtumpaan ni Hisus.

<sup>34</sup> Ne merakel se ebpe deraru ne nengeulian ni Hisus, ne mibpe negseg din ke menge vusew ne midsuuk dut te menge etew. Ugaid ne warà din pekegkehiya ke menge vusew su nekilala ran en ma ke engkey sikandin.

*Mibpesabut si Hisus te menge etew diyà te Lusud te Geliliya  
(Lucas 4:42-44)*

<sup>35</sup> Guna su egkepe kawà en, ne mid-eneew en si Hisus ne mibpe menaug en ne mibpendiyà te endei se warà etew rin ne ketà sikandin mibpe neningeni.

<sup>36</sup> Ne mibpe mengà en ni Simon wey ke menge ruma rin ke endei en sikandin.

<sup>37</sup> Guna su netuen dan en si Hisus ne migkahi ran en te, “Ebpe mengaan ka te langun ne menge etew.”

<sup>38</sup> Ugaid ne migkahi si Hisus kandan te, “Ebpependiyà kiyu pà te ruma ne inged kayi se ebpesabut kandan dema, su arà ke kinekepengkayi ku,” ke sikandin.

<sup>39</sup> Ne mid-eneb-eneb en si Hisus dut te langun ne inged kayi te lusud te Geliliya se ebpesabut ketà te menge valey ne ebpedegian te menge Hudiyanen te penduan dan, ne mibpenegseg din ke menge vusew ne midsuuk te menge etew.

*Neulian ni Hisus ke senge etew ne Kevuwaen ne Muna pà te It-it  
(Mateo 8:1-4; Lucas 5:12-16)*

<sup>40</sup> Senge hewii ne ruen etew ne egkevuwaen ne muna pà te it-it ne mid-uevy ki Hisus. Mibpenimbuel en sikandin diyà te sineruwan ni Hisus se ebpemuyù te, “Embiya perem egkiyug ke rà, ne egkeulian nu ini se meredsik ne sakit ku,” ke sikandin.

<sup>41</sup> Ne ingkeyru ni Hisus sikandin ne midampen din en se egkahi te, “Uya, egkiyug a, meulii ka!”

<sup>42</sup> Arà dà se nekahi rin, ne neawà en ke sakit dut te meama su neulian en.

<sup>43</sup> Ketà ne impeipanew en ni Hisus sikandin te mid-il-ilutan din te egkahi te,

<sup>44</sup> “Kenà nu ve imbe kegkehiya ini te misan endei en, ugaid ne riyà ka tilandeng te terebpelengesa ne ibpekita nu kandin te neulian ke en. Ne ivehey nu ve kandin ke ibpelengesa te Eleteala ne insuhù dengan ni Moises dut te menge etew ne neulian te sakit dan ne kevuwa apey metueni te langun ne menge etew te neulian ke en,” ke sikandin.

<sup>45</sup> Ugaid ne mid-awà dà arà se etew ne nasi din en impenudul te misan engkey en ne etew ke ned-ulaula rin. Ne ketà dà puunan te kebpemenudul din ne kenà en ebpekelihiwang si Hisus diyà te ruma ne inged su egkevurunburun ke menge etew. Ketà be ne riyà dà med-ubpà sikandin te warà etew rin, ugaid ne mid-ebpet en kandin ke menge etew ne riyà ebpuun te ruma pà ne inged.

## 2

*Neulian ni Hisus ke Meama ne Minatey ke Tevi ne Lawa Rin  
(Mateo 9:1-8; Lucas 5:17-26)*

<sup>1</sup> Nengepiraan be ketà ne mid-uli en si Hisus diyà te inged ne Kapirawum, ne nerineg en dut te menge etew te nekeuli en.

<sup>2</sup> Ne ketà ne midasek se merakel ne etew su warà dan en meamin diyà te valey, misan diyà te edsempawan en. Ne gewii te ebpesabut si Hisus dut te Meupiya ne Tudtul kandan,

<sup>3</sup> ne ruen nekeuma ne epat ne etew ne edyayung te etew ne minatey ke tevi ne lawa rin.

<sup>4</sup> Ugaid ne geina te merakel ne menge etew ne warà dan mekeuvevy ki Hisus. Ketà be ne iyan dan mid-ulaula ne midlekatan dan ke atep ne renged ni Hisus, ne ketà ne midtuntun dan en ke ederaru kayi te ed-irehaan din diyà te ki Hisus.

<sup>5</sup> Guna su netuenan ni Hisus te rekela ke sarig dan kandin, ne migkehiyan din en ke minatey se tevi ne lawa rin te, “Mama, nepesehad en ke menge salà nu.”

<sup>6</sup> Ketà ne ruen dema ebpinpinuu ne menge etew ne ebpenurù te penduan, ne guna su nerineg dan ke migkahi ni Hisus ne iyan netahù te hinawa ran te,

<sup>7</sup> “Meambe ke egkahi ini se etew te iring sikandin te ebpekepesehad te salà? Edsumpalit sikandin te Eleteala su warà etew ne ebpekepesehad te salà embiya kenà ke Eleteala rà!” ke hingginawa ran.

<sup>8</sup> Arà dà ne netuenan en ni Hisus ke netahù te itungan dan, ne migkahi en sikandin diyà te kandan te, “Meambe ke netahù te itungan niyu se iring kenian?”

<sup>9</sup> Endei rapit se melemu,” ke si Hisus, “te egkahi riyà te minatey se lawa rin te, ‘Ke menge salà nu ne nepesehad en’ etawa ve egkahi te, ‘Enew ke en ne luluna nu ke ikam nu ne ipanew ke en?’

<sup>10</sup> Ugaid ne guntaani ne ibpekita ku keniyu te ruen gehem rut te Impeanak te Menusiya te ebpehad te salà kayi te ampew te dunya.” Ketà ne migkehiyan din ke etew ne minatey ke tevi ne lawa rin te,

<sup>11</sup> “Mama, enew ke en ne luluna nu ke ikam nu ne uli ke en.”

<sup>12</sup> Ne mid-enew en ke etew, ne arà dà ne midlulun din ke ikam din, ne mibpemehilang-gilang en se ed-ipanew kayi te etuvangan dan langun. Guna su nekita rut te langun ne menge etew ketà, ne rekdekela se kinekegeyip dan ne neryù dan ke Eleteala se egkahi te, “Taman te taman ne warà tew pà mekita se iring kayi!”

*Mibpemili ni Hisus si Levi te Eduma Kandin  
(Mateo 9:9-13; Lucas 5:27-32)*

<sup>13</sup> Neipus arà ne midlived en maa si Hisus diyà te beyvey te ranew te Geliliya. Ne ruen migkuludkulud ne menge etew ne mibpendiyà te kandin ne mibpenurù din en sikandan.

<sup>14</sup> Guna su nekeipus sikandin se ebpenurù ne midlaus en sikandin se ed-ipanew, ne gewii te ked-ipanew rin ne nekita rin ke senge etew ne meama ne ebpevyad te buwis ne si Levi, ke anak ni Alfeo, ne ebpnuu riyà te upisinà din. Ne migkehiyan din en te, "Duma ka kediey." Arà dà ne mid-itindeg si Levi ne miduma en kandin.

<sup>15</sup> Ne senge hewii ne pinekaan si Hisus wey ke menge edumdumaan din diyà te baley ni Levi ne ruen merakel ne ebpevyad te buwis wey ke menge kenè en birang ne menge etew ne midtundug ki Hisus ne elin dan ki Hisus se migkaan ketà.

<sup>16</sup> Ne dutun te uvey te baley ne ruen menge Peresiyu ne ebpenurù te penduan ne nekita ran te egkaan si Hisus ne duma te menge etew ne ebpevyad te buwis wey ke menge kenè en birang ne menge etew. Ne netegtehaad ne mibpendiyà dan te menge edumdumaan ni Hisus ne mid-insà te, "Meambe ke edseveka sikandin se egkaan ketà te menge etew ne ebpevyad te buwis wey ke menge kenè en birang ne menge etew?"

<sup>17</sup> Nerineg dà ni Hisus arà ne migkehiyan din en sikandan te sempità te, "Ke menge etew ne warà daru rin ne kenà dan ebpegungayà te terebawì, ugaid ne ke menge etew rà ne duen daru rin. Ne iring din ded be rema kayi ini se menge etew su kenà iyan ku kinepengkayi se iyan ku ebpeuveyen ne ke menge metiditu kun se ulaula ran, ugaid ne ke menge kenà en birang ne menge etew apey ran mekedsendit," ke si Hisus.

*Ruen Menge Etew ne Mid-insà ki Hisus ke Meambe ke kenà Edlimpas te Egkaan ke Menge Edumdumaan Din*

*(Mateo 9:14-17; Lucas 5:33-39)*

<sup>18</sup> Senge hewii ne midlimpas te kegkaan ke menge edumdumaan ni Juan ke Ebpebunyang wey ke menge Peresiyu su edtumanen dan ke betasan dut te keep-epuan dan. Ne ruen menge etew ne mibpendiyà te ki Hisus ne migkahi te, "Edlimpas te kegkaan ke menge edumdumaan ni Juan ke Ebpebunyang wey ke menge edumdumaan dut te menge Peresiyu ne meambe ke kenà edlimpas te kegkaan ke menge edumdumaan nu?" ke sikandan.

<sup>19</sup> Ne midtavak si Hisus te sempità, ke sikandin te, "Embiya ruen egkewingen, maa edlimpas ves maa te kegkaan ke menge etew ne mid-inggat te ini pà ke ibpengesawa te kandan? Kenà en iya! Ne iring din ded dema kayi te edumdumaan ku su taman te ini e pà te kandan ne kenà dan arà ed-ul-ulaan.

<sup>20</sup> Ugaid ne ruen hewii ne egkeuma ne egkeawà ke ibpengesawa diyà te kandan, ne ketà dan pà edlimpas te kegkaan."

<sup>21</sup> Ne ketà maa ne insempità ni Hisus te kenà egkepakey ne ebpegebmiten ke behu ne penurù din wey ke raan ne betasan te keep-epuan dan, ke sikandin te, "Kenà edait ne idapi nu ke behu ne saput ketà te neredit en ne velegkas, su embiya ebpedepiyan nu ne ketà te kebpiii nu ne egkenseng ke vehu ne saput ne egkevindas ke redit en ne velegkas ne tuwas pà ke keluag te bisey rin.

<sup>22</sup> Ne iring din ded dema," ke si Hisus, "ke behu pà ne tebà su kenà egkepakey ne riyà nu idtahù te raan en ne edtehuan ne mibeelan ne lundis. Su embiya arà se ed-ul-ulaan nu ne edsevu ke tebà ne ebetu ke lundis ne midtehuan, ne edturayas ke tebà ne egkereetan, ne egkereetan dema ke midtehuan ne lundis. Tembù be iyan din kemeyidan ne ke behu pà ne tebà ne riyà nu itahù te edtehuan ne behu pà ne mibeelan," ke si Hisus.

*Ke Impenurù ni Hisus Mekeatag te Hewii ne Id-imeley*

*(Mateo 12:1-8; Lucas 6:1-5)*

<sup>23</sup> Senge hewii te Sepetu, ke Hewii ne Id-imeley, ne midtarà si Hisus wey ke menge edumdumaan din diyà te pareyanan. Ne arà se kebpetindalan dan ketà te pareyanan ne mibpengetu te tiugkayan ini se menge edumdumaan ni Hisus ne mibpengurib su idsungit dan.

<sup>24</sup> Nekita rà ini dut te menge Paresiyu ne migkehiyan dan en si Hisus te, "Tengtengi nu ma ayan se menge edumdumaan nu su nekesurang en ayan se ed-ul-ulaan dan dut te Penduan tew ne egkahi te warà egelevek te Andew te Id-imeley."

<sup>25</sup> Ne migkehiyan ni Hisus te, "Maa, warà niyu mevasa ke impesurat te Eleleala mekeatag te mid-ulaula ni David, ke ratù tew rengan? Su ruen hewii ne mibpelahuy si David wey ke menge ruma rin dut te menge kunterà dan ne nengevitil dan.

<sup>26</sup> Ketà ne hewii ne iyan pà mepurù dut te menge terebpepengesa ne si Abiyatar ne midlusud si David diyà te insivey ne Baley te Eleleala ne migkuwa rin ke egkeenen ne indenà diyà te Eleleala ne migkaan sikandin ne mibehayan din ke menge ruma rin.



Ugaid ne kayi te Penduan tew ne kenà arà egkekaan te piya engkey ne etew su ke menge terepeligesa rà te Eleteala.”

<sup>27</sup> Ne migkahi en maa si Hisus diyà te menge Paresiyu te, “Ini se Hewii te Id-imeley ne mibeelan te keupianan dut te menge etew te kebpekeimeley ran, ugaid ne warà beeli ke menge etew te keupianan dut te Hewii ne Id-imeley.

<sup>28</sup> Tembù be ke Impeanak te Menusiyà ne iyan ebayàbayà te egkahi te engkey se edait ne ed-ul-ulaan dut te Hewii ne Id-imeley.”

### 3

#### *Ke Meama ne Nekeyengkeng se Belad Din (Mateo 12:9-14; Lucas 6:6-11)*

<sup>1</sup> Ne ruen maa Hewii te Id-imeley ne midlived si Hisus diyà te valey ne ebpengedian te menge Hudiyanen te penduan dan, ne ruen ketà senge etew ne meama ne nekeyengkeng se seveka ne velad din.

<sup>2</sup> Ruen dema ketà menge Peresiyu ne egkunterà ki Hisus ne ebpenipat nevenar ki Hisus ke embiya ebwianan din ini se etew kayi te Hewii ne Id-imeley apey ruen id-isuhat dan kandin ne kevenar.

<sup>3</sup> Ne migkehiyan ni Hisus ke etew ne nekeyengkeng se velad din te, “Mama, pengkayi ka te etuvangan.”

<sup>4</sup> Ne mid-insaan din en ke menge etew ne nevrurun ketà te, “Engkey ma se nekahi te penduan tew ne idtuhut ne ed-ul-ulaan tew te Hewii ne Id-imeley? Maa, edtevangenan tew ke menge ruma ta etawa ebpekekeiran tew sikandan? Maa, edsumpatan tew ke umur te menge ruma ta etawa ed-imetayan tew?” ke si Hisus. Ugaid ne warà den ma medtavak.

<sup>5</sup> Ne neepes si Hisus ne insihid din ke mata rin dut te menge etew ugaid ne ingkeuru rin ded manen su netuenan din te meresen se ulu ran su warà kegkeyru ran dut te menge ruma ran. Ne migkehiyan din manen ke etew ne nekeyengkeng se velad din te, “Mama, ketenga nu ayan se velad nu.” Arà dà ne migketeng en dut te meama ke velad din, ne neulian en.

<sup>6</sup> Nekita rà dut te menge Peresiyu ne midlihawang dan en ketà te valey ne ebpengedian te menge Hudiyanen, ne mibpeing-inggumaey ran en dut te menge sakup ni Hirudis su ebpemengaen dan se ralan te kegkeimetayi ran ki Hisus.

#### *Neulian ni Hisus ke menge Ebpendararu Diyà te Beyvey te Ranew*

<sup>7</sup> Guna su mid-awà en si Hisus ketà ne diyana en maa mibpesinaru sikandin wey ke menge edumdumaan din te beyvey te Ranew te Geliliya. Ne midtundug kandin ke medmerakel ne menge inged te lusud te inged ne Geliliya wey riyà ebpuun te lusud te inged ne Hudiya,

<sup>8</sup> ne ruen dema riyà ebpuun te inged ne Hirusalim, wey riyà ebpuun te lusud te inged ne Idumea, wey riyà ebpuun te inged ne ripag te wayig ne Hurdan, wey ke menge inged ne nekeuvey te menge inged ne Tiru wey Sidun. Mibpendiyà te ki Hisus ke merakel ne menge etew su neringan dan ke tudtul mekeatag te ed-ul-ulaan din ne mekegeyip.

<sup>9</sup> Ne geina te denda ke menge etew ne midsuhù ni Hisus ke edumdumaan din te ebpenehana te avang ne ed-unturan din su apey kenà melipit sikandin dut te merakel ne etew.

<sup>10</sup> Su merakel se nengeulian din, ne langun dut te egkereruwana ne ebpesinsinumahey ran se ed-uvey ki Hisus su apey ran merampen en nikandin ne egkeulian.

<sup>11</sup> Ne embiya egkekita si Hisus dut te menge etew ne mibpenuukan te menge vusew ne midlumpeng dan en diyà te sineruwana din se ebensag te, “Sikuna ke Anak te Eleteala!”

<sup>12</sup> Ugaid ne mibenduan ni Hisus ke menge vusew te kenà dan ebpeketuana te menge etew ke engkey sikandin.

#### *Mibpemili ni Hisus ke Sepulù wey Deruwa ne Edumdumaan Din (Mateo 10:1-4; Lucas 6:12-16)*

<sup>13</sup> Ketà ne midtekereg si Hisus diyà te buvungan ne midtawag din en ke menge meama ne egkiyuhana din ne nekeuma ran en.

<sup>14</sup> Ne midtendù din en ke sepulù wey deruwa ne edumdumaan din ne ed-ingeranan te Apustulis ne migkehiyan din sikandan te, “Midtendù ku sikiyu ne ebpekiduma kediey,” ke sikandin, “ne edsuhuen ku sikiyu te ebpemesabut dut te Meupiya ne Tudtul,

<sup>15</sup> ne ebekahan kew te gehem te kebpekesegseg dut te menge vusew ne ebpenuuk te menge etew.”

<sup>16</sup> Ini ke minge ngaran dut te sepulù wey deruwa ne midtendù din: si Simon (ke mid-ingaranan din ki Pedro),

<sup>17</sup> si Santiago wey ke ari rin si Juan (ke mid-ingaranan ni Hisus te Buwanirgis ne iyan din meana ne "Menge etew ne iring te Ruhung") ini se deruwa ne minge anak ni Sibidyu.

<sup>18</sup> Ne elin dema si Andres, si Felipe, si Bartolome, si Mateo, si Tomas, si Santiago ke anak ni Alpiyu, si Tediya, si Simon ke Patriat ne iyan din meana ne diralem se lengesa rin dut te inged din,

<sup>19</sup> wey si Hudas Iskeriyuti ke ed-ulug ki Hisus te ked-imatey.

*Iyan Kunaan te Menge Etew ne Riyà Ebpuun te Egkeunuten te Vusew ini se Gehem ni Hisus*

*(Mateo 12:22-32; Lucas 11:14-23; 12:10)*

<sup>20</sup> Guna su netendù din en sikandan ne mid-uli dan en. Ne ketà ne merakel en maa se minge etew ne nevrurun ne kenà dan en ebpekesolet te kegkaan dan.

<sup>21</sup> Nerineg dà ini dut te minge suled din, ne mibeyaan dan su ed-engayen dan sikandin su ruen migkahi te, "Nevuneg sikandin!"

<sup>22</sup> Ne ruen minge meyteru te penduan ne riyà ebpuun te inged ne Hirusalim ne migkahi te, "Midsuukan en si Hisus ini ni Belsibull!" Ne ruen ruma pà ne migkahi te, "Uya, ke egkeunuten te minge vusew se mibehey kandin te gehem te kebpekesegseg din dut te minge vusew ne edsuuk te minge etew," ke sikandan.

<sup>23</sup> Guna su nerineg ini ni Hisus ne impeuvey rin ke minge etew ne migkehiyan din te sempità te, "Kenà egkepakey ne edsegseg si Setanas ke egkeunuten te minge vusew te ruma rin ne vusew!"

<sup>24</sup> Su upama ruen datù te senge inged ne ed-unev ebpevuneey ke minge sakup din ne egketunggad arà se inged din.

<sup>25</sup> Ne embiya ruen telteleanak ne ed-unev egkewaha, ne warà ebpengkusan din ke kenà egkevurahey.

<sup>26</sup> Iring din ded be ketà ke midetuan ni Setanas ke egkeunuten te minge vusew, embiya ed-unev ebpevuneey ke sakup din ne kenà meuhet se kedatù din su egketunggad arà se edetuan din.

<sup>27</sup> "Ugaid ne netalew ku en si Setanas ke egkeunuten te minge vusew, tembù be ebpekesegseg a te minge sakup din, su warà etew ne ebpekelusud te valey te mevaher ne etew su ebpenakew te minge kearen din embiya kenà din ed-unaan pà te ebakù arà se mevaher ne etew. Ugaid ne embiya nevakù din en, ne arà pà ne ebpekekuwa sikandin dut te kearen din.

<sup>28</sup> "Idtahù niyu imbe ini te hinawa," ke si Hisus, "te egkepeshad te Eleteala ke langun ne minge salà te minge etew ne misan engkey en ne meraat ne edlelehan dan kandin.

<sup>29</sup> Ugaid ke etew ne edlalog te meraatey mekeatag dut te Kedesenan ne Ebpetuntul te Menusiyà, ne kenà en vulug egkepeshad ke salà din su nekevaal sikandin te salà taman te taman."

<sup>30</sup> (Migkahi ni Hisus ini geina te ruen migkahi te ke gehem din ne riyà ebpuun te vusew ne midsuuk kandin.)

*Ke Impetimbang ni Hisus te Iney Rin wey Menge Suled Din*

*(Mateo 12:46-50; Lucas 8:19-21)*

<sup>31</sup> Nekeuma en ke iney ni Hisus wey ke minge ari rin ne meama, ne riyà dan dà te luwal meketaman ne mibpesuhuan den dà si Hisus.

<sup>32</sup> Su neterektek te merakel ne etew si Hisus, ne migkahi ran en kandin te, "Ke iney nu wey ke minge ari nu ne riyà te lihewangan ne ebpekibalak keykew."

<sup>33</sup> Migkahi si Hisus te, "Duen pà ibpekita ku keniyu," ke sikandin, "ne iring te iney ku wey minge suled ku."

<sup>34</sup> Ne insihid din ke mata rin dut te minge etew ne nekelingut kandin, ne ke sikandin te, "Sikandin ini ke iney ku wey ke minge suled ku!"

<sup>35</sup> Su misan engkey en se ebperumaruma te kiyug te Eleteala ne sikandan en imbe ke minge suled ku ne meama, ke minge etevay ku, wey ke iney ku," ke si Hisus.

## 4

*Mibpenempità si Hisus Mekeatag te etew ne Midsawed te Beni*

*(Mateo 13:1-9; Lucas 8:4-8)*

<sup>1</sup> Senge hewii maa ketà ne riyà si Hisus te veyvey te ranew se ebpenurù te minge etew. Ne geina te merakel ne minge etew se nevrurun ketà, ne mid-untud sikandin diyà

te avang te gebgevasan te ranew se ebpenurù. Ne riyà dà te beyvey te ranew ke menge etew ne ebpeming kandin.

<sup>2</sup> Ne merakel se impenurù din kandan ne impepeveyà te sempità, ke sikandin te.

<sup>3</sup> "Itaan niyu ve ke telinga niyu, su ruen etew ne mibpendiyà te pengengewiran din su edsawed te beni.

<sup>4</sup> Ne ketà te kinesawed din ne ruen beni ne nengeulug diyà te kilid te ralan ne midtuktuk en te menge pepenuk.

<sup>5</sup> Ruen ruma ne insawed din ne riyà nengeulug te kebetuwan ne mevavew se tanà din. Ne geina te mevavew ini se tanà din, ne mehaan dà se kinetuvù din.

<sup>6</sup> Ugaid ne guna su mid-endawan en ne petuluy ne migkuley ke dawun din ne geina te warà meketuneh ke ralid din ne neebmas en.

<sup>7</sup> Ne ruma pà ne riyà nengeulug te sepinitan ne guna su midtuvù en ini ne migkubmusan en dut te sepinit ne warà en mekevahas.

<sup>8</sup> Ugaid ne ruen ruma pà ne riyà nengeulug te meupiya ne tanà, ne midreteb, ne meselinuvù se tuvù din, ne nekevahas su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani.

<sup>9</sup> "Tembù be," ke si Hisus, "itaan niyu ke telinga niyu kayi te migkahi ku ini."

*Midseysey ni Hisus Ke Atag Dut te Menge Sempità*

*(Mateo 13:10-17; Lucas 8:9-10)*

<sup>10</sup> Guna su mid-awà en ke menge etew ne nevurun ketà ne ruen menge etew ne nekerineg dut te impenurù din ne mid-uvey ran kandin abpeg ke sepulù wey deruwa ne edumdumaan din ne mibuyù dan kandin te ibpesabut kandan ke meana te sempità.

<sup>11</sup> Ne migkahi si Hisus te, "Sikiyu ne edurumaruma kediey, ne ebpesebuten en te Eleteala rut te in-eles dengan mekeatag te kedatù te Eleteala te menge etew, ugaid ke ruma ne menge etew ne ebpenurù kandan te ibpepeveyà te menge sempità,

<sup>12</sup> su apey

'Misan edtengteng dan, ne kenà dan ebpekekita;  
ne misan ebpeming dan, ne kenà dan ebpekesabut.

Su embiya nesebutan dan,

ne edlived dan ke hinawa ran diyà te Eleteala  
ne egkepesehad din sikandan.' "

*Mibpesebutan ni Hisus ke Meana dut te Sempità mekeatag te Eteew ne Midsawed te Beni*

*(Mateo 13:18-23; Lucas 8:11-15)*

<sup>13</sup> Ne migkahi si Hisus kandan te, "Maa warà niyu ves mesebuti ayan se sempità ku? Embiya warà niyu mesebuti ini, ne engkey embe se ralan te kebpesabut niyu rut te ruma pà ne idsempità ku?

<sup>14</sup> Su iyan ku midsempitaan ketà te etew ne edsawed te beni ne ke etew ne ebpenudtul dut te Lalag te Eleteala.

<sup>15</sup> Ne ini se ralan ne neuluhan te beni, ne arà ke menge etew ne nekerineg te Lalag te Eleteala, ugaid ne midgedehawan ni Setanas ke datù te pekaid te ed-ahew ini nerineg dan su apey kenà dan mekeperetiyya.

<sup>16</sup> Ne ke kebetuwan ne neuluhan te beni, ne arà ke menge etew ne nekerineg te Lalag te Eleteala ne ingkehalew ran te ebpeming ne mibperetiyya ran.

<sup>17</sup> Ugaid ne mehaan dà su warà mekedalid te hinawa ran. Ne embiya ebpekedarà dan te kemerehenan sabap dut te kedtuman dan te Lalag te Eleteala ne nerineg dan, ne ed-engked dan su edlived dan diyà te andang ne ed-ul-ulaan dan.

<sup>18</sup> Ne ke sepinitan ne neuluhan te beni, ne arà ke menge etew ne nekerineg te Lalag te Eleteala,

<sup>19</sup> ugaid ne gewii ran te ebpetindalan ne merakel se egkubmus dut te lalag ne nerineg dan iring te kemutuwan dan te ked-ubpà-ubpà, ne kegkelilingey ran dut te menge kearan dan, wey ke pegungayà te kepata te nanam, ne ketà ne kenà dan ebpekevehas.

<sup>20</sup> Ugaid ne ke meupiya ne tanà ne neuluhan te beni ne arà ke menge etew ne nekerineg dut te Lalag te Eleteala, ne midtelimà dan, ne mibahas dan su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani," ke si Hisus.

*Ke Penurù ni Hisus Mekeatag te Sulù ne Ibpeluukluuk te Saag Su apey Egkerayahan ke langun*

*(Lucas 8:16-18)*

<sup>21</sup> Ne migkahi en maa si Hisus te sempitâ kandan te, "Warà etew ne edtemtem te sulû ne ebpelengkevan din etawa ibperalung din. Ugaid ne riyâ din ibpeluukluuk te saag su apey egkerayahan ke langun.

<sup>22</sup> Iring din ded dema," ke si Hisus, "langun te netelevan guntaani ne ebpekepehawa red keuremâ. Ne langun ne impegelesâ ne egkepayahan ded.

<sup>23</sup> Itaan niyu ve ke telinga niyu kayi te migkahi ku ini," ke si Hisus.

<sup>24</sup> Ne migkahi pà maa si Hisus te, "Uya, pemineha niyu ve imbe ini su apey niyu egkesebuti! Su endei taman se id-isuhah nu te ruma nu, ne engketâ ded dema ke id-isuhah te Eleteala kenikew, ne ebpesedaran din pà.

<sup>25</sup> Su ke etew ne idtahû din te hinawa ke ibpesabut kandin te Eleteala, ne ed-umanan pà te Eleteala ini se kebpekesabut din. Ugaid ke etew ne kenâ din idtahû te hinawa ke ibpesabut kandin te Eleteala, ne egkeawâ arâ se reisek ne nesebutan din."

*Ke Sempitâ Mekeatag te Kedtuvû te Benî ne Insawed*

<sup>26</sup> Ne migkahi en maa si Hisus te kebpenurû din te, "Ke kedatû te Eleteala rut te menge etew ne iring te etew ne mid-sawed te benî diyâ te pengengewiran din.

<sup>27</sup> Neipus dîn dà te edsawed ne mid-ewaan dîn en, ne gewii rin te egelevek dut te ruma pà ne helevek dîn te uman gewii ne edtuvû en lavew ini se insawed din. Ugaid ne warâ dîn mesebuti ke memenumenu se kebpeketuvû din.

<sup>28</sup> Iyan ebpetuvû te benî ne ke tanâ su apey mekevehas. Iyan ed-una ke lawa, ne edtungud ne ebpenlesut, ne arâ pà ke tiugkayan.

<sup>29</sup> Ne embiya ve egkelutuan en ke bahas dîn ne ed-eheniyen dut te kemuney su timpu en te kebpengehani," ke sikandin.

*Insempitâ ni Hisus ke Edetuan te Eleteala te Pinekemerimet ne Lahas ne Ed-ingaranan te Mustasa*

*(Mateo 13:31-32, 34; Lucas 13:18-19)*

<sup>30</sup> Ne migkahi pà maa si Hisus te, "Engkey ma se edait ne ebpeiringan ta te kedatû te Eleteala dut te menge etew? Engkey ma se meupiya ne sempitâ ta te kedseyseya ketâ?

<sup>31</sup> Su ini se kedtuvû te kedatû te Eleteala te menge etew ne ebpekeiring dut te merimet nevenar ne lahas ne ed-ingaranan te Mustasa. Ini ke pinekemerimet ne lahas kayi te ampew te dunya.

<sup>32</sup> Ugaid ne embiya ibpemula ini ne ebpeketuvû ne egkevaluy ne iyan dekelâ dut te langun ne pinemula. Ne edsubpang te derekelâ, ne rutun ebpenesalag ke menge pepenuk," ke sikandin.

<sup>33</sup> Mibpesabut si Hisus te Lalag te Eleteala diyâ te menge etew te impepevayâ din te sempitâ iring kayi, te endei taman se netuenan dîn ne egkesebutan dan.

<sup>34</sup> Warâ sikandin mibpenurû kandan ke kenâ ibpepevayâ te menge sempitâ. Ugaid ne embiya iyan dîn dà dumâ ke menge edumdumaan dîn, ne impesabut dîn kandan ke langun ne meana rin.

*Impeengked ni Hisus ke Keramag Diyâ te Ranew*

*(Mateo 8:23-27; Lucas 8:22-25)*

<sup>35</sup> Guna su merukilem en te arâ ne hewii ne migkehiyan ni Hisus ke menge edumdumaan dîn te, "Kuwa kew en su ed-apat kiyu riyâ te ripag," ke sikandin.

<sup>36</sup> Arâ dà ne mid-ewaan dan en ke merakel ne menge etew, ne mid-untud dan en ketâ te avang ne mibpinuwan ni Hisus ne mibpuridtas dan en ki Hisus. Ne ruen duma ne avang ne eduma rema kandan.

<sup>37</sup> Guna su ed-avang-avang dan en, ne midtekwetekew en se mebmevandes ne keramag ne egkelikuvungan dan en te menge baleg ne egkesimbuhan en te wayig ke avang dan ne deisek samâ ne egkekahem dan en.

<sup>38</sup> Ne si Hisus ne riyâ te ulinan su nekelipereng diyâ te ulunan dîn. Ne mibpemukew en dut te menge edumdumaan dîn se egkahi te, "Meyterû, egkeherâ ki en! Maa, warâ te hinawa nu se kegkeherâ tew?"

<sup>39</sup> Nepukew si Hisus ne mid-enuw en ne pineengked dîn en ke keramag wey baleg ne migkahi te, "Engked kew!" Arâ dà ne mid-eneng-eneng ke keramag, ne midlengen en ke ranew.

<sup>40</sup> Ne migkehiyan dîn en ke menge edumdumaan dîn te, "Meambe ke nengeandek-andek kew? Maa, kenâ kew edsarig kediey?"

<sup>41</sup> Ne andek-andek dan nevenar ne mibpein-inseey ran te, "Engkey ini ne etew? Su misan ke keramag wey menge baleg ne ebperumaruma rut te lalag dîn," ke sikandin.

## 5

*Neulian ni Hisus ke Meama ne midsuukan te Menge Vusew*  
(Mateo 8:28-34; Lucas 8:26-39)

<sup>1</sup> Ne nekerunggù en ensi Hisus diyà te ripag te ranew te Geliliya riyà te sakup te inged te menge Gerisiyanu.

<sup>2</sup> Guna su mibpemeanaug en si Hisus ketà te avang ne midsinuhung en sikandin te senge etew ne riyà ebpuun te menge surung ne penlelevangan te minatey.

<sup>3</sup> Su ini se etew ne midsuukan te vusew, tembù be diyàn en mid-ubpà sikandin te menge surung ne penlelevangan te minatey. Ne kenà en egkeehenan sikandin misan pà egkedinaan.

<sup>4</sup> Ne kenà kepipira rà bekua ke paa rin wey ke velad din, ugaid ne ebpengevidtew rin ded ke kedina ne ebpengetamped din ke putew ne impatung te paa rin. Warà etew ne ebpekeehen kandin su mevaher.

<sup>5</sup> Merukilem meandew ne edlauglaug sikandin diyà te menge surung ne penlelevangan te minatey wey riyà te menge buvungan se ebpulung ebpengulayi, ne ebpemelian din pà ke lawa rin te menge vatu.

<sup>6</sup> Guna su nesandeng din si Hisus ne mibpelelahuy rin en te edsinuhung, ne midlumpeng en sikandin diyà te sineruwan ni Hisus.

<sup>7</sup> Ne mibensag en sikandin se egkahi te, "Sikuna ini si Hisus ke Anak te Eleteala ne warà repeng din. Engkey ma se kememeniyà nu kediey? Isapà nu te etuvangan te Eleteala te kenà a nu pemekeiri," ke sikandin.

<sup>8</sup> (Ini se mibuyù din geina te migkehiyan en ni Hisus sikandin te, "Sikuna ini se vusew, ewai nu en ayan se etew!")

<sup>9</sup> Ketà ne mid-insaan ni Hisus ke meama te, "Engkey ma se ngaran nu?"

Ne midtavak ke vusew te, "Iyan ku ngaran ne si Selasà su medmerakel dey," ke sikandin.

<sup>10</sup> Ne mibpemuyù te mevaher ki Hisus te kenà din ebpepeewaan sikandan ketà te inged.

<sup>11</sup> Ne ruen ketà te uvey ran medmerakel ne bavuy ne ebpemenual diyà te kelendihan.

<sup>12</sup> Ne mibpemuyù en ke menge vusew ki Hisus se egkahi te, "Ibpendiyà key nu te menge bavuy arà su apey key ketà mekeawuk te kandan."

<sup>13</sup> Ne midtuhutan en ni Hisus sikandan. Arà dà ne mid-awà en ke menge vusew rut te meama ne riyàn dan en mibpengasuk te menge bavuy. Ne mibpemelelahuy en ke menge bavuy se ed-umpak diyà te dempilas ne nengelened dan en diyà te ranew su ruen en buwa menge deruwa ne ngivu se kerakel dan.

<sup>14</sup> Guna su nekita ini rut te menge etew ne edtuganur ketà te menge bavuy ne mibpemelelahuy ran en su impemenudtul dan ini diyà te inged dan wey ke nekeerivey ne pengengewiran. Nerineg ini rut te menge etew, ne mibayaan dan en su midsusi ran.

<sup>15</sup> Nekeuma ran ketà te ki Hisus ne nekita ran en te ebpinuu ke meama ne midsuukan te medmerakel ne menge vusew pehaney, ne duen en belegkas din ne nekeulit en ke itungan din. Ketà ne nengeandek dan nevenar.

<sup>16</sup> Ne ini se menge etew ne nekekita rut te mid-ulaula ni Hisus ne impenudtul dan en dut te ruma pà ne etew ke kegkeulli rut te meama ne midsuukan te menge vusew wey ke ned-ulaula rema rut te menge bavuy.

<sup>17</sup> Ne mibpemuyù dan ki Hisus te menu med-awà sikandin ketà te inged dan.

<sup>18</sup> Ne midlived en ensi Hisus diyà te avang dan, ne guna su ed-untud en sikandin te avang ne migkahi en ini se meama ne neulian en te, "Egkiyug a ne ebpekiduma kenikew," ke sikandin.

<sup>19</sup> Ugaid ne warà megkiyug si Hisus te ebpekeruma sikandin ne iyan din migkahi se, "Uli ke en diyà te keniyu ne ipenudtul nu ini se meupiya ne mid-ulaula te Kerenan kenikew wey ke kinekeyru rin kenikew."

<sup>20</sup> Arà dà ne mid-uli en ini se meama ne mibpemenudtul en diyà te langun ne menge inged diyà te lusud te inged ne Dikapulis ini se meupiya ne mid-ulaula ni Hisus kandin. Ne langun ne menge etew ne nekerineg kandin ne nengegeyip dan nevenar.

*Neulian ni Hisus ke Anak ni Jairo wey ke Meritan ne Mid-ami dà te Belegkas ni Hisus*  
(Mateo 9:18-26; Lucas 8:40-56)

<sup>21</sup> Guna su mid-apat en maa si Hisus diyà te ranew ne midunggù dan ne merakel se menge etew ne nengevurun ne midlingut kandin.

<sup>22</sup> Duen ketà meama ne ed-ingaranan ki Jairo, su seveka sikandin ne egkeunutan te baley ne ebpedgian te menge Hudiyane te penduan dan. Guna su nekita rin si Hisus ne midlumpeng en diyà te etuvangan din,

<sup>23</sup> ne midsebenar mibpemuyù en sikandin se egkahi te, “Ruen deisek ne anak ku ne meritan ne edaru ne edtiviltivil te kepatey,” ke sikandin, “kuwa ki en be su apey nu mesamsam sikandin ne egkeulian.”

<sup>24</sup> Ne miduma en si Hisus kandin te ed-uli. Ne mid-eguyut en kandan ke merakel ne menge etew, ne ketà ne egkelipitlipit en si Hisus.

<sup>25</sup> Ne ruen meritan ketà dema ne nerasey nevenar su nekedsepulù en wey deruwa ne rahun se kebpemundasa rin te lengesa ne kenà egkeengked.

<sup>26</sup> Misan mibpevwian din en te merakel ne terevawì ne warà dan megaga. Neamin din en ke kureta rin su apey egkeulii, ugaid ne lemban en ne ed-iseg.

<sup>27</sup> Nerineg din ke meupiya ne ulaula ni Hisus, ne mibpenelektelek en sikandin diyà te uriyan din.

<sup>28</sup> Su kehegginawa rin te, “Misan egkeamì ku rà ke velegkas din, ne egkeulian en ini se sakit ku,” ke sikandin.

<sup>29</sup> Guna su neamì din en ke velegkas ni Hisus ne netibpek en ke kebpemundasa rin, ne netuenan din te warà en ke sakit din.

<sup>30</sup> Arà dà ne neheram ni Hisus te ruen gehem te kebpekeuli ne midlihawang kandin, ne mid-itindeg sikandin se ebpenlangulangu. “Engkey ma se mid-amì te velegkas ku?” ke sikandin.

<sup>31</sup> Migkahi ke menge edumdumaan din te, “Ey, netuenan nu en se merakel ne menge etew ne ebkelipit kenikew, ne meambe ke ed-insà ka ke engkey se mid-amì te velegkas nu?”

<sup>32</sup> Ugaid ne mibpenlangulangu pà manen si Hisus ke entei arà se mid-amì dut te velegkas din.

<sup>33</sup> Ne ini se meritan ne netau te ned-ulaula rin ne mid-uvey en ki Hisus se egkerkeren te kinekeandek din. Ne midlumpeng en diyà te sineruwan ni Hisus ne impenudtul din en langun ke ned-ulaula rin.

<sup>34</sup> Ne migkehiyan en ni Hisus sikandin te, “Bayi, neulian ke en su sabap dut te kinesarig nu kediey. Uli ke en be ne barasbaras ka su neulian ke en dut te keresayan nu,” ke sikandin.

<sup>35</sup> Ne gewii te ebpekidlalag pà si Hisus dut te meritan ne ruen en nekeuma ne ibpetundug ki Jairo se egkahi te, “Ke anak nu ne nekerudtanà en. Kenà ta en ebengen en si Hisus,” ke sikandan.

<sup>36</sup> Ugaid ne warà impememantag ni Hisus ke nerineg din ne lalag dan inemulà se iyan din migkahi diyà te ki Jairo te, “Kenà ka egewhewana kayi te anak nu, ugaid ne sarig ke rà kediey.”

<sup>37</sup> Arà dà ne iyan din dà pineruma kandan ki Jairo ne si Pedro, wey ke teleari si Santiago ki Juan.

<sup>38</sup> Guna su nekeuma ran diyà te valey ni Jairo ne nekita ni Hisus se egkehisaweg ke menge etew, ne nerineg din en se ebpemenderawit.

<sup>39</sup> Guna su midlusud en si Hisus ketà te valey ne migkehiyan din en sikandan te, “Meambe ini se egkehisaweg kew? Ne meambe ke ebpemenderawit kew? Warà minatey ayan se vatà su nekelipereng dà.”

<sup>40</sup> Nerineg den dà ke migkahi ni Hisus ne mid-engitan den dà sikandin. Arà dà ne impeawà dan en ni Hisus diyà te valey, ne midtawag din en ke amey wey iney rut te batà wey ke tetelu ne edumdumaan din ne midlusud dan en diyà te mibpereyasan dut te vatà.

<sup>41</sup> Guna su nekelusud dan ketà ne migeweran ni Hisus ke velad din ne migkahi te, “Talita kumi,” ne iyan din meana se, “Payi, enew ke en.”

<sup>42</sup> Arà dà ne mid-enew en ke vatà ne mid-ipanew en. Ini se vatà ne edraharaha en su sepulù wey deruwa se rahun din. Guna su nekita ini rut te menge etew ne nengegeyip dan nevenar.

<sup>43</sup> Ugaid ne mibenduan dan ni Hisus te kenà ibpenudtul ini se ned-ulaula te misan entei en. Ne migkahi rema sikandin te pekeena ran ke vatà.

## 6

*Warà Mibperetiyaya te Penurù ni Hisus Diyà te Inged Din ne Nesarit*  
(Mateo 13:53-58; Lucas 4:16-30)

<sup>1</sup> Mid-awà en si Hisus wey ke edumdumaan din ketà te arà ne inged, ne mid-uli en diyà te inged din ne Nesarit.

<sup>2</sup> Guna su neuma en ke Hewii te Id-imeley, ne miɓpendiyan en si Hisus te baley ne ebpendgian te menge Hudiyanen te penduan dan se ebpenurù, ne merakel se menge etew ne nevrurun ketà.

Guna su nerineg dan se kebpenurù din ne neinuinu ran nevenar se egkahi te, “Endei rin be buwa mehuruwi ini?” ke sikandan. “Engkey ini se ketau rin ne nekuwa rin? Ne ebmenuwen din te ebaal ini se menge mekegeyip?”

<sup>3</sup> Maa, kenà uvag ayan ke pandey, ne anak ni Maria, ne kakey en ni Santiago, ki Jose, ki Hudas wey ki Simon? Maa, kenà be ke menge etevey rin ne ini red dema med-ubpà?” ke sikandan. Ne ketà ne mid-engkenà dan kandin.

<sup>4</sup> Ne migkahi si Hisus kandan te, “Ke etew ne ebpelembas te Lalag te Eleteala ne egkeedatan te piya endei en sikandin egketahù, liyu rà dut te muney ne inged din wey ke kereremige y rin.”

<sup>5</sup> Tembù be warà mekegeyip ne ingkepekita ni Hisus ketà te inged din. Ne merelag dà se miɓpendampen din ne ebpendararu ne neulian.

<sup>6</sup> Ne ingkeinuinu nevenar ni Hisus su warà meɓperetiya ke menge etew kandin.

*Impeipanew ni Hisus ke Sepulù wey Deruwa ne Edumdumaan Din  
(Mateo 10:5-15; Lucas 9:1-6)*

Ne mid-ipanew rin ke langun ne nekeerivey ne menge inged diyà te lusud te inged ne nesarit su ebpenurù sikandin dut te menge etew.

<sup>7</sup> Miburun ni Hisus ke sepulù wey deruwa ne edumdumaan din ne impeipanew rin sikandan te igihiruwa. Ne mibehayan din te gehem te kebpenegseg te menge vusew ne ebpenuuk dut te menge etew.

<sup>8</sup> Ne intelaan din kandan te, “Kayi te ked-ipanew niyu ne iyan niyu rà peneheewita ne ke tuked niyu, kenà kew ewit te lutù, kenà kew ewit te kemuyut etawa kureta.

<sup>9</sup> Ne tetelumpà kew, ugaid ne kenà kew ewit te belegkas ne idsambì niyu.”

<sup>10</sup> Intelaan din kandan dema te, “Embiya ebpekeuma kew riyà te inged ne riyà kew rateng te baley ne ruen ebpepemenayik keniyu, ne ketà kew rà rateng taman te ked-awà niyu ketà te inged.

<sup>11</sup> Ugaid ne embiya ebpekeuma kew te inged ne warà edtelimà keniyu etawa kenà dan ebpemingg dut te ipesabut niyu, ne levundus kew ne pendegdaha niyu ke lipupuk diyà te paa niyu gewii te ed-awà kew ketà te inged dan. Su tuus ini te baag kandan te kenè en be kilid keniyu ketà te hewii ne kedtimbang te Eleteala kandan.”

<sup>12</sup> Arà dà ne mid-ipanew ran en se ebpepemesabut diyà te menge etew se med-engked dan en te meraat ne menge ulaula ran.

<sup>13</sup> Ne miɓpenegseg dan ke menge vusew ne miɓpenuuk te menge etew, ne midsepuwan dan te lana ke menge ebpendararu ne neulian en.

*Ke Guhud Mekeatag te Kinepatay ni Juan ke Eɓpembunyag  
(Mateo 14:1-12; Lucas 9:7-9)*

<sup>14</sup> Nekeeneb en ini se tudtu mekeatag te ed-ul-ulaan ni Hisus taman te nekeuma en diyà te ki Hirudis, ke egkeunutan kayi te inged ne Geliliya, su nevantug en si Hisus diyà te langun ne inged ketà. Ruen menge etew ne migkahi te, “Neuyag ded maa si Juan ke Eɓpembunyag, tembù be ruen gehem din te kebpekevaal din te menge mekegeyip.”

<sup>15</sup> Ruen duma ne migkahi te, “Si Elias ded ini, ke miɓpelambas te Lalag te Eleteala rengan.” Ruen duma pa ne migkahi te, “Sikandin ini ke ebpelambas te Lalag te Eleteala iring te senge etew rut te menge miɓpelembas te Lalag te Eleteala rengan.”

<sup>16</sup> Guna su nerineg ni Hirudis ini se lalag dan ne iyan din migkahi se, “Ini red si Juan ke Eɓpembunyag. Impepungel ku en ke ulu rin, ugaid ne neuyag ded sikandin.”

<sup>17</sup> Ini se nekahi ni Hirudis su sikandin en iya ke miɓpeimatey ki Juan, su sikandin pa ke miɓpesigkem, ne miɓpevakù ne miɓpevilanggù kandin. Iyan din kineul-ulaa kayi su mid-esawa rin si Hirudiyas ke ipag din misan si Hirudiyas ne esawa rut te tuney ne suled din ne si Felipe.

<sup>18</sup> Ne uman dà ebpengegekahi ni Juan si Hirudis te, “Kenà meupiya ne ed-esawaan nu ke ipag nu su esawa en te tuney ne suled nu!”

<sup>19</sup> Arà be ke ingkeepes ni Hirudiyas ki Juan, ne ebpeimetayan din perem, ugaid ne warà din med-ulaula ini su warà megkiyug si Hirudis.

<sup>20</sup> Su neandek si Hirudis ki Juan su netuean din ne metidtu sikandin ne iyan ebpelupandù kandin ne Eleteala. Tembù be kenà din ebpeimetayan si Juan. Ne ingkesuati rin te ebpemingg ke penurù ni Juan misan ebpekevehey te kemutuwan te hinawa rin.

<sup>21</sup> Ugaid ne guna su neuma en ke hewii te kineanaka ki Hirudis ne ketà metuen ni Hirudiyas se ralan te kegkeimetayi ki Juan. Su miɓaal si Hirudis te kevruran dut te

langun ne menge mepurù ne egkeunutan, wey ke menge mepurù dut te sundaru rin, wey ke menge etew ne egkamal kayi te lusud te inged dan ne Geliliya.

<sup>22</sup> Ketà te kevrunan ne pinesayew ke anak ni Hirudiyas ne raha, ne ingkesuatsuat ni Hirudis wey ke menge etew ne impetelavuk din.

Tembù be migkahi si Hirudis dut te raha te, "Engkey ma se egkiyuhan nu? Su misan engkey en ne egkekuwa nu, ne ibehey ku keykew."

<sup>23</sup> Ne impasad din te mevaher te, "Misan pà engkey se ebpentunen nu ne ibehey ku keykew, misan egketengà pà ke langun ne kearen ku."

<sup>24</sup> Arà dà ne midlihawang en ke raha su ebpendiyà te iney rin ne mid-insà te, "Engkey se ebuyen ku?"

Ne midtavax ke iney rin te, "Iyan nu buyua ke ulu ni Juan ke Ebpemunyag."

<sup>25</sup> Ne midahewrahew en midlived ke raha riyà te egkeunutan ne si Hirudis ne migkehiyan din en te, "Iyan ku ebuyen te guntaani ne ivehey nu kediey ke ulu ni Juan ke Ebpembunyag ne edsenaren te pelatu."

<sup>26</sup> Nerineg dà ni Hirudis ne nekebmutu nevenar sikandin, ugaïd ne kenà din arà egkeparew su ingkepasad din en diyà te etuvangan te langun ne pinetelavuk din.

<sup>27</sup> Ketà be ne midsuhù din en se sundaru rin te ibpekuwa ke ulu ni Juan, ne mibpendiyà en ke sundaru te bilengguan ne mibpungelan din en si Juan.

<sup>28</sup> Ne intahù din en te pelatu ke ulu ni Juan ne mibpeneheewit din en ne imbehey rin diyà te raha, ne imbehey en dema dut te raha diyà te iney rin.

<sup>29</sup> Guna su nerineg ini dut te menge edumdumaan ni Juan, ne mibayaan dan diyà te bilengguan ne migkuwa ran ke lawa ni Juan ne inleveng dan.

*Pinekaan ni Hisus ke Lelima ne Ngivu ne Etw*

*(Mateo 14:13-21; Lucas 9:10-17; Juan 6:1-14)*

<sup>30</sup> Guna su mibpenguli ke menge edumdumaan ni Hisus kayi te kandin ne mibpenudtul dan kandin ke langun ne mid-ulaula ran wey ke impemenurù dan.

<sup>31</sup> Ketà ne misan ke kegkaan dan ne kenà dan ebpekeselet su ebpemekedsuvar se merakel ne menge etew ne ebpekeuma kayi te kandan. Tembù be migkehiyan ni Hisus ke edumdumaan din te, "Kuwa kew en su ebpendiyà kiyu pà te endeï se warà etew rin su apey kew ebpekeimeley pà."

<sup>32</sup> Ketà be ne mid-erà dan en te avang ne mid-avang-avang dan en se ebpendiyà te endeï se warà etew rin.

<sup>33</sup> Ugaïd ne guna su ed-ipanew ran en ne merakel ded ne etew se nekekità kandan ne nekilalà ran. Ketà be ne mibpemelelahuy ke merakel ne menge etew ne ebpetiuna en ketà te inged ne ebpesineruwan ni Hisus.

<sup>34</sup> Guna su nekerunggù en ensi Hisus ne iyan dan en nekita se merakel ne menge etew ne nevrurun, ne neyruwan nevenar ni Hisus sikandan su iyan dan neiringan ne menge bilibili ne warà tumetuganur. Ketà be ne merakel se impenurù din kandan.

<sup>35</sup> Guna su meapun en nevenar ne mid-uvey en kandin ke menge edumdumaan din se egkahi te, "Meapun en ini ne warà dè be menge etew kayi te inged ini.

<sup>36</sup> Iyan tumù ne ibpeipanew nu en ini se merakel ne etew su apey ran ebpekependiyà te endeï se ruen menge valey rin ne ebpekepemasa ran te egkekaan dan."

<sup>37</sup> Ugaïd ne migkehiyan dan ni Hisus te, "Sikiyu se ebpekaan kandan."

Ne migkahi ran te, "Maa, sikami pè be se ebpepemasaan nu te ibpekaan kandan? Misan buwa duen kureta tew ne ed-elahà te deruwa nehatus ne denariyu ne ibpemasa te egkekaan, ne kurang pà."

<sup>38</sup> Ne migkahi en si Hisus te, "Engkey ma taman se kerakel te lutù tew? Intengi niyu kun."

Guna su mid-intengan dan ne migkahi ran en te, "Ruen lelima ne timan se pan wey deruwa ne timan se serà."

<sup>39</sup> Nerineg din dà ne migkehiyan en ni Hisus ke sepulù wey deruwa ne edumdumaan din te, "Pemepinuwa niyu sikandan te idsengepuntuk keniyan te gumegebà."

<sup>40</sup> Arà dà ne mibpepinuu ran en te igihilima nepulù etawa ibmehatus ne etew te idsenge puntuk.

<sup>41</sup> Ne migkuwa ni Hisus ke lelima ne timan ne pan wey ke deruwa ne timan ne serà, ne midlingakà sikandin diyà te langit ne impeselamat din te Eleteala. Ne mibpenevitevi din en ke pan ne imbehey rin en dut te menge edumdumaan din su ibpetukid dut te merakel ne etew. Ne iring din ded dema ke serà, mibpenevitevi din ne impetukid din dut te langun ne menge etew.

<sup>42</sup> Migkaan dan langun ne nengevulung dan.



<sup>43</sup> Guna su nekeipus dan en se egkaan ne mibpunpun dut te sepulù wey deruwa ne edumdumaan din ke nengesamà, ne iyan din nepunpunan ne sepulù wey deruwa ne binevey ne nengepenù.

<sup>44</sup> Ne ke minge etew ne migkaan ketà ne lelima nengivu ke meama, liyu pà ke minge meritan batà.

*Mid-ipanew si Hisus Diyà te Divavew te Wayig  
(Mateo 14:22-33; Juan 6:15-21)*

<sup>45</sup> Nekeipus dan dà ketà, ne impeuntud en ni Hisus te avang ke minge edumdumaan din su ibpeuna rin en sikandan te ed-apet te ranew riyà te inged ne Bitsaida, su ibpepeuli din pà ke minge etew.

<sup>46</sup> Guna su impeipanew rin en ke minge etew ne midtekereg en sikandin te buvungan su ebpengeningeni.

<sup>47</sup> Guna su egkesagkup en ne riyen en ke edumdumaan ni Hisus te kalud te ranew se ed-avang-avang, ne kayi pà te buvungan si Hisus se ebpengeningeni.

<sup>48</sup> Ne nesandeng ni Hisus se egkepesangan ke minge edumdumaan din te ebpemura su egkesurang dan ke mevandang ne keramag. Guna su egkekepawà en ne midtelukun en si Hisus kandan se ed-ip-ipanew riyà te rivavew te wayig, ne iring te edsahad dà kandan.

<sup>49</sup> Ne guna su nekita sikandin dut te minge edumdumaan din se riyà ed-ip-ipanew te rivavew te wayig ne kunaan dan ke angka sikandin, ne migkuleyi dan te kegkeandek dan.

<sup>50</sup> Su langun dan ne nekekita kandin ne nengeandek dan nevenar.

Ketà ne migkahi si Hisus kandan te, "Pedtihel kew te hinawa niyu, su siaken ini! Kenà kew meandek!"

<sup>51</sup> Arà dà ne mid-erà en si Hisus te avang dan ne netekew en mid-engked ke keramag. Ketà ne nengeinuini nevenar ke minge edumdumaan din.

<sup>52</sup> Su misan nekita ran en ke mekegeyip ne mid-ulaula ni Hisus te kinepekaan din te merakel ne etew, ne warà den pà mesebuti ke benar ne meana rut te nekita ran, su warà metegkad dut te itungan dan.

*Neulian ni Hisus Ke Minge Ebpenderaru Diyà te Inged ne Hiniserit  
(Mateo 14:34-36)*

<sup>53</sup> Guna su mid-apet dan te ranew ne iyan dan nerunguan ne inged ne Hiniserit, ne ketà ne migaun dan en ne in-iket en ke avang dan.

<sup>54</sup> Guna su nekehaun dan en ne petuluy ne nekilala dut te minge etew si Hisus.

<sup>55</sup> Arà dà ne mibpelelahuy ran en se ebpesabut dut te minge etew ne ebpenderaru riyà te minge inged ne nekeerivey. Ne misan endei ran egkerineg se egketahuan ni Hisus ne edyeyungen en ke minge ebpenderaru su ebpeneheewitan dan diyà te kandin.

<sup>56</sup> Ne misan endei ebpesinaru si Hisus te minge pengengewiran etawa riyà te lihewangan sikandin, ne edyeyungen dan maa ke minge ebpenderaru riyà te kandin. Su ebpeneheewitan dan diyà te minge pedian su ebpemuyuen dan ki Hisus te menu mà ke mekeami ke ebpenderaru misan dut te velegkas din dà, ne ketà ne langun ne nekeami ne neulian.

## 7

*Mid-insà ke Minge Peresiyu ki Hisus ke meambe ke kenà eduma ke Minge Edumdumaan din Dut te Penurù te Keep-epuan Dan ne Hudiyanen mekeatag te kebpenlùlù  
(Mateo 15:1-9)*

<sup>1</sup> Senge hewii ne ruen minge Peresiyu wey minge meyerù te penduan ne riyà ebpuun te Hirusalim ne mibpengkayi te ki Hisus.

<sup>2</sup> Nekita ran te ruen edumdumaan ni Hisus ne nekerimpas dut te betasan ne edtenuran dut te minge Peresiyu su migkaan dan ne warà dan dumai ke edtenuran ne kebpenlùlù te minge belad dan.

<sup>3</sup> Su ke minge Peresiyu wey ruma pà ne minge Hudiyanen ne kenà dan ebpekekaan embiya kenà iyan dan ibpeuna ke kedtumana te edtenuran ne betasan te kedlùlù te velad ne impenurù dut te keep-epuan dan.

<sup>4</sup> Misan ed-ulùlù dan ke riyà ebpuun te pedian ne kenà dan ebpekekaan embiya kenà dan ed-unaan te edtuman ke edtenuran ne betasan te kedlùlù. Ne ruen pà ruma ne betasan ne edtumanen dan iring te edtenuran ne kedlùlù te minge sangkap te egkaan, minge kelalew, minge halang ne kendidu, wey minge ed-irehaan.

<sup>5</sup> Ketà be ne mid-insaan dut te minge Peresiyu wey ke minge meyerù te penduan si Hisus te, "Meambe ke kenà edtuman ini se minge edumdumaan nu rut te impenurù

ne betasan dut te keep-epuan tew? Su matag dan en migkaan ne warà dan tumana ke edtenuran te kedlùlù!”

<sup>6</sup> Ne midtavak si Hisus kandan te, “Benar iya ke lalag mekeatag keniyu ne impesurat te Eleteala ki Isaias ne mibpelambas te Lalag te Eleteala rengan. Su sikiyu ne uvag en kun ne ebperetiyya iring dut te insurat din ne egkahi te,

‘Ini se menge etew, ke se Eleteala, ne kayi rà te bivig dan se ked-arap dan kediey, ugaïd ne ke hinawa ran ne medmeriyù kediey.

<sup>7</sup> Warà ded be lalew rin se kebpengarap dan kediey, su ke impenurù dan ne mibèbeelan dà te etew, ugaïd ne iyan dan migkahi ne kayi ini ebpuun te penduan ku, ” ke se impesurat ki Isaias.

<sup>8</sup> “Ne iring din ded dema te sikiyu,” ke si Hisus, “su mid-lekaan niyu ke penduan te Eleteala, ne iyan niyu egeweran ke betasan ne bineelan dà te menusiya.”

<sup>9</sup> Ne migkahi pà maa si Hisus te, “Metau kew nevenar te ralan te ked-engked niyu te penduan te Eleteala su apey niyu metuman ke keniyu rà dè duen ne betasan.

<sup>10</sup> Su,” ke si Hisus, “ruen penduan te Eleteala ne impesurat din ki Moises dengan ne egkahi te, ‘Edati niyu ke amey niyu wey ke iney niyu.’ Ne ingkahi rema te, ‘Misan engkey en ne etew ne edlalag te meraatey riyà te menge lukes din ne ebpeimetayan,’ ke se impesurat ki Moises.

<sup>11</sup> Ugaïd ne sikiyu,” ke si Hisus, “ne iyan niyu ibpenurù ne embiya ruen etew ne ruen igketavang din dut te menge lukes din ne egkepakey ne egkehiyen din se ‘Kurban ini’ ne iyan din meana ne ‘Eleteala se kemuney kayi’.

<sup>12</sup> Ne ketà,” ke si Hisus, “ne kenà en sikandin ebpeketavang rut te amey rin wey iney rin.

<sup>13</sup> Kayi ve te penurù niyu ini ne mid-iniyuhan niyu ke Lalag te Eleteala su iyan niyu ibpeiseg ke betasan ne intelau dut te keep-epuan niyu. Ne ruen merakel pà ne iring kayi ne ed-ul-ulaan niyu.”

*Ke Menge Ebpekeredsik te Etew  
(Mateo 15:10-20)*

<sup>14</sup> Arà dà ne pineuvey en ni Hisus ke merakel ne menge etew se egkahi te, “Pemineha niyu ve ini,” ke sikandin, “se edlelehan ku su apey niyu egkesebuti.

<sup>15</sup> Kenà iyan ebpekeredsik te etew ini se egkeenen ne ebpekeawuk te bèbà din, ugaïd ne iyan ebpekeredsik te etew ini se netahù te hinawa rin ne ebpekelihawang kayi te bèbà din. [

<sup>16</sup> Itaan niyu ve ke telinga niyu kayi te migkahi ku ini!]”

<sup>17</sup> Nekeipus te edlalag si Hisus ne mid-ewaan din ke merakel ne etew ne midlusud en diyà te valey, ne mid-insaan en dut te menge edumdumaan din ke engkey se meana ketà te sempità din.

<sup>18</sup> Ne migkahi si Hisus te, “Iring kew rà dut te ruma ne etew ne mevavew se kebpekesabut din. Meambe warà niyu ves mesebuti te kenà iyan ebpekeredsik te etew ini se egkeenen ne ebpekeawuk te bèbà din?”

<sup>19</sup> Su kenà ini edlusud te hinawa rin, ugaïd ne kayi ebpevyà te hetek din ne edlihawang en diyà te kandin.” (Ne ini se lalag ni Hisus ne iyan din ibpesabut ne egkepakey ne egkeenen se misan engkey en ne egkekaan.)

<sup>20</sup> Ne impelevundus ni Hisus se kegkahi rin te, “Iyan ebpekeredsik te etew ne ini se netahù te hinawa rin ne ebpekelihawang te bèbà din.

<sup>21</sup> Su ini se kayi ebpuun te lusud te diralem te etew, ini se neketahù te hinawa rin, ke ebpuunan te meraat ne itungan ne ebpeneheewit kandin te meraat ne ed-ul-ulaan iring te ed-ulaula te meredsik, kebpentakew, ked-imatey,

<sup>22</sup> kedlangkadlangkad te esawa rin, kegkeima, kereatey te itungan mekeatag te ruma rin, kebpencilbung, kedimayà, kebpengelikud, kebpenerupet, kebmeperayù, wey kerupangan.

<sup>23</sup> Langun din ini ne menge meraat ne ulaula ne kayi ebpuun te lusud te hinawa te etew ne ebpekeredsik kandin.”

*Ke Guhud mekeatag te Sarig te Senge Etew ne Meritan ki Hisus  
(Mateo 15:21-28)*

<sup>24</sup> Ne mid-awà si Hisus ketà te lusud te inged ne Geliliya ne mibpendiyà te inged ne Tiru. Guna su nekeuma en ne mibpemenayik sikandin dutun te valey su kenà din egkesuatan ne egketendekan te menge etew ke valey ne midetengan din, ugaïd ne kenà ma iya ebpekeeles sikandin.

<sup>25</sup> Ne ruen meritan ketà te inged ne ruen anak din ne meritan ne midsuukan te vusew. Guna su nerineg din se nekeuma en si Hisus ne mibayaan din ne midlumpeng en diyà te sineruwan ni Hisus.

<sup>26</sup> Ne mibpemuyù kandin te ibpesegeg ke vusew ne midsuuk te anak din. Ini se meritan ne kenà Hudiyanen su etew te inged ne Punisiya, lusud te inged ne Siriya, ne iyan din kedlalag ne Gerisiyanu.

<sup>27</sup> Ugaid ne midsempità si Hisus kandin te, “Ed-unaan ta te ebpekaan ke menge vatà su kenà edait ne egkuan ta ke ebpekaan te menge vatà ne idsavud te menge asu.”

<sup>28</sup> “Benar ayan, Kerenan,” ke se meritan, “ugaid misan ke menge asu ne ebpenelisim dut te mumu te menge vatà ne ebpengeulug diyà te lemisaan.”

<sup>29</sup> Ne migkahi si Hisus te, “Geina te iring ketà se lalag nu, ne ebpekeuli ke en su mid-awà en ke vusew ne midsuuk te anak nu!”

<sup>30</sup> Arà dà ne mid-uli en ke meritan, ne iyan din nekita ne ed-id-irehà ke anak din su mid-awà en iya ke vusew ne midsuuk kandin.

#### *Ruen Senge Etew ne Bengel wey Emew ne Neulian ni Hisus*

<sup>31</sup> Guna su mid-awà si Hisus kayi te inged ne Tiru ne riyà pà mibpevayà te inged ne Sidun, ne arà pà ne mibetikù kayi te ranew ne Gelliliya ne midlusud en te inged ne Dikapulis.

<sup>32</sup> Ne ruen menge etew ketà ne mibpeneheewit te etew ne bengel, ne timalù te egkeemew kayi te ki Hisus. Ne mibpemuyù dan ki Hisus te ibperampen kandin su apey meulii.

<sup>33</sup> Arà dà ne migkuwa en ni Hisus ini se etew ne impesivey rin en dut te merakel ne etew, ne intiuyuk en ni Hisus ke terù din dut te telinga te bengel. Ne an pà ne mid-ames din te ileb ke terù din ne impendaras din dut te rilà ketà te etew.

<sup>34</sup> Midlingakà si Hisus diyà te langit ne merahing se kinepeudsur din te hinawa rin se egkahi te, “Ipata!” ne iyan din meana se “Mepuwasi!”

<sup>35</sup> Arà dà iya ne nekerineg en ini se vengel, ne mepayag en ke kebpekelalag din su nekeulit en.

<sup>36</sup> Ketà ne imbandù ni Hisus dut te menge etew te kenà dan penudtula ini se nekita ran te misan entei en. Ugaid ne makin ne impemees ni Hisus ne lemban en be ne in-eneb-eneb dan ini se nekita ran.

<sup>37</sup> Ne langun ne nekerineg ketà ne negeyip nevenar su iyan dan nekahi se, “Meupiya nevenar ini se langun ne vaal din! Misana ke bengel ne ebpekerineg en, ne ke emew ne ebpekelalag en!”

## 8

#### *Pinekaan ni Hisus Ke Epat ne Ngivu ne Etew*

*(Mateo 15:32-39)*

<sup>1</sup> Senge hewii ketà ne nevrurun maa ke merakel ne menge etew. Guna su neeminan dan en te egkekaan, ne pineuvey ni Hisus ke menge edumdumaan din se egkahi te,

<sup>2</sup> “Igkeyruwi ku nevenar ini se menge etew,” ke si Hisus, “su nekedtetelu en ne hewii se kinepekiduma ran keytew ne warè en egkekaan dan.

<sup>3</sup> Embiya ebpeulien ku sikandan te kenà dan ebpekekaan, ne edlunusan dan diyà te ralan te kegkevital su ruen дума ne meriyù se ed-ulian din.”

<sup>4</sup> Migkahi ke menge edumdumaan ni Hisus te, “Endei ki mulà ebpekekuwa te egkekaan ne ebpekaan tew kayi te merakel ne menge etew se ini kiyu te inged ne warà bulug etew rin?”

<sup>5</sup> “Engkey ma taman ke kerakel te lutù tew?” ke si Hisus.

Ne migkahi ran te, “Pitu rè be ne timan ini se lutù tew ne pan.”

<sup>6</sup> Ne pinepinuu ni Hisus ke menge etew diyà te tanà. Ne migkuwa rin ke pitu ne timan ne pan ne impeselamat din en diyà te Eleteala. Arà dà ne mibpenevitevi din en ke pan, ne imbehey rin en dut te menge edumdumaan din su ibpetukid diyà te menge etew. Ne arè en iya rema ke mid-ulaula ran.

<sup>7</sup> Ne ruen dema ketà pira ne timan ne reisek ne serà. Ne migkuwa ini ni Hisus ne impeselamat din diyà te Eleteala, ne imbehey rin diyà te edumdumaan din su ibpemehey ran dema riyà te merakel ne etew.

<sup>8-9</sup> Langun dan ne migkaan ne nengevulung, ne ruen menge epat ne ngivu se menge etew ne nevrurun ketà ne migkaan. Guna su nekeipus dan se ebpegaan, ne mibpunpun dut te edumdumaan din ke nengesamà ne iyan din nepunpunan se pitu ne binevey. Ne pineuli ni Hisus ke menge etew,

<sup>10</sup> ne arà dà ne mid-untud en sikandin te avang wey ke minge edumdumaan din ne mid-avang-avang dan en se ebpendiyà te inged ne Delmanuta.

*Mibuyù ki Hisus ke Menge Peresiyu te Ed-inteng Dan te Ed-ul-ulaan Din ne Mekegeyip (Mateo 16:1-4)*

<sup>11</sup> Guna su nekerunggù dan, ne ruen en minge Peresiyu ne mibpengkayi te ki Hisus se ebpekidlewanà kandin su ebeelan dan te litag si Hisus. Ne mibuyuan dan sikandin te mebpékita te mekegeyip ne tuus te sikandin ke benar ne midsuhù te Eleteala.

<sup>12</sup> Ketà ne mibmerahing se kinepeudsur ni Hisus te hinawa rin se egkahi te, “Sikiyu ne minge etew te guntaani en, meambe ke ed-inteng kew pà te minge mekegeyip ne arà pà ne ebperetiyya kew? Ugaid ne igkahi ku keniyu ke benar te warà ibpekita ku keniyu ne mekegeyip ne tuus!”

<sup>13</sup> Arà dà ne mid-ewaan din en sikandan ne mid-erà te avang se ed-apat diyà te ranew.

*Ke Meraat ne Penurù Dut te Menge Peresiyu wey ni Hirudis ne Impeiring ni Hisus te Ibpelevag te Pan*

*(Mateo 16:5-12)*

<sup>14</sup> Ne nelipat ke edumdumaan ni Hisus te ed-ewit te lutù dan ne pan, ugaid ne senge timan dè be ne pan se kayi te avang dan.

<sup>15</sup> Ne midsempitá si Hisus kandan se egkahi te, “Andam kew,” ke sikandin, “ne ingati niyu te kenà kew egkepeneheewit te ibpelevag te pan dut te minge Peresiyu, abpeg ki Hirudis.”

<sup>16</sup> Ugaid ne geina te warà dan mesebuti ne mibpeglegelahey ran te, “Iyan din kinepekekahi kayi ne geina te warà kiyu mekeewit te lutù tew ne pan.”

<sup>17</sup> Ne netueanan ni Hisus ke engkey se ibpeglegelahey ran ne migkehiyan din en sikandan te, “Meambe ke iyan niyu egkepensasak se warà niyu kebpekeewit te pan? Maa, warà kew pè bes mekasabut? Maa mevavew pè be se itungan niyu?”

<sup>18</sup> Duen ded ura mata niyu, ne meambe ke kenà niyu egkekita? Ne duen ded ura telinga niyu, ne meambe ke kenà niyu egkerineg? Maa kenà niyu en egketenuran ke mid-ulaula ku?

<sup>19</sup> Ketà te kinepenevitevi ku rut te lelina ne timan ne pan ne impekaan ku rut te lelina ne ngivu ne minge etew, ne pira ne binevey se nepenù te nengesamà ne nepunpun?”

“Sepulù wey deruwa ne binevey,” ke sikandan.

<sup>20</sup> Ne migkahi pà maa si Hisus te, “Arà se kinepenevitevi ku rut te pitu ne timan ne pan ne impekaan ku rut te epat ne ngivu ne minge etew,” ke si Hisus, “ne pira ne binevey se nepenù te nengesamà?”

“Pitu ne binevey,” ke sikandan.

<sup>21</sup> “Maa warà kew pè be lavew mekasabut te ini se penurù ku ne kenà mekeatag te egkeenen tew?”

*Neulian ni Hisus ke senge etew ne Pisek Diyà te Inged ne Bitsaida*

<sup>22</sup> Nekerunggù dan kayi te inged ne Betsaida, ne ruen minge etew ne mibpeneheewit te pisek kayi te ki Hisus ne mibpemuyù dan te ibperampen kandin su apey meulii.

<sup>23</sup> Arà dà ne mibpikit en ni Hisus ke pisek ne midlihawang dan en dut te inged. Nekelihawang den dà ne mid-ilevan en ni Hisus ke mata ketà te pisek, ne midampen din se egkahi te, “Maa, ruen en egkekita nu?”

<sup>24</sup> Ne midlingakà ke pisek ne migkahi te, “Egkekita ku en ke minge etew, ugaid ne iring dan te minge kayu ne ebpengip-ipanew.”

<sup>25</sup> Ne midampen en maa ni Hisus ke mata rut te pisek ne ketà ne mibutatek din te edtengteng ke meama, ne nekeulit en ke kedtengteng din su mepayag en se kebpekekita rin.

<sup>26</sup> Ne pineulii ni Hisus sikandin se egkahi te, “Kenà ke en be awet kayi te inged ini.”

*Ke In-insà ni Hisus dut te Edumdumaan din ke Engkey Sikandin*

*(Mateo 16:13-20; Lucas 9:18-21)*

<sup>27</sup> Ketà ne mid-ipanew en si Hisus wey ke minge edumdumaan din te ebpendiyà te minge inged uvey te inged ne Sisariya Pilipus. Gewii ran te ed-ip-ipanew ne mid-insaan ni Hisus ke minge edumdumaan din te, “Engkey a kun ma riyà te pegitungan te minge etew?”

<sup>28</sup> “Ruen egkahi te sikuna si Juan ke Ebpemunyag,” ke sikandan. “Ne ruen duma ne egkahi te sikuna si Elias ke mibpelambas te Lalag te Eleteala rengan. Ne ruen pà ruma ne egkahi te sikuna ke seveka ne mibpelambas te Lalag te Eleteala rengan.”

<sup>29</sup> “Ne menu sikiyu,” ke si Hisus, “engkey a ma diyà te pegitungan niyu?”

Ne midtavak si Pedro te, "Sikuna si Kristu ke midtendù te Eleteala ne ebperetuen dut te menge etew."

<sup>30</sup> Ne mid-il-ilutan ni Hisus te egkahi kandan te kenà dan ibpenudtl ini te misan entei ne etew.

*Migkahi en ni Hisus ke Kebpatey Rin*  
(Mateo 16:21-28; Lucas 9:22-27)

<sup>31</sup> Ketà ne impesabut en ni Hisus dut te menge edumdumaan din te, "Iyan iya se edresayen nevenar ini se Impeanak te Menusiya su ebpeheweran diyà te menge egkeunutan te Hudiyane wey ke menge mepurù te terebpelengesa wey ke menge meyerù te penduan. Ed-imetayan, ugaid ne ketà te iketetelu ne hewii ne egkevanew red."

<sup>32</sup> Mibpeketuenan ni Hisus kandan ke langun ne ibped-ulaula kandin. Nerineg ni Pedro ne impekeriyù din si Hisus ne migkehiyan din te kenà en ebpeisehen te edlalag te iring ketà.

<sup>33</sup> Ugaid ne midlingi si Hisus se edtengteng diyà te menge edumdumaan din ne midawey rin si Pedro se egkahi te, "Awà ka su iring ka ki Setanas. Su ke itungan nu ne kenà diyà ebpuun te Eleteala, ugaid ne kayi rà ebpuun te itungan te menusiya!"

<sup>34</sup> Ne miburun en ni Hisus ke menge etew abpeg dut te menge edumdumaan din ne migkahi te, "Embiya ruen etew ne egkiyug ne eduma kediey ne iyan iya se pekelipati rin ke kandin ne kiyug, ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin pà se keduma rin kediey.

<sup>35</sup> Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey te kebpekesabut dut te Meupiya ne Tudtul ne ruen umur ne ibehey kandin ne warà edtemanan din.

<sup>36</sup> Menu, ke ruen etew ne ebpekeangkun te langun taman kayi te ampew te dunya, maa engkey se rantek din embiya egkerasey ke himukud din diyà te apuy ne rakà? Warà!

<sup>37</sup> Su warà misan engkey ne kearen ne igkevehey te etew apey rin meawi ke gimukud din.

<sup>38</sup> Embiya ruen etew ne igkeyeyai a rin wey ini se ibpenurù ku kayi te ini ne timpu ne merakel ne menge etew ne mekesesalà wey edsumpalit te Eleteala, ne ke Impeanak te Menusiya ne igkeyeyai rin dema sikandin ketà te kedlived din kayi te ampew te dunya. Su ketà ne hewii ne ruen raman din ne riyà ebpuun te Amey rin ne Eleteala, ne edumaan sikandin dema rut te menge berekat ne suluhuen diyà te langit."

## 9

<sup>1</sup> Ne migkahi pà maa si Hisus te, "Tentenuri niyu ini, ruen ruma tew kayi ne kenà pà ebpatey taman ketà te hewii ne egkekita ran ke kedetui te Eleteala te menge etew rut te gehem din."

*Medsalin Nevenar ni Hisus ke Paras Din*  
(Mateo 17:1-13; Lucas 9:28-36)

<sup>2</sup> Guna su neked-enem en ne hewii, ne miduma en ni Hisus ensi Pedro, si Santiago wey si Juan ne midtekereg dan en te mehantur ne buvungan te sikandan dà. Guna su ketà dan en ne midtengtengan dan si Hisus ne netekew nedsalin ke paras din.

<sup>3</sup> Ne mibpeneringsing ke velegkas din te keputi su warà misan engkey ne kayi te ampew te dunya ne ebpekemeputi iring kayi.

<sup>4</sup> Netekew ran en dema nekita se deruwa ne etew se ebpekidlalag ki Hisus, si Elias wey si Moises, ke menge mibpelambas te Lalag te Eleteala rengan.

<sup>5</sup> Ne migkahi en si Pedro ki Hisus te, "Meyerù, meupiya su kayi ki! Edsesabung key te tetelu, seveka keykew, seveka ki Moises, wey seveka rema ki Elias," ke sikandin.

<sup>6</sup> Ugaid ne matag be migkahi si Pedro te iring ketà ne warà din metueni ke engkey se egkehiyan din su neandek dan.

<sup>7</sup> Arà dà ne ruen sehulapun ne nekelikuvung kandan ne ruen suwara ne ketà ebpuun te sehulapun ne migkahi te, "Ini ke Anak ku ne egkelimù ku nevenar. Pemineha niyu ke edlelahen din!"

<sup>8</sup> Ne mibpenlangulangu ran ketà, ugaid ne warà en etew ne nekita ran liyu rà ki Hisus ke ruma ran.

<sup>9</sup> Gewii ran te edtupang ne mibenduan dan en ni Hisus te, "Kenà niyu ve imbe ibpenudtl te misan entei en ini se nekita niyu taman te egkevanew en ke Impeanak te Menusiya."

<sup>10</sup> Ne midtuman dan ini se ingkahi ni Hisus, ugaid ne mibpein-inseey ran te, “Engkey se meana rin ini se ebenawen?”

<sup>11</sup> Ne mid-insaan dan si Hisus te, “Meambe ke egkehiyen te minge meyerù te penduan te iyan ed-una ebpengkayi ne si Elias ke etew ne mibpelambas te Lalag te Eleteala rangen, ne arà pà ke midtendù te Eleteala ne edatù?”

<sup>12</sup> Ne midtavak si Hisus te, “Benar ne ed-una ebpengkayi si Elias su ed-endamen din ke langun te kebpekeuma dut te midtendù te Eleteala ne edatù. Ugaid ne maa,” ke sikandin, “ke ruen dema impesurat ne Lalag te Eleteala rangen te merakel se kemeresayan dut te Impeanak te Menusiyà ne idumili dan sikandin?”

<sup>13</sup> Ugaid ne igkahi ku keniyu te nekeuma en si Elias. Nasi dan midrasey sikandin te endei se kiyug dan iring dut te impesurat dengan ne Lalag te Eleteala mekeatag kandin.”

*Neulian ni Hisus ke Vatà ne Midsuukan te Busew*

*(Mateo 17:14-21; Lucas 9:37-43a)*

<sup>14</sup> Guna su nekeuma en ensi Hisus kayi te ruma ne edumdumaan din, ne nekita ran te midlingutan dan te merakel ne minge etew. Ruen kayi minge meyerù te penduan ne ebpekidlewanà kandan.

<sup>15</sup> Guna su nekita rut te minge etew se ebpeelinguma en si Hisus ne nengeinuinu ran nevenar su warà kebpenareng dan kandin, ne mibpemelelahuy ran en su midsinuhung dan en sikandin.

<sup>16</sup> Ne mid-insaan ni Hisus ke minge edumdumaan din te, “Engkey se ibpelewaney niyu?”

<sup>17</sup> Ne ruen ketà te nevurun senge etew ne meama ne midselet se egkahi te, “Meyerù, ruen ini se anak ku ne mibpeneheewit ku kayi te keykew su midsuukan te vusew ne kenè en ebpekelalag.

<sup>18</sup> Embiya edsuukan sikandin te vusew ne ebpekebadas sikandin diyà te tanà, eburvuraan ke bèbà din, edyengketen ke ngipen din, ne egkereg ke lawa rin. Ne mibpemuyù ku rut te edumdumaan nu te ibpesegseg ini se vusew ne midsuuk kayi te anak ku, ugaid ne warà dan ma megaga.”

<sup>19</sup> Migkahi si Hisus te, “Sikiyu ne minge etew guntaan, warà kebperetiyya niyu te Eleteala! Neuhet en se kebpekiduma ku keniyu, ne engkey pà taman te kebperetiyya niyu? Engkey pà taman se keuhet din se kedtigkeri ku keniyu? Ipengkayi niyu ayan se vatà!” ke si Hisus.

<sup>20</sup> Ne mid-ewit dan en ke vatà riyà te ki Hisus. Guna su nekita rut te vusew si Hisus ne midsuukan din en ke vatà te nehurivid, ne nekebadas en diyà te tanà, ne midteltelilid en, ne miburàburà ke bèbà din.

<sup>21</sup> Mid-insaan ni Hisus ke amey rut te vatà te, “Keenu rudsui sikandin kayi te egeraman din ini?”

Midtavak ke amey rin te, “Inggenat dà te vatà pà sikandin.

<sup>22</sup> Su kenà kepipira rà ed-imetayi perem kayi te vusew su ruen ke riyà ebpeketimbag sikandin te apuy wey ruen ke riyà te wayig. Keyruwi key nikuna ne tevangi key embiya egkegaga nu.”

<sup>23</sup> “Ne meambe ke id-insà nu pà embiya egkegaga ku?” ke si Hisus. “Su langun ne egkegaga te etew embiya ruen peretiyya rin te Eleteala.”

<sup>24</sup> Arà dà ne nekekahi ke amey rut te vatà te, “Duen peretiyya ku, ugaid ne kurang pà. Ebuyuen ku ne umani nu pà!”

<sup>25</sup> Nekita ni Hisus te edadseg en kandan ke merakel ne minge etew ne migkehiyan din en ke vusew ne midsuuk dut te vatà te, “Sikew ne vusew ne igkeemew wey igkevengal te minge etew,” ke sikandin, “ewai nu ayan se vatà ne kenà ke en be imbe edlived!”

<sup>26</sup> Arà dà ne migkulayi en ke vusew ne mibidbid din en ke vatà, ne mid-awà en diyà te kandin. Ne iring en te minatey ini se vatà su warà en mekewaleng, ne migkahi en ke minge etew ketà te, “Minatey en!”

<sup>27</sup> Ugaid ne migewaran ni Hisus ke velad dut te vatà ne pineenew rin, ne mid-itindeg en ke vatà.

<sup>28</sup> Guna su riyà en ensi Hisus te lusud te valey ne mid-insaan en dut te edumdumaan din te, “Meambe ke warà dey megaga te edsegseg ke vusew ne midsuuk ketà te vatà?”

<sup>29</sup> Ne migkahi si Hisus kandan te, “Warà duma ne ebpekegaga te kedsegseg te iring kenian ne vusew embiya kenà kayi rà te kebpenengeni.”

*Migkahi pà maa ni Hisus Ke Kebpatey Rin*

*(Mateo 17:22-23; Lucas 9:43-45)*

<sup>30</sup> Ne mid-awà dan ketà ne midlaus dan en se ed-ipanew diyà te lusud te Geliliya. Ne kenà egkiyug si Hisus ne egketuenan te minge etew ke endei sikandin egketahù,

<sup>31</sup> su apéy warà ebpekesambar te kebbenurù din dut te minge edumdumaan din. Migkahi sikandin diyà te kandan te, “Inì se Impeanek te Menusiya ne ed-uluhen dut te minge egkunterà kandin ne ebpeimetayan dan, ugaid ne ketà ne iketelu ne hewii ne egkevanew red.”

<sup>32</sup> Ne warà dan mesebuti ke meana rut te migkahi ni Hisus kandan, ugaid ne neandek dan te ed-insà kandin.

*Mibpein-inseeý Ke Menge Edumdumaan ni Hisus Ke Engkey Kandan se Mepurù*  
(Mateo 18:1-5; Lucas 9:46-48)

<sup>33</sup> Nekeuma ran diyà te inged ne Kapirnewum ne guna su diyán dan en te lusud te valey ne mid-insaan en ni Hisus ke minge edumdumaan din te, “Engkey ma se ibpelewlewaney niyu riyà te ralan?”

<sup>34</sup> Ugaid ne warà senge etew kandan ne neketekab su iyan dan ibpelewlewaney ke engkey kandan se mepurù.

<sup>35</sup> Ne mibpinuu si Hisus, ne miburun din en ke sepulù wey deruwa ne edumdumaan din ne midlalag en kandan se egkahi te, “Misan engkey ne etew ne egkiyug ne ebmepurù, ne iyan iya se mebbeembavà te hinawa rin wey ebpevayabayà sikandin dut te langun ne minge ruma rin.”

<sup>36</sup> Ketà be ne migkuwa si Hisus te senge etew ne vatà ne midsepipi rin ne impeitindeg din diyà te etuvangan dan se egkahi te,

<sup>37</sup> “Misan engkey ne etew se edtelimà te vatà iring kayi su atag te keduma rin kediey, ne midtelimà dema sikandin kediey. Ne misan engkey ne etew ne edtelimà kediey, ne kenà siak dà se midtelimà din su ke Amey ku rema ne Eleteala ne midsuhù kediey ne midtelimà din ded.”

*Ke Etew Ne Kenà Egkunterà Kenitew ne Ruma Tew*  
(Lucas 9:49-50)

<sup>38</sup> Ne migkahi en si Juan diyà te ki Hisus te, “Meyterù, duen neuma rey ne etew ne ebpenegseg te minge vusew te ibpepevayà dut te gehem te ngaran nu. Ne midawey rey sikandin su kenà tew ma ruma.”

<sup>39</sup> Ne migkahi si Hisus te, “Kenà niyu sikandin edewaya su warà etew ne ebpekevaal te mekegeyip te ibpepevayà te ngaran ku ne melemu ne edlalag te mereatey mekeatag kediey.

<sup>40</sup> Su ke etew ne kenà tew kunterà ne ruma tew.

<sup>41</sup> Benar ini se egkehiyen ku, piya engkey ne etew ne ebpeinum keniyu te wayig su sabap te kineruma niyu kediey, ne ebpeketelimà en iya sikandin te idlalew te Eleteala.”

*Ke Ebpeheewit Keytew te Ebaal te Meraat*  
(Mateo 18:6-9; Lucas 17:1-2)

<sup>42</sup> “Ne mekeatag be te ini se minge vatà ne mibperetiyaya kediey, embiya ruen etew ne ebpekepeengked te sarig dan kediey, ne iyan pà meupiya,” ke si Hisus, “ne ebperiwetuhan ke lieg din te mevehat ne watu ne id-antug diyà te rahat tumin dè be ke ebpekepeengked ke sarig te vatà.

<sup>43</sup> Embiya iyan ebpekepeneheewit keykew te kebpekedsalà nu ke belad nu, ne tempera nu! Su iyan pà tumù ne egkesarir ka ne ebpekeangkun ka te umur ne kenà edtaman tumin dè be ke deruwa red ke velad nu ugaid ne riyà ka ma ebpesinaru te apuy nerakà ne warà igkeevuki rin. [

<sup>44</sup> Su ketà ne ruen minge tagkey rin ne kenà ebpatéy, ne ke apuy ne kenà egkeevukan.]

<sup>45</sup> Ne embiya iyan ebpekepeneheewit keykew te kebpekedsalà nu ke paa nu, ne tempera nu! Su iyan pà tumù ne egkesarir ka ne ebpekeangkun ka te umur ne kenà edtaman, tumin dè be ke deruwa red ke paa nu ugaid ne igkeantug ka diyà te apuy nerakà. [

<sup>46</sup> Su ketà ne ruen minge tagkey rin ne kenà ebpatéy, ne ke apuy ne kenà egkeevukan.]

<sup>47</sup> Ne embiya iyan ebpekepeneheewit keykew te kebpekedsalà nu ke mata nu, ne lesika nu! Su iyan pà tumù ne kebpekelusud nu rut te eduetan te Eleteala ne dibdivaluy rà ke mata nu, tumin dè be ke deruwa red ke mata nu ugaid ne igkeantug ka riyà te apuy nerakà. [

<sup>48</sup> Su ketà ne ruen minge tagkey rin, ne kenà ebpatéy, ne ke apuy ne kenà egkeevukan.]

<sup>49</sup> “Su uman senge etew ne eduma kediey ne egkepenedsal pà te apuy wey timus ne iyan din meana ne ebpekeheram pà te kemeresayan su apéy mebbevæg-et ke kedsarig din kediey.

<sup>50</sup> “Ne meupiya ini se timus su ibmeupiya te nanam dut te egkeenen tew, ugaid ne embiya egkeawà en ke nanam kayi te timus ne warà en dalan te kebmetimus din pà

maa. Ne iring te timus ini se ed-ul-ulaan te menge etew ne mibperetiyaya kediey," ke si Hisus, "tembù be iyan iya se pelimlimuey kew ne peup-upianey kew."

## 10

*Ke Kebpenurù ni Hisus Mekeatag Te Ebpekid-engked te Esawa*  
(Mateo 19:1-12; Lucas 16:18)

<sup>1</sup> Mid-awà si Hisus ketà te inged ne Kapirnewum ne mibpendiyan te lusud te inged ne Hudiya ne mid-apet diyà te wayig ne Hurdan. Ketà ne ruen en maa merakel ne menge etew ne nevrurun diyà te kandin ne mibpenurù din en maa sikandan su arà ke tatap ne ed-ul-ulaan din.

<sup>2</sup> Ne ruen menge Peresiya ne mibpengkayi te ki Hisus su ebaal dan te idseligkat kandin. "Menu, idluhut be te penduan tew," ke sikandan, "se ebpekid-engked ke meama te esawa rin?"

<sup>3</sup> Ugaid ne in-insà ni Hisus kandan te, "Engkey ma se nekahi rut te impesurat ni Moises ne penduan tew mekeatag te kebpeked-engked te esawa?"

<sup>4</sup> Ke sikandan te, "Inluhut ni Moises ini, ugaid ne ed-una edsurat te kesebenaran te ebpekid-engked en sikandin ne an pà ne egkeengkeran din ke esawa rin."

<sup>5</sup> Ne migkahi si Hisus kandan te, "Inluhut ini ni Moises se kebpekid-engked niyu geina te meresen ke ulu niyu te kebpeking niyu te kebpenurù din.

<sup>6</sup> Ugaid ne rut te kinelimbaha kayi te dunya, 'Ne midlimbag te Eleteala ke meama wey meritan.

<sup>7</sup> Tembù be ed-ewaan dut te meama ke amey rin wey iney rin su riyà ebpekidseveka sikandin te esawa rin,

<sup>8</sup> ne ini se teled-esawa ne nevaluy ne seveka.' Ketà ne kenà dan en deruwa ne etew su neseveka rà.

<sup>9</sup> Tembù be ini se deruwa ne etew ne midseveka te Eleteala, ne kenà egkepebelag dut te etew," ke si Hisus.

<sup>10</sup> Guna su riyand an te valey ne mid-insà maa ki Hisus ke menge edumdumaan din mekeatag te ked-engked te esawa.

<sup>11</sup> Ne migkahi en si Hisus kandan te, "Embiya ruen meama ne ebpekid-engked te esawa rin ne edsaup ded maa ed-esawa, ne nekelangkad te esawa rin.

<sup>12</sup> Engketà ded dema ke meritan, embiyan ruen ebpekid-engked te esawa rin ne edsaup ded maa ed-esawa, ne nekelangkad ded dema te esawa rin."

*Mibpenubtuvaran ni Hisus ke Menge Vatà*  
(Mateo 19:13-15; Lucas 18:15-17)

<sup>13</sup> Ne ruen menge etew ketà ne mibpemava te menge anak dan diyà te ki Hisus su ibperampen dan kandin su ebpepenubtuvaran, ugaid ne midawey ran dut te menge edumdumaan din.

<sup>14</sup> Guna su nekita ini ni Hisus ne ingkeepesi rin ne ke sikandin te, "Kenà niyu dewaya sikandin! Ugaid ne ipepengkayi niyu te kediey ke menge vatà, su ke menge etew ne iring te menge vatà se kedsarig dan kediey ne sikandin ke ebpekeamung te Edetuan te Eleteala.

<sup>15</sup> Sebenarvenar ini se egkehiyan ku, ke etew ne kenà edtelimà te Kedetui kandin te Eleteala iring te kedtelimà kayi te reisek ne vatà, ne kenà sikandin ebpekelusud dut te menge etew ne Edetuan te Eleteala," ke si Hisus.

<sup>16</sup> Arà dà ne mibpenikupu rin ke menge vatà ne midampen din sikandin su ebpepenubtuvaran.

*Ke Kewasa ne Meama ne Migkiyug ne Ebpekeangkun te Umur ne Warà Edtemanan Din*

(Mateo 19:16-30; Lucas 18:18-30)

<sup>17</sup> Guna su ed-ipanew en maa ensi Hisus ne ruen meama ne mibpelelahuy se ebpendiyà te kandin. Ne midlumpeng en diyà te sineruwan ni Hisus se egkahi te, "Meyterù, langun ne ed-ul-ulaan nu ne meupiya! Engkey iyan se ed-ul-ulaan ku apey a mekekuwa te umur ne warà edtemanan din?"

<sup>18</sup> Ne midtavak si Hisus te, "Meambe ke nekahi nu te meupiya ke langun ne ed-ul-ulaan ku? Su seveka rà se meupiya se ed-ul-ulaan din ne Eleteala rà.

<sup>19</sup> Ugaid ne embiyà arà se id-insà nu mekeatag te umur ne kenà edtaman, ne netuenan nu en ke penduan ne egkahi te: 'Kenà ka ed-imatey, kenà ka edlangkadlangkad te esawa nu, kenà ka ebpenakew, kenà ka edtarutarù, kenà ka edlimbung, ne edati nu ke amey nu wey ke iney nu.' "



<sup>20</sup> Ne midtavak ke meama ki Hisus te, “Meyterù, igenat te vatà e pà ne langun keninyan ne midumaan ku.”

<sup>21</sup> Nerineg dà ni Hisus ne midtengtangan din ke meama su neyruwan din se egkahi te, “Duen pà lavew kurang nu. Iyan be se uli ka ne pesaa nu ke langun ne kearen nu ne ipemehey nu ve ke elehà din diyà te minge ayuayu su apey ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedì,” ke si Hisus.

<sup>22</sup> Nerineg din dà ke lalag ni Hisus ne mibmerumbahat ke buvuked din ne mid-ipanew en se merungkug su kewasa nevenar.

<sup>23</sup> Ne mibpenlangulangu si Hisus diyà te minge edumdumaan din se egkahi te, “Merehen nevenar te kewasa ne etew se kebpesakup din dut te Edetuan te Eleteala!”

<sup>24</sup> Ne nengegeyip ke minge edumdumaan ni Hisus ketà te lalag din. Ugaid ne migkahi en maa si Hisus kandan te, “Menge anak, merehen nevenar te etew se kebpesakup din dut te Edetuan te Eleteala.

<sup>25</sup> Iyan pà melemu ne ebpevyà diyà te vudsi te rahum ini se binatang ne kemilu tumin dè be ke kebpesakup te etew ne kewasa dut te Edetuan te Eleteala.”

<sup>26</sup> Nerineg dà dut te minge edumdumaan din ne ingkegeyip dan nevenar ne mibpein-inseey ran te, “Embiya iring ketà se kerehen din te etew ne kewasa pà dut te Edetuan te Eleteala, ne engkey rè be buwa se ebpekekuwa te umur ne warà edtemanan din?”

<sup>27</sup> Ne midtengteng si Hisus kandan ne migkahi en te, “Embiya etew rà ne kenà dan ebpekegaga te eboejeywa te umur ne warà edtemanan din, ugaid ne Eleteala se ebpekegaga ne ebehey kandan su egkegaga te Eleteala ke langun.”

<sup>28</sup> Ne midlalag en si Pedro te, “Netuenan nu te mid-ewaan dey ke langun taman dey su miduma key keykew.”

<sup>29</sup> Ne migkahi si Hisus kandan te, “Benar ayan, ugaid ne sebenarvenar ini se egkehinyan ku keniyu te misan engkey ne etew se neewaan din ke ubpaan din, minge suled din, minge etevey rin, ke iney rin wey amey rin, minge anak din, wey ke tanà din su atag dut te keduma rin kediey wey ke kebpesabut din dut te Meupiya ne Tudtul,

<sup>30</sup> ne ebpeketelimà sikandin te kemehatus egketakep se neewaan din ne ubpaan din, minge suled din, minge etevey rin, ke iney rin wey amey rin, minge anak din, wey ke tanà din te biviyag pà sikandin kayi te ampew te dunya, ne ebpekepevyà pà rema te kemeresayan. Ne ketà te akir din ne hewii ne egketelimà din ke umur ne kenà edtaman.

<sup>31</sup> Ugaid ne merakel ne minge etew guntaan,” ke si Hisus, “ne mepurù se ketengندان din, ugaid ne riyà te akir din ne hewii ne sikandan ke pinekemevavà. Ne ruen minge etew guntaani ne mevavà dan nevenar, ugaid ne ketà te akir din ne hewii ne sikandan se pinekemepurù se ketengندان din.”

*Impesabut ni Hisus te Iketelu en Ke Kebpatey Rin*

*(Mateo 20:17-19; Lucas 18:31-34)*

<sup>32</sup> Gewii te ed-ip-ipanew ensi Hisus wey ke minge edumdumaan din te ebpependiyà te Hirusalim ne mid-unauna si Hisus, ne neipeng dan nevenar su ebpependiyà sikandin te Hirusalim. Ne ke minge etew ne midtinundug kandan ne nengeandek dan. Ne impesivey en ni Hisus ke minge edumdumaan din ne impesabut din en maa kandan ke ibped-ulaula kandin.

<sup>33</sup> Ke sikandin te, “Netuenan niyu en ne ebpependiyà kiyu te Hirusalim ne riyà ne sikandin ke Impeanak te Menusiyà ne ibpalad en diyà te minge mepurù te terebpepengesa wey ke minge meyerù te penduan. Ne ebpegumpung dan en te kukuman dan te ed-imetayan sikandin ne ibpalad sikandin diyà te minge etew ne kenà Hudiyanan.

<sup>34</sup> Ne ed-unda-unda ran kandin, ne ebpengileb, ebpenlambit, wey ed-imatey ran kandin, ugaid ne ketà te iketelu ne hewii ne egkevanew sikandin.”

*Ke Mibuyù ni Santiago wey Si Juan ki Hisus*

*(Mateo 20:20-28)*

<sup>35</sup> Ne ketà ne mid-uvey en ki Hisus ke minge anak ni Sibidiyu, si Santiago wey si Juan, se egkahi te, “Meyterù, ruen ebuyuen dey keykew.”

<sup>36</sup> “Engkey ma se ebuyuen niyu?” ke si Hisus.

<sup>37</sup> Ke sikandan te, “Ketà te akir din ne hewii te kedatù nu en, ne ebuyuen dey keykew te pepinuuwa key ne ruma nu, seveka se riyà te egkekewanan nu, ne seveka ne riyà te egkehivang nu.”

<sup>38</sup> Ne migkahi ni Hisus kandan te, “Matag niyu en ini ebuyua ne warà niyu mesebuti an se ebuyuen niyu. Maa, ebpeketigker kew ve dut te kemeresayan ne mehaan ku en

ibpevayà? Ne maa, ebpeketikà kew ve ne ebpevayà te kemetayen iring te ibpekepevayà ku?"

<sup>39</sup> "Uya," ke sikandan, "egketigkeran dey."

Ne migkahi si Hisus kandan te, "Benar iya ne edresayen kew iring te kemeresayan ku. Ne iring ded dut te ked-imetayi kediey se kedresaya rema keniyu.

<sup>40</sup> Ugaid ne mekeatag te ayan se ebuyuen niyu, ne warà ketengdanan ku te ebpemili te engkey se ebpepinuuwen kayi te egkekewanan ku wey kayi te egkehivang ku. Su ini ne intail dut te Amey ku ne Eleteala dut te mibpemili din."

<sup>41</sup> Guna su nerineg kayi te sepulù ne edumdumaan ni Hisus arà se ebuyuen enni Santiago ki Juan, ne nengeepes dan.

<sup>42</sup> Tembù be impeuvey ran langun ni Hisus se egkahi te, "Netuenan tew ne ini se menge pengulu te inged kayi te ampew te dunya ne metehel ne edsuhù te langun ne menge etew, ne ini se menge unuten dan ne kandan dà ne kiyug se edumaan.

<sup>43</sup> Ugaid ne kenà kew ed-iring ketà, su embiya ruen seveka keniyu ne egkiyug ne ebmepurù, ne iyan iya se mebpeembavà te hinawa rin wey ebpevayàbayà dut te langun.

<sup>44</sup> Ne embiya ruen seveka keniyu ne egkiyug te sikandin se ebpekeuna te langun niyu, ne iyan iya se mebpeembavà te hinawa rin wey ebpevayàbayà dut te langun.

<sup>45</sup> Su misan ke Impeanak te Menusiyà ne kenà iyan din kinepepengkayi te ampew te dunya ne apey sikandin metevangi te menge etew. Ugaid ne iyan din kinepepengkayi ne apey rin metevangi ke langun ne menge etew, ne egkeimetayan sikandin su apey egkevelukasi ke langun ne menge etew."

*Neulian ni Hisus si Bartimeo ne Pisek  
(Mateo 20:29-34; Lucas 18:35-43)*

<sup>46</sup> Nekeuma en si Hisus wey ke menge edumdumaan din diyà te Hiriku. Ne guna su ed-awà dan en ne merakel ne menge etew se mibpenduma kandan, ne kayi te kelid te ebpevayaan dan ne ruen meama ne pisek ne ebpinpinuu su ebpemuyù ne ed-ingaranan ki Bertimeo, anak ni Timiyu.

<sup>47</sup> Guna su nerineg din te edasahad en si Hisus ne riyà ebpuun te Naserit ne mibensag en te, "Hisus, ke inenakan ni David rengan, igkeyru a nu nevenar!"

<sup>48</sup> Ne merakel ne menge etew ketà se midawey kandin te ebpeen-enengen ugaid ne lemban en ne egkeilut se ebpemensag te, "Sikuna ne inenakan ni David rengan, igkeyru a nu nevenar!"

<sup>49</sup> Guna su nerineg ni Hisus ne mid-itindeg pà sikandin se egkahi te, "Pikita niyu ayan kayi!"

Arà dà ne mid-umew ran en ke pisek se egkahi te, "Kehalew ka en, ne itindeg ka, su ed-umawen ke en nikandin."

<sup>50</sup> Arà dà ne mibpelis din ke kumbalà din, ne mid-itindeg en, ne mid-uey en ki Hisus.

<sup>51</sup> "Engkey ma se ebpetevangan nu kediey?" ke si Hisus.

Ne migkahi ke pisek te, "Meyterù, kiyug ku ne mekekita a red perem!"

<sup>52</sup> "Su kenà duwaruwa se kedsarig nu kediey," ke si Hisus, "ne ebpekeulit en ke kebpekekita nu. Ipanew ke en." Arà dà iya ne nekekita en ini se meama, ne miduma en ki Hisus te ked-ip-panew ran.

## 11

*Ke Kinelusud ni Hisus Diyà te Hirusalim ne Mid-untud te Nati te Kudà su Tuus Ini te Datù Sikandin dut te menge Hudiyenen*

*(Mateo 21:1-11; Lucas 19:28-40; Juan 12:12-19)*

<sup>1</sup> Guna su ebpelundani ran en te Hirusalim ne neuma ran en ke buvungan ne ed-ingaranan te Uliuwun, elet te inged ne Bitpahi wey inged ne Bitaniya. Midsuhù en ni Hisus ke deruwa ne edumdumaan din te ebpeunaan dan,

<sup>2</sup> ke sikandin te, "Una kew en be ketà te inged ne an te unaan ta, ne ketà te ebpekeuma kew ne egkekita niyu ke nati ne kudà ne in-iket ketà ne warà pà bulug meunturi. Ekari niyu be ne ewita niyu en kayi.

<sup>3</sup> Ne embiya ruen ed-insà keniyu te, 'Meambe ke ed-ekaran niyu ke nati ne kudà?' ne iyan niyu kehiya te, 'Ke Kerenan dey se ebpegin-awà kayi te egkeunturan din ne mehaan dà id-uli.'"

<sup>4</sup> Arà dà ne mid-ipanew en ke deruwa ne etew. Guna su nekeuma ran ne nekita ran en ke nati ne kudà diyà te uey te ralan ne in-iket diyà te bengawan te valey.

<sup>5</sup> Ne gewii te ed-ekaran dan en ne ruen menge etew ketà ne mid-insà kandan te, "Ebmenuwen niyu ve ayan se nati ne kudà?"

<sup>6</sup> Ne midtavak dan dut te ingkahi ni Hisus kandan, ne ketà ne pineipanew ran en.

<sup>7</sup> Ne mid-ewit dan en ini se nati ne kudà kayi te ki Hisus, ne midebpasan dan en te kumbalà dan ke nati ne kudà, ne mid-untud en si Hisus.

<sup>8</sup> Merakel ne menge etew ketà se midtulid te menge kumbalà dan te ebpepeveyaan ki Hisus, ne ruma pà ne mibpenguwa te menge rasang ne rawunen su intulid dan su ini ke tuus te adat te menge Hudiyanen dut te menge mepurù dan.

<sup>9</sup> Ke menge etew ne mid-una ki Hisus wey engketà ded dema ke midtundug kandin ne migkerag te,

“Edeyuen tew ke Eleteala!

Menu ma ke ebpeneuven te Eleteala

ini se midtendù din ne edatù te langun!

<sup>10</sup> Menu ma ke ebpeneuven te Eleteala

ini se nekeuma ne edatù keykew

su sikandin ke insambi

dut te ratù tew si David,

ke keep-epuan tew rengan!

Edeyuen tew te Eleteala!”

<sup>11</sup> Guna su nekeuma en si Hisus kayi te Hirusalim ne mibpendiyan en sikandin te Nekebpuru ne Valey te Eleteala ne mid-usug-usug din ke langun ne diyà te lusud, ne midlihawang en. Ne geina te meapun en ne mibpendiyà sikandin te inged ne Bitaniya se midummaan dut te edumdummaan din.

*Ke Kayu ne Ed-ingaranan te Igira ne Mibpenrewakan ni Hisus*

*(Mateo 21:18-19)*

<sup>12</sup> Nepawà ketà ne mid-awà dan en te inged ne Bitanya su edlived dan maa kayi te Hirusalim, ne gewii te ini ran pà te ralan ne nevitil si Hisus.

<sup>13</sup> Ne ruen en nesandeng din ne merapung ne kayu ne ed-ingaranan te igira, ne mid-uvay rin su ed-intengan din ke ruen bahas din. Guna su nekeuma sikandin diyà te levut ne warà nekita rin ne bahas su tibal rawun su kenà ma ini ke gewii te kebpemehas din.

<sup>14</sup> Ne migkahi en si Hisus ketà te kayu te, “Igenat guntaani ne kenà ke en imbe egkekeenan te bahas nu!” Ini se lalag ni Hisus ne nerineg dut te menge edumdummaan din.

*Mibpenegseg ni Hisus ke menge Ebpemendahang Diyà te Nekebpuru ne Valey te Eleteala*

*(Mateo 21:12-17; Lucas 19:45-48; Juan 2:13-22)*

<sup>15</sup> Guna su nekeuma ran en diyà te Hirusalim ne midlusud en si Hisus ketà te Nekebpuru ne Valey te Eleteala ne mibpemenegeg din en ke menge etew ne ebpememasa wey ke menge ebpemendehang ketà. Ne mibpemelintuad din ke menge lemisaan dut te menge etew ne ebpenambi te kureta wey ke menge ebpeminuwan dut te menge etew ne ebpemendahang te menge melepati ne ibpemelengesa rut te menge Hudiyanen diyà te Eleteala.

<sup>16</sup> Ne kenà din idluhut ne ruen ed-ewit te rehangan dan ne kayi ebpevayà te lamalama te Nekebpuru ne Valey te Eleteala.

<sup>17</sup> Ne mibpenurù din ke menge etew ketà se egkahi te, “Duen en ura impesurat ne Lalag te Eleteala ne egkahi te, ‘Ini se balek ku ne ed-ingaranan te valey ne ebpengeningeniyen dut te langun ne menge etew te misan endei en.’ Ugaid ne sikiyu,” ke si Hisus, “ne mibaluy niyu en ini se balek ne ubpaan te menge tenlimbungen!”

<sup>18</sup> Guna su nerineg dut te menge mepurù te terebpelelengesa wey ke menge meyerù te penduan ini se mid-ulaula ni Hisus ne mibpemengà dan te ralan te kegkeimetayi ran ki Hisus su neandek dan kandin geina te merakel ne menge etew ne negeyip rut te penurù din.

<sup>19</sup> Guna su midsanlep en ke andew ne mid-awà en si Hisus wey ke menge edumdummaan din kayi te inged ne Hirusalim.

*Nehangu Ke Kayu ne Igira*

*(Mateo 21:20-22)*

<sup>20</sup> Guna su nepawà en ne edlived dan en maa riyà te Hirusalim, ne kayi te ibayà dan ne nekita ran en ke kayu ne igira ne nehangu en taman te ralid din.

<sup>21</sup> Ne netenuran ni Pedro ke midlalag ni Hisus ketà te kayu ne migkehiyan din si Hisus te, “Meyerù, tengtengi nu ma arà se kayu ne mibpendrawakan nu gevii ne nehangu en.”

<sup>22</sup> Ne migkahi si Hisus te, “Tentenuri niyu ini ne sarig kew te Eleteala.

<sup>23</sup> Su sevenarbenar ini se egkehiyen ku keniyu ne embiya meilit se kedsarig niyu te Eleteala te warà keduwaruwa rin, ne misan ke kenà egkegaga te menusiya ne egkegaga niyu iring te ne misan egkehiyen niyu ini se buvungan te, 'Awà ka kayi ne riyen ka te rahat,' ne egketuman ini se egkehiyen niyu.

<sup>24</sup> Tembù be idtarem ku keniyu te embiya ruen ebpemuyuen niyu te Eleteala, ne eheta niyu ke hinawa niyu te warà keduwaruwa rin ne egketelimà niyu ini.

<sup>25</sup> Ne embiya ebpengeningeni kew riyà te Eleteala ugaid ne ruen meraat ne neketahù te hinawa niyu mekeatag te ruma niyu, ne pesehara niyu sikandin su apey egkepesehad kew rema te Eleteala ke Amey niyu riyà te langit. [

<sup>26</sup> Su embiya kenà niyu egkepesehad ke ruma niyu, ne kenà kew rema egkepesehad dut te Amey niyu ne Eleteala riyà te langit.]”

*Mid-insaan si Hisus Mekeatag te Kewagib Din Dut te Mibpenegseg din ke menge Ebpemendahang Diyà te Nekebpuru ne Baley te Eleteala*

(Mateo 21:23-27; Lucas 20:1-8)

<sup>27</sup> Guna su nekeuma ran en maa diyà te Hirusalim, ne midlived en maa si Hisus ketà te Nekebpuru ne Valey te Eleteala. Gewii rin te ed-ip-ipanew kayi te lusud ne ruen menge mepurù te terebpelengesa, menge meyerù te penduan, wey menge egkeunutan te Hudiyenen ne mid-uey kandin.

<sup>28</sup> Ne mid-insaan dan si Hisus te, “Ini se mid-ulaula nu kayi te nekebpuru ne valey te Eleteala, ne engkey se kewagib nu te ed-ulaula te iring kayi? Ne engkey se mibehey keykew te kewagib?”

<sup>29</sup> Midtavak si Hisus te, “Ruen dema id-insà ku keniyu ne embiya egketavak niyu ne idtarem ku keniyu ke engkey se mibehey kedì te kewagib kayi te mid-ulaula ku.

<sup>30</sup> Engkey ke mibehey ki Juan ke Ebpembunyah te kewagib te ebunyah, diyà be te Eleteala etawa kayi rà de duen te menusiya? Kehiya niyu kediey.”

<sup>31</sup> Ne mibpein-inseey ran en te, “Engkey se idtavak tew? Su egkehiyen embiya iyan tew se, ‘Riyà ebpuun te Eleteala,’ ne ed-insà maa sikandin te, ‘Meambe ke warà kew mebperetiyaya ki Juan?’

<sup>32</sup> Ugaid ne embiya egkahi ki te, ‘Kayi red ebpuun te menusiya,’ ne egkeepesan kiyu te menge etew.” (Ini se impein-inseey ran su nengeandek dan dut te menge etew su langun ne mibperetiyaya te si Juan ne mibpelambas te Lalag te Eleteala.)

<sup>33</sup> Ketà be ne midtavak dan ki Hisus te, “Kenà dey egketuanan.”

Ne migkahi si Hisus kandan te, “Embiya iring ketà, na kenà ku rema egkehiyen ke engkey se mibehey kedì te kewagib ku te ed-ulaula kayi.”

## 12

*Ke Sempità ni Hisus Mekeatag te Etew ne Pinekamal te Pemulaan*

(Mateo 21:33-46; Lucas 20:9-19)

<sup>1</sup> Ne mibpenurù din en sikandan te impepevayà te sempità, ke sikandin te, “Ruen senge etew ne ruen tanà din ne mibpemulaan din te wahed ne ed-ingaranan te paras. Ne mid-alad din arà, ne mibaal din te edtehuan dut te egkekeres te bahas te paras, ne midsebungan din te ebpeubpaan dut te ebpeventayen din. Ne ruen pinekamal din dut te impemula rin, ne arà pa ne mid-ipanew en se ebpendiyà te meriyù ne inged.

<sup>2</sup> Guna su midsabpet en ke pinemula rin ne ruen senge etew ne edsugsuhuen din ne midsuhù din su ibpekuwa ke kandin ne umun.

<sup>3</sup> Ugaid ne nekeuma ini se midsuhù din, ne migeweran dut te pinekamal ne mibedasan dan ne impeuli din te warè en iya imbehey kandin.

<sup>4</sup> Ne mibpan iring ketà, ne midsuhù en maa se senge etew. Ugaid ne nekeuma ini ne mibedasan ded maa ke ulu rin dut te pinekamal, ne pinegkeyà dan.

<sup>5</sup> Nekita maa kayi te kemuney ini, ne midsuhù pà lavew te senge etew. Nekeuma maa ini, ne mid-imetayan dan. Ne iring din ded dema se imped-ulaula ran dut te ruma pà ne midsuhù su ruen en se mibpenruug, ne ruen se mid-imetayan dan.

<sup>6</sup> “Guna su iyan dè be nesamà ke tuney en ne anak din ne igkelimù din nevenar, ne iyan din en midsuhù diyà te kandan su iyan netahù te itungan din ne ke sikandin te, ‘Kenà en be iya maa egkepakey ne kenà dan ini ed-edatan.’

<sup>7</sup> “Ugaid ne guna su nekeuma ini se anak din ne mibpeglelaheya ke menge pinekamal din te, ‘Ini en bes ke anak dut te kemuney kayi te tanà. Kuwa kew en su ed-imetayan tew su apey sikitew en se ebpekegkemuney kayi te tanà.’

<sup>8</sup> Arà dà ne migeweran dan en sikandin ne mid-imetayan dan en, ne intimbag dan ke bankuey rin diyà te luwal dut te pemulaan.

<sup>9</sup> “Na geina te iring kayi,” ke si Hisus, “se mid-ulaula rut te pinekamal dut te pemulaan, engkey ve se ed-ul-ulaan dut te kemuney ketà te pinekamal din? Idtarem ku keniyu te ebayaan din arà se menge etew ne ebpengimetayan din, ne ebpelemalan din te ruma pà ne menge etew.”

<sup>10</sup> Ne migkahi pà maa si Hisus te, “Nevasa niyu red ura ke impesurat ne Lalag te Eleteala ne egkahi te,  
‘Ke pelaus ne mid-eng-engkeran  
dut te menge etew ne ebpemevaley,  
su kunaan dan ke warà rantek din  
ne iyan en iya ini  
nepemili ne segkad te valey.

<sup>11</sup> Ini se mid-ulaula te Kerenan  
ne mekegeyip nevenar!’ ”

<sup>12</sup> Ne edsigkemen en perem si Hisus dut te menge egkeunutan te menge Hudiyanan se netuenan dan te sikandan ke nesuhat ketà te sempità din. Ugaid ne neandek dan dut te merakel ne etew ne egkiyug ne ebpemineg ki Hisus, ne arà dà ne mid-ewaan dan en sikandin ne mid-ipanew ran en.

*Edlitahen perem si Hisus te menge Paresiyu kayi te ked-insà dan Mekeatag te Kebayad te Buwis*

*(Mateo 22:15-22; Lucas 20:20-26)*

<sup>13</sup> Guna su mid-awà en ke menge egkeunuten te menge Hudiyanan, ne ruen en maa ruma pà ne menge Peresiyu wey menge etew ni Hirudis ne midsuhù dan te ebaal te menge penginsà su apey ruen dalan ne idlitag dan ki Hisus.

<sup>14</sup> Guna su nekeuma ran ne migkahi ran en te, “Meyerù, netuenan dey te edlalag ka te benar ne kenà ka egkopenheewit dut te lalag te menge etew. Su misan ke mepurù mevavà ne menge etew ne warà ebiraan te kepbenurù nu, ugaid ne ebpenurù ka te benar dut te kiyug te Eleteala ne ed-ul-ulaan tew. Tembù be ruen. Ed-insà dey keykew. Maa, ebpekerimpas kiyu ve dut te penduan tew embiya ebayad ki te buwis diyà te ratù tew te inged ne Ruma, etawa kenà? Engkey, ebayad ki etawa kenà?”

<sup>15</sup> Ugaid ne netuenan en ni Hisus se ebpemengaan den dà se ralan te igkeisuhat dan kandin ne ke sikandin te, “Meambe ke ebaal kew te ralan te kegkelitag niyu kediey? Peintenga a niyu kun te pelatà.”

<sup>16</sup> Impekita ran kandin ke pelatà ne migkahi sikandin te, “Engkey ki paras wey ngaran kayi?”

Midtavak dan te, “Paras wey ngaran dut te ratù tew kayi te inged ne Ruma.”

<sup>17</sup> “Embiya iring ketà,” ke si Hisus, “ne ivehey niyu diyà te datù ayan se bayad te buwis ne kandin, ne ivehey niyu riyà te Eleteala ke endei rema ke kandin.”

Ne ingkeinuinu ru nevenar ini se migkahi ni Hisus.

*Mid-insà ke Menge Sedyusiyu ki Hisus Mekeatag te Kegkevanew te Menge Minatey*

*(Mateo 22:23-33; Lucas 20:27-40)*

<sup>18</sup> Ne ruen dema menge etew ne ed-ingaranan te Sedyusiyu ne mibpendiyà te ki Hisus. (Ini se menge Sedyusiyu ke menge etew ne warà mebperetiyyaya te egkevanew pà te Eleteala ke menge minatey.)

<sup>19</sup> Ke sikandan te, “Meyerù, ruen penduan ne insurat ni Moises dengan ne egkahi te, ‘Embiya ruen meama ne ebpatay ne neketahak te esawa rin ugaid ne warà anak dan, ne ebpemeluwen dut te suled din ne meama su apey ruen ded anak dut te minatey ne ebpekesumpat.’

<sup>20</sup> Su ruen dengan,” ke sikandan, “pitu ne meama ne telteleari ne mid-esawa en ke kakey, ugaid ne minatey te warà dan med-anak.

<sup>21</sup> Ne mibpemalu en dut te nesikupu rin arà se ipag dan, ne minatey red dema te warà dan med-anak. Ne iring din ded dema ke iketelu.

<sup>22</sup> Ne engketà ded ke nesamà, langun dan te pitu ne etew se nekepemalu ketà te ipag dan, ugaid ne warà dan med-anak. Netaman ne minatey en ini se meritan.

<sup>23</sup> Ne ini ve se id-insà dey keykew,” ke se menge Sedyusiyu, “embiya benar ne egkevanew red te Eleteala ke menge minatey keuremà, ne endei rapit kandan se tehiesawa ketà te meritan? Su langun dan te pitu ne telteleari ne nekedtundug se nekeesawa kandin.”

<sup>24</sup> Midtavak si Hisus te, “Warè en iya ebpekesuhat ne itungan niyu! Su warà niyu mesebuti ke impesurat ne Lalag te Eleteala, ne warà niyu mesebuti ke rekèlè ne gehem din.

<sup>25</sup> Su ketà te hewii ne egkevanew ke minge minatey ne warè en kebpees-eseweey su iyan dan en egkeiringan ke minge suluhuen te Eleteala riyà te langit ne kenà ebpees-eseweey.

<sup>26</sup> Ne ini se id-insà niyu mekeatag te kegkevanew te minge minatey, ne maa warà niyu ves mevasa ke impesurat ne lalag ni Moises dengan mekeatag te kinepekidlalag te Eleteala kandin ne riyà ebpuun te neregreg ne sagbet? Su misan neuhet en ne minatey en si Abraham, si Isaac, wey si Jacob ne migkahi ke Eleteala ki Moises te, 'Siaken ke Eleteala ne ebpengerapan ni Abraham, ni Isaac, wey si Jacob,' ke se Eleteala.

<sup>27</sup> Tembù be netuean tew," ke si Hisus, "ne misan minatey ran en, ne viviyag den pà diyà te etuvangan te Eleteala su iyan dà ebpekepengarap te Eleteala ne viviyag, kenà ke minatey. Warè bulug ebpekesuhat ne itungan niyu!"

*Duen Meyterù te Penduan ne Edlitag Perem ki Hisus kayi te insà din ke Engkey se Ebpekeuna ne Penduan*

*(Mateo 22:34-40; Lucas 10:25-28)*

<sup>28</sup> Ruen ketà meyerù te penduan ne ebpemineg te lalag ni Hisus dut te minge Sedyusiyu. Guna su netuean din te metau nevenar ne ebpenavak si Hisus dut te minge Sedyusiyu ne midubpù en sikandin ne mid-inseen te, "Engkey ma rut te penduan tew se ebpekeuna te langun?"

<sup>29</sup> Ne midtavak ni Hisus te, "Ini ke ebpekeuna te langun: 'Sikiyu ne inenakan ni Israyil ne pemineha niyu ini! Ke Kerenan ne Eleteala tew ne iyan dà iya Kerenan!

<sup>30</sup> Iamin nu ke hinawa nu te edlimù te Kerenan ne Eleteala nu, ne iamin nu ke baher nu wey ke itungan nu te ed-ulaula ke engkey se ebpekesuhat te hinawa rin.'

<sup>31</sup> Ne ini ke ikeruwa ne pinekemepurù dut te langun: 'Ikelimù nu ke ruma nu iring te kegkelimù nu te hinawa nu.' Warà en be," ke si Hisus, "ruma pà ne penduan ne pinekemepurù pà kayi te ini se deruwa."

<sup>32</sup> "Benar arà, Meyterù, se migkahi nu," ke se meyerù te penduan, "su sebseveka rà ke Eleteala, ne warè en duma.

<sup>33</sup> Ne ini se lalag nu ne id-amin ta ke hinawa ta te edlimù te Eleteala, ne iyan ta ibpeuna sikandin te itungan ta wey rut te langun ne ed-ul-ulaan ta, ne igkelimù ta ke ruma ta iring dut te kegkelimù ta kayi te keytew ne hinawa," ke se meyerù, "ne iyan pà ini meupiya ne edtumanen ta tumin dè be rut te langun ne binatang ne edtutungen wey ruma pà ne ibpelengesa ne ibehey tew te Eleteala."

<sup>34</sup> Guna su nerineg ni Hisus te neketidtu ke tavak din ne migkahi en sikandin te, "Benar imbe ayan, deisek dà ne ebpekelusud ka rut te Edetuan te Eleteala." Ne igenat dè be ketà ne warà en ebpeketikà ne ed-insà ki Hisus.

*Impesabut ni Hisus te Sikandin Ke Impasad te Eleteala ne Ebperetuen te Langun*

*(Mateo 22:41-46; Lucas 20:41-44)*

<sup>35</sup> Gewii te ebpenurù si Hisus ketà te Nekebpuru ne Valey te Eleteala ne mid-insaan din sikandan te, "Menu ne egkahi ke minge meyerù niyu te arà se Impasad te Eleteala ne Ebperetuen dut te langun ne etew ne inenakan sikandin ni David?"

<sup>36</sup> Su mid-ulinan te Kedesenan ne Ebpetuntul te Menusiyà si David ne impesurat din te,

'Migkahi ke Eleteala ketà te Kerenan ku te:  
Kayi ka pinuu te rapit te egkekewanan ku  
taman te ebpenggiekan ku  
ke minge kunterà nu.' "

<sup>37</sup> Ne migkahi pà maa si Hisus te, "Embiya ini ke nekahi ni David te arà se Impasad te Eleteala ne Ebperetuen te langun ne Kerenan din, ne maa egkepakey ve ne kayi red ini te inenakan din?"

Ne ketà ne nengesuatsuat ke merakel ne minge etew ne ebpemineg dut te kepbenurù ni Hisus.

*Duen Imbaag ni Hisus Mekeatag te Ed-ul-ulaan te Minge Meyterù te Penduan*

*(Mateo 23:1-36; Lucas 20:45-47)*

<sup>38</sup> Gewii ni Hisus te ebpenurù kandan ne migkahi te, "Uram kew su apay kenà kew egkepeneheewit dut te minge meyerù te penduan ne ebpengip-ipanew se ebevelegkas te lembung ne sida ne melayat su ebpeadat te minge etew diyà te minge pedian.

<sup>39</sup> Ne embiya riyà dan en te valey ne ebpengedian te penduan te minge Hudiyanen ne ebpemili dan te meupiya ne ebpinnuwan diyà te sineruwana, etawa ke edtelavuk dan te kevrunan ne riyà dan ebpinnu te insivey ne meupiya ne ebpinnuwan te egkeedatan.

<sup>40</sup> Ne ebpeey-eyunan dan ke menge kearen dut te menge valu ne meritan, ne ebpeedleydeley ran te kebpengeningeni ran diyà te Eleteala su uvag kun se rekela se sarig dan te Eleteala. Ugaid ne keuremà ne labi pà ne mekeandek-andek ke ibadas ne kersaan kandan te Eleteala!"

*Ke Imbehey te Valu ne Meritan Diyà te Eleteala*  
(Lucas 21:1-4)

<sup>41</sup> Senge hewii ne riyà si Hisus te Nekebpuru ne Valey te Eleteala, ne mibpinuu sikandin diyà te uvey te edtegehuan te kureta ne midtengtangan din ke menge etew ne ed-ulug dut te ibehey ran te Eleteala. Duen ketà menge kewasa ne rekela se imbehey ran.

<sup>42</sup> Ugaid ne ruen nekeuma ketà ne valu ne meritan ne ayuayu nevenar, ne iyan din dà neulug se deruwa ne tumbaha.

<sup>43</sup> Arà dà ne impeuvey en ni Hisus ke menge edumdumaan din ne migkahi en te, "Benar ini se egkehiyen ku keniyu ne riyà te etuvangan te Eleteala ne iyan pà rekela se imbehey kayi te ini se valu ne meritan dut te langun ne imbehey te menge kewasa.

<sup>44</sup> Su ke ruma ne menge etew ne iyan dan imbehey ne sawad dà dut te kekewesai ran, ugaid ne ini se ayuayu ne valu ne imbehey rin te Eleteala ke namànamà ne kureta rin ne edserihan te hinawa rin."

## 13

*Migkahi ni Hisus ke Kegkerundus Dut te Nekebpuru ne Valey te Eleteala Diyà te Hirusalim*

(Mateo 24:1-2; Lucas 21:5-6)

<sup>1</sup> Guna su mid-awà en si Hisus ketà te Nekebpuru ne Valey te Eleteala ne ruen seveka ne edumdumaan din ne migkahi te, "Meyterù, tengtengi nu ma ini se menge vatu ne derekela ne pengawid kayi, ne kebpelasan nevenar ke kineveeli!"

<sup>2</sup> Ne midtavak si Hisus te, "Uya, intengi nu ma ini se rekela ne valey ne iyan din pengawid ne vatu! Su ruen gewii ne egkeuma ne ini se egkekita niyu ne egkerundus ne warà misan seveka rà ne vatu ne egkesamà su egkevurahey langun."

*Migkahi ni Hisus ke Keresayan wey Kebpekesakit ne Ebpekeuma Kayi te Menge Etew*  
(Mateo 24:3-14; Lucas 21:7-19)

<sup>3</sup> Guna su riyán dan en te buvungan ne ed-ingaranan te Ulivuwan ne mibpinuu si Hisus ne egkesineruwan din ke Nekebpuru ne Valey te Eleteala. Ne mid-uvey kandin si Pedro, si Santiago, si Juan, wey si Andres te sikandan dà se egkahi te,

<sup>4</sup> "Ikahi nu kenami ke keenu egketuman ini se langun ne migkahi nu ne kegkerundus dut te Nekebpuru ne Valey te Eleteala, ne engkey se idtuus dey su apey rey egketueni te neuma en ke hewii te egketuman din."

<sup>5</sup> Ne migkahi si Hisus kandan te, "Uram kew su apey kenà kew meekali dut te menge etew ne metau ne edliyuk.

<sup>6</sup> Su merakel se edlepew ne engkunkun te siaken en ne egkahi ran te, 'Siaken en ini ke Impasad te Eleteala ne Ebperetuen te langun ne menge etew!' Ne ketà," ke si Hisus, "ne merakel ne menge etew se ebpekeperetiyaya te tarù dan.

<sup>7</sup> Ne embiya egkerineg niyu se ebpevunbunuey riyà te meriyù merani ne kenà kew meandek. Su ini pà iya se egkeuma ne egked-ulaula, ugaid ne warà pà meuma ke hewii te kebpupusa kayi te dunya.

<sup>8</sup> Su ebpepekebunuey pà ke idsenge inged, ne engketà ded dema ke idsenge retuan. Ne edlinug te mevaher te piya endei en, ne egetab se bitil. Ugaid ne rudsuan dà ini dut te keresayan ne egeramen niyu, iring dut te belilit te meritan ne ed-anak.

<sup>9</sup> "Ne sikiyu, ne ingat kew nevenar su ebpenigkemen kew te menge etew ne ibpepemenayik kew riyà te valey te kukuman. Ne ebpenruuhen kew riyà te valey ne ebpededian te penduan te menge Hudiyänen, ne ebpenheewiten kew riyà te menge egkeunutan wey hari te inged su atag dut te kedsarig niyu kediey, ugaid ne ini en imbe ke ralan te kebpupesabut niyu kandan dut te Meupiya ne Tudtul mekeatag kediey.

<sup>10</sup> Su iyan pà ibpeuna ibpesabut ini se Meupiya ne Tudtul dut te langun ne menge etew kayi te ampew te dunya te kenà pà egkeuma ke hewii te kebpupusa kayi te dunya.

<sup>11</sup> Ne ketà te edsigkemen kew ne ebpenheewiten kew riyà te kukuman, ne kenà kew meuru ke ebmemenuwen niyu se kedlalag niyu te kedtindeg te hinawa niyu su ketà ne iyan niyu rà egkekahi ne lalag ne ibpekahi keniyu su riyà ebpuun te Kedesenan ne Ebpetuntul te Menusiyà ne kenà kayi rà ebpuun te itungan niyu rà dè duen.

<sup>12</sup> "Su ketà ne hewii ne ruen menge etew ne misan ke temperà dan te pused ne ed-uluhén dan su ebpeimetayan, ne iring din ded dema ke ed-ul-ulaan te amey dut te menge

anak dan. Ne ruen minge anak ne ebpekid-atu te minge lukes dan su ebpeimetayan dan.

<sup>13</sup> Ne egkeepesan kew dut te langun ne minge etew su atag te keduma niyu kediey. Ugaid ke etew ne misan egkerasey sikandin ne kenà edsuwey dut te keduma rin kediey taman te ini pà sikandin te ampew te dunya, ne ebpekehaked te umur ne kenà edtaman.”

*Imbaag ni Hisus Mekeatag te Kebpekeuma dut te Ebpekekaid ne Ebpekelusud Diyà te Nekebpuru ne Valey te Eleteala su Edsevuèn Din ke Ed-edaten*  
(Mateo 24:15-28; Lucas 21:20-24)

<sup>14</sup> Ne embiya egkekita niyu en ini se “Ebpekekaid ne Kunterà ku” diyà te lusud te Nekebpuru ne Valey te Eleteala ke warà iluhut kandin, ne sikiyu riyà te pruvinsiya te Hudiya ne pelahuy kew riyà te buvungan. (Sikiyu ke ebpekevasa kayi ne pegpegitunga niyu ke meana rin ini.)

<sup>15</sup> Ne ke etew ne riyà te ruwangen te valey rin ne kenà din en lilingaya ke keleglahan din su mebpelahuy en sikandin.

<sup>16</sup> Ne ke etew ne riyà te pengengewiren din, ne kenà en med-uli se egkuwa te kumbalà din.

<sup>17</sup> Ne egkeyruwan ke minge meritan ne mehingey te arà ne hewii wey ke minge meritan ne edseruru.

<sup>18</sup> Ipengeningeni niyu te Eleteala te kenà ini med-ulaula te hewii te kedrengreng.

<sup>19</sup> Su ini se kemeresayan ne ebpekeuma ne warà repeng din igenat dut te aney en limbaha te Eleteala ini se dunya, ne kenà en egkerepengan te misan keenu.

<sup>20</sup> Ugaid ne sabap dut te raat te nanam te Eleteala ne migkurangan din en ke minge hewii rut te kemeresayan su embiya warà, ne warà en egkesamà ne biviyag. Uya, su geina te rekela ke limu din dut te minge etew ne mibpemili din, ne migkurangan din ke minge hewii rut te kemeresayan.

<sup>21</sup> “Su ketà ne hewii embiya ruèn egkahi keniya te, ‘Ini en ke Impasad te Eleteala ne Ebperetuen din te langun ne minge etew!’ etawa ruèn egkahi te, ‘Ayan en sikandin!’ ne kenà kew peretiya su apew kenà kew egkelimbungi.

<sup>22</sup> Su ruèn ebpenlepew ne minge etew ne engkunkun te sikandan ke Impasad te Eleteala ne Ebperetuen etawa sikandan ke ebpelambas te Lalag te Eleteala. Ne ebpekita dan te mekegeyip ne ed-ul-ulaan su apew ran perem meekali ayan se minge etew ne mibpemili te Eleteala.

<sup>23</sup> Tembù be idtarem ku ini,” ke si Hisus, “su apew niyu meingati te kenà pà ini egked-ulaula.”

*Tuus te Mehaan en ke Kedlived Dut te Impeanak te Menusiyà kayi te Ampew te Dunya*  
(Mateo 24:29-31; Lucas 21:25-28)

<sup>24</sup> “Ne ebpeketundug be ketà te egkeipus ke hewii te kemeresayan,” ke si Hisus, “Ne ebmerusirem ke andew,

ne kenà en edsilà ke vulan,

<sup>25</sup> ne ebpengeulug ke minge bituen diyà te langit,

ne egkeparin dut te netahuan dan ke edtenuran ne minge bituen.’

<sup>26</sup> “Ne ketà be ne egkekita niyu se kedlived dut te Impeanak te Menusiyà, ne egkerumaan te sehulapun, ne egkekita niyu ke gehem din wey raman din ne ed-anlag.

<sup>27</sup> Ne edsuhuen din diyà te epat ne pediyulu kayi te dunya ini se minge suluhuen din su apew ran egkevurun ke langun ne minge etew ne mibpemili te Eleteala igenat te pHiliran taman te binunsuran.”

*Ke Sempità ni Hisus Mekeatag te Kayu ne Igira Ne In-upama Rin te Tuus te Mehaan en ke Kedlived Dut te Impeanak te Menusiyà*  
(Mateo 24:32-35; Lucas 21:29-33)

<sup>28</sup> “Kenian niyu rè ma te kayu ne Igira,” ke si Hisus, “su ruèn ibpenuru din keyta. Embiya nekepasad en te edrewrew ne ed-umbus en wey ebpenersing, ne tuus te ed-andew en.

<sup>29</sup> Ne iring din ded dema embiya egkekita niyu en se netuman en ke langun ne tuus ne impenuru ku keniya, ne egketuanan niyu te mehaan en se kedlived dut te Impeanak te Menusiyà.

<sup>30</sup> Tentenuri niyu ini se egkehiyen ku keniya, su ruèn pà kayi te keniya guntaani ebpekesaut pà ketà te kegketuman din ini.

<sup>31</sup> Su egkeawà ini se langit wey tanà, ugaid ne ini se migkahi ku ne kenà bulug ebperis.”



*Warà Metueni ke Hewii Etawa Endei Egketahù ke Andew te Kedlived Dut te Impeanak te Menuiyà Kayi te Dunya*  
(Mateo 24:36-44)

<sup>32</sup> “Ugaid ne ini se idtarem ku keniyu,” ke si Hisus, “warà netau te hewii etawa endei egketahù ke andew ke edlived kayi ke Impeanak te Menuiyà su ke Amey ku rà ne Eleteala. Misan ke suluhuen te Eleteala diyà te langit wey misan dema siaken ke Anak te Eleteala ne warà netau ke keenu se kedlived din.

<sup>33</sup> Uram kew ve ne penehana kew en, su warà niyu metueni ke hewii ne egkeuma ini.

<sup>34</sup> Su ini se hewii te kedlived din kayi ne iyan ta ed-upamaan ne etew ne mid-ipanew riyà te meriyù ne inged ne warà din kehiya ke keenu ed-uli. Ne ruen sugsuheun din ne pinetuganur din te valey rin te warà pà migenat, ne ruen helevek ne imbehey rin te uman seveka. Ne migkehiyan din ke tumetameng te eheran te mebpekevantev nevenar.

<sup>35</sup> “Ne sikiyu,” ke si Hisus “ne iring kew rut te tumetameng te eheran ne pekevantev kew su warà niyu metueni ke hewii te edlived din ini se kemuney te baley, ke embiya meapun be, ke edluuk be se kerukileman, ke ebpengelet en be ke manuk, etawa ve ke edsilà en ke andew.

<sup>36</sup> Tembù be uram kew, su embiya ebpeketekew ebpekeuma sikandin ne iyan din kemeyidan ne kenà kew nikandin egkeumaan se edlipereng.

<sup>37</sup> Ini se egkehiyan ku keniyu ne igkahi ku red dema diyà te langun ne menge etew te mebpekevantev ran te kedlived ku kayi.”

## 14

*Mibentaan ke Menge Mepurù te Terebpelengesa wey ke menge Meyterù te Penduan te Kedsigkem ki Hisus su Ebpeimetayan*

(Mateo 26:1-5; Lucas 22:1-2; Juan 11:45-53)

<sup>1</sup> Deruwa pà ne hewii ne egkeuma ke kevruran ne edtenuran tew ne ed-ingaranan te Pista te Kedsehari te Suluhuen dut te menge apù tew rengan wey ke Pista te Kegkaan dan te Pan ne Warà Idsawug ne Ibpelevag. Ne ebpemengà ke menge mepurù te terebpelengesa wey ke menge meysterù te penduan te ralan te kedsigkem dan ki Hisus te kenà egketuanan dut te menge etew apew ebpeimetayan dan en.

<sup>2</sup> Ne mibpelelelahey ran te, “Kenà ta ini ed-ul-ulaan dut te kevruran ne pista su kema ke egkekita rut te menge etew ne egkeepes dan keytew ne egkehuvut en ketà.”

*Mibperiyemutan en Neraan Ke Lawa ni Hisus te Kedleveng Kandin*

(Mateo 26:6-13; Juan 12:1-8)

<sup>3</sup> Guna su riyà si Hisus te inged ne Bitanya ne riyà sikandin te valey ni Simon, senge etew ini ne kevuwaen muna pà te it-it ne neulian. Gewii te egkaan si Hisus ne nekeuma en ini se meritan ne mid-ewit te pelanaan ne mibeelan te elibastru, ne midtehuan te periyemut ne mepurù nevenar su mibeelan dut te lunsey ne Nardu. Ne mid-uvay en kandin, ne imbusbus din en ke periyemut kayi te ulu ni Hisus.

<sup>4</sup> Ne ruen menge etew ketà ne neepes ne mibpelelelahey ran te, “Babeba! Meambe ke midereetan din dà ini se periyemut?”

<sup>5</sup> Iyan tumù ne indahang din ini ne igkepemehey pà diyà te menge ayuayu su labi tetelu nehatus ne pirak se elehà din!” ke sikandan. Ne nesewayan dan ini se meritan.

<sup>6</sup> Ugaid ne migkahi si Hisus te, “Pedteraya niyu sikandin! Meambe ke edsewayan niyu sikandin? Su meupiya nevenar ini se mid-ulaula rin kediey!”

<sup>7</sup> Su ke menge ayuayu ne lelayun kew red ebpemekeduma ne egketevangan niyu sikandan, ugaid ne siaken ne kenà ad meuhet kayi te keniyu.

<sup>8</sup> Su ini se meritan,” ke si Hisus, “ne mid-ulaula rin en ke taman ne egkegaga rin, su mibperiyemutan din en ke lawa ku te kebpenehana te kedleveng kediey.

<sup>9</sup> Sevenarbenar ini se egkehiyan ku keniyu,” ke si Hisus, “te misan endei kayi te ampew te dunya ipesabut ini se Meupiya ne Tudtul mekeatag kediey, ne egkepenudtul ded dema ini se mid-ulaula rin kediey ne kenà egkelipatan.”

*Mibpendiyà si Hudas Iskeriyuti te Menge Mepurù te Terebpelengesa su Ebpekidsabut ke Ebmemenuwen Din te Ed-ulug si Hisus*

(Mateo 26:14-16; Lucas 22:3-6)

<sup>10</sup> Ne ketà ne si Hudas Iskeriyuti, seveka rut te sepulù wey deruwa ne edumdumaan ni Hisus, ne mibpendiyà te menge mepurù te terebpelengesa su igkahi rin kandan te egkeulug en si Hisus diyà te kandan.

<sup>11</sup> Guna su nerineg dan ne nengesuatsuat dan nevenar, ne impasad dan kandin te ebeyahan te pirak. In-awà dè be ketà ne ebpemengaan en ni Hudas ke ralan te kegkeulug din ki Hisus su apey mesigkem dan en.

*Mibpekidseveka te Egkaan si Hisus dut te Menge Edumdumaan Din te Kedlavung te Pista te kedtenuri ran te Kedsehari te Suluhuen te Menge Apù dan*  
(Mateo 26:17-25; Lucas 22:7-13, 21-23; Juan 13:21-30)

<sup>12</sup> Ne ketà te egkeuma ne hewii te Pista te menge Hudiyanen te kegkaan dan te Pan ne Warà Insawug ne Ibpelevag, ne edsusumbali dan te nati te bilibili ne egkeenen dan te kedtenuri ran dut te hewii rengan te Kedsehari te Suluhuen dut te menge Apù dan. Ne mid-insaan si Hisus dut te menge edumdumaan din te, "Endei rey ve ini ebpegetura se idlavung tew te Pista te Kedsehari te Suluhuen?"

<sup>13</sup> Ne ketà ne midsuhù ni Hisus se deruwa rut te menge edumdumaan din se egkahi te, "Una kew en be riyà te inged ne ruen ne edsinuhung keniyu ne meama ne ed-utuk te kelalew ne ruen wayig din.

<sup>14</sup> Tundug kew en be kandin, ne embiya ebpekeuma kew riyà te ed-ubpaan din ne kehiyi niyu ve ke kemuney te valey te, 'Ibpeinsà dut te meyerù tew te, Endei ne ruhu ke edlevungan ku wey ke menge edumdumaan ku dut te Pista te Kedsehari te Suluhuen?'

<sup>15</sup> Ne ketà ne ibpekita rin keniyu ke meluag ne ruhu diyà te ikeruwa ne pangkat ne saag ne nepegediran en, ne ketà kew be pegatur te idlavung tew."

<sup>16</sup> Arà dà se nerineg dan ne mid-ipanew en ini se deruwa ne edumdumaan ni Hisus se ebpendiyà te inged, ne langun dut te ingkahi kandan ni Hisus ne arè en iya rema se nekita ran. Ne ketà dan ne mibpegatur te idlavung dan te Pista te Kedsehari te Suluhuen.

<sup>17</sup> Guna su merukilem en ne nekeuma en si Hisus wey ke sepulù wey deruwa ne menge edumdumaan din ketà te valey.

<sup>18</sup> Ne gewii ran te egkaan ne migkahi si Hisus te, "Benar ini se egkehiyen ku keniyu, ruen senge etew kayi te keniyu se ed-ulug kediey su apey a meimetayi."

<sup>19</sup> Guna su nerineg dut te menge edumdumaan din ini, ne mibmerungkug dan ne uman senge etew ne mid-insà te, "Entei, kenà ma siaken?"

<sup>20</sup> Midtavak si Hisus te, "Senge etew keniyu rut te sepulù wey deruwa ne ebpekidtuhen te edeluwit te pan din kayi ke ed-ulug kediey.

<sup>21</sup> Su egkeimetayan ke Impeanak te Menusiyà iring dut te nekahi te impesurat ne Lalag te Eleteala rengan, ugaid ne meraat nevenar se egketemanan din ini se etew ne ed-ulug kandin su iyan pà tumù ne warà sikandin ianak."

*Ke Ketepusan ne Kinelavung te Kerenan Tew Wey Ke Edumdumaan Din*

(Mateo 26:26-30; Lucas 22:14-20; 1 Kurintu 11:23-25)

<sup>22</sup> Gewii te egkaan dan ne migkuwa ni Hisus ini se egkeenen dan ne pan ne impeselamat din te Eleteala, ne mibpenevitevi din ne imbehey rin diyà te menge edumdumaan din se egkahi te, "Kua niyu ini, su ini ke lawa ku."

<sup>23</sup> Ne ketà ne migkuwa ni Hisus ke ed-inumen ne impeselamat din te Eleteala ne imbehey rin kandan, ne langun dan ne mid-inum ketà.

<sup>24</sup> "Ini ke lengesa ku," ke si Hisus, "ne ebpeketudà ne ibavas te menge etew, su tuus ini te egketuman ne ke impasad te Eleteala rengan te ebpekepelihauan en ke menge etew dut te keberedusaan dan.

<sup>25</sup> Benar ini se egkehiyen ku keniyu te kenà ad maa ed-inum kayi te ed-inumen ini taman te kenà egkeuma ke hewii keuremà te kedatù te Eleteala ne egkevehu en ke ed-inumen tew."

<sup>26</sup> Arà dà ne mideyù dan ke Eleteala te kanta ran ne midlihawang dan en ne riyà dan en mebpsinaru te buvungan ne ed-ingaranan te Ulivuwen.

*Impayag neraan ni Hisus ke Kebparew ni Pedro te Teleduma Ran*

(Mateo 26:31-35; Lucas 22:31-34; Juan 13:36-38)

<sup>27</sup> Ne migkahi pà maa si Hisus dut te edumdumaan din te, "Langun niyu ne ebpelahuy ne edtehaken a niyu su ruen Lalag te Eleteala ne impesurat din ne egkahi te, 'Ebpeimetayan ku ke tumetuganur

dut te menge bilibili, ne egerunsuwey ke menge bilibili rin.'

<sup>28</sup> Ugaid," ke si Hisus, "embiya egkevanew ad, ne ed-una ad keniyu riyà te inged ne Geliliya."

<sup>29</sup> Ne migkahiy si Pedro te, "Misan edtehaken ka rut te langun dan, ne siaken ne kenà!"

<sup>30</sup> Ugaid ne migkehiyan sikandin ni Hisus te, "Tentenuri nu ini te kenà pà ed-ukarà ke manuk te kereruwa te ini en ne kerukileman, ne ketetelu nu en ibparew te kenà a nu ruma."

<sup>31</sup> Ugaid ne warà mebpehimbemar si Pedro se egkahi te, "Kenà a ebpekekahi te iring ketà te kenà ki teleduma misan ebpekeunung a keykew te ed-imetayan." Ne iring ded dema ketà ke migkahi rut te menge ruma rin.

*Mibpengeningeni si Hisus diyà te Gitsimani*  
(Mateo 26:36-46; Lucas 22:39-46)

<sup>32</sup> Nekeuma ran en diyà te inged ne ed-ingaranan te Gitsimani ne migkehiyan ni Hisus ke menge edumdumaan din te, "Pinuu kew rè be kayi gewii ku te ebpengeningeni."

<sup>33</sup> Ne miduma rin si Pedro ki Santiago wey ki Juan diyà te unaan. Ne nemutu nevenar sikandin wey nerurunù ke hinawa rin.

<sup>34</sup> Ne migkahi sikandin kandan te, "Merasey nevenar ini se hinawa ku su iring te egkevidtew en. Kayi kew rè be ne kenà kew lipereng kediey."

<sup>35</sup> Ne midlaus pà sikandin diyà te unaan dan ne midlangkeb en se ebpengeningeni te Eleteala te embiya egkepakey rà ne kenà ibpepeyayà kandin ini se kemeresayan.

<sup>36</sup> Ne ini se migkahi rin te kebpengeningeni rin, "Amà, su sikew se Amey ku, netueanan ku te egkegaga nu ke langun! Ne embiya egkiyug ke rà ne iawà nu ini se keresayan ku, ugaid ne misan iring en ketà se kiyug ku ne iyan nu tumana ke keykew ne kiyug."

<sup>37</sup> Neiseg-iseg ketà ne midliveran din ke tetelu ne etew ne edumdumaan din ne iyan din neumaan se nekelipereng dan. Ne migkehiyan din en si Pedro te, "Simon, maa nekelipereng ke ves? Maa, kenà ka ebpeketigker misan mehaan dà?"

<sup>38</sup> Kenà kew edlipereng, ugaid ne pengeningeni kew," ke si Hisus, "su apey kenà kew ebpekeruma kayi te ebpenggeram keniyu. Su mevaher perem ke hinawa niyu te edtuman te lalag ku, ugaid ne midtaman dè be te kenà eduma ke lawa niyu."

<sup>39</sup> Ne mid-awà en maa si Hisus se ebpengeningeni te iring ded ketà te neuna ne pengeningeni rin.

<sup>40</sup> Ne ketà ne midlived maa sikandin kayi te tetelu ne edumdumaan din ne iyan din neumaan se nekelipereng dan su midseharan dan te turug. Ne warà dan metau ke engkey se egkehiyen dan.

<sup>41</sup> Guna su midlived en sikandin kayi te menge edumdumaan din te iketelu rin en te ebpengeningeni ne migkahi en te, "Maa, nekelipereng kew pè bes lavew? Sesangen en ayan! Su ini en ke ked-uluha dut te Impeanak te Menusiyà diyà te palad te menge etew ne beniyagà."

<sup>42</sup> Enew kew," ke si Hisus, "su ini en ke etew ne ed-ulug kediey. Kuwa kew en su edtelavuk ki."

*Ke Kedsigkem ki Hisus*

(Mateo 26:47-56; Lucas 22:47-53; Juan 18:3-12)

<sup>43</sup> Gewii te edlalag pà si Hisus ne nekeuma en si Hudas, senge etew ini rut te sepulù wey deruwa ne edumdumaan din. Ne nerumaan dut te merakel ne menge etew ne midmemetarem dan te menge sundang wey menge behuval, su midsuhù dan dut te menge mepurù te terebpelengesa, ke menge meysterù te penduan, wey ke menge egkeunutan te menge Hudiyanan.

<sup>44</sup> Ugaid ketà te warà den pà med-ipanew ne ruen ingkahi ni Hudas kandan te, "Ke etew ne ed-uveyan ku ne ed-erekan ku ne arà imbe ke ebpemengaan niyu. Sigkema niyu ne pekeventayi niyu nevenar te ked-ewit niyu."

<sup>45</sup> Nekeuma rà si Hudas, ne mid-uvey rin si Hisus se egkahi te, "Na Meyterù!" Ne arà pà ne mid-erekan din.

<sup>46</sup> Ketà ne migeweran dan en si Hisus ne midsigkem dan en.

<sup>47</sup> Ugaid ne ruen senge etew diyà te uvey ran ne mid-ulavut te sundang din ne midtibas din en ke sugshuen dut te Pinekebmepurù te Terebpelengesa ne nesempingan en te telinga rin.

<sup>48</sup> Ne migkahi si Hisus dut te menge etew ne midsigkem kandin te, "Maa, tulisan a ne ebmetereman niyu te sundang wey behuval te edsigkem kediey?"

<sup>49</sup> Su uman ded ma hewii ne riyana te Nekebpuru ne Valey te Eleteala se ebpenurù," ke si Hisus, "ne warà a ma nikaiyu sigkema ketà. Ugaid ne egked-ulaula ini su apey egketuman en ke Lalag te Eleteala ne impesurat dengan."

<sup>50</sup> Arà dà ne mibpelahuy en ke menge edumdumaan din ne mintahaky dan en sikandin.

<sup>51</sup> Ne ruen kenakan ketà ne migkukumbung te malung dà se edtungtung ki Hisus. Gewii te ked-ewita ran ki Hisus ne idragkes dan perem te edsigkem sikandin.

<sup>52</sup> Ugaid ne mibpelahuy sikandin te warà seseberen din su neluung ke malung din te kineheweri ran kandin.

*Mibpenehewit si Hisus Diyà te Valey te Kukuman*

*(Mateo 26:57-68; Lucas 22:54-55, 63-71; Juan 18:13-14, 19-24)*

<sup>53</sup> Ne mid-ewit dan si Hisus diyà te baley te pinekemepurù dut te minge terebpepengesa su rutun egkevurun ke minge mepurù te terebpepengesa, ke minge egkeunutan te minge Hudiyanan, wey ke minge meyerù te penduan.

<sup>54</sup> Ne midtutundugtundug en si Pedro kandan taman te nekeuma sikandin diyà te lama te valey dut te pinekemepurù te minge terebpepengesa. Na kayi mibpekid-amur en mibpinuu dut te minge bantey te valey se ed-inarang.

<sup>55</sup> Ne ini se minge mepurù te terebpepengesa wey ke minge egkeunutan te minge Hudiyanan ne nevurun kayi, ne mibpegelep dan mibpemengà ke engkey se id-isuhat dan ne kewagib ki Hisus su apey ran egkeimetayi, ugaid ne warà netuen dan.

<sup>56</sup> Merakel se in-isuhat dan ne kewagib kandin, ugaid ne warà memeked-ayun su mibèbeelan dan dè ma.

<sup>57</sup> Ne ruen en maa minge etew ne mid-etuvang ki Hisus su ed-isuhat kandin te kenà benar se egkahi te,

<sup>58</sup> "Nering dey," ke sikandan, "se egkahi ini se etew te, 'Egkerundus ku ini se Nekebpuru ne Valey te Eleteala ne mibeelan te etew, ugaid ne ketà te tetelu ne hewii ne igkepeitindeg ku en ke behu ne valey ne kenà bineelan te etew.' "

<sup>59</sup> Ugaid ne misan engkey en kandan se egkahi ne kenà ebpeked-ayun.

<sup>60</sup> Ketà ne mid-itindeg en ke pinekemepurù te minge terebpepengesa ne migkehiyan din si Hisus te, "Engkey ve se keykew ne egkekahi? Engkey, benar ini se id-isuhat dan ne kewagib keykew?"

<sup>61</sup> Ugaid ne mibpeeneng-eneng dà si Hisus.

Ne migkahi pà maa ini se pinekemepurù dut te minge terebpepengesa te, "Maa, sikuna en iya ini ke Anak te Eleteala ne midtendù din ne ebperetuen din?"

<sup>62</sup> Ne midtavak si Hisus te, "Uya, siaken en iya. Ne egkekita niyu red keuremà ke Impeanak te Menusiya ne ebpekepinu riya te egkekewanan te Eleteala ne warà repeng te gehem din. Ne ketà te kedlived din a kayi ne egkekita niyu en te edumaan te sehulapun."

<sup>63</sup> Nering dà dut te pinekemepurù te minge terebpepengesa ke migkahi ni Hisus ne mibisey rin ke velegkas diin te kegkeepes diin ne migkahi en te, "Kenà ki en ebpemengà te ruma pà ne titihus!

<sup>64</sup> Su nering niyu en ini se kedsumpalit din! Ne engkey en be se keniyu ne kukuman?"

Ne langun dan ne mid-isuhat kandin te kewagib ne ebpeimetayan.

<sup>65</sup> Ne ruen en ketà se mibpengileb ki Hisus, ne ruen duma ne mibegkesan ke mata rin ne midsuntuk dan en se egkahi te, "Entuka nu ke entei se midsuntuk keykew." Ne migkuwa sikandin dut te minge sundaru ne ebantey kandin ne mibpenabpi dan en sikandin.

*Imparew ni Pedro Te Teleduma ran ki Hisus*

*(Mateo 26:69-75; Lucas 22:56-62; Juan 18:15-18, 25-27)*

<sup>66</sup> Ne riyà pà lavew te lama te valey te Pinekemepurù te Terebpepengesa si Pedro, ne ruen meritan ne edsugsuhuen ketà te valey ne mid-uvay kandin.

<sup>67</sup> Nekita rin si Pedro se ed-in-inarang ne mibpeut-utangan din te edtengteng se egkahi te, "Sikuna rema ne ruma ka ni Hisus ke ebpuun te Nasarit."

<sup>68</sup> Ugaid ne mibparew sikandin se egkahi te, "Kenà ku egketuanan, kenà ku egkesebutan ayan se egkehiyan nu." Ne mid-ip-ipanew sikandin se ebpependiyà te bengawan te lama ne arà dà ne ruen mid-ukarà ne manuk.

<sup>69</sup> Nekita en maa si Pedro dut te meritan ne migkahi en sikandin diyà te minge etew ne nevurun ketà te, "Ayan se etew ne teleduma ki Hisus."

<sup>70</sup> Nering ni Pedro ne mibparew rin ded maa.

Neiseg-iseg manen ne migkahi ke minge etew ketà ki Pedro te, "Benar iya ne teleduma kew su egketuusan te riyà ka ebpuun te Geliliya."

<sup>71</sup> Ne migkahi si Pedro te, "Dusa kedi te Eleteala embiya teleduma key keniyuan te etew ne egkehiyan niyu!"

<sup>72</sup> Arà dà iya ne mid-ukarà en ke manuk te ikeruwa. Ketà ne netenuran ni Pedro ke migkahi ni Hisus kandin te, "Kenà pà ed-ukarà ke manuk te kereruwa te ini en ne kerukileman ne ketetelu a nu en ibparew te kenà ki teleduma." Ne midrahukrahuk en si Pedro te kedsinehew rin.

## 15

*Mid-ewit Dan si Hisus Diyà te Ki Pilatu ke Gubinedur te Ruma*

*(Mateo 27:1-2, 11-14; Lucas 23:1-5; Juan 18:28-38)*

<sup>1</sup> Guna su mesmeselem pà ne nevurun en ke minge mepurù te terebpelengesa, ke minge egkeunutan te minge Hudiyanen, ke minge meyterù te penduan, wey ke ruma pà ne egkedserihan dan te minge Hudiyanen ne neumpung dan en ke engkey se ed-ulaan dan ki Hisus. Ne mibakù dan si Hisus ne mibpeneheewit dan sikandin diyà te ki Pilatu, ke gubinedur te Ruma.

<sup>2</sup> Ne mid-insaan en ni Pilatu si Hisus te, “Menu, sikuna en iya ke ratù te minge Hudiyanen?”

Midtavak ni Hisus te, “Uya, ayan iya se migkahi nu.”

<sup>3</sup> Ne merakel se in-isuhut ne kewagib dut te minge mepurù te terebpelengesa ki Hisus.

<sup>4</sup> Ne ketà ne migkahi en maa si Pilatu ki Hisus te, “Menu, kenà ke en be edtavak kayi te in-isuhut dan kenikew? Su merakel ini!”

<sup>5</sup> Ugaid ne warè en megkahikahi si Hisus, ne ketà ne neinuinu nevenar si Pilatu.

*Migkukum dan te Ed-imetayan si Hisus*

*(Mateo 27:15-26; Lucas 23:13-25; Juan 18:39-19:16)*

<sup>6</sup> Ne iyan nelayaman ni Pilatu te uman egkeuma ke Pista te Kedsehari te Suluhuen ne ruen ibpelihawang din ne senge etew ne vilanggù ne ebuyuen dut te minge etew.

<sup>7</sup> Ne ketà ne hewii ne ruen senge etew ne nevilanggù ne ed-ingaranan ki Barabas su mid-amung sikandin te ebpekidkunterà te gubirnu ne ruen nepatey rin.

<sup>8</sup> Guna su mid-uevy en ke minge etew ki Pilatu su ebuyuen dan te ibpelihawang din ini se senge etew ne vilanggù iring dut te raan ne betasan din.

<sup>9</sup> Ne mid-insà si Pilatu te, “Menu, egkiyug kew ve te ibpelihawang ku ini se ratù niyu te minge Hudiyanen?”

<sup>10</sup> Iyan din migkahi ini su netuenan din se ini se id-isuhut ne kewagib ki Hisus dut te minge mepurù te terebpelengesa ne sabap dut te kegkesihi ran kandin.

<sup>11</sup> Ugaid ne migkumbida dut te minge mepurù te terebpelengesa ke minge etew te iyan dan ibpeyuyù ne ibpelihawang si Barabas, kenà si Hisus. Ne arà en iya rema ke mibuyù dan.

<sup>12</sup> Ne migkahi en maa si Pilatu te, “Embiya arà se egkiyuhan niyu, ne ebmemenuwen ku be ini se ed-ingaranan niyu ne ratù niyu te minge Hudiyanen?”

<sup>13</sup> Ne mibpemensag den dà te, “Ibpelansang nu sikandin diyà te ebpebelevahan ne kayu!”

<sup>14</sup> “Meambe?” ke si Pilatu. “Engkey se meraat ne mid-ulaula rin?”

Ugaid ne nasi en be ne mid-iseg pà se kebpemensag dan te, “Ibpelansang nu sikandin diyà te ebpebelevahan ne kayu!”

<sup>15</sup> Ketà ne impelihawang en ni Pilatu si Barabas su apey igkesuat sikandin dut te minge etew. Ne si Hisus embe ke imperuug din en ne imbehey rin en kandan te ibpelansang diyà te pinebelavag ne kayu.

*Pinelelembung Si Hisus te Datù Dut Te Minge Sundaru te Kedsumpalit Dan Kandin su uvag kun Datù sikandin*

*(Mateo 27:27-31; Juan 19:2-3)*

<sup>16</sup> Ne mid-ewit en te minge sundaru si Hisus diyà te lamalama te turuhan te gubinedur ne midtawag dan ke langun ne minge sundaru.

<sup>17</sup> Ne pinelelembung dan si Hisus te merihà su uvag kun ne ratù, ne ruen impetengkulu kandin ne mibeelan dan ne ruhiyen ne wahed.

<sup>18</sup> Ne uvag kun ed-adat dan kandin se egkahi te, “Mebereumur ka ne ratù te minge Hudiyanen!”

<sup>19</sup> Ne mibedasan dan ke ulu rin, ne mibpengilevan dan sikandin, ne midlangkeb dan diyà te etuvangan din su uvag kun se ebpergerap dan.

<sup>20</sup> Guna su neipus ke kedsumpalit kandin, ne midluung dan en ke merihà ne impelelembung kandin ne inseluub dan ded ke kandin ne belegkas ne mid-ewit dan en sikandin diyà te ebpelensangan kandin.

*Inlansang si Hisus Diyà te Pinebelavag ne Kayu*

*(Mateo 27:32-44; Lucas 23:26-43; Juan 19:17-27)*

<sup>21</sup> Guna su riyà dan en te ralan te kebpeneheewita ran en kandin, ne ruen etew ne ed-ingaranan ki Simon ne nesinuhung dan ne iyan pà ebpekeuma ne riyà ebpuun te taneb, ne mibpehes dan te ibpetiang ke pinebelevag ne kayu ne edtiangen ni Hisus. (Si Simon ini ne riyà ebpuun te Sirini, ke amey ni Alejandro ki Rufo.)

<sup>22</sup> Ne mid-ewit dan en si Hisus diyà te rapit ne ed-ingaranan te Gulguta, ne iyan din meana ne "Tulan te Ulu."

<sup>23</sup> Ne ketà ne ebpeinumén dan perem si Hisus te binu ne midsewuhan dan te vawì ne ed-ingaranan te mira, ugaid ne warà din inuma.

<sup>24</sup> Arà dà ne inlansang dan en si Hisus diyà te pinebelavag ne kayu. Neipus dan ne mibunutbunutan dan ke velegkas din ke entei se ebpekegkemuney kandan.

<sup>25</sup> Ne ketà ne menge siyew en ne uras te keseleman te kedlansang dan ki Hisus.

<sup>26</sup> Ne insurat dan ke in-isuhat dan ne kewagib ki Hisus se egkahi te, "Ke ratù te menge Hudiyanen."

<sup>27</sup> Ne ruén deruwa ne tulisan ne inlansang dan dema duma ki Hisus, seveka kayi te egkekewanan din, ne seveka kayi te egkehiwang din. [

<sup>28</sup> Ini se ned-ulaula apey metuman ke impesurat ne Lalag te Eleteala rengan ne egkahi te, "Iyan dan pegitungan ne ruma sikandin te menge tulisan." ]

<sup>29</sup> Ke menge etew ne midsahad kandin ne mibpondungkádungkà dan te ked-undaunda ran kandin se egkahi te, "Na, endei embe ke migkahi nu ne edrundusen nu ini se Nekebpuru ne Valey te Eleteala, ne ketà te tetelu ne hewii ne igkepeitindég nu manen te vehu pà?"

<sup>30</sup> Na ed-intengan ta kun imbe ke ruén ketehel nu, ibpelihaun nu ke hinawa nu ne pemenaug ke en keninyan te midlensangan keykew."

<sup>31</sup> Ne iring ded dema ketà ke ked-undaunda rut te menge mepurù te terebpepengesa wey ke menge meyerù te penduan se ebpelelelahey ran te, "Nekepelihaun kun sikandin te menge ruma rin, ugaid ne ke kandin en ne hinawa ne kenà din egkegaga.

<sup>32</sup> Na kun be imbe embiya sikuna ke Impasad te Eleteala ne Ebperetuen, ke ratù te menge Hudiyanen, ne pemenaug ke en keninyan te midlensangan keykew su apey key ebpekeperetiyyaya."

Ne misan dema ke deruwa ne inlansang diyà te idsengeriveluyà din ne elin en ne ed-undaunda.

### *Ke Kinepatey Ni Hisus*

*(Mateo 27:45-56; Lucas 23:44-49; Juan 19:28-30)*

<sup>33</sup> Ketà te neudtu en ke andew ne mibmerusirem en ke tivuuk ne dunya lusud te tetelu ne uras.

<sup>34</sup> Guna su tetelu en ne uras ne migkuleyi si Hisus te merahing se egkahi te, "Ili, ili, lama se baktani?" Ne iyan din meana se, "Ey, Eleteala ku, Eleteala ku, meambe ke mid-ewaan a nu?"

<sup>35</sup> Duen menge etew ketà ne nekerineg kandin ne migkahi te, "Pemineha niyu ma su ebpengumawen din en si Elias."

<sup>36</sup> Senge etew ketà se midahewrahew migkuwa kayi te in-ered te tebà ne midtiyuk din en te deisek ne terekayu. Ne ketà ne insugkar din diyà te bèbà ni Hisus su apey rin meesep ne midlalag, sikandin kayi te menge ruma rin te, "Na ed-intengan tew ve ke edlepew si Elias se ebpeawà kandin ketà."

<sup>37</sup> Ne migkuleyi en maa si Hisus te merahing ne nependusan en sikandin te hinawa.

<sup>38</sup> Diyà te Nekebpuru ne Valey te Eleteala ne ruén mekepal ne sapat ne impehelet dut te insivey ne ed-ubpaan te Eleteala, ne ketà te kinepatey ni Hisus ne nevindas kayi te luuk ini igenat te divavew taman te diralem.

<sup>39</sup> Ne ini se kepitan te sundaru ne ed-it-itindég kayi te egkesineruwan ni Hisus, ne guna su nerineg din ke kegkuleyi ni Hisus wey nekita rin ke ned-ulaula te kebpatey en ni Hisus ne nekekahi sikandin te, "Benar ini ne Anak te Eleteala!"

<sup>40</sup> Ne ruén dema ketà menge meritan ne nekeitindég diyà te malù meriyù su edtengteng ki Hisus, elin ketà si Maria Magdalena, si Salumi, wey si Maria ke iney ni Jose ki Santiago ke ari rin.

<sup>41</sup> Mibpekiduma ran en ki Hisus su edtavang dan kandan gewii te riyà dan pà te Geliliya. Ne ruén pà ruma ne menge meritan ne mibpekiduma kandan te kebpendiya dan en te Hirusalim.

### *Ke Kineleveng ki Hisus*

*(Mateo 27:57-61; Lucas 23:50-56; Juan 19:38-42)*

<sup>42</sup> Ne ini se kinepatey ni Hisus ne meapun te Diyemaat ne ini ke hewii te menge Hudiyanen te kebpenehana ran dut te Hewii ne Id-imeley ran. Guna su malù en edsanlep ke andew, ne nekeuma en si Jose ke ebpuun te Eremitiya.

<sup>43</sup> Senge etew ini ne egkeedatan dut te menge egkeunutan te menge Hudiyanen, ne seveka red dema sikandin ne ebpenareng dut te kegketuman te impesurat ne Lalag te

Eleteala mekeatag te kedetui rin te menge etew kayi te ampew te dunya. Mibpengarew en se ebpendiyà te ki Pilatu ne mibuyù din ke vangkey ni Hisus.

<sup>44</sup> Guna su mibuyù en ni Jose ke vangkey ni Hisus, ne neinuini si Pilatu su kunean din ke warà pà minatey si Hisus. Ketà ne midtawag din ke mepurù te menge sundaru su id-insà din ke minatey en si Hisus.

<sup>45</sup> Guna su nerineg ni Pilatu ke migkahi rut te mepurù te sundaru, ne migkehiyan din en si Jose te egkepakey ne egkuan din ke vangkey ni Hisus.

<sup>46</sup> Arà dà ne mid-ipanew en si Jose su ebpemasa te meputi ne saput ne ibukus dut te bangkey ni Hisus te kedleveng kandin, ne migkuwa rin en ke vangkey ne mibukusan din en ketà te saput. Nepasad din ne inleveng din en ketà te imbangbang ne leveng diyà te dempilas. Dutun ne ruen dekelà ne vatu ne midlilid din ne inlekeb ketà te bengawan te leveng.

<sup>47</sup> Ne nekita en ni Maria Magdalena wey si Maria ke iney ni Jose ke langun ne mid-ulaula rin wey endei rin inleveng ke bangkey ni Hisus.

## 16

### *Ke Kinekevanew ni Hisus*

*(Mateo 28:1-8; Lucas 24:1-12; Juan 20:1-10)*

<sup>1</sup> Guna su neipus en ke Hewii te Id-imeley ne mibpemasa ensi Maria Magdalena, si Salumi, wey si Maria ke iney ni Santiago te periyemut su ebpendiyà dan te midlevengan ki Hisus su ebperiyemutan dan ke lawa rin.

<sup>2</sup> Mesmeselem pà te hewii ne Akad ne mibpendiyà dan en te midlevengan ki Hisus.

<sup>3</sup> Gewii ran te ed-ip-ipanew ne mibpengasak dan te, "Engkey se ebpeliliren tew rut te batu ne inlekeb dut te leveng din?"

<sup>4</sup> (Su dekelà nevenar ini se vatu.)

Nekeuma ran ne nekita ran te nelilid en ke vatu ketà.

<sup>5</sup> Ne mid-awuk dan en ne iyan dan nekita ne menguwed ne meama ne mibevelegkas te meputi ne riyà mebpinu te egkekewanan dan, ne nengeandek dan.

<sup>6</sup> Ne migkahi en ini se suluhuen te, "Kenà kew meandek!" ke sikandin. "Ebpemengà kew ki Hisus ne ebpuun diyà te Nasarit ne inlansang dan te pinebelevag ne kayu, ugaid ne warè en kayi su nevanew en. Intengi niyu ma ini se midtehuan dan kandin.

<sup>7</sup> Na, ipanew kew en ne penudtula niyu ve riyà te menge edumdumaan din abpeg ki Pedro te, 'Si Hisus ne ed-una en keniyu riyà te Geliliya, ne riyà niyu en egkekita sikandin su arà ke impasad din rengan keniyu.' "

<sup>8</sup> Arà dà ne midlihwang dan en se ebpelelahuy su nekiyab se atey ran te kegkeandek dan. Ne warà dan kegkehiya te misan entei en su neandek dan.

### *KE RAAN NE KETEPUSAN*

### *Mibpekita si Hisus ki Maria Magdalena*

*(Mateo 28:9-10; Juan 20:11-18)*

[  
<sup>9</sup> Guna su nevanew en si Hisus ne mesmeselem pà te hewii ne Akad, ne riyà mid-una mibpekita sikandin te ki Maria Magdalena. Ini ke meritan ne midsuukan te pitu ne vusew ne midsegseg ni Hisus dangan.

<sup>10</sup> Nekita rà ni Maria ne mid-ipanew sikandin su ebayaan din ke menge edumdumaan ni Hisus. Neuma rin sikandan ne ebpeninehew ran te kegkemutu ran te kinepatey ni Hisus.

<sup>11</sup> Guna su mibpenudtulan dan en ni Maria te nekita rin en si Hisus su nevanew en, ne warà dan mepperetiya.

### *Mibpekita si Hisus Dut te Deruwa ne Edumdumaan Din*

*(Lucas 24:13-35)*

<sup>12</sup> Neipus ini se kinepekita ni Hisus ki Maria Magdalena, ne mibpekita maa sikandin te nesalin ke paras din diyà dut te deruwa ne edumdumaan din gewii te ed-ipanew ran se ebpendiyà te taneb.

<sup>13</sup> Ne midlived dan kayi te Hirusalim su ebpenudtulan dan ke menge ruma ran te nekita ran en si Hisus, ugaid ne warà dan mibperetiya.

### *Mibpekita si Hisus Dut te Sepulù wey Seveka ne Edumdumaan Din*

*(Mateo 28:16-20; Lucas 24:36-49; Juan 20:19-23; Nenged-ulaula 1:6-8)*

<sup>14</sup> Ketepusan be ne mibpekita si Hisus dut te sepulù wey seveka ne edumdumaan din gewii te egkaan dan. Midseweyan din sikandan su kurang ke sarig dan ne merehen te hinawa ran te kebperetiyaya rut te lalag te menge etew ne nekekita kandin te nevanew en.

<sup>15</sup> Migkehiyan din sikandan te, "Pendiya kew te langun ne menge inged kayi te ampew te dunya ne ibpesabut niyu ke Meupiya ne Tudtul mekeatag kediey riyà te langun ne menusiya.

<sup>16</sup> Ne piya engkey ne etew ne ebperetiyaya wey ebpebunyang dan ne ebpeketimà te umur ne kenà edtaman, ugaid ne ke etew ne kenà ebperetiyaya ne ebetetayan te salà te kepatey.

<sup>17</sup> Ne ke menge etew ne ebperetiyaya kediey ne egkevehayan ku te gehem su apey ran ebpekevaal te mekegeyip. Su kayi te gehem ne ibehey ku kandan ne ebpekegaga ran ne ebpenegseg te menge vusew, ne ebpekelalag dan te menge lalag ne kenà kandan ne kinehiyen;

<sup>18</sup> ne embiya ebpekehawed dan te uled etawa ebpekeinum dan te ed-ilu, ne kenà dan egkekeiran; ne edsamsam dan te ebpenderaru ne ebpengeulian."

<sup>19</sup> Guna su nekeipus si Hisus ke Kerenan se edlalag kayi te menge edumdumaan din ne nevatun en diyà te langit, ne mibpinuu en diyà te egkekewanan te Eleteala.

<sup>20</sup> Ne mid-ipanew en dema ini se menge edumdumaan din se ebpesabut dut te Meupiya ne Tudtul mekeatag kandin diyà te langun ne menge inged. Ne Eleteala se midtavang kandan su nekevaal dan te menge mekegeyip apey mekeperetiyaya ke menge etew te benar ini se ibpesabut dan.]

*RUMA PÀ NE RAAN NE KETEPUSAN*

[ (9) Mibpendiyà ke menge meritan te enki Pedro ne intarem dan ke langun ne nerineg dan. (10) Neipus ini ne pineipanew ni Hisus ke menge edumdumaan din egenat te edsilaan ne ebpendiyà te edsenlepan su ebpesabut dan te berekat ne lalag mekeatag te umur ne warà edtaman din.]



## **Ke Meupiya ne Tudtul Mekeatag ki Hisu Kristu ne Miguhud ni Lucas**

<sup>1</sup> Diyà te ki Teofilo:

Merakel en se menge etew ne migeram midsurat te guhud mekeatag te ned-ulaula ni Hisus kayi te kenami.

<sup>2</sup> Iyan dan insurat ke nengeguhud kandan dut te menge etew ne nekekita en iya kayi te ned-ulaula igenat te rudsuan wey iyan dan dema mibpesabut te Lalag te Eleteala.

<sup>3</sup> Na Teofilo, langun ini ne ned-ulaula ne midsusi ku up-upiani, tembù be netahù te itungan ku se edsuratan ku sikuna kayi te ned-ulaula endei se kegkeatur din.

<sup>4</sup> Idsurat ku ini su apey nu metueni en iya te benar ini langun se impenurù keykew.

### *Impesabut Ke Ked-anak Ki Juan ne Ebpembunyag*

<sup>5</sup> Iyan ku egkepengguhud ne timpu te iyan pà edatù si Hirudis dut te pruvinsiya te Hudiya ne ruen etew ketà ne ed-ingaranan ki Zacarias. Si Zacarias ini ne senge etew ne terebpepengesa rut te kevuwaran te keep-epuan dan dengan ne ed-ingaranan ki Ebiha su ke kevuwaran te Ebiha se menge terebpepengesa te Eleteala. Iyan din esawa ne ed-ingaranan ki Elisabet ne kevuwaran te bansa te Arun ne terebpepengesa rema te Eleteala.

<sup>6</sup> Ne ini se senge tiwelayan ne metidtu se hinawa ran diyà te etuvangan te Eleteala ne warà igkesawey kandan dut te kedtuman dan te langun ne suhù wey penduan te Eleteala.

<sup>7</sup> Ugaid ne warà anak dan su kenà ed-anak si Elisabet su elin dan en nelukes.

<sup>8</sup> Ne neuma en ke menge gewii te iyan ebpekepengesa ne si Zacarias wey ke menge ruma rin ne kevuwaran ni Ebiha diyà te Nekebpuru ne Valey te Eleteala.

<sup>9</sup> Na duen betasan dut te menge terebpepengesa te Eleteala ne engkey ki ngaran se egemew ne sikandin se edlusud diyà te Nekebpuru ne Valey te Eleteala su edtutung te rukut. Ne arà ne hewii ne ki Zacarias se migemew ne midlusud en sikandin diyà te Nekebpuru ne Valey te Eleteala su edtutung te rukut.

<sup>10</sup> Ne gewii rin te edtutung te rukut kayi te lusud, ne riyà te luwal ebpengeningeni ke merakel ne etew.

<sup>11</sup> Kemulu pà ne ed-ulaula si Zacarias kayi ne ruen suluhuen te Eleteala ne mibpekita kandin, kayi nekeitindeg te rapit te egkekewanan dut te edtutungan te rukut.

<sup>12</sup> Nekita rà ni Zacarias ne netekawen sikandin ne neandek-andek nevenar.

<sup>13</sup> Ugaid ne migkahi ke suluhuen te Eleteala te, "Kenà ka meandek, Zacarias, su nerineg te Eleteala ke pengeningeni nu ne ke esawa nu ne ebpekeanak te meama, ne iyan nu iingaran ne si Juan.

<sup>14</sup> Egkehalew ka nevenar kandin, ne kenà ketà dà taman su kehelawan dema dut te ruma ne etew ketà te ked-enaka kandin.

<sup>15</sup> Su egkevaluy sikandin ne mepurù ne etew diyà te etuvangan te Eleteala. Kenà sikandin ed-inum te piya engkey ne ebpeketeveveg ne ed-inumen. Ne misan igenat te kenà pà sikandin id-anak ne edlumunan en sikandin dut te Kedesenan ne Ebpetuntul te Menusiya.

<sup>16</sup> Ne kayi te kebpenerù din ne ebpekepelilived te merakel ne Hudiyanen riyà te Kerenan dan ne Eleteala ne andang ne ebpengeningenian dan.

<sup>17</sup> Ini se anak nu si Juan," ke se suluhuen te Eleteala, "ne edsuhuen te Eleteala ne ibpeuna te ebpeketuenan te mehaan ne ebpekeuma ke Kerenan. Ne ebhayan sikandin te baher wey edlumunan dut te Kedesenan ne Ebpetuntul te Menusiya iring ki Elias ke etew ne mibpelambas te Lalag te Eleteala rengan. Kayi ebpuun te kebpenerù ni Juan ne ebpemeked-ulitey ke hinawa rut te menge amey wey ke menge anak. Ne ke menge etew ne warà mepperumaruma te suhù te Eleteala ne ebpekedsendit ne arà pà ne ebpekeulit te metidtu ne itungan. Ne kayi te penurù din ne ebpekepenehana ke menge etew dut te kebpokeuma ni Hisus ke Kerenan."

<sup>18</sup> Migkahi si Zacarias diyà te suluhuen te Eleteala te, "Maan engkey ve se idtuus ku te benar ini se migkahi nu? Su siaken ne lukes en, ne lukes en dema ke esawa ku."

<sup>19</sup> Migkahi ke suluhuen te Eleteala maa te, "Siak imbe si Gabriel ke suluhuen te Eleteala ne layun diyà te etuvangan din. Sikandin iya se midsuhù kedì su ebpeketuenan keykew ini se meupiya ne egked-ulaula.

<sup>20</sup> Ne warà ke ma mibpehimbenar dut te migkahi ku, Zacarias," ke se suluhuen te Eleteala, "ugaid ne egkeuma ke enget ne hewii ne egketuman imbe iya. Na geina te warà ka mibpehimbenar, ne egkeemew ka taman te egked-ulaula ini se migkahi ku."

<sup>21</sup> Ne ini se menge etew ne mibpulang midtahad ki Zacarias diyà te luwal, ne neinuini ran su malù neuhet sikandin diyà te lusud te Nekebpuru ne Valey te Eleteala.

<sup>22</sup> Guna su midlihawang en si Zacarias ne kenà en ebpekehahi riyà te menge etew su ebpenguyew-uyew rè be ne ketà ne neemew en sikandin. Ne netuenan dut te menge etew te ruen en impekita kandin te Eleteala diyà te lusud te valey te Eleteala.

<sup>23</sup> Neipus ni Zacarias ke kandin ne hewii te egelevék diyà te Nekebpuru ne Valey te Eleteala ne mid-uli en.

<sup>24</sup> Warà meuhet ne mibpenhipuun en ke esawa ni Zacarias, ne nekedlelima ne vulan ne mid-ubpaubpà sikandin te valey.

<sup>25</sup> "Ne ini pè be ne ingkeyru a te Eleteala su ebpekeanak ad," ke sikandin. "Ne ebpekeengked en ke menge etew ne edtekudi kedì."

#### *Impesabut ke Ked-anak Ki Hisus*

<sup>26</sup> Guna su ikeenem en ne vulan te kehingeyan dut te esawa ni Zacarias ne midsuhù te Eleteala ke suluhuen din ne si Gabriel diyà te inged ne Nesarit lusud te Geliliya.

<sup>27</sup> Iyan mibpeveyaan kandin ne riyà te senge etew ne raha ne nepesaran en se ed-esawaen te kenakan ne ed-ingeranan ki Jose, ke kevuwaran dut te ratù dan dengan ne si David.

<sup>28</sup> Ebmeuma ke suluhuen te Eleteala riyà te ki Maria ne migkahi en te, "Na kehalew ka, Maria! Bebegian ka ne etew su kayi en ke Eleteala te kenikew."

<sup>29</sup> Guna su nerineg ni Maria ke lalag dut te suluhuen te Eleteala ne neliveg nevenar sikandin, ne mibpegpegitung din te engkey vuwa se meana rin.

<sup>30</sup> Ne migkahi ke suluhuen te Eleteala kandin te, "Kenà ka meandek, Maria, su midtuvaran ka te Eleteala.

<sup>31</sup> Ebmehingey ka ne ed-anak ka te meama ne iyan nu iingeran ne si Hisus.

<sup>32</sup> Ebmepurù sikandin ne iyan duma ne id-umew kandin ne Anak en iya te Eleteala ne pinekemepurù te langun. Iyan ebpepurù kandin ne Eleteala," ke se suluhuen, "su ibehey rin kandin ke edetuan dut te apù din dengan ne si David.

<sup>33</sup> Ne ini se anak nu ne edatù te langun ne menge Hudiyanen, ke menge kevuwaran ni Jacob. Uya, ini se kegkeratù din ne warà ketepusan din."

<sup>34</sup> Migkahi si Maria riyà te suluhuen te, "Egkemenumenu be buwa ini? Su siaken ne matag nepasad se selengguni ne warà key pà mepakey ketà te meama."

<sup>35</sup> Migkahi maa ke suluhuen te Eleteala te, "Iyan ma edalandalan keykew ke Kedeseenan ne Ebpetuntul te Menusiya, ne ke gehem te Eleteala ne ini en te keykew. Tembù be ini se igkeanak nu ne berekat ne vatà ne iyan id-ingaran kandin ke Anak te Eleteala.

<sup>36</sup> Ne kenà ini rà se tudtul ku," ke se suluhuen te Eleteala, "su arà se ayà nu si Elisabet ne kenà kun ed-anak ne ikeenem din en ne vulan te kehingeyan din misan lukes en sikandin.

<sup>37</sup> Su embiya Eleteala, ne egkeveelan din ke misan engkey en."

<sup>38</sup> Nerineg dà ni Maria ne migkahi en te, "Berekat ne ed-ul-ulaan din en ini se migkahi nu kayi te kedì. Su siaken, ne Eleteala se ebayàbayà kedì." Arà dà ne mid-ewean en dut te suluhuen te Eleteala si Maria.

#### *Mibpendiyà si Maria Diyà te ki Elisabet*

<sup>39</sup> Warà meuhet ne mibpenines si Maria ne migaangaan migenat su ebpendiyà te senge inged diyà te buvungan lusud te Hudiya.

<sup>40</sup> Ebmeuma si Maria riyà te valey en ni Zacarias ki Elisabet ne mibpenehiat sikandin ki Elisabet.

<sup>41</sup> Guna su nerineg ni Elisabet ke penehiat ni Maria ne midwaleng ke vatà kayi te hetek din. Ne ke Kedeseenan ne Ebpetuntul te Menusiya se midlumun ki Elisabet.

<sup>42</sup> Ne ruen impekahi rin ki Maria ne mibmerahing ke suwara rin te nekepemensag sikandin su kegkehalew rin se egkahi te, "Warà idsan nu ne meritan ne midtuvaran te Eleteala ne iring kayi! Ne engketà ded se kedtuvari dut te egkeanak nu!

<sup>43</sup> Maan buwa ke midexkelà a te hinawa te Eleteala se iyan en ebpeengkayì te kedì ke iney rut te Kerenan ku?

<sup>44</sup> Su nerineg ku rà sikew se ebpenehiat ne midlehuwat te kegkehalew rin ini se kayi te hetek ku.

<sup>45</sup> Tembù be midtuvaran ka, Maria," ke si Elisabet, "su mibperetiyaya ka te egketuman iya ke impesabut kenikew dut te suluhuen te Eleteala."

*Ke Bayuk ni Maria te Edeyù te Eleteala*

- <sup>46</sup> Migkahi si Maria te,  
 “Mesarig se kedeyù ku rut te Kerenan ku,  
<sup>47</sup> ne dekelà se kegkehalew ku  
 dut te Eleteala ne ebpeleyu kedi;  
<sup>48</sup> Su mibpemili a nikandin ne edtuvaran din,  
 misan engkayi te kevevaan a ne edsugsuhuen din.  
 Igenat guntaani ne ini se kevuwaran,  
 ne idtitinudtulà dan te siaken kun  
 se midtuvaran te Eleteala  
 dut te langun ne memeritan,  
<sup>49</sup> su mekegeyip ke menge mid-ulaula  
 dut te Eleteala kediey.  
 Su Eleteala ne mekegegehem  
 ne warà repeng din ke ngaran din.  
<sup>50</sup> Igenat dut te pehaney ne kevuwaran  
 taman te ketepusan ne kevuwaran,  
 ne ibpekita rin ke kegkeyru rin  
 dut te langun ne ebperumaruma kandin.  
<sup>51</sup> Impekita rin ke gehem din dut te mid-ulaula rin,  
 ne miburehey rin ke menge etew ne mepereyù  
 su apay kenà dan en metuman ke intahù te itungan dan.  
<sup>52</sup> Ruen menge ratù ne metehel ne mibpekevavà din,  
 ne ke mepeembavà ne menge etew ne mibpekepurù din.  
<sup>53</sup> Ke menge etew ne layun en neirui,  
 ne mibehayan te Eleteala te kurang dan;  
 ugaid ke menge etew ne kewasa,  
 ne pineuli din te kuyaskuyas.  
<sup>54-55</sup> Warà melipati te Eleteala ke pasad din dengan  
 dut te keep-epuan tew si Abraham  
 wey ke menge kevuwaran din.  
 Su midtevangan kiyu rin,  
 ini se menge sugsuuhuen din  
 ne kevuwaran ni Israyil.  
 Egkeyruwan kiyu rin dema  
 te warà edtemanan din,” ke si Maria,  
 “ini se menge kevuwaran ni Abraham ne nepemili din.”  
<sup>56</sup> Neketetelu buwa ne vulan se ked-ubpà ni Maria riyà te engki Elisabet ne arà pà  
 ne mid-uli sikandin.

*Ke Kineanak Ki Juan Ke Ebpembunyang*

- <sup>57</sup> Neuma ke hewii ne mid-anak si Elisabet ne iyan din anak ne meama.  
<sup>58</sup> Guna su nering dut te menge etew riyà te menge valey ne uvey ran wey ke menge  
 suled dan ini se keupiya te Eleteala ki Elisabet ne nengehalew ran dema.  
<sup>59</sup> Neuma ke ikewalu ne hewii ne miburun dan kayi te valey su edtumanen dan ini se  
 betasan dan te menge Hudiyane te ed-etus. Iyan dan perem id-ingaran kayi te vatà ne  
 si Zacarias, idsangey red dut te amey rin,  
<sup>60</sup> ugaid ne migkahi ke iney rin te, “Kenà egkepakey! Si Juan se ngaran din!”  
<sup>61</sup> Ne migkahi ran kayi te ki Elisabet te, “Ini se id-ingaran nu ne warà suled nu ne  
 egkesangayan.”  
<sup>62</sup> Ne mid-uyawan dan ke amey rin ke engkey se kandin ne id-ingaran.  
<sup>63</sup> Mid-uyew rema si Zacarias te ebpevehey sikandin te egkesuratan te ngaran, ne iyan  
 din insurat se “Si Juan se ngaran din.” Guna su insurat din arà ne neinuinu nevenar ke  
 menge etew.  
<sup>64</sup> Arà dà iya ne nekelalag en si Zacarias ne nereyù din ke Eleteala.  
<sup>65</sup> Langun dut te ruma rin ne neandek, ne nekeeneb en ke tudtul dan dut te langun  
 ne menge etew ne mid-ubpà ketà te buvungan lusud te Hudiya.  
<sup>66</sup> Langun te nekerineg ne neketahù te itungan dan ne mid-insà te, “Engkey buwa se  
 ebuwatan kayi te batà ini?” Su mepayag nevenar se Eleteala se mibpengelintau kayi te  
 vatà.

*Ke Bayuk ni Zacarias*

<sup>67</sup> Midlumunan dut te Kedesenan ne Ebpetuntul te Menusiyà si Zacarias ne ini se impelambas din ne lalag din, ke sikandin te,

<sup>68</sup> “Edeyù kiyu te Kerenan, ke Eleteala tew te menge kevuwaran ni Israyil. Su miþpengkayi sikandin te edtavang dut te sikitew ne menge etew rin, ne ebehey kenitew te kebpekepeleyu kenitew.

<sup>69</sup> Ibpepengkayi rin en te keytew arà se mekegehem ne ebpelehaun keytew, ne kayi egketuntun te kevuwaran dut te edsugsuhuen din ne ratù tew rengan ne si David.

<sup>70</sup> Ini ve ke migkahi rin rengan impepeyayà dut te menge etew ne ebpelambas te lalag din.

<sup>71</sup> Su migkahi rin te ibpelihawang kiyu rut te menge kunterà tew wey riyà te edtingkungan te palad dut te menge etew ne egkeepes kenitew.

<sup>72</sup> Migkahi rin dema te igkeyru rin ke menge keep-epuan tew, ne kenà din edlipatan ke pasad din kandan dengan.

<sup>73</sup> Mevaher ke pasad din dengan dut te keep-epuan tew ne si Abraham,

<sup>74</sup> su impasad din te ibpeleyu kiyu rut te palad te menge kunterà tew, su apey edtuman kiyu te kiyug din te warà kegkeandek,

<sup>75</sup> su apey egkelunsey se ked-erapa tew kandin wey metidtu kiyu riyà te etuvangan din taman te biviyag kiyu pà.”

Ne migkahi maa si Zacarias kayi te anak din te,

<sup>76</sup> “Ne sikew ini ne anak ku, iyan idtawag keykew ne ebpelambas te Lalag te Eleteala ne warà repeng din.

Su edsuhuen ka nikandin te ibpeuna dut te Kerenan tew, su ebpeketueanan te menge etew te ebpenehana rut te kebpekeuma rin.

<sup>77</sup> Sikuna ke ebpesabut te menge kevuwaran ni Israyil te igkepeleyu dan dut te kedusai kandan

embiya ebuyù dan te Eleteala te kebpeseudad te menge salà dan.

<sup>78</sup> Su ke Eleteala tew ne iiruwen wey melimù. Ne ini se kebpeleyu rin kenitew te kerusaan tew, ne iring te kedsilà te andew ne egkesilaan ke kerusireman.

<sup>79</sup> Ebpekereyahen te Eleteala ke kerusireman tew su apey kenà kiyu en ed-elungen te kepepatey; su apey langun tew ne melintad se kegingginawa.”

<sup>80</sup> Ne nekeiseg-iseg en ke kerekelà te anak en ni Zacarias ne mid-iseg en dema ke ketau rin mekeatag te Eleteala. Guna su dekelà en sikandin ne miþpendiyan en te tanà ne kenà egkeubpaan te etew, ne ketà mid-ubpà taman te neuma ke hewii te kebpenurù din te menge kevuwaran ni Israyil mekeatag te Lalag te Eleteala.

## 2

*Ke Kineanak ki Hisus  
(Mateo 1:18-25)*

<sup>1</sup> Guna su iyan pà mepurù si Agustu rut te inged ne Ruma ne ruen suhù din te langun te menge etew ne ed-ubpà kayi te menge inged ne egkekemalan din ne ebpesurat te ngaran dan.

<sup>2</sup> Ini pà ke neuna ne kebpesurat dan te ngaran dan gewii te iyan midtendù ni Agustù ne gubinedur diyà te inged ne Siriya ne si Cirenio.

<sup>3</sup> Ne langun ne menge etew ne mibpendiyà te uman inged ne mid-enakan kandan su ebpesurat te ngaran din.

<sup>4</sup> Tembù be mibpendiyà si Jose kayi ebpuun te inged ne Nesarit lusud te Geliliya diyà te inged ne Bitlihim lusud te Hudiya su ini se inged ne Bitlihim ke mid-enakan dut te keep-epuan din ne datù dengan, si David.

<sup>5</sup> Ne miduma ni Jose si Maria ini se raha ne nepenelenggunian din en su ebpesurat si Jose te ngaran din. Ne edrendayan en si Maria.

<sup>6</sup> Guna su diyan dan en te Bitlihim ne neuma en ke hewii te ked-anak din.

<sup>7</sup> Ne iyan din anak ne meama ne panganey rin pà ini. Ne midsemputan din ini se vatà ne impeirehà din diyà te ebpekeenan te kudà su warà neirehaan dan diyà te valey ne ed-eranan su nepengkeg en te etew.

*Mibpekita ke Menge Suluhuen te Eleteala te Menge Edtuganur te Menge Bilibili*

<sup>8</sup> Ne arà ne kerukileman ne ruen menge etew ne ebantey te menge bilibili ran diyà te ebpemetebtavan dan uvey te Bitlihim.

<sup>9</sup> Ne netekew se ruen mibpekita kandan ne suluhuen te Kerenan riyà ebpuun te langit, ne mibpesilaan te Kerenan sikandan te raman din. Ne nengeandek dan nevenar.

<sup>10</sup> Ne migkahi ke suluhuen kayi te kandan te, "Kenà kew meandek! Su midsuhù a ini te ebpepenudtulen keniyu te meupiya ne tudtul ne ebpekehalew te langun ne etew.

<sup>11</sup> Su ini ne kerukileman diyà te Bitlihim ke inged ni David rengan ne in-anak ke ebpeleyu keniyu dut te salà niyu. Su sikandin si Kristo ke Kerenan ne Impasad te Eleteala rengan ne Ebperetuen te langun.

<sup>12</sup> Ini se idtuus niyu te benar ini se migkahi ku keniyu te ebpekeuma kew riyà ne egkekita niyu ini se vatà ne midsemputan ne impeirehà riyà te ebpekeenan te kudà."

<sup>13</sup> Ne segugunee ne ruen mibpekita ne ruma rut te suluhuen ne medmerakel riyà ebpuun te langit ne mideyù dan ke Eleteala se egkahi te,

<sup>14</sup> "Edeyù kiyu te Eleteala

riyà te lesang te langit.

Ne kayi te ampew te dunya

ne mebmelintad ke hinawa rut te menge etew

ne ebpekesuhat te hinawa rin."

<sup>15</sup> Guna su mid-uli en diyà te langit ini se menge suluhuen ne mibpelelehahey ke menge ebantey te bilibili te, "Kuwa kew en su ebpendiyà kiyu te Bitlihim su apey tew egkekita ini se ned-ulaula ne mibpekietuanan te Kerenan keytew."

<sup>16</sup> Arà dà ne midahewrahew ran en mid-ipanew ne netuen dan en si Maria ki Jose ne nekita ran en ini se vatà ne impeirehà diyà te ebpekeenan te kudà. Ne nekita ran dema si Maria wey si Jose ketà.

<sup>17</sup> Guna su nekita en kayi te ebantey te bilibili ini se vatà ne impenudtul dan en kandan ke migkahi rut te suluhuen mekeatag kayi te vatà.

<sup>18</sup> Langun te nekerineg kayi te tudtul dut te ebantey te bilibili ne nengegeyip dan dut te nerineg dan.

<sup>19</sup> Ne si Maria, ne kenà egkeawà te itungan din ini se tudtul dan su mibpegegitung din up-upiani.

<sup>20</sup> Ne ini se ebantey te bilibili, ne mid-uli en. Ne wey ran mideyù te Eleteala rut te langun ne nerineg dan wey nekita ran su netuman en langun ke impenudtul kandan dut te suluhuen te Eleteala.

*Mid-ingeran an ke Vatà ki Hisus*

<sup>21</sup> Guna su neume en ke ikewal ne hewii ne mid-etusan dan en ini se vatà, su arà ke betasan te menge Hudiyanen, ne mid-ingaranan dan en ki Hisus. Su ini ke ngaran ne impenudtul ki Maria rut te suluhuen te Eleteala te misan warà pà sikandin mibpengeraring.

*Intepeny si Hisus Dut te Lukes Din Diyà te Nekebpuru ne Valey te Eleteala*

<sup>22</sup> Neuma ke hewii ne edtumanen ni Jose ki Maria ini se betasan dan te ebehey te ibpelengesa riyà te Nekebpuru ne Valey te Eleteala riyà te Hirusalim su edumaan dan ke penduan ne intahak ni Moises rengan mekeatag te meritan ne behu pà ne mid-anak. Ne mibpeneheewit dan ke vatà diyà te Hirusalim su apey ran idtepeney te Eleteala.

<sup>23</sup> Su edtumanen dan ke penduan ne impesurat te Eleteala rengan ne egkahi te, "Langun ne panganey ne meama ne idtepeney niyu te Eleteala."

<sup>24</sup> Ne ibehey ran dema ke ibpelengesa ne nekahi rut te penduan te Kerenan ne “deruwa ne timan ne limuken etawa deruwa ne timan ne melepati.”

<sup>25</sup> Duen senge etew ne meama ne ed-ubpà ketà te Hirusalim ne ed-ingaranan ki Simeon. Metidtu se ulaula rin wey in-amin din ke hinawa rin te egelevék te Eleteala. Ne ebpenemati sikandin ke keenu ibpeliyu te Eleteala ke menge etew rin ne menge kevuwaran ni Israyil. Ne ke Kedesenan ne Ebpetuntul ne Menusiyà ne midlumun en ki Simeon.

<sup>26</sup> Ne daan en ne mibpeketuenan kandin dut te Kedesenan ne Ebpetuntul te Menusiyà te kenà pà ebpatéy sikandin taman te kenà din mekita ke Mesiyas arà se Impasad te Eleteala ne Kerenan dengan ne Ebperetuen te langun.

<sup>27</sup> Ketà te hewii ne mibpeneheewit dut te lukes din si Hisus te edlusud kayi te Nekebpuru ne Valey te Eleteala su edtumanen ini se nekahi rut te penduan ne ketà en te lusud si Simeon su impelusud sikandin dut te Kedesenan ne Ebpetuntul te Menusiyà.

<sup>28</sup> Ne midsepipi ni Simeon ke vatà ne mideyù en te Eleteala se egkahi te,

<sup>29</sup> “Is Kerenan, midtuman nu en iya

ke impasad nu kedi.

Ne misan keenu nu ebugkuta se niyawa ku

ne egkepakey en,

su mibmelintad en se hinawa ku.

<sup>30</sup> Su ne bentangan en iya kayi te mata ku

ini se midtendù nu ne ebpeliyu kenami

rut te keberedusaan dey.

<sup>31</sup> Su mibpenehana nu sikandin

su apey langun ne menge bansa ne ebpekekita.

<sup>32</sup> Iring sikandin te rayag

dut te menge etew ne kenà Hudiyane

su apey ebmerayag ke tidtu ne ibayà dan

te ebpendiyà te kenikew.

Uya, ini ve se vatà se ralan te kegkereyù

dut te sikami ne menge kevuwaran ni Israyil

ne nepemili nu.”

<sup>33</sup> Neselekawan ini se menge lukes dut te vatà kayi te migkahi ni Simeon mekeatag te anak dan.

<sup>34</sup> Impengeningeni ni Simeon te ebpeneuven dan te Eleteala, ne migkahi en sikandin kayi te ki Maria ke iney ni Hisus te, “Ini se batà ne daan en ne mibpemili te Eleteala ne tuus te Eleteala kayi te menge kevuwaran ni Israyil. Ke menge etew ne ed-engkenà kandin ne edusaan, ne ke menge etew ne edtelimà kandin ne ibpeliyu te Eleteala. Sikandin iya ke tuus ne riyà ebpuun te Eleteala kayi te sikandan, ugaid ne merakel se ed-engkenà kandin.

<sup>35</sup> Ne kayi te menge ulaula ran ne egkepeyahan ke intahù te itungan dan, ini se itungan dan ne in-eles dan dut te ruma ran. Ne sikuna, Maria,” ke si Simeon, “ne egkerupet se hinawa nu iring te nesuhat ka te meharang ne sundang.”

<sup>36</sup> Ne ruen dema meritan ne mibpelambas te Lalag te Eleteala ne ed-ingaranan ki Ana, anak ni Panuwil, ne kevuwaran ni Asir. Lukes en nevenar ini se meritan ne nekeesawa taman te pitu rà ne rahun

<sup>37</sup> ne nevalu en, ne nekedwalu nepulù en wey epat ne rahun se kegkevalu rin. Warà mid-awà sikandin kayi te Nekebpuru ne Valey te Eleteala. Merukilem meandew ne mideyù din ke Eleteala, ne ruen menge hewii ne kenà sikandin egkaan su apey rin meilut se kebpengeningeni rin te Eleteala.

<sup>38</sup> Nesehetaan dema sikandin te kinepeneheewit dut te vatà kayi te Nekebpuru ne Valey te Eleteala ne mid-uvey sikandin engki Maria ne mideyù ke Eleteala mekeatag ketà te vatà. Ne igenat ketà ne impesabut din en mekeatag kayi te vatà diyà te langun ne ebpenareng te Eleteala te kebpekepeliyu te menge kevuwaran ni Israyil.

*Mid-uli Dan Diyà te Inged ne Nesarit*

<sup>39</sup> Guna su nepasad en ni Jose ki Maria te kedtuman dut te langun ne nekahi kayi te penduan te Kerenan ne mid-uli dan en diyà te inged dan ne Nesarit, lusud te Geliliya.

<sup>40</sup> Ne mid-iseg en ini se vatà ne mekaherkaher se lawa rin ne metautau sikandin, ne dekelà se penaub te Eleteala kandin.

*Ke Vatà ne si Hisus Diyà te Nekebpuru ne Valey te Eleteala*

<sup>41</sup> Uman rahun ne ebpendiyà ke lukes ni Hisus te Hirusalim su edtelavuk te Pista te Kedsehari te Suluhuen te Eleteala dut te menge apù dan dengan.

<sup>42</sup> Guna su sepulù en wey deruwa ne rahun si Hisus, ne mibpendiyà dan en te Pista maan.

<sup>43</sup> Guna su neipus en ke minge hewii te pista ne migenat dan en se ed-uli, ugaid ne mibpelintetahak si Hisus diyà te Hirusalim te warà metueni rut te minge lukes din.

<sup>44</sup> Iyan dan kunaan ke kayi red sikandin te minge ruma ran ne midlevundus dan en se ed-ipanew te neep-epunan. Ne arà pà ne mibpemengà dan si Hisus kayi te minge suled dan wey minge ruma ran.

<sup>45</sup> Ugaid ne warà dan metuen, ne ketà ne midlived dan diyà te Hirusalim se ebpemengà.

<sup>46</sup> Ne iketelu rin ne andew ne arà pà ne netuen dan diyà te Nekebpuru ne Valey te Eleteala. Su riyà ebpemekibitiyara sikandin te minge meyerù te Hudiyanen se ebpemineg te lalag dan wey ebpenginginsaan din sikandan.

<sup>47</sup> Langun dan te ebpemineg ki Hisus ne negeyip dut te ketau rin te edtavak te minge insà kandin.

<sup>48</sup> Nekita rà dut te minge lukes din ne neinuinu ran nevenar ne migkahi ke iney rin kayi te ki Hisus te, "Anak ku, maan ke mid-ulaula nu ini kenami? Neipeng-ipeng key te amey nu se ebpemengà kenikew."

<sup>49</sup> Ne migkahi si Hisus kandan te, "Meambe ke mibpemengà kew pà kediey? Maa warà niyu metueni se kayi a mulà te valey te amey ku?"

<sup>50</sup> Ugaid ne warà dan mekesabut dut te meana kayi te migkahi rin.

<sup>51</sup> Ne miduma en si Hisus kandan te ed-uli diyà te Nesarit ne mibperumaruma sikandin kandan. Ne si Maria mulà ne intahù din langun ini te itungan din.

<sup>52</sup> Ne nekeiseg en se kerekelà te lawa ni Hisus ne ke itungan din ne mid-iseg dema. Ne mid-iseg-iseg en se kebpekesuhat din te hinawa te Eleteala, ne engketà ded dema ke minge etew.

### 3

#### *Ke Kebpenurù ni Juan ke Ebpembunyag (Mateo 3:1-12; Marcos 1:1-8; Juan 1:19-28)*

<sup>1</sup> Midsahadsahad en se minge rahun ne ini en ke ikeseputù en wey lelima ne rahun te kegkamal ni Tibiriyu rut te inged ne Ruma. Si Punsiyu Pilatu se midtendù din ne gubinedur dut te pruvinsiya ne Hudiya, si Hirudis se migkamal te pruvinsiya ne Geliliya, ne ke ari rin ne si Felipe se migkamal te minge pruvinsiya te Ituriya wey Terekunita, wey iyan migkamal te pruvinsiya te Ebeliniya ne si Lisanyas.

<sup>2</sup> Ne iyan minge mepurù dut te langun ne terebpepengesa te Eleteala rut te minge Hudiyanen ne si Anas wey Kayipas.

Si Juan be ini, ke anak ni Zacarias, ne riyà pà te tanà ne kenà egkeubpaan te etew ne diyan en meumai sikandin te lalag te Eleteala te ebperudsuen te helevek din.

<sup>3</sup> Ketà ne migemew en si Juan ne mibayaan din ke langun ne minge inged uvey te wayig ne Hurdan. Ne mibpemesabut din ke minge etew se egkahi te, "Pemedsendit kew ne engkeri niyu ke meraat ne minge ulaula niyu, ne pemebunyag kew su apey ebpeseharen te Eleteala ke minge keberedusaan niyu."

<sup>4</sup> Ini se impenurù ni Juan ne netuman en ke impesurat ki Isayas ke mibpelambas te Lalag te Eleteala rengan se egkahi te,

"Duen etew riyà te tanà ne kenà egkeubpaan te etew  
ne ebpenawag dut te minge etew  
ne ed-uvey kandin, ke sikandin te,  
'Mehaan ebpekeuma ke Kerenan,  
ihewani niyu ke ralan

ne tidtuwa niyu ke ibayà din,  
ne iyan din meana ne tilaka niyu ke hinawa niyu  
su apey kew egkepenehana te kebpekeuma rin.

<sup>5</sup> Langun te netempag ne edtembakan,  
ne langun ne ebpenuhartuhar ne ebpetahen.  
Ke dalan ne ebpenikùtikù ne ebpeketidtuwen  
ne ke mibuketur ne ralan ne edtilaken.

<sup>6</sup> Ne ketà ne ibpekita te Eleteala te langun ne menusiyà  
ke edsuhuen din ne ebpeiyu kandan.' "

<sup>7</sup> Migkuludkulud ma se minge etew ne mibpengkayi te ki Juan su ebpemebunyag. Migkehiyan din sikandan te, "Iring kew te minge uled ne ebpelahuy dut te apuy!

Mehaan en egkeuma ke kedusa te Eleteala keniyu. Engkey se midtarem keniyu te ebpekeliyu kew ketà ke ebpebunyag kew?

<sup>8</sup> Embiya benar ne mid-engkeran niyu ke meraat ne ulaula niyu, ne ipekita niyu kayi te ulaula niyu. Ne kenà kew egkahi te sikiyu ne kenà edusaan te Eleteala su kevuwaran kew ni Abraham. Su igkahi ku keniyu,” ke si Juan, “misan ini se menge batu ne egkepebaluy te Eleteala ne etew ne tuney ne kevuwaran ni Abraham ne igkesambi keniyu.

<sup>9</sup> Ne sikiyu ne iring te menge kayu ne kenà ebahas te meupiya, tembù be ebpiyayen. Ne iring te nekekayew en ke adsa su ebpemilayen en ne edtimbag diyà te apuy.”

<sup>10</sup> Mid-insà ke menge etew kandin te, “Engkey en be se ed-ul-ulaan dey su apey key mekeliyu keniyan te egkehiyen nu?”

<sup>11</sup> Ne migkahi si Juan te, “Ini se ul-ulaa nu, ke etew ne deruwa se velegkas din ne mebehey te etew ne warà velegkas din. Engketà ded maa ke egkekaan, ke etew ne ruen egkekaan din ne mebehey dut te etew ne warà kandin.”

<sup>12</sup> Duen menge ebpeyavad te buwis ne mibpengkayi te ki Juan su ebpebunyag. Ke sikandan te, “Meyterù, engkey en be se kenami ne ed-ul-ulaan?”

<sup>13</sup> Ne migkahi si Juan te, “Embiya ebpeyavad kew te buwis, ne kenà niyu ed-umani ke ibpeyavad niyu.”

<sup>14</sup> Ne ruen dema menge sundaru ne mid-insà kandin, ke sikandan te, “Nemenu sikami? Engkey se kenami ne ed-ul-ulaan?”

Ne migkahi si Juan te, “Engkeri niyu ini se kebpenguwa te pirak te kebpemehes niyu wey ini se kebpenguwa te pirak te etew ne edtevuwan niyu. Kenà kew ebpeuman te sukey niyu kayi te kedlimbung niyu.”

<sup>15</sup> Gewii rut te menge etew ne ebpepeming ki Juan ne mid-ilut se kebpengarang dan su iyan dan pegitungan ne si Juan ini ke Impasad te Eleteala dengan ne Ebperetuen te langun ne ed-ingeranan te Mesiyas.

<sup>16</sup> Tembù migkahi si Juan diyà te kandan te, “Duen ebpeketundug kediey ne mepurù pà kedi su misan ke telumpà din ne kenà a edait ne ed-ekar. Wayig se ibunyag ku keniyu, ne sikandin ke migkahi ku ne ebpeketundug kedi ne ebunyag dema keniyu. Ke menge ebperetiyya ne ebunyahan din te Kedesenan ne Ebpetuntul te Menusiya, ne ke kenà ebperetiyya ne iyan din ibunyag ne apuy.

<sup>17</sup> Geina te ibpesivey rin ke menge etew ne ebperetiyya rut te menge etew ne kenà ebperetiyya, ne iring sikandin te etew ne ruen teluung din su ed-ukap ne ibpelayap din ke ukap rut te rimahas. Ke rimahas ne idtahù din diyà te patil, ne ke ukap ne ebinsulan din te apuy ne kenà egkeevukan.”

<sup>18</sup> Gewii te ibpesabut ni Juan te menge etew ini se Meupiya ne Tudtul te Eleteala ne inlehetlehet din kandan te mebpenehana ran ketà te migkahi rin ne ebpekeuma.

<sup>19</sup> Ugaid ne si Hirudis ke egkamal kayi te inged ne Geliliya ne mibpengerkehiyan ni Juan su mid-ahew ni Hirudis ke ipag din ne si Hirudiyas ke esawa te ari rin ne si Felipe. Ne kenà arà dà se meraat ne mid-ulaula ni Hirudis ne impengahikahi ni Juan kandin su merakel pà lavew se meraat ne mid-ulaula rin.

<sup>20</sup> Huna su nerineg ini ni Hirudis, ne midruntuwan din pà lavew ke meraat ne ulaula rin su impevilanggù din si Juan.

*Ke Kebunyag ki Hisus  
(Mateo 3:13-17; Marcos 1:9-11)*

<sup>21</sup> Guna su langun dut te etew ne nebunyeahan en ni Juan ne arà pà ne mibpengkayi si Jesus te ki Juan su ebpebunyag kandin. Ne ketà ne mibpengereningeni si Hisus te Eleteala, ne gewii rin te ebpengereningeni ne iring te nevuakan ke langit

<sup>22</sup> ne midudsuk ke Kedesenan ne Ebpetuntul te Menusiya kayi te ki Hisus ne midragid te melepati. Ne ruen suwara ne riyà ebpuun te langit ne migkahi te, “Sikew ke anak ku ne igkelimù ku nevenar, ne nekesuhat ka nevenar te hinawa ku.”

*Ke Keep-epuan ni Hisus  
(Mateo 1:1-17)*

<sup>23</sup> Guna su menge tetelu en nepulù se rahun ni Hisus ne midrudsù te helevek din ne mibpeveelan kandin te Eleteala. Iyan itungan te menge etew ne tuney ne anak sikandin ni Jose.

Si Jose ini ne anak ni Heli,  
<sup>24</sup> si Heli ne anak ni Matat,  
si Matat ne anak ni Levi,  
si Levi ne anak ni Milki,  
ne si Milki ne anak ni Hani,  
si Hani ne anak ni Jose,



25 si Jose ne anak ni Matatiyas,  
si Matatiyas ne anak ni Amos,  
si Amos ne anak ni Nahum,  
si Nahum ne anak ni Isli,  
si Isli ne anak ni Nagey,  
26 si Nagey ne anak ni Maat,  
ne si Maat ne anak ni Matatiyas,  
si Matatiyas ne anak ni Simi,  
si Simi ne anak ni Jose,  
si Jose ne anak ni Huda,  
27 si Huda ne anak ni Huwana,  
si Huwana ne anak ni Risa,  
si Risa ne anak ni Surubabil,  
si Surubabil ne anak ni Selatil,  
si Selatil ne anak ni Niri,  
28 si Niri ne anak ni Milki,  
si Milki ne anak ni Adi,  
si Adi ne anak ni Kusam,  
si Kusam ne anak ni Ilmudam,  
si Ilmudam ne anak ni Iyir,  
29 si Iyir ne anak ni Josue,  
si Josue ne anak ni Eliezer,  
si Eliezer ne anak ni Hurim,  
si Hurim ne anak ni Matat,  
si Matat ne anak ni Levi,  
30 si Levi ne anak ni Simeon,  
si Simeon ne anak ni Huda,  
si Huda ne anak ni Jose,  
si Jose ne anak ni Hunan,  
si Hunan ne anak ni Iliyakim,  
31 si Iliyakim ne anak ni Miliya,  
si Miliya ne anak ni Meinan,  
si Meinan ne anak ni Matata,  
si Matata ne anak ni Natan,  
si Natan ne anak ni David,  
32 si David ne anak ni Isai,  
si Isai ne anak ni Obid,  
si Obid ne anak ni Buus,  
si Buus ne anak ni Salmun,  
si Salmun ne anak ni Naasun,  
33 si Naasun ne anak ni Aminadab,  
si Aminadab ne anak ni Admin,  
si Admin ne anak ni Arni,  
si Arni ne anak ni Isrum,  
si Isrum ne anak ni Piris,  
si Piris ne anak ni Huda,  
34 si Huda ne anak ni Hakub,  
si Hakub ne anak ni Isaac,  
si Isaac ne anak ni Abraham,  
si Abraham ne anak ni Tiri,  
si Tiri ne anak ni Nakur,  
35 si Nakur ne anak ni Serug,  
si Serug ne anak ni Ragaw,  
si Ragaw ne anak ni Peleg,  
si Peleg ne anak ni Ibir,  
si Ibir ne anak ni Sala,  
36 si Sala ne anak ni Kainan,  
si Kainan ne anak ni Erpaksad,  
si Erpaksad ne anak ni Sim,  
si Sim ne anak ni Noe,  
si Noe ne anak ni Lamic,  
37 si Lamic ne anak ni Matusalin,

si Matusalin ne anak ni Enok,  
 si Enok ne anak ni Harid,  
 si Harid ne anak ni Mehelelil,  
 si Mehelelil ne anak ni Kainan,  
<sup>38</sup> si Kainan ne anak ni Inus,  
 si Inus ne anak ni Sit,  
 si Sit ne anak ni Adan,  
 si Adan ne anak te Eleteala.

## 4

*Ke Kinepenggeram ki Hisus  
 (Mateo 4:1-11; Marcos 1:12-13)*

<sup>1</sup> Guna su nebunyeahan en si Hisus diyà te wayig te Hurdan, ne mid-awà dutun ne midlumunan nevenar dut te Kedesehan ne Ebpetuntul te Menusiyà ne mid-ewit en sikandin diyà te tanà ne kenà egkeubpaan te menge etew.

<sup>2</sup> Ne ketà ne lusud te neked-epat nepulù ne hewii ne mibpenggeraman en si Hisus ni Setanas ke datù te pekaid. Ne ini ne menge hewii ne warà bulug mekekaan sikandin ne ketà ne nevitil nevenar si Hisus.

<sup>3</sup> Ne migkehiyan ni Setanas ke datù te pekaid si Hisus te, "Embiya sikuna en ke Anak te Eleteala ne pebeluya nu ini se batu ne pan."

<sup>4</sup> Ne migkahi si Hisus te, "Iyan insurat ne Lalag te Eleteala ne egkahi te, 'Kenà egkeenen dà se igkeuyag te etew.' "

<sup>5</sup> Ne ketà ne mid-ewit ni Setanas si Hisus te edteggereg ne seperek mata ne impekita rin ki Hisus ke langun ne inged kayi te ampew te dunya.

<sup>6</sup> "Ini se kebayaàbaya kayi te langun ne inged ini ne ibehey ku keykew," ke se datù te pekaid, "wey langun ini ne kekewesai, su langun imbe kayi ne imbehey kedì ne igkevehey ku te piya engkey ne egkesuatan ku.

<sup>7</sup> Langun din ini ne kenikew en embiya ed-arap ka kedì."

<sup>8</sup> Ne migkahi si Hisus te, "Ruen impesurat ne Lalag te Eleteala ne egkahi te, 'Iyan niyu rà erapa ne Kerenan ne Eleteala niyu, ne sikandin dà se ebperumdumaan niyu.' "

<sup>9</sup> Ne ketà maa ne mid-ewit dut te datù te pekaid si Hisus diyà te inged ne Hirusalim dutun te migketikangan dut te Nekebpuru ne Valey te Eleteala ne migkahi sikandin te, "Embiya benar ne sikew ke Anak te Eleteala ne umpak ka ruen.

<sup>10</sup> Su ruen impesurat ne Lalag te Eleteala ne egkahi te, 'Edsuhù ke Eleteala te menge suluhuen din ne ebpetugenuren keykew.'

<sup>11</sup> Ne ruen dema ketà ne egkahi te,

'Edsepirawen ka nikandan  
 su apey kenà egkerudruri  
 ke menge paa nu te batu.' "

<sup>12</sup> Ne migkahi si Hisus te, "Ugaid ne ruen dema Lalag ne impesurat te Eleteala ne egkahi te, 'Kenà kew baal te ralan ne ibpenggeram niyu te gehem dut te Kerenan ne Eleteala niyu.' "

<sup>13</sup> Guna su netuehan dut te datù te pekaid te kenà din egkepenggeraman si Hisus ne mid-ewaan din pà.

*Midrudsù si Hisus te Helevek Din  
 (Mateo 4:12-17; Marcos 1:14-15)*

<sup>14</sup> Mid-uli en si Hisus diyà te Geliliya ne ke gehem te Kedesehan ne Ebpetuntul te Menusiyà ne ini en te kandin. Ne nekeeneb en dut te langun ne nekelingut ne inged ke tudtul mekeatag ki Hisus.

<sup>15</sup> Mibpenurù sikandin diyà te menge valey ne ebpedgian te menge Hudiyenen ne nekereyù kandin ke langun ne menge etew.

*Warà Mibperetiya te Penurù ni Hisus Diyà te Inged Din ne Nesarit  
 (Mateo 13:53-58; Marcos 6:1-6)*

<sup>16</sup> Ne arà pà ne midlaus si Hisus diyà te Nesarit, ke inged ini ne kayi en mibukelid sikandin. Neuma se Hewii ne Id-imeley ne mibpendiyà sikandin te valey ne ebpedgian te Hudiyenen te penduan dan su ini se kandin ne ulaula. Guna su nevrurun dan en ne mid-itindeg en si Hisus su ebase te Lalag te Eleteala.

<sup>17</sup> Induwal dan en kandin ke insurat ni Isayas, senge etew ne mibpelambas te Lalag te Eleteala rengan. Ne mibekar ni Hisus ini se insurat ketà te egkahi te,

<sup>18</sup> "Ke Kedesehan ne Ebpetuntul te Menusiyà

ne riya ebpuun te Kerenan ne Eleteala  
ne midlumun en kediey,  
ne mibpemili a te Kerenan ne Eleteala  
su apey ku ibpesabut  
dut te menge etew ne ayuayu  
ke Meupiya ne Tuditul.

Ne mibpeveyaan din kedi  
apey ku mepenudtuli te egkevelukasan  
ke menge etew ne nevakù ni Setanas;  
ne ebpengeulian ke menge pisek  
su apey ran ebpekekita;  
ne ebpelihawang dut te menge edteikutaken.

<sup>19</sup> Midsuhù a rin dema su apey ku mepenudtul  
te ini en ke timpu te kebpeliyu te Kerenan ne Eleteala  
te kandin ne menge etew."

<sup>20</sup> Ne midlulun ni Hisus ke ebasaan ne in-uli din diyà te mibehey kandin ne mibpinuu  
sikandin se ebpenurù kandan. Ne langun ne menge etew ketà ne rutun dà mepuhuy ke  
mata ran te kandin su ebpemineg.

<sup>21</sup> Ne migkahi sikandin kayi te kandan te, "Ini se nekahi rut te impesurat te Eleteala  
ne mibasa ku ne netuman en gunteani te ini ini en iya ne nerineg niyu."

<sup>22</sup> Langun dut te nevrurun ketà ne nevenaran dut te kebpenerù din, ne negeyip dan  
dut te keupiya te kedlalag din, ke sikandan te, "Maa, kenà anak ni Jose ayan?"

<sup>23</sup> Migkahi si Hisus te, "Ruen beseenan tew ne igkesuati niyu ves te egkahi kayi te kedi  
ini se egkahi te, 'Embiya ebpemawì ka ne etew, ne bawii nu ke lawa nu.' Ne seveka  
maa buwa ne egkekahi niyu te, 'Ruen nerineg dey ne mid-ulaula nu riya te inged ne  
Kapirnowum, ne kun imbe ul-ulaa nu rema kayi te keykew ne inged.'

<sup>24</sup> Ugaid," ke si Hisus, "ini se igkahi ku keniyu, warà etew ne ebpelambas te Lalag te  
Eleteala ne ebpeminehen te menge etew diyà te kandin ne inged.

<sup>25</sup> Benar ini se egkehiyen ku keniyu, iring ini se ed-ul-ulaan niyu guntaani rut te timpu  
rengan ne biviyag pà si Elias ke mibpelambas te Lalag te Eleteala. Su nekedtetelu ne  
rahan wey enem ne vulan ne warà uran, ne nesuhat te bitil ke langun ne inged din, ne  
merakel se menge ruma tew ne Hudiyenen ne nevalu ne meritan ne ebpengerehenan  
ketà te bitil.

<sup>26</sup> Ugaid ne warà ma suhua te Eleteala si Elias te ebpetevangan te senge etew kandan,  
nasi ne impependiyà si Elias te senge etew ne valu ne ed-ubpà te Sersipta, lusud te Sidun.

<sup>27</sup> Ne ruen pà maa," ke si Hisus, "gewii rema ni Eliseo te mibpelambas te Lalag te  
Eleteala ne merakel se menge Hudiyenen ne mibpendaru te kevuwa ne muna te it-it.  
Ugaid ne warà seveka kandan ne mibpevawian te Eleteala ki Eliseo, nasi ne impependiyà  
si Eliseo te senge etew ne kenà Hudiyenen ne si Naaman lusud te inged ne Siriya."

<sup>28</sup> Nerineg dut te menge etew ne nevrurun ketà se migkahi ni Hisus te edtavang ke  
Eleteala te kenà Hudiyenen, ne neepes-epes dan nevenar.

<sup>29</sup> Mid-itindeg dan ne migeweran dan si Hisus ne midtuyuk dan se ebpependiyà te  
puntur te tuhar su ketà metahù ke inged dan, ne idtimbang dan perem si Hisus diyà te  
dempilas.

<sup>30</sup> Ugaid ne mibpeniyuksiyuk si Hisus diyà te kandan ne midlevundus en se ed-ipanew.

*Midsegseg ni Hisus ke Vusew ne Midsuuk te Meama  
(Marcos 1:21-28)*

<sup>31</sup> Ne midlaus si Hisus diyà te Kapirnowum, inged ne lusud te Geliliya. Ne neuma ke  
Hewii ne Id-imeley ne mibpenurù din ke menge etew.

<sup>32</sup> Nerineg dan ke kebpenerù din, ne neinuinu ran nevenar su ruen gehem te  
kebpenerù din.

<sup>33</sup> Ketà te valey ne ebpengedian dan te penduan dan ne ruen senge etew ne midsuukan  
te vusew. Nekita rin dà si Hisus ne migkuleyi te,

<sup>34</sup> "Hey Hisus ne riya ebpuun te Nesarit, engkey se kememeniyà nu kayi te sikami ne  
vusew? Maa, edereetan key nikuna? Egkekilala ku sikuna su sikuna ke Berekat ne Anak  
te Eleteala!"

<sup>35</sup> Ne pinengked en ni Hisus ke vusew se egkahi te, "Engked ka rà, ne awà ka kenian  
te meama ayan!" Ne intimbang pà dut te vusew ini se meama kayi te etuvangan te menge  
etew, ne mid-awà sikandin ugaid ne warà din mekeiri ini se meama.

<sup>36</sup> Ne rekela se kinekegeyip dut te langun ne minge etew ketà ne mibpein-inseey ran te, "Engkey ve vuwa ini? Su utew rekela se gehem din te ebpeawa te minge vusew, ne ebpemineg dan kandin."

<sup>37</sup> Arà dā ne nekeeneb en ke tudtul te mid-ulaula ni Hisus diyā te langun ne nekelingut ne inged.

*Neulian ni Hisus ke Mibpenderaru ne Etew  
(Mateo 8:14-17; Marcos 1:29-34)*

<sup>38</sup> Guna su mid-awā si Hisus kayi te valey ne ebppedgian te minge Hudiyanen te penduan dan, ne mibpendiyā te valey ni Simon. Seretā din ketā ne edetengen ke enuhang ni Simon ne meritan, ne mibuyū dan ki Hisus te bawii rin.

<sup>39</sup> Mid-uvey si Hisus dut te meritan ne pineawā din ke rateng. Arà dā ne neawā en ke rateng din ne mid-ewew sikandin ne mid-ilutū en te ibpekaan kandan.

<sup>40</sup> Guna su ebpengirum-irum en ne langun ne minge etew ne ruen duma ran ne ebpenderaru te misan engkey en ne daru ne mibpeneheewit dan kayi te ki Hisus. Ne midampen din ke uman senge etew ne neulian en.

<sup>41</sup> Ne misan ke minge vusew ne impeawā din dut te minge etew ne edteverehen dan. Ne embiya ebpeewaen en ini se vusew ne egkuleyī dan te, "Sikuna ke Anak te Eleteala!"

Ugaid ne pineengked ni Hisus sikandan su kenā din idluhut ne edlalag dan su netueanan dan te sikandin ke Impasad te Eleteala rengan ne Ebperetuen te langun.

<sup>42</sup> Guna su egkeriwaswas en ne mid-awā si Hisus ketā te inged ne mibpendiyā sikandin te sibsiveyan. Mibpemengā sikandin dut te minge etew ne guna su netuen dan sikandin ne imbangen dan perem su apey kenā mekeawā diyā te kandan.

<sup>43</sup> Ugaid ne migkahi si Hisus kandan te, "Kenā egkepakey ne kenā ku ibpendiyā te minge etew diyā te ruma ne inged su rema kandan ini se Meupiya ne Tudtul mekeatag dut te Impasad te Eleteala ne Ebperetuen te langun su ini ke insuhū kediey te Eleteala."

<sup>44</sup> Ketā ne midlevundus en mebpenerū si Hisus diyā te minge valey ne ebppedgian te Hudiyanen diyā te lusud te Hudiya.

## 5

*Duen Minge Meama ne Mibpemili ni Hisus ne Edumdumaan Din  
(Mateo 4:18-22; Marcos 1:16-20)*

<sup>1</sup> Senge hewii ne riyā si Hisus te beyvey te ranew ne ed-ingaranan te Ginisarit, ne merakel se etew ne egkeasek su ed-uvey ran su ebpemineg dan te Lalag te Eleteala ne ibpenurū din.

<sup>2</sup> Nekekita si Hisus te deruwa ne avang ne in-ampil diyā te gebgevasan su mid-ewaan pā te minge kemuney su ebpenggasgas te biyala ran.

<sup>3</sup> Mid-erā si Hisus diyā te seveka ne avang ne avang ni Simon, ne migkehiyan din si Simon te, "Ibpetulud pā arā se avang din te malū ebpekeriyū dut te beyvey." Ketā ne mibpinuu si Hisus se ebpenurū dut te merakel ne etew.

<sup>4</sup> Nekeipus si Hisus se ebpenurū ne migkehiyan din si Simon te, "Purai niyu en be ini se avang nu riyā te kalud ne pemiyala kew en su apey kew ebpekeutel."

<sup>5</sup> Migkahi si Simon te, "Nepewpewaan key en se ebpemiyala ne warā key en iya mekeutel, ugaid embiya arā se kahi nu ne ebpemiyala key maa."

<sup>6</sup> In-antug dan ke biyala ran ne nevenbenaran dan te serā ne neutel dan su reisek samā ne egkereetan ke biyala ran.

<sup>7</sup> Ne nekekapey ran dut te minge ruma ran diyā te senge evangan su ebpeamung dan. Nekeuma ran ne wey ran intahū kayi te deruwa ne avang ini se serā ne neutel dan ne reisek dā ne egkeered dan en su elin nepenūpenū.

<sup>8</sup> Nekita rā ni Simon Pedro ini se ned-ulaula ne nekepenimbuel sikandin diyā te etuvangan ni Hisus se egkahi te, "Kenā ka ed-uvey kedī, Kerenan, su beredusa a ne etew."

<sup>9</sup> Iyan din kinekahi ketā ne negeyipgeyip nevenar sikandin abpeg ke minge ruma rin dut te neutel dan.

<sup>10</sup> Ne neinuinu rema ini se minge ruma ni Simon te ebpemiyala ne en si Santiago wey si Juan, ke minge anak ni Sibidyū.

Ne migkehiyan ni Hisus si Simon te, "Kenā ka meandek! Engkayī kew en ne duma kew kediey su serā se ebpemiyalaan niyu guntaani, ugaid ne ebpenuruen ku pā sikiyu te iyan niyu mulā egkeutel ne minge etew ne eduma kedī."

<sup>11</sup> Ne in-ampil dan ke minge avang dan diyā te gebgevasan ne mid-ewaan dan en ini langun su miduma ran ki Hisus.

*Neulian ni Hisus ke Senge Etew ne Kevuwaen ne Muna pà te It-it*

*(Mateo 8:1-4; Marcos 1:40-45)*

<sup>12</sup> Senge hewii ne riyà si Hisus te inged ne ruen meama ne nelumbus ke lawa rin te kevuwa ne muna pà te it-it. Nekita rin si Hisus ne midnunutnunut en se ed-uvey kandin ne mibpemuyù en se egkahi te, "Mama, embiya perem egkiyug ke rà ne egkeulian nu ini se meredsik ne sakit ku."

<sup>13</sup> Arà dà ne midampen ni Hisus ke meama se egkahi te, "Uya, egkiyug a, meulii ka!" Arà dà se nekahi rin ne neawà en ke sakit dut te meama su neulian en.

<sup>14</sup> Ne mid-il-lutan en ni Hisus te egkahi dut te meama te, "Kenà nu ve imbe kegkehiya ini te misan endei en, ugaid ne riyà ka tilandeng te terebpelengesa ne ibpekita nu kandin te neulian ke en. Ne ivehey nu ve kandin ke ibpelengesa te Eleteala ne insuhù dengan ni Moises dut te menge etew ne neulian te sakit dan ne kevuwa su apey metueni te langun te neulian ke en."

<sup>15</sup> Ugaid ne nasi en ne nekeeneb ke tudtul mekeatag te mid-ulaula ni Hisus, ne migkuldukulud se menge etew ne mibpengkayi te kandin su ebpemineg te penurù din wey ebpemewawì te menge raru ran.

<sup>16</sup> Ugaid ne mid-ewaan din ke merakel ne menge etew su mibpendiyà sikandin te tanà ne warà etew rin ne ketà mibpengerenigeni.

*Neulian ni Hisus ke Meama ne Minatey se Tevi ne Lawa Rin*

*(Mateo 9:1-8; Marcos 2:1-12)*

<sup>17</sup> Senge hewii ne ebpenurù si Hisus ne ruen menge Peresiyu wey menge meyerù te penduan te Hudiyänen ne midtelavuk ketà. Riyà dan ebpuun te uman inged lusud te Geliliya, ne uman inged lusud te Hudiya, wey diyà dema ebpuun te inged ne Hirusalem. Ne ruen gehem te Eleteala te kebepmawì te raru ne riyà te ki Hisus.

<sup>18</sup> Ne ruen nekeuma ne menge etew ne ed-ewit te meama ne ed-id-irehà dà diyà te duyanà ne minatey se tevi ne lawa rin. Edlusud perem ini se menge etew ne edyayang su apey ran igkerenà diyà te sineruwan ni Hisus.

<sup>19</sup> Ugaid ne geina te merakel ne etew ne warà egkepeveyaan dan diyà te kandin. Ketà be ne mibatun dan ne midlekatan dan ke atep ne midtuntun dan ini se meama diyà te luuk te menge etew diyà te sineruwan ni Hisus.

<sup>20</sup> Guna su netueanan ni Hisus te rekela ke sarig dan kandin ne migkehiyan din ke ederaru te, "Mama, nepesehad en ke keberedusaan nu."

<sup>21</sup> Guna su nerineg dut te menge meyerù te penduan te Hudiyänen wey ke menge Peresiyu ne ebpinuu ketà ne kehinggina ran te, "Engkey uvag etawa ini se edsumpalit te Eleteala? Warà etew ne ebpekepesahad te salà embiya kenà ke Eleteala!"

<sup>22</sup> Ugaid ne netueanan ni Hisus ke netahù te itungan dan ne migkehiyan din sikandan te, "Meambe ke netahù te itungan niyu se iring keninyan?"

<sup>23</sup> Endei rapit se melemu," ke si Hisus, "te egkahi riyà te minatey se lawa rin te, 'Ke menge salà nu ne nepesehad en' etawa ve egkahi te, 'Enew ke en ne luluna nu ke ikam nu ne ipanew ke en'?"

<sup>24</sup> Guntaani ne ibpekita ku keniyu," ke si Hisus, "te ruen gehem dut te Impeanak te Menusiyà te ebpehad te salà kayi te ampew te dunya." Ne migkehiyan din en ke meama ne minatey se tevi ne lawa rin te, "Mama, enew ke en ne luluna nu ke ikam nu ne uli ke en."

<sup>25</sup> Arà dà iya ne mid-enew en ke meama ne midlulun din ke ikam din ne mid-uli en se edeyù te Eleteala dut te keupiya rin kandin.

<sup>26</sup> Langun dan ne netemenengan dan kayi te nekita ran. Ne mideyù dan te Eleteala se egkahi te, "Mekegeyip iya nevenar ini se nekita tew guntean!"

*Mibpemili ni Hisus si Levi*

*(Mateo 9:9-13; Marcos 2:13-17)*

<sup>27</sup> Guna su neipus ini ne mid-ipanew en si Hisus ne nekita rin ini se senge etew ne meama ne ebpevyad te buwis ne ed-ingeranan ki Levi ne ebpinuu riyà te upisinà din. Ne migkehiyan ni Hisus sikandin te, "Duma ka kedi."

<sup>28</sup> Arà dà ne mid-itindeg si Levi ne mid-ewaan din ke langun su miduma ki Hisus.

<sup>29</sup> Ne senge hewii ne mibair si Levi te kevrunan diyà te baley rin su ed-inggaten din si Hisus. Merakel se midtelavuk, ne menge ruma ni Levi ne ebpevyad te buwis wey merakel pà ne etew rema se mibpangaan ne ruma ran.

<sup>30</sup> Guna su nekita rut te menge Peresiyu wey ruma ne menge sakup dan ne menge meyerù te penduan ne dutun te uvey te valey ne nevrunan te ini se menge etew ne ebpemeked-erungut ki Hisus ne netegtehaad ne mibpendiyà dan te menge edumdumaan

ni Hisus se ebpemivig te, "Meambe ke edseveka kew se egkaan kayi te menge etew ne ebpevyad te buwis wey ini se menge etew ne mekesesalà?"

<sup>31</sup> Migkahi si Hisus te, "Ke menge etew ne warà daru ran ne kenà dan ebpegungeyà te terebawì, ugaid ne ke menge etew rà ne duen daru ran.

<sup>32</sup> Iring din ded be rema kayi te ini se menge etew su kenà iyan ku kinepengkayi se iyan ku ebpeuveyen ne ke menge metidtu kun se ulaula ran, ugaid ne apey ebpekedsendit ke menge etew ne meraat se ulaula ran."

*Ke Insà Mekeatag te Menge Edmundumaan ni Hisus ne Edlimpas te Egkaan  
(Mateo 9:14-17; Marcos 2:18-22)*

<sup>33</sup> Duen menge etew ne mibpengkayi te ki Hisus ne migkahi te, "Duen hewii dut te menge edumdumaan ni Juan ne edlimpas dan te egkaan su apey kenà dan egkevangan dut te kebpeingeneni ran. Ne iring din ded dema ke menge edumdumaan te menge Peresiyyu. Ugaid ne keykew ne menge edumdumaan ne kenà edlimpas se egkaan wey ed-inum."

<sup>34</sup> Ne midsempità si Hisus te, "Embiya ruen egkewingan, maa edlimpas be te egkaan ke menge etew ne mid-inggat te ini pà ke ibpengesawa te kandan? Kenà en iya!

<sup>35</sup> Ugaid ne ruen hewii ne egkeuma ne egkeawà ke ibpengesawa diyà te kandan, ne ketà pà sikandan edlimpas te egkaan."

<sup>36</sup> Ne ketà maa ne insempità ni Hisus te kenà egkepakey ne ebpegebiten ke behu ne penurù din wey ke raan ne betasan te keep-epuan dan, ke sikandin te, "Warà etew ne ebisey te behu pà ne belegkas su idapi te belegkas ne redit en. Su embiya ini se ed-ul-ulaan din ne midereetan din ke behu ne belegkas, ne ini se dapi ne behu pà ne kenà edait dut te redit en ne velegkas.

<sup>37</sup> Ne iring din ded dema," ke si Hisus, "ke behu pà ne tebà su kenà egkepakey ne riyà idtahù ini te raan en ne edtehuan ne lundis te kambing. Su embiya ini se ed-ul-ulaan din ne edsevu ke tebà ne ebetu ke raan ne lundis ne midtehuan, ne edturayas ke tebà ne egkereetan dema ke midtehuan ne lundis.

<sup>38</sup> Tembù be iyan be kemeyidan ne ke behu pà ne tebà ne idtahù te edtehuan ne behu pà ne mibeelan.

<sup>39</sup> Ne warà etew," ke si Hisus, "ne nekeinum en te raan en ne tebà ne egkiyug ne ed-inum pà te behu ne tebà su egkahi sikandin te, 'Ke raan en se meupiya ne teba.' "

## 6

*Ke Insà Mekeatag te Hewii ne Id-imeley  
(Mateo 12:1-8; Marcos 2:23-28)*

<sup>1</sup> Senge hewii ne Sepetu, ke Hewii ne Id-imeley, ne midtarà si Hisus wey ke menge edumdumaan din diyà te pareyanan. Ne gewii ran te edtarà ne ebpengurib ke menge edumdumaan ni Hisus te parey ne idsungit dan.

<sup>2</sup> Ne ruen ketà menge Peresiyyu ne migkahi te, "Meambe ke ed-ul-ulaan niyu ini se ebpekesurang te Penduan tew ne egkahi te warà egelevek te hewii ne id-imeley?"

<sup>3</sup> Ne migkahi si Hisus te, "Maa, warà niyu mevasa ke impesurat te Eleteala mekeatag te mid-ulaula ni David, ke datù tew rengan? Su ruen hewii ne sikandin wey ini se menge sundaru rin ne nengevilit dan.

<sup>4</sup> Ne midlusud si David diyà te insivey ne Valey te Eleteala ne migkuwa rin ke egkeenen ne indenà diyà te Eleteala ne migkaan sikandin ne mibehayan din ke menge ruma rin. Ugaid ne kayi te penduan tew ne kenà arà egkekaan te piya engkey ne etew su ke menge terebpelengesa rà te Eleteala."

<sup>5</sup> Ne migkahi pà maa si Hisus te, "Ke Impeanak te Menusiyyu ke ebayàbayà te egkahi te engkey se edait ne ed-ul-ulaan dut te Hewii ne Id-imeley."

*Ke Meama ne Nekeyengkeng se Belad Din  
(Mateo 12:9-14; Marcos 3:1-6)*

<sup>6</sup> Senge Hewii maa ne Id-imeley ne mibpendiyà si Hisus te valey ne ebpengedian te menge Hudiyanen ne mibpenurù. Ne ruen ketà senge etew ne meama ne nekeyengkeng se kewanan ne velad din.

<sup>7</sup> Duen dema ketà menge Peresiyyu wey menge meyerù te penduan ne ebpenipat ki Hisus embiya egkeulian din ini se etew te arà ne hewii ne id-imeley su ebpemengaan dan ke engkey se kegkesuhat dan ki Hisus te kevenar.

<sup>8</sup> Ugaid ne netuenan en ni Hisus ke netahù te itungan dan ne migkehiyan din en ke meama ne nekeyengkeng se velad din te, "Mama, itindeg ka kayi te uvey ku." Ne mid-itindeg en ke meama ne mid-uvey en ki Hisus.

<sup>9</sup> Ne migkahi en si Hisus dut te mence etew ne nevurun ketà te, “Duen id-insà ku keniyu: Engkey ma se nekahi te penduan tew ne idtuhut ne ed-ul-ulaan tew te hewii ne id-imeley? Maa, edtavangan tew ke mence ruma tew etawa ebpemekeiran tew sikandan? Maa, edsumpatan tew ke umur te mence ruma tew etawa ed-imetayan tew?”

<sup>10</sup> Ne insihid din ke mata rin dut te langun ne mence etew ne migkehiyan din ke meama ne nekeyengkeng se velad din te, “Mama, ketenga nu ayan se velad nu.” Ne ketà ne migketeng dut te meama ke velad din, ne neulian en.

<sup>11</sup> Ketà ne neregret te langet dan ke mence Peresiyu wey ke mence meyerù te penduan ne mibpein-inseey ran en ke engkey se ed-ul-ulaan dan ki Hisus.

*Mibpemili ni Hisus Ke Sepulù wey Deruwa ne Edumdumaan Din*

*(Mateo 10:1-4; Marcos 3:13-19)*

<sup>12</sup> Nengepiraan ketà ne midtekereg si Hisus diyà te buvungan su ebpengeningeni, ne nepewpewaan se kebpengeningeni rin te Eleteala.

<sup>13</sup> Nepawà ne miburun din ke langun ne mence etew ne edurumaruma kandin ne mibpemili sikandin te sepulù wey deruwa ne edumdumaan din ne mid-ingeranan din te Apustulis.

<sup>14</sup> Iyan dan ngaran ini se nepemili din ne si Simon (ke ed-ingaranan dema ki Pedro) wey ke ari rin ne si Andres, si Santiago wey si Juan, si Felipe wey si Bartolome,

<sup>15</sup> si Mateo wey si Tomas, si Santiago ne anak ni Alfeo, wey si Simon (ne ed-ingaranan dema te Patriat ne iyan din meana ne diralem se lengesa rin dut te inged din),

<sup>16</sup> si Hudas ne anak ni Santiago wey si Hudas Iskeriyuti ne ed-ulug ki Hisus diyà te mence kunterà din.

*Neulian ni Hisus Ke Menge Ebpenderaru*

*(Mateo 4:23-25)*

<sup>17</sup> Ne midtupang si Hisus wey ke mence nepemili din ne mid-engked dan ketà te malù mepatag. Ne ketà ne ruen nevurun ne merakel ne etew ne edurumaruma kandin wey mence etew ne riyà ebpuun te langun ne mence inged lusud te Hudiya, ne riyà ebpuun dema te Hirusalim, wey riyà ebpuun te mence inged ne Tiru wey Sidun diyà te beyvey te rahat.

<sup>18</sup> Mibpengkayi ran su ebpemineg te kebpenerù ni Hisus wey ebpevawì dema te mence raru ran. Duen kayi te mence etew ini midtevereg te vusew ne neulian ni Hisus.

<sup>19</sup> Ne langun ne mence etew ne migeram midsinagkew ki Hisus su ruen gehem din ne ketà ebpuun te kandin ne ebpekeuli te mence raru dut te langun dan.

*Ke Benar ne Kehelawan*

*(Mateo 5:1-12)*

<sup>20</sup> Ne midtengtangan ni Hisus ke mence edumdumaan din ne migkahi en te, “Dayirayi kew ne mence ayuayu,

su sikiyu ke edetuan te Eleteala.

<sup>21</sup> Dayirayi kew ne mence egkevital guntaan, su ebpekebulungan kew te Eleteala keuremà.

Dayirayi kew ne mence egkemutu guntaan, su egkehalewhalew kew keuremà.

<sup>22</sup> Dayirayi kew ke egkeepsan kew te mence etew ne kenà kew nikandan edsehipaan, ne ebpenempelaen kew,

wey egkahi ran te mereatey kew

su kayi egenat dut te keduma niyu ke Impeanak te Menusiyà.”

<sup>23</sup> “Su iring kayi ke imped-ulaula te keep-epuan dan dut te mence etew ne mibpelambas te Lalag te Eleteala rengan. Egkehalew kew ke ini se egketemanan niyu ne id-idangdang kew su dekelà se lalew ne ebpenerengen niyu diyà te langit.

<sup>24</sup> Ugaid ne mekeruanduan kew ne mence kewasa guntaan, su nepehinlelawan niyu ke meupiya ne egketemanan niyu kayi.

<sup>25</sup> Mekeruanduan kew ne ebpengebulung guntaan, su ruen timpu ne egkevital kew keuremà.

Mekeruanduan kew ne nengehalew guntaan, su ruen timpu ne egkemutu kew

wey ebpekesinehew kew keuremà.

<sup>26</sup> Mekeruanduan kew ke edeyuen dut te langun ne mence ruma niyu,

su ini se mid-ulaula te keep-epuan dan dengan, su mibpendeyù dan ke mibèbeelan dà ne mibpelambas te Lalag te Eleteala.”

*Ke Penurù ni Hisus Mekeatag te Kedlimù Ta te Menge Kunterà Ta (Mateo 5:38-48; 7:12a)*

<sup>27</sup> Ne migkahi pà maa si Hisus te, “Iyan ku igkahi keniyu, langun niyu ne edtaan te telinga niyu, ne limui niyu ke minge kunterà niyu, ne upiani niyu ke hinawa niyu rut te egkengeepes keniyu.

<sup>28</sup> Ipengeningeni niyu te ebpeneuven te Eleteala ke minge etew ne ebpenrawak keniyu, ne ke minge etew ne ed-ayuaya keniyu ne ipengeningeni niyu sikandan.

<sup>29</sup> Embiya ruen etew ne edtabpi te naping niyu ne kenà kew bangen ke edtebpian din ke divaluy. Embiya ruen etew ne ed-ahew te kumbalà niyu ne kenà kew bangen ke egkuan din ke belagkas niyu ne kemisita.

<sup>30</sup> Embiya ruen etew ne ebuyù keniyu ne behayi niyu, ne embiya ruen etew ne egkuwa te keleglehan niyu ne kenà niyu en ewia.

<sup>31</sup> Nè misan engkey ne egkiyuhan niyu ne ibped-ulaula te minge etew keniyu, ne iring ketà dema se ul-ulaa niyu riyà te kandan.

<sup>32</sup> “Embiya iyan niyu rà igkelimù ke minge etew ne egkelimù keniyu, ne meambe ke ebpenareng kew te kebpenaub te Eleteala keniyu? Su misan ke minge beredusa ne igkelimù dan dema ke minge etew ne egkelimù kandan.

<sup>33</sup> Ne embiya iyan niyu rà ed-upianan ke minge etew ne ed-upiya keniyu, ne meambe ke ebpenareng kew te kebpenaub te Eleteala keniyu? Su misan ke minge beredusa ne ed-upiya ran dema rut te minge etew ne ed-upiya kandan.

<sup>34</sup> Ne embiya iyan niyu rà ebpeutangen ke minge etew ne kenà duwaruwa ne ebpekevayad, ne meambe ke ebpenareng kew te kebpenaub te Eleteala? Su misan ke minge beredusa ne ebpeutang dema rut te minge beredusa embiya kenà duwaruwa ne ebpekevayad.

<sup>35</sup> Ugaid ne sikiyu, iyan ku igkahi keniyu ne limui niyu ke minge kunterà niyu ne upiani niyu ke ed-ul-ulaan niyu kandan. Embiya ebpeutang kew ne kenà niyu pegitunga te kebpevayad ne ketà ne rekelà se idlalew keniyu. Su embiya ini se ed-ul-ulaan niyu, ne egkekita kayi te keniyu te sikiyu ne minge anak en te Eleteala ke mepmepurù te langun. Su melimù ke Eleteala misan diyà te minge etew ne warà te hinawa ran ke tavang din wey ke minge etew ne meraat se ulaula ran.

<sup>36</sup> Tembù be keyru kew te ruma ne etew iring dut te kegkeyru te Amey niyu riyà te langit kayi te langun niyu.”

*Ke Penurù ni Hisus Mekeatag te Kedsawey ta (Mateo 7:1-5)*

<sup>37</sup> Ne migkahi pà maa si Hisus te, “Kenà kew edsawey te ruma ne etew, ne kenà kew edsewayan te Eleteala. Kenà niyu imesara te egkahi te nevenaran ke ruma ne etew ne kenà ed-imasad ke Eleteala te egkahi te nevenaran kew. Pesehara niyu ke salà te ruma ne etew ne ebpeseharen te Eleteala ke salà niyu.

<sup>38</sup> Behayi niyu ke ruma ne minge etew ne ebeyhan kew rema te Eleteala. Ne iyan din ibehey keniyu ne ed-ip-ipenuen din ne ed-es-eseken din ne arà pà ne eberundtuwan din ke ibusbus ketà te edtehuan niyu. Su ke kerekelà te ibehey niyu te ruma ne etew ne iyan ded kerekelà te ibehey te Eleteala keniyu.”

<sup>39</sup> Ne mibpenempità si Hisus te, “Embiya ruen etew ne pisek, ne kenà egkepakey ne edtuyuk te etew ne pisek ded dema. Su embiya elin dan pisek ne ebpeked-unung dan se egkeulug diyà te lepak.

<sup>40</sup> Ne warà etew ne ebpepenurù pà ne iyan en mepurù dut te ebpenurù kandin, ugaid ne embiya netamat din en ke langun ne impenurù kandin ne ebpekeiring en dut te mibpenurù kandin.”

<sup>41</sup> Ne ruen pà maa migkahi ni Hisus, ke sikandin te, “Meambe ke edturikan nu ke salà te ruma nu ne iring te pisek, ugaid ne warà ma te hinawa nu te ruen salà nu ne iring te gedgeran kerekelà din?”

<sup>42</sup> Engkey se kedtikà nu te egkahi riyà te ruma nu te id-awà nu ke peseke din, ugaid ne ruen ma nekepeseke kenikew ne iring te gedgeran kerekelà din ne kenà nu egketuusan? Engkey en ayan ne kedtarùtarù! Unai nu pà te ed-awà ke nekepeseke kenikew ne iring te gedgaran ne an pà ne ebpekekita ke en ne ebpengawà te peseke te ruma nu.”

*Ke Ulaula te Menge Etew ne Ebpekeiring te Bahas te Kayu (Mateo 7:16-20; 12:33-35)*



<sup>43</sup> Duen pà maa migkahi ni Hisus, ke sikandin te, “Ke kayu ne meupiya se kegueyhuery rin, ne kenà ebahas te meraatey. Ne iring ded maa ke kayu ne ruen sakit din, ne kenà ebahas te meupiya.

<sup>44</sup> Su piya engkey ne kayu ne kayi nu egketueni te bahas din. Su kenà ebahas ke merevuaya te igira.

<sup>45</sup> Ne engketà ded dema se menge etew,” ke si Hisus, “su ke etew ne meupiya se ulaula rin, ne meupiya rema se kedlalag din su meupiya se intahù te hinawa rin. Ugaid ke etew ne mereatey se ulaula rin, ne mereatey rema se kedlalag din su iyan din intahù te hinawa rin ne mereatey. Su piya engkey se intahù te etew te hinawa rin ne ini se egemew te bèbà din.”

*Ke Deruwa ne Etew ne Ebevaley  
(Mateo 7:24-27)*

<sup>46</sup> Ne ruen pà lavew migkahi ni Hisus, ke sikandin te, “Meambe ke layun a niyu ed-ingerani te ‘Kerenan’, ugaid ne kenà kew ma eduma rut te igkahi ku keniyu?

<sup>47</sup> Idtarem ku keniyu ke engkey se egkeiringan dut te menge etew ne ed-uvvey kedì ne ebpemineg te lalag ku ne ebperumdumaan dan.

<sup>48</sup> Embiya idsempita ta ne iring sikandin te etew ne riyà mebevaley te mevaher. Pehaney ne migkekalut sikandin te merallem ne midtehuan din te rekelà ne batu ne arà pà ne imbunsud din ke pelaus. Nepasad ini se valey ne midalem ke wayig ne nerumpak te wayig ini se valey, ugaid ne warà mekugal ke valey su midteghaman ma.

<sup>49</sup> Ugaid ne ke etew,” ke si Hisus, “ne ebpemineg kedì ne kenà din ebperumdumaan ke lalag ku ne iring sikandin te etew ne riyà mebevaley te ebpengsal-esalen dà diyà te pantad. Nepasad ini se valey ne nerumpak te dalem, ne arà dà ne nerundus en ne newahey en.”

## 7

*Neulian ni Hisus ke Edsugsuhuen dut te Senge Etew ne Mepurù  
(Mateo 8:5-13)*

<sup>1</sup> Nekeipus si Hisus se ebpenurù te menge etew ne mibpendiyà sikandin te inged ne Kapirnavum.

<sup>2</sup> Duen ketà te inged kepitani ne kenà Hudiyänen ne egkamal te menge sundaru ne ruen edsugsuhuen din ne meama ne egkepesangan su iyan deruwa se kebpatay. Ne dekelà te hinawa te kepitani ini se edsugsuhuen din.

<sup>3</sup> Guna su nerineg dut te kepitani se kebpemawì ni Hisus te daru ne midsuhù sikandin te menge pekilukesen ne Hudiyänen su ebpeengayen ki Hisus su apey meulii ini se edsugsuhuen din.

<sup>4</sup> Nekeuma ran kayi te ki Hisus ne midsebenar dan mibpemuyù kandin se egkahi te, “Metidtevangi arà se kepitani ne dait ne edtevangani nu sikandin.

<sup>5</sup> Ne kenà deisek dà ke hinawa rin kayi te langun tew ne menge Hudiyänen, su sikandin se mibpeitindeng ketà te valey ne ebpedgian tew.”

<sup>6</sup> Ne miduma en si Hisus kandan.

Iyan dan kebpeelinguma riyà te valey te kepitani ne impesinuhung en dut te kepitani te menge ruma rin ne ini se impekahi rin dut te midsinuhung ki Hisus, “Mama,” ke sikandin, “misan kenà ke en edlaus diyà te valey ku su kenà a dait ne ebpepenayanikan nu.

<sup>7</sup> Tembù be warà a medsinuhung keykew su kenà a rema edait. Dekelà se gehem nu ne misan igkahi nu te, ‘Meulii sikandin,’ ne egkeulian ini se edsugsuhuen ku.

<sup>8</sup> Nesebutan ku ini su siaken ne ruen mepurù ku ne meperumaruma a kandin. Ne ruen menge sundaru ne egkemalan ku ne meperumaruma ran kediey. Su egkahi e rà te, ‘Diyà kew,’ ne iring dan te ebelesiken. Ne engketà ded ke egkahi a te, ‘Kayi kew,’ ne seperék mata ne kayi ran en. Ne embiya edsuhuen ku ini se edsugsuhuen ku te, ‘Ul-ulaan nu ini,’ ne arà en iya rema se ed-ul-ulaan din. Iring de be kayi misan edlelehan nu rà ne egkeulian ini se sugsuhen ku.”

<sup>9</sup> Nerineg ni Hisus ini, ne neinuini nevenar sikandin. Ne mibengkiring sikandin dut te merakel ne etew ne ed-eguyut kandin ne migkahi en te, “Igkahi ku ini te warà pà mekeuma te etew ne iring kayi kerekelà se sarig din kediey misan kayi te langun ne kevuwaran ni Israyil!”

<sup>10</sup> Mid-uli en ini se impesinuhung ki Hisus, ne guna su nekeuma ran diyà te valey te kepitani ne neulian en ini se edsugsuhuen.

*Mibanew ni Hisus ke Anak ne Meama Dut te Valu ne Meritan*

<sup>11</sup> Nengepiraan be maa ketà ne mibpendiyà si Hisus te inged ne ed-ingaranan te Nain. Ne denda se minge etew ne miduma kandin abpeg ke minge edumdumaan din.

<sup>12</sup> Guna su ebpeleinguma ran ketà te belvelakan te inged ne nekesinuhung dan te merakel ne etew ne ebelanting te minatey. Ini se ebelentingen ne minatey ne budtung ne anak ne meama te meritan ne valu, ne merakel se minge etew riyà ebpuun te inged ne miduma kayi te valu te edleveng.

<sup>13</sup> Nekita ni Hisus ke iney rut te minatey ne neyru nevenar sikandin ne migkahi en te, "Kenà ka edsinehew, Ayà."

<sup>14</sup> Ne mid-uvey en si Hisus ne migeweran din ke lungun ne mid-itindeg ke minge meama ne ebelanting. Ne migkehiyan ni Hisus ke minatey te, "Mama, enew ka!"

<sup>15</sup> Arà dà ne mid-enew en ke minatey ne midlalag en. Ne migkahi en si Hisus kayi te iney rin te, "Ini en, Ayà, ke anak nu."

<sup>16</sup> Langun dan te nekekita ne netemenengan, ne nekereyù dan te Eleteala se egkahi te, "Ini pè be ne neumaan ki te metmetehel ne ebpelembas te Lalag te Eleteala. Benar, impekita te Eleteala ke kedtavang din te ebpeleyu dut te minge etew ne mibpemili din."

<sup>17</sup> Nekeeneb en ini se mid-ulaula ni Hisus kayi te lusud te Hudiya wey riyà dema te nekelingut ne inged.

*Ke Menge Midsuhù ni Juan Diyà te ki Hisus  
(Mateo 11:2-19)*

<sup>18</sup> Guna su nerineg dut te minge edumdumaan ni Juan ke Ebpebunyang ini se langun ne mid-ulaula ni Hisus ne imperineg dan ki Juan diyà te bilengguan. Ne midtawag si Juan te deruwa rut te edumdumaan din,

<sup>19</sup> ne midsuhù din diyà te ki Hisus te ebpeinsà kandin te, "Menu, sikuna ke impesabut ni Juan ne ibpepengkayi te Eleteala etawa ruen duma pà ne egkepenareng dey?"

<sup>20</sup> Nekeuma ran ne migkahi ran te, "Iyan dey lakew te mibpepengkayi ne midsuhù key ni Juan ke Ebpebunyang su ibpeinsà kenikew ke embiya sikuna en iya ke impesabut din ne ibpepengkayi te Eleteala etawa ruen ruma pà ne egkepenareng dey?"

<sup>21</sup> Ne arà dema ne hewii ne ruen merakel ne etew ne neulian ni Hisus dut te minge daru ran wey minge sakit. Mibpenegseg din ke minge vusew ne edamung-amung kandan, ne impeulit din ke kebpekekita rut te minge pisek.

<sup>22</sup> Ne migkahi si Hisus diyà te minge suhù ni Juan te, "Uli kew en diyà te ki Juan ne penudtula niyu kandin ini se nekita niyu ne mid-ulaula ku wey ini se nerineg niyu ne migkahi ku. Iyan niyu peketueni kandin ne kayi ebpuun te kediey ne nekeulit en se kebpekekita rut te minge pisek, nekeipanew en ke minge pungkù, neulian en ke minge kevuwaen, nekeringen en ke minge bengel, neuyag en ke minge minatey wey impesabut ku ke Meupiya ne Tutdul diyà te minge ayuayu.

<sup>23</sup> Ne peketueni niyu kandin," ke si Hisus, "te dayirayi nevenar ke etew ne kenà eduaruwa kediey."

<sup>24</sup> Guna su mid-uli en ke minge suhù ni Juan ne midlalag en si Hisus mekeatag ki Juan diyà te denda ne minge etew ne nevrurun, ke sikandin te, "Ketà te kinependiyà niyu te ki Juan diyà te tanà ne kenà egkeubpaan te minge etew, ne engkey se mibpenareng niyu ne egkekita niyu? Maa, ebpenareng kew te ebpekekita kew te etew ne iring te karan ne edsemseren te keramag?"

<sup>25</sup> Engkey ve iya, etew ne mibevelegkas te nepenù te rayandayan? Kenà buwa su ke etew ne mibevelegkas te iring ketà ne meupiya nevenar se egketemanan din ne riyà niyu rà egkekita te turuhan te minge ratù.

<sup>26</sup> Engkey ve iyan se mid-intengan niyu? Engkey, etew ne ebpelembas te Lalag te Eleteala? Arà imbe! Ugaid ne igkahi ku keniyu te arà se nekita niyu ne labi pà dut te etew ne ebpelembas te Lalag te Eleteala.

<sup>27</sup> Su si Juan ini ke impeuna kediey ne nekahi te Eleteala rut te impesurat ne Lalag din rangen ne egkahi te,

'Duen edsuhuen ku ne ibpeuna ku keykew  
te kebpekepenehana rut te minge etew te kebpekeuma nu.' "

<sup>28</sup> Ne migkahi pà maa si Hisus te, "Tentenuri niyu ini, warà pà etew ne in-anak kayi te ampew te dunya ne ebpekerepeng ki Juan ke Ebpebunyang. Ugaid ne misan ke kevevaan en ne etew dut te langun ne Edetuan te Eleteala diyà te langit ne labi pà ki Juan."

<sup>29</sup> Ini se migkahi ni Hisus ne nerineg en dut te langun ne etew ketà misan ke minge ebpepayad te buwis ne egkehiyan ne mekebeberedusa. Ne mibpehimbendar dan te metiditu ke minge petiralan te Eleteala ne mibpebunyang dan ki Juan.

<sup>30</sup> Ugaid ke minge Peresiya wey ke minge meyerù te penduan te Hudiyane ne mid-engkenà dan dut te ibpetuman te Eleteala kandan, ne warà dan mebpebunyag ki Juan.

<sup>31</sup> Ne migkahi pà maa si Hisus te, "Ini se minge etew te huntaani en, engkey se ebpeiringan ku?"

<sup>32</sup> Iring dan en iya te minge vatà ne ebpemimpinuu riyà te kevrunan. Ed-umew ini se senge puntuk diyà te minge ruma ran te,

'Middlepad key, ugaid ne warà kew medsayew!

Mibminudar key, ugaid ne warà kew medsinehew!'

<sup>33</sup> Iring din ded dema ke kebpekeuma ni Juan ke Ebpebunyag, su nekita niyu te edlimpas te kegkaan si Juan ne kenà dema ed-inum te piya engkey ne ebpeketevereg ne iyan niyu migkahi se, 'Midsuukan sikandin te vusew!'

<sup>34</sup> Ne mibpengkayi ke Impeanak te Menusiya ne nekita niyu te migkaan sikandin wey mid-inum ne iyan niyu maa migkahi se, 'Tengtengi niyu ma ayan se midelungan te bitil! Ne metehel ne ed-inum! Ne teleduma kayi te ebpevyad te buwis wey misan ke minge etew ne kenè en birang.'

<sup>35</sup> Ugaid," ke si Hisus, "ketà te minge ulaula te minge etew ne tidtu ne mibperetiyaya te Eleteala ne nekeheram te limù din ne egkekita te utew metau ke Eleteala te langun ne petiralan din."

*Diyà si Hisus te Baley ni Simon, senge Etew ne Peresiya*

<sup>36</sup> Duen senge etew ne Peresiya ne mid-inggat ki Hisus diyà te valey rin su riyà din ebpekeena. Ne miduma si Hisus kandin ne nekeuma ran ne mibpeer-erungutey ran en se egkaan.

<sup>37</sup> Ketà te inged ne ruen senge etew ne meritan ne warà keeleran din. Nerineg din se riyà egkaan si Hisus te valey te Peresiya ne mibpendiyà sikandin se ed-ewit te pelanaan ne mibeelan te elibastru ne midtehuan te periyemut ne mepurù nevenar.

<sup>38</sup> Ne mid-uey ki Hisus dapit te paa rin se edsinehew ne nengeulug se luwà din kayi te paa ni Hisus. Ketà ne mibpunasan din en te bulvul din, ne mid-erekan din, ne mibusbunan din en kayi te lana ne meemut nevenar.

<sup>39</sup> Nekita kayi te Peresiya ne mid-inggat ki Hisus, ne ke hingginawa rin te, "Embiya benar ne ebpelambas te Lalag te Eleteala si Hisus ne egketueanan din ke engkey ini se meritan ne edsapu kandin wey ini se warà keeleran din!"

<sup>40</sup> Ketà ne migkahi en si Hisus kandin te, "Simon, duen igkahi ku kenikew."

"Ew, engkey?" ke si Simon. "Kehiya nu en."

<sup>41</sup> Ne mibpenempità si Hisus kandin, ke sikandin te, "Duen deruwa ne etew ne nekeutang diyà te etew ne ebpeutang te kureta ne lelima nehatus se mid-utang dut te senge etew, ne mid-utang ke seveka te lelima nepulù ne pirak.

<sup>42</sup> Ne guna su kenè en ebpevyad ini se deruwa ne mid-utang ne migkahi ke mid-utangan dan te, 'Beleharen en ke utang niyu.' Ne mid-insà si Hisus ki Simon te, 'Endei rapit kandan ini te deruwa se egkelimù nevenar ketà te meama ne mibpeutang kandan?'"

<sup>43</sup> Ke si Simon te, "Arà buwa se dekelà se utang din ne warà din en peveyari."

Ke si Hisus te, "Arà iya!"

<sup>44</sup> Midsineruwan ni Hisus ke meritan ne migkehiyan din si Simon te, "Iring ded be imbe kayi te meritan ini. Su mibpemenayik a kayi te valey nu ne warà a nu behayi te ibpepenlulù te paa ku misan ini ke betasan tew. Ugaid ne sikandin mulà ne midluluan din te luwà din ke paa ku ne mibpunasan din te bulvul din.

<sup>45</sup> Warà a nu en iya gelhelawa te ked-arek dut te kebpepemenayik ku te valey nu misan ini ke betasan tew. Ugaid ne ini mulà se meritan ne mibpulungpulung en mid-arek te paa ku igenat te kebpekeuma ku.

<sup>46</sup> Warà nu petehisi ke ulu ku te lana misan ini ke betasan tew te kebpeed-edatey. Ugaid ne sikandin mulà ne mibusbunan din ke minge paa ku te belielehà ne periyemut.

<sup>47</sup> Tembù migkahi ku ini," ke si Hisus, "su misan dekdekèlè se salà din ne mibpesahad en te Eleteala su dekdekèlè se limù ne impekita rin kediey. Ugaid ke etew ne reisek se keberedusaan din ne mibpesahad te Eleteala, ne reisek dema se limù ne ibpekita rin."

<sup>48</sup> Ne migkahi en si Hisus ketà te meritan te, "Mibpesahad en te Eleteala ke keberedusaan nu."

<sup>49</sup> Ne ruen netahù te hinawa rut te minge etew ne migkaan ketà ki Hisus, ke hingginawa ran te, "Engkey ini ne etew se ebpekepesehad te keberedusaan te etew?"

<sup>50</sup> Ne migkahi pà maa si Hisus ketà te meritan te, "Nekeliyu ke en te kedusa te Eleteala te salà nu su kenà duwaruwa ke kedsarig nu te Eleteala. Na, uli ke en, ne menu ma ke edumaan ka te Eleteala!"

## 8

*Ke Menge Meritan ne Midtuganur ki Hisus*

<sup>1</sup> Nengepiraan ne hewii ketà ne mibpendiyà si Hisus te ruma ne minge inged, dekelà wey deisek, ne mibpesebutan din dut te minge etew ketà ke Meupiya ne Tudtul mekeatag te Kedetui te Eleteala te minge etew. Ne miduma kandin ke sepulù wey deruwa ne edumdumaan din.

<sup>2</sup> Duen dema ketà minge meritan ne miduma kandan ne nengeulian te minge daru ran, ne ruma kandan ne pehaney ne mid-em-emungan te vusew ugaid ne midsegseg ni Hisus. Senge etew kandan ne si Maria (ne mid-ingaranan dema ki Magdalena) ne mibpenegsehan ni Hisus te pitu ne vusew.

<sup>3</sup> Ne ruen dema ketà si Juana ke esawa ni Kusa, ne midserihan ni Hirudis ke mepurù dan diyà te turuhan din. Si Susana rema wey merakel pà ne meritan ne miduma engki Hisus su edtuganur kandan te egenat te pentiyari ran.

*Ke Etew ne Midsawed te Beni*

(*Mateo 13:1-9; Marcos 4:1-9*)

<sup>4</sup> Iring ma te edtevr se minge etew ne mibpengkayi te ki Hisus ne kayi egenat te ebalàbalà ne minge inged. Guna su merakel se nevrurun ketà ne mibpenempità si Hisus kandan se egkahi te,

<sup>5</sup> “Ruen etew ne mibpendiyà te pengengewiran din su edsawed te benì. Ne ketà te kinesawed din ne ruen benì ne nengeulug diyà te kilid te ralan ne nengehiekan te etew ne midtuktuk en te minge pepenuk.

<sup>6</sup> Duen ruma ne insawed din ne riyà nengeulug te kebetuwan. Midtuvù ini ugaid ne mehaan dà ne neebmas su edsahad dà ke wayig.

<sup>7</sup> Duen dema insawed din ne riyà nengeulug te sepinitan. Ne midtuvù ini ugaid ne migkubmusan en dut te sepinit.

<sup>8</sup> Duen ded dema insawed din ne riyà nengeulug te meupiya ne tanà ne midtuvù ini ne nekevahas te meupiya su mibpengupiya nevenar se bahas din.”

Ne migkahi pà maa si Hisus te, “Itaan niyu ve ke telinga niyu kayi te nerineg niyu.”

*Midseyse ni Hisus ke Atag dut te Menge Sempità*

(*Mateo 13:10-17; Marcos 4:10-12*)

<sup>9</sup> Ne mid-insà ke minge edumdumaan din te, “Engkey se meana rin ini se sempità ne imperineg nu kenami?”

<sup>10</sup> Ne migkahi si Hisus kandan te, “Sikiyu en imbe se ebpesebuten te Eleteala rut te warà din pà impayag te piya engkey ne etew mekeatag dut te kedatù din te minge etew. Ugaid ke ruma ne minge etew ne ibpepevayà te sempità su apey, misan edtengteng dan, ne kenà dan ebpekekita; ne misan egkerineg dan, ne kenà dan egkesebutan ke meana rin.”

*Mibpesebutan ni Hisus ke Meana dut te Sempità Mekeatag te Etew ne Midsawed te Beni*

(*Mateo 13:18-23; Marcos 4:13-20*)

<sup>11</sup> Ne migkahi pà maa si Hisus dut te edumdumaan din te, “Ini se meana rin arà se sempità ku: Ke benì ne insawed dut te etew ne arà ke Lalag te Eleteala.

<sup>12</sup> Ke ralan ne neuluhan te benì ne arà ke minge etew ne nekerineg te Lalag te Eleteala, ugaid ne middegdehawan ni Setanas ke datù te pekaid te ed-ahew ke lalag su apey kenà dan mekeperetiya ne kenà dan egkepeliyu.

<sup>13</sup> Ne ke kebetuwan ne neuluhan te benì ne arà ke minge etew ne nekerineg te Lalag te Eleteala ne ingkehalew ran te ebpepimineg ne mibperetiya ran, ugaid ne mehaan dà se kineperetiya ran su warà mekedalid te hinawa ran. Ne wey ran penggerami ni Setanas dut te peretiya ran ne midlekà dan en.

<sup>14</sup> Ne ke sepinitan ne neuluhan te benì ne arà ke minge etew ne nekerineg te Lalag te Eleteala, ugaid ne gewii ran te ebpetindalan ne merakel se egkubmus dut te lalag ne nerineg dan iring te kemutuwan dan te ked-ubpà-ubpà, ne kegkelilingey ran dut te minge kearen dan, wey ke pegungayà te kebpata te nanam, ne warà dan en mekeuma te kebehas dan.

<sup>15</sup> Ne ke meupiya ne tanà ne neuluhan te benì, ne arà ke minge etew ne nekerineg te Lalag te Eleteala ne midtelimà dan ne warà dan midsanggal se ebperetiya. Ne mibpenemtemanan dan te edtuman taman te nekeuma ran te kebehas.”

*Ke Sempità ni Hisus Mekeatag te Sulù ne Mibpelengkevan*

(*Marcos 4:21-25*)

<sup>16</sup> Ne migkahi en maa si Hisus te sempità kandan te, “Warà etew ne midtemtem te sulù ne ebpelengkevan din etawa ibperalung din. Ugaid ne riyà din ibpeluukluuk te saag su apey egkerayahan ke etew ne edlusud.

<sup>17</sup> “Iring din ded dema,” ke si Hisus,

“langun te netelevan guntaani

ne ebpekepehawahawa red

dut te akir din ne hewii.

Ne langun ne impegelesà

ne egkepayahan ded.

<sup>18</sup> Itaan niyu ve ke telinge niyu,” ke si Hisus. “Su ke etew ne idtahù din te hinawa ke ibpesabut kandin te Eleteala, ne ed-umanan pà te Eleteala ini se kebpekesabut din. Ugaid ke etew ne kenà din idtahù te hinawa ke ibpesabut kandin te Eleteala, ne egkeawà arà se reisek ne kunaan din ne nesebutan din en.”

*Ke Impetimbang ni Hisus te Iney Rin wey Menge Suled Din*

*(Mateo 12:46-50; Marcos 3:31-35)*

<sup>19</sup> Nekeuma en ke iney ni Hisus wey ke menge ari rin ne meama, ugaid ne warà dan mekeuvey ki Hisus su neterektek te etew sikandin.

<sup>20</sup> Ne ruen migkahi ki Hisus te, “Ke iney nu wey ke menge ari nu ne riyà te lihewangan su ebpekibalak dan keykew.”

<sup>21</sup> Ugaid ne migkahi si Hisus dut te menge etew ketà te, “Iyan ku iney wey menge ari ne ke menge etew ne ebpemingeg te Lalag te Eleteala wey ebperumdumaan dan.”

*Impeengked ni Hisus ke Keramag Diyà te Ranew*

*(Mateo 8:23-27; Marcos 4:35-41)*

<sup>22</sup> Senge hewii ketà ne migkehiyan ni Hisus ke edumdumaan din te, “Kuwa kiyu en su ed-apet kiyu riyà te ripag te ranew.” Arà dà ne mid-untud dan te avang ne mibpuridtas dan en.

<sup>23</sup> Guna su ed-avang-avang dan en ne midsaharan si Hisus te turug. Ne midtekewtekw en se mevandes ne keramag kayi te ranew ne nesimbunan en te wayig ke avang dan, ne reisek samà ne egkeherà dan en.

<sup>24</sup> Mid-uvey ran si Hisus ne mibpukew ran en se egkahi te, “Meyterù, egkeherà ki en!”

Ne mid-enuw si Hisus ne pineengked din en ke keramag wey ke dekelà ne baleg. Arà dà ne mid-eneng-eneng en ke keramag wey baleg ne segugunee ne midlengen ke ranew.

<sup>25</sup> Ne migkehiyan din en ke menge edumdumaan din te, “Meambe ke nengeandek-andek kew? Maa kenà kew ves edsarig kediey?”

Ne neandek-andek dan ne neinuinu ran su mibpein-insee ran te, “Engkey ini ne etew? Su misan ke keramag wey menge baleg ne ebperumaruma rut te lalag din!”

*Neulian ni Hisus ke Meama ne Midsuukan te Menge Vusew*

*(Mateo 8:28-34; Marcos 5:1-20)*

<sup>26</sup> Ne nekerunggù en ensi Hisus dut te telipag te pruvinsiya te Geliliya, diyà te sakup te inged te menge Gerisiyanu.

<sup>27</sup> Guna su migaun en si Hisus ketà te avang ne midsinuhung en sikandin te senge etew ne midsuukan te vusew ne andang ne mehinged ketà te Gerisiyanu. Ugaid ne neuhet en ne warà mid-uli sikandin te ubpaan din su kayi en mid-ubpà te menge surung ne penlelevangan ne warà en seseberen din.

<sup>28</sup> Nekita rin dà si hisus ne midrawak en ne midlumpeng diyà te sineruwan ni Hisus ne mibensag en se egkahi te, “Sikuna ini si Hisus ke Anak te Eleteala ne warà repenge din. Engkey ma se kememeniyà nu kediey? Isapà nu te etuvangan te Eleteala te kenà a nu pemekeiri!”

<sup>29</sup> Ini se mibuyù din su migkehiyan ni Hisus arà se vusew te ibpeawà diyà te meama. Su kenà kepipira rà ewita arà se meama dut te vusew ne ebpemekaid kandin. Ne misan ebekuen ke paa rin wey ke velad din te kedina ne ebentayan te menge etew ne ebpengevidtew rin ded ne ed-ewiten en maa sikandin dut te vusew diyà te tanà ne kenà egkeubpaan te etew.

<sup>30</sup> Ne migkehiyan en ni Hisus sikandin te, “Engkey ma se ngaran nu?”

Ne midtavak te, “Iyan ku ngaran ne si Selasà.” Tembù nekahi rin ini su medmerakel ne vusew se midsuuk kandin.

<sup>31</sup> Ne mibpemuyù dan ki Hisus te kenà dan ibpeawà ni Hisus se ibpependiyà te egkembusan ne warà edtemanana te keralem din.

<sup>32</sup> Ne ruen ketà te uvey medmerakel ne bavuy ne ebpemenumal diyà te kelendihan, ne mibpemuyù ke menge vusew ki Hisus te dutun dan ibpepeawuk te menge bavuy ne midtuhutan dema ni Hisus.

<sup>33</sup> Ketà dà ne mid-ewaan dan en ke meama ne mibpengasuk dan en dut te menge bavuy, ne mibpemelelahuy en ke menge bavuy se ed-umpak diyà te dempilas ne nengelened dan en diyà te ranew.

<sup>34</sup> Guna su nekita ini rut te menge etew ne edtuganur ketà te menge bavuy ne mibpemelelahuy ran en su impemenundtul dan ini diyà te inged dan wey ke nekeerivey ne pengengewiran.

<sup>35</sup> Nerineg ini rut te menge etew, ne mibayaan dan en su midsusi ran. Nekeuma ran ketà te ki Hisus ne nekita ran en ke meama ne midsuukan te merakel ne vusew pehaney ne riya mibpinuu te rengdengaan ni Hisus, ne mibevelegkas en ne nekeulit en ke itungan din. Ketà ne nengeandek dan nevenar.

<sup>36</sup> Ne ini se menge etew ne nekekita rut te mid-ulaula ni Hisus ne impenundtul dan en dut te ruma pà ne etew ke ned-ulaula rut te meama ne midsuukan te menge vusew.

<sup>37</sup> Ne langun ne mehinged ketà te Gerisiyanu ne mibpemuyù ki Hisus te menu med-awà sikandin su neandek dan nevenar. Arà dà ne midlived en si Hisus diyà te avang din su ed-awà en.

<sup>38</sup> Ne mibuyù ini se meama ne neulian en diyà te ki Hisus te, "Egkiyug a ne ebpekiduma kenikew."

Ugaid ne warà imperuma ni Hisus su impeuli din se egkahi te,

<sup>39</sup> "Uli ke en diyà te keniye ne ipenundtul nu ini se meupiya ne mid-ulaula te Eleteala kenikew." Arà dà ne mid-uli en ini se meama ne mibpemenundtul en diyà te langun ne mehinged ini se meupiya ne mid-ulaula ni Hisus kandin.

*Neulian ni Hisus ke anak ni Jairo wey ke Meritan ne Mid-amì dà te Belegkas ni Hisus (Mateo 9:18-26; Marcos 5:21-43)*

<sup>40</sup> Nekeampil be maa si Hisus kayi te mibpuunan din ne migalewhalew kandin ke merakel ne menge etew ne nevurun ketà su daan dan en ne edtahad kandin.

<sup>41</sup> Duen ketà meama ne ed-ingaranan ki Jairo, senge etew ne egkeunutan diyà te valey ne ebpengedian te menge Hudiyanen te penduan dan. Mid-uvey sikandin ki Hisus ne midlumpeng diyà te etuvangan din se ebpemuyù ki Hisus te ebperuma riya te valey rin.

<sup>42</sup> Su ruen budtung ne anak din ne sepulù buwa wey deruwa se rahun din ne edaru ne edtiviltilvil te kepatay.

Miduma si Hisus kandin ne gewii ran te ed-ipanew ne egkeasek kayi te ki Hisus ke merakel ne etew.

<sup>43</sup> Ne ruen ketà meritan ne nerasey nevenar su nekedsepulù en wey deruwa ne rahun se kebpemundasa rin te lengesa ne kenà egkeengked. Misan mibpevewian din en te merakel ne terevawì ne warà dan megaga.

<sup>44</sup> Mibpenelektelek en sikandin diyà te uriyan ni Hisus ne mid-amì din dà ke belegkas ni Hisus ne netibpek en ke kebpemundasa rin.

<sup>45</sup> Ne migkahi si Hisus te, "Engkey ma se mid-amì kediey?"

Guna su mibparew ran langun ne migkahi si Pedro te, "Engkey se kegketuani nu, Meyerù, te merakel ne etew ne ebpekelipit kenikew?"

<sup>46</sup> Ne migkahi si Hisus te, "Duen iya mid-amì kediey su neheram ku ke gehem ku te kebpemawì ne midlihawang kediey."

<sup>47</sup> Guna su nerineg kayi te meritan ne mid-amì ki Hisus te netuenan din, ne inlayanglayang ma sikandin te kerker. Ne mid-uvey rin si Hisus ne midlumpeng en diyà te sineruwana din ne intarem din en ketà te merakel ne etew ke maan ke mid-amì sikandin ki Hisus wey arà dà ne neulian en ke daru rin.

<sup>48</sup> Ketà ne migkahi si Hisus kandin te, "Bayi, neulian ke en su sabap dut te kinesarig nu kediey. Uli ke en be ne barasbaras ka dut te keresayan nu."

<sup>49</sup> Ne gewii te ebpekidlalag pà si Hisus dut te meritan ne ruen en nekeuma ne ibpetundug ki Jairo, ne migkahi te, "Ke anak nu ne nekerudtanà en. Kenà ta en ebpengen en si Hisus."

<sup>50</sup> Guna su nerineg ini ni Hisus ne migkehiyan din si Jairo te, "Kenà ka kelagew kayi te anak nu, ugaid ne sarig ke rà kediey ne egkeuyag ded sikandin."

<sup>51</sup> Guna su nekeuma ran diyà te valey ni Jairo ne iyan din dà impelusud ne si Pedro, wey ke teleari si Santiago ki Juan, wey ke menge lukes dut te vatà.

<sup>52</sup> Ne langun ne menge etew ketà te valey ne ebpeninehew wey ebpemenderawit dut te vatà. Ne migkahi si Hisus kandan te, "Kenà kew pè ma edsinehew. Warà minatey ayan se vatà su nekelipereng dà."

<sup>53</sup> Nerineg den dà ke migkahi ni Hisus ne mid-engitan den dà sikandin su netuanan dan te minatey en ke vatà.

<sup>54</sup> Mid-uvvey rin ke vatà ne migeweran din ke velad din ne migkahi te, "Payi, enew ke en."

<sup>55</sup> Arà dà ne nekesunggud ke hinawa rin ne mid-enew en. Ne migkehiyan ni Hisus ke menge lukes din te pekeena ran ke anak dan.

<sup>56</sup> Ne nengegeyip nevenar ke menge lukes dut te vatà, ugaid ne mibenduan dan ni Hisus te kenà ibpepenudtul ini se ned-ulaula te misan entei en.

## 9

### *Impeipanew ni Hisus ke Sepulù wey Deruwa ne Edumdumaan Din (Mateo 10:5-15; Marcos 6:7-13)*

<sup>1</sup> Miburun ni Hisus ke sepulù wey deruwa ne edumdumaan din ne mibeheyen din sikandin te gehem te ebpekeuli te menge daru wey ebpekesegseg dan te menge vusew ne ebpenudtul dut te menge etew.

<sup>2</sup> Ne impeipanew rin sikandan su ebpesabut te menge etew mekeatag te kedatù te Eleteala kandan wey apey ran mekevawì dema te misan engkey en ne daru.

<sup>3</sup> Ne intelaan din kandan te, "Kayi te ked-ipanew niyu ne kenà kew ed-ewit te misan engkey en, kenà kew ewit te tuked, kemuyut, lutù, kureta etawa belegkas te idsambi niyu.

<sup>4</sup> Ne endei se valey ne ruen edtelimà keniyu ne ketà kew rà rateng taman te ked-awà niyu ketà te inged.

<sup>5</sup> Ugaid ne embiya ruen menge etew ne warà edtelimà keniyu, ne levundus kew ne pendegdaha niyu ke lipupuk diyà te paa niyu gewii te ed-awà kew ketà te inged dan. Su tuus ini te baag kandan ne kenè en be kilid keniyu ketà te hewii ne kedtimbang te Eleteala kandan," ke si Hisus.

<sup>6</sup> Ne mid-ipanew en ke menge edumdumaan ne mid-eneb dan te menge inged se ebpesabut te Meupiya ne Tudtul mekeatag te Eleteala wey mibpemawì dan dema te menge etew diyà te langun ne menge inged.

### *Ke Guhud Mekeatag te Kinepatey ni Juan ke Ebpemunyag (Mateo 14:1-12; Marcos 6:14-29)*

<sup>7</sup> Nekeeneb en ini se tudtul mekeatag te ed-ul-ulaan ni Hisus taman te nekeuma en diyà te ki Hirudis, ke egkeunutan dan diyà te Geliliya. Guna su nerineg ni Hirudis ne neliveg sikandin su ruen menge etew ne migkahi te nevanew red si Juan ke Ebpemunyag.

<sup>8</sup> Ruen дума ne migkahi te si Elias ini ke mibpelambas te Lalag te Eleteala rengan ne neuyag ded. Duen ruma pà maa ne migkahi te sikandin ini ne senge etew rut te menge mibpelambas te Lalag te Eleteala rengan ne neuyag maa.

<sup>9</sup> Ugaid ne iyan migkahi ni Hirudis te, "Embiya si Juan, ne impepungel ku en ke ulu rin. Ugaid ne engkey ve etawa ini se egkehiyen dan?" Ketà ne mibpemengà ni Hirudis se ralan te kegkekita rin ki Hisus.

### *Pinekaan ni Hisus ke Lelima nengivu ne Etw (Mateo 14:13-21; Marcos 6:30-44; Juan 6:1-14)*

<sup>10</sup> Guna su mibpenguli ke sepulù wey deruwa ne edumdumaan ni Hisus ne mibpenudtul dan kandin ke langun ne mid-ulaula ran. Ne pineruma rin ke edumdumaan din te sikandan dà diyà te inged ne ed-ingaranan te Betsaida.

<sup>11</sup> Nerineg kayi te merakel ne etew ne nevrurun se mid-ipanew en si Hisus ne midtelukan dan. Nekeuma ran ne migalàhalà dan ni Hisus ne mibpesebutan din kandan mekeatag te kedatù te Eleteala kandan, wey mibpemewian din ke menge etew ketà ne ruen daru rin.

<sup>12</sup> Guna su meapun en nevenar ne mid-uvvey en ki Hisus ke sepulù wey deruwa ne edumdumaan din se egkahi te, "Meapun en ini ne warà dè be menge etew kayi te inged ini. Iyan tumù ne ibpeipanew nu en ini se merakel ne etew su apey ran ebpekependiyà te endei se ruen menge valey rin ne ebpekekuwa ran te egkekaan wey egkeirehaan dan."

<sup>13</sup> Ugaid ne migkahi si Hisus te, "Sikiyu se ebpekaan kandan."

Ne migkahi ran te, "Ini se keytew ne lelima rà ne timan ne pan wey deruwa rà ne timan ne serà. Etawa ebpepemasen key nu te ibpekaan kayi te denda ne etew?"

<sup>14</sup> (Su ketà ne ruen menge lelima nengivu ne meama liyu pà ke meritan batà.)

Ne migkahi si Hisus dut te sepulù wey deruwa ne edumdumaan din te, "Pemepinuuwa niyu sikandin te idsenge puntuk te igkarang se menge lelima nepulù."

<sup>15</sup> Ne ketà ne impepinuu ran en ke langun ne menge etew.

<sup>16</sup> Ne migkuwa ni Hisus ke lelima ne timan ne pan wey ke deruwa ne timan ne serà ne midlingakà sikandin diyà te langit ne impeselamat din te Eleteala. Ne mibpenevitevi din ne imbehey rin en dut te menge edumdumaan din su ibpetukid dut te merakel ne etew.

<sup>17</sup> Migkaan dan langun ne nengevulung dan. Guna su nekeipus dan se egkaan ne mibpunpun dut te sepulù wey deruwa ne edumdumaan din ke nengsamà, ne iyan din nepunpunan ne sepulù wey deruwa ne binevey se nengepenù.

*Ke In-insà ni Hisus dut te Edumdumaan Din ke Engkey Sikandin*  
(Mateo 16:13-19; Marcos 8:27-29)

<sup>18</sup> Senge hewii maa ne mibpengeningeni si Hisus te sebseveka rin ne riyà te uvey rin ke menge edumdumaan din. Ne mid-insaan din sikandan te, "Engkey a kun ma riyà te pegitungan te menge etew?"

<sup>19</sup> Ne midtavak dan te, "Ruen egkahi te sikuna si Juan ke Ebpemunyag, ne ruen duma ne egkahi te sikuna si Elias ke mibpelambas te Lalag te Eleteala rengan, ne ruen pà ruma ne egkahi te sikuna ke seveka ne mibpelambas te Lalag te Eleteala rengan ne nevanew maa."

<sup>20</sup> "Ne menu sikiyu?" ke si Hisus. "Engkey e ma diyà te pegitungan niyu?"

Ne midtavak si Pedro te, "Sikuna si Kristu ke midtendù te Eleteala ne ebperetuen dut te menge etew."

<sup>21</sup> Ne migkehiyan ni Hisus tegtehami sikandan te kenà dan ibpenudtul ini te misan entei ne etew.

*Migkahi en ni Hisus ke Kebpatey Rin*  
(Mateo 16:20-28; Marcos 8:30-9:1)

<sup>22</sup> Ne migkahi pà maa si Hisus dut te menge edumdumaan din te, "Ke Impeanak te Menusiyà ne edresayen nevenar. Su ebpeheweran din dut te menge egkeunutan te Hudiyanan, ke menge mepurù te terebpepengesa wey ke menge meyerù te penduan. Ed-imetayan sikandin ugaid ne ketà te iketelu ne hewii ne egkevanew red."

<sup>23</sup> Ne migkahi pà maa si Hisus kandan langun te, "Embiya ruen etew ne egkiyug ne eduma kediey ne iyan iya se pekelipati rin ke kandin ne kiyug, ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin pà se keduma rin kediey.

<sup>24</sup> Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey te kebpemesabut dut te Meupiya ne Tudtul, ne ruen umur ne ibehey kandin ne warà edtemanan din.

<sup>25</sup> Su misan duen etew ne ebpekeangkun te langun kayi te ampew te dunya, ne warà lalaw rin embiya egkerasey ke himukud din diyà te apuy ne rakà.

<sup>26</sup> Embiya ruen etew ne igkeyeyai a rin wey ini se ibpenurù ku kayi te ini ne timpu ne merakel ne menge etew ne mekesesalà wey edsumpalit te Eleteala, ne igkeyeyai rema sikandin dut te Impeanak te Menusiyà ketà te kedlived din kayi te ampew te dunya. Su ketà ne hewii ne ruen raman din ne riyà ebpuun te Amey rin ne Eleteala, ne edumaan din dema rut te menge berekat ne suluhuen diyà te langit.

<sup>27</sup> Tentenuri niyu ini, ruen ruma tew kayi ne kenà pà ebpatey taman ketà te hewii ne egkekita ran ke Kedetui te Eleteala rut te menge etew."

*Midsalin Nevenar ni Hisus Ke Paras Din*  
(Mateo 17:1-8; Marcos 9:2-8)

<sup>28</sup> Guna su nekedsenge pedian en igenat te kinekahi ni Hisus ketà, ne pineruma rin en ensi Pedro, si Juan, wey si Santiago te edtekereg diyà te buvungan su ebpengeningeni.

<sup>29</sup> Gewii ni Hisus te ebpengeningeni ne nesalin ke paras dut te buked din. Ne mibpeneringsing ke velegkas din te keputi su warà misan engkey ne kayi te dunya ne ebpekemeputi iring kayi.

<sup>30</sup> Netekekew ran en dema nekita se deruwa ne etew ne ebpekidlalag ki Hisus, si Moises wey si Elias, ke menge mibpelambas te Lalag te Eleteala rengan.

<sup>31</sup> Ne mibpengandlag ke kesihey ran dema ne iyan dan edlelahen ki Hisus ne mehaan din en edtumana ke suhù kandin te Eleteala te ebpebpatey diyà te inged ne Hirusalim.

<sup>32</sup> Ugaid ne si Pedro wey ke menge ruma rin ne nekelipereng dan, ne guna su nekehimerat dan en ne nekita ran ke kesihey ni Hisus wey ke deruwa ne etew ne uvey rin.

<sup>33</sup> Ne gewii te ed-awà ke deruwa ne etew riyà te ki Hisus ne migkahi si Pedro te, "Meyerù, meupiya su kayi ki! Edsesabung key te tetelu, seveka keykew, seveka ki



Moises, wey seveka rema ki Elias.” (Ugaid ne matag be migkahi si Pedro te iring ketà ne warà din metueni ke engkey se egkehien din.)

<sup>34</sup> Ketà te edlalag pà si Pedro ne ruen sehulapun ne nekelikuvung kandan ne neandek dan te nesukub dan en te sehulapun.

<sup>35</sup> Ne ruen suwara ne ketà ebpuun te sehulapun ne migkahi te, “Ini ke Anak ku ne mibpemili ku. Pemineha niyu ke edlelahen din.”

<sup>36</sup> Neipus ke suwara ne iyan den dà nekita ne si Hisus. Ketà te arà ne hewii te kebpekeruma pà ni Hisus kandan ne warà dan kegkehiya ini se nekita ran te misan senge etew rà.

*Neulian ni Hisus ke Vatà ne Midsuukan te Busew*

*(Mateo 17:14-18; Marcos 9:14-27)*

<sup>37</sup> Ne midtundug ketà ne hewii ne midtupang dan ketà te buvungan ne merakel se menge etew ne mid-alew ki Hisus.

<sup>38</sup> Duen senge etew ne meama ketà te menge etew ne nevrurun ne midtawag ki Hisus se egkahi te, “Meyerù, menu ke intengi nu pà ini se anak ku ne meama su budtung dà ini.

<sup>39</sup> Ne ruen busew ne edsuuk kandin ne embiya egkeumaan sikandin ne edtekew ne egkuleyi ne egkehurivid ke lawa rin taman te eburvuraen ke bèbà din. Merasirasi edsuuk ke vusew kandin ne egkekeiran en sikandin.

<sup>40</sup> Ne mibpemuyù ku rut te edumdumaan nu te ibpesegeg ini se vusew, ugaid ne warà dan ma megaga.”

<sup>41</sup> Migkahi si Hisus te, “Sikiyu ne menge etew guntaan, warà kebperetiyyaya niyu te Eleteala wey menge suer kew!” ke sikandin. “Neuhet en se kebpekiduma ku keniyu, ne engkey pà taman se kebperetiyyaya niyu? Wey engkey pà taman se keuhet din se kedtigkeri ku keniyu?” Ne migkahi si Hisus dut te amey te vatà te, “Ipengkayi nu ke anak nu.”

<sup>42</sup> Ne gewii te ed-ewiten dan ke batà kayi te ki Hisus ne midsuuk en maa ke vusew kandin ne nepiley sikandin ne nehurivid en ke lawa rin. Ugaid ne midsegseg ni Hisus ke vusew, ne neulian din ke vatà, ne in-uli din diyà te amey rin.

<sup>43</sup> Ne negeyip ke langun ne menge etew ketà dut te mid-ulaula ni Hisus su nekita ran ke gehem te Eleteala.

*Migkahi pà maa ni Hisus ke Kebpatey Rin*

*(Mateo 17:22-23; Marcos 9:20-32)*

Kemuluwan pà ne egkegeyip ke langun ne menge etew rut te mid-ulaula ni Hisus ne migkahi si Hisus diyà te edumdumaan din te,

<sup>44</sup> “Itaan niyu ke telinga niyu kayi te ini se egkehien ku keniyu, ebpuliren ke Mipeanak te Menusiya dut te menge kunterà din.”

<sup>45</sup> Ugaid ne warà dan mesebuti ke meana rut te migkahi ni Hisus kandan, ne neandek dan te ed-insà.

*Mibpein-inseey Ke Menge Edumdumaan ni Hisus ke Engkey Kandan Se Mepurù*

*(Mateo 18:1-5; Marcos 9:33-37)*

<sup>46</sup> Ne mibpelelewawany ke menge edumdumaan ni Hisus ke engkey kandan se mepurù.

<sup>47</sup> Ugaid ne netuenan ni Hisus ke menge pegitungan dan, ne ketà ne migkuwa rin se vatà ne impeitindeg din diyà te uvey rin.

<sup>48</sup> Ne migkahi en te, “Misan engkey ne etew se edtelimà te vatà iring kayi su atag te keduma rin kediey, ne midtelimà dema sikandin kediey. Ne misan engkey ne etew ne edtelimà kediey, ne kenà siak dà se midtelimà din su misan ke Amey ku ne Eleteala ne midsuhù kediey ne midtelimà din dema. Su misan engkey en keniyu se kevevaan su sabap te egkesuhùsuhù te menge ruma rin, ne sikandin ke tidtu ne mepurù keniyu.”

*Ke Etew ne Kenà Egkunterà Kenitew ne Ruma Tew*

*(Marcos 9:38-40)*

<sup>49</sup> Ne migkahi si Juan ki Hisus te, “Meyerù, duen etew ne neuma rey ne ebpenegseg te vusew te ibpepevayà dut te gehem te ngaran nu, ne midawey rey sikandin su kenà tew ma ruma.”

<sup>50</sup> Ugaid ne migkahi si Hisus kandin te, “Kenà niyu sikandin edewaya su warà etew ne ebpekevaal te mekegeyip te ibpepevayà te ngaran ku ne melemu ne edlalag te mereatey mekeatag kediey. Su ke etew ne kenà ebpekidkunterà keytew ne ruma tew.”

*Warà Telimaa si Hisus diyà te Seveka ne Inged Lusud te Semeriya*

<sup>51</sup> Guna su egkereniyen en ke hewii te kebpekeawà ni Hisus kayi te ampew te dunya su ed-uli en diyà te langit ne mibpedtihel din ke hinawa rin te ebpendiyà te inged ne Hirusalim ne ketà ne migenat dan en.

<sup>52</sup> Duen menge etew ne pineuna rin su ebpemengà te egkeretengan dan ne migenat dan en. Mibpendiyà dan te seveka ne inged lusud te Semeriyà su ebpenehana te kebpekeuma en ni Hisus.

<sup>53</sup> Ugaid ne ke mehinged ketà ne warà midtelimà ki Hisus su netuenan dan se riyà edsinaru sikandin te inged ne Hirusalim.

<sup>54</sup> Guna su nekita ini rut te edumdumaan ne si Santiago wey si Juan se warà bes edtelimà kandan ne migkehiyan dan si Hisus te, "Menu, egkiyug ka, Meyterù, ne ebuyù key te apuy riyà te langit ne ibpetanà kandan su apey langun dan ne egkeherà?"

<sup>55</sup> Ugaid ne midlilingey si Hisus kandan ne midawey rin,

<sup>56</sup> ne midlevundus dan en diyà te ruma ne inged.

*Ke Menge Etew Ne Deisek dà ne Ebpekerumaen ki Hisus*

*(Mateo 8:19-22)*

<sup>57</sup> Gewii ran te ed-ipanew ne ruen etew ne migkahi ki Hisus te, "Eduma a kenikew misan ebpendei ka."

<sup>58</sup> Ne migkahi si Hisus kandin te, "Ke menge laku ne ruen takub ne ed-ul-ulian dan, ke menge pepenuk ne ruen kandan ne salag, ugaid ne ke Impeanak te Menusiya ne misan endei ad memekeirehà su warà ubpaan din."

<sup>59</sup> Ne migkahi maa si Hisus diyà te senge etew te, "Duma ka kediey."

Ugaid ne migkahi ini se meama te, "Ed-uli e pà ne embiya egkepupusan en te ebpeneytayen ke amey ku ne arà pà ne eduma a kenikew, su siaken ded se edleveng kandin."

<sup>60</sup> Ne migkahi si Hisus te, "Iyan nu pelevenga rut te minatey ke menge ruma nu ne kenà ebperetiyya kediey, ugaid ne iyan ku ibpehelevek kenikew ne ebpesabut dut te Meupiya ne Tudtul mekeatag te Kedatù te Eleteala te menge etew."

<sup>61</sup> Ne ruen pà maa senge etew ne migkahi te, "Mama, eduma a kenikew, ugaid ne ebpemehetew e pà diyà te bevelayan ku."

<sup>62</sup> Ne migkahi si Hisus te, "Embiya ruen etew ne edadu ne ebpulung edlilingey, ne kenà meupiya arà. Ne iring din ded dema," ke si Hisus, "ke etew ne eduma kediey, embiya ebpulung edlilingey dut te netehak din ne kenà sikandin edait ne egelevek dut te menge etew ne edetuan te Eleteala."

## 10

*Mibpemili si Hisus te Pitu Nepulù wey Deruwa ne Etew ne Impeipanew Rin*

<sup>1</sup> Guna su neipus arà ne ruen pitu nepulù ne ruma pà ne menge meama ne mibpemili te Kerenan ne impeipanew rin ini te igeheruwa riyà te langun ne menge inged ne mehaan din ebayai.

<sup>2</sup> Ne migkehiyan din sikandan te, "Medmarkel se menge etew ne warà pà meketelimà dut te Meupiya ne Tudtul mekeatag te Eleteala. Iring sikandan te melutuen ne pareyanan. Meluag nevenar ini se pareyanan, ugaid ne warà utew ruma rut te ebpengehani. Pemuyù kew riyà te Eleteala ke kemuney rut te pareyanan te medsuhù pà sikandin te ruma ne ed-ehani diyà te pareyanan din.

<sup>3</sup> Na, genat kew en, ugaid uram kew su edsuhuen ku sikiyu riyà te menge etew ne ebpekekaid, ne iring kew te nati te bilibili ne ebpekeseruk diyà te senge ingeren en ne mewalew ne asu.

<sup>4</sup> Kenà kew ewit te kureta, kempiru, etawa telumpà ne idsambi. Ne kenà kew edlanganlangan te ebpekibpengasak dut te langun ne menge etew ne egkeuma niyu riyà te ralan.

<sup>5</sup> "Ne piya engkey ki baley se egkepemenayakan niyu ne penehetiat kew se egkahi te, 'Menu ma ebpeneuwen te Eleteala ke langun ne ed-ubpà kayi te valey ini!'

<sup>6</sup> Embiya ruen ketà te valey ebperetiyya wey egalàhalà keniyu ne dekelà se penaub te Eleteala kandan. Ugaid ne embiya kenà kew ran egelhelaan ne kenà edlaus kandan ke kebpenaub te Eleteala.

<sup>7</sup> Ubpà kew ketà te valey ne ruen migalàhalà keniyu taman te egkeuma ke ked-awà niyu ketà te inged dan. Kenà kew ed-arat-arat te ked-ubpà niyu. Ne telimaa niyu misan engkey se idsaru ran wey ibpeinum dan keniyu su mehelalew ran en keniyu. Su ke etew ne egelevek ne dait ne edsukayan.

<sup>8</sup> "Piya endei ne inged se egkeumaan niyu ne ruen egalàhalà keniyu, ne telimaa niyu misan engkey se idsaru ran keniyu.

<sup>9</sup> Pemawii niyu ke munge ebpenderaru ketà te inged. Ne kehiya niyu rut te munge etew ketà te inged te mehaan en ke hewii te Kedatù te Eleleala kandan.

<sup>10</sup> Ugaid ne embiya ebpekeuma kew riyà te inged ne warà egalàhalà keniyu, ne pendiyà kew te ralan ne kahi kew riyà te munge etew te,

<sup>11</sup> 'Mibpemunas dey en ini se lipupuk te inged niyu ne mideket te paa rey su tuus ini te kenà en kilid kenami ketà te hewii ne kedtimbang te Eleleala keniyu. Ugaid ne iyan niyu tentenuri ne mehaan en ke gewii te Kedatù te Eleleala dut te munge etew.'

<sup>12</sup> Ugaid ne idtarem ku keniyu," ke si Hisus, "muna pà ke kesusai te Eleleala kandan ketà te hewii ne kedtimbang din te menusiya dut te kinerusa rin te munge mehinged riyà te Sudum."

*Ke munge Etew ne Warà Mebperetiyya ne Mekeandek-andek se Egketemanan Dan (Mateo 11:20-24)*

<sup>13</sup> Ne migkahi maa si Hisus te, "Sikiyu ne munge etew riyà te inged ne Kurasin, mekeandek-andek se egketemanan niyu! Ne sikiyu te inged ne Bitsaida, mekeandek-andek dema se egketemanan niyu! Su embiya ke munge etew rà diyà te munge inged ne Tiru wey Sudum se nekekita kayi te mekegeyip ne mid-ulaula ku riyà te keniyu ne neuhet dà ne mid-ewaan dan en ke meraat ne ulaula ran ne mibevelegkas dan en te sakù ne mid-ewuan dan ke ulu ran su tuus te nekedsendit dan.

<sup>14</sup> Ketà te hewii ne kedtimbang te Eleleala te menusiya ne iyan pà dekelà ke kesusai te Eleleala keniyu rut te mehinged te Tiru wey Sidun.

<sup>15</sup> Ne sikiyu rema ne munge etew diyà te inged ne Kapirnamum," ke si Hisus, "egkesuat kew perem ne ebpekesugkur diyà te langit, ugaid ne ibpetimbag kew riyà te apuy ne rakà."

<sup>16</sup> Ne migkehiyan ni Hisus ke pitu nepulù ne ebpeipenawen din te, "Ke munge etew ne ebpepining te ibpenurù niyu ne iring te iyan a ran ebpepiminehen. Ne engkey se kenà edtelimà keniyu ne iring te iyan a rin warà telimaa. Ne engkey se kenà edtelimà kediey ne iyan din warà telimaa ke Eleleala ne midsuhù kediey."

*Ke Kineuli Dut te Pitu nepulù wey Deruwa*

<sup>17</sup> Guna su mid-uli ke pitu nepulù wey deruwa ne midsuhù ni Hisus, ne nengesuatsuat dan nevenar! Migkahi ran diyà te ki Hisus te, "Kerenan, misan ke vusew ne mibperumaruma te lalag dey ke ibpeawà dey te ebpepevayà te ngaran nu."

<sup>18</sup> Ne migkahi si Hisus kandan te, "Nekita ku si Setanas ke datù te pekaid ne neulug diyà ebpuun te langit ne iring te kilat se kegkeulug din.

<sup>19</sup> Tentenuri niyu te mibehayan ku en sikiyu te gehem su apey misan ebpekehiek kew te uled etawa awa ne kenà kew egkevisaan. Kenà kew egketalew rut te kevaher te datù te pekaid, ne warè en ebpekekaid keniyu.

<sup>20</sup> Ugaid ne kenà iyan niyu igkehalew se ebperumaruma ke vusew keniyu," ke se Hisus, "ugaid ne iyan niyu ikehalew ne impesurat en te Eleleala ke munge ngaran niyu riyà te langit."

*Pinehalew si Hisus dut te Kedeseenan ne Ebpetuntul te Menusiya (Mateo 11:25-27; 13:16-17)*

<sup>21</sup> Ketà ne hewii ne mibpehalew si Hisus dut te kedlumun te Kedeseenan ne Ebpetuntul te menusiya ne mideyù din ke Eleleala se egkahi te, "Ew Amà, sikuna ke Kerenan diyà te langit wey kayi rema te ampew te dunya. Dekelà se kebpeselamat ku kenikew su impayag nu ke ketau nu rut te munge etew ne warà egketütuenan dan, ne in-eles nu ini se ketau nu rut te munge etew ne dekelà se netuanan dan. Uya, dekelà se kedeyù ku keykew, Amà, te ini se mid-ulaula nu su ini ke kiyug nu."

<sup>22</sup> Ne migkahi maa si Hisus dut te munge etew te, "Ke Amey ku se mibpesarig kediey te langun taman. Warà netau kedi te Anak a te Eleleala liyu rà te Amey ku ne Eleleala. Ne warà netau te Amey ku ne Eleleala liyu rà te siaken ne Anak din wey ke munge etew ne egkiyuhan ku te ebpayag mekeatag dut te Amey ku."

<sup>23</sup> Ne midsinaru si Hisus dut te munge edumdumaan din te sikandan dà se middlehan din te, "Dayirayi kew su nekita niyu ini se ebpeheleveke te Eleleala kedi.

<sup>24</sup> Su benar ini se egkehiyen ku keniyu te kenà pira rà se ebpelambas te Lalag te Eleleala wey ke munge mepurù dengan ne egkesuat perem ne ed-inteng kayi te nengekita niyu te gunteani en, ugaid ne warà dan en mekita. Ne egkesuat dan perem ne ebpepining kayi te nengeringe niyu te gunteani en, ugaid ne warà dan en mekerineg."

*Ke Sempità ni Hisus Mekeatag te Meupiya ne Etew ne Riyà Ebpuun te Inged ne Semeriya*

<sup>25</sup> Ne senge hewii maa ne ruen senge etew ne meyerù te penduan se mibpengkayi te ki Hisus su edseligkat perem te menge insà din. Ke sikandin te, “Meyerù, engkey se ed-ululaan ku su apey a mevehayi te umur ne warà edtemanan din?”

<sup>26</sup> Ne migkahi si Hisus te, “Engkey se impesurat ne penduan te Eleteala ne intelaan ni Moises? Engkey se egkesebutan nu rut te kebasa nu ketà?”

<sup>27</sup> Ne migkahi ke meama te, “Iamin nu ke hinawa nu te edlimù te Kerenan ne Eleteala nu, ne iamin nu ke baher nu wey itungan nu te ed-ulaula ke engkey se ebpekesuhat te hinawa rin’ wey ‘Ikelimù nu ke ruma nu iring te kegkelimù nu te hinawa nu.’ ”

<sup>28</sup> Ne migkahi si Hisus te, “Benar ini se migkahi nu. Ul-ulaa nu ve ini ne egkevehayan ka te umur ne warà edtemanan din.”

<sup>29</sup> Ugaid ne kenà egkiyug ini se meyerù te penduan ne egkepilayan te pengasak ne ketà ne mid-insà en maa te, “Engkey se ruma ku?”

<sup>30</sup> Ne midtavak si Hisus te impepevayà te sempità, ke sikandin te, “Duen senge etew ne Hudiyanen ne riyà ebpuun te Hirusalim ne ebpetupang kayi te inged ne Hiriku. Kayi te ralan ne ruen neuma rin ne menge tulisan ne midruug kandin ne pinegkedew ran sikandin ne wey ran ewai ne igelimbeka rè be se hinawa rin.

<sup>31</sup> Guna su mid-ewaan en dut te menge tulisan ne ruen senge etew ne Hudiyanen ne terebpepengesa te Eleteala ne mibpevayà ketà te ralan. Ugaid ne nekita rin dà ini se etew ne nekeid-irehà dutun te ralan, ne mid-elihu rin ne midlevundus en se ed-ipanew.

<sup>32</sup> Ne engketà ded maa se senge etew ne mibpevayà ketà te ralan ne Hudiyanen ded dema, ne kevuwaran ni Levi ne iyan din helevek ne ed-amung dut te menge terebpepengesa diyà te Nekebpuru ne Valey te Eleteala. Nekeuma ne nekita rin ded dema ini se etew ne nekeid-irehà dutun te ralan, ne mid-elihu rin ded dema ne midlevundus en se ed-ipanew.

<sup>33</sup> Warà dà meuhet ne ruen en maa senge etew ne nekeuma ne mibpevayà ketà te ralan ne kenà Hudiyanen su mehinged te Semeriyà. Nekita rin dà ini se meama ne nekeid-irehà ketà te ralan ne midaat se nanam din.

<sup>34</sup> Mid-uvey rin en ne mibawian din ke menge pali te lana wey vinu ne mibagkes din. Nepasad din te ebawì ne midsepuwat din diyà te kudà din ne mibpeneheewit din diyà te valey ne ed-eranan ne rutun din maa tugenura.

<sup>35</sup> Nepawà ne mibehey sikandin te kureta rut te kemuney te valey se egkahi te, ‘Tugenura nu pè be kedì ini se meama. Embiya ruen pà igkegastu nu kandin ne id-uli ku rà kenikew ketà te kedlived ku.’ ”

<sup>36</sup> Ne migkahi si Hisus ketà te meyerù te penduan te, “Endei rapit kayi te tetelu ne meama se meupiya ne ruma ketà te meama ne midruug te tulisan?”

<sup>37</sup> Ne migkahi ke meyerù te, “Arà se neyru kandin se meupiya ne ruma rin.”

Ne migkahi si Hisus te, “Ini ve se iringi nu.”

*Mibpenumbaley si Hisus diyà te engki Marta wey Maria*

<sup>38</sup> Gewii te edlevundus en ensi Hisus te ked-ipanew ran ne nekeuma ran ketà te senge inged. Ne ruen ketà meritan ne ed-ingaranan ki Marta ne mibpepemenayik kandan diyà te baley rin.

<sup>39</sup> Duen ari rin ne ed-ingaranan ki Maria. Ne mibpinpinuu si Maria ini riyà te uvey ni Hisus su ebpepinge te penurù din.

<sup>40</sup> Ne si Marta ne warà kebpinuu rin su sikandin dè be se ed-elugan te kegkaan dan. Ne ketà ne mid-uvey rin si Hisus se egkahi te, “Menu warà nu metuusi, Mama, te ebpedterayen e rà keniyen te ari ku se egelevek kayi te avu? Kehiyi nu pà si Maria te ebpeemungen kedì.”

<sup>41</sup> Ugaid ne migkahi si Hisus te, “Sikuna, Marta, merakel utew se igkeuru nu ne kenà beripantag.

<sup>42</sup> Ugaid ne seveka rà se beripantag. Ne iyan nepemilì ni Maria ini se meupiya ne kenà egkeawà kayi te kandin.”

## 11

*Mibpenurù si Hisus Mekeatag te Kebpengeningeni*

*(Mateo 6:9-13; 7:7-11)*

<sup>1</sup> Senge hewii ne mibpengeningeni si Hisus ketà te andang ne ebpengeningeniyen din. Nekeipus sikandin se ebpengeningeni ne migkahi ini se senge etew ne edumdumaan din te, “Mama, penurua key te ebpengeningeni iring ki Juan te mibpenurù din ke menge edumdumaan din.”

<sup>2</sup> Ne migkahi si Hisus kandan te, “Kayi te kebpengeningeni niyu ne iringa niyu kayi, ‘Ah, Amà, berekat ne edati te menusiyà ke ngaran nu.

Ne berekat ne edatù ka rut te langun ne menusiyà.

<sup>3</sup> Behayi key te sesangen ne egkekaan dey te uman andew.

<sup>4</sup> Ne pesehara nu ke salà dey, su ebpesaharen dey rema ke langun ne nekedsalà kenami.

Ne ipekeriyù key nikuna dut te minge mevaher ne penggeram.' "

<sup>5</sup> Ne migkahi maa si Hisus dut te edumdumaan din te, "Upama ke ruen senge etew keniyu se ebpendiyà te sepatat din te metaneb ne kerukileman se egkahi te, 'E, Mama, pesembaya e pà nikuna te egkekaan,

<sup>6</sup> su ruen meheliyug ku ne riyà ebpuun te meriyù ne mid-aran kayi te kenami ne warà idsaru ku kandin.'

<sup>7</sup> "Ne ketà ne edtavak sikandin diyà te lusud te valey te, 'Ebpekelipereng ad mulà ini. Mibpintuan ku en ini se gumawan ku wey nekelipereng en ini se minge anak ku kayi te ulid ku. Kenà ad ebpekeenew te ebehey keykew.'

<sup>8</sup> Idtarem ku keniyu," ke si Hisus, "te misan sepatat ka rin ne kenà ed-eneb sikandin se ebehey keykew. Ugaid ne embiya kenà ka ed-engked se ebuyù, ne ebpekeenew red sikandin se ebehey keykew te ebuyuen nu.

<sup>9</sup> "Tembù be," ke si Hisus, "ibpesabut ku ini keniyu, pemuyù kew riyà te Eleteala ne ebhayan kew rin. Pemengà kew ne ruen arà egketuen niyu. Penehetiat kew ne ebpuwasan kew rin.

<sup>10</sup> Su langun ne ebpembuyù diyà te Eleteala ne ebhayan, ne sika ebpemengà ne ebpeketuen, ne sika ebpenehetiat ne ebpuwasan te Eleteala kandin.

<sup>11</sup> "Menu sikiyu ne minge lukes," ke si Hisus, "embiya ebuyuan ka te anak nu te serà, maa uled se ibehey nu?

<sup>12</sup> Etawa ebuyuan ka rin te etelug, maa awa se ibehey nu?

<sup>13</sup> Sikiyu ne menusiyà ne kenà metidtu ne metau kew ne ebehey te meupiya riyà te anak niyu, na iyan pè be ke Amey niyu ne Eleteala riyà te langit kenà mebehey keykew te kedlumun dut te Kedesenan ne Ebpetuntul te Menusiyà embiya ebpembuyù kew riyà te kandin."

*Iyan Kunaan te Menge Etew ne Riyà Ebpuun te Unuten te Vusew ini se Gehem ni Hisus (Mateo 12:22-30; Marcos 3:20-27)*

<sup>14</sup> Ruen hewii ne midsegseg ni Hisus ke vusew ne mibpemekaid te etew te kegkeemew rin. Guna su neawà en ke vusew ne arà dà ne nekelalag en ke meama, ne negeyip nevenar ke minge etew ne nevrurun ketà.

<sup>15</sup> Ugaid ne ruen migkahi te, "Si Belsibul, ke unuten te minge vusew se mibehey kandin te gehem te kebpenegseg te minge vusew."

<sup>16</sup> Ne ruen pà ruma ne ebpenggeram ki Hisus ne mibuyuan dan si Hisus te mebpekita kandan te mekegeyip su apey ran egketueni ke riyà ebpuun si Hisus te Eleteala.

<sup>17</sup> Ugaid ne netueanan ni Hisus ke netahù te itungan dan ne migkahi en te, "Upama ke ruen datù te inged ne ed-uneb ebpevuneey ke minge sakup din, ne egketunggad arà se inged din. Ne iring din ded dema ke ruen telteleanak ne ed-uneb egkewaha, ne warà ebpengkusan din ke minge egkevurahey.

<sup>18</sup> Iring din ded be ketà ke midetuan ni Setanas ke unuten te minge vusew, embiya ed-uneb ebpevuneey ke sakup din ne kenà meuhet se kedatù din su egketunggad arà se edetuan din. Migkahi niyu te iyan ku kebpenegseg te vusew ne mibehayan a ni Belsibul ke unuten te minge vusew te gehem din.

<sup>19</sup> Embiya benar ne iyan ku ibpenegseg te vusew ke gehem ni Belisbul, ne endei ve ebpuun ke gehem dut te edumaruma keniyu te ebpenegseg te vusew? Sikandan be ayan se ebpekekahi te warà mekesuhat ke egkehiyen niyu.

<sup>20</sup> Ugaid ne iyan benar ne riyà ebpuun te Eleteala ini se gehem ku te ebpenegseg te vusew. Ne kayi ve ne egketueanan niyu te neuma en ke hewii te Kedatù te Eleteala keniyu."

*Midsempità si Hisus su Ibpekita Rin te Dekelà Pà ke Gehem te Eleteala Rut te ki Setanas ke Datù te Pekaid*

<sup>21</sup> Migkahi si Hisus te, "Upama ke ruen mevaher ne etew ne ruen metarem din ne ebentayan en ke valey rin, ne warà etew ne ebpekelusud te valey rin su ebpenakew te kearen din.

<sup>22</sup> Ugaid ne embiya ruen mevaher pà ne etew ne edsulung ne ebpeketalew kandin wey egkeahew en ke metarem ne edserihan dut te etew ketà te valey, ne langun dut te netavan din ne egkepungumun-umun din en dut te menge ruma rin.”

<sup>23</sup> Ne migkahi maa si Hisus te, “Ke etew ne kenà ku ruma ne kunterà ku, ne ke etew ne kenà ed-amung kediey te eburun kayi te menge etew ne ebpemburahey.”

*Ke Kedlived te Busew dut te Etew ne Midsuukan Din*  
(Mateo 12:43-45)

<sup>24</sup> Ne migkahi pà maa si Hisus te, “Embiya ruen busew ne edsuuk te etew ne ed-awà en, ne riyà ebpevayà te memara ne tanà su ebpemengà te ubpaan din. Ne embiya warà egketuen din ne iyan egketahù te hinawa rin se, ‘Edliveran ku red ke mid-ubpaan ku.’

<sup>25</sup> Nekeuma ini se vusew, ne nekita rin te metilak en wey nekeulit en ke langun ketà te lusud.

<sup>26</sup> Ne midlihawang pà sikandin ne med-ewit te pitu ne vusew ne tuwas pà kandin keraat, ne langun dan ne ketà dà mid-ubpà. Ne ini se egketemanan ketà te etew ne muna pà se kepasang din dut te neuna.”

*Ke Lalag ni Hisus Mekeatag te Tidtu ne Kehelawan*

<sup>27</sup> Nekeipus si Hisus se edlalat kayi, ne ruen meritan ketà te nevurun ne merahing se kinekahi rin te, “Dekelà se kehelawan dut te meritan ne mid-anak wey mibpesusu keykew.”

<sup>28</sup> Ugaid ne iyan migkahi ni Hisus se, “Iyan pè be dekelà se kehelawan dut te etew ne ebpeming te Lalag te Eleteala wey ebperumdumaan din.”

*Ke Menge Etew ne Layun Ebuyù te tuus Ke Riyà Ebpuun te Eleteala Si Hisus*  
(Mateo 12:38-42)

<sup>29</sup> Gewii te egkeasek en ke merakel ne etew riyà te ki Hisus ne migkehiyan din sikandan te, “Sikiyu ne menge etew te guntaan en, mereatey nevenar se menge ulaula niyu ne warà kebperetiyya niyu te Eleteala! Iyan niyù ebpemengaan se mekegeyip ne tuus te gehem ku. Ugaid ne warà en ma tuus ne ibpekita keniyu liyu rà ketà te netemanan ni Jonas ne mibpelambas te Lalag te Eleteala rengan.

<sup>30</sup> Su iring te nekeuma si Jonas diyà te inged ne Ninivi rengan ne impekita rin dut te menge etew ketà ke tuus te kedusa te Eleteala, ne iring din ded dema te sikandin ne Impeanak te Menusiya ke tuus kayi te keniyu ne menge etew te guntaan en.

<sup>31</sup> Ketà te akir din ne hewii te kedtimbang te Eleteala te menusiya,” ke si Hisus, “duen Bai rengan ne riyà ebpuun te inged ne Siba ne ed-itindeg ne ed-isuhat te kewagib dut te sikiyu ne menge etew guntaan. Su mibpengkayi sikandin se riyà ebpuun te divaluy te pehiliran su apey mekerineg dà ki Salomon ke Ratù dengan ne metmetau. Ne ruen en guntaan seveka ne mepurù pà ki Salomon ne ini en te keniyu, ugaid ne kenà niyu edtelimaan ke penurù din.

<sup>32</sup> Uya, ketà te akir din ne hewii ne kedtimbang te Eleteala te menusiya,” ke si Hisus, “ne ed-itindeg ini se menge etew ne riyà ebpuun te Niniva rengan su ed-isuhat keniyu te kewagib. Su sikandan mulà ne nerineg dan dà ke Lalag te Eleteala ne impesabut ni Jonas kandan ne nekedsendit dan ne mid-ewaan dan en ke meraat ne mid-ulaula ran. Ne guntaan ne ruen mepurù pà ki Jonas ne kayi te keniyu, ugaid ne kenà niyu edtelimaan ke penurù din ne kenà kew ebpedsendit te meraat ne ulaula niyu.”

*Ke Sempità ni Hisus Mekeatag te Engkey se Ebpekerayag te Lawa ta*  
(Mateo 5:15; 6:22-23)

<sup>33</sup> Ne migkahi maa si Hisus te sempità kandan te, “Warà etew ne edtemtem te sulù ne ebpelengkevan din etawa ibperalung din. Ugaid ne riyà din ibpeluukluuk te saag su apey egkerayahan ke langun.

<sup>34</sup> Ke mata te etew ne iring te sulù dut te lawa rin su embiya merayag se kedtengteng din ne iyan din meana ne metidtu se ulaula rin, ne iring te egkerayahan ke langun ne lawa rin. Ugaid ne embiya edsehulepunen se kedtengteng din ne iyan din meana ne mereatey se ulaula rin, ne iring te egkerusireman ke langun ne lawa rin.

<sup>35</sup> Tembù be uram kew ke ini se egkehiyen nu ne kerayag te lawa nu ne kerusirem bes.

<sup>36</sup> Su embiya egkerayahan ke langun ne lawa nu ne warà misan deisek dà ne kerusireman, ne medmerayag nevenar ke lawa nu iring te egketeyawan ka te sulù.”

*Mid-insà Ke Menge Peresiyu ki Hisus ke Meambe ke Kenà Eduma Ke Menge Edumdumaan Din Dut te Betasan te Keep-epuan Dan ne Hudiyenen Mekeatag te Kebpenlùlù*  
(Mateo 23:1-36; Marcos 12:38-40)

<sup>37</sup> Nekeipus en si Hisus se edlalag ne ruen senge etew ne Peresiyu ne mid-inggat kandin te egkaan diyà te valey rin. Ne miduma en rema si Hisus ne mibpinuu en se egkaan.

<sup>38</sup> Nekita dut te minge Peresiyu te warà midlùlù si Hisus te warà pà sikandin mekekaan ne neinuunu ran nevenar.

<sup>39</sup> Ne migkahi si Hisus kandan te, “Sikiyu ne minge Peresiyu, iring kew te minge basu wey pelatu ne migkulisungan su apey melinis kew kayi te egkekita, ugaid ne kayi te diralem niyu ne meredsik su nepenù te kegkeeram-am wey kereatey!

<sup>40</sup> Menge warà eperu niyu!” ke si Hisus. “Maa, warà niyu metueni te kenà iyan dà midlimbag te Eleteala ke egkekita kayi te lihewangan su misan ini se kayi te lusud ne kenà egkekita ne midlimbag din ded dema.

<sup>41</sup> Ugaid ne umuni niyu ke minge ayuayu dut te intahù niyu te minge basu wey pelatu niyu ne ebmelinis kew te kenà kayi rà te lihewangan su kayi rema te lusud te hinawa niyu.

<sup>42</sup> “Iyan kew rà mekeyruwuru ne minge Peresiyu!” ke si Hisus. “Su ebehey kew te Eleteala te kandin ne umun ne ikesepulù dut te pinemula niyu ne peninù iring te tandlad wey bawing, ugaid ne warà te hinawa niyu ke egkiyuan te Eleteala ne ketidtu te ulaula niyu riya te minge ruma niyu wey ke kedlimù niyu te Eleteala. Benar ne ebehey kew te Eleteala te kandin ne umun ugaid ne warà niyu ma iya tumana ke didis en dut te penurù te Penduan.

<sup>43</sup> “Iyan kew rà mekeyruwuru ne minge Peresiyu!” ke si Hisus. “Su riya te baley ne ebpedgian te penduan te Hudiyanan ne ebpemili kew te ebpinuwan te sineruwan, ne embiya riya kew te pedian ne iyan niyu igkesuat ne ed-edatan kew.

<sup>44</sup> “Iyan kew rà mekeyruwuru! Su iyan niyu egkeupamaan ne leveng ne warà kudal din ne egiekan te etew te warà dan metuusi ne ebpekereraat kandan su ebpekehuru ran dut te meraat ne ulaula niyu.”

<sup>45</sup> Duen senge etew ketà ne meyerù te penduan ne migkahi ki Hisus te, “Meyerù, arà se lalag nu ne nesuhat key red dema.”

<sup>46</sup> Ne migkahi si Hisus kandin te, “Ne sikiyu rema ne minge meyerù te penduan, mekeyruwuru kew rema! Ebpekevehatan niyu ke minge etew te minge penduan ne kenà dan en egkegaga ne edtuman, ugaid ne sikiyu ne warà misan deisek dà ne idtavang niyu kandan te edtuman ketà.

<sup>47</sup> “Iyan kew rà mekeyruwuru! Su mideyreyanan niyu ke minge leveng dut te mibpelambas te Lalag te Eleteala rengan, ugaid ne keniya ma ne keep-epuan ke mid-imatey kandan.

<sup>48</sup> Ini se mid-ulaula niyu ne tuus te seveka kew red dut te ulaula te keep-epuan niyu rengan. Su sikandan ke mid-imatey dut te minge mibpelambas te Lalag te Eleteala rengan ne sikiyu ke midayandayan dut te leveng dan.

<sup>49</sup> Ne geina te metmetau ke Eleteala ne ruen migkahi rin dengan mekeatag ini, ke sikandin te, ‘Edsuhù a te minge etew diyà te kandan te ebpelembasen ku te Lalag ku wey kedserihan ku te ebpemenudtul mekeatag kediey, ne ruen duma ne ed-imeteyan dan ne ruen duma ne ebpendreseyan dan.’

<sup>50</sup> Tembù be sikiyu ne minge etew guntaan ne igkeragkes kew te Eleteala te kedusa rin dut te kineimatey ran dengan te minge etew ne mibpelambas te Lalag din, igenat te rudsuan te kelibutan.

<sup>51</sup> Edusaan kew te Eleteala dut te kineimatey dengan te langun ne minge etew ne mibpelambas te lalag din igenat dut te kineimatey ki Abel taman en dut te kineimatey ki Zacarias ke mid-imetayan diyà te elet te edenaan te ibpelengesa te Eleteala wey ke mibpeheletan diyà te Nekebpuru ne Valey te Eleteala. Uya, benar ini se egkehien ku,” ke si Hisus, “sikiyu se minge etew guntaan, igkeragkes kew te Eleteala te kedusa rin dut te kinepengimatey ran dengan.

<sup>52</sup> “Iyan kew rà mekeyruwuru ne minge meyerù te penduan! Su ed-elangan niyu ke minge etew su apey ran kenà mekesabut te benar ne ralan dan diyà te Eleteala. Sikiyu ne kenà kew edlusud dut te benar ne ibayà diyà te Eleteala, ne ed-alang kew pà maa rut te etew ne egkesuat ne edlusud ketà.”

<sup>53</sup> Guna su mid-awà si Hisus ketà te valey te Peresiyu, ne midligpitan en sikandin dut te minge Peresiyu wey ke minge meyerù te penduan, ne merakel se in-insà dan ki Hisus,

<sup>54</sup> su ebpemengaan dan se kegkesaut dan ki Hisus su apey ruen idwagib dan kandin.

## 12

*Ke Meraat ne Ulaula Dut te Menge Peresiya ne Impeiring ni Hisus te Ibpelevag te Pan (Mateo 10:26-27)*

<sup>1</sup> Keta ne hewii ne denda ne munge etew se nevirun su ebpemekedtekutakey ran en. Ne rutun ne migkahi si Hisus, ugaid ne iyan din edlelehan ke munge edumdumaan din, ke sikandin te, "Ingati niyu te kenà kew egkepeneheewit rut te munge ulaula te munge Peresiya su ibpekikakita ran dà ke ulaula ran diyà te etuvangan te munge etew su iring ini rut te ibpelevag te pan ne ed-eneb."

<sup>2</sup> Langun te netelewan guntaani, ne ebpekepehawahawa red keuremà. Ne langun ne impegesà, ne egkepayahan ded.

<sup>3</sup> Langun ne impeglelelahey niyu te merusirem ne igkepayag ded te meandew. Ne misan engkey se impevutbutehey niyu te sikiyu rà ne egkevukayat ded diyà te kerekelan te etew."

*Engkey se Dait ne Igkeendeki? (Mateo 10:28-31)*

<sup>4</sup> "Menge suled ku," ke si Hisus, "iyan ku igkahi keniyu ne kenà kew meandek dut te munge etew ne iyan dà egkepatay se lawa niyu, ugaid ne warà en ubpu te ed-ul-ulaan dan su kenà dan egkepatay ke himukud niyu."

<sup>5</sup> Ugaid, ne idtarew ku keniyu ke engkey se ikeandek niyu. Iyan niyu ikeandek ne Eleteala su kenà lawa niyu rà se egkepatay rin su ruen gehem din te kebpekeantug te himukud niyu riyà te apuy ne rakà. Uya, iyan niyu iya ikeandek sikandin."

<sup>6</sup> Migkahi pa maa si Hisus te, "Ruen deisek ne pepenuk ne egkepemasa te lelima ne timan ne deruwa rà ne tumbaha. Ne misan iring ketà se kevavà te elehà din, ne warà seveka rà kandan ne egkelipatan te Eleteala."

<sup>7</sup> Ne iyan kew pè be melipati te Eleteala su misan ke edtiweruwan te bulvul niyu ne nevirang din en. Engketà be ne kenà kew meandek su iyan kew pà belielehà diyà te kandin dut te merakel ne pepenuk."

*Ke Imbaag ni Hisus Mekeatag Dut te Menge Etew ne Ebparew Kandin (Mateo 10:32-33; 12:32; 10:19-20)*

<sup>8</sup> "Ne ruen idtarew ku keniyu," ke si Hisus, "piya engkey en ne etew se ebpayag diyà te munge etew se ebpesakup kediey ne iyan ibpayag dut te Impeanak te Menusiya diyà te suluhuen te Eleteala diyà te langit ne ed-engkunen sikandin ne kandin ne sakup."

<sup>9</sup> Ugaid," ke si Hisus, "piya engkey ne etew se ebparew diyà te munge etew te sakup ku sikandin, ne kenà rema ed-engkunen ne sakup dut te Impeanak te Menusiya diyà te munge suluhuen te Eleteala diyà te langit."

<sup>10</sup> "Ne misan engkey en ne etew se edlalag te meraat mekeatag te Impeanak te Menusiya, ne egkepesahad pà te Eleteala. Ugaid," ke si Hisus, "piya engkey ne etew ne edlalag te meraat mekeatag te Kedesenan ne Ebpetuntul te menusiya ne kenè en egkepesehad te Eleteala."

<sup>11</sup> "Ne embiya ibpemenayik kew nikandan te kukuman diyà te munge valey ne ebpededian te pundan dan etawa ibpelaus ke pà diyà te munge gubinedur wey egkeunutan dan ne kenà kew meuru ke ebmemenuwen niyu se kedlalag niyu te kedtinge te hinawa niyu wey engkey se ralan te kegkahi niyu."

<sup>12</sup> Su iyan ebpenurù keniyu gewii niyu ketà ne ke Kedesenan ne Ebpetuntul te Menusiya su ebpeketahù te hinawa niyu ke engkey se ibpekahi rin."

*Ke Sempità ni Hisus Mekeatag te Kewasa ne Etew ugaid ne Diyà te Etuvangan te Eleteala ne Kurang nenavar*

<sup>13</sup> Duen senge etew ne meama ketà te nevirun se migkahi diyà te ki Hisus te, "Meyerù, kehiyi nu ke kakey ku te ebpeunungan a dut te aren ne intavun te amey rey."

<sup>14</sup> Migkahi si Hisus te, "Ey, Mama, warà kewagib ku te egkukum keniyu, ne warà kewagib ku te ebad ketà te aren ne intavun te amey nu."

<sup>15</sup> Ne midlalag en si Hisus ketà te merakel ne etew te, "Uram kew wey inteng kew te ulaula niyu te warà kegkeeram-am niyu. Su ke tidtu ne puunan te kegkeuyag te etew ne kenà diyà te kearen ne egeweran din."

<sup>16</sup> Ne intarem en ni Hisus ini se impepevayà te sempita: "Duen senge etew ne kewasa nenavar ne ruen tanà din ne egkepekeyan te keuyahan."



<sup>17</sup> Ne kehingginawa kayi te etew te, 'Engkey se ed-ul-ulaan ku kayi te langun ne egkepakey ku? Su kenà egkeamin kayi te balungbalung ne warè en edtehuan.

<sup>18</sup> A, ini ves,' ke sikandin, 'edrundusen ku pà ini se minge balungbalung ne ebelayan ku te rekela pà su apay ruen egketehuan ku te langun ne egkeehani ku wey ruma pà ne kearen ku.

<sup>19</sup> Ne arà pè be imbe ne egkehiyen ku te: Bebegian a ne meama! Su neketahù a te rekela ne keuyahan taman te pipira pà ne rahun. Ne ketà ne edsinendangan a se egkaan, ed-inum, wey ebpatà dà imbe te nanam.'

<sup>20</sup> "Ugaid ne migkehiyan sikandin te Eleteala te 'Merupangdupang ka nevenar! Ini rà ne kerukileman ne kayi rà taman se ked-ubpàubpà nu kayi te ampew te dunya. Ne engkey ve vuwa se kemuney kenian te kearen ne intahù nu? "

<sup>21</sup> Ne migkahi pà maa si Hisus te, "Ini ve imbe ke egketemanan dut te piya entei ne etew ne ed-umanan din te edtehuan te kearen din, ugaid ne warà te hinawa rin ke egkiyuhan te Eleteala."

*Ke Kepenurù ni Hisus Mekeatag te Kedsarig te Eleteala*

*(Mateo 6:25-34)*

<sup>22</sup> Ne migkahi en si Hisus diyà te minge edumdumaan din te, "Ini imbe ke igkahi ku keniyu, kenà kew meuru te egkekaan ne igkeuyag niyu etawa ke engkey se ibelegkas te lawa niyu.

<sup>23</sup> Su ke hinawa niyu ne imbehey keniyu te Eleteala ne belielehà pà te egkekaan, ne ke lawa niyu rema ne imbehey keniyu te Eleteala ne belielehà pà te velegkas.

<sup>24</sup> Kenian niyu rè ma te minge uwak, warà kebpmemula ran ne warà ked-ehani ran, ne warà edtehuan dan te egkekaan dan, ugaid ne Eleteala se ebpesavud kandan! Ne iyan kew pè be se belielehà kew pà dut te minge pepenuk!

<sup>25</sup> Misan engkey en se kegkenuhun te etew te umur din, ne kenà din egkesumpatan te misan deisek dà te ralan te kegkeuru rin.

<sup>26</sup> Embiya kenà niyu egkegaga ini se reisek dà, ne maa engkey ve se pantag din se kegkeuru niyu te ruma pà?

<sup>27</sup> "Kenian niyu rè ma te kevukaran ke engkey se kedtuvù dan. Kenà dan egelevel ne kenà dan ed-avel. Ne misan iring ketà ne igkahi ku keniyu te misan ke kewasa ne datù dengan ne si Salomon ne ke keupiya te velegkas din ne warà dà mekesusuluwan dut te keupiya te seveka kenian ne kevukaran.

<sup>28</sup> Embiya Eleteala se ebpebparas te kevukaran te sagbet iring ketà misan mehaan dà se kedtuvù dan su egkekita niyu guntan ne keremà ne nehangu en ne egkevinsulan en, ne iyan kew pè be kenà mevehayi te igkevevelegkas niyu. Sikiyu ne deisek se kedsarig niyu!

<sup>29</sup> Ketà be ne kenà kew meuru, ne kenà iyan niyu rà idtahù te hinawa niyu ke engkey se egkekaan wey egkeinum niyu.

<sup>30</sup> Su ini imbe ke layun intahù te hinawa rut te minge etew ne warà mebperetiyaya rut te benar ne Eleteala. Ugaid ne sikiyu ne kenà kew meuru su netueanan dut te Amey niyu ne Eleteala te engkey se kurang niyu.

<sup>31</sup> Ne iyan niyu ipeuna te hinawa niyu ke kiyug te Eleteala wey ke kedatù din keniyu, ne arà pà ne ebhayan kew te Eleteala te langun te kurang niyu."

*Ke Penurù ni Hisus Mekeatag te Edtehuan Tew te Kekewesai tew Riyà te Langit*

*(Mateo 6:19-21)*

<sup>32</sup> "Sikiyu ini se minge edumdumaan ku," ke si Hisus, "kenà kew meandek, su misan deisek kew rà ne ke Amey niyu riyà te langit ne egkiyug ne egkeratù kew dut te minge etew ne Edetuan din.

<sup>33</sup> Pesaa niyu en ke langun ne kearen niyu ne ipemehey niyu ve ke elehà din diyà te minge ayuayu. Embiya ini se ed-ul-ulaan niyu ne egkevaluy ne ruen kekewesai niyu riyà te langit su iring te ruen intahù te keletidà niyu riyà te langit ne kenà egkereving, ne kenà egkeamin ke kekewesai niyu su warà ebpenakew ne warà rumpew ne egketket.

<sup>34</sup> Su piya endei niyu idtahù ke kekewesai niyu ne ketà dema ke hinawa niyu."

*Warà Metueni Ke Hewii Etawa Uras te Kedlived Kayi te Dunya ni Hisus*

<sup>35</sup> Ne milpenempità si Hisus se egkahi te, "Sesebitan kew neraan ne iyan din meana ne andam kew te misan engkey ne egketemanan, ne kenà niyu ed-evuki ke sulù niyu,

<sup>36</sup> su iring kew te minge edsugsuhuen ne edtahad te kebpekeuma te ebpengemuney kandan ne riyà ebpuun te egkewingan ne midtelavuk din. Su embiya layun kew ebpenehana neraan, ne ebpekeuma ke ebpengemuney keniyu ne ebpenehiat, ne mehaan kew ebpekebukà te lekeb.

<sup>37</sup> Meupiya nevenar se hinawa rut te minge edsugsuhuen ne neumaan dut te ebpengemuney kandan ne warà midlipereng su mid-andam neraan. Igmahi ku keniyu ini," ke si Hisus, "se ini se ebpengemuney ne edsembian din ke belegkas din ne ebpepinuuwen din sikandan diyà te egkeenan ne ebpehendaran sikandan.

<sup>38</sup> Meupiya nevenar se hinawa rut te minge edsugsuhuen ne neumaan dut te ebpengemuney kandan ne mid-andam neraan misan ebpekeuma sikandin te edluuk se hewii te merukilem etawa egkepkepawà en.

<sup>39</sup> Ugaid ne ini se idtahù niyu te hinawa," ke si Hisus, "embiya ebpekeingat ke kemuney te valey ke keenu ebpekeuma ke tekawan ne ebpenehana neraan sikandin su apey kenà ebpekelusud te valey rin ke ebpenakew.

<sup>40</sup> Ne engketà kew red dema, penehana kew neraan su ebpekeuma ke Impeanak te Menusiyà dut te kenà niyu ebpenerengen ne egketahuan te andew."

*Ke Sempità ni Hisus Mekeatag te Edsugsuhuen ne Ebpekemalen ne Meperumaruma te Idsuhù kandin wey ke Kenà Meperumaruma*

*(Mateo 24:45-51)*

<sup>41</sup> Guna su nerineg dan ini se midlalag ni Hisus ne migkahi si Pedro te, "Ini se impepeyayà nu te sempità nu ne engkey, sikami se egkesuhah etawa abpeg ded ke ruma ne etew?"

<sup>42</sup> Ne midtavak si Hisus ke Kerenan te sempita ded, ke sikandin te, "Ke edsugsuhuen ne egkedserihan wey metmetau su edtuman te idsuhù kandin, ne ebpekemalen en dut te ruma ne edsugsuhuen. Ne sikandin se ebehey te egkekaan dut te ruma ne edsugsuhuen ketà te kegkekaan dan.

<sup>43</sup> Meupiya nevenar se hinawa ketà te edsugsuhuen ne ebpekemalen ke ebpekeuma ke ebpengemuney kandin ne iyan din egkekita se midtuman din ke langun ne insarig kandin!

<sup>44</sup> Idtarem ku keniyu," ke si Hisus, "ini se edsugsuhuen ne ebpekemalen ne midtuman te langun ne insarig kandin, ne sikandin en se ebpekekamal dut te langun ne kearen te ebpengemuney kandin.

<sup>45</sup> Ugaid ne embiya iyan netahù te hinawa kayi te edsugsuhuen ne ebpekemalen se, 'A, kalu ke meuhet pà ebpekeuma ke ebpengemuney kenami,' ke sikandin, ne ketà ne mibpedeasan din en ke ruma ne edsugsuhuen ne meama abpeg ke minge meritan ne migkaakaan dè be sikandin wey ebpinginum taman te egketevereg en,

<sup>46</sup> ne ketà ne netekew mekeuma ini se ebpengemuney kandin te hewii ne warà din penerenga su warà din metueni ke endei egketahù ke andew te kedlived din. Ne ed-imetayan dut te ebpengemuney kandin ne ebpeheraman sikandin dut te egketemanan te minge etew ne kenà meperumaruma te Lalag te Eleleala.

<sup>47</sup> "Ke edsugsuhuen ne netuenan din ke insarig kandin ne helevek," ke si Hisus, "ugaid ne warà mebpenehana wey warà medtuman dut te insarig kandin ne ebpeketimaran te ebadas.

<sup>48</sup> Ugaid ne ke edsugsuhuen ne warà din metueni neraan ke engkey se ibpehelevak te ebpengemuney kandin ne ruen mid-ulaula rin ne dait ne ibedasi kandin, ne ebedasan sikandin ugaid ne kenà dā utew ebpeketimaran. Su ke etew," ke si Hisus, "ne rekela se insarig kandin ne rekela dema se egkepenareng kandin. Ne embiya dekdekela pà se insarig kandin ne iyan pè be kenà dekela pà se egkepenareng kandin."

*Ke Kebperetiyya ki Hisus ke Puunan te Kebpemekedsingey te Hinawa dut te Telteleanak*

*(Mateo 10:34-36)*

<sup>49</sup> Migkahi maa si Hisus te, "Iyan ku kinepengkayi te ampew te dunya su ed-ewit a te apuy ne iyan din meana ne egkukumen ku ke minge etew. Ne kiyug ku perem ne mehaan en egkeretemi.

<sup>50</sup> Dekelà pà se kemeresayan ne ibpeyayà ku ne warà pà mekeuma kediey. Iring a te ebpekeutuk te langit taman kenà ku mepasad ini.

<sup>51</sup> Maa, iyan niyu kunaan ke ini se kinepengkayi ku ne ed-ewit a te kebmelinew kayi te kelibutan? Kenà en iya! Su idtarem ku keniyu te kenà kebmelinew, su ini se kinepengkayi ku ne ruen kebpekedingsingey te hinawa dut te minge etew.

<sup>52</sup> Igenat gunteani ne embiya ruen lelima ne telteleanak, ne ebpekedingsingey ke hinawa ran. Ne tetelu se egkunterà dut te deruwa, ne iring din ded dema ke deruwa ne egkunterà dut te tetelu mekeatag te keduma ran kediey.

<sup>53</sup> Ke amey ne egkunterà dut te anak din ne meama, ne ini se anak din ne egkunterà dut te amey rin. Ne ke iney ne egkunterà dut te anak din ne meritan, ne ini se anak ne

egkunterà dut te iney rin. Ne ke enuhang ne meritan ne egkunterà dut te ambey rin, ne ini se ambey ne egkunterà dut te enuhang din ne meritan.”

*Ke Menge Etew ne Metau ne Ebpenipat te Hewii Ugaid ne Uvag Kun Warà Dan Mesebuti Ke Tuus Dut te Ned-ulaula Te Arà ne Hewii*

*(Mateo 16:2-3)*

<sup>54</sup> Ne migkahi si Hisus diyà te merakel ne minge etew te, “Embiya egkekita niyu te kivel diyà te edsenlepan ne arà dà ne egkahi kew te, ‘Mehaan en ed-uran.’ Ne ed-uran iya rema.

<sup>55</sup> Ne embiya egketuusan niyu te ebpependiyà ke keramag te diraya ne ke sikiyu te, ‘Meinit ini.’ Ne ed-andew iya rema.

<sup>56</sup> Sikiyu ne minge etew ne uvag kun warà sesabut niyu te egketemtemanan guntaani! Embiya edtengteng kew te tanà wey langit ne metau kew nevenar ne ebpenipat te hewii, ne meambe ke kenà niyu egkesebutan ke tuus kayi te egketemtemanan guntaan?”

*Pekiduntey kew rut te Edwagib Keniyu*

*(Mateo 5:25-26)*

<sup>57</sup> Ne migkahi maa si Hisus te, “Meambe ke kenà niyu ebpepegitungen ke engkey se edait ne ed-ul-ulaan?”

<sup>58</sup> Upama ke ruen edwagib kenikew ne ed-ewiten ka riyà te kukuman, ne pekiduntey ka nevenar kandin gewii te keniyu ka pà te ralan su apey kenà ka ibpelaus diyà te uwis. Su embiya ebpekeetuvang ka riyà te uwis ne ibehay ka riyà te minge pulis, ne ke minge pulis se ebilanggu keykew.

<sup>59</sup> Idtarem ku keniyu,” ke si Hisus, “kenà ka ebpekelihawang ketà taman te kenà nu egkevayaran ke langun ne keselaan nu.”

## 13

<sup>1</sup> Ne ruen minge etew ne nekeuma ketà su mibpenudtul ki Hisus mekeatag te minge etew riyà te Geliliya ne mibpeimetayan ni Gubinedur Pilatu gewii te ebpelengesa ran diyà te Nekebpuru ne Valey te Eleteala.

<sup>2</sup> Ne migkahi si Hisus kandan te, “Geina te mibpeimetayan ini se minge etew te iring ketà, ne maa iyan niyu kunaan ke muna pà se keselaan dan dut te ruma ne minge etew te Geliliya?”

<sup>3</sup> Kenà arà! Ugaid ne ini se igkahi ku keniyu te embiya kenà kew ebpepemedsendit wey ed-engkeran niyu ke meraat ne ulaula ne ebpepatey kew red dema iring kandan.

<sup>4</sup> Ne menu arà se sepulù wey walu ne minge etew riyà te Siluwi,” ke si Hisus, “ne mibpeimatey ne nepilayan te metmetikang ne valey, maa iyan niyu kunaan ke muna pà se keselaan dan dut te ruma ne minge etew te Hirusalim?”

<sup>5</sup> Kenà arà! Ugaid ne igkahi ku keniyu te embiya kenà kew ebpepemedsendit wey ed-engkeran niyu ke meraat ne ulaula ne ebpepatey kew red dema iring kandan.”

*Ke Kayu ne Ed-ingaranan te Igira ne Mibpenrewakan ni Hisus*

<sup>6</sup> Ne ruen maa ruma ne sempità ne imperineg ni Hisus kandan, ke sikandin te, “Duen senge etew ne meama ne ruen kayu rin ne ed-ingaranan te igira ne impemula riyà te pemulaan din. Senge hewii ne midlauy rin su ebpenareng en sikandin ke ruen bahas din, ugaid ne warà.

<sup>7</sup> Ketà dà ne migkehayan din ke meama ne ed-ihawan ketà te, ‘Egkemeni ini se senge puun ne kenà pà lavew ebahas? Su nekettetelu en ne rahun se kebpepematì ku te ebahas ne warà pà lavew bahas din. Pilaya nu en! Su ebpekeenget dà kayi te ruma pà ne pinemula.’

<sup>8</sup> “Ne migkahi ini se meama ne ed-ihawan te, ‘Kenà te pà, Anggam, ebpileyan. Ebpepematien te pà te senge rahun, su ed-ihewanu ku pà ke ebpekelingut wey ebukbukan ku pà te ibpelambù.

<sup>9</sup> Ne embiya ebahas ded kayi te edtundug ne rahun ne meupiya. Ugaid ne embiya kenà ne arà pà ne ibpepiley nu en.’ ”

*Ruen Egkunterà ki Hisus ne Edawey perem kandin te Ebpepawì dut te Hewii ne Id-imeley*

<sup>10</sup> Senge Hewii ne Id-imeley ne riyà si Hisus te Baley ne Ebpepedian te Hudiyane te pendum dan su ebpenurù.

<sup>11</sup> Duen ketà meritan ne nevekut su mibpepemekeiran te vusew. Nekedsepulù en wey walu ne rahun ini se kinekevekut din, ne kenà din en iya egkeketeng te misan deisek dà.

<sup>12</sup> Guna su nekita ni Hisus ini se meritan ne migkahi sikandin te, "Bayi, egkeulian ke en te raru nu."

<sup>13</sup> Ne midampen ni Hisus ke peka rin, ne arà dà ne netidtu en dut te meritan ke peka rin ne nekereyù nevenar sikandin te Eleteala!

<sup>14</sup> Ne neepes ini se egkeunutan dut te valey ne ebpedgian te Hudiyänen te penduan dan su mibawi si Hisus te Hewii ne Id-imeley. Ke sikandin te, "Enem be ne hewii ke igelevak tew. Ne lusud be kayi ne pengkayi kew se ebpelewawì, kenà te ini se Hewii ne Id-imeley."

<sup>15</sup> Migkahi si Hisus kandan te, "Sikiyu ne engkungkun ne edtuman te suhù te Eleteala! Menu, kenà uman senge etew keniyu ne ed-ekar te sapi din etawa kudà din ne edtuyukan din diyà te wayig su ibpeinum din misan Hewii ne Id-imeley?"

<sup>16</sup> Ne ini se meritan ne kevuwaran dut te keep-epuan tew rengan ne si Abraham ne nekedsepulù en wey walu ne rahun se kinevakù kandin ni Setanas ke ratù te pekaid. Kenà egkepakey ne kenà ed-ekaran sikandin dut te kinekevaku din misan Hewii ne Id-imeley."

<sup>17</sup> Langun dut te egkunterà ki Hisus ne nengeyeyaan dut te migkahi ni Hisus kandan, ugaid ne ke ruma ne menge etew ne nesuatsuat su nekita ran ke mekegeyip ne mid-ulaula ni Hisus.

*Insempità ni Hisus ke Edetuan te Eleteala te Pinekemerimet ne Lahas ne ed-ingaranan te Mustasa*

*(Mateo 13:31-32; Marcos 4:30-32)*

<sup>18</sup> Ne migkahi maa si Hisus te, "Engkey ma se edait ne ebpeiringan ta te Kedatù te Eleteala dut te menge etew? Engkey ma se meupiya ne upama ta?"

<sup>19</sup> Ini se kedtuvù te Kedatù te Eleteala te menge etew ne ebpekeiring dut te merimet nevenar ne lahas ne ed-ingaranan te Mustasa ne impemula riyà te pengengewiran. Edtuvù ini ne ebaluy ne kayu, ne rutun ebpenesalag ke pepenuk te subpang din."

*Insempità ni Hisus ke Edetuan te Eleteala te Menge Etew dut te ibpepelevag te Pan*

*(Mateo 13:33)*

<sup>20</sup> Ne migkahi maa si Hisus te, "Engkey se id-upama ta te Edetuan te Eleteala rut te menge etew?"

<sup>21</sup> Ini se Edetuan te Eleteala te menge etew ne id-upama ta te ibpepelevag te pan ne migkuwa te meritan ne idsawug dut te senge asad ne tapung su apey ebpeketuvù ke mibawug ne tapung."

*Ke Sempità ni Hisus Mekeatag te Menge Etew ne Egkiyug ne Edlusud Dut te Melihet ne Gumawan ne Ebpendiyà te Menge Etew ne Edetuan te Eleteala*

*(Mateo 7:13-14; 21:23)*

<sup>22</sup> Nekeipis si Hisus ketà ne migenat en se ebpendiyà te Hirusalim, ne ketà te ked-ipanew rin ne mibpengawet-awet sikandin te menge inged su ebpenurù.

<sup>23</sup> Duen senge etew ne mid-insà kandin te, "Mama, maa kenà be utew merakel ne etew se egkepeleiyu te Eleteala?"

Midsempità si Hisus kandan se egkahi te,

<sup>24</sup> "Pegelep kew nevenar te kedlusud niyu ketà te melihet ne gumawan te kenà pà egkelekevan, su idtareng ku keniyu ini," ke si Hisus, "te merakel se egkesuat ne edlusud ugaid ne kenà dan en ebpekelusud.

<sup>25</sup> Su ke kemuney te valey se ebpendiyà te gumawan su ebpintuan din ne riyà kew rà te liyu se edtawag te, 'Mama, bukai key pà te lekeb.'

'Ugaid ne iyan din egkehiyen se, 'Kenà ku egketuenan ke endei kew ebpuun.'

<sup>26</sup> "Ne iyan niyu maa egkekahi se, 'Kenà nu egketenuran te rengan ne mibpeer-erungutey ki pà se egkaan ne mibpenurù key pà nikuna diyà te inged dey?'

<sup>27</sup> 'Ugaid ne edtavak maa sikandin te, 'Kenà ku iya egketuenan ke endei kew ebpuun. Awà kew kayi te kediey, sikiyu ne menge etew ne meraat se ulaula niyu!' ke se kemuney te valey.

<sup>28</sup> "Ne ebpekependerawit kew se ebpekengingitel kew su egkekita niyu riyà te lusud dut te menge etew ne Edetuan te Eleteala arà se keep-epuan niyu rengan, ne en si Abraham wey ke anak din ne si Isaac wey ke apù din ne si Jacob abpeg dema ke langun ne menge etew ne mibpelambas te Lalag te Eleteala, ugaid ne sikiyu ne kayi kew rà te luwal su kenà kew ebpekelusud ketà.

<sup>29</sup> Ne merakel dema se menge etew ne egenat te epat ne pediylulu kayi te kelibutan ne ebpekeuma su ebpekepinuu te egkaan ketà te kevruranan dut te menge etew ne Edetuan te Eleteala.

<sup>30</sup> Ugaid ne ruen munge etew guntaan ne mepeembavà se hinawa ran wey ebpesuhù dan te ruma ran, ugaid ne egkeuma arà se hewii ne sikandan ke mepurù se ketengdanan din. Ne ruen munge etew guntaan ne mepurù se ketengdanan din, ugaid ne egkeuma arà se hewii ne sikandan se pinekemevavà.”

*Bayuk ni Hisus te kegkerurunù din dut te Menge Mehinged te Hirusalem (Mateo 23:37-39)*

<sup>31</sup> Ketà te arà ne munge hewii ne ruen munge Peresiyu ne mid-ingguma ki Hisus ne migkahi ran te, “Levundus ke en diyà te ruma ne inged su ed-imetayan ka kun ni Hirudis.”

<sup>32</sup> Ne migkahi si Hisus te, “Si Hirudis ayan se metau te edliyuk ne kehiya niyu kandin te, ‘Kenà a ed-awà kayi su guntaani wey keremà ne edlevundusan ku pà ini se helevek ku te ebpenegseg te vusew ne ebpemekaid te munge etew wey ebpemawì a te munge daru ran, ne ketà te iketelu ne hewii ne egkeipus ku ini.’

<sup>33</sup> Ugaid ne ed-ip-ipanew ad ma guntaan wey keremà abpeg te ikeruwa pà ne hewii su warà ebpekekaid kedì kayi su langun ne ebpelambas te Lalag te Eleteala ne riyà ed-imetayi te lusud te inged ne Hirusalim.”

<sup>34</sup> Ne ketà ne netenuran ni Hisus ke munge ulaula rut te munge etew te Hirusalim ne migkahi sikandin te,

“Ey, igkerurunù ku sikiyu ne munge mehinged te Hirusalim!

Su sikiyu ke mibpengimatey

te munge etew ne mibpelambas te Lalag te Eleteala,

wey mibpenrumbag niyu te batu

ke munge etew ne midsuhù te Eleteala kenian te keniyu!

Kenà kepipira ku rà perem eburuna sikiyu

su edtuguren ku sikiyu

ebpekeiring te upa ne edlekup te anak din,

ugaid ne kenà kew ebpelekup kediey!

<sup>35</sup> Na guntaan ne ed-ewaan en te Eleteala ke inged niyu.

Ne ini se igkahi ku keniyu,

igenat guntaani ne kenà a niyu en egkekita

taman te egkeuma arà se hewii

ne ebpekekahi kew te, ‘Edeyuen tew ini se nekeuma,

ne midsuhù te Eleteala ke Kerenan tew.’ ”

## 14

*Ebpenipaten si Hisus dut te Menge Peresiyu ke Ebpemawì Sikandin te Hewii ne Id-imeley*

<sup>1</sup> Seveka maa ne Hewii ne Id-imeley ne ruen senge etew ne egkeunutan te munge Peresiyu ne mid-inggat ki Hisus te egkaan diyà te valey rin. Ne ketà ne ebpenipaten si Hisus dut te munge etew ke ebpemawì sikandin te Hewii ne Id-imeley.

<sup>2</sup> Ne ruen ketà meama ne ebpekedaru su midlevag ke velad din wey paa rin.

<sup>3</sup> Mid-insà si Hisus dut te munge meyerù te penduan wey ke munge Peresiyu te, “Kayi te penduan tew, ne menu idtuhut be kenitew se ebpemawì te Hewii ne Id-imeley?”

<sup>4</sup> Ugaid ne langun dan ne mibpeeneng-eneng. Ne migeweran ni Hisus ke meama ne ebpekedaru ne arà dà ne neulian en, ne impeuli din en.

<sup>5</sup> Ne migkahi en si Hisus kandin te, “Embiya ruen senge etew keniyu ne ruen anak din etawa sapi din ne neulug diyà te meralen ne kalut te Hewii ne Id-imeley, ne maa kenà niyu edegdehawan te ebpehaun su geina ne Hewii ne Id-imeley?”

<sup>6</sup> Ne ketà ne warà dan meketavak.

*Ke Penurù ni Hisus Keyta Embiya Edtelavuk ki te Kevuruan*

<sup>7</sup> Netuasan ni Hisus te ini se munge etew ne mid-inggat ketà te Peresiyu te egkaan diyà te valey rin ne mibpemili dan te munge ebpinuwan te egkeedatan, ne mibpenempità sikandin, ke sikandin te,

<sup>8</sup> “Embiya egkeinggat kew riyà te kevuruan te egkewing, kenà kew ed-una ebpinuu rut te ebpinuwan te egkeedatan su kema ke ruen mepurù pà keykew ne ebpekeuma.

<sup>9</sup> Ne ed-uvey keniyu ini se mibair te kevuruan se egkahi te, ‘Sikandin se pepinuuwa nu kenian.’ Ne ketà ne egkeyeyaan ka su riyà kew ibpepinuu te iniyuhan.

<sup>10</sup> Ini se meupiya ne ed-ul-ulaan niyu embiya egkeinggat kew riyà te kevuruan, diyà kew pinuu te iniyuhan. Su embiya ve ed-uvey ke mibair te kevuruan ne egkehiyan kew te, ‘Kenà kew ma ruen dà pinuu su kayi kew pinuu te sineruhan ebpinuwan.’ Ne ketà ne egkeedatan kew rutun te merakel ne etew.

<sup>11</sup> Su ke etew ne ebpepurùpurù te hinawa rin ne ibavà te Eleteala, ugaid ke etew ne mepeembavà te hinawa rin ne ibpepurù sikandin te Eleteala.”

<sup>12</sup> Ne migkahi si Hisus dut te etew ne mibair te kevrunan te, “Ne sikuna rema, Mama, embiya ebair ka te kevrunan ne kenà iyan nu rà inggata ke minge sepekat nu wey ke minge suled nu, etawa ke minge etew riyà te uvey nu ne egkewasa. Su embiya ini se ed-ul-ulaan nu, ne ed-inggaten ka red nikandan ne ketà ne nekebayarey kew en.

<sup>13</sup> Ugaid ne embiya ebair ka te kevrunan ne iyan nu inggata ke minge ayuayu, ke minge etew ne sarir, ke minge pungkù wey ke minge pisek.

<sup>14</sup> Ne embiya ini se ed-ul-ulaan nu ne dekelà se kegkehalew nu. Su kenà ke ma nikandan egkevayaran, ugaid ne Eleteala se ebales keykew ketà te akir din ne hewii te kegkevanew te minge etew ne metidtu se ulaula.”

*Ke Sempità ni Hisus Mekeatag te Kevrunan te Kewingan ne Ibpeiring Din Dut te Kevrunan te Eleteala te Minge Etew ne Edetuan Din*

*(Mateo 22:1-10)*

<sup>15</sup> Duen senge etew ketà te uvey ni Hisus ne nekerineg te migkahi ni Hisus ne migkahi te, “Meupiya nevenar se hinawa rut te ebpeketelavuk ketà te kevrunan te Eleteala dut te minge etew ne Edetuan din.”

<sup>16</sup> Ne ketà ne ruen insemptà ni Hisus kandin te, “Duen senge etew ne meama ne mibair te dekelà ne kevrunan ne merakel se mid-inggat din.

<sup>17</sup> Guna su ini en ke bungkà te kevrunan din ne midsuhù din ke edsugsuhuen din diyà te minge etew ne mid-inggat din te ebpesabut kandan te, ‘Kuwa kew en su ebpekaan en.’

<sup>18</sup> “Ugaid ne langun te mig-inggat din ne mibaal te sumbuwan. Ke se neuna kayi te edsugsuhuen te, ‘Kenà dà mebmaraat se hinawa nu su kenà a ebpekependiyà su ruen tanà ne mibpemasa ku ne ed-intengan ku pà.’

<sup>19</sup> “Senge etew maa se migkahi te, ‘Kenà dà mebmaraat se hinawa nu su kenà a ebpekependiyà su ruen sepulù ne sapi ne mibpemasa ku ne ini pà ne igeram ku te edadu.’

<sup>20</sup> “Ne senge etew pà lavew se migkahi te, ‘Behu e pà ne nekeesawa ne kenà a ebpeketelavuk.’

<sup>21</sup> “Mid-uli ini se edsugsuhuen ne mibpenudtulan din ke ebpengemuney kandin dut te langun ne minge lalag te minge etew. Ne neepes ini se ebpengemuney kandin ne migkahi maa sikandin dut te edsugsuhuen din te, ‘Pekehaan kà se ebpendiyà te inged ne tuntula nu ke kelesada wey ke minge ralan ne pendumaa nu ke minge ayuayu, ke minge sarir, ke minge pisek wey ke minge pungkù.’

<sup>22</sup> “Huna su mid-uli ini se edsugsuhuen ne migkahi sikandin dut te ebpengemuney kandin te, ‘Netuman ku en ke insuhù nu kedi ne ini ran en, ugaid ne warà pà mepengkeg ini se valey.’

<sup>23</sup> “Ne migkahi pà ke ebpengemuney kandin te, ‘Tuntula nu ke merampal wey ke merimun ne minge ralan ne il-iluti nu te ebpepengkayì ke minge etew su apey egkepengkeg ini se valey ku.

<sup>24</sup> Ne ini se igkahi ku keniyu, warà senge etew rà dut te neuna ne mid-inggat ku se ebpekeheram dut te elugan ku misan deisek dà.’ ”

*Ke Penurù ni Hisus Mekeatag Dut te Kerehanan te Keduma Kandin*

*(Mateo 10:37-38)*

<sup>25</sup> Ne mid-ipanew maa si Hisus ne merakel nevenar ne etew ne miduma kandin. Ne midsineruwan ni Hisus sikandan se egkahi te,

<sup>26</sup> “Embiya ruen etew ne egkiyug ne eduma kediey ugaid ne iyan pà dekelà se limù din dut te amey rin wey iney rin, esawa rin, minge anak din, minge suled din, etawa misan ke hinawa rin, ne kenà benar sikandin ne edumdumaan ku.

<sup>27</sup> Su ke etew ne egkiyug ne eduma kediey ne iyan iya se lipati rin ke kandin ne kiyug ne tianga rin ke kandin ne pinebelavag ne kayu ne ed-ingaranan te Krus ne iyan din meana ne tumana rin ke minge suhù ku misan ibpateny rin pà se keduma rin kediey.

<sup>28</sup> “Upama ke ruen senge etew keniyu,” ke si Hisus, “ne egkesuat ne ebpeitindeg te metmetikang ne baley, ne ed-unaan din pà te ebpepegitung ke pira se igkegastu rin su apey rin egketueni ke ebpekegaga sikandin etawa kenà.

<sup>29</sup> Su embiya kenà din ebpegitungen ke pira se igkegastu rin, ne kalu ke iyan din dà egketemanan se matag igkevunsud ke minge pelaus. Ne egkekita rut te langun ne minge etew ini ne ed-un-undaan su warà din meimasad.

<sup>30</sup> Ne ebpeglelahey ran te, ‘Iyan tumù ne warà mibulug sikandin ke kenà din bes egkepasad.’ ”

<sup>31</sup> Ne migkahi maa si Hisus te, "Iring ded dema te ratù ne ebpekibunù te senge etew ne ratù, su ed-unaan din pà te ebpegitung ke ebpekegaga sikandin ne ebpekibunù dut te senge etew ne ratù ne ruen deruwa nepulù nengivu se sakup din, ugaid ne sepulù dà nengivu se kandin ne sakup.

<sup>32</sup> Embiya egkeantap din te kenà ebpekeatu ke minge sakup din, ne ruen edsuhuen din te ebpendiyà te senge etew ne ratù te meriyù pà ini se kunterà din su ebpekiduntay te warà pà mekebunù.

<sup>33</sup> Ne iring din ded dema," ke si Hisus, "dut te minge etew ne eduma kediey, kenà kew benar ne edumdumaan ku embiya kenà niyu edtehaken ke langun ne igkenuhuni niyu te kedumaruma niyu kedì."

*Ke Sempità ni Hisus te Ini se Keduma Kandin ne Ebpekeiring te Timus*

<sup>34</sup> Ne midsempità maa si Hisus te, "Meupiya ini se timus, su ebpekevehey te nanam dut te egkeenen tew ugaid ne embiya egkeawà en ke nanam te timus ne warà en dalan te kebmetimus din pà maa.

<sup>35</sup> Warà en iya pantag din su kenà egkehamit te misan ebunu ne ibpelambù te tanà, ne idtimbang dà lavew. Na," ke si Hisus, "ini se migkahi ku ne itaan niyu ke telinga niyu."

## 15

*Ke Sempità ni Hisus Mekeatag te Bilibili ne Nelaag ne Netuen ded ne Impeiring Din Dut te Etew ne Mibpedsendit te Salà Din*

*(Mateo 18:12-14)*

<sup>1</sup> Senge hewii ne merakel se minge etew ne ebpevyad te buwis wey minge etew ne mekesalà dema ne mid-uvay ki Hisus su ebpemineg te penurù din.

<sup>2</sup> Nekita ini rut te minge Peresiyu wey minge meyerù te penduan ne mibpemivig dan se egkahi te, "Si Hisus ini ne ebpemekiduma kayi te minge etew ne mekesalà ne ebpekiduntay pà dema kandan."

<sup>3</sup> Ne ketà be ne mibpenempità si Hisus kandan te,

<sup>4</sup> "Embiya ruen senge etew keniyu ne ruen mehatus ne bilibili rin ne seveka se nelaag, ne engkey se ed-ul-ulaan din? Ini imbe se ed-ul-ulaan din, ed-ewaan din imbe ke siyew nepulù wey siyew ne ebpenabtab su ebpenuntulen din arà se seveka ne nelaag taman te egketuen din.

<sup>5</sup> Ne embiya egketuen din ini ne egkehalewhalew nevenar sikandin, ne ketà ne edsepiyeyen din,

<sup>6</sup> ne ed-uli en. Embiya ebpekeuma riyà te valey rin ne ebpenenawag sikandin dut te minge ruma rin se egkahi te, 'Kehalew kew su netuen ku red ini se nelaag ne bilibili ku.'

<sup>7</sup> Ne igkahi ku keniyu," ke si Hisus, "te iyan pà dekelà ne kehelawan diyà te langit embiya ruen senge etew ne mekesesalà ne ebpekedsendit ne ed-engked te meraat ne ulaula rin, tumin dè be kayi te siyew nepulù wey siyew ne minge etew ne kenè en mulà ebpedsendit su metidtu kun."

*Ke Sempità ni Hisus Mekeatag te senge elad ne pirak ne netarin ne Ebpekeiring Dut te Etew ne Mibpedsendit te Salà Din*

<sup>8</sup> Ne midsempità maa si Hisus te, "Upama ruen senge etew ne meritan ne ruen sepulù din ne pirak ne elin-elin pelatà ne neterinan te senge elad. Engkey se ed-ul-ulaan din? Ini imbe se ed-ul-ulean din, edtemteman din ke sulù ne arà pà ne ebpenepung sikandin te valey su ebpemengaan din taman te egketuen din ded.

<sup>9</sup> Ne embiya egketuen din ded ne ebpenenawag sikandin te minge ruma rin se egkahi te, 'Kehalew kew su netuen ku red ini se kureta ku ne netarin.'

<sup>10</sup> Ne igkahi ku keniyu," ke si Hisus, "ne engketà ded be imbe ke kehelawan dut te minge suluhuen te Eleteala riyà te langit ke ruen senge etew ne mekesesalà ne ebpekedsendit ne ed-engked te meraat ne ulaula rin."

*Ke Sempità ni Hisus Mekeatag te anak ne Nelaag ne Ebpekeiring Dut te Etew ne Mibpedsendit te Salà Din*

<sup>11</sup> Ne midsempità pà maa si Hisus te, "Duen meama ne deruwa se anak din ne elin meama.

<sup>12</sup> Migkahi ini se ari riyà te amey rin te, 'Amà, behayi ad nikew te kediey ne umun kayi te minge aren nu.' Arà dà ne mibaad en dut te amey ke aren din dut te deruwa ne anak din.

<sup>13</sup> Warà dà meuhet ne mibpasa en dut te ari ke kandin ne umun ne migkuwa rin ke langun ne kureta rin ne mid-awà en. Diyà mibpesinaru sikandin te medmeriyù ne inged ne rutun din be emina ke kureta rin te warà pantag din.

<sup>14</sup> Guna su neeminan en sikandin ne migetuk se bitil ketà te inged, ne ini se kenakan ne warà egkepesineruwan din.

<sup>15</sup> Ketà be ne mibuyù sikandin te helevek dut te etew ketà ne iyan imbehey kandin ne helevek ne edtuganur te bavuy riyà te taneb.

<sup>16</sup> Tuus te kegkevital din ne egkeiveg en sikandin dut te savud te bavuy, ugaid ne warà ma ebpekaan kandin.

<sup>17</sup> “Guna su neuhet ne nekemuhudmuhud sikandin ne kehingginawa rin te, ‘Langun dut te menge etew ne egelevek ki Amà ne edsawadsawad se egkekaan dan, ugaid ne siaken kayi ne ebpatay ad te bitil.

<sup>18</sup> Iyan tumù se ed-uli e red diyà te ki Amà ne ini se egkehiyen ku, “Amà, dekelà se salà ku diyà te Eleteala wey kayi te sikuna ne amey ku.

<sup>19</sup> Kenà ad edait ne anak a nu pà, ugaid ne peheleveka a nu rà iring dut te edsugsuhuen nu.” ’

<sup>20</sup> Arà dà ne mid-uli en ini se kenakan diyà te amey rin.

“Ne riyà pà sikandin te meriyù ne nesandeng en dut te amey rin. Ne midaat nevenar se nanam dut te amey rin kandin ne mibpelelahuy en se edtalavuk kayi te anak din ne midrakep din ne ereki ini se anak din.

<sup>21</sup> ‘Amà,’ ke se anak din, ‘dekelà en se salà ku riyà te Eleteala wey kayi te sikuna ne amey ku ne kenà ad edait ne anak a nu pà.’

<sup>22</sup> “Ugaid ne midtawag dut te amey rin ke menge edsugsuhuen din se egkahi te, ‘Pekehaan kew ne ipengkayi niyu ke mèmeupiya ne velegkas ne iseluub niyu kandin’. Sisingi niyu sikandin wey telumpai niyu pà sikandin.

<sup>23</sup> Engaya niyu ve arà se nati te sapi ne pinelambù ne sumbelia niyu su ebair ki te kevrunan.

<sup>24</sup> ‘Su ini se anak ku

ne iring iya te minatey en,

ne guntaani ne neuyag maa.

Su iring te nelaag en,

ne guntaani ne mid-uli ded.’

Arà dà ne midrudsuan dan en ke kegkevurun dan.

<sup>25</sup> “Ne ini se kakey ne anak dut te lukes ne riyà te pengengewiran. Guna su ed-uli en ne ebpelpelingguma en sikandin kayi te valey ne nekerineg sikandin te edlebpad wey edsayew.

<sup>26</sup> Ne midtawag din se senge etew ne edsugsuhuen dut te amey rin ne mid-insàan din te, ‘Engkey ayan se ed-ul-ulaan niyu kenian te valey?’

<sup>27</sup> Midtavak ke sugsuhen te, ‘Ke ari nu ne mid-uli en, ne impesumbali dut te amey nu ke pinelambù ne nati su warà ded nekekaid dut te ari nu.’

<sup>28</sup> “Ugaid ne neepes ini se kakey ne kenà en ebpemenayik diyà te baley ran. Ketà ne mibpemenaug ke amey rin ne midneyeyuan din te ebpepemenayik.

<sup>29</sup> Ugaid ne iyan din migkahi kayi te amey rin te, ‘Tentenuri nu, Amà, te kenà pira rà ne rahun se kinehelhelevek ku keykew iring dut te edsugsuhuen nu, ne warà a keenu midsuer keykew. Ne misan iring ketà ne warà a nu behayì te misan kambing dà su apey a mekehalewhalew rut te menge sepekat ku.

<sup>30</sup> Ugaid ne guna su mid-uli en ayan se anak nu ne mideraat te kearen nu su indumaruma rin te meritan ne midsumbali nu mulà ke pinelambù ne nati.’

<sup>31</sup> “ ‘Mama,’ ke se amey rin, ‘warà ka mekevelag kediey ne langun te kearen ku ne keykew.

<sup>32</sup> Ugaid ne iyan din kemeyidan ne egalewhalew ki,

su ini se ari nu

ne iring iya te minatey en,

ne guntaani ne neuyag maa.

Su iring te nelaag en,

ne guntaani ne mid-uli ded.’ ”

## 16

*Ke Sempità ni Hisus Mekeatag te Kenà Metidtu ne Ebpeheweren te Kekewesai*



<sup>1</sup> Ne ruen ruma pà ne sempità ne migkahi ni Hisus dut te edumdumaan din. “Duen senge etew ne kewasa,” ke sikandin, “ne ruen midserihan din dut te kearen din. Ne ruen mibpenudtul kandin te ini se midserihan din ne ederaat dà dut te kekewesai rin.

<sup>2</sup> Nerineg din arà ne midtawag din arà se kedserihan din ne migkahi te, ‘Engkey ini se nerineg ku mekeatag kenikew? Isurat nu en ke langun ne kegkuwinta nu kayi te ini se helevek ne insarig ku kenikew su kenà ke en egkepakey ne kedserihan ku.’

<sup>3</sup> “Ne kehingginawa rut te meama ne kedserihan te, ‘Ibpeawà e bes dut te mepurù ku. Engkey en be se ed-ul-ulaan ku? Su kenà a ebpekegaga ne egkekalut wey egkeyeyaan a ne ebpememuyù.

<sup>4</sup> A, ini ves se ed-ul-ulaan ku,’ ke hingginawa rin, ‘su apey ruen egkepeneruwan ku ke ibpeawà ad nikandin kayi te helevek ku.’

<sup>5</sup> “Ketà ne midtawag din te idsenge etew ke langun ne ruen utang din ketà te mepurù din. Ke neuna ne mid-insaan din te, ‘Pira pà ke utang nu rut te mepurù ku?’

<sup>6</sup> “Ne midtavak ini se meama te, ‘Mehatus ne latà te lana.’

“Ne migkahi ini se kedserihan te, ‘Ini red ke listaan te utang nu, ne pinuu ka ne degdehawi nu te edsambi te lelima nepulù dà.’

<sup>7</sup> “Ne mid-insaan din maa ke senge etew te, ‘Pira pà ke utang nu?’

“Ne migkahi ini se meama te, ‘Sengivu ne sakù te parey.’

“Migkahi maa ini se kedserihan te, ‘Ini ke listaan te utang nu, ne iyan nu rà isurat se walu nehatus.’

<sup>8</sup> “Guna su nerineg kayi te mepurù te kedserihan ne nekekahi sikandin te, ‘Hey, metautau sikandin ne ebpenehana te keuyahan din keuremà!’ ”

Ne migkahi en maa si Hisus te, “Ke menge etew ne kayi rà te ampew te dunya ne kenà sakup te Eleteala ne metau ne ebpekiduma rut te ruma ran su apey ruen egkekuwa ran. Ugaid,” ke si Hisus, “ke menge etew ne sakup te Eleteala ne kenà dan bes metau ne ebpenehana te akir din ne hewii riyà te langit.

<sup>9</sup> Tembù be igkahi ku keniyu,” ke si Hisus, “te gemita niyu ini se kekewesai niyu kayi te ampew te dunya te edtavang dut te menge ayuayu su embiya ebpatay ke en ne kenà nu en egemiten ke kekewesai nu ne edtelimaan ka te Eleteala riyà te langit.

<sup>10</sup> “Su ke etew ne egkeserihan te reisek ne kearen,” ke si Hisus, “ne egkeserihan dema te rekela ne kearen. Ne iring din ded dema ke etew ne edlimbung te misan deisek dà ne kearen ne wey pè be kenà medlimbung ke rekela en ne kearen.

<sup>11</sup> Su embiya kenà ka egkeserihan ne ebpeheweren te kearen kayi te ampew te dunya ne kenà ke en iya ebpeheweren te Eleteala rut te tidtu ne kearen diyà te langit.

<sup>12</sup> Ne embiya kenà ka egkeserihan ne ebpeheweren te kearen ne kenà keykew, ne kenà ka ebeheyan te Eleteala te tidtu ne kearen nu riyà te langit.

<sup>13</sup> “Warà edsugsuhuen,” ke si Hisus, “ne deruwa se edtehiuripen kandin. Su embiya deruwa se ebpengunguripen kandin, ne egkeepesan din ke seveka ne ed-edatan din ke seveka. Etawa ebperumdumaan din ke seveka, ne kenà din edsehpaen ke seveka. Ne iring din ded dema,” ke si Hisus, “embiya iyan dekelà te hinawa nu ne kureta, ne kenà ka ebpeketuman te kiyug te Eleteala.”

*Menge Ruma Pà ne Penurù ni Hisus*

*(Mateo 11:12-13; Marcos 10:11-12)*

<sup>14</sup> Duen ketà menge Peresiyu ne iyan den dà dekelà te hinawa ne kureta ran. Nerineg dan dà ini se migkahi ni Hisus ne mid-undaunda ran dà.

<sup>15</sup> Ne migkahi si Hisus kandan te, “Sikiyu ne engkungkun ne menge metidtu kew kayi te sineruwan te menge etew, ugaid ne netuenan te Eleteala ke netahù te hinawa niyu. Su ini se rekela te hinawa te menge etew ne warà pantag din diyà te etuvangan te Eleteala.

<sup>16</sup> “Ke penduan ni Moises,” ke si Hisus, “wey ke menge impesurat te Eleteala rut te menge etew ne mibpelambas te Lalag din, ini se impesabut dan taman dà te nekeuma en si Juan ke Ebpebunyang. Igenat dè be ketà te nekeuma si Juan ne impesabut en ke Meupiya ne Tudtul mekeatag te Kedadù te Eleteala te menge etew, ne edtehel ke menge etew te kedlusud dan ketà.

<sup>17</sup> Ugaid ne ke penduan ni Moises ne kenà egkeawà, su iyan pà melemu ne egkeawà ini se langit wey tanà tumin dè be ke meawà te senge tahà dà dut te penduan ni Moises.

<sup>18</sup> “Arà se meama ne ebpekid-engked te esawa rin ne edsaup maa ed-esawa,” ke si Hisus, “ne nekepengingniyug en sikandin diyà te etuvangan te Eleteala. Ne engketà ded maa ke meama ne mid-esawa kayi te meritan ne mibpekid-engked dut te esawa rin, ne nekepengingniyug en dema sikandin diyà te etuvangan te Eleteala.”

*Ke Kewasa ne Meama wey si Lazaro*

<sup>19</sup> Ne migkahi pà maa si Hisus te, “Duen senge etew ne kewasa nevenar ne mibevelegkas te mepurù nevenar se elehà din, ne ini se ked-ubpàubpà din ne warà egkepemengà din.

<sup>20</sup> Ne ruen dema senge etew ne ayuayu ne mid-ingaranan ki Lazaro ne nelumbus se lawa rin te padel. Ne uman gewii ne id-ated sikandin te menge ruma rin diyà te pesuran te eهران ketà te kewasa ne meama.

<sup>21</sup> Su ebpekeinam ke ruen samà dut te kewasa ne meama. Ne gewii rin te ed-id-irehà ketà ne ruen menge asu ne edilà te padel din.

<sup>22</sup> “Ne neuma se hewii ne minatey si Lazaro, ne mibpeneheewit sikandin dut te menge suluhuen te Eleteala diyà te uvey ni Abraham diyà te langit. Ne minatey en dema ini se meama ne kewasa ne inleveng dan en sikandin.

<sup>23</sup> Ne nekependiyà sikandin te apuy ne rakà ne nerasey nevenar sikandin! Ne midlingakà sikandin ne nekita rin diyà te medmeriyà si Abraham. Ne nekita rin dema ketà si Lazaro diyà te uvey rin.

<sup>24</sup> Ne midtawag din en si Abraham se egkahi te, ‘Apù Abraham, ikeyru a nevenar nikuna! Ipepengkayi nu pà si Lazaro su apey rin egketepihisi ini se bèbà ku te wayig su egkerasey ad nevenar kayi te apuy.’

<sup>25</sup> “Ugaid ne migkahi si Abraham te, ‘Menge anak, tentenuri nu te nekuwa nu en ke langun ne keupiyanan nu te gewii rut te biviyag ke pà, ugaid ne si Lazaro mulà ne neamin-amin din se keresayan. Ugaid ne guntaani ne si Lazaro ne meupiya en se egketemanan din kayi, ne sikuna en se egkerasay.

<sup>26</sup> Ne kenà ketà dà taman su ruen egkembusan te tanà keniyang te elet tew, ne misan duen kayi ne egkiyug ne ed-apat keniyang te keniyu ne kenà ebpekeapet. Engketà ded maa ke keniyang te keniyu, kenà dan ebpekeapet kayi.’

<sup>27</sup> “Ne ketà ne migkahi pà maa ke kewasa te, ‘Embiya iring ketà, Apù Abraham, ne ebuyuen ku keykew te ipependiyà nu pà si Lazaro riyà te baley ni Amà,

<sup>28</sup> su ruen lelima ne ari ku ne elin meama. Ibpevaag nu sikandan apey kenà dan ebpekepengkayi te ini se ubpaan ne keresayan.’

<sup>29</sup> “Migkahi si Abraham te, ‘Duen diyà te kandan impesurat ki Moises te Eleteala wey ke impesurat te Eleteala rut te menge etew ne mibpelambas te lalag din, ne arà dè be se upiani ran pemihena.’

<sup>30</sup> “Ne migkahi en maa ke kewasa te, ‘Kenà dan ebpeming ketà, Apù Abraham, ugaid ne embiya ruen minatey ne egkevanew ne ed-uli diyà te kandan ne arà pà ne ebpedesendit dan.’

<sup>31</sup> “Ne migkahi si Abraham te, ‘Embiya kenà dan ebpeming dut te impesurat te Eleteala ki Moises wey ke impesurat dut te menge etew ne mibpelambas te Lalag te Eleteala, ne iyan dan pè be pemihena ke ruen egkevanew ne ed-uli diyà te kandan.’”

## 17

*Ke Penurù ni Hisus Mekeatag te Kebpesahad te Salà te Menge Ruma ta*

*(Mateo 18:6-7, 21-22; Marcos 9:42)*

<sup>1</sup> Ne ruen migkahi ni Hisus diyà te edumdumaan din te, “Kenà egkepakey ne kenà egkeuma ini se kebpengerami te menge etew, ugaid ne ke etew ne ebpengeram te ruma rin su apey ebpekedsalà ne mekeyruwiru nevenar!

<sup>2</sup> Iyan pà tumù ne ebperiwetuwan ke lieg din te mevehat ne batu ne id-antug diyà te rahat su apey kenà sikandin se puunaan te ebpekedsalà dut te mevavà ne etew ne edsarig kediey.

<sup>3</sup> Tembù be uram kew!

“Embiya ruen duma nu ne nekedsalà kenikew,” ke si Hisus, “ne kehiya nu kandin ne ibpetiditu nu sikandin, ne embiya ebpekedsendit ne ed-engkeran din ke salà din ne pesihara nu.

<sup>4</sup> Embiya ebpekedsalà sikandin kenikew te kepipitu te lusud te senge keandew ne kepipitu rema sikandin ebuyù kenikew te, ‘Nekedsendit a te mid-ulaula ku, menu ke pesihara a nu,’ ne pesihara nu rema sikandin.”

*Ke Penurù ni Hisus Mekeatag te Kebperetiyya*

<sup>5</sup> Ne migkahi ke menge edumdumaan diyà te ki Hisus ke Kerenan te, “Umani nu ke kepperetiyya rey.”

<sup>6</sup> Ne migkahi si Hisus te, “Embiya ruen kepperetiyya niyu te Eleteala ne reisek misan iring dut te reisek ne lahas ne mustasa ne ebpekekahi ka kayi te ini se rekela ne kayu te, ‘Awà ka kayi ne arat ka riyà te rahat,’ ne arà dà ne ebpekeperumaruma keykew.”

*Ke Penurù ni Hisus Mekeatag te Ketengdanan tew ne Menge Edsugsuhuen Din*

<sup>7</sup> Migkahi maa si Hisus te, “Upama ke ruen senge etew keniyou ne ruen edsugsuhuen din te edadu etawa edtuganur te menge bilibili nu ne mid-uli sikandin te meapun ne engkey, ebpekekahi ka te, ‘Una ke en kaan su wey ad?’

<sup>8</sup> Kenè en iya! Su iyan nu mulà egkekahi se, ‘Sambi ka te belegkas nu ne elugan ke en su apey a mekekaan en. Ne wey ka kaan ke ebpekeipus ad.’

<sup>9</sup> Ne menu, edeyuen nu ke edsugsuhuen nu su midtuman dut te insuhù nu? Kenà en iya!

<sup>10</sup> Ne engketà kew red dema,” ke si Hisus, “embiyà netuman niyu en ke langun ne ibpehelevek te Eleteala keniyou ne kahi kew rà te, ‘Menge edsugsuhuen kiyu rà te Eleteala, ne kenà edait ne edeyuen kiyu su midtuman tew rà ke insuhù din kenitew.’ ”

*Neulian ni Hisus ke Sepulù ne menge Etew ne Kevuwaen ne muna pà te It-it*

<sup>11</sup> Guna su ebpendiyan en si Hisus te Hirusalim ne riyà mebayà sikandin te eletan te pruvinsiya ne Semeriya wey Geliliya.

<sup>12</sup> Ketà te ebpelpelinggume en sikandin te senge inged ne ruen sepulù ne meama ne midtelavuk kandin ne ruen kevuwa ran muna te it-it. Ugaid ne geina te ruen kevuwa ran ne riyà dan mid-itindeg te malù dà meriyù ki Hisus

<sup>13</sup> ne midtawag dan en se egkahi te, “Hisus, Meyterù, ikeyru key nikuna!”

<sup>14</sup> Nekita rin sikandan ne migkahi en te, “Pendiya kew te menge terebpelengesa te Eleteala ne peintengi niyu ke lawa niyu te nengeulian en.” Ne mid-ipanew ran ne gewii te riyà dan en te ralan ne nengeulian dan en.

<sup>15</sup> Ne senge etew kandan se nekekita te neulian sikandin ne midlived kayi te ki Hisus se egkulkuleyi en se edeyù te Eleteala.

<sup>16</sup> Ne mid-veye sikandin ki Hisus ne midlumpeng en sikandin kayi te sineruwan ni Hisus se ebpeselamat kandin. Ne ini se etew ne kenà Hudiyänen su riyà ebpuun te inged ne Semeriya.

<sup>17</sup> Ne migkahi si Hisus te, “Maa kenà sepulù niyu beneng ke nengeulian? Endei en be ke siyew ne etew?”

<sup>18</sup> Meambe ke sikuna rà ini se tegeSemeriya se midlived su ebpeselamat te Eleteala?”

<sup>19</sup> Ne migkahi en si Hisus te, “Itindeg ke en, Mama, ne levundus ke en su ke sarig nu te Eleteala se nekeulì keykew.”

*Ke Penurù ni Hisus Mekeatag te Kedatù te Eleteala te Menge Etew*

*(Mateo 24:23-28, 37-41)*

<sup>20</sup> Senge hewii maa ne ruen menge Peresiyou ne mid-insà ki Hisus te, “Keenu egkeuma arà se Kedatù te Eleteala te menge etew?”

Midtavak si Hisus kandan te, “Kenà niyu egkekita se kebpekeuma rut te Kedatù te Eleteala te menusiya.

<sup>21</sup> Warà ebpekekahi te, ‘Ini en ke Kedatù din,’ etawa ebpekekahi te, ‘Ediyan en.’ Su ini se Kedatù te Eleteala te menge etew ne kenà egkekita su kayi red te hinawa niyu.”

<sup>22</sup> Ne migkahi en si Hisus kayi te edumdumaan din te, “Duen gewii ne egkeuma ne rekela se kiyug niyu te metuman ke hewii te edlived ke Impeanak te Menusiya, ugaid ne kenà pà egked-ulaula.

<sup>23</sup> Duen egkahi keniyou te, ‘Ediyan en ke Ebperetuen te Eleteala te menge etew,’ etawa egkahi ran te, ‘Ini en.’ Ugaid ne kenà kew eduma kandan.

<sup>24</sup> Su ketà te kedlived te Impeanak te Menusiya kayi te ampew te dunya ne iring kehaan din te kilat ne ebpeketaew te langun ne linengkevan igenat te pehiliran taman te binunsuran.

<sup>25</sup> Ugaid te kenà pà ini egked-ulaula ne iyan iya se egkerasey pà sikandin wey ed-engkenà kandin ini se menge etew guntaani.

<sup>26</sup> “Ketà te akir din ne hewii ke edlived sikandin kayi te ampew te dunya, ne ebpekeiring ke ed-ul-ulaan te menge etew rut te ed-ul-ulaan te menge etew rengan te gewii pà ni Noa.

<sup>27</sup> Su rengan te hewii pà ni Noa, ne warà sanggel dan se ebpengevrurun su egkaankaan dan ne ebpinginum wey ebpees-eseweey taman te arà en ke hewii ne midlusud en ensi Noa ketà te rekela ne avang ne ed-ingaranan te arka. Ne arà ne nekeuma en ke dalem ne neherà dan en langun.

<sup>28</sup> ‘Ebpekeiring ded dema rut te hewii ni Lut. Su warà sanggel dan se ebpengevrurun su egkaankaan dan ne ebpinginum, ebpememasa wey ebpemendahang, ebpememula wey ebpemevaley.

<sup>29</sup> Ugaid ne arà se hewii ne kinepeawà ki Lut ketà te inged din ne ed-ingaranan te Suduma ne imperadsang te Eleteala ini se regreg wey esupri ne riya ebpuun te langit ne neherà dan langun.

<sup>30</sup> "Iring ded be ketà se kehaan din ke edlived kayi ke Impeanak te Menusiyà su kenà ebpenerengen te menge etew.

<sup>31</sup> "Ketà ke egkeuma arà ne hewii," ke si Hisus, "ne embiya ruen etew riya te ruwangen te baley rin ne kenà din en lilingaya ke keleglehan din. Ne engketà ded dema ke riya sikandin te pengengewiran, kenè en med-uli diyà te valey su egkuwa te piya engkey en.

<sup>32</sup> Tentenuri niyu ke engkey se netemanan dut te esawa ni Lut te midlilingey sikandin.

<sup>33</sup> Su ke etew ne egkenuhun te umur din ne ebpatay lavew, ugaid ke etew ne iyan din ibpatay se keduma rin kediey te kebepemesabut dut te Meupiya ne Tudtul ne ruen umur ne ibehey kandin ne warà edtemanin din.

<sup>34</sup> Ne ini se tendai nu nevenar, embiya merukilem se kedlived din kayi ne ruen ebpeulirey ne deruwa ne etew, ne ebpekeruma ke senge etew kandin ne egketahak ke seveka.

<sup>35</sup> Engketà ded dema ke meandew se kedlived din kayi, embiya duen deruwa ne meritan ne ebpeemungey te egaling, ne ebpekeruma ke senge etew kandin ne egketahak ke seveka. [

<sup>36</sup> Engketà ded dema ke ruen deruwa ne etew ne ebpeemungey riya te pengengewiran, ebpekeruma ke senge etew kandin ne egketahak ke seveka.]"

<sup>37</sup> Ne ketà ne mid-insà ke menge edumdumaan ni Hisus kandin te, "Endei ve ini egketuman?" Ne midtavak din te tatap ne besenan, ke sikandin te, "Piya endei se ruen minatey rin ne ketà eburun ke menge uwak."

## 18

### *Ke Sempità ni Hisus Mekeatag te Balu ne Meritan wey Ke Egawed te Kukuman*

<sup>1</sup> Duen maa insemptà ni Hisus dut te edumdumaan din su apey ran egketenuri se layun dan ebpengeningeni ne kenà dan egkevungas.

<sup>2</sup> Ke sikandin te, "Duen senge etew ne egawed te kukuman diyà te senge inged ne warà andek din te Eleteala etawa warà adat din te menge etew.

<sup>3</sup> Ne ketà te inged ne ruen dema senge etew ne meritan ne valu ne layun ebpengkayi te kandin su ebuyù te tavang din. 'Tevangi a nu,' ke se meritan, 'su apey kenà meahew te kunterà ku ini se kearen.'

<sup>4</sup> "Ne neuhet nevenar ne warà sehipaa kayi te egawed te kukuman ini se meritan, ugaid ne neperaan te kedlivedlived te meritan ne kehingginawa rin te, 'Misan warà andek ku te Eleteala etawa warà adat ku te menge etew,

<sup>5</sup> ne geina te edlingasa ini se meritan kediey ne idtindeg ku sikandin kayi te kunterà din su apey ed-engked en su embiya kenà ne egkepupusan ad te tigker.' "

<sup>6</sup> Ne migkahi en maa si Hisus te, "Pegpegitunga niyu arà se midlalag dut te egawed te kukuman ne kenà metidtu ne midtindeg dut te meritan.

<sup>7</sup> Ne menu kenà be edtindeg ke Eleteala dut te kandin ne menge etew embiya ebpengeningeni ran diyà te kandin te merukilem meandew? Maa edlanganlangan pè bè sikandin se edtavang kandan?

<sup>8</sup> Igkahi ku keniyu," ke si Hisus, "mehaan se kedtindeg din keniyu. Kenà egkevungas ke Eleteala ne edtavang dut te etew rin, ugaid ne ketà te edlived kayi ke Impeanak te Menusiyà ne menu duen pè be egkeumaan din ne edsarig kandin?"

### *Ke Sempità ni Hisus Mekeatag te Senge Etew ne Peresiyu wey ke Ebpevyayad te Buwis*

<sup>9</sup> Ne ruen impenempità ni Hisus ne ebpekesuhat dut te menge etew ne iyan dan kunaan ke menge metidtu ran ne edsudi dan ke langun ne menge ruma ne etew.

<sup>10</sup> Ke si Hisus te, "Duen deruwa ne etew ne mibpendiyà te Nekebpuru ne Valey te Eleteala su ebpengeningeni. Senge etew ne Peresiyu ne ini se seveka ne ebpevyayad te buwis.

<sup>11</sup> Guna su ketà dan en te lusud ne mid-itindeg ini se Peresiyu ne mibpengeningeni te hinawa rin, ke sikandin te, 'Is Eleteala, ebpenelamat a kenikew ne Eleteala su kenà a iring keniyan te ruma ne menge etew ne tenlimbungen, menge etew ne meraatey se ulaula ran, wey menge etew ne ebpengingniyug. Uya, ebpenelamat a te kenà a iring keniyan te etew ne ebpevyayad te buwis.

<sup>12</sup> Uman senge pedian ne ke reruwa a edlimpas se egkaan ne ebehey a kenikew te ikeseputù ne umun dut te langun ne egkevatonbatun ku.'

<sup>13</sup> “Ugaid ne ini se etew ne ebpevayad te buwis ne mibpekeriyù sikandin ne midurungul ne mibpenempak din se kumeng din te kegkebmutu rin ne mibpengeningeni se egkahi te, ‘Is Eleteala, ikeyru a nevenar nikuna su mekesesalà a.’”

<sup>14</sup> “Igakahi ku keniyu,” ke si Hisus, “ketà te kineuli kayi te ebpevayad te buwis ne kenè en ebpenunduhan te Eleteala ke salà din, ugaid ne kenà iring ketà te mepereyù ne Peresiyu. Su piya entei ne etew ne ebpepurùpurù te hinawa rin ne ibpevavà te eleteala, ugaid ne piya entei ne etew ne mepeembavà te hinawa rin ne ibpepurù sikandin te Eleteala.”

*Mibpenubtuvaran ni Hisus ke Menge Vatà*  
(Mateo 19:13-15; Marcos 10:13-16)

<sup>15</sup> Na ruen menge etew ne mibpemava te anak dan diyà te ki Hisus su ibperampen dan kandin su ebpepenubtuvaran, ugaid ne midawey ran dut te menge edumdumaan din.

<sup>16</sup> Guna su nekita ini ni Hisus ne midtawag din ke menge vatà ne migkehiyan din ke menge edumdumaan din te, “Kenà niyu dewaya sikandin! Ugaid ne ibpepengkayi niyu te kediey ke menge vatà su ke menge etew ne iring te menge vatà se kedsarig dan kediey ne iyan ebpekeamung te Edetuan te Eleteala.

<sup>17</sup> Sebenarvenar ini se egkehiyan ku, ke etew ne kenà edtelimà te Kedetui kandin te Eleteala iring te kedtelimà kayi te reisek ne vatà ne kenà ebpekelusud sikandin dut te menge etew ne Edetuan te Eleteala.”

*Ke Kewasa ne Meama ne Egkiyug ne Ebpekeangkun te Umur ne Warà Edtemanan Din*  
(Mateo 19:16-30; Marcos 10:17-31)

<sup>18</sup> Duen hewii ne ruen mibpengkayi te ki Hisus ne senge etew ne egkeunutan te menge Hudiyanen ne mid-insà te, “Meyterù, langun ne ed-ul-ulaan nu ne meupiya! Engkey se ed-ul-ulaan ku su apay a mekekuwa te umur ne warà edtemanan din?”

<sup>19</sup> Ne midtavak si Hisus te, “Meambe ke nekahi nu te meupiya ke langun ne ed-ul-ulaan ku? Su seveka rà sa meupiya se ed-ul-ulaan din ne Eleteala rà.

<sup>20</sup> Ugaid ne embiya arà se id-insà nu mekeatag te umur ne warà edtemanan, ne netuanan nu en ke penduan te Eleteala ne egkahi te: ‘Kenà ka ebpengingniyug, kenà ka ed-imatey, kenà ka ebpenakew, kenà ka edtarùtarù, ne edati nu ke amey nu wey ke iney nu.’”

<sup>21</sup> Ne migkahi ke meama te, “Meyterù, igenat te batà e pà ne langun keniyen ne midumaan ku.”

<sup>22</sup> Nerineg dà ni Hisus ini ne migkahi en sikandin te, “Duen pà lavew kurang nu. Iyan be se uli ka ne pesaa nu ke langun ne kearen nu ne ipemehey nu ve ke elehà din diyà te menge ayuayu su apay ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedì.”

<sup>23</sup> Nerineg din dà ke lalag ni Hisus ne neu ruen nevenar sikandin su kewasa nevenar.

<sup>24</sup> Nekita ni Hisus te neu ru ke meama ne migkahi sikandin te, “Merehen nevenar te kewasa ne etew se kebpesakup din dut te menge etew ne Edetuan te Eleteala.

<sup>25</sup> Iyan pà melemu ne ebpevayà diyà te vudsi te rahum ini se rekela ne binatang ne kemilu tumin dè be ke kebpesakup te etew ne kewasa dut te menge etew ne Edetuan te Eleteala.”

<sup>26</sup> Ke menge etew ne nekerineg kayi ne mid-insà te, “Embiya iring ketà se kerehen din te etew ne kewasa te kebpesakup din dut te menge etew ne Edetuan te Eleteala, ne engkey rè be buwa se ebpekeangkun te umur ne warà edtemanan din?”

<sup>27</sup> Ne migkahi si Hisus te, “Embiya etew rà ne kenà dan ebpekegaga te ed-angkun te umur ne warà edtemanan din ugaid ne Eleteala se ebpekegaga ne ebehey kandan su egkegaga te Eleteala ke langun.”

<sup>28</sup> Ne migkahi si Pedro te, “Netuanan nu te mid-ewaan dey ke langun taman dey su miduma key keykew.”

<sup>29</sup> Ne migkahi si Hisus kandan te, “Sebenarvenar ini se egkehiyan ku keniyu te misan entei ne etew se neawaan din ke ubpaan din, esawa rin, menge suled din, menge lukes din, wey menge anak din su atag te kebpesakup din dut te menge etew ne Edetuan te Eleteala,

<sup>30</sup> ne ebpetelimaan sikandin te Eleteala misan kayi pà sikandin te ampew te dunya te labi pà kerakel din dut te neawaan din, ne ketà te akir din ne hewii ne ebpeketelimà sikandin te umur ne warà edtemanan din.”

*Impesabut ni Hisus te Iketelu en ke Kebpatay Rin*  
(Mateo 20:17-19; Marcos 10:32-34)

<sup>31</sup> Ne ketà ne impesivey ni Hisus ke sepulù wey deruwa ne edumdumaan din ne migkahi te, "Netuenan niyu en ne ependiyà kiyu te Hirusalim ne ketà ne egketuman en langun ne impesurat te Eleteala dut te menge mibpelambas te Lalag din dengan mekeatag te sikandin ne Impeanak te Menusiyà.

<sup>32</sup> Ne ibpalad sikandin diyà te menge etew ne kenà Hudiyanen ne ed-un-undaen sikandin, ebpegeyaen sikandin, wey ebpengilevan sikandin.

<sup>33</sup> Ebpenlembiten dan sikandin wey ed-imetayan. Ugaid ne ketà te iketelu ne hewii ne ebenawen ded te Eleteala."

<sup>34</sup> Ugaid ne ini se edumdumaan din ne warà dan mekesabut te misan deisek dà kayi te migkahi ni Hisus. Su in-eles kandan ke meana rin, ne warà dan metueni ke engkey se edlelehen din.

<sup>35</sup> Guna su ebpelundani en ensi Hisus diyà te inged ne ed-ingaranan te Hiriku, ne ketà te kilid te ebpevayaan dan ne ruen meama ne pisek ne ebpimpinuu su ebpemuyù.

<sup>36</sup> Guna su nerineg din te merakel ne etew se edsahad ne mid-insà sikandin te, "Engkey ini?"

<sup>37</sup> Ne ruen midtarem kandin te, "Si Hisus ne riyà ebpuun te Neserit se edsahad."

<sup>38</sup> Guna su nerineg din ini ne midtawag en te, "Hisus, ke inenakan ni David dengan, igkeyru a nu nevenar!"

<sup>39</sup> Ne neepes ke menge etew ne riyà te unaan ni Hisus ne midawey kandin ne migkahi te ebpeen-enengen sikandin, ugaid ne lemban en ne egkeilit se ebpemensag te, "Sikuna ne inenakan ni David dengan, igkeyru a nu nevenar!"

<sup>40</sup> Guna su nerineg ni Hisus ne mid-itindeg pà sikandin ne midsuhù te ibpepikit ke pisek kayi te kandin. Nekeuvey ki Hisus ke meama ne pisek ne mid-insaan din te,

<sup>41</sup> "Engkey ma se ebpetevangan nu kediey?"

Ne migkahi ke pisek te, "Meyterù, kiyug ku ne mekekita a red perem!"

<sup>42</sup> Ne migkahi si Hisus te, "Su kenà duwaruwa ke kedsarig nu kediey, ne ebpekeulit en ke kebpekekita nu."

<sup>43</sup> Arà dà iya ne nekekita en ini se meama, ne miduma en ki Hisus se edeyù te Eleteala. Ne ke menge etew ne nekekita kayi ne mideyù dan dema ke Eleteala.

## 19

*Si Hisus wey ke Senge Etew ne Ebpevayad te Buwis ne Ed-ingaranan ki Sekiyu*

<sup>1</sup> Nekeuma en ensi Hisus diyà te inged ne Hiriku ne ketà dan mibpevayà te luuk te inged te kedlaus dan en.

<sup>2</sup> Ne ruen ketà senge etew ne ed-ingaranan ki Sekiyu. Senge etew ini ne meama ne mepurù dut te menge etew ne ebpevayad te buwis ne kewasa nevenar.

<sup>3</sup> Egkesuatan din te edtengteng si Hisus, ugaid ne kenà din egkekita su nelingutan si Hisus te merakel ne etew ne mevavà ne etew si Sekiyu.

<sup>4</sup> Ketà be ne mibpelelahuy sikandin diyà te unaan te merakel ne etew ne mid-ambak diyà te kayu ne ed-ingaranan te sikumuru ne egkeseharan ni Hisus su apey rin mekita si Hisus.

<sup>5</sup> Guna su nekeuma en si Hisus ketà te levut te kayu ne mid-embakan ni Sekiyu ne midlingakà ne migkahi te, "E Sekiyu, dahew ke en se edurus keniyen su ebpekeawet a diyà te baley nu guntaani."

<sup>6</sup> Arà dà ne midarahuhu midurus si Sekiyu ne migalàhalà din si Hisus.

<sup>7</sup> Nerineg kayi te merakel ne etew ini se migkahi ni Hisus ki Sekiyu ne mibpemeviyig dan se egkahi te, "Meambe ke miduma si Hisus diyà te valey te etew ne mekesesalà?"

<sup>8</sup> Nekeuma ran diyà te valey ni Sekiyu ne mid-itindeg sikandin ne migkahi diyà te ki Hisus te, "Na, ibehey ku ini se tengà te kekewesai ku diyà te menge etew ne ayuayu. Ne embiya ruen etew ne nelimbungan ku ne ed-ulian ku te keepat egketakep ke nekuwa ku kandin."

<sup>9</sup> Ne migkahi si Hisus kandin te, "Sikiyu ne telteleanak kayi ne nekeliyu kew en te kedusa te Eleteala te salà niyu. Ne sikiyu ini ne tuney kew en ne keep-epuan ni Abraham su mibperetiyya kew en.

<sup>10</sup> Su iyan din impengkayi ke Impeanak te Menusiyà te ampew te dunya su ebpemengà te langun ne menge etew ne nekesuwey ketà te tidtu ne ibayà te Eleteala su apey ran ebpekeliyu rut te keberedusaan dan te Eleteala."

*Ke Menge Edsugsuhuen ne Midserihan te Kureta su Ebpeisehen ne Insempità ni Hisus dut te Menge Etew ne Egkiyug ne Eduma te Bayàbayà te Eleteala  
(Mateo 25:14-30)*

<sup>11</sup> Ne mibpenempitå si Hisus dut te munge etew ne ebpemineg kandin. Su merani ran en diyå te inged ne Hirusalim ne iyan kunaan dut te munge etew ke embiya ebpekeuma ran diyå ne edrudsuen Edatù ke Eleleala te munge etew.

<sup>12</sup> Tembù be midsempitå si Hisus kandan se egkahi te, "Duen senge etew ne berebansa ne mibpendiyå te meriyù ne inged su edsempayatan te galal te kegkeratù, ne ketå be te ked-uli din ne edatù en kayi te inged din.

<sup>13</sup> Ne ketå te warå pà mekehehan ne midtawag din te sepulù ne etew ne edsugsuhuen din ne uman senge etew kandan ne mibehayan din te kureta ne neked-iring ke kerakel din. Ne migkehiyan din sikandin te, 'Ini se kureta ne idsarig ku keniyu ne sikiyu en se ebpeiseg taman te kenå e pà ebpekeuli.'

<sup>14</sup> "Ugaid ne ini se mehinged te inged din ne neepes kandin, ne guna su mid-ipanew sikandin ne ruen midsuhù dan te ebpesabut ketå te etew ne edsempayat te galal kandin se egkahi te, 'Kenå key egkiyug ne sikandin se edatù kenami.'

<sup>15</sup> "Ugaid ne misan iring ketå ne sikandin ded se midsempayatan te kegkeratù ne mid-uli en. Nekeuma rà ne midtawag din en ke sepulù ne edsugsuhuen din ne midserihan din te kureta su ed-intengan din ke pira se kinepeiseg dan dut te kureta rin.

<sup>16</sup> "Nekeuma ke neuna ne edsugsuhuen ne migkahi te, 'Datù, sepulù se neisahan din ke kureta ne insarig nu kedì.'

<sup>17</sup> "Migkahi ini se meama ne behu pà ne edatù te, 'Arå be! Meupiya ka su mibpegelep ke ves iya rema! Geina te egkeserihan ka te deisek ne kureta ne iyan ku idsarig kenikew ne ebpekemalen ku sikuna te sepulù ne inged.'

<sup>18</sup> "Nekeuma ke ikeruwa ne edsugsuhuen din ne migkahi te, 'Lelima, Datù, se neisehan din dut te kureta ne insarig nu kedì.'

<sup>19</sup> "Ne migkahi ke datù te, 'Arå be! Ne lelima ne inged se ebpekemalan ku keykew.'

<sup>20</sup> "Nekeuma ke iketelu ne edsugsuhuen ne migkahi te, 'Ini red ke kureta ne insarig nu kedì. Midtegethaman ku te edtenges ne intahù ku,

<sup>21</sup> su neandek a su netuenan ku te memasang ka ne etew. Ebpenareng ka te kebpekeiseg ke ruen idsarig nu te edsugsuhuen nu; ne engketå ded dema ke ruen ibpepemula nu kandan su ebpenerengen nu.'

<sup>22</sup> "Ke se datù te, 'Mereatey ke ves ne edsugsuhuen! Ayan dà se nengelalag nu ne neisuhat ku en sikew te kewagib. Netuenan nu ves te taman te nekahi ku ne idtehel ku, ne ebpenareng a te iseg ke ruen idsarig ku te ruma ku, ne engketå ded ke ruen ibpepemula ku te ruma ku, ebpenerengen ku red.

<sup>23</sup> Meambe ke warå nu ipemeutang arå se kureta ku ne insarig ku keykew su apey ku metelimå ke kureta ku te ruen iseg din ke edlived a?'

<sup>24</sup> "Ne migkahi en ke datù ketå te munge etew ne ebpengit-itindeg te, 'Kua niyu arå se kureta kenyan te kandin ne ivehey niyu ketå te edsugsuhuen ne mibpeiseg te sepulù.'

<sup>25</sup> "Ne migkahi ran te, 'Ne ruen en ma kandin su sepulù ke iseg dut te kureta rin.'

<sup>26</sup> "Ne migkahi ke datù te, 'Igakhi ku keniyu te ke etew ne egkeserihan dut te insarig kandin ne ed-umanan pà. Ugaid ke etew ne kenå egkeserihan ne ed-ewien pà misan ke reisek ne insarig kandin.

<sup>27</sup> Na ini se munge etew ne egkunterà kedì su kenå dan egkiyug ne edatù a kandan, ne ipepengkayi niyu ne imetayi niyu kayi te etuvangan ku.' "

*Ke Kinelusud ni Hisus Diyå te Hirusalim ne Mid-untud te Nati ne Kudå su Tuus ini te Datù Sikandin Dut te Menge Hudiyanan*

*(Mateo 21:1-11; Marcos 11:1-11; Juan 12:12-19)*

<sup>28</sup> Nekeipus si Hisus se edlalag kayi ne mid-ipanew ran en se ebpendiyå te Hirusalim.

<sup>29</sup> Nekeuvey ran diyå te deruwa ne inged ne Bitpahi wey inged ne Bitanya diyå te buvungan ne ed-ingaranan te Ulivuwen. Ne mibpeuna sikandin te deruwa rut te edumdumaan din se egkahi te,

<sup>30</sup> "Una kew en ketå te inged ne an te unaan ta, ne ketå te ebpekeuma kew ne egkekita niyu ke nati ne kudå ne in-iket ketå ne warå pà bulug meunturi. Ekari niyu be ne ewita niyu en kayi.

<sup>31</sup> Ne embiya ruen ed-inså keniyu te, 'Meambe ke ed-ekaran niyu ke nati ne kudå?' ne iyan niyu kehiya te, 'Ke Kerenan dey se ebpegingawå te egkeunturan din ne mehaan dà id-uli.' "

<sup>32</sup> Nekeuma ini se midsuhù din ne nekita ran ke nati te kudå ne iring iya rema ketå te migkahi ni Hisus.

<sup>33</sup> Gewii ran te ed-ekar dut te nati ne migkahi ke munge kemuney te, "Meambe ke ed-ekaran niyu ayan se nati?"

<sup>34</sup> Ke sikandan te, "Si Hisus ke edlingekaan dey se ebpeginawà kayi te egkeunturan din ne mehaan dà id-uli."

<sup>35</sup> Ne arà dà ne mid-ewit dan en ini se nati ne kudà kayi te ki Hisus, ne midebpasan dan en te kumbalà dan ke nati ne kudà ne arà pà ne pineerà dan si Hisus.

<sup>36</sup> Gewii rin te egkukudà ne midtulid ke menge etew te kumbalà dan te ebpepevayaan ki Hisus su tuus ini te adat te menge Hudiyanen te mepurù dan.

<sup>37</sup> Guna su nekeuvey en sikandin te Hirusalim ketà dapit te dalan ne idtupang ketà te buvungan ne Uliuwun ne langun dut te menge etew ne midurumaruma kandin ne migkerag se egalewhalew te kedeyù dan te Eleteala su atag te langun ne nekita ran ne mekegeyip ne mid-ulaula ni Hisus.

<sup>38</sup> Ke sikandan te,  
 "Menu ma ke ebpeneuven te Eleteala  
 ini se datù ne nekeuma  
 su impepengkayi te Eleteala.  
 Ne melinew en ke kebpekiduma tew te Eleteala,  
 ne edeyuen tew ke Eleteala diyà te langit!"

<sup>39</sup> Ketà te menge etew ne miduma ki Hisus ne ruen menge Peresiyu ne migkahi riyà te ki Hisus te, "Peengkerà nu ayan se edumdumaan nu se edeyù keykew su ebpekesahad en utew!"

<sup>40</sup> "Igakhi ku keniyu," ke si Hisus te, "embiya ebpeeneng-eneng dan ne langun kenian te menge batu ne iyan dan egkerag."

*Midsandeng ni Hisus ke Inged ne Hirusalim ne Ingkeyru Rin su Midsinehewan Din Ke Mehinged Ketà Su Netueanan Din Ke Egketemanan Dan Keuremà*

<sup>41</sup> Guna su ebpekeuvey en sikandin kayi te Hirusalim ne impelayap din ke mata rin kayi te inged ne midsinehewan din su ingkeyru rin nevenar ke menge mehinged ketà.

<sup>42</sup> Ke sikandin te, "Embiya perem netueanan niyu rà ke engkey se benar ne kebmetidtu su apey melinew se inged niyu, ugaid ne guntaani ne kenà niyu egketueanan.

<sup>43</sup> Duen gewii ne egkeumaan kew te menge kunterà ne edtengkalen kew nikandan wey edtelikupan kew ne warà en iya egensik.

<sup>44</sup> Edereetan dan ke menge valey niyu ne ebeluyan dan ne tapung ke inged niyu su warà seveka rà ne batu ne egketahak dut te netehuan din. Ne langun niyu ne egkeherà. Ini se egketemanan niyu su warà kew medsehipà te ini en ke hewii te kinepepengkayi te Eleteala kedi su apey kew ebpekeliyu."

*Mibpenegseg ni Hisus ke Menge Ebpemendahang Diyà te Nekebpuru ne Valey te Eleteala*

*(Mateo 21:12-17; Marcos 11:15-19; Juan 2:13-22)*

<sup>45</sup> Nekeuma si Hisus diyà te Hirusalim ne midlusud sikandin diyà te Nekebpuru ne Valey te Eleteala ne mibpenegseg din en ke menge etew ne ebpemasa wey ke menge ebpemendahang ketà.

<sup>46</sup> Ne migkahi sikandin te, "Duen en ura impesurat ne Lalag te Eleteala ne egkahi te, 'Ini se baley ku ne ed-ingaranan te baley ne ebpengeningenian.' Ugaid ne sikiyu," ke si Hisus, "ne mibaluy niyu en ini se baley ne ubpaan te menge tenlimbungen."

<sup>47</sup> Igenat dè be ketà ne uman andew ne ebpenurù sikandin ketà te Nekebpuru ne Valey te Eleteala. Ugaid ne ini se menge mepurù te terebpepengesa te Eleteala, ke menge meyerù te penduan wey ke menge unuten dut te menge etew ne mibpemengà dan te ralan te kegkeimetayi ran ki Hisus.

<sup>48</sup> Ugaid ne warà dan mekevaluy su langun ne menge etew ne egkevenbenaran te penurù din.

## 20

*Mid-insaan si Hisus Mekeatag te Kewagib Din dut te Mibpenegseg Din Ke Menge Ebpemendahang Diyà te Nekebpuru ne Valey te Eleteala*

*(Mateo 21:23-27; Marcos 11:27-33)*

<sup>1</sup> Senge hewii ne mibpenurù ni Hisus ke menge etew riyà te Nekebpuru ne Valey te Eleteala su ipbesabut din ke Meupiya ne Tudtul. Ne ketà ne mibayaan sikandin dut te menge mepurù te terebpepengesa te Eleteala, ke menge meyerù te penduan wey ke menge unuten te Hudiyanen.

<sup>2</sup> Ne mid-insaan dan si Hisus te, "Ini se mid-ulaula nu kayi te Nekebpuru ne Valey te Eleteala ne engkey se kewagib nu te ed-ulaula te iring kayi? Ne engkey se mibehey keykew te kewagib?"



<sup>3</sup> Ne midtavak si Hisus te, “Duen dema id-insà ku keniyu ne tevaka a nu.

<sup>4</sup> Entei ke mibehey ki Juan ke Ebpemunyag te kewagib te ebunyag, diyà be te Eleleala etawa kayi rà dè duen te menusiya?”

<sup>5</sup> Ne mibpein-inseey ran en te ke sikandan te, “Engkey se idtavak tew? Su embiya egkehiyen tew se, ‘Riyà ebpuun te Eleleala,’ ne ed-insà maa sikandin te, ‘Meambe ke warà kew mibperetiya ki Juan?’

<sup>6</sup> Ugaid ne embiya egkahi ki te, ‘Kayi red ebpuun te menusiya,’ ne ebpenrumbahen ki rut te menge etew te batu su langun dan ne mibperetiya te si Juan ne mibpelambas te Lalag te Eleleala.”

<sup>7</sup> Ketà be ne iyan dan intavak ki Hisus te, “Kenà dey egketuenan ke endei ebpuun.”

<sup>8</sup> Ne migkahi si Hisus kandan te, “Embiya iring ketà ne kenà ku rema egkehiyen ke enta se mibehey kedì te kewagib ku te ed-ulaula kayi.”

*Ke Sempità ni Hisus Mekeatag te Etew ne Pinekamal te Pemulaan  
(Mateo 21:33-46; Marcos 12:1-12)*

<sup>9</sup> Ne ruen sempità ne imperineg ni Hisus riyà te menge etew, ke sikandin te, “Duen senge etew ne ruen tanà din ne mibpemulaan din te wahed ne ed-ingaranan te paras. Ne ruen pinekamal din dut te impemula rin, ne arà pà ne mid-ipanew en se ebpendiyà te meriyù ne inged ne ketà pà ed-ubpà te meuhet.

<sup>10</sup> Guna su midsabpet en ke pinemula rin, ne ruen senge etew ne edsugsuhuen din ne midsuhù din su ibpekuwa ke kandin ne umun. Ugaid ne nekeuma ini se midsuhù din, ne mibedasan dut te pinekamal ne impeuli dan te warà en iya imbehey kandin.

<sup>11</sup> Ne misan iring ketà, ne midsuhù en maa se senge etew. Ugaid ne nekeuma ini ne mibedasan dan ded maa, ne pingkeyà dan ne impeuli dan te warà ded dema imbehey ran.

<sup>12</sup> Nekita maa kayi te kemuney ini ne midsuhù pà lavew te iketelu ne edsugsuhuen din. Nekeuma maa ini ne midruug dut te pinekamal taman te nengepelian en, ne arà pà ne impeawà dan.

<sup>13</sup> “Ne ketà ne migkahi ke kemuney te pemulaan te, ‘Engkey se ed-ul-ulaan ku? Iyan tumù ne iyan ku en edsuhuen ini se tuney en ne anak ku ne igkelimù ku nevenar. Su kenà egkepakey ne kenà dan ini ed-edatan.’

<sup>14</sup> “Ugaid ne guna su nekeuma ini se anak din ne mibpeglelahey ke menge pinekamal din te, ‘Ini en bes ke anak dut te kemuney kayi te tanà. Kuwa kew en su ed-imetayen tew su apey sikitew en se ebpegekemuney kayi te tanà.’

<sup>15</sup> Arà dà ne migeweran dan ne miguyud dan diyà te luwal dut te pemulaan ne mid-imetayan dan en.

“Na,” ke si Hisus, “geina te iring kayi se mid-ulaula ketà te menge etew ne pinekamal te pemulaan, ne engkey se ibped-ulaula kandan dut te kemuney?”

<sup>16</sup> Idtarem ku keniyu te ebayaan din arà se menge etew ne ebpengimetayan din, ne ebpekemalan din te ruma pà ne menge etew.”

Nerineg dut te menge etew ini se migkahi ni Hisus ne ke sikandan te, “Ipekeriyù te Eleleala arà!”

<sup>17</sup> Ne mibpeut-utengan ni Hisus te mata sikandan ne migkahi en te, “Na embiya iring ketà se pegitungan niyu ne engkey ve se ibpesabut kayi te impesurat te Eleleala rengan ne egkahi te,

‘Ke pelaus ne mid-eng-engkeran dut te menge etew ne ebpevaley su kunaan dan ke warà rantek din ne iyan en iya ini nepemili ne segkad te valey.’ ”

<sup>18</sup> Ne migkahi maa si Hisus te, “Ne geina te siaken ini se segkad ne egkerupet ke langun ne egkeulug ketà, ugaid ne egkepipini ke langun ne egkepilayan din.”

*Edlitahen perem si Hisus te Menge Paresiyu kayi te ked-insà dan Mekeatag te Kebayad te Buwis*

*(Mateo 22:15-22; Marcos 12:13-17)*

<sup>19</sup> Edsigkemen perem si Hisus dut te menge meyerù te penduan wey ke menge unuten te terebpelengesa su netuenan dan te sikandan ke nesuhate sempità din dut te menge etew ne pinekamal te pemulaan. Ugaid ne neandek dan dut te merakel ne menge etew.

<sup>20</sup> Igenat dà ketà ne mibpenipat dan sikandin su ebpemengà dan te kegkesigkem dan ki Hisus. Ne ruen menge etew ne mibpenukayan dan ne ibpesirib ki Hisus ne ebpeinsaen ne engkungkun ne tidtu se insà dan. Ne embiya ruen lalag ni Hisus ne ebpekesurang te

penduan ne ibpesigkem dan ne ibehey ran diyà te bayàbayà te gubinedur su ibpekukum en.

<sup>21</sup> Migkahi ini se minge etew ne edsirib ki Hisus te, “Meyterù, netueanan dey te langun ne egkehiyen nu wey langun ne penurù nu ne metidtu nevenar. Ne warà ebpelebiyen nu ne etew, ugaid ne ebpenurù ka te benar dut te kiyug te Eleteala ne ed-ul-ulaan tew.

<sup>22</sup> Tembù be ruen id-insà dey keykew. Maa ebpekerimpas kiyu ve dut te penduan tew embiya ebayad ki te buwis diyà te ratù tew te inged ne Ruma etawa kenà?”

<sup>23</sup> Ugaid ne netueanan en ni Hisus ke lakew te ked-insà dan su edselingkepen dan dà sikandin ne migkahi en sikandin te,

<sup>24</sup> “Peintenga a niyu kun te pelatà.” Ne mid-insà sikandin te, “Entei ki tuluran kayi? Ne enta ki ngaran kayi?”

<sup>25</sup> Ne midtavak dan te, “Tularan wey ngaran dut te ratù tew kayi te inged ne Ruma.” Ne migkehiyen ni Hisus sikandan te, “Embiya iring ketà ne ivehey niyu diyà te datù ayan se bayad te buwis ne kandin, ne ivehey niyu riyà te Eleteala ke endei rema ke kandin.”

<sup>26</sup> Ne warè en iya neselingkep dan kandin ketà te lalag din diyà te etuvangan te merakel ne minge etew. Ketà ne mibpeeneng-eneng dan su negeyip dan dut te tavak din.

*Mid-insà ke Menge Sedyusiyu Ki Hisus Mekeatag te Kegkevanew te Menge Minatey*

*(Mateo 22:23-33; Marcos 12:18-27)*

<sup>27</sup> Duen minge etew ne ed-ingaranan te Sedyusiyu ne mibpendiyà te ki Hisus. (Ini se minge Sedyusiyu ke minge etew ne warà mebperetiyaya te egkevanew pà te Eleteala ke minge minatey.) Iyan dan impengkayi te ki Hisus ne ed-insà dan.

<sup>28</sup> “Meyterù,” ke sikandan, “ruen penduan ne insurat ni Moises dengan ne egkahi te, ‘Embiya ruen meama ne ebpaty ne neketahak te esawa rin ugaid ne warà anak dan, ne ebpemeluwen dut te suled din ne meama su apey ruen ded anak dut te minatey ne ebpekesumpat.’

<sup>29</sup> Su ruen dengan,” ke sikandan, “pitu ne meama ne telteleari ne mid-esawa en ke kakey, ugaid ne minatey te warà dan med-anak.

<sup>30</sup> Ne mibpemalu en dut te nesikupu rin arà se ipag dan, ne minatey red dema te warà dan med-anak.

<sup>31</sup> Ne iring din ded dema ke iketelu. Ne engketà ded ke nesamà, langun dan te pitu ne etew se nekepemalu ketà te ipag dan, ugaid ne warà dan med-anak.

<sup>32</sup> Netaman ne minatey en ini se meritan.

<sup>33</sup> Ne ini ve se id-insà dey keykew,” ke se minge Sedyusiyu, “embiya benar ne egkevanew red te Eleteala ke minge minatey keuremà, ne entei ve rapat kandan se tehiesawa ketà te meritan? Su langun dan te pitu ne telteleari ne nekedtungug se nekeesawa kandin.”

<sup>34</sup> Ne migkahi si Hisus kandan te, “Ini se minge etew kayi te ampew te dunya ne ebpees-eseweey.

<sup>35</sup> Ugaid ne ke minge etew ne ebirangan te Eleteala ne dait ne ebenawen ne ebpeubpaen diyà te langit, ne kenà en ebpees-eseweey.

<sup>36</sup> Iyan dan kenà kebpees-eseweey ne iring dan en te suluhuen te Eleteala ne kenè en ebpaty. Menge anak dan en te Eleteala su nevanew ran en.

<sup>37</sup> Ne mekeatag ketà te egkevanew red te Eleteala ke minge minatey,” ke si Hisus, “mepayag en ini ketà te impesurat ni Moises dengan mekeatag te kinepekidlalag te Eleteala kandin diyà ebpuun te neregred ne sagbet. Su ketà ne nekahi ni Moises te ini se Eleteala ‘ne iyan ded Eleteala ne ebpererapan ni Abraham, si Isaac wey si Jacob,’ misan ketà ne hewii ne neuhet dan en ne minatey.

<sup>38</sup> Su ini ne ebpesabut te misan minatey ran en ne biviyag dan pà diyà te etuvangan te Eleteala su iyan dà ebpekepengarap te Eleteala ne biviyag, kenà ke minatey.”

<sup>39</sup> Ne ruen ketà minge meyerù te penduan ne migkahi ki Hisus te, “Benar ayan se migkahi nu, Meyterù.”

<sup>40</sup> Ne warà dan en medtikà ne ed-insà pà maa ki Hisus.

*Impesabut ni Hisus te Sikandin Ke Impasad te Eleteala ne Ebperetuen te Langun*

*(Mateo 22:41-46; Marcos 12:35-37)*

<sup>41</sup> Ne migkahi si Hisus kandan te, “Meambe ke nekahi ran te ke Mesiyas arà se Impasad te Eleteala rangan ne Ebperetuen te langun ne inenakan sikandin ni David?”

<sup>42</sup> Su riyà te riberù ne ed-ingaranan te Salmo ne si David en iya se edlalag ketà te, ‘Migkahi ke Eleteala ketà te Kerenan ku te:

Kayi ka pinuu te rapat te egkekewanan ku

<sup>43</sup> taman te ebpeggiekan ku

ke menge kunterà nu.’

<sup>44</sup> Na,” ke si Hisus, “embiya ini ke nekahi ni David te arà se Impasad te Eleteala ne Ebperetuen te langun ne Kerenan din, ne mepmepurù pà sikandin dut te inenakan dà ni David.”

*Duen Imbaag ni Hisus Mekeatag te Ed-ul-ulaan Te Menge Meyterù te Penduan*  
(Mateo 23:1-36; Marcos 12:38-40)

<sup>45</sup> Ebpemineg pà ke merakel ne etew ki Hisus ne migkahi en sikandin kayi te edumdumaan din te,

<sup>46</sup> “Uram kew su apey kenà kew egkepeneheewit dut te menge meyerù te penduan ne ebpengip-ipanew se ebevelegkas te lembung ne sida ne melayat su ebpeadat te menge etew diyà te menge pedian. Ne embiya riyà dan en te valey ne ebpengedian te penduan te menge Hudiyanan ne ebpemili dan te meupiya ne ebpinuuwan diyà te sineruwana, etawa ke edtelavuk dan te kevrunan ne riyà dan ebpinuu te insivey ne meupiya ne ebpinuuwan te egkeedatan.

<sup>47</sup> Ne ebpeey-eyunan dan ke menge kearen dut te menge valu ne meritan, ne ebpedleyedley ran te kebpenengeni ran diyà te Eleteala su uvag kun se rekela se sarig dan te Eleteala. Ugaid ne keuremà ne labi pà ne mekeandek-andek ke ibadas ne kersaan kandan te Eleteala!”

## 21

*Ke Imbehey Te Valu ne Meritan Diyà te Eleteala*  
(Marcos 12:41-44)

<sup>1</sup> Senge hewii ne riyà si Hisus te Nekebpuru ne Valey te Eleteala, ne nekita rin ke menge etew ne kewasa ne id-ulug dan ini se ibehey ran te Eleteala ketà te edtegtahuan te kureta.

<sup>2</sup> Nekita rin dema ini se senge etew ne balu ne meritan ne ayuayu nevenar ne ed-ulug te deruwa ne tumbaha.

<sup>3</sup> Nekita rin ini ne migkahi en sikandin kayi te menge ruma rin te, “Benar ini se egkehiyan ku kenii, ini se valu ne meritan diyà te etuvangan te Eleteala ne iyan pà dekelà se imbehey rin dut te langun ne imbehey te menge kewasa.

<sup>4</sup> Su ke ruma ne menge etew ne iyan dan imbehey ne sawad dà dut te kekewesai ran, ugaid ne ini se ayuayu ne valu ne imbehey rin en te Eleteala ke namànamà ne kureta rin ne edserihan te hinawa rin.”

*Migkahi ni Hisus ke Kegkerundus Dut te Nekebpuru ne Valey te Eleteala*  
(Mateo 24:1-2; Marcos 13:1-2)

<sup>5</sup> Duen menge edumdumaan ni Hisus ne mibpengasak mekeatag te kineup-upiani te ebaal dut te menge kebpasaran ne batu kayi te Nekebpuru ne Valey te Eleteala. Ne langun kayi ne mepurù nevenar ne imbehey te menge etew riyà te Eleteala. Nerineg ni Hisus ne migkahi sikandin te,

<sup>6</sup> “Langun kayi te edtengtangan niyu guntaani ne egkereetan. Su ruen gewii ne egkeuma ne ini se edtengtangan niyu guntaani ne egkerundus ne warà misan seveka rà ne batu ne egkesamà kayi te netahuan din su egkevurahey langun.”

*Migkahi ni Hisus ke Keresayan wey Kebpekesakit ne Ebpekeuma kayi te Menge Etew*  
(Mateo 24:3-14; Marcos 13:3-13)

<sup>7</sup> Ne mid-insaan dan si Hisus te, “Meyerù, keenu ve ini egketuman se kegkerundus dut te Nekebpuru ne Valey te Eleteala? Ne engkey se idtuus dey su apey rey egketuani te mehaan en ini egketuman?”

<sup>8</sup> Ne migkahi si Hisus te, “Uram kew su apey kenà kew meekali dut te menge etew ne metau ne edliyuk. Su merakel se edlepew ne engkungkun ne siaken en ne egkahi ran te, ‘Siaken en ini ke Impasad te Eleteala ne Ebperetuen te langun!’ Ne egkahi ran te, ‘Ini en ke ketepusan ne hewii,’ ugaid ne kenà kew eduma kandan.

<sup>9</sup> Ne embiya egkerineg niyu se ebpevunbunuey riyà te meriyù merani ne kenà kew meandek. Su ini pà iya ke egkeuma ne egked-ulaula, ugaid ne warà pà meuma ke hewii te kebpuusa kayi te dunya.”

<sup>10</sup> Ne migkahi en si Hisus kandan te, “Ebpemekebunuey pà ke idsenge inged, ne engketà ded dema ke idsenge retuan.

<sup>11</sup> Ne edlinug te mevaher, ne ruen mepmepasang ne bitil wey ruen sakit ne ed-eneb kayi te piya endei ne inged. Ne ruen egked-ulaula ne mekeandek nevenar wey ruen dekelà ne tuus ne egkekita niyu riyà te langit ne ebpekeinuinu wey ebpekeandek.

<sup>12</sup> “Ugaid ne kayi te kenà pà ini egketuman, ne edsigkemen kew ne edreseyen kew ran. Ne ibpepemenayik kew riyà te baley ne ebpengedian te menge Hudiyenen te penduan dan su egkukumen kew ne ebilengguen kew en. Ne ebpenehewiten kew riyà te menge hari wey riyà te egkeunutan te inged su atag dut te kedsarig niyu kediey.

<sup>13</sup> Ugaid ne ini en imbe ke ralan te kebpekesabut niyu kandan dut te Meupiya ne Tудtul mekeatag kediey.

<sup>14</sup> Es-eseka niyu neraan ke hinawa niyu ne kenà kew egkeuru ke engkey se idtavak niyu kandan.

<sup>15</sup> Su siaken dà se ebpekahi keniyu ne ebehayan ku sikiyu te ketampas te itungan su apey ke menge kunterà niyu ne kenà ebpeketavak ne kenà dan egkeliyu ke benar ne egkelalag niyu.

<sup>16</sup> Ne misan ke lukes niyu, ke temperà niyu te bituka, ke menge suled niyu wey ke menge sepatat niyu ne ebpulid keniyu riyà te egawed te kukuman, ne ruen en ebpeimetayan kayi te sikiyu.

<sup>17</sup> Egkunteraan kew dut te langun su atag te edumdumaan ku sikiyu.

<sup>18</sup> Ugaid ne warà egkeawà misan seveka ne bulvul nu ne iyan din meana ne misan ed-imatayan kew ne kenà kew ran en egkesikep diyà te palad te Eleteala.

<sup>19</sup> Itindehi niyu ve te mevaher ke sarig niyu kediey su kayi kew ve ebpekeangkun te umur ne kenà edtaman.”

*Imbaag ni Hisus Ke Kegkereeti Rut Te Inged ne Hirusalim*

*(Mateo 24:15-21; Marcos 13:14-19)*

<sup>20</sup> Ne migkahi en maa si Hisus te, “Embiya egkekita niyu en ini se inged ne Hirusalim ne edtelikupan en te kunterà niyu ne sundaru ne kenà kew en duwaruwa te mehaan en se kegkereeti rin.

<sup>21</sup> Na ke menge etew kayi te pruvinsiya te Hudiya ne mebpelahuy en diyà te buvungan. Ne ke menge etew kayi te Hirusalim ne mebpelahuy dema. Ne ke menge etew ne kayi te nekeerivey ne inged ne kenà dan en iya mebpengkayit te Hirusalim.

<sup>22</sup> Su arà en ke hewii ne edusaan te Eleteala ke menge etew ne egkunterà kandin, ne langun te nekahi rin kayi te impesurat ne Lalag te Eleteala rengan ne egketuman en.

<sup>23</sup> Egkeyruwan ke menge meritan ne mehingey te arà ne hewii wey ke menge meritan ne edseruru. Su ruen kemeresayan ne ebpekedabak kayi ne inged, ne ed-isuhaten en te Eleteala te kegkeeps din ke menge Hudiyenen ne egkunterà kandin.

<sup>24</sup> Duen kayi te sikandan ebpenundangen, ne ruen ebpeimbayahen ne ed-ewiten diyà te langun ne menge inged kayi te ampew te dunya. Ne ini se inged ne Hirusalim ne edtekutaken te menge etew ne kenà Hudiyenen taman te idtuhut pà kandan te Eleteala.”

*Tuus te Mehaan en ke Kedlived Dut te Impeanak te Menusiya Kayi te Ampew te Dunya*

*(Mateo 24:29-31; Marcos 13:24-27)*

<sup>25</sup> Ne migkahi en maa si Hisus te, “Duen egkekita niyu riyà te andew, bulan, wey bituen ne menge tuus. Ne kayi te ampew te dunya ne egkekiyab se atey te menge etew rut te egkerineg dan ke ebpekesahad ne egkenegkeneg ne rahat wey ke ebpeteltelukuney ne baleg.

<sup>26</sup> Ebpengavidawan ke menge etew te andek dan su egkeuru ran ke engkey se egketemanan dan. Su langun te netahuan te edtenuran diyà te langit ne egkeparin.

<sup>27</sup> Ne ketà ne egkekita ran ke kedlived, te Impeanak te Menusiya, su eduma dut te sehulapun. Ne egkekita ran ke gehem din wey ke ed-andlag ne raman din.

<sup>28</sup> Embiya edrudsürudsü en ini se migkahi ku te kegketuman din ne kenà kew kelugkai ugaid ne kehalew kew su mehaan kew en ebpekeliyu.”

*Ke Sempità ni Hisus Mekeatag Te Kayu ne Igira ne In-upama Rin te Tuus te Mehaan en ke Kedatù te Eleteala te Menusiya*

*(Mateo 24:32-35; Marcos 13:28-31)*

<sup>29</sup> Ne mibpenempità si Hisus kandan te, “Kenian niyu rè ma te kayu ne igira wey ruma pà ne menge kayu.

<sup>30</sup> Embiya egkekita niyu ne nekepasad en te edrewrew wey ebpeneringsing en, ne tuus te ed-andew en.

<sup>31</sup> Ne iring din ded dema embiya egkekita niyu en se netuman en ke langun ne tuus ne intarem ku keniyu, ne egketuenan niyu te mehaan en ke Kedatù te Eleteala te menusiya.

<sup>32</sup> “Tentenuri niyu ini se egkehiyen ku keniyu su ruen pà kayi te keniyu guntaan ebpekesaut pà ketà te kegketuman din ini.

<sup>33</sup> Su egkeawà ini se langit wey tanà, ugaid ne ini se migkahi ku ne kenà bulug ebperis.”

*Ke Imbaag Ni Hisus Mekeatag Te Kebantey Rut te Hewii te Kegkukum te Eleleala te Menusiyà*

<sup>34</sup> Ne migkahi en maa si Hisus te, “Uram kew ve su apey kenà kew kayi rà egketaman te kebpengevruran, ebpeninum te ebpeketeveveg, wey ke kegkeuru niyu te ked-ubpàubpà niyu. Su embiya kenà kew ed-uram ne egkesaut kew te hewii ne keggkukum te Eleleala te menusiyà ne iring kew te rumat ne egketelebpi.

<sup>35</sup> Su iring te telivekasen se kehaan din te kebpekeuma ketà kayi te langun ne menusiyà.

<sup>36</sup> Tembù be,” ke si Hisus, “pekevantev kew nevenar ne layun kew pengeningeni su apey kew ebehera te Eleleala te ked-etuvang niyu kayi te langun ne egketemanan. Pengeningeni kew su apey warà igkeyeyai niyu ketà te ked-itindeg niyu kayi te etuvangan ku, ke Impeanak te Menusiyà.”

<sup>37</sup> Uman gewii ne mibpenurù si Hisus diyà te Nekebpuru ne Valey te Eleleala, ne uman merukilem ne mibpendiyà sikandin te buvungan ne ed-ingaranan te Uliuvuven su riyà ed-ubpà.

<sup>38</sup> Ne mibpaneypaney ke menge etew ne ebpendiyà te Nekebpuru ne Valey te Eleleala su ebpemineg te penurù din.

## 22

*Mibentaan ke Menge Mepurù te Terebpepengesa wey ke Menge Meyterù te Penduan te Kedsigkem ki Hisus*

*(Mateo 26:1-5; Marcos 14:1-2; Juan 11:45-53)*

<sup>1</sup> Mehaan en egkeuma arà se hewii te kevruran ne edtenuran dut te menge Hudiyanen ne ed-ingaranan te Pista te Kedsehari te Suluhuen.

<sup>2</sup> Ne ebpemengà ke menge mepurù te terebpepengesa wey ke menge meyerù te penduan te ralan te kedsigkem dan ki Hisus te kenà egketuanan te menge etew su egkeandek dan te menge etew.

*Mibpendiyà si Hudas Iskeriyuti te Menge Mepurù te Terebpepengesa Su Ebpekidsabut ke Ebmemenuwen Din te Ed-ulug si Hisus*

*(Mateo 26:14-16; Marcos 14:10-11)*

<sup>3</sup> Ne ketà ne mid-awuk en si Setanas ke datù te pekaid ki Hudas, ini se ed-ingaranan dema te Iskeriyuti ne senge etew sikandin dut te sepulù wey deruwa ne edumdumaan ni Hisus.

<sup>4</sup> Ne midlihawang sikandin se ebpendiyà te menge mepurù te terebpepengesa wey ke menge kepitan dut te ebantey te Nekebpuru ne Valey te Eleleala su ebpekidsabut kandan ke memenu se kebpulid din ki Hisus.

<sup>5</sup> Ne nengesuatsuat dan nevenar, ne impasad dan kandin te ebehayan te pirak.

<sup>6</sup> Ne migkiyug en si Hudas ne in-awà dà ketà ne ebpemengaan din en ke ralan te kegkeulug din ki Hisus su apey mesigkem dan en te kenà egketuanan dut te menge etew.

*Mibpenohana si Hisus Wey Ke Menge Edumdumaan Din Dut te Kedlavung te Pista te Kedsehari te Suluhuen*

*(Mateo 26:17-25; Marcos 14:12-21; Juan 13:21-30)*

<sup>7</sup> Neuma en ke hewii rut te kevruran dan te Pista te Kegkaan dan te Pan ne Warà Insawug ne Ibpelevag. Ne ini se neuma ne hewii ne idsumbali te menge Hudiyanen te ibpelengesa ran ne nati ne bilibili ne egkeenen dan te kedtenuri ran dut te hewii rengan te kedsehari te menge apù dan dut te suluhuen te Eleleala.

<sup>8</sup> Ne midsuhuen ni Hisus si Pedro wey si Juan ne migkehiyan din sikandan te, “Una kew en be ne pegatur kew en te Kedlavung tew te Pista te Kedsehari te Suluhuen.”

<sup>9</sup> Ne mid-insà dan ki Hisus te, “Endei rey ve ini ebpegetura?”

<sup>10</sup> Ne migkahi si Hisus te, “Embiya ebpekeuma kew en diyà te inged ne ruen meama ne ed-utuk te kelalew ne ruen wayig din ne edsinuhung keniyu. Tundug kew en be kandin, ne embiya ebpekeuma kew riyà te ed-ubpaan din,

<sup>11</sup> ne kehiyi niyu ve ke kemuney te valey te, ‘Ibpeinsà rut te meyerù tew te: Endei ne ruhu ke edlevungan ku wey ke menge edumdumaan ku dut te Pista te Kedsehari te Suluhuen?’

<sup>12</sup> Ne ketà ne ibpekita rin keniyu ke meluag ne ruhu diyà te ikeruwa ne pangkat ne saag ne pegediran en, ne ketà kew be pegatur te idlavung tew.”

<sup>13</sup> Mid-ipanew ran ne nekeuma ran ketà te inged ne langun dut te ingkahi kandan ni Hisus ne arà en iya rema se nekita ran. Ne ketà dan en mibpegatur te idlavung dan te Pista te Kedsehari te Suluhuen.

*Ke Ketepusan dà ne Kinepekiduma ni Hisus te Egkaan Dut Te Menge Edumdumaan (Mateo 26:26-30; Marcos 14:22-26; 1 Kurintu 11:23-25)*

<sup>14</sup> Guna su arà en ke kedlavung dan ne mibpinuu si Hisus wey ke menge edumdumaan din ne ed-ingaranan te apustulis su egkaan.

<sup>15</sup> Ne migkahi si Hisus te, “Dekelà te hinawa ku se egkeseveka kiyu se egkaan te ini ne Pista te Kedsehari te Suluhuen te kenà e pà ebpatay.

<sup>16</sup> Su ini se idtarem ku keniyu te egkepasad ini ne kenà ad maa egkaan te Pista te Kedsehari te Suluhuen taman te egketuman en ke tidtu ne pista ketà te menge etew ne Edetuan te Eleteala keuremà.”

<sup>17</sup> Ne ketà ne migkuwa ni Hisus ke ed-inumen ne impeselamat din te Eleteala ne migkahi sikandin te, “Pesemsemeey kew ve se ed-inum kayi.

<sup>18</sup> Su idtarem ku keniyu te kenà ad maa ed-inum kayi te ed-inumen ini taman te kenà egkeuma ke hewii keuremà te Kedetui te Eleteala.”

<sup>19</sup> Ne migkuwa rin ke egkeenen dan ne pan ne impeselamat din te Eleteala, ne mibpenevitevi din ne imbehey rin diyà te menge edumdumaan din se egkahi te, “Ini ke lawa ku ne ibeliwas keniyu. Ul-ulaa niyu ini su apey a niyu egkepegpegitung.”

<sup>20</sup> Guna su nekeipus dan se edlavung ne migkuwa maa ni Hisus ke ed-inumen se egkahi te, “Ini se lengesa ku ne ebpeketudà ne ibavas te langun ne menge etew, su tuus ini te egketuman en ke impasad te Eleteala rengan te ebpekepelihauan en ke langun ne menge etew te keberedusaan dan.

<sup>21</sup> “Ugaid ne kegketueni niyu te sikandin ini se ed-ulug kediey ne kayi red te sikitew ini ne mibpinuu.

<sup>22</sup> Su ed-imetayan ke Impeanak te Menusiyà su rengan ne intandà te Eleteala ini, ugaid ne mekeyruwiru arà se etew ne ed-ulug kandin.”

<sup>23</sup> Ne ketà ne mibpein-inseey ke menge edumdumaan din ke endei rapat buwa kandan se ed-ulaula kayi te migkahi rin.

*Migpelewlewaney Ke Menge Edumdumaan ni Hisus ke Engkey se Mepurù Kandan*

<sup>24</sup> Ne mibpelewlewaney ke menge edumdumaan ni Hisus ke engkey kandan se mepurù te langun.

<sup>25</sup> Migkahi si Hisus kandan te, “Kayi te ampew te dunya ini se menge pengulu te inged ne metehel ne edsuhù te menge sakup dan, ne ini se menge unuten ne egkiyug ne egelalan te sikandan ke Ebpesineruwan te Menge Etew.

<sup>26</sup> Ugaid ne kenà kew ed-iring ketà, su embiya ruen seveka keniyu ne egkiyug ne ebmepurù ne iyan din kemeyidan ne mebpeembavà te hinawa rin iring te ineriyen en. Ne embiya ruen egkiyug ne egkeunutan ne medlila te hinawa rin te edsugsuhuen te menge ruma rin.

<sup>27</sup> Maa entei se mepurù,” ke si Hisus, “ke etew ne edsendaran su egkaan etawa ke etew ne edsendad kandin? Idtarem ku keniyu te arà se midsendaran. Ugaid ne misan siaken se edlingekaan niyu ne gewii ku te kayi te keniyu ne iring te siaken se edsugsuhuen niyu.”

<sup>28</sup> Ne migkahi si Hisus te, “Langun te kemerehenan ku ne mid-unung kew kedi.

<sup>29</sup> Mibehayan a te Amey ku ne Eleteala te kewagib te edatù, ne engketà ded ebhayan ku rema sikiyu te kewagib te kedatù.

<sup>30</sup> Keuremà te Kedatù ku ne ketà kew ebpinuu te uvey ku su edseveka kiyu egkaan wey ed-inum. Ne ebpepinuuwan ku sikiyu se edatù dut te sepulù wey deruwa ne bansa ne inenakan ni Israyil.”

*Impayag neraan ni Hisus ke Kebparew ni Pedro te Teleduma Ran*

*(Mateo 26:31-35; Marcos 14:27-31; Juan 13:36-38)*

<sup>31</sup> Migkahi si Hisus kayi te ki Simon Pedro te, “E, Simon, duen idtarem ku keykew. Midtuhutan te Eleteala si Setanas ke datù te pekaid su ebpenggeraman kew ke embiya ebpekedsalà kew. Ini se kebpenggeraman din ne iring te ed-ukapan din ke sarig nu.

<sup>32</sup> Ugaid ne impengeningeni ku en sikuna, Simon, su apey kenà egkeawà ke sarig nu kediey. Ibpawarew a nikuna, ugaid embiya ebpekeulit en ke sarig nu kediey ne behera nu ke sarig te menge ruma nu.”

<sup>33</sup> Ne migkahi si Pedro te, “Kenà a ebpitass kenikew, Kerenan, misan egkevilanggù ka ne ketà ad dema. Embiya ebpatay ka ne ebpekid-unung a kenikew.”

<sup>34</sup> Ne migkahi si Hisus te, "Tentenuri nu ini, Pedro, te kenà pà ed-ukarà ke manuk te ini en ne kerukileman, ne ketetelu a nu en ibparew te kenà a nu ruma."

*Migkehiyan en ni Hisus ke minge Edumdumaan Din te Ebpeewiten en te Kureta, Kempiru wey Sundang te Ked-ipanew Ran*

<sup>35</sup> Ne migkahi maa si Hisus kandan te, "Ketà te kinesuhù ku keniyu rut te kengkeniyà ne indawey ku keniyu se ed-ewit te kureta, kempiru etawa telumpà, ne maa ruen be nepemengà niyu?"

Ne migkahi ran te, "Warà."

<sup>36</sup> Ne migkahi si Hisus te, "Ugaid ne guntaani ne embiya ruen kureta etawa kempiru niyu ne ewita niyu en te ked-ipanew niyu. Ne ke etew ne warà sundang din ne pesaa rin en ke kumbalà din ne mebpemasa te seveka.

<sup>37</sup> Su igkahi ku keniyu ne arà se impesurat ne Lalag te Eleteala mekeatag kediey ne iyan iya se metuman en. Su ruen nekahi ketà mekeatag kediey te, 'Inragkes sikandin te minge etew ne belisalà' ne ke kegketuman din ini ne mehaan en egkeuma."

<sup>38</sup> Ne migkahi ke minge edumdumaan din te, "Intengi nu ma, Meyterù, su duen en deruwa ne sundang dey."

"Sesangen en ayan," ke si Hisus.

*Mibpengeningeni si Hisus Diyà te Buvungan ne Ed-ingaranan te Ed-ulivuwen*  
(Mateo 26:36-46; Marcos 14:32-42)

<sup>39</sup> Midlihawang en si Hisus ketà te valey ne midlevungan dan ne mibpendiyà maa sikandin te buvungan ne ed-ingaranan te Ulivuwen su arà ke andang ne ebpesineruwan din. Ne miduma kandin ke minge edumdumaan din.

<sup>40</sup> Nekeuma ran ketà ne migkehiyan din sikandan te, "Pengeningeni kew su apey kenà kew mepeneheewit dut te ebpenggeram keniyu."

<sup>41</sup> Mid-ewaan ni Hisus sikandin te egkeuma red te edtimbang, ne mibpenimbuel sikandin se ebpengeningeni te Eleteala.

<sup>42</sup> Ke sikandin te, "Amà, netuenan ku te egkegaga nu ke langun! Ne embiya egkiyug ke rà ne iawà nu ini se keresayan ku, ugaid ne misan be engketà ke kiyug ku ne ipelevundus nu se keykew ne kiyug."

<sup>43</sup> Gewii rin te ebpengeningeni ne ruen suluhuen te Eleteala ne riyà ebpuun te langit ne mibpengkayi te kandin su ebaher te hinawa rin.

<sup>44</sup> Ne gaina te nepenù en si Hisus te kemutuwan ne mid-ilut pà se kebpengeningeni rin te Eleteala, ne ketà ne edtehaktak diyà te tanà ke rimuseng din ne iring en te lengesa.

<sup>45</sup> Mid-itindeg sikandin ketà te ebpengeningeniyen din ne midliveran din ke minge edumdumaan din, ne neumaan din ne nekelipereng dan su neewaan dan te baher dut te kemutuwan dan.

<sup>46</sup> Migkahi en si Hisus kandan te, "Meambe ke edlipereng kew? Enew kew ne pengeningeni kew te Eleteala su apey kew kenà mepeneheewit dut te ebpenggeram keniyu."

*Ke Kedsigkem Ki Hisus*

(Mateo 26:47-56; Marcos 14:43-50; Juan 18:3-11)

<sup>47</sup> Gewii te edlalag pà si Hisus ne nekeuma en se merakel ne etew. Ne si Hudas ke senge etew rut te sepulù wey deruwa ne edumdumaan din ne iyan en iya ebpengunaan kandan. Mid-uvey rin si Hisus su ed-erekan din.

<sup>48</sup> Ugaid ne migkahi si Hisus kandin te, "Maa, Hudas, ini embe se ked-arek nu kayi te Impeanak te Menusiyà se ked-ulug nu en kandin kenyan te minge ruma nu?"

<sup>49</sup> Nekita rà kayi te minge edumdumaan ni Hisus se iring bes kayi ne migkahi ran te, "Menu, Meyterù, edtibas key en su sundang ded ini?"

<sup>50</sup> Ne senge etew kandan se mid-ulavut din se sundang din ne midtibas din en ke edsugsuhuen dut te pinekebmeperù te terebpepengesa ne nesamping en ke kewanan ne telinga rin.

<sup>51</sup> Ne ketà ne migkahi si Hisus te, "Suhati nu en!" Ne in-ulit ni Hisus ke telinga rut te edsugsuhuen ne neulian en.

<sup>52</sup> Ne migkehiyan ni Hisus ke minge etew ne edsigkem kandin, ini se minge mepurù te terebpepengesa, ke minge kepitan te ebantey rut te Nekebpuru ne Valey te Eleteala, wey ke minge egkeunutan te minge Hudiyenen, ke sikandin te, "Maa, tulisan a ne ebmetereman niyu te sundang wey behuval te kedsigkem kediey?"

<sup>53</sup> Su uman gewii ne diyen a te Nekebpuru ne Valey te Eleteala se ebpenurù, ne warà e ma nikiyu sigkema ketà. Ugaid ne keniyu en ini ne hewii te kedsigkem kediey, ne ebpepayag en ke kevaher ni Setanas ke datù te pekaid se ebayabayà keniyu."

*Imparew ni Pedro te Teleduma Ran ki Hisus*

*(Mateo 26:57-58, 69-75; Marcos 14:53-54, 66-72; Juan 18:12-18, 25-27)*

<sup>54</sup> Ne ketà ne midsigkem dan si Hisus ne mibpeneheewit dan en diyà te baley te pinekemepurù dut te menge terebpepengesa. Ne midtundugtundug en dema si Pedro.

<sup>55</sup> Nekeuma ran ne ketà te lama ne ruen midtetemeg te apuy ne mibpinuu ran se ed-inarang. Ne mibpekid-amur en si Pedro kandan.

<sup>56</sup> Ne ruen ketà senge etew ne raha ne edsugsuhuen ne nekekita ki Pedro te nesilaan te rayag dut te apuy. Midtengtengan din si Pedro ne migkahi en te, "Ini ne meama ne ruma red ketà te midsigkem dan."

<sup>57</sup> Ugaid ne mibparew si Pedro se egkahi te, "E, Bayi, kenà ku egketuenan ke entei sikandin."

<sup>58</sup> Neiseg-iseg ne ruen en maa senge etew ne nekekita ki Pedro ne migkahi te, "Benar iya ne ruma ke red ketà te nesigkem."

Ne migkahi si Pedro te, "E Mama, kenà."

<sup>59</sup> Ne neiseg-iseg maan ne ruen maa senge etew ne nekekita ki Pedro ne migkahi te, "Benar iya ne ruma red sikandin ketà te nesigkem su riyà ebpuun sikandin te Geliliya."

<sup>60</sup> Ne migkahi si Pedro te, "E, Mama, kenà ku egkesebutan ayan se egkehiyen nu." Arà dà ne gewii te edlalag pà si Pedro ne mid-ukarà en ke manuk.

<sup>61</sup> Ketà ne midlilingey ni Hisus si Pedro. Ne arà pà ne netenuran ni Pedro ke migkahi ni Hisus kandin te, "Kenà pà ed-ukarà ke manuk guntaani te ini en ne kerukileman ne ketetelu a nu en ibparew te kenà a nu ruma."

<sup>62</sup> Ne midlihawang si Pedro ne midrahukrahuk en te kedsinehew rin.

*Mid-undaunda wey Mibedasan si Hisus*

*(Mateo 26:67-68; Marcos 14:65)*

<sup>63</sup> Ne mid-undaunda en wey mibedasan si Hisus dut te menge etew ne mibantey kandin.

<sup>64</sup> Ne mibegkesan dan ke mata rin ne migkahi ran te, "Entuka nu ke enta se mibadas keykew."

<sup>65</sup> Ne merakel pà se kinepegkeyà dan ki Hisus.

*Mid-ewit Dan si Hisus Diyà te Kukuman*

*(Mateo 26:59-66; Marcos 14:55-64; Juan 18:19-24)*

<sup>66</sup> Guna su mesmeselem pà ne langun dut te egkeunutan te menge Hudiyanen, ke menge mepurù te terebpepengesa, wey ke menge meyerù te penduan ne impeetuvang dan en si Hisus su sikandan ke egkukum.

<sup>67</sup> "Embiya sikuna ke Anak te Eleteala," ke sikandan, "ne Impasad din ne Ebperetuen din ne kehiya nu kenami."

Ne migkahi si Hisus te, "Misan egkehiyen ku keniyu ne kenà kew ebperetiyaya kediey.

<sup>68</sup> Ne misan duen id-insà ku keniyu ne kenà kew rema edtavak.

<sup>69</sup> Ugaid ne igkahi ku keniyu te mehaan en egketuman ke hewii ne ebpekepinuu en ke Impeanak te Menusiyà diyà te rapit te egkekekewanan te Eleteala ne warà repeng te gehem din."

<sup>70</sup> Ne langun dan ne migkahi te, "Embiya ves arà se kahi nu, ne maa sikuna en iya ini ke Anak te Eleteala ne Impasad din ne Ebperetuen din?"

Ne midtavak si Hisus te, "Uya, siaken en iya."

<sup>71</sup> Ne migkahi ran te, "Kenà ki en ebpemengà te ruma pà ne titihus su nerineg tew en ayan se lalag din ne mibpepayà te bèbà din."

## 23

*Mid-ewit Dan Si Hisus Diyà te ki Pilatu ke Gubinedur ne Rumanu*

*(Mateo 27:1-2, 11-14; Marcos 15:1-5; Juan 18:28-38)*

<sup>1</sup> Ketà ne langun ne menge etew ne mibpengukum ki Hisus se mid-ewit kandin diyà te gubinedur ne si Pilatu su apey rin mepasad en ke kukuman.

<sup>2</sup> Nekeuma ran ne imperineg dan ki Pilatu ke id-isuhat dan kandin se egkahi te, "Nesepenan dey ini se meama ne ebpesuwey rut te menge etew kayi te inged tew su impengked din ke menge etew ne ebayad te buwis diyà te mepurù tew ne si Cesar. Ne migkahi rin te sikandin kun ke midtendù te Eleteala ne ebperetuen."

<sup>3</sup> Ne mid-insaan ni Pilatu si Hisus te, "Menu sikuna en iya ke ratù te menge Hudiyanen?"

Ne midtavak si Hisus te, "Uya, ayan iya se migkahi nu."



<sup>4</sup> Ne migkahi si Pilatu riyà te minge mepurù te terebpepengesa wey ke merakel ne minge etew ne nevrurun ketà, ke sikandin te, “Warà netuen ku ne salà ne id-isuhat ku kayi te etew ini.”

<sup>5</sup> Ugaid ne nasi dan en ne mibpemensag se egkahi te, “Ini se minge penurù din se puunan te ebpeetuwen din ke minge etew ketà te mepurù tew. Midrudsù se kebpenurù din diyà te lusud te Geliliya ne neeneb din ke minge inged diyà te lusud te Hudiya taman te ini en te Hirusalim.”

*Mid-ewit Dan si Hisus Diyà te ki Hirudis*

<sup>6</sup> Nerineg ni Pilatu ini ne mid-insà sikandin te, “Meambe, etew ves ini te Geliliya?”

<sup>7</sup> “Uya,” ke sikandan, “etew ayan te Geliliya.” Guna su netueanan ni Pilatu te riyà bes ne etew si Hisus te Geliliya ne inged ne egkemalan ni Hirudis, ne impependiyà din si Hisus te ki Hirudis. Su seretà din ketà ne kayi rema si Hirudis te Hirusalim.

<sup>8</sup> Nekita ni Hirudis si Hisus ne nesuatsuat sikandin su neuhet en ne ed-ing-ingitaen din si Hisus. Su uman din dà egkerineg ke mekegeyip ne ed-ul-ulaan ni Hisus, ne ed-inteng dema perem sikandin.

<sup>9</sup> Ketà be ne mibpenginsaan ni Hirudis si Hisus, ugaid ne warà midtavak si Hisus.

<sup>10</sup> Nekeipus sikandin ne mid-uvey ke minge mepurù te terebpepengesa wey ke minge meyerù te penduan ne mid-uluhan dan nevenar si Hisus te kewagib.

<sup>11</sup> Ne mid-undaunda ni Hirudis wey ke minge sundaru rin si Hisus ne pingkeyà dan. Ne pinelembung dan te velegkas te datù su uvag kun ne ratù ne impelived dan en maa riyà te ki Pilatu.

<sup>12</sup> Ne arà ne andew ne neked-upiyaney en si Pilatu wey si Hirudis su pehaney ne telegkunterà dan.

*Nepasad ke Kukuman Dan te Ed-imetayan si Hisus*

*(Mateo 27:15-26; Marcos 15:6-15; Juan 18:39-19:16)*

<sup>13</sup> Guna su kayi en maa si Hisus te ki Pilatu ne miburun ni Pilatu ke minge mepurù te terebpepengesa, ke minge egkeunutan wey ke merakel ne etew.

<sup>14</sup> Ne migkehiyan din sikandan te, “Mid-ewit niyu ini se etew kayi te kedi ne egkehiyan niyu ne ebpeatu sikandin kayi te minge etew rut te mepurù tew. Ugaid ne mid-insaan ku en sikandin kayi te etuvangan niyu ne warà netuen ku ne salà din iring dut te idwagib niyu.

<sup>15</sup> Engketà ded dema si Hirudis, warà dema netuen din su tembù impelived din ded kayi te kenitew. Warà salà kayi te etew ini ne rait ne id-imetayi kandin.

<sup>16</sup> Ugaid ne ibpelambit ku rà sikandin ne ibpelihawang ku en.” (

<sup>17</sup> Iyan kinekahi ni Pilatu kayi su ruen betasan din te embiya egkeuma ke kevruran te Pista te Kedsehari te Suluhuen ne ruen ibpelihawang din ne senge etew ne bilanggù ne ebuyuen te minge etew.)

<sup>18</sup> Nerineg dut te minge etew ini se migkahi ni Pilatu ne nasi dan ne mibpemensag se egkahi te, “Peimatayi nu ayan ne etew! Ne ipelihawang nu kayi te kenami si Barabas!”

<sup>19</sup> (Si Barabas ini ne nevilanggù su mid-amung sikandin te ebpekidkunterà te gubirnu ne ruen nepatey rin.)

<sup>20</sup> Duen kiyug ni Pilatu te iyan ibpelihawang ne si Hisus ne ketà ne mid-insà maa sikandin dut te minge etew.

<sup>21</sup> Ugaid ne mibpememensag se egkahi te, “Ipelansang nu! Ipelansang nu riyà te ebpebelevahen ne kayu!”

<sup>22</sup> Ne migkahi en maa si Pilatu te iketelu en te, “Meambe? Engkey se meraat ne mid-ulaula rin? Su warà netuen ku ne salà din ne dait ne id-imetayi kandin. Ibpelambit ku rà sikandin ne ibpelihawang ku en.”

<sup>23</sup> Ugaid ne mid-ilut dan pa se ebpememensag se egkahi te ebpeimetayan sikandin, ne warè en mekeehen si Pilatu.

<sup>24</sup> Geina te mibpulang dan mibpememensag ne imbehey en ni Pilatu ke kiyug dan.

<sup>25</sup> Impelihawang en ni Pilatu si Barabas, ini se etew ne nevilanggù su mid-amung te ebpekidkunterà te gubirnu wey ruen nepatey rin. Ugaid ne si Hisus ne impalad en ni Pilatu diyà te kandan te misan ebmenenuwen dan.

*Inlansang si Hisus Diyà te Pinebelavag ne Kayu*

*(Mateo 27:32-44; Marcos 15:21-32; Juan 19:17-27)*

<sup>26</sup> Ne ketà ne mibpeneheewit dan en si Hisus diyà te ed-imetayan dan kandin. Ne gewii ran te ed-ipanew ne ruen etew ne nesinuhung dan ne iyan pa ebpekeuma ne riyà ebpuun te taneb, ne mibpehes dan te ebpetiang ke pinebelavag ne kayu ne edtiangen ni Hisus. Etew ini ne ed-ingaranan ki Simon riyà ebpuun te inged ne Sirin.

<sup>27</sup> Ne denda ne munge etew se miduma ki Hisus abpeg ke munge meritan ne ebpenehew su ebpenderawit dan en kandin.

<sup>28</sup> Ne midlilingey si Hisus kandan ne migkahi en te, "Sikiyu ne munge meritan kayi te Hirusalim, kenà a niyu sinehewi, ugaid ne iyan niyu sinehewi ke egketemanan niyu wey ke munge anak niyu.

<sup>29</sup> Su ruen hewii ne egkeuma," ke si Hisus, "ne egkahi ke munge etew te, 'Meupiya ke meritan ne kenà ed-anak, ke meritan ne warà med-anak, wey ke meritan ne wara edseruruwen din!'

<sup>30</sup> Egkeuma arà se hewii ne egkehiyan te munge etew ayan se buvungan te, 'Ketempahi key en ne buvungan!' wey egkahi ran keninyan te munge tuhar te, 'Kevunbuni key en ne tuhar.'

<sup>31</sup> Su," ke si Hisus, "embiya ini se ibped-ulaula ran kedì te iring te kayu ne meilew pà su warà salà ku, ne tuwas pà imbe ke ibped-ulaula ran keniyu te sikiyu ne iring te kayu ne nehangu."

<sup>32</sup> Ne ruen dema mid-ewit dan ne deruwa ne etew ne tulisan su ibperuma ki Hisus te ed-imetayan.

<sup>33</sup> Nekeuma ran ketà te rapit ne ed-ingaranan te "Tulan te ulu" ne inlansang dan en si Hisus diyà te pinebelavag ne kayu ne inlansang ded dema ini se deruwa ne tulisan, seveka kayi te egkekewanan ni Hisus ne seveka kayi te egkehiyang din.

<sup>34</sup> Gewii ran te edlansang kandin ne mibpengereningeni si Hisus te, "Amà, pesehara nu sikandan su warà dan metueni ini se ed-ul-ulaan dan." Ne ketà ne ini se munge sundaru ne midlansang kandin ne mibunutbunutan dan se velegkas ni Hisus ke entei se ebpekegkemuney kandan.

<sup>35</sup> Ke denda ne etew ne mid-itindeg ketà se edtengteng, ne ini se munge egkeunutan te Hudiyanan ne mid-undaunda ki Hisus, ke sikandan te, "Nekepelihau sikandin te munge ruma rin. Ne intengan tew ve ke igkepelihau din ke hinawa rin embiya benar ne sikandin en ke midtendù te Eleteala ne ebperetuen ne ed-ingaranan te Mesiyas."

<sup>36</sup> Ne mid-amung ke munge sundaru mid-undaunda kandin. Mid-uevy ran si Hisus ne pineinum dan te daan en ne tebà.

<sup>37</sup> Ne migkahi ran te, "Embiya sikuna en ke ratù dut te munge Hudiyanan ne ibpeliyu nu ke hinawa nu."

<sup>38</sup> Ne ruen surat ne riyà dan intahù te divavew te ulu rin ne egkahi te, "Ini ke Ratù te munge Hudiyanan."

<sup>39</sup> Ne senge etew rut te imbitin ne tulisan ketà se mid-undunda ki Hisus se egkahi te, "Menu, kenà sikuna ke Impasad te Eleteala ne Ebperetuen? Ipeliyu nu ke hinawa nu wey sikami rema."

<sup>40</sup> Ugaid ne midawey sikandin dut te ruma rin se egkahi te, "Engkey ka ini? Maa, kenà ke ves egkeandek te Eleteala te langun tew ini te tetelu ne ebpedulung en te kepepatey?"

<sup>41</sup> Dait ta ini te deruwa se ed-imetayan su id-uli dà keyta ke kereatey te ulaula ta. Ugaid ne ini se etew ne egkeimetayan te warè en iya meraat ne ulaula rin."

<sup>42</sup> Ne migkahi sikandin kayi te ki Hisus te, "E, Hisus, tentenuri a nu rà ketà te Edetuan nu keuremà."

<sup>43</sup> Ne migkahi si Hisus kandin te, "Igakhi ku kenikew te ini en ne andew ne ebpekeruma ka kedì riyà te langit."

### *Ke Kinepatey ni Hisus*

*(Mateo 27:45-56; Marcos 15:33-41; Juan 19:28-30)*

<sup>44</sup> Neudtu en ini ke andew ne midtekew mibmerusirem ketà te langun ne inged taman te edluuk en ebpemenaug ke andew su midlekep.

<sup>45</sup> Ne riyà te Nekebepuru ne Valey te Eleteala ne newaswas kayi te luuk ini se mekepal ne saput ne impehelet dut te insivey ne ruhu te Eleteala.

<sup>46</sup> Ne ketà ne migkulayi si Hisus se egkahi te, "Amà, ebpeheweran ku kenikew ke gimukud ku." Nelalag din dà ini ne nependus an sikandin te hinawa.

<sup>47</sup> Nekita rut te kepitan te munge sundaru ne ini se ned-ulaula ne nekereyù sikandin te Eleteala se egkahi te, "Benar ves iya ne metidtu ini ne etew."

<sup>48</sup> Ne langun kayi te munge etew ne nevrurun ketà su edtengteng, ne nekekita kayi te ned-ulaula ne mid-uli dan se ebpenempak te kumeng dan su dekelà se kemutuwan dan.

<sup>49</sup> Langun ne edkekilala ni Hisus abpeg ke munge meritan ne miduma kandin igenat te Geliliya ne mid-it-itindeg diyà te malù meriyù se edtengteng kayi te langun ne ned-ulaula.

*Ke Kineleveng ki Hisus**(Mateo 27:57-61; Marcos 15:42-47; Juan 19:38-42)*

<sup>50-51</sup> Duen senge etew ketà ne ed-ingaranan ki Jose ne riyà ebpuun te inged ne Eremetiya lusud te Hudiya. Meupiya ne etew sikandin wey metidtu se ulaula rin. Senge etew sikandin dut te menge Hudiyanan ne edtahad dut te kebpekeuma te Edetuan te Eleteala kayi te ampew te dunya. Senge etew rema sikandin dut te menge egkeunutan te Hudiyanan te Perekukum, ugaid ne warà meeyuni sikandin dut te kineimasad en ki Hisus.

<sup>52</sup> Mibpendiyà si Jose ini te ki Pilatu su ebuyuen din ke lawa ni Hisus ne inlulut dema ni Pilatu.

<sup>53</sup> Ne mibperus en ni Jose ke lawa ni Hisus ne mibukusan din en te meputi ne saput. Ne inleveng din en ketà te imbangbang ne leveng diyà te dempilas ne warà pà melevangi te minatey.

<sup>54</sup> Meapun en ini te Diyemaat ne edsanlep ke andew ne ini se rudsuan te Hewii ran te Id-imeley.

<sup>55</sup> Ke menge meritan ne miduma ki Hisus igenat diyà te Geliliya ne miduma ki Jose te edleveng, ne nekita ran ke midlevengan wey ke kinetahù en ki Hisus diyà te leveng din.

<sup>56</sup> Ne mid-uli dan en ne mibpenehana ran ke meemut ne menge rawun wey periyemut su idsapu te lawa ni Hisus.

Ne ketà te midrudsù ke Hewii te Id-imeley ran ne mid-imeley ran en su edtuman dan dut te insuhù te penduan dan.

**24***Ke Kinekevanew ni Hisus**(Mateo 28:1-10; Marcos 16:1-8; Juan 20:1-10)*

<sup>1</sup> Mesmeselem pà te hewii ne Akad ne mibpendiyà ke menge meritan te leveng ni Hisus ne imbangbang diyà te dempilas ne mid-ewit dan ke menge meemut ne idsapu ne mibpenehana ran.

<sup>2</sup> Nekeuma ran ne nekita ran te nelilid en ke watu ketà.

<sup>3</sup> Mid-awuk dan ne mibpenlangulangu ran, ugaid ne warà dan mekita ke lawa ni Hisus.

<sup>4</sup> Gewii ran te ed-it-itindeg ketà se neliveg, ne neketekew en nekeitindeg se deruwa ne meama ne ebpenersing se velegkas dan.

<sup>5</sup> Ne nekelumpeng ke menge meritan te kegkeandek dan. Ne migkahi ini se deruwa ne meama te, "Meambe ke ebpemengaan niyu kayi te edlevengan te minatey arà se etew ne biviyag?"

<sup>6</sup> Warà en sikandin kayi su nevanew en. Tentenuri niyu rè ma ke migkahi rin keniyu rut te riyà kew pà te Geliliya.

<sup>7</sup> Su migkahi rin te ibpalad ke Impeanak te Menusiya diyà te kebayaabayà te menge etew ne mekesalà ne idlansang dan sikandin, ugaid ne ketà te iketelu ne hewii ne egkevanew en."

<sup>8</sup> Ne arà pà ne netenuran dan ke migkahi ni Hisus.

<sup>9</sup> Mid-uli dan ne mibpenudtulan dan ke sepulù wey seveka ne edumdumaan ni Hisus wey ke menge ruma pà ketà.

<sup>10</sup> Ini ke menge meritan ne mibpenudtul te lalag te suluhuen: Si Maria ne riyà ebpuun te Magdala, si Juana, si Maria ne iney ni Santiago, wey ruen pà menge ruma ran. Sikandan be ini ke mibpenudtul dut te menge edumdumaan ni Hisus ne ed-ingaranan te Apustulis.

<sup>11</sup> Ugaid ne warà mibperetiyya ke menge edumdumaan ni Hisus dut te tudtul te menge meritan su iyan dan kunaan ke menge kesembaran dà.

<sup>12</sup> Ugaid ne mid-itindeg si Pedro ne mibpelelahuy en se ebpendiyà te leveng. Nekeuma ne midsiniling din en ne iyan din nekita ke meputi ne saput ne imbukus dan ne netahak ketà. Ne mid-uli sikandin ne neinuinu nevenar sikandin ke engkey se ned-ulala.

*Mibpekita si Hisus Diyà te Ralan Dut te Deruwa ne Etew ne Ebpendiyà te Inged ne Emaus*

*(Marcos 16:12-13)*

<sup>13</sup> Arà ne hewii ne ruen deruwa ne etew rut te midumaruma ki Hisus ne ebpendiyà te inged ne ed-ingaranan te Emaus. Ini se inged ne Emaus ne iyan din keriyù te Hirusalim ne menge sepulù wey seveka ne kilometro.

<sup>14</sup> Ketà te ked-ipanew ran ne iyan dan egkepempengasak ne mekeatag te langun dut te ned-ulaula ni Hisus.

<sup>15</sup> Gewii ran te ebpengasak ne midlambag si Hisus kandan ne mibpekiduma en.

<sup>16</sup> Nekita ran sikandin ugaid ne warà mebpakilala sikandin kandan.

<sup>17</sup> Migkahi si Hisus kayi te kandan te, “Engkey ini se egkepengasak niyu te ed-ip-ipanew?”

Mid-itindeg dan se paras te egkemutuwan.

<sup>18</sup> Midtavak ini se senge etew ne ed-ingaranan ki Keliyupas te, “Maa iyan ka mid-ubpà kayi te Hirusalim ne warà pà metuau kayi te ned-ulaula ketà?”

<sup>19</sup> “Maa,” ke si Hisus, “engkey se ned-ulaula ketà?”

Ne midtavak dan te, “Engkey ve iya? Iyan arà ne mekeatag ki Hisus ne riyà ebpuun te Nesarit. Su si Hisus ini ne benar ne mibpelambas te Lalag te Eleteala diyà te etuvangan din wey kayi rema te etuvangan te menge etew. Duen gehem din te kebpenurù din wey kayi rema te langun te mid-ulaula rin ne mekegeyip.

<sup>20</sup> Ugaid ne ini se menge mepurù tew te terebpepengesa wey ke menge egkeunutan tew ne impemenayik dan diyà te gubinedur su impekukum ne mid-imasad dan te ebpeimetayan, ne inlansang dan en sikandin diyà te pinebelavag ne kayu.

<sup>21</sup> Ne iyan netahù te hinawa rey ne sikandin en iyan ke midsuhù te Eleteala ne ebpeiyu te langun ne inenakan ni Israyil. Ugaid ne ini en ke iketelu ne hewii te kineimetayi ran kandin.

<sup>22</sup> Ne ruen dema ned-ulaula te menge meritan ne ruma ta ne igkeinuinu rey. Su geina ne mibpemanepayan ran diyà te leveng din,

<sup>23</sup> ugaid ne warà dan mekita ke lawa rin ketà. Ne midlived dan kayi te kenami ne mibpenudtul dan te ruen deruwa ne suluhuen te Eleteala ne mibpekita kun kandan ne migkahi kandan te neuyag en si Hisus.

<sup>24</sup> Ne ruen menge duma rey ne midsuvar mibpendiyà te leveng ne iring ded iya ketà se nekita ran te migkahi rut te menge meritan, ugaid ne warà dan mekita ke lawa ni Hisus.”

<sup>25</sup> Ne migkahi en si Hisus kandan te, “Warà bes itungan niyu! Meambe ke warà kew mepperetiyaya rut te langun ne impesurat te menge mibpelambas te Lalag te Eleteala rangen?”

<sup>26</sup> Su migkahi ke menge mibpelambas te Lalag te Eleteala ne egkerasey pà ini se Impasad te Eleteala ne arà pà ne Ebperetuen din te langun ne imbehey kandin.”

<sup>27</sup> Ketà ne midseysey en ni Hisus kandan ke meana rut te langun ne impesurat te mibpelambas te Lalag te Eleteala rangen mekeatag kandin. Kayi rin imperudù te impesurat ki Moises taman en dut te mewri ne mibpelambas te Lalag te Eleteala.

<sup>28</sup> Guna su ebpelundani ran en dut te inged ne edtemanan dan, ne iring te edlevundus pà si Hisus.

<sup>29</sup> Ugaid ne mibangen dan sikandin se egkahi te, “Kayi kiyu pà su meapun en, ne edsanlep en ayan se andew.” Ne arà dà ne mibpekiduma en si Hisus kandan.

<sup>30</sup> Neiseg-iseg ketà ne mibpinuu ran se egkaan, ne migkuwa ni hisus ke egkeenen dan ne pan ne impeselamat din te Eleteala ne mibpenevitevi din ne imbehey rin en kandan.

<sup>31</sup> Ketà dan pè be mekilala si Hisus su arà pà ne iring te nevukaan ke mata ran. Ugaid ne miduma rà sikandin te peeraan dan.

<sup>32</sup> Ne mibpelelahay en ini se deruwa ne etew te, “Tembù bes neinesa ki te ebpepineg kandin te edseysey te menge impesurat te Eleteala te mibpelambas te lalag din gewii te kebpepengasak tew te ed-ipanew.”

<sup>33</sup> Arà dà ne mid-itindeg dan ne mid-uli dan en diyà te Hirusalim. Ne iyan dan neumaan ketà ke sepulù wey seveka ne edumdumaan ni Hisus wey ruma pà ne nevrurun.

<sup>34</sup> Iyan dan egkepenudtul se, “Benar iya ne nevanew si Hisus ne mibpekita en ki Simon.”

<sup>35</sup> Ne ketà ne mibpenudtul en kandan ini se deruwa ne etew ne riyà ebpuun te Emaus ke engkey se ned-ulaula ran diyà te ralan te kinepekiduma ran ki Hisus. Ne mibpenudtul dan dema ke engkey se kinepekekilala ran en ki Hisus ketà te kebpenevitevi din en dut te egkeenen dan ne pan.

*Mibpekitakita si Hisus Dut te Menge Edumdumaan din*

*(Mateo 28:16-20; Marcos 16:14-18; Juan 20:19-23; Nenged-ulaula 1:6-8)*

<sup>36</sup> Gewii te ebpenudtul dan kayi ne netetau ran te kayi en mekeitindeg si Hisus te teliwarà dan. Ne migkahi en te, “Na, mebmelintad ke hinawa niyu!”

<sup>37</sup> Nekita ran dà si Hisus ne neandek dan nevenar su iyan dan kunaan ke gimukud din se nekita ran.

<sup>38</sup> Ugaid ne migkahi sikandin kandan te, “Meambe ke egkeandek kew maa kedi? Meambe ke duwaruwa se hinawa niyu kedi?”

<sup>39</sup> Intengi niyu ma ini se palad ku wey paa ku su siaken ded iyan ini! Geweri a niyu ma su apey niyu egketueni te kenà a gimukud. Su embiya gimukud,” ke si Hisus, “ne warà sapù din wey tulan din, ugaid ne egkekita niyu ma te ruen kediey.”

<sup>40</sup> Nekahi rin dà ini ne impekita rin en ke palad din wey paa rin.

<sup>41</sup> Ne ruen pà lavew keduwaruwa te hinawa ran te si Hisus ini se nekita ran ugaid ne nengehalew ran wey nengeinuinu. Ne ketà ne mid-insà si Hisus kandan te, “Menu ruen ded egkekaan tew kayi?”

<sup>42</sup> Ne mibehayan dan sikandin te in-anag ne serà.

<sup>43</sup> Ne migkuwa rin ke serà ne migkaan din kayi te sineruwan dan.

<sup>44</sup> Ne migkahi si Hisus kandan te, “Pehaney te kayi e pà te keniyu ne ini iya ke migkahi ku keniyu: Langun te impesurat mekeatag kediey ketà te penduan ni Moises wey ke impesurat te menge mibpelambas te Lalag te Eleteala wey arà se insurat ketà te riberù ne ed-ingaranan te Salmu ne langun din ne metuman iya kayi te kedì. Na guntaani ne netuman en arà kayi te netemanan ku.”

<sup>45</sup> Ne arà pà ne mibukaan din ke itungan dan su apey ran ebpekesabut dut te impesurat ne Lalag te Eleteala.

<sup>46</sup> Ne migkahi en kandan te, “Ini se impesurat dut te mibpelambas te Lalag te Eleteala rangen ne: Ebpekevayà pà te kegkasey arà se Impasad te Eleteala ne Ebperetuen ne ed-ingaranan te Mesiyas, ugaid ne ketà te iketelu ne hewii ne ebenawen ded.

<sup>47</sup> Ne kayi te kebpatay rin wey kayi te kebanew te Eleteala kandin,” ke se impesurat ne Lalag te Eleteala, “ne kayi ve imbe ne ruen kebpsahad te Eleteala te keberedusaan dut te menge etew ne ebpedsendit ne ed-engkenà te meraat ne ulaula ran. Ini se ieneb niyu te ebpesabut diyà te langun ne menge inged kayi te ampew te dunya. Kayi niyu irudsù te Hirusalim.

<sup>48</sup> Su geina te nemetmetaan niyu en,” ke si Hisus, “te netuman en ini kayi te kedì, ne sikiyu en ke edtitihus.

<sup>49</sup> Duen ibpempengkayì ku te keniyu ke Kedesenan ne Ebpetuntul te menusiyà ne impasad keniyu te Amey ku rangen. Engketà be ne kenà kew pà awà kayi te inged ne Hirusalim taman te edlumun en keniyu ke gehem din ne riyà ebpuun te langit.”

*Nevatun si Hisus Diyà te Langit*

*(Marcos 16:19-20; Nenged-ulaula 1:9-11)*

<sup>50</sup> Ne ketà ne mibpeneheewit din sikandan diyà te liyu te inged ne Hirusalim uvey te inged ne Biteniya. Nekeuma ran ne ingkayew rin ke belad din ne impenuvadtuvad kandan.

<sup>51</sup> Gewii rin te ibpenuvadtuvad din sikandan ne mid-ewaan din en sikandan ne mibatun en diyà te langit.

<sup>52</sup> Ne mibpengarap dan kandin, ne memehalew ran nevenar te mid-uli dan diyà te Hirusalim.

<sup>53</sup> Ne merukilem meandew ne riyà dan te Nekebpuru ne Valey te Eleteala se edeyù te Eleteala.

## Ke Meupiya ne Tudtul Mekeatag ki Hisu Kristu ne Miguhud ni Juan

*Ini se Mid-ingaranan ne Lalag ne Mibpebaluy ne Menusiyà*

<sup>1</sup> Rengan te warà pà limbaha ini se misan engkey en, ne raan en ketà ke mid-ingaranan te Lalag. Ne iyan kineingarani kandin ne Lalag su igkepayag din ke langun ne netahù te itungan te Eleteala. Ne raan sikandin ne ruma te Eleteala su Eleteala red dema sikandin.

<sup>2</sup> Dut te warà pà melimbag ini se misan engkey en ne duma en sikandin te Eleteala.

<sup>3</sup> Ne impepeyayà kandin ne midlimbag te Eleteala ke langun taman, ne warà misan seveka rut te nelimbag ke kenà impepeyayà kandin.

<sup>4</sup> Sikandin ke ebpuunan te umur te menusiyà, ne ke umur din se ebpekerayag te itungan te langun ne menusiyà.

<sup>5</sup> Ne nekeandlag ke kerayag din diyà te kerusireman, ne ke kerusireman ne warà mekeevuk dut te kerayag.

<sup>6</sup> Duen senge etew ne mid-ingaranan ki Juan ne midsuhù te Eleteala.

<sup>7</sup> Iyan din kinesuhua ki Juan ne ebpepemenduen din mekeatag dut te kerayag ne si Hisus su apey ke langun ne ebpekerineg dut te penduan ne ebpekeretiayaya.

<sup>8</sup> Si Juan ini ne kenà ke kerayag, ugaid ne sikandin ke edseysey mekeatag kayi te kerayag.

<sup>9</sup> Su ini ke benar ne kerayag ne mibpebaluy ne etew, ne nekeuma en kayi te ampew te dunya su edrayag dut te itungan te langun ne menusiyà.

<sup>10</sup> Nekeuma en sikandin kayi te ampew te dunya, ugaid ne warà mekekilala kandin ke menge etew misan impepeyayà kandin ke kinelimbag dut te dunya.

<sup>11</sup> Nekeuma sikandin kayi te inged din, ne misan ke kereremigey rin ne Hudiyanen ne warà midtelimà kandin.

<sup>12</sup> Ugaid ne misan engkey ne etew se midtelimà wey mibperetiayaya en kandin ne mibehayan din te ketenged te egkevaluy ran ne tunei ne menge anak te Eleteala.

<sup>13</sup> Ne iyan dalan te kinekevaluy ran ne menge anak te Eleteala ne kenà bineelan dà te menusiyà, etawa impenganak te menge etew rà ne amey, su iyan dan Amey ne Eleteala.

<sup>14</sup> Ne ke mid-ingaranan te Lalag ne mibpebaluy en ne menusiyà ne mid-ubpà en kayi te keytew. Ne lilimuen nevenar sikandin, wey ke langun ne egkehiyen din ne benar. Nekita rey ke geyip ne gehem din ne imbehey kandin te Eleteala su sikandin ke budtung ne Anak te Amey rin ne Eleteala.

<sup>15</sup> Ne mibpenurù si Juan mekeatag kandin ne impenawag din se egkahi te, "Ini ve ke etew ne impenudtul ku keniyu te, 'Duen senge etew ne ebpeketundug kediey, ugaid ne misan ebpeketundug dà kediey ne sikandin se muna pà ne mepurù kediey, su ketà te warà e pà in-anak ne raan en ketà sikandin.'"

<sup>16</sup> Geina te dekelà ke limù din ne sikitew langun ne mibehayan din te penaub, ne ini se penaub ne warà kegkepupus din.

<sup>17</sup> Su si Moises ke nekepenheewit te penduan te Eleteala kayi te langun tew ne menge menusiyà, ugaid ne si Hisu Kristu ke mibpepayag ne limù te Eleteala wey ke benar mekeatag te Eleteala.

<sup>18</sup> Warà senge etew rà ne nekekita te Eleteala, liyu rà dut te budtung ne Anak din ne si Hisu Kristu, su iyan dan layun teleduma. Ne sikandin ke mibpesabut keytew mekeatag dut te Eleteala ne Amey rin.

*Ke Impesabut ni Juan Ke Ebpebunyag*

*(Mateo 3:1-12; Marcos 1:1-8; Lucas 3:1-18)*

<sup>19</sup> Duen menge etew ne mibpendiyà te ki Juan su riyà sikandin te ripag te wayig ne Hurdan se ebpebunyag te menge etew. Ini se nekeuma ne menge terebpepengesa wey menge inenakan ni Levi su midsuhù dan dut te egkeunutan te menge Hudiyanen te ebpeinsa dan si Juan te, "Entei ka?"

<sup>20</sup> Ne mepeyag ini se intavak ni Juan su warà din in-eles se egkahi te, "Kenà siaken si Hisu Kristu, ke Impasad te Eleteala ne Ebperetuen din."

<sup>21</sup> "Engkey ke ve, si Iliyas ka?" ke sikandan.

"Kenà," ke si Juan.

"Ne engkey ke ve iya? Maa sikuna en iya ayan ke ebpelambas te Lalag te Eleteala ne impasad din?" ke sikandan.

"Kenà," ke si Juan.

<sup>22</sup> “Ne idtarenu nu kenami,” ke sikandan, “ke engkey ka su apey rey egkepenudtul diyà te midsuhù kenami. Engkey se egkekahi nu mekeatag keykew?”

<sup>23</sup> Midtavak si Juan ne ke migkahi rin ne iring dut te impesurat ne Lalag te Eleteala ki Isayas ke mibpelambas te Lalag te Eleteala rengan ne migkahi sikandin te, “Siaken ke etew riyà te tanà ne kenà egkeubpaan te etew ne ebpnawag dut te menge etew ne ed-uey kedi, ne migkahi a te, ‘Mehaan ebpekeuma ke Kerenan, ne tidtuwa niyu ke ibayà din, ne iyan din meana ne tilaka niyu ke hinawa niyu su apey kew egkepenehana te kebpekeuma rin.’ ”

<sup>24</sup> Ne ayan se ebpenginsà ki Juan ne menge suhù te menge Peresiyu,

<sup>25</sup> mid-insà dan maa te, “Embiya kenà sikuna si Hisu Kristu, ne kenà sikuna rema si Iliyas etawa ke mibpelambas te Lalag te Eleteala, ne meambe ke ebpbunyang ka te menge etew?”

<sup>26</sup> Midtavak si Juan te, “Siak ne iyan ku ibunyang se wayig, su apey ran egkeandam te kedtelimà ketà te senge etew ne riyà te keniyu ne kenà niyu egkekilala,” ke si Juan.

<sup>27</sup> “Ebpekeuma sikandin se ebpeketundug kedi, ugaid ne misan ke telumpà din ne kenà e adait ne ed-ekar.”

<sup>28</sup> Langun kayi ne riyà med-ulaula te inged ne Bitanya riyà te ripag te wayig ne Hurdan su riyà si Juan se ebpbunyang.

*Si Hisu ke Ebpekeiring te Impelengesa ne Nati te Bilibili*

<sup>29</sup> Midtundug be maa ne hewii ne nekita ni Juan si Hisu se ebplingguma ne migkahi en sikandin dut te menge etew ne uvey rin te, “Ayan de be ke etew ne iring te ibpelengesa ne nati te bilibili ne imbehey te Eleteala apey ke langun ne salà te menusiya ne egkeawà.

<sup>30</sup> Ini ve ke etew ne impenudtul ku keniyu te, ‘Duen senge etew ne ebpeketundug kediey, ugaid ne misan ebpeketundug dà kediey ne sikandin se mepurù pà kedi, su raan en ketà sikandin te warà e pà in-anak.’

<sup>31</sup> Pehaney en,” ke si Juan, “ne warà ku pà mekilala ke engkey an sikandin, ugaid ne mibpengkayi a te ebpbunyang te menge etew te wayig su apey egketueni rut te menge kevuwaran ne Israyil se ebpekeuma en sikandin.”

<sup>32</sup> Ne mibpenudtul pà maa si Juan mekeatag ki Hisu te, “Nekita ku ke Kedesenan ne Ebpetuntul te Menusiya ne midragid te melepati ne riyà ebpuun te langit ne mibpehnrerenà diyà te kandin, ne warà din ewai.”

<sup>33</sup> “Ne warà ku pà lavew metueni te sikandin en bes iya ke midsuhù te Eleteala,” ke si Juan, “ugaid ne ke Eleteala ne midsuhù kedi te ebunyang te wayig ne ingkahi rin kedi te, ‘Embiya egkekita nu en arà se Kedesenan ne Ebpetuntul te Menusiya ne ebpehnrerenà diyà te etew ne kenà din ed-ewaan, ne egketuenan nu be imbe te sikandin ke ebpbunyang ibpepevayà dut te kedlumun te Kedesenan ne Ebpetuntul te Menusiya diyà te menge etew ne mibperetiyaya.’

<sup>34</sup> Ne nekita ku en iya ini,” ke si Juan, “ne egkehiyen ku en keniyu te sikandin en iya ke Anak te Eleteala.”

*Ke Neuna ne Edumdumaan ni Hisu*

<sup>35</sup> Ne ke neketundug ne hewii ne ketà en maa si Juan se ebpekidlalag dut te deruwa ne edumdumaan din.

<sup>36</sup> Nekita rà ni Juan se edsahad si Hisu, ne migkahi en te, “Ayan de be ke etew ne iring te ibpelengesa ne nati te bilibili ke mid-andam te Eleteala ne ibehey rin!”

<sup>37</sup> Ne wey meringe dut te deruwa ne edumdumaan din ke lalag ni Juan ne midtundug dan en ki Hisu.

<sup>38</sup> Ne midteren si Hisu ne midlilingey ne nekita rin ke deruwa ne etew ne edtundug kandin ne mid-insà te, “Meambe ke edtundug kew kedi?”

Ne migkahi ran te “Rabi, (ne iyan din meana ne Meyterù) endei ka ed-ubpà?”

<sup>39</sup> Ne midtavak si Hisu te, “Duma kew en kedi su apey niyu egkekita.”

Ne mibpekiduma ran en kandin te ed-inteng dut te ed-ubpaan din. Ne meapun en dutun ne wey ran med-uli ne merukilem en.

<sup>40</sup> Ne senge etew kayi te deruwa se nekerineg te nekahi ni Juan ne miduma ki Hisu ne mid-ingaranan ki Andres, su teleari ran ki Simon Pedro.

<sup>41</sup> Arà dà ne mid-awà en sikandin se ebpemengà ki Simon ke suled din. Nekita rin dà ne migkahi te, “Netuen dey en ke ed-ingaranan te Mesiyas.” (Seveka ne ngaran ini ni Hisu Kristu, ke Impasad te Eleteala ne Ebperetuen din.)

<sup>42</sup> Ne mibperuma din en si Simon diyà te ki Hisu. Nekeuma ran dà ne midtengtangan en ni Hisu si Simun ne migkahi en te, “Sikuna si Simon, ke anak ni Juan, ugaid ne

edsembian ku ke ngaran nu ki Sipas.” (Ayan se ngaran ne Sipas ne neked-iring ded te Pedro su ke meana rin ne “Batu”).

*Mibpemili ni Hisus si Pilipi wey si Natanael*

<sup>43</sup> Ne ke neketundug ne hewii ne nepegitung ni Hisus ne ebpendiyà te pruvinsiya ne Geliliya. Ketà ne nevalak din si Felipe ne migkehiyan din en te, “Duma ka kedì.”

<sup>44</sup> Si Felipe ne etew ne riyà ebpuun te inged ne Bitsaida, ke inged en ni Andres wey si Pedro.

<sup>45</sup> Ketà ne mibayaan ni Felipe si Natanael ne migkehiyan din en te, “Nekita rey en ke etew ne ingkesurat ni Moises diyà te riberù te minge penduan te Eleteala, wey ingkesurat ded dema dut te minge etew ne mibpelembas te Lalag te Eleteala rengan. Si Hisus ke ngaran din, ke anak ni Husi ne riyà ebpuun te Neserit.”

<sup>46</sup> Ne rutun ne migkahi en si Natanael te, “Maa, ruen bes etew ne riyà ebpuun te Neserit ne ruen egkekaga rin?”

Midtavak si Pilipi te, “Iyan tumù se pengkayi ka su intengi nu.”

<sup>47</sup> Guna su nekita ni Hisus si Natanael se ebpelembas kayi te kandin ne migkahi te, “Ayan be ke tidtu ne inenakan ni Israyil su warà edtelevan din.”

<sup>48</sup> Mid-insà si Natanael te, “Meambe ke egkekilala a nikuna?”

Midtavak si Hisus te, “Nekita ku sikuna ketà te levut te kayu ne ed-ingaran te igira te warà pà med-ipanew si Felipe te edtawag keykew.”

<sup>49</sup> “Meyterù,” ke si Natanael, “sikuna ves iya ke Anak te Eleteala! Sikuna en iya ke Edatù keytew ne minge kevuwaran ni Israyil!”

<sup>50</sup> Migkehiyan ni Hisus si Natanael te, “Maa iyan nu rè bes kebperetiyaya kediey, Natanael, se nekahi ku te nekita ku sikuna se riyà te medmeriyù ne levut te kayu ne igira? Ugaid ne muna pà se kebpekeperetiyaya nu ke egkekita nu en ke mekegeyip ne ed-ululaan ku.”

<sup>51</sup> Ne migkahi en si Hisus kandan te, “Benar ini se egkehiyan ku keniyu te egkekita niyu ke lesang te langit ne egkevukaan, ne ke suluhuen te Eleteala ne egkekita niyu se mekepemenayik ne mekepemenaug se ebpengkayi te ke Impeanak te Menusiyà.”

## 2

*Ke Kewingan Diyà te Inged ne Kana*

<sup>1</sup> Guna su nekederuwa ne hewii ketà ne ruen kewingan diyà te inged ne Kana ne lusud te inged ne Geliliya. Ne midtelavuk ke iney ni Hisus ketà te kewingan.

<sup>2</sup> Ne ketà dema si Hisus wey ke edumdumaan din su neinggat dan te edtelavuk ketà te kewingan.

<sup>3</sup> Guna su neamin en ke inumen dan ne binu su kurang pà kandan ne mibayaan en te iney ni Hisus se egkahi te, “Warà en duma ne binu.”

<sup>4</sup> “Tebiyà dà keykew, Inà,” ke si Hisus, “te kenà a nu uyawi te ed-ululaan ku. Su warà pà meuma ke hewii te kebpekita ku te gehem ku riyà te minge etew.”

<sup>5</sup> Ne migkahi en ke iney ni Hisus dut te minge sugshuen te, “Dumai niyu te misan engkey se idsuhù din.”

<sup>6</sup> Ne ruen enem ne timan ne kelalew ne edtehuan te wayig su ruen edtenuran ne betasan te minge Hudiyanen mekeatag te kepbenlùlù. Ne uman seveka ne kelalew ne egketeahuan te epat etawa enem ne latà ne wayig.

<sup>7</sup> Ne migkehiyan en ni Hisus ke minge sugshuen te, “Pengipenua niyu ini se kelalew te wayig,” ke sikandin. Ne mibpengipenù dan en iya rema ke minge kelalew.

<sup>8</sup> Neipus dan te ebpenekeru ne migkahi en si Hisus te, “Sekilut kew be kenian te wayig ne ewita niyu en diyà te egkamal te egkeenen.”

Ne mid-ewit dan en diyà te kandin,

<sup>9</sup> ne migeraman din ke wayig ne nevaluy en ne binu. Warà din metueni ke endei ebpuun ini se binu (ugaid ne ke minge sugshuen ne midsekilut ketà se netau). Dutun ne midtawag din en ke meama ne ebpegesawa

<sup>10</sup> ne migkahi te, “Iyan tew nelayaman ne betasan te embiya ruen kevuwaran tew ne iyan tew id-una te ebpeinum ke meupiya ne binu, ne embiya ve su ebpegevuulung dan en ne arà pà ne ibpeinum ke binu ne mekurangkurang se nanam din. Ugaid ne sikuna,” ke se meama “ne ke meupiya ne binu ne impememewri nu te ebpehendad su ini pà ne impelepew nu.”

<sup>11</sup> Ini se mid-ulaula ni Hisus diyà te inged ne Kana, lusud te inged ne Geliliya, se neuna ne mekegeyip ne mibeelan din. Impekita rin ke gehem din, ne ketà be ne nekeperetiyaya iya ke edumdumaan din kandin.



<sup>12</sup> Neipus arà se kewingan ne mibpendiyà si Hisus, ke iney rin, ke menge ari rin, wey ke edumdumaan din te inged ne Kapirnowum. Nekeuma ran ketà ne mid-ubpà dan te nekebpipira ne hewii.

*Mibpendiyà si Hisus te Nekebpuru ne Valey te Eleteala*  
(Mateo 21:12-13; Marcos 11:15-17; Lucas 19:45-46)

<sup>13</sup> Ne rutun ne mehaan en ne egkeuma ke hewii te kegkevurun te menge Hudiyanen diyà te Hirusalim te kedtumana ran dut te Pista te Kedsehari te Suluhuen te Eleteala, ne arà be ne mibpendiyà si Hisus diyà te Hirusalim.

<sup>14</sup> Guna su nekeuma ran ne midlusud en si Hisus diyà te Nekebpuru ne Valey te Eleteala, ne nekita rin ke ebpemendehang te menge sapi, menge bilibili, wey menge melepati, su ini se menge binatang ne impemendehang dan ne iyan din egkeetehan ne ibpelengesa. Ne ruen dema ketà menge etew ne ebpesemsembiey te pirak te idsenge vevansa ne inged kayi te pirak te menge Hudiyanen.

<sup>15</sup> Nekita rà ni Hisus sikandan ne midsuvid en sikandin te idlambit din kandan, ne midsegseg din en langun te kepeluwal kandan, abpeg ke menge bilibili wey sapi. Misan ke lemisaan dut te menge etew ne eppenambi te pirak ne mibpemunggad din, abpeg dut te pirak dan ne insivurak ni Hisus.

<sup>16</sup> Ne migkehiyan din en ke menge etew ne ebpemendehang te melipati te, "Ipengawà niyu ayan! Kenà niyu beeli ne pedian ini se Baley te Amey ku ne Eleteala!"

<sup>17</sup> Ne netenuran dut te edumdumaan din ke impesurat ni David ke mibpelambas te Lalag te Eleteala rengan se egkahi te, "Na Eleteala ku, iring te apuy ne edrugrugkayew kayi te diralem ku ini se kegkenuhun ku te ini se valey nu ne egkeedatan."

<sup>18</sup> Ne rutun ne mid-insaan si Hisus te egkeunutan te menge Hudiyanen te, "Engkey ve se mekegeyip ne ibpekita nu ne tuus te mibehayan ka te gehem te Eleteala te iring ketà ne mid-ulaula nu?"

<sup>19</sup> Ne midtavak si Hisus te, "Rundusa niyu ini se Baley te Eleteala ne lusud te tetelu ne hewii ne ibpeitindog ku en manen ini se valey."

<sup>20</sup> "Epat ne pulù wey enem ne rahun se kineveeli kayi te valey! ke sikandan. Maa, ibpeitindog nu maa te lusud te tetelu rà ne hewii?"

<sup>21</sup> Ugaid ne warà dan mesebuti se ini se valey ne migkahi ni Hisus ne ke lawa rin.

<sup>22</sup> Guna su neuma en ke hewii te nevanew en si Hisus, ne arà pà ne netenuran dut te edumdumaan din ini se nekahi rin. Ne mibperetiyaya ran ke impesurat ne Lalag te Eleteala mekeatag te kegkevanew ni Hisus abpeg dut te nekahi rin mekeatag te sikandin.

*Netuenan ni Hisus ke Netahù te Itungan te Menge Etew*

<sup>23</sup> Gewii pà ni Hisus diyà te Hirusalim te kedtuman dan te Pista te Kedsehari te Suluhuen, ne merakel se mibperetiyaya kandin su nekita ran ke geyip ne mid-ulaula rin.

<sup>24</sup> Ugaid ne warà midsarig si Hisus dut te nelalag dan ne kebperetiyaya ran kandin su netuenan din ke engkey se netahù te itungan te langun ne menge etew.

<sup>25</sup> Su misan warà midtarem kandin te engkey se metahù te itungan te menge etew, ne netuenan din en ke engkey ke netahù te itungan dan.

### 3

*Mibpendiyà si Nikudimu te ki Hisus*

<sup>1</sup> Duen senge etew ne egkeunutan te menge Hudiyanen ne mid-ingaranan ki Nikudimu. Senge etew ini ne sakup te neumpungan ne ed-ingaranan te Peresiyu.

<sup>2</sup> Senge kerukileman ne mibpendiyà sikandin te ki Hisus ne migkahi te, "Meyterù, netuenan dey se midsuhù ka te Eleteala te ebpenurù kenami, su warà etew ne ebpekevaal te mekegeyip embiya kenà duen gehem te Eleteala riyà te kandin."

<sup>3</sup> Migkahi si Hisus te, "Sebenarvenar ini se igkahi ku keykew te warà senge etew rà ne ebpekelusud diyà te Edetuan te Eleteala embiya kenà sikandin edsaup pà ebpeanak."

<sup>4</sup> Migkahi si Nikudimu te, "Menu ve ke lukes en ne etew te ebpesaup ebpeanak? Engkey, edlived pà maa sikandin dut te hetek te iney rin su apey igkesaup igkeanak sikandin?"

<sup>5</sup> "Sebenarvenar ini se igkahi ku keykew," ke si Hisus, "te warà senge etew rà ne ebpekelusud diyà te Edetuan te Eleteala embiya kenà sikandin edsaup pà ebpeanak te ibpepevayà te wayig wey ke gehem dut te Kedesenan ne Ebpetuntul te Menusiyà.

<sup>6</sup> Su ke id-anak te menusiyà ne menusiyà dà iya, ugaid ne embiya igkesaup en sikandin te igkeanak ibpepevayà dut te gehem te Kedesenan ne Ebpetuntul te Menusiyà ne egkevaluy en sikandin ne anak te Eleteala.

<sup>7</sup> Kenà nu ve igkeselekawi," ke si Hisus, "te kinelalag ku te, 'Mebpesaup kew pà langun mebpeanak.'

<sup>8</sup> Embiya idsempità ta ne edsamber ke keramag ne misan endei egkesuat ne ebpevayà. Embiya edsamber ne egkerineg nu, ugaid ne warà nu metueni ke endei ebpuun etawa endei ebpesinaru. Iring ded dema ketà ke langun ne mibpeanak te Kedesenan ne Ebpetuntul te Menusiyà, su egketuanan dan iya misan kenà dan egkesebutan."

<sup>9</sup> "Egkememenu ve ini?" ke si Nikudimu.

<sup>10</sup> Midtavak si Hisus te, "Mevantug ka ura ne ebpemandù dut te minge kevuwaran ni Israyil, ne meambe ke kenà nu egkesebutan ini se migkahi ku?

<sup>11</sup> Benar iya ini se egkehiyen ku su netuanan dey te benar ini se impesabut dey keniyu, ne netitihusan dey ke nekita rey en, ugaid ne warà niyu peretiyyaa ke migkahi rey.

<sup>12</sup> Embiya kenà ka ebperetiyya te ini se ibpenurù ku kenikew mekeatag te ulaula kayi te ampew te dunya," ke si Hisus, "ne iyan nu pè be peretiyyaa ke iyan ku en ibpenurù mekeatag te ulaula riyà te langit.

<sup>13</sup> Su warà pà duma ne nekependiyà te langit liyu rà dut te sikandin arà ne riyà ebpuun te langit ne mibpepengkayi ne Impeanak te Menusiyà.

<sup>14</sup> "Rengan te kemulu pà ensi Moises diyà te tanà ne kenà egkeubpaan te etew," ke si Hisus, "ne ruen mibeelan din ne uled ne galang ne intampak din diyà te kayu ne intunggul rin. Na," ke si Hisus, "diyà te keuhetan din ne hewii ne ibpeketunggul dema ini se Impeanak te Menusiyà.

<sup>15</sup> Iyan din keppekevitiin diyà te kayu su apey langun ne ebperetiyya kandin ne ebpeketelimà te umur ne warà edtemanan din.

<sup>16</sup> "Su kayi ebpuun te rekela ne limù te Eleteala rut te langun ne minge etew kayi te ampew te dunya ne warà din ingkenuhuni ke budtung ne anak din, ugaid ne midsuhù din te ebpatay riyà te pinebelavag ne kayu su apey langun te ebperetiyya kandin ne kenà edusaan te Eleteala ugaid ne ebpeketelimà dan te umur ne warà edtemanan din.

<sup>17</sup> Su iyan kinesuhù te Eleteala rut te Anak din kayi te ampew te dunya su apey kenà edusaan ke minge etew, ugaid ne apey ran igkepeyliyu.

<sup>18</sup> "Ne misan engkey ne mibperetiyya rut te Anak te Eleteala ne kenà en egkesuhat te kedusa te Eleteala, ugaid ne langun ne warà mebperetiyya kandin ne insivey en te Eleteala ne edusaan su warà dan medtelimà ki Hisus ke budtung ne Anak te Eleteala.

<sup>19</sup> Iyan kedusa te Eleteala te minge etew su nekeuma en kayi te ampew te dunya si Hisus ke ed-ingaranan te Kerayag su ebpekerayag dut te itungan te langun ne menusiyà, ugaid ne iyan dan midtumù ke kerusireman tumin dè be dut te rayag su meraat ke ulaula ran.

<sup>20</sup> Ne misan engkey en ne etew ne ed-ulaula te meraat ne kenà egkesuat te merayag wey kenà dan ed-uvey te merayag su apey kenà egkepayahan ke ulaula ran ne meraat.

<sup>21</sup> Ugaid ke etew ne metidtu se ulaula rin ne ed-uvey dut te merayag su apey egkepayahi ke ulaula rin, su apey egkekita ke ulaula rin ne riyà ebpuun te gehem te Eleteala."

*Si Hisus wey si Juan ne Ebpebunuyag*

<sup>22</sup> Netaman ketà ne mibpendiyà si Hisus wey ke edumdumaan din te inged ne Hudiya. Ne mid-ubpà dan ketà te nekebpipira ne hewii su ebpebunuyag si Hisus te minge etew.

<sup>23</sup> Ne si Juan dema ne ebpebunuyag te minge etew riyà te inged ne Inun uvey te inged ne Salim su merakel ne wayig diyà. Ne ruen minge etew ne ebpepekeuma su ebpebunuyag dan kandin.

<sup>24</sup> (Su arà ne hewii ne warà pà bilenggua si Juan.)

<sup>25</sup> Ne ruen minge edumdumaan ni Juan ne ebpekidlewanà te senge etew ne Hudiyanen. Iyan dan ibpelewaney ne atag te edturan ne betasan te minge Hudiyanen te kedlulù.

<sup>26</sup> Ketà ne mibpendiyan en ke edumdumaan ni Juan te kandin se egkahi te, "Meyerù, netenuran nu ves ke ruma nu riyà te ripag te wayig ne Hurdan ne arà se nekahi nu! Riyà guntaani sikandin se ebpebunuyag ne iyan pà merakel ne minge etew ne ebpendiyà te kandin su ebpebunuyag."

<sup>27</sup> Migkahi si Juan te, "Warà etew ne ebpekekuwa te ketengdanen embiya kenà ebpebunuyag te Eleteala.

<sup>28</sup> Ne sikiyu en iya ke minge titihus te migkahi ku te, 'Kenà siaken si Hisu Kristu ke Impasad te Eleteala ne Edatù kayi te minge etew, ugaid ne pineuna e rà kandin su apey ku egkepenehana ke ebpevayà din.'

<sup>29</sup> Embiya idsempità ta," ke si Juan, "ke ruen egkewingan ne ke meama ne ed-esawa ne ini se ebpekehaked dut te meritan, kenà ke egkuyug dut te egkewingan; ugaid ne

ketà dema sikandin te uvey. Ne embiya egkerineg din en ke meama ne neked-esawa en ne ebpekidlalag en dut te esawa rin, ne dekdekela se kegkehalew rin. Ini ve imbe ke sempità ku," ke si Juan, "mekeatag ki Hisus wey siaken. Nehalew ad nevenar su nekekuyug a kandin te ebpenehana dut te netandang ku en ke ibayà din te ebpekeuma."<sup>30</sup> Ketà be ne ebpekeiseg pà se bentuhan ni Hisus, ugaid ne siaken ne ebpekeembavà."

#### *Sikandin ne Riyà Ebpuun te Langit*

<sup>31</sup> Riyà ebpuun te langit si Hisus ne sikandin ke mepurù pà dut te langun. Ugaid ke etew ne kayi rà ebpuun te dunya ne menusiyà dà sikandin, ne iyan din dà edlelahen ke ulaula kayi te dunya. Ugaid sikandin arà se riyà ebpuun te langit se mepurù pà dut te langun.

<sup>32</sup> Iyan din edlelahen ne ke nekita rin wey ke nerineg din diyà, ugaid ne warà utew etew ne ebpemineg kandin.

<sup>33</sup> Ugaid ne ke etew ne mibperetiyyaya te penurù din, ne ibepepekita rin te iyan dà edlelahen te Eleteala ne benar.

<sup>34</sup> Si Hisus ke midsuhù te Eleteala ne iyan ibepepenudtul ne ke Lalag te Eleteala dut te ebpelumunan sikandin te Kedesenan ne Ebpetuntul te Menusiyà ne imbehey kandin te Amey rin ne Eleteala.

<sup>35</sup> Su igkelimù nevenar te Eleteala ini se anak din ne midsuhù din, ne imbehey rin kandin ke gehem te ebayàbayà te langun taman.

<sup>36</sup> Ne langun ne ebperetiyyaya dut te Anak te Eleteala ne egkevehayan te umur ne warà edtemanan din; ugaid ne langun ne kenà ebperetiyyaya dut te Anak te Eleteala ne kenà egkevehayan te umur ne warà edtemanan din, nasi pà te iyan igkevehey kandan ke kedusai te Eleteala te warà edtemanan din.

## 4

#### *Ke Meritan ne Riyà Ebpuun te Inged ne Semeriya*

<sup>1</sup> Nerineg dut te minge Peresiyyu ke tudtul te iyan pà merakel ne minge etew se ebpendiyà te ki Hisus su ebpebunyag wey ebpesakup kandin dut te minge etew ne ebpendiyà te ki Juan.

<sup>2</sup> (Ugaid ne iyan benar ne kenà si Hisus ke ebunyag te minge etew su ke edumdumaan din dà.)

<sup>3</sup> Guna su nerineg ni Hisus te nepenudtulan, ne mid-awà en diyà te inged ne Hudiya ne mid-uli en sikandin diyà te inged ne Geliliya.

<sup>4</sup> Ugaid ne ini se ralan ne ibpevayà din te ed-uli ne kayi ebayà te inged ne Semeriya.

<sup>5</sup> Ne guna su ebpevayà en sikandin te inged ne Semeriya ne nekeuma en sikandin te senge inged ne lusud ded te Semeriya ne ed-ingaranan te Sikar; inged ini ne uvey te tanà ne imbehey ni Hakub dengan dut te anak din ne si Jose.

<sup>6</sup> Ne kayi te tanà ini ne ruen ne ingkalut ni Hakub dengan. Nekeuma si Hisus ketà ne mibpinuu dut te uvey te kalut su neluhat sikandin te kineipanew rin, su ketà ne neudtu en ke andew.

<sup>7</sup> Guna su ebpinpinuu en sikandin ne ruen meritan ne nekeuma su edsekeru ne riyà ebpuun te inged ne Semeriya. Ne migkahi en si Hisus kandin te, "Bayi, peinum a nu."

<sup>8</sup> (Iyan din kinevuyù te wayig diyà te kandin su mibpendiyà ke edumdumaan din te senge inged su ebpemasa te egkekaan dan.)

<sup>9</sup> "Ey," ke se meritan, "siaken ne etew a te Semeriya, ne meambe ke egnganey ka kedi te ked-inum nu su Hudiyanen ke ma?" (Iyan din kebpekelaag te iring kayi su kenà ebpemegayun ke minge Hudiyanen dut te minge etew te Semeriya.)

<sup>10</sup> Midtavak si Hisus te, "Bayi, embiya perem egketuenan nu rà ke engkey ke ibehey te Eleteala, ne embiya perem egkekilala nu rà ke engkey a ini se ebuyù keykew te egkeinum, ne sikuna pà nasi se ebuyù te egkeinum nu kayi te kedi," ke si Hisus. "Ne igkevehey ku keykew ke wayig ne ebpekevehey te kegkeuyag."

<sup>11</sup> "Mama," ke se meritan, "memenuwen nu ve se kebpekekuwa nu kenian te wayig ne ebehey te kegkeuyag? Su warà ma idsekilut nu ne meralam pà maa ini se wayig!"

<sup>12</sup> Su maa," ke se meritan, "muna ke pà ki Hakub ke keep-epuan dey? Su sikandin ke midtabun kenami kayi te kalut ini ne kayi mid-inum sikandin wey ke minge anak din, abpeg dut te minge ayam din ne pineinum kayi dema."

<sup>13</sup> Migkahi si Hisus manen te, "Ke minge etew ne ed-inum kayi te wayig te ini ne kalut ne edsaup pà lavew ebpekeinum."

<sup>14</sup> Ugaid ke etew ne ed-inum te wayig ne ibehey ku kandin, ne kenà en edsaup ebpekeinum. Su ini se wayig ne ibehey ku kandin ne iring te sebseb ne edtevir diyà te

lusud te hinawa rin su puunan te kegkeuyag din, ne ebehey te umur ne warà edtamanan din."

<sup>15</sup> "Mama," ke se meritan, "peinuma e ves nikuna kenian te wayig su apay kenà ad edsaup ebpekeinum, ne kenà ad ebpekepengkayi se edsekeru."

<sup>16</sup> "Na, uli ke pà," ke si Hisus, "ne engaya nu ve ke esawa nu su lived kew kayi."

<sup>17</sup> "Warà ma esawa ku," ke se meritan.

"Benar an se lalag nu ne warà esawa nu," ke si Hisus.

<sup>18</sup> "Su kekelima ke en mekesawa, ugaid ne ayan se ebpeniwaley guntaani keykew ne kenà nu esawa. Ini se ingkahi nu en kedì ne benar."

<sup>19</sup> "Mama," ke se meritan, "netuenan ku te ayan se lalag nu ne lalag te etew ne ebpelambas te Lalag te Eleteala.

<sup>20</sup> Ne ruen id-insà ku," ke se meritan. "Mekeatag te keep-epuan dey te Semeriya ne kayi ran imbe ebpengarap te Eleteala te ini ne buvungan. Ugaid ne sikiyu ne menge Hudiyanen ne iyan niyu nekahi se riyà dà te inged ne Hirusalim se ed-uppaan te ebpengarap te Eleteala."

<sup>21</sup> "Tenuri nu ini, Bayi," ke si Hisus, "su ruen hewii ne egkeuma ne kenà en kayi rà ne buvungan etawa riyà dà te Hirusalim ebpengarapa te menge etew ke Amey tew ne Eleteala.

<sup>22</sup> Su sikiyu ne menge etew te Semeriya ne matag kew en edsimba ne warà niyu metueni ke engkey se edsimbaan niyu. Ugaid ne sikami se menge Hudiyanen, ne netuenan dey mulà ke edsimbaan dey su kayi ebpuun te kenami ne menge Hudiyanen ne ruen ebpekehemew ne ebpeleyi te menusiya.

<sup>23</sup> Na," ke si Hisus te, "neuma en ke hewii te embiya benar ne edsimba ke menge etew te Eleteala ne Amey tew ne med-arap dan ibepepevayà te Kedesenan ne Ebpetuntul te Menusiya dut te Eleteala wey kayi ebpuun te tidtu te hinawa ran, wey kayi te keduma ran te benar ne penurù ne impayag dut te Eleteala. Ini ve se egkiyuhan te Eleteala ne ulaula rut te menge etew ne edsimba kandin.

<sup>24</sup> Ke Eleteala ne warà lawa rin, tembù be kenà egkekita sikandin. Ke menge etew ne edsimba te Eleteala ne medsimba te ipphenat te tidtu ne hinawa wey sebenarvenar te keduma ran dut te penurù ne impayag te Eleteala."

<sup>25</sup> Ke se meritan, "Netuenan ku te ruen ebpekeuma ne Impasad te Eleteala ne Ebperetuen din te langun ne ed-ingaranan ki Kristu ke Mesiya. Ketà te kebpekeuma rin, ne ibpesabut din keytew ke langun."

<sup>26</sup> Ke si Hisus te, "Siaken en iya ini se ebpekidlalag keykew arà se migkahi nu ne si Kristu."

<sup>27</sup> Kemulu pà ne ebpekidlalag si Hisus dut te meritan ne nekeuma en ke edumdumaan din, ne nengeinuinu ran se ebpekidlalag si Hisus ketà te meritan. Ugaid ne warà seveka rà kandan ne nekeinsà dut te meritan ke engkey se lakew rin ki Hisus, ne warà dan mekeinsà ki Hisus ke engkey arà se ebpengesaken dan.

<sup>28</sup> Arà dà ne intelau en dut te meritan ke idsekeru rin ne mid-uli en. Nekeuma rà sikandin ne impemenudtul din en dut te menge etew.

<sup>29</sup> "Pengkayi kew su intengi niyu eyè se etew su intarem din kedì ke langun ne mid-ulaula ku. Engkey, eyè en buwa ke Impasad te Eleteala ne Edatù te langun ne ebpenerengen tew?" kahi rut te meritan.

<sup>30</sup> Nering den dà ne migenat dan en se ebpendiyà te ki Hisus.

<sup>31</sup> Ketà te warà pà mekeuma ke menge etew ne migkahi en ke edumdumaan ni Hisus te, "Mama, iyan tumù ne kaan ke pà."

<sup>32</sup> "Kaan kew en," ke si Hisus, "su ruen egkeenen ku ne warà niyu metueni."

<sup>33</sup> Ne rutun ne mibpein-insey ran te egkahi te, "Maa, ruen bes buwa mibehey kandin te nekaan din?"

<sup>34</sup> "Iring te egkeenen ku," ke si Hisus, "ini se kedtumana ku te kiyug te Eleteala ne midshùh kedì te ed-imasad dut te helevek ne imbehey rin kedì.

<sup>35</sup> Kenà bes duen besaanan niyu ne egkahi te, 'Epat pà ne vulan ne arà pà ne egkeuma ke ked-ehani.' Ugaid," ke si Hisus, "ne idtarem ku keniyu te sendenga niyu ma ayan se menge etew ne ebpeleinguma en, su embiya idsempità ta ne iring dan te melutù ne parey ne ed-eheniyen su kenà meuhet ne ebperetiyya ran kedì.

<sup>36</sup> Su ke etew ne ed-ehani ne ebeyaran, ne embiya id-upama ta ne ke etew ne ebpesabut mekeatag kedì ne ruen ded dema egkeehani rin, ugaid ne iyan din egkeehani ke merakel ne ebpeketimà te umur ne warà edtamanan din. Ketà ne ke mibuvur te Lalag te Eleteala, wey ke mid-ehani te bahas dut te kebpmenudtul te Lalag te Eleteala ne elin dan egkehalew.

<sup>37</sup> Benar iya ke besaanan dut te keep-epuan ne egkahi te, 'Ruen ebuvur, ne ke ruma se ed-ehani.'

<sup>38</sup> Sikiyu," ke si Hisus, "ne midsuhù ku te ed-ehani rut te warà niyu geleveka te kebuvar. Su duma ne etew se migeleveke te kebuvar ketà, ugaid ne sikiyu en maa ke ed-ehani rut te gelevek dan."

<sup>39</sup> Gewii te kayi pà te ralan ini se minge etew te Semeriya ne ebpendiyà te ki Hisus, ne merakel dut te sikandan se nekeperetiyyaya kandin su sabap dut te nekahi te meritan kandan te, "Intarem din kedì ke langun ne mid-ulaula ku."

<sup>40</sup> Guna su nekeuma en ini se minge etew te Semeriya ne mibuyù dan ki Hisus te kenà pà bevayà medlaus, ne ketà dema ne mid-ubpà si Hisus te nekederuwa ne hewii.

<sup>41</sup> Ne merakel pà lavew ne minge etew se mibperetiyyaya kandin su nerineg dan ke penurù din.

<sup>42</sup> Migkehiyan dan ke meritan te, "Mibperetiyyaya key en ne kenà ma ketà dà ebpuun dut te nekahi nu kenami, ugaid ne kayi te nerineg dey en dema ke penurù din ne netuenan dey se benar en iya ne sikandin ke netendù te Eleteala ne ebpeleyu te menusiya."

*Neulian ni Hisus ke Anak ne Meama dut te Senge Etew ne Mepurù te Gubirnu*

<sup>43</sup> Guna su nepupus en se deruwa ne hewii, ne midlaus en ensi Hisus diyà te inged ne Geliliya.

<sup>44</sup> Su ruen ketà pehaney ne nekahi ni Hisus te, "Ke etew ne ebpelambas te Lalag te Eleteala ne kenà ed-edatan te minge etew diyà te muney ne inged din."

<sup>45</sup> Guna su nekeuma ran diyà te inged ne Geliliya ne nengehalew ke minge etew ketà su neketelavuk dan te kevruranan diyà te Hirusalim dut te Pista te Kedsehari te Suluhuen, ne nekita ran ke langun ne mid-ulaula ni Hisus diyà.

<sup>46</sup> Netaman ketà ne midlived si Hisus kayi te inged ne Kana lusud te Geliliya, ke inged ne ruen wayig ne pinebaluy rin ne binu. Ketà ne ruen etew ne mepurù se ketengdanan din diyà te gubirnu te inged ne Kapirnowum ne ruen anak din ne meama ne ebpekedaru.

<sup>47</sup> Nerineg dut te mepurù se nekeuma en si Hisus kayi te Geliliya te riyà ebpuun te inged ne Hudiya, ne mibayaan din en ne mibpemuyù kandin te ebperumaan din diyà te Kapirnowum su ebpevwian ke anak din ne egkerandung te kemetayen.

<sup>48</sup> Nerineg dà ni Hisus ne migkehiyan din en te, "Embiya kenà kew ebpekekita te tuus ne ebpekegeyip ne kenà kew ebperetiyyaya."

<sup>49</sup> "Mama," ke se mepurù te ketengdanan din, "duma ke pà kedì te kenà pà ebpatay ke anak ku."

<sup>50</sup> Ke si Hisus te, "Na, uli ke en su neulian en ke anak nu."

Ne mibperetiyyaya ke meama rut te migkahi ni Hisus kandin, ne mid-uli en.

<sup>51</sup> Guna su nepawà te riyān dan pà te ralan ne nesinuhung dan en ke minge sugshuen din ne migkahi ran te, "Neulian en ke anak nu ne ederaru."

<sup>52</sup> Ne mid-insaan din en sikandan te, "Keenu neulii ke anak ku?"

"Gevii te nepulid en ke andew ne mid-engked ke kedetenga rin," ke sikandan.

<sup>53</sup> Nerineg din arà ne netenuran din en te gevii te nepulid ke andew ke kinekahi ni Hisus kandin te, "Neulian en ke anak nu ne ederaru." Arà dà ne mibperetiyyaya en ki Hisus, abpeg dut te langun ne sikandan kayi te lusud te valey rin.

<sup>54</sup> Ini ve ke ikeruwa ne mekegeyip ne mid-ulaula ni Hisus kayi te lusud te inged ne Geliliya gewii te kineuli din te riyà ebpuun te inged ne Hudiya.

## 5

*Ke Etew ne Neuhet en se kedaru Rin ne Neulian ni Hisus*

<sup>1</sup> Ne warà dà utew meuhet maa ketà ne mibpendiyà si Hisus te Hirusalim su ruen pista te minge Hudiyānen.

<sup>2</sup> Diyà te Hirusalim ne ruen bengawan ne ebpevayaan te minge etew ne ebpeheewit te minge bilibili ne ibpelengesa, ne uvey ketà te bengawan ne ruen linew ne ed-ingaranan te kinehiyan ne Hudiyānen te Bitsaida. Ruen lelima ne ed-elungan ne nekelingut kayi te kilid en te wayig.

<sup>3</sup> Merakel ne minge etew ne ederaru ne ebpengirehà ketà te ed-elungan, ruen pisek, ruen pungkù, ne ruen en midtibas te ayew. (Su edtahad dan te kedsevu ketà te wayig.)

<sup>4</sup> Su ruen andew ne ebpehunnerenà ke suluhuen te Eleteala te kebpepevu rin ketà te wayig. Ne arà be ne ke egkeuna ne etew ne ederaru ne ebpekethier te edsevu pà ke wayig ne egkeulian ke misan engkey en ne sakit din.)

<sup>5</sup> Ne ruen ketà meama ne neketedetelu en nepulù wey walu ne rahun se kederaru rin.

<sup>6</sup> Nekita ni Hisus sikandin se ed-id-irehà ketà ne netuenan din se neuhet en nevenar ini se daru rin. Ne mid-insaan ni Hisus te, “Maa, egkiyug ka ne egkeulian?”

<sup>7</sup> “Mama,” ke se meama ne ederaru, “warà ruma ku ne ebpekesepuwat kedi te ebpetiher kenian te wayig ke embiya edsevu. Su embiya seveka ku rà se ebpengkenian te wayig, ne ruen ebpekeuna kedi.”

<sup>8</sup> Ne migkahi si Hisus te, “Enew ka, luluna nu ke ikam nu, ne ipanew ke en.”

<sup>9</sup> Arà dà iya ne neulian en ini se etew, ne midlulun din en se ikam din ne mid-ipanew en.

Ini ne hewii ne Sepetu, ke Hewii te Ked-imeley ran.

<sup>10</sup> Guna su nekita rut te minge egkeunutan te Hudiyanen ke mibawian ni Hisus ne migkahi ran te, “Meambe ke ebava ka te ikam nu gunteani? Maa kenà ka edtanud te ini ke Hewii ne Id-imeley ne ebpekerimpas ka dut te penduan tew ke ed-ewit ka te ikam nu?”

<sup>11</sup> Midtavak ini se meama te, “Su ke etew ne nekeuli kedi ne iyan migkahi te, ‘Luluna nu ke ikam nu ne ipanew ke en.’ ”

<sup>12</sup> “Engkey arà ne etew,” ke se minge Hudiyanen, “se migkahi keykew te ibpelulun ke ikam nu ne ibpeipanew ka?”

<sup>13</sup> Ugaid ne warà metueni rut te meama ke enta se mibawì kandin su ruen merakel ne etew ketà te uvey te wayig ne mid-awà en si Hisus.

<sup>14</sup> Warà dà meuhet ketà ne nekita en ni Hisus ini se meama riyà te lusud te Nekebpuru ne Valey te Eleteala. “Intengi nu ve,” ke si Hisus, “neulian ke en te daru nu! Na, kenà ke en be baal te salà su apey ka kenà egkerasey te tuwas pà dut te daru nu ne ebpekesuhat keykew.”

<sup>15</sup> Arà pà ne midlihawang ke meama su ebpendiyà te minge egkeunutan te minge Hudiyanen su idtareng din kandan te si Hisus bes iya ke nekevawì kandin.

<sup>16</sup> Ne ketà puunan ne neepes ke minge egkeunutan te Hudiyanen ki Hisus su mibawì sikandin ketà te Hewii ne Id-imeley.

<sup>17</sup> Tembù be migkahi si Hisus kandan te, “Taman guntaani ne warà med-imeley ke Amey ku ne Eleteala te egelevek, ne iyan e pè be rema kenà megelevek.”

<sup>18</sup> Nerineg den dà ke migkahi ni Hisus, ne neisab dan se ebpemengà te ralan te ked-imetayi ki Hisus su nekerimpas sikandin dut te penduan ne egkahi te kenà egkapakey ne egelevek dut te Andrew ne Id-imeley, ne ikeruwa rin ne mibpekidreng sikandin te Eleteala su migkahi rin se Eleteala ke Amey rin.

*Ke Umur ne Warà Edtemanan Din ne Riyà Ebpuun te Anak te Eleteala*

<sup>19</sup> Ketà ne migkahi si Hisus kandan te, “Sebenarvenar ini se egkehiyen ku te siak ke Anak te Eleteala ne warà egkeveelan ku te kediey rà ne kiyug. Iyan dà ebeelan ku ne arà se nekita ku riyà te ulaula te Amey ku, su ini se ebeelan din ne iyan dema se edumaan ku.

<sup>20</sup> Su ke Amey ku ne Eleteala ne rekelà se limù din kedi ne Anak din, ne ibpekita rin kedi ke langun ne ed-ul-ulaan din. Ne ruen muna pà ne ibpekita rin kedi ne ed-ul-ulaan ku ne igkegeyip niyu.

<sup>21</sup> Su ke Amey ku ne Eleteala se ebanew te minge etew ne minatey ne ed-uyahen din maan, ne iring ded dema ketà te siaken ne Anak din su ed-uyag a te piya engkey ne egkiyuhan ku,” ke si Hisus.

<sup>22</sup> Kenà ke Amey ku ne Eleteala se egkukum te minge etew, ugaid ne imbehey rin kedi ke Anak din ke gehem te kegkukum te langun ne minge etew.

<sup>23</sup> Iyan din kinesarig kedi su apey siaken ne Anak din ne egkereyrey rut te langun ne minge etew, iring te kedeyreya ran te Amey ku. Su misan engkey en ne etew ne kenà edeyrey kedi ne kenà dema edeyrey dut te Amey ku ne Eleteala ke midsuhù kedi.

<sup>24</sup> “Sebenarvenar ini se egkehiyen ku ne misan engkey ne etew ne ebpemineg te lalag ku wey ebperetiyya rut te midsuhù kedi, ne ebpekettelimà dut te umur ne warà edtemanan din. Ne kenà en edusaan su nekepeiyu en sikandin te kepepatey ne warà edtemanan din, ne ebpekeubpà en diyà te Eleteala taman te taman.

<sup>25</sup> Sebenarvenar ini se egkehiyen ku, misan ke minge etew ne iring te minatey en su sabap dut te salà dan ne neuma en ke hewii ne egkeringe dan ke lalag ku, ke Anak te Eleteala, ne arà se ebpemineg ne egkevehayan te behu ne umur.

<sup>26</sup> Ke Amey ku se ebpuunan te umur su sikandin se ebpekevehay te umur, ne iring ded be ketà ke kedi ne Anak din su ke gehem din ne imbehey rin kediey ne ebpekevehay e red dema te umur.

<sup>27</sup> Ne kenà ketà dà taman, su imbehey rin lavew kedi ke gehem te kegkukum te minge etew su siaken iya ke Impeanak te Menusiyà.

<sup>28</sup> “Kenà kew ve meselekawi kayi su ruen hewii ne ebpekeuma ne langun ne riyà te minge leveng ne egkerineg dan ke suwara ku,

<sup>29</sup> ne ketà ne egemew ran dut te leveng dan. Ne langun te metidtu ne egkevanew ran su riyà ebpekeubpà te Eleteala su neketelimà dan te umur ne warà edtamanan din, ugaid ne langun be rut te nekevaal te meraat ne ulaula ne egkevanew red su edusaan.”

*Ke Menge Titihus Mekeatag ki Hisus*

<sup>30</sup> Ne migkahi manen si Hisus te, “Embiya kenà ke gehem te Eleteala ne imbehey rin kedì ne warà egkeveelan ku, su iyan ku rà kekkukum ne endei se igkahi rin kedì ne arà se edumaan ku te kekkukum. Tembù be ke kekkukum ku ne metidtu. Su kenà kedì ne kiyug se edtumanen ku, ugaid ne ke kiyug dut te midsuhù kedì se edtumanen ku.

<sup>31</sup> “Upama ini, embiya siaken dà se ebpekehiyen te kedì ne hinawa, ne kenà egkepehimbenar te ruma ne etew.

<sup>32</sup> Ugaid ne ke Amey ku ne ebpenindeg kediey ne netuenan ku te egkererihan se kebpenitihus din kediey.

<sup>33</sup> “Duen midsuhù niyu riyà te ki Juan su ebpeinsaan niyu ke engkey se siak, ne benar ke migkahi rin mekeatag kediey.

<sup>34</sup> Kenà a ebpegungeyà te etew rà se editihus kediey, ugaid ne ebpetenuran ku keniyu ke kedtitihus ni Juan su apey kew ebpekeperetiyaya wey egkepeliyu dut te keberedusaan.

<sup>35</sup> Su si Juan ne iring te sulù ne midsilà, ne nehalew kew ne ebpemineg dut te mehaan dà ne penurù din.

<sup>36</sup> “Ugaid ne ruen mevaher pà dut te kedtitihus ni Juan mekeatag kedì. Ini se helevek ne imbehey kedì dut te Amey ku ne Eleteala, ne ini se ebpesabut keniyu te siak ke midsuhù din kayi.

<sup>37</sup> Ne ke Amey ku ne midsuhù kedì ne ebpeketitihus dema mekeatag kediey. Warà niyu meringe ke suwara rin wey warà niyu mekita sikandin.

<sup>38</sup> Ne warà niyu telimaa ke lalag din su warà kew ma mibperetiyaya kediey ke midsuhù din.

<sup>39</sup> Mibpangedian niyu ke lalag te Eleteala ne impesurat dengan su iyan niyu kunaan ke ketà kew ebpekehaked te umur ne warà edtemaninan din. Ne langun ne impesurat ketà ne edlalag mekeatag kedì.

<sup>40</sup> Ugaid ne kenà kew egkiyug ne ebpengkayi te kedì su apey kew perem ebpekehaked te umur ne warà edtamanan din.

<sup>41</sup> “Kenà iyan ku ebpemengaan se kekkereyù kedì te minge etew.

<sup>42</sup> Ugaid ne netuenan ku te warà te hinawa niyu se kedlimù te Eleteala.

<sup>43</sup> Iyan ku impengkayi ne ibpepevayà te gehem dut te Amey ku ne Eleteala, ne warà kew medtelimà kedì. Ugaid ne embiya ruen ebpekeuma ne ebpemandù keniyu te kandin dà ne gehem, ne edtelimaan niyu mulà sikandin.

<sup>44</sup> Memenu ma se kebperetiyaya niyu embiya iyan niyu rà ebpemengaan se kekkereyù keniyu te minge ruma niyu, ugaid ne warà niyu pemengaa ke ralan te kekkereyù ne riyà ebpuun te budtung ne Eleteala?

<sup>45</sup> “Iyan niyu kunaan ke siaken se ed-isuhat keniyu te kevenar diyà te etuvangan te Amey ku ne Eleteala, ugaid ne kenà en iya. Su ruen seveka ne ed-isuhat te kevenar keniyu ketà te hewii te kekkukum ne si Moises su dekelà ke sarig niyu te penduan ne intahak din.

<sup>46</sup> Embiya benar ne mibperetiyaya kew rut te impesurat ki Moises dengan, ne ebperetiyaya kew kedì dema su ke impesurat kandin ne mekeatag kedì.

<sup>47</sup> Ne ketà be embiya warà kew mibperetiyaya te lalag ne impesurat din,” ke si Hisus, “ne memenu ve se kebperetiyaya niyu kayi se egkehiyen ku?”

## 6

*Pinekaan ni Hisus ke Lelima Ne Ngivu ne Etew*

(Mateo 14:13-21; Marcos 6:30-44; Lucas 9:10-17)

<sup>1</sup> Guna su neipus ini, ne midlived en si Hisus diyà te ripag te Ranew te Geliliya (ne ed-ingaranan dema te Ranew te Tibiriya).

<sup>2</sup> Ne ruen denda ne minge etew ne mid-eguyut kandin su nekita ran ke mekegeyip ne mid-ulaula rin te kebpemawì din dut te minge etew ne ebpenderaru.

<sup>3</sup> Ne midtekereg en si Hisus wey ke minge edumdumaan din diyà te buvungan ne mibpinuu ran en.

<sup>4</sup> Su ketà ne hewii ne edanirani en ke hewii ne edtenuran te minge Hudiyanen ne ed-ingaranan te Pista te Kedsehari te Suluhuen.

<sup>5</sup> Midsandeng si Hisus ne nekita rin ke denda ne menge etew ne ebpeleungguma, ne migkehiyan din si Felipe te, “Endei kiyu ebpekekuwa te egkekaan ne ibpekaan tew keninyan te renda ne menge etew?”

<sup>6</sup> (Migkahi rin ini su ebpenggeraman din si Felipe, ugaid ne netuenan din ma ke engkey se ed-ul-ulaan din.)

<sup>7</sup> Midtavak en si Felipe te, “Misan pipira pà ne hatu ne pirak se ibpemasa ta te egkeenen te iring keninyan se kerakel dan ne kenà pà ebpeketukid kandan misan idsenge sungit dà.”

<sup>8</sup> Ne senge etew ne edumdumaan ni Hisus ne ed-ingaranan ki Andres, ke ari ni Simon Pedro, ne migkahi te,

<sup>9</sup> “Duen ini batà ne meama ne midlulutù te lelima ne timan ne pan wey deruwa ne timan te serà. Ugaid ne ebmemenuwen dè be ayan se engkayi ne kerakel te menge etew?”

<sup>10</sup> Migkahi si Hisus te, “Ibpemepinuu niyu en ayan se menge etew.” (Ne ruen gumegebà ketà ne meluag.) Ne rutun dan en mebpinuu, ne menge lelima ne ngivu se meama liyu ke meritan batà.

<sup>11</sup> Arà dà ne migkuwa ni Hisus ke lutù te batà, ne mibpeselamatan din te Eleteala, ne mibpenevitevi din ne imbehey rin dut te edumdumaan din te idtukid diyà te menge etew ne mibpinuu. Iring din ded dema ke serà, ne migkaan dan langun taman te nevlung dan.

<sup>12</sup> Guna su nevlung dan en ne migkahi en si Hisus dut te edumdumaan din te, “Punpuna niyu ke langun ne samà su apey kenà egkereeti.”

<sup>13</sup> Arà dà ne mibpunpun dan en ke samà dut te pan, ne ruen sepulù wey deruwa ne binevey se netimuan te samà dut te lelima ne timan ne pan.

<sup>14</sup> Guna su nekita rut te menge etew ke mekegeyip ne mid-ulaula ni Hisus ne migkahi ran te, “Ini en ke ebpelambas te Lalag te Eleteala ne ibpepengkayi rin te ampew te dunya.”

<sup>15</sup> Netuenan ni Hisus se mid-uevy ran kandin su ebeelan dan sikandin ne ratù dan misan kenà egkiyug sikandin. Tembù be mid-ewaan dan ni Hisus ne midtekereg diyà te buvungan te sikandin dà.

*Mid-ipanew si Hisus diyà te Divavew te Wayig*

*(Mateo 14:22-26; Marcos 6:45-52)*

<sup>16</sup> Guna su meapun en, riyà en midtupang ke menge edumdumaan din te beyvey te ranew.

<sup>17</sup> Ne mid-untud dan en te avang su ed-apat dan te edlived diyà te inged ne Kapirawum. Guna su mibmerusirem en ne warà pà lavew si Hisus, ne midlaus dan en te ed-apat.

<sup>18</sup> Netekew ne mibmevajer ke keramag, ne midekelà ke baleg te wayig.

<sup>19</sup> Guna su neketantal dan en te menge lelima ne kilù, ne arà pà ne nekita ran si Hisus se ebpeleungguma ne ed-ipanew kayi te divavew te wayig. Ne nengeandek dan nevenar!

<sup>20</sup> “Kenà kew meandek!” ke si Hisus, “su siaken ini.”

<sup>21</sup> Nerineg dan ke suwara rin ne nengehalew ran ne impeuntud dan en si Hisus kayi te avang. Guna su nekeuntud en sikandin te avang, ne segugunà ne nekerunggù dan en dut te inged ne ebayaan dan.

<sup>22</sup> Nepawà ketà ne ke menge etew ne pinekaan ne riyà pà lavew te ripag te ranew ne netuenan dan te seveka rà ke avang ne diyà te beyvey te ranew. Netuenan dan dema te si Hisus ne warà pà mekeruma dut te edumdumaan din su ke edumdumaan din dà ke mibpenguntud te avang.

<sup>23</sup> Ne rutun te uevy te mibpekeenan kandan ne mibpeselamat si Hisus te Eleteala ne ruen midunggù ne menge avang ne riyà ebpuun te Tibiriya.

<sup>24</sup> Guna su nekita rut te denda ne menge etew te warà en si Hisus wey misan ke edumdumaan din, ne mibpenguntud dan en te menge avang se ebpendiyà te inged ne Kapirawum su ebpemangan dan si Hisus.

*Ke Egkeenen ne ebpevehey te Umur ne Warà Edtemanen Din*

<sup>25</sup> Guna su nekerunggù dan ne netuen dan en si Hisus. “Meyterù,” ke sikandan “keenu ka mekeuma kayi?”

<sup>26</sup> Midtavak si Hisus te, “Sebenarvenar ini se egkehiyen ku, ebpemengà kew kedì su nekekaan kew te pan ne nengevlung kew, ugaid ne warà kew mekesabut ke engkey se meana kayi te mekegeyip ne ed-ul-ulaan ku.

<sup>27</sup> Kenà niyu iyan pegelepi ke egkeenen kayi te ampew te dunya su edsahad dà. Ugaid,” ke si Hisus, “ne iyan benar ne pegelepi niyu ke egkeenen ne ebpevehey te umur ne



warà edtemanan din. Ini se egkeenen ne siaken ke Impeanak te Menusiyà ke ebehey keniyu, su ruen gehem ku ne imbehey kedì te Amey ku ne Eleteala.”

<sup>28</sup> Migkahi ke menge etew te, “Engkey se ed-ul-ulaan dey su apey key ebpeketuman te kiyug te Eleteala?”

<sup>29</sup> Ne midtavak si Hisus te, “Ini se ul-ulaa niyu su apey kew ebpeketuman te kiyug te Eleteala, peretiyaya kew kedì ke midsuhù te Eleteala.”

<sup>30</sup> Ne migkahi ran en te, “Engkey pà se ruma ne mekegeyip ne ed-ul-ulaan nu ne ibpekita nu kenami su apey key ebpekeperetiyaya?”

<sup>31</sup> Su ke menge keep-epuan tew rengan ne iyan dan migkaan ne ed-ingeranan te mana te riyà dan pà te tanà ne kenà egkeubpaan te menge etew, iring dut te impesurat ne Lalag te Eleteala ne egkahi te, ‘Ke egkeenen ne riyà ebpuun te langit se imbehey kandan ni Moises.’ ”

<sup>32</sup> “Sebenarvenar ini se egkehiyen ku,” ke si Hisus, “ke egkeenen ne imbehey ni Moises te keep-epuan niyu ne kenà ke tidtu ne egkeenen ne riyà ebpuun te langit, su ke Amey ku ne Eleteala se ebehey te tidtu ne egkeenen ne riyà ebpuun te langit.

<sup>33</sup> Su ke egkeenen ne ibehey te Eleteala, ne sikandin arà se mibpengkayi te ampew te dunya su ebehey te menge etew te umur ne warà edtemanan din.”

<sup>34</sup> “Mama,” ke sikandan, “behayi key en keniyan te egkeenen ne nekahi nu ne kenà edsahad dà su warà edtemanan din.”

<sup>35</sup> Ne migkahi si Hisus te, “Siaken arà se egkeenen ne ebehey te umur ne warà edtemanan din. Ke etew ne eduma kedì su ebperetiyaya ne iring te etew ne kenà en egkevital. Uya, ke etew ne edsarig kedì ne iring te etew ne kenà en ebpekeinum.

<sup>36</sup> Na iring te intarem ku en keniyu,” ke si Hisus, “ne misan nekita niyu en ke ed-ul-ulaan ku, ne kenà kew pà lavew iya ebperetiyaya kedì.

<sup>37</sup> Ke langun ne menge etew ne ibehey kedì te Eleteala ne sikandan ke eduma kedì, ne langun ne eduma kedì ne warà senge etew rà kandan ne kenà ku edtelimaan.

<sup>38</sup> Su mid-ewaan ku ke langit ne mibpengkayi a te ampew te dunya su apey ku egketuman ke kiyug dut te midsuhù kedì, kenà kedì ne kiyug.

<sup>39</sup> Su ini ke kiyug te Eleteala ne midsuhù kedì te langun ne etew ne imbehey rin kedì ne eduma kedì, ne warà senge etew rà kandan ne kenà egkevehayan te umur ne warà edtemanan din, ne ebenawen ku pà sikandan langun ketà te ketepusan ne hewii te keggukum,” ke si Hisus.

<sup>40</sup> “Su ini ve ke kiyug te Amey ku ne Eleteala te langun ne nekesabut te siaken ke Anak din ne ebperetiyaya ran kedì ne ebpeketelimà dan te umur ne warà edtemanan din, ne siaken se ebanhew kandan ketà te ketepusan ne hewii te keggukum.”

<sup>41</sup> Arà be ne neepes ke menge egkeunutan te Hudiyanen dut te nelalag ni Hisus te, “Siaken ke egkeenen ne riyà ebpuun te langit.”

<sup>42</sup> Ne mibpemengasak dan te, “Maa, kenà si Hisus ded ini ke anak ni Jose? Su egkekilala tew ke amey rin wey ke iney rin dema. Na meambe ke nekahi rin se riyà sikandin ebpuun te langit?”

<sup>43</sup> Midtavak si Hisus te, “Engked kew en te ebpemivig.

<sup>44</sup> Su warà senge etew rà ne eduma kediey ke kenà ke Amey ku ne Eleteala ke midsuhù kedì se ebpenehana te hinawa rin te ebperetiyaya, ne ebenawen ku sikandin dutun te akir din ne hewii te keggukum.

<sup>45</sup> Duen impesurat te menge etew ne mibpelembas te Lalag te Eleteala rengan ne egkahi te, ‘Langun ne menge etew ne ebpebuten te Eleteala,’ ” ke si Hisus, “ne langun ne ebpeping te ibpesabut kandin dut te Amey ku ne Eleteala ne eduma kedì.

<sup>46</sup> Kenà iyan ku keggahi ne ruen etew ne nekekita te Amey ku ne Eleteala su siaken dà ke riyà ebpuun te Eleteala se nekekita kandin su riyān a mibpuun te kandin.

<sup>47</sup> Sebenarvenar ini se egkehiyen ku ne ke etew ne mibperetiyaya kediey ne egkevehayan te umur ne warà edtemanan din.

<sup>48</sup> Su siaken arà ke egkeenen ne ebpekevehey te umur ne warà edtemanan din,” ke si Hisus.

<sup>49</sup> “Benar ne nekekaan ke keep-epuan niyu te egkeenen ne ed-ingeranan te mana rut te riyà dan te tanà ne kenà egkeubpaan te etew, ugaid ne minatey ran ded lavew.

<sup>50</sup> Ugaid ne ini se tidtu ne egkeenen ne riyà ebpuun te langit, ne piya engkey ne etew ne egkaan ketà ne ebpeketelimà te umur ne warà edtemanan din.

<sup>51</sup> Siaken ke tidtu ne egkeenen ne riyà ebpuun te langit ne ebpekevehey te umur. Ke etew ne egkaan kayi ne warà kemetayen te himukud din. Su ke egkeenen ne ibehey ku ne ini en iya se lawa ku su apey ebpeketelimà ke langun ne etew kayi te ampew te dunya te umur ne warà edtemanan din.”

<sup>52</sup> Guna su nering dut te minge egkeunutan te Hudiyänen ke migkahi ni Hisus ne nekedlewanà dan te, “Ebmémuwen din te ebehey ke lawa rin keytew te ebpekaan?”

<sup>53</sup> Ne midtavak si Hisus te, “Sebenarvenar iya ini se egkehiyen ku keniyu, embiya kenà kew egkaan te lawa ku wey embiya kenà kew ed-inum te lengesa ku ne kenà kew egkevehayan te umur ne warà edtemanan din.

<sup>54</sup> Su ke etew ne egkaan te lawa ku wey ed-inum te lengesa ku ne egkevehayan te umur ne warà edtemanan din, ne ebenawen ku sikandin ketà te hewii ne kebpuusa te dunya.

<sup>55</sup> Su ini se lawa ku ke tidtu ne egkeenen, ne ini se lengesa ku ke tidtu ne ed-inumen ne ebpevehey te umur ne warà edtemanan din.

<sup>56</sup> Ne misan engkey ne etew se egkaan te lawa ku ne ed-inum te lengesa ku ne sikandin ne kayi ebpekeubpà te kedì, ne siaken dema ne diyan a ebpekeubpà te kandin.

<sup>57</sup> Ke Amey ku ne Eleteala ne midsuhù kedì ne ruen umur din ne warà edtemanan din ne ketà ebpuun ne ruen kedì ne umur. Ne iring dema ketà ke etew ne egkaan kediey, egkevehayan sikandin te umur su kayi ebpuun te kediey.

<sup>58</sup> Ini ve ke egkeenen ne riyà ebpuun te langit, ne kenà ini iring dut te egkeenen ne ed-ingaranan te mana ne nekaan dut te keep-epuan niyu su mibpmatey ran. Su ke etew ne egkaan kayi te egkehiyen ku ne egkeenen ne egkeuyag sabap kedì.”

<sup>59</sup> Ini ke migkahi ni Hisus te kebpenurù din diyà te valey ne ebpengedian te minge Hudiyänen te penduan dan diyà te inged ne Kapirawum.

*Merakel ne Midsuwey te Eduma ki Hisus su Melugkà se Hinawa Ran*

<sup>60</sup> Merakel dut te minge etew ne eduma kandin se nekerineg kayi te impenurù din ne migkahi ran te, “Merehen ne egkerumaan ini se impenurù din. Engkey rà buwa iya se ebpemineg kayi?”

<sup>61</sup> Netuean ni Hisus te ebpemekedlewanà dan su atag dut te impenurù din ne migkahi en te, “Maa, ebmelugkà ini te hinawa niyu?”

<sup>62</sup> Upama ke embiya egkekita niyu ke Impeanak te Menusiyà ne ebpekelesed su ed-uli diyà te ebpuun din, ne engkey ve se pegitungan niyu, muna pà buwa se kekgelugkai te hinawa niyu?

<sup>63</sup> Iyan dà ebpevehey te umur ne warà edtemanan din ne ke Kedesenan ne Ebpetuntul te Menusiyà, su warà egkegaga te etew rà dè duen. Ini se migkahi ku keniyu ne riyà ebpuun te Kedesenan ne Ebpetuntul te Menusiyà ne ebpevehey te umur ne warà edtemanan din.

<sup>64</sup> Ugaid ne ruen ruma niyu ne warà mebperetiyya kediey.” (Migkahi ini ni Hisus su netuean din en neraan ke engkey se warà mebperetiyya kandin wey ke ed-ulug kandin diyà te kunterà din.)

<sup>65</sup> Ne midsaup maa sikandin migkahi te, “Tembù be migkahi ku keniyu te warà senge etew rà ne ebpekeruma kediey embiya kenà egkepenehana ke hinawa rin dut te Amey ku ne Eleteala.”

<sup>66</sup> Arà dà iya ne merakel en dut te minge etew ne eduma kandin se mibpekidsuwey en, ne kenà dan en eduma kandin.

<sup>67</sup> Ketà ne nekehiyan ni Hisus ke sepulù wey deruwa ne edumdumaan din te, “Menu sikiyu, ebpekidsuwey kew en rema kediey?”

<sup>68</sup> Migkahi si Simon ke mid-ingaranan ki Pedro te, “Sikuna ke Kerenan dey ne endei key pè be ebpesinaru? Su sikuna rè ma ke ebpenurù te ralan te kebpekettelimà te umur ne warà edtemanan din.

<sup>69</sup> Ne mibperetiyya key en keykew su netuean dey se sikuna ke Berekat ne midsuhù te Eleteala ne ebpekemalen.”

<sup>70</sup> Migkahi en si Hisus dut te edumdumaan din te, “Maa, kenà ke sepulù niyu wey deruwa se mibpemili ku? Ugaid ne seveka keniyu se sakup ni Setanas ke datù te pekaid.”

<sup>71</sup> Iyan din ini egkehiyen ne si Hudas ke anak ni Simon Iskeriyuti. Su misan senge etew si Hudas dut te sepulù wey deruwa, ne sikandin se ed-ulug ki Hisus diyà te minge kunterà din.

## 7

*Mibpendiyà si Hisus te Kevurunan*

<sup>1</sup> Guna su nekeipus si Hisus te kebpenurù din ne midlauglaug en sikandin kayi te minge inged lusud te Geliliya. Kenà sikandin egkiyug ne ebpendiyà te lusud te inged ne Hudiya su ruen ketà minge egkeunutan te Hudiyänen ne egkiyug ne ed-imatey kandin.

<sup>2</sup> Ne mehaan en dema ketà egketuman ke kevurunan te minge Hudiyänen ne ed-ingaranan te Pista te Menge Sabung.

<sup>3</sup> Tembù be migkehiyan si Hisus dut te minge ari rin te, “Iyan tumù ne awà ka kayi ne telavuk ka te kevrunan diyà te inged ne Hudiya su apey mekekita ke minge etew ne eduma keykew te mekegeyip ne ed-ul-ulaan nu.

<sup>4</sup> Su warà etew ne ed-eles te ed-ul-ulaan din embiya egkiyug sikandin ne egkevantug. Geina te ed-ul-ulaan nu ini se mekegeyip ne iyan tumù ne ibpekita nu riyà te langun ne minge etew.”

<sup>5</sup> (Migkahi ini rut te minge ari ni Hisus su misan sikandan ne kenà dan ebperetiyaya kandin.)

<sup>6</sup> Midtavak si Hisus kandan te, “Warà pà mekeuma ke dait ne hewii te kebpayag ku rut te ed-ul-ulaan ku. Ugaid ne sikiyu, nè piya engkey ne hewii ne noked-iring dà diyà te keniyu.

<sup>7</sup> Su kenà ma egkeepes keniyu ke minge etew ne egkunterà te Eleteala, ugaid ne egkeepes dan kedì su layun a edsawey kandan dut te meraat ne ulaula ran.

<sup>8</sup> Una kew en pendiyà te kevrunan,” ke si Hisus “su warà pà mekeuma ke dait ne hewii te kebpayag ku rut te minge ulaula ku.”

<sup>9</sup> Arà dà ke migkahi ni Hisus ne mibpelintetahak en sikandin kayi te Geliliya.

<sup>10</sup> Guna su mid-ipanew en ke minge ari ni Hisus ne edtelavuk dut te kevrunan ne midtungud ded dema sikandin, ugaid ne ed-eles-eles dà sikandin.

<sup>11</sup> Ne ketà te pista, ne mibpemengà si Hisus dut te minge egkeunutan te Hudiyanen. “Endei en be sikandin?” ke sikandan.

<sup>12</sup> Duen merakel ne ebpevutbutehey mekeatag kandin ketà te minge etew ne nevrurun. Ruen egkahi te, “Si Hisus ne meupiya ne etew.” Ne ruen ruma pà ne egkahi te, “Kenà, su ibpesuwey rin ke minge etew.”

<sup>13</sup> Ne geina te egkeandek dan dut te minge egkeunutan te Hudiyanen ne kenà dan utew ibperineg te minge ruma ran ke kedlalag dan.

<sup>14</sup> Guna su edluukanan en ke kevrunan ne mibpendiyan en si Hisus te Nekebpuru ne Valey te Eleteala su ebpenurù dut te minge etew.

<sup>15</sup> Ne ruen ketà minge egkeunutan te Hudiyanen ne midtelavuk ne nengeinuini ran. “Endei ebpuun ini se ketau rin” ke sikandan “su warà ma sikandin mekepengadi?”

<sup>16</sup> Nerineg ni Hisus ke migkahi ran ne migkahi en kandan te, “Ini se ibpenurù ku ne kenà kayi ebpuun te ketau ku su riyà ebpuun te Eleteala ne midsuhù kedì.

<sup>17</sup> Ke etew ne egkiyug ne edtuman te kiyug te Eleteala ne egketuenan din ke penurù ku ke embiya egenat te Eleteala etawa kayi rà dèduen te hinawa ku.

<sup>18</sup> Su ke etew ne ebpenurù te kandin dà dèduen ne hinawa, ne ebpemengà dà te kegkevantug din. Ugaid ne ke etew ne iyan din ebpemengaan se kegkevantug dut te midsuhù kandin, ne egkeserihan ke lalag din su kenà tarù ini se ibpenurù din.

<sup>19</sup> Maa, kenà ke apù niyu rengan ne si Moises,” ke si Hisus “ke mibehey keniyu te minge penduan? Ugaid ne netuenan ku te warà seveka rà keniyu ne midtuman dut te penduan din. Ne meambe ke egkiyug kew ne ed-imatey kediey?”

<sup>20</sup> “Ed-emungan ke ves buwa te vusew!” ke se minge etew. “Su enta ma se egkiyug ne ed-imatey keykew?”

<sup>21</sup> Ne migkahi si Hisus te, “Duen seveka ne mid-ulaula ku ne mekegeyip ne langun niyu ne nengeselekawan su ketà te Hewii ne Id-imeley.

<sup>22</sup> Ruen seveka ne penduan ne intahak ni Moises dengan ne insuhù din keniyu te ed-etus te behu pà ne in-anak embiya meama (asal kenà diyà dà ebpuun te ki Moises ini se betasan niyu ne ed-etus su raan en ini ne betasan te keep-epuan niyu), ne ed-etus kew misan ketà te Hewii ne Id-imeley.

<sup>23</sup> Ne embiya egkepakey ne ed-etusan se meama te Hewii ne Id-imeley su apey egketuman ke penduan ni Moises, ne meambe ke egkeepes kew kedì ketà te neulian ku te kinebawì ku arà se meama ne ederaru dut te Hewii ne Id-imeley?

<sup>24</sup> Kenà kew ed-isuhat te kukuman te kayi rà te egkekita niyu, ugaid ne ed-isuhat kew te kukuman te ibpeunsad dut te benar.”

*Mid-insà ke Minge Etew diyà te Kevrunan ke Embiya si Hisus ke Impasad te Eleteala ne Ebperetuen Din*

<sup>25</sup> Duen minge etew ketà te inged ne Hirusalim ne nekerineg dut te migkahi ni Hisus ne migkahi te, “Engkey, kenà ini iya ke etew ne ebpemengaan dut te minge egkeunutan te Hudiyanen su ed-imetayan dan?

<sup>26</sup> Intengi niyu ma se ebpenurù ded sikandin kayi te merakel ne etew. Kema ke benar ded buwa ne netuenan dut te minge egkeunutan tew te sikandin iya ke nekahi ne Impasad te Eleteala ne Ebperetuen din, su warà peengkera sikandin se ebpenurù.

<sup>27</sup> Ugaid ne ini se kebpekeuma rut te Impasad te Eleteala ne Ebperetuen din, ne warà kun egketau ke endei ebpuun sikandin, ugaid ne ini ne netuenan tew red ke mibpuunan din."

<sup>28</sup> Gewii ni Hisus te ebpenurù diyà te Nekebpuru ne Valey te Eleteala ne nerineg din arà se lalag dan ne migkahi sikandin te impekerahing din te, "Kunaan niyu ke nekilala a niyu wey netuenan niyu ke endei a ebpuun, ugaid ne idtarem ku keniya te warà a mibpengkayi te kediey rà ne kiyug su iyan midsuhù kedì ne ke Eleteala ne benar, ugaid ne warà niyu metueni ke entei sikandin.

<sup>29</sup> Ugaid ne netuenan ku mulà sikandin su riyan a ebpuun te kandin, ne iyan dema sikandin se midsuhù kedì."

<sup>30</sup> Ne edsigkemen dan en perem si Hisus ketà, ugaid ne warà neketikà ne egawed kandin su warà pà ma mekeuma ke intail ne hewii te Eleteala te kegkesigkem kandin.

<sup>31</sup> Merakel se mibperetiya te sikandin en ke nekahi ne Ebperetuen ne Impasad te Eleteala, ke sikandan te, "Ini en iya ke egkepenareng tew ne Edatù su warà en ebpekelawan dut te menge mekegeyip ne ed-ul-ulaan din."

<sup>32</sup> Nerineg te menge Peresiyu ke menge etew ne ebpebutbutehey mekeatag ki Hisus ne tembù be sikandan wey ke menge mepurù te terebpelengesa se midsuhù te menge gurudyà dut te Nekebpuru ne Valey te Eleteala te ibpesigkem si Hisus.

<sup>33</sup> Migkahi si Hisus te, "Kenà utew meuhet ne ed-ewaan ku sikiyu su ed-ulì ad diyà te midsuhù kedì.

<sup>34</sup> Ne ebpemengà kew kedì, ugaid ne kenà a niyu egketuen su kenà kew ma ebpekependiyà te ebpesineruwan ku."

<sup>35</sup> Ketà ne mibpein-inseeey ke menge egkeunutan te Hudiyanan te, "Endei ve buwa ebpesinaru sikandin se kenà tew egketuen? Ebpendiyà buwa sikandin te inged te menge etew ne kenà Hudiyanan ke mid-ulian te menge ruma tew ne Hudiyanan, su ebpenurù sikandin te menge etew ne kenà Hudiyanan.

<sup>36</sup> Su meambe," ke se menge egkeunutan te Hudiyanan, "ke nekahi rin se, 'Ebpemengà kew kedì, ugaid ne kenà a niyu egketuen.' Ne nekahi rin pà se, 'Kenà kew ebpekependiyà te ebpesineruwan ku.' Engkey ve buwa se meana rut te nekahi rin?"

*In-upama ni Hisus te Sikandin ke Puunan te Wayig ne Etdudà ne Ebpekevehey te Umur ne Warà Edtemanan Din*

<sup>37</sup> Ketà te mewri ne hewii te pista, su arà ke pinekerekelà ne hewii te menge Hudiyanan te kedtanud dan, ne mid-itindeg en si Hisus ne pinekerahing din se egkahi te, "Ke etew ne ebpekeinum ne mibpengkayi te kedì ne med-inum.

<sup>38</sup> Su embiya ed-inum en sikandin kayi te kedì," ke si Hisus, "ne iring dut te impesurat ne Lalag te Eleteala ne egkahi te, 'Ke etew ne mibperetiya kediey,' embiya idsempità ta, 'ne riyà ebpuun te hinawa rin ne ruen wayig ne edtudà ne ebpekevehey te umur ne warà edtemanan din.' "

<sup>39</sup> (Ini se impesabat ni Hisus mekeatag dut te Kedesenan ne Ebpetuntul te Menusiyà ne mehaan en ebpekeubpà diyà te menge etew ne ebperetiya kandin. Ugaid ne ketà ne hewii ne warà pà ingkevehey ni Hisus ke Kedesenan ne Ebpetuntul te Menusiyà ne ibpeubpà din kandan su warà pà nevanew si Hisus dut te Amey rin ne Eleteala te kebpekeuli din diyà te langit te kedeyù kandin te Amey rin.)

<sup>40</sup> Guna su nerineg dut te merakel ne etew ne nevurun ketà ne ruen migkahi te, "Ini en iya ke ebpelambas te Lalag te Eleteala ke ebpenerengen tew."

<sup>41</sup> Ne ruen duma ne migkahi te, "Sikandin en iya ke Impasad te Eleteala ne Ebperetuen din."

Ugaid ne ruen ruma pà ne migkahi te, "Kenà, su kenà diyà ebpuun te lusud te inged ne Geliliya ke Ebperetuen te Eleteala.

<sup>42</sup> Su impesabat te insurat ne Lalag te Eleteala te ini se Impasad din ne Ebperetuen ne kayi ebpuun dut te inenakan ni Davìd ne riyà kun id-anak te inged ne Bitlihìm ke inged dengan ni Dabid."

<sup>43</sup> Ketà be ne warà meseveka ke itungan dut te menge etew mekeatag ki Hisus.

<sup>44</sup> Duen ketà egkiyug en ne edsigkem ki Hisus, ugaid ne warà ebpeketikà ne egawed kandin.

*Warà Mibperetiya ki Hisus ke Menge Egkeunutan te Hudiyanan*

<sup>45</sup> Guna su mid-ulì en ke menge gurudyà te Nekebpuru ne Valey te Eleteala ne mid-insaan dan en dut te menge mepurù te terebpelengesa wey ke menge Peresiyu te, "Meambe ke warà niyu meewit sikandin kayi?"

<sup>46</sup> Ne midtavak ke menge gurudyà te, "Iyan dey warà kedsigkema kandin ne warà key pà mekerineg te etew ne ebpasal iring ketà te kebpasal din."

<sup>47</sup> Ne migkehiyan dan en maa dut te minge Peresiyu te, "Maa, sikiyu ves dema ne nelimbungan din en?"

<sup>48</sup> Maa, ruen misan seveka kayi te sikami ne egkeunutan te Hudiyanen ne ebperetiyaya kandin, abpeg te minge Peresiyu? Warà en iya!

<sup>49</sup> Ini se merakel ne etew ne miduma en kandin ne warà dan mekesabut dut te penduan ni Moises ne intahak keytew, ne igkeantug dan diyà te apuy nerakà."

<sup>50</sup> Ne dutun si Nikudimu ke senge etew ne Peresiyu ne mibpekidlalag ki Hisus se migkahi te,

<sup>51</sup> "Kayi te penduan tew ne kenà egkepakey ne ebpedselaan ke etew ke kenà ibpepinuu pà te kukuman su ebpenginsaan pà sikandin."

<sup>52-53</sup> "Meambe," ke se minge ruma rin, "ebpeninideg ka kandin su riyà ka rema ebpuun te inged ne Geliliya? Besaa nu ke impesurat ne Lalag te Eleteala ne ketà nu egketueni te warà ebpelambas te Lalag te Eleteala ne egemew riyà te lusud te inged ne Geliliya."

## 8

### *Ke Meritan*

[ <sup>1</sup> Neipus ketà ne mibpengulien ke langun ne minge etew, ugaid ne si Hisus ne midtekereg sikandin diyà te buvungan ne ed-ingaranan te Ulivu.

<sup>2</sup> Guna su nepawè en ne mibpaneypaney si Hisus se edlived kayi te Nekebpuru ne Valey te Eleteala. Miburun maa ke langun ne minge etew kayi te kandin, ne mibpinuu en sikandin se ebpenurù kandan.

<sup>3</sup> Ketà ne ruen minge meyerù te penduan wey minge Peresiyu se mibpengkayi te ki Hisus su mid-ewit dan ini se meritan ne nehumangan ne midlangkadlangkad te esawa rin, ne impeitideg dan ke meritan kayi te etuvangan te minge etew.

<sup>4</sup> "Meyerù," ke se minge etew ne mid-ewit te meritan, "nesempenan dey ini se meritan ne midlangkadlangkad te esawa rin.

<sup>5</sup> Kayi te penduan ni Moises ne edumaan tew, embiya ruen etew ne iring kayi ne edrumbahen te watu taman te ebpatey. Na, engkey en be se keykew ne kegkukum kayi te meritan ini?"

<sup>6</sup> Iring ketà se migkahi ran ki Hisus su ebpemegaan dan se ralan te id-isuhat dan ne kewagib dut te idtavag din.

Ugaid ne midungkug si Hisus ne midsurat te terù din kayi te tanà.

<sup>7</sup> Gewii ran te ed-insà ki Hisus ne midtenggak en sikandin se egkahi te, "Embiya ruen keninyan te keniyu ne warà mekevaal te meraat ne ulaula ne iyan med-una medtimbag kandin te watu."

<sup>8</sup> Nekahi rin dà arà ne midungkug en maa sikandin ne midsurat kayi te tanà.

<sup>9</sup> Ne nerineg den dà arà se intavak ni Hisus ne mid-awà dan en te idseveka te egenat dut te lukes taman te iyan dà nesamà si Hisus wey ke meritan ne ed-it-itideg kayi te etuvangan din.

<sup>10</sup> Ne midtenggak en maa si Hisus se egkahi te, "Na, Bayi, endei embe sikandan? Maa, warà embe seveka kandan ne nesamà ne ed-isuhat keykew te kewagib?"

<sup>11</sup> "Warà en, Mama," ke se meritan.

"Na," ke si Hisus te, "siak dema ne warà id-isuhat ku keykew ne kewagib. Uli ke en be ugaid ne kenà ke en maa baal te meraat ne ulaula.]"

*Si Hisus ke Sulù ne Ebpekerayag te Itungan dut te Langun ne Menge Etew kayi te Ampew te Dunya*

<sup>12</sup> Ne migkahi pà maa si Hisus diyà te minge etew te, "Siaken ke sulù ne ebpekerayag te itungan te langun ne minge etew kayi te ampew te dunya. Piya engkey ne eduma kedì ne kenà en ed-ipanew diyà te kerusireman su egkereyahan en ke itungan dan kayi te rayag te sulù ne ebehey te umur ne warà edtemanan din."

<sup>13</sup> Guna su nerineg te minge Peresiyu ne migkahi ran te, "Sikuna red se edtitihus te keykew rà ne hinawa. Tembù be ini se migkahi nu ne kenà tidtu ne titihus ini."

<sup>14</sup> Ne migkahi si Hisus kandan te, "Piya edtitihusan ku ke kedì ne hinawa ne egkedserihan niyu ke lalag ku ne benar. Su netuenan ku ke endei a ebpuun ne endei a ebpesinaru, ugaid ne sikiyu mulà ne kenà niyu egketuanan ke endei a ebpuun etawa ke endei a ebpesinaru.

<sup>15</sup> Embiya egkukum kew te ulaula te minge etew ne kenà egkedserihan se kegkukum niyu su kayi rà dèduen te kememenusiyai ne itungan, ugaid ne siaken ne kenà a egkukum te misan engkey en.

<sup>16</sup> Ugaid ne embiya egkukum a," ke si Hisus pè maa, "ne egkeperetiyyaya niyu ne benar su kenà siaken dà su deruwa rey rut te Amey ku ne Eleteala ne midsuhù kedi se egkukum.

<sup>17</sup> Su ruen nekesurat te penduan niyu ne egkahi te, 'Embiya egkeseveka se bitiyara rut te deruwa ne etew ne editihus, ne benar se lalag dan.'

<sup>18</sup> Edtitihusan ku ke kedi ne hinawa, ne ke Amey ku ne Eleteala ne midsuhù kedi se editihus dema mekeatag kedi."

<sup>19</sup> Nerineg dà dut te minge Peresiyyu ne migkahi ran en te, "Endei ma ke Amey nu?"

"Warà a niyu metueni ke entei a etawa ke Amey ku," ke si Hisus. "Su embiya netueanan a nikiyu ne egketueanan niyu rema ke Amey ku."

<sup>20</sup> Ini ke migkahi ni Hisus dut te kebpenurù din diyà te Nekebpuru ne Valey te Eleteala uvey te edtehuan te ibehey te Eleteala. Ne warà midsigkem kandin su warà pà ma metuman ke hewii ne intail te Eleteala kandin.

<sup>21</sup> Ne migkahi pà maa si Hisus diyà te minge egkeunutan te Hudiyanan te, "Ed-ewaan ku en sikiyu ne ebpemengà kew kediey su apey kew ebpekepeleyu, ugaid ne kenà e ma nikiyu egketuen ne ebpematay kew red keninyan te salà niyu ne kenà egkepesahad. Su kenà kew ebpekependiyà te ebpesineruwan ku."

<sup>22</sup> Ne mibpein-insey ke minge unutan te Hudiyanan te, "Migkahi sikandin te, 'Kenà kew ebpekependiyà te ebpesineruwan ku.' Engkey se ibpesabut din, ed-ehet buwa sikandin?"

<sup>23</sup> Ne midtavak si Hisus te, "Sikiyu ne ini kew rà te ampew te dunya, ugaid ne siaken ne riyān a ebpuun te divavew. Uya, sikiyu ne kayi kew ebpuun te kelibutan, ugaid ne siaken ne diyan a ebpuun te langit.

<sup>24</sup> Tembù be intarem ku en keniyu," ke si Hisus, "te ebpematay kew red keninyan te salà niyu ne kenà egkepesahad. Uya embiya kenà kew ebperetiyyaya te siaken arà ke intarem ku keniyu ne riyā ebpuun te Eleteala ne ebpematay kew red keninyan te salà niyu ne kenà egkepesahad."

<sup>25</sup> "Engkey ke ma iya?" ke se minge Peresiyyu.

Ne midtavak si Hisus te, "Intarem ku en keniyu ke entei a igenat dut te aney en ne kebpenurù ku taman en gunteani.

<sup>26</sup> Merakel pà se igkekahi ku wey igkeisuhat ku mekeatag te minge ulaula niyu. Ugaid ne iyan ku rà ibpesabut te menusiya ne endei rà ke nerineg ku rut te midsuhù kedi, ne egkedserihan nevenar sikandin."

<sup>27</sup> Warà mekesabut ke minge Hudiyanan te migkahi rin mekeatag te Amey rin ne Eleteala.

<sup>28</sup> Ne geina te warà dan mesebuti ne migkahi en maa si Hisus te, "Ketà te hewii ne kedlensanga niyu ke Impeanak te Menusiya diyà te pinebelevag ne kayu ne ketà niyu egkesebuti te siaken arà se intarem ku keniyu ne riyā ebpuun te Eleteala. Ne ketà ne egketueanan niyu rema te warà ebeelan ku te kedi dà ne hinawa, ugaid ne iyan ku rà igkahi ne endei rà ke ibpekahi kedi dut te Amey ku ne Eleteala.

<sup>29</sup> Ne ke Amey ku ne midsuhù kedi," ke si Hisus, "ne eduma kedi. Kenà a rin ebpedtedayan su iyan ku rà edtumanen ke ebpekesuhat te hinawa rin."

<sup>30</sup> Ne merakel dut te nekerineg te lalag ni Hisus se mibperetiyyaya kandin.

*Ke Minge Etew ne Ebaal te Meraat ne Egkeuripen te Salà*

<sup>31</sup> Ne migkehiyan ni Hisus ke minge Hudiyanan ne mibperetiyyaya en kandin te, "Embiya ibperayun niyu ke keduma niyu rut te minge penurù ku keniyu ne benar kew en ne edumdumaan ku.

<sup>32</sup> Ne egkesebutan niyu ke benar ne penurù mekeatag te Eleteala ne ketà puunan ne egkevelukasan kew."

<sup>33</sup> Nerineg den dà ne migkahi ran en te, "Sikami ne minge inenakan ni Abraham ne warà key pà keenu meuripen te misan entei en. Ne meambe ke nekahi nu se egkevelukasan key?"

<sup>34</sup> "Sebenarvenar ini se egkehiyan ku keniyu," ke si Hisus, "te misan entei ne ebaal te meraat ne egkeuripen te salà.

<sup>35</sup> Ini se uripen ne kenà ebpekeubpà ketà te baley te kerenan din taman te taman, ugaid ne ke tunei ne anak se ebpekeubpà ketà taman te taman.

<sup>36</sup> Geina te siak se Anak te Eleteala, ne embiya egkevelukasan ku en sikiyu ne kenà kew en egkepengunguripen.

<sup>37</sup> Netueanan ku," ke si Hisus, "te inenakan kew ni Abraham, ugaid ne iyan niyu ebpemengaan se kebpatay ku su kenà kew ma ebpemineg te penurù ku keniyu.

<sup>38</sup> Iyan ku egkehiyen ne endei rà ke ibpekahi kedi dut te Amey ku, ugaid ne sikiyu ne iyan niyu ed-ul-ulaan ke netuenan niyu rut te amey niyu."

<sup>39</sup> Ne migkahi ran te, "Iyan dey keep-epuan si Abraham."

Ne migkahi si Hisus te, "Embiya ma benar kew ne inenakan ni Abraham, ne iyan niyu ma ebeelan ke mibeelan din dengan.

<sup>40</sup> Ugaid ne kenà ma ayan ke ulaula niyu su ebpemengà kew te ked-imatey niyu kedi misan iyan ku rà migkahi keniyu ke benar ne ibpekahi kedi dut te Amey ku ne Eleteala. Ne kenà be iring ketà ke ulaula ni Abraham dengan.

<sup>41</sup> Sikiyu, ne iyan niyu ebeelan ne endei rema ke mibeelan dut te amey niyu."

Migkahi ran te kegkeepes dan te, "Kenà key ini minge anak dà te ingkehingey! Netuenan dey ke engkey se amey rey, su ke sebseveka ne Eleteala!"

<sup>42</sup> "Na," ke si Hisus "embiya ke Eleteala iya maa ke amey niyu, ne igkelimù a nikiyu su diyan a mibpuun te kandin. Ne kenà kedi ne kiyug se kinepengkayi ku su sikandin ke midsuhù kedi.

<sup>43</sup> Meambe ke kenà niyu egkesebutan ke egkehiyen ku? Iyan iya se kenà kew egkiyug ne eduma te ibpenurù ku.

<sup>44</sup> Su ke datù ma te pekaid se amey niyu ne iyan niyu edumaan ke kandin ne kiyug. Terebunù sikandin te aney en, ne edsungkanger dut te benar su iyan dè ma nekepenù te bèbà din ne tarù. Embiya edlalag sikandin ne tarù su edumaan din ke kandin ne kiyug, su teruen ma sikandin ne apù sikandin te tarù.

<sup>45</sup> Ugaid ne sebenarvenar mulà ini se lalag ku," ke si Hisus, "ne kenà kew ebperetiyya kediey.

<sup>46</sup> Na, engkey keniyu se ebpekettitihus te ruen meraat ne ed-ul-ulaan ku? Warà! Ne embiya benar se lalag ku ne meambe ke kenà kew ebperetiyya kedi?"

<sup>47</sup> Arà se etew ne benar ne anak te Eleteala ne ebpemineg te minge lalag te Eleteala. Ugaid ne sikiyu ne kenà din minge anak, tembù kenà kew ebpemineg."

#### *Si Hisus wey si Abraham*

<sup>48</sup> Ne midtavak ke minge Hudiyänen ki Hisus te, "Benar iya vuwa ke nekahi rey geina ne riyà ka ebpuun te inged ne Semeriyà ne midsuukan ka te vusew."

<sup>49</sup> "Warà a ini suuki te vusew," ke si Hisus. "Su iyan ku ed-ul-ulaan ini ne pekingan dut te Amey ku, ugaid ne ebpegkeyà kew kedi.

<sup>50</sup> Kenà ku iyan ebpenemaran ke kebantug kedi te minge etew, ugaid ne Eleteala se metau ne edtanganur te kegkevantung ku, wey sikandin se edtampil kedi.

<sup>51</sup> Sebenarvenar ne ini se idtarem ku keniyu te piya entei en se eduma te ibpenurù ku ne kenè en ebpatay."

<sup>52</sup> "Na benar iya ne midsuukan ka te vusew," ke se minge Hudiyänen. "Su misan si Abraham wey ke langun ne mibpelembas te Lalag te Eleteala rengan ne mibpematay ran ded ma. Ne meambe ke migkahi nu te, 'Misan entei en ne eduma te penurù ku ne kenè en ebpatay?'"

<sup>53</sup> Ke keep-epuan dey ne si Abraham ne minatey en, ne engkey, muna ke pà bes kandin? Wey ke mibpemelambas te Lalag te Eleteala ne mibpematay ran ded lavew. Engkey ke ma te keykew ne kebpegpegitung?"

<sup>54</sup> Ne midtavak si Hisus te, "Embiya ebantug a te hinawa ku ne warà pantag din ke bentuhan ku. Ugaid ne iyan ebantug kedi ke Amey ku ne Eleteala, ke iyan egkehiyen niyu ne Eleteala niyu.

<sup>55</sup> Warà niyu metueni ke entei sikandin, ugaid ne siaken mulà ne netuenan ku sikandin," ke si Hisus. "Embiya ve migkahi ku te warà ku metueni sikandin, ne teruen a iring keniyu. Ugaid ne netuenan ku nevenar sikandin ne edtumanen ku ke minge lalag din kediey.

<sup>56</sup> Nehalew si Abraham ke keep-epuan niyu rengan su netuenan din te ibpepengkayi a su ebpebaluy ne menusiya, tembù be nehalew sikandin su ebpenerengen a rin."

<sup>57</sup> Ne migkahi ke minge Hudiyänen te, "Engkey en se kinepekekita nu ki Abraham te warà pà melelima nepulù se rahun nu?"

<sup>58</sup> "Sebenarvenar ne ini se egkehiyen ku keniyu," ke si Hisus, "te warà pà in-anak si Abraham ne raan ad."

<sup>59</sup> Arà dà ne mibpurut en ke minge Hudiyänen te vatu su idrumbag dan ki Hisus, ugaid ne mibpeniyuksiyuk si Hisus ne mid-awà ketà te Nekebpuru ne Valey ne te Eleteala.

<sup>1</sup> Ketà te ked-ip-ipanew ni Hisus ne nekita rin ini se etew ne neketakin kandin se nepisek en.

<sup>2</sup> "Mama," ke se menge edumdumaan ni Hisus, "meambe ke midtakin ayan ne kegkepisek din? Engkey ki salà, kandin be etawa ke menge lukes din?"

<sup>3</sup> Ne migkahi en si Hisus te, "Kenà kayi ebpuun te kandin ne salà etawa riyà te menge lukes din. Nepisek sikandin su apey egkekita kayi te kegkeulii rin ke gehem te Eleteala.

<sup>4</sup> Taman te meandew pà," ke si Hisus, "ne iyan iya se egelevek ki pà dut te gelevek te midsuhù kedi. Su egkeuma ke merukilem ne warà en ebpekehelevek.

<sup>5</sup> Taman te kayi e pà te ampew te dunya ne siaken ke sulù ne ebpekerayag te itungan te menge etew."

<sup>6</sup> Neipus din te egkahi ini, ne mid-ileb en diyà te tanà ne intevuley rin en ke ileb din te tanà su apey ebudtà. Ne indekudas din en ke vudtà diyà te mata rut te nepisek.

<sup>7</sup> Ne migkahi en sikandin te, "Pendiya ke be te linew ne ed-ingaranan te Siluan ne pendapug ke ve ketà." (Iyan meana te Siluan ne "Midsuhù".) Arà dà ne mibpendiyà en ke pisek ne mibpendapug en ketà sikandin. Nekeipus ne midlived sikandin ne ebpekekita en.

<sup>8</sup> Guna su nekita rut te menge etew riyà te sepiring din wey ke menge etew ne nekekita kandin te kepememuyù din ne mibpein-inseey ran te, "Maa, kenà ini red ke meama ne ebpipinuu su ebpememuyù?"

<sup>9</sup> Ruen migkahi te, "Ayan ded iya sikandin!"

Ne ruen ruma ne migkahi te, "Kenà, su nekedrahid dà ke paras dan."

Ne migkahi en ke meama ne nepisek pehaney te, "Siaken iya ini ke nepisek."

<sup>10</sup> "Ne meambe," ke sikandan, "engkey ma se kegkeulii te mata nu?"

<sup>11</sup> Midtavak sikandin te, "Iyan nekeuli te mata ku arà se etew ne ed-ingaranan ki Hisus. Su mid-ilevan din ke tanà ne intevuley rin ke ileb din su apey mebudtà, ne arà ke indekudas din te mata ku. Ne migkehiyan a rin te, 'Pendiya ka te linew ne ed-ingaranan te Siluan ne pendapug ke ve ketà.' Ne mibpendiyan a rema te linew ne guna su nekeipus a se ebpendapug ne ebpekekita ad."

<sup>12</sup> "Na endei be sikandin?" ke sikandan.

Ne midtavak en sikandin te, "Idita en."

*Impenginsà Dut te Menge Peresiya Mekeatag Dut te kegkeulii Rin*

<sup>13</sup> Ne miduma ran en ke neulian ne pisek diyà te menge Peresiya.

<sup>14</sup> Ne arà ne hewii se kinevaal ni Hisus te budtà ne nekeuli dut te pisek ne Hewii te Id-imeley.

<sup>15</sup> Nekeuma ran diyà te menge Peresiya ne mid-insaan en maa sikandin ke engkey se imped-ulaula ni Hisus kandin te kegkeulii te mata rin.

Ke sikandin te, "Indekudas din ke budtà kayi te mata ku ne pinependapug a rin, ne ketà ne nekekita ad."

<sup>16</sup> Nerineg dà dut te menge Peresiya ne ruen migkahi te, "Ini se etew ne mibawi keykew ne kenà ebpuun te Eleteala su kenà edtanud sikandin dut te Hewii ne Id-imeley."

Ne ruen ruma pà ne migkahi te, "Engkey, duen belisalà ne etew ne ebpekevaal te menge ulaula ne mekegeyip?" Ketà ne kenà dan en ebpemegayun.

<sup>17</sup> Ne mid-insaan dan en manen ke etew ne neulian te, "Na sikew, nekahi nu te sikandin se kineulii te mata nu, engkey ve se nepegitung nu mekeatag kandin?"

Ke sikandin te, "Ebpelambas sikandin te Lalag te Eleteala."

<sup>18</sup> Ugaid ne warà peretiyayaa te menge egkeunutan te Hudiyanen te nepisek ini se etew neraan, tembù be impetawag dan ke menge lukes dut te pisek,

<sup>19</sup> ne mid-insà dan dut te menge lukes te, "Engkey, ini iya ke anak nu? Maa, daan en iya ne pisek sikandin te kineanak kandin? Ne memenu ve se kinekeulii te mata rin?"

<sup>20</sup> Ne midtavak ke lukes din te, "Uya, anak dey iya sikandin ne intakin kandin ayan se kegkepisek din.

<sup>21</sup> Ugaid ne warà dey metueni ke engkey se kinepekekita rin en, ne warà dey metueni ke engkey se nekeuli kandin. Iyan tumù ne sikandin en se insai niyu ne igketarem din ma su egketau en sikandin."

<sup>22</sup> Ini ke intavak dut te menge lukes din su neandek dan dut te menge egkeunutan te Hudiyanen. Su ruen neumpungan te menge egkeunutan te embiya ruen etew ne ebperetiyaya te si Hisus ke Impasad te Eleteala ne Ebperetuen, ne ibpeawà sikandin dut te baley ne ebpengedian te menge Hudiyanen te penduan dan.

<sup>23</sup> Tembù be migkahi ke menge lukes din te, "Iyan niyu en insai sikandin su egketau en ma sikandin."



<sup>24</sup> Ne rutun ne mid-umew ran en maa te ebpelived ke neulian ne pisek ne migkahi ran te, “Na iyan nu rà kehiya ke benar su ini ka te etuvangan te Eleteala. Su netueanan dey te ini ne etew se nekeuli keykew ne belisalà ne etew.”

<sup>25</sup> “Kenà ku egketueanan embiya belisalà sikandin etawa kenà,” ke se neulian ne pisek, “ugaid ne iyan ku netueanan te pehaney ne nepisek a ne huntaani ne ebpekekita ad.”

<sup>26</sup> “Ne engkey ve se imped-ulaula rin keykew?” ke sikandin. “Ne mibmenu menu rin be se kegkeulii te mata nu?”

<sup>27</sup> “Migkahi ku en ura keniyu,” ke se neulian ne pisek, “ne warà kew ma mebphehbenar. Ne meambe maa ke ibpesulit niyu pà kedi? Maa egkiyug kew rema ne eduma kandin?”

<sup>28</sup> Neepes dan ketà ne meraat se lalag dan kandin, ke sikandin te, “Ew, edumdumaan ke ves nikandin, ugaid ne sikami mulà ne edumdumaan key rut te ebpelambas te Lalag te Eleteala rengan ne si Moises.

<sup>29</sup> Netueanan dey nevenar te mibpekidlalag ke Eleteala ki Moises, ugaid ne ini se etew ini ne warà dey metueni ke endei sikandin nekepuun.”

<sup>30</sup> Migkahi ini se neulian te, “Asal mekegeyip! Warà niyu metueni ke endei sikandin ebpuun misan ruen gehem din ne nekeuli te kegkepisek ku.

<sup>31</sup> Netueanan tew te kenà ebpmineg ke Eleteala rut te etew ne belisalà, ugaid ne iyan din ebpminehen ke etew ne ed-adat kandin wey edtuman te kiyug din.

<sup>32</sup> Su aney en te kinelimbaha te dunya ne warà pà nerineg tew ne etew ne ebpekeuli te etew ne nekeraan kandin se kegkepisek din.

<sup>33</sup> Embiya kenà suhù te Eleteala ini se etew,” ke se neulian ne pisek, “ne warà igaga rin te ebpekevaal te iring kayi.”

<sup>34</sup> Migkahi ke menge egkeunutan te, “In-anak ka te mekesesalà, ne meambe ke ebpenunganunga ka ebpenurù kenami?” Arà dà ne impeawà dan en sikandin ne migkehiyan dan te kenà en ebpelusuren dut te baley ne ebpedgian te menge Hudiyanen te penduan dan.

#### *Nepisek ded Dema ke Menge Etew ne Warà pà Mebperetiyya ki Hisus*

<sup>35</sup> Guna su nerineg ni Hisus ke imped-ulaula ran dut te etew ne neulian din, ne mibpemengà din. Guna su netuen din ne mid-insaan din te, “Maa, mibperetiyya ke en be rut te Impeanak te Menusiya?”

<sup>36</sup> Ne midtavak te meama te, “Kehiya nu kedi ke entei sikandin, Mama, su apey a ebperetiyya kandin.”

<sup>37</sup> “Nekita nu en,” ke si Hisus, “su sikandin en iya ini ke ebpekidlalag keykew.”

<sup>38</sup> “Embiya sikuna ves,” ke se meama, “ebperetiyya a keykew.” Arà dà ne mibpengarap en ki Hisus.

<sup>39</sup> Migkahi si Hisus te, “Iyan ku impengkayi te ampew te dunya su edtimbangan ku ke menge etew su apey ke menge etew ne nerusireman te kegkepisek dan ne edtelimà kedi ne ebhayan ku te kerayahan. Ugaid ne ke kenà edtelimà kedi su engkungkun ne nekita ran ke kerayahan ne ebpelekapan ku ke mata ran.”

<sup>40</sup> Ruen menge Peresiyya ne nekerineg dut te lalag ni Hisus ne migkahi ran en te, “Engkey se migkahi nu, menge pisek key rema?”

<sup>41</sup> Ne midtavak si Hisus te, “Embiya nepisek kew iring dut te etew ne warà pà nevehayi te kerayahan, ne warà perem kegkeisuhat keniyu. Ugaid ne geina te migkahi kew te, ‘Ebpekekita key en,’ ne arà se kegkeisuhat keniyu te kewagib su kenà kew ma eduma.”

## 10

#### *Ke Sempità ni Hisus Mekeatag dut te Tumetuganur te Menge Bilibili*

<sup>1</sup> Ne ruen insemptà ni Hisus te, “Sebenarvenar ini se egkehiyen ku keniyu, embiya ruen etew ne edlusud te tudilan te menge bilibili ugaid ne kenà ebpevayà te humawan su ed-ambak, ne tekawen sikandin etawa tulisan.

<sup>2</sup> Ugaid ke etew ne edlusud te humawan, ne sikandin ke tumetuganur dut te bilibili.

<sup>3</sup> Embiya edlusud sikandin ne ebpuwasan dut te ebantey ke humawan. Ne ebpekekilala ke bilibili te suwara rin ke ed-umawen din dut te ngaran dan su ibpelihawang dan.

<sup>4</sup> Ne embiya ve nekelihawang dan en ne ed-una en ke tumetuganur, ne edtungug en ke menge bilibili su egkekilala ran ke kandin ne suwara.

<sup>5</sup> Kenà dan edtungug te selakew ne etew, inemulà se ebpelahuy ran kandin su kenà den ma egkekilala ke kandin ne suwara.”

<sup>6</sup> Ini ke insemptà ni Hisus kandan, ugaid ne warà dan mesebuti ke meana rin.

*In-upama si Hisus te sikandin ke Meupiya ne Tumetuganur te Menge Bilibili ne ke menge Bilibili se menge Eteu ne Mibperetiyya Kandin*

<sup>7</sup> Ne migkahi maa si Hisus kandan te, “Sebenarvenar ini se egkehiyen ku keniyu: ne iyan a ke gumawan te tudilan ne ibpevayà dut te menge bilibili.

<sup>8</sup> Langun ne mid-una kedi su ebpenurù ne egkahi te midsuhù te Eleteala ne iring dan te menge tekawen wey tulisan. Ugaid ne ke menge bilibili ne timbang te menge etew ne warà dan mebpemineg kandan.

<sup>9</sup> Siaken ke humawan, ne misan engkey se edlusud kayi te kedi ne igkepeliyu sikandin. Iring sikandin te bilibili ku ne medlusud wey medluwal se ebpemengà te kegkaan din su egkeventayan ku ma sikandin.

<sup>10</sup> Ke tekawen ne iyan din kedlusud dut te tudilan su ebpenakew, ed-imatey wey ederaat. Ugaid,” ke si Hisus, “ne iyan ku kinepengkayi su apey ku igkepeliyu ke menge etew ne ebpeketelimà dan te penaub te Eleteala igenat guntaani abpeg dut te umur ne warà edtamanan din.

<sup>11</sup> “Siak ke meupiya ne tumetuganur,” ke si Hisus, “su andam a ne ebpepatey apey kenà mekeiri ini se menge bilibili ku.

<sup>12</sup> Ke etew ne edsukayan dà ne ebantey te bilibili ne kenà tidtu ne tumetuganur, ne warà kegkenuhun din kandan su kenà ma kandin ne bilibili. Ne ed-ewaan din su ebpelahuy ke ruen egkekita rin ne leew ne asu ne ebpekeuma. Ketà be ne warè en ebpekevantey kayi te bilibili, ne igketangag en te leew ne asu ini se bilibili ne ke ruma ne egurusuwey en.

<sup>13</sup> Iyan kebpelahuy rut te edsukayan dà ne ebantey su kenà tidtu ne tumetuganur, ne warà kegkenuhun din ketà te menge bilibili.

<sup>14-15</sup> “Siaken,” ke si Hisus, “ke meupiya ne tumetuganur ne ke menge etew ne iring te menge bilibili ku. Netuenan ku ke Amey ku, ne netuenan a rin dema. Ne iring ded dema kayi te menge bilibili ku ne eduma kedi su egkekilala ku sikandan ne egkekilala a ran dema, ne andam a ne ebpepatey te selidig kandan.

<sup>16</sup> Ruen pà ruma ne menge bilibili ku,” ke si Hisus “ne warà pà kayi te lusud te tudilan. Ed-ewiten ku ve sikandan kayi te tudilan ini ne ebpmineg dan kedi, ne egkevaluy ran ne senge luyuran dà ne seveka rà dema se tumetuganur kandan su siaken dà.

<sup>17</sup> “Igkelimù a te Amey ku ne Eleteala su andam a ne ebpepatey kandan. Iyan ku kebpepatey su apey ku metelimà ded ketà te kegkevanew ku.

<sup>18</sup> Warà a tehela te misan entei en ne etew te ebpepatey, ugaid ne kedi en ne kiyug. Su ruen gehem ku te edselidig te umur ku, ne ruen gehem ku te ed-awi maa ketà te kegkevanew ku. Su ini ke insuhù kedi te Amey ku ne Eleteala.”

<sup>19</sup> Guna su nerineg dut te menge Hudiyanen ini se impenurù ni Hisus ne warà dan meseveka.

<sup>20</sup> Merakel kandan se migkahi te, “Midsuukan sikandin te vusew! Ebunehen! Meambe ke ebpmineg kew kandin?”

<sup>21</sup> Ugaid ne ruen duma ne migkahi te, “Embiya ma midsuukan te vusew sikandin, ne kenà iring kayi se kebpenurù din! Ne ebmemenu ve se vusew te ebpekekità ke pisek?”

#### *Warà Mebperetiyya ki Hisus ke Menge Hudiyanen*

<sup>22</sup> Ne neuma en ke hewii te kevrunan te menge Hudiyanen ne ed-ingaranan te Edtepeney diyà te Nekebpuru ne Valey te Eleteala diyà te inged ne Hirusalim, ne arà ne hewii ne ed-uran-uran.

<sup>23</sup> Ne riyà si Hisus ed-ip-ipanew te palàpalà te Nekebpuru ne Valey te Eleteala ne ed-ingaranan te Palàpalà ni Datù Salomon.

<sup>24</sup> Ne rutun ne miburun ke menge egkeunutan te Hudiyanen diyà te ki Hisus su mid-insaan dan te, “Keenu key pà nikuna edteremi ke entei ka? Embiya maa sikuna en ke Edetuen ne Impasad te Eleteala, ne ikahi nu en kenami.”

<sup>25</sup> Midtavak si Hisus te, “Nekahi ku en keniyu, ugaid ne warà kew ma mebperetiyya. Ini se mekegeyip ne ulaula ku ne insuhù kedi te Amey ku ne Eleteala ne iyan tuus te sikandin ke midsuhù kedi,

<sup>26</sup> ugaid ne warà kew ma mebperetiyya su warà kew ma mekelusud kayi te tudilan te bilibili ku.

<sup>27</sup> Su ke menge etew ku ne timbang te bilibili ku,” ke si Hisus “ne ebpmineg dan kedi su egkekilala ren ma ke suwara ku. Egkekilala ku sikandan ne eduma ran kedi.

<sup>28</sup> Ebhayan ku sikandan te umur ne warà edtamanan din wey kenà en ebpepatey ke gimukud dan, ne warà senge etew rà ne ebpekeahew kandan dut te edtingkungan te palad ku,” ke si Hisus.

<sup>29</sup> “Su iyan mibehey kandan kedi ne ke Amey ku ne Eleteala ne warà repeng se gehem din, ne warà senge etew rà ne ebpekehew kandan dut te edtingkungan te palad din.

<sup>30</sup> Su seveka key rà dut te Amey ku ne Eleteala.”

<sup>31</sup> Guna su nerineg te minge Hudiyanen ke lalag ni Hisus ne mibpemurut dan en maa te minge batu su idrumbag dan kandin.

<sup>32</sup> Ne migkahi si Hisus te, “Merakel se impekita ku keniyu ne meupiya ne ulaula ku ne insuhù kedi te Amey ku ne Eleteala. Ne endei ve rapit ne ulaula ku ke rait ne idrumbeha niyu kedi te batu?”

<sup>33</sup> “Kenà iyan dey idrumbag keykew te batu,” ke se minge Hudiyanen “ne ayan se meupiya ne ulaula nu, ugaid ne ayan se kedsumpalit nu te Eleteala. Su egkahi ka te Eleteala ka, ugaid ne etew ke rà ma!”

<sup>34</sup> Ne migkahi si Hisus kandan te, “Ruen impesurat diyà te keniyu ne penduan te migkahi ke Eleteala, ‘Ragid kew kedi ne Eleteala.’

<sup>35</sup> Netuenan tew,” ke si Hisus, “ke impesurat ne Lalag te Eleteala ne benar ne warà kegesembii rin taman te taman su migkahi rin te imperagid dan te Eleteala ke minge keep-euan tew ne mibehayan din dut te lalag din.

<sup>36</sup> Su siaken, ne mibpemilì a te Amey ku ne Eleteala ne impepengkayi a te ampew te dunya, ne meambe ke egkekahi niyu se edsumpeliten ku ke Eleteala embiya egkehien ku te Anak a te Eleteala?

<sup>37</sup> Iyan ku ebeelan ne arà se insuhù kedi te Amey ku ne Eleteala, ugaid ne embiya kenà ne kenà a niyu peretiyaya.

<sup>38</sup> Ugaid ne embiya iyan ku ebeelan ne arà se insuhù din kedi, ne misan kenà kew ebperetiyaya te minge lalag ku ne peretiyaya kew kayi te minge baal ku ne mekegeyip ne ebbpuun te gehem din. Su kayi niyu egketueni te seveka key rà, siaken wey ke Amey ku, su kayi sikandin te kedi, ne riyan e rema te kandin.”

<sup>39</sup> Nerineg den dà ke lalag ni Hisus ne edsigkemen dan en maa perem, ugaid ne nekelihawang ma sikandin.

<sup>40</sup> Ketà be ne mid-awà en si Hisus kayi te inged ne Hirusalim ne mid-apet te wayig ne Hurdan ne mibpendiyà te inged ne mipebunyahnan ni Juan dengan, ne ketà mid-ubpà sikandin.

<sup>41</sup> Merakel ne minge etew se mibpendiyà te kandin ne ebpeleglelahey ran te, “Warà mekegeyip ne mid-ulaula rengan ni Juan, ugaid ne langun ne migkahi rin mekeatag te ini ne etew ne benar iya.”

<sup>42</sup> Ne merakel ne etew se mibperetiyaya kandin.

## 11

### *Ke Kinepatey ni Lasaru*

<sup>1</sup> Duen meama ne edaru ne ed-ingaranan ki Lasaru ne riyà ed-ubpà te inged ne Bitanya. Duen deruwa ne etevey rin ne dutun ded dema ed-ubpà ne ed-ingaranan ki Maria wey si Marta.

<sup>2</sup> (Si Maria ini ke meritan ne mibùbù te periyemut diyà te paa ni Hisus ne mibpunas din te bulvul din. Ne meeman din arà se ederaru ne si Lasaru.)

<sup>3</sup> Mibpesuhuan kayi te deruwa ne etevey ni Lasaru si Hisus ne iyan dan intelaan se, “Mama, ebpekedaru ini se sepekat nu ne igkelimù nu navenar.”

<sup>4</sup> Guna su nerineg ni Hisus ne migkahi te, “Ini se daru ni Lasaru ne kenà pà ini ke ibpatey rin, ugaid ne iyan din kebpekedaru su apey iyan egkereyù ne ke Eleteala wey siak dema ke Anak din ne egkereyù.”

<sup>5</sup> Dekelà te hinawa ni Hisus ensi Marta ki Maria wey si Lasaru.

<sup>6</sup> Ugaid ne misan iring ketà, ne nerineg din te edaru si Lasaru ne mid-ubpà pà lavew sikandin te nekederuwa ne hewii.

<sup>7</sup> Nepupus pè be arà ne migkehiyan din ke edumdumaan din te, “Kuwa kew en su edlived kiyu maa diyà te lusud te inged ne Hudiya.”

<sup>8</sup> “Meyerù,” ke se minge edumdumaan din, “warà pà utew meuhet se kedrumbaha ran perem keykew te batu. Ne meambe ke edlived ke en maa?”

<sup>9</sup> Ne migkahi si Hisus te sempità din te, “Maa, kenà sepulù wey deruwa ne uras te senge keandew? Ne embiya ed-ipanew ki te meandew ne kenà ki ebpekesiud su ruen ma rayag ne ebpeketayew keyta.

<sup>10</sup> Ugaid ne embiya ed-ipanew ki te merukilem ne ebpekesiud ki su merusirem en ma ne kenà ki en ebpekekita.”

<sup>11</sup> Iring ketà se nekahi ni Hisus te sempità din ne migkahi en maa te, “Nekelipereng en arà se sepekat tew ne si Lasaru, ugaid ne ebpendiyan a su apey ku mepukew sikandin.”

<sup>12</sup> Midtavak ke edumdumaan din te, "Embiya nekelipereng dà sikandin ne meupiya su egkeulian ded sikandin."

<sup>13</sup> Iyan meana te migkahi ni Hisus ne minatey en si Lasaru, ugaid ne kunaan dan ke andang dà ne kedlipereng arà se egkehiyen din.

<sup>14</sup> Arà dà ne impayag ni Hisus kandan te, "Minatey en si Lasaru,

<sup>15</sup> ugaid ne apey kew mekeperetiya ketà te ked-uyaha ku kandin, ne meupiya su warà a ketà te kinepatey rin. Kuwa kew embe su ebpendiyà kiyu te kandin."

<sup>16</sup> Dutun ne senge etew ne edumdumaan din ne ed-ingaranan ki Tomas (ne mid-ingaranan dan dema te Seping) se migkahi riyà te menge ruma rin te, "Eduma kiyu kandin su apey ki ebpekeunung kandin te ebpatay."

*Si Hisus ne Iyan Ebpuunan Wey ke Ebpuunan te Umur ne Warà Edtemanan Din*

<sup>17</sup> Guna su nekeuma en si Hisus diyà te Bitanya ne nerineg din en te neked-epat en ne hewii se kineleveng ki Lasaru.

<sup>18</sup> Ini se inged ne Bitanya ne uvey red te inged ne Hirusalim su menge tetelu buwa ne kilù se elet din.

<sup>19</sup> Ne merakel ne Hudiyanen se riyà ebpuun te Hirusalim ne mibpendiyà te engki Marta wey ki Maria su edlenganen dan dut te kinepatey te meeman dan.

<sup>20</sup> Guna su nerineg ni Marta se ebpekeuma en si Hisus ne midsinuhung din en, ugaid ne si Maria ne riyà ded te valey.

<sup>21</sup> Ne migkahi si Marta diyà te ki Hisus te, "Mama, embiya kayi ke rà perem ne kenà ded ebpatay ke meeman ku.

<sup>22</sup> Ugaid ne netueanan ku te misan guntaani ke ruen ebuyuen nu te Eleteala ne ibehey rin keykew."

<sup>23</sup> "Egkevanew red arà se meeman nu," ke si Hisus.

<sup>24</sup> "Uya," ke si Marta, "netueanan ku se egkevanew red sikandin keuremà dut te kebenawa te menge minatey ketà te mewri ne hewii."

<sup>25</sup> Ne migkahi si Hisus te, "Iyan a imbe ke ebpuunan ne iyan a imbe ebpuunan te umur ne warà edtamanan din. Ke etew ne ebperetiya kedi ne misan ebpatay sikandin ne biviyag ded ke gimukud din ne ed-ubpà diyà te Eleteala taman te taman.

<sup>26</sup> Su ke etew ne ebperetiya kedi," ke si Hisus, "ne ruen umur din ne warà edtemanan din wey kenà en ebpatay ke himukud din. Menu, Bayi, ebperetiya ke en be kayi?"

<sup>27</sup> Ne midtavak si Marta te, "Uya, mibperetiya a te sikuna ke Impasad te Eleteala ne Ebperetuen, ke Anak din ne impepengkayi rin te ampew te dunya."

*Midsinehew si Hisus Dut te kegkeyru Rin ki Maria wey ki Marta*

<sup>28</sup> Guna su nekahi arà ni Marta ne mid-uli en ne midnènaasan din si Maria te, "Kenian en si Hisus ne in-insà ka rin."

<sup>29</sup> Nerineg dà ni Maria ne mid-itindog ne migaangan se edsinuhung ki Hisus.

<sup>30</sup> (Warà pà mekeuma si Hisus kayi te inged dan su diyà pà lavew sikandin te nesinehungan ni Marta.)

<sup>31</sup> Guna su nekita dut te menge Hudiyanen ne edlengan ki Maria te kayi pà te valey te nekeitindog su edlihawang ne midtundug dan su iyan dan kunaan ke ebpendiyà te leveng su riyà sikandin edsinehew.

<sup>32</sup> Nekeuma rà si Maria riyà te ki Hisus ne mid-uvey rin en ne midlangkeb sikandin se edsinehew. Ke sikandin te, "Mama, embiya kayi ke rà perem ne kenà ded perem ebpatay ke meeman ku."

<sup>33</sup> Guna su nekita ni Hisus se edsinehew si Maria, wey midsinehew dema ke menge Hudiyanen ne miduma kandin, ne mibmeraat ke nanam din te kegkeyru rin. Ne ed-eleg-ehen en sikandin se egkahi te,

<sup>34</sup> "Endei niyu ileveng?"

Ne midtavak dan te, "Kayi ke en, Mama, su ebayaan tew."

<sup>35</sup> Ketà ne nekesinehew en si Hisus.

<sup>36</sup> "Intengi niyu ma," ke se menge Hudiyanen, "igkelimù nevenar ni Hisus si Lasaru."

<sup>37</sup> Ugaid ne ruen migkahi te, "Maa, kenà ini ke etew ne nekeuli te pisek ne meama? Embiya nekeuli sikandin te pisek, ne meambe ke warà din bawii si Lasaru su apey warà mebpatay?"

*Ke Kinevanew ni Hisus ki Lasaru*

<sup>38</sup> Ne mibmeraat en maa ke nanam ni Hisus te kegkeyru rin ketà te nekeuvey en sikandin dut te leveng. Ini se leveng ne riyà te surung, ne ruen dekelà ne batu ne in-alang dut te humawan.

<sup>39</sup> “Iawà niyu ayan se batu!” ke si Hisus.

Ne migkahi si Marta ke etevey dut te minatey te, “Mama, memawù en su neked-epat en ne andew ini se kineleveng kandin.”

<sup>40</sup> “Migkahi ku en keykew te embiya ebperetiyaya ka ne egkekita nu arà se ebpekereyù te Eleteala,” ke si Hisus.

<sup>41</sup> Ketà ne midlilid dan en ke batu ne in-alang ne midlingakà en si Hisus diyà te langit se ebpengeningeni te, “Dekelà se kegkereyù ku keykew, Amey ku, su ebpemingehen nu ini se ebuyuen ku.

<sup>42</sup> Netuenan ku te lelayun ka ebpeming kedi, ugaid ne iyan ku kebpengeningeni guntaani su apey ebpekeperetiyaya ke menge etew ne ini te uvey ku te sikuna ke midsuhù kedi.”

<sup>43</sup> Nekeipus sikandin se egkahi ne mid-umew rin te merahing ne suwara te, “E, Lasaru, lihawang ke en.”

<sup>44</sup> Arà dà ne migemew en ke minatey su nevanew en. Ne nevukusan te saput ke lawa rin abpeg ke velad din wey ke paa rin, ne misan ke vuked din ne nevukusan dema te saput. “Ewai niyu sikandin te bukus,” ke si Hisus, “su apey ebpekewaleng.”

*Mibentaan Ke Menge Mepurù te Terebpelengesa wey Ke Menge Meyterù te Penduan Te Kedsigkem ki Hisus*

*(Mateo 26:1-5; Marcos 14:1-2; Lucas 22:1-2)*

<sup>45</sup> Merakel dut te menge Hudiyanen ne miduma ki Maria se nekekita rut te mid-ulaula ni Hisus ne mibperetiyaya kandin.

<sup>46</sup> Ugaid ne ruen duma kandan ne mibpendiyà te menge Peresiyu su ebpenudtul dut te mid-ulaula ni Hisus.

<sup>47</sup> Arà dà ne mibpendiyà ke menge mepurù te terebpelengesa wey ke menge Peresiyu su eburun diyà te menge pekilukesen te Hudiyanen.

Guna su nevurun dan en ne migkahi ran te, “Engkey se ed-ul-ulaan tew? Su merakel se mekegeyip ne ed-ul-ulaan ni Hisus!

<sup>48</sup> Embiya ebpedterayen tew sikandin ne langun ne menge etew ne ebperetiyaya en te sikandin ke Impasad te Eleteala ne Ebperetuen. Ne embiya iring en ketà, ne egkeringe dut te egkeunutan tew ne riyà te Ruma ne ebpeveyaan ki te menge sundaru ran ne edereetan dan ini se Nekebpuru ne Valey te Eleteala wey ini se pehinged tew te menge Hudiyanen.”

<sup>49</sup> Ketà ne migkahi ini se senge etew ne mepurù te terebpelengesa ne ed-ingaranan ki Keyipas, su ketà ne hewii ne sikandin ke pinekemepurù te langun ne menge terebpelengesa, ke sikandin te, “Warà menge itungan niyu!”

<sup>50</sup> Warà niyu ves mesebuti te iyan dà tumù ne senge etew rà se ebpatay tumin dè be ke langun ne menge Hudiyanen su apey kenà mereeti ini se pehinged tew te menge Hudiyanen.”

<sup>51</sup> (Migkahi rin ini te kenà kandin dà ne itungan, ugaid ne geina te sikandin ke pinekemepurù dut te langun ne menge terebpelengesa te arà ne hewii ne nekekahi sikandin neraan te si Hisus se ebpatay ne idselidig te langun ne menge Hudiyanen.

<sup>52</sup> Ne kenà ke menge Hudiyanen dà se egkeselidigan te kebpatay rin, ugaid ne apey langun ne nevaluy ne anak te Eleteala ne egkevurun te egkeseveka misan endei ne menge inged.)

<sup>53</sup> Ne igenat dè be ketà ne andew ne mibpemengà en te menge egkeunutan te Hudiyanen te ralan te ked-imatey ran ki Hisus.

<sup>54</sup> Tembù be warà en mebpekitakita si Hisus dut te merakel ne etew ketà te inged ne Hudiya, ugaid ne mibpendiyà sikandin te inged ne ed-ingaranan te Ipraim uvey te tanà ne kenà egkeubpaan te etew. Ne ketà sikandin med-ubpa wey ke edumdumaan din.

<sup>55</sup> Ne ebpelundani en ke kevruran te menge Hudiyanen ne ed-ingaranan te Pista te Kedsehari te Suluhuen. Ne merakel en ne menge etew ne ebpuun te ebalàbalà ne menge inged se ebpenekereg dan diyà te Hirusalim su edtumanen dan ke betasan te menge Hudiyanen mekeatag te kepbnlùlù su apey ran ebpekeamung dut te kevruran.

<sup>56</sup> Mibpemengà dan si Hisus ne gewii ran te egkevurun diyà te Nekebpuru ne Valey te Eleteala ne mibpein-inseey ran te, “Engkey se antap niyu, ebpengkayi red buwa si Hisus etawa kenà?”

<sup>57</sup> Ruen insuhù te menge mepurù te terebpelengesa wey ke menge Peresiyu te piya engkey se egketau ke endei si Hisus ne igkahi kandan su apey ran igkepesisigkem.

## 12

### *Mibperiyemutan en Neraan ke Lawa ni Hisus te Kedleveng Kandin*

*(Mateo 26:6-13; Marcos 14:3-9)*

<sup>1</sup> Enem pà ne hewii ne egkeuma ke kevrunan ne ed-ingaranan te Pista te Kedsehari te Suluhuen ne mibpendiyà si Hisus te inged ne Bitanya, ke inged ni Lasaru ke mibanew rin.

<sup>2</sup> Ketà te valey ni Lasaru ne mibair dan te kevrunan su igalewhalew ran ki Hisus. Si Marta se ebpenedad ne elin ketà si Lasaru wey si Hisus se ebpegaan.

<sup>3</sup> Ne migkuwa ni Maria ini se dekelà ne pelenaan te periyemut ne mepurù nevenar su mibeelan dut te ed-ingaranan te Nardu. Ne mid-uevey rin si Hisus ne imbùbù din diyà te paa rin, ne mibpunasan din te bulvul din. Ne nekeeneb kayi te lusud te baley te keemut din.

<sup>4</sup> Ne seveka rut te edumdumaan ni Hisus, si Hudàs Iskeriyuti ke ed-ulug kandin, se midlalag ki Hisus te,

<sup>5</sup> “Babeba!” ke sikandin. “Nerèdeetan ini su pira buwa nehatus se elehà din? Iyan tumù ne indehang ini se periyemut ne ke elehà din ne igkepemehey riyà te menge etew ne ayuayu.”

<sup>6</sup> Kenà iyan din kinekahi te iring ketà ne ke kegkeyru rin dut te menge ayuayu, ugaid ne tekawen sikandin. Su sikandin ke ebpetugenuren dut te edtehuan te kureta en ni Hisus, ugaid ne ebpepenguan din mulà.

<sup>7</sup> Ugaid ne migkahi si Hisus te, “Pedteraya niyu sikandin! Ne ibpetahù ded kandin ke samà ne periyemut su apey ruen idsapu rin te lawa ku ketà te idleveng ad.

<sup>8</sup> Su ke menge ayuayu ne lelayan kew red ebpepekeduma ne egketevangan niyu sikandan, ugaid ne siak ne kenà ad meuhet kayi te keniya.”

<sup>9</sup> Nerineg dut te merakel ne menge Hudiyänen te riyà si Hisus te inged ne Bitanya ne mibpemendiyà dan. Ne kenà iyan dan dà kinependiyà ne mekeatag ki Hisus, ugaid ne iyan dan dema ed-intengan ne si Lasaru ke mibanew rin.

<sup>10</sup> Ne iyan netahù te itungan te menge unuten te terebpepengesa ne ebpeimetayan dema si Lasaru.

<sup>11</sup> Su atag te kinekevanew kandin ne merakel ne Hudiyänen se midsuwey en dut te ibpenurù dan su kayi ran en mibperetiyaya ki Hisus.

### *Ke Kinelusud ni Hisus Diyà te Hirusalim ne Mid-untud te Nati te Kudà su tuus ini te Datù Sikandin Dut te Menge Hudiyänen*

*(Mateo 21:1-19; Marcos 11:1-11; Lucas 19:28-40)*

<sup>12</sup> Guna su nepawè en ne nerineg dut te merakel ne menge etew ne edtelavuk te kevrunan te Hirusalim se ebpekeuma kun si Hisus.

<sup>13</sup> Ne mibpenguwa ran te dawun te menge niyug ne midsinuhung dan si Hisus se egkerag te,

“Edeyuen tew ke Eleteala!

Ne menu ma ke ebpeneuven te Eleteala ini se ebpekeuma,

su midsuhù din te ralan te ketengdanan din.

Menu ebpeneuven te Eleteala

ini se nepemilì ne Ebperetuen

te menge kevuwaran ni Israyil!”

<sup>14</sup> Ne migkuwa ni Hisus se nati ne kudà ne mid-untud sikandin iring dut te impesurat ne Lalag te Eleteala ne egkahi te,

<sup>15</sup> “Sikiyu ne mehinged te Hirusalim,

kenà kew meandek!

Su ebpekeuma en ini ke ratù niyu

ne ed-untud te nati te kudà.”

<sup>16</sup> Ketà ne hewii ne warà mesebuti ini rut te edumdumaan din. Ugaid ne guna su nevanew en si Hisus wey nevantun en diyà te langit, ne netenuran dan arà se kedlusud ni Hisus diyà te Hirusalim ne netuman ke impesurat ne Lalag te Eleteala rengan.

<sup>17</sup> Ini se menge etew ne nekekita ki Hisus te ked-umawa rin wey kebenaran rin ki Lasaru ne mibpemenudtul.

<sup>18</sup> Tembù be mibpenelavuk ke merakel ne etew ki Hisus su nerineg dan ini se ulaula rin ne mekegeyip.

<sup>19</sup> Guna su nekita rut te menge Peresiya ke denda ne etew ne edtelavuk ki Hisus ne mibpeglelelahay ran te, “Tengtegg kew be, warà en bes egkegaga tew! Su ke denda ne etew ne eduma en kandin!”

*Ke Migkahi ni Hisus Mekeatag te Kemetayen Din*

<sup>20</sup> Ne ruen minge Gerisihanun ne mibpekiduma te minge Hudiyanen te ebpendiyà te Hirusalim su edtelavuk dan dema te pista ne ebpengarap dan te Eleteala.

<sup>21</sup> Mibpendiyà dan te ki Felipe, senge etew ne ruma ni Hisus ne riyà ebpuun te inged ne Bitsaida lusud te inged ne Geliliya, ke sikandan te, "Egkesuat key ne ebpekibalak ki Hisus."

<sup>22</sup> Ne intarem ini ni Felipe riyà te ki Andres. Ne rutun ne mibperumeey ran en se ebpendiyà te ki Hisus ne mibpenudtul dan kandin.

<sup>23</sup> Migkahi si Hisus te, "Neuma en ke hewii te ebpekeuli ke Impeanak te Menusiyà diyà te Amey rin su ebeheyan rut te kandin ne bentuhan.

<sup>24</sup> Sebenarvenar ini se egkehiyen ku keniyu: embiya kenà ibpemula ini se senge lahas ne veni diyà te tanà ne kenà egkeumanan su senge lahas dè ma. Ugaid ne embiya ibpemula en, ne edtuvu ne ebahas te merakel. Iring ded dema ketà te siak," ke si Hisus, "su embiya igkeleveng ad ne merakel se egkevehayan te umur ne warà edtemanan din.

<sup>25</sup> Embiya ruen etew ne iyan din ebpekinuhunan se umur din ne kayi te ampew te dunya, ne nasi ne egkewarà kandin. Ugaid ne ke etew ne edtuman te kiyug ku su warà kebpekinuhun din te umur din kayi te ampew te dunya, ne ebpeketelimà te umur ne warà edtemanan din.

<sup>26</sup> Su ke etew ne egkiyug ne eduma te penurù ku," ke si Hisus, "ne iyan din ibpeuna te hinawa rin te ked-iniyug din te kandin ne kiyug su apey mekeruma kedi, ne piya endei a ne ketà dema ke edsugnuhuen ku. Ne ke etew ne edtuman te penurù ku, ne egkereyù te Amey ku ne Eleteala."

<sup>27</sup> Ne migkahi pà maa si Hisus dut te edumdumaan din te, "Egkevehatan nevenar se hinawa ku guntaani. Engkey vuwa se egkehiyen ku te kebpeneningeni ku ki Amà? Maa, iyan ku ebuyuen kandin te kenà a meked-ulaula te ini se merasey ne ebpekeuma? Kenà! Su iyan ku impengkayi te ampew te dunya ne ed-etuvangen ku iya ini se merasey."

<sup>28</sup> Ne ketà ne migkahi en sikandin dut te amey rin te, "Amà, ipekita nu ke bentuhan nu kayi te minge etew!"

Ne ruen en suwara ne riyà ebpuun te langit ne migkahi te, "Impekita ku en ke kegkevantug ku ketà te mid-ulaula nu, ne ibpekita ku pà maa ini se kegkevantug ku kayi te ed-ul-ulaan nu."

<sup>29</sup> Ne ketà ne merakel se minge etew ne nekerineg te suwara ne ruen migkahi te, "Miduruhung!" Ne ruen ruma ne migkahi te, "Suluhuen te Eleteala ne mibpekidlalag ki Hisus."

<sup>30</sup> Ne migkahi si Hisus te, "Kenà iyan kinekahi te Eleteala ne ruen ibpayag din kedi, ugaid ne apey niyu egketueni te ebpemiehen a rin.

<sup>31</sup> Ini en ke hewii te kegkukum te Eleteala te langun ne menusiyà kayi te ampew te dunya ne kuntera din. Egketalew en si Setanas ke datù te pekaid ne midatù kayi te ampew te dunya.

<sup>32</sup> Ne siak, embiya idtunggul ad diyà te pinebelavag ne kayu ne ebpuyuken ku ke langun ne minge etew te ebpengkayi te kedi."

<sup>33</sup> (Ini se migkahi ni Hisus ne impayag din ke ralan te ked-imetayi kandin.)

<sup>34</sup> Migkahi ke merakel ne etew te, "Iyan tew nesebutan kayi te impesurat ne Lalag te Eleteala ne kenà ebpatay ke Impasad te Eleteala ne Ebperetuen din. Ne meambe maa ke migkahi ka te sikuna ke Impeanak te Menusiyà ne idtunggul ka riyà te pinebelavag ne kayu? Embiya iring ketà, ne engkey ma ini se Impeanak te Menusiyà?"

<sup>35</sup> Ne midtavak ni Hisus te sempità ne, "Ke sulù ne ebpekerayag te itungan niyu ne kayi en te keniyu, ugaid ne kenà en meuhet ne ed-awà. Ne taman te kayi pà te keniyu ke sulù ne rumai niyu su apey kew kenà meuma te merusirem, su ke etew ne ed-ipanew diyà te merusirem ne kenà ebpeketuntul te ibayà din.

<sup>36</sup> Taman te kayi pà te keniyu ke sulù, ne serih niyu su apey kew ebpekehemew te kerayahan."

*Ke Menge Etew ne Kenà Ebperetiyaya*

Neipus ni Hisus se kinelalag din ketà ne mid-awà en ne mid-eles kandan.

<sup>37</sup> Misan merakel en ne mekegeyip ne mid-ulaula rin ne nekita ran ne warà dan mebperetiyaya kandin,

<sup>38</sup> su apey egketuman en ke migkahi ni Isayas ke ebpelambas te lalag te Eleteala rengan ne egkahi te,

"Eleteala, warà utew mibperetiyaya te impesabut dey!

Warà utew midsabut rut te gehem

ne impekita nu kandan!"

<sup>39</sup> Ne ruen dema ingkahi ni Isayas mekeatag te kenà dan kebpekeperetiya, ke sikandin te,

<sup>40</sup> "Mibpelekapan dan te Eleteala

su apey kenà dan ebpekekita.

Ne mibpekeresen ke itungan dan

su apey ran kenà ebpekesabut.

Ne iyan pè be se ked-uvey ran kedì te ebperetiya

su apey ku igkepeliyu sikandan!"

<sup>41</sup> Migkahi ini ni Isayas su netueanan din dengan ke rekela ne gehem ni Hisus ke Ibpeanak te Menusiyà ne ini se edlalag din mekeatag kandin.

<sup>42</sup> Misan iring ketà se lalag ni Isayas ne ruen ded lavew merakel ne menge egkeunutan te Hudiyanan ne mibperetiya ki Hisus. Ugaid ne warà dan mebpepayag su neandek dan dut te menge Peresiyu ke ibpeawà dan na kenà dan ebpekelusud dut te baley ne ebpedgian te menge Hudiyanan te penduan dan.

<sup>43</sup> Su iyan dan pinedlabi ke kedeyù kandan te menge etew, tumin dè be ke kedeyù te Eleteala kandan.

<sup>44</sup> Ne impekerahing ni Hisus se kegkahi rin te, "Entei se mibperetiya kedì, ne kenà siaken dà se ebperetiyaen din su elin ded dema ke midsuhù kedì.

<sup>45</sup> Ne entei se nekekita kediey ne nekekita red dema sikandin dut te Amey ku ne Eleteala ne midsuhù kedì.

<sup>46</sup> Mibpengkayi a ne kerayag kayi te ampew te dunya su apey ku egkereyahi ke itungan dut te menge etew su apey ke langun ne ebperetiya kedì ne kenè en egkeresireman ke itungan dan.

<sup>47</sup> "Piya entei ne nekerineg te menge lalag ku ugaid ne kenà din edtumanen," ke si Hisus, "ne kenà siaken se ed-isuhat kandin te kerusaan. Su kenà iyan ku impengkayi ne ed-isuhat te kerusaan kandan, ugaid ne apey ran ebpekepeliyu dut te kerusaan dan.

<sup>48</sup> Ugaid ne ruen ed-isuhat te kerusaan dut te menge etew ne mid-engkena kedì wey warà medtelimà te menge lalag ku. Su ini se menge lalag ku ne warà dan telimaa ne ini red se ed-isuhat te kerusaan kandin ketà te mewri ne hewii.

<sup>49</sup> Uya, su ini se menge lalag ku ne kenà kayi ebpuun te kediey rà," ke si Hisus, "ugaid ne insuhù kedì te ibpelalag dut te Amey ku ne Eleteala ne iyan midsuhù kedì.

<sup>50</sup> Su netueanan ku te ini se insuhù din kedì te ibpelalag ne ini en iya ke ebpekevehey te umur ne warà edteman din. Ketà ne iyan ku rà egkehiyen ne engkey se ibpelalag din kedì."

## 13

### *Midlùlan ni Hisus Ke Menge Paa dut te Menge Edumdumaan Din*

<sup>1</sup> Senge hewii pa ne egketuman ke kevrunan te menge Hudiyanan ne ed-ingaranan te Pista te Kedsehari te Suluhuen. Netueanan ni Hisus se neuma en ke hewii ne ked-awà din kayi te ampew te dunya su ed-uli en diyà te Amey rin ne Eleteala. Dekdekela ke limù din dut te langun ne menge etew kayi te ampew te dunya ne midtelimà kandin, ugaid ne guntaani ne impekita rin kandan ke rimahas te limù din kandan.

<sup>2</sup> Guna su meapun en ne edlavung pa ensi Hisus wey ke edumdumaan din, ne neketahù en si Setanas ke datù te pekaid diyà te itungan ni Hudas ke anak ni Simon Iskeriyuti te ed-ulug ki Hisus.

<sup>3</sup> Ugaid ne netueanan ni Hisus te imbehey en kandin dut te Amey rin ke kebayaàbaya te langun taman. Netueanan din dema se riyà ebpuun sikandin te Eleteala, ne riyà ded lavew ed-uli.

<sup>4</sup> Ne mid-itindeg si Hisus ketà te egkeenan dan ne midluung din ke kumbalà din ne impipinding din ke tuwalya.

<sup>5</sup> Neipus din arà ne migkuwa rin se pelenggana ne mibusbusan din te wayig, ne mibpenlùlan din ke menge paa te edumdumaan din ne mibpemunan din dut te tuwalya rin.

<sup>6</sup> Mid-uvey sikandin ki Simon ne mid-ingaranan ki Pedro, ne migkahi en si Pedro te, "Sikuna se Kerenan dey, na engkey sikuna ves maa se edlùlu te paa ku?"

<sup>7</sup> Ne midtavak si Hisus te, "Ini se ed-ul-ulaan ku guntaani ne kenà nu pa iya egkesebutan, ugaid ne iseg-iseg ne egkesebutan nu red."

<sup>8</sup> Ke si Pedro te, "Kenà egkepakey ne iyan ka ebpenlùlu te paa ku!"

Ne migkahi si Hisus te, "Embiya kenà ku edlùlan ke paa nu, ne kenà ke en ruma dut te edumdumaan ku."



<sup>9</sup> Ne nekekahi si Pedro te, “Embiya ves iring ketà, ne kenà iyan nu rà lului ini se paa ku su misan ini se velad ku wey ulu ku rema.”

<sup>10</sup> Migkahi si Hisus te, “Ke etew ne nekepemihù en ne metilak en, ne iyan dà edlùlan ke menge paa rin su ruen lipupuk din. Iring ded dema te sikiyu su langun niyu ne netilak en ke itungan niyu liyu ketà te senge etew keniyu.”

<sup>11</sup> (Su netuenan din en ke engkey arà se ed-ulug kandin tembù be migkahi sikandin te, “Langun niyu ne metilak en liyu ketà te senge etew.”)

<sup>12</sup> Guna su nekeipus si Hisus te edlùlù te paa ran ne inseluub din en maa ke kumbalà din ne midlived sikandin ketà te ebpinuwan din te egkaan. Ne mid-insaan din ke edumdumaan din te, “Maa, nesebutan niyu ve ini se mid-ulaula ku keniyu?”

<sup>13</sup> Iyan niyu id-umew kedi ne ke Meyterù niyu wey ke Kerenan niyu, ne benar ma iya arà.

<sup>14</sup> Su embiyan siaken ke Kerenan niyu wey ke Meyterù niyu se mibpenlùlù te paa niyu ne dait ne pelùlùley kew rema te menge paa niyu.

<sup>15</sup> Su ini se impekita ku keniyu,” ke si Hisus, “ne ledawan keniyu su apey niyu egkeiringi riyà dut te menge ruma niyu.

<sup>16</sup> “Sebenarvenar ini se egkehiyan ku, warà uripen ne iyan en mepurù dut te ebpenguripen kandin. Iring ded dema dut te edsugsuhuen, kenà iyan mepurù sikandin dut te edsuhùsuhù kandin.

<sup>17</sup> Embiyan egkesebutan niyu en ini se penurù ku keniyu, ne igkehalew niyu nevenar ke egkerumaan niyu!

<sup>18</sup> “Kenà langun niyu se egkesuhat kayi te edlelehan ku,” ke si Hisus, “su netuenan ku ke engkey se netahù te hinawa te uman seveka keniyu ne mibpemili ku, ne netuenan ku ke engkey se ebpulid kedi te menge kunterà ku. Ugaid ne ruen impesurat ne Lalag te Eleteala rengan ne egketuman en ne egkahi te, Ke etew ne mibpekidtuhen kedi ne iyan ded nevaluy ne kunterà ku.

<sup>19</sup> “Tembù be ebpeketuenan ku ini keniyu te warà pà med-ulaula su apey ketà te hewii te kegkeuma rin ne ebpekeperetiyaya kew te siaken iya ke intarem ku keniyu ne impasad te Eleteala.

<sup>20</sup> Sebenarvenar ini se egkehiyan ku,” ke si Hisus, “misan entei ne etew se edtelimà dut te edsuhuen ku, ne siaken se midtelimà din dema. Ne ke etew ne edtelimà kediey ne midtelimà din dema ke Amey ku ne midsuhù kediey.”

*Migkahi ki Hisus Neraan te Ruen Ed-ulug Kandin te Ked-imetayi*

*(Mateo 26:20-25; Marcos 14:17-21; Lucas 22:21-23)*

<sup>21</sup> Nekeipus si Hisus se edlalag ne mibmerungkug nevenar sikandin ne impayag din dut te menge edumdumaan din te, “Sebenarvenar ini se egkehiyan ku keniyu te ruen senge etew kayi te keniyu ne ed-ulug kediey su apey a meimetayi.”

<sup>22</sup> Nerineg dut te menge edumdumaan din ne nekedsirà dan su warà dan metueni ke engkey ini se ibpesabut din.

<sup>23</sup> Ne ruen durug ni Hisus te ebpinuu ne seveka rut te edumdumaan din ne igkelimù din nevenar.

<sup>24</sup> Arà be ke mid-uyewan ni Simun Pedro te, “Insai nu si Hisus ke entei ini se egkehiyan din.”

<sup>25</sup> Ne midsandig sikandin ki Hisus ne mid-insaen din en te, “Entei ma se ed-ulug keykew, Kerenan?”

<sup>26</sup> Midtavak si Hisus te, “Ideluwit ku ini se pan kayi te savew ne endei ve ketà se ebheyan ku ne arà imbe sikandin.” Arà dà ne indeluwit din en ke pan dut te savew ne imbehey rin en ki Hudas ke anak ni Simon Iskeriyuti.

<sup>27</sup> Guna su migkuwa ni Hudas ke pan, ne mid-awuk en kandin si Setanas ke datù te pekaid.

Ne migkehiyan en ni Hisus sikandin te, “Ini se ed-ul-ulaan nu ne gègeeni nu en!”

<sup>28</sup> Langun dut te edumdumaan ni Hisus ne warà dan mesebuti ke migkahi rin.

<sup>29</sup> Ne geina te si Hudas ke ebpetugenuren rut te edtehuan te kureta ran ne ruen edumdumaan din ne nekepegitung te midsuhù ni Hisus sikandin te ebpepemasa te igastu ran te pista etawa ebpevehayan ni Hisus diyà te menge ayuayu.

<sup>30</sup> Migkaan ni Hudas ke pan ne midlihawang en, ne merukilem en ketà.

*Ke Behu ne Suhù ni Hisus te Kebpelimlimuey*

<sup>31</sup> Guna su migenat en si Hudas ne migkahi en si Hisus dut te edumdumaan din te, “Mehaan en egkekita ke memenu kerekelà ke gehem dut te Impeanak te Menuisyà. Ne kayi ebpuun te kedtuman din te kiyug te Amey rin ne egkekita red dema ke kerekelà te gehem te Amey rin ne Eleteala.

<sup>32</sup> Ne embiya egkekita ke kerekelà ne gehem te Eleteala kayi te kedtuman te Anak din te kiyug din, ne ibpekita rema te Amey rin ke kerekelà te gehem ku, ne ini ne mehaan en egked-ulaula.

<sup>33</sup> "Sikiyu se edumdumaan ku," ke si Hisus, "ne iring te minge anak ku, ne kenè en meuhet ne warà ad kayi te keniyu. Ketà ne ebpemengà kew kedì, ne ini se egkehiyen ku keniyu guntaani ne iring dut te intarem ku rut te minge Hudiyanen te, 'Kenà kew ebpependiyà te ebpesineruwan ku.'

<sup>34</sup> "Na, ruen behu ne suhù ne ibpetuman ku keniyu te iyan iya se pelimlimuey kew. Iring dut te kegkelimù ku keniyu ne arà se iringi niyu te kebpekimlimuey niyu.

<sup>35</sup> Embiya ebpekimlimuey kew," ke si Hisus, "ne egkekita te langun ne minge etew te sikiyu ne minge edumdumaan ku."

*Migkahi si Hisus Neraan te Ebparew si Pedro te Teleduma Ran  
(Mateo 26:31-35; Marcos 14:27-31; Lucas 22:31-34)*

<sup>36</sup> Mid-insà si Simon Pedro ki Hisus te, "Ebpendei ke ma?"

Midtavak si Hisus te, "Kenà ke pà ebpekeruma diyà te ebpesineruwan ku, ugaid ne egketaman ne ebpeketelukun ke red."

<sup>37</sup> "Kerenan," ke si Simon Pedro, "meambe ke kenà a ebpekeruma keykew guntaani? Kenà ku sikew ed-ewaan su ebpekid-unung a kenikew te ebpatay."

<sup>38</sup> Migkahi si Hisus te, "Maa, ebpekid-unung ka kedì te ebpatay? Sebenarvenar ini se egkehiyen ku keykew te kenà pà ed-ukarà ke manuk, ne ketetelu nu en ibparew te kenà a nu egkekilala."

## 14

*Si Hisus se Ralan te Ebpendingà te Amey Rin*

<sup>1</sup> Ne migkahi pà maa si Hisus dut te edumdumaan din te, "Kenà kew egkeuru. Sarig kew te Eleteala wey sarig kew red dema kediey.

<sup>2</sup> Merakel se egkeubpaan diyà te baley te Amey ku, ne ebpendiyan a su ebpenehana a te egkeubpaan niyu. Su kenà ku egkehiyen ini keniyu embiya kenà benar.

<sup>3</sup> Ne embiya ebpekependiyan ad," ke si Hisus, "ne egkepenehanaan ku en sikiyu te ubpaan niyu, ne edlived a kayi su ebpenehewiten ku sikiyu su apey misan endeì a ne ketà kew red dema.

<sup>4</sup> Netuenan niyu en ke ibayà diyà te ebpesineruwan ku."

<sup>5</sup> Migkahi si Tomas te, "Kerenan, warà dey metuenei ke endeì ka ebpesinaru! Ne memenu ve se egketuenei rey te ralan ketà?"

<sup>6</sup> Midtavak si Hisus te, "Siaken ke ralan te Eleteala, siaken ke ebpuunan te benar, ne siaken ded ke ebpuunan te umur ne warà edtemanan din. Warà etew ne ebpekependiyà te Amey ku embiya kenà kayi ebpevayà te kediey.

<sup>7</sup> Geina te netuenan a niyu en," ke si Hisus "ne egketuenan niyu en rema ke Amey ku. Ne egenat guntaani ne egketuenan niyu en sikandin su nekita niyu en."

<sup>8</sup> Migkahi si Felipe te, "Kerenan, ipekita nu kenami ke Amey nu ne Eleteala, ne nesesangan en kenami."

<sup>9</sup> Ne migkahi si Hisus te, "Neuhet en se kebpekiduma ku keniyu ne maa Felipe, warà nu pè bes metuenei ke enteì a? Su piya enteì ne nekekita kediey ne nekita rin en dema ke Amey ku. Ne meambe ke migkahi nu te, 'Ipekita nu kenami ke Amey nu?'

<sup>10</sup> Meambe Felipe, warà ke pè bes mebperetiyaya te ini te kedì ke Amey ku, ne siaken ne riyana te kandin? Ini se minge lalag ku keniyu ne kenà kayi rà ebpuun te kedì ne itungan su ke Amey ku ne ini med-ubpà te kedì ne kandin ne vaal ini.

<sup>11</sup> Peretiyayaa niyu nevenar ini se egkehiyen ku te riyana te Amey ku, ne ini sikandin te kediey. Ne embiya merehen kew ne ebperetiyaya te egkehiyen ku, ne iyan niyu peretiyayaa ke minge tuus ne impekita ku keniyu.

<sup>12</sup> Sebenarvenar ini se egkehiyen ku," ke si Hisus, "misan enteì en ne edsarig kediey ne ebpekevaal iring dut te mibeelan ku. Uya, muna pà se egkeveelan din su geina te ed-uli ad diyà te Amey ku.

<sup>13</sup> Ne misan engkey se ebuyuen niyu diyà te Eleteala kayi sabap dut te kedsarig niyu kediey ne ibehay ku keniyu su apey egkekita ke gehem te Amey ku ebpevayà dut te ulaula ku ne Anak din.

<sup>14</sup> Su misan engkey se ebuyuen niyu sabap dut te kedsarig niyu kediey, ne ibehay ku keniyu."

*Impasad ni Hisus te Ibpepengkayì Rin Ke Kedesenan ne Ebpetuntul te Menusiyà*

<sup>15</sup> “Embiya egkelimù kew kediey,” ke si Hisus, “ne edtumanen niyu ini se minge suhù ku keniyu.

<sup>16</sup> Ne ebuyà a riya te Amey ku su apey rin igkevehey keniyu ke Edtavang keniyu ne ebpekesambi kedì, ne kenà edsuwey keniyu taman te taman.

<sup>17</sup> Sikandin ini ke Kedesenan ne Ebpetuntul te Menusiya ke ebpesabut keniyu te benar mekeatag te Eleteala,” ke si Hisus. “Kenà ini egketelimà te minge etew kayi te ampew te dunya ne warà medtelimà kedì su kenà dan egkekilala sikandin ne kenà dan ebpekesabut ke entei sikandin. Ugaid ne nesebutan niyu en ke entei sikandin su ebpekiduma sikandin keniyu wey diyà mid-ubpà sikandin te keniyu.

<sup>18</sup> “Ne kenà ku sikiyu ed-ewaan,” ke si Hisus, “iring te minge ilu su edliveran ku red sikiyu.

<sup>19</sup> Kenà en utew meuhet ne kenà ad egkekita rut te minge etew kayi te ampew te dunya ne warà medtelimà kedì, ugaid ne egkekita e red nikiyu su siaken ne egkeuyag a, ne egkeuyag kew red dema.

<sup>20</sup> Ketà te hewii te egkevanew a ne ketà niyu egketueni te siak wey ke Amey ku ne egkeseveka key rà, ne egkesebutan niyu rema te ini kew te kedì ne riyan a dema te keniyu.

<sup>21</sup> Misan entei ne etew se edtelimà te minge suhù ku ne edtumanen din,” ke si Hisus, “ne sikandin ke egkelimù kediey. Ne igkelimù dema dut te Amey ku arà se etew ne egkelimù kediey. Ne igkelimù ku rema sikandin, ne ibpayag ku kandin te siaken ke ruma rin.”

<sup>22</sup> Migkahi en si Hudas (kenà si Hudas ne anak ni Simon Iskeriyuti) te, “Kerenan, ne meambe ke kayi ke rà ebpepayag te kenami ne kenà ka diyà ebpepayag dut te minge etew ne warà medtelimà keykew?”

<sup>23</sup> Midtavak si Hisus te, “Uya, su kenà dan egkelimù kediey su ke etew ne egkelimù kediey ne iyan din edtumanen ke minge suhù ku. Ne igkelimù sikandin dut te Amey ku, ne sikami ki Amà ne riya key te kandin su ed-ubpà.

<sup>24</sup> Ugaid ne ke etew ne kenà egkelimù kediey, ne kenà din dema edtumanen ke minge suhù ku. Ini se lalag ku ne imperineg ku keniyu ne kenà kayi rà ebpuun te itungan ku, ugaid ne riya ebpuun te Amey ku ke midsuhù kediey.

<sup>25</sup> “Nekahi ku en ini keniyu te ini e pà te keniyu,” ke si Hisus.

<sup>26</sup> “Ugaid ne misan ed-ewaan ku en sikiyu ne ruen en edsuhuen te Amey ku ne ebpekesambi kediey ne edtavang keniyu. Ini se edtavang keniyu ne ke Kedesenan ne Ebpetuntul te Menusiya su sikandin se ebpenurù keniyu te langun taman, ne ebpetunuran din dema keniyu ke langun ne migkahi ku.

<sup>27</sup> Uya, misan ed-ewaan ku en sikiyu, ne edtahakan ku sikiyu te kebmelintad te hinawa niyu. Ini se kebmelintad te hinawa niyu ne ibehey ku keniyu ne kayi ebpuun te kediey. Ke minge etew kayi te ampew te dunya ne kenà ebpekevehey te kelintad ne iring kayi, ketà be ne kenà kew meuru, ne kenà kew meandek.”

<sup>28</sup> “Nerineg niyu en ke migkahi ku te, ‘Ed-ewaan ku sikiyu, ugaid ne edliveran ku red sikiyu,’” ke si Hisus. “Embiya benar ne igkelimù a nikiyu ne igkehalew niyu su ed-uli a riya te Amey ku su sikandin ke mepurù pà kediey.

<sup>29</sup> Idtarem ku en ini keniyu guntaan te warà pà med-ulaula su embiyan egked-ulaula en ini ne ebpekeperetiya kew red misan warà ad.

<sup>30</sup> Kenà en utew meuhet se kebitiyara ku keniyu su ebpekeuma en si Setanas ke datù te pekaid ne egkamal kayi te ampew te dunya,” ke si Hisus. “Ne warà ma bayàbayà din kediey,

<sup>31</sup> ugaid su apey metueni te minge etew kayi te ampew te dunya te igkelimù ku ke Amey ku ne tembù be edtumanen ku ke langun ne insuhù kediey te Amey ku. Na, kuwa kiyu en su ed-awà ki en kayi.”

## 15

*Impeiring ni Hisus te Sikandin ke Benar ne Lawa te Pinemula wey ke Subpang din ne ke Menge Etwew ne Mibperetiya Kandin*

<sup>1</sup> Ne mibpenempità si Hisus dut te edumdumaan din te, “Siaken ke benar ne lawa te pinemula ne iyan be edtuganur dut te pinemula ne ke Amey ku ne Eleteala.

<sup>2</sup> Embiyan ruen subpang ku ne kenà ebahas, ne id-awà din. Ne langun ne minge subpang ku ne ebpemahas ne ebpenemperan din su apey merapung ke bahas din.

<sup>3</sup> Ne iring kew en dut te minge subpang ne mibpenemperan su sabap dut te Lalag te Eleteala ne impemula ku riya te itungan niyu rut te impenurù ku.

<sup>4</sup> Ketà be ne kenà kew ebpitas kediey," ke si Hisus, "ne kenà a rema ebpitas keniyu. Su ke subpang ne egkepitas dut te lawa te pinemula ne kenà ebpekevahas, ne iring kew rema te subpang su kenà kew ebpekevahas embiya ebpitas kew rut te kebperetiyyaya niyu kedì."

<sup>5</sup> Ne migkahi maa si Hisus te, "Siaken ke lawa te pinemula ne sikiyu ve ke minge subpang. Ke subpang ne kenà ebpitas kediey ne diyan a rema te kandin ne ebpemahas te merapung. Ugaid ne embiya ebpitas kew kediey, ne warè egkeveelan niyu.

<sup>6</sup> Su ke etew ne ebpitas kediey," ke si Hisus, "ne igketimbag sikandin iring dut te subpang ne idtimbag su egenguwen. Embiya nehangu en, ne eburunen ne idtimbag diyà te apuy su ebinsulan.

<sup>7</sup> Ugaid ne embiya kenà kew ebpitas kediey su intahù niyu te hinawa ke penurù ku," ke si Hisus, "ne misan engkey se ebuyen niyu kediey ne ibehey ku keniyu.

<sup>8</sup> Su embiya ebpemahas kew te merapung ne egkereyù ke Amey ku ne Eleteala, ne iring ketà se kegketueni te sikiyu ne benar ne edumdumaan ku.

<sup>9</sup> "Ini se kegkelimù ku keniyu," ke si Hisus, "ne iring te kegkelimù dut te Amey ku kediey, ne kenà kew pitas dut te limù ku keniyu.

<sup>10</sup> Embiya edtumanen niyu ini se minge suhù ku keniyu ne kenà kew egkepitas kayi te limù ku keniyu, iring ded dema kedì te midtuman ku ke minge suhù te Amey ku kediey ne kenà a rema egkepitas diyà te limù din kediey.

<sup>11</sup> Mibpeketuenan ku ini keniyu su apey niyu igkehalew te kebpeneheewita niyu te minge suhù ku iring dut te kegkehalew ku te kebpeneheewit ku te suhù kedì te Amey ku," ke si Hisus. "Ne ketà ne egkehalew kew nevenar!

<sup>12</sup> Ne ini ve ke suhù ku keniyu te pelimlimuey kew iring dut te limù ku keniyu.

<sup>13</sup> Embiya ruen etew ne ebpepatey su limù din dut te ruma rin, ne arà en imbe ke punggus te limù.

<sup>14</sup> Ne sikiyu ke minge sepakat ku embiya edtumanen niyu ini se minge suhù ku keniyu.

<sup>15</sup> Kenà en be edsugsuhuen ke id-umew ku keniyu su kenà egketuenan dut te edsugsuhuen ke ebeelan dut te edsuhùsuhù kandin. Ugaid ne iyan ku en mulà id-umew keniyu ne minge sepekat ku su langun te nerineg ku riyà te Amey ku ne Eleteala ne impayag ku keniyu.

<sup>16</sup> Kenà sikiyu se mibpemili kediey ugaid ne siaken se mibpemili keniyu, ne midtendù ku sikiyu te ebpemenudtul dut te Meupiya ne Tudtul su apey kew mekepemahas te ulaula ne ebpekesuhat te hinawa te Eleteala su ebpekeperayun ke keupiya rin. Embiya iring ketà ne misan engkey ne ebuyen niyu riyà te Amey ku ne Eleteala sabap dut te kebperetiyyaya niyu kediey, ne ibehey rin keniyu.

<sup>17</sup> Ini ve ke suhù ku keniyu," ke si Hisus, "te pelimlimuey kew."

#### *Ke Minge Etew ne Egkunterà ki Hisus*

<sup>18</sup> "Embiya edèdeetan kew te minge etew kayi te ampew te dunya ne egkunterà te Eleteala," ke si Hisus, "ne kenà kew meinuinu su tentenuri niyu te siak ke neuna ne ingkeepes dan.

<sup>19</sup> Embiya ruma kew ran te egkunterà te Eleteala kayi te ampew te dunya, ne kenà kew ran edèdeetan. Ugaid ne geina te mibpemili ku sikiyu ne kenà kew en duma nikandan, tembù be egkeepes dan keniyu.

<sup>20</sup> Tentenuri niyu iya ke migkahi ku te, 'Warà uripen ne iyan en mepurù dut te ebpengunguripen kandin,' " ke si Hisus. "Ne embiya midrasey a ran, ne iyan kew pè be kenà resaya ran. Embiya midtuman dan ke penurù ku, ne edtuman dan dema dut te penurù niyu.

<sup>21</sup> Iyan dan kedresaya keniyu ne sabap dut te kebperetiyyaya niyu kediey su warà dan metueni ke Eleteala ne midsuhù kedì.

<sup>22</sup> Embiya warà a mebpengkayì te ampew te dunya," ke si Hisus, "te ebpayag dut te lalag ku kandan, ne warà igkeisuhat kandan te salà. Ugaid ne geina te impayag ku en ini kandan ne warà en liwahì dan.

<sup>23</sup> Ketà be ne misan entei se egkeepes kediey, ne igkeepes din rema ke Amey ku ne Eleteala.

<sup>24</sup> Duen mid-ulaula ku ne nekita ran ne mekegeyip ne warà meveeli te misan entei ne menusiya, ne embiya ve perem warà dan ini mekita ne ruen igkeliwahì dan te salà dan," ke si Hisus. "Ugaid ne nekita ran en ini, ne ingkeepes key ran ki Amà.

<sup>25</sup> Ugaid ne iyan ebpuun te kegkeepes dan kedì ne egketuman ke impesurat diyà te penduan dan ne egkahi te, 'Neepees dan kedì misan warà puunan din.' "

<sup>26</sup> Ne migkahi pà maa si Hisus te, "Ibpepengkayi ku te keniyu arà se ed-ingeranan te Edtavang ne riyà ebpuun te Amey ku su sikandin ke Kedeseenan ne Ebpetuntul te Menusiyà ne ebpesabut keniyu te benar mekeatag te Eleteala. Ne embiya ebpekeuma en sikandin kayi ne ebpesabut sikandin mekeatag kediey.

<sup>27</sup> Ne ebpesabut kew rema mekeatag kediey su igenat te rudsuan te kinepenurù ku kayi te ampew te dunya ne telteleduma kiyu en."

## 16

<sup>1</sup> "Langun kayi ne migkahi ku keniyu," ke si Hisus, "su apey kew kenà edsuwey kedi ketà te hewii ne egked-ulaula ini.

<sup>2</sup> Su ke minge etew ne mid-engkenà kedi ne ebpeawà keniyu rut te baley ne ebpedegian te minge Hudiyanan te penduan dan. Uya, su egkeuma ke hewii ne ke etew ne ed-imatey keniyu ne iyan din kunaan ke netuman din ke kiyug te Eleteala.

<sup>3</sup> Iring ketà se ed-ul-ulaan dan keniyu su warà dan metueni ke Amey ku ne Eleteala wey warà a ran dema metueni.

<sup>4</sup> Ugaid ne egkehiyan ku ve ini keniyu neraan," ke si Hisus, "su embiya egked-ulaula en ini ne egketenuran niyu te ingkekahi ku en keniyu. Ini ne warà ku kehiya keniyu te aney en," ke si Hisus, "su geina te ebpemekeduma kiyu pà."

### *Ke Helevek Dut te Kedeseenan ne Ebpetuntul te Menusiyà*

<sup>5</sup> "Ugaid ne guntaan te ed-uli ad diyà te Amey ku ke midsuhù kedi, ne warà senge etew rà keniyu ne mid-insà kediey te, 'Endei ka ebpesinaru?'

<sup>6</sup> Guntaan te migkehiyan ku sikiyu, ne egkemutuwan kew en.

<sup>7</sup> Sebenarbenar ini se egkehiyan ku keniyu," ke si Hisus, "iyan pà meupiya ne egkeewaan ku sikiyu, su embiya kenà ne kenà ebpepengkayi se Edtavang keniyu. Ugaid ne embiya egenat ad ne ibpepengkayi ku sikandin kayi te keniyu.

<sup>8</sup> Ne ketà te kebpekeuma rin ne ibpesabut din dut te minge etew kayi te ampew te dunya ke ulaula ne meraat, ne ibpesabut din dema ke ulaula ne metidtu wey ibpesabut din dema mekeatag te kedusa te Eleteala te minge etew ne warà mebperetiyaya kandin.

<sup>9</sup> Ibpesabut din kandan te meraat ke ulaula ran su warà dan mebperetiyaya kediey," ke si Hisus.

<sup>10</sup> "Ibpesabut din kandan ke ulaula ne metidtu su ketà te ked-uli ku diyà te Amey ku ne egketenan dan se netuman ku en ke langun ne insuhù din kediey, ne id-anew ad nikiyu te mata.

<sup>11</sup> Ne ibpesabut din dema ke kedusai kandan te Eleteala su neisuhat en te kukuman si Setanas ke datù te pekaid ke unuten dan te egkunterà te Eleteala."

<sup>12</sup> "Merakel pà perem," ke si Hisus, "se egkehiyan ku keniyu, ugaid ne kenà niyu pà egketegkad.

<sup>13</sup> Ugaid ne ketà te kebpekeuma dut te Kedeseenan ne Ebpetuntul te Menusiyà kayi te keniyu, ne sikandin en ke ebpetuntul keniyu te langun ne benar. Ne ini se ibpesabut din ne kenà kayi rà te kandin ne itungan, ugaid ne iyan din ibpesabut ne endei rà ke nerineg din diyà te Amey ku ne Eleteala. Ne ibpesabut din ded lavew keniyu ke egked-ulaula ne ebpeleungguma," ke si Hisus.

<sup>14</sup> "Ne ebentuhan a rin su ibpesabut din ke minge lalag ku keniyu wey ke ulaula ku.

<sup>15</sup> Langun ne riyà te Amey ku ne kediey red dema, tembù be migkahi ku keniyu ne ibpesabut din keniyu ini se minge lalag ku su ke lalag te Amey ku ne kedi ded dema ne lalag."

### *Ke Egkemutu ne Iyan Din Egkeveluyan ne Kehelawan*

<sup>16</sup> "Kenè en utew meuhet ne id-anew a niyu te mata, ugaid ne iseg-iseg ne egkekita a niyu red," ke si Hisus.

<sup>17</sup> Duen edumdumaan din ne mibpein-inseey te, "Engkey se meana kayi te migkahi rin te, 'Kenè en utew meuhet ne id-anew a niyu te mata, ne iseg-iseg ne egkekita a niyu red.' Ne migkahi pà maa sikandin te, 'Su ed-uli ad diyà te Amey ku.' "

<sup>18</sup> Ne mibpein-inseey ran maan te, "Engkey ve vuwa ini se kinekahi rin te 'kenà utew meuhet'? Kenà tew egkesebutan ayan."

<sup>19</sup> Netueanan ni Hisus te ruen id-insà dan kandin ne migkahi en sikandin te, "Geina ne migkahi a te, 'Kenè en utew meuhet ne id-anew a niyu te mata, ne iseg-iseg ne egkekita a niyu red.' Maa, ini ve arà se ibpein-inseey niyu?

<sup>20</sup> Sebenarvenar ini se egkehiyan ku, ebpekesinehew kew kayi te egketemanan ku, ugaid ne ke minge etew ne ed-engkenà kediey ne egkehalew ran. Ne misan egkemutu kew, ne iyan din egkeveluyan ne egkehalew kew.

<sup>21</sup> Iring ded dema te meritan ne ebpelelesut en te ked-anak din su neuma en ke kegerasey rin. Ugaid ne embiya nekehemew en ke vatà, ne egkelipatan din en ke mesakit su nehalew sikandin dut te behu pà ne in-anak din.

<sup>22</sup> Ne iring kew re be rema ketà su guntaani ne egkemutu kew, ugaid ne ebpekidbalak e red maa keniyu ne egkehalew kew nevenar, ne warà misan entei ne ebpekeawà kayi te kehelawan niyu.

<sup>23</sup> “Embiya egkeuma en arà se hewii,” ke si Hisus, “ne warà en kemeyidan te ebuyù kew kediey. Sebenarvenar ini se egkehiyen ku te misan engkey se ebuyuen niyu riyà te Amey ku, embiya sabap dut te kebperetiyyaya niyu kediey ne ibehey rin keniyu.

<sup>24</sup> Taman guntaani ne warà kew pà mibuyù diyà te kandin sabap dut te kebperetiyyaya niyu kediey. Buyù kew en kandin sabap dut te kebperetiyyaya niyu kediey, na egketelimà niyu se rekela ne kehelawan niyu.”

*Netalew ni Hisus Ke Datù te Pekaid ne Egkamal Kayi te Ampew te Dunya*

<sup>25</sup> “Ini se impesabut ku keniyu ne ralan te sempità,” ke si Hisus. “Ugaid ne ruen hewii ne egkeuma ne kenà ad ebpenempità su iyan ku kebpekidlalag keniyu mekeatag te Amey ku ne metidtu rà ne lalag.

<sup>26</sup> Embiya egkeuma en arà se hewii ne iyan kew en buyù riyà te Amey ku su sabap te kebperetiyyaya niyu kediey, su kenà en siaken se ebuyù keniyu diyà te Amey ku.

<sup>27</sup> Su igkelimù kew nevenar te Amey ku ne Eleteala geina te igkelimù a niyu sabap geina te mibperetiyyaya kew te riyana e bpuun te kandin.

<sup>28</sup> Uya,” ke si Hisus, “diyan a mebpuun te Amey ku su mibpengkayi a te ampew te dunya, ne guntaani ne ed-ewaan ku en ini se dunya su ed-uli ad diyà te Amey ku.”

<sup>29</sup> Ketà ne migkahi ke edumdumaan ni Hisus te, “Kenà en sempità se lalag nu kenami guntaani su metidtu rà ke lalag nu guntaani.

<sup>30</sup> Netuenan dey en te netuenan nu ke langun, su misan ke minge insà ne warà pà ingkeinsà keykew ne netuenan nu. Tembù be mibperetiyyaya key en te riyà ka ebpuun te Eleteala.”

<sup>31</sup> Ne migkahi si Hisus kandan te, “Maa, mibperetiyyaya kew en be guntaani?”

<sup>32</sup> Mehaan en egkeuma ke hewii ne egurunsuwey kew su ed-uli kew riyà te ed-ubpaan niyu, ne egkeewaan a niyu en. Ugaid ne misan egkeewaan a niyu en ne kenà ma sebeveka ku rà, su iyan ku ruma ne ke Amey ku ne Eleteala.

<sup>33</sup> “Langun kayi ne migkahi ku keniyu,” ke si Hisus, “su apey ebmelintad ke hinawa niyu te kebpekidseveka niyu kediey. Su kayi te ampew te dunya ne edresayen kew te minge etew ne ed-engkenà kediey. Ugaid ne misan iring ketà ne kenà niyu ebpilaya ke hinawa niyu, su netalew ku en ke datù te pekaid ne migkamal kayi te ampew te dunya!”

## 17

*Mibpengeningeni si Hisus Mekeatag Dut te Menge Edumdumaan Din*

<sup>1</sup> Guna su nepasad ni Hisus te egkahi diyà te edumdumaan din, ne midlingakà diyà te langit se ebpengeningeni te,

“Amà, ini en ke hewii te kedtumana nu ke kiyug nu. Ipekita nu te minge etew ke raman ne kenà egkeseupama dut te Anak nu apey ku ibpekepekita ke raman nu ne kenà egkeseupama.

<sup>2</sup> Su imbehey nu kediey se kebayaàbaya dut te langun ne menusiya apey ke minge etew ne imbehey nu kediey ne egkevehayan te umur ne warà edtemanan din.

<sup>3</sup> Su ke ralan te kebpeketelimà te umur ne warà edtemanan din ne arà se kegkesebuti te minge etew te sikew rà iya ke benar ne Eleteala, wey egkesebutan dan dema te siaken si Hisu Kristu ke Anak nu ne midsuhù nu.

<sup>4</sup> Su kayi te dunya ne impekita ku en ke kerekela te gehem nu kayi te ulaula ku, ne ke insuhù nu kediey ne nepasad ku en.

<sup>5</sup> Na guntaani, Amà, te ed-uli ad diyà te etuvangan nu ne iuli nu en kediey ke raman ku ne kenà egkeseupama iring dut te aney en ne raman ku te riyana e pà te keykew te warà pà limbaha ini se dunya.

<sup>6</sup> “Ini se minge etew kayi te dunya ne imbehey nu kediey, Amà,” ke si Hisus, “ne impesabut ku en kandan mekeatag te sikew ne Eleteala. Su andang dan ne keykew te warà nu pà imbehey kediey, ne midtuman dan en ke insuhù nu kandan.

<sup>7</sup> Ne netuenan dan en uman te ini se langun ne egkeveelan ku ne riyà dà ebpuun te keykew.

<sup>8</sup> Su impenundul ku en kandan ke impesabut nu kediey ne mibperetiyyaya ran en ini. Su netuenan dan te riyà a iya ebpuun te keykew, ne mibperetiyyaya ran te sikuna ke midsuhù kedi.

<sup>9</sup> “Ketà be, Amà, ne ibpengeningeni ku sikandan,” ke si Hisus. “Kenà ku iyan ebuyuen diyà te keykew se tevangi nu ke menge etew ne warà medtelimà kedì, ugaid ne iyan ku ebuyuen ne tevangi nu ke menge etew ne imbehey nu kediey su keykew red ma sikandan.

<sup>10</sup> Su langun kayi ne menge etew ne kediey ne keykew red, ne ke langun ne menge etew ne keykew ne kediey red dema. Ne kayi te kandan se puunan te egkereyà a.

<sup>11</sup> Ne guntaani ne ed-uli ad diyà te keykew ne kenà ad ed-ubpà kayi te dunya, ugaid ne ini se menge etew ta ne kayi ran ded te ampew te dunya. Is, Amà ne berekat,” ke si Hisus, “ipata nu sikandan te ralan te kerekelà te gehem te ngaran nu ne imbehey nu kediey su apey meseveka sikandan iring dut te kegeseveka ta.

<sup>12</sup> Su gewii te ini e pà te kandan ne mid-ipat ku sikandan te ralan te kerekelà te gehem te ngaran nu ne imbehey nu kediey. Uya, mid-ipat ku sikandan su warà seveka rà kandan ne neawà liyu rà ketà te senge etew ne iyan dà nekahi neraan ne ed-ulug kediey. Neawà sikandin su apey egketuman ke impesurat ne Lalag nu.

<sup>13</sup> “Ne guntaani,” ke si Hisus, “ne ed-uli ad diyà te keykew, Amà, ugaid ne geina te kayi e pà te ampew te dunya ne ebuyuen ku te menu ma ke egkehalew ran iring dut te dekelà ne kegkehalew ku.

<sup>14</sup> Su langun ne menge lalag nu ne impesabut ku en kandan, ugaid ne ingkeepesi ran dut te menge etew kayi te ampew te dunya ne migkunterà keykew su geina te mibpekidsuwey ran dut te menge kunterà nu, iring te siaken ne warà a mebpekid-amur te menge kunterà nu.

<sup>15</sup> Kenà ku iyan ebuyuen keykew ne iawà nu ini se menge etew ta kayi te dunya, ugaid ne iyan ku ebuyuen keykew te ipata nu sikandan su apey ran kenà meahew ni Setanas ke datù te pekaid.

<sup>16</sup> Su sikandan ne kenà duma rut te menge etew kayi te ampew te dunya ne egkunterà kenikew,” ke si Hisus, “iring kedì te kenà a ruma dut te menge etew ne egkunterà kenikew.

<sup>17</sup> Su geina te ke lalag nu ke ebpuunan te langun ne benar, ne kayi puunan ne beluya nu sikandan ne tuneu ne sugshuen nu su apey idtepeney ran ke hinawa ran diyà te keykew.

<sup>18</sup> Su iring te kinesuhù nu kediey kayi te ampew te dunya, ne edsuhuen ku rema sikandan su apey ran ikepesabut ke lalag nu dut te langun ne menusiya.

<sup>19</sup> Su atag dut te limù ku kandan ne idrumakan ku keykew ini se hinawa ku su apey ran dema idrumakan nevenar ke hinawa ran keykew.

<sup>20</sup> “Kenà ku iyan dà ebuyuen keykew,” ke si Hisus, “ne ini se menge etew ta guntaani, ugaid ne ke langun ne ebperetiya kediey keuremà sabap dut te kebpemesabut dan.

<sup>21</sup> Su apey langun te sikandan ne meseveka, Amà, iring te ini ka te kedì wey riyau a rema te keykew. Uya, meseveka ran perem kayi te keyta su apey ebpekeperetiya ke menge etew kayi te ampew te dunya te midsuhù a nu.

<sup>22</sup> Ne ini se kegkevantug ku ne imbehey nu kedì ne imbehey ku rema diyà te kandan, su apey egkeseveka ke itungan dan iring te kegkeseveka ta.

<sup>23</sup> Su riyau a te kandan iring dut te ini ka rema te kediey, apey egkeseveka rà ke itungan dan. Ne ketà ne egketuenan te langun ne menusiya te midsuhù a nikuna, ne egketuenan dan dema te igkelimù nu sikandan iring dut te limù nu kediey.

<sup>24</sup> “Is, Amà, ini se menge etew ne imbehey nu kediey,” ke si Hisus, “ne iyan ku kiyug ne riyà dan te kediey ne ed-ubpaan su apey ran egkekita ke mekegeyip ne raman ku. Su ini se raman ku ne imbehey nu kediey su ingkelimù a nikuna rengan te warà pà limbaha ini se dunya.

<sup>25</sup> “Is, Amey ku ne metidtu,” ke si Hisus, “ini se menge etew kayi te ampew te dunya ne egkunterà kenikew, ne warà dan metueni ke ente ka. Ugaid ne netuenan ku sikew wey ini se menge etew ne imbehey nu kedì ne netuenan dan te sikuna ke midsuhù kediey.

<sup>26</sup> Impesabut ku en kandan ke ente ka, Amà, ne ini ne ibperayun ku pà te ebpesabut kandan apey ebmeilut ke kebpelimlimuey ran iring dut te limù nu kediey su apey riyau a rema te kandan.”

## 18

<sup>1</sup> Guna su nekeipus si Hisus te ebbingeningeni ne mid-awà en sikandin abpeg dut te edumdumaan din, ne mid-apat dan te beuhan ne ed-ingaranan te Kidrun. Su ruen pemulaan dutun ne mibpemulaan te menge kayu ne ketà dan be midseruk.

<sup>2</sup> Ne si Hudas, ke ed-ulug ki Hisus te ked-imatey, ne neketuntul ketà su tatap ne egkevurunan eni Hisus dut te edumdumaan din.

<sup>3</sup> Ketà ne nekeuma en kayi te pemulaan si Hudas se midumaan te menge sundaru wey ke menge gurudyà rut te Nekebpuru ne Valey te Eleteala se midsuhù dut te menge mepurù te terebpelengesa wey ke menge Peresiyu. Nekeuma ran en se ebpenusulù ne sangkap dan nevenar te metarem.

<sup>4</sup> Ugaid ne netuenan ni Hisus ke langun ne egketemanan din ne midsinuhung din en sikandan se egkahi te, "Engkey ma ini se ebpemengaan niyu?"

<sup>5</sup> Midtavak dan te, "Si Hisus ne ebpuun te Nesarit."

"Siak ini ke ebpemengaan niyu," ke si Hisus.

Ne elin en dema dut te menge sundaru si Hudas, ke ed-ulug ki Hisus.

<sup>6</sup> Guna su nekahi ni Hisus te, "Siaken en iya ini," ne nekesunud dan ne nengepiley ran.

<sup>7</sup> Ne mid-insà maa si Hisus te, "Entei iya ini se ebpemengaan niyu?"

Ne midtavak dan maa te, "Si Hisus ne ebpuun te Nesarit."

<sup>8</sup> Migkahi en maa si Hisus te, "Migkahi ku en ura keniyu te siaken en ini iya. Embiya ve siaken ke ebpemengaan niyu, ne kenà niyu rà iamung te edsigkem ini se menge ruma ku."

<sup>9</sup> (Iring ketà se kinekahi rin te kenà ibpeamung te edsigkem ke menge ruma rin su apey ini se nekahi rin dut te kinepangingeni rin geina ne egketuman te, "Warà seveka rà, Amà, ne egkeawà dut te langun ne menge etew ne imbehey nu kediey.")

<sup>10</sup> Nekita rà ni Simon Pedro se iring ketà ne mid-ulavut din ke sundang din ne midtibas din en ke sugsuhuen dut te pinekebmepurù te terebpelengesa, ne nesamping en ke kewanan ne telinga rin. Ini se edsugsuhuen ne ed-ingaranan ki Malco.

<sup>11</sup> Ne midawey ni Hisus si Pedro se egkahi te, "Ilipi nu ayan se sundang nu! Su engkey, iyan nu kunaan ke kenà ku egkegaga te edtigker ke kemeresayan ne imbehey kedì te Aney ku?"

#### *Mibpeneheewit si Hisus Diyà te ki Anas*

<sup>12</sup> Ketà ne midsigkem dan en si Hisus ne mibakù dan en dut te menge sundaru wey ke unutan dan abpeg dut te menge gurudyà ne Hudiyanen.

<sup>13</sup> Ne riyà dan unai te ed-ewit si Hisus te ki Anas, ke enuhang ni Kayipas ke pinekemepurù dut te langun ne terebpelengesa te arà ne rahun.

<sup>14</sup> Si Kayipas ke nekekahi rut te menge Hudiyanen te iyan dà tumù se senge etew rà se ebpatay ne ebpekeselidig dut te langun ne menge etew.

#### *Imparew ni Pedro te Teleduma Ran ki Hisus*

(Mateo 26:69-70; Marcos 14:66-68; Lucas 22:55-57)

<sup>15</sup> Guna su neewit dan en si Hisus, ne midtelelukun en si Simon Pedro wey senge etew pà ne edumdumaan ni Hisus. Ini se senge etew ne edumdumaan ni Hisus ne andang ne nekilala dut te keunutan te terebpelengesa, ne ketà be ne nekeruma sikandin ki Hisus te edlusud diyà te lamalama rut te valey te keunutan te terebpelengesa.

<sup>16</sup> Ugaid ne si Pedro ne riyà dà te luwal te humawan. Ne ketà ne mibpelilived diyà te gumawan ini se seveka ne edumdumaan ni Hisus ne nekilala rut te egkeunutan te terebpelengesa ne middlelehan din en ke meritan ne ebantey rutun te gumawan te ebpelusuren si Pedro, ne arà dà ne impelusud din en.

<sup>17</sup> Ne ketà ne mid-insà ke meritan ne ebantey te humawan ki Pedro te, "Maa, kenà ka senge etew ne edumdumaan keninyan te etew ne midsigkem?"

Midtavak si Pedro te, "Kenà, kenà siak!"

<sup>18</sup> Ne rutun te lamalama ne mid-uyag dan te apuy te uring ke menge sugsuhuen kayi te valey elin dema ke menge bantey rut te nekebpuru ne valey te Eleteala su ebpinginarang dan su meadsil. Ne arà dà dema ne mid-uvey en si Pedro su ed-inarang dema sikandin.

#### *Mibpenginsaan si Hisus Dut te Pinekemepurù te Menge Terebpelengesa*

(Mateo 26:59-66; Marcos 14:55-64; Lucas 22:66-71)

<sup>19</sup> Ne mibpenginsaan ni Anas ke Pinekemepurù te menge Terebpelengesa si Hisus mekeatag dut te edumdumaan din wey ke penurù din.

<sup>20</sup> Ne midtavak si Hisus te, "Ini se penurù ku ne warà mekeeles su riyà te merakel ne etew. Su riyàn a layun mibpenurù te menge valey ne ebpengedian te Hudiyanen te



penduan dan wey riyà dema te Nekebpuru ne Valey te Eleteala su arà ke egkevurunan te langun ne menge Hudiyanen. Warà impenurù ku ne nekeeles.

<sup>21</sup> Ne meambe ke iyan a nu ed-insaan? Iyan nu insai," ke si Hisus, "ke nekerineg kediey su netuenan dan ke migkahi ku kandan."

<sup>22</sup> Guna su nekahi ini ni Hisus ne midtabpi en sikandin te seveka ne gurudyà. Ke se gurudyà te, "Sikuna pè be iya se ebpeketikàtikà ne ebpenumpun te iring kenian kayi te Pinekemepurù te menge Terebpepengesa!"

<sup>23</sup> Migkahi si Hisus kandin te, "Embiya meraatey ini se migkahi ku, ne kehiya nu ke engkey se meraat kayi te etuvangan te merakel. Ugaid ne embiyan warà meraat din, ne meambe ke midtabpi a nu?"

<sup>24</sup> Neipus ni Anas te ed-insà si Hisus ne impelaus din en diyà te ki Kayipas ke enuhang din ne iyan Pinekemepurù te langun ne menge terebpepengesa. Si Hisus ini ne nevakù pa lavew.

*Imparew maa ni Pedro te Teleduma Ran ki Hisus  
(Mateo 26:71-75; Marcos 14:69-72; Lucas 22:58-62)*

<sup>25</sup> Ne ketà te lamalama te Pinekemepurù te menge Terebpepengesa ne ed-inarang pa lavew si Pedro. Mid-insaan te menge etew sikandin te, "Kenà ka senge etew ne edumdumaan kenian te etew an?"

Ugaid ne mibparew si Pedro, "Kenà, kenà siaken!"

<sup>26</sup> Ne ruen ketà seveka ne edsugsuhuen te Pinekemepurù te menge Terebpepengesa ne megeget din arà se nesempingan ni Pedro te telinga rin. Ne migkehiyan din en si Pedro te, "Iring te nekita ku sikuna geina riyà te kedsigkema rey ki Hisus, ne engkey, duma ka nikandin?"

<sup>27</sup> Ne mibparew en maa ni Pedro te, "Kenà!" Ne arà dà iya ne mid-ukarà en ke manuk.

*Mid-ewit Dan si Hisus Diyà te ki Pilatu ke Gubinedur ne Rumanu  
(Mateo 27:1-2, 11-14; Marcos 15:1-5; Lucas 23:1-5)*

<sup>28</sup> Ed-awà ketà te valey ni Kayipas ne mid-ewit dan si Hisus se ebpendiyà te turuhan ni Pilatu ke gubinedur ne Rumanu, ne mesmeselem pà. Ugaid ne ke menge egkeunutan te Hudiyanen ne kenà edlusud ketà te turuhan su apey ran kenà mekesurang dut te edtenuran ne betasan mekeatag te ebpenlùlù. Su embiyan edlusud dan te valey te menge etew ne kenà eduma te edtenuran dan ne betasan dan te kedlùlù, ne kenà dan ebpekeamung dut te kevruran dan te Pista te Kedsehari te Suluhuen.

<sup>29</sup> Geina te arà ke betasan dan ne midlihawang si Pilatu su edsinuhung kandan ne ke sikandin te, "Engkey ma se id-isuhat niyu ne kukuman kayi te etew ini?"

<sup>30</sup> Midtavak ke menge egkeunutan te, "Embiyan warà salà din ini ne kenà dey ebpenheewiten kayi te keykew."

<sup>31</sup> Ne migkahi si Pilatu kandan te, "Kua niyu sikandin ne iyan kew en kukum kandin su ruen ma penduan niyu ne egkerumaan."

Ne migkahi ke menge egkeunutan te, "Geina te sikami ne Hudiyanen ne egkekemalan dut te sikiyu ne menge Rumanu ne warà ketau rey te kebpeimatey kandin."

<sup>32</sup> (Ned-ulaula ini su apey metuman ke nekahi ni Hisus se idlansang sikandin diyà te pinebelavag ne kayu te kebpeimetayi kandin.)

<sup>33</sup> Ne midsuri medlusud si Pilatu diyà te turuhan ne mid-umew rin si Hisus ne mid-insaan te, "Maa, datù ke ves ini te menge Hudiyanen?"

<sup>34</sup> Midtavak si Hisus te, "Maa, keykew rà ayan ne itungan se in-insà nu kedi te ratù a etawa riyà nu merineg ini te ruma ne etew?"

<sup>35</sup> Migkahi si Pilatu te, "Meambe, Hudiyanen a? Su keykew red ne menge ruma ne Hudiyanen wey ke menge mepurù te terebpepengesa ke mibpenheewit keykew kayi te kedi. Ne engkey se mid-ulaula nu?"

<sup>36</sup> Midtavak si Hisus te, "Ini se kedi ne edetuan ne kenà kayi te ampew te dunya, su embiyan ma kayi ne mibpekibunù en ke menge sakup ku apey kenà a mesigkem te menge Hudiyanen. Ugaid ne ini se edetuan ku ne kenà kayi te ampew te dunya."

<sup>37</sup> Ketà ne migkahi si Pilatu te, "Engkey, ratù ke ves?"

Midtavak si Hisus te, "Benar ayan se nekahi nu ne ratù a! Su iyan ku kinepengkayit ampew te dunya ne impeanak te menusiyà su ebpesabut a rut te benar. Ne misan entei en ne etew se edtampil dut te benar, ne ebpepinge kediey."

<sup>38</sup> Arà dà ne mid-insà si Pilatu te, "Engkey se meana te benar?"

Nekahi rin dà arà ne midlihawang en maa si Pilatu riyà te menge Hudiyanen ne migkahi te, "Warà egketuen ku ne id-isuhat ku kandin."

<sup>39</sup> Ugaid ne kayi te keniyu ne ruen betasan niyu te embiya egkeuma en ke Pista te Kedsehari te Suluhuen ne ibpelihawang ku se senge etew ne bilanggù ne ebuyuen niyu. Maa, egkesuatan niyu ve ne ibpelihawang ku ini se ratù niyu te menge Hudiyänen?”

<sup>40</sup> Nerineg den dà arà ne mibpemensag dan te, “Kenà, kenà sikandin! Iyan tumù ne si Barabas!” (Si Barabas ini ne tulisan.)

## 19

### *Migkukum Dan te Ed-imetayan si Hisus*

<sup>1</sup> Nerineg dà arà ni Pilatu ne midlusud en maa sikandin te turuhan din ne migkuwa rin en si Hisus ne imperuug din en.

<sup>2</sup> Guna su neipus dan te edruug sikandin ne ruen impetengkulu kandin ne mibeelan te menge sundaru ne ruhiyen ne wahed, ne pinelelembung dan te merihà su uvag kun datù.

<sup>3</sup> Ne mid-uwey ran sikandin te kedsumpelita ran te, “Mebereumur ka, ne ratù te menge Hudiyänen!” Ne arà pà ne midtabpi dan sikandin.

<sup>4</sup> Ne midlihawang en manen si Pilatu riyà te menge etew ne migkahi te, “Ibpelihawang ku en maa sikandin kayi te keniyu su apey niyu metueni te warà iya netuen ku ne kewagib ne idselaa kandin.”

<sup>5</sup> Ne ketà ne midlihawang en si Hisus se impetengkulu te ruhiyen wey midlelembung te merihà. Ke si Pilatu te, “Tengtengi niyu en be sikandin su ini en!”

<sup>6</sup> Guna su nekita rut te menge mepurù te terebpelengesa wey ke menge gurudyà si Hisus ne mibpemensag dan en te, “Idlansang sikandin diyà te ebpebelevahan ne kayu!”

Ne migkahi si Pilatu te, “Iyan kew en lansang kandin diyà te pinebelavag ne kayu, su warà egketuen ku ne arus ne ibpatey rin.”

<sup>7</sup> Ne migkahi ke menge Hudiyänen te, “Kayi te penduan dey ne iyan iya se ebpeimetayan ini se etew su edsumpalit sikandin su egkahi te Anak te Eleteala.”

<sup>8</sup> Guna su nerineg ni Pilatu ini ne mid-iseg se kegkeandek din.

<sup>9</sup> Midlusud maa si Pilatu riyà te turuhan din ne med-insà maa si Hisus te, “Endei ke ma ebpuun?” Ugaid ne warà medtavak si Hisus.

<sup>10</sup> Ne migkahi en maa si Pilatu te, “Meambe ke kenà ka edtavak? Warà nu ves metueni se siaken se ebayàbayà te kebpeliyu keykew etawa kebpelansang ku keykew riyà te kayu!”

<sup>11</sup> Ne midtavak si Hisus te, “Warà bayàbayà nu kediey embiya kenà Eleteala se mibehey keykew. Tembù ke etew ne mibpeewit kediey kayi te keykew ne muna pà ke salà din dut te keykew.”

<sup>12</sup> Guna maa su nerineg ni Pilatu arà ne neilut nevenar ke hinawa rin te kebpemengà din te ralan te kebpeliyu din ki Hisus. Ugaid ne mibpemensag maa ke menge Hudiyänen te, “Embiya iyan nu ibpeliyu ini se etew, ne egkunterà ka dut te ratù tew riyà te Ruma ne si Cesar. Su iring kayi ne etew se edatùdatù ne egkunterà ki Cesar.”

<sup>13</sup> Nerineg dà ini ni Pilatu ne mibpeneheewit din en si Hisus te edlihawang ne mibpinuu sikandin te ebpinuwan din te egkukum diyà te mid-ingeranan te Saag ne Simintu. (Ne kayi te kinehiyan te Hibruhanen ne “Gebata.”)

<sup>14</sup> Ne ketà ne ed-ikeremaen dà ke Pista te Kedsehari te Suluhuen ne malù en egkeudtu ke andew.

Ne migkahi si Pilatu dut te menge Hudiyänen te, “Ini en ke datù niyu!”

<sup>15</sup> Ne mibpemensag ke menge Hudiyänen te, “Id-awà su ed-imetayan! Ibpelansang nu sikandin diyà te kayu!”

Migkahi si Pilatu te, “Maa, ibpelansang ku ve ini se ratù niyu riyà te pinebelavag ne kayu?”

Ne mibpemensag ke menge mepurù te terebpelengesa te, “Seveka rà se ratù dey ne si Cesar dà.”

<sup>16</sup> Arà dà ne imbehey en kandan ni Pilatu si Hisus diyà te kandan te ibpelansang sikandin diyà te kayu.

### *Inlansang si Hisus Diyà te Pinebelavag ne Kayu*

(Mateo 27:32-44; Marcos 15:21-32; Lucas 23:26-43)

Ketà ne mid-ewit dan en si Hisus.

<sup>17</sup> Ne midlihawang en si Hisus se edtiang dut te pinebelavag ne kayu su ebpendiyà dan en te dapit ne ed-ingeranan te menge “Tulan te Ulu.” (Ne riyà te kinehiyan te Hibruhanen ne ed-ingeranan te “Gulguta.”)

<sup>18</sup> Ne rutun dan inlansang si Hisus diyà te pinebelavag ne kayu, ne ruen deruwa ne etew ne inlansang dan dema diyà te kayu te idsenge riveluyà ni Hisus.

<sup>19</sup> Ne ruen insurat ni Pilatu ke gubinedur ne impetahù diyà te divavew rut te pinebelavag ne kayu. Ne ini se insurat din ne egkahi te, "Si Hisus ne riyà ebpuun te Nesarit, ke Ratù te minge Hudiyanen."

<sup>20</sup> Merakel ne minge Hudiyanen se nekevasa ketà su ini se midlensangan dan ki Hisus ne uvey red ma te inged ne Hirusalim. Ne ini se insurat ne kinehiyan te Hibruhanen, Latin ke kinehiyan te minge etew te Ruma, wey ke kinehiyan te minge Gerisiyanen.

<sup>21</sup> Migkahi ke minge mepurù te terebpelengesa riyà te ki Pilatu te, "Warà nu perem insurat 'Ke Datù te minge Hudiyanen,' ugaid ne iyan nu rà perem insurat ne 'Migkahi rin te Siaken ke Datù te minge Hudiyanen.' "

<sup>22</sup> Ne migkahi si Pilatu te, "Ke insurat ku en ne arà dà iya!"

<sup>23</sup> Guna su neipus te minge sundaru te kedlansang dan ki Hisus diyà te pinebelavag ne kayu ne migkuwa ran ke minge belegkas din ne mibaadbaad dut te epat ne sundaru. Migkuwa ran dema ke inlelembung din ne mid-avel ne warà penai rin.

<sup>24</sup> Migkahi ke minge sundaru te, "Kenà tew ini ebpenebtevasen, ugaid ne ebunutbunut ki su apey tew egkekita ke engkey se ebpekegkemuney."

Ini ke mid-ulaula ran su apey egketuman ke impesurat ne Lalag te Eleteala rengan ne egkahi te,

"Mibaadbaad dan ke velegkas ku,

ne mibunutbunutan dan ke inlelembung ku."

Ne ini iya ke mid-ulaula te minge sundaru.

<sup>25</sup> Ne uvey ketà te pinebelavag ne kayu ne mid-it-itindeg ke iney ni Hisus, elin ke ayà din ne suled te iney rin, ne si Maria ke esawa ni Kelupas wey si Maria ne ebpuun te Magdala.

<sup>26</sup> Guna su nekita ni Hisus ke iney rin wey ke edumdumaan din ne ibpengelimù din nevenar, ne migkehiyan din ke iney rin te, "Inà, ini ke anak nu."

<sup>27</sup> Ne migkehiyan din dema ke edumdumaan din te, "Ini en ke iney nu." Ne in-awà dè be ketà ne andew ne diyan en med-ubpà ke iney ni Hisus te edumdumaan din.

#### *Ke Kinepatey ni Hisus*

*(Mateo 27:45-56; Marcos 15:33-41; Lucas 23:44-49)*

<sup>28</sup> Ketà ne netueanan ni Hisus te langun ne insuhù kandin ne nepasad din en ne migkahi en sikandin te, "Ebpekeinum a." Migkahi rin ini su apey egketuman ke impesurat ne Lalag te Eleteala rengan.

<sup>29</sup> Ruen ketà kelalew ne netehuan te tebà. Ne ruen migkuwa ran ne in-ered kayi te tebà, ne intahù dan diyà te reisek ne subpang ne ed-ingaranan te "isupu" ne arà be ke insugkar dan diyà te bèbà ni Hisus.

<sup>30</sup> Mid-esep ni Hisus ini se tebà ne migkahi en sikandin te, "Nepasad en ke langun ne insuhù kediey." Ne midungul dà sikandin ne minatey en.

#### *Mibpilak Dan ke Tengkiliran ni Hisus*

<sup>31</sup> Ne mibpendiyà ke minge Hudiyanen te ki Pilatu su ebuyuen dan te ebpenlepuan dan ke paa rut te minge etew ne impenlansang diyà te kayu su apey ran ebpatèy te mehaan ne egkeawà en ke bangkey ran. Ini ke ed-ul-ulaan dan su arà en ke keepunan te Diyemaat ne ebpekesurang dut te penduan dan embiya ruen bangkey riyà te pinebelavag ne kayu dut te hewii te Sepetu ke Hewii te Id-imeley ran. Ne ini ne Sepetu ne edtenuran dan nevenar su egketuman ke Pista ran te Kedsehari te Suluhuen.

<sup>32</sup> Migkiyug en si Pilatu ne mibpendiyan ke minge sundaru ne mibpenlepuan dan ke minge paa rut te deruwa ne etew ne inlansang diyà te idsengeriveluyà ni Hisus.

<sup>33</sup> Ugaid ne guna su kayi ran en te ki Hisus ne nekita ran se minatey en ne warà dan en penlepui sikandin.

<sup>34</sup> Ugaid ne ruen seveka ketà ne sundaru ne mibpilak din ke tengkiliran ni Hisus, ne arà dà ne ruen midtudà ne lengesa ne nekedsawug te wayig.

<sup>35</sup> Su siaken ini ke midsurat kayi ne edtitihusan ku te benar ini su nekita ku en iya. Uya, netueanan ku te benar ini, tembù be insurat ku su apey kew ebpekeperetiaya.

<sup>36</sup> Ned-ulaula ini su apey egketuman ke impesurat ne Lalag te Eleteala rengan ne egkahi te, "Warà misan seveka ne tulun din ne egkelepù."

<sup>37</sup> Ne ruen pà ruma ne Lalag ne impesurat te Eleteala ne egkahi te, "Edtengtangan dan ini se etew ne mibpilak dan."

#### *Ke Kineleveng ki Hisus*

*(Mateo 27:57-61; Marcos 15:42-47; Lucas 23:50-56)*

<sup>38</sup> Nepasad ini ne ruen senge etew ne ed-ingaranan ki Husi riyà ebpuun te Eremetiya se mibpendiyà te ki Pilatu su ebuyuen din ke bangkey ni Hisus. (Si Husi ini ne eduma

rema ki Hisus, ugaid ne in-eles din dà su egkeandek sikandin dut te menge egkeunutan te menge Hudiyanen.) Ne migkiyug si Pilatu te egkuan ni Husi ke bangkey ni Hisus, ne arà dà ne mibayaan en ni Husi ke bangkey ni Hisus ne mid-ewit din en.

<sup>39</sup> Si Nikudimu, ke etew ne mibpekibalak ki Hisus te senge kerukileman, se miduma kandin. Ne mid-ewit sikandin te menge lelima nepulù ne kilù ne periyemut pined-amut ke deruwa ne susun, mira wey alus.

<sup>40</sup> Ne migkuwa ran en ke bangkey ni Hisus ne mibukusan dan te meputi ne saput, ne inragkes dan en ketà ke periyemut su arà ke betasan te menge Hudiyanen te kedleveng.

<sup>41</sup> Ne diyà te uvey te midlensangan ki Hisus ne ruen pemulaan te menge kayu. Ne ketà ne ruen leveng ne edlevengan, ugaid ne warà pà melevengi.

<sup>42</sup> Ne geina te Diyemaat en arà ne mehaan en egkeuma ke Hewii te Ked-imeley ran wey merani rema ini se edlevengan, ne ketà dan en inleveng si Hisus.

## 20

### *Ke Kinevanew ni Hisus*

*(Mateo 28:1-8; Marcos 16:1-8; Lucas 24:1-12)*

<sup>1</sup> Guna su meseselem te Akad ne mibpendiyà si Maria Megdelina te midlevengan ki Hisus te merusirem pà. Nekeuma ketà sikandin ne nekita rin te neawè en ke vatu ne inlekeb dut te gumawan te leveng.

<sup>2</sup> Nekita rin dà ne mibpelelahuy en se ebpendiyà te ki Simon Pedro wey arà se edumdumaan ni Hisus ne igkelimù din utew. Ne migkahi en si Maria kandan te, "In-awà dan en dut te midlevengan ki Hisus ke Kerenan tew, ne warà dey metueni ke endei ran ewita."

<sup>3</sup> Nerineg dà ni Pedro wey arà se ruma rin ne edumdumaan ni Hisus ne mibpendiyan dan en te leveng.

<sup>4</sup> Mibpelelahuy ran se deruwa ne etew, ugaid ne neunaan dut te ruma rin si Pedro te kebpekeuma riyà te leveng.

<sup>5</sup> Midsiniling din en ne iyan din nekita ke meputi ne saput ne imbukus, ugaid ne warà medlusud sikandin.

<sup>6</sup> Ne si Simon Pedro ke neketundug kandin, ne midlusud en mulà, ne nekita rin ke saput ne meputi

<sup>7</sup> wey ke saput ne imbukus dut te ulu ni Hisus. Nengelempì en ini, ugaid ne nekedsivey se kinekesavuk din.

<sup>8</sup> Ne arà pà ne midlusud ke neuna ne nekeuma ne edumdumaan ni Hisus. Nekita rin dà arà ne mibperetiyaya sikandin te nevanhew si Hisus.

<sup>9</sup> (Misan warà dan pà lawew mekesabut dut te impesurat ne Lalag te Eleteala ne egkahi te egkevanew si Hisus.)

<sup>10</sup> Ketà dà ne mid-uli en ke deruwa ne edumdumaan ni Hisus.

### *Mibpekitakita si Hisus ki Maria Magdalena*

*(Mateo 28:9-10; Marcos 16:9-11)*

<sup>11</sup> Ugaid ne si Maria ne diyà te lihewangan te leveng ed-it-itendeg se edsinehew. Gewii rin te edsinehew ne midsiniling din ke leveng,

<sup>12</sup> ne rutun te leveng ne nekita rin se deruwa ne suluhuen te Eleteala ne utew mèmeputi se velegkas dan. Diyà dan mibpinuu te nesevukan te bangkey ni Hisus, seveka riyà te egkeulunan din, ne seveka kayi te egkeiwaran din.

<sup>13</sup> Mid-insà dan ki Maria te, "Bayi, engkey ma ini se idsinehew nu?"

Ke si Maria te, "Migkuwa ran ke bangkey rut te Kerenan tew ne warà ku metueni ke endei ran ewita!"

<sup>14</sup> Nekeipus dà te edlalag ne midlilingey ne iyan din nekita si Hisus se ed-it-itindeg, ugaid ne warà din mekilala sikandin.

<sup>15</sup> "Bayi," ke si Hisus, "engkey ma ini se idsinehew nu? Engkey se ebpemengaan nu?"

Iyan kunaan ni Maria ke arà se etew ne edtuganur ketà te pemulaan, tembù be migkahi sikandin te, "Mama, embiya iyan ka migkuwa rut te bangkey rin ne kehiya nu kedi ke endei nu ewita sikandin su apey ku egkekuwa."

<sup>16</sup> "Maria," ke si Hisus.

Nerineg din dà arà ne midsinaru en si Maria ne migkehiyan din en te kinehiyan te Hibruhanen te, "Ew, Rebuni!" (Su riyà te kinehiyan te Hibruhanen ne iyan din meana ne "Meyerù.")

<sup>17</sup> Ne migkahi en si Hisus kandin te, "Kenà a nu pà geweri su warà e pà mekeuli diyà te Amey ku. Ugaid ne beyai nu ke menge suled ku ne penudtuli nu ve sikandan te, 'Ed-uli

a riyà te Amey ku ne ke Amey nu red dema, ke Eleteala ku ne ke Eleteala nu red rema.’

<sup>18</sup> Arà dà ne mibayaan en ni Maria Megdelina ne mibpenudtulan din en ke edumdumaan ni Hisus te nekita rin si Hisus ne mibpenudtul din dema kandan ke langun ne lalag ni Hisus.

*Mibpekita kita si Hisus dut te Menge Edumdumaan Din*

(Mateo 28:16-20; Marcos 16:14-18; Lucas 24:36-49)

<sup>19</sup> Ne ketà te hewii te Akad te merukilem en ne nevrurun en ke minge edumdumaan ni Hisus diyà te senge baley, ne mibpemintù dan su egkeandek dan dut te minge egkeunutan te Hudiyanen. Ne netetau ran te kayi en mekeitindeg si Hisus te teliwarà dan. Ke sikandin te, “Na, mebmelilintad ke hinawa niyu!”

<sup>20</sup> Nekeipus te edlalag ne impekita rin kandan ke minge velad din ne nepelian dut te lansang, ne impekita rin ded dema ke tengkiliran din ne mibpilik. Ne arà iya ne nengehalewhalew nevenar ke edumdumaan din te kebpekekita ran dut te Kerenan dan.

<sup>21</sup> Ne migkahi en maa si Hisus te, “Na, mebmelilintad ke hinawa niyu! Ne iring dut te midsuhù a te Amey ku ne Eleteala,” ke si Hisus, “ne edsuhuen ku rema sikiyu.”

<sup>22</sup> Neipus din te egkahi ini ne mibperiyupan din sikandan se egkahi te, “Na, ebpelumunan kew en dut te Kedesenan ne Ebpetuntul te Menuisiyà!”

<sup>23</sup> “Embiya ebpeseharen niyu ke minge salà te etew ne egkepesehad ini, ugaid ne embiya kenà niyu ebpeseharen ke minge salà din ne kenà dema ini egkepesehad.”

*Si Hisus Wey si Tomas*

<sup>24</sup> Ketà te kinepekita kita ni Hisus dut te minge edumdumaan din ne warà ketà si Tomas (ne mid-ingaranan te Seping).

<sup>25</sup> Guna su neuma rut te edumdumaan ni Hisus si Tomas ne mibpenudtulan dan te, “Nekita rey ke Kerenan tew.”

Ne migkahi si Tomas te, “Kenà a ebperetiyya kenian te nevanew sikandin taman te egkekita ku ke mibpevayaan te lansang diyà te minge velad din wey taman pà te edtiyukan ku wey edsepuwen ku ke nepelian te bangkew riyà te tengkiliran din.”

<sup>26</sup> Nekedsenge pedian maa ketà ne nevrurun ke minge edumdumaan ni Hisus diyà te senge valey ne rutun en dema si Tomas. Ne mibpemintù dan, ugaid ne misan iring ketà ne neketekeew en maa si Hisus nekeitindeg diyà te teliwarà dan. Ke sikandin te, “Na, mebmelilintad ke hinawa niyu.”

<sup>27</sup> Arà dà ne migkahi en sikandin diyà te ki Tomas te, “Tengtengi nu ini se velad ku, ne tiyuka nu ini se palad ku abpeg dut te pali te tengkiliran ku ne sepupa nu rema! Engked ka te keduwaruwa nu, ne peretiyya ka!”

<sup>28</sup> Migkahi si Tomas te, “Sikuna ke Kerenan ku, ne Eleteala ku!”

<sup>29</sup> Migkahi si Hisus kandin te, “Maa, arà pè be ne mibperetiyya ka su nekita ad nikuna! Ugaid ne idtareng ku ini, egkehalew nevenar ke minge etew ne ebperetiyya kedì misan warà dan mekekita kediey!”

<sup>30</sup> Merakel pà se mid-ulaula ni Hisus ne mekegeyip ne nekita rut te edumdumaan din ne warà ikesurat en kayi te riberù ini.

<sup>31</sup> Ugaid ne ini se mekegeyip ne ulaula ne ingkesurat kayi su apey kew ebpekeperetiyya te Anak te Eleteala si Hisus, ne ebpekeperetiyya kew rema te sikandin ke Impasad te Eleteala ne Ebperetuen, su embiya ebperetiyya kew kandin ne ebpeketimà kew te umur ne warà edtemanan din.

## 21

*Mibpekita kita si Hisus Dut te Pitu ne Edumdumaan Din*

<sup>1</sup> Guna su nekesahad en se pipira ne hewii ne mibpekita kita maa si Hisus dut te edumdumaan din diyà te beyvey te ranew ne ed-ingaranan te Tibiriyas. Ne iring kayi se ned-ulaula te kinepekita kita rin.

<sup>2</sup> Nengevrurun ketà ensi Simon Pedro, si Tomas (ne ed-ingaranan te Seping), si Natanael (ne ebpuun te inged ne Kana lusud te Geliliya), ne elin dema ke deruwa ne anak ni Sibidiyu, wey ruen pà ketà deruwa ne edumdumaan ni Hisus.

<sup>3</sup> Ne migkahi en si Simon Pedro te, “Ebpenginsedà e pad.”

Migkahi en ke minge ruma rin te, “Eduma key keykew.” Arà dà ne mibpendiyan dan en te wayig ne mid-untud dan en te avang se ebpenginsedà, ugaid ne nepewpewaan dan se ebpenginsedà ne warà dan mekeutel.

<sup>4</sup> Guna su nepawà en ne riyan en si Hisus mid-it-itindeg te beyvey te wayig, ugaid ne warà mekilala dut te edumdumaan din.

<sup>5</sup> Ne migkahi si Hisus kandan te, "Na engkey, mence suled, nekeutel kew red?" Midtavak dan te, "Warà en iya!"

<sup>6</sup> Migkahi si Hisus te, "Tantug niyu ayan se biyala niyu kenihan te egkekewanane avang niyu su apew kew ebpekeutel." Arà dà ne in-antug dan en ke biyala ran ne wey ran gelengkena ne kenà dan en egkegaga su merakel ke neutel.

<sup>7</sup> Nekita ran ini ne migkehiyan en dut te edumdumaan ni Hisus ne igkelimù din si Pedro te, "Sikandin ayan ke Kerenan tew!" Guna su nerineg ni Pedro te si Hisus bes arà ne ingkeseluub din maa ke kumbalà din (su mibpenluung ma sikandin) ne midlumbuk en sikandin diyà te wayig se ebpeebpet diyà te ki Hisus.

<sup>8</sup> Ne mid-untud te avang ke mence ruma rin se ebpeketundug kandin ne eguyud dut te biyala ran ne nekeutel te merakel ne serà. Ne kenà dan utew meriyù dut te tebtivasan te wayig su warà dà buwa mebmehatus ne meyerù.

<sup>9</sup> Guna su nekerunggù dan en ne iyan dan nekita se mid-ug-uhanga ne baha ne ruen ketà serà ne intuug ne ruen dema pan ne in-ini.

<sup>10</sup> Ne migkahi si Hisus kandan te, "Ewita niyu kayi ke duma ne serà ne neutel niyu."

<sup>11</sup> Ne midlived si Simon Pedro riyà te avang ne miguyud din en ke biyala ne midsipek te derekelà ne serà, su iyan din kerakel ke neutel ne mehatus wey lelima nepulù wey tetelu. Ne misan iring ketà se kerakel din, ne warà mevindas ke biyala.

<sup>12</sup> Migkahi en si Hisus te, "Kuwa kew en ne ramag kew en!" Ne warà senge etew rà kandan ne neketikà ne ed-insà te, "Entei ka?" su netueanan dan en ma te si Hisus iyan ini ke Kerenan dan.

<sup>13</sup> Ne migkuwa ni Hisus ke pan diyà te apuy ne mid-umun-umun din kandan, ne iring ded dema ketà ke serà.

<sup>14</sup> Iketelu en ini te kebpekitakita ni Hisus dut te edumdumaan din te nevanew en sikandin.

<sup>15</sup> Nekeipus dan se egkaan ne migkahi en si Hisus diyà te ki Simon Pedro te, "Simon, sikuna ini ke anak ni Juan, maa igkelimù a nu ve te muna pà dut te kegkelimù te ruma?"

"Uya, Kerenan," ke si Simon, "netueanan nu en se igkelimù ku sikuna."

Ne migkahi si Hisus te, "Tugenura nu ini se mence etew ku ne iring te nati te bilibili."

<sup>16</sup> Ne migkahi pà maa si Hisus te, "Simon, sikuna ini ke anak ni Juan, maa igkelimù a nu?"

"Uya, Kerenan," ke si Simon, "netueanan nu en se igkelimù ku sikuna."

Ne migkahi en maa si Hisus te, "Tugenura nu ini se mence etew ku ne iring te bilibili."

<sup>17</sup> Ne migkahi pà maa si Hisus te, "Simon, sikuna ini ke anak ni Juan, maa igkelimù a nu?"

Nerineg dà ni Pedro ne nemutu se hinawa rin su iketelu en ini te kedsulit ni Hisus te ed-insà kandin ke ruen limù din. Arà be ne migkahi en sikandin te, "Netueanan nu ke langun, Kerenan, ne netueanan nu en se igkelimù ku sikuna!"

Migkahi en si Hisus te, "Tugenura nu ini se mence etew ku ne iring te mence bilibili ku.

<sup>18</sup> Sebenarvenar ini se idsempità ku keykew ne embiya ke menguwed pà ne iyan ka edsesebitan, ne misan endei ka egkiyug ne riyà ka ebpesinaru. Ugaid ne embiya egkelukes ke en ne ebpekererepa ka ne ruen ruma ne ebpeesebitan keykew ne edtuyuken ka riyà te kenà nu egkiyuhan."

<sup>19</sup> (Iring ketà se kinekahi ni Hisus su idtarem din ke ralan te kemetayen ni Pedro ne ebpekereyù te Eleteala.) Ne migkahi en si Hisus kandin te, "Duma ka kediey!"

<sup>20</sup> Guna su nerineg ni Pedro se lalag ni Hisus ne midlilingey sikandin ne iyan din nekita ne edtundug kandan ke edumdumaan ni Hisus ne igkelimù din iya. Sikandin ini ke midsandig ki Hisus dut te kinelavung dan te warà pà mebpatey si Hisus, ne sikandin ini ke mid-insà ki Hisus te, "Entei ma se ed-ulug keykew, Kerenan?"

<sup>21</sup> Guna su nekita ni Pedro sikandin ne migkahi en diyà te ki Hisus te, "Kerenan, engkey ve rema se egketemanan kayi te ruma ta ini?"

<sup>22</sup> Ne midtavak si Hisus te, "Embiya iyan ku egkesuatan se biviyag pà sikandin taman ketà te kedlived ku kayi te ampew te dunya, ne maa engkey ve se keykew ketà? Kenà merakel se pegitunga nu, ugaid ne ruma kew kedì."

<sup>23</sup> Ketà ne nekeeneb ke tudul dut te langun ne eduma ki Hisus te kenà en ebpatay ini se senge etew rut te edumdumaan din. Ugaid ne kenà ma arà ke migkahi ni Hisus se kenà en ebpatay su iyan din migkahi te, "Embiya iyan ku egkesuatan se biviyag pà sikandin taman ketà te kedlived ku kayi te ampew te dunya, ne maa engkey ve se keykew ketà?"

<sup>24</sup> Ne ini se senge etew ne edumdumaan din ne migkahi ni Hisus ne warà duma ke kenà siaken iya ke midsurat kayi. Ne langun kayi te nekesurat ini ne nemetmetaan ku, ne editihusan ku te langun kayi ne benar.

<sup>25</sup> Ruen pà lavew merakel ne mid-ulaula ni Hisus ne warè en ikesurat. Su embiya id-amin te edsurat ne antap ku ne misan ini se lusud te linengkevan ne kurang pà ne edtehuan.

## Ke Nenged-ulaula dut te Menge Kedserihan ni Hisus

<sup>1</sup> Diyà te ki Teofilo:

Ketà te neuna ne surat ku kenikew ne miguhud ku mekeatag te langun ne mid-ulaula ni Hisus wey ke langun ne kebpenurù din igenat te kinerudsù din te helevek din

<sup>2</sup> taman en te kebetuna kandin te Eleteala diyà te langit. Ugaid ne ketà te warà pà betuna sikandin ne midteleanan din ke menge etew ne mibpemili din ne kedserihan din, ne ini se intelaan din ne egenat te Kedesenan ne Ebpetuntul te Menusiya.

<sup>3</sup> Guna su mid-imetayan sikandin ne nevanew en maa ne mibpekikakita sikandin dut te menge kedserihan din. Ne merakel ne tuus ne impekilala rin kandan su titihus te biviyag en sikandin. Su lusud te epat nepulù ne hewii ne kemerakel sikandin mibpekikakita kandan wey mibpengasak sikandin mekeatag dut te Kedatù te Eleteala.

<sup>4</sup> Keseveka te nevrun dan ne intelaan din kandan se egkahi te, “Kenà kew ed-awà kayi te inged ne Hirusalim, ugaid ne tehari niyu taman te ibehey en keniyu ini se Impasad te Amey ku ne nekahi ku en keniyu neraan.

<sup>5</sup> Su si Juan, ne wayig se imbunyang din te menge etew. Ugaid ne menge pipira pà ne hewii ne ebunyahana kew te edlumunan dut te Kedesenan ne Ebpetuntul te Menusiya.”

*Ke Kinevatan ki Hisus diyà te Langit*

<sup>6</sup> Senge hewii ne nevrun ensi Hisus wey ke menge kedserihan din ne mid-insaan dan sikandin se egkahi te, “Keranan, menu ini en be ke hewii ne ibpeulit nu ke sikami ne menge kevuwaran ni Israyil ke andang ne kedatù te sikami?”

<sup>7</sup> Ne midtavak si Hisus te, “Ke Amey ku rà se ebayàbaya dut te egketemanan kayi te ampew te dunya wey keenu egked-ulaula, ne kenà ini idtuhut ne egketuanan niyu.

<sup>8</sup> Ugaid ne embiya ebpekeuma en kayi te keniyu ke kedlumun dut te Kedesenan ne Ebpetuntul te Menusiya,” ke si Hisus, “ne ebpekettelimà kew en te gehem ne sikiyu en ke ebpesabut mekeatag kediey kayi te inged ne Hirusalim, ne ieneb niyu en ini kayi te lusud te pruvinsiya te Hudiya, wey riyà dema te pruvinsiya te Semeriya, wey taman en diyà te epat ne pediyulu kayi te kelibutan.”

<sup>9</sup> Neipus din ini te edlalag ne mibatun en sikandin se ebpendiyà te langit. Ne kemulu ran pà ne edlingakà su edtengtengan dan sikandin, ne neelangan si Hisus te sehulapun ne in-anew ran en te mata.

<sup>10</sup> Edlingakà dan pà diyà te langit se edtengteng te kebetuneen kandin, ne netekew en se deruwa ne meama ne mibevelegkas te meputi ne nekeitindeg diy te uvey ran

<sup>11</sup> ne migkahi ran te, “Sikiyu ne menge riyà ebpuun te Geliliya, maan ke ed-itindeg kew kayi se edlingakà diyà te langit? Si Hisus ini ne nekita niyu ne mibatun diyà te langit ne edlived ded kayi, ne ini se kedlived din ne iring ded dut te nekita niyu sikandin ne mibatun diyà te langit.”

*Si Matias ke Nepemili dan ne Nekesambi ki Hudas*

<sup>12</sup> Ketà ne mid-awà en ke menge kedserihan dutun te buvungan ne ed-ingaranan te Uliuwun, ne mid-uli dan en diyà te Hirusalim ne iyan din keriyù ne menge senge kilù.

<sup>13</sup> Nekeuma ran diyà te Hirusalim ne mid-uli dan diyà te sungkù dan diyà te divavew ne mid-ubpaan dan. Mesi dan ini ne si Pedro, si Juan, si Santiago, si Andres, si Felipe, si Tomas, si Bartolome, si Mateo, si Santiago ke anak ni Alfeo, si Simon ke Patriat (ne iyan din meana ne diralem se lengesa rin dut te inged din), wey si Hudas ke anak ni Santiago.

<sup>14</sup> Langun dan ne lelayun eburun su ebpengeningeni diyà te Eleteala, ne mid-amung dema ke menge meritan, elin dutun si Maria ke iney ni Hisus wey ke menge meama ne ari ni Hisus.

<sup>15</sup> Senge hewii ketà ne ruen kevrunan te menge mibperetiyaya ne menge mehatus dan wey deruwa nepulù se miburun, ne mid-itindeg si Pedro se edlalag.

<sup>16</sup> “Menge suled,” ke sikandin, “kenà egkepakey ne kenà edtumanen ke Lalag te Eleteala ne impesurat te Kedesenan ne Ebpetuntul te Menusiya ki David dengan. Su impekahi rin neraan te si Hudas se ebpalad ki Hisus diyà te menge etew ne edsigkem kandin.

<sup>17</sup> Si Hudas ne senge etew ne ruma tew su netai ma sikandin ne ed-amung te helevek tew.”



<sup>18</sup> (Ne impemasa ni Hudas te tanà ke kureta ne impevayad din dut te meraat ne ulaula rin te ebbalad ki Hisus. Ne ketà sikandin neulug ne nekelangkeb ne minatey en, ne mibetu ke hetek din ne nevukayat ke bituka rin.

<sup>19</sup> Nering ini dut te langun ne menge etew te Hirusalim, ne mid-ingaranan dan ini se tanà te Ekildama te kinehiyan dan ne iyan din meana ne “Tanà ne Mibayaran te Lengesa.”)

<sup>20</sup> “Su ruen impesurat,” ke si Pedro, “diyà te riberù ne ed-ingaranan te Salmu ne egkahi te,  
'Berekat ne meewai ke ed-ubpaan din,  
ne warà be med-ubpà dutun,'  
ne ruen dema impesurat ne egkahi te,  
'Ini se impehelevek kandin  
ne iphehelevek en te ruma.'"

<sup>21-22</sup> “Ketà be,” ke si Pedro, “ne iyan iya se duen senge etew ne egkepemili ne ebpekeamung kenitew te kedtitihus tew te nevanew en si Hisus ke Kerenan tew. Ebpemilien tew ini dut te menge ruma tew te hewii te kebpekiduma tew ki Hisus ke Kerenan tew igenat te kebpesabut ni Juan mekeatag te kebpebunyang taman te kinekevatun en ni Hisus diyà te langit.”

<sup>23</sup> Ne mid-ingaran dan te deruwa ne etew ne ebpedsemilien dan ke endei rapat, si Jose ne ed-ingaranan ded ki Barsabas (ne ed-ingaranan ded maa ki Justo), ne senge etew ne si Matias.

<sup>24</sup> Ketà ne mibpengeningeni ran se egkahi te, “Kerenan, netuenan nu ke engkey se netahù te hinawa te langun ne menge etew. Ne guntaani ne ipekita nu kenami ke endei se nepemili nu kayi te deruwa ini

<sup>25</sup> se egelevek dut te helevek ne intail nu rut te kedserihan nu. Su si Hudas ne mid-ewaan din ini se impehelevek kandin, ne mibpendiyà te egkeubpaan ne edait kandin.”

<sup>26</sup> Nekeipus dan te ebpengeningeni ne mibunutbunut dan ne ke ngaran ni Matias se migemew, ne ketà ne ingkeuman sikandin dut te sepulù wey seveka ne kedserihan.

## 2

### *Impepengkayi te Eleteala ke Kedesenan ne Ebpetuntul te Menusiyà*

<sup>1</sup> Guna su neuma en ke hewii te pista ne ed-ingaranan te Pintikusti, ne langun ne mibperetiyaya ki Hisus ne nevrurun diyà te seveka ne valey.

<sup>2</sup> Ne takin ne ruen utew merahing ne nering dan ne riyà ebpuun te langit ne iring te mevandes ne keramag ne egkenegkeneg. Ne arà se dahing ne nekeeneb ketà te lusud te valey ne nevrururan dan.

<sup>3</sup> Ne ketà ne nekita ran se iring te regreg te apuy ne nekelayap ne mibpenrenà dut te uman senge etew kandan.

<sup>4</sup> Ne mid-lumun kandan ke Kedesenan ne Ebpetuntul te Menusiyà ne nekelalag dan te menge kinehiyan ne kenà dan egketuenan ibpepevayà dut te gehem te Kedesenan ne Ebpetuntul te Menusiyà ne mibpelalag kandan.

<sup>5</sup> Ketà ne hewii ne ruen menge Hudiyanen ne mid-ubpà diyà te Hirusalim ne riyà ebpuun te idsengelulumpuk ne inged kayi te ampew te dūnya ne laus ne edtuman te suhù te Eleteala.

<sup>6</sup> Guna su nering dan arà se merahing, ne denda ran se nevrurun ketà. Ne neinuinu ran nevenar su uman seveka kandan ne nering din ke kinehiyan din ketà te lalag te menge mibperitiyaya ki Hisus.

<sup>7</sup> Neinuinu ran ne negeyip dan se egkahi te, “Engkey te vuwa ini? Su menge etew ini ne riyà ebpuun te Geliliya ne edlalag!

<sup>8</sup> Ne meambe ke iyan ta egkerineg ne ebpekelalag dan te kinehiyan te uman seveka kenita?

<sup>9</sup> Su sikami ini ne riyà ebpuun te idsenge inged su ruen ebpuun te inged ne Partya, ruen ebpuun te Midya, wey ebpuun te Ilam. Ne ruen ebpuun te Misuputamya, ebpuun te Hudiya, ebpuun te Kepedusya, ne ebpuun te Puntu wey Asya.

<sup>10</sup> Duen ruma tew ne riyà ebpuun te Prigiya, ebpuun te Pempilya, ebpuun te Ihiptu wey ebpuun te menge inged ne lusud te Libya ne uvey te inged ne Sirini. Duen dema ebpuun te inged ne Ruma

<sup>11</sup> ne menge Hudiyanen wey kenà menge Hudiyanan ne edruyud te menge penduan te Hudiyanen. Duen dema riyà ebpuun te inged ne Krita wey riyà ebpuun te inged ne Erabiya. Ne misan warà memeked-iring ke kinehiyan ta, ne nesebutan tew langun su

nerineg tew ne nekelalag dan dut te langun ne kinehiyan tew mekeatag te mekegeyip ne mid-ulaula te Eleteala.”

<sup>12</sup> Ne neinuinu ran su warà dan mesebuti ini se ned-ulaula ne mibpein-inseey ran te, “Engkey ve vuwa ini?”

<sup>13</sup> Ugaid ne ruen duma diyà te kandan ne edsumpeliten dan ini se menge mibperetiyya se egkahi te, “Netevereg ini se menge etew!”

*Ke Kebpemesabut ni Pedro*

<sup>14</sup> Ketà ne mid-itindeg si Pedro elin ke menge ruma rin ne sepulù wey seveka ne kedserihan ne mibpekerahing te lalag din se egkahi te, “Sikiyu ne menge ruma ku ne Hudiyanen wey langun niyu ne menge etew kayi te Hirusalim, pemineha niyu ini se egkehiyan ku su ruen egkepenudtul ku keniyu.

<sup>15</sup> Iyan niyu kunaan ne netevereg en ini se menge ruma ku, ugaid ne kenà egkepakey su edluuk pà ebpmenayik ke andew.

<sup>16</sup> Ini se nekita niyu guntaani,” ke si Pedro, “ne impekahi en dengan te Eleteala ki Joel, senge etew ne ebpelambas te Lalag te Eleteala, su migkahi rin te,

<sup>17</sup> ‘Ne ibpelumun ku te langun ne menusiya

ke Kedesenan ne Ebpetuntul te Menusiya

ketà te mehaan en egkeuma ke mewri ne hewii.

Ne ke inenakan niyu ne menge meama wey meritan

ne ibpesabut te menge etew ini se lalag ku.

Ke menguwed ne menge meama ne ruen ibpekita ku kandan,

ne ke lukes ne menge meama ne ruen ibpetehinep ku kandan.

<sup>18</sup> Uya,’ ke se Eleteala, ‘iring din ded dema ke menge sugshuen ku,

ne menge meama wey meritan,

ne ibpelumun ku kandan

ke Kedesenan ne Ebpetuntul te Menusiya

ketà keuremà,

ne ibpesabut dan te menge etew ini se lalag ku.

<sup>19</sup> Ne ruen ulaula ne mekegeyip

ne ibpekita ku diyà te langit

wey mekeinuinu ne ed-ul-ulaan ku kayi te tanà,

su ruen egkekita ne lengesa, apuy, wey mekepal ne evel.

<sup>20</sup> Duen hewii,’ ke se Eleteala, ‘ne ebmerusirem ke andew,

ne ebmerihà ke vulan iring te lengesa,

embiya mehaan en ebpekeuma ini se mevantug ne hewii

ne kedtimbang te Kerenan dut te langun ne menusiya.

<sup>21</sup> Ne ketà ne hewii ne piya engkey ne etew

ne ebpeiruiru se egkahi te, “Ipelihaun a te menge salà ku, Kerenan,”

ne egkepelihauun dut te keberedusaan din.’

<sup>22</sup> “Sikiyu ne menge ruma ku ne Hudiyanen,” ke si Pedro, “pemineha niyu ini se egkehiyan ku. Si Hisus ne riyà ebpuun te Nesarit, ne mepayag ne impepengkayit sikandin te Eleteala, ne ruen gehem te Eleteala ne riyan en te kandin su nekita ini dut te langun ne mibpeveelan kandin te Eleteala ne mekegeyip wey ke mid-ulaula rin ne mekeinuinu. Netueanan niyu ini su kayi mid-ulaula ini te keniyu.

<sup>23</sup> Daan en ne netueanan te Eleteala te ibpalad si Hisus keniyu su ini ke intahù te itungan din. Ne mibpeimetayan niyu sikandin rut te menge etew ne mekesesalà ne inlansang dan sikandin diyà te pinebelavag ne kayu.

<sup>24</sup> Ugaid ne impeliyu te Eleteala si Hisus dut te inged ne Iveyaan su mibanew rin, su kenà egkepakey ne egkeveyveyaan si Hisus te kemetayen.

<sup>25</sup> Su ruen impesurat ni David rengan mekeatag ki Hisus ne egkahi te, ‘Layun edumà kedi ke Kerenan tew;

uya, ini en te uvey ku sikandin, tembù kenà a egkeandek.

<sup>26</sup> Engketà arà ne mehalew nevenar ini se hinawa ku,

ne misan kayi te lalag ku ne egketuusan nevenar.

Ne misan ebpatay a ne idsarig ku kandin ini se lawa ku,

<sup>27</sup> su netueanan ku te kenà din idtahak ini se gimukud ku

diyà te inged ne Iveyaan;

siaken ne laus ne edtuman te suhù din,

ne kenà din idtahak ini se lawa ku te egkeredak dà.

<sup>28</sup> Impekita rin kediey ke ibayà te ebpendiyà

te umur ne warà edtemanan din;

wey mehalew a nevenar  
su ini en te kedì sikandin.'

<sup>29</sup> "Na, munge suled ku," ke si Pedro, "kenà ku idsanggal te egkehiyen ku keniyu mekeatag dut te tipewna ne datù tew rengan ne si David, ne neuhet en ne minatey ne inleweg ne kemulu red lavew ini se leveng din taman guntaani.

<sup>30</sup> Senge etew si David ne ebpelambas te Lalag te Eleteala rengan, ne netuenan din ke impasad te Eleteala kandin. Su iyan impasad kandin te Eleteala ne mevaher ne ruen senge etew ne kevuwaran ni David ne egkevaluy ne ratù keuremà iring kandin.

<sup>31</sup> Netuenan neraan ni David ini se ed-ul-ulaan te Eleteala ketà te akir din ne hewii, tembù be nelalag din mekeatag dut te kegkevanew ni Hisus, ke Impasad te Eleteala rengan ne Ebperetuen te langun, su migkahi si David te,

'Warà sikandin intahak  
diyà te inged ne Iveyaan;

ne warà neredak ke lawa rin diyà te leveng.'

<sup>32</sup> Ne ini se nekahi ni David ne iyan iya si Hisus," ke si Pedro, "ne mibanew te Eleteala, ne langun dey ne neketitihus ne benar ini su nekita kayi te mata rey.

<sup>33</sup> Mibatun te Eleteala si Hisus ne riyà impepinuu te rapit te egkekewanan te Amey rin ne Eleteala, ne imbehey kandin dut te Amey rin ke Kedesenan ne Ebpetuntul te Menusiyà ne impasad kandin. Ne imbehey red kandin lavew ke ketengdanan te ibpepengkayì rin ke Kedesenan ne Ebpetuntul te Menusiyà dut te sikami. Ne ini se nekita niyu wey nerineg niyu ne ini se mekegeyip ne mid-ulaula dut te Kedesenan ne Ebpetuntul te Menusiyà ne imbehey rin kenami.

<sup>34</sup> Na, kenà si David ini se mibatun diyà te langit ugaid ne ruen migkahi rin te,  
'Migkahi ke Eleteala ketà te Kerenan ku te:

Kayi ka pinuu te rapit te egkekewanan ku

<sup>35</sup> taman te ebpepgiekian ku  
ke munge kunterà nu.'

<sup>36</sup> "Tembù be," ke si Pedro, "langun te sikita ne munge kevuwaran ni Israyil ne iyan iya se edsebuten tew te si Hisus ini ne inlansang niyu diyà te pinebelavag ne kayu ne sikandin ke netendù te Eleteala ne Kerenan tew wey ke Impasad ne Ebperetuen te langun."

<sup>37</sup> Nerineg ini rut te munge etew ne iring te migkeres ke atey ran ne migkehiyan dan si Pedro wey ke ruma ne munge kedserihan te, "Menge suled, engkey en buwa se ed-ul-ulaan dey?"

<sup>38</sup> Ne migkahi si Pedro te, "Engkeri niyu ke meraat ne ed-ul-ulaan niyu ne pebunyang kew, uman seveka keniyu, su tuus te mibpesakup kew en ki Hisu Kristu. Ne ebpeseharen te Eleteala ini se meraat ne ulaula niyu ne ke Kedesenan ne Ebpetuntul te Menusiyà ne ibpeubpà din kayi te keniyu.

<sup>39</sup> Su ini ke impasad te Eleteala keniyu wey ke munge kevuwaran niyu abpeg te langun ne munge etew ne ed-ubpà diyà te meriyù, langun ne ibpeuvey dut te Kerenan tew ne Eleteala ne eduma kandin."

<sup>40</sup> Ne merakel pà se lalag ni Pedro te edneyùnèyù kandan ne meilut se kebuyù din se egkahi te, "Pekeriya kew dut te munge etew te guntaani ne ed-ulaula te meraat su edusaan dan te Eleteala!"

<sup>41</sup> Ne merakel se mibperetiyaya dut te lalag ne impesabut ni Pedro ne mibpebunyang dan tuus te ebperetiyaya ran en ki Hisus. Ne arà ne hewii ne munge tetelu ne ngivu se munge mibperetiyaya ne nekeuman dut te munge etew ne mibperetiyaya ki Hisus.

<sup>42</sup> Uman gewii ne ebpemineg dan dut te ibpenurù te munge kedserihan, ne neseveka ke hinawa dut te langun ne munge mibperetiyaya ki Hisus. Langun dan ne mid-amung te egkaan te pan su kedtenuri ran dut te kinepatey ni Hisus, ne mid-amung dan lavew te kebpengeningeni te Eleteala.

#### *Ke Nenged-ulaula dut te Menge Mibperetiyaya ki Hisus*

<sup>43</sup> Ne merakel se mibeelan ne mekegeyip wey mekeinuinu ne ulaula dut te munge kedserihan ni Hisus, ne ketà ne neandek ke langun ne munge etew.

<sup>44</sup> Ne langun ne munge mibperetiyaya en ki Hisus ne meilut se kegkeseveka ran, ne piya engkey se kearen dan ne ibpevegbehayi ran dut te munge ruma ran.

<sup>45</sup> Ne mibpasa ran ke munge kearen dan wey tanà dan ne ke elehà din ne mid-umun-umun dan diyà dut te langun ne munge ruma ran su atag dut te kurang kandan.

<sup>46</sup> Uman gewii ne langun dan ne eburun diyà te Nekebpuru ne valey te Eleteala. Ne egkeseveka ran lavew ne egkaan diyà te munge valey ran, ne mehalew nevenar se hinawa ran, ne mibehey ran te ruma ran te lila ne hinawa ran.

<sup>47</sup> Ne mideyù dan te Eleteala, ne egkeedatan dan dut te langun ne menge etew. Ne uman gewii ne ruen menge etew ne mibperetiyya ki Hisus ke Kerenan tew ne ini ne menge etew ne ingkeuman te Kerenan dut te langun ne mibperetiyya.

### 3

#### *Ke Pungkù ne Neulian*

<sup>1</sup> Senge hewii ne mibpendiyà si Pedro ki Juan te Nekebpuru ne Valey te Eleteala ketà ne edluuk en ebpepenaug ke andew su ini se netahù ne hewii te kebpengeningeni.

<sup>2</sup> Ne diyà te Nekebpuru ne Valey te Eleteala, ketà te bengawan ne ed-ingaranan te Mekempet ne Bengawan, ne ruen meama ne ebpepemuyù ne nepungkù igenat dà te ked-enaka kandin. Uman gewii ne id-ated sikandin ketà te bengawan su ebpepemuyù te kureta dut te menge etew ne edlusud dut te Nekebpuru ne Valey te Eleteala.

<sup>3</sup> Guna su nekita rin ne edlusud en si Pedro ki Juan, mibuyuen sikandin te kureta.

<sup>4</sup> Midtengtengan sikandin ni Pedro ki Juan ne migkahi si Pedro te, "Tengtengi key nikuna!"

<sup>5</sup> Midlingakà din sikandan su kunaan din ke ruen kureta ne ibehey kandin.

<sup>6</sup> Ugaid ne migkahi si Pedro te, "Warà en kureta ku, ugaid ne ini se ruen kayi te kedi ne ivehey ku keykew. Ipepevyà dut te gehem te ngaran ni Hisu Kristu ne riyà ebpuun te Nesarit, ne ipanew ka!"

<sup>7</sup> Ketà ne migeweran ni Pedro ke belad din ne kewanan su ibpeitindeg din. Arà dà ne mibmeveher en ke menge paa dut te meama.

<sup>8</sup> Ne mid-umbetut se ed-itindeg ne mid-ipanew. Ketà ne miduma kandan te edlusud dut te Nekebpuru ne Valey te Eleteala ne midlinglingketew se ed-ipanew ne edeyù te Eleteala te keupiya rin.

<sup>9</sup> Nekita rut te menge etew ketà ne ed-ipanew ne edeyù te Eleteala.

<sup>10</sup> Guna su nekilala ran te sikandin ke pungkù ne ebpimpinuu riyà te bengawan ne ed-ingaranan te Mekempet, ne neinuinu ran nevenar wey negeyip dan dut te ned-ulaula rin.

#### *Ke Kebpesabut ni Pedro Diyà te Nekebpuru ne Valey te Eleteala*

<sup>11</sup> Ketà te egawed pà ke meama ki Pedro wey ki Juan diyà te palàpalà ne ed-ingaranan te Palà-palà ni Salomon, ne mibpelelahuy ke menge etew se eburun ketà su negeyip dan nevenar.

<sup>12</sup> Guna su nekita ni Pedro ne nevrurun en ke menge etew ne migkehiyan din sikandan te, "Menge ruma ku ne kevuwaran ni Israyil, meambe ke negeyip kew kayi te ini ne ned-ulaula? Ne meambe ke edtengtengan key nikiyu? Maa, kunaan niyu ke kenami rà ne gaga se nekeipanew ini se meama etawa mekeatag te ketidtu rey ne nekeipanew en ini? Kenà!"

<sup>13</sup> Ugaid ne ke Eleteala ne iyan ed-erapen dut te menge keep-epuan tew ne si Abraham, si Isaac wey si Jacob," ke si Pedro, "ne impepurù din ke sugshuen din ne si Hisus su mibatun din. Ugaid te kayi pà sikandin te ampew te dunya, ne impalad niyu sikandin diyà te menge egkeunuten niyu diyà te gubirnu niyu su ebpeimetayan. Ini se mid-ulaula niyu misan ibpeliyu perem sikandin ni Pilatu ke gubinedur, ugaid ne warà kew medtuhut su mid-engkenà kew kandin diyà te etuvangan ni Pilatu.

<sup>14</sup> Metilak nevenar se atey ni Hisus wey metidtu sikandin, ugaid ne warà niyu tuhuti ne ibpeliyu sikandin ni Pilatu su nasi niyu pà buyua te iyan din ibpeliyu rut te bilengguan ke senge etew ne terevunù.

<sup>15</sup> Ne mibpeimetayan niyu sikandin, ke ebpuunan te umur ne warà edtemanin din; ugaid ne mibanew te Eleteala sikandin. Ne ebpeketitihus key ketà te nevanew en sikandin su nekita rey.

<sup>16</sup> Na mekeatag te ini se pungkù ne behu pà ne nekeipanew," ke si Pedro, "ne mibmevahaer en ke menge paa rin su egenat dut te gehem ne ibpepevyà te ngaran ni Hisus. Su ini se etew ne egkekilala niyu wey ini se ned-ulaula rin ne nekita niyu ne mid-ulaula ini ni Hisus atag dut te kebpereiyaya rey kandin. Uya, ke kebpereiyaya rey ki Hisus se ingkeulii rin iring kayi te nekita niyu en langun.

<sup>17</sup> "Na, menge suled," ke si Pedro, "netuenan ku te sikiyu wey ke menge unuten niyu ne ini se mid-ulaula niyu ki Hisus ne mibeelan niyu ini su warà niyu mesebuti ke meana rut te mid-ulaula niyu kandin.

<sup>18</sup> Ugaid ne ini se mid-ulaula niyu ne ini ke ralan te kegketuman din ke Lalag te Eleteala ne impesurat din dengan dut te langun ne menge etew ne ebpelambas te lalag din, su ruen nekahi rin neraan mekeatag dut te Impasad din ne Ebperetuen te langun, ne edresayan sikandin.

<sup>19</sup> Na," ke si Pedro, "pemedsendit kew wey engkeri niyu ini se meraat ne ed-ul-ulaan niyu, ne ibehey niyu ke hinawa niyu te Eleteala su apey egkepesahad din ke mengé meraat ne ed-ul-ulaan niyu. Embiya ini se ed-ul-ulaan niyu,

<sup>20</sup> ne egkeuma ke hewii ne ebeg-eten ke hinawa niyu te Eleteala ne ibpepengkayi rin te ampew te dunya si Hisus, ini ke midtendü din neraan ne Impasad din ne Ebperetuen keniyu.

<sup>21</sup> Ugaid ne riyà pà ed-ubbà si Hisus te langit taman te kenà pà egkeuma ke hewii ne ebhuwen dut te Eleteala ke langun taman. Ne an pà ne edlived sikandin kayi te ampew te dunya iring dut te impesabut te Eleteala rengan dut te mengé etew ne ebpemelambas te Lalag din.

<sup>22</sup> Su iyan migkahi ni Moises dengan dut te keep-epuan tew ne mengé Hudiyanen ne, 'Ruen edsuhuen dut te Eleteala ne Kerenan tew ne ibpepengkayi rin te keniyu ne ebpelambas te Lalag din iring dut te siaken, ne senge etew sikandin dut te ruma niyu ne Hudiyanen. Iyan iya se tumana niyu ke langun ne egkehiyen din keniyu.

<sup>23</sup> Ne piya engkey ne etew ne kenà edtuman te lalag din ne edereetan sikandin su kenà ragkes dut te mengé etew te Eleteala,' ke se impesurat ni Moises dengan.

<sup>24</sup> "Na," ke si Pedro, "ke mengé etew ne ebpelambas te Lalag te Eleteala rengan igenat ki Samuel wey ke ebpeketundug kandin, langun dan ne pinekahi te Eleteala mekeatag te ini ne mibpayag neraan mekeatag ke engkey se egked-ulaula guntaan.

<sup>25</sup> Ne ini ke impasad te Eleteala rengan ne impepevayà din dut te mengé etew ne ebpelambas te lalag din ne ini ne pasad din keniyu, su sikiyu ne nekeuman dut te impasad te Eleteala rut te mengé keep-epuan niyu. Su ruen impasad te Eleteala dut te keep-epuan tew ne si Abraham se egkahi te, 'Kayi ibpepevayà te kevuwaran niyu ne ebpeneuven ku ke langun ne menusiyà kayi te ampew te dunya.'

<sup>26</sup> Tembù be," ke si Pedro, "mibpemili te Eleteala si Hisus ne sugsuhen din ne impuna rin impengkayi te kenitew ne mengé Hudiyanen su apey ki ebpeneuva te Eleteala su ibpeengked ki rin dut te meraat ne ed-ul-ulaan tew."

## 4

### *Ke Kegkukuma ki Pedro wey ki Juan*

<sup>1</sup> Ne ketà te kemulu pà edlalag si Pedro wey si Juan te mengé etew, ne mid-uvey en kandan ke mengé terebpepengesa, ke mepurü dut te mengé ebantey kayi te Nekebpuru ne Valey te Eleteala, wey ke mengé Sadyusiyu.

<sup>2</sup> Nengeepes dan dut te impenurü eni Pedro te kegkevanew ni Hisus se tuus te egkevanew red keuremà ke mengé etew ne minatey ne mibperetiyya ki Hisus.

<sup>3</sup> Ketà ne midsigkem dan si Pedro ki Juan ne geina te meapun en arà ne mibilanggü dan taman te nepawà.

<sup>4</sup> Ugaid ne merakel se mibperetiyya ki Hisus dut te mengé etew ne nekering te lalag ni Pedro, ne arà ne mid-iseg ke kerakel dut te meama rà ne mengé lelima ne ngivu.

<sup>5</sup> Ketà te neketundug ne hewii, ne nevurun dut te inged ne Hirusalim ke mengé egkeunutan te Hudiyanen, ke mengé pekilukesen, wey ke mengé meyterü te penduan.

<sup>6</sup> Elin dema rutun ne si Anas ke Pinekemepurü dut te mengé Terebpepengesa, si Keyipas, si Juan wey si Alejandro, wey ruen duma ne mengé suled dut te Pinekemepurü ne Terebpepengesa.

<sup>7</sup> Ne impetuvang dan si Pedro wey si Juan ne mibpenginsaan dan te, "Engkey ki gehem kayi te ingkeulii rin ini se etew? Ne endei kew megkuwa te ini ne gehem?"

<sup>8</sup> Ne midlumun ki Pedro ke Kedesenan ne Ebpetuntul te Menusiyà ne midtavak se egkahi te, "Sikiyu ne mengé egkeunutan dey wey mengé pekilukesen dey,

<sup>9</sup> embiya iyan niyu id-insà kenami mekeatag kayi se meupiya ne ned-ulaula te ini ne etew ne daan ne pungkù wey embiya iyan niyu id-insà ke engkey ki gehem se ingkeulii rin,

<sup>10</sup> ne sikiyu wey langun ne mengé etew te Israyil ne sebuta niyu te iyan kebpekeitindag kayi te meama ne ini se etuvangan niyu ne neulian en su atag dut te gehem ne ibpepevayà dut te ngaran ni Hisu Kristu ne riyà ebpuun te Nesarit. Si Hisus ini ke impelansang niyu riyà te pinebelavag ne kayu, ugaid ne mibanew en te Eleteala.

<sup>11</sup> Si Hisus ini se nekahi dut te Lalag te Eleteala ne impesurat din dengan se egkahi te, 'Ke pelaus ne mid-engkeran dut te sikiyu ne ebpevaley su kunaan niyu ke warà rantek din, ne iyan en iya ini nepemili ne segkad te valey.'

<sup>12</sup> Ne sikandin dà se ebpekepeliyu keytew rut te keberedusaan tew,” ke si Pedro, “su warà duma ne kayi te ampew te dunya ne imbehey te Eleteala ne ebpekegaga ne ebpekepeliyu keytew su sikandin dà.”

<sup>13</sup> Ne guna su nekita rut te minge Perekukum te kenà egkeandek si Pedro wey si Juan ne edlalag ne negeyip dan su netuenan dan te mevavà se nepengedian kayi te deruwa su minge etew rà dè duen. Ne ketà ne netenuran dan te midumdumaan dan ni Hisus.

<sup>14</sup> Ne warà dan mekekahikahi su nekita ran ini se meama ne daan ne pungkù ne neulian ne ed-itindeg ketà te uvey ni Pedro ki Juan.

<sup>15</sup> Tembù be impeluwal dan en ketà te egkukuman te mibpein-inseey ini se minge Perekukum te,

<sup>16</sup> “Engkey se ed-ul-ulaan tew kayi te minge etew ini?” ke sikandan. “Su netuenan te langun ne minge etew kayi te Hirusalim te mibaal dan te ulaula ne mekegeyip nevenar, ne kenà tew igkeparew.

<sup>17</sup> Ugaid,” ke sikandan, “ne ibaag tew kandan te kenà dan en maa ebpekelalag te misan engkey ne etew mekeatag dut te ngaran ni Hisus su apey kenà pà ebpekeeneb ini rut te minge etew.”

<sup>18</sup> Ketà ne mid-umew ran si Pedro ki Juan ne imbaag dan kandan ne migkahi te, “Kenà niyu en be igkepenurù etawa ebpekelalag ini mekeatag ki Hisus.”

<sup>19</sup> Ugaid ne migkahi si Pedro wey si Juan te, “Pegpegitunga niyu ke endei rapit te metidtu riyà te etuvangan te Eleteala te ebperumaruma key keniyu etawa ebperumaruma key te Eleteala.

<sup>20</sup> Su kenà egkepakey ne ebpekeengked key se ebpemenuitul dut te nekita te mata rey wey nerineg dey.”

<sup>21</sup> Meilut nevenar se kinebaag kandan dut te minge Perekukum, ne ketà ne impeliyu ran en. Warà dan metikà te ebpekesakit si Pedro ki Juan su neandek dan dut te langun ne minge etew ne edeyù te keupiya te Eleteala su atag dut te ini ne ned-ulaula.

<sup>22</sup> Ne ini se nepungkù ne etew ne neulian dut te mekegeyip ne ulaula ne labi en epat nepulù se rahun din.

*Mibpengeningeni ke Minge Mibperetiyaya te Ebeheren te Eleteala ke Hinawa Ran te Ibpemenuitul Dan ke Lalag Din*

<sup>23</sup> Guna su impeliyu ran en si Pedro ki Juan ne mid-uli dan en diyà te minge ruma ran ne mibperetiyaya, ne mibpemenuitul dan en ke langun ne migkahi dut te minge terebbelengesa wey minge pekilukesen.

<sup>24</sup> Nerineg dà dut te minge mibperetiyaya ne nevrurun dan te neseveka se hinawa ran te ebpengeningeni te Eleteala. “Is, ke Eleteala ne ebayàbayà te langun, sikuna ke midlimbag te langit wey tanà wey ke rahat wey langun ne tahù ketà.

<sup>25</sup> Su impekahi nu rut te keep-epuan dey ne si David ne sugshuen nu ibpepevayà dut te Kedlumun te Kedesenan ne Ebpetuntul te Menuisya ne migkahi te, ‘Meambe ke neepes ke minge etew ne kenà Hudiyanen?

Ne meambe ke netahù te itungan dut te minge etew se ed-ulaula ran te ed-atu ki Hisus

su ini ne ulaula ne kenà dan egketuman.

<sup>26</sup> Su mibpenehana en ke minge datù kayi te ampew te dunya,

ne nevrurun en ke minge egkeunutan

su ed-atu dut te Eleteala ne Kerenan;

uya, egkunterà dut te Impasad din ne Ebperetuen te langun.’

<sup>27</sup> Is, Eleteala,” ke sikandan, “ini se impekahi nu ki David dengan ne netuman en su nevrurun en ke minge Hudiyanen wey ke kenà minge Hudiyanen diyà te engki Hirudis wey si Gubinedur Punsiyu Pilatu kayi te inged ne Hirusalim su neseveka ran en ne egkunterà ki Hisus, ini se sugshuen nu ne meputi nevenar se atey rin, ini se Impasad nu ne Ebperetuen te langun.

<sup>28</sup> Iyan dan mid-ulaula ne ini se raan en ne netahù te itungan nu ne egked-ulaula. Netuenan nu ini su ruen gehem nu wey ini se kiyug nu ne egked-ulaula.

<sup>29</sup> Na guntaani, Kerenan, netuenan nu ini se mevaher ne minge imbaag dan kenami. Behera nu ke hinawa rey ke sikami ne minge sugshuen nu, su apey key kenà egkeandek te kebpenudtul dut te lalag nu.

<sup>30</sup> Ipayag nu ke gehem nu su apey egkeulii ke minge ederaru wey ipekita nu ke ebeelan nu ne mekeinuinu wey ulaula nu ne mekegeyip ibpepevayà dut te ngaran ni Hisus ke sugshuen nu ne meputi nevenar se atey rin.”

<sup>31</sup> Guna su nekeipus dan se ebpengeningeni ne neheram dan ne migkugel te Eleteala ini se baley ne nevrurun dan. Ne langun dan ne midlumunan dut te Kedesenan ne

Ebpetuntul te Menusiya, ne ketà ne mibmevagher en ke hinawa ran te ebpmenudtul dut te Lalag te Eleteala te warà kegkeandek dan te piya engkey ne etew.

*Mibpevegbehaya te Langun ne Menge Kearen Dan ke Menge Mibperetiyya ki Hisus*

<sup>32</sup> Langun dan ne mibperetiyya ki Hisus ne egkeseveka ke itungan dan wey hinawa ran. Warà seveka kandan ne nekepegitung dut te kandin ne menge aren ne kandin dà, ugaid ne mibpevegbehaya dan te langun ne kearen dan.

<sup>33</sup> Ne ini se menge kedserihan, ne dekelà se gehem dan te ebpesabut te nevanew en si Hisus ke Kerenan tew. Ne rekela se penaub te Eleteala dut te langun dan.

<sup>34</sup> Tembù be warà seveka kandan ne ruen kurang din dut te keuyehan, su embiya ruen seveka ne ruen kurang din ne ke menge ruma rin ne ebpasa te tanà etawa baley ran ne ke elehà din

<sup>35</sup> ne ibehay ran dut te menge kedserihan su apey ed-um-umunen dut te langun atag dut te kurang kandan.

<sup>36</sup> Ketà ne hewii ne ruen senge etew ne ed-ingaranan ki Jose ne diyà in-anak te Sipru. Hudiyanen sikandin ne kevuwaran ni Levi, ne iyan in-ingaran kandin dut te menge kedserihan ne si Bernabe (ne iyan din meana ne “Ke Ebag-et te Hinawa te Ruma Rin”).

<sup>37</sup> Ne ruen tanà ni Bernabe ne mibpasa rin ne ke elehà ketà ne imbehey rin dut te menge kedserihan.

## 5

*Si Ananias ki Sapira*

<sup>1</sup> Ne ruen meama ketà ne ed-ingaranan ki Ananias ne ke esawa rin ne ed-ingaranan ki Sapira. Duen tanà dan ne mibpasa ran,

<sup>2</sup> ugaid ne ruen duma dut te elehà ne intahak din ki Sapira ne warà din ipayag su kiyug ded dema dut te esawa rin. Ne ini se nesamà imbehey rin dut te menge kedserihan se egkahi te ini en imbe ke langun ne elehà din.

<sup>3</sup> Ne migkehiyan sikandin ni Pedro te, “Ananias, meambe ke midtuhut ka ne ke datù te pekaid se ebayabayà te hinawa nu su midtarutarù ka rut te Kedesenan ne Ebpetuntul te Menusiya? Su ruen intahak nu ne elehà dut te mibpasa nu ne tanà.

<sup>4</sup> Gewii te warà nu pà mebasa ke tanà nu, ne keykew ayan. Ne guna su mibpasa nu en, ne sikuna red lavew se ebayabayà dut te elehà din. Na, meambe ke nepegitung nu se ini ne ulaula ne meraat te iring kayi? Su kenà etew rà se edteruteruan nu, ugaid ne ke Kedesenan ne Ebpetuntul te Menusiya.”

<sup>5</sup> Nerineg dà ini ni Ananias, ne nepiley en sikandin su minatey en ne langun dut te nekerineg te ini ne ned-ulaula dan ne nengeandek nevenar.

<sup>6</sup> Ketà ne mid-vey ke menge menguwed ne meama ne mibukusan dan ke bangkey rin ne mid-ewit dan su idleveng.

<sup>7</sup> Nekesahad te menge tetelu ne uras ne nekeuma en ke esawa ni Ananias, ugaid ne warà din metueni ini se netemanan ni Ananias.

<sup>8</sup> Ne migkehiyan sikandin ni Pedro te, “Menu, ini rè be iya ke langun ne elehà dut te mibpasa niyu ne tanà? Idtarem nu kedì!”

“Uya,” ke se meritan, “ayan dà iya langun.”

<sup>9</sup> Ne migkahi en maa si Pedro te, “Meambe ke sikew wey ke esawa nu ne neupakat te ebpenggeraman niyu ke Kedesenan ne Ebpetuntul te Menusiya? Su ayan en maa ke menge meama ne midleveng dut te esawa nu, ne ed-ewiten ke red dema nikandan su idleveng ka!”

<sup>10</sup> Arà dà ne nepileyen sikandin ketà te sineruwan ni Pedro su minatey en. Guna su midlusud en ini se menge menguwed ne meama ne nekita ran ne minatey en sikandin, ne mibinting dan en diyà te liyu ne inleveng dan en maa diyà te uvey te leveng te esawa rin.

<sup>11</sup> Ketà ne neandek nevenar ke langun ne menge mibperetiyya ki Hisus abpeg dut te langun ne nekerineg dut te ini ne ned-ulaula.

*Mibeelan dut te menge Kedserihan ni Hisus ke Ulaula ne Mekegeyip wey Mekeinuinu ne Ned-ulaula*

<sup>12</sup> Ne merakel se ulaula ne mekegeyip wey mekeinuinu ne ned-ulaula ne mibeelan dut te menge kedserihan ni Hisus diyà dut te menge etew. Ne langun dut te menge mibperetiyya ki Hisus ne lelayun egkevurun diyà te ed-ingaranan te “Palàpalà ni Salomon”.

<sup>13</sup> Ne ke menge etew ne warà pà mibperetiyya ki Hisus, ne warà dan meketikà ne ed-amur ketà te kandan, misan dekelà se ked-adat kandan dut te langun ne menge etew.

<sup>14</sup> Ugaid ne nasi ne mid-iseg ke kerakel te menge meama wey menge meritan ne mibperetiyya ki Hisus ne nekeuman dut te langun ne mibperetiyya.

<sup>15</sup> Ne geina te ruen neveelan ne mekegeyip dut te menge kedserihan, ne mid-ewit dan ke menge etew ne ederaru diyà te kilid te ralan ne ibpeirehà diyà te kama wey diyà te ikam su apey egketerapes dan dut te alung ni Pedro embiya ebpeyayà sikandin.

<sup>16</sup> Ne denda ne menge etew se nekeuma ne riyà ebpuun te nekeerivey te Hirusalim ne menge inged su ebpengewit dan te ebpenderaru wey ke menge midsuukan te vusew, ne langun dutun ne neulian.

*Impevilanggù ke Menge Kedserihan dut te Menge Perekukum*

<sup>17</sup> Ketà ne ini se Pinekemepurù te menge Terebpelengesa wey ke menge ruma rin ne menge Sadyusiyu, ne dekelà nevenar se kegkesihì ran dut te menge kedserihan, tembù be midsuhù dan

<sup>18</sup> te impesigkem ini se menge kedserihan ne mibilanggù dan.

<sup>19</sup> Ugaid ne arà ne kerukileman ne ruen suluhuen te Kerenan ne mibpendiyà te bilengguan ne mibpuwasan din ke gumawan ne impelihawang din ke menge kedserihan se egkahi te,

<sup>20</sup> "Pendiya kew te Nekebpuru ne Valey te Eleteala ne pesebuti niyu dut te langun ne menge etew mekeatag dut te ini se umur ne behu ne riyà ebpuun te ki Hisus."

<sup>21</sup> Ketà ne midtuman ke menge kedserihan dut te ingkahi kandan dut te suluhuen te Kerenan kandan su egkepkepawà ne mibpendiyà dan en te Nekebpuru ne Valey te Eleteala ne mibpenurù dan te menge etew.

Guna su nekeuma en dutun ini se Pinekemepurù te menge Terebpelengesa wey ke menge ruma rin, ne impetawag din en ke langun ne menge pekilukesen te menge Hudiyanen su ruen kevruran te menge perekukum. Ketà ne midsuhù dan diyà te bilengguan su ibpeangey ke menge kedserihan.

<sup>22</sup> Nekeuma ini se midsuhù diyà te bilengguan, ne warà en ketà ke menge kedserihan. Ketà ne mid-uli dan en diyà te menge perekukum ne mibpenudt dan.

<sup>23</sup> "Guna su nekeuma key diyà te bilengguan," ke sikandan, "ne nekita rey se mibpintuan ini se menge gumawan ne langun dut te ebantey ne dutun te uvey te menge gumawan. Ugaid ne wey rey puwasi ini se gumawan ne warà nekita rey diyà te lusud."

<sup>24</sup> Guna su nerineg ini dut te kepitan te menge ebantey te Nekebpuru ne Valey te Eleteala wey ke menge mepurù te menge terebpelengesa, ne neinuinu ran nevenar ne ebpein-inseey ran ke engkey se ned-ulaula rut te menge kedserihan.

<sup>25</sup> Na ruen etew ne midlusud ne migkahi kandan. "Arà se menge etew ne impevilanggù niyu," ke sikandin, "ne ini en te lusud kayi te Nekebpuru ne Valey te Eleteala se ebpenurù te menge etew!"

<sup>26</sup> Arà dà ne mibeyaan en dut te kepitan te menge ebantey wey ke menge ruma rin ne mid-ewit dan ini se menge kedserihan. Ugaid ne warà dan pekesekiti sikandan su neandek dan dut te menge etew su kalu ke ebpenrumbehan dan te batu.

<sup>27</sup> Mid-ewit dan ini se menge kedserihan ne impeitindeg dan kayi te etuvangan te menge Perekukum. Ne migkehiyan dan dut te Pinekemepurù te menge Terebpelengesa te,

<sup>28</sup> "Imbaag dey en keniyyu neraan," ke sikandin, "te kenà niyu en ipenurù ke mekeatag te ngaran kayi te etew ini ne edumaan niyu. Ugaid ne intey niyu ve ini se mid-ulaula niyu! Su ini se impenurù niyu ne nekeeneb en kayi te lusud te Hirusalim. Ne kenà ini rà se mid-ulaula niyu su iyan key egkesenditan te kineimetayi kayi te etew ne edumaan niyu."

<sup>29</sup> Ketà ne migkahi si Pedro wey ke menge ruma ne menge kedserihan te, "Iyan dey iya edumaan ne ke suhù te Eleteala, kenà ke suhù ne mibeelan dà te etew.

<sup>30</sup> Su si Hisus ini," ke sikandan, "ne mibpeimetayan niyu su impelansang niyu diyà te pinebelavag ne kayu, ugaid ne mibanew sikandin te Eleteala, ke Eleteala ne ebpengerapen dut te menge keep-epuan tew rengan.

<sup>31</sup> Uya, mibanew sikandin te Eleteala ne mibatun din diyà te langit ne riyà impepinuu sikandin te egkekewanen te Eleteala su guntaanì ne sikandin ke Kerenan tew wey sikandin se ebpeiyu keytew rut te keberedusaan tew te Eleteala su apey sikitew ke menge kevuwaran ni Israyil ne embiya ebpemedsendit kiyu wey ed-engked dut te meraat ne ed-ul-ulaan tew ne ebpesharen din.

<sup>32</sup> Ne sikami," ke si Pedro, "ne ebpekethus key te langun kayi ne benar, abpeg dut te Kedesenan ne Ebpetuntul te Menusiyà ne editithus dema su ebpelumunan kandin te Eleteala ke langun ne edtuman te menge suhù din."



<sup>33</sup> Nerineg dà dut te menge Perekukum ne neepes dan nevenar ne egkiyuhan dan en te ebpeimatey ini se menge kedserihan.

<sup>34</sup> Ugaid ne senge etew kandan se mid-itindeg. Peresiyu sikandin ne ed-ingaranan ki Gemalil ne meyerù te penduan wey egkeedatan dut te langun ne menge etew. Ne mibuyù sikandin te ibpeliyu pà ke menge kedserihan,

<sup>35</sup> ne migkahi rin dutun dut te menge ruma rin ne Perekukum te, "Sikiyu ne menge ruma ku ne menge kevuwaran ni Israyil, ebantey kiyu kayi te kineped-ulaula tew te ini ne menge etew.

<sup>36</sup> Embiya egketenuran niyu te warà pà utew meuhet ne ruen senge etew ne midlepep ne ed-ingaranan ki Tewdas ne uvag te sikandin en ke egkeedatan ne etew. Ne ruen menge epat nehatus ne menge meama ne miduma kandin, ugaid ne kegkepatey kandin ne nenekedsuwey en ini se menge miduma kandin. Ne ke menge ulaula ran ne neengked.

<sup>37</sup> Neiseg-iseg ketà ne ruen maa senge etew ne midlepep ne ed-ingaranan ki Hudas ne riyà ebpuun te Geliliya su arà ne hewii ne ibpesurat dut te langun ne menge etew ke menge ngaran dan diyà te inged ne mid-enakan kandan. Ne ruen dema miduma kandin, ugaid ne kegkepatey dema kandin ne nenekedsuwey en ke langun ne miduma kandin.

<sup>38</sup> Tembù be," ke si Gemalil, "ini ne ulaula ne iyan ku egkekahi ne kenà tew en ed-ulaan se ebpekesekitan tew ini se menge etew. Ebeleharen tew en, su embiya kayi rà ebpuun te etew ini se netahù te itungan dan wey ebeelan dan ne kenà ebpekeiseg,

<sup>39</sup> ugaid ne embiya riyà ebpuun te Eleteala ini, ne kenà niyu egkegaga te ebpeengked sikandan. Ne kenà ketà dà tamen su egkevaluy kew ne egkunterà te Eleteala."

Ketà ne mibperumaruma ke menge Perekukum dut te lagal ni Gemalil.

<sup>40</sup> Impelusud dan en maa ke menge kedserihan ne impelambit dan sikandan. Ketà ne imbaag dan en maa kandan te kenà dan en ebpekelalag mekeatag dut te ngaran ni Hisus, ne impeliyu ran en.

<sup>41</sup> Ketà ne kineawà dut te menge kedserihan kayi te menge Perekukum ne mehalew ran su iring te iyan pegitungan te Eleteala ne edait dan ne egkerasey atag dut te kebperetiyya ran ki Hisus.

<sup>42</sup> Ne uman gewii ne riyà dan te Nekebpuru ne Valey te Eleteala wey riyà te baley te menge etew ne nasi dan pà ne mid-iseg se kebpenurù dan wey ibpesabut dan ke Meupiya ne Tudtul mekeatag ki Hisus, ke Impasad te Eleteala ne Ebperetuen te langun.

## 6

### *Ke Pitu ne Etew ne Nepemili dut te Menge Kedserihan ne Nevehayan te Helevek*

<sup>1</sup> Ketà te arà ne hewii te ed-iseg-iseg en ke kerakel dut te menge mibperetiyya ki Hisus, ne ruen nevaluy ne kewehaan dan dut te teleinged ne menge Hudiyanen ne Hibruwanen se kinehiyan din wey ke menge Hudiyanen ne Gerisiyanen se kinehiyan din. Iyan migkahi dut te menge Hudiyanen ne Gerisiyanen se kinehiyan din ne kenà egkevehayan ke menge balu ne meritan te kureta ne ed-um-umunen dan te uman gewii.

<sup>2</sup> Dutun ne impetawag dut te sepulù wey deruwa ne menge kedserihan ke langun ne mibperetiyya ki Hisus ne migkahi ran te, "Kenà meupiya te sikami ne menge kedserihan se ed-engked ne ebpemesabut dut te Lalag te Eleteala apay rey egketuganur ke kurang dut te balu ne menge meritan.

<sup>3</sup> Tembù be menge suled," ke sikandan, "pemili kew te pitu ne etew kayi te keniyyu, ke etew ne midlumunan dut te Kedesenan ne Ebpetuntul te Menusiyà wey ruen ketau rin. Ne ini ne helevek ne idsarig dey riyà te kandan.

<sup>4</sup> Ketà," ke sikandan, "ne sikami ke menge kedserihan ne kenà en egkeseletan ke hewii te kebpenengeningi rey wey kebperemesabut dey dut te Lalag te Eleteala."

<sup>5</sup> Nerineg dan ini se menge lalag dut te menge kedserihan ne nesuatsuat ke langun ne nevrurun ketà. Ne mibpemili dan en si Esteban su ini ne etaw ne dekelà se kebperetiyya rin wey midlumunan dut te Kedesenan ne Ebpetuntul te Menusiyà. Ne ke ruma ne mepemili dan dema ne si Felipe, si Procu, si Nicanor, si Timun, si Parmenas, wey si Nicolas ne riyà ebpuun te Antiyuka. Si Nicolas ini ne kenà Hudiyanen, ugaid ne nekeruyud sikandin dut te tuluuwen dut te menge Hudiyanen.

<sup>6</sup> Ne ini se nepemili dan ne impetitindeg dan ne impekilala rut te menge kedserihan. Ne gewii ran te ebpenengeningi ne indampen dan ke menge belad dan dut te nepemili dan su ebuyù dan te ebpeneuven dan te Eleteala.

<sup>7</sup> Ketà ne ed-iseg-iseg se kebpekeeneb dut te ibpesabud dan ne Lalag te Eleteala. Ne ed-iseg-iseg dema se kerakel dut te mibperetiyaya ki Hisus kayi te Hirusalim, ne merakel dema se menge terebpepengesa ne mibperetiyaya ki Hisus.

*Ke Kinesigkema ki Esteban*

<sup>8</sup> Ne si Esteban ini, ne mibpenaub te Eleteala ne ruen gehem te Eleteala ne imbehey kandin su riyà te etuvangan te menge etew ne ruen neveelan din ne mekegeyip nevenar wey ulaula ne mekeinuinu.

<sup>9</sup> Ugaid ne ruen menge Hudiyanen riyà te senge valey ne ebppedgian te penduan dan ne ed-ingaranan te “Menge Uripen ne Nevelukasan” ne migkunterà ki Esteban. Ini se menge Hudiyanen ne riyà ebpuun te inged ne Sirini wey Elihendriya wey riyà ebpuun te lusud te inged ne Silisya wey Asiya ne mibaal te kebpekidlewanà ki Esteban.

<sup>10</sup> Ugaid ne mibehayan si Esteban te ketau dut te Kedeseenan ne Ebpetuntul te Menusiyà, tembù be warà mekeatu ke ebpekidlwan kandin.

<sup>11</sup> Ketà ne ini se menge etew ne ebpekidlwan, ne ruen midselipsip kandan te kureta te egkahi te, “Nering dey ke meraat ne menge lalag ni Esteban mekeatag ki Moises wey ke Eleteala!”

<sup>12</sup> Sabap dut te tarù dan ne nehuvut ke menge etew, ke menge pekilukesen, wey ke menge meysterù dut te penduan. Ne arà dà iyan ne migsigkem dan en si Esteban ne mid-ewit dan sikandin su ibpeetuvang diyà dut te menge Perekukum.

<sup>13</sup> Ne ruen dema impelusud dan ne edlalag te tarù mekeatag ki Esteban. “Ini se etew,” ke sikandan, “ne layun edlalag te meraat ne ebpekesuhat dut te egkeedatan ne Nekebpuru ne Valey te Eleteala wey mekeatag dut te menge penduan ni Moises.

<sup>14</sup> Su nering dey te egkahi sikandin,” ke sikandan te, “si Hisus ini ne ebpuun te Nesarit ne edrundusen din kun ini se Nekebpuru ne Valey te Eleteala wey edsembian din ke langun ne betasan ne intahak keyta ni Moises rengan!”

<sup>15</sup> Ne langun dut te menge Perekukum ne nevrurun ketà ne midtengteng ki Esteban, ne nekita ran ke paras din ne iring dut te paras te suluhuen te Eleteala.

## 7

*Ke Kebpekidlalag ni Esteban dut te Menge Perekukum*

<sup>1</sup> Ketà ne mid-insaan si Esteban dut te Pinekemepurù te menge Terebpepengesa te, “Menu, benar iya ini se menge lalag dan ne ebpekesuhat keykew?”

<sup>2</sup> Ne migkahi si Esteban te, “Menge suled ku wey menge lukes, pemineha niyu ini se egkehiyen ku keniyu. Dengan te diyà pà ed-ubpà te inged ne Misuputamya ini se ke-ep-epuan tew ne si Abraham su warà pà sikandin med-arat diyà te inged ne Haran ne mibpekita kandin ke Eleteala ne ebpengandlag te raman din.

<sup>3</sup> Ne migkehiyan si Abraham dut te Eleteala te, ‘Ewai nu ini se menge suled nu wey ke menge lukes nu wey ini se inged nu ne pendiyà ka te inged ne ibpekita ku keykew.’

<sup>4</sup> “Dutun ne mid-awà en sikandin dut te inged din ne mid-arat med-ubpà diyà te inged ne Haran. Ne kinepatey dut te amey rin ne impearat en maa sikandin te Eleteala kayi te inged ne ubpaan tew en guntaan.

<sup>5</sup> Ugaid ne ketà ne hewii ne warà pà imbehey te Eleteala ki Abraham ne tanà misan senge palad dà. Ugaid ne mibpasad ke Eleteala kandin te ibehey rin ini se inged su sikandin se egkemuney elin ke menge kevuwaran din. Gewii te impasad kandin te Eleteala ini ne warà pà anak ni Abraham.

<sup>6</sup> Ne migkahi kandin dut te Eleteala te, ‘Ke menge kevuwaran nu, ne diyà dan ebpekeubpà keuremà te inged te ruma pà ne bansa. Ne ketà ne egkevaluy ran ne uripen wey ed-ey-eyuwen dut te arà ne bansa taman te epat nehatus ne rahun.

<sup>7</sup> Ugaid ne edusaan ku ini se menge etew ne ebpengenguripen kandan. Ne ketà ne ibpeliyu ku sikandan dut te arà ne inged ne edlived dan kayi ne ubpaan ne ebpengarap dan kediey,’ ke se Eleteala.

<sup>8</sup> Ne insuhù te Eleteala ki Abraham,” ke si Esteban, “te langun ne menge meama ne ed-etusan su iyan tuus te kedtuman dut te insuhù din kandan. Tembù be mid-etusan en ni Abraham ini se anak din ne si Isaac te nekedwalu pà ne andew se kineenaka kandin. Ne si Isaac dema, ne mid-etusan din ke sepulù wey deruwa ne menge anak din ne menge meama ne nevaluy ne menge keep-epuan dut te sikitew ne menge Hudiyanen.

<sup>9</sup> “Na,” ke si Esteban, “kayi te ini ne sepulù wey deruwa ne anak ni Jacob ne duen senge etew ne ed-ingaranan ki Jose ne ingkesihi rut te menge suled din. Si Jose ini, ne mibpasa rut te menge suled din ne egkevaluy ne uripen diyà te inged ne Ihiptu. Ugaid ne ke Eleteala se miduma kandin,

<sup>10</sup> ne mibpeliyu kandin dut te langun ne merehen ne ned-ulaula rin. Ne guna su mid-etuvang si Jose dut te datù te inged ne Ihiptu ne mibpenaub dut te Eleteala sikandin wey mibehayan te ketau wey meupiya ne ulaula, ne nekita ini rut te datù ne nesuatsuat sikandin. Tembù be midtendù din si Jose ne gubinedur diyà te inged ne Ihiptu wey ebpekekamal dut te menge sugsuhuen wey menge kearen diyà te turuhan din.

<sup>11</sup> “Ne neumaan te bitil ke langun ne inged riyà te Ihiptu wey kayi te inged ne Kenaan ne ubpaan ni Jacob ke amey ni Jose, ne nerehenan ke menge etew. Ne ini se keep-epuan tew,” ke si Esteban, “ne warà ebpesineruwan dan te ebpemengà te egkekaan dan.

<sup>12</sup> Guna su nerineg ni Jacob te ruen egkekaan diyà te inged ne Ihiptu ne midsuhù din ke menge anak din, ini se menge keep-epuan tew,” ke si Esteban, “su ebpemasa te egkekaan ne ini se neuna ne kebpekepeneleinged dan diyà.

<sup>13</sup> Ne ketà te ikeruwa ne kebpekependiyà dan te inged ne Ihiptu ne impayag ni Jose te sikandin ke suled dan wey merineg ini dema dut te datù, tembù be netuenan din en ke endei ini se menge suled ni Jose.

<sup>14</sup> Dutun ne intelaan ni Jose ke amey rin su ebpeketuenan kandin wey langun dut te menge suled din ne ebpendiyà te inged ne Ihiptu, ne pitu ran nepulù wey lelima.

<sup>15</sup> Tembù be mibpendiyà ensi Jacob te inged ne Ihiptu ne diyàn en minatey sikandin wey ke menge anak din ke menge keep-epuan tew,” ke si Esteban.

<sup>16</sup> “Ne ke menge bangkey ran ne ed-ewiten ded ketà te inged ne Sikim lusud te Kenaan, ne kayi ran inleveng dut te penlelevangan ne mibpemasa rut te apù dan ne si Abraham, su mibpemasa rin ini dut te menge anak ni Hamur.

<sup>17</sup> “Guna su egkeuma en ke hewii ne ebpekeliyu ran en dut te inged ne Ihiptu su edtumanen en te Eleteala ke impasad din ki Abraham dengan, ne mibmerakel dan en diyà te inged ne Ihiptu ke menge keep-epuan tew,” ke si Esteban.

<sup>18</sup> “Ketà ne ruen behu ne midatù diyà te inged ne Ihiptu ne warà mekekilala ki Jose.

<sup>19</sup> Ne mibpeselipsipan din te itungan ne mevaher wey meraat se mid-ulaula rin dut te menge keep-epuan tew,” ke si Esteban, “su mibpehes din te ebpeengkeran kandan ke menge anak dan ne riyà te liyu su apey ebpematay.

<sup>20</sup> “Ne ketà ne hewii ne ruen in-anak ne ed-ingaranan ki Moises, ne merayirayi ne vatà. Ne taman te tetelu ne vulan se kineritan dut te iney rin kandin diyà te valey ran.

<sup>21</sup> Guna su nekedtetelu en ne vulan ne intahù dan en sikandin diyà te meriyù. Ugaid ne netuen sikandin te meritan ne anak dut te datù ne mid-anak-anak din si Moises, ne nevaluy ne iring te tunej ne anak din.

<sup>22</sup> Ne impenurù dan ki Moises ke langun ne menge ulaula ne netuenan dan dut te menge etew te Ihiptu, ne nevantug sikandin su atag dut te ketau rin te kebpesabut wey ke menge vaal din.

<sup>23</sup> “Guna su epat en nepulù se rahun ni Moises,” ke si Esteban, “ne netahù te itungan din se ebpenumbelayan din ke menge ruma rin ne menge Hudiyanan ne kevuwaran ni Israyil.

<sup>24</sup> Ne nekita rin te senge etew kandan ne edtulengen dut te etew te Ihiptu. Ne midtevangin din ketà ne midsulian din ke etew te Ihiptu su mid-imetayan din. (

<sup>25</sup> Kunaan din ke mepayag diyà te itungan dut te menge ruma rin ne menge Hudiyanan te sikandin se netendù te Eleteala ne ebpekepeliyu kandan dut te inged ne Ihiptu, ugaid ne warà dan mesebuti.)

<sup>26</sup> Ikeruwa ne hewii ne midlived maa sikandin ne nekita rin te ruen deruwa ne ruma rin ne Hudiyanan ne ebpeehetey, ne ebpelangen din perem ini se deruwa ne etew. ‘Menge suled,’ ke sikandin, ‘kenà kew! Su teledsuled kew su elin kew Hudiyanan! Ne meambe ke ebpeehetey kew?’

<sup>27</sup> “Ugaid ne ini se etew ne mibadas te ruma rin ne insinumag din dà si Moises se egkahi te, ‘Engkey se mibehey kenikew te ketengdanan te kegkukum kenami?’

<sup>28</sup> Meambe, ed-imatay ka perem kediey iring gevii dut te kineimatay nu te senge etew ne etew te Ihiptu?’

<sup>29</sup> Nerineg dà ini ni Moises ne mibpelahuy en sikandin ne riyà med-ubpà sikandin te inged ne Madyan. Ne dutun ne mid-esawa sikandin ne mid-anak dan te deruwa se anak dan ne meama.

<sup>30</sup> “Guna su neked-epat en nepulù ne rahun ne riyà si Moises te inged ne Madyan, ne ruen suluhuen te Eleteala ne mibpekikakita ki Moises diyà te sagbet ne egkeregreg. Ini se nekita rin ne riyà te tanà ne kenà egkeubpaan te etew uvey dut te buvungan ne ed-ingaranan te Sinai.

<sup>31</sup> Negeyip si Moises ketà te nekita rin, ne mid-uvey rin ke sagbet su ed-intengan din. Ne dutun te egkeregreg ne sagbet ne nerineg din ke suwara te Kerenan se egkahi te,

<sup>32</sup> 'Siaken ke Eleteala ne mibpengerapen dut te minge keep-epuan niyu ne si Abraham, si Isaac wey si Jacob.' Ne migkerker si Moises te kegkeandek din ne warà din metikà te edtengteng.

<sup>33</sup> "Ne migkehiyan sidandin te Kerenan te, 'Luunga nu ke telumpà nu su egkeedatan an se tanà ne mid-itindeha nu.

<sup>34</sup> Su nekita ku ke kegkerasey dut te langun ne minge etew ku riyà te inged ne Ihiptu, ne nerineg ku ke keggegegeng dan. Tembù be ini ad guntaani te tanà su ibpeliyu ku en sikandan. Na ipanew ke en,' ke se Kerenan, 'su edsuhuen ku sikew diyà te inged ne Ihiptu.'

<sup>35</sup> "Na," ke si Esteban, "si Moises ini se warà sehipaa dut te minge kevuwaran ni Israyil su migkehiyan dan sikandin te, 'Engkey se mibehey kenikew te ketengdanan te kegkukum kenami?' Ugaid ne sikandin," ke si Esteban, "ke midsuhù te Eleteala ne egkeunutan ne ebpeliyu dut te minge keep-epuan tew. Ne midtevangan sikandin dut te suluhuen te Eleteala ne nekita rin diyà te sagbet ne egkeregeg.

<sup>36</sup> Su sikandin se mid-ewit te minge keep-epuan tew te ed-awà ketà te inged ne Ihiptu ne mibpenguripen kandan. Ne mibaal sikandin te mekegeyip wey ulaula ne mekeinuinu diyà te inged ne Ihiptu, wey riyà te rahat ne ed-ingaranan te Merihà, wey riyà dema te ebpevayaan dan ne tanà ne kenà egkeubpaan te etew ne impekita rin kandan ne minge ulaula arà taman te neked-epat nepulù ne rahun.

<sup>37</sup> Si Moises ini," ke si Esteban, "se migkahi dut te keep-epuan tew ne minge kevuwaran ni Israyil te, 'Ruen ibpepengkayi te Eleteala te keniyu keuremà ne ebpelambas te lalag din iring dut te siaken ne impepengkayi a nikandin. Ne senge etew sikandin dut te minge ruma niyu ne minge Hudiyanen,' ke si Moises.

<sup>38</sup> Si Moises ini," ke si Esteban, "ne dutun en dema te nevurun ne minge keep-epuan tew diyà te tanà ne kenà egkeubpaan te etew. Ne sikandin se ebpekidlalag dut te suluhuen te Eleteala riyà te buvungan ne ed-ingaranan te Sinai. Ne sikandin ini se neketelimà te lalag egenat te Eleteala ne warà kegkepus din su apay rin ibehey kenitew.

<sup>39</sup> "Ugaid," ke si Esteban, "ne kenà egkiyug ke minge keep-epuan tew ne eduma kandin. Mid-engkenà dan kandin su iyan dan kiyug ne edlived dan diyà te inged ne Ihiptu.

<sup>40</sup> Ne gewii te diyà pà si Moises te buvungan ne migkehiyan dan si Arun ke kakey rin te, 'Beeli key nikuna te minge ledawan ne egkevaluy ne minge diwata ta ne ed-ewit kenitew te edlived. Su si Moises ini se mid-ewit kenitew te riyà ebpuun te inged ne Ihiptu, ne warà dey metueni ke endei en sikandin.'

<sup>41</sup> Ne rutun," ke si Esteban, "ne mibaal dan te ledawan ne iring te paras te nati te sapi. Ne mibpelengesaan dan ne mibehey ran kandin, ne midsesemayà te dekelà ne kegkehalew dut te mibeelan dà te belad dan.

<sup>42</sup> Ketà," ke si Esteban, "me mid-iniyuhan en ke minge keep-epuan tew rut te Eleteala ne mibeledhad din en se kebpengarap dan te minge bituen diyà te langit. Su ruen impesurat din diyà te riberù dut te minge ebpelambas te Lalag din dengan ne egkahi te,

'Ey, sikiyu ne minge kevuwaran ni Israyil, ne gewii te riyà kew pà te tanà ne kenà egkeubpaan te etew ne impelengesa niyu ke minge binatang ne ibehey niyu, ugaid ne kenà siaken ini se nevehayan niyu.

<sup>43</sup> Su iyan niyu mid-ewit ne ke ebpeubpaan niyu dut te ledawan ne ed-erapen niyu ne si Muluk; wey ke ledawan ne iring te paras te bituen ne ed-erapen niyu ne si Ripan. Minge ledawan ini ne mibeelan niyu ne ed-erapen niyu. Tembù be ibpebiyag ku sikiyu diyà te uanaan pà te inged ne Bebilunya.'

<sup>44</sup> "Na ini se keep-epuan tew," ke si Esteban, "ne dengan te riyà den pà te tanà ne kenà egkeubpaan te etew, ne ruen baley ne iyan din pengawid se minge lundis te binatang su ketà med-ubpà ke Eleteala ke ebpekidlalag ke minge etew kandin. Mibeelan ini se baley su insuhù dut te Eleteala ki Moises su ebpeiringan ke impekita rin kandin.

<sup>45</sup> Ne intavun dan ini se baley ne ed-ubpaan te Eleteala rut te minge inenakan dan taman te pipira ne lapis ne kevuwaran. Ne ini ne mid-ewit dan te eduma ki Josue te edlusud kayi ne inged su impeawà en te Eleteala ke minge bansa ne mid-ubpà kayi su

apey iyan en ebpengemuney ne ke menge keep-epuan tew. Ne kayi red ini se baley ne ubpaan te Eleteala taman te hewii ne warà pa medatù si David.

<sup>46</sup> Ne ke ulaula ni David," ke si Esteban, "ne nekesuhat te hinawa te Eleteala, ne mibuyù din te Eleteala te embiya idtuhut kandin ne ibpeitindeg din ke baley ne ubpaan te Eleteala ne iyan ebpengeraan dut te keep-epuan tew ne si Jacob.

<sup>47</sup> Ugaid ne warà idtuhut ki David su ke anak din ne ed-ingaranan ki Salomon se ebpekepitindeg te baley ne ed-ubpaan te Eleteala.

<sup>48</sup> "Ugaid," ke si Esteban, "ne ke Eleteala ne kenà ed-ubpa te baley ne mibeelan dà te menusiya. Su ruen impesurat din dut te senge etew ne ebpelambas te Lalag din se egkahi te,

<sup>49</sup> "Ke langit se ebpinuuwan ku te kedatù ku ne ke dunya se edsendayan te paa ku.

Tembù be kenà egkepakey

ne ebpeitindeg kew te baley ne ed-ubpaan ku, ke se Eleteala.

Ne kenà egkepakey ne ebpeitindeg kew te ed-imelayan ku.

<sup>50</sup> Su siaken se midlimbag kayi te dunya wey langun ne tahù din.

<sup>51</sup> "Ne sikiyu," ke si Esteban, "ne menge ruma ku ne menge Hudiyanen, meresen nevenar se ulu niyu! Ne ke hinawa niyu ne kenà eduma te Lalag te Eleteala, ne iring te bengel kew su kenà kew ebpepingeg. Iring kew red iya te menge keep-epuan niyu, ne kenà kew rema ebpepingeg dut te Kedesenan ne Ebpetuntul te Menusiya.

<sup>52</sup> Ne menu, duen be misan seveka te menge ebpelambas te Lalag te Eleteala rengan ne warà resaya dut te menge keep-epuan niyu? Warà! Su mid-imetayan dan arà se midsuhù te Eleteala rengan ne ebpesabut mekeatag te kebpekeuma dut te Sugsuhuen din ne metidtu ne si Hisus. Guna su nekeuma en sikandin, ne mid-ulug niyu diyà te menge etew ne egkepees kandin ne mibeimetayan niyu.

<sup>53</sup> Ne sikiyu se mibebayan te penduan te Eleteala rengan," ke si Esteban, "ne intetehak impepevaya dut te menge suluhuen din, ugaid ne warà niyu tumana."

#### *Ke Kinerumbaha te Batu ki Esteban*

<sup>54</sup> Guna su nerineg dut te menge Perekukum ini se lalag ni Esteban, ne nengepees dan nevenar ne nekepengingitel dan te kegkepees dan kandin.

<sup>55</sup> Ugaid ne si Esteban ini, ne midlumun en kandin ke Kedesenan ne Ebpetuntul te Menusiya ne midlingakà sikandin diyà te langit ne nekita rin ke daman dut te Eleteala ne ketà ne nekita rin dema si Hisus ne mid-itindeg diyà te egkekewanan te Eleteala.

<sup>56</sup> "Intengi niyu ma," ke si Esteban, "su egkekita ku ne nevukaan en ke langit ne sikandin ke Impeanak te Menusiya se ed-itindeg diyà te egkekewanan te Eleteala!"

<sup>57</sup> Nerineg dà ini rut te menge Perekukum ne midsabpeng dan te telinga ran se egkuleyi. Ne ketà ne midlingketawan dan sikandin,

<sup>58</sup> ne migeweran dan ne miguyud dan diyà te inged dan ne Hirusalim, ne mibpenrumbag dan en te batu. Ne ini se menge etew ne mid-isuhat kandin te lalag, su ini ke ed-ingaranan te titihus, ne insavuk dan ke menge kumbalà dan ne mibentayan dut te senge etew ne ed-ingaranan ki Saulo.

<sup>59</sup> Ne rutun te kedrumbaha ki Esteban te batu ne mibpengeningeni sikandin se egkahi te, "Ey Kerenan ku ne si Hisus, telimaa nu ini se gimukud ku!"

<sup>60</sup> Ketà ne mibpenimbuel en sikandin ne mibmerahing se suwara rin se egkahi te, "Ey Kerenan, kenà nu penunduha ke menge salà dan!" Neipus din dà te egkahi ini, ne nepandus en ke hinawa rin.

## 8

<sup>1-2</sup> Ketà dema si Saulo te kinerumbaha te batu ki Esteban, ne kiyug din iya se kineimetayi ran kandin.

#### *Mibpekesekitan ni Saulo ke menge Mibperetiyya ki Hisus*

Inleveng si Esteban dut te menge etew ne mepegeleleala ne mibpeninehew ran wey mibpenderawit kandin. Igenat dut te hewii ne kineimetayi ran kandin ne midrudsù ke kegkerasey dut te langun ne mibperetiyya ki Hisus diyà te Hirusalim. Tembù be nevurahey ke langun ne mibperetiyya diyà te menge inged ne lusud te Hudiya wey Semeriya, ne ini rà te sepulù wey deruwa ne menge kedserihan se warà med-awà kayi te Hirusalim.

<sup>3</sup> Ne si Saulo ini, ne mibpekesekitan din ke menge etew ne mibperetiyya ki Hisus su apey ran egkereeti perem. Su midsihid sikandin diyà te menge valey ne midlusud ne miguyud din ke menge meama wey meritan ne mibperetiyya ne mibilanggu din.

*Mibpesebutan dut te Menge Mibperetiyya Ini se Meupiya ne Tudtul Mekeatag ki Hisus Diyà te Lusud te Semeriya*

<sup>4</sup> Ne ini se mibperetiyya ki Hisus ne nevurahey en, ne mid-eneb-eneb dan en diyà te langun ne menge inged se ebpesabut dut te Lalag te Eleteala.

<sup>5</sup> Ne senge etew kandan ne ed-ingaranan ki Felipe ne mibpendiyà te senge inged ne lusud te Semeriya se mibpesabut din ke menge etew mekeatag dut te Impasad te Eleteala ne Ebperetuen te menge etew.

<sup>6</sup> Ne guna su nerineg dut te denda ne menge etew arà te lalag ni Felipe ne nekita ran ke menge ulaula ne mekegeyip ne mibeelan din, ne egkseveka ran ne ebpeming kandin.

<sup>7</sup> Merakel se menge etew ne mibpenegseg din ke menge busew ne midsuuk kandan, ne nekepenguleyi ini se busew te kinepeawà kandan. Ne merakel dema se midtibas te ayew wey menge pungkù ne nengeulian din.

<sup>8</sup> Tembù be nehalew nevenar ke menge etew dut te ini ne inged.

<sup>9</sup> Duen senge etew ne ed-ingaranan ki Simon ne mid-ubpà ketà ne inged ne nekebpipira en ne rahun ne negeyip nevenar ke menge etew te Semeriya rut te mibeelan din ne malik mata. Mibpeperetiyya sikandin te menge etew te ruen kun uvag gehem din.

<sup>10</sup> Ne langun ne menge etew ketà ne igenat te mepurù taman te kevevaan ne intahù dan te hinawa ke langun ne lalag din. Ke sikandan te, "Ini se gehem ne impekita rin ne gehem te Eleteala ne ed-ingaranan te 'Ke Dekelà ne Gehem'."

<sup>11</sup> Tembù be mibperumaruma ran kandin su neuhet en ne negeyip dan dut te malik mata ne mibeelan din.

<sup>12</sup> Ugaid ne guna su impesabut ni Felipe ke Meupiya ne Tudtul mekeatag te Edetuan te Eleteala ke menge etew wey mekeatag ki Hisu Kristu ne mibpebunyang ke menge bayi meama tuus te mibperetiyya ran.

<sup>13</sup> Misan si Simon ini ne mibaal te malik mata ne mibperetiyya en dema. Guna su mibpebunyang en sikandin ne midumaruma en sikandin ki Felipe ne negeyip sikandin dut te nekita rin ne mibeelan ni Felipe ne mekegeyip wey ke dekelà ne ned-ulaula rin ne mekeinuinu.

<sup>14</sup> Ne nerineg dut te menge kedserihan diyà te Hirusalim te mibperetiyya en ke menge etew te inged ne Semeriya, ne ketà ne impendiyà dan si Pedro ki Juan.

<sup>15</sup> Nekeuma ran ne impengeningeni ran te Eleteala ke langun ne mibperetiyya ki Hisus su apey ebpekelumun kandan ke Kedesenan ne Ebpetuntul te Menusiyà.

<sup>16</sup> Su warà pà mekeuma ke kedlumun dut te Kedesenan ne Ebpetuntul te Menusiyà dut te ini ne menge etew. Su nebunyan dan dà se tuus te mibpesakup dan ki Hisu Kristu.

<sup>17</sup> Rutun ne indampen dan ke velad ni Pedro ki Juan dut te menge etew, ne ketà ne midlumun en kandan ke Kedesenan ne Ebpetuntul te Menusiyà.

<sup>18</sup> Nekita ni Simon ne kinedampen dut te menge kedserihan dut te mibperetiyya ki Hisus ne midlumun en ke Kedesenan ne Ebpetuntul te Menusiyà, ne ebhayan din perem te kureta si Pedro ki Juan.

<sup>19</sup> Ke sikandin te, "Behayi a rema kayi te gehem ini su apey ruen edempenan ku ne edlumunan sikandin dut te Kedesenan ne Ebpetuntul te Menusiyà."

<sup>20</sup> Ugaid ne migkehiyan sikandin ni Pedro te, "Embiya perem edusaan ka te Eleteala abpeg dut te kureta nu su kunaan nu ke egkepaye ne egkepemasa ini se gehem ne imbehey te Eleteala!

<sup>21</sup> Warà kebpekeamung nu etawa kebpekeruma nu te ini ne helevek dey," ke si Pedro, "su kenà metidtu ke hinawa nu riyà te etuvangan te Eleteala.

<sup>22</sup> Tembù be pedsendit ka ne engkeri nu ke meraat ne netahù te itungan nu, ne ebpekevuyù ka te Eleteala te ebpehareh din ke nepegitung nu ne meraat.

<sup>23</sup> Su netuanan ku," ke si Pedro, "te laus ka ne egkesihi ne uripen ka dut te meraat ne ed-ul-ulaan nu."

<sup>24</sup> Migkehiyan ni Simon si Pedro ki Juan te, "Ibpengeningeni a niyu te Kerenan su apey ke rawak niyu kedì ne kenà egked-ulaula."

<sup>25</sup> Ne taman te nekebpipira ne hewii ne mibpesabut si Pedro ki Juan dut te Lalag te Kerenan wey mibpenudul dan mekeatag ki Hisus ke Kerenan, ne mid-uli dan en maa diyà te Hirusalim. Ne gewii ran te riyà te ralan ne impesabut dan ke Meupiya ne tudtul diyà te merakel ne menge inged ne imbayà dan lusud te Semeriya.

*Si Felipe wey ke Egkeunutan ne Riyà Ebpuun te Itiyupiya*

<sup>26</sup> Ne ruen suluhuen te Kerenan ne migkahi ki Felipe, ke sikandin te, "Ipanew ka guntaani ne pendiya ka te belengkayan diya te ralan ne egenat te Hirusalim ne ebpendiya te inged ne Gasa." (Ini ne ralan ne wara en ebpevaya guntaani.)

<sup>27-28</sup> Ketà ne migenat en si Felipe. Ne rutun te ralan ne ruen etew ne yanuku riyà ebpuun te inged te Itiyupiya ne ed-uli diya te kandan su mibpendiya ini se etew te Hirusalim su ebpengarap te Eleleala. Mepuru ne egkamal sikandin dut te menge kearan te Bai ketà te inged ne Itiyupiya. Gewii te ed-uli en sikandin te ed-untud te kerumata ne ebasa sikandin te riberu ne impesurat ki Isayas, senge etew ini ne ebpelambas te Lalag te Eleleala rengan.

<sup>29</sup> Ne migkehiyan rutun si Felipe dut te Kedesenan ne Ebpetuntul te Menusiya te, "Uvey ka ketà te kerumata rin."

<sup>30</sup> Nekeuvey rà si Felipe rutun ne nerineg din en ke meama ne ebasa dut te impesurat ki Isayas, ke ebpelambas te Lalag te Eleleala rengan. Ke si Felipe te, "Menu, egkesebutan nu ini se ebasaan nu?"

<sup>31</sup> Ne migkahi ke meama te, "Memenu ve se kegkesebuti ku ke embiya wara ebpenuru kediey?" Ketà ne impeuntud din en si Felipe dut te kerumata rin.

<sup>32</sup> Ini se mibasa rin ne Lalag te Eleleala ne ke impesurat ki Isayas rengan ne egkahi te, "Iring sikandin te bilibili ne eduma ne edtuyuken su edsumbelien;

uya iring sikandin te nati te bilibili ne kenà ed-erang ke edtevangawan, su wara kekehiyen din.

<sup>33</sup> Pinegkaya sikandin wey bigkug se kukuman dan kandin. Wara ebpekeguhud dut te inenakan din, su nepupus en ke umur din kayi te ampew te dunya."

<sup>34</sup> Nekeipus ini se meama ne ebasa ne mid-insà ki Felipe te, "Engkey etawa ini se edlelehen kayi te ebpelambas te lalag te Eleleala rengan ne si Isayas? Edlalag be sikandin mekeatag te kandin ne hinawa etawa ruma ne etew?"

<sup>35</sup> Ketà ne midlalag si Felipe, ne igenat te arà ne nekesurat ne Lalag te Eleleala ne nevasa dut te meama ne impesabut en ni Felipe kandin ke Meupiya ne Tudtul mekeatag ki Hisus.

<sup>36</sup> Neiseg-iseg te ked-ipanew ran ne ruen neumaan dan te wayig. Migkahi ke meama te, "Ruen wayig ini. Menu, egkepakey en ne ebunyahan a nu?" [

<sup>37</sup> Ne migkehiyan ni Felipe sikandin te, "Egkepakey ne ebunyahan ka embiya imbehey nu en ke hinawa nu ki Hisus su mibperetiyaya ka kandin."

"Mibperetiyaya ad," ke se meama, "su mibperetiyaya a te si Hisu Kristu ke Anak te Eleleala.]"

<sup>38</sup> Ketà ne impeengked dut te meama ke kerumata ne mibpemenaug dan en ki Felipe ne midlumbuk dan diya te wayig ne mibunyahan en ni Felipe ke meama.

<sup>39</sup> Guna su migaun dan en ne netekew te neawa si Felipe dut te Kedesenan ne Ebpetuntul te Menusiya. Wara en mekita dut te meama, ugaid ne midlaus en ini se meama ne mehalew nevenar.

<sup>40</sup> Si Felipe ini, ne diyan en mekita te inged ne Asutu. Ne impesabut din ke Meupiya ne Tudtul mekeatag ki Hisus diya te langun ne menge inged ne midseharan din taman te nekeuma sikandin diya te inged ne Sisariya.

## 9

### *Ke Kebpekeperetiyaya ni Saulo ki Hisus*

<sup>1</sup> Ketà ne hewii ne wara pà lavew med-engked si Saulo te meilut ne kebpemeliandek din dut te menge mibperetiyaya ki Hisus ke Kerenan. Mibpendiya sikandin te Pinekemepuru ne Terebpepengesa

<sup>2</sup> ne mibuyù te ebpesuratan din ke egkamal dut te menge baley ne ebpedgian te penduan te menge Hudiyanen ne riyà te inged ne Demasku. Ne ed-ewiten din be ini su apey egkekilala sikandin ne idtuhut kandin se edsigkem te menge etew ne eduma te penuru ni Hisus wey ed-ewiten din sikandan te edlived diya te Hirusalim su ebilengguen.

<sup>3</sup> Guna su ebpelundani en si Saulo diya te inged ne Demasku, ne netekew en te ruen mermerayag ne ebpuun te langit ne neketayew kandin.

<sup>4</sup> Nepiley sikandin ne ruen suwara ne nerineg din ne egkahi te, "Ey Saulo, Saulo, meambe ke ebpekesekitan a nu?"

<sup>5</sup> Migkahi si Saulo te, “Engkey ka etawa, Kerenan?”

“Si Hisus a,” ke se suwara, “ne mibpekesekitan nu.

<sup>6</sup> Na, enew ka en ne laus ka riyà te inged su ketà ne ibpenurù keykew ke engkey se ed-ul-ulaan nu.”

<sup>7</sup> Ne ini se menge etew ne miduma ki Saulo ne nekeitindeg ketà te warà dan mekekahi su nengegeyip dan. Nerineg dan ke suwara, ugaid ne warà ma nekita ran.

<sup>8</sup> Mid-enew si Saulo ne nehimerat ke mata rin, ugaid ne kenà en ebpekekita sikandin. Ne ketà ne mid-ahak dan sikandin se ebpendiyà te Demasku.

<sup>9</sup> Ne lusud te tetelu ne hewii ne kenà ebpekekita sikandin ne edtuyun en sikandin.

<sup>10</sup> Ketà te inged ne Demasku ne ruen senge etew ne ed-ingaranan ki Ananias ne mibperetiyya ki Hisus ne Kerenan. Ne mibpekitakita kandin ke Kerenan se egkahi te, “Ey, Ananias!”

“Ini a red, Kerenan!” ke se meama.

<sup>11</sup> Ke se Kerenan te, “Ipanew ka ne pendiyà ka te ralan ne ed-ingaranan te Metidtu ne Ralan ne riyà te baley ni Hudas ne insà ka ke ruen etew ketà ne ed-ingaranan ki Saulo ne riyà ebpuun te inged ne Tarsu. Su ketà sikandin ebpengeningeni,

<sup>12</sup> ne ruen impekita ku en kandin mekeatag keykew, Ananias. Su ketà te impekita ku kandin ne ruen etew ne ed-ingaranan ki Ananias ne nekeuma ne edlusud te valey rin su edampen kandin su apey ebpekekita en maa sikandin.”

<sup>13</sup> Ugaid ne migkahi si Ananias te, “Kerenan, nerineg ku riyà te merakel ne etew mekeatag kayi ne etew su meraat te mid-ulaula rin dut te menge mibperetiyya keykew ne riyà te Hirusalim.

<sup>14</sup> Guntaani,” ke si Ananias, “ne ini en sikandin te inged ne Demasku su intuhut kandin dut te menge mepurù te terebpelengesa te ibpesigkem kandin ke langun ne menge etew ne ebpengeningeni keykew.”

<sup>15</sup> “Ipanew ka,” ke se Kerenan, “su mibpemili ku en sikandin ne egelevak kediey. Su sikandin se ebmemendtul mekeatag kediey riyà te menge etew ne kenà Hudiyanen wey ke menge datù dan abpeg dut ne menge Hudiyanen.

<sup>16</sup> Ne ibpekita ku kandin langun ne kegkerasey rin su atag dut te keduma rin kediey.”

<sup>17</sup> Ketà ne mid-ipanew en si Ananias. Nekeuma rà ne mibpemenayik en diyà te baley ne midampen din en si Saulo te migkahi, “Saulo, sikew se suled ku. Impepengkayi a rut te Kerenan tew ne si Hisus ke mibpekitakita keykew diyà te ralan te kebpengkayi nu te ini ne inged. Impepengkayi a su apey ka ebpekekita en maa, wey egkelumunan ka rut te Kedesenan ne Ebpetuntul te Menusiya.”

<sup>18</sup> Arà dà ne ruen neulug ne riyà ebpuun te menge mata ni Saulo ne iring te enir te serà, ne ebpekekita en sikandin. Ketà ne mid-enew sikandin ne mibpebunyag en su tuus te mibpesakup en sikandin ki Hisus.

<sup>19</sup> Ne migkaan en ne nekeulit en ke baher din.

#### *Ke Kebpesabut ni Saulo Diyà te Inged ne Demasku*

Ne mid-ubpà pà si Saulo duma dut te menge edurumaruma ki Hisus kayi te inged ne Demasku taman te nekebpipira ne hewii.

<sup>20</sup> Dutun ne mibpendiyà sikandin te menge baley ne ebppedgian te menge Hudiyanen te penduan dan su ebpesabut te si Hisus ke Anak te Eleteala.

<sup>21</sup> Ne langun te nekerineg kandin ne nengegeyip nevenar se egkahi te, “Kenà be sikandin ayan ke riyà te Hirusalim ne ebpemekesakit dut te menge etew ne ebpengarap ki Hisus? Kenà be iyan din kebpengkayi ne ebpenigkemen din ke edurumaruma ki Hisus su ed-ewiten din diyà te mepurù ne terebpelengesa diyà te Hirusalim?”

<sup>22</sup> Ne ini se kebpesabut ni Saulo mekeatag ki Hisus ne mid-iseg se kevaher din te kebpkepehimbenaar dut te menge etew. Ne mepayag nevenar ke tuus ketà te impesabut din te si Hisus ke Impasad te Eleteala ne Ebperetuen te langun. Tembù be ini se menge Hudiyanen ne kayi te Demasku ne warà mekekahikahi.

<sup>23</sup> Warà meuhet ne miburun ke menge Hudiyanen ne netahù te itungan dan te ed-imetayan dan si Saulo,

<sup>24</sup> ugaid ne ruen imbaag kandin mekeatag dut te netahù te itungan dan. Ne merukilem meandew ne mibentayan dut te menge Hudiyanen ke menge bengawan ne idlusud wey idlihawang ketà te inged dan su apey egkeimetayi sikandin embiya egkekita ran.

<sup>25</sup> Ugaid ne senge kerukileman, ne ruen menge edurumaruma kandin ne migkuwa kandin su intahù dan diyà te bukag su midtuntun dan sikandin diyà te sulawan dut te pehalad ne nekelingut ketà te inged.

#### *Ke Kebpendiyà ni Saulo te Hirusalim*



<sup>26</sup> Ne mibpendiyà si Saulo te Hirusalim. Nekeuma sikandin ne ebpekidseveka perem dut te minge kedserihan ni Hisus. Ugaid ne nengeandek dan su warà dan mebphehmbenar te si Saulo ne tidtu en ne edurumaruma ki Hisus.

<sup>27</sup> Ugaid ne midtevangen si Saulo ni Bernabe su miduma rin te ebpendiyà te minge kedserihan, ne impenuduul din kandan te mibpekita ki si Hisus ke Kerenan ki Saulo te riyà dan te ralan gewii te ebpendiyà sikandin te inged ne Demasku ne mibpekidlalag ke Kerenan kandin. Ne impenuduul din elin te mevag-et ke kebpesabut ni Saulo dut te minge etew riyà te Demasku mekeatag te Meupiya ne Tudtu ibpepevayà dut te ngaran ni Hisus.

<sup>28</sup> Ne si Saulo ini, ne mid-amur en dut te minge kedserihan ne midsihid din ke lusud te Hirusalim te warà kegkeandek din ne ebpesabut mekeatag ki Hisus ke Kerenan ibpepevayà dut te ngaran din.

<sup>29</sup> Ne mibpekidlalag wey mibpekidlawan sikandin dut te minge Hudiyanen ne Gerisiyanen se kinehiyan din, ugaid ne ed-imetayan dan perem sikandin.

<sup>30</sup> Guna su nerineg ini dut te minge ruma rin ne edurumaruma ki Hisus, ne mid-ewit dan si Saulo diyà te inged ne Sisariya ne impelaus dan sikandin diyà te inged ne Tarsu.

<sup>31</sup> Ne ketà ne merinew se ked-ubpà dut te langun ne minge mibperetiyya ki Hisus diyà te lusud te Hudiya, Geliliya wey Semeriya. Ne midtevangen dan dut te Kedesenan ne Ebpetuntul te Menusiya, tembù be mevag-et se kebperetiyya ran ki Hisus wey mid-iseg te kebmerakel dan. Su ke langun ne ked-ulaula ran ne iyan dan ibpeuna ne ke ebpekesuhat te hinawa ni Hisus ne Kerenan dan.

*Mibpendiyà si Pedro te inged ne Lida wey Hupa*

<sup>32</sup> Mibayaan ni Pedro ke merakel ne minge inged, ne senge hewii ketà ne mibpendiyà sikandin te inged ne Lida su ebpenumbelayan din ke minge edurumaruma ki Hisus ne ed-ubpà ketà.

<sup>33</sup> Ketà ne ruen neuma rin ne senge etew ne ed-ingaranan ki Eneas. Midtibas te ayew ini se etew ne nekedwalu en ne rahun ne warè en mekeenew-ewew sikandin.

<sup>34</sup> “Eneas,” ke si Pedro, “egkeulian ka guntaani ni Hisu Kristu! Enew ka ne peninesa nu ke ikam nu.” Arà dà ne mid-enew en si Eneas.

<sup>35</sup> Nekita sikandin dut te langun ne minge etew te inged ne Lida wey Sarun te neulian sikandin, ne ketà ne mibperetiyya ran ki Hisus ke Kerenan.

<sup>36</sup> Na riyà te inged ne Hupa ne ruen meritan ne ed-ingaranan ki Tabita ne mibperetiyya ki Hisus. (Ne ini se ngaran din dut te kinehiyan te Gerisiyanen ne si Dorcas su iyan din meana ne “selareng.”) Ne layun din ed-ul-ulaa ke meupiya, ne edtavang dut te minge ayuayu.

<sup>37</sup> Arà ne hewii ne neumaan te daru sikandin ne minatey en. Ne midihuen ini se lawa rin wey imperey-as diyà te sungkù ne riyà te divavew.

<sup>38</sup> Ne ini se inged ne Hupa ne kenà meriyù dut te inged ne Lida. Guna su nerineg dut te minge mibperetiyya ketà te inged ne Hupa te riyand en si Pedro te inged ne Lida, ne ruen deruwa ne meama ne midsuhù dan ne ebpendiyà se ebpenudtuul kandin te, “Gaangaan ka pengkayi.”

<sup>39</sup> Nerineg dà ni Pedro ne miduma en kandan. Guna su nekeuma ran ne impepenayik dan sikandin diyà te sungkù ne mibperey-asan dut te minatey. Ke langun ne minge valu ne meritan ne midlingut kandin se ebpeninehew, ne impekita ran kandin ke minge kumbalà wey ruma ne minge belegkas ne mibpemenai ni Dorcas te biviyag pà sikandin.

<sup>40</sup> Ne impeluwal ni Pedro langun dan dut te sungkù, ne mibpenimbuel sikandin se ebpeningeni te Eleteala. Rutun ne midsineruwan din ke minatey ne migkehiyan din te, “He Tebita, enew ka!” Nehimerat ke mata rin ne nekita rin si Pedro ne ketà ne mibpinuu.

<sup>41</sup> Migeweran ni Pedro ke velad din su apey ibpeitindeg. Ketà ne midtawag din ke langun ne minge mibperetiyya abpeg ke minge balu ne meritan, ne impekita rin kandan te neviviyag si Dorcas.

<sup>42</sup> Nekeeneb en ke tudtu mekeatag kayi te langun ne inged te Hupa, ne merakel ne minge etew se mibperetiyya ki Hisus ne Kerenan.

<sup>43</sup> Ne mid-ubpà-ubpà pà si Pedro ketà te inged ne Hupa taman te pipira ne hewii su riyà sikandin te baley te senge etew ne ed-ingaranan ki Simon ne ebpemaal te biasbias te minge lundis te binatang.

<sup>1</sup> Ne riyà te inged ne Sisariya ne ruen senge etew ne ed-ingaranan ki Cornelio. Kepitan sikandin dut te menge sundaru ne ed-ingaranan te “Kumpeniya te Italiya.”

<sup>2</sup> Si Cornelio ini ne mepegeleteala ne langun dan te telteleanak ne mibpengarap te Eleteala. Ne dekelà se tavang din dut te menge Hudiyänen ne ayuayu wey layun ebpengeningeni sikandin te Eleteala.

<sup>3</sup> Senge hewii te edluuk pà ebpenaug te andew, ne ruen impekita kandin. Ketà te impekita kandin ne ruen suluhuen te Eleteala ne nekita rin ne mepayag ne nekeuma ne egkahi te, “Ey, Cornelio!”

<sup>4</sup> Ne netengtangan din ini se suluhuen te Eleteala su neandek ne migkahi te, “Engkey ma, Mama?”

Migkahi ke suluhuen te Eleteala te, “Nerineg te Eleteala ke pengeningeni nu wey nekita rin ke tavang nu te menge ayuayu ne kenà din egkelipatan su nekesuhat ini te hinawa rin.

<sup>5</sup> Na, suhù ka ve te menge etew ne ibpendiyà te inged ne Hupa su ibpeangey nu se senge etew ne ed-ingaranan ki Simon ne ed-ingaranan ded maa ki Pedro,” ke se suluhuen te Eleteala.

<sup>6</sup> “Su riyà ed-ubpà sikandin te baley te etew ne ed-ingaranan dema ki Simon ne ebpmbaal te biasbias ne menge lundis te binatang, ne ke valey rin ne riyà te beyvey te rahat.”

<sup>7</sup> Ne guna su mid-awà en ke suluhuen te Eleteala, ne midtawag en ni Cornelio ke deruwa ne sugsuhuen din kayi te valey rin wey senge etew ne sundaru rin. Ebpengarap dema te Eleteala ini se sundaru ne senge etew sikandin ne kedserihan ni Cornelio.

<sup>8</sup> Mibpenudul din kandan ke langun mekeatag dut te impekita kandin te suluhuen te Eleteala, na impendiyà din en sikandan te inged ne Hupa.

#### *Ke Impekita te Eleteala ki Pedro*

<sup>9</sup> Ketà te neketundug ne hewii te riyà dan pà te ralan te ebpepingguma ran en te inged ne Hupa. Ugaid ne diyen en te lusud te inged ne Hupa ne mibpemenayik si Pedro diyà te mepatag ne atep te baley rin te neudtu su ebpengeningeni.

<sup>10</sup> Neiseg-iseg ketà ne nevitil sikandin ne egkesuat en ne egkaan. Gewii te ed-ilitù te egkeenen, ne ruen impekita kandin.

<sup>11</sup> Ne nekita rin ketà te nepuwasan ke langit ne ruen iring te sapat ne mid-iketan ketà te epat ne pediyulu ne intuntun.

<sup>12</sup> Ne ruen intahù ketà ne biasbias ne binatang su ruen ed-ipanew, ruen edulug, wey ruen edlayang.

<sup>13</sup> Ne ruen suwara ne migkahi kandin te, “He Pedro, enew ka ne sumbali ka su apey ka mekekaan.”

<sup>14</sup> Ugaid ne migkahi si Pedro te, “Kenà a, Kerenan! Su taman guntaani ne warà a pà mekekaan te misan engkey ne meredsik ne iring kenyan su indawey dut te penduan ta.”

<sup>15</sup> Ne migkahi en maa ke suwara te, “Arà se migkahi te Eleteala ne meupiya, kenà nu egkehiya te meredsik.”

<sup>16</sup> Ketetelu rin ini mekita wey nerineg, ne ketà ne in-uli diyà te langit arà se intuntun.

<sup>17</sup> Gewii te ebpegepitungen pà ni Pedro ke engkey se meana dut te impekita kandin, ne netuntulan en dut te menge meama ne midsuhù ni Cornelio en ini ran en te bengawan dut te baley rin.

<sup>18</sup> Mibpetukewtukew ran se ed-insà te, “Menu, duen etew kayi ne ed-ubpà ne ed-ingaranan ki Simon Pedro?”

<sup>19</sup> Kemulu pà ne ebpegitungen ni Pedro ke engkey se meana dut te impekita kandin. Ne migkehiyan sikandin dut te Kedesenan ne Ebpetuntul te Menusiyà te, “Duen tetelu ne etew ne ebpemengà keykew.

<sup>20</sup> Kayi ke en ne pemenaug ke en ne kenà ka meandek ne eduma kandan su siaken se midsuhù kandan.”

<sup>21</sup> Ketà ne mibpemenaug si Pedro ne migkehiyan din ke menge meama te, “Siaken ke ebpemengaan niyu. Meambe ke ini kew?”

<sup>22</sup> Midtavak dan te, “Impepengkayi key rut te Kepitan ne si Cornelio. Metidtu ne etew sikandin ne ebpengarap te Eleteala wey ed-edatan sikandin dut te langun ne menge Hudiyänen. Ne ruen suluhuen te Eleteala ne migkahi kandin te ibpeangey ka, Simon Pedro, su apey mekerineg sikandin dut te ibpesabut nu.”

<sup>23</sup> Ne impelusud ni Pedro ke menge meama ne impeirehà din sikandan te senge kerukileman.

Guna su nepawà en ne miduma si Pedro kandan. Ne ruen menge mibperetiyya riyà te Hupa ne miduma kandin dema.

<sup>24</sup> Neketundug ne andew ne nekeuma ran en diyà te inged ne Sisariya. Riyà te baley ni Cornelio ne edtahad elin ke menge suled din wey menge sepekat din ne mid-inggat din.

<sup>25</sup> Guna su edlusud en si Pedro perem dutun te valey, ne midsinuhung en ni Cornelio se mibpenimbuel su ebpenгарap kandin.

<sup>26</sup> Ugaid ne pinetindég sikandin ni Pedro. "Itindég ka," ke sikandin, "su siaken ne etew a red dema iring keykew."

<sup>27</sup> Ne ebpelelahey ran gewii te edlusud dan dut te baley ne nekita ni Pedro ke merakel ne etew ne nevurun ketà.

<sup>28</sup> Migkahi si Pedro kandan te, "Netuenan niyu te ke penduan dey te menge Hudiyanen ne kenà idtuhut ne ebpekiduma key te menge etew ne iring keniyu te kenà Hudiyanen, etawa misan ebpenumbaley rà diyà te keniyu. Ugaid ne impesabut kedì te Eleteala te kenà din egkiyuhan ne ebpegitungen ku te meredsik wey indawey se misan engkey ne etew.

<sup>29</sup> Tembù be arà se impeangey a niyu, ne warà a med-alang-alang te ebpengkayi. Na, ed-insà a ve keniyu te meambe ke impeangey a niyu?"

<sup>30</sup> Midtavak si Cornelio te, "Neked-epat en ne hewii arà ne mibpengeningeni a kayi te lusud te baley ku te iring kayi ne uras te edluuk ebpemenaug ke andew. Netekew te ruen mid-itindég kayi te uvey ku ne mesihey se belegkas din.

<sup>31</sup> Ne migkahi te, "Ey, Cornelio, nerineg dut te Eleteala ke kebpengeningeni nu wey kenà din egkelipatan ke tavang nu rut te menge ayuayu.

<sup>32</sup> Na, suhù ka te ebpependiyà te Hupa su ibpeangey nu te senge etew ne ed-ingaranan ki Simon ne ed-ingaranan ded maa ki Pedro. Su riyà ed-ubpà sikandin te baley te etew ne ed-ingaranan dema ni Simon ne ebpemaal te biasbias ne menge lundis te binatang, ne ke baley rin ne riyà te beyvey te rahat?"

<sup>33</sup> Arà dà iya ne impeangey ku en sikuna ne meupiya su migkiyug ke red ne ebpengkayi. Na guntaani," ke si Cornelio, "ne langun dey ini ne nevurun kayi te etuvangan te Eleteala su ebpe mineg key te langun ne ibpekahi te Kerenan keykew se ebpesabut kenami."

<sup>34</sup> Migkahi si Pedro te, "Netuenan ku en ne benar te warà misan engkey ne etew ne ibpeuna te Eleteala

<sup>35</sup> su ke etew te misan endei ne inged ke embiya ed-edatan din ke Eleteala wey metidtu se ulaula rin ne edtelimaan dut te Eleteala.

<sup>36</sup> Ne netuenan niyu te impesabut te Eleteala kenami ne menge kevuwaran ni Israyil te ini se Meupiya ne Tudtul ne ebpekerinew te hinawa tew ne riyà ebpuun te ki Hisu Kristu ne Kerenan dut te langun.

<sup>37</sup> Ne netuenan niyu lavew," ke si Pedro, "ke ned-ulaula riyà te langun ne inged te kevuwaran ni Israyil egenat te inged ne Geliliya ne gewii ne nekeipus si Juan se ebpesabut mekeatag te kebnyug ne tuus te kebpedsendit.

<sup>38</sup> Netuenan niyu rema te mekeatag ki Hisus ne riyà ebpuun te inged ne Nesarit. Su impelumun te Eleteala kandin ke Kedesenan ne Ebpetuntul te Menusiyà ne midlumun kandin ne mibehey kandin te gehem. Ne mid-eneb din ini se menge inged se ebaal te meupiya wey nengeulian din ke langun ne edlelun gen dut te datù te pekaid su diyà ma te kandin ke Eleteala.

<sup>39</sup> "Ne sikami," ke si Pedro, "ne ebpeketitihus key su nekita rey ke langun ne mibeelan din diyà te langun ne inged te menge Hudiyanen wey riyà dema te inged ne Hirusalim. Ketà ne mibpeimetayan sikandin dut te menge etew te kedlensanga kandin diyà te pinebelavag ne kayu.

<sup>40</sup> Ugaid ne ketà te iketelu ne hewii ne mibanew sikandin te Eleteala ne impekita sikandin kenami.

<sup>41</sup> Warà impekita sikandin diyà te langun ne menge etew, ugaid ne kayi rà te kenami ke raan ne nepemili te Eleteala ne egkevaluy ne edititihus, uya, kayi rà te kenami se ruma rin pà te egkaan wey ed-inum dut te nevanew en sikandin.

<sup>42</sup> "Ne insuhù din kenami," ke si Pedro, "te ebpe mesabut dut te Meupiya ne tudtul diyà te menge etew. Ne insuhù din ded kenami te ebpe menudtul te sikandin se mibehayan te Eleteala te kebaya bayà te egkukum dut te langun ne menusiyà ke biviyag wey menge minatey.

<sup>43</sup> Su ke langun dut te ebpelambas te Lalag te Eleteala rengan," ke si Pedro, "ne midlalag mekeatag kandin su nekahi ran te piya engkey ne etew se ebperetiyya kandin

ne egkepesehad ke menge salà din su arà te atag te kinepatey ni Hisu Kristu mekeatag dut te menge salà tew."

*Ke Menge Etew ne Kenà Hudiyanen ne Neketelimà te Kedlumun dut te Kedeseenan ne Ebpetuntul te Menusiya*

<sup>44</sup> Ne gewii te edlalag pà si Pedro ne midlumun en ke Kedeseenan ne Ebpetuntul te Menusiya dut te langun ne menge etew ne ebpeming te lalag din.

<sup>45</sup> Ne ke menge Hudiyanen ne mibperetiya ki Hisus ne egenat te Hupa ne nekeruma ki Pedro ne nengegeyip su netelimà dan ke Kedeseenan ne Ebpetuntul te Menusiya ne midlumun dut te menge etew ne kenà Hudiyanen.

<sup>46</sup> Su nerineg dan ini se kenà menge Hudiyanen ne nekelalag te kenà kandan ne kinehiyan te mideyù te Eleteala atag dut te gehem din.

Ketà ne migkahi si Pedro te,

<sup>47</sup> "Ini se menge etew ne kenà Hudiyanen, ne neketelimà dan dema te kedlumun dut te Kedeseenan ne Ebpetuntul te Menusiya iring dut te sikami ne menge Hudiyanen," ke si Pedro. "Geina te iring kayi, ne warè ebpekevangan te kebunyahi kandan."

<sup>48</sup> Dutun ne migkahi sikandin te ebunyahan dan en ini se tuus te mibpesakup dan en ki Hisu Kristu. Ketà ne mibuyù dan kandin te med-ubpà pà sikandin diyà te kandan te pipira ne hewii.

## 11

*Tudtul ni Pedro diyà te Menge Mibperetiya ne Hudiyanen Diyà te Hirusalim ne Mekeatag Dut te Menge Mibperetiya ne Kenà Hudiyanen Diyà te Antiyuka*

<sup>1</sup> Ke menge kedserihan wey ke menge ruma ran ne mibperetiya ki Hisus diyà te lusud te Hudiya ne nerineg dan te mibperetiya en dema ke menge etew ne kenà Hudiyanen te Lalag te Eleteala.

<sup>2</sup> Guna su mid-uli si Pedro diyà te Hirusalim ne ruen menge Hudiyanen ne mibperetiya ki Hisus ne midawey kandin se egkahi te,

<sup>3</sup> "Meambe ke mibpemenayik ka diyà te baley te menge etew ne kenà Hudiyanen ne warà mengeetusi wey mibpekidtuhen ka rema kandan?"

<sup>4</sup> Ketà ne miguhud ni Pedro ke ned-ulaula igenat te rudsuan.

<sup>5</sup> Ke sikandin te, "Diyan a te inged ne Hupa se ebpengeningeni diyà te Eleteala, ne ruen impekita kedi. Ketà te impekita kediey, ne ruen iring te meluag ne saput ne mid-iketan dut te epat ne pediyulu ne intuntun kayi te uvey ku.

<sup>6</sup> Midtengtangan ku ne ruen nekita ku ne intahù ketà ne menge binatang ne ayam wey mehintelunan, ruen edulug wey ruen edlayang.

<sup>7</sup> Ne ketà ne ruen suwara ne nerineg ku ne migkahi te, 'He Pedro, enew ka ne sumbali ka su apey ka mekekaan.'

<sup>8</sup> "Ugaid ne migkahi a te, 'Kenà a, Kerenan! Su warà e pà mekekaan te misan engkey ne meredsik ne iring kenian su indawey dut te penduan ta.'

<sup>9</sup> "Ne nerineg ku en maa ke suwara ne riyà ebpuun te langit se egkahi te, 'Ini se migkahi te Eleteala ne meupiya, ne kenà nu kehiya te meredsik.'

<sup>10</sup> Ini ne ketetelu ku mekita wey meringe, na in-uli diyà te langit arà se intuntun.

<sup>11</sup> "Arà dà iya ne nekeuma en ketà te baley ne ubpaan ku," ke si Pedro, "ini se tetelu ne etew ne riyà ebpuun te Sisariya ne midsuhù su ibpeangey a.

<sup>12</sup> Ne migkehiyan a rut te Kedeseenan ne Ebpetuntul te Menusiya te ibperuma a ne kenà a meuru te kenà dan Hudiyanen. Ne ruen miduma kedi ne enem ne etew ne mibperetiya ki Hisus ne menge ruma ku diyà te inged ne Hupa.

"Guna su nekeuma key riyà te Sisariya," ke si Pedro, "ne midlusud key en diyà te baley rut te Kepitan ne si Cornelio.

<sup>13</sup> Ne mibpenudtulan key ni Cornelio te ruen suluhuen te Eleteala ne mibpekita kanda kandin diyà te baley rin. Ne migkahi ini se suluhuen te, 'Suhù ka te ebpendiyà te inged ne Hupa su ipeangey nu ini se senge etew ne ed-ingaranan ki Simon Pedro.

<sup>14</sup> Su sikandin ne ruen ibpesabut din keniyu ne ebpekepeliyu keykew wey langun niyu ne telteleanak dut te kedusa te Eleteala te salà niyu.'

<sup>15</sup> "Ne gewii ku te edlalag kandan," ke si Pedro, "ne midlumun en kandan ke Kedeseenan ne Ebpetuntul te Menusiya iring dut te kinelumun din keyta pehaney.

<sup>16</sup> Dutun ne netenuran ku ke migkahi te Kerenan tew ne si Hisus, ke sikandin te, 'Si Juan, ne wayig se imbunyang din te menge etew, ugaid ne ebunyahan kew ibpepeveyà dut te Kedeseenan ne Ebpetuntul te Menusiya.'

<sup>17</sup> Na, mepayag nevenar," ke si Pedro, "te ini se menge etew ne kenà Hudiyanen ne mibpelumunan te Eleteala dema dut te Kedeseenan ne Ebpetuntul te Menusiya iring dut

te kinelumun din kenami dut te kineperetiyyaya rey ki Hisu Kristu ke Kerenan. Tembù be kenà a ebpekevangan te helevek te Eleteala dut te menge etew ne kenà Hudiyanen.”

<sup>18</sup> Nerineg dà ini rut te menge mibperetiyyaya ne Hudiyanen, ne mid-engked dan en te edsawey kandin. Nasì pà te mideyù dan te Eleteala te migkahi, “Embiya iring ketà ne mibpendsendit dan en bes dema diyà te Eleteala arà se menge etew ne kenà Hudiyanen ne ed-engkeran dan ke meraat ne ulaula ran su apey ran egketelimà ke umur ne warà edtemanan din.”

*Diyà te inged ne Antiyuka lusud te inged ne Siriya ne ke Mibperetiyyaya ki Hisus ne arà ke Neuna ne Ed-ingaranan te Kristiyanu*

<sup>19</sup> Ketà te hewii ne kineimetayi ki Esteban, ne nevurahey ke menge mibperetiyyaya su mekeatag dut te kedresaya kandan. Ne ruen duma ne nekeuma diyà te inged ne Pinisi, riyà te punul te Sipri, wey inged te Antiyuka lusud te inged ne Siriya se ebpesabut dut te Meupiya ne Tudtul mekeatag ki Hisus ugaid ne riyà dà te menge Hudiyanen.

<sup>20</sup> Duen pà duma ne menge mibperetiyyaya ne riyà ebpuun te inged ne Sipri wey Sirini ne mibpendiyà te Antiyuka ne mibpenudtulan dan ke menge etew ne kenà Hudiyanen dut te Meupiya ne Tudtul mekeatag ki Hisus ke Kerenan.

<sup>21</sup> Ke gehem te Eleteala ne neketavang kandan su medmerakel ne menge etew ne riyà te Antiyuka ne mibperetiyyaya ki Hisus ke Kerenan ne mibpesakup kandin.

<sup>22</sup> Ne nerineg ini se tudtul dut te menge mibperetiyyaya diyà te Hirusalim, ne midsuhù dan si Bernabe diyà te Antiyuka.

<sup>23</sup> Guna su nekeuma sikandin ne nekita rin arà se rekelà ne penaub te Eleteala ketà te menge etew. Ketà ne nehalew nevenar sikandin wey mibag-et din sikandan te egkahi te geweri ran te nevaheer arà se kebperetiyyaya ran ki Hisu Kristu ke Kerenan.

<sup>24</sup> Ne si Bernabe ini ne meupiya se ulaula rin wey layun edlumun kandin ke Kedeseenan ne Ebpetuntul te Menusiya wey meilut se kebperetiyyaya rin te Eleteala. Ne merakel se menge etew riyà te inged ne Antiyuka se mibperetiyyaya ki Hisus ke Kerenan su atag dut te impesabut din.

<sup>25</sup> Ne mibpendiyà si Bernabe te inged ne Tarsu su ebpemengaan din si Saulo.

<sup>26</sup> Guna su netuen din, ne mid-ewit din te ed-uli diyà te inged ne Antiyuka. Ne lusud te senge rahun ne mid-ubpà dan duma dut te menge mibperetiyyaya kayi te inged ne Antiyuka wey merakel se mibpenurù dan. Ne kayi te inged ne Antiyuka ne ke menge mibperetiyyaya ki Hisus ne arà ke neuna ne mid-ingaranan te Kristiyanu.

<sup>27</sup> Ketà ne hewii, ne ruen ebpuun te Hirusalim ne menge ebpelambas te Lalag te Eleteala ne mibpendiyà te Antiyuka.

<sup>28</sup> Ruen senge etew kandan ne ed-ingaranan ki Agabu ne mid-itindeg su igkahi rin neraan ini se impesabut kandin dut te Kedeseenan ne Ebpetuntul te Menusiya. Iyan din migkahi te ruen mepasang ne bitil ne ebpekeuma kayi te langun ne inged te ampew te dunya. (Nekeuma ini se mepasang ne bitil te gewii te si Claudio se egkamal te inged ne Ruma.)

<sup>29</sup> Ne netahù te itungan dut te menge edumdumaan ni Hisus te ebehey ran te tavang diyà te menge suled dan te ebperetiyyaya ki Hisus diyà te inged ne Hudiya te endei rà taman se egkegaga te uman seveka.

<sup>30</sup> Na ini se mid-ulaula ran, ne mibpeewit dan te kureta ki Bernabe wey si Saulo diyà te menge pekilukesen dut te menge mibperetiyyaya diyà te Hirusalim.

## 12

*Mid-iseg pà ini se kebpekesekeiti Rut te Menge Etew ne Mibperetiyyaya ki Hisus*

<sup>1</sup> Ketà ne hewii te si Hirudis se egkamal ketà ne inged ne midrudsù sikandin te ebpekesakit dut te ruma ne mibperetiyyaya ki Hisus.

<sup>2</sup> Ne mibpeimetayan din si Santiago, ke suled ni Juan, su impetibas din te sundang.

<sup>3</sup> Guna su netueanan din te ingkesuat dut te menge Hudiyanen arà se ulaula rin, ne mid-iseg ke meraat ne ulaula rin su impesigkem dan si Pedro. (Ned-ulaula ini se gewii te Pista ne Egkaan te Pan ne warà Insawug ne Ibpelevag.)

<sup>4</sup> Guna su nesigkem en si Pedro, ne impevilanggù din en. Ne ruen epat ne puntuk ne menge sundaru ne ebantey kandin, ne ruen epat ne sundaru te uman senge puntuk. Su ruen netahù te itungan ni Hirudis te embiya egkeipus en ke Pista te Kedtenuri dut te Menge Hudiyanen te Kedsehari te Suluhuen te Menge Apù dan ne edsumeriyaan din si Pedro diyà te etuvangan te menge etew.

<sup>5</sup> Ketà ne diyà si Pedro te bilengguan, ugaid ne ke menge mibperetiyyaya ki Hisus ne meilut ne ebpengeingeni diyà te Eleteala mekeatag kandin.

*Impeliyu si Pedro dut te Suluhuen te Eleteala Diyà te Bilengguan*

<sup>6</sup> Ne arà ne kerukileman ke embiya egkepawà en ne ibpeetuvang en ni Hirudis si Pedro diyà te menge etew, ne nekelipereng si Pedro diyà te elet te deruwa ne ebantey kandin. Nevakù sikandin te deruwa ne sengkali wey ruen ebantey diyà te bengawan te bilengguan.

<sup>7</sup> Netezew te duen suluhuen te Kerenan ne nekeitindog diyà te uvey rin, ne ruen merayag kayi te lusud te bilengguan. Ne migunggel dut te suluhuen si Pedro ne migkehiyan din te, "Gaan ke en med-enuw!" Arà dà ne nengeulug en ini te sengkali ne imbakù te belad din.

<sup>8</sup> Ne migkahi ke suluhuen te Kerenan te, "Pipinding ka wey medtetelumpà." Ne midumaan ini ni Pedro. Ne migkahi maa ke suluhuen te, "Kukumbalà ka ne medtundug kedi."

<sup>9</sup> Ne midtundug si Pedro kandin te edlihawang dut te bilengguan, ugaid ne warà din metueni ke benar be ini se ed-ul-ulaan dut te suluhuen su iyan din kunaan ke ebpenehinep dà sikandin.

<sup>10</sup> Midsahad ini se deruwa kayi te penempang ne menge bantey, ne dutun te ikeruwa ne menge bantey taman te nekeuma ran diyà te menge putew ne bengawan ne ebpendiyà te siyudad. Nekeuma ran ketà ne netekew te neveukaan ini se bengawan ne midlihawang dan en. Ne midtuntul dan te ralan ne gewii ran te ed-ipanew ne netekew te warè en ke suluhuen te Kerenan.

<sup>11</sup> Ketà ne neimemanan ni Pedro te kenà tehinepen dà ini se ned-ulaula rin ne migkahi sikandin te, "Ini se suluhuen ne impepengkayi te Eleteala su ebpeleihawang kedi rut te palad ni Hirudis wey rut te meraat ne egketemanan ku ne ebpenerengen dut te menge Hudiyanen ne ibped-ulaula kedi."

<sup>12</sup> Guna ne netuenan ni Pedro ini, ne mibpendiyà sikandin te baley ni Maria ke iney ni Juan ne ed-ingaranan dema ki Marcos. Ne merakel se menge etew ne nevurun ketà su ebpengeningeni te Eleteala.

<sup>13</sup> Ne mibpemehuktuk si Pedro diyà te bengawan te lama su ebpetukewtukew ne ruen meritan ne ed-ingaranan ki Roda ne sugsuwuen ketà ne baley ne nekeuma su iyan ebukà.

<sup>14</sup> Nekilala rin ke suwara ni Pedro, ugaid ne egenat dut te kegkehalew rin ne warà din en mevukai su midlived pà diyà dut te menge etew ne ketà te lusud te baley su ebpesabut kandan. Ke sikandin te, "Si Pedro ne diyan te liyu rut te bengawan."

<sup>15</sup> "Egkevuneg ka!" ke sikandan. Ugaid ne meilut nevenar se kedlalag din ne egkahi te benar iya ini ne migkahi ran te, "Suluhuen arà te Eleteala ne ebantey kandin!"

<sup>16</sup> Ugaid ne diyà te bengawan ne warà med-engked si Pedro se ebpetukewtukew. Netaman ne mibukaan dan ke bengawan ne nekita ran te benar iya ne si Pedro ini ne negeyip dan nevenar.

<sup>17</sup> Ne miguringan kandan te kenà dan pà medlalag, ne mibpenudtul din kandan ke memenu se kinepelihawang kandin te Eleteala diyà te bilengguan. "Penudtula niyu ini," ke si Pedro, "diyà te ki Santiago wey ke ruma ne menge suled tew te ebperetiaya." Ne mid-awà sikandin ketà su mibpendiyà te senge inged.

<sup>18</sup> Guna su nepawà en ne newawet ke menge bantey diyà te bilengguan se egkahi te, "Nemenu ve buwa si Pedro?"

<sup>19</sup> Impepemengà ni Hirudis, ugaid ne warà dan mekita. Ne impesumeriyà din ke menge bantey, ne mibpeimetayan din.

Ketà ne mid-awà si Hirudis diyà te lusud te Hudiya ne mibpendiyà te inged ne Sisariya ne riyà pà med-ubpàubpà sikandin.

*Ke Kinepatey ni Hirudis*

<sup>20</sup> Ne ingkeepesi nevenar ni Hirudis ke menge etew diyà te inged ne Tiru wey Sidun. Tembù be arà se menge etew ketà te deruwa ne inged ne mipendiyà te kandin. Ugaid ne mid-una ran pà mebpekidlalag ki Belastu, senge etew ne egkamal dut te turuhan ni Hirudis, su apey ebpeketavang sikandin kandan. Ne ketà ne midlaus dan diyà te ki Hirudis te ebuyi se edtuntye kandin dut te kegkeepes din. Mid-ulaula ran ini su riyà ebpuun te inged ni Hirudis se kebpekekuwa ran te keuyahan dan.

<sup>21</sup> Ne rutun te hewii ne neupakatan en ni Hirudis te ebpekidlalag dut te menge etew, ne imbevelegkas din ke belegkas ne edait dut te kedatù wey mibpinuu sikandin diyà te kurusi. Ne ketà ne mibehey te lalag diyà dut te menge etew.

<sup>22</sup> Ne mibpememensag ke menge etew te, "Kenà ini etew se edlalag," ke sikandan, "su diwata."

<sup>23</sup> Arà dà ne pinedaru en sikandin dut te suluhuen te Kerenan su iyan din kiyug ne sikandin se edeyuen te menge etew, ugaid ne iyan edait perem ne edeyuen ne Eleteala. Ne midtegekayan ini se lawa rin, na minatey en.

<sup>24</sup> Ugaid ne mid-iseg ke kebpesabut dut te Lalag te Eleteala, ne mibmerakel ke menge etew ne mibperetiyyaya ketà.

<sup>25</sup> Ne geina te nekeipus en si Bernabe wey si Saulo te mibvevelan kandan diyà te Hirusalim, ne mid-uli dan en diyà te Antiyuka. Ne pineruma ran si Juan ne ed-ingaranan dema ki Marcos.

## 13

*Intail dut te Menge Mibperetiyyaya te Inged ne Antiyuka si Bernabe wey si Saulo te Ebpesabut te Lalag te Eleteala*

<sup>1</sup> Diyà te menge mibperetiyyaya ne riyà te Antiyuka ne ruen menge ebpelambas te Lalag te Eleteala wey ebpenurù te Lalag din. Ketà ne si Bernabe, si Simeon (ke ed-imukuen te Meitem), si Lucio (ne riyà ebpuun te Sirini), ne si Menain (ne riyen en medekelà te ki Hirudis ne gubinedur) wey si Saulo.

<sup>2</sup> Gewii ran te ebpengarap te Kerenan wey edlimpas te egkaan su ebpengeningeni ran, ne ruen impesabut kandan dut te Kedesenan ne Ebpetuntul te Menusiyà. Ke sikandin te, "Idtail niyu kediey si Bernabe wey si Saulo su apey ran egelevek dut te ebpevelan ku."

<sup>3</sup> Ketà ne midlimpas dan maa te egkaan su mibpengeningeni ran, ne indampen dan ke velad dan ki Bernabe wey si Saulo ne arà pà ne impeipanew ran.

*Nekeuma si Bernabe wey si Saulo Riyà te Punul ne Sipri*

<sup>4</sup> Geina te impeipanew si Bernabe wey si Saulo rut te Kedesenan ne Ebpetuntul te Menusiyà, ne mibpendiyà dan te inged ne Selusiya diyà te beyvey te rahat te mid-untud te kapal te ebpendiyà te punul ne Sipri.

<sup>5</sup> Guna ne nekerunggù dan en diyà te inged ne Selamis ketà te punul te Sipri, ne impesabut dan ke Lalag te Eleteala diyà te menge valey ne ebpededian te menge Hudiyänen te penduan dan. Iyan miduma kandan si Juan ne ed-ingaranan dema ki Marcos ne edtavang kandan.

<sup>6</sup> Neeneb dan ini se punul ne Sipri egenat te inged ne Selamis taman te inged ne Papus. Ketà ne neuma ran ini se etew ne ed-ingaranan ki Barhisus ne metau ne ebaal te malik mata. Hudiyänen ini ne uvag kun ne ebpelambas te Lalag te Eleteala.

<sup>7</sup> Ne sepekat sikandin ni Sergio Peulu ne gubinedur te ini ne punul. Metampas ne ebpegitung si Sergio, ne impepengkayi te turuhan din si Bernabe wey si Saulo su egkesuat sikandin ne ebpepinge te Lalag te Eleteala.

<sup>8</sup> Ugaid ne mibelavag kandan ini se metau ne ebaal te malik mata ne ed-ingaranan ki Barhisus ne ed-ingaranan ded maa ki Elimas (su ini se ngaran din dut te kinehiyan ne Gerisiyanen) su kiyug din ne kenà ebpekeperetiyyaya ke gubinedur ki Hisus.

<sup>9</sup> Ne si Saulo, ne ed-ingaranan dema ki Pablo, ne midlumunan dut te Kedesenan ne Ebpetuntul te Menusiyà ne midtengtangan din arà se metau te malik mata

<sup>10</sup> ne migkehiyan din te, "Anak ka rut te datù te pekaid! Ne kunterà ka rut te langun ne meupiya! Nepenù ke itungan nu te ulaula ne menge limbung! Ne ebpehintarù ka te benar ne Lalag te Kerenan!

<sup>11</sup> Na guntaani," ke si Pablo, "edtebpjen ka te Kerenan. Egkepisek ka ne meuhet ne kenà ka ebpekekita te rayag te andew."

Arà dà ne mibmerusirem en se kedtengteng ni Elimas ne kenà en ebpekekita. Nekeyangapyangap sikandin se ebuyù te ebpiit kandin.

<sup>12</sup> Guna su nekita rut te gubinedur arà se ned-ulaula ni Elimas ne mibperetiyyaya en sikandin. Su negeyip nevenar dut te impesabut ni Pablo kandin mekeatag dut te Lalag te Kerenan.

*Nekeuma si Pablo wey si Bernabe Riyà te Inged ne Antiyuka Lusud te Inged ne Pisidya*

<sup>13</sup> Mid-awà ensi Pablo ketà te inged ne Papus ne mid-untud dan te kapal te ebpendiyà te inged ne Pirga lusud te inged ne Pempilya. Nekeuma ran ne si Juan ne ed-ingaranan dema ki Marcos ne midsuwey kandan su midlivid sikandin diyà te Hirusalim.

<sup>14</sup> Ne mid-awà en si Pablo ki Bernabe riyà te inged ne Pirga ne midlaus dan diyà te inged ne ed-ingaranan maa te Antiyuka diyà te lusud te Pisidya. Dut te Hewii ne Id-imeley ne midlusud dan diyà te baley ne ebpededian te menge Hudiyänen te penduan dan ne mibpinuu ran dutun.

<sup>15</sup> Duen mibasa rut te insurat ne penduan ni Moises wey ingkesurat dut te menge ebpelambas te Lalag te Eleteala dengan. Neipus ketà ne ruen midsuhù dut te pekilukesen

diyà te baley ne ebppedgian dan te migkahi te, “Menge suled, embiya ruen egkehiyen niyu kayi te menge etew ini ne nevrurun ne ebpekepevag-et te hinawa ran ne leleha niyu en.”

<sup>16</sup> Ketà ne mid-itindeg si Pablo ne mid-uyew te belad din ne migkahi te,

“Menge ruma ku ne menge kevuwaran ni Israyil abpeg dut te menge etew ne kenà Hudiyanen ne nevrurun kayi su ebpengarap te Eleteala, pemineha niyu ini se egkehiyen ku keniyu.

<sup>17</sup> Ini se menge keep-epuan dut te sikami ne menge Hudiyanen,” ke si Pablo, “ne nepemili te Eleteala, ke Eleteala ne ebpperapen dut te sikami ne bansa te Israyil. Ne mibmerakel ke kevuwaran dan te gewii ne riyà dan med-ubpà te inged ne Ihiptu, inged ini te ruma pà ne bansa. Ne midtevangan dan dut te gehem te Eleteala su nekeliyu ran ketà ne inged.

<sup>18</sup> Lusud te neked-epat nepulù ne rahun diyà te tanà ne kenà egkeubpaan te etew se kinetigker dut te Eleteala kandan, misan warà dan medtuman te menge lalag din.

<sup>19</sup> Ne pitu ne bansa se midereetan din diyà te lusud te inged ne Kenaan,” ke si Pablo, “ne impeangkun din ini se tanà dut te menge etew rin ne kevuwaran ni Israyil.

<sup>20</sup> Ne inggenat dut te hewii ne mibpendiyà dan te inged ne Ihiptu taman dut te hewii ne ked-ubpà dan diyà te inged te Kenaan ne neked-epat ne hatu wey lelisma nepulù ne rahun.

“Neipus arà,” ke si Pablo, “ne ruen en menge perekukum ne netendù te Eleteala ne ed-ewit kandan taman dut te hewii ne si Samuel en se ebpelambas te Lalag te Eleteala.

<sup>21</sup> Ketà ne mibuyi dan te Eleteala te ruen datù ne ed-ewit kandan. Ne midtendù din si Saulo, ke anak ni Kis, ne kevuwaran ni Benjamin, ne midatù kandan taman te epat nepulù ne rahun.

<sup>22</sup> Guna su in-awà sikandin te Eleteala ne si David en maa se imperatù te Eleteala kandan. Ne ini se migkahi te Eleteala mekeatag ki David, ke sikandin te, ‘Si David ini, ke anak ni Isai, se ebpekesuhat te hinawa ku. Su edtumanen din ke langun ne idsuhù kandin.’

<sup>23</sup> Na,” ke si Pablo, “si Hisus ini ne kevuwaran ni David ne nepemili te Eleteala ne impasad din ne ebpekepelihauan keytew ne menge kevuwaran ni Israyil.

<sup>24</sup> Ne rutun te warà pà medrudsù te ebpenurù si Hisus, ne nekeuma si Juan se ebpesabut dut te langun ne menge kevuwaran ni Israyil te mebpedsendit dan wey ebpebunyang su tuus te ed-engked dan en dut te meraat ne ulaula ran.

<sup>25</sup> Guna su mehaan en ebpekeipus si Juan dut te helevek ne imbehey kandin te Eleteala, ne ruen migkahi rin dut te menge etew. Ke sikandin te, ‘Engkey a diyà te itungan niyu? Kunaan niyu vuwa ke siaken en ke ebpenerengen niyu, ugaid ne kenà siak. Ugaid ne arà se ebpenerengen niyu ne ebpeketundug kedì, ne kenà a edait te misan edluung dà te telumpà din.’

<sup>26</sup> “Na menge ruma ku ne menge kevuwaran ni Israyil,” ke si Pablo, “wey ke menge etew ne kenà Hudiyanen ne nevrurun kayi su ebpengarap te Eleteala, sikita ke mibpeewitan te Eleteala dut te menge lalag din su apey kiyu ebpekeliyu rut te keberedusaan mekeatag dut te salà tew.

<sup>27</sup> Su ke menge etew riyà te Hirusalim wey misan ke egkeunutan dan ne warà dan metueni te iyan bes ebpekepeliyu kenitew ne si Hisus. Ne warà dan mesebuti ke menge lalag ne ingkesurat dut te menge ebpelambas te Lalag te Eleteala rengan, misan uman Hewii te Id-imeley ne egkering dan te kebesaa diyà te menge baley ne ebppedgian dan te penduan dan. Ugaid ne misan iring ketà te warà dan mesebuti ini, ne netuman dan arà se ingkesurat dut te menge ebpelambas te Lalag te Eleteala rengan ketà te in-isuhat dan ne kewagib te ebpeimetayan dan si Hisus.

<sup>28</sup> Ne misan warà netuen dan ne ibenar ne salà ne dait ne ebpeimetayan si Hisus, ne mibuyi dan ki Pilatu ke gubinedur te ebpeimetayan kandin.

<sup>29</sup> Guna su neipus arà se nenged-ulaula te kegketuman dut te ingkesurat neraan te menge ebpelambas te Lalag te Eleteala rengan ne ibped-ulaula ki Hisus, ne in-awà dut te menge mibperetiyaya ke bangkey ni Hisus ketà te pinebelavag ne kayu ne inleveng dan.

<sup>30</sup> Ugaid ne mibanew sikandin te Eleteala,

<sup>31</sup> ne guna su nevanew en sikandin ne taman te pipira ne hewii ne mibpekita kanda sikandin dut te menge nekeruma kandin ne egenat te lusud te Geliliya taman te Hirusalim. Ne guntaanì ne sikandan se titihus ne ebpenudtul mekeatag ki Hisus diyà te langun ne menge kevuwaran ni Israyil.



<sup>32</sup> “Na sikami,” ke si Pablo, “ne mibpengkayi su ibpesabut dey keniyu ke Meupiya ne Tudtul. Ini se Meupiya ne Tudtul ne mekeatag dut te impasad te Eleteala te menge keep-epuan tew rengan.

<sup>33</sup> Na ini se impasad din kandan dengan ne netuman en kayi te kenitew ke menge kevuwaran dan ketà te kinebanew ki Hisus. Su ruen impesurat te Eleteala riyà te riberù ne ed-ingaranan te Salmu ketà te ikeruwa ne bayuk ne egkahi te,  
‘Sikuna ke Anak ku

ne guntaanì ne ibpekita ku te Amey a nikuna.’

<sup>34</sup> Ne ruen dema impesurat te Eleteala mekeatag te kebanew kandin ne kenà egkeredak ke lawa rin su migkahi te,

‘Ini se penaub ne impasad ku ki David dengan ne edtumanen ku kayi te keykew.’

<sup>35</sup> Ne ruen pà lavew impesurat te Eleteala ki David ne migkahi ni Hisus te,

‘Siaken se metulanged ne sugsuhen nu

ne kenà nu idtuhut ne ini se lawa ku

ne egkeredak diyà te leveng.’

<sup>36</sup> “Na netuanen ta, menge suled,” ke si Pablo, “ne midtuman ni David arà se mibpevelan kandin te Eleteala, ne guna su neipus din na minatey en. Ne inleveng sikandin diyà te ulid te midlevengan te menge apù din, ne neredak ke lawa rin.

<sup>37</sup> Ugaìd ne si Hisus, arà se mibanew te Eleteala, ne warà mulà meredak ke lawa rin.

<sup>38-39</sup> “Tembù be menge suled, langun niyu ne menge ruma ku ne kevuwaran ni Israyil, ketueni niyu ne kayi ebpuun te ki Hisus ini se lalag ne ibpesabut ku keniyu ne kebpekeliyu ta te kedusa te Eleteala keyta mekeatag dut te menge salà ta. Su piya engkey ne etew se ebperetiyya kandin ne ebpekeliyu dut te kedusa te Eleteala kandin, ugaìd ke kedtuman ta rut te menge penduan ni Moises ne kenà ebpekegaga ne ebpeleyu keyta.

<sup>40</sup> Na uram kew su apey kenà egked-ulaula kayi te keniyu ini se impesurat te menge ebpelambas te Lalag te Eleteala rengan ne egkahi te,

<sup>41</sup> ‘Sikiyu ne menge edsumpalit su kenà kew ebperetiyya,

ne uram kew!

Su egkegeyip kew te ebeelan ku,

ne ebpematey kew, ke se Eleteala.

Su ruen ebeelan ku te biviyag kew pà

ugaìd ne kenà niyu ebperetiyyaan,

misan duen ebpemenudtul keniyu.’ ”

<sup>42</sup> Nekeipus si Pablo te edlalag ne gewii te edlihawang dan en ki Bernabe dut te baley ne ebpededian te menge Hudiyanen te penduan dan, ne migkehiyan dan dut te menge etew te medlived dan te edtundug ne Hewii ne Id-imeley su apey ran mekeuman mekesabut mekeatag te ini.

<sup>43</sup> Ne guna su midlihawang en ke menge etew ne nevrurun ketà, ne ruen midtundug ki Pablo wey si Bernabe. Ini se midtundug kandan ne menge Hudiyanen wey kenà Hudiyanen ne midruyud te peretiyya te menge Hudiyanen. Ne migkehiyan dan ni Pablo wey si Bernabe te mibag-et dan ke hinawa ran te kenà dan medlekà dut te kebperetiyya ran te Eleteala ne midlimù kandan.

<sup>44</sup> Guna su neuma en ke edtundug ne Hewii te Id-imeley ne malùmalù langun ne menge etew te inged ne Antiyuka ne nevrurun su ebpeming te Lalag te Kerenan.

<sup>45</sup> Guna su nekita dut te menge Hudiyanen te denda ne menge etew ne nevrurun, ne nesihi ran midsumpalit dan ke impenurù ni Pablo ne midtempelà dan dema sikandin.

<sup>46</sup> Ugaìd ne nasi en ne mid-iseg si Pablo wey si Bernabe te edlalag ne egkahi te, “Iyan iya se ed-unaan dey sikiyu ne menge Hudiyanen te ebpesabut dut te Lalag te Eleteala. Ne geina te warà niyu telimaa ini wey ne warà niyu mepegitung te sikiyu se dait ne ebpekotelimà te umur ne warà edtemanan din, ne ed-ewaan dey sikiyu su ebpendiyà key te menge etew ne kenà Hudiyanen.

<sup>47</sup> Su ini rema ke insuhù te Kerenan ne ebpevelan kenami ne ingkesurat ne Lalag din ne egkahi te,

‘Tring kew te menge sulù ne intahù ku

ne ebpekevehey te rayag

dut te menge etew ne kenà Hudiyanen,

su apey ebpekeuma ini se Meupiya ne Tudtul

diyà te epat ne pediyulu te dunya

te siaken se ebpekepeliyu te menge etew

rut te kedusa te Eleteala kandan!’ ”

<sup>48</sup> Guna su nerineg ini dut te minge etew ne kenà Hudiyanen ne nengehalew ran wey mideyà dan ke Eleteala mekeatag dut te lalag din. Ne langun ne minge etew ne nepemili te Eleteala ne ebhayan te umur ne warà edtemanan din ne mibperetiyya en ki Hisus.

<sup>49</sup> Nekeeneb ini se impesabut ne Lalag te Kerenan diyà te langun ne minge inged ketà.

<sup>50</sup> Ugaid ne migkehiyan dut te minge Hudiyanen ke minge unuten wey ke minge egkeedatan ne minge meritan ne kenà Hudiyanen ne ebpengarap te Eleteala se ebaal te igkeepesi su apey ran ebpekesekeiti si Pablo ki Bernabe. Ketà ne impeawà dan arà se deruwa rut te inged dan.

<sup>51</sup> Ne ketà te ked-awà ni Pablo ki Bernabe ne midagdag dan ke lipupuk dut te minge paa ran su tuus ini te kenà en kilid kandan kegkeuma arà se hewii ne kedtimbang te Eleteala te minge etew. Ne midlaus dan en diyà te inged ne Ikunya.

<sup>52</sup> Ne ke minge mibperetiyya ki Hisus ne netetahak diyà te Antiyuka ne midlumun kandan ke Kedesenan ne Ebpetuntul te Menusiyà ne nehalew ran nevenar.

## 14

### *Nekeuma si Pablo ki Bernabe diyà te Inged ne Ikunya*

<sup>1</sup> Diyà te inged ne Ikunya ne iring ded maa dut te mid-ulaula ni Pablo ki Bernabe te riyà dan pà te Antiyuka su midlusud dan diyà te baley ne ebpengedian te minge Hudiyanen te penduan dan su ibpesabut dan ke Lalag te Eleteala. Ne meilit te kebpesebuti ran ketà dut te merakel ne minge Hudiyanen wey kenà Hudiyanen se mibperetiyya ki Hisus.

<sup>2</sup> Ugaid ne ruen migkehiyan dut te minge Hudiyanen ne warà mepperetiyya kayi te minge etew ne kenà Hudiyanen ne ebaal te kegkeepesi ran dut te minge mibperetiyya ki Hisus.

<sup>3</sup> Ne malù meuhet se ked-ubpaubpà ni Pablo ki Bernabe ketà te inged ne Ikunya. Ne warà kegkeandek dan te ebpesabut mekeatag ki Hisus ne Kerenan. Ne mibpekita ke Kerenan dut te minge etew te benar arà se Lalag ne impesabut ni Pablo mekeatag te kegkeyru te Kerenan kandan su imbehey rin kandan ke gehem din te ebaal te ulaula ne mekegeyip wey mekeinuinu ne ed-ul-ulaan.

<sup>4</sup> Ne nevaad ke minge etew kayi te inged ne Ikunya su ruen midtampil te minge Hudiyanen wey ruen dema midtampil enki Pablo.

<sup>5</sup> Ne ketà ne ruen minge Hudiyanen wey kenà Hudiyanen abpeg dut te egkeunutan dan ne mid-upakat dan se ebpekesekitan dan si Pablo ki Bernabe su ibperumbag dan te batu.

<sup>6</sup> Ugaid ne guna su nerineg ini eni Pablo ne mibpelahuy ran se ebpendiyà te minge inged ne Listra wey Dirbi lusud te inged ne Likunya wey ke nekeerivey ne minge inged

<sup>7</sup> ne ketà ne impesabut dan ke Meupiya ne Tudtul.

### *Nekeuma en ensi Pablo diyà te Menge Inged ne Listra wey Dirbi*

<sup>8</sup> Ne riyà te inged ne Listra ne ruen meama ne pungkù igenat te kineanaka kandin ne warà en mekeipanew.

<sup>9</sup> Mibpeminig din ini se lalag ni Pablo. Ne netuenan ni Pablo se mibperetiyya arà se etew ne egkeulian sikandin, tembù be midtengtangan ni Pablo sikandin

<sup>10</sup> ne mibmerahing ke suwara rin se egkahi te, "Itindeg ka!" Ne arà dà iyan ne mid-umbetut en te mid-itindeg sikandin ne mid-ip-ipanew.

<sup>11</sup> Guna su nekita rut te denda ne etew arà se mibeelan ni Pablo ne mibpememensag dan en te kinehiyan ne Linikunyan se egkahi te, "Mid-iring te paras te etew ke minge diwata ne mibpahunrenà kayi te keyta!"

<sup>12</sup> Ne iyan dan in-ingaran ki Bernabe ne si Siyus, ne iyan dan in-ingaran ki Pablo ne si Hirmis su sikandin ke metau ne edlalag.

<sup>13</sup> Ne riyà te uvey te inged ne ruen baley ketà ne ebpengeraan dan te diwata ran ne si Siyus. Ne ruen terebpepengesa ketà ne nekeuma diyà te bengawan dut te ubpaan eni Pablo ne mid-ewit te minge sapi wey midurung ne minge kevukaran su sikandin abpeg ke minge etew ne edrenà te siparat dut te deruwa ne kedserihan.

<sup>14</sup> Guna su netuenan ni Bernabe ki Pablo ini se ed-ul-ulaan dut te minge etew ne mibpemindas dan ke belegkas dan ne tuus te kenà dan ebpekesehat kayi te ini ne ulaula. Ne mibpelelahuy ran diyà te luuk dut te minge etew se ebpemengsag te,

<sup>15</sup> "Meambe ke ed-ul-ulaan niyu ini? Sikami ne etew red dema iring keniyu! Ne iyan dey impengkayit te inged niyu su ibpesabut dey ke Meupiya ne Tudtul apey niyu egkeengkeri ke kebpengarap niyu te minge diwata ne warà rantek din su apey kew ebpekepengarap te Eleteala ne warà kemetayen din. Iyan sikandin midlimbag te langit wey tanà wey dahat wey ke langun ne neketahù ketà.

<sup>16</sup> Dengan ne intuhut te Eleteala dut te langun ne minge etew ne ed-ulaula te piya engkey ne egkiyuhan dan.

<sup>17</sup> Ugaid ne misan iring ketà te intuhut din, ne ruen minge tuus ne ibpekilala rin te sikitew ne minge etew ne duen igkeupiya tew. Su ebehayan kiyu rin te uran ne ebpekepevahah te pinemula tew te hewii te kebehas. Ibehey rin keytew ke keuyahan tew ne ibmehalew te hinawa tew.”

<sup>18</sup> Ne misan iring ketà se lalag eni Pablo, ne merehen dan ne egkerawey arà se minge etew ne edrenà te idsiparat kandan.

<sup>19</sup> Ketà ne ruen nekeuma te inged ne Listra ne minge Hudiyanen ne riyà ebpuun te Antiyuka lusud te Pisidya wey riyà ebpuun dema te inged ne Ikunya. Ne nekumbabid dan ke minge etew kayi te edtampil kandan su ebaal te igkeepesi ran engki Pablo. Ketà ne mibpenrumbag dan te batu si Pablo wey miguyud dan diyà te liyu te inged su kunaan dan ke minatey en sikandin.

<sup>20</sup> Ugaid ne guna su nevrurun ke minge mibperetiya ne midlingut kandin, ne mid-ewew sikandin ne midlived ketà te inged. Ne ketà te hewii ne edtundug ne mid-awà si Pablo ki Bernabe su mibpendiyà dan te inged ne Dirbi.

*Mid-uli en ensi Pablo Diyà te Inged ne Antiyuka lusud te Siriya*

<sup>21</sup> Guna su nekeuma en si Pablo ki Bernabe diyà te inged ne Dirbi ne impesabut dan ke Meupiya ne Tudtul ne merakel ketà se miduma ki Hisus. Dutun ne mid-uli dan diyà te minge inged ne Listra wey Ikunya, ne ketà ne midlaus dan diyà te inged ne Antiyuka lusud te Pisidya.

<sup>22</sup> Ketà ne minge inged ne impenurù dan se ibpeiseg ke keduma dut te langun ne minge mibperetiya ki Hisus ne mibag-et dan ke hinawa dut te minge etew te kenà medlekà dut te peretiya ran. Su impesabut dan te, “Ebpevayà ki pà iyan te minge kemerehenan te kenà ki pà ebpekelusud dut te Edetuan te Eleteala,” ke sikandan.

<sup>23</sup> Ne ketà te langun ne inged ne impesabut ni Pablo ke Lalag te Eleteala ne ruen minge mibperetiya ne midtendù eni Pablo ne minge pekilukesen. Ketà ne midlimpas dan te egkaan wey mibpengeningeni ran te Eleteala wey inrumakan dan diyà te Kerenan ne iyan edtuganur kandan arà se midserihan dan.

<sup>24</sup> Guna su mid-apat en si Pablo riyà te inged ne Pisidya, ne nekeuma ran en diyà te inged ne Pampilya.

<sup>25</sup> Ne ketà ne impesabut dan ke Lalag te Eleteala diyà te minge etew te inged ne Pirga, na mibpetiulug dan diyà te inged ne Etalya diyà te beyvey te rahat.

<sup>26</sup> Ne ketà ne mid-untud dan te kapal te ed-uli diyà te inged ne Antiyuka. Su arà se inged ne Antiyuka ne netail si Pablo ki Bernabe dut te minge mibperetiya su intepeny ran se hinawa ran diyà te Eleteala ne iyan edtuganur kandan te ed-ip-ipanew se ebpesabut te Meupiya ne Tudtul. Ne guntaani ne neipus dan en ini se mibpeveelan kandan.

<sup>27</sup> Guna su nekeuma ran en diyà te inged ne Antiyuka, ne miburun dan ke minge mibperetiya ki Hisus ne mibpenudtul dan arà se langun ne impehelevek kandan impepevayà te tavang te Eleteala kandan. Ne miguhud dan lavew ke petiralan te Eleteala te ibpesabut ke Meupiya ne Tudtul diyà te minge etew ne kenà Hudiyanen ne ketà ne merakel se mibperetiya ki Hisus.

<sup>28</sup> Ne neuhet se ked-ubpaubpà dan diyà dut te minge mibperetiya te inged ne Antiyuka.

## 15

*Ke Kinevrurun eni Pablo Dut te Minge Pekilukesen Diyà te Inged ne Hirusalim*

<sup>1</sup> Duen minge etew ne riyà ebpuun te Hudiya ne mibpendiyà te inged ne Antiyuka ne mibpenurù dan ke minge mibperetiya ketà. “Embiyà kenà kew ebpeetus iring dut te impenurù ni Moises rengan,” ke sikandan, “ne kenà kew ebpekeliyu rut te kedusa te Eleteala keniyu.”

<sup>2</sup> Ne mibpekid-apol te mevaher en si Pablo ki Bernabe kandan, ne mibpekidlewanà dan mekeatag dut te impenurù ketà te minge etew. Tembù be ke minge mibperetiya ketà se midsuhù ki Pablo wey si Bernabe wey duma ne mibperetiya te ebpendiyà te inged ne Hirusalim su ebpekibalak dut te minge kedserihan wey ke minge pekilukesen mekeatag te ini ne penurù.

<sup>3</sup> Ketà te ked-ipanew ran ne midtevangan dan dut te minge mibperetiya kayi te inged ne Antiyuka. Ne gewii te kebpevayà dan kayi te Pinisiya wey Semariya ne miguhud dan mekeatag dut te minge etew ne kenà Hudiyanen ne nekeperetiya en ki Hisus. Nerineg ini rut te minge mibperetiya ketà ne nengehalew ran nevenar.

<sup>4</sup> Guna su nekeuma ran diyà te inged ne Hirusalim ne migalewhalew ran dut te minge mibperetiyya, ke minge kedserihan, wey ke minge pekilukesen ketà. Ne impenudtul ni Pablo ki Bernabe ke langun ne mibpeveelan te Eleteala kandan ibpepevyà te tavang din.

<sup>5</sup> Ugaid ne ruen minge mibperetiyya ketà ne sakup te minge Paresiyu ne mid-itindeg se egkahi te, "Iyan iya se mebpeetus dan arà se minge etew ne kenà Hudiyanen wey medtuman dan dema te penduan ni Moises."

<sup>6</sup> Miburunburun ini se minge kedserihan wey ke minge pekilukesen su ebpengesaken dan mekeatag ketà.

<sup>7</sup> Guna su neuhet en se kebpengasak dan ne mid-itindeg si Pedro ne migkahi te, "Menge suled, netuenan niyu en te kayi te keniyu ne siaken se nepemili te Eleteala ne ebpesabut dut te Meupiya ne Tudtul diyà te minge etew ne kenà Hudiyanen su apey ran ebpekerineg ne ebpekeperetiyya ran ki Hisus.

<sup>8</sup> Ne ke Eleteala ne netuenan din ke hinawa te minge etew, ne mibpemasman din te kedtelimà din dut te minge etew ne kenà Hudiyanen su imbehey rin ke kedlumun dut te Kedesean ne Ebpetuntul te Menusiyà kandan iring dut te kinevehey rin te kinelumun dut te Kedesean ne Ebpetuntul te Menusiyà keyta.

<sup>9</sup> Warà pebiraa te Eleteala," ke si Pedro, "ke sikami ne minge Hudiyanen wey ke minge etew ne kenà Hudiyanen su ibpeleyu rin dema sikandan dut te kedusa rin te salà dan sabap dut te kineperetiyya ran ki Hisus.

<sup>10</sup> Na," ke si Pedro, "meambe ke kiyug niyu ne ebperengitan niyu ke Eleteala ketà te ini se ibpetuman niyu dut te minge ruma tew ne mibperetiyya ki Hisus! Su arà se ibpetuman niyu kandan ne penduan ni Moises, ne misan ke keep-epuan tew wey sikitew rema ne warà meketuman.

<sup>11</sup> Ugaid ne tentenuri niyu minge suled," ke si Pedro, "ne ini se kebperetiyya tew se ebpekepeleyu keytew te minge Hudiyanen dut te kedusa te Eleteala su atag dut te kegkeyru rin. Ne engketà ded dema ke minge etew ne kenà Hudiyanen."

<sup>12</sup> Nerineg dà ini rut te minge etew ne nevurun ketà ne mibpeeneng-eneng dan. Ne mibpemingeg dan ki Bernabe wey si Pablo te ebpenudtul mekeatag dut te ed-ul-ulaan dan ne mekegeyip wey ned-ulaula ne mekeinuinu dut ke migelevek dan diyà te minge etew ne kenà Hudiyanen impepevyà dut te gehem te Eleteala ne imbehey rin kandan.

<sup>13</sup> Guna su nekeipus dan se edlalag ne migkahi en si Santiago te, "Pemineha niyu, minge suled, ini se egkehiyen ku.

<sup>14</sup> Miguhud en ni Simon keniyu mekeatag dut te neuna ne impekita te Eleteala ne limù din dut te minge etew ne kenà Hudiyanen su apey ruen diyà te kandan ne ebpesakup kandin.

<sup>15</sup> Ini se kebpesakup dut te minge etew ne kenà Hudiyanen te Eleteala ne iring dut te nekahi te minge etew ne ebpelambas te Lalag te Eleteala rengan su ruen ingkesurat ne lalag te Eleteala ne egkahi te,

<sup>16</sup> 'Embiya egkeipus ini

ne edlived a, ke se Kerenan,

ne ebngunen ku maa

ke netunggad ne baley ni Dabid.

Uya, ibpeitiindeg ku ini se baley rin

su ibpeulit ku maa.

<sup>17</sup> Ketà ne langun ne minge etew ne kenà Hudiyanen

ne ebpengkayi dema su ibehey ran ke hinawa ran kediey,

su mibpemili ku rema sikandan.

<sup>18</sup> Ini se migkahi te Kerenan

ne impesabut en ini egenat dà dengan.'

<sup>19</sup> "Ini," ke si Santiago, "ne iya kayi te kedi ne itungan ne ini se minge etew ne kenà Hudiyanen ne imbehey ran ma ke hinawa ran te Eleteala ne kenà tew en igkereheni.

<sup>20</sup> Iyan meupiya ne edsuratan ta sikandan ne egkehiyen tew te kenà dan megkaan te egkeenen ne indawey su inrenà ne siparat diyà te ledawan ne kenà tidtu ne Eleteala, ne kenà dan megkaan te binatang ne ebpekelen dà wey kenà dan megkaan te lengesa. Ne kenà dan dema mebpeingniyug.

<sup>21</sup> Su ini ke penduan ni Moises ne netetahak din ne ibpetuman tew kandan ne neuhet en ne ebasaan ini diyà te minge baley ne ebpengedian te minge Hudiyanen te penduan dan te uman Gewii ne Id-imeley wey impesabut en ini diyà te langun ne inged."

*Ke Surat ne Impeewit diyà te kenà minge Hudiyanen ne Mibperetiyya ki Hisus*

<sup>22</sup> Ne ketà ne ini se minge kedserihan wey minge pekilukesen abpeg ke langun ne minge mibperetiyya ne neumpung se ruen ebpemilien dan dut te minge ruma ran ne ibperuma ki Pablo wey ki Bernabe riyà te inged ne Antiyuka. Ne iyan dan nepemili ne deruwa ne etew ne egkeedatan dut te langun ne mibperetiyya ne si Hudas ne edingeranan ded maa ki Bersabas wey si Silas.

<sup>23</sup> Ne impepeewit dan kandan ke surat ne ini se migkahi rin,

“Ini se surat ne kayi ebpuun te minge suled niyu ne mibperetiyya ki Hisus kayi te Hirusalim, ke minge kedserihan wey ke minge pekilukesen. Meupiya key kayi, ugaid ne memenu kew kenian langun ne kenà Hudiyanen ne minge suled dey te mibperetiyya ki Hisus kenian te inged ne Antiyuka wey riyà te minge pruvinsiya te Siriya wey Silisiya.

<sup>24</sup> Nerineg dey ne ruen minge ruma rey ne Hudiyanen kayi ne mibpendiyà te keniyu ne nekesamuk keniyu su neliveg dà ke itungan niyu su atag dut te ibpenurù dan, ugaid ne warà dey suhua sikandan.

<sup>25</sup> Tembù be miburun key ne mid-umpung key se ebpemili te ebpendiyà su ebpesabut keniyu, ne eduma ran ki Bernabe wey ki Pablo ne ruma ta ne igkelimù dey nevenar.

<sup>26</sup> Su ini ne minge etew, ne inselakan dan ke umur dan te kebpenurù dan mekeatag te Kerenan tew ne si Hisu Kristu.

<sup>27</sup> Ne ini se ibpendiyà dey si Hudas wey si Silas, ne neked-iring se ibpenudtul dan keniyu dut te intahù te surat dey keniyu.

<sup>28</sup> Ne impesabut kenami dut te Kedeseenan ne Ebpentuntul te Menusiya te sikami ne neupakat dema te kenà dey ibpehes keniyu te ebpetuman en kew te langun ne penduan, ugaid ne ini iya se tumana niyu:

<sup>29</sup> kenà kew kaan te egkeenen ne inrenà ne siparat diyà te ledawan dà ne kenà tidtu ne Eleteala, kenà kew kaan te binatang ne ebpekelen dà, kenà kew kaan te lengesa wey kenà kew mebpengingniyug. Ne meupiya en embiya ini se edtumanen niyu se nekahi ku. Arà dà taman.”

<sup>30</sup> Ketà ne migenat en arà se midsuhù ne ebpendiyà te Antiyuka. Nekeuma ran ne miburun dan ke langun ne mibperetiyya ne imbehey ran kandan ke surat.

<sup>31</sup> Ne ini se minge mibperetiyya, nevasa ran ne nengehalew ran nevenar su nevag-et ke hinawa ran mekeatag dut te lalag ne nevasa ran.

<sup>32</sup> Ne si Hudas ini ki Silas ne minge etew rema ne ebpelambas te Lalag te Eleteala ne meuhet se kinepekidlalag dan dut te minge mibperetiyya su mibpenurù dan su apey ke kepperetiyya ran ne mevag-et wey meilut.

<sup>33</sup> Guna su malù neuhet se ked-ubpà ni Hudas ki Silas ketà, ne mid-uli dan diyà te midsuhù kandan. Ne mibpemehetawan dan dut te minge mibperetiyya ketà te Antiyuka se egkahi te, “Kerenan se metau te ked-ipanew niyu.” (

<sup>34</sup> Ugaid ne si Silas ne warà meduma su mibpelintetahak dà.)

<sup>35</sup> Si Pablo wey si Bernabe ne mid-ubpaubpà den pà dema diyà te inged ne Antiyuka su sikandan wey arà se merakel ne minge ruma ran se ebpenurù wey ebpesabut te Lalag te Eleteala.

#### *Mibpesuwayey si Pablo wey si Bernabe*

<sup>36</sup> Nekebpipira ne hewii ne migkehiyan ni Pablo si Bernabe te, “Edlived ki su ebperemeraan ta ke minge mibperetiyya diyà te minge inged ne impesabut ta ke Lalag te Eleteala.”

<sup>37</sup> Ne kiyug ni Bernabe ne edumaan dan si Juan ne ed-ingeranan ded maa ki Marcos,

<sup>38</sup> ugaid ne warà megkiyug si Pablo te ebpekeruma si Juan su sikandin ne mid-ewaan dan diyà te inged ne Pempiliya su warà din medtiggeri ke kemerehenan taman te neipus ke helevek dan.

<sup>39</sup> Ne nekedlewanà dan ne ketà ne mibpesuwayey ran. Ne si Bernabe, miduma rin si Juan ne ed-ingeranan ded maa ki Marcos ne mid-untud dan te kapal se ebpendiyà te inged ne Sipri.

<sup>40</sup> Ne si Pablo, ne miduma rin si Silas ne mibpengeningeni ke minge mibperetiyya se ebuyù te iru te Eleteala te edtuganur kandan dut te ked-ipanew ran.

<sup>41</sup> Ne mid-apat dan diyà te minge pruvinsiya ne Siriya wey Silisiya se ebpenurù su apey ebmeilut se kepperetiyya dut te minge mibperetiyya ketà.

<sup>1</sup> Ne nekeuma ensi Pablo diyà te inged ne Dirbi wey riyà te inged ne Listra. Ketà ne ruen ed-ubpà ne senge etew ne ed-ingaranan ki Timoteo ne mibperetiyaya ki Hisus. Ini se iney rin ne Hudiyanen ne mibperetiyaya ki Hisus, ugaid ne ke amey rin se Gerisiyanen.

<sup>2</sup> Ne langun ne menge mibperetiyaya diyà te inged ne Dirbi wey Ikunya ne meupiya se lalag dan mekeatag ki Timoteo.

<sup>3</sup> Kiyug ni Pablo ne ebpekeruma kandin si Timoteo, tembù be mid-etusan din sikandin. Iyan din ked-etusi kandin su apey edtelimaa sikandin dut te menge Hudiyanen ketà te menge inged ne ebpevayaan dan su netuenan dut te langun ne menge Hudiyanen te Gerisiyanen ke amey ni Timoteo.

<sup>4</sup> Gewii te ked-ip-ipanew ran dut te menge inged ne impesabut dan dut te menge mibperetiyaya arà se suhù dut te menge kedserihan wey pekilukesen diyà te Hirusalim ne ingkahi kandan te edtumanen

<sup>5</sup> Ne nevag-et se kebperetiyaya dut te menge mibperetiyaya wey mid-iseg ke kerakel dan te uman gewii.

*Mibpekitakita ke Eleteala ki Pablo diyà te Inged ne Teruwas*

<sup>6</sup> Ne riyà dan mibpevayà te menge inged ne Perigya wey Gelasiya su warà ituhut kandan dut te Kedesenan ne Ebpetuntul te Menusiyà te ibpesabut ke Lalag te Eleteala diyà te pruvinsiya ne Asiya.

<sup>7</sup> Guna su nekeuma ran diyà te eletan te inged te Misiya ne edlaus dan perem diyà te pruvinsiya te Bitaniya, ugaid ne warà dan tuhuti dut te Kedesenan ne Ebpetuntul te Menusiyà ne ebpuun diyà te ki Hisus.

<sup>8</sup> Ne ketà ne mid-apet dan diyà te Misiya ne mibpetiulug dan diyà te inged ne Teruwas.

<sup>9</sup> Ketà te merukilem en ne ruen impekita te Eleteala ki Pablo ne etew ne riyà ebpuun te inged ne Mesidunya ne ebuyù kandin se egkahi te, "Laus kew kayi te Mesidunya su apey key niyu tevangi!"

<sup>10</sup> Nekita rà ini ni Pablo ne midteganen key en se edlaus diyà te inged ne Mesidunya su nesebutan dey te edsuhuen key te Eleteala te ibpesabut ke Meupiya ne Tudtul diyà te menge etew ketà.

*Ke Kebperetiyaya ni Lydia diyà te inged ne Pilipus*

<sup>11</sup> Ne mid-untud key te kapal ne egenat te Teruwas ne ebpendiyà te punul te Semustrasiya, ne ke nekedtundug ne hewii ne midlaus key diyà te inged ne Niyepulis.

<sup>12</sup> Nekeuma key ne mid-ipanew key en se ebpendiyà te dekelà ne inged ne Pilipus ne ed-una ne inged te lusud te Mesidunya, ne rutun te inged ne Pilipus ne merakel se menge etew ne Rumanu ne sumeseuyan. Ne ketà key med-ubpà taman te pipira ne hewii.

<sup>13</sup> Guna su Hewii te Id-imeley ne midlihawang key ketà te inged ne mibpendiyà key te beyvey te wayig su nepegitung dey te ruen egkevurunan te menge Hudiyanen te ebpengeningeni. Ketà ne mibpinuu key se ebpekidlalag te menge meritan ne nevurun dutun.

<sup>14</sup> Ne seveka rutun te menge meritan ne ebpemineg te lalag dey ne ed-ingaranan ki Lydia ne riyà ebpuun te inged ne Tiyetira ne ebpemendehang te saput ne mehurditem. Mibpengarap te Eleteala ini se meritan, tembù be imbehey rin te Kerenan ke hinawa rin te kedtelimà te ibpesabut ni Pablo.

<sup>15</sup> Ketà ne mibunyahan sikandin abpeg ke menge emurà din dutun te valey rin. Ne migkehiyan key rin te, "Embiya birang te itungan niyu ne benar se peretiyaya ku ki Hisus ne Kerenan ne diyà kew ubpà te baley ku." Ne warà key rin ewai ne ketà ne mibpendiyà key en.

*Mibilanggù si Pablo ki Silas diyà te Inged ne Pilipus*

<sup>16</sup> Senge hewii ketà te kebpendiyà dey te ebpengeningenian te menge Hudiyanen ne midsinuhung kenami arà se meritan ne uripen ne mibehayen te gaga te busew ne midsuuk kandin te kedtendek te egked-ulaula keuremà. Ne rekelà se kureta ne nepentiyari dut te tehiuripen kandin kayi te kebpenguris din.

<sup>17</sup> Ne midtundug kenami ki Pablo arà se meritan se ebpemensag te, "Ini ne menge etew ne sugsuhuen dut te Eleteala ne kenà egkerepengan! Ne ibpesabut dan keniyu ke ralan te ebpekeliyu kew rut te kedusa rin."

<sup>18</sup> Arà se mid-ulaula rin lusud te merakel ne hewii ne netaman ketà ne neperè en si Pablo ne midlilingey rin ne migkehiyan din ke busew te, "Egenat te gehem te ngaran ni Hisu Kristu ne idsuhù ku keykew te awà ka kenian te meritan." Arà dà ne mid-ewaan en dut te busew ke meritan.

<sup>19</sup> Guna su nesehipà dut te minge tehiuripen kandin se kenà dan en ebpekepentiyari te kureta ketà te helevek dut te meritan, ne midsigkem dan si Pablo ki Silas ne miguyud dan te ebpendiyà te minge perekukum te inged dan.

<sup>20</sup> Ketà ne mibpeetuvang din te minge perekukum ne Rumanu ne migkahi te, "Ini ne minge etew ne minge Hudiyanen ne edsamuksamuk kayi te inged ta.

<sup>21</sup> Su ebpenurù dan te minge betasan ne ebpekesurang dut te minge penduan ta. Ne sikitew ne minge Rumanu ne kenà egkepakey ne edumaan tew arà se betasan ne ibpenurù dan."

<sup>22</sup> Ne ke merakel ne minge etew ne nevurun ketà ne mid-amung te ebpekesakit kandan. Ne ketà ne mibpemindas dut te perekukum ke belegkas ni Pablo ki Silas ne mibpebedasan dan.

<sup>23</sup> Guna su neipus dan te ebpemadas te mevaher, ne mibilanggù dan en. Ne ini se ebantey te bilengguan ne migkehiyan dan te ebpepintuan te mevaher.

<sup>24</sup> Nerineg ini dut te ebantey, ne diyà din in-awuk sikandan te sungkù ne nekepeluuk te bilengguan ne mibpatung din ke minge paa ran te mevaher ne kayu.

<sup>25</sup> Guna su mehaan en edluuk se kerukileman ne mibpengerineni en si Pablo ki Silas wey migkanta ran se edeyù te Eleteala, ne mibpeming kandan ke minge ruma ran ne bilanggù.

<sup>26</sup> Ne ketà midtekew midlinug te mevaher ne piya ke mibpeunsaran dut te bilengguan ne newaleng. Ne segugoneey ne nevukaan langun ne minge humawan, ne nengeluung ke minge sengkali dut te minge bilanggù.

<sup>27</sup> Nekehimerat ke ebantey te bilengguan ne nekita rin ne nevukaan en ke minge gumawan dut te bilengguan, ne mid-ulavut din ke sundang din su ed-imatey perem te lawa rin su kunaan din ke mibpemelahuy en ke minge bilanggù.

<sup>28</sup> Ugaid ne mibensag si Pablo te, "Kenà ka ed-usuk te lawa nu! Su langun dey ne ini red!"

<sup>29</sup> Ini se ebantey, ne mibpengumew te ebpeewit te sulù. Ne ketà ne migaangaan midlusud kayi te minge bilanggù ne mibpenimbuel diyà te sineruwan ni Pablo ki Silas se migkerker te andek din.

<sup>30</sup> Ne impelihawang din sikandan se egkahi te, "Mama, engkey se ed-ul-ulaan ku su apay a ebpekeliyu rut te kedusa te Eleteala?"

<sup>31</sup> Ne migkahi ensi Pablo te, "Peretiyaya ka te Kerenan tew ne si Hisus ne ebpekeliyu ka te kedusa te Eleteala abpeg ke minge emurà nu diyà te baley nu."

<sup>32</sup> Ketà ne sikandin wey ke emurà din diyà te baley rin ne impesabut kandan eni Pablo ke Lalag te Eleteala.

<sup>33</sup> Ne rutun te metaneb pà ne kerukileman ne migkuwa rut te ebantey si Pablo ki Silas ne mid-enuan din ke minge pali dan. Ne ketà ne mibunyahan en ini se ebantey abpeg ke sikandan ne telteleanak.

<sup>34</sup> Ne rutun ne miduma rin en si Pablo ki Silas diyà te baley rin wey pinekaan din. Ne sikandan se telteleanak ne nehalew nevenar su mibperetiyaya ran en te Eleteala.

<sup>35</sup> Guna su meselem en ne duen midsuhù te minge egkeunuten ne Rumanu ke minge mepurù te pulis se egkahi te, "Ibpeleihawang nu en ayan se minge etew."

<sup>36</sup> Ne ketà ne mibpenudtul ini dut te ebantey diyà te ki Pablo se egkahi te, "Insuhù te minge egkeunuten ne Rumanu ne ibpeleihawang kew en ki Silas. Ebpekeawà kew en ne up-upiya kew rà!"

<sup>37</sup> Ugaid ne migkehiyan ni Pablo ke minge mepurù te pulis dut te egkeunutan te, "Mibpebedasan key ran diyà te etuvangan te merakel ne minge etew misan warà netuen dan ne idwagib kenami ne sikami ne sakup ded dema te inged ne Ruma. Ini ne mibilanggù key. Na guntaani ne id-eles te kebpeawà kenami. Kenà egkepakey!" ke si Pablo. "Su iyan iya se mibpengkayi ke egkeunutan ne Rumanu ne iyan ebpeleihawang kenami."

<sup>38</sup> Ne mibpenudtul ini dut te minge mepurù te pulis diyà te egkeunuten ne Rumanu. Ne guna su netueanan dan te si Pablo ki Silas ne sakup ded dema te inged ne Ruma ne neandek dan.

<sup>39</sup> Tembù be mibpendiyà dan ne mibuyù dan te ebpeseharen eni Pablo. Ketà ne miduma ran su ibpeleihawang dan te bilengguan wey mibuyù dan te med-awà dan ketà te inged.

<sup>40</sup> Ne midlihawang si Pablo ki Silas ne mibpendiyà dan te baley ni Lydia, ne mibag-et dan ke kebperetiyaya rut te minge mibperetiyaya ki Hisus ne neuma ran ketà, arà pà ne migenat dan en.

## 17

*Si Pablo ki Silas diyà te Inged te Tiselunika*

<sup>1</sup> Na mid-ipanew en si Pablo ki Silas ne ebpevayà te menge inged ne Empipulis wey Epulunya ne nekeuma ran diyà te inged ne Tiselunika. Ne ruen ketà baley ne epengedian te menge Hudiyanen te penduan dan.

<sup>2</sup> Ne rutun te Hewii te Id-imeley ne mibpendiyà si Pablo te baley ne ebpengedian te menge Hudiyanen te penduan dan su nelayaman din. Ne uman Hewii te Id-imeley lusud te tetelu ne pedian ne mibpekidlalag sikandin dut te menge etew ne ibpeudsad te ingkesurat ne Lalag te Eleteala.

<sup>3</sup> Ne midseysey rin kandan ke Lalag te Eleteala wey mibpetuasan din te edresayen wey ed-imetayan arà se Impasad te Eleteala ne Ebperetuen te langun wey ebenawen sikandin. "Si Hisus ini ne impenudtul ku keniyu," ke si Pablo, "ne sikandin ke Impasad te Eleteala ne Ebperetuen te langun."

<sup>4</sup> Ne ruen duma ne menge Hudiyanen ketà ne mibperetiyaya rut te lalag ni Pablo ne mibpekiduma kandan ki Silas. Ne merakel dema se mibperetiyaya ne menge Gerisiyanen ne mibpengarap te Eleteala, elin ne nekeperetiyaya ne menge meritan ne egkeedatan dutun ne inged.

<sup>5</sup> Ugaid ne ke menge Hudiyanen ne warà mibperetiyaya ne nesihi, ne miburun dan ke menge merupangdupang wey mepauk ne menge etew ne mid-eneb dan ini se lusud te inged te ebaal te lingasa. Ne mibpendiyà dan te baley ni Jason su ebpemengaan dan si Pablo ki Silas su apey ran meewit diyà te menge etew.

<sup>6</sup> Ugaid ne guna su warà dan metuen, ne si Jason en wey ruma ne menge mibperetiyaya se miguyud dan diyà te menge egkeunutan ketà te inged dan se egkahi te, "Duen menge etew ne ebaal te lingasa te piya endei te ebpesineruwan dan. Ne guntaani ne ini ran en te inged ta,

<sup>7</sup> ne si Jason," ke sikandan, "se mibpeubpà kandan diyà te baley rin. Ne langun dan ne nekesurang dut te menge penduan te datù tew ne si Cesar su egkehiyan dan ne ruen pà mepurù ne datù ne ed-ingaranan ki Hisus."

<sup>8</sup> Nerineg dà ini dut te menge egkamal wey ke menge etew ne nevrurun, ne nehuvut dan.

<sup>9</sup> Ne si Jason wey ini se ruma ne mibperetiyaya, ne impevayad dan dut te impiyansa kandan ne arà pà ne impeawà dan.

*Si Pablo ki Silas wey si Timoteo diyà te Inged ne Beriya*

<sup>10</sup> Guna su merukilem en ne impeipanew en dut te menge mibperetiyaya si Pablo ki Silas se ebpependiyà te inged ne Beriya. Nekeuma ran, ne mibpendiyà dan te baley ne ebpengedian te menge Hudiyanen te penduan dan.

<sup>11</sup> Ne ke menge Hudiyanen ketà ne laus ne ebpemineg dan engki Pablo su sikandan ne kenà iring dut te menge Hudiyanen diyà te Tiselunika. Su egkeseveka ran ne mibpemineg dut te impesabut ni Pablo. Ne uman gewii ne ebesaan dan ke ingkesurat ne Lalag te Eleteala su apey ran egketueni ke benar iya ke impenurù dan.

<sup>12</sup> Merakel dan se mibperetiyaya abpeg ke egkeedatan ne menge meritan ne Gerisiyanen wey menge meama ne Gerisiyanen dema.

<sup>13</sup> Ugaid ne guna su nerineg dut te menge Hudiyanen diyà te inged ne Tiselunika te ebpesabut si Pablo te Lalag te Eleteala diyà te inged ne Beriya, ne mibpendiyà dan ne mibaal dan te kegkeepesi dut te menge etew ki Pablo.

<sup>14</sup> Arà dà ne ruen duma ne mibperetiyaya ne miduma ki Pablo diyà te beyvey te rahat, ugaid ne intahak din dà si Silas ki Timoteo diyà te inged ne Beriya.

<sup>15</sup> Ke menge etew ne mid-ated ki Pablo ne miduma ran kandin taman te inged ne Etenas. Ne ketà ne mid-uli dan diyà te inged ne Beriya se ed-ewit te telaan ni Pablo te ibpehaangaan ibpetundug si Silas ki Timoteo.

*Si Pablo ne Riyà te Inged ne Etenas*

<sup>16</sup> Ne tehaad te kedtehari ni Pablo ki Silas wey si Timoteo riyà te inged ne Etenas, ne neliveg se itungan din te nekita rin ne medmerakel ne ledawan ne ebpengerapen dut te menge etew ketà.

<sup>17</sup> Tembù be mibpendiyà te baley ne ebpengedian te menge Hudiyanen te penduan dan ne mibpekidlalag si Pablo dut te menge Hudiyanen wey ke kenà menge Hudiyanen ne mibpengarap te Eleteala ketà. Ne uman gewii ne mibpendiyà te pedian dema se ebpekidlalag dut te piya engkey ne etew ne edsahad ketà.

<sup>18</sup> Ne ketà ne ruen menge meyerù ne ed-ingaranan te Epikuranu wey ruma ne ed-ingaranan te Estuwiku ne mibpekidlalag kandin. Duen duma ne mid-insà te, "Engkey



vuwa se egkehiiyan kayi te ini se ed-iring uvag te ruen nesebutan din?" Ne duen duma ne migkahi te, "Iyan din beneng edlelahen ne mekeatag te minge diwata diyà te meriyù ne inged." Tembù migkahi ran ini su impesabut ni Pablo ke Meupiya ne Tudtul mekeatag ki Hisus wey ke kegkevanew rin.

<sup>19</sup> Ketà ne mid-ewit dan si Pablo diyà te etuvangan te minge kunsiyal ne nevrurun diyà te tuhar ne ed-ingaranan te Eriyupahu ne migkahi te, "Egkiyug key ne eguru kayi se behu ne penurù ne nelalag nu.

<sup>20</sup> Su ruen nekahi nu ne iyan dey pà nerineg, tembù be egkiyug key ne eguru kayi su apey rey egkesebuti ke meana rin." (

<sup>21</sup> Tembù be nekahi ran arà su langun ne minge etew te Etenas wey ke minge sumeseuyan ketà ne egkeepunan dan dà se ebpenudtul wey ebpemineg dut te penurù ne iyan dan pà merineg.)

<sup>22</sup> Rutun ne mid-itindeg si Pablo riyà te etuvangan te minge kunsiyal ne nevrurun ketà ne migkahi te, "Sikiyu ne minge etew te Etenas, netuusan ku ne ebpengarap kew iya te merakel ne minge diwata.

<sup>23</sup> Su gewii ku te kedlauglaug kayi te inged niyu ne nengekita ku ini se ed-erapen niyu. Ne ruen seveka dema ne ebpengarapen niyu ne nekita ku ne duen insurat ketà ne lalag ne egkahi te, 'Ini se ebpengarapan ne Eleteala ne warà pà metueni.'

"Na," ke si Pablo, "ini se Eleteala ne ebpengarapen niyu ne misan warà niyu pà metueni, ne ini iya ke ibpesabut ku keniyu.

<sup>24</sup> Su ini iya ke Eleteala ne midlimbag te dunya wey ke langun ne neketahù kayi. Sikandin ke Kerenan ne ebayàbayà te langit wey tanà ne warà med-ubpà kayi te minge baley ne ebpengeningeniyar ne mibeelan dà te etew,

<sup>25</sup> ne geina te warà kurang din ne warà misan engkey ne neveelan te etew ne ruen atag din diyà te kandin," ke si Pablo, "su sikandin se ebehey te hinawa wey umur wey langun taman dut te langun ne minge etew.

<sup>26</sup> Su sikandin ke midlimbag te meama ne arà ke neuna ne etew ne ebpuunan dut te langun ne minge etew ne impeubpà din kayi te te ampew te dunya. Ne pinedsinggey rin neraan ke hewii te ked-ubpà te minge etew kayi wey ke edtemanan te ed-ubpaan tew.

<sup>27</sup> Mibeelan din ini su apey ebpemengà dan kandin ne kalu ke egketuen dan ded sikandin gewii te ebpemengà dan. Ini se Eleteala," ke si Pablo, "ne kenà meriyù dut te langun tew.

<sup>28</sup> Su

'Ini se umur tew wey kebpekewalengwaleng

wey kebpekepegitung tew

ne impepevayà te kandin ne gehem.'

Iring te nekahi rut te senge etew keniyu ne metau ne ebpemayuk ne migkahi te,

'Sikitew rema ne minge anak din.'

<sup>29</sup> "Ne geina te minge anak kiyu te Eleteala ne iring kiyu kandin. Ne embiya iring ketà, ne kenà tew ebpegitungen te Eleteala ne iring te paras te seveka ne ledawan ne mibeelan ne bulawan etawa pirak etawa batu ne mideyeyanan te etew ne metau.

<sup>30</sup> Rengan te warà pà sikandin metueni te minge menusiya, ne warà din itahù te hinawa arà se meraat ne ed-ul-ulaan. Ugaïd ne guntaanì ne ruen en suhù din te ebpeengkeran dut te langun ne etew te piya engkey ne meraat ne ed-ul-ulaan din.

<sup>31</sup> Su ruen en intail te Eleteala ne hewii keuremà te edtimbangen din ke langun ne menusiya. Ne metidtu se kedtimbang kayi ne etew ne nepemilì din ne edtimbang. Ne impekilala rin dut te langun ne etew te ini se nepemilì din su mibanew rin."

<sup>32</sup> Guna su nerineg dan ini se nekahi ni Pablo mekeatag te kegkevanew dut te minatey, ne ruen duma ne midsumpalit. Ugaïd ne ruen dema migkahi te, "Iguesuat dey pà maa te ebpemineg te kedseyseya nu mekeatag kayi."

<sup>33</sup> Ketà ne mid-awà si Pablo dut te nevrurun.

<sup>34</sup> Duen minge etew ketà ne mibperetiyyaya ki Hisus ne miduma ki Pablo. Iyan si Dionisio ne senge etew rut te kunsiyal, elin dema ini se meritan ne ed-ingaranan ki Demaris, wey ruen pà duma ne mibperetiyyaya ketà.

## 18

### *Si Pablo Riyà te Inged ne Kurintu*

<sup>1</sup> Guna su nekeipus si Pablo se ebpenurù ne mid-awà sikandin kayi te inged ne Etenas ne mibpendiyà te inged ne Kurintu.

<sup>2</sup> Rutun ne neuma rin arà se tiwaley ne Hudiyanen ne si Ekila ki Priscila ke esawa rin, ne riyà ebpuun te inged ne Puntus. Behu ran pà ne nekeuma egenat te inged ne Italiya su ruen ureding dut te mepurù ne egkamal ketà, ne si Claudio, te ibpeawà diyà te inged ne Ruma lusud te Italiya ke langun ne menge Hudiyanen. Ne mibpendiyà si Pablo te kandan su ebpenumbaley,

<sup>3</sup> ne mid-ubpà ketà ne mid-amur te helevek dan se nerineg din se megidsan se helevek dan dut te kandin dema ne helevek su ebpembaal dan te ibevaley ne manteylukù.

<sup>4</sup> Ne uman Hewii te Id-imeley ne mibpendiyà si Pablo te baley ne ebpengedian te menge Hudiyanen ke penduan dan su ebpekidlalag te menge etew ketà su apay ebpekeperetiya ki Hisus ke menge Hudiyanen wey ke menge Gerisiyanen dutun.

<sup>5</sup> Ne ketà te nekeuma ensi Silas ki Timoteo te riyà ebpuun te Mesidunya, ne iyan ibpeuna ni Pablo ne helevek din se ed-epunà sikandin se ebpesabut te Meupiya ne Tudtul su mid-ey-eyaran din te eguhud diyà te menge Hudiyanen te si Hisus ke Impasad te Eleteala ne Ebperetuen te langun.

<sup>6</sup> Ugaid ne guna su warà dan meberpetiyaya su edsumpalit dà kandin, ne mibpendagdag din ke lipupuk kayi te belegkas din ne tuus te ibpesabut din kandan te kenè en kilid kandin ketà te hewii ne kedtimbang te Eleteala kandan ne migkahi te, “Embiya kenà kew egkiyug ne ebpekeliyu rut te kedusa te Eleteala atag te salà niyu, ne sikiyu rà! Su kenè en kilid kediey! Su guntaani ne ebpendiyà ad te menge kenà Hudiyanen.”

<sup>7</sup> Mid-awà ketà si Pablo dut te baley ne ebpengedian te menge Hudiyanen te penduan dan ne diyà mid-ubpà te baley te senge etew ne kenà Hudiyanen ne si Tito Justo ne ebpengarap dema te Eleteala. Ini se baley rin ne sepiring dut te baley ne ebpengedian te menge Hudiyanen.

<sup>8</sup> Ne si Crispo, ke egkeunutan dut te baley ne ebpengedian te menge Hudiyanen, abpeg ke menge emurà diyà te baley rin ne mibperetiya te Kerenan. Ne ruen merakel ketà te inged ne Kurintu ne nekerineg te Meupiya ne Tudtul ne mibperetiya wey mibunyahan dan.

<sup>9</sup> Senge kerukileman ketà ne mibpekita ki Kerenan ki Pablo se egkahi te, “Kenà ka egkeandek! Kenà ka ed-engked se ebpesabut te Lalag ku, ugaid ne iseg ka.

<sup>10</sup> Su eduma a kenikew,” ke sikandin. “Warà misan engkey ne ebpekekaid kenikew, ne ruen merakel pà ne menge etew kayi te inged ini ne ebpekeperetiya kediey.”

<sup>11</sup> Ne ketà ne riyà mid-ubpà si Pablo te inged ne Kurintu taman te senge rahun wey enem ne vulan se ebpenurù te Lalag te Eleteala dut te menge etew.

<sup>12</sup> Guna su iyan en gubinedur ne si Galio diyà te inged ne Gerisiya, ne midseveka ke menge Hudiyanen ne midsigkem dan si Pablo ne impeetuvang dan te kukuman.

<sup>13</sup> “Ini ne etew,” ke sikandan, “ne ibpengarap din te Eleteala ini se menge etew te ralan ne ebpekesurang dut te penduan ta.”

<sup>14</sup> Guna su edlalag en perem si Pablo ne migkahi si Galyu diyà te menge Hudiyanen te, “Embiya ini se id-isuhat niyu kandin ne mekeatag te rekela ne linasa rin etawa sala din, ne edait ne ebperineg a keniyu.

<sup>15</sup> Ugaid ne geina te ebpekid-apul kew rà mekeatag te menge lalag wey menge ngaran wey mekeatag te penduan te sikiyu ne menge Hudiyanen, ne iyan kew rà kukum. Su kenà a iyan egkukum te iring dutun.”

<sup>16</sup> Ne ketà ne impelihawang dan en diyà te kukuman.

<sup>17</sup> Ne arà se kenà Hudiyanen dutun, ne migeweran dan si Sustinas, ke egkeunutan dut te baley ne ebpengedian te menge Hudiyanen, ne midruug dan sikandin diyà te etuvangan te kukuman. Ugaid ne ini ne warà sehippa ni Galyu.

*Midlived si Pablo diyà te Inged ne Antiyuka*

<sup>18</sup> Ne merakel pà ne hewii se kineubpà ni Pablo diyà te menge mibperetiya ne riyà te inged ne Kurintu. Ketà ne mibpemehetew sikandin dut te menge mibperetiya dutun ne arà pà ne migentan abpeg ki Priscila wey Ekila se ebpendiyà te inged ne Siriya. Ne te warà den pà med-untud te kapal diyà te inged ne Singkiriya, ne mibpetevungew si Pablo ne tuus te ruen impasad din diyà te Eleteala ne netuman din en.

<sup>19</sup> Nekeuma ran diyà te inged ne Ipisu ne ketà pà med-ubpà si Priscila ki Akila. Ugaid ne mid-awet dà si Pablo kayi, ne mibpendiyà te baley ne ebpengedian te menge Hudiyanen te penduan dan ne mibpekidlalag dut te menge Hudiyanen ketà.

<sup>20</sup> Ne mibpemuyù ke menge mibperetiya ketà te ed-ubpà pà sikandin dutun, ugaid ne warà mibperineg si Pablo.

<sup>21</sup> Ne dutun te kegenat din ne migkahi rin te, “Embiya idtuhut te Eleteala ne edlived a kayi te keniyu.” Ne ketà ne mid-untud en te kapal ne mid-awà kayi te inged ne Ipisu.

<sup>22</sup> Guna su nekeuma si Pablo diyà te inged ne Sisariya, ne midlaus diyà te inged ne Hirusalim su ebpenumbaley riyà te minge mibperetiyyaya ki Hisus dutun. Ne ketà ne mid-uli diyà te inged ne Antiyuka.

<sup>23</sup> Warà meuhet ketà ne migenat sikandin ne kayi ebpevyà te minge pruvinsiya te Gelasiya wey Perigiya. Ne mibag-et din ke kebperetiyyaya rut te langun ne minge mibperetiyyaya ketà ne minge inged.

*Mibpendiyà si Epulus te minge Inged ne Ipisu wey Kurintu*

<sup>24</sup> Ne riyà te inged ne Ipisu ne ruen nekeuma riyà ebpuun te inged ne Elihandriya ne senge etew ne Hudiyanen ne ed-ingaranan ki Apulus. Metau ne edlalag ne metau rema ne edseyse te insurat ne Lalag te Eleteala.

<sup>25</sup> Neey-eyaran sikandin te ebpenurù mekeatag te penurù ni Hisus ke Kerenan. Ne mevag-et sikandin ne midlalag, ne nekesuhat se kebpenurù din mekeatag ki Hisus, ugaid ne iyan din dà netuenan ne arà se kebnyag ni Juan.

<sup>26</sup> Ne ketà te kebpenurù din diyà te baley ne ebpedgian te minge Hudiyanen ne kenà edsanggal se edlalag. Nering ni Priscila wey Akila ini se kebpenurù din, ne nesebutan dan te ruen pà warà din metueni. Ne miduma ran sikandin diyà te baley ran ne mibpenurù dan sikandin mekeatag dut te penurù ni Hisus ne warà din pà metueni.

<sup>27</sup> Ne ketà ne netahù te itungan din se ebpendiyà te inged ne Gerisiya. Ne midtevang an sikandin dut te minge mibperetiyyaya diyà te inged ne Ipisu su midsuratan dan arà se minge mibperetiyyaya ne riyà te Gerisiya se ebuyù te eghelawen dan sikandin. Guna su nekeuma sikandin diyà te Gerisiya, ne ruen mibperetiyyaya ki Hisus su atag te kegkeyru te Eleteala kandan, ne dekelà se neketavang din kandan dut te kebpenurù din.

<sup>28</sup> Ne iyan din kebpeketavang ne midtevanan arà se minge Hudiyanen ne ebpekid-apul kandin. Su mevaher se kebpesabut din te ke insurat ne Lalag te Eleteala ne tuus te si Hisus ke Impasad te Eleteala ne Ebperetuen te langun.

## 19

*Mibpendiyà si Pablo te Inged ne Ipisu*

<sup>1</sup> Ne gewii te riyà si Apulus te inged ne Kurintu, ne mibpevyà si Pablo diyà te taneb se ebpendiyà te inged ne Ipisu. Ne riyà te Ipisu ne neuma rin arà te minge mibperetiyyaya ki Hisus

<sup>2</sup> ne mid-insaan din sikandan te, “Maa neketelimà kew en te kedlumun te Kedesenan ne Ebpetuntul te Menusiya dut te hewii ne kineperetiyyaya niyu ki Hisus?”

Ne migkahi ran te, “Warà. Su warà dey pà merineg se ruen Kedesenan ne Ebpetuntul te Menusiya.”

<sup>3</sup> Ne ke si Pablo te, “Engkey se impenurù keniyu ketà te kinebunyahi keniyu?”

“Ke meana rin ne ke kebnyag ne nekahi ni Juan ke ebpebunyag,” ke sikandan.

<sup>4</sup> Ne ke si Pablo te, “Iyan impenurù ni Juan mekeatag te kebnyag ne tuus te mibpendsendit wey mid-engked dan te meraat ne ed-ul-ulaan. Ne impenurù dema ni Juan te minge kevuwaran ni Israyil se mebperetiyyaya ran dut te ebpeketundug kandin ne si Hisus.”

<sup>5</sup> Guna su nering dan arà, ne mibunyahan dan se tuus te mibpesakup dan te Kerenan ne si Hisus.

<sup>6</sup> Ne ketà te indampen ni Pablo ke belad din kandan ne midlumun kandan ke Kedesenan ne Ebpetuntul te Menusiya ne nekelalag dan te minge kinehiyan ne kenà kandan wey impayag dan arà se impesabut kandan te Eleteala.

<sup>7</sup> Minge sepulù dan wey deruwa ne etew.

<sup>8</sup> Ne lusud te tetelu ne vulan ne mibpendiyà si Pablo te baley ne ebpedgian te minge Hudiyanen te penduan dan ne kenà edsanggal ke kebpekidlalag din kandan. Ne merakel se ibpetuus din mekeatag te Edetuan te Eleteala te minge etew su apey ruen ebperetiyyaya ne ebpekelusud ketà.

<sup>9</sup> Ugaid ne ruen duma ne meresen se ulu rin ne kenà ebperetiyyaya, ne midlalag te meraat mekeatag te penurù te Kerenan tew diyà te etuvangan te minge etew ne nevrurun ketà. Dutun ne mid-awà si Pablo kandan ne miduma rin ke minge mibperetiyyaya ki Hisus ne uman gewii ne ebpenurù sikandin dut te minge etew riyà te sungkù te baley ne ebpenuruan ni Tiranu.

<sup>10</sup> Ne lusud te deruwa ne rahun ne arà se mid-ulaula rin, ne in-eneb din se ebpesabut ke Lalag te Eleteala diyà te langun ne minge Hudiyanen wey kenà Hudiyanen ne ed-ubpà ketà te lusud te pruvinsiya ne Asiya.

*Ebpenegseg Perem te Vusew ini se Menge Anak ni Iskiba*

<sup>11</sup> Gewii te ed-ubpà ketà si Pablo, ne mibaal ke Eleteala te merakel ne ed-ul-ulaan ne mekegeyip ibepevayà ki Pablo.

<sup>12</sup> Su misan tubew wey tuwalya ne in-usar ni Pablo ne ed-ewiten dan diyà te menge ederaru wey midsuukan te vusew, ne nengeulian.

<sup>13</sup> Ne ruen duma ne menge Hudiyanen ne ebpenipanew su ebawì te menge etew ne midsuukan te busew. Ne netahù te itungan dan te egeraman dan te ebawì arà se midsuukan te vusew te edreviten dan ke ngaran ni Hisus ke Kerenan. Ketà ne migkahi ran diyà te menge vusew te, "Egkehiyan ku sikiyu ne ibepevayà dut te gehem te ngaran ni Hisus ke Kerenan ne impesabut ni Pablo, awai niyu an se midsuukan niyu."

<sup>14</sup> Ini se mid-ulaula kayi ne ke pitu ne etew ne menge anak dut te seveka ne mepurù dut te menge terebpepengesa te menge Hudiyanen ne ed-ingaranan ki Iskiba.

<sup>15</sup> Ketà ne migkahi arà se busew ne midsuuk dut te etew te, "Netuenan ku si Hisus ne netuenan ku rema ini se etew ne Pablo, ugaid ne sikiyu ne engkey se midsuhù keniyu?"

<sup>16</sup> Ne ketà ne mid-urambak en kandan arà se etew ne midsuukan te vusew wey mibpekesekitan din sikandin ne nengevindas en ke menge belegkas dan. Ne mibpelelahuy ran egenat dutun te valey se nengeluungan wey nengepelian.

<sup>17</sup> Guna su nerineg ini dut te menge Hudiyanen wey ke kenà Hudiyanen diyà te inged ne Ipisu, ne migkerker dan langun te kegkeandek dan ne mid-iseg se ked-adat dan dut te ngaran te Kerenan tew ne si Hisus.

<sup>18</sup> Ne merakel dut te menge mibperetiyya ketà ne nevurun ne ebpenudtul te nekedsendit dan en dut te meraat ne mid-ulaula ran wey mid-engkeran dan en.

<sup>19</sup> Ne iring ketà dema ne ruen etew ne metau ne edlambus ne mid-ewit te menge riberù dan te kebaal te kedlambus ne mibinsulan dan dutun te etuvangan te menge etew. Ne mibirang dan ke elehà dut te menge riberù ne lelima nepulù ne ngivu ne pirak se elehà din.

<sup>20</sup> Ne ketà te arà ne ned-ulaula, ne mid-iseg ke kebpsesabut dut te lalag te Kerenan wey neumanan pà ke menge mibperetiyya.

*Ke Kegkehuvut Diyà te Inged ne Ipisu*

<sup>21</sup> Ne rutun ne netahù te itungan ni Pablo te ebpendiyà te menge pruvinsiya te Mesidunya wey Gerisiya ne edlaus diyà te inged ne Hirusalim. "Embiya ebpekeipus ad diyà," ke sikandin, "ne ebpendiyà a maa te inged ne Ruma."

<sup>22</sup> Ketà ne impeuna rin diyà te Mesidunya arà se deruwa ne ruma rin, si Timoteo ki Erastu, ne dutun ne diyà pà sikandin te pruvinsiya te Asiya.

<sup>23</sup> Ne gewii te riyan en sikandin te inged ne Ipisu lusud te Asiya, ne ruen dekelà ne huvut dutun su atag dut te penurù ni Hisus ke Kerenan.

<sup>24</sup> Su ruen ketà senge etew ne pandey ne mid-ingaranan ki Dimitriyu ne ebpemaal te rereisek ne menge baley ne pirak iring dut te paras te baley ne ebpengerapan te diwata ran ne si Diana. Ne dekelà se pentiyari rin ne engketà ded dema ke menge etew ne migelevek diyà te kandin te keppendahang kayi.

<sup>25</sup> Ne miburun din arà se egelevek diyà te kandin abpeg dut te menge etew ne idsan dut te helevek din. Ne migkahi te, "Sikiyu ne menge ruma ku, netuenan niyu se mid-iseg ini se pentiyari tew kayi te helevek tew ini.

<sup>26</sup> Ne nekita niyu wey nerineg niyu ini se mibeelan kayi te etew ini ne ed-ingaranan ki Pablo su impenurù din te ini se menge ledawan ne mibeelan te menge etew rà ne kenà ke tidtu ne Eleteala. Ne merakel en se mibperetiyya te ini se penurù din, ne kenà kayi rà te inged ne Ipisu su riyà te langun ne lusud te Asiya.

<sup>27</sup> Ketà ne kalu ke edsudian en te menge etew ini se helevek tew ne egkeenged en ini se pentiyari tew," ke sikandin. "Ne kenà ketà dà taman su kalu ke ini se baley ne ebpengerapan dut te diwata tew ne si Diana ne warè en ed-adat ne menge etew. Guntaani ne hewii ne si Diana se ebpengerapen dut te langun ne menge etew kayi te lusud te Asiya wey langun ne lusud te dunya, ugaid ne kalu ke egkeawà ke pekinegan din."

<sup>28</sup> Nerineg dà dut te menge etew ne nevurun ketà ini se lalag ni Dimitriyu, ne ingkeepes dan nevenar ensi Pablo. Ne mibpememensag dan te, "Ed-edatan nevenar si Diana kayi te inged ne Ipisu!"

<sup>29</sup> Ne nekeeneb en ini se lalag ni Dimitriyu diyà te lusud te Ipisu, ne dutun ne nengeepes ke menge etew ne nehuvut en. Ne midsigkem dan si Gayu wey si Eristarku, ini se deruwa ne riyà ebpuun te Mesidunya ne miduma ki Pablo, ne mid-ewit dan diyà te meluag ne egkevurunan te menge etew dut te inged.

<sup>30</sup> Ne si Pablo ne ebpendiyà perem te egkevurunan, ugaid ne warà tuhuti dut te menge ruma rin ne mibperetiyya.

<sup>31</sup> Ne duen duma ne egkeunutan kayi te pruvinsiya ne nekekilala kandin ne ruen midsuhù dan te ebuyù te kenà sikandin ibpendiyà te egkevurunan.

<sup>32</sup> Ne ketà te egkevurunan ne warà kebpekerinegrineg dan. Su ruen egkuleyì diyà, ne ruen ebpemensag kayi, misan ke kerekelan ne etew ketà ne warà dan metueni arà se egkevurunan dan.

<sup>33</sup> Ruen duma ne menge etew ne iyan dan kunaan ne si Alejandro se ebpuunan dut te kinekevurun dan su sikandin ke impeetuvang te menge Hudiyanen. Ne migkayew si Alejandro te belad din te edlalag su ruen idseysey rin ne ibpetuus din te kenà diyà te kandin se puunan kayi te ini se kevurunan.

<sup>34</sup> Ugaid ne netuenan dan ne Hudiyanen sikandin ne mid-ilut dan se ebpememensag te, “Ed-edatan nevenar si Diana kayi te inged ne Ipisu!” Ne lusud te deruwa ne uras arà se kebpememensag dan.

<sup>35</sup> Netaman ketà ne ke beredsurat dut te inged ne nepeengked din ded ke menge etew ne nevrun ketà. “Menge ruma ku kayi te Ipisu,” ke sikandin, “netuenan te langun ne menge etew te sikami kayi te inged ne Ipisu se ebantey dut te baley ne ebpergerapan te mepurù ne diwata tew ne si Diana wey ini se berekat ne ledawan ne batu ne neulug ebpuun te langit.

<sup>36</sup> Warà etew ne ebpekekahi te kenà benar ini. Tembù be peeneng-eneng kew ne pegitunga niyu neraan ke engkey se ed-ul-ulaan niyu.

<sup>37</sup> Su meambe ke mid-ewit niyu ini se menge etew ne warà dan mibpenakew diyà te menge baley ne ebpergerapan te diwata tew, ne warà dan dema sumpelita ke diwata tew ne si Diana.

<sup>38</sup> Embiya ruen id-isuhat eni Dimitriyu ne ruen hewii ne intail te egkukum ne ruen perekukum ne dait ne riyà dan idsumbung.

<sup>39</sup> Ugaid ne embiya ruen ruma pà ne egkukumen, ne egkukumen arà diyà te netail ne kegkevurun te menge etew dut te inged.

<sup>40</sup> Su kalu ke iyan ki egkesuhat te nehuvut ini ne ned-ulaula guntaan. Ne warà kewagib ta te ini ne ned-ulaula.”

<sup>41</sup> Nekahi rin arà ne impeulì din ke menge etew.

## 20

### *Ke Kebpendiyà ni Pablo te Menge Inged ne Mesidunya wey Gerisiya*

<sup>1</sup> Guna su neengked en ke nehuvut, ne miburun ni Pablo ke menge mibperetiyaya ki Hisus ne mibpesabut din su apey mevag-et ke kebperetiyaya ran. Ne ketà ne mibpemehetew sikandin ne migenat en se ebpendiyà te inged ne Mesidunya.

<sup>2</sup> Ne mibhevayà sikandin dut te menge inged ketà ne mibpesabut din ke menge mibperetiyaya su ibpevag-et din ke kebperetiyaya ran. Ne midlaus en diyà te inged ne Gerisiya

<sup>3</sup> ne dutun mid-ubpà te tetelu ne vulan. Ne guna su egenat en perem sikandin se ed-untud te kapal se ebpendiyà te inged ne Siriya ne ruen impayag kandin ne netahù te itungan dut te menge Hudiyanen se ebpeimetayan sikandin. Ketà ne nepegitung din se edlived te imbaya din te ebpendiyà te Mesidunya.

<sup>4</sup> Ne ruen miduma kandin si Supatir ke anak ni Piru ne riyà ebpuun te inged ne Beriya, elin dema si Eristarku wey si Segundo ne riyà ebpuun te inged ne Tiselunika, si Gayu ne riyà ebpuun te inged ne Dirbi, si Tikiku wey si Trupimu ne riyà ebpuun te pruvinsiya ne Asiya, wey si Timoteo.

<sup>5</sup> Ne mid-una ran diyà te inged ne Teruwas ne midteharan key ran diyà.

<sup>6</sup> Ne ketà te kegkeipus dut te Pista te Egkaan te pan ne warà Insawug ne Ibpelevag, ne mid-untud key te kapal diyà te inged ne Pilipus. Ne nekedlelima ne hewii ne nekeuma key diyà te inged ne Teruwas ne nesaut dey sikandan dutun, ne riyà key med-ubpà te senge pedian.

### *Ke Uriyan ne Kebpendiyà ni Pablo te Inged ne Teruwas*

<sup>7</sup> Ne guna su midsanlep en ke andew te hewii ne Sepetu ne miburun key ke menge mibperetiyaya ki Hisus su egkaan te pan ne mibpenevitevi en su ini ke kedtentenuri rey te kinepatey ni Hisus. Ne mibpesabut ni Pablo ke menge etew ne nevrun ketà taman te edluuk se kerukileman su ed-ipanew en sikandin dut te hewii ne edtungud.

<sup>8</sup> Ne ruen merakel ne sulù diyà te sungkù te iketelu ne pangkat dut te baley ne nevrunan dey.

<sup>9</sup> Ne ruen kenakan ne ed-ingaranan ki Yutiku ne riyà mebpinuu te sulawan. Ne geina te meuhet se kedlalag ni Pablo, ne edtureturen en si Yutiku ne netaman ne nekelipereng en ne neulug en diyà te tanà. Ne mibpemenaug ne mibitbit dan, ne minatey en.

<sup>10</sup> Ne mibpemenaug si Pablo ne midlengkevan din ne migkepkepan din ini se kenakan. “Kenà kew egkeuru,” ke si Pablo, “su neuyag en.”

<sup>11</sup> Ne ketà ne mibpemenayik si Pablo ne migkaan te mibpenevitevi ne pan. Ne meuhet pà se kebpekidlalag din kandan su taman te nepawà, arà pà ne migenat en.

<sup>12</sup> Ne arà se kenakan ne neuyag en, ne mid-ewit dan sikandin diyà te baley rin ne nehalew nevenar se hinawa ran.

*Ke Kebpendiyà ni Pablo te Inged ne Melitus*

<sup>13</sup> Ne mid-una key ki Pablo ne mid-untud te kapal se ependiyà te inged ne Asun su ruen neupakatan dey ne riyà dey ed-eweta sikandin ne langun dey ne ed-untud te kapal te edlaus. Su migkahi rin te ed-ipanew rà sikandin taman diyà te inged ne Asun.

<sup>14</sup> Guna su neneked-uma key diyà te inged ne Asun ne impeuntud dey sikandin, ne dutun ne midlaus key riyà te inged ne Mitilini.

<sup>15</sup> Ne dut te neketundug ne hewii ne mid-awet key rà te inged ne Kiyus ne ketà maa te neketundug ne hewii ne nekeuma key diyà te inged ne Melitus.

<sup>16</sup> Ne nepegitung ni Pablo te kenà key en ed-awet diyà te inged ne Ipisu lusud te Asiya su apey key kenà mevangan diyà te pruvinsiya ne Asiya. Egkerehusu si Pablo su iyan din igkesuat ne embiya egkepakey ne ebpekeuma sikandin diyà te inged ne Hirusalim te kenà pà egkeuma ke hewii te pista ne ed-ingaranan te Pintikusti.

*Kinpemehetew ni Pablo diyà te minge Pekilukesen dut te Menge Mibperetiyya diyà te inged ne Ipisu*

<sup>17</sup> Ugaid ne guna su nekeuma key diyà te inged ne Melitus ne impetawang ni Pablo ke minge pekilukesen dut te minge mibperetiyya diyà te inged ne Ipisu.

<sup>18</sup> Nekeuma ran ne migkehiyan din sikandan te, “Netuenan niyu ke engkey se mid-ulaula ku te langun ne hewii ku te kayi e pà te keniyu igenat te hewii ne nekeuma a kayi te pruvinsiya te Asiya.

<sup>19</sup> Su gelevek ku ke helevek ne insuhù te Kerenan kedì ne warà ku impereyüdeyù. Ne midtihs se luwà ku dut te meraat ne ed-ul-ulaan ne nekita ku te ruma ne etew,” ke sikandin. “Ne migelevek a lavew misan nerasey a su atag dut te mid-ulaula te minge Hudiyanen kediey.

<sup>20</sup> Netuenan niyu se in-amin ku keniyu ipesabut ke langun ne ebpeketavang keniyu. Ne impenurù ku keniyu diyà te kevrunan wey misan dema diyà te minge baley niyu.

<sup>21</sup> Hudiyanen se kenà Hudiyanen ne impesabut ku te langun se engkeri ran ke meraat ne ed-ul-ulaan dan wey ibehy ran ke hinawa ran te Eleteala wey ebperetiyya dut te Kerenan tew ne si Hisus.

<sup>22</sup> “Ne guntaani ne ebpendiyan a te inged ne Hirusalim su ini ke insuhù kediey te Kedesenan ne Ebpetuntul te Menusiya. Ne kenà ku egketuenan ke engkey se egketemanan ku riyà.

<sup>23</sup> Iyan ku rà netuenan ne impesabut kediey dut te Kedesenan ne Ebpetuntul te Menusiya te uman senge inged ne kebpekeuma ku ne egkevilanggu a wey merakel se kemerehenan ne edseharan ku.

<sup>24</sup> Ugaid ne kenà ku en egkenehunan ini se umur ku su apey ku egkepasad ini se helevek ne impehelevek kedì te Kerenan tew ne si Hisus ne ini se kebpesabut dut te Meupiya ne Tudtul mekeatag te kegkeyru keytew te Eleteala.

<sup>25</sup> “Midsihid a dut te langun niyu te kebpesabut mekeatag te edetuan dut te Eleteala ne minge etew. Ne guntaani ne netuenan ku te ini rà taman se kepemekedkita tew.

<sup>26</sup> Tembù be egkehiyan ku keniyu ke embiya ruen misan senge etew keniyu ne kenà ebpekeliyu dut te kedusa te Eleteala kandin, ne kenè en kilid kediey.

<sup>27</sup> Su in-amin ku keniyu ipesabut ke langun ne intahù te itungan te Eleteala ne ed-ul-ulaan.

<sup>28</sup> Bentayi niyu,” ke si Pablo, “ini se ed-ul-ulaan niyu wey tugenura niyu ke langun ne minge etew ne mibperetiyya ki Hisus ne insarig keniyu dut te Kedesenan ne Ebpetuntul te Menusiya. Ed-iring kew te tumetuganur te minge bilbili ne edtuguren niyu ke minge etew ne mibperetiyya te Eleteala su sakup dan te Eleteala egenat te kebpebpatey te Anak din su sabap dut te minge salà dan.

<sup>29</sup> Netuenan ku te embiya ed-ewaan ku en sikiyu ne ruen edlepew kayi te keniyu ne minge etew ne ederaat dan perem te kebperetiyya niyu su iring dan te mewalew ne asu ne ebpemsuwey dut te minge bilbili.

<sup>30</sup> Egkeuma se hewii ne misan minge ruma niyu red ne edlalag te tarù su apey ruen minge mibperetiyya ne mekeruma kandan.

<sup>31</sup> Tembù be uram kew ne kenà niyu lipati te lusud te tetelu ne rahun ne merukilem meandew ne mibpenurù a keniyu wey midtihs se luwà ku mekeatag keniyu.

<sup>32</sup> “Na,” ke si Pablo, “idsarig ku sikiyu riyà te Eleteala su sikandin se edtuganur keniyu. Ne ke lalag din mekeatag te limù din wey iru rin te minge etew se ebpeiseg te kebperetiyyaya niyu kandin. Ne embiyya edumaan niyu ini se lalag din, ne ebpeneuven kew te Eleteala su ini se ibehey rin te langun ne etew ne in-amin din ke hinawa rin te eduma kandin.

<sup>33</sup> Ne egkehiyen ku rema keniyu te warà a meima te kureta wey tamuk te piya engkey ne etew.

<sup>34</sup> Su netueanan niyu langun te migelevek a te mevaher su apey ruen kureta ne igkepemasa te kurang dey te minge ruma ku.

<sup>35</sup> Arà se mevaher ne migelevek ku,” ke si Pablo, “ne impekita ku keniyu se mebpegelep kew rema su apey ruen ibpeketavang tew te minge ayuayu su edtentenuran tew ke minge lalag te Kerenan tew ne si Hisus ne migkahi te, ‘Ke etew ne ebehey te tavang, ne dekelà pà se kegkehalew rin dut te etew ne edtelimà te tavang.’ ”

<sup>36</sup> Guna su nekeipus si Pablo se edlalag ne mibpenimbuel sikandin abpeg ke ruma ne minge mibperetiyyaya ne mibpengeringeni sikandin te Eleteala.

<sup>37</sup> Ne ketà te kebperemetew rin ne nenekesinehew ran ne migkepkepan dan si Pablo wey mid-erekan dan.

<sup>38</sup> Iyan dan ibmerungkug ne arà se lalag din ne kenà dan en ebperemegekita. Ketà ne midumaan dan sikandin taman diyà te kapal.

## 21

### *Mibpendiyà si Pablo te Inged ne Hirusalim*

<sup>1</sup> Mid-ewaan dey ketà ke minge etew, ne mid-untud key en te kapal ne migenat. Ne midtilandeng dey se kebaya dey ne nekeuma key riyà te inged ne Kus. Ne ke neketundug ne hewii ne nekeuma key riyà te inged ne Rudas ne egenat ketà ne midlaus key diyà te inged ne Petara.

<sup>2</sup> Ketà ne ruen kapal ne ebpendiyà te inged ne Pinisiya lusud te Siriya ne mid-untud key ketà.

<sup>3</sup> Ne midsehid dey ke punul ne Sipriyu, ugaid ne mibpevayà key kayi te egkehiyang ne midlaus key riyà te inged ne Tiru lusud te Siriya. Nekerunggù key ketà su ibpenrenà dan ke ruran te kapal ne mibpemenaug key.

<sup>4</sup> Ne rutun ne ruen minge mibperetiyyaya ne nevalak dey ne mid-ubpà key riyà te kandan lusud te senge pedian. Ne ruen impayag kandan dut te Kedesenan ne Ebpetuntul te Menusiya ne egketamanan ni Pablo, ne migkahi ran kandin te kenà sikandin ibpelaus diyà te inged ne Hirusalim.

<sup>5</sup> Ugaid ne guna su neuma en ke hewii te ked-ipanew rey rutun, ne migenat key en. Ne langun ne minge mibperetiyyaya meama se meritan, abpeg te minge anak dan, se miduma kenami taman diyà te beyvey te rahat ne mibpenimbuel key se ebperengerineni te Eleteala.

<sup>6</sup> Ketà ne mibperemetetawey key ne mid-untud key en te kapal, ugaid sikandan ne mid-uli dan en.

<sup>7</sup> Ne mid-ewaan dey ini se inged ne Tiru ne midlaus key en ne nekerunggù key diyà te inged ne Tulemeyda. Ne mibpenumbelayan dey ke minge mibperetiyyaya te ketà ne inged ne diyà key med-ubpà te senge hewii.

<sup>8</sup> Ne dut ke neketundug ne hewii ne mid-awà key se edlayag ne nekerunggù key diyà te inged ne Sisariya. Ne riyà key mid-ubpà te baley ni Felipe, senge etew ne mibpesabut te Meupiya ne Tudul mekeatag ki Hisus, ne seveka sikandin dut te pitu ne etew ne meama ne nepemili dan diyà te Hirusalim ne ed-amung te helevek diyà.

<sup>9</sup> Ne ruen epat ne minge anak din ne raha ne mibehayan te Eleteala te helevek te ebpayag dut te Lalag te Eleteala diyà te minge etew.

<sup>10</sup> Guna su nekepipira en ne hewii se ked-ubpà dey riyà ne ruen nekeuma ne senge etew ne ebperelambas te Lalag te Eleteala ne ed-ingaranan ki Egebu ne riyà ebpuun te inged ne Hudiya.

<sup>11</sup> Nekeuma rà kayi te kenami ne migkuwa rin en ke sebitan ni Pablo ne impevakù din en te paa rin wey belad din. Ne migkahi te, “Impesabut kenitew rut te Kedesenan ne Ebpetuntul te Menusiya te ini se kemuney kayi te sebitan ne iring kayi te kebekua kandin dut te minge Hudiyanen diyà te Hirusalim su ibpalad dan sikandin diyà te minge kenà Hudiyanen te ed-ul-ulaan dan kandin ke kiyug dan.”

<sup>12</sup> Ne guna su nerineg dey arà, ne sikami wey ke minge mibperetiyyaya dutun ne mibuyù dey ki Pablo te kenà sikandin ebperelusen diyà te Hirusalim.

<sup>13</sup> Ugaid ne migkahi rin te, “Meambe ke ebpeninehew kew se ebpekevehey kedì te kegekeuru? Su embiya idtuhut en ini te Kerenan tew ne si Hisus ne egketemaman ku kayi te kegelevek ku kandin ne idselakan ku en te kenà kebekua rà kediey su piya edimetayan e pà diyà.”

<sup>14</sup> Ne guna su kenà dey egkevangan si Pablo ne migkahi key te, “Berekat ne iyan egketuman se kiyug te Kerenan.”

<sup>15</sup> Guna su nekebpipira en ne hewii se ked-ubpà dey ketà ne mibpenines key en ne migenat key se ebpendiyà te Hirusalim.

<sup>16</sup> Ne ruen menge mibperetiyaya ketà te inged ne Sisariya se miduma kenami te ebpendiyà te Hirusalim su in-ated key ran diyà te baley ni Menasun ne egkeubpaan dey. Senge etew sikandin ne riyà ebpuun te inged ne Sipriyu ne seveka sikandin dut te nengeuna ne mibperetiyaya ki Hisus.

*Mibpekibalak si Pablo ki Santiago riyà te Hirusalim*

<sup>17</sup> Ketà te kebbekeuma rey diyà te Hirusalim ne nengehalewhalew ke menge mibperetiyaya dut te kebbekeuma rey.

<sup>18</sup> Ne dut te neketundug ne hewii ne miduma kenami si Pablo se ebpendiyà te baley ni Santiago su ebpekibalak kandin ne ketà dema ke menge pekilukesen dut te menge mibperetiyaya.

<sup>19</sup> Mibpenginginsà si Pablo kandan te, “Engkey red se egketemaman niyu?” Ne dutun ne mibpenudul din ke langun ne mibpeveelan te Eleleala kandin diyà te menge etew ne kenà Hudiyanen.

<sup>20</sup> Neringe dan ini se tudtul ni Pablo ne mideyù dan te Eleleala. Ne migkehiyan dan si Pablo te, “Netuenan nu, suled, te medmerakel en se menge ruma tew ne Hudiyanen ne mibperetiyaya ki Hisus, ne langun dan ne meilut se kedtuman dan te penduan ne intetahak ni Moises.

<sup>21</sup> Ne neringe dan arà se tudtul ne ruen kun penurù nu te menge Hudiyanen ne ed-ubpà riyà te kenà Hudiyanen se engkeri ran te edtuman ke penduan ne intetahak ni Moises. Su impenurù nu kun te kenà dan en ebpeetusan ke menge anak dan.

<sup>22</sup> Na engkey embe imbe ini? Su egkerineg dan iya te nekeuma ke en.

<sup>23</sup> Iyan meupiya ne edumaan nu ini se egkehiyan ku. Su ruen epat ne menge meama kayi ne ruen impasad dan te Eleleala iring dut te betasan tew.

<sup>24</sup> Duma ka kandan diyà te Nekebpuru ne Valey te Eleleala ne amung ka te kedtumana dut te edtenuran ne betasan tew te menge Hudiyanen mekeatag te kedlùlù. Iyan ka bayad dut te ibpelengesa ran ne ibehy te Eleleala su apey ran ebpekepetevungew. Embiya ed-ul-ulaan nu ini, ne egketuenan te langun ne menge etew te kenà benar arà se tudtul ne neringe dan mekeatag kenikew ne egketuenan dan te meilut dema se kedtumana nu te penduan ni Moises.

<sup>25</sup> Ugaid ne ini se menge kenà Hudiyanen ne mibperetiyaya ki Hisus, ne ruen surat ne impeewit dey diyà te kandan se ebpesabut kandan te kenà dan megkaan te egkeenen ne indawey su inrenà ne siparat diyà te ledawan. Ne kenà dan megkaan te binatang ne ebpekelen dà, ne kenà dan megkaan te lengesa, wey kenà dan dema mebpengingniyug.”

<sup>26</sup> Ne ketà te neketundug ne hewii ne miduma ni Pablo arà se menge meama ne mid-amung sikandin dut te kedtumana te edtenuran ne betasan te menge Hudiyanen mekeatag te kedlùlù te kenà den pà edlusud te Nekebpuru ne Baley te Eleleala. Ne dutun ne midlusud si Pablo su ebpenudul dut te menge terebpepengesa te pira ne hewii se kegkeipus dut te edtenuran dan ne betasan mekeatag te kedlùlù su embiya egkeipus en ne uman senge etew kandan ne ruen ibpelengesa rin ne ibehy te Eleleala.

*Ke kedsigkem ki Pablo diyà te Nekebpuru ne Valey te Eleleala diyà te Hirusalim*

<sup>27</sup> Ne guna su mehaan en egkeipus ke pitu ne hewii dut te edtenuran dan ne betasan mekeatag te kedlùlù ne ruen menge Hudiyanen ne riyà ebpuun te Asiya ne nekekita ki Pablo diyà te Nekebpuru ne Valey te Eleleala. Ne mibaal dan te kegkeepes dut te merakel ne etew ne nevrun ketà ne midsigkem dan si Pablo.

<sup>28</sup> Ne mibpememensag dan te, “Sikiyu ne menge ruma rey ne Hudiyanen, tevangi key su ini ne etew ne in-eneb din ke penurù din te menge etew te misan endei ne inged. Ne ebpekesurang ini se impenurù din te langun ne menge Hudiyanen wey ke penduan ni Moises wey misan ini se Nekebpuru ne Valey te Eleleala. Ne guntaani ne impelusud din en kayi te Nekebpuru ne Valey ini se kenà menge Hudiyanen ne egkeredsikan en.” (

<sup>29</sup> Tembù migkahi ran ini su nekita ran si Trupimu ne riyà ebpuun te Ipisu ne kenà Hudiyanen se ruma ni Pablo dutun te inged. Kunaan dan ke miduma ni Pablo te edlusud kayi te Nekebpuru ne Valey te Eleleala.)



<sup>30</sup> Ini ne ingkeepes dut te langun ne minge etew dutun te inged ne Hirusalim ne nengevurun dan ne midsigkem dan si Pablo ne miguyud dan diyà te liyu ne midlekevan dan ke gumawan dut te Nekebpuru ne Valey te Eleteala.

<sup>31</sup> Ne ed-imetayan dan perem sikandin, ugaid ne ruen nekepenudtul diyà te mepurù te minge sundaru ne Rumanu te egkehuvut ke langun ne minge etew diyà te inged ne Hirusalim.

<sup>32</sup> Arà dà ne midtawag dut te mepurù ini se minge kepitan wey minge sundaru rin ne migaangaan dan se ebpendiyà dut te minge etew ne nevurun. Guna su nekita rut te minge etew ini se mepurù wey ke minge sundaru rin, ne mid-engked dan se ebadas ki Pablo.

<sup>33</sup> Ne mid-uvay ini se mepurù ki Pablo ne midsigkem din ne impevakù din te deruwa ne sengkali. Ketà ne mid-insaan din ke minge etew te, "Engkey ini etawa ne engkey se salà din?"

<sup>34</sup> Ne mibpememensag te edtavak arà se minge etew, ugaid ne kenà ebpemegayun ke lalag dan. Meilut se kebmehurub dan, tembù be kenà egketuenan dut te mepurù te minge sundaru ke engkey se ned-ulaula ini. Ne ketà ne insuhù te minge sundaru rin te ibpeewit si Pablo kandan diyà te baher dan.

<sup>35</sup> Nekeuma ran diyà te eheran te baher dan, ne mibitbit dan en si Pablo su kenà dan egkeeren ke minge etew.

<sup>36</sup> Su ed-ehawen dan perem si Pablo se ebpememensag te, "Ed-imetayan tew!"

*Mid-itindehan ni Pablo ke Kewagib din diyà te Etuvangan te Menge Etew*

<sup>37</sup> Dutun ne idlusud en perem dut te minge sundaru si Pablo diyà te baher dan ne migkehiyan din ke mepurù te sundaru te, "Engkey, egkepakey red be ke ruen idlalag ku kenikew?"

Migkahi ini se mepurù te minge sundaru te, "Menu, metau ke ves te edlalag te kinehiyan te Gerisiyanen?"

<sup>38</sup> Embiya iring ketà," ke sikandin, "ne kenà bes sikuna ke etew ne riyà ebpuun te inged ne Ihiptu ne mid-atu te gubirnu ne mid-ewit te epat nengivu ne nebmetereman ne tulisan diyà te tanà ne kenà egkeubpaan te etew."

<sup>39</sup> "Kenà a," ke si Pablo, "su Hudiyanan a ne riyana in-anak te dekelà ne inged ne Tarsu lusud te Selisiya. Ne embiya egkepakey ne ebuyuen ku kenikew te ebpekidlalag a kayi te minge etew."

<sup>40</sup> Ne midtuhut kandin ini se mepurù te minge sundaru. Mid-itindeg ketà si Pablo kayi te eheran te baher ne mid-uyew te belad din te mebbeeneng-eneng ke minge etew. Ne guna su neengked dan se mehurub, ne midlalag si Pablo kandan te kinehiyan te Hibruhanen.

## 22

<sup>1</sup> "Menge suled wey minge lukes," ke si Pablo, "pemineha niyu ini se ibpesabut ku keniye ne kewagib ne idtindeg ku."

<sup>2</sup> Guna su neringe dan se lalag din ne Hibruhanen ne kinehiyan, ne warà ed-edtiken dan su ebpemineg.

Ne ke si Pablo te,

<sup>3</sup> "Hudiyanan a ne riyana in-anak te inged ne Tarsu lusud te Selisiya, ugaid ne kayi a medekelà te inged ne Hirusalim ne mibpenurù a ni Gemelil. Ne meited se impenurù din kediey mekeatag dut te penduan ne edtumanen dut te minge keep-epuan tew. Ne meilit se kedtumanana ku kayi su in-amin ku ke hinawa ku ke egeleveke te Eleteala iring te sikiyu ne kayi en guntaani.

<sup>4</sup> Tembù be," ke si Pablo, "mibpekesekitan ku ke minge mibperetiyya te penurù ni Hisus taman te ruen mibpimatey ketà. Ne ruen en kandan meama meritan ne midsigkem ku ne mibilanggu.

<sup>5</sup> Ini se mepurù te terepelengesa wey langun ne minge Perekukum se ebpeketitihus te benar ini se egkehiyan ku keniye su mibehayan e ran te minge surat ne impeewit dan kediey diyà te minge ruma ran ne Hudiyanan diyà te inged ne Demasku su apey a egkekilala nikandan. Ketà ne mibpendiyà a su apey ku mesigkem ke minge mibperetiyya te penurù ni Hisus ne ed-ewiten ku sikandan kayi te inged ne Hirusalim su edresayan dut te minge Perekukum kayi.

<sup>6</sup> "Ne guna su ebpepelingguma ad diyà te inged ne Demasku," ke si Pablo, "te mehaan en egkeudtu ne netekew te ruen mermerayag ne ebpuun te langit ne neketayew kediey.

<sup>7</sup> Nepiley a ne ruen suwara ne neringe ku se egkahi te, 'Ey, Saulo, Saulo, meambe ke ebpekesekitan a nu?'

<sup>8</sup> “Ne migkahi a te, ‘Engkey ka, Kerenan?’

“ ‘Si Hisus a ne riyà ebpuun te inged ne Nesarit,’ ke se suwara, ‘ne mibpekesekitan nu.’

<sup>9</sup> Ne ke menge ruma ku, nekita ran ke merayag ugaid ne warà dan mesebuti ke suwara ne migkahi kediey.

<sup>10</sup> “Ne nekeinsà a te, ‘Kerenan, engkey se ed-ul-ulaan ku?’

“Ne midtavak ke Kerenan te, ‘Na, enew ka ne laus ka riyà te inged ne Demasku ne dutun ne langun ne ebpevelan keykew te Eleteala ne ibpenurù keykew.’

<sup>11</sup> Ne nepisek a dut te mermerayag ne neketayew kediey, ne ketà ne mibpikit a dut te menge ruma ku te ebpendiyà te inged ne Demasku.

<sup>12</sup> “Ne rutun te inged ne Demasku ne ruen etew ne ed-ingaranan ki Ananias. Ne meperumaruma sikandin te menge penduan tew wey ed-edatan te langun ne menge Hudiyanen ketà.

<sup>13</sup> Neuma a rin dà ne mid-itindeg en kayi te uvey ku ne migkahi te, ‘Saulo, sikew se suled ku, guntaani ne ebpekekita ke en.’ Arà dà ne nekeulit en se kebpekekita ku su egkekita ku en sikandin.

<sup>14</sup> “Ketà ne migkahi si Ananias kediey te, ‘Ke Eleteala ne mibpengerap dut te menge keep-epuan tew se mibpemili kenikew su apey nu egketueni ke engkey se kiyug te Eleteala ne ibpehelevek din keykew. Tembù be nekita nu ini se metidtu ne sugsuhen din ne si Hisus wey nerineg nu ke migkahi rin.

<sup>15</sup> Ne guntaani ne ibpenendutl din kenikew diyà te menge etew mekeatag dut te nekita nu wey nerineg nu.

<sup>16</sup> Na kenà ka edlanganlangan ne pengeningeni ka te Kerenan tew ne si Hisus su apey ebpeharan din ke menge salà nu. Ne kuwa ke en ne pebunyang ke en ne tuus te mibpesakup ke en ki Hisus.’

<sup>17</sup> “Ne mid-uli ad diyà te inged ne Hirusalim ne gewii te kebpengeningeni ku diyà te Nekebpuru ne Valey te Eleteala ne ruen impekita kediey.

<sup>18</sup> Ne ke Kerenan tew ne si Hisus se mibpekkitakita kedì ne migkahi te, ‘Gaangaan ka awà kayi te inged ne Hirusalim su ke menge etew kayi ne kenà dan edtelimaan ke ibpesabut nu mekeatag kediey.’

<sup>19</sup> Ugaid ne migkahi a te, ‘Kerenan, netuenan dan en te mibayaan ku arà se menge etew ne mibperetiyaya keykew diyà te menge baley ne ebpengedian te menge Hudiyanen ne mibpenigkem ku wey mibpembedasan.

<sup>20</sup> Ne ketà te kineimetayi ki Esteban, arà se etew ne mid-itindeg dut te penurù nu, ne dutun a su migkiyug a rema te ed-ul-ulaan dan arà su siaken se mibantey te kumbalà dut te mid-imatey kandin.’

<sup>21</sup> Ugaid ne migkahi ke Kerenan tew te, ‘Genat ke en su ibpendiyà ku sikew te meriyù ne menge inged su ibpesabut nu mekeatag kediey diyà te menge etew ne kenà Hudiyanen.’ ”

<sup>22</sup> Ne gewii te edlalag si Pablo ne mibpeeneng-eneng ke menge etew su ebpeming kandin, ugaid ne guna su migkahi rin te sikandin se ibpendiyà te Eleteala te menge etew ne kenà Hudiyanen ne mibpememensag dan en te, “Ed-imetayan tew! Su dait ne ed-imetayan!”

<sup>23</sup> Ne mibpememensag dan pà ne impenerawes dan ke menge kumbalà dan wey mibpenivurak te lipupuk.

<sup>24</sup> Ne arà se mepurù te menge sundaru ne Rumanu ne midsuhù din ke menge sundaru rin te ibpeewit kandan si Pablo diyà te lusud te baher ne ebpebedasan su apey rin igkepayag ke engkey se igkeepes kandin dut te menge Hudiyanen ne ebpememensag.

<sup>25</sup> Ne ketà te ebekuan dan si Pablo su ebadasan ne migkehiyan en ni Pablo arà se kepitan te, “Engkey, idtuhut be te ureding te ebadasan a niyu te siaken ne sakup te inged ne Ruma ne warà a pà mesumeriyà?”

<sup>26</sup> Nerineg ini dut te kepitan ne mibpendiyà te mepurù din ne migkahi te, “Meambe ke ebpebedasan nu kenami arà se etew ne sakup bes te inged ne Ruma?”

<sup>27</sup> Ne mibpendiyà arà se mepurù te ki Pablo ne migkahi te, “Maa, sakup ke ves te inged ne Ruma?”

“Uya,” ke si Pablo.

<sup>28</sup> Ne ke se mepurù te menge sundaru te, “Siaken, ne dekelà nevenar se ingkevayad ku diyà te gubirnu su apey egkevaluy a ne sakup te inged ne Ruma.”

“Ne siaken mulà,” ke si Pablo, “ne benar ne sakup a te inged ne Ruma su ke menge lukes ku ne menge Rumanu.”

<sup>29</sup> Nerineg dà arà dut te menge sundaru ne ebasas perem ki Pablo, ne migaangaan dan med-awà. Ne neandek arà se mepurù dan su imevakù din si Pablo te sengkali,

ugaid ne geina te sakup si Pablo te inged ne Ruma ne ebpekesurang te ureding ini se ed-ul-ulaan te minge sundaru su warà pà sumeriyà.

<sup>30</sup> Ne ketà te neketundug ne hewii ne midtawag dut te mepurù te minge sundaru ini se minge mepurù te terebpepengesa wey langun ne minge Perekukum su edsumeriyaan dan si Pablo apey rin metueni ke engkey se id-isuhata kandin dut te minge Hudiyanen. Dutun ne mid-ewit din si Pablo ne impeetuvang kandan.

## 23

*Mibpeetuvang si Pablo diyà te minge Perekukum*

<sup>1</sup> Ne midtengtangan ni Pablo ke minge Perekukum ne migkahi te, “Menge suled ku ne minge Hudiyanen, netuenan te Eleteala te metilak te itungan ku te miduma a te Eleteala taman guntaanì.”

<sup>2</sup> Ne si Ananias, arà se mepurù te terebpepengesa, guna su nerineg din ke lalag ni Pablo ne migkehiyan din ke minge etew ne ed-itindeg te uvey ni Pablo te tebpia ran ke bèbà din.

<sup>3</sup> Ne migkehiyan sikandin ni Pablo te, “Edusaan ka te Eleteala su uvag en kun ne meputi ka nedtengtangan, ugaid ne ke hinawa nu ne meitem nevenar! Su sikuna se egkukum kediey te pengitavan te penduan ni Moises, ugaid ne sikuna se nekesurang te penduan ni Moises ketà te suhù nu te kedtebpia kediey!”

<sup>4</sup> Ne migkahi arà se minge etew ne uvey ni Pablo te, “Edsumpeliten din ke mepurù ne terebpepengesa te Eleteala!”

<sup>5</sup> “Menge suled ku ne minge Hudiyanen,” ke si Pablo, “warà ku metueni te sikandin bes ke mepurù te terebpepengesa. Su embiya netuenan ku ne warà ku kehiya arà diyà te kandin su netuenan ku te ruen nekahi te surat ne Lalag te Eleteala ne egkahi te, ‘Kenà ka edlalag te meraat mekeatag te etew ne egkamal keniyu.’ ”

<sup>6</sup> Ne guna su nekita ni Pablo se ruen minge Sedusiyu wey minge Paresiyu ne nevurun ketà te Perekukum ne mibmerahing se suwara rin ne egkahi te, “Menge suled ku ne Hudiyanen, Paresiyu a minge lukes ku. Ugaid ne impeetuvang a niyu su atag dut te peretiyaya ku ne ebenawen te Eleteala ke minge minatey keuremà!”

<sup>7</sup> Nekahi rin dà arà ne nekedlewanan ke minge Sedyusiyu wey minge Paresiyu ne warè en kegkeatur dut te kukuman. (

<sup>8</sup> Iyan dan kebpekedlewanà su egkahi ke minge Sadusiyu te kenè en ebenawen ke minge minatey, ne warè suluhuen ne riyà ebpuun te langit, ne egkahi ran te warè gimukud. Ugaid ne ke minge Paresiyu ne egkahi ran te ebenawen ke minge minatey, ne ruen suluhuen ne riyà ebpuun te langit, ne egkahi ran te ruen gimukud.)

<sup>9</sup> Ketà ne mid-ilut pà ke kebpebenbensahey ran su ruen minge Paresiyu ne mibpenurù te penduan ni Moises ne mid-itindeg ne migkahi te, “Embiya kayi te ki Pablo ne warà meraat ne netuenan dey ne mibeelan din. Su kalu ke ruen gimukud etawa suluhuen ne riyà ebpuun te langit ne mibpekidalag kandin.”

<sup>10</sup> Ketà ne mid-iseg nevenar ke kebpekedlewaney ran taman te meinit en ne neandek arà se mepurù te minge sundaru su kalu ke edwèweasen dan si Pablo. Tembù be inuhù din dut te minge sundaru rin se ibpeahew kandan si Pablo ne ibpeuli diyà te kutà.

<sup>11</sup> Rutun ne kerukileman en ne mibpekitakita ki Pablo ke Kerenan tew ne si Hisus ne migkahi te, “Kenà ka meandek! Su iring te impeitindeg nu ke kebperetiyaya nu kediey kayi te lusud te inged ne Hirusalim, ne engketà ded se ed-ul-ulaan nu rema diyà te inged ne Ruma.”

*Ke Netahù te itungan dut te minge Hudiyanen te ked-imetayi ran ki Pablo*

<sup>12</sup> Guna su meselem en ne ruen minge Hudiyanen ne nevurun su ebpengesaken dan ke engkey se egkepakey ne ralan te ked-imetayi ran ki Pablo. Ne insapà dan te kenà dan egkaan wey ed-inum taman te kenà dan mepatey si Pablo.

<sup>13</sup> Ne labi ran epat nepulù ne mid-upakat kayi.

<sup>14</sup> Ketà ne mibpendiyà dan te minge mepurù te terebpepengesa wey minge pekilukesen ne migkahi te, “Midsapà key te kenà key egkaan wey ed-inum taman te kenà dey mepatey si Pablo.

<sup>15</sup> Ne sikiyu wey langun ne minge Perekukum, pesurati niyu arà se mepurù te minge sundaru te Ruma su ewita rin si Pablo kayi su ruen kun uvag дума ne penginsà nu kandin. Ne sikami ve ne ed-ayan key diyà te ralan su ed-imetayan dey te kenà pà ebpekeuma kayi.”

<sup>16</sup> Ugaid ne ruen anak ne meama dut te etevey ni Pablo ne nekerineg dut te netahù te itungan dan ne ed-ul-ulaan dan ki Pablo ne mibpendiyà sikandin te kutà ne impenudtul din ini ki Pablo.

<sup>17</sup> Ne dutun ne mid-umew si Pablo te senge etew ne kepitan ne migkahi te, “Ewita nu ini se kenakan diyà te mepurù nu su ruen igkahi rin kandin.”

<sup>18</sup> Ne mid-ewit din ini se kenakan diyà te mepurù din ne migkahi te, “Ke bilanggù ne si Pablo se mid-umew kediey ne ibpeewit din kediey ini se kenakan kayi te keykew su ruen igkahi rin kenikew.”

<sup>19</sup> Ne mid-ahak dut te mepurù ini se kenakan diyà te ubpu te sikandan dà ne mid-insà te, “Engkey se igkahi nu kedì?”

<sup>20</sup> Ne migkahi ini se kenakan te, “Mid-upakat ke menge Hudiyanen ne ebuyù kenikew te ibpependiyà nu ini se anggam ku ne si Pablo diyà te Perekukum su ruen kun uvag duma ne penginsà dan kandin.

<sup>21</sup> Ugaid ne kenà nu idtuhut su ruen labi epat nepulù ne etew ne ed-eles su ed-ayan kandin. Ne ruen sapà dan ne kenà dan egkaan wey ed-inum taman te kenà dan mepatey sikandin. Neimes dan en ne iyan dan dà edteharan se suhù nu.”

<sup>22</sup> Ne migkahi ini se mepurù te, “Kenà nu penudtula te misan engkey ne etew te impenudtul nu kediey ini.” Ne ketà ne impeuli din ini se kenakan.

*Impeewit Dan si Pablo diyà te ki Gubinedur Felix*

<sup>23</sup> Ne mid-umew dut te mepurù te menge sundaru ke deruwa ne kepitan din ne migkahi te, “Imesa niyu te deruwa nehatus ne sundaru su ibpependiyà te inged ne Sisariya, ne ibperuma ran te pitu nepulù ne sundaru ne egkukudà wey deruwa nehatus ne sundaru ne ehevangkew. Ne iyan be imbe se ed-imes dan en su egenat dan te siyew ne uras te ini ne kerukileman.

<sup>24</sup> Ne kuwa kew te menge kudà ne ebpeunturan ki Pablo, ne ey-eyari niyu te ebantey sikandin taman te ebpekeuma kew riyà te ki Gubinedur Felix.”

<sup>25</sup> Ne ketà ne midsurat ke mepurù te menge sundaru te ibpeewit din diyà te gubinedur ne ini se migkahi rin:

<sup>26</sup> “Surat ini ni Claudio Lisyas diyà te ki Gubinedur Felix.

“Memenu kew en kenian?”

<sup>27</sup> Ini se etew ne ibpeewit ku kenian ne nesigkem dut te menge Hudiyanen ne ed-imetayan dan perem. Ne guna su netuenan ku ne sakup sikandin te inged ne Ruma, ne mibeyaan dey te menge sundaru ku su apey kenà dan egkeimetayi.

<sup>28</sup> Ketà ne mid-ewit ku sikandin diyà te menge Perekukum su edsumeriyaan dan su edsuisyen ku ke engkey se id-isuhat dan kandin.

<sup>29</sup> Ne rutun ne netuenan ku te warà bes meraat ne ed-ul-ulaan din te kebpeimetayi kandin etawa kebilanggù su iyan dà id-isuhat kandin ne mekeatag te kedsurang din dut te pengitavan te menge penduan dan.

<sup>30</sup> Ne guna su netuenan ku te ed-ayanan sikandin su ed-imetayan dut te menge Hudiyanen, tembù be nepegitung ku se ibpeewit ku sikandin kayi te keniyu. Ne migkehiyan ku ini se menge mid-isuhat kandin te riyà dan te keykew ibpeetuvang. Arà dà taman se lalag ku.”

<sup>31</sup> Arà ne kerukileman ne midtuman dut te menge sundaru ini se suhù te mepurù dan ne migkuwa ran si Pablo ne migenat en ne diyà dan metaman te inged ne Entipatris.

<sup>32</sup> Ne rut te neketundug ne hewii ne mid-uli en diyà te kutà arà se menge ed-ip-ipanew rà ne menge sundaru ne iyan mid-ewit ki Pablo arà se menge sundaru ne egkukudà.

<sup>33</sup> Ne ketà te nekeuma ran diyà te inged ne Sisariya ne imbehey ran ke surat diyà te ki Gubinedur Felix wey impalad dan kandin si Pablo.

<sup>34</sup> Ne mibasa rut te gubinedur arà se surat ne mid-insaan din si Pablo ke endei se kandin ne pruvinsiya. Guna su netuenan din te riyà ebpuun te pruvinsiya ne Selisiya si Pablo,

<sup>35</sup> Ne migkehiyan din te, “Wey ku en egkukuma sikew ke ebpekeuma arà se mid-isuhat.” Ne mibpeventayan din te menge sundaru si Pablo diyà te turuhan ni Hirudis.

## 24

<sup>1</sup> Guna su nekedlelima ne hewii ne mibpependiyà te inged ne Sisariya si Ananias arà se Mepurù ne Terebpelengesa, ne edumaan din ke menge pekilukesen wey senge etew ne ebugadu ne ed-ingaranan ki Tertulu. Ne mid-etuvang dan ki Gubinedur Felix su ruen id-isuhat dan mekeatag ki Pablo.

<sup>2</sup> Ne guna su impetawag en si Pablo, ne mid-itindeg arà se ebugadu ne si Tertulu ne impesabut din dut te gubinedur ke menge id-isuhat dan mekeatag ki Pablo. “Egkeedatan ne Gubinedur Felix,” ke se ebugadu, “su atag dut te ketau nu te kekgamal nu kenami ne neuhet en ne merinew se ked-ubpà dey wey merakel ne menge keupianan ne neveelan kayi te kenami.

<sup>3</sup> Tembù be lelayun key ebpeselamat te piya endei su atag dut te ed-ul-ulaan nu.

<sup>4</sup> Ne kenà ku igkesuat te egkevangan ka kayi te egkehiyen ku, ugaid ne ebuyuen ku keykew te pemineha nu pà ini se ibpesabut ku kenikew.

<sup>5</sup> Iyan dey kebpengkayi ne ebpesebutan dey kenikew te ini se etew ne si Pablo ne mesamak sikandin su ini se menge baal din se puunan te kegkehuvut dut te menge Hudiyanen te piya endei ebpesinaru sikandin. Su sikandin ke unutan dut te menge etew ne ed-ingaranan te Naserinu su si Hisus ke mibperetiyaya ran ne riyà ebpuun te inged ne Nesarit.

<sup>6</sup> Ne kenà dutun dà taman su edredsikan din perem ini se Nekebpuru ne Valey te Eleteala rey, tembù be midsigkem dey sikandin. Ne egkukumen dey perem sikandin kayi te pengitavan te penduan dey.

<sup>7</sup> Ugaid ne nekeuma ke mepurù te menge sundaru ne si Lisyas ne mid-ahew rin kenami su apey kenà dey egkekukum.

<sup>8</sup> Ne impeewit din kayi te keykew ne migkehiyan key rin te sikami se mid-isuhat ki Pablo ne kayi key ibpeetuvang te kenikew. Su embiya edsumeriyaan nu ini se etew, ne egketuenan nu ke benar ini se in-isuhat dey kandin."

<sup>9</sup> Ne ketà ne mid-ayun arà se menge ruma rin ne menge Hudiyanen se egkahi te benar arà se langun ne migkahi rin.

*Midtindeg si Pablo te Hinawa Rin diyà te Etuvangan ni Gubinedur Felix*

<sup>10</sup> Ne mid-uyawan dut te gubinedur si Pablo su apey egkahi sikandin. Ne migkahi si Pablo te, "Netuenan ku ne meupiya se kegkama nu su neuhet en se kegkama nu kayi te inged ini, tembù be kenà a egkesanggal ne edtavak dut te in-isuhat dan kediey.

<sup>11</sup> Ne embiya egkiyug ka ne ed-insà kedi mekeatag kayi se id-isuhat dan kediey ne egkepakey. Su ruen merakel ne ebpekepenudtul te nekedsepulù en wey deruwa ne hewii ne mibpendiyan a te Hirusalim su ebpengarap a te Eleteala.

<sup>12</sup> Ne warà ma mekita te menge Hudiyanen ne ebpekidlewanà a te misan engkey en ne etew diyà te Nekebpuru ne Valey te Eleteala. Ne warà dema mekita ne ebaal a te egkehuvut diyà te menge valey ne ebpengedian te menge Hudiyanen te penduan dan etawa piya endei ketà te lusud te inged ne Hirusalim.

<sup>13</sup> Tembù be ini se in-isuhat dan kediey ne kenà benar su warà tuus ne igkepekita ran.

<sup>14</sup> Ugaid ne kenà ku igkesanggal te egkahi keniyu ne ed-erapen ku ke Eleteala ne mibpengerap dut te menge keep-epuan dey. Ne iyan dalan te kebpengarap ku ne edtuntul a te pengitavan te penurù ni Hisus, ugaid ne egkehiyen dan te kenà benar ne kebpengarap. Ne edtuntul a rema dut te langun ne penduan ni Moises wey ke impesurat dut te menge ebpelambas te Lalag te Eleteala rengan.

<sup>15</sup> Su langun dey abpeg kayi se mid-isuhat kediey, ne iyan dey ebpenerengen ke migkahi te Eleteala ne kebanew rin te langun ne menge minatey meupiya se meraat se ulaula ran.

<sup>16</sup> Tembù be ebpegelep a te ed-ulaula te meupiya su wey warà igkesewayi kediey te Eleteala wey misan engkey en ne etew.

<sup>17</sup> "Guna su ebrangan en te rahun se kineawà ku diyà te Hirusalim ne mibpendiyan a su id-ated ku se kureta ne idtavang te menge ruma ku ne Hudiyanen ne ayuayu. Ne mibpendiyan a su apey ruen ibpelengesa ku ne ibehay te Eleteala.

<sup>18</sup> Ne gewii te ed-ul-ulaan ku ini ne nekita a ran diyà te Nekebpuru ne Valey te Eleteala te nepasad ku en ini se kedtumana te edtenuran ne betasan dey te menge Hudiyanen mekeatag te kedlulù. Ne kenà merakel ne menge etew se ruma ku ne warà dema egvut.

<sup>19</sup> Ugaid ne ruen menge Hudiyanen ketà ne riyà ebpuun te Asiya ne midsigkem kedi. Iyan dait ne sikandan se ed-etuvang keykew embiya ruen id-isuhat dan mekeatag kediey.

<sup>20</sup> Embiya warà, ne pelelaha nu ini se menge etew kayi ne mid-isuhat kedi te kehiya ran keykew ke engkey se salà ku te impeetuvang a ran kayi te menge Perekukum.

<sup>21</sup> Su warà netuenan dan liyu te migkahi ku gewii te mibpenginsaan a dut te menge Perekukum su ke siaken te, 'Impeetuvang a niyu su atag dut te peretiyaya ku ne ebenawen te Eleteala ke menge minatey keuremà.' "

<sup>22</sup> Nekahi rà ni Pablo arà ne ketà dà taman se kebpenginsà dut te gubinedur su netuenan din neraan mekeatag dut te menge etew ne eduma te penurù ni Hisus. "Ne wey ku en ed-imesara ke kukuman nu," ke sikandin, "ke embiya ebpekeuma en ke mepurù te menge sundaru ne si Lisyas."

<sup>23</sup> Ne migkehiyan din arà se senge etew ne sereyintu te ebpeventayan si Pablo, ugaid ne ruen idtuhut kandin. Ne egkepakey rema ne ke menge egkekilala rin ne ebpenumbaley su ebehey te kurang din.

<sup>24</sup> Guna su nekebpipira en ne hewii ne nekeuma si Felix ki Drusila ke esawa rin ne Hudiyanen. Ne impetawag din si Pablo ne mibpeming dan dut te kebpsesabut ni Pablo mekeatag te kepperetiyya rin ki Hisu Kristu.

<sup>25</sup> Ne ketà te kebpsesabut ni Pablo mekeatag te metidtu ne ulaula, wey kedtigker te hinawa rin, wey ke hewii ne ebpekeuma ne kedtumbanga te Eleteala dut te menge etew, ne neandek si Felix ne migkahi te, “Kayi pà taman su ibpetawag ku rà sikew ke embiyya ruen en lakey ku.”

<sup>26</sup> Ugaid ne edtahad si Felix ke ebhayan ni Pablo te idselipsip din ne kureta, tembù layun din ibpetawag su apey ran ebpekebitiyara.

<sup>27</sup> Ne nekederuwa ne rahun ne si Pursyu Pistu se nekesambi ki Felix ne gubinedur. Si Felix, ne warà din pelihewanga si Pablo su apey igkesuat sikandin dut te menge Hudiyanen.

## 25

### *Ke Kebpekeetuvang ni Pablo ki Gubinedur Pistu*

<sup>1</sup> Guna su nekedtetel en ne hewii se kekamal ni Pistu ne gubinedur ketà te pruvinsiya te Hudiya, ne mid-awà sikandin te inged ne Sisariya se ebpendiyà te inged ne Hirusalim.

<sup>2</sup> Rutun ini se menge mepurù te terebpepengesa wey ke menge egkeunutan te menge Hudiyanen ne mid-vey kandin se ebpenudtul mekeatag te in-isuhah dan ki Pablo. Ne ebuyen dan ki Pistu

<sup>3</sup> te edtevangin din sikandin te ibpeewit kandin si Pablo diyà te inged ne Hirusalim, ugaid ne iyan dan kebuyua su ruen netahù te itungan dan te ed-ayanan dan si Pablo diyà te ralan su ed-imetayan dan.

<sup>4</sup> Ugaid ne migkahi si Pistu te, “Uya, si Pablo ne bilanggù sikandin diyà te inged ne Sisariya ne kenà meuhet ne ed-uli a riya.”

<sup>5</sup> Tembù be ibperuma niyu kedì arà se menge egkeunutan niyu su wey ran mekevaal te id-isuhah embiyya ruen mid-ulaula rin ne meraat.”

<sup>6</sup> Riya pà si Pistu te inged ne Hirusalim taman te labi senge pedian, arà pà ne mid-uli diyà te inged ne Sisariya. Ne ke neketundug ne hewii te kebpekeuma rin ne mibpinuu sikandin diyà te egkukuman ne insuhù din te ibpeetuvang kandin si Pablo.

<sup>7</sup> Nekeuma si Pablo ne midlingutan sikandin dut te menge Hudiyanen ne riya ebpuun te Hirusalim ne mevehat se in-isuhah dan kandin, ugaid ne warà tuus ne impetus dan atag te id-isuhah dan kandin.

<sup>8</sup> Dutun ne midlalag si Pablo te tindeg din te hinawa rin se egkahi te, “Warà a mekesurang te penduan dey te menge Hudiyanen, ne engketà ded kayi te Nekebpuru ne Valey te Eleteala rey, ne warà a mekesurang dut te datù ne egkamal keytew riya te inged ne Ruma.”

<sup>9</sup> Ugaid ne si Pistu ne kiyug din ne ebmeupiyya ke hinawa dut te menge Hudiyanen kandin ne mid-insaan din si Pablo te, “Engkey, egkesuat ke ve ne ebpendiyà te inged ne Hirusalim su riya ku sikuna egkukuma?”

<sup>10</sup> Ne migkahi si Pablo te, “Ini ad guntaani su egkukuman a te kukuman te datù tew riya te Ruma ne iyan ini edait ne egkukum kediey. Ne netuenan nu te warà meraat ne mid-ulaula ku te menge Hudiyanen.

<sup>11</sup> Embiyya midsurang a te penduan dey wey ruen mid-ulaula ku ne edait ne id-imetayi kedì ne beledah en ke ed-imetayan a. Ugaid ne embiyya ini se in-isuhah dan mekeatag kediey ne kenà benar, ne warà etew ne ruen kewagib din te ebpalad kediey te ebpeimetayan a. Iyan ku igkesuati ne iyan egkukum kediey ne ke ratù tew ne egkamal keytew diyà te inged ne Ruma.”

<sup>12</sup> Ketà ne mibpekibitiyya si Pistu dut te ruma ne menge egkeunutan ne edserihan din te inged ne migkahi te, “Ini te iyan nu igkesuati ne egkukum keykew ke Ratù tew riya te Ruma, ne riya ka ibpeewit te kandin.”

### *Impeetuvang si Pablo diyà te ki Datù Egeripa wey ke Esawa rin ne si Bernisi*

<sup>13</sup> Nekebpipira ne hewii ketà ne nekeuma si Datù Egeripa wey ke esawa rin ne si Bernisi kayi te inged ne Sisariya su edtelavuk ki Gubinedur Pistu.

<sup>14</sup> Guna su nekebpipira ne hewii ketà ne impesabut ni Pistu ki Egeripa ke kukuman mekeatag ki Pablo ne egkahi te, “Ruen senge etew kayi ne bilanggù te iyan pà gubinedur ne si Felix.

<sup>15</sup> Ne ketà te mibpendiyà a te inged ne Hirusalim ne ruen id-isuhah mekeatag kandin dut te menge Hudiyanen ne menge mepurù te terebpepengesa wey menge pekilukesen ne mibuyù dan te egkukuman ku sikandin te ed-imetayan.

<sup>16</sup> Ne migkahi ku kandan te sikami ne minge Rumanu ne kenà egkepakey ne ibpalad dey arà se etew ne mid-isuhat ke embiya warà pà mekeetuvang sikandin dut te mid-isuhat kandin ne idtindeg te kewagib din kandan.

<sup>17</sup> Tembù be kinepengkayi ran langun te inged ne Sisariya ne ketà te neketundug ne hewii ne mibpinuu a diyà te egkukuman ne insuhù ku te ibpeetuvang ke bilanggù kayi te kediey.

<sup>18</sup> Ketà ne mid-itindeg arà se minge mid-isuhat kandin. Ne kunaan ku ke iyan id-isuhat kandin ne meraat ne mid-ulaula rin, ugaid ne kenà.

<sup>19</sup> Su iyan dà id-isuhat ne mekeatag te tuluuwen din wey mekeatag te senge etew ne minatey ne ed-ingaranan ki Hisus, ugaid ne migkahi ni Pablo te nevanew en.

<sup>20</sup> Ne guna su warà ku metueni ke engkey se kukuman ku ketà, ne mid-insaan ku si Pablo embiya egkesuat ne ebpendiyà te inged ne Hirusalim su riyà sikandin egkukuma.

<sup>21</sup> Ugaid ne iyan din igkesuat ne ebilangguan pà sikandin kayi taman te iyan edsumeriyà kandin ke Datù tew diyà te inged ne Ruma ne ke Datu se ed-imasat te kukuman din. Tembù be mibpeventayan ku pà sikandin taman te kenà ku igkepeewit sikandin diyà te Datù."

<sup>22</sup> Ne migkahi si Egeripa ki Pistu te, "Kiyug ku ne egkerineg ku rema ke engkey se idtindeg din ne kewagib."

"Keremà," ke si Pistu, "ne ibpetawag ta sikandin."

<sup>23</sup> Ne dut te neketundug ne hewii ne nekeuma si Datù Egeripa wey ke esawa rin ne si Bernisi se mibevelegkas te belegkas te minge ratù su apey egkekita se mepurù dan. Ne midlusud dan dutun te egkukuman se edumaan te minge kepitan wey ke minge egkeunutan te inged dan. Ne impetawag ni Pistu te ibpelusud si Pablo.

<sup>24</sup> Ne ketà te midlusud en si Pablo ne migkahi si Pistu te, "Datù Egeripa wey ke langun niyu ne nevrurun kayi, egkekita niyu ini se etew ne mid-isuhat dut te minge Hudiyanan kayi te inged ne Sisariya wey diyà te inged ne Hirusalim. Ne mibpememengas dan te ebuyu te ebpeimetayan ku ini se etew.

<sup>25</sup> Ugaid ne mibpenguinsaan ku ne warà netuen ku ne dait ne ibpeimetayi kandin. Ne geina te kiyug din ne iyan ebpenginsà kandin ke Datù tew diyà te inged ne Ruman, ne midtuhut a ne ibpeewit ku sikandin diyà.

<sup>26</sup> Ugaid ne ketà te warà netuen ku ne salà din ne igkesurat ku diyà te Datù tew, tembù be impeetuvang ku kayi su apey niyu egkerineg lavi en te sikuna Datù Egeripa su apey ruen igkesurat ku ke embiya ebpenginsaan nu en sikandin.

<sup>27</sup> Su kayi te kedì," ke si Pistu, "ne kenà dait ne ebpeewit te bilanggù diyà te datù embiya kenà egketueanan ke engkey se salà din."

## 26

### *Mid-itindeg si Pablo te Kewagib din diyà te Etuvangan ni Datù Egeripa*

<sup>1</sup> Ne migkahi si Egeripa riyà te ki Pablo te, "Egkepakey en ne ibpesabut nu kenami ke engkey se idtindeg nu ne kewagib te in-isuhat dan keykew." Ne migkayew si Pablo te belad din su edlalag en ne midrudsuan din te ed-lalag ne ed-itindeg te kewagib din se egkahi te,

<sup>2</sup> "Datù Egeripa, ingkehalew ku nevenar te ini kew en su apey nu egkerineg ke ked-itindeg ku te kewagib dut te langun ne in-isuhat te minge Hudiyanan kediey.

<sup>3</sup> Su sikuna ne ruen nesebutan nu mekeatag te betasan dey te minge Hudiyanan wey ebiraan dut te tuluuwen dey. Tembù be kelimua ne tigker ka te ebpeeming kayi te egkehien ku.

<sup>4</sup> "Langun ne minge Hudiyanan ne netueanan dan ke engkey se mid-ulaula ku igenat te batà e pà taman guntaani su riyan a midekelà abpeg kandan diyà te inged ku wey riyà dema te inged ne Hirusalim.

<sup>5</sup> Neuhet en ne netueanan dan ke ed-ul-ulaan ku, ne embiya perem ebenaren dan dà ne ini se ed-ul-ulaan ku ke ed-ul-ulaan te minge Paresiyu. Ne embiya Paresiyu ne meilit nevenar se kedtumana ran te ralan te kebpengarap dey te Eleteala.

<sup>6</sup> Ne guntaani," ke si Pablo, "ne ini ad te etuvangan niyu su mid-isuhat a niyu sabap dut te ebperetiyaya a te egketuman keuremà arà se impasad te Eleteala dengan te minge keep-epuan dey.

<sup>7</sup> Ne ini se impasad kandan ne iyan ebpenerengen dut te sepulù wey deruwa ne bansa te sikami ne minge Hudiyanan, tembù merukilem meandew ne ebpengarap dan te Eleteala. Ugaid ne sabap dut te ini se ebpenerengen ku, ke keupiya nu ne Ratù Egeripa, ne mibaluy te minge ruma ku ne Hudiyanan ne in-isuhat dan kediey.

<sup>8</sup> Ne sikiyu ne menge ruma ku ne Hudiyanen, meambe ke kenà kew ebpekeperetiyyaya te ebenawen te Eleteala ke menge minatey?

<sup>9</sup> “Ne siaken dengan,” ke si Pablo, “ne kunaan ku ke iyan ibpehelevek kediey te Eleteala ne keppegelep te ebpekesakit dut te menge etew ne mibperetiyyaya ki Hisus ne riyà ebpuun te inged ne Nesarit.

<sup>10</sup> Su ini se mid-ulaula ku riyà te inged ne Hirusalim ketà te mibuyà a te surat diyà te menge mepurù te terebpelengesa su apey a mekesigkem wey ebpekebilanggù te menge etew ne mibperetiyyaya ki Hisus. Ne ketà te kukuman dan te ed-imetayan ne mid-ayun a.

<sup>11</sup> Warà tedtab te mid-ulaula ku te pekesekitan ku sikandan diyà te menge baley ne ebpengedian te menge Hudiyanen te penduan dan su apey ran meengkeri te kebperetiyyaya ran ki Hisus. Ne neepes a nevenar kandan su midtelukunan ku pà diyà te meriyù ne menge inged su embiya ruen egkeumaan ku ne mibperetiyyaya ki Hisus ne ebpekesekitan ku.

<sup>12</sup> “Tembù be,” ke si Pablo, “mibpendiyan a te egkuwa te surat dut te menge mepurù te menge terebpelengesa diyà te inged ne Hirusalim su apey ebpendiyan a te inged ne Demasku ne ebpekesigkem a te menge mibperetiyyaya ki Hisus diyà.

<sup>13</sup> Na gewii te riyen e pà te ralan te meudtu, ke keupiya nu ne Datù Egeripa,” ke si Pablo, “ne netekew te ruen mermerayag ne riyà ebpuun te langit ne neketayew kedi wey ke menge ruma ku.

<sup>14</sup> Ne ketà ne nepiley key langun ne ruen suwara ne nerineg ku ne edalag te kinehiyan ne Hibruhanen ne egkahi te, ‘Ey, Saulo, Saulo, meambe ke ebpekesekitan a niyu? Su ini se mid-ulaula nu ne ed-atu kediey, ne sikuna red se egkesekitan.’

<sup>15</sup> “ ‘Engkey ka etawa, Kerenan?’ ke siaken.

“ ‘Si Hisus a,’ ke se suwara, ‘ne ebpekesekitan nu.

<sup>16</sup> Na, enew ka su iyan ku kinepekita kenikew su ebpeheleveken ku sikew kediey ne apey nu ebpekesabat ke menge etew mekeatag dut te impekita ku keykew guntaani wey ruma pà ne ibpekita ku keykew keuremà.

<sup>17</sup> Ne ibpendiyà ku sikew te menge Hudiyanen wey kenà menge Hudiyanen, ugaid ne ebentayan ku sikew dut te kebpekesakit dan keykew.

<sup>18</sup> Su sikandan ne arà se ed-ul-ulaan dan ne kenà meupiya ne iring te riyà dan te kerusireman. Ugaid ne pendiyà ka su ibpesabat nu kandan mekeatag kedi su apey ran mekehimerat ne ebpekeengked dan dut te meraat ne ed-ul-ulaan dan ne ebpekearat dan diyà te kerayahan, uya su ebpekeawà dan dut te kegkeuripen kandan te datù te pekaid ne ebpesakup dan en te Eleteala. Su apey egkepesehad ke menge salà dan sabap dut te kebperetiyyaya ran kedi,’ ke si Hisus, ‘ne ebpekeamung dan dut te menge etew ne mibpemili te Eleteala.’

<sup>19</sup> “Tembù be igkahi ku keykew, ke keupiya nu ne Ratù Egeripa,” ke si Pablo, “ne ini se impenudtul ku keykew ke migkahi kedi dut te Kerenan tew ne si Hisus, arà se midumaan ku.

<sup>20</sup> Ke neuna ne pinesabat ku ne ke menge etew diyà te inged ne Demasku, ne arà pà ke diyà te inged ne Hirusalim, dutun ne mibpesabat a riyà te langun ne menge inged ne lusud te Hudiya wey abpeg ke menge etew ne kenà Hudiyanen. Mibpesabat ku sikandan te iyan iya se engkeri ran ke meraat ne ed-ul-ulaan dan wey ibehey ran ke hinawa ran diyà te Eleteala. Ne impesabat ku kandan te kayi te ini se ed-ul-ulaan dan ne egkekita embiya benar etawa kenà arà se kebperetiyyaya ran.

<sup>21</sup> Tembù be nesigkem a rut te menge Hudiyanen diyà te Nekebpuru ne Valey te Eleteala ne riyà te Hirusalim ne ed-imetayan e ran perem.

<sup>22</sup> Ugaid ne egenat dut te hewii te kebpesabat ku mekeatag ki Hisus taman guntaani ne ke Eleteala se midtavang kedi. Ne sikandin ded se ibpesabat ku keniya te menge mepuru mevavà ne menge etew ne nevurun kayi. Ne ini se ibpesabat ku ne iyan ded impekahi ki Moises wey ke ruma ne menge etew ne ebpelambas te Lalag te Eleteala rengan ne egked-ulaula.

<sup>23</sup> Su migkahi ran te ini se Impasad te Eleteala ne Ebperetuen te langun ne edredsayan wey ed-imetayan, ugaid ne egkevanew red sikandin su apey sikandin se egkeuna te egkevanew rut te menge minatey. Ne ibpesabat din diyà te menge Hudiyanen wey kenà menge Hudiyanen te sikandin ke ralan te kebpekeliyu ran dut te kedusa te Eleteala kandan.”

<sup>24</sup> Guna su nekahi en ni Pablo ini, ne midserambag si Pistu se egkahi te, “Egkevuneg ka, Pablo! Su langun dut te mibpengedian nu se igkebung nu!”

<sup>25</sup> “Kenà a egkevuneg, ke keupiya nu ne Gubinedur Pistu,” ke si Pablo, “su ini se migkahi ku ne benar.



<sup>26</sup> Iyan ku kenà kegkeandek te ebpenudtul keykew ini, Datù Egeripa, su netuenan ku te netuenan nu en ini. Netuenan nu su ini ne nenged-ulaula ne warà mekeeles iya.

<sup>27</sup> Ne sikew, Datù Egeripa, engkey ebperetiyyaya ka te penurù dut te impesurat te minge ebbelambas te Lalag te Eleteala rengan? Netuenan ku te mibperetiyyaya ka.”

<sup>28</sup> “Kalu ke iyan nu egkepegitung,” ke si Datù Egeripa, “ne mehaan a ebpekeruma te kebperetiyyaya ki Hisus.”

<sup>29</sup> “Meuhet mehaan,” ke si Pablo, “ne iyan ku ibpengeningeni te Eleteala te kenà sikuna rà, Datù Egeripa, ugaid ne langun niyu ne ebpemineg kediey guntaani ne egkevaluy ne ebperetiyyaya ki Hisus iring kediey, ugaid ne kenà kew mulà ebilengguan.”

<sup>30</sup> Nekeipus si Pablo se edlalag ne si Bernisi wey ke minge ruma ran,

<sup>31</sup> ne midlihawang dan se ebpelelahey te, “Ini ne etew ne warà mid-ulaula rin ne dait ne ed-imetayan etawa ebilengguan.”

<sup>32</sup> Ne migkehiyan ni Egeripa si Pistu te, “Embiya warà din buyua te iyan egkukum kandin ke Datù tew diyà te inged ne Ruma ne egkepakey ne ebpekeliyu en sikandin dut te bilengguan.”

## 27

### *Mid-untud si Pablo te Kapal se Ebpendiyà te Inged ne Ruma*

<sup>1</sup> Guna su neupakat dan te ibpeuntud key en te kapal te ebpendiyà te inged ne Ruma lusud te Italiya, ne impalad dan en si Pablo wey ke ruma rin ne bilanggù diyà te ki Julio ne senge etew ne kepitan dut te minge sundaru ne ed-ingaranan te “Kumpeniya te Datù te Ruma.”

<sup>2</sup> Ne mid-untud key te kapal egenat te inged ne Edremitiyu se ebpevyà te minge inged ne kilid te rahat te pruvinsiya ne Asiya ne ketà ne migenat key en. Ne ruen ruma rey ne ed-ingaranan ki Eristarku ne riyà ebpuun te inged ne Tisulenika lusud te Mesidunya.

<sup>3</sup> Ne ke neketundug ne hewii ketà ne nekerunggù key diyà te inged ne Sidun, ne si Julio ini ne midtulengaran din si Pablo su intuhut din te ebpekepemenaug ne ebpekenumbaley sikandin diyà te minge etew ne nekilala rin su apey ran mevehayi te piya engkey se kurang din.

<sup>4</sup> Ketà ne midlevundus key en ne geina te ebpekesurang key dut te mevandes ne keramag ne kayi key mibpevyà te divaluy dut te punul ne Sipri su egkeelangan ke keramag.

<sup>5</sup> Ne nekerapas key dut te rahat ne uvey te minge pruvinsiya ne Selisiya wey Pampiliya, ne nekerunggù key diyà te inged ne Mira lusud te Lisiya.

<sup>6</sup> Dutun ne ruen kapal ne riyà ebpuun te inged ne Elihendriya ne nekita rut te kepitan ne mehaan en ebpendiyà te inged ne Italiya ne impeuntud key rin ketà.

<sup>7</sup> Migenat key en ugaid ne geina te ebpekesurang key te keramag ne menaney utew ke kapal te nekebpipira en ne hewii rutun, ne merehen se kebpekerunggù dey diyà uvey te inged ne Nidu. Ne geina te kenà ebpekelaus ke kapal su egkesurang dut te mevandes ne keramag, ne riyà key mebayà te divaluy te punul ne Krita ne egkeelangan te keramag ne midsehad key te migarang ne tuhar te punul ne ed-ingaranan te Salmun.

<sup>8</sup> Ne mibpehungkilid key en dut te beyvey te rahat ne nerehenan key te kebpevyà dey, ugaid netaman ne nekerunggù key diyà dapit ne ed-ingaranan te Mepmeupiya ne Edungguan uvey te inged ne Lasiya.

<sup>9</sup> Geina te neuhet key dut te ebpevyà dey ne midsahad en ke hewii te minge Hudiyanen te edlimpas te egkaan ne mekeandek en ne idlaus su netuenan en te arà ne hewii ne ebpekeuma se keramag. Tembù mibaag ni Pablo sikandan se egkahi te,

<sup>10</sup> “Menge ruma ku, ruen egked-ulaula tew ne mekeandek ke edlaus kiyu su egkereatan ini se kapal, ne egkelened ini se induran, ne sikitew ne ruen egkelened.”

<sup>11</sup> Ugaid ne ini se kepitan te minge sundaru ne warà din pemineha ke imbaag ni Pablo su midsarig sikandin te lalag dut te kepitan te kapal wey ke lalag dut te tehikemuney.

<sup>12</sup> Ne ke dungguan dutun ne kenà meupiya ne edtehuan te kapal embiyya ke hewii te bagyu, tembù be ke kerekelan ne egkiyug ne edlaus su apey key mekeuma riyà te inged ne Pinisi diyà te punul ne Krita embiyya egkepakey. Su meupiya ne edungguan arà taman te edsahad ke hewii te bagyu su egkeelangan ke keramag.

### *Nesuhat te bagyu ini se Kapal ne Mid-unturan eni Pablo*

<sup>13</sup> Ketà ne midrudsuen medsamber ke menayù ne keramag egenat te ebelevahan ne kunaan dan ke iyan edtuman ke netahù te itungan dan te edlaus dan en. Tembù be mibigkat dan ke mid-ulug dan ne perivatu dut te kapal, ne migenat key en, ne mibpevyà key diyà te beyvey te punul ne Krita.

<sup>14</sup> Warà meuhet ketà ne midsamber te mevandes ne keramag ne riyà dapit te punul.

<sup>15</sup> Ne nesuhat ke kapal ne kenà dey en igkepeiseg ke kapal su neveriyung en, ne mibelehad dey en ke endei ed-ewita ini se kapal dut te keramag.

<sup>16</sup> Ne mibpevyà key diyà te divaluy te reisek ne punul ne Kewda ne neelangan ke keramag. Ne misan ingkereheni rey ne netehel dey te edtines ini se avang ne eguyuren dut te kapal ne mid-unturan dey.

<sup>17</sup> Guna su netines en ke avang, ne mibagkes dan te rekelà ne tali dutun te kapal su apey kenà mewahey dut te keramag. Ne neandek dan embiya egkeewit ini se kapal te keramag ne ebpekehandrad diyà te kevevawen te wayig uvey te beyvey te inged ne Libya, tembù be in-awà dan ke puleyehan dut te kapal su misan menaney se ibpevyà din ne kenà egkeewit ini se kapal te keramag ne ebpekehandrad.

<sup>18</sup> Ne bagyu pà lavew dut te neketundug ne hewii, ketà ne midrudsù dan te ebpenimbag dut te induran te kapal su apey meegkapi ne kenà melened.

<sup>19</sup> Ne ketà te neketundug ne hewii ne ruen mevehat ne menge adir dut te kapal ne impenimbag dan en dema.

<sup>20</sup> Ne nekebpipira ne hewii ne warà dey mekita ke andew wey menge bituen su warà pà lavew med-engked ke bagyu, netaman ne warà en kayi te itungan dey se egkeuyag key pà.

<sup>21</sup> Su nekebpipira en ne hewii ne warà mekekaan ke menge etew ne migkahi si Pablo kandan te, "Menge ruma ku, embiya perem mibpeming kew dut te imbaag ku keniyu te kenà kiyu ed-awà diyà te punul ne Krita, ne kenà tew imbe egkeseharan ini se ned-ulaula tew wey warà tew impenimbag arà se induran.

<sup>22</sup> Ugaid ne ebuyuen ku keniyu guntaani ne kena melagew te hinawa niyu su warà misan seveka kenitew ne egkepatay su ini rà se kapal se egkereetan.

<sup>23</sup> Su geina te merukilem ne ini se Eleteala ne kemuney kediey ne iyan ku ebpengerapen, ne mibpekita kita kedi ke suluhuen din

<sup>24</sup> ne migkahi te, 'Ey Pablo, kenà ka meandek su ebpekeuma ka diyà te Datù te inged ne Ruma. Ne misan ke menge ruma nu kayi te kapal ne warà seveka kandan ne egkepatay su atag dut te limù te Eleteala kenitew.'

<sup>25</sup> Ini se migkahi rut te suluhuen," ke si Pablo, "ne dutun ne kenà kew meuru su ebperetiyyaya a te Eleteala te edtumanen din arà se migkahi rin kediey.

<sup>26</sup> Iyan dà egked-ulaula ne ebpekehandrad kiyu diyà te punul."

<sup>27</sup> Ne ketà ne ikeseputù en wey epat ne kerukileman te ked-ewita kenami te bagyu ne diyà key pà te rahat ne ed-ingaranan te Miditeranyu. Guna su metaneb en se kerukileman, ne nepegitung dut te menge etew ne migeleveke kayi te kapal te kalu ke nekeuvey ran en te kelupaan.

<sup>28</sup> Ketà ne in-ulug dan te tali ne ruen perivatu ne in-iket su edteggaran dan ke keralem dut te wayig ne netuenan dan se deruwa rà nepulù ne repa se keralem din. Ne nekeiseg dan dutun ne midteggad dan maa ne netuenan dan se sepulù dà wey lelisma ne repa se keralem din.

<sup>29</sup> Ne neandek dan su kalu ke ebpekehandrad ini se kapal te menge batu, tembù be in-iket dan ke epat ne menge perivatu diyà te ulinan te kapal su apey kenà ebpekeiseg, ne mibpengeningeni ran te egkepawà en perem.

<sup>30</sup> Ne nepegitung dut te menge etew ne migeleveke kayi te kapal se ed-awà dan perem su ebpemelahuy ran. Ketà ne impenaug dan arà se avang su apey kun uvag egkeperiwetuwi ke dulung te kapal.

<sup>31</sup> Ugaid ne migkahi si Pablo diyà dut te kepitan wey menge sundaru rin te, "Embiya ed-awà kayi te kapal ini se menge etew ne egeleveke ne kenà kew ebpekehaun."

<sup>32</sup> Ne ketà ne mibidtey dut te sundaru arà se tali ne in-iket dut te avang ne neulug diyà te rahat.

<sup>33</sup> Guna su egkekepawà en ne mibuyù si Pablo te langun dan ne egkaan. "Neked-seputù en wey epat ne hewii," ke si Pablo, "ne midtigker kew te kegkeandek niyu ne warà kew mekekaan te misan engkey rà.

<sup>34</sup> Tembù be ebuyuen ku keniyu te kaan kew su apey kew ebmeveherbeher. Su kenà kew egkekeiran."

<sup>35</sup> Ne ketà te nekahi ni Pablo arà ne migkuwa te pan ne mibpeselemetan din te Eleteala ne mibpenevitevi din ne migkaan din.

<sup>36</sup> Ne dutun ne mibmeupiya se hinawa ran, ne langun dan ne migkaan.

<sup>37</sup> Ne sikami ne deruwa nehatus wey pitu nepulù wey enem dutun te kapal.

<sup>38</sup> Guna su nengevulung key en, ne impenimbag dan ke induran ne trigu su apey meegkapi arà se kapal.

*Nereetan en ke Kapal ne Mid-unturan eni Pablo*

<sup>39</sup> Guna su nepawà en ne warà mekilala dut te minge etew ne egelevek kayi te kapal ke engkey ne punul arà se uvey rey, ugaid ne nekita ran arà se nekesuluk ne rahat ne ruen ketà beyvey ne pantad. Ne nepegitung dan te ibperunggü ketà ke kapal embiya egkepakey.

<sup>40</sup> Ketà ne mibidteu ran ke tali ne in-iket dut te minge perivatu su apey metehak, ne mibpenger dan ke tali dut te minge pura ne ebpetidutu te kapal. Ne ibpeitindog dan maa ke puleyehan diyà te rulung su apey egkeewit dut te keramag ini se kapal diyà te beyvey.

<sup>41</sup> Nekeuma ini se kapal diyà te mevavew ne wayig ne nekehandrad en dutun. Su ke rulung dut te kapal se nekehandrad ne kenà en egkewaleng, ugaid ne ke ulinan din ne egkerumpak dut te derekelà ne minge baleg ne egkehuvar en.

<sup>42</sup> Netahù te itungan dut te minge sundaru te ebpeimetayan dan ke minge bilanggü su apey ran kenà ebpekepararas diyà te beyvey se ebpelahuy.

<sup>43</sup> Ugaid ne ke kepitan te minge sundaru, ne warà din ituhut te ed-imetayan si Pablo, ne midawey rin sikandan. Ne ketà ne insuhù din dut te langun ne metau ne ebpepararas te edlumbuk en diyà te wayig ne ebpepararas diyà te beyvey.

<sup>44</sup> Ne sikandan ke kenà metau ne ebpepararas ne migkahi rin kandan te egkuwa ran te papan etawa nengetampeng pengawid dut te kapal ne eguntungan dan te edunggü. Ini se mid-ulaula rey ne langun dey ne nekerunggü, ne warà nekeiran.

## 28

### *Si Pablo ne Riyà te Punul ne Melita*

<sup>1</sup> Guna su nekehaun key en diyà te beyvey ne nerineg dey te ini se punul ne ed-ingaranan te Melita.

<sup>2</sup> Ne ke minge etew ketà ne midtelimà dan kenami te meupiya ne midtetavun dan su ed-uran ne meadsil.

<sup>3</sup> Mibpengayu si Pablo te minge rasang ne guna su intavun din diyà te apuy ne ruen mevisa ne uled ne neinitan dut te apuy ne migemew ne mibedbed kayi te belad ni Pablo ne migkahat.

<sup>4</sup> Guna su nekita rut te minge etew ne ed-ubpà ketà arà se uled ne mibitinbitin diyà te belad ni Pablo ne mibpelelahey ran se egkahì te, "Terevunù bes buwa ini, su misan nekehaun sikandin dut te rahat ne kayi red se Bagì din se ebpatay."

<sup>5</sup> Ugaid ne impirik ni Pablo ke uled diyà te apuy ne warà mekeiri sikandin.

<sup>6</sup> Ne kunaan dan ke edlevag ini se belad ni Pablo wey egkepiley su ebpatay en. Ugaid ne neiseg-iseg ne warà ned-ulaula rin, ne nesalin ke itungan dan se egkahì te, "Diwata bes ini."

<sup>7</sup> Diyà te uvey ne ruen minge pengengewiran ni Publiyu ne iyan egkeunutan dutun te punul. Ne impepenayik key rin diyà te baley rin su midtuganur key rin te meupiya, ne rutun key med-ubpà lusud te tetelu ne hewii.

<sup>8</sup> Ne gewii te dutun key ne ed-id-irehà ini se amey ni Publiyu su edetengen wey ebpengindes. Midlusud si Pablo diyà te sungkù dut te ederaru ne guna su mibpengeringeni ne midampen din te belad din ne neulian en.

<sup>9</sup> Guna su nerineg ini dut te minge etew ne ed-ubpà ketà, ne mid-ewit dan ke langun ne ederaru ne nengeulian.

<sup>10</sup> Ne merakel se minge penggalew ran kenami, ne ketà te hewii ne ked-awà dey diyà te kandan ne ruen induran dan diyà te kapal ke misan engkey ne kurang dey te kedlayag.

### *Ke Ipanewan ni Pablo Egenat te Punul ne Melita Taman te Inged ne Ruma.*

<sup>11</sup> Ugaid ne tetelu en ne vulan taman te kebpekelayag dey ne mid-untud key te kapal ne riyà ebpuun te inged ne Elihandriya ne ed-ingaranan te "Ke Seping ne Diwata," ne migenat key en. Ini se kapal, ne midunggü ketà te punul ne Melita taman te neipus ke hewii te bagyu.

<sup>12</sup> Mid-awet key diyà te inged ne Sirekusa ne nekeditetelu key ne hewii rutun.

<sup>13</sup> Ne midlaus key en maa ne nekeuma key riyà te inged ne Rihiyu. Dut te neketundug ne hewii ne ruen keramag ne ebpuun te ebelevahen ne nekeewit dut te kapal dey ne nekederuwa ne hewii ne nekerunggü key diyà te inged ne Putiyuli.

<sup>14</sup> Dutun ne ruen neumaan dey ne minge etew ne mibperetiyya ki Hisus ne mibpeubpà kenami diyà te kandan te lusud te senge pedian. Ketà ne mid-ipanew rey se ebpeidiyà te inged ne Ruma.

<sup>15</sup> Guna su nerineg dut te minge mibperetiyya ki Hisus diyà te Ruma te ebpekeuma key en, ne mid-ipanew ran taman te inged ne ed-ingaranan te Pedian ne Apiyu wey inged ne ed-ingaranan te Tetelu ne Valey ne Edlevungan su edtelavuk kenami. Guna su

nekita ran ni Pablo, ne mibpeselamat sikandin te Eleteala su mibmeupiya se hinawa rin te eduma kandan diyà te inged ne Ruma.

*Diyan en si Pablo te Inged ne Ruma*

<sup>16</sup> Guna su nekeuma key diyà te inged ne Ruma ne warà ipelusud si Pablo diyà te bilengguan su midtuhutan sikandin te ruen kandin ne ed-ubpaan, ugaid ne ruen senge etew ne sundaru ne ebantey kandin.

<sup>17</sup> Guna su nekedtetelu en ne hewii ne midtawag ni Pablo ke menge egkeunutan te menge Hudiyanen. Guna su nevrurun dan en ne migkahi si Pablo te, "Menge suled ku ne Hudiyanen, warà meraat ne mid-ulaula ku diyà te menge suled tew ne Hudiyanen, ne warà a mekesurang dut te menge betasan tew ne intahak dut te menge keep-epuan tew. Ugaid ne misan iring ketà te warà meraat ne mid-ulaula ku diyà te kandan, ne nesigkem a rut te menge Hudiyanen te Hirusalim ne impevilanggù a ne impalad a ran diyà te menge egkeunutan te Rumanu.

<sup>18</sup> Ne mibpeinsaan a te menge egkeunutan ne Rumanu ne ibpeliyu e ran perem su netuenan dan te warà mid-ulaula ku ne dait neid-imetayi kediey.

<sup>19</sup> Ugaid ne arà se menge ruma tew ne Hudiyanen ne kenà dan egkiyug te ibpeliyu a. Ne geina te warè en ebpeketavang kedl, ne mibuyù a te iyan egkukum kediey ne ke Datù kayi te Ruma misan warà igkesumbung ku kandan te menge ruma ku ne menge Hudiyanen."

<sup>20</sup> Tembù be midtawag a keniyu su ebpekibitiyara a keniyu. Ne ini se ingkevakù ku te sengkali ne mekeatag dut te kebperetiyaya ku te sikandin se ebpenerengen dut te sikami ne menge Hudiyanen.

<sup>21</sup> Ne midtavak dan si Pablo te, "Warà surat mekeatag keykew ne netelimà dey ne ebpuun te pruvinsiya ne Hudiya. Ne warà dema nekeuma ne ruma rey ne Hudiyanen ne nekeewit te tudtul kayi mekeatag keykew etawa mibpenudtul te ruen mid-ulaula nu ne meraat.

<sup>22</sup> Ugaid ne egkesuatan dey te ebpeming ke penurù te kebperetiyaya nu, su netuenan dey te ini se penurù ne mibpesekupan nu ne egkunteraan te menge etew te piya endei en."

<sup>23</sup> Ketà ne mibpasad dan te hewii te eburun dan diyà te ki Pablo. Guna su neumaen ke hewii, ne merakel se nevrurun dutun te ed-ubpaan ni Pablo. Ne igenat te meselem taman te merukilem ne impenurù ni Pablo wey impesabut din kandan mekeatag dut te Edetuan te Eleteala te menge etew. Su kiyug din perem ne ebpekeperetiyaya ran te si Hisus ke edtuman dut te impesurat ni Moises mekeatag te Penduan wey arà se impesurat dut te menge ebpelambas te Lalag te Eleteala rengan.

<sup>24</sup> Ruen duma ne mibperetiyaya dut te impesabut din, ne ruen duma ne warà mibperetiyaya.

<sup>25</sup> Ketà ne mibpesusuweyey ran su warà meked-ayun ke itungan dan. Ugaid ne te warà den pà med-awà ne migkahi maa si Pablo te, "Benar iya ke migkahi rut te Kedesenan ne Ebpetuntul te Menusiya ne impesurat dut te senge etew ne ebpelambas te Lalag te Eleteala rengan ne si Isayas.

<sup>26</sup> Su impekahi sikandin te,

'Beyai nu arà se menge etew  
ne kehiyi nu sikandan te,  
Lelayun kew ebpeming,  
Ugaid ne iring te warà niyu merineg  
su kenà niyu egkesebutan.  
Ne lelayun kew edtengteng,  
ugaid ne kenà kew ebpekekita.

<sup>27</sup> Su ini ne menge etew  
ne meresen se ulu ran,  
ne timbang te midsabpeng dan ke telinga ran,  
ne midlipereng dan ke mata ran.  
Su embiya kenà, ne ebpekekita ran,  
ne ebpekerineg dan,  
ne ebpekesabut dan,  
ne ke hinawa ran ne edlived kayi te kediey  
ne ibpekepeliyu ku sikandan dut te salà dan.' "

<sup>28</sup> Ne migkahi rema si Pablo te, "Geina te ini se ed-ul-ulaan niyu, ne ibpesabut ku en keniyu te ini se Lalag te Eleteala ne mekeatag te kebpeeliyu te Eleteala rut te menusiya

ne insuhù din te ibpesabut en diyà te menge etew ne kenà Hudiyanen, ne ebpemineg dan mulà." [

<sup>29</sup> Guna su nekahi ni Pablo ini, ne mid-awà ke menge Hudiyanen se tidtu ne kebpekedlewanà dan.]

<sup>30</sup> Ne nekederuwa ne rahun dutun ne mid-ubpà si Pablo diyà te baley ne midsukayan din ne impepenayik din ke langun ne ebpenumbaley riyà te kandin.

<sup>31</sup> Ne impesabut din kandan mekeatag dut te Edetuan te Eleteala ne menge etew wey mekeatag dut te Kerenan tew ne si Hisu Kristu. Ne kenà din idsanggal te ebpenurù dut te menge etew wey warà midawey kandin te ebpenurù.

## **Ke Surat ni Pablo Riyà te Menge Etew te Inged ne Ruma**

<sup>1</sup> Siaken ini se edsurat keniyu ne si Pablo, ne sugshuen ni Hisu Kristu. Ne nepemili a te Eleteala ne kedserihan din ne insuhù din kediey te ibpesabut ku ke Meupiya ne Tudtul ne riyà ebpuun te kandin.

<sup>2</sup> Ne ini se Meupiya ne Tudtul ke impasad te Eleteala rengan. Ne impesabut din dut te minge etew ne ebpelembas te lalag din te ibpesurat din dut te Berekat ne Riberù ne mibpesuratan kandan.

<sup>3</sup> Ini se impesurat din ne mekeatag dut te Anak din ne si Hisu Kristu ke Kerenan tew. Ne si Hisus ini ne nevaluy ne etew ne in-anak sikandin dut te kevuwaran ni Dabid.

<sup>4</sup> Ne netueanan ta te si Hisu Kristu ne lunsey ne Eleteala, su impekita en te Anak sikandin ketà te mibanew te Eleteala sikandin.

<sup>5</sup> Ibpepevayà ki Hisu Kristu ne midtevangen a te Eleteala te nevaluy a ne kedserihan ni Hisus te ebpesabut mekeatag kandin diyà te langun ne minge etew. Su egkiyuhan din te langun ne minge etew ne ebpekeperetiyya ki Hisus ne eduma kandin. Ne kayi te keduma ran kandin ne sikandin se edeyuen diyà te kandan.

<sup>6</sup> Ne sikiyu rema diyà te inged ne Ruma ne in-amung kew red dut te mibpemili te Eleteala ne egkevaluy ne minge sakup ni Hisu Kristu.

<sup>7</sup> Tembù be edsuratan ku sikiyu langun diyà te inged ne Ruma ne ingkelimù te Eleteala ne mibpemili din ne kandin ne minge etew.

Kiyug ku ne egkepenaub kew te Eleteala ke Amey tew wey si Hisu Kristu ke Kerenan tew, ne ebmelinew se hinawa niyu.

### *Ke Kebpeselamat wey Kebpengeningeni ni Pablo*

<sup>8</sup> Iyan ku id-una te egkahi keniyu ne ebpeleamatan ku te Eleteala su atag dut te langun niyu ne mibperetiyya. Su misan diyà te meriyù ne minge inged ne nerineg dan mekeatag te kebperetiyya niyu kandin. Ne ini se kebpeselamat ku ne ibpepevayà ki Hisu Kristu ne Anak din.

<sup>9</sup> Su netueanan te Eleteala ne benar ini se egkehiyen ku te uman a ebpengeningeni ne idragkes ku sikiyu. Ne ini ke Eleteala ne id-amin ku ke hinawa ku te egelevekan kandin te kebpekesabut ku rut te Meupiya ne Tudtul mekeatag te Anak din.

<sup>10</sup> Layun ku rà ibpengeningei te Eleteala te embiya idtuhut din ne menu ke mekepenumbaley a riyà te keniyu.

<sup>11</sup> Su rekela te hinawa ku se kebpenumbaley ku riyà te keniyu su apey ruen dalan te kebpekenurù ku keniyu rut te impenurù kediey te Kedesanan ne Ebpetuntul te Menusiya su apey ed-ilut pà se kebperetiyya niyu te Eleteala.

<sup>12</sup> Ne iyan ku egkiyuhan ne ke kebperetiyya tew ki Hisus ne ebpetebtevangey kiyu. Su embiya egkekita niyu ke sarig ku, ne ke kedsarig niyu rema ne ebmeilut. Ne engketà e red dema ebmeilut ke sarig ku ke egkekita ku ke sarig niyu.

<sup>13</sup> Menge suled, ebpeketueanan ku keniyu te kenà kepipira ku rà pegitunga te kebpenumbaley ku riyà te keniyu, ugaid ne ruen ma ebpekevangan kediey. Su egkesuatan ku ne ebpekesabut a riyà te keniyu su apey ruen etew ne ebpekeperetiyya ki Hisus iring dut te kinepesabut ku riyà te ruma ne minge inged ne kenà Hudiyanen.

<sup>14</sup> Su iyan ku ebpeiringan ne ruen utang ku rut te langun ne minge etew, ne iyan ku bayad kayi te utang ku ne arà se kebpesabut ku rut te Meupiya ne Tudtul diyà te langun ne edsusunan te minge etew ne sumabut etawa kenà, misan ke ruen netueanan din etawa warà.

<sup>15</sup> Tembù be rekela se kiyug ku te ebpekesabut keniyu rema kenian te inged ne Ruma rut te Meupiya ne Tudtul mekeatag ki Hisus.

<sup>16</sup> Ne kenà ku en iya igkeyeyai te ebpepenudtul arà, su netueanan ku te misan engkey en ne etew ne ebperetiyya, egenat te Hudiyanen abpeg ke kenà Hudiyanen, ne ruen gehem te Eleteala te ebpekepeliyu sikandin te kedusa te salà din.

<sup>17</sup> Su egenat dut te Meupiya ne Tudtul ne impayag keytew te Eleteala se ralan te kebmetidtu tew riyà te etuvangan din embiya ebperetiyyaan tew si Hisu Kristu. Su warà en duma ne ralan liyu rà kayi te kedsarig tew kandin. Su ruen impesurat ne Lalag te Eleteala ne egkahi te, "Ke etew ne midsarig en te Eleteala ne iyan metidtu riyà te etuvangan din, ne egkevehayan sikandin te umur ne warà edtemanan din."

*Midekela se salà dut te Langun ne Menge Etew*

<sup>18</sup> Su impayag te Eleteala ke kegkeepes din dut te langun ne minge etew ne mid-ulaula te meraat wey mid-engkenà kandin. Su kayi te meraat ne ulaula ran ne nepekelasan dan ke ruma ran te kebpekesabut dut te penurù ne benar.

<sup>19</sup> Sikandan ne edusaan te Eleteala su embiya egkiyuhan dan te egkesebutan dan mekeatag te Eleteala ne melemu ran ne egketueanan, su ini ne impayag te Eleteala kandan.

<sup>20</sup> Su igenat te kinelimbaha te Eleteala kayi te dunya, ne misan kenà egkekita ke Eleteala, ne melemu ne egkekita ke keupiya rin wey ke rekelà ne gehem din ne warà ebpekerepeng kayi te egkekita tew ke langun ne nelimbag din. Tembù be warà etew ne ebpekeparew te kenà dan egketueanan te ruen Eleteala.

<sup>21</sup> Su misan netuenan dan te ruen Eleteala, ugaid ne warà ma adat wey kebpeselamat dan te limù din kandan te misan midtevangen dan ded te Eleteala. Nasi pà ne kenà ebpekevehey te ibmeupiya te itungan dan, ne iring te nerusireman ke itungan dan ne kenà dan egkesebutan ke benar ne penurù te Eleteala.

<sup>22</sup> Iyan dan kunaan ke metampas en se itungan dan, ugaid ne kenà bes su kerupangan dà se neketahù te itungan dan.

<sup>23</sup> Su kenà iyan dan ebpengerapan ke tidtu ne Eleteala ne warà kemetayen din, su iyan dan ebpengerapan ne minge ledawan ne mibeelan dà iring te paras te etew ne ruen kemetayen din, wey iring te paras te minge pepenuk, binatang wey uled.

<sup>24</sup> Tembù be mibelehad dan en te Eleteala te ed-ulaula ran te kiyug te lawa ran ne meredsik, ne ini se mibeelan dan te kandan ne lawa ne mekeyeyà.

<sup>25</sup> Mibpehinterà dan dut te benar mekeatag te Eleteala, su iyan dan mibperetiyya ne ke tarù. Su iyan dan ebpengerapan wey ed-edatan ne ke bineelan dà te Eleteala; ugaid ne kenà iyan dan mibpengarap ke Midlimbag, su sikandin dà iya se dait ne edeyuen taman te taman. Ne egketuman ini.

<sup>26</sup> Su mid-iniyuhan dan ke Eleteala, ne mibelehad en dema rut te Eleteala te ed-ul-ulaan dan ne kandan dà ne kiyug ne meredsik. Su misan ke minge meritan ne kenà en ke esawa ran ke ed-uliren dan, ugaid ne meritan ded se igkeerihi ran.

<sup>27</sup> Ne engketà ded dema ke minge meama, kenà en ke esawa ran ke ed-uliren dan su meama red se igkeerihi ran. Ne utew en ne mekeyeyà arà se baal dut te lawa ran, tembù be ke meraat ne egketueanan dut te lawa ran ne dait en dut te ulaula ran.

<sup>28</sup> Su warà te hinawa ran ke benar mekeatag te Eleteala, ne ketà mibelehad en te Eleteala sikandan te iyan ebayabayà te itungan dan ne utew meraatey. Tembù be iyan dan ed-ul-ulaan ne meraat.

<sup>29</sup> Ne ke itungan dan ne nepenù dut te langun ne meraat, ne lelegawen dan, ne meraat se ulaula ran dut te minge ruma ran. Imaan dan, ne terevunù dan, ne ebpekid-ehet dan, ne tenlimbungen dan, ne iyan dan pegitungan mekeatag te ruma ne etew ne meraat, ne edserupet dan te minge ruma ran,

<sup>30</sup> Wey metehel dan ne edliwak te ruma ran. Minge kunterà dan te Eleteala, ne kenà dan ed-adat dut te minge ruma ran, ne mepereyù dan wey ebpendatal. Ne layun dan idtahù te itungan ke meraat ne ed-ul-ulaan dan, ne kenà dan ebperumaruma dut te minge lukes dan.

<sup>31</sup> Warà dan sebuta te misan engkey ne meupiya ne ulaula. Kenà dan edtuman te pasad dan, ne warè en iya kegkelimù dan wey kegkeyru ran dut te ruma ran.

<sup>32</sup> Misan netuenan dan ke migkahi te penduan te Eleteala ne ke etew ne ed-ulaula te meraat iring kayi ne dait ne edusaan din taman te taman, ugaid ne ibpeiseg dan ded iya ke ulaula ran. Ne kenà ketà dà taman su igkesuati ran ke minge ruma ran ne ed-iring kandan.

## 2

### *Ke Kegkukum te Eleteala*

<sup>1</sup> Na sikiyu ne ed-isuhah dut te ruma ne minge etew ne ed-ulaula te meraat iring ketà ne med-uram kew. Warà kevenar niyu te ed-isuhah kandan su kenà egkepakey ne egkahi kew te warà salà niyu. Su embiya ed-isuhah kew kandan, ugaid ne mid-ulaula kew te meraat iring dut te mid-ulaula ran, ne timbang te sikiyu red se nesuhah elin kandan.

<sup>2</sup> Netuenan ta te keggkukum dut te Eleteala te iring kayi ne minge ulaula ne metidtu.

<sup>3</sup> Ugaid ne sikiyu, minge suled, ne ed-ulaula kew red dema te mereatey iring dut te id-isuhah niyu te ruma ne minge etew, tembù be kunaan niyu ke ebpekeliyu kew rut te kedusa te Eleteala keniyu.

<sup>4</sup> Kalu ke iyan niyu kunaan te geina te metulanged wey mepeseharen ke Eleteala ne warà en kedusa rin keniyu. Su iyan din kebpeketulanged ne apey kew mekepedsendit.

<sup>5</sup> Ugaid ne sikiyu, ne warà kew mebpsendit su meresen se ulu niyu. Tembù be ed-iseg pà se kevahat din te idusa keykew te Eleteala ketà te hewii ne ibpayag din ke kegkeepes din, ne arà ded ne hewii ne egketuenan te kegkukum din ne metidtu.

<sup>6</sup> Su ruen ibehey te Eleteala dut te langun ne menge etew te endei se edait dut te mid-ulaula ran.

<sup>7</sup> Ruen menge etew ne iyan dan ebpeisehen ne ke meupiya ne ed-ul-ulaan, su iyan netahù te itungan dan ne egkeuma ke hewii ne ebpekelusud dan en diyà te ed-ubpaan te Eleteala ne kenà igkeupama se keupiya rin. Ne ketà dan egkekita se nekesuhat dan te hinawa te Eleteala, ne riyà dan en ebpekeubpà taman te taman. Su ketà dan en egketelimà ke umur dan ne warà edtemaninan din.

<sup>8</sup> Ugaid ne ruen duma pà ne menge etew ne iyan dà netahù te menge itungan dan ne iyan dan ibpeiseg ne kandan ded ne kiyug, ne warà dan mepperetiyaya rut te benar mekeatag te Eleteala su iyan dan midtuman te ebperetiyaya ne ke tarù. Ne ini se menge etew ne kenà deisek dà se kegkeepes te Eleteala kandan su ke kedusa ne ibehey kandan ne mevehat.

<sup>9</sup> Uya, edusaan wey edresayen ke langun ne menge etew ne ed-ulaula te meraat, ke menge Hudiyanen wey kenà Hudiyanen.

<sup>10</sup> Ugaid ne langun te menge etew ne ed-ulaula te meupiya ne ebpekelusud diyà te ed-ubpaan te Eleteala ne kenà igkeupama se keupiya rin. Ne ketà dan egkekita te nekesuhat dan te hinawa te Eleteala ne riyà dan egketelimà ke kebmelintad te hinawa ran, ne elin ke menge Hudiyanen wey kenà Hudiyanen.

<sup>11</sup> Su ke Eleteala ne warà pinedlabi rin dut te kegkukum din te menge etew.

<sup>12</sup> Ke menge etew ne kenà Hudiyanen ne warà dan mesebuti ke engkey se ibpemandù kayi te penduan ni Moises, ugaid ne embiya nekevaal dan te salà ne egkukumen dan ded lavew te Eleteala te kometayen keuremà. Ugaid ke menge Hudiyanen, ne nesebutan dan ini se penduan ni Moises ne embiya ebaal dan te salà ne iyan igkukum te Eleteala kandan ne kayi red te penduan su nesebutan dan mulà ke penduan ne midsurang dan.

<sup>13</sup> Su kenà iyan kegkesebuti te menge etew mekeatag dut te penduan ni Moises ke kebmetidtu ran diyà te etuvangan te Eleteala; ugaid ne kayi te keduma ran dut te nekahi te penduan se kebmetidtu ran.

<sup>14</sup> Ke menge etew ne kenà Hudiyanen ne warà dan mesebuti ke penduan ni Moises, ugaid ne ruen hewii ne egkerumaan dan ini se nekahi rut te penduan. Ne ibpetuus ini te misan warà dan mesebuti ke penduan ni Moises ne ruen en ingketitik diyà te atey ran ke ed-ul-ulaan ne meupiya.

<sup>15</sup> Su kayi te meupiya ne menge ulaula ran ne egketuusan ta te nekahi te penduan ne neketitik ded diyà te atey ran se ebpenurù kandan. Su netuenan dan te ebpdusun ke meupiya wey rut te meraat ne ed-ul-ulaan.

<sup>16</sup> Ne ruma pà ne kayi egketuani te ini se Meupiya ne Tudtul ne ibpesabut ku, ne ruen hewii keuremà ne iyan ibpekukum te Eleteala dut te langun ne menge etew ne si Hisu Kristu. Su ibpayag din ke langun ne mid-ulaula ran, misan ke impegelesà dan.

*Kenà ke Kegkehudiyanen ta se Ebpekesuhat te Hinawa te Eleteala, Ugaid ne Keduma Ta te Insuhù Din*

<sup>17</sup> Ne sikiyu rema se menge ruma ku ne Hudiyanen, ne impereyùdeyù niyu te Hudiyanen kew, ne egkahi kew te meupiya se itungan te Eleteala mekeatag keniyu su ruen penduan din kayi te keniyu. Ne idantal niyu te sikiyu rà se netau te Eleteala.

<sup>18</sup> Netuenan niyu ke kiyug te Eleteala keniyu, ne nesebutan niyu en ke engkey se meupiya ne ed-ul-ulaan su riyà te penduan se kinesebuta niyu kayi.

<sup>19</sup> Iyan niyu pegitungan ne sikiyu se ebpekepenurù dut te menge etew ne warà pà mekesabut te Eleteala, ne sikiyu se ebpekevehey te rayag dut te ralan te menge etew ne iring te nepisek su nerusireman pà ke itungan dan.

<sup>20</sup> Iyan niyu pegitungan te sikiyu se ebpekepenurù dut te menge etew ne warà utew egketùtuenan dan mekeatag te Eleteala, wey ke menge etew ne iring pà te menge vatà. Su iyan niyu pegitungan ne ke penduan te Eleteala ne intahak keniyu ne dutun intahù ke langun ne ketau wey ke benar.

<sup>21</sup> Embiya ebpekepenurù kew te menge ruma niyu, ne meambe ke kenà niyu ebpenuruen ke keniyu ne hinawa? Su iyan niyu ibpesabut te kenà meupiya se kebpeamenakew, ugaid ne iyan kew ma tekawen.

<sup>22</sup> Ibpesabut niyu te, "Kenà kew edlangkadlangkad te esawa niyu," ugaid ne iyan kew ma edlangkadlangkad te esawa niyu. Ne utew niyu igkeepes ke ledawan ne ebpengerapan te kenà Hudiyanen, ugaid ne edlusud kew ma ketà te valey te ebpengerapan dan te ledawan su wey niyu mepenakew arà.



<sup>23</sup> Ne impereyùdeyù niyu se kinekevehayi keniyu rut te penduan te Eleleala, ugaid ne sikiyu red ma ke kenà eduma. Tembù be ebpegkeyaan niyu ke Eleleala.

<sup>24</sup> Iring dut te impesurat ne Lalag te Eleleala ne egkahi te, “Kayi red ebpuun te sikiyu ne menge Hudiyänen se kegkesumpalit te Eleleala rut te menge etew ne kenà Hudiyänen.”

<sup>25</sup> Sikiyu menge suled ku ne menge Hudiyänen, iyan niyu pegitungan ne rekela te pantag din ke kinepeetus niyu, ne ruen iya rema pantag din embiya eduma kew red dut te penduan te Eleleala. Ugaid ne embiya kenà kew eduma te penduan din, ne ke kinepemeetus niyu ne warà pantag din.

<sup>26</sup> Su misan ke etew ne kenà Hudiyänen, embiya edumaan din ke penduan te Eleleala ne riyà te etuvangan te Eleleala ne iyan din kedtengteng ne arà se etew ne neetusan.

<sup>27</sup> Su ke menge etew ne warà etusi su kenà Hudiyänen, ugaid ne mibperumaruma te penduan te Eleleala, ne sikandan se puunan te ked-isuhata te Eleleala keniyu te kewagib dut te warà niyu merumai ke penduan. Su sikiyu ma perem ke midtahakan dut te penduan ne mibpemeetusan.

<sup>28</sup> Su riyà te etuvangan te Eleleala ne kenà ke etew ne in-anak te Hudiyänen etawa ke etew ne eduma te betasan te Hudiyänen te ebpeetus te lawa rin ne igketuusi te tidtu ne Hudiyänen sikandin.

<sup>29</sup> Ugaid ne iyan tidtu ne Hudiyänen diyà te etuvangan te Eleleala ne ke etew ne eduma te insuhù din ne ebpuun te lunsey te hinawa rin. Su riyà te etuvangan te Eleleala ne ke benar ne egkeetusan ne kenà ketà dà te ebpelian ke lawa te etew iring te insurat te penduan, ugaid ne ke kebmetilak te hinawa te menge etew ne riyà ebpuun dut te Kedesenan ne Ebpetuntul te Menusiyà. Ke etew ne iring kayi, ne kenà iyan edeyù ne etew, ugaid ne iyan edeyù kandin ne ke Eleleala.

### 3

<sup>1</sup> Embiya ve iring ketà se igkeamung key red se menge Hudiyänen dut te menge etew ne kenà Hudiyänen te edusaan, ne engkey en be se atag din te kegkehudiyänen dey wey kebpeemeetus dey?

<sup>2</sup> Ugaid ne rekela iya se atag din kayi te sikami ne Hudiyänen. Seveka en, ne sikami se midtehakan dut te penduan te Eleleala.

<sup>3</sup> Ne benar ne ruen menge ruma rey ne Hudiyänen ne warà mebperumaruma te penduan te Eleleala. Ugaid ne kenà egketuen te wagib te kenà egkeserihan ke Eleleala te edtuman dut te impasad din dengan.

<sup>4</sup> Su misan teruen ke langun ne menusiyà, ugaid ne ke Eleleala mulà ne warà tarù ne egkehiyen din. Su iring dut te impesurat ne Lalag te Eleleala mekeatag kandin se egkahi te,

“Kayi te langun ne lalag nu ne impekita nu ke keykew ne ketidtu. Misán ruen id-isuhát keykew ne warà ebpekepengukum keykew, su nasi pà te keykew ne egkehiyen ne iyan ebpekevenar.”

Ini ke insurat ne Lalag te Eleleala mekeatag kandin.

<sup>5</sup> Kalu ke ruen menge etew ne iyan dan ebpegitungen ne egkepakey ne ed-ulaula ki te mereat su kayi ebpuun ne egkekita te menge etew te metidtu ke Eleleala su kenà iring keytew, ketà ne kenà dait ne edusaan te Eleleala ke menge etew ne ed-ulaula te meraat. (Ini ne mibeelan dà ne lempawi dut te etew kayi te ampew te dunya.)

<sup>6</sup> Ugaid ne tarù ke lempawi ne iring ketà. Su embiya kenà metidtu ke Eleleala ne kenà egkepakey ne egkukumen din ke langun ne menge etew kayi te ampew te dunya.

<sup>7</sup> Kalu ke ruen ruma pà ne menge etew ne iyan dan pegitungan ne kenà dait ne edusaan ki te Eleleala atag dut te kedtarutarù tew, su embiya kenà kiyu egkeserihan ne maa, kenà be mepayag te munà pà ne egkeserihan ke Eleleala su warà mulà tarù din? Ne ketà kun puunan ne egkereyù dan ke Eleleala.

<sup>8</sup> Ugaid ne embiya benar arà se egkehiyen dut te menge etew ne kerupangan se ebpegitungen dan ne iyan tew ibpeiseg ke langun ne kereetayan ne ed-ululaan tew su apey egkekita ke ketidtu nevenar te Eleleala. Ugaid ne kenà benar arà misan duen menge etew ne midlivak kediey se egkahi te ini se ibpenurù ku. Edusaan te Eleleala atag dut te tarù dan, ne dait dan iya arà.

<sup>9</sup> Ne sikami se Hudiyanen, ne iyan niyu ve kunaan ke meupiya key pà dut te menge etew ne kenà Hudiyanen. Ugaid ne kenà benar. Su daan en ne impesabut ku keniyu te langun ne menge etew, Hudiyanen etawa kenà, ne elin ded ebeyvayaan te salà.

<sup>10</sup> Su ini ke impesurat ne Lalag te Eleteala ne egkahi te,

“Warà senge etew rà ne metidtu  
riyà te etuvangan te Eleteala.

<sup>11</sup> Warà senge etew rà ne nekesabut mekeatag te Eleteala;  
ne warà senge etew rà ne benar ne ebpemengà  
te ralan te kebpekesabut mekeatag kandin.

<sup>12</sup> Su langun ne menge etew ne midsuwey  
rut te tidtu ne ralan te Eleteala;  
langun dan ne iyan dà neketahù se meraat ne ulaula;  
warà seveka rà diyà te kandan ne metidtu se ulaula rin,  
misan senge etew rà.

<sup>13</sup> Iyan dà neketahù te bèbà dan ne meredsik  
iring dut te memawù ne edsengew diyà te leveng.  
Ne miduma en be imbe ketà ke tarù  
su warà tulán dut te dilà dan.  
Iring te bisa te uled ini se egemew te bèbà dan  
ne ebpekekaid.

<sup>14</sup> Warà duma ne egkehiyen dan  
ke kenà kebpendrawak te menge ruma ran.

<sup>15</sup> Iyan netahù te hinawa ran ne melemu se kebpengimatey.

<sup>16</sup> Misan endei ran ebpekesinaru ne ebpekereraat dan,  
wey ebpekerasey ran dut te menge ruma ran.

<sup>17</sup> Su warà dan metuen ke ralan  
te kenà kegkeseleti te hinawa ran te meraat,

<sup>18</sup> ne warà te hinawa ran se andek dan te Eleteala.”

<sup>19</sup> Na, nesebutan tew langun te iyan kinepesurat te Eleteala te penduan din su apey ke menge etew ne egkevehayan ketà ne ebperumaruma ran. Tembù be warà ralan te misan senge etew rà ne ebpekeparew ketà te kegkukum te Eleteala keytew su misan duen penduan te Eleteala kayi te keytew ne warà tew rumai.

<sup>20</sup> Su warà senge etew rà ne ebmetidtu riyà te etuvangan te Eleteala su atag dut te keduma rin te penduan su kenà din edtumanen te langun. Tembù be imbehey te Eleteala ke penduan su apey tew metueni se duen salà tew.

*Ke Mid-ulaula te Eleteala su Apey ki Ebmetidtu Diyà Te Etuvangan Din*

<sup>21</sup> Ugaid ne guntaani ne impayag en te Eleteala te kegkesebuti tew te ralan te kebmetidtu tew riyà te etuvangan din. Ne ini ne kenà kayi ebpuun dut te kedumai tew te penduan ni Moises, misan duen nekahi te Eleteala mekeatag te ini riyà te penduan wey riyà te impesurat din dut te menge etew ne ebpelembas te Lalag din.

<sup>22</sup> Ne ini ke impayag din ne ralan te embiya ebperetiayaan tew si Hisu Kristu ne iyan kedtengteng te Eleteala keytew ne metidtu ki riyà te etuvangan din. Su piya engkey ne etew ne ebperetiyya ki Hisu Kristu ne iyan kedtengteng kandin te Eleteala ne metidtu diyà te etuvangan din, su warà ebpedlebiyen din dut te menge etew.

<sup>23</sup> Su langun ne menge etew ne mekesesalà. Ne warè misan seveka rà ne ebpeketuntul te ibayà te Eleteala, su langun en ne nekesuwey.

<sup>24</sup> Ugaid ne egenat te raat te nanam te Eleteala keytew ne iyan din kedtengteng keytew ne metidtu. Ne warà midaat se nanam din su sapat te misan engkey en ne ulaula tew ne meupiya, ugaid ne riyà ebpuun te ki Hisu Kristu ke mibpeliyu keytew.

<sup>25</sup> Su si Hisu Kristu ke imbehey te Eleteala ne mibpebpatey mekeatag te menge salà te langun ne menge etew. Ne impetudà din ke lengesa rin su apey ke langun ne ebperetiyya kandin ne ebpehareharen din ke menge salà dan. Mid-ulaula ini te Eleteala su apey tew mesebuti te metidtu se kegkukum din kayi te midtuman din ke kedusa dut te salà tew. Su rengan ne iring te mibelahad din ke menge etew ne mibaal te salà su warà din sembuti te edusa sikandan ugaid ne midtigkeran din taman te midsuhù din si Hisu Kristu.

<sup>26</sup> Ugaid ne guntaani ne warà ebpekedsalà ne kenà din edusaan su insuhù din ki Hisus te ibpeangkun kandin ke menge salà te langun ne menge etew su apey tew egketueni guntaani te ke Eleteala ne metidtu se kegkukum din. Ne misan engkey en ne etew ne mibperetiyya te si Hisus ke mibpebpatey atag dut te salà din, ne ebpehareharen te Eleteala su riyà te etuvangan din ne iyan din kedtengteng kandan ne metidtu.

<sup>27</sup> Tembù be warà igkependantal tew te misan engkey ne ulaula tew ne meupiya. Kenà egkepakey ne egkahi ki te iyan tew kebmetidtu su midumaan tew ke penduan. Su kenà ke keduma tew rut te penduan ugaid ne sabap te kinesarig tew ki Hisu Kristu ne iyan kedtengteng te Eleteala keytew ne metidtu riyà te etuvangan din.

<sup>28</sup> Ketà be ne netuenan tew se iyan tew rà kebmetidtu riyà te etuvangan te Eleteala ne kenà kayi ebpuun te edumaan tew ke penduan, ugaid ne sabap te kedsarig tew ki Hisu Kristu.

<sup>29</sup> Kalu ke egkahi kew te ke Eleteala ne Eleteala rà dut te menge Hudiyanen ne kenà dut te kenà Hudiyanen. Kenà benar! Su sikandin dà ke Eleteala rut te langun ne menge etew, Hudiyanen sikandin etawa kenà.

<sup>30</sup> Su sebseveka rà ke Eleteala, ne sikandin ke Eleteala dut te langun ne menge etew. Ne seveka rà se ralan te ebmetidtu ke langun ne menge etew su kayi rà ini ebpuun dut te kedsarig dan ki Hisu Kristu, Hudiyanen sikandin etawa kenà.

<sup>31</sup> Ne embiaya kayi rà ebpuun te kedsarig tew ki Hisu Kristu ne egkepesehad te Eleteala ke salà tew, ne maa warà bes pantag din ke penduan? Kenà benar arà! Su sabap dut te kineperetiyaya tew ki Hisu Kristu ne midumaan tew te mevaher ke penduan.

## 4

*Si Abraham se Petugiringan te Sarig ne Iyan Ibmetidtu te Etew Riyà te Etuvangan te Eleteala*

<sup>1</sup> Na iyan meupiya ne ruen pegitungan tew mekeatag ki Abraham ke keep-epuan rangen dut te langun tew ne menge Hudiyanen su apey ki mekesabut te kenà ke keduma tew rut te penduan ne ebmetidtu ki.

<sup>2</sup> Su embiya iyan kedtengteng te Eleteala ki Abraham ne metidtu su sabap dut te meupiya ne ulaula rin, ne ruen kevenar din se ebpendantal. Ugaid ne kenà egkepakey te kebpendantal din su kenà kayi ebpuun te meupiya ne mid-ulaula rin se iyan kedtengteng te Eleteala kandin ne metidtu.

<sup>3</sup> Ne netuenan tew ini su ruen impesurat ne Lalag te Eleteala ne egkahi te, "Mibperetiyaya si Abraham dut te impasad te Eleteala kandin, tembù be iyan kedtengteng te Eleteala kandin ne metidtu."

<sup>4</sup> Embiya idsempità ta, ne ke etew ne egelevek te edsukayan ne ebyaran, ne ke sukey rin ne kenà ibehey rà dè duen su bayad dut te helevek din.

<sup>5</sup> Ugaid ne ke Eleteala, ne kenà ke meupiya ne ulaula tew se iyan din kedtengteng ne warà salà tew. Su warà ed-ul-ulaan tew ne igkevehey su apey tew idsambi te kebmetidtu tew diyà te etuvangan din, su ini ne sabap te daat te nanam din keytew ne ibehey rà dè duen. Ugaid ne sabap dut te kedsarig tew kandin ne iyan din kedtengteng keytew ne metidtu, su sabap dut te kebperetiyaya tew ne egkepesehad ke salà tew.

<sup>6</sup> Ini ve ke impesabut dengan ni Dabid te nekahi rin ke kegkehalew rut te etew ne kenà iyan din dà edserihan ne sabap dut te keupiya te ulaula rin se ebpekemetidtu kandin diyà te etuvangan te Eleteala, ugaid ne ke sarig din te Eleteala.

<sup>7</sup> Su migkahi si Dabid te,

"Mehalew nevenar ke etew  
ne nepesehad en ke salà din,  
ne mibpelilipatan en te Eleteala.

<sup>8</sup> Mehalew nevenar ke etew  
ne warè en tentenuri te Eleteala ke salà din."

<sup>9</sup> Na ini se kehelawan te etew ne nepesehad en ke salà din ne nekahi ni Dabid te engkey, kayi rè be ini te menge etew ne nengeetusan ne menge Hudiyanen? Kenà iya! Su misan ke menge etew ne kenà Hudiyanen ne ingkeamung ded dema kayi misan warà dan meetusi. Su sabap dut te Lalag te Eleteala ne netuenan tew te riyà dà nekepuun te kinesarig ni Abraham ne mibmetidtu sikandin diyà te etuvangan te Eleteala.

<sup>10</sup> Ne pegpegitunga niyu ini. Keenu telimaa te Eleteala si Abraham ne metidtu? Maa neetusan en be sikandin ketà etawa warà pà? Netuenan tew te warà pà meetusi si Abraham ne midtelimà en te Eleteala ne metidtu.

<sup>11</sup> Iyan neuna ne midsarig si Abraham te Eleteala ne arà pà ne mibpeetus sikandin su apey ruen tuus te lawa rin te kinetelimaa kandin te Eleteala te mibmetidtu sabap dut te kinesarig din te Eleteala. Ketà be ne iring sikandin te amey te langun ne menge etew ne mibperetiyaya te Eleteala, ne ke sarig dan se iyan kedtengteng dut te Eleteala kandan ne metidtu ran diyà te etuvangan din misan warà dan mebpeetus.

<sup>12</sup> Ne si Abraham dema ke amey rut te menge Hudiyanen ne eduma te betasan te kebpeetus. Ugaid ne kenà ke kinepeetus dan se puunan te iring sikandin ne amey ran,

su ke sarig dan te Eleteala se puunan iring dut te kinesarig ni Abraham te warà pà sikandin meetusi.

<sup>13</sup> Ruen impasad te Eleteala ki Abraham abpeg dut te minge kevuwaran din te ruen hewii ne ebpekeuma ne sikandan se egkemuney kayi te dunya. Iyan din kinepasad kayi su iyan din kedtengteng ki Abraham ne metidtu sabap dut te kinesarig din ne kenà sabap te midumaan din ke penduan.

<sup>14</sup> Su embiya iyan dà ebpeketelimà dut te impasad te Eleteala arà se minge etew ne eduma te penduan ne warà en pantag din se kedsarig dan te Eleteala, ne warà lavew pantag din ke pasad te Eleteala kandan su warà misan senge etew rà ne ebpeketuman dut te penduan.

<sup>15</sup> Su ke penduan ne ed-ewit te kegkeepes te Eleteala te langun ne minge etew su kenà dan ebpeketuman. Ugaid ne embiya warà penduan ne warà ma ralan te kegketueni ran te nekesurang dan.

<sup>16</sup> Ketà ne ke impasad te Eleteala ne egketelimà dut te minge etew sabap dà dut te kedsarig ta te Eleteala. Ne iyan din kineulaula ketà ne apey arà ne riyà ebpuun te raat te nanam din ne kenà sabap te nehelevekan ta. Ne kenà ke minge Hudiyanen dà ne eduma te penduan ne ebehayan ini te Eleteala, ugaid ne ibehey rin dema diyà te langun ne minge etew ne mibperetiyaya kandin iring dut te kineperetiyaya ni Abraham su sikandin ke nevaluy ne amey rut te langun tew ne mibperetiyaya.

<sup>17</sup> Su iring dut te impesurat ne Lalag te Eleteala ki Abraham rengan ne egkahi te, “Mibaluy ku sikew ne amey rut te merakel ne edsusunan te minge etew.” Ne ini se migkahi te Eleteala ne midtuman en su nevaluy rin si Abraham ne amey rut te langun tew ne mibperetiyaya iring te kineperetiyaya ni Abraham kandin. Ne ke Eleteala ne mibperetiyaya ni Abraham ne iyan ded sikandin arà ke Eleteala ne ebanew te minge minatey, su ke senge tahà dà ne lalag din ne egked-ulaula ke engkey se egkiyuhan din.

<sup>18</sup> Mibperetiyaya si Abraham te misan enduen te kenè en egketuman ke impasad kandin te Eleteala su mibpenenharan din ded lavew te kedsarig din te kebpekearen din te anak. Tembù be nevaluy sikandin ne amey dut te merakel ne edsusunan te minge etew iring te migkahi kandin te Eleteala te, “Ebmerakel ke kevuwaran niyu, ne iyan din egkeiringan ne bituen diyà te langit se kerakel dan.”

<sup>19</sup> Su arà ne hewii ne mehatu en ke rahun ni Abraham ne netuanan din se mehurang en nevenar sikandin ne warè en kearus din ne ebpekeanak pà sikandin. Ne netuanan din dema se kenà en ebpekeanak ke esawa rin si Sara, ugaid ne misan pà te iring dutun ne warà medtakas sikandin se edsarig te Eleteala.

<sup>20</sup> Warà meewà ke sarig din su kenà duwaruwa te hinawa rin ne edtumanen te Eleteala ke impasad din kandin. Ugaid ne gewii rin te ebpenenahad ne ed-ilut dema ke sarig din wey mideyù din ke Eleteala.

<sup>21</sup> Su mevaher ke hinawa rin te ruen gehem te Eleteala te edtuman dut te pasad din.

<sup>22</sup> Ne sabap dut te kedsarig ni Abraham te Eleteala ne iyan kedtengteng te Eleteala kandin ne metidtu.

<sup>23</sup> Ugaid ne arà ne impesurat ne Lalag te Eleteala rengan ne ebpesabut te iyan kedtengteng kandin te Eleteala ne metidtu ne kenà ini se insurat ne mekeatag dà ki Abraham.

<sup>24</sup> Su ingkeragkes kiyu red dema su apey iyan din kedtengteng keytew ne metidtu sabap dut te kebperetiyaya tew te sikandin ke mibanew ki Hisu ne Kerenan tew.

<sup>25</sup> Su si Hisu ke imbehey te Eleteala ne ebpebpatey mekeatag dut te minge salà tew, ne mibanew sikandin te Eleteala su apey iyan din kedtengteng keytew ne metidtu riyà te etuvangan din.

## 5

*Ini ne Mekeatag te Mibpebpatey si Hisu Kristu keytew su apey iyan Kedtengteng te Eleteala ne Metidtu ke Menge Etew ne Mibperetiyaya kandin*

<sup>1</sup> Na keta ne netuanan tew te riyà te etuvangan te Eleteala ne iyan din kedtengteng keytew ne metidtu kiyu sabap dut te kebperetiyaya tew ki Hisu Kristu. Ne kayi te kebpebpatey ni Hisu ne melintad en se hinawa tew su neawà ke epes te Eleteala mekeatag dut te salà tew.

<sup>2</sup> Su sabap dut te kebperetiyaya tew ki Hisu ne netelimà tew en ke tavang te Eleteala te in-ulug din ke raat te nanam din keytew. Ketà be ne egkehalew ki su ruen ebpeneregen tew ne hewii ne ebpekeamung ki red te Eleteala riyà te ed-ubpaan din ne kenà igkeupama se keupiya rin.

<sup>3</sup> Ne kenà ketà dà taman ke kehelawan tew. Su ke kinekereheni tew te keduma ki Hisu Kristu ne kehelawan tew rema su netuenan tew te ini se egkevaluy ne tavang keytew te egkehuruwan tew te kedtigker.

<sup>4</sup> Ne embiya nehuruwan tew te kedtigker dut te kemerehenan ne ebpekesuhat ki te hinawa te Eleteala. Ketà be ne netuenan tew te egketuman ini se ebpenerengen tew diyà te Eleteala.

<sup>5</sup> Ne kenà ki ebpekegkeyà kayi te kebpenareng tew su benar ini ne edtumanen te Eleteala sabap dut te pengelimuman din keytew. Ne ini se limù din ne riyà din ipepevayà dut te Kedesenan ne Ebpetuntul te Menusiyà ne imbehey rin keytew.

<sup>6</sup> Na pegitunga niyu ma ke pengelimuman keytew te Eleteala, su rengan te warà kiyu pà mebperetiyya ne warà dalan te kegkegaga te meupiya ne ulaula tew su iring te uripen kiyu te salà tew, ugaid ne neuma en ke hewii ne andang ne midtendù te Eleteala ne mibpepatey si Hisu Kristu su selidig te langun tew ne mekesesalà.

<sup>7</sup> Kayi te keyta ne netuenan tew te merelag dà se etew ne idselidig din te umur din dut te etew ne metidtu. Ugaid ne egkepakey vuwa ne ruen etew ne edselidig te umur din dut te meupiya ne etew ke edait ne edtevangan.

<sup>8</sup> Ugaid ne impayag te Eleteala ke pengelimuman din keytew su midsuhù din si Hisu Kristu te ebpepatey mekeatag keytew te mekesesalà ki pà.

<sup>9</sup> Ne geina te mibmetidtu ki en diyà te etuvangan te Eleteala sabap dut te lengesa ni Hisus ne impetudà din keytew, ne iyan pè be kenà muna pà se kebpeleyu rin keytew dut te kesusai te Eleteala te salà tew keuremà.

<sup>10</sup> Su rengan ne kunterà ki pà te Eleteala, ugaid ne sabap dut te kinepatey te Anak din si Hisu Kristu ne guntaan ne imped-ulit ki en diyà te etuvangan din. Ne embiya ve iring ketà te imped-ulit ki en, ne wey ki pè be maa kenà nikandin ipeliyu rut te kesusai keytew su neviviyag en ke Anak din si Hisu Kristu.

<sup>11</sup> Ne kenà ketà dà taman, su rekela se kegkehalew tew mekeatag dut te pengelimuman te Eleteala ne impekita rin keytew te kinepatey ni Hisu Kristu ke Kerenan tew, su sikandin ke ralan te imped-ulit ki diyà te etuvangan te Eleteala.

*Ke Egketemanan dut te Mid-ulaula ni Adan wey ke Egketemanan dut te Mid-ulaula ni Hisu Kristu*

<sup>12</sup> Geina te mibaal te salà si Adan rengan, ne arà se puunan te etew ne ebaal te salà kayi te ampew te dunya. Ne geina te nekevaal sikandin te salà ne mibehayan te Eleteala sikandin te kemetayen. Tembù be langun ne minge etew ne ebpepatey su langun ne mibelidsalà.

<sup>13</sup> Rengan te warà pà insuhù te Eleteala ke penduan ne imbehey rin ki Moises, ne mibelidsalà en ke langun ne minge etew. Ugaid ne warà din pà itahù te hinawa ke salà dan su warà din pà ikevehey ke penduan ne ebperumaan kandan.

<sup>14</sup> Ne inggenat dut te hewii te nekedsalà si Adan taman dut te hewii ne imbehey en ke penduan diyà te ki Moises, langun ne minge etew ne mibpatey sabap dut te minge salà dan, misan ke salà dan ne kenà iring dut te salà ni Adan te midsurang din ke insuhù kandin te Eleteala.

Ne ruen ketà te mid-ulaula ni Adan ne ebpekeiring dut te ebpeketundug kandin ne si Hisu Kristu.

<sup>15</sup> Ugaid ne kenà ke mid-ulaula ran se neked-iring su si Hisu Kristu ne kenà din iyan mibpeneheewit kayi te ampew te dunya ne salà iring ki Adan, ugaid ne iyan din mibpeneheewit ne raat te nanam te Eleteala ne ibehey rin dè duen su apey ebpehad te minge salà tew. Su atag dut te salà te senge etew rà ne si Adan, ne langun ne minge etew kayi te ampew te dunya ne ebpepatey. Ugaid ne atag dut te raat te nanam te Eleteala, ne imbehey rin ki Hisu Kristu su apey ruen ralan te ebpekeliyu kiyu rut te salà tew. Tembù be iyan pà rekela ke raat te nanam te Eleteala keytew dut te kedusa te salà ni Adan.

<sup>16</sup> Ne ruen ebiraan te egketemanan dut te mid-ulaula ran su iyan egketemanan dut te salà ni Adan ne egkukumen te kesusaa te langun ne minge etew. Ugaid ne iyan egketemanan dut te mid-ulaula ni Hisus ne misan ruen merakel ne salà te minge etew, ne egkepesehad dan te Eleteala su sabap dut te imbehey rin dè duen ne raat te nanam din su apey iyan din kedtengteng kandan ne metidtu diyà te etuvangan din.

<sup>17</sup> Uya, sabap dut te salà te senge etew ne si Adan ke langun ne minge etew ne ebpepatey. Ugaid ne sabap dut te mid-ulaula te senge etew ne si Hisu Kristu ne muna pà se gehem ne egkekita. Su impekita te Eleteala ke rekela ne daat te nanam din kandan ibepevayà te kinepatey ni Hisu Kristu, ne piya engkey ne etew ne edsarig dut te mid-ulaula rin

ne iyan kedtengteng kandan te Eleteala ne metidtu. Ne ebehayan dan te umur ne warà edtemanan din wey egkeseveka ran dut te Eleteala te kebayàbayà din.

<sup>18</sup> Ketà be ne netuenan tew te sabap dut te salà te senge etew ne si Adan ne nesuhat te kukuman te kedusaa te langun ne munge etew. Iring din ded dema arà te metidtu ne mid-ulaula te senge etew ne si Hisu Kristu te mibpeimatey, ne ibpeliyu rin ke langun ne munge etew te kedusa kandan te Eleteala su apey ran meketelimà te umur ne warà edtemanan din.

<sup>19</sup> Su sabap dut te senge etew ne warà miduma rut te insuhù kandin te Eleteala, ne nevaluy ke langun ne munge etew ne mekesesalà. Ne engketà ded dema ne riyà ebpuun te senge etew ne si Hisu Kristu ne miduma rut te insuhù te Eleteala kandin, ne ke langun ne munge etew ne mibperetiyya kandin ne iyan din kedtengteng kandan ne metidtu diyà te etuvangan din.

<sup>20</sup> Iyan kinevehey te Eleteala te penduan su apey tew metueni te ed-iseg ke salà tew kandin. Ugaid ne kayi te ked-iseg pà te salà tew ne iyan muna pà se kerekelà dut te raat te nanam te Eleteala ne edtavang keytew.

<sup>21</sup> Ketà ne nesebutan tew te neuripen ki te salà rengan ne ebpekepeneheewit keytew riyà te kepepatey. Ugaid guntaani ne sabap dut te raat te nanam te Eleteala te mibpepatey ke Anak din si Hisu Kristu ke Kerenan tew, ne iyan kedtengteng te Eleteala keytew ne metidtu ne ibehey rin keytew ke umur ne warà edtemanan din riyà te etuvangan te Eleteala.

## 6

*Ini ne Mekeatag Dut te Ked-ungung ta ki Hisu Kristu wey ke Kegkevanew ta Red Dema su Apey Tew Ed-engkeri Ke Meraat ne Ulaula Tew*

<sup>1</sup> Na kalu ke ruen munge etew ne iyan dan kunaan ke ibpeiseg tew pà lavew ke meraat ne ed-ul-ulaan tew su apey egkeumanan pà ke ibpekita keytew te Eleteala ne raat te nanam din.

<sup>2</sup> Kenà en iya! Su ketà te kinepesakup ta ki Hisus ne iring ki te minatey ne munge etew su neewaan tew en ke raan ne meraat ne ulaula tew, engketà be ne kenà egkepakey ne ed-iseg ki pà lavew ne ed-ulaula te meraat.

<sup>3</sup> Su netuenan tew en te ketà te kebunyahi keytew ne tuus arà te kebpekidseveka tew ki Hisu Kristu, ne tuus dema te ketà te kinepatey rin ne iring te nekeunung ki red kandin.

<sup>4</sup> Uya, ketà te kebunyahi keytew ne tuus te nekeunung ki te kemetayen din wey ke kineleveng kandin su apey ki mekeamung dut te behu ne kegkeuyag iring ki Hisu Kristu te mibanew impepeyayà dut te gehem te Amey tew ne Eleteala.

<sup>5</sup> Su embiya benar ne mibpekidseveka ki ki Hisus ketà te kinepatey rin su inselidig sikandin keytew te Eleteala, ne benar ne elin ki red dema egkevanew keuremà iring dut te kinevanew kandin.

<sup>6</sup> Su netuenan tew te andang ki en ne etew ne mekesesalà, ugaid ne ke daan ne ke eetawi tew ne meraat ne nekeunung en ketà te kinelensanga ki Hisus diyà te pinebelavag ne kayu su apey ke kiyug tew te ed-ulaula te meraat ne egkeengked en su apey kenà ki en egkeuripen dut te betasan tew ne meraat.

<sup>7</sup> Su ke etew ne minatey en ne nekeliyu en te kebayàbayà te salà.

<sup>8</sup> Na geina te netuenan tew en te ketà te kinepatey ni Hisus ne iring te nekeunung ki en kandin, ne netuenan tew te egkevanew ki red dema su ruen en egkevehu ne umur tew iring kandin.

<sup>9</sup> Su netuenan tew se nevanew en si Hisu Kristu, ne kenà en maa egkepakey ne ebpatey pà sikandin su warè en ke kemetayen diyà te kandin.

<sup>10</sup> Kesevekà rà sikandin minatey, ne warè en kegkeseupi rin. Ne sabap dut te kinepatey rin ne midereetan din en ke gehem te salà ne ebayàbayà keytew, su nevanew en sikandin ne iyan din ed-ul-ulaan ke igkereyù te Eleteala.

<sup>11</sup> Ne engketà ded dema keniyu, su tentenuri niyu te iring kew te minatey su nekeunung kew rut te kinepatey ni Hisu Kristu ne neawà en kayi te keniyu ke gehem te salà. Ne geina te kebpekidseveka niyu ki Hisu Kristu ne iyan niyu rà ul-ulaa ne endei se igkereyù te Eleteala.

<sup>12</sup> Tembù be kenà niyu en iluhut se iyan pà ebpekevayàbayà dut te lawa niyu ne ke ulaula ne meraat. Su embiya ini se ed-ul-ulaan niyu, ne ebpekeruma kew red dut te egkiyuhan niyu ne meraat.

<sup>13</sup> Kenà niyu iluhut te misan endei rapit te lawa niyu te ed-ulaula te meraat, ugaid ne iyan niyu luhuti ne Eleteala se ebayàbayà keniyu te piya engkey ne metidtu ne ulaula ne

kiyug din. Su iyan ini edait keniyu geina te nekeliyu kew en te kemetayen ne mibehayan kew en te behu ne kegkeuyag.

<sup>14</sup> Su rangen te iyan niyu pà edumaan ke penduan, ne iring te iyan pà mibayàbayà keniyu ke salà su warà kew meketuman rut te penduan. Ugaid ne geina te impayag en te Eleteala ke daat te nanam din keniyu ne kenà en salà se ebayàbayà keniyu.

<sup>15</sup> Kalu ke ruen menge etew ne iyan dan kunaan ke geina te kenà tew en edumaan ke penduan ni Moises ne misan ibpeiseg tew ke meraat ne ed-ul-ulaan tew enderayi ma su ruen en daat te nanam te Eleteala keytew. Ugaid ne kenà arà egkepeakey!

<sup>16</sup> Su netuenan niyu te piya endei kew ebpesakup ne arà se ebayàbayà keniyu su embiya idsempità ta ne iring kew te uripen din. Ne engketà ded dema ke etew ne iyan ed-uripen kandin ke meraat ne ed-ul-ulaan din, ne edusaan sikandin te kepepatey ne warà edtemanan din. Ugaid ne ke etew ne idrumakan din ke hinawa rin te eduma te Eleteala, ne iyan kedtengteng kandin te Eleteala ne metidtu riyà te etuvangan din.

<sup>17</sup> Rengan ne iring te iyan mid-uripen keniyu ne salà, ugaid ne guntaani ne mibpeselematan ku ke Eleteala su intahù niyu iya te hinawa ke keduma niyu rut te tidtu ne penurù te Eleteala ne impenurù keniyu.

<sup>18</sup> Na guntaani ne iyan ebayàbayà keniyu ne ke metidtu en ne ulaula, su nevelukasan kew en te Eleteala rut te salà ne mid-uripen keniyu.

<sup>19</sup> Iyan ku insemptità ke egked-ulaula te uripen su apey niyu melemu mesebuti ke impenurù ku keniyu, su ini se kebperetiyaya niyu ne warà pà mekedalid. Su rangen ne iring te mibpeuripen kew te meraat su inrumakan niyu ke lawa niyu te ed-ulaula te meredsik wey ke meraat ne ed-isab pà. Ugaid ne guntaani ne iyan iya se ivehey niyu ke lawa niyu riyà te Eleteala te edtuman te ulaula ne metidtu su apey kew metilak diyà te etuvangan din.

<sup>20</sup> Su rangen te iyan pà ebpengunguripen keniyu ke meraat ne ulaula niyu, ne warà te hinawa niyu te eduma rut te metidtu ne ulaula ne ebpekesuhat te hinawa te Eleteala.

<sup>21</sup> Maa, engkey se keupianan ne netelimà niyu ketà te meraat ne ulaula niyu rangen ne igkeyeyai niyu guntaani? Warà! Su embiya ibpeiseg niyu pà ne menge ulaula arà, ne warà duma ne edungguan din ke kenà kemetayen ne warà edtemanan din.

<sup>22</sup> Ugaid ne guntaan ne mibelukasan kew en te Eleteala rut te salà ne mid-uripen keniyu, ne nevaluy kew en ne uripen te Eleteala. Ne rekela se keupianan niyu su ebmetilak ke hinawa niyu, ne egketelimà niyu ke umur ne warà edtemanan din.

<sup>23</sup> Su iyan bayad te kebpekedsalà ne kemetayen ne warà edtemanan din, ugaid ne iyan ibehey te Eleteala rut te menge etew ne mibperetiyaya ki Hisu Kristu ke Kerenan tew ne umur ne warà edtemanan su sabap dut te pengelimuan din ne imbehey rin dà dè duen.

## 7

*Ke Sempità Mekeatag dut te Ureding ne Ebayàbayà te Etew ne Nekeesawa en ne Id-upama te Etew ne Mibperetiyaya ki Hisus wey ke Keduma Rin dut te Penduan ni Moises*

<sup>1</sup> Menge suled, nesebutan tew en ke engkey se ureding te gubirnu tew, ne netuenan tew red dema te sakup ki rut te nekahi te ureding taman te uviyag ki pà. Ugaid ne embiya ebpatay ki en ne kenà kiyu en ebpekeperumaruma ketà te nekahi te ureding.

<sup>2</sup> Upama ke meritan ne nekeesawa en, kahi rut te ureding ne iyan ebayàbayà kandin ne ke esawa rin taman te biviyag pà sikandin. Ugaid ne embiya minatey en ke esawa rin, ne egkepeakey en maa ne edsaup ed-esawa arà se meritan.

<sup>3</sup> Ugaid ne embiya warà pà mebpatay ke esawa rin ne ebpekiduma sikandin wey ebpekid-ulid te senge etew ne meama, ne nesurang din en ke ureding su geina te midlangkad din ke esawa rin. Ugaid embiya ebpatay en ke esawa rin, ne egkepeakey en ne edsaup ed-esawa sikandin su kenà en egkesuhat sikandin dut te ureding su nekeliyu en sikandin dut te ureding mekeatag te kebpeeseweey.

<sup>4</sup> Ne engketà ded imbe ke langun tew, menge suled, su rangen te kinepatay ni Hisus ne iring te nekeunung ki en ketà. Tembù be kenà ki en be ebeyveyaan dut te penduan ni Moises su nekeliyu ki en te keduma ketà. Guntaani ne nevaluy ki en ne sakup ni Hisu Kristu ne nevanew en su apey iyan tew metuman ke kiyug te Eleteala.

<sup>5</sup> Su rangen te warà ki pà mebperetiyaya ne iyan mibayàbayà keytew ke meraat ne ulaula tew, ne nekeiseg ke meraat ne ed-ul-ulaan tew ketà te netuenan tew ke imbandù te penduan. Ne geina te iring ketà se mid-ulaula kiyu te meraat, ne iyan tew rà ebpenerengen ne kepepatey ne warà edtemanan din.

<sup>6</sup> Ugaid ne geina te midsarig ki en ki Hisus ne iring te nekeunung ki en dut te kinepatay rin, ne nekeliyu ki en dut te keduma te penduan ni Moises ne mibayàbayà keytew. Su rangen te iyan tew pà edumaan ke penduan ni Moises, ne warà kiyu meketuman dut te

kiyug te Eleteala. Ugaid ne guntaani ne ebpekegaga kiyu en ne edtuman dut te kiyug te Eleteala ibpepevyà dut te tavang te Kedesenan ne Ebpetuntul te Menusiyà.

*Ke Atag dut te Penduan te Eleteala ne Imbehey ki Moises*

<sup>7</sup> Kalu ke ruen menge etew ne iyan dan egkepegitung ne meraat ke penduan ni Moises su nekeiseg ke meraat ne ed-ul-ulaan tew te netueanan tew ke imbandù te penduan. Kenà arà! Su embiya warà penduan ne mibpayag ke engkey se salà ku, ne kenà ku egketueanan. Su upama kenà ke penduan se migkahi te, "Kenà ka egkeima te kearen te ruma nu," ne warà ku mesebuti se salà bes ini se kegkeima ku.

<sup>8</sup> Su andang ad ne mekesesalà, ugaid ne guna su impesabut kediey te penduan te salà ini se kegkeima ne lemban en ne mid-iseg se kegkeima ku wey ke salà ku. Su embiya warà penduan ne ebandù keytew te ulaula ne meraat, ne warà dema kegketuani tew te salà bes arà ne ned-ulaula.

<sup>9</sup> Su pehaney te warà ku pà metuani ke engkey se insuhù te penduan, ne iyan ku kunaan ke warà salà ku su warà penduan ne mibpesekupan ku. Ugaid ne guna su netueanan ku en ke penduan, ne neimemanan ku rema se mekesesalà e ves, ne edusaan a te kepepatey ne warà edtemanan din.

<sup>10</sup> Ketà be ne ini se penduan ne imbehey te Eleteala te kebpeketelimà tew te umur ne warà edtemanan din embiya kenà tew edsurangen, ne iyan ded ebpekepeneheewit kedì te kepepatey ne kenà edtaman su warà a ma meketuman te penduan.

<sup>11</sup> Iring te mid-ekalan a rut te salà ku su in-iseg ku pà ke meraat ne ulaula ku ne imbandu dut te penduan te kenà ku kebpeketuman. Ne arà se igkukuma kediey te kepepatey ne warà edtemanan din su nekesurang a te insuhù te Eleteala dut te penduan.

<sup>12</sup> Ketà be ne warà meraat ne nekeselet dut te penduan, ugaid ne etew rà. Su langun ne insuhù te Eleteala ne keupianan dà wey ketidtu.

<sup>13</sup> Kalu ke ruen egkahi te embiya meupiya rà ke penduan ne meambe ke ini se puunan te kegkepeneheewit kedì te kepepatey ne warà edtemanan din? Ugaid ne kenà ded arà! Su kayi iya ebpuun te salà ku te nekesurang a rut te meupiya ne insuhù te penduan ne arà ke kedusai kedì te kepepatey su apey igkepesabut kedì te meraat nevenar se kebpekedsalà.

*Ke Deruwa ne Kiyug te Menge Etew ne Ebpekedlewanà*

<sup>14</sup> Netueanan tew te meupiya ke penduan te Eleteala su riyà ebpuun te kandin. Ugaid ne siaken ne geina te etew a rà ne ruen ded meraat ne netahù te hinawa ku, ne iring a te uripen su iyan ebayàbayà kedì ne ke salà ku.

<sup>15</sup> Ne kenà ku egkesebutan ke ed-ul-ulaan ku. Su ke meupiya ne igkesuati ku te ed-ulaula ne kenà ku iyan egked-ulaula, ugaid ne ke meraat ne igkeepesi ku te ed-ulaula ne nasi manen ne iyan ku ed-ul-ulaan.

<sup>16</sup> Ne embiya egked-ulaula ku pà ke kenà ku egkesuatan te ed-ulaula, ne tuus ini te ebpehimbena a te metidtu ke penduan.

<sup>17</sup> Ketà be ne ini se meraat ne mid-ulaula ku ne kenà kayi ebpuun te keputian te atey ku, ugaid ne kayi en ini ebpuun dut te salà ne ebayàbayà kedì.

<sup>18</sup> Netueanan ku te warà deisek dà ne meupiya ne kayi ebpuun te daan ne kegkeetew ku. Su misan egkiyug a ne ed-ulaula te meupiya, ne kenà ku egketuman.

<sup>19</sup> Su ke meupiya ne egkiyuhan ku te ed-ulaula ne kenà ku egketuman; nasi pà te ke mereatey ne igkeepesi ku te ed-ulaula ne iyan ku maa egketuman.

<sup>20</sup> Embiya egked-ulaula ku ini se kenà ku perem ed-ul-ulaan, ne kenè en egenat te keputian te atey ku se ed-ulaula ketà, ugaid ne iyan en ed-ulaula ne ke mereatey ne ebayàbayà te lawa ku.

<sup>21</sup> Ne layun iya iring kayi se egketemanan ku ne edsuhù kedì. Su misan egkiyuhan ku te ed-ulaula te meupiya, ne iyan ed-ahew ke meraat ne ebayàbayà te lawa ku.

<sup>22</sup> Su kayi te ginawa ku ne dekelà se kiyug ku te edtuman dut te insuhù te Eleteala.

<sup>23</sup> Ugaid ne ini se meraat ne ebayàbayà te lawa ku ne edsuhù kedì te ed-ulaula te mereatey ne ebpekesurang dut te meupiya ne egkiyuhan ku kayi te hinawa ku ne eduma te insuhù te Eleteala. Tembù be iring te ebpepiley ran taman te kayi a ebpekeruma te meraat, su iring a te uripen dut te mereatey ne ebayàbayà te lawa ku.

<sup>24</sup> Merasey nevenar ini se egketemanan ku! Ne engkey rà buwa se ebpekevelukas kediey dut te mereatey ne ebayàbayà te lawa ku ne ebpepeneheewit kediey te kemetayen ne warà edtemanan din?

<sup>25</sup> Ne rekela se kinepeselamat ku te Eleteala su imbehey rin si Hisu Kristu ke Kerenan tew ne ebpekevelukas kedì su apey kenà en iyan ebayàbayà kediey ne ke meraat.



Su ruen ini se deruwa ne egketemanan ne edsuhù kedi su ruen kayi te hinawa ku ne eduma te insuhù te Eleteala, ugaid ne ruen dema ke meraat ne ebayàbayà kediey ne edsuhù te ibpetuman kedi ke meraat.

## 8

*Ini ne Mekeatag te Kedesenan ne Ebpetuntul te Menusiyà ne Ebehey te Behu ne Kegkeuyag Tew*

<sup>1</sup> Sikitew ne mibpekidseveka en ki Hisu Kristu, ne warè en kedusai keytew te Eleteala te kemetayen ne warà edtemanan din.

<sup>2</sup> Su sabap dut te sarig tew te neseveka ki ki Hisu Kristu, ne ruen behu ne kegkeuyag ne imbehey keytew te Kedesenan ne Ebpetuntul te Menusiyà. Tembù be impeliyu ki en nikandin dut te salà ne mibayàbayà te lawa tew su apey kenà kiyu en edusaa te kemetayen ne warà edtemanan din.

<sup>3</sup> Su ke keduma tew te penduan ne kenà arà se kebpekeliyu tew te salà ne ebayàbayà te lawa tew su geina te warà tew megaga te edtuman ke penduan. Ugaid ne Eleteala red se mibpelihaun keytew dut te kinekeuripen tew te salà, su midsuhù din ke Anak din si Hisu Kristu kayi te ampew te dunya ne pinebaluy rin ne etew iring keytew, ugaid ne warà salà din. Ne kayi te kinepebpatay rin mekeatag te salà tew, ne pineliyu ki te Eleteala rut te kebayàbayà te salà te lawa tew.

<sup>4</sup> Ini ke mid-ulaula te Eleteala su apey langun tew te mibperetiyya kandin ne ebpekeliyu rut te salà ne ebayàbayà te lawa tew, su apey tew egketuman ke metiditu ne nekahi rut te penduan. Ne egketuman tew ini su kedumai keytew rut te Kedesenan ne Ebpetuntul te Menusiyà ne edtavang keytew.

<sup>5</sup> Su ke menge etew ne edtuman ke kandan dà ne kiyug, ne iyan dà netahù te itungan dan ne ke kiyug dan dà ne meraat. Ugaid ke menge etew ne edtuman dut te kiyug te Kedesenan ne Ebpetuntul te Menusiyà, ne iyan dekelà ne netahù te itungan dan ne ke keduma ran te kiyug te Kedesenan ne Ebpetuntul te Menusiyà.

<sup>6</sup> Su embiya iyan netahù te itungan te etew se kandin dà ne kiyug ne meraat, ne iyan din egketemanan ne edusaan te kemetayen ne warà edtemanan din. Ugaid ne embiya iyan netahù te itungan din ne ke kiyug dut te Kedesenan ne Ebpetuntul te Menusiyà ne iyan din egketemanan ne ruen kegkeuyag din wey kelinew te hinawa rin.

<sup>7</sup> Su ke etew ne iyan netahù te itungan din ke kandin dà ne kiyug ne meraat, ne kunterà sikandin te Eleteala. Su kenà din edumaan ke nekahi rut te penduan te Eleteala, ne iyan benar ne kenà din egkegaga te edtuman.

<sup>8</sup> Ne ke menge etew ne eduma rut te kandan dà ne kiyug, ne warà ulaula ran ne ebpekesuhat te hinawa te Eleteala.

<sup>9</sup> Ugaid ne sikiyu ve mulà, ne kenà en ke keniyu rà ne kiyug se edtumanen niyu su iyan niyu en edtumanen ne ke kiyug dut te Kedesenan ne Ebpetuntul te Menusiyà ne ed-ubpà riyà te hinawa niyu guntaan. Ugaid ke etew ne warà pà mekeubpà diyà te hinawa rin ini se Kedesenan ne Ebpetuntul te Menusiyà ne midsuhù ni Hisu Kristu, ne kenà pà sakuw sikandin ni Hisu Kristu.

<sup>10</sup> Ugaid ne embiya si Hisu Kristu se ed-ubpà diyà te hinawa niyu ne misan ebpatay ini se lawa niyu su geina te ruen salà niyu, ne ke gimukud niyu ne ed-ubpà diyà te Eleteala taman te taman su iyan din kedtengteng keniyu ne metiditu riyà te etuvangan din.

<sup>11</sup> Ke Eleteala ne mibanew ki Hisu Kristu. Ne iring ketà se egketemanan niyu su embiya diyà ed-ubpà te hinawa niyu ke Kedesenan ne Ebpetuntul te Menusiyà ne midsuhù din, ne ebenawen kew red dema nikandin su atag dut te Kedesenan ne Ebpetuntul te Menusiyà ne ed-ubpà te hinawa niyu.

<sup>12</sup> Ketà be, menge suled, geina te sikitew ke ed-ubpaan dut te Kedesenan ne Ebpetuntul te Menusiyà ne iyan iya se ebperumdumaan tew ke kiyug din, ne kenà tew en edumaan ke meraat ne neketahù te itungan tew.

<sup>13</sup> Su embiya iyan tew edumaan ke meraat ne kiyug ne neketahù te itungan tew, ne edusaan ki te kemetayen ne warà edtemanan din. Ugaid ne embiya kayi ebpuun dut te tavang te Kedesenan ne Ebpetuntul te Menusiyà ne ed-engkeran tew en te eduma ke meraat ne kiyug ne neketahù te itungan tew, ne egkevehayan ki en te behu ne kegkeuyag tew.

<sup>14</sup> Su ke menge etew ne ebpeming wey eduma dut te nekahi te Kedesenan ne Ebpetuntul te Menusiyà, ne sikandan ne menge anak te Eleteala.

<sup>15</sup> Su geina te imbehey en te Eleteala keytew ke Kedesenan ne Ebpetuntul te Menusiyà ne kenà ki en egkevaluy ne uripen ne egkeandek te Eleteala iring dut te rengan, su nevaluy ki en ne menge anak din. Ne sabap dut te gehem dut te Kedesenan ne

Ebpetuntul te Menusiyà ne imbehey rin keytew ne egkepakey en ne ed-amey ki te Eleteala.

<sup>16</sup> Su ke Kedesenan ne Ebpetuntul te Menusiyà se ebpesabut dut te hinawa tew te sikitew ne minge anak ki en te Eleteala.

<sup>17</sup> Ne geina te nevaluy ki en ne tuneu ne anak din, ne ruen hewii ne ebpekeuma ne egketelimà tew ke langun ne keupianan ne impasad din keytew, ne kenà arà dà su langun te keupianan ne imbehey rin ki Hisus ne ebpeketelimà ki red dema. Su embiya edrumerasey ki guntaan sabap dut te keduma tew ki Hisu Kristu, ne ebpekeamung ki dut te kebpepurù kandin keuremà.

*Ini ne Mekeatag te Ebehuwen dut te Eleteala ke Langun ne Midlimbag din ketà te Hewii ne Ebehuwen din ke Langun ne Minge Anak din*

<sup>18</sup> Embiya ebpepegitungen ku te ini se keresayan tew guntaani kayi te ampew te dunya, ne warà dà mekeiring te sulu te kingking dut te dekelà ne keupiya te Eleteala ne ibehey rin keytew keuremà.

<sup>19</sup> Ne meilit nevenar se kebpenareng dut te langun ne midlimbag te Eleteala te ebpekeuma ke hewii ne kebpayag te Eleteala te kandin ne minge anak.

<sup>20</sup> Su ke langun ne nelimbag din ne neredisikan dut te salà te neuna ne etew rengan; ugaid ne arà se kinekeredsiki ran ne warè ded kebpekeiseg din su egeleveken ded te Eleteala ke engkey se egkiyuhan din kandan. Ugaid ne misan pà te iring ketà ne ruen pà kebpenareng dan,

<sup>21</sup> te ruen gewii ne ebpekeuma ne warè en kegkeredak dut te langun ne nelimbag din, ne egkevehu ke langun iring te kegkevehu te langun ne minge anak te Eleteala.

<sup>22</sup> Ne netueanan tew se langun ne nelimbag din igenat dà dut te neuna taman dut te guntaani en ne egkerasey en iring te meritan ne ebeliliten.

<sup>23</sup> Su ke kenà arà dà se nelimbag din se egkerasey su misan sikitew ne neketelimà en dut te Kedesenan ne Ebpetuntul te Menusiyà su ini se neuna ne ibehey rin dut te minge mibperetiyaya ne egkerasey ki red dema. Su ebpenerengen tew ke kebpekeuma dut te arà ne hewii ne ed-imasaren te Eleteala ke ked-anak-anak din kenitew ne ruen behu ne lawa tew ne warè en kebpekepevayà din te sakit wey kepepatey.

<sup>24</sup> Ne impeliyu kiyu en te Eleteala rut te kersasaan tew te kepepatey, ugaid ne ruen pà egkepenareng tew. Ne embiya ruen pà egkepenareng tew ne iyan tew egkesebutan te warà pà med-ulaula ini se egkepenareng tew, su warà etew ne ebpenareng pà te ned-ulaula en.

<sup>25</sup> Ugaid ne geina te warà pà med-ulaula arà se egkepenareng tew, ne kenà ki egkeperà gewii te edthead ki pà.

<sup>26</sup> Ne kenà arà dà se egkepenareng tew ne ebpeketavang kayi te kebmeluvey tew su ke Kedesenan ne Ebpetuntul te Menusiyà se ebpeketavang keytew rema. Upama ke ebpengeningeni ki te Eleteala ugaid ne kenà tew egketueanan ke engkey se kebuyù tew, ne ke Kedesenan ne Ebpetuntul te Menusiyà se ebpemuyù keytew diyà te etuvangan te Eleteala su sikandin se ebpesabut ke engkey se netahù te hinawa tew ne kenà tew en egketueanan te edlalag.

<sup>27</sup> Ne ke amey tew ne Eleteala se netau ke engkey se kayi te hinawa tew, ne netueanan din ded dema ke engkey se riyà te itungan te Kedesenan ne Ebpetuntul te Menusiyà. Su arà se ebpemuyuen te Kedesenan ne Ebpetuntul te Menusiyà mekeatag keyta, ne arà iya dema ke kiyug te Eleteala ne ibehey rin keytew te minge anak din.

<sup>28</sup> Ne sikitew ke mibpemili te Eleteala te iyan nerumaan ke netahù te itungan din, netueanan tew te langun ne egketemanan tew ne ebeluyen din ne keupianan tew kayi te keytew ne egkelimù kandin.

<sup>29</sup> Su daan en ne netueanan te Eleteala ke engkey se ebperetiyaya kandin, ne sikandan se nepemili din neraan su apey sikandan ne ebpekeiring ki Hisus ke Anak din. Iyan din ked-iringa ketà su apey sikitew ne mibperetiyaya ne ebpekeiring ki te ari rà ne anak din ne iyan tew kakey ne si Hisus.

<sup>30</sup> Ketà be ne mibpemili te Eleteala ke langun ne minge etew ne netueanan din neraan ne ebperetiyaya kandin. Ne langun tew ne mibpemili din ne iyan din kedtengteng keytew ne metidtu riyà te etuvangan din. Ne langun tew ne iyan din kedtengteng ne metidtu ne ebpekeamung kiyu dut te kebpepurù din te Anak din.

*Engkey se Egkepeiringan Tew Mekeatag te Limù te Eleteala Keytew?*

<sup>31</sup> Na geina te netueanan tew ke langun ne mid-ulaula te Eleteala te kebpekita rin dut te limù din keytew, ne netueanan tew se benar iya ne kayi medtampil ke Eleteala te keytew, ne warà ebpekekaid keytew.

<sup>32</sup> Su misan ke Anak din si Hisus ne warà din pekinuhuni, ugaid ne midsuhù din kayi te ampew te dunya su apey ebpekepeimatey ne idselidig kenitew atag dut te salà tew. Ne embiya iring ketà ke pengelimuman din keytew, ne kenà egkepakey ne kenà din ibehey keytew ke langun ne kurang tew.

<sup>33</sup> Warà etew ne ebpekessumbung dut te sikitew ne mibpemilì te Eleteala, su riyà te etuvangan din ne iyan din kedtengteng keytew ne metidtu.

<sup>34</sup> Ne warè en ebpekekahi te dait ne edusaan ki, su mibpebpatey si Hisu Kristu ne inselidig te minge salà tew. Ne kenà ketà dà taman su nevanew en dema sikandin ne guntaani ne riyà sikandin te egkekewanan te Eleteala se ebpeninindig keytew.

<sup>35</sup> Ne embiya iring ketà, ne warà misan engkey en ne ebpekepebelag keytew rut te limù ni Hisu Kristu. Su misan egkerasey ki, egkemutuwan ki, ebpekesekitan ki te ruma tew, egkerasey ki te vitil etawa te kewewereey, ebpekekeiran ki etawa ed-imetayan ki, ne netuenan tew te kenà egkeawà ke kerekelà te limù ni Hisus keytew.

<sup>36</sup> Su iyan din egkeiringan ke impesurat ne Lalag te Eleteala ne egkahi te, "Sabap dut te keduma rey keykew, Eleteala, ne layun key egkemengeyawi te kepatay. Su iring key te minge bilibili ne mehaan en ne ed-imetayi."

<sup>37</sup> Ugaid ne misan egkerasey ki iring ketà ne kenà ki ebpetalew, su iyan ki red ebpeketavan su atag dut te gehem ni Hisu Kristu ke nelimù keytew.

<sup>38</sup> Su netuenan ku ne warà misan engkey en ne ebpekepebelag kenitew dut te rekela ne limù te Eleteala kenitew, misan keuyag etawa kepepatay, misan minge suluhuen te Eleteala etawa ke ruma pà ne egkamal diyà te langit etawa piya engkey en ne ruen ketehel din ne ebpekeandek, misan ini se egketemanan tew te guntaani en etawa ke ebpekeuma keuremà, ne warè ebpekepebelag kenitew dut te limù din keytew.

<sup>39</sup> Warà misan engkey en ne ruen ketehel din diyà te divavew, etawa kayi te insekednar, etawa misan engkey ne nelimbag te Eleteala ne ebpekepebelag kenitew dut te limù din kenitew ne impekita rin ne kayi egenat te ki Hisu Kristu ke Kerenan tew.

## 9

### *Ini ne Mekeatag te Kebpemilì te Eleteala Dut te Minge Etw Rin*

<sup>1</sup> Na, benar ini se egkehiyen ku keniyu, su siaken ne kedserihan ni Hisu Kristu ne kenà a edtarùtarù. Ne misan kayi te hinawa ku ne netuenan ku se kenà a edtarùtarù, ne ini se netuenan dema dut te Kedeseenan ne Ebpetuntul te Menusiyà su sikandin ke ebayàbayà te hinawa ku.

<sup>2</sup> Su ruen dekelà ne ebpekebmutu ku ne kenà egkeawà se ibmerungkug te hinawa ku

<sup>3</sup> mekeatag te minge suled ku ne kerurumeey ku red ne Hudiyanen ne kenà ebperetiyya ki Hisu Kristu. Embiya egkepakey rà perem ne siaken se edusaan ne ebpekesehidig kandan, ne siaken se ebpekevelag ki Hisu Kristu su apey ran mekeliyu rut te kodusai kandan.

<sup>4</sup> Su rekela se tavang te Eleteala ne impekita rin kandan su rengan ne mibpemilì te Eleteala ke minge kevuwaran ni Israyil ne egkevaluy ne minge anak din, ne sikandan ke mid-anak-anak te Eleteala ne diyà te kandan ne impekita te Eleteala ke kenà egkeseupama ne raman din. Mibaal sikandin te neupakatan te kedtavang kandan, ne imbehey rin kandan ke penduan din, ne sikandan ne mibpenurù din te ralan te kebpenenangur dan kandin, ne merakel se impasad din kandan.

<sup>5</sup> Ne ke kepuun dan ne mibpemilì te Eleteala ne mevantug ne etew rengan. Ne kayi ebpuun te kevuwaran dan ne in-anak si Hisu Kristu ke Eleteala ne ebayàbayà te langun, ne edait ne edeyuen taman te taman.

<sup>6</sup> Impasad te Eleteala rengan ke inenakan ni Israyil ne ebeluyen din ne minge etew rin. Ne kenà ku egkekahi te warà metuman te Eleteala ini se impasad din su netuman en ini, ugaid ne kenà langun dut te inenakan ni Israyil ne ebpekeangkun ketà te impasad te Eleteala kandan.

<sup>7</sup> Iring ded dema ki Abraham dengan, ne kenà langun dut te inenakan din ne ebpekeangkun dut te impasad kandin te Eleteala. Su ruen ma impesurat ne Lalag te Eleteala ne egkahi te, "Ke minge inenakan dut te anak nu ne si Isaac ne sikandan dà ke tuney ne inenakan niyu."

<sup>8</sup> Iyan ipesabut keytew kayi ne ke tidtu ne minge etew te Eleteala ne kenà kayi te andang ne ked-anak te kememenusiyai, ugaid ne riyà ini egketuntun dut te anak ni Abraham ne impasad te Eleteala kandin.

<sup>9</sup> Su ruen impasad te Eleteala ki Abraham te warà pà in-anak si Isaac, ke sikandin te, "Senge rahun pà guntaan ne edlived a kayi ne ed-anak en ini se esawa nu si Sara te meama."

<sup>10</sup> Ne kenà ketà dà taman su guna su lukes en ini se anak dan ne si Isaac ne senge etew ne keep-epuan tew rema ne mid-anak dan ki Rebecca te seping elin meama, si Jacob wey si Isew.

<sup>11-12</sup> Ne guna su mehaan en ne ed-anak si Rebecca ne migkehiyan sikandin te Eleteala te, "Iyan edsugsuhuen ke kakey dut te ari rin." Migkahi rin ini te warà pà ianak ini se seping, ne warà pà kenaweng dan te ed-ulaula te meraat wey meupiya. Tembù be ned-ulaula ini su ibpesabut te Eleteala te ke kebpemili din te menge etew ne kenà kayi ebpuun te menge meupiya ne ulaula ran, ugaïd ne ke kandin dà ne kiyug.

<sup>13</sup> Su iyan din egkeiringan ke impesurat ne Lalag te Eleteala se egkahi te, "Iyan dekelà te hinawa ku ne si Jacob, kenà si Isew."

<sup>14</sup> Embiya iring ketà ne kalu ke ruen egkahi te kenà metidtu ke Eleteala te ralan te kebpemili din su ruen ebpelebiyen din. Kenà arà!

<sup>15</sup> Su migkahi ke Eleteala rengan diyà te ki Moises te,  
"Siaken se ebayàbayà  
ke engkey ne etew se egkeyruwan ku,  
wey engkey ne etew se igkelimù ku."

<sup>16</sup> Ketà ne nesebutan tew te ke penaub te Eleteala dut te langun ne etew ne kenà kayi ebpuun te kiyug te menusiya etawa ke meupiya ne ulaula ran, ugaïd ne sabap dut te iru te Eleteala.

<sup>17</sup> Iring dut te impesurat ne Lalag te Eleteala ne migkahi rin ki Parao ne senge etew ne ratù diyà te inged ne Ihıptu rengan ne warà din ingkeyru. Ke sikandin te, "Tembù mibaluy ku sikew ne ratù su apey egkekita ke gehem ku ketà ke egketalew ku sikuna wey apey a egkevantug kayi te langun ne kelibutan."

<sup>18</sup> Ketà be ne nesebutan tew te igkeyru te Eleteala ke etew ne egkiyuhan din, ne ebpedterayen din en ke meresen te ulu rin su apey rin igkeperayun ke keresen te ulu rin.

<sup>19</sup> Ne geina te iring ketà ne kalu ke ruen ebpekekahi te, "Embiya ini se ulaula te Eleteala, ne meambe ke ebpemuunen din ke menge etew te salà dan? Su embiya ruen egkiyuhan te Eleteala ne warà ebpekeengked te kiyug din."

<sup>20</sup> Ugaïd ini se egkehiyan ku keniyu ne maa, egkepakey ve te sikitew ne midlimbag dà te Eleteala ne ebpenavak kandin? Embiya idsempità ta te midiyun ne kuren, ne engkey, egkepakey ne egkahi ke kuren te, "Meambe ke iring kayi se kineriyuna nu kedi?"

<sup>21</sup> Su iring te etew ne ebpendiyun ne sikandin se ebayàbayà ke ebmemenuwen din te ebpepparas ke menge ediyun din. Su embiya ediyun sikandin te seveka ne ebpeperasen din te meupiya su edeyreyanan, ne ke seveka ne iyan din dà kediyun ne kuren dà dè duen, ne kandin dà ne bayàbayà.

<sup>22</sup> Ne engketà ded be rema ke Eleteala su ibayàbayà din ke engkey se kebped-ulaula rin dut te menge etew. Su misan egkesuatan din en te ebpekita ke epes din wey ke gehem din te edusa dut te menge etew ne warà mebperumaruma kandin, ne warà din pà ul-ulaa. Su midtigkeran din pà lavew ini se menge etew ne andang ne edereetan din.

<sup>23</sup> Iyan din kinetigker kandan su apey langun tew ne ebpekesabut te urar sikandin te keupianan dut te menge etew ne egkeyruwan din, su ke menge etew ne egkeyruwan din ne ebpenehanaan din te ked-ubpà diyà te kandin ne keupianan keuremà.

<sup>24</sup> Su sikitew ke menge etew ne miłbpemili din ne ebpenehanaan din, ne kenà kayi rà ebpuun te menge Hudiyanen, su misan ke kenà Hudiyanen dema.

<sup>25</sup> Su ini ke nekahi rin dut te impesurat te senge etew ne ebpelambas te lalag din dengan ne si Oseas se egkahi te,

"Ke menge etew ne kenà ku sakup dengan  
ne ebeluyen ku sikandan ne menge sakup ku.  
Ne ke menge etew ne kenà ku igkelimù dengan  
ne dekelà ku en sikandan te hinawa guntaani.

<sup>26</sup> Ne misan diyà te inged ne migkahi ku kandan te kenà sikandan ke sakup ku,  
ne ketà ne egkehiyan ku sikandan  
te sikandan ke tidtu ne menge anak te Eleteala,  
ke Eleteala ne warà kemetayen din."

<sup>27</sup> Ne ruen dema impesurat te Eleteala ki Isayas dengan mekeatag te menge etew ne kevuwaran ni Israyil, ke sikandin te,  
"Ne misan ke kevuwaran ni Israyil

ne mibmerakel en su kenà en egkeviring  
su iring en te pantad diyà te beyvey te rahat,  
ugaid ne deisek nevenar se ebpekeliyu  
dut te kedusa te Eleteala.

<sup>28</sup> Su kenà duwaruwa ne egkeuma arà se hewii  
ne segugoneey ne edtumanen te Eleteala ke lalag din  
ne edusaan din ke langun ne menge etew  
kayi te ampew te dunya.”

<sup>29</sup> Su iring ini rut te neuna ne nekahi ni Isayas te,  
“Embiya warà ki meyrui te Eleteala  
ne warà repeng te gehem din,  
ne warà nesamà dut te sikitew ne Hudiyänen  
su ebpekeiring ki rut te menge etew  
te inged ne Suduma ne neherà,  
uya, ebpekeiring ki rut te menge etew  
te inged ne Gumura ne nevinasa.”

*Ini ne Mekeatag te Menge Hudiyänen ne Midsarig dà te kandan ne Gaga te Kedtuman  
te Penduan ne Warà dan Mebperetiyya dut te Mid-ulaula ni Hisus Kandan*

<sup>30</sup> Iyan ku ibpesabut kayi ne ke menge etew ne kenà Hudiyänen ne misan warà  
neketahù te itungan dan se kepemengà te ebmetidtu ran diyà te etuvangan te Eleteala,  
ne ruen ded mibmetidtu kandan su sabap dut te kedsarig dan te Eleteala.

<sup>31</sup> Ugaid ne ke menge Hudiyänen ne iyan dan kunaan ke kayi ran ebmetidtu rut te  
kedumai ran te penduan, ne nasi en be ne warà nepekayan dan su warà dan ma megaga  
te edtuman.

<sup>32</sup> Ne meambe ke warà nepekayan dan? Su iyan dan midserihan ke kandan ne  
egkegaga te kedtuman te penduan, kenà ke mid-ulaula ni Hisus kandan. Ne sabap dut  
te warà dan kebperetiyya kandin, ne iring dan te menge etew ne neketempilag diyà te  
batu.

<sup>33</sup> Ini se batu ne netempilahan dan ne ruen nekahi te Eleteala dut te impesurat din se  
egkahi te,

“Intey niyu ma se intahù ku ne etew  
riyà te inged te menge Hudiyänen ne ed-ingaranan te Siyun,  
ne iring sikandin te batu ne egketempilehan te menge etew,  
uya iring sikandin te batu ne egkeurembakan dan.  
Ugaid ke etew ne ebperetiyya kandin  
ne kenà ebpekedsendit dut te kebperetiyya rin kandin.”

## 10

<sup>1</sup> Na menge suled ku, iyan ku perem egkesuatan ne egkepelihaun ke menge ruma ku ne  
Hudiyänen dut te kedsai kandan te Eleteala! Ini ve imbe ke lelayun ku ibpengeningeni  
te Eleteala!

<sup>2</sup> Netuenan ku se meilut nevenar se kedtumana ran te penduan te Eleteala, ugaid ne  
ini se meilut ne kedtumana ran te penduan ne warà mekeudsad dut te benar ne penurù  
mekeatag kandin.

<sup>3</sup> Su warà dan metueni te ruen ralan ne mibeelan te Eleteala te kebmetidtu ran diyà  
te etuvangan din, ugaid ne mibaalvaal dan te kandan dà ne ralan ne warà dan telimaa  
ke ralan te Eleteala ne kebmetidtu ran.

<sup>4</sup> Su geina te nekeuma en si Hisu Kristu ne ke keduma ran te penduan ne warè en  
egkeetahan din, su kayi rà ebpuun te kebperetiyya tew ki Hisu Kristu se ralan te  
kebmetidtu te etew riyà te etuvangan te Eleteala.

*Piya engkey ne Etew ne Ebperetiyya ki Hisu Kristu ne Ebpekeliyu rut te Kedusa te  
Salà Dan*

<sup>5</sup> Ruen impesurat ne lalag ni Moises dengan mekeatag te etew ne iyan din kunaan  
ke kedtumana rin te penduan se iyan kedtengteng kandin te Eleteala ne metidtu. Ke si  
Moises te, “Ke etew ne iyan din edserihan se kedtumana rin te penduan, ne egkevehayan  
sikandin te umur ne warà edtamanan din embiya negaga rin te edtuman ke langun ne  
nekahi rut te penduan.”

<sup>6</sup> Ugaid ne ruen impesurat ne Lalag te Eleteala mekeatag te kedsarig tew ki Hisus se  
iyan kedtengteng keytew te Eleteala ne metidtu. Ne ini se ibpesabut keytew te kenà  
en dait ne ebpegitungen tew te engkey se egkepakey ne ebpendiyà te langit su apey  
ed-angey ki Hisu Kristu kayi te ampew te dunya.

<sup>7</sup> Ne kenà dait dema ne ebpegitungen tew ke engkey se egkepakey ne ibpendiyà te Ivayaan su apey mevanew si Hisus su nevanew en.

<sup>8</sup> Su ruen ruma ne impesurat ne Lalag te Eleteala ne ebpesabut keytew te ini en te keniyu ke Meupiya ne Tudtul ne ebpuun te Eleteala su apey kew ebpekepegitung wey egkekahi niyu. Ne ini ke Tudtul ke ibpemenudtul dey te ke kedsarig te minge etew ki Hisus se iyan kedtengteng te Eleteala kandan ne metidtu.

<sup>9</sup> Su embiya ibpayag niyu te mibpesakup kew ki Hisu Kristu ke Kerenan tew wey ebperetiyaya kew nevenar te mibanew sikandin te Eleteala ne ebpekeliyu kew rut te kedusa te Eleteala te salà niyu.

<sup>10</sup> Su sabap dut te kedsarig tew ki Hisu Kristu ne iyan kedtengteng te Eleteala keytew ne metidtu riyà te etuvangan din. Ne kayi te ibpayag tew ini diyà te minge ruma tew, ne ebpekeliyu ki rut te kedusa te Eleteala keytew.

<sup>11</sup> Su ruen impesurat ne Lalag te Eleteala ne egkahi te, "Misan engkey ne etew ne ebperetiyaya ki Hisu Kristu, ne kenà sikandin ebpekendsidit dut te ebperetiyaya rin."

<sup>12</sup> Tembù be misan engkey ne etew ne egkepakey ne medsarig en ki Hisu Kristu, Hudiyanen ma sikandin etawa kenà su warà biraan din. Su seveka rà ke Kerenan dut te langun ne minge etew, ne melimù nevenar sikandin dut te langun ne ebuyù te tavang kandin.

<sup>13</sup> Su iring dut te impesurat ne Lalag te Eleteala ne egkahi te, "Misan engkey ne etew ne ebuyù te tavang riyà te ki Hisu Kristu ne ebpekeliyu sikandin dut te kedusa te salà din."

<sup>14</sup> Ugaid ne engkey se kebpetavang te minge etew dut te Kerenan embiya warà dan pà mebperetiyaya kandin? Ne engkey ma se ralan te kebpekeperetiyaya ran embiya warà dan pà mekerineg te Meupiya ne Tudtul mekeatag kandin? Ne engkey se ralan te kebpekerineg dan mekeatag kandin embiya warà etew ne ebpmenuudtul dut te Meupiya na Tudtul mekeatag kandin?

<sup>15</sup> Ne engkey se ralan te ebpmenuudtul dut te Meupiya ne Tudtul embiya warà etew ne edsuhuen te ebpmenuudtul? Ugaid ne ruen minge etew ne midsuhù te Eleteala su iring dut te impesurat ne Lalag te Eleteala ne egkahi te, "Nengehalewhalew ran nevenar te kebpekeuma rut te minge etew ne ebpmenuudtul te Meupiya ne Tudtul."

<sup>16</sup> Ugaid ne guna su impemenudtul en ke Meupiya ne Tudtul ne deisek dà kandan se mibperetiyaya. Su iring dut te lalag te senge etew ne mibpelambas te lalag te Eleteala rengan ne si Isayas ne migkahi te, "Is kerenan, iring te warà utew ebperetiyaya dut te impemenudtul dey."

<sup>17</sup> Ketà ne nesebutan tew te iyan dalan te kebpekeperetiyaya te etew ki Hisu Kristu ne sabap te egkerineg din ke Meupiya ne Tudtul mekeatag kandin. Ne iyan dalan te kebpekerineg din dut te Meupiya ne Tudtul ke ruen ebpmenuudtul kandin.

<sup>18</sup> Ne kalu ke ruen etew ne ebpekekahi te, "Arà se minge Hudiyanen ne warà mebperetiyaya, maa warà den pà merineg ini?" Asal, su nerineg dan ded ini rengan. Su ruen impesurat ne Lalag te Eleteala ne egkahi te,

"Ini se lalag ne nekeeneb en  
dut te langun ne inged kayi te ampew te dunya.  
Uya, warà tedtab din ini se tudtul  
ne impemenudtul kayi te ampew te dunya."

<sup>19</sup> Ne kalu ke ruen duma ne etew ne egkahi te, "Maa, nesebutan be imbe te minge Hudiyanen ini se impemenudtul kandan?" Nesebutan dan nevenar su iyan en iya neuna ne mibaag kandan ne si Moises su ruen impesurat ne Lalag te Eleteala ne egkahi te, "Ne ebpeim-imaan ku sikiyu ne minge Hudiyanen rut te kedtevangi ku te minge etew ne kenà Hudiyanen. Uya, ebpelengeten ku sikiyu su atag te ingkeyruwi ku ke minge etew ne midsudian niyu."

<sup>20</sup> Ne mepmepayag nevenar se Lalag te Eleteala ne impenuudtul rengan ni Isayas se migkahi te,

"Ke minge etew ne warà mebpemengà kediey  
ne netuen a nikandan.  
Uya, ke minge etew ne warà a impenginginsà nikandan  
ne mibpepayag a riyà te kandan."

<sup>21</sup> Ugaid ne ruen lalag te Eleteala ne impenuudtul rengan ni Isayas mekeatag te minge Hudiyanen ne egkahi te,

"Uteu meresen se ulu ran wey uteu ran minge suer,  
su misan egkelayun en se kedtawag ku kandan  
te ebpetelimà te limù ku ne kenà dan ebpmineg."

## 11

### *Ini ne Mekeatag te Duen ded Kegkeyru te Eleteala dut te Menge Hudiyanen*

<sup>1</sup> Misan pà benar ne meresen ke ulu te menge Hudiyanen diyà te Eleteala, ne maa mid-engkeran be te Eleteala ini se kandin ne menge etew? Kenà en iya arà! Su siaken dema ne Hudiyanen e red iring kandan su inenakan a ni Benjamin ne seveka ne inenakan ni Abraham.

<sup>2</sup> Warà ded indumili te Eleteala ke mibpemili din ne kandin ne menge etew dengan te aney en dut te kinelimbag din. Su netenuran niyu red ma vuwa ke impesurat ne Lalag te Eleteala rengan te kinevuyù ni Elias diyà te Eleteala mekeatag dut te meraat ne mid-ulaula te menge ruma rin ne Hudiyanen.

<sup>3</sup> Ke si Elias te, "Kerenan, mibpengimetayan dan ke menge etew ne ebpelambas te lalag nu ne midsuhù nu, ne midereetan dan en ke ebpelengesaan te ibehey rey diyà te keykew. Ne siaken dà be se nesamà ne ebpengarap keykew, ne egkiyuhan a rema nikandan te ed-imatey."

<sup>4</sup> Ugaid ne iyan intavak te Eleteala kandin te, "Kenà sikuna rà su ruen pà pitu ne ngivu ne menge etew ne kevuwaran ni Israyil ne warà mebpengarap ki Baal, ke kenà tidtu ne eleteala."

<sup>5</sup> Ne iring din ded dema te guntaani en ne hewii su ruen ded menge Hudiyanen ne mibperetiyya ki Hisu Kristu ne nepemili te Eleteala sabap dut te daat te nanam din kandan.

<sup>6</sup> Ini se kinepemili din kandan ne kenà dut te meupiya ne mid-ulaula ran, ugaid ne sabap dut te kinedaat dà te nanam din kandan. Su embiya iyan kinepemili te Eleteala se atag dut te meupiya ne mid-ulaula ran ne tembù pà engketà su kenà tidtu ne daat te nanam din.

<sup>7</sup> Ketà be ne nesebutan tew te kerekelan dut te kevuwaran ni Israyil ne warà dan metuen ke ralan te kebmetidtu ran diyà te etuvangan te Eleteala misan midsebenar dan perem te ebpemengà. Ugaid ne misan iring ketà, ne ruen ded nearam te Eleteala ne neketuen te ralan te kebmetidtu. Ne ke ruma kandan ne warà mibpeniniga dut te lalag te Eleteala su apey kenà dan meringe ke benar ne tudtul.

<sup>8</sup> Su iyan din iring ke impesurat ne Lalag te Eleteala ne egkahi te, "Iring te midseluuvan te Eleteala te kuren ke itungan dan;

su taman guntaani

ne misan duen mata ran ne kenà dan ebpekekita,

uya, misan duen telinga ran ne kenà dan ebpekerineg."

<sup>9</sup> Ne ruen dema impesurat ne Lalag te Eleteala ne nekahi ni Dabid, ke sikandin te,

"Menu ma perem ke kayi ebpuun

te kedsarig dan te kebpengevruran dan,

ne iyan ded ebpekelitag kandan wey ebpekehebpà dan,

ne ke kedusa te Eleteala ne ebpekeuma diyà te kandan.

<sup>10</sup> Menu ma perem ke egkepisek dan

su apey kenà dan en ebpekekita;

ne runturumuntu se egketemanan dan taman te taman."

<sup>11</sup> Ne geina te warà mebperetiyya ke menge Hudiyanen, ne maa, mid-engkeran dan en be te Eleteala? Warà iya! Su kayi te kenà dan kebpmineg te Lalag te Eleteala ne ruen en ralan te kebpekepeliyu te menge etew ne kenà Hudiyanen su apey egkeima ke menge Hudiyanen dut te menge etew ne kenà Hudiyanen, ne arà pè be ne ebpekeperetiyya ran iring kandan.

<sup>12</sup> Ne sabap dut te kenà kebperetiyya te menge Hudiyanen, ne nevehayan te Eleteala te rekela ne penaub din ke langun ne menge etew kayi te ampew te dunya. Ne egenat dema te neawà diyà te menge Hudiyanen ke penaub te Eleteala ne ibehey rin perem kandan, ne nekevehey rin ke rekela ne penaub din diyà te menge etew ne kenà Hudiyanen. Ugaid ne wey pè be kenà muna pà se kerekela te penaub dut te Eleteala ketà te hewii ne id-uli dut te langun ne menge Hudiyanen ke hinawa ran te kebperetiyya ki Hisus.

### *Ini ne Mekeatag te Menge Etew ne Kenà Hudiyanen ne Midtelimà te Eleteala Dut te Kebpeliyu Ran*

<sup>13</sup> Ne sikiyu ini se menge etew ne kenà menge Hudiyanen ne ruen egkehiyen ku keniyu. Netuenan niyu ne midsuhù a te Eleteala ne kedserihan din te ebpemenudtul ke Meupiya ne Tudtul keniyu te keniyu, ne edtumanen ku ve ini te mevaher se insuhù din kediey.

<sup>14</sup> Su kiyug ku perem ne meima ke minge ruma ku ne Hudiyänen te kayi te kedtevangi ku keniyu te minge kenà Hudiyänen, ne ini se petihayun ku te ruen diyà te kandan ne ebpekeretiyaya ne ebpekepeliyu te kedusa te Eleteala kandan.

<sup>15</sup> Su ketà te mid-engkenà te Eleteala ke minge Hudiyänen, ne ini se minge etew ne kenà Hudiyänen se mibpekid-ulit kandin. Ne wey pè be kenà muna pà se kerekelà te penaub dut te Eleteala ketà te ebpekid-ulit en maa ke minge Hudiyänen te kebperetiyaya. Su iring te minge etew ne minatey ne nevanew en maa.

<sup>16</sup> Su ruen sempità ku mekeatag te minge Hudiyänen te sikandan ded ke minge etew te Eleteala su ke minge apù dan ne kandin. Su sikami ne minge Hudiyänen ne iyan dey egkeiringan ne pan su kayi te betasan dey ne ruen edtevien dey rut te pan ne ebeelan dey su ibehey rey te Eleteala ne timbang te langun ne ibehey red dema diyà te Eleteala. Ne ruma pà ne upama ku ne iring te kayu su embiya ke ralid din ne iyan kemuney ke Eleteala, ne misan ke minge subpang din ne edtuvù ketà ne kandin ded dema.

<sup>17</sup> Ne ke minge Hudiyänen ne iring te minge subpang ketà te kayu ne impemula te Eleteala ne warà mebpemehas ne midtamped te Eleteala, ne arà pà ne migkuwa sikandin te minge subpang te kayu diyà te ketelunan ne idsumpat din ketà te midtamped din ne subpang su apew edtuvù ketà te kayu. Ne sikiyu se kenà minge Hudiyänen ne sikiyu arà ke mehintelunan ne subpang te kayu, ugaid ne ke kayu ne nesumpatan niyu ne ke minge Hudiyänen ne nepemili te Eleteala ne kandin ne minge etew rut te aney en se aney.

<sup>18</sup> Tembù be sikiyu ne nekesambi ne ingkesumpat dut te midtamped, ne kenà niyu peleviya ke itungan niyu se egkahi te iyan kew pà lavi ne meupiya ketà te nengetamped! Su sikiyu ne subpang kew rà ne insumpat te Eleteala apew ebpeketuvù ketà. Ne kenà niyu lipati te kenà sikiyu se subpang se egenatan te kegkeuyag dut te dalid, ugaid ne ke dalid se egenatan te kegkeuyag dut te subpang ne iring te sikiyu.

<sup>19</sup> Ne kalu ke egkahi kew te, “Sikami ini se kenà minge Hudiyänen ne iyan key pà tumù su midtamped sikandan te Eleteala su apew sikami se idsambi kandan.”

<sup>20</sup> Ne benar ne nekesambi kew kandan. Ugaid ne iyan puunan te kinetemperas te Eleteala kandan su warà dan mebporetiyaya ki Hisus, ne ke puunan te kinetuvù niyu guntaani ne ke kineperetiyaya niyu. Ugaid ne kenà niyu ve ibpendekarak, inemulà se ingati niyu nevenar ke ulaula niyu.

<sup>21</sup> Su embiya iring ketà se midtamped te Eleteala ke tunganey ne subpang ne ke minge Hudiyänen, ne iyan kew pè be kenà tempera se mehintelunan dà ne subpang embiya ed-iring kew red kandan.

<sup>22</sup> Ketà be ne nesebutan tew te rekelà se daat te nanam te Eleteala rut te minge etew ne ebperetiyaya kandin, ugaid ne warà ma senge etew rà ne kenà din edusaan embiya kenà dan ebpeming kandin. Ne ed-iseg pà ke daat te nanam din keniyu embiya kenà kew edsuwey dut te kebperetiyaya niyu. Ugaid ne embiya edsuwey kew, ne ed-iringen kew red dut te subpang ne midtamped din.

<sup>23</sup> Ne ini se minge subpang ne midtamped din, ne ke minge Hudiyänen, embiya ibped-ulit dan en te itungan dan te kebperetiyaya ran te Eleteala ne id-ulit ded sikandan idsumpat dut te subpang te kayu ne mibpuunan dan su egkegaga ma te Eleteala se kebped-ulit din.

<sup>24</sup> Ne sikiyu ne kenà minge Hudiyänen ne kenà kew tunganey ne minge subpang ketà te kayu ne impemula su riya kew ebpuun te ketelunan ne kayu, ugaid ne insumpat kew rà ne subpang ketà te kayu ne impemula rin. Ne embiya negaga te Eleteala ini keniyu te kenà diyà ebpuun te kayu ne impemula rin, ne iyan din pè be kenà megaga te ebped-ulit ke tunganey ne subpang ne ketà en iya ebpuun.

*Ini ne Mekeatag te Ruen Daat te Nanam te Eleteala Dut te Langun ne Menge Eteew ne Ebperetiyaya Kandin*

<sup>25</sup> Na minge suled ku ne kenà Hudiyänen, ruen ibpayag ku keniyu ne in-eles rengan. Ne iyan ku kebpayag keniyu su apew kenà niyu igkependekarak ke mid-ulaula te Eleteala keniyu iring te sikiyu se muna pà dut te minge Hudiyänen. Ini ve arà se in-eles, ne ayan se kenà kebperetiyaya te minge Hudiyänen ne edsahad dà. Su embiya ve ke langun niyu ne kenà Hudiyänen ne nepemili te Eleteala se mibperetiyaya en kandin, ne ketà pà ne egkeawà ke keresen te ulu ran ne ebpekeulit ke itungan dan te kebperetiyaya ran maa.

<sup>26</sup> Ne ketà te kebpekeulit en te itungan dan te kebperetiyaya, ne egkepeliyu ran en te kedusa kandan te Eleteala. Su iyan din iring ke impesurat ne Lalag te Eleteala ne egkahi te,

“Riyà te inged te minge Hudiyänen ne ed-ingaranan te Siyun  
ne edlepew ke etew ne ebpeeliyu



te langun ne minge kevuwaran ni Jacob,  
su id-awà din en ke meraat ne ulaula ran.

<sup>27</sup> Uya, ketà te igkeawà ku en  
ke minge salà dan," ke se Eleteala,  
"ne ke raan ne impasad ku kandan  
ne edtumanen ku en."

<sup>28</sup> Su geina te mid-engkenà ke minge Hudiyanen dut te Meupiya ne Tudtlu te Eleteala,  
ne nevaluy ran ne kunterà din. Ugaid ne arà se kineengkenà dan, ne ketà se puunan te  
kegkevehayi keniyu ne kenà Hudiyanen te penaub dut te Eleteala. Ugaid ne andang en  
sikandan ne mibpemili te Eleteala ne minge etew rin ne dekelà ded lavew sikandan te  
hinawa rin su atag dut te pasad din te keep-epuan dan.

<sup>29</sup> Su nepemili dan te Eleteala ne mibpenaub din sikandan, ne kenà din ed-ewien ke  
penaub din kandan su ke itungan te Eleteala ne kenà edsambisambi.

<sup>30</sup> Ne sikiyu ne kenà minge Hudiyanen, dengan ne warà kew mebperetiyaya te  
Eleteala, ugaid ne guntaani ne neyruwan kew rin wey mibpeliyu kew en nikandin. Ne  
ini se kegkeyru rin keniyu ne egenat dut te kineengkenà te minge Hudiyanen kandin.

<sup>31</sup> Ne iring din ded be ketà ke minge Hudiyanen te misan pà te kenà dan ebperetiyaya  
te Eleteala guntaani, ne ruen ded gewii ne edaat se nanam din kandan iring dut te  
kinekeyruwi rin keniyu.

<sup>32</sup> Su ke Eleteala ne egkiyuhan din ne egkesebutan dut te langun ne minge etew te  
sikandan ne mekesesalà ne dait ne edusaan, su apey ebpe sebutan keytew te ruen daat  
te nanam din te kebpesehad din te salà te langun ne minge etew.

*Ini ne Mekeatag te Kebpeselamat tew te Eleteala dut te Keupiya Rin kayi te Keytew*

<sup>33</sup> Iring te wayig ne edtudà  
se kerekelà te daat te nanam te Eleteala  
dut te langun ne minge etew!  
Ne ke ketampas wey ketau rin  
ne kenà egketegkad!

Warà etew ne ebpekesagkew te kukuman din!  
Ne warà etew ne ebpekesabut te kandin ne kebpesepavayà!

<sup>34</sup> Su iyan din iring ke impesurat ne Lalag te Eleteala ne egkahi te,  
"Engkey rà se nekesabut te itungan te Eleteala?  
Uya, engkey rà la se ebpekepemandu kandin?"

<sup>35</sup> Ne iring din ded dema ne warà etew  
ne ebpekevehey kandin te misan engkey en  
su apey ebpeulian din kandin!"

<sup>36</sup> Su langun ne nelimbag  
ne riya ebpuun te kandin ded ne bineelan.  
Ne sikandin ded ke ebayàbayà kayi te langun,  
ne iyan din kedlimbag kandan su apey edeyuen sikandin.  
Ketà be ne edeyuen tew ke Eleteala taman te taman!

## 12

*Ini ne Mekeatag te Ibehey tew ke Hinawa tew te Egelevek te Eleteala*

<sup>1</sup> Engketà be minge suled ku, ne geina te rekelà se keupianan ne imbehey te Eleteala  
keytew, ne ebuyuen ku keniyu te irumakan niyu kandin ke lawa niyu te ed-ulaula te  
kiyug din dà su apey kew ebpekesuhat te hinawa rin. Ini se ed-ul-ulaan niyu su ini ke  
dait ne ralan te kebpengarap niyu kandin.

<sup>2</sup> Ne kenà niyu peun-unuti ke minge ulaula kayi te ampew te dunya ne egkunterà te  
Eleteala, ugaid ne ivehey niyu te Eleteala ke itungan niyu su apey ke daan ne perangey  
niyu ne egkevehuwan din. Ketà be ne egkesebutan niyu ke kiyug te Eleteala kayi te  
keniyu, ne egkesebutan niyu ke ulaula ne ebpekesuhat te hinawa rin su apey warà  
igkesewayi keniyu.

<sup>3</sup> Ne geina te ruen ketau ne imbehey kediey te Eleteala te kebpemesabut te lalag din,  
ne ebuyuen ku te langun niyu ne kenà niyu pegitunga te sikiyu rà se ruen gaga rin.  
Ugaid ne peketiduwa niyu ke itungan niyu dut te negaga niyu, ne iyan niyu serihi ne  
endei rà taman te ketau ne imbehey keykew te Eleteala ketà te kedsarig niyu kandin.

<sup>4</sup> Su sikitew ne mibperetiyaya ne ke ketau tew ne warà meked-iring. Su iring te lawa  
tew ne seveka rà ke lawa, ugaid ne merakel se edsusunan din ne uman senge susun ketà  
ne senge bias ke kandin ne egkeetahan.

<sup>5</sup> Ne iring din ded dema te sikitew ne minge mibperetiyaya, su misan medmerakel tew ne neseveka ki rà ne lawa sabap dut te kebperetiyaya tew ki Hisu Kristu. Ne iring ded be rema ketà ke kebpekekepikil tew te minge ruma tew, su iring ki rut te merakel ne edsusunan te lawa tew.

<sup>6</sup> Ne geina te warà memeked-iring ke imbehey te Eleteala ne ketau rut te sikitew, ne iyan tew rà egeveken ke imbehey rin keytew. Upama ini, embiya iyan ingkevehey te senge etew rut te sikitew se ebmenudtul ke engkey se impesabut kandin te Eleteala, ne arà en imbe se geleveka rin te endei taman se sarig din.

<sup>7</sup> Embiya iyan imbehey keytew ne ketau te edtavang te ruma tew, ne arà imbe se ed-ululaan tew se edtevangen tew ke minge ruma tew. Etawa ve kebpenurù, ne ebpenurù ki imbe.

<sup>8</sup> Ne embiya iyan imbehey keytew ne ketau te ebag-et te hinawa te ruma tew, ne arà imbe ke ed-ul-ulaan tew. Ne embiya manen iyan imbehey keytew ne kedtavang tew, ne iyan iya se edtevangen tew ke minge ruma tew ne ebpeungayà te tavang. Ne embiya maa iyan imbehey keytew se ebpeheewit te minge mibperetiyaya, ne arà imbe ke edsemikaran tew. Ne embiya maa iyan imbehey keytew ne ke ketau te edtuganur te ebpegesangan, ne iyan iya mehalew se kedtevangi tew kandan.

<sup>9</sup> Ne ke limù ne ibpekita tew te minge ruma tew ne kenà kayi rà te ampew ugaid ne ibpetuneb tew te hinawa tew. Ne ebpekeriyuan tew ke meraat ne ulaula, ne egeweran tew te mevaher ke meupiya.

<sup>10</sup> Ne sikitew se mibperetiyaya en ki Hisu Kristu, ne iyan iya se ebpelelimuey ki iring te edtutanayà ne ebpenusuled. Ne ebpeed-edatey ki nevenar te minge ruma tew.

<sup>11</sup> Kenà ki ebpepehul te kebpenangur tew ki Hisu Kristu ke Kerenan tew, ugaid ne id-amin tew ke hinawa tew se kedtumana tew rut te kiyug din.

<sup>12</sup> Ne egalewhalew ki ve kayi rut te ebpeneregen tew keuremà, ne kenà ki ebpepimivig ke embiya ruen kemeresayan tew, ne layun ki ebpengeningeni te Eleteala.

<sup>13</sup> Ne ebekayan tew te tavang ke minge suled tew te kebperetiyaya ne ruen kurang din, ne egelhalaan tew ke minge etew ne sumeseharey.

<sup>14</sup> Ke minge etew ne ebpekesakit keytew, ne ibpengeningeni tew te Eleteala ne ebpeuveen din sikandan. Uya, ibpengeningeni tew te Eleteala ne ebpeuveen sikandan, ne kenà din edusaan.

<sup>15</sup> Embiya ruen duma tew ne egkehalew, ne eduma ki rema rut te igkehalew ran. Ne embiya ruen ruma tew ne egkemutuwan, ne eduma ki te kemutu ran.

<sup>16</sup> Ne langun tew ne mibperetiyaya ki Hisu Kristu, ne iyan iya se egkeseveka ki su apey kiyu kenà ebpekedlewanà. Ne kenà ki ebpepperayù, ne kenà tew igkeyeyai se kebpekiduma tew rut te malù mevavà keytew. Ne kenà tew ebpegitungen te iyan ki pà bereitungan kandan.

<sup>17</sup> Embiya ruen ibped-ulaula keytew ne meraatey, ne kenà tew edsulian sikandan. Inemulà se iyan tew ed-ul-ulaan ne endei ke ulaula ne meupiya riyà te etuvangan te langun ne minge etew.

<sup>18</sup> Ne ed-ul-ulaan tew ke taman ne egkegaga tew te kebaal te meupiya su apey warà kewehaan ne egkeveelan.

<sup>19</sup> Minge suled ku, kenà ki edsulì dut te minge etew ne mid-ulaula keytew te meraat, ugaid ne ibehew tew en ne bayàbayà te Eleteala ke engkey se ed-ul-ulaan din kandan. Su ruen impesurat ne Lalag te Eleteala ne egkahi te,

“Siaken se ebayàbayà te kegkesulii kandan,

uya, siaken se edsulì, ke se Kerenan tew.”

<sup>20</sup> Ketà be ne iyan tew edumaan ne ke impesurat ne Lalag te Eleteala ne egkahi te,

“Embiya egkevìtil ke kunterà nu, ne pekeena nu.

Ne embiya ebpekeinum, ne peinuma nu.

Su embiya ve iring ketà se mid-ulaula nu kandin,

ne igkeyeyai rin nevenar ke meraat ne mid-ulaula rin keykew.”

<sup>21</sup> Embiya ruen duma tew ne ed-ulaula te meraat keytew, ne kenà tew edsureren, su embiya edsurer ki ne egkeewit ki riyà te meraatey. Ugaid ne iyan timbang ne idsurer tew kandin ne ibpekita tew kandin ke meupiya ne ulaula tew, su apey rin egkemuhdmuhud ne ketà ne ebpekeruma sikandin te meupiya.

## 13

<sup>1</sup> Langun tew, minge suled, ne iyan iya se ebperumaruma kiyu rut te minge kumekamal te gubirnu te inged tew, su warà senge etew ne nevaluy ne egkamal ke kenà ke Eleteala se midtendù kandin ne egkamal.

<sup>2</sup> Ketà be ne misan engkey se kenà eduma rut te minge egkamal te inged, ne iring te iyan din kenà edumaan ne ke Eleteala su ke Eleteala ma se mibpebaluy kandan ne egkamal. Tembù be ke etew ne iring ketà ne edusaan te Eleteala.

<sup>3</sup> Su ke minge etew ne iyan dan ed-ul-ulaan ne metidtu, ne kenà dan egkeandek dut te egkamal. Ugaid ke minge etew ne ed-ulaula te meraat, ne dait ne egkeandek dan. Ne embiya kenà ki egkiyug ne egkeandek dut te minge egkamal, ne iyan tew ed-ul-ulaan ke metidtu ne ketà ne egkereyù ki nikandan.

<sup>4</sup> Su ke minge etew ne egkamal, ne iring sikandan te sugshuen te Eleteala apey ebpekeiseg ke keupiya dut te ked-ubpà tew. Ne embiya mereatey se ulaula tew, ne dait iya ne egkeandek ki su mevaher se keteheh dan te kedusa ran keytew. Su intahù sikandan ketà te Eleteala apey sikandan se ed-ewit te kedusa te Eleteala dut te minge etew ne meraat se ulaula ran.

<sup>5</sup> Tembù be ebperumaruma kiyu rut te minge kumekamal keytew ne kenà kayi rà dut te kegkeandek tew te kedusa te Eleteala, ugaid ne ebperumaruma kiyu su netuean tew ne ini se meupiya ne ed-ul-ulaan tew.

<sup>6</sup> Tembù be ebayad ki rema te buwis dut te kumekamal keytew su sikandan se sugshuen te Eleteala embiya meupiya ke kebpeneheewita ran dut te insuhù kandan te gubirnu.

<sup>7</sup> Arà be ne ebayaran tew ke langun ne edsusunsusun ne ebuwisan tew. Ne ed-edatan tew nevenar ke minge kumekamal dut te inged tew su ini ke dait ne ed-ul-ulaan tew.

*Ke Ibpeuna ne Suhù dut te Langun ne Idsuhù Keytew ne Ebpelimlimuey Kiyu*

<sup>8</sup> Kenà kiyu ed-utang. Iyan dà meupiya ne utang tew ne ke idlimù tew dut te minge ruma tew. Su embiya igkelimù tew nevenar ke minge ruma tew, ne netuman tew en ke penduan te Eleteala.

<sup>9</sup> Su ke minge suhù ne egkahi te, “Kenà ka edlangkadlangkad te esawa nu, kenà ka ebpengimatey, kenà ka ebpenakew, ne kenà ka egkeima te kearen te ruma nu,” ne langun kayi ne suhù wey ruma pà ne nesetiman dà kayi te seveka ne suhù te Eleteala ne egkahi te, “Igkelimù nu ke ruma nu iring te kegkelimù nu te keykew ne hinawa.”

<sup>10</sup> Su embiya igkelimù tew ke minge ruma tew, ne kenà egkepakey ne edèdeetan tew sikandan. Tembù be embiya igkelimù tew ke ruma tew, ne netuman tew ke langun ne insuhù te Eleteala dut te penduan.

<sup>11</sup> Ne ini ve iya se ed-ul-ulaan tew, su mehaan en ke hewii te edlived ni Hisus te ked-engaya rin keytew. Tembù be kenà kiyu ebpenliplipereng, ugaid ne ebpenehana kiyu te kebpekeuma rin. Su kenà iring te aney en ne kineperetiyya tew ne iring te meuhet pà ke kebpekelived din, ugaid ne guntaani ne mehaan en.

<sup>12</sup> Su mehaan en edsahad ke kerukilemen ne ebpekeuma en ke rayag te keseleman su mehaan en edlived si Hisu Kristu kayi. Tembù be sikitew ke nerayahan en se itungan din ne ed-engkeran tew en ke minge meraat ne ulaula, ne iyan tew ve ed-ul-ulaan ke dait ne ed-ul-ulaan te kerayahan su arà ke timbang Limbutung tew ne ed-alang keytew dut te datù te pekaid.

<sup>13</sup> Uya, ed-upianan ke minge ulaula tew su ini ke dait ne ed-ul-ulaan dut te minge etew ne ed-ubpà te kerayahan. Ne kenà ki en ebpemekiduma dut te kevruran te minge etew ne ebpengasak te temperasà wey ebpinginum te ebpeketevereg, ne kenà ki ebpingniyug etawa ed-ulaula te misan engkey en ne mekeyeyà ne kenà ki ebaal te kewahaan etawa egkeima.

<sup>14</sup> Ne kenà kiyu en eduma rut te meraat ne kiyug te lawa tew, ugaid ne iyan tew ed-iringan ne si Hisu Kristu wey ke ulaula rin, su timbang te sikandin ke limbutung tew ne ed-alang keytew.

## 14

*Iyan iya se Kenà Kiyu Medsawey dut te Menge Ruma Tew*

<sup>1</sup> Na embiya ruen duma niyu ne mibperetiyya en ki Hisu Kristu ugaid ne meluvey pà se peretiyya rin, ne telimaa niyu sikandin te meupiya ne kenà kew pekidlawanà kandin embiya ke peretiyya rin ne warà pà mekeiring dut te keniyyu.

<sup>2</sup> Su uman senge etew ne nekebira se itungan din. Su ruen senge etew ne iyan din pegitungan ne egkepakey ne egkeenen din ke piya engkey en, ugaid ke etew ne meluvey pà se kebperetiyya rin ne iyan din pegitungan ne kenà idluhut kandin se kegkaan te usa, ne tuved dà se egkeenen din.

<sup>3</sup> Ne ini se etew ne misan engkey en ne egkeenen din, ne kenà mebbepegitung sikandin se muna pà dut te etew ne tuved dà se egkeenen din. Ne engketà ded dema ke etew ne iyan din dà egkeenen se tuved, kenà mebbepegitung te sikandin se muna pà dut te etew ne egkaan te misan engkey en su elin dan midtelimà te Eleleala.

<sup>4</sup> Tembù be kenà kiyu edsawey te minge ruma tew. Su warà kevenar tew te edsawey te sugshuen te ruma ne etew. Su iyan dà edsawey kandin ne ke egelevekan din ke midtuman din be ke mibpeveelan kandin etawa warà. Ne netuenan tew ne ebpekegaga si Hisu Kristu ne edtavang dut te minge sugshuen din su apey ran med-ulaula ke meupiya.

<sup>5</sup> Duen duma ne mibperetiyya ne egkahi te, “Ruen kun andew ne egkeedatan pà dut te ruma ne minge andew.” Ugaid ne ruen pà ruma ne egkahi te, “Langun ne minge andew ne neked-iring, tembù be kenà ki ebaal te seveka ne iyan dà egkeedatan dut te ruma rin.” Ugaid ne iyan ku egkehiyen ne kenà kew duwaruwa ke engkey se metidtu ne ulaula diyà te etuvangan te Eleleala.

<sup>6</sup> Su ke etew ne ebpegitung te ruen senge keandew ne egkeedatan nevenar, ne ini se ed-ul-ulaan din te ked-edati rin dut te Kerenan tew. Ne iring din ded dema ke etew ne egkaan te piya engkey en, su ed-ul-ulaan din ini te ked-edati rin te Kerenan tew su Eleleala ke mibpeselematan din ketà te egkeekan din. Ne ke etew ne tuved dà se egkeenen din su kenà kun idluhut se usa se egkeenen, ne ini se ed-ul-ulaan din dema te ked-edati rin te Kerenan tew, ne mibpeselematan din ded dema te Eleleala.

<sup>7</sup> Su taman te biviyag ki pà ne kenà sikitew se kemuney kayi te hinawa tew, ne misan ketà te ebpatay ki en ne ruen kemuney keytew.

<sup>8</sup> Su taman te biviyag ki pà ne iyan iya se ibpeuna tew ke kiyug te Kerenan tew, ne ketà te kebpatay tew ne sikandin ded se kemuney keytew. Su iyan din meana ne kepatey keyuyag ne iyan egkemuney keytew ne ke Eleleala.

<sup>9</sup> Su tembù mibpebpatay si Hisu Kristu ne nevanew red manen su apey sikandin ke Kerenan dut te langun ne mibperetiyya kandin, megidsan se biviyag dan etawa ke minatey ran en.

<sup>10</sup> Ne geina te benar ini, ne kenà dait ne iyan ki edsawey rut te minge ruma tew ne mibperetiyya mekeatag te egkeekan dan, etawa igkesuheyy tew sikandin. Su keuremà ne langun tew ne ebpengetuvang diyà te Eleleala ne sikandin ke egkukum keytew.

<sup>11</sup> Su iyan din egkeiringan ke impesurat ne Lalag te Eleleala ne egkahi te,

“Na geina te benar iya ne biviyag a,” ke se Eleleala,

“ne benar dema ne ruen hewii ne ebpekeuma,

ne langun ne minge etew ne ebpenimbuel

kayi te etuvangan ku.

Uya, langun ne ebpekepehimbenar

te iyan a ke benar ne Eleleala.”

<sup>12</sup> Ketà ne riyà ki ebpengetuvang te Eleleala ne igketarem tew kandin ke langun ne mid-ulaula tew kayi te ampew te dunya.

*Kenà Kiyu Ebaal te Kebpekevangan te Minge Ruma Tew te Keduma ki Hisu Kristu*

<sup>13</sup> Tembù be kenà kiyu edsawey rut te ulaula te minge ruma tew ne mibperetiyya. Inemulà se iyan tew ed-ul-ulaan ne endei se kenà tew egkepeneheewit ke minge ruma tew ne mibperetiyya te kebpekevaal dan te salà.

<sup>14</sup> Su kayi sabap te keduma ku ki Hisu Kristu ke Kerenan ku, ne nesebutan ku te warà misan engkey ne egkeenen ne idawey te Eleleala. Ugaid ne embiya ruen etew ne ebpegitung te ruen egkeenen ne idawey te Eleleala, ne kenà meupiya ne egkaan sikandin.

<sup>15</sup> Ne embiya egkereetan ke itungan te suled niyu sabap dut te iyan niyu migkaan ini se idawey rin, ne iring te warà limù niyu kandin. Kenà niyu beluya ini se egkeenen niyu ne ebpekederaat dut te sarig te ruma niyu te ebperetiyya, su seveka red dema sikandin dut te midselidigan ni Hisu Kristu te kinepatey rin.

<sup>16</sup> Ne misan netuenan tew te ini se ed-ul-ulaan tew ne warà meraat din, ugaid ne ruen duma tew ne ebpegitung te idawey ini te Eleleala, ne iyan iya se kenà tew ed-ul-ulaan ini su apey warà ebpekekahi te misan engkey en ne meraat mekeatag te ini se ulaula tew.

<sup>17</sup> Su kenà iyan Edetuan te Eleleala keytew ne mekeatag dà te egkeenen wey ed-inumen, ugaid ne mekeatag te kebmetidtu te ulaula tew, mekeatag te kebmelintad te hinawa tew, wey ke kegkehalew te hinawa tew ne riyà ebpuun te Kedeseenan ne Ebpetuntul te Menusiya.

<sup>18</sup> Su embiya iring ketà se kegkerumai tew ki Hisu Kristu ne ebpekesuhat ki te hinawa te Eleteala, ne egkesuatan dema rut te menge ruma tew ke menge ulaula tew.

<sup>19</sup> Ketà be ne iyan tew ed-ul-ulaan ke endei se kegkeseveka rut te langun tew ne mibperetiyyaya, ne ebpekepeiseg te kebperetiyyaya tew te keduma tew ki Hisus.

<sup>20</sup> Ne egkehiyen ku maa keniyu ne kenà kiyu ederaat te sarig te menge ruma tew sabap dut te egkeenen tew. Su benar ne warà egkeenen ne idawey te Eleteala, ugaid ne iyan din dà kereetayan embiya ruen дума tew ne egkepeneheewit tew te kebpekevaal dan te salà kayi rut te migkaan tew.

<sup>21</sup> Tembù be kenà ki ed-ulaula te piya engkey en ne ulaula ne ebpekepeneheewit te menge suled tew ne mibperetiyyaya te kebpekevaal te salà. Su embiya kayi te egkeenen tew ne usa, etawa ke ebpenginumen tew ne ebpeketevereg se puunan te kegkepeneheewit kandan te kebpekevaal te salà, ne kenà tew en arà ed-ul-ulaan.

<sup>22</sup> Ne kayi te migkahi ku keniyu ini, ne iyan niyu rà dumai ke endei se egkeperetiyyaya niyu ne ebpekesuhat te hinawa te Eleteala, ugaid ne kenà niyu en ibpekidlewanà mekeatag ketà su iyan dà dait ne netau kayi ne ke Eleteala. Ne mehalew nevenar ke etew ne kenà eduwaruwa se hinawa rin dut te ed-ul-ulaan din.

<sup>23</sup> Su embiya ruen etew ne egkeruwaruwa se hinawa rin ketà te egkeenen din, ugaid ne egkeenen din ma iya, ne ed-isuhaten te Eleteala sikandin te salà su nesurang din ke benar ne mibperetiyyaya rin. Ne misan engkey en se ed-ul-ulaan tew, embiya kenà kayi ebpuun dut te benar ne peretiyyaya tew ne egkevaluy ne salà tew.

## 15

*Iyan Iya se Ibpeuna te Hinawa Tew Ke Kebpeiseg te Kebperetiyyaya dut te Menge Ruma Tew*

<sup>1</sup> Na sikitew se mevaher en se peretiyyaya tew, ne iyan iya se edtulengeran tew ke menge ruma tew ne meluvey pà se peretiyyaya rin. Ne kenà iyan tew rà ebpegitungen ne ke hinawa tew.

<sup>2</sup> Ugaid ne iyan tew ibpeuna te hinawa tew ne endei se ebpekevehey rut te ruma tew te keupianan su apey ebpekeiseg ke sarig dan.

<sup>3</sup> Su misan si Hisu Kristu ne warà din ipeuna ke kiyug te hinawa rin. Su ruen nekahi rin diyà te Eleteala ne impesurat ne egkahi te, “Ke langun ne ibpegkeyà te etew keykew, Eleteala, ne kayi edadsang te kediey.”

<sup>4</sup> Ne netueanan tew te langun ne impesurat ne Lalag te Eleteala rengan ne keytew ne keupianan su apey ki egkepenurù. Su ini se impesurat ne lalag din ne ini se ebpeketavang keytew te kebmetigker tew ketà te kemeresayan tew, wey idtihel te hinawa tew gewii te kedtahad tew rut te ebpeneregen tew keuremà.

<sup>5</sup> Ne Eleteala rà se ebpuunan kayi te ini se kebmetigker tew te kemeresayan wey ke kebmetihel te hinawa tew. Ne egkiyuhan ku ve perem ne menu ma ke egketevangan kew te Eleteala su apey egkeseveka ke hinawa niyu iring dut te nehuruwan niyu ne ulaula ni Hisu Kristu.

<sup>6</sup> Ketà ne egkeseveka kew langun te kedeyù niyu rut te Eleteala tew ne Amey ni Hisu Kristu ke Kerenan tew.

*Impesabat ni Hisu Kristu Ke Daat te Nanam te Eleteala diyà te Menge Etew ne Kenà Hudiyanen*

<sup>7</sup> Peteltelimeey kew iring te kinetelimaa ni Hisu Kristu keniyu, ne embiya ve ini se ed-ul-ulaan niyu ne igkereyù ini te Eleteala.

<sup>8</sup> Benar ini se egkehiyen ku te si Hisu Kristu ne nevaluy ne sugsuhuen te menge Hudiyanen su apey rin ibpekita kandan te kenà ebperis ke pasad te Eleteala. Su ke kinesuhua te Eleteala ki Hisus, ne sikandin ini ke intuman dut te pasad te Eleteala te keep-epuan dan dengan.

<sup>9</sup> Ne ruma pà ne insuhù te Eleteala ki Hisu Kristu su apey ebpekereyù te Eleteala ke kenà menge Hudiyanen sabap dut te impekita rin ne daat te nanam din kandan. Su iring dut te impesurat rengan ne nekahi ni Hisu Kristu ne egkahi te, “Ibpemenudtul ku riya te kenà menge Hudiyanen ke daat te nanam nu kandan.

Uya, ebpemeyukbeyuken ku mekeatag keykew, Eleteala, kayi te kedeyù ku keykew.”

<sup>10</sup> Ne ruen pà nekahi dut te impesurat ne Lalag te Eleteala ne egkahi te, “Sikiyu ne kenà menge Hudiyanen, ne amung kew en dut te kehelawan te menge etew ne nepemili te Eleteala.”

11 Ne ruma pà maa ne nekahi ketà te,  
 “Sikiyu ne kenà menge Hudiyanen,  
 ne deyua niyu en ke Kerenan tew.  
 Uya, langun niyu ne menge etew,  
 ne deyua niyu en sikandin.”

12 Ne ruen pà lavew rengan migkahi ni Isayas, senge etew ne mibpelambas te Lalag te Eleteala, ke sikandin te,  
 “Ne egenat te kevuwaran ni Isai  
 ne ebpekelepew ke etew ne ebayàbayà  
 dut te menge etew ne kenà Hudiyanen.  
 Ne sikandin ke ebpenerengen dan.”

13 Ne ke Eleteala se ebpuunan te langun ne keupianan ne ebpenerengen tew, ne kiyug ku ne menu ma ke mevehayi kew nikandin te rekela ne kehelawan wey ke kebmelintad te hinawa niyu. Su embiya iring ketà se egked-ulaula, ne ke kedsarig niyu kandin mekeatag te ebpenerengen niyu ne ebmevag-et riyà sabap dut te gehem te Kedesenan ne Ebpetuntul te Menusiyà.

*Ke Kiyug ni Pablo te Ebpmenuutul dut te Meupiya ne Tudtul diyà te Meriyù ne Menge Inged*

14 Menge suled ku, kayi te itungan ku ne netueanan ku te layun niyu ed-ul-ulaa ke meupiya. Ne netueanan ku rema se netamat niyu en ke impenurù keniyu, ne ebpekegaga kew en te ebpenurù te menge ruma niyu.

15 Ugaid ne kayi te surat ku ini keniyu ne iring te meharang se kegkahi ku su ruen arà egkesuatan ku ne ebpetenturan ku keniyu. Ne iyan ku warà kegkealang-alang te egkahi kayi su geina te ruen kewayà ne imbehey kediey te Eleteala,

16 Su mibeelan a nikandin ne sugsuhuen ni Hisu Kristu te egeleveke kenyan te keniyu te menge etew ne kenà Hudiyanen su ebpesabut te Meupiya ne Tudtul ne egenat te Eleteala. Ne kayi te kegeleveke ku ne iring a te terebpepengesa ne edrenà te ibehey diyà te Eleteala. Su embiya ruen ebperetiyaya ne sikandan se egketelima te Eleteala ne iring sikandan dut te idrenà ku ne ibehey diyà te Eletela su midtilak en ke hinawa ran dut te Kedesenan ne Ebpetuntul te Menusiyà.

17 Ne sabap dut te tavang ni Hisu Kristu kediey ne kenà ku igkeyeyai te ibpmenuutul ku ke langun ne neveelan ku riyà te kandin.

18 Ugaid ne iyan ku rà ma egkehien ne endei rà ke neveelan ku ibpepevyà te tavang ni Hisu Kristu su apey ku ebpebuti dut te menge etew ne kenà Hudiyanen su apey ran ebpekeruma te Eleteala. Su nekeperetiyaya ran en sabap dut te lalag ku ne nerineg dan wey ke ed-ul-ulaan ku ne nekita ran.

19 Uya, nekeperetiyaya ran sabap dut te nekita ran ne mibpeveelan kediey te Eleteala ne mekegeyip wey sabap dut te gehem dut te Kedesenan ne Ebpetuntul te Menusiyà. Ketà be ne riyà te langun ne neipenawan ku ne impemenuutul ku en ke Meupiya ne Tudtul mekeatag ki Hisu Kristu igenat dà te Hirusalim taman te inged ne Eliriku.

20 Su iyan ku pegungayà ne riyana ebpmenuutul te Meupiya ne Tudtul te menge etew ne warà pà bulug mekerineg su apey kenà a ebpekelapis dut te nepenuutulan en te ruma ne etew.

21 Su iring dut te impesurat ne Lalag te Eleteala ne egkahi te,  
 “Ke menge etew ne warà pà mepenuutuli  
 mekeatag ki Hisu Kristu,  
 ne ruen ded kegkepuwasi te itungan dan.  
 Uya, ke menge etew ne warà pà vulug mekerineg  
 ne ruen ded dema kebpekesabut dan.”

*Ke Kiyug ni Pablo ne Ebpekibalak dut te Menge Mibperetiyaya Diyà te Inged ne Ruma*  
 22 Geina te ini se heleveke ku te kebpenerù dut te Meupiya ne Tudtul ne kenà kepipira e rà mevangan te ebpengkenyan te keniyu.

23 Ne guntaan te neipus ku en ini se menge heleveke ku kayi te ebelàbelà ne inged, ne neuhet dà ne ebpegitungan ku en se kebpepengkenyan ku te keniyu,

24 ne guntaani ne netahù te itungan ku se ebpengkenyan ad te keniyu su ebpepin-awet a riyà te keniyu te kebpendiyà ku te inged ne Isepanya su ebpekibalak a keniyu neraan. Ne igkehalew ku te ebpekebalak kiyu, ne embiya egkeipus ke ebpegesaken tew ne egkeawà ke limengew ku ne kalu ke edtevangen a nikiyu te kedlaus ku.

25 Ugaid ne guntaani ne ed-ipanew ad se ebpendiyà te Hirusalim su ruen id-ated ku ne kureta ne idtavang dut te menge etew ne mibperetiyaya riyà.

<sup>26</sup> Su nepegitung dut te minge suled tew ne mibperetiyaaya kayi te lusud te Mesidunya wey Gerisya te iyan meupiya ne ebehey ran te tavang diyà te minge ruma tew ne mibperetiyaaya riyà te Hirusalim ne ebpegevuuluan te egketemanan din.

<sup>27</sup> Ne lila nevenar ini se netahù te itungan dan ne kedtavang dan, ne edait iya rema ketà su nekeutang dan dut te limù te minge Hudiyanen ne mibperetiyaaya riyà te Hirusalim. Iyan ku egkehiyen ini su embiya kenà ke minge Hudiyanen ne mibperetiyaaya diyà te Hirusalim, ne warà metueni dut te minge etew ne kenà Hudiyanen ke benar ne penurù mekeatag te Eleteala. Tembù be edait iya ne edtavang ke kenà minge Hudiyanen dut te minge Hudiyanen riyà te Hirusalim ne ebpegevuuluan te egketemanan din.

<sup>28</sup> Ne embiya egkeipus ku en ini se vaal ku te ked-ated ku kayi te langun ne nevrurun ne tavang, ne arà pà ne egenat a te ed-ipenawan ku riyà te Isepanya ugaid ne ebpepin-awet a kenian te keniyu.

<sup>29</sup> Ne netuenan ku te embiya ebpekeuma ad kenian te keniyu, ne dekelà se kedtavang kenitew ni Hisu Kristu su apey ebmevag-et ke kedsarig tew.

<sup>30</sup> Na ebuyuen ku keniyu ne minge suled ku, te ipengeningeni a nikiyu te mevaher te Eleteala. Ne netuenan ku ne ed-ul-ulaan niyu ini su atag dut te kebpekidseveka tew ki Hisu Kristu ke Kerenan tew wey atag dut te kebpekimlimuey tew ne imbehey rut te Kedeseenan ne Ebpetuntul te Menusiya.

<sup>31</sup> Ipengeningeni niyu te elangi a te Eleteala rut te intahù te itungan te minge etew ne warà mebperetiyaaya riyà te lusud te Hudiya te ebpemekaid kediey. Ne ipengeningeni niyu red dema se mehalew se kedtelimaa rut te minge etew ne mibperetiyaaya riyà te Hirusalim kayi te ebpeheewiten ku ini.

<sup>32</sup> Su embiya egkeipus ku en ini ne embiya idluhut te Eleteala, ne ebpekepengkenian ad te keniyu. Ne egkehalew a ketà te kebpekeuma ku, ne egkesuatsuat se hinawa ku ke ebpekekebalak kiyu.

<sup>33</sup> Iyan ku kiyug ne menu ma perem ne ke Eleteala ne ebpuunan dut te kebmelintad te hinawa tew ne ebpekiduma keniyu. Ne egketuman ini.

## 16

### *Ke Ketepusan dut te Surat ni Pablo*

<sup>1</sup> Na ruen ibpekilala ku keniyu ne meritan ne mibperetiyaaya ki Hisus ne edtavang diyà te egkevurunan dut te minge mibperetiyaaya riyà te inged ne Sinsiriya. Ne iyan din ngaran ne si Febe.

<sup>2</sup> Embiya ebpekeuma sikandin ne gelhelaa niyu su ruma tew sikandin te ebperetiyaaya ki Hisu Kristu ke Kerenan tew, su ini ke edait ne ulaula tew te minge etew ne mibperetiyaaya en. Ne tevangi niyu sikandin embiya ruen kurang din su merakel dema ini se netevangan din abpeg kediey.

<sup>3</sup> Ne ibpesabpet niyu rà ini se panginginsà ku riyà te ki Priscila wey ki Ekila, su minge ruma ku sikandan te egelevek ki Hisu Kristu.

<sup>4</sup> Ne sabap dut te kedtevangi ran kediey ne warà dan isepayan ke ebpatay ran. Ne rekelà be se kebpeselamat ku kandan, ne kenà siaken dà su misan ke langun ne kenà minge Hudiyanen ne mibperetiyaaya en ne ebpeparap kayi ne rekelà ded dema se kebpeselamat dan.

<sup>5</sup> Ne idlakit niyu rema ini se panginginsà ku rut te minge etew ne mibperetiyaaya ne riyà egkevurun te valey ran su ebpeparap dan te Eleteala.

Ne idlakit niyu red dema ini se panginginsà ku riyà te igkelimù ku ne sepekat ku ne si Ipinitu, su sikandin ke neuna ne etew ne mibperetiyaaya ki Hisu Kristu kenian te lusud te Asiya.

<sup>6</sup> Idlakit niyu rà ki Maria ini se panginginsà ku kandin, arà se migelevek te mevaher te kedtevangi keniyu.

<sup>7</sup> Idlakit niyu rà dema ini se panginginsà ku ki Andruniku wey si Huniyas, minge ruma ku ne Hudiyanen te nevilanggù. Ne egkeedatan nevenar sikandan dut te minge kedserihan ni Hisus, ne sikandan pà se neuna ne mibperetiyaaya kenà siaken.

<sup>8</sup> Ne idlakit niyu rè be ini se panginginsà ku ki Empliyatu, ke sepekat ku ne rekelà ku te hinawa sabap dut te kineperetiyaaya tew ki Hisu Kristu ke Kerenan tew.

<sup>9</sup> Ibpesampey niyu rà ini se panginginsà ku ki Urbano ke ruma ku te egelevek ki Hisu Kristu, wey si Istakis rema ke megeget ne sepekat ku.

<sup>10</sup> Ibpesampey niyu rà ini se panginginsà ku ki Epilis, arà se impekita rin ke sarig din ki Hisu Kristu diyà te langun. Ne igkahi niyu rà ini rema riyà te telteleanak ne ensi Eristubulu.

<sup>11</sup> Ibpesampey niyu rà rema ini ki Hirudyun ne ruma ku ne Hudiyanen, wey riyà pà maa te telteleanak ne ensi Narciso wey ne mibperetiyaya en.

<sup>12</sup> Ne ibpesampey e rà nikiyu riyà te ki Tripina wey ki Tripusa, ke menge mehiedgied ne sugsuhuen ni Hisu Kristu ke Kerenan tew. Ne ibpesampey e red nikiyu riyà te ki Persida, ke megeget ne sepekat ku ne rekela se neveelan din te kedtumana rin dut te mibpeveelan kandin ni Hisu Kristu ke Kerenan tew.

<sup>13</sup> Ne ibpesampey e rà dema nikiyu riyà te ki Rufo ke nekilala te langun ne meupiya se helevek din te Eleteala, wey riyà te iney rin dema ne midtuganur kediey iring te tuney ad ne anak din.

<sup>14</sup> Ibpesampey e rà nikiyu ki Asinkritu, ki Pligunti, ki Hirmis, ki Petrubas, ki Hirmas, wey ke langun pà ne mibperetiyaya riyà te kandan.

<sup>15</sup> Idlakit e rà be nikiyu ki Pilulugu ki Julia, ki Nereo wey ke etevey rin, abpeg din ki Ulimpas wey ke langun ne menge ruma ran ne mibperetiyaya riyà te kandan.

<sup>16</sup> Ne langun niyu ne pesegshepeey kew su tuus te ruen kebpelimuey niyu. Langun ne menge mibperetiyaya kayi te ebelàbelà ne inged ne ebppingingsà dan dut te langun ne sikiyu kenian.

*Ke Mewri en ne Penduan Te Surat Ni Pablo*

<sup>17</sup> Ebuyuen ku ve keniyu, menge suled ku, te ingat kew rut te menge etew ne ebaal te kegkereeiti rut te kegkeseveka niyu te kebperetiyaya, ne elihu kew kandan su sikandin ke puunan dut te kegkeliyaliya te sarig niyu su ebpekesurang dan dut te benar ne penurù ne ingkepenurù keniyu.

<sup>18</sup> Su ke menge etew ne iring kayi ne kenà iyan dan edumaan si Hisu Kristu ke Kerenan tew, ugaid ne iyan den dà edumaan ne ke kiyug diyà te hinawa ran. Metau ran ne edlalag wey metau ran ne edlana dut te hinawa te menge etew su apey ran egkeekali ke menge etew ne kenà pà metau dut te benar ne penurù.

<sup>19</sup> Nevantug en ke tudtul te kebperumaruma niyu rut te menge suhù te Eleteala, ne nehalew a nevenar ketà. Ugaid ne iyan ku rà egkiyuhun ne egkeumanan pà ke netuean niyu te ed-ul-ulaan ne meupiya, ne kenà kew ebpekehuru te misan engkey ne ulaula ne meraat.

<sup>20</sup> Ne ke Eleteala ne ebpuunan te kebmelintad te hinawa tew ne kenà dà meuhet ne edtekutaken din si Setana ke datù te pekaid.

Iyan ku kiyug ne menu ma perem ke ibpekita rut te Kerenan tew ne si Hisu Kristu ke daat te nanam din keniyu.

<sup>21</sup> Ini se ruma ku te ebpmenuudtul te Meupiya ne Tudtul ne si Timoteo, ne ebppingingsà keniyu wey en si Lucio, si Jason, wey si Susipatru ke menge ruma ku ne Hudiyanen.

<sup>22</sup> Ne si Tiriku rema ke pinesurat ku kayi te surat ku ne ebppingingsà dema keniyu su ruma tew rema sikandin te ebperetiyaya.

<sup>23</sup> Si Gayu ne ebppingingsà rema keniyu. Sikandin ke ebpeketuganur kediey su riyana a ed-ubpà te baley rin ne egkevurunan dut te ruma tew ne mibperetiyaya. Ne si Irastu ke edtuganur te kureta kayi te inged ini, wey ke suled tew te ebperetiyaya si Kuwartu ne ebppingingsà rema keniyu. [

<sup>24</sup> Ne langun niyu riyà, ne iyan ku kiyug ne menu ma perem ke ibpekita rut te Kerenan tew ne si Hisu Kristu ke daat te nanam din keniyu. Ne egketuman ini.]

<sup>25</sup> Edeyù kiyu te Eleteala! Su sikandin dà ke ebpekevehey te kebmetihel te kebperetiyaya niyu sabap dut te Meupiya ne Tudtul mekeatag ki Hisu Kristu ne impemenuudtul ku wey sabap dut te benar ne ne in-eles te neuhet dà dengan ugaid ne impayag en guntaani.

<sup>26</sup> Ne arà se benar ne impayag en guntaani te Eleteala keytew sabap dut te impesurat dut te menge etew ne ebpelembas te lalag din dengan. Ne guntaani ne insuhù en dut te Eleteala ne warà kemetayen din te ibpepenudtul ini kayi te langun ne menge etew kayi te ampew te dunya su apey langun ne ebpekeperetiyaya wey ebpekeperumaruma te menge suhù din.

<sup>27</sup> Ne ke sebseveka rà ne Eleteala ne iyan dà netau te langun. Uya, edeyuen tew te ibpepeyayà tew ki Hisu Kristu taman te taman.

Arà dà taman.

*Pablo*



## **Ke Neuna ne Surat Ni Pablo Riyà te Menge Etew ne Mibperetiyya te Inged Ne Kurintu**

<sup>1-2</sup> Siaken ini si Pablo se edsurat kayi diyà te minge etew te Eleteala te inged ne Kurintu egenat te kebperetiyya ran ki Hisu Kristu. Ne si Sutinis ke suled tew te ebperetiyya se ed-amung kediey te edsurat kayi.

Senge etew a ne kedserihan ni Hisu Kristu ne nepemili din su arà ke kiyug te Eleteala. Ini se surat ku kenihan te keniyu ne nepemili te Eleteala ne egkevaluy ne minge etew rin egenat te mibpekidseveka ke hinawa niyu ki Hisu Kristu. Uya, nepemili kew nikandin ne mibmetilaken ke hinawa niyu su apey sikiyu ne minge etew rin ne edtuman te kiyug din. Ne kenà sikiyu rà se nepemili din su langun ne etew ne mibperetiyya ki Hisu Kristu ke Kerenan tew, misan endei ran kayi te ampew te dunya, su si Hisus ke Kerenan tew te langun ne ebpengarap kandin.

<sup>3</sup> Kiyug ku ne egkepenaub kew te Eleteala ke Amey tew wey si Hisu Kristu ke Kerenan tew, ne egenat kandan ne kenà meseleti te meraat ke hinawa niyu.

### *Ke Menge Keupiyanan ne Ibehey te Eleteala*

<sup>4</sup> Layun a ebpeselamat te Eleteala atag dut te keupiyanan ne ibehey rin keniyu atag dut te kebpekidseveka te hinawa niyu ki Hisu Kristu egenat te kebperetiyya niyu kandin.

<sup>5</sup> Warà tedtab din se penaub te Eleteala keniyu igenat te mibpekidseveka ke hinawa niyu ki Hisus. Seveka ne penaub din ne nesebutan niyu en ke benar ne penduan ni Hisus, ne nevehayan kew rema te ketau te ebpesabut kayi te minge ruma niyu.

<sup>6</sup> Su ke penduan ni Hisu Kristu ne iring te pinemula ne nokedalid en kayi te itungan niyu.

<sup>7</sup> Engketà be ne warà kurang dut te merakel ne edsusunan te ketau ne ibehey te Eleteala su apey kew egketevangan te eduma rut te kiyug din gewii te edtahad kew rut te kedlived ni Hisu Kristu ke Kerenan tew.

<sup>8</sup> Ne sikandin ke mibaher te kebperetiyya niyu su apey warà idsawey rin keniyu ketà te hewii ne kedlived ni Hisu Kristu.

<sup>9</sup> Su ke Eleteala ne mibpemili keniyu te ebpekidseveka rut te Anak din si Hisu Kristu ke Kerenan tew ne egkedserihan din nevenar.

### *Ke Kebpelewlewanà dut te Menge Mibperetiyya Diyà te Kurintu*

<sup>10</sup> Menge suled ku te ebperetiyya, ruen ebuyuen ku keniyu ne ebperumdumaan niyu su suhù a ni Hisu Kristu ke Kerenan tew. Iyan ku ebuyuen ne egkeseveka kew su apey warà kebpelekedlewanà diyà te keniyu. Uya, egkeseveka ke itungan niyu wey ke hinawa niyu.

<sup>11</sup> Iyan ku kegkahi kayi, minge suled, su ruen minge suled ni Keluwì ne mibpenudtul kediey te ebpelekedlewanà kew riyà.

<sup>12</sup> Ne ini se ed-ul-ulaan niyu ne kenà meupiya se ebpelekedsurang ke hinawa niyu su ruen egkahi te, "Sakup a ni Pablo," ne egkahi manen ke seveka te, "Sakup a ni Epulu." Ne egkahi maa ke ruma te, "Kayi a eduma ki Pedro," ne ruen pà lavew egkahi te, "Ne siaken ne kayi eduma te ki Hisu Kristu."

<sup>13</sup> Ey, embiya arà se ed-ul-ulaan niyu ne iring te mid-umun-umun niyu si Hisu Kristu! Menu, siaken be se mibpelensang diyà te pinebelavag ne kayu su apey kew egkepelihau? Engkey, iyan niyu impebunyang su mibpesakup kew kediey?

<sup>14</sup> Pinegkepiya ku pà te kenà siaken se mibunyang keniyu su warà дума ne mibunyanhan ku liyu te si Krispu wey si Gayu.

<sup>15</sup> Su kenà be egkepakey ne ruen senge etew keniyu ne egkahi te iyan din kebunyahì kedi su apey egkevaluy ne sakup ku.

<sup>16</sup> (Uya, duen pè bes nebunyanhan ku ne si Istipanis ragkes ke esawa rin, anak din. Liyu pè be kandan ne warè en egketenuran ku.)

<sup>17</sup> Su kenà ke kebpebunyang te minge etew se insuhù ni Hisu Kristu kediey. Ugaid ne iyan din insuhù kedi ne ibpemesabut ku ke Meupiya ne Tudtul dut te minge etew. Ne wey ku ibperayag en arà se Meupiya ne Tudtul ne kenà kayi te meralen ne lalag su apey egkekita ke ketau ku. Su embiya arà se mid-ulaula ku ne siaken se edeyuen, ne ke tudtul mekeatag dut te kinepebpatay ni Hisu Kristu diyà te pinebelavag ne kayu ne ebpekeeles.

*Si Hisu Kristu ke Mibpayag dut te Ketampas te Eleteala*

<sup>18</sup> Ne ke minge etew ne egkerandung diyà te kenerekaan, embiya ebpekerineg dan dut te Meupiya ne Tudtul mekeatag te kinepatey ni Hisu Kristu riyà te pinebelavag ne kayu atag dut te salà dan, ne iyan dan kebpegitung ne warà rantek din. Ugaid ne sikami ke mibperetiyyaya ki Hisus, ne netuenan dey te ini ne ibpekita te Eleteala te gehem din te kebpeliyu rin keyta dut te kedusa te salà tew.

<sup>19</sup> Su ruen impesurat ne Lalag te Eleteala ne egkahi te, “Ke itungan dut te etew ne ruen sinebutan din dut te itungan te minge etew, ne edereetan ku.

Ne ke etew ne metau ne ebpegitung te merallem, ne ibpayag ku te arà se ketau rin ne warà pantag din kediey.”

<sup>20</sup> Embiya iring ketà se ed-ul-ulaan te Eleteala, ne egkemenumeni ke etew ne merallem se kebpegitung din, wey ke etew ne midtau dut te pendum ni Moises, wey ke etew ne lelayun edtavan dut te kebpelelewanà? Su impayag en te Eleteala se ayan be ne itungan ne warà en iya rantek din diyà te kandin su kayi rà ayan ne ketau te ampew te dunya.

<sup>21</sup> Su ayan ne minge ketau te itungan ne kenà ayan ke ralan ne kegkesebuti tew te Eleteala. Ugaid ne ke puunan te ralan te kegkeriweswasi tew te Eleteala ne riyà ded ebpuun te kandin ne eturan. Ini se eturan din ne ebpekepeliyu keytew atag dut te kebperetiyyaya tew rut te Meupiya ne Tudtul ne impemesabut dey, misan ini se impemesabut dey ne warà kun rantek din.

<sup>22</sup> Su ke minge Hudiyanen ne kenà dan ebperetiyyaya dut te Meupiya ne Tudtul ke embiya kenà dan egkekita ke mekegeyip ne tuus te gehem te Eleteala. Ne ke minge Gerisiyanen ne iyan dan ebperetiyyayaan arà se etew ne metampas se itungan din.

<sup>23</sup> Ugaid ne sikami ne iyan dey ibpemesabut ke Meupiya ne Tudtul mekeatag te kinepatey ni Hisu Kristu riyà te pinebelavag ne kayu, misan iring te ebvayuen te andu ke hinawa rut te minge Hudiyanen ketà te egkerineg dan ini, ne riyà te itungan te minge Gerisiyanen ne warà rantek din.

<sup>24</sup> Ugaid ne ke minge etew ne miduma rut te kedtawag te Eleteala, misan Hudiyanen etawa kenà, ne nemesasan dan dut te kinepatey ni Hisu Kristu riyà te pinebelavag ne kayu ne ketà impayag te Eleteala ke gehem din wey ketau rin.

<sup>25</sup> Su misan pà duen etew ne egkahi te ke mid-ulaula te Eleteala te kebpeliyu rin keytew te kedusa te salà tew ne iring te warà rantek din, ugaid ne warà itungan te etew kayi te ampew te dunya ne ebpekerepeng te itungan te Eleteala. Ne misan egkahi ran te meluvey ke Eleteala su minatey red ke Anak din, ugaid ne ketà din iya impayag te iyan pà mevaher ke gehem din dut te langun ne gehem te minge etew.

<sup>26</sup> Na minge suled, tentenuri niyu ke ulaula niyu rengan te warà kew pà mibperetiyyaya te Eleteala. Su merelag keniyu se metikang se nesebutan din, merelag keniyu se nevehayan te ketehel, ne merelag keniyu se minge anak te berebansa ne etew, ugaid ne nepemili kew red te Eleteala te ebperetiyyaya kandin.

<sup>27</sup> Su ke etew ne nepemili te Eleteala ne ke etew ne ebpendereiseken te ruma rin ne warà mibperetiyyaya su iring te kenà din egkegaga se lenged din. Iyan kinepemili te Eleteala te etew ne iring ketà su apey egkeyeyai ke etew ne iyan din pegitungan se egkegaga rin ke langun. Ne engketà ded dema se mibpemili ded dut te Eleteala ke etew ne warà behayi te ketehel din su apey egkeyeyai ke etew ne ruen ketehel din.

<sup>28</sup> Ne mibpemili dema te Eleteala ke etew ne mevavà ne edtetekudien su warà atag diyà te itungan te ruma rin, su apey ibpekita rin te warà pantag din ke ebelielehà dut te itungan te minge etew kayi te ampew te dunya.

<sup>29</sup> Tembù be mid-ulaula rin ini su apey kenà egkepakey ne ruen etew ne edekarak te hinawa rin diyà te etuvangan te Eleteala.

<sup>30</sup> Su ke kinepekideveka tew ki Hisu Kristu ne riyà ebpuun te kiyug te Eleteala. Ne Eleteala rema se ebehey keyta te ketau ibpepevayà ki Hisu Kristu. Ne si Hisus ke iyan kedtengteng te Eleteala keytew ne metidtu diyà te etuvangan din su sikandin se mibpeliyu keytew rut te kedusa te salà tew su apey ki mevaluy ne minge etew te Eleteala.

<sup>31</sup> Tembù be iring dut te impesurat ne Lalag te Eleteala ne egkahi te, “Embiya ruen etew ne edekarak, ne kenà iyan din idekarak ke hinawa rin ugaid ne si Hisu Kristu ke Kerenan tew.”

## 2

*Ke Impesabut ni Pablo ne Riyà Ebpuun te Eleteala*

<sup>1</sup> Menge suled ku, rut te aney en ne kebpendiyà ku te keniyu su ebpesabut ke engkey se ibpesesabut te Eleteala kediey mekeatag ki Hisu Kristu, ne warà ku pekerelema ke lalag ku te ibpekita te metikang se nesebutan ku.

<sup>2</sup> Su seveka rà se neketahù te itungan ku ne ibpesabut ku keniyu ne ini se tudtul mekeatag ki Hisu Kristu, labi en ke kinepatey rin diyà te pinebelavag ne kayu ke midlensangan kandin.

<sup>3</sup> Su ketà te nekeubpà a riyà te keniyu ne mibmeluvey se lawa ku ne iring te migkerker a su igkeandek ku kema ke kenà ku egkegaga te edtuman ke insarig kedì te Eleteala.

<sup>4</sup> Ne wey ku impemesabut en ke Lalag te Eleteala keniyu ne kenà iring dut te etew ne egkepuyuk ke menge etew dut te lambeylambey te lalag din. Ugaid ne mibpehimbenar kew su nekita niyu ke tuus dut te gehem te Kedesenan ne Ebpetuntul te Menusiyà se midtavang kedì.

<sup>5</sup> Tembù be ke kebperetiyya niyu ki Hisus ne kenà kayi rà ebpuun te ketau te menusiya, ugaid ne riyà ebpuun te gehem te Eleteala.

*Ke Tidtu ne Ketau ne Riyà Ebpuun te Eleteala*

<sup>6</sup> Embiya riyà te menge etew ne mevaher en se kebperetiyya ran te Eleteala ne ke kebpmesabut ku kandan ne merallem. Ugaid ne kenà iring dut te ketau te itungan dut te menge etew kayi te ampew te dunya etawa ke ketau rut te menge etew ne nevehayan te ketulengeran dan, su ruen edtedtavan din.

<sup>7</sup> Ugaid ne riyà ebpuun te ketau te Eleteala ini se ibpayag ku guntaani ne warà pa metueni te etew. Su ketà te warà din pà limbaha ini se dunya ne netahù en te itungan din se ruen dalan te kebpeiyu keytew dut te salà tew su apey ki ebpekeamung kandin dut te kebpuurù din.

<sup>8</sup> Ne ayan se menge etew ne nevehayan te ketulengeran kayi te dunya ne warà dan mesebuti ke netahù te itungan te Eleteala, su embiya nesebutan dan ne warà dan peimetayi si Hisu Kristu ke mekegehem ne Kerenan tew.

<sup>9</sup> Su ruen impesurat ne Lalag te Eleteala ne egkahi te,

“Duen impenehana te Eleteala  
rut te menge etew ne egkelimù kandin.  
Ini se impenehana rin,  
ne warà senge etew rà ne nekekita kayi,  
ne warà nekerineg,  
ne warà nekepegitung ketà.”

<sup>10</sup> Ugaid ne guntaani ne ayan se in-eles din dengan ne mibpesebutan din en kenami te kayi rin impepevayà dut te Kedesenan ne Ebpetuntul te Menusiyà. Su egketuenan te Kedesenan ne Ebpetuntul te Menusiyà ke langun ne itungan te Eleteala, misan pà ke menenem ne itungan din.

<sup>11</sup> Ne iring dema te etew, ne warà etew ne netau ke engkey se riyà te itungan dut te ruma rin ke kenà sikandin dà. Ne engketà ded dema, warà egketau ke engkey se netahù te itungan te Eleteala ke kenà ke Kedesenan ne Ebpetuntul te Menusiyà dà.

<sup>12</sup> Ne sikami ne mibperetiyya, ne kenà iyan imbehey kenami te Eleteala ke itungan ne iring dut te menge etew kayi te ampew te dunya ne kenà ebperetiyya. Ugaid ne iyan imbehey kenami ne ke Kedesenan ne Ebpetuntul te Menusiyà te ebpetuntul kenami su apey rey metueni ke langun ne ibehey te Eleteala kenami.

<sup>13</sup> Engketà be ne iyan dey ibpemesabut ne kenà kayi rà ebpuun te ketau te etew, su iyan dey ibpemesabut ke impenurù kenami rut te Kedesenan ne Ebpetuntul te Menusiyà. Uya, edseysayen dey ke tidtu ne penurù mekeatag te Eleteala rut te menge etew ne netehuan en te Kedesenan ne Ebpetuntul te Menusiyà.

<sup>14</sup> Ugaid ne ke menge etew ne kenà ebperetiyya ne warà pà metehui te Kedesenan ne Ebpetuntul te Menusiyà, ne kenà dan ebpekettelimà dut te ibehey te Kedesenan ne Ebpetuntul te Menusiyà. Ne kenà dan ma egkesebutan su iyan dan pegitungan ne warà pantag din. Uya, kenà dan ebpekesabut ketà su warà pà meketahù diyà te hinawa ran ke Kedesenan ne Ebpetuntul te Menusiyà ne edtavang kandan su apey ran egkesebuti.

<sup>15</sup> Ugaid ne ke etew ne mibperetiyya ne netehuan en te Kedesenan ne Ebpetuntul te Menusiyà, ne egkesebutan din ke pantag dut te langun ne impenurù te Kedesenan ne Ebpetuntul te Menusiyà. Ugaid ne ke etew ne kenà ebperetiyya ne warà diyà te kandin ke Kedesenan ne Ebpetuntul te Menusiyà, ne kenà ebpekesabut te itungan dut te menge etew ne netehuan en te Kedesenan ne Ebpetuntul te Menusiyà.

<sup>16</sup> Su iring dut te impesurat ne Lalag te Eleteala ne egkahi te,  
“Engkey, ruen be etew ne ebpekegaga  
te ebpekesabut dut te itungan te Eleteala

su apey rin egkepemandù ke Eleteala?"

Ugaid ne sikitew ke mibperetiyyaya, ne ruen kebpekesabut dey mekeatag kandin su impesabut ni Hisu Kristu ke itungan din kayi te keytew.

### 3

<sup>1</sup> Na minge suled ku, gewii te riyana te keniyyu ne warà a mekepemandù keniyyu iring dut te kepemandù ku te minge etew ne mid-ulinan te Kedeseenan ne Ebpetuntul te Menusiya. Ugaid ne mibpenurù a keniyyu iring te batà pà su ruen ded ed-ul-ulaan niyyu iring te kememenusiyyai.

<sup>2</sup> Embiyya idsempità ku ke penurù ku keniyyu ne iring te rudsun ne impeinum ku keniyyu su kenà kew pà egkepakey ne ebpekekaan te mekahal ne egkeenen. Ne kegkehiyen dè be iya ne ke penurù ku keniyyu ne kenà meralem su warà niyyu pà mesebuti. Ne taman gunteani ne kenà kew pà ebpekesabut te meralem ne kepemandù.

<sup>3</sup> Su ed-ul-ulaan niyyu red ke ulaula rut te minge etew ne warà pà mebperetiyyaya. Egkehiyen ku ini su ruen pà keniyyu se egkesihi, ne ruen pà egkewaha, ne tuus be arà te iyan pà egaked keniyyu ne ke kiyug dut te kememenusiyyai.

<sup>4</sup> Su ruen kun keniyyu se egkahi te, "Sakup a ni Pablo," ne egkahi maa ke senge etew te, "Sakup a ni Epulus." Tuus be te ke ulaula niyyu ne iring pà dut te minge etew ne warà mebperetiyyaya.

<sup>5</sup> Na maa engkey key? Su sikami ki Epulus ne etew red ne midsuhù te Eleteala su apey kew ebpekeperetiyyaya kandin. Su sikami ne edtuman key rà dut te ibpehelevék te Eleteala kenami.

<sup>6</sup> Embiyya idsempità ku ne iring te benì ne ibpemula ku riyà te keniyyu. Ne ke helevek ni Epulus ne ebungbung te wayig su sikandin se ebag-et dut te kebperetiyyaya niyyu. Ugaid ne iyan ebpetuvù dut te benì ne Eleteala.

<sup>7</sup> Su ke etew ne ebpemula wey ke ebungbung te wayig ne kenà sikandan se egkereyù. Ugaid ne iyan egkereyù ke Eleteala su sikandin dà se ebpetuvù dut te benì.

<sup>8</sup> Engketà be ne warà ebiraan dut te etew ne ebpemula wey ke etew ne ebungbung te wayig su nek-ed-iring ke lakew ran. Su ketà te hewii ne kebehey te Eleteala te idlalew rin ne iyan din kebehey ne ebpekepayew rut te helevek dan.

<sup>9</sup> Su sikami ki Epulus ne teleduma te egelevék te Eleteala, ne sikiyu ke iring te pengengewiran te Eleteala ne ebpehelevékan din kenami.

Iring kew rema te ebelayan te Eleteala ne warà pà meipus.

<sup>10</sup> Ne egenat dut te tavang te Eleteala ne ibehey rin kediey, ne iring a rut te etew ne ebpetindég te mevaher ne segkad. Ne ke helevek ku ketà ne meimpit su siak ke neuna ne mibpenurù keniyyu atag ki Hisu. Ugaid ne ruen ruma ne etew ne ed-imasad ketà te nerudsuan ku ne helevek, ne uman seveka ne ed-amung te ebevaley ne med-uram dut te kandin ne helevek.

<sup>11</sup> Su warà ruma ne ebpeunsaran te etew dut te segkad ketà te baley ke kenà ke mibpeunsaran te Eleteala ne si Hisu Kristu.

<sup>12</sup> Ne ketà te segkad ne egkepakey ne ruen pengawid te ebevaley ne meupiyya etawa meraat, su ruen ebevaley te kenà melemu ne egkeeretan iring dut te bulawan, pirak, wey minge belielehà ne batu. Ruen duma ne iyan dan egkuan ne pengawid ne melemu ne egketutung iring te kayu, karan, wey telitip.

<sup>13</sup> Ugaid ne ketà te hewii ne kedlived si Hisu ne ibpayag din ke langun ne helevek te minge etew ke meupiyya ve etawa meraat. Su arà se pengawid ne egeraman din ibpepevayà te apuy su apey egkekita rin embiyya mevaher etawa kenà.

<sup>14</sup> Ne embiyya ke pengawid ne imbaley te etew ketà te segkad ne kenà egketutung, ne dekelà se lalew rin.

<sup>15</sup> Ugaid ne embiyya egketutung arà, ne warà lalew ne ibehey rin. Egkepeliyyu sikandan iring te etew ne ebpelahuy te egketutung ne valey.

<sup>16</sup> Ne sikiyu ne minge mibperetiyyaya, maa kenà niyyu ves egkesebutan te sikiyu ke ed-ubpaan te Eleteala ne ke Kedeseenan ne Ebpetuntul te Menusiya se ed-ubpà riyà te keniyyu?

<sup>17</sup> Engketà be ne embiyya ruen etew ne ederaat te ed-ubpaan te Eleteala ketà te ibpenurù din, ne arà se etew ne edereetan te Eleteala. Su insivey kew te Eleteala ne kandin ne minge etew, ne ketà ne sikiyu ke ed-ubpaan din.

*Ke Etew ne Mepereyù ne Warà Rantek din diyà Te Eleteala*

<sup>18</sup> Kenà kew ed-akal te hinawa niyyu. Embiyya ruen diyà te keniyyu ne ebpegitung te egkegaga rin te meralem ne kebpegitung dut te minge etew kayi te ampew te dunya, ne

iyang iya se ed-engkeran din arà se itungan din su apey rin egketelima ke benar ne ketau ne riyà ebpuun te Eleteala.

<sup>19</sup> Su riyà te etuvangan te Eleteala ne arà se ketau te minge etew kayi te ampew te dunya ne warà rantek din. Su iring te impesurat ne Lalag te Eleteala ne egkahi te, "Ke ketau te etew ne arà en iya ke kebpekelitag te Eleteala dut te minge etew ne ebpegitung te ruen ketau rin."

<sup>20</sup> Ne ruen ruma pà ne impesurat ne Lalag te Eleteala ne egkahi te, "Netueanan te Eleteala ne warà rantek din ke pegitungan dut te minge etew ne egkahi te ruen ketau ran."

<sup>21</sup> Engketà be ne warà mebpendekarak kenian te keniyu mekeatag te ketau te etew ne ebpesekupan niyu. Su langun dan ne midsuhù te Eleteala diyà te keniyu su apey kew egkeupiya.

<sup>22</sup> Su sikami ki Epulus wey si Pedro ne midsuhù key te Eleteala te edtavang keniyu, ne engketà be ne warè en pantag din se ebpemilien key nikiyu. Su langun taman ne mibeelan te Eleteala ne imbehey rin en keniyu, misan ke umur niyu, ke kepepatey niyu, ne misan ke egketemanan niyu en guntaani wey ke keuremà. Uya, langun kayi ne imbehey en te Eleteala keniyu

<sup>23</sup> su si Hisu Kristu se kemuney keniyu, ne ke Eleteala se kemuney ki Hisu Kristu.

#### 4

<sup>1</sup> Ne sikami ne ebpemesabut te Lalag te Eleteala ne iyan niyu kebpegitunga kenami ne sugshuen key te Eleteala. Insarig kenami te Eleteala te ini se ibpemesabut dey mekeatag ki Hisu Kristu ne warà metueni te minge etew rengan.

<sup>2</sup> Tembè be egelevék ki te meupiya su ke etew ne ruen insarig kandin te egelevék, ne iyan iya se edtumanen din te meupiya ke insarig kandin dut te mepurù din.

<sup>3</sup> Kayi te kedè ne kenà ku igkeuru ayan se egkehiyen niyu etawa misan ke kukuman te etew rà mekeatag dut te kedtumana ku rut te helevék ne insarig te Eleteala kedè. Su kenà sikiyu se egkukum kedè. Misana siaken ne kenà a egkahi te meimpit nevenar ke helevék ku.

<sup>4</sup> Su misan warà salà ne netueanan ku ne idsawey kedè te Eleteala, ne kenà ku egketueanan embiya benar arà. Su ke Kerenan tew rà ke egkukum kedè.

<sup>5</sup> Engketà be ne kenà kew edsawey te ruma niyu su warà pà mekeuma ke hewii te kegkukum. Ne ketà te hewii ne edlived si Hisu Kristu ne sikandin se ebpayat te langun ne ulaula te minge etew ne in-eles dan te merusirem. Ne ibpekita rin dema ke nekeeles ne itungan te minge etew ne warà pà metueni, ne ketà be ne egketueanan te uman senge etew ke embiya egkeryù be sikandin te Eleteala etawa kenà.

<sup>6</sup> Minge suled, ini se ebpenerengen te Eleteala dut te edsugsuhuen din ne insemptà ku kayi te helevék dey ki Epulus su keupianan niyu. Su kiyug ku ne eduma kew ketà te inledawan dey su apey kew kenà edlangkad dut te Lalag te Eleteala ne impesurat din ne kenà duen dà se egkeedatan dut te ruma ran. Su kayi te minge sugshuen te Eleteala embiya ruen ed-edatan niyu dut te ruma rin, ne warà kew en meduma te Lalag te Eleteala.

<sup>7</sup> Embiya ruen diyà te keniyu nekesabut te muna pà dut te ruma rin, ne ende ebpuun ini se nesebutan dan? Engkey, ruen sinebutan dan ne kenà diyà ebpuun te Eleteala? Warà! Ne embiya iring ketà, ne meambe ke idekarak dan iring te sikandin ke ebpuunan ketà te nesebutan dan? Su langun te sinebutan niyu ne Eleteala rà se ebpuunan, kenà kayi te keniyu.

<sup>8</sup> Menu, iyan niyu egkepegitung se kenà kew en ebuyù te ketau te Eleteala su keniyu en ke langun? Iyan niyu kunaan ke mibehayan kew te langun ne ketau ne ibehey te Eleteala. Ne iring kew te minge datù. Ugaid ne sikami ne kedserihan din ne warà pà. Meupiya iya maa perem ke embiya edatù kew en su wey sikami ne edatù en dema elin keniyu.

<sup>9</sup> Iyan ku kegkahi kayi su kayi te pegitungan ku ne kiyug te Eleteala ne langun ne kedserihan din ne ebpeembavà dut te langun. Iring key te minge bilanggù ne edimetayan diyà te etuvangan te langun ne etew abpeg ke minge suluhuen te Eleteala.

<sup>10</sup> Ne kayi te keduma rey ki Hisus, ne egkahi ke minge etew te kenà key metau ne ebpegitung. Ugaid ne sikiyu, ne egkahi kew te metampas kew rut te netueanan niyu te Eleteala. Ne sikami kun ne warà gaga rin, ugaid ne iyan niyu pegitungan ne ruen gaga niyu. Ne sikami ne edsusudian, ugaid ne sikiyu ne ed-edatan.

<sup>11</sup> Ne sikami ne taman gunteani ne kurang se kegkaan dey wey ked-inum, wey ke belegkas dey ne ebpendriteyritey en. Ne uman key rà egkebedasi, ne warà egketail ne ed-ubpaan dey.

<sup>12</sup> Edrumerasey key te helevek dey. Ne embiya ruen edsudi kenami ne kenà dey edtevaken; inemulà se ibpengeningeni rey sikandan te ebpeneuven te Eleteala. Ne embiya ebpekesekitan key ne edtigkeran dey.

<sup>13</sup> Embiya meraatey se egkehiyen dan kenami, ne meupiya se idtavak dey. Su taman gunteani ne iring key te ripet diyà te etuvangan te etew kayi te ampew te dunya, uya iring key te etew ne ibpesusek te ruma ran.

<sup>14</sup> Menge suled, kenà iyan ku kegkahi kayi ne ebpegkeyaan ku sikiyu. Kenà. Iyan ku kegkahi kayi su apey kew egkepenurù te engkey se meupiya, su iring kew te tuney en ne anak ku ne rekela te hinawa ku.

<sup>15</sup> Su misan pà merakel se ebpenurù keniyu te kebperetiyaya niyu ki Hisus, ne sebseveka ku ne iring te amey niyu kayi te kineperetiyaya niyu ki Hisus. Su nekeperetiyaya kew ki Hisu Kristu dut te kinepesabut ku keniyu te Meupiya ne Tudtul.

<sup>16</sup> Ne geina te iring te siaken ke amey niyu, ne ebuyuen ku te iyan a iringi nikiyu.

<sup>17</sup> Tembù be midsuhù ku si Timoteo keniyan te keniyu. Iring sikandin te tidtu ne anak ku kayi ebpuun te kebperetiyaya rey ki Hisu Kristu. Egkeserihan din kayi te keduma rin te Kerenan tew, tembù be midsuhù ku sikandin su ebpetentenan din keniyu ke engkey se ed-ul-ulaan te keduma ku ki Hisus, ne ini ke ibpenurù ku te menge mibperetiyaya te misan endei a ebpesinaru ne inged.

<sup>18</sup> Na ruen keniyan te keniyu menge mepereyù su iyan dan kunaan ke kenà ad ebpengkeniyan te edsusi keniyu.

<sup>19</sup> Ugaid ne embiya idluhut te Eleteala, ne mehaan a ebpekepengerkeniyan te keniyu. Ne ketà ne egketuenan ku ke endei taman ke gehem dut te arà se mepereyù, ke ruen be kevenar etawa kayi rà te bèbà dan.

<sup>20</sup> Su ke menge etew ne nekelusud te Edetuan te Eleteala, ne ke keupiya ran ne kenà kayi rà te lalag dan su kayi ran ibpekita te ulaula ran ne meupiya.

<sup>21</sup> Ketà be, ne endei rapit se tumù niyu ketà te kebpekeuma ku keniyan? Embiya kenà niyu edsembian ke meraat ne ulaula niyu, ne ebpengkeniyan a su apey kew ebpeketidtu te meupiya ne batasan. Ugaid ne embiya ebpeketidtu kew te ulaula niyu, ne ebmetulanged ad keniyu ne ibpekita ku ke limù ku keniyu.

## 5

### *Ini ne Mekeatag te Senge Susun ne Salà te Menge Etew diyà te Kurintu*

<sup>1</sup> Na menge suled, ruen nerineg ku keniyan te sikiyu ne ruen ulaula rin ne meredsik. Duen kun senge etew keniyan ne midsumbang su ebpekid-ulid te ayà din ke esawa te amey rin. Ne misan ke menge etew ne warà pà mebperetiyaya, ne kenà dan ed-ulaula te iring keniyan ne meraat.

<sup>2</sup> Ne misan meredsik ke ed-ul-ulaan dan iring ketà, ne meambe ke ebpereyùdeyù kew pà lavew? Iyan tumù ne egkemutu kew ne ibpeawà niyu sikandin dut te kevruran niyu su atag dut te meredsik ne ulaula rin.

<sup>3</sup> Su misan meriyù a keniyu ne iring a te keniyan ded su layun ku egkepegitung sikiyu. Ne geina te iring te keniyan e red ne nepasad ne kayi te itungan ku mekeatag keniyan te etew ne mid-ulaula te meredsik.

<sup>4</sup> Ne ini se egkiyuhan ku ne egkerumaan niyu, ne vurunburun kew su iring te keniyan ad te keniyu, ne ke gehem ni Hisu Kristu ne keniyan ded te keniyu.

<sup>5</sup> Ne egenat te gehem ni Hisu Kristu ne keniyan en te keniyu, ne ibpeawà niyu en ayan ne etew su apey edresayan ni Setanas ke datù te pekaid su apey ebpekedsendit dut te salà din ne ebpekeliyu ke mekatù din ketà te hewii ne kedlived ni Hisu Kristu te egkukum.

<sup>6</sup> Warà iya kewagib niyu te ebpendekarak! Iyan meupiya ne id-awà niyu arà se meraat su apey kenà ebpekeeneb dut te langun niyu iring dut te beseanan ne egkahi te, "Misan ibukbuk niyu ke reisek ne pelevag dut te tapung ne ebeelan ne pan ne langun ketà ne edlevag."

<sup>7</sup> Engketà be ne iawà niyu ke meraat ne ulaula niyu iring te mid-ulaula niyu rengan su apey kew ebmetilak sabap dut te kebperetiyaya niyu. Su embiya ini se ed-ul-ulaan niyu ne iring kew ketà te pan ne warà mesewhi te ibpelevag ne mibeelan dut te menge Hudiyanan ne egkeenen dan ketà te Pista ne edsumbelien dan ke nati te bilibili su apey ran egketenuri ke kedsahad te suluhuen te Eleteala dut te menge apù dan dengan. Uya, iring kew en te pan ne warà insawug ne ibpelevag, ne si Hisu Kristu ke iring te nati te bilibili su mibpepatey sikandin su apey kiyu ebpekeliyu dut te kedusa te salà tew.

<sup>8</sup> Tembù be iyan meupiya ne ebpeselamat kiyu te Eleteala atag dut te kinepatey ni Hisus ne mibaal te ralan te kebmetilak tew rut te raan ne ulaula tew rengan ne meraat,

su iring arà te ibukbuk ne ibpelevag te pan ne ebpekepeneheewit keniyu te meraat. Ne iyan tew ibpeuna te hinawa tew ke keduma rut te tidtu ne penurù su insempità arà te pan ne warà insawug ne ibpelevag.

<sup>9</sup> Iyan migkahi ku rut te rengan ne surat ku keniyu te kenà kew pekiduma rut te etew ne meredsik se ulaula rin.

<sup>10</sup> Ne ini se nekahi ku ne kenà diyà ebpekesuhat dut te menge etew ne warà pà mebperetiyyaya ne ruen ulaula ran ne meredsik, etawa kegkelagew, etawa kebpepeneheewit, etawa ebpengeningeni te kenà tidtu ne Eleteala. Su kenà egkepakey ne ed-elihu ki kandan taman te kayi ki pà te ampew te dunya.

<sup>11</sup> Ugaid ne iyan ku ebpe sebutan keniyu ne kenà kew ebpekiduma rut te menge etew ne egkahi te sikandan ne mibperetiyyaya en ugaid ne ke ulaula ran ne meredsik, etawa lelegawen dan, etawa ebpengeningeni ran te kenà tidtu ne Eleteala, etawa metekang se kedlalag dan, etawa ebpelehubug etawa ebpepemenakew. Kenà kew pekiduma kandan misan kebpekidtuhen te egaan.

<sup>12-13</sup> Ugaid ne ke menge etew ne warà pà mebperetiyyaya, ne warà kewagib ku te ed-usisa kandan su Eleteala rà se egkukum kandan. Ugaid ne ini se ruma tew te ebperetiyyaya, ne ruen kewagib tew te ked-usisa kandan. Su ruen impesurat ne Lalag te Eleteala ne egkahi te, "Ipeawà niyu rut te kevruran niyu ayan se ruma niyu te ebperetiyyaya ne meredsik se ulaula rin."

## 6

*Ini ke Dait ne Ed-ul-ulaan ke Embiya ruen menge Mibperetiyyaya ne Ebpesumsumbungey*

<sup>1</sup> Na embiya ruen seveka ne mibperetiyyaya riyà te keniyu ne egkeveelan te kukuman te ruma rin ded, ne meambe ke riyà kew ebpesinaru te unuten ne warà pà mebperetiyyaya su egkekukum kew? Iyan tumù ne riyà kew egkekukum te unuten niyu te ebperetiyyaya.

<sup>2</sup> Maa warà niyu metueni te sikitew ne mibperetiyyaya en se ed-amung ki Hisus te egkukum keuremà kayi te langun ne ampew te dunya? Ne embiya egkepakey se sikiyu se egkekukum te langun kayi te dunya, ne meambe ke kenà niyu egkekukum arà se reisek dà ne kukuman?

<sup>3</sup> Maa warà niyu metueni te sikitew ne mibperetiyyaya se ed-amung ki Hisus te egkukum dut te suluhuen te Eleteala ne riyà ebpuun te langit? Embiya arà se ed-ul-ulaan tew, ne labi pà ne egkepakey ne egkekukum ki dut te meraat ne ulaula kayi rà te ampew te dunya!

<sup>4</sup> Engketà be ne embiya ruen seveka keniyu ne egkeveelan te kukuman te ruma rin ne ebperetiyyaya, ne meambe ke riyà niyu ed-ewita dut te unuten ne nekebira nevenar ke itungan din dut te menge mibperetiyyaya?

<sup>5</sup> Dait imbe arà ne igkeyeyai niyu! Engkey, warà en iya kenyan te keniyu ne mibperetiyyaya ki Hisus ne metau ne egkekukum?

<sup>6</sup> Su misan sikiyu ne menge mibperetiyyaya ne ruen egkeveelan ne kukuman te ruma niyu, ugaid ne muna pà ne meraat ke riyà niyu ebpepeneheewita te unuten ne warà mebperetiyyaya ki Hisus Kristu su apey egkekukum.

<sup>7</sup> Meambe, warà niyu ves metueni te ini se kebpesumsumbungey niyu ne ini ke tuus te kurang kew pà te kebperetiyyaya niyu ki Hisus? Iyan meupiya ne ebeleharen niyu ke ruen ebped-ulaula keniyu te meraatey etawa edililimbang keniyu?

<sup>8</sup> Inemulà pà te sikiyu red se ebaal kayi te meraatey ne ulaula wey ebpengahew te menge ruma niyu ne ebperetiyyaya ki Hisus.

<sup>9</sup> Iring be te warà niyu metueni te ke etew ne ebpegula-ula te meraatey ne kenà ebpekeamung dut te Edetuan te Eleteala. Kenà kew mebpepeneheewit te akal dut te hinawa niyu, su ke etew ne ed-ulaula te meredsik, ke etew ne ebpengarap te kenà tidtu ne Eleteala, ke etew ne edlangkadlangkad te esawa rin, ke meama ne egkiyug te meama red dema etawa ke meritan ne egkiyug te meritan ded dema, ne kenà dan ebpekeamung dut te Edetuan te Eleteala.

<sup>10</sup> Iring ded dema ketà ke etew ne tekawen, ke etew ne lelegawen, ke etew ne pelehubug, ke etew ne metakang se lalag din wey ke etew ne tulisan, ne kenà dan ebpekeamung dut te Edetuan te Eleteala.

<sup>11</sup> Ruen dut te sikiyu ne ed-ulaula te iring kayi rengan, ugaid ne gunteani ne midtilak kew en te Eleteala su impesahad din en ke salà niyu, ne nevaluy kew en ne etew te Eleteala. Ne riyà te etuvangan din ne iyan din kedtengtey keniyu ne metidtu en su atag dut te mid-ulaula ni Hisus Kristu ke Kerenan tew wey ke Kedesenan ne Ebpetuntul te Menuisiyà.

*Kenà ki Ed-ulaula te Meraat su ke Lawa tew te Menge Mibperetiyya ne Iring te Ubpaan te Eleteala*

<sup>12</sup> Kalu ke ruen etew ne egkahi te, "Sikami ne munge mibperetiyya ne egkepakey ne ed-ul-ulaan dey te misan engkey se egkiyuhan dey embiya kenà meraat." Ne benar arà, ugaid ne ruen ed-ul-ulaan tew ne kenà ibpekeiseg dut te kebperetiyya tew. Ne misan egkepakey se ed-ul-ulaan ku te piya engkey en se kiyug ku, ne kenà ku idluhut se ed-uripenen a te misan engkey en ne ed-ul-ulaan.

<sup>13</sup> Ne kalu ke ruen ruma ne egkahi te, "Iyan egkeetahan te egkeenen ne ebpeketahù kayi te hetek ta, ne iyan kineveeli te hetek ta su edtehuan te egkeenen." Ne benar arà. Ugaid ne kenà meupiya ne egkeeram-am te egkeenen su ruen hewii ne ebpetedtavan te Eleteala ke hetek ta abpeg ke egkeenen. Ne iring ketà ke lawa ta, su kenà dait ne ebpeetahan te lawa ta te keduma te kiyug dà te lawa ta. Ugaid ne iyan dait ne egkeetahan ked-usar te lawa ta ne egeleveke te Kerenan tew si Hisu Kristu, ne si Hisu Kristu dema se edtuganur te lawa ta.

<sup>14</sup> Su si Hisu Kristu ke Kerenan tew ne mibanew te Eleteala, ne iring ketà ne ebenawen ki rema nikandin keuremà rut te kebpatay ta ibpepevayà dut te kerekelà te gehem din.

<sup>15</sup> Netuenan niyu ne ke lawa te etew ne mibperetiyya ne ripàripà te lawa ni Hisus. Ne embiya iring ketà ne maa, egkepakey ne iyan ta ebpeetahan te lawa ta te ebpekid-ulid te meritan ne meredsik se ulaula rin? Kenà iya!

<sup>16</sup> Su ke etew ne ebpekid-ulid te meritan ne meredsik se ulaula rin, ne ke lawa ran ne egkevaluy ne egkeseveka. Su ruen impesurat ne Lalag te Eleteala ne egkahi te, "Ke meama wey meritan ne ebpeulirey ne egkeseveka."

<sup>17</sup> Ne iring ded dema ke etew ne ebpekidseveka ki Hisu Kristu ke Kerenan tew, su egkeseveka ke hinawa rin ki Hisu Kristu.

<sup>18</sup> Tembù be kenà kew ebppingniyug. Duen duma ne ulaula ne meraat ne kenà ebpekekaid te lawa te etew, ugaid ne ini se kebppingniyug ne an en iya ke ebpekututung kandin.

<sup>19</sup> Idtahù niyu ini te hinawa se ayan se lawa niyu ne timbang te baley ne mibpeubpaan te Eleteala rut te Kedesenan ne Ebpetuntul te Menusiya ne imbehey rin keniyyu. Ne ketà be ne kenè en sikiyu se kemuney rut te lawa niyu su Eleteala en.

<sup>20</sup> Ne mepmepurù se kinevayad din keytew su apey ki egkevaluy ne munge etew rin. Engketà be ne iyan niyu rà ul-ulaa te lawa niyu ke ebpekereyù te Eleteala.

## 7

*Ini ke munge Suhù mekeatag te Ked-esawa*

<sup>1</sup> Na guntaan, munge suled, ini se egkehiyen ku en mekeatag te ked-insà niyu te ked-esawa dut te surat niyu kedì. Embiya ruen etew ne kenà ed-esawa, ne meupiya rema arà.

<sup>2</sup> Ugaid geina te ruen merakel ne munge etew ne ebppingniyug, ne iyan tumù ne ke meama ne ruen kandin ne esawa, wey ke meritan ne ruen esawa rin dema.

<sup>3</sup> Ne ke teled-esawa, ne iyan iya se edtumanen dan ke kedtiwelayà dan.

<sup>4</sup> Su ke meritan ne ed-esawa, ne kenà sikandin dà se kemuney te lawa rin su elin ke esawa rin. Ne iring ded dema ketà ke meama, kenà sikandin dà se kemuney te lawa rin su elin ke esawa rin.

<sup>5</sup> Tembù be sikiyu ne neked-esawa en, ne kenà nu id-engkenà ke lawa nu rut te esawa nu, liyu ke ruen hewii ne egkeupekatan niyu te kebppingeningeni su apey warà sanggel din te kebppingeningeni niyu. Ne embiya egkeipus arà se hewii, ne lived kew manen dut te kedtiwelayà niyu te esawa nu su apey kenà kew egkegaga dut te penggeram ni Setanas ke datù te pekaid te edlangkadlangkad ka su kenà ka ebpeketicger dut te kiyug te lawa nu.

<sup>6</sup> Ini se migkahi ku keniyyu, ne kenà ku suhù ini se ked-esawa niyu ugaid ne mehempemandù ku rà.

<sup>7</sup> Embiya egkepakey, ne iyan ku egkiyuhan ne ebpekeiring kew kedì te kenà ebpingesawa. Ugaid ne netuenan ku te warà pemed-iringa te Eleteala ke langun tew, su mibehayan din ke senge etew te ketigker te kenà ked-esawa, ne keseveka ne senge bias dema se imbehey rin.

<sup>8</sup> Na sikiyu se munge kenakan wey munge raha wey munge valu, iyan pà meupiya ke kayi kew ed-iring te kedì te warà med-esawa.

<sup>9</sup> Ugaid embiya kenà niyu egketigkeran ke kiyug te lawa niyu, ne iyan pà tumù se ed-esawa kew. Su iyan pà meupiya se ruen esawa niyu tumin dè be ke kenà kew ebpeketicger dut te kiyug te lawa niyu.



<sup>10</sup> Na sikiyu ke munge nekeesawa en, ne ruen egkehiyen ku keniyu. Ini ne kenà kayi ebpuun te kedì, ugaid ne riyà ebpuun te ki Hisu Kristu ke Kerenan tew su sikandin se migkahi te: ke meritan ne kenà ebpekibelag te esawa rin.

<sup>11</sup> Ugaid ne embiya ebpekibelag sikandin, ne kenà en egkepakey ne edsaup pà sikandin te ed-esawa. Su egkepakey rà ne ebpekid-uli sikandin dut te esawa rin ded. Ne ke meama ne kenà ded dema ebpekibelag dut te esawa rin.

<sup>12</sup> Ne sikiyu ke munge ruma, ne ruen egkehiyen ku keniyu (siaken se migkahi ini, kenà si Hisu Kristu ke Kerenan tew). Ini se egkehiyen ku keniyu, embiya ruen meama ne mibperetiyaya ki Hisus ugaid ne ke esawa rin ne warà mebperetiyaya, embiya ebpekesuhat se hinawa kayi te meritan ne kenà din belahi, ne kenà egkepakey ne ebpekibelag ke meama dut te esawa rin.

<sup>13</sup> Ne engketà ded dema ke meritan ne mibperetiyaya ki Hisus ugaid ke esawa rin ne warà mebperetiyaya, embiya ebpekesuhat se hinawa kayi te meama ne kenà din belahi, ne kenà egkepakey ne ebpekibelag ke meritan dut te esawa rin.

<sup>14</sup> Sikiyu ne mibperetiyaya ki Hisu Kristu ne ruen esawa niyu ne warà pà mebperetiyaya ki Hisus, ne riyà te etuvangan te Eleteala ne metilak se kebpekeesawa niyu su sabap te kebperetiyaya nu ki Hisus. Engketà ded dema ke munge anak niyu riyà te etuvangan te Eleteala, su embiya ve kenà metilak se kebpekeesawa niyu riyà te etuvangan te Eleteala ne ke munge anak niyu ne kenà metilak diyà te etuvangan din su iyan dan egkeiringan ne anak dut te warà pà mebperetiyaya te Eleteala.

<sup>15</sup> Ugaid ne embiya ruen esawa ne warà mebperetiyaya ne egkiyug ne ebpekibelag dut te esawa rin ne mibperetiyaya, ne ruma ke en dut te kiyug din. Ne kenà egkevaluy ne salà nu se keduma nu ketà su riyà ebpuun te kandin. Su iyan kiyug te Eleteala ne ke telteled-esawa ne melintad se ked-ubpà dan.

<sup>16</sup> Su iyan ta keduma rut te kiyug te esawa ta ne warà mebperetiyaya ne ebpekibelag, su misan kenà ki edtuhut ne kenà ta egketuanan ke egkepeneheewita sikandin dut te kebperetiyaya ta ki Hisu Kristu etawa kenà.

<sup>17</sup> Ne misan engkey se ketau ne imbehey te Eleteala te uman senge etew keytew te warà kiyu pà mebperetiyaya, ne iyan meupiya ne idlaus ta arà dut te kebperetiyaya ta. Ini se ibpenurù ku dut te langun ne egkevurun ne mibperetiyaya te misan endei ne inged ne ebpesineruwan ku.

<sup>18</sup> Iring dut te etew ne mibpeetus te warà pà sikandin mebperetiyaya, ne kenà meupiya ne iyan din pegitungan ne id-awà din ke tuus te kinepeetus din. Ne iring ded dema rut te etew ne warà pà mebpeetus, embiya mibperetiyaya en sikandin ki Hisus ne iyan iya se kenà en sikandin ebpeetus.

<sup>19</sup> Su riyà te etuvangan te Eleteala ne misan neetusan ka, etawa warà, ne warà ded pulus din. Ugaid ne iyan dekelà diyà te hinawa te Eleteala ne ke kedtuman niyu te kiyug din.

<sup>20</sup> Ne egkehiyen ku manen ke migkahi ku geina te kenà kiyu en ebpemegitung en te kedsambi tew te misan engkey ne mibpetehuan te Eleteala keytew te warà kiyu pà mebperetiyaya ki Hisus.

<sup>21</sup> Embiya uripen ka te kineperetiyaya nu, kenà ka egkeuru. Ugaid ne embiya ruen hewii ne egkepakey ne egkevelukasan ka, ne pevelukas ka.

<sup>22</sup> Su misan uripen ka ketà te kineperetiyaya nu ki Hisu Kristu ke Kerenan tew, ne iyan din kedtengte keykew ne kenà uripen. Engketà ded dema misan kenà ki uripen dut te kineperetiyaya tew, ne iring kiyu te uripen su embiya sikitew se mibperetiyaya ki Hisus ke Kerenan tew ne uripen kiyu nikandin.

<sup>23</sup> Ne mepmepurù se kinevayad te Eleteala keytew te kebpekepeliyu keytew rut te keberedusaan tew. Engketà be ne kenà kew en peuripen dut te etew, ugaid ne diyà kew peuripen dut te mibpemasa keniyu te mepmepurù.

<sup>24</sup> Menge suled, edsaup ad maa egkahi te kenà kew en pemegitung te kedsambi niyu te misan endei en se midtehuan te Eleteala keniyu dut te kineperetiyaya niyu ki Hisus, ne kenà niyu ipekeriyù se hinawa niyu te Eleteala.

*Ini ne Mekeatag dut te Menge Etew ne warà pà med-esawa wey ke Menge Balu ne Meritan*

<sup>25</sup> Na munge suled, edlived ad maa te egkahi rut te in-insà niyu atag dut te munge etew ne warà pà meked-esawa. Warà suhù ni Hisu Kristu ke Kerenan tew mekeatag te ini ne ibpelambas ku, ugaid ne ini se ibpepevayà te daat te nanam din kediey ne egkeserihan a ne mehepemandù ku keniyu.

<sup>26</sup> Embiya iyan ta ed-intengan ke egketemanan dut te sikitew ne mibperetiyaya ne merakel se kemerehenan ne ibpevayà ta, ne iyan pà tumù ne kenà ed-esawa.

<sup>27</sup> Ne embiya nekeesawa ke en, ne kenà nu ed-engkeri. Ne embiya warà pà esawa nu, ne kenè ke en ed-esawa.

<sup>28</sup> Ugaid ne embiya maa ed-esawa ka, ne kenà egkevaluy ne salà nu. Iyan ku rà kebpekekahi te iyan tumù se kenà ed-esawa, su embiya mid-esawa kad ne merakel se kemeserayan niyu kayi te ampew te dunya ne arà be ne egkesuatan ku perem ne kenà kew meked-ulaula te iring ketà.

<sup>29</sup> Ne iyan ku kebpekekahi kayi, minge suled ku, su kenè en meuhet se hewii te egelevek ki te Eleteala. Ne geina te iring kayi, ne ke nenekeesawa en ne iyan din tumana ke kiyug te Eleteala kandin, iring te warà esawa rin.

<sup>30</sup> Ne iring ded dema ke etew ne ruen kemutuwan din, kenà din ketà dà edtemana ke pegitungan din ketà te kemutuwan din. Ne iring ded ke etew ne ruen igkehalew rin, kenà iyan din dà tutuva te ebpegitung ne ke kehelawan din. Ne arà dema se ruen mibpemasa rin, ne kenà iyan din pegitunga se igkenuhuni rin arà se nepemasa rin, ugaid ne iyan din petimbangi se warà te hinawa rin.

<sup>31</sup> Ne kenà iyan tew dekelà te ebpegitungan ne ke langun taman kayi te ampew te dunya. Su ini se kelibutan wey langun te nekeriken kayi te ampew te dunya ne id-anew.

<sup>32</sup> Ne iyan ku igkesuati keniyu ne warà utew merakel ne kemutuwan ne ebpekesuhat keniyu kayi te ampew te dunya. Su ke meama ne warà med-esawa, ne warà duma ne ebpekeungan kandin te edtuman te helevek ne imbehey te Eleteala kandin su iyan din ibpeuna te pegitungan ne ke kebpekesuhat te hinawa te Eleteala.

<sup>33</sup> Ugaid ne ke meama ne ruen esawa rin, ne iyan din dà lelayun egkepegitung ke engkey se ebpekekeupiya kandan su apey mesuat ke esawa rin.

<sup>34</sup> Engketà be ne ruerua en ke hinawa rin, su ibpengingsuhat din en te Eleteala ne ibpengingsuhat din dema dut te esawa rin. Ugaid ke meritan ne warà esawa rin, ne seveka rà se netahù te itungan din ne ke kiyug te Eleteala kandin. Su ke helevek din wey ke baher din ne in-amin din te edtuman dut te helevek ne impehelevek kandin te Eleteala su apey ebpekesuhat sikandin te hinawa rin. Ugaid ne ke meritan ne ruen en esawa rin, ne iyan din dà egkepegitung ne atag dut te kandan ne egketemanan su apey egkesuat ke esawa rin.

<sup>35</sup> Kenà iyan ku kegkahi kayi ne ebelevahan ku sikiyu te ed-esawa. Ugaid ne iyan ku kegkahi kayi ne edtevangen ku sikiyu su apey warà ebpekeungan keniyu rut te keduma niyu te Eleteala wey ke edtumanen niyu ke ibpehelevek din ne imbehey rin keniyu.

<sup>36</sup> Embiya ruen tehebarey ugaid ne malù en mehurang ke raha ne ke kenakan ne kenà dait se ulaula rin dut te raha su kenà ebpeketigker te kiyug din te ked-esawa, ne iyan tumù ne med-esawa en su kenà dema salà.

<sup>37</sup> Ugaid ne embiya ruen kenakan ne intahù te hinawa rin te kenà ed-esawa su egketigkeran din ke kiyug din ne kenà ebpehesen sikandin, ne iyan tumù ne kenà en sikandin med-esawa.

<sup>38</sup> Tembù be ke etew ne ed-esawa ne nekevaal te meupiya, ugaid ne muna pà se keupiya rin embiya kenà ed-esawa.

<sup>39</sup> Na embiya ruen meritan ne ruen en esawa rin, ne kenà egkepakey ne ed-engkeran din ke esawa rin ne edsaup ed-esawa. Ugaid embiya ebpatay ke esawa rin, ne egkepakey ne edsaup sikandin ed-esawa asal su iyan din ed-esawaan ne mibperetiyya ki Hisu Kristu ke Kerenan tew.

<sup>40</sup> Ugaid ne iyan pà meupiya ne kenà en ed-esawa. Ini ne kediey rà ne pegitungan su iyan ku egkeperetiyya ne ke impayag kedì te Kedesenan ne Ebpetuntul te Menusiya.

## 8

*Ini ne Mekeatag dut te Egkeenen ne Indrenà ne Siparat diyà te kenà tidtu ne Ebpengerapan su kenà Tidtu ne Eleteala*

<sup>1</sup> Na minge suled ku, ini se egkehiyen ku keniyu ne mekeatag te in-insà niyu kedì ke embiya egkepakey ne egkekaan dut te sikitew ne mibperetiyya ki Hisu Kristu ke egkeenen ne indrenà ne siparat diyà te kenà tidtu ne ebpengerapan. Ne benar iya ne iyan niyu migkahi te netuanan tew langun te ini se kenà tidtu ne ebpengerapan ne warà gehem din keytew. Ugaid ne misan netuanan tew en se warà gehem din keytew, ne ed-uram kiyu su apey kenà ki ebmepereyù diyà te ruma tew su kenà ini se netuanan tew se kebpeketavang tew kandan. Su ke ralan ne kebpeketavang tew rut te ruma tew ne kenà ke netuanan tew, ugaid ne ke limù tew kandan.

<sup>2</sup> Su ke etew ne kunaan din ke dekelà en se netuanan din, ne tuus arà te warà mekesuhat ke pegitungan din.

<sup>3</sup> Ugaïd ne ke etew ne rekela se limu din te Eleteala, ne ibpekita te Eleteala te sikandin en ke anak din.

<sup>4</sup> Na gunteani maa ne edlived ad te egkahi te in-insa niyu mekeatag te indrena ne siparat diyà te kenà tidtu ne ebpengerapan. Ne netuenan ta te arà se midreanan dan te siparat ne kenà tidtu ne ebpengerapan su ruen sebseveka rà ne Eleteala.

<sup>5</sup> Ne misan duen merakel ne kenà tidtu ne ebpengerapan te minge etew ne edingaranan dan te Eleteala ne riyà kun ed-ubpà te langit wey kayi te ampew te dunya su egkehiyen dan ne arà en ke kerenan dan,

<sup>6</sup> ugaïd ne sikitew ne mibperetiyyaya ki Hisus, ne netuenan tew te ruen sebseveka rà ne Eleteala ke Amey tew ne midlimbag te langun taman. Ne sikandin se edumaan tew su apey ki edtuman dut te kiyug din. Ne seveka rà ke Kerenan tew ne si Hisu Kristu su ibpepevayà kandin ne midlimbag te Eleteala ke langun taman, ne sikandin se mibehey keytew te behu ne umur.

<sup>7</sup> Ugaïd ne kenà langun ne ruma tew ne mibperetiyyaya ki Hisus ne netau te warà gehem din diyà te kandan arà se kenà tidtu ne ebpengerapan embiya egkaan dan te egkeenen ne indrena ne siparat su nelayaman dan rengan te egkaan te egkeenen ne indrena ne siparat diyà te kenà tidtu ne ebpengerapan. Ne taman guntaan embiya egkekaan dan arà se egkeenen ne indrena ne siparat diyà te kenà tidtu ne ebpengerapan, ne iyan dan kunaan ke nekeamung dan dema te ebpengarap ketà te kenà tidtu ne ebpengerapan. Ne ketà puunan ne ebmeraat ke hinawa ran su kunaan dan ke nekesalà dan su warà dan mesebuti ke benar.

<sup>8</sup> Ugaïd ne egkehiyen ku keniyu te kenà ini se egkeenen se iyan kedtengteng te Eleteala keyta ne meupiya. Su riyà te etuvangan din ne neked-iring dà se egkaan ki etawa kenà.

<sup>9</sup> Ugaïd ne misan iring ketà, ne uram kew kayi te minge ruma niyu ne meluvey pà se peretiyyaya ran su apey ran kenà ebpekedsalà te puunan keniyu.

<sup>10</sup> Su misan netuenan nu ke benar ugaïd ne egkaan ka te egkeenen ne indrena ne siparat diyà te baley ne ed-erapan te kenà tidtu ne ebpengerapan ne nekita ka rut te ruma ne warà mekesabut te benar, ne kalu ke egkepeneheewit nu sikandin te ed-amung dema.

<sup>11</sup> Engketà be ne kayi te mid-ulaula nu ne misan nesebutan nu te arà ne kenà salà, ne nereetan nu ke sarig te ruma nu ne meluvey se kebperetiyyaya rin, ne etew red dema sikandin ne impeliyu ni Hisus dut te kinepatey rin.

<sup>12</sup> Tembù be embiya iring ketà se ed-ul-ulaan nu, ne nekesalà ka ki Hisu Kristu su nekesalà ka rut te ruma nu ne meluvey pà se kebperetiyyaya rin ki Hisus su midereetan nu ke sarig din.

<sup>13</sup> Engketà be ne embiya iyan dà kebpekedsalà te ruma ku se egkeenen ku, ne kenà ku en egkeenen arà se egkeenen ne indrena ne siparat diyà te kenà tidtu ne ebpengerapan su apey ku kenà egkepeneheewit te ebpekedsalà arà se ruma ku ne mibperetiyyaya ki Hisus.

## 9

### *Ke Kewagib dut te Menge Kedserihan*

<sup>1</sup> Su siaken ne egkepakey ne ebpemilì a ke engkey se egeleveken ku su kedserihan a ni Hisu Kristu ne nekita ku ke Kerenan tew si Hisu Kristu, ne ke kebperetiyyaya niyu kandin ne arà imbe ke helevek ku su sabap dut te kebpenurù ku mekeatag kandin.

<sup>2</sup> Ne misan ruen ruma ne etew ne kenà ebpehimbentar te siaken ne kedserihan ni Hisu Kristu, ugaïd ne sikiyu keninyan te Kurintu ne netuenan niyu en te ke nekepekidseveka kew en ki Hisus sabap dut te kebperetiyyaya niyu te kebpenurù ku ne arà se tuus te siaken ne kedserihan din.

<sup>3</sup> Ne ke minge etew ne kenà ebpehimbentar te midsuhù a ni Hisus, ne iyan ku idtavak kandan se ini.

<sup>4</sup> Engkey, kenà be wagib te edtugenuren a te kegkaan ku wey ed-inumen ku rut te ebpemenduen ku?

<sup>5</sup> Engkey, kenà be kewagib te ed-iring a dut te ruma ne minge kedserihan ni Hisus, abpeg dut te minge ari rin wey si Pedro, su langun dan ne ruen esawa ran ne mibperetiyyaya ki Hisus ne edumaan dan te ked-ipanew ran?

<sup>6</sup> Menu, sikami rà ki Bernabe se kenà edtugenuren te kegkeuyag dey rut te minge etew ne pemenduen dey?

<sup>7</sup> Upama ke, ruen sundaru ne kenà egkevehayan te egestuwen din? Menu, ruen be etew ne ebpemula ne embiya edsabpet en ne kenà egkepakey ne ebpekekaan dut te bahas te pinemula rin? Ne engketà ded dema ke etew ne ebantey te minge binatang,

menu kenà be egkepakey ne ebpekeinum sikandin te gatas dut te edtugenuren din ne binatang?

<sup>8</sup> Ne kenà kayi rà ebpuun te insemptà ini ne ulaula dut te minge etew ne egketuenan niyu te iyan meupiya se ruen umun dut te etew ne egelevek, su nerineg niyu en dema dut te penduan ne imbehey ki Moises dengan.

<sup>9</sup> Su ruen penduan ni Moises ne impesurat din dengan ne egkahi te, "Kenà niyu pungesa ke sapi ne ebpehiekene te parey." Ini se Lalag te Eleteala ki Moises dengan ne kenà niyu pegitunga se riyà dà ebpekeshat te binatang.

<sup>10</sup> Su sikitew ne minge etew ne nekeamung ded ketà. Su tembù egkerasey ki se edadu wey ed-ehani su apey ruen egkesabpet tew.

<sup>11</sup> Ne engketà ded dema ke Meupiya ne Tudtul ne egenat te Eleteala ne impemesabut dey keniyu ne iring te benì ne impemula rey keniyu te keniyu. Tembù be iya rin dait ne ibehey niyu kenami ke lalew te helevek dey ne kegkeuyag dey.

<sup>12</sup> Embiya edait ne egkevehayan niyu ke ruma ne ebpenurù keniyu, iyan key pè be kenà duen egkeperateng.

Ugaid ne misan duen kewagib dey te ebperateng, ne warà key mebuyù. Misal me pasang en se egketemanan dey ne warà key mebuyù apey kenà meungen ke kebepemesabut dey rut te Meupiya ne Tudtul mekeatag ki Hisus.

<sup>13</sup> Netuenan niyu en ne ke minge etew ne egelevek diyà te Nekebpuru ne Baley te Eleteala riyà te Hirusalim ne ketà dan imbe egkuwa te umun dan dut te egkeenen ne mid-ewit ketà. Ne ke minge terebpepengesa ne edtutung te binatang diyà te ebpepengesaan su ibehey te Eleteala, ne ruen umun dan dut te kebpepengesa ran.

<sup>14</sup> Ne engketà ded dema ke minge etew ne ebepemesabut dut te Meupiya ne Tudtul, su arà ke insuhù ni Hisu Kristu ke Kerenan tew ne ke minge etew ne ebepemesabut te Lalag din ne ketà se ebpuun te kebpekekuwa ran te igkeuyag dan.

<sup>15</sup> Ugaid ne siaken ne warà a megkuwa te igkeuyag ku riyà te minge etew ne mibpenurù ku, misan duen kewagib ku ketà. Ne kenà iyan ku kedsurat se ebuyua keniyu. Iyan pà tumù se ebpatay a te bitil tumin dà ke mekevuyù a keniyu! Su iyan ku igkesuat ne kenà egkewarà ke kewagib ku te edantal te warà a mesanggal te ebepemesabut dut te Meupiya ne Tudtul mekeatag ki Hisus.

<sup>16</sup> Su kenà egkepakey ne idantal ku ke kebepemesabut ku dut te Meupiya ne Tudtul, su iyan midsuhù kedì ne si Hisu Kristu ke Kerenan tew. Ne kenà egkepakey ne kenà ku edtumanen, su mevehat se kedusa rin kedì embiya kenà ku ibpemesabut ke Meupiya ne Tudtul ne egenat diyà te kandin.

<sup>17</sup> Embiya kediey rà ne kiyug se kebepemesabut ku te Meupiya ne Tudtul mekeatag ki Hisus ne kenà ibpehelevek kediey te Eleteala, ne dait ne ebpenareng a te sukey ku. Ugaid ne geina te insarig kediey te Eleteala ini ne helevek, ne edtumanen ku su insarig din kediey.

<sup>18</sup> Ne embiya iring ketà, ne engkey ve se egkekuwa ku kayi ne lalew ku? Iyan ku lalew ne ke kegkehalew ku te ebepemesabut rut te Meupiya ne Tudtul te warà sukey misan duen kewagib ku te ebuyù te igkeuyag ku.

<sup>19</sup> Na geina te warà etew ne edsukey kediey, warà dema etew ne dait ne edsuhù kediey. Ugaid ne egkiyug ad ne egkevaluy ne edsugsuhuen dut te langun ne etew su apey ku egkepeneheewit ke merakel ne etew te kebperetiyyaya ki Hisu Kristu.

<sup>20</sup> Su upama ke riyana ebpenurù te minge Hudiyenen, ne edumaan ku ke betasan dut te Hudiyenen su apey ku sikandan mepeneheewit te kebperetiyyaya ki Hisus. Su misan warà ad diyà te diralem te penduan ne imbehey ki Moises, ne eduma e red lavew asal dà su egkepeneheewit ku sikandan te kebperetiyyaya ki Hisus.

<sup>21</sup> Ne engketà ded maa ke riyana ebpenurù te kenà minge Hudiyenen ne kenà eduma te penduan ni Moises. Embiya sikandan ke ruma ku ne kenà ku rema edumaan ke betasan ku te Hudiyenen, su iyan ku maa edtumanen ke minge betasan te kenà Hudiyenen su apey ku egkepeneheewit sikandan te kebperetiyyaya ki Hisu Kristu. Ugaid ne kayi te ed-ul-ulaan ku ini, ne kenà a ebpekeshat dut te insuhù te Eleteala su edtumanen ku ke insuhù ni Hisu Kristu.

<sup>22</sup> Ne embiya riyana te minge etew ne meluvey pà se kebperetiyyaya ran ki Hisus, ne kenà ku ed-ul-ulaan te iyan dan pegitungan ne salà. Iyan ku ked-ul-ulaan te iring ketà su apey ku egketevangi sikandan te ebpeiseg dut te kebperetiyyaya ran. Tembù be kayi te kebepemesabut ku te Meupiya ne Tudtul dut te langun ne minge etew, ne ebpemengaan ku ke ralan te kebpeheewit ku kandan te kebperetiyyaya ki Hisus.

<sup>23</sup> Ne iyan ku kinevaal te langun kayi su apey ebpekeeneb ke Meupiya ne Tudtul mekeatag ki Hisus, ne egkeumunan a rema rut te keupianan ne ibehey te Eleteala diyà te minge etew ne miduma kandin.

*Insempitâ ni Pablo ke keduma tew te Eleteala iring dut te Eteew ne Ed-amung te Egkuya te Ebpelelahuy*

<sup>24</sup> Netuenan niyu se embiya ruen egkuya te ebpelelahuy, ne merakel dan se ed-amung ketâ ugaid ne seveka rà se ebpeketavan ne egkevehayan te lalew rut te kegkuya. Ne sikiyu se mibperetiyya ki Hisus ne pemikar kew te mevaher te eduma te Eleteala iring dut te etew ne egkuya te ebpelelahuy su apey kew egkevehayi te lalew te Eleteala keuremâ.

<sup>25</sup> Ne ke menge etew ne ed-amung dut te egkuya te ebpelelahuy ne megeleveke te mevaher te kekgelumbad te lawa ran. Iyan dan ked-ulaula kayi su wey ran mevehayi te lalew ne mibeelan dâ te menge rawun su ibpeseluluy ketâ te etew ne ebpeketavan misan melemu ne egkeleyülü. Ugaid ne sikitew ne mibperetiyya ki Hisus, ne edsemikar ki te eduma te Eleteala su apey tew egkekuwa arâ se idlalew rin ne kenâ egkeawâ taman te taman.

<sup>26</sup> Tembù be ed-iring a dut te etew ne mid-amung te egkuya ne ebpelelahuy ne editilandang a ketâ te ebpetemanan te kegkuya. Ne iring a rema te etew ne pesusuntuk ne uman edsuntuk ne ebpekesuhat.

<sup>27</sup> Ne iring te pesusuntuk ne edlumbaren ku ke lawa ku su apey ku kenâ egkerumaan ke kiyug te lawa ku. Su merakel se impemandù ku keniyu, ne kenâ ku egkiyuhan te siaken ke mibpemandù keniyu ne siaken en arâ se kenâ egkevehayan te Eleteala te lalew rin su warâ a mebperumaruma.

## 10

*Ini ne Mekeatag te Imbaag te Kenâ ki Ebpengarap dut te Kenâ Tidtu ne Ebpengerapan*

<sup>1</sup> Menge suled, iyan niyu pegitunga ke netemanan rengan dut te menge apù dey ne menge Hudiyanan ne miduma ki Moises. Su neelungan dan te sehulapun ne tuus te miduma ke Eleteala kandan. Ne mibpevayâ dan te ralan ne mibeelan te Eleteala diyâ te rahat ne ed-ingaranan te Merihâ ne warâ nelened.

<sup>2</sup> Su ke kineruma ran dut te sehulapun wey ke kineapet dan te rahat ne iring te nebunyahyan dan su wey ran mesakup ni Moises.

<sup>3</sup> Ne langun dan ne nekekaan te egkeenen ne imbehey kandan te Eleteala.

<sup>4</sup> Ne nekeinum dan te ed-inumen ne imbehey red kandan te Eleteala su langun dan ne nekeinum ketâ te wayig ne ebpuun te batu ne impekita kandan te Eleteala. Su arâ ne batu ne insempitâ ki Hisu Kristu ke miduma kandan ne mibehey kandan te langun ne kurang dan.

<sup>5</sup> Ne misan ketâ te rekela se tavang kandan te Eleteala ne kerekelan kandan ne warâ mekesuhat te hinawa te Eleteala, ne ketâ puunan ne merakel se minatey kandan diyâ te tanâ ne kenâ egkeubpaan te etew ne impevayâ dan.

<sup>6</sup> Ne ini se netemanan dan ne impesurat te Eleteala su apey ki egkevaag ne kenâ ebpeketahù te hinawa ta se ed-ulaula te iring ketâ te meraat ne ned-ulaula ran.

<sup>7</sup> Ketâ be ne kenâ tew en iya ebpengerapan ke kenâ tidtu ne ebpengerapan su iring ketâ ke mid-ulaula rut te ruma ne menge etew rengan. Su ruen impesurat ne Lalag te Eleteala ne egkahi te, "Miburunburun dan se egkaan wey ed-inum dut te indrenâ dan ne siparat. Nekeipus dan ne midsesayewsayew ran, ne ketâ ne nekevaal dan te meraat ne ulaula."

<sup>8</sup> Ne ruma pà ne kenâ tew ed-iringan arâ se mid-ulaula dut te ruma ran dengan ne mid-ulaula ran te kegkiyugâ. Su tembù be midusa ran te Eleteala ne deruwa nepulù wey tetelu ne ngivu se minatey kandan te senge keandew rà.

<sup>9</sup> Ne ruma pà maa, ne kenâ tew ebpenggeraman ke Eleteala dut te meraat ne ed-ulaan tew. Su ini ke mid-ulaula rut te ruma ne menge apù tew rengan ne iyan indusa kandan ne mibuntal dan te menge uled ne mibpematey ran.

<sup>10</sup> Ne duen pà lavew ruma, ne kenâ ki ebpemivig mekeatag te ed-ul-ulaan te Eleteala. Su arâ ke mid-ulaula rut te ruma ne menge apù tew rengan ne mibpeveyaan dan te Eleteala te suluhuen din te ed-imatey kandan.

<sup>11</sup> Ne langun arâ ne nengetemanan dut te menge apù tew dengan ne ibaag keytew su apey kenâ ki ebpeked-ulaula ketâ te nenged-ulaula ran. Ne ini ke impesurat ne Lalag te Eleteala su apey ki ebpekeuram ne kenâ ki edusaan iring kandan, su ke kekgembangkit kayi te dunya ne mehaan en.

<sup>12</sup> Ne engketâ be ne embiya ruen etew ne iyan din egkepegitung te kenâ din ed-ulaan ke meraat su mevaher en se sarig din, ne iluta rin pà lavew su kalu ke ebpekevaal ded sikandin te salâ.

<sup>13</sup> Ne ke penggeraman ne ebpekeuma keykew ne warà bira rin dut te penggeraman ne ebpekeuma dut te langun ne menge etew. Ugaid ne ke Eleteala se egkeserihan nevenar ne edtavang keykew, su kenà din idluhut ne ebpekeuma keykew arà se penggeraman ne kenà nu egkegaga. Ugaid ne arà penggeraman ne ebpekeuma keykew, ne ibehey rin keykew ke gaga te ed-engkenà su apey ka ebpekeliyu ne kenà nu ed-ul-ulaan ke meraat.

*Kenà Egkepakey ne Sikitew ke Mibperetiyyaya Ki Hisus se Egkaan te Pan te Edtenuran Tew Ke Kinepatey Rin*

*Mekeatag Keytew ne Egkaan Ki Rema dut te Egkeenen ne Indrenà ne Siparat diyà te Menge Busew*

<sup>14</sup> Engketà be, menge suled ne igkelimu ku, ne kenà kew ed-amung dut te menge etew ne ebpengarap te kenà tidtu ne ebpengerapan.

<sup>15</sup> Su sikiyu ne metau kew en ne ebpegitung, tembù be ruen ini se egkehiyen ku ne pegpegitunga niyu ini.

<sup>16</sup> Ketà te edtumanen tew ke edtenuran te kinepatey ni Hisus mekeatag keytew, ne ruen ed-inumen ta te kebpeselamat tew te Eleteala. Ne kayi te ed-inumen tew ini ne tuus te mibpekidseveka ki ki Hisus Kristu su atag dut te lengesa rin ne impetudà din kayi te keyta. Ne ketà te kegkaan ta rut te pan ne ebpenbevtvien ne tuus ini te mibpekidseveka ki ki Hisus Kristu su atag dut te lawa rin ne minatey diyà te pinebelavag ne kayu.

<sup>17</sup> Na geina te seveka rà ke pan ne arà si Hisus Kristu, ne netuenan tew te misan merakel kiyu ne mibperetiyyaya ne iring te seveka kiyu rà su seveka rà ke pan ne mibpenevitevi keytew.

<sup>18</sup> Pegpegitunga niyu rema ke ed-ul-ulaan te menge Hudiyanen. Su embiya ebpekeamung dan te egkaan dut te ibpelengesa ran ne ibehey diyà te Eleteala, ne tuus arà te nekeamung dan en te ebpengarap te Eleteala.

<sup>19</sup> Ne engketà ded ke menge etew ne edrenà te siparat diyà te kenà tidtu ne ebpengerapan, ne nekeamung dan dema te ebpengarap dut te kenà tidtu ne Eleteala. Ugaid ne ebpesebutan ku keniyu te warà iya lalew ran ketà. Ne ini se kenà tidtu ne ebpengerapan ne warà iya igketavang dan dut te menge etew ne edrenà te siparat diyà te kandan.

<sup>20</sup> Ugaid ne iyan ku egkehiyen ne arà se idrenà ne siparat te menge etew ne warà mebperetiyyaya diyà te kenà tidtu ne ebpengerapan ne iyan dan ebehayan ketà ne ke kenà egkekita ne ed-ingaran te busew ne sugshuen ni Setanas ne kenà ke tidtu ne Eleteala. Ne kenà ku egkiyuhan ne sikiyu ne ebpekeamung te ebpengarap te menge vusew.

<sup>21</sup> Su kenà egkepakey ne ebpekeamung kew te ed-inum dut te ed-inumen ne tuus te mibperetiyyaya kew ki Hisus Kristu, ne arà pà ne ed-inum kew rema dut te ed-inumen ne indrenà ne siparat diyà te menge busew. Ne kenà egkepakey rema ne egkaan kew te pan ne tuus te mibperetiyyaya kew ki Hisus Kristu, ne arà pà ne egkaan kew rema dut te egkeenen ne indrenà ne siparat diyà te menge busew.

<sup>22</sup> Su embiya iring ketà se ed-ul-ulaan niyu ne egkevehayan niyu ke Eleteala te kegkeepesi rin keniyu. Ne kenà kew ebpekeliyu rut te kedusa rin keniyu.

<sup>23</sup> Ruen egkahi te, "Egkepakey ne ed-ul-ulaan tew te misan engkey en ne ulaula asal kenà salà." Ugaid ne iyan ku egkehiyen ne kenà langun ketà ne ebpeketaavang dut te menge ruma tew. Su misan egkepakey ne ed-ul-ulaan tew te misan engkey en, ne kenà langun ketà ne ebpekepeiseg te sarig dut te menge ruma tew.

<sup>24</sup> Warà perem dut te sikiyu ne ebpegelep te kandin dà ne keupianan, ke kenà keupianan ded dut te ruma ne menge etew.

<sup>25</sup> Tembù be egkehiyen ku te egkepakey ne egkaan kew te usa ne idehang diyà te pedian asal kenà eduwaruwa se hinawa niyu wey kenà kew ebpenginginsà ke embiya indrenà arà ne siparat diyà te kenà tidtu ne ebpengerapan.

<sup>26</sup> Su warà egkeenen ne imbehey te Eleteala ne kenà egkepakey ne egkekaan. Su ruen impesurat ne Lalag te Eleteala ne egkahi te, "Ke langun ne dunya wey ke langun ne nekeriken ketà ne pekearen te Eleteala."

<sup>27</sup> Ketà ne embiya ruen duma nu ne kenà ebperetiyyaya ki Hisus ne ed-inggat keykew te egkaan diyà te valey rin ne egkiyug ka, ne keena nu misan engkey se ibpekaan din keykew. Ne kenà ke en penginginsà ke endei ebpuun su apey warà ibmesakit te hinawa nu.

<sup>28-29</sup> Ugaid ne embiya ruen etew ketà ne mibperetiyyaya ki Hisus ne egkahi te ayan se egkeenen ne indrenà ne siparat diyà te kenà tidtu ne ebpengerapan, ne kenà nu keena su arà se ibpetuus kandin te salà embiya egkaan ka. Tembù be kenà nu keena su apey kenà ebmesakit se hinawa rin.

Ne kalu ke ruen egkahi te, “Meambe ke kenà ku egkekaan arà te netuenan ku ne kenà salà? Su meambe ke iyan ku edumaan ke itungan dut te ruma ne etew?”

<sup>30</sup> Su embiya mibpeselemetan ku te Eleteala arà se egkeenen ku, ne meambe ke egkehiyen te ruma ne etew te meraat ne egkekaan ku misan mimpeselamat a ketà?”

<sup>31</sup> Ugaid ne egkehiyen ku keniyu te iyan kenà tew kegkaan ketà. Iyan tew kenà kegkaan su ke langun ne ulaula tew te kegkaan wey ked-inum ne iyan tew ked-ul-ulaa se egkereyù te Eleteala.

<sup>32</sup> Ne sekitew, ne kenà ki iya ed-ulaula te misan engkey en ne egkopenehewit ke ruma tew te ebpekedsalà misan Hudiyanen sikandin, etawa kenà Hudiyanen, etawa ve ke ruma tew red te mibperetiyya ki Hisus.

<sup>33</sup> Iringi niyu ke ed-ul-ulaan ku su layun ku ebpemengaa ke ralan te kegketevangi ku te langun ne menge etew. Su kenà ku iyan ebpegitungen se kedi dà ne keupianan, ugaid ne ke keupianan dut te langun ne menge etew. Su iyan ku ked-ulaula kayi su apey ku egkopenehewit sikandan te kebperetiyya ki Hisus ne ebpekeliyu ran dut te keberedusaan dan.

## 11

*Ini ne Mekeatag dut Te Dait ne Ed-ul-ulaan Tew diyà te Baley ne Ebpengeningeniyen*

<sup>1</sup> Engketà be, ne iringi niyu ke ulaula ku iring dut te kineiringi ku te mid-ulaula ni Hisus.

<sup>2</sup> Na ruen ed-ul-ulaan niyu ne meupiya su warà niyu lipati ke impenurù ku keniyu, ne edtumanen niyu rema ke insuhù ku keniyu.

<sup>3</sup> Ugaid ne ruen pà ini ne ebpeketuenan ku keniyu. Iyan ebayàbayà te meritan ne ke esawa rin, ne iyan ebayàbayà ke meama ne si Hisu Kristu, ne iyan ebayàbayà ki Hisu Kristu ne ke Eleteala.

<sup>4</sup> Engketà be ne embiya egkevurun kew riyà te baley ne ebpengeningeniyen ne ruen meama ne ebpengeningeni etawa ebpenudtul te impesabut kandin te Eleteala, ne iyan iya se kenà edtutubew. Su embiya ruen tubew rin, ne nepegkeyà din su warà adat din ki Hisu Kristu ne ebayàbayà kandin.

<sup>5</sup> Ugaid ne embiya ruen meritan ne ebpengeningeni etawa ebpenudtul te impesabut kandin te Eleteala, ne medtutungatub sikandin. Su embiya kenà ne nepegkeyà din su warà adat din te esawa rin ne ebayàbayà kandin. Su mekeyeyà ke meritan ne kenà edtutungatub su iring dut te meritan ne mibpetevungew.

<sup>6</sup> Ketà be ne embiya kenà sikandin egkiyug ne ruen tungatub din, ne iyan tumù ne ebpetevungew sikandin su negidsan ded. Ugaid ne embiya egkeyeyaan sikandin te ebpetevungew, etawa ebpetamped, ne medtutungatub sikandin embiya riyà te baley ne ebpengeningeniyen.

<sup>7</sup> Su iyan kenà kedtutubew rut te meama ne ebpengeningeni su sikandin ne nelimbag te iring dut te kebpeparas te Eleteala, ne riyà te kandin ne egkekita ke bayàbayà te Eleteala. Ugaid ne ke meritan se egkekitaan dut te kebayàbayà te meama.

<sup>8</sup> Su ke neuna ne meama ne warà nelimbag dut te lawa te meritan, ugaid ne ke neuna ne meritan se nelimbag dut te lawa te meama.

<sup>9</sup> Ne kenà iyan kinelimbaha te Eleteala te meama su apey ruen ruma te meritan, ugaid ne midlimbag din se meritan su apey ruen ruma te meama.

<sup>10</sup> Engketà be ne iyan meupiya te meritan ne edtutungatub sikandin ke riyà te baley ne ebpengeningeniyen su apey egkekita misan diyà te menge suluhuen te Eleteala ne riyà te langit te iyan ebayàbayà kandin ne ke esawa rin.

<sup>11</sup> Ugaid ne misan iring ketà, ne kayi te mibpekidseveka ki en ki Hisu Kristu ne mebpetevangey ran en, su ke meama ne ruen wayàwayà din dut te esawa rin, ne engketà ded dema ke meritan ne ruen wayàwayà din dut te esawa rin.

<sup>12</sup> Su misan midlimbag te Eleteala ke neuna ne meritan ne riyà ebpuun te lawa te meama, ne langun ne inenan dan ne meama ne in-anak te meritan. Su ke langun ketà ne riyà dà ebpuun te Eleteala.

<sup>13</sup> Na pegpegitunga niyu ma ini ke edait be ke embiya ruen meritan ne ebpengeningeni riyà te baley ne ebpengeningeniyen ne warà idtutungatub din.

<sup>14</sup> Su igenat te rudsuan ne netuenan tew en te igkeyeyai te meama ke melayat ne vulvul din iring te meritan.

<sup>15</sup> Ugaid ne atag te meritan ne meupiya ne ed-intengan ke melayat se bulvul din. Su iyan kinevehey te Eleteala te ebpekeleyaten ke bulvul din su apey metelevi ke ulu rin.

<sup>16</sup> Ne embiya ruen kenà edtelimà kayi te migkahi ku en mekeatag te edtutungatub ke meritan ne ebpengeningeni ne ini se egkehiyen ku te warà duma ne betasan ne ibpenurù

dut te sikami ne kedserihan ni Hisus ke kenà ini rà. Ne ini ke edumaan dut te langun ne mibperetiyya te Eleteala diyà te baley ne ebpengeningeniyen dan piya diyà te ruma ne inged.

*Ini se Mekeatag dut te Dait ne Ed-ul-ulaan Tew Te Kegkevrurun tew te egkaan te Kedtenuri Tew te Kinepatey ni Hisus*

<sup>17</sup> Na ruen pà egkehiyen ku keniyu ugaid ne ini se egkehiyen ku ne kenà ku ideyù keniyu, su ketà te kevrunan niyu te ebpengarap te Eleteala ne iring te warà atag din su arà se kegkevrurun niyu ne tuwas pà ne meraat se ebeelan niyu dut te meupiya.

<sup>18</sup> Su nerineg ku ne matag kew egkevrurunburun, ugaid ne ke hinawa niyu ne ebpemekedsurang. Ne ruen ebperetiyya ku ketà. (

<sup>19</sup> Ketà te kebpesinsinumehayì niyu ne iyan din dà keupianan ne egkekita ketà te ke minge etew ne benar se kebperetiyya rin ki Hisu Kristu su kenà dan eduma rut te ed-ul-ulaan niyu.)

<sup>20</sup> Su misan egkevrurunburun kew te egkaan dut te kedtenuri niyu te kinepatey ni Hisus, ne ke ulaula niyu ne kenà si Hisus se edtentenan niyu.

<sup>21</sup> Su embiyà egkeuma en ke kegkaan, ne ruen se egkelagew su ed-una ran en te egkaan wey ed-inum taman te egketevereg en, ugaid ne ke ruma ne egkevital ded.

<sup>22</sup> Meambe ke kenà kew riyà dà egkaan te baley niyu? Ne meambe ke warà adat niyu dut te minge ruma niyu ne mibperetiyya te Eleteala abpeg ke kebpegkeyà niyu dut te minge ayuayu? Menu, edeyuen ku sikiyu ketà te ulaula niyu? Kenà en iya!

<sup>23</sup> Ne egkehiyen ku maa ke engkey se dait ne ulaula ne impesabut kedi ni Hisu Kristu. Su ketà te kerukileman te kineulug ni Hudas ki Hisus ke Kerenan tew, ne guna su edlavung dan en ne migeweran ni Hisus ke pan,

<sup>24</sup> Ne impesalamat din en diyà te Eleteala ne mibpenevitevi din en ke pan ne migkahi te, "Ini ke lawa ku ne ibehy ku ne ed-imetayan mekeatag te salà niyu. Layun niyu keena te iring kayi su ke kedtanudtanud niyu kedì."

<sup>25</sup> Nekeipus dan se egkaan ne migeweran din maa ed-inumen ne migkahi te, "Ini se ed-inumen ne tuus te ruen behu ne pasad te Eleteala ne impasad din te minge etew rin, ne ke lengesa ku ne ibpetudà atag keniyu se tuus te edtumanen din ini. Ne uman kew ed-inum kayi ne egketenuran a nikiyu."

<sup>26</sup> Ketà be ne taman te kenà pà edlived ke Kerenan tew ne uman niyu egkeena ini se pan wey ed-inuma ini se inumen ne ebpesebutan niyu ke kebpepatey ni Hisus ke Kerenan tew mekeatag te salà niyu.

<sup>27</sup> Ne embiya ruen etew ne ed-amung te egkaan kayi te pan wey ed-inum kayi te inumen ugaid ne warà meketahù te itungan din ke meana kayi, ne nekesalà sikandin su warà din edati ke lawa ni Hisus wey ke lengesa rin ne neketudà atag kandin.

<sup>28</sup> Tembù be ke etew ne ed-amung te egkaan wey ed-inum dut te kedtanudtanud te kinepatey ni Hisus, ne iyan iya se usisaa rin pà ke hinawa rin, ne arà pà ne egkepakey ne ed-amung sikandin te egkaan wey ed-inum ketà.

<sup>29</sup> Su embiya ruen ed-amung te egkaan wey ed-inum ketà ugaid ne warà din mepegitung te ini ne tuus te kinepatey ni Hisus ke Kerenan tew, ne riyà ded ke puunan te kandin te kesusai te Eleteala kandin.

<sup>30</sup> Su ini ke puunan te merakel keniyu se ebpenderaru, ne merakel keniyu se meluvey se lawa, ne merakel se mibpematay en su atag dut te kedusa te Eleteala.

<sup>31</sup> Embiya ed-unaan ta te ed-usisa ke hinawa ta su apey ta kenà ed-ul-ulaan ke meraat, ne warà idusa te Eleteala keyta.

<sup>32</sup> Ugaid ne embiya sikitew ne mibperetiyya ki Hisus se edusaan te Eleteala, ne iyan din ed-ul-ulaan ini su apey ki kenà ebpekelaus te ed-ul-ulaan ta ne meraat ne kenà ki ebpekeamung dut te minge etew ne kenà ebperetiyya ne edusaan din te apuy ne rakà.

<sup>33</sup> Engketà be minge suled, ne embiya egkevrurun kew su edtumanen niyu ke edtenuran te kinepatey ni Hisus, ne warà ed-unauna keniyu su tehad kew te minge ruma niyu.

<sup>34</sup> Na embiya ruen egkevital keniyu, ne riyà med-ib-ivulung te baley rin su apey warà id-isuhat kandin ne ke kedusa te Eleteala.

Na mekeatag te ruma pà ne insà niyu kediey, ne ruen pà ruma ne suhù ku keniyu ke embiya ebpekeuma ad keniyen te keniyu.

## 12

*Ini ne Mekeatag dut te Menge Ketau ne Ibehey Rut te Kedesenan ne Ebpetuntul te Menusiya*



<sup>1</sup> Na minge suled, ruen ini egkehiyen ku mekeatag te ruma ne insà niyu kediey, su kiyug ku ne egketuenan niyu mekeatag te minge ketau ne ibehey rut te Kedeseenan ne Ebpetuntul te Menusiyà.

<sup>2</sup> Netueanan niyu te warà kew pà mebperetiyaya ki Hisus, ne nepeneheewit kew te kebpengarap te kenà tidtu ne ebpengerapen ne warà hinawa rin. Ne ketà te mibpengarap niyu arà, ne nekesuwey kew en dut te tidtu ne Eleteala.

<sup>3</sup> Ugaid ne ketà te ebperetiyaya kew en te Eleteala ne egketuenan niyu embiya ke egkehiyen dut te etew ne ebpuun te Kedeseenan ne Ebpetuntul te Menusiyà etawa kenà. Su ke etew ne mid-ulinan dut te Kedeseenan ne Ebpetuntul te Menusiyà ne kenà egkepakey ne edlalag te meraat mekeatag ki Hisus. Ne engketà ded dema warà etew ne egkepakey ne egkahi te si Hisu Kristu ke Kerenan din embiya kenà ebpesebuten sikandin dut te Kedeseenan ne Ebpetuntul te Menusiyà.

<sup>4</sup> Ugaid ne mekeatag te minge ketau ne imbehey te Kedeseenan ne Ebpetuntul te Menusiyà te minge etew te Eleteala, ne ruen merakel te edsusunan din ugaid ne seveka rà se mibehey kandan su ke Kedeseenan dà ne Ebpetuntul te Menusiyà.

<sup>5</sup> Ne ruen dema merakel ne susun ne ed-ul-ulaan tew su apey ki ebpemekedtevanggey dut te minge ruma tew, ugaid ne seveka rà se edumaan tew ne si Hisu Kristu ke Kerenan tew.

<sup>6</sup> Sikitew ne mibperetiyaya ki Hisus ne merakel se edsusunan te ibpehelevek tew kandin, ugaid ne sebseveka rà se Eleteala ne ebehey keytew te ketau su apey ki ebpeketaan ketà te ibpehelevek din keytew.

<sup>7</sup> Ne ke ketau ne imbehey dut te langun ne mibperetiyaya kandin, ne arà ke tuus te iyan ebpetuntul keytew ne ke Kedeseenan ne Ebpetuntul te Menusiyà. Iyan kinevehey keytew su apey ki meketavang dut te ruma tew ne mibperetiyaya.

<sup>8</sup> Duen ruma ne iyan imbehey kandin te Kedeseenan ne Ebpetuntul te Menusiyà ne ke ketau te ebpesabut te ruma rin dut te benar ne penduan te Eleteala. Ne ke senge etew maa ne iyan imbehey kandin te Kedeseenan ne Ebpetuntul te Menusiyà ne ketau te kedseyse rut te meralem ne penduan te Eleteala.

<sup>9</sup> Ne senge etew pà lavew ne iyan imbehey kandin ne ke mevaher ne kedsarig, ne ruen pà lavew ne iyan imbehey kandin ne ke gehem te kebpepawii su apey rin mevewii ke minge ebpendebaru.

<sup>10</sup> Ne ruen pà lavew ruma ne iyan din imbehey ne ke gehem te ebaal te mekegeyip. Ne ruen pà maa iya ruma ne iyan din imbehey ne ketau te kedseyse te impesabut kandin ne Lalag te Eleteala. Ne ruen pà ruma ne iyan imbehey kandin ne ketau te egkekilala rin ke ketau te ruma rin embiya riyà ebpuun te ke Kedeseenan ne Ebpetuntul te Menusiyà te Eleteala ne insuhù te Eleteala etawa kenà. Ne ke ruma pà ne etew ne mibehayan te Eleteala te ketau te kedlalag te kinehiyan ne kenà dan egkesebutan, ne ruen ded maa ne mibehayan din te ketau te kedluwas kayi te lalag.

<sup>11</sup> Ne langun kayi ne ketau ne riyà da ebpuun te ke Kedeseenan ne Ebpetuntul te Menusiyà, su sikandin se ebayàbayà ke endei rin ibehey arà se ketau.

*Ke Sempità mekeatag te langun ne Mibperetiyaya ki Hisus ne iring te pepatà dut te Lawa rin su Egenat*

*Te Mibpekidseveka ki kandin*

<sup>12</sup> Embiya ebpegitungen ta mekeatag te lawa te etew, ne misan merakel se pepatà dut te lawa ugaid ne seveka rà ke lawa su langun ne pepatà ne amung dut te seveka ne lawa. Ne engketà ded dema ke langun ne mibperetiyaya ki Hisus su iring ki te pepatà te lawa rin, ne misan merakel kiyu ne nevaluy ki ne seveka rà ki Hisus.

<sup>13</sup> Su langun tew ne misan Hudiyanen etawa kenà uripen etawa kenà ne langun tew ne mibunyahan ibpepevayà dut te seveka rà ne Kedeseenan ne Ebpetuntul te Menusiyà su apey ki egkevaluy ne egkeseveka ne lawa egenat dut te kebpekidseveka tew ki Hisus. Langun tew ne mibehayan te seveka rà ne Kedeseenan ne Ebpetuntul te Menusiyà ne ed-ubpà kayi te hinawa tew.

<sup>14</sup> Su iring te nekahi ku mekeatag te lawa te etew ne seveka rà, ugaid ne ruen merakel ne pepatà rin.

<sup>15</sup> Upama ini, embiya egkahi ke paa rin te, “Kenà e ma pepatà te lawa rin su kenà a belad,” ne misan iring ketà se egkekahi rin ne kenà egkepakey ne kenà ubpu te lawa rin arà se paa.

<sup>16</sup> Ne embiya egkahi ke telinga rin te, “Siak ne kenà a pepatà te lawa rin su kenà a mata,” ne misan pà iring ketà se egkekahi rin ne ubpu red iya lavew te lawa.

<sup>17</sup> Su upama ke langun ne lawa te etew ne mata rà, ne kenà ebpekerineg sikandin. Ne upama ke langun ne lawa te etew ne telinga rà, ne kenà ebpekearek sikandin.

<sup>18</sup> Ugaid ne kenà iring ketà se kinelimbag te Eleteala te etew, su ke lawa te etew ne kenà senge susun ne pepatà dà ugaid ne merakel su uman seveka ne ruen egkeetahan din su arà ma ke kiyug te Eleteala.

<sup>19</sup> Su kenà en lawa embiya elin-elin dà mata, etawa elin-elin dà telinga.

<sup>20</sup> Ugaid ne kenà iring ketà se kinelimbag te Eleteala te lawa ta, su merakel se edsusunan din ne pepatà misan seveka rà ne lawa.

<sup>21</sup> Tembù be kenà egkepakey ne egkahi ke mata riya te belad te, “Sikew ini se belad, ne warà atag nu kayi te kediey!” Ne iring ded dema ke ulu, kenà egkepakey ne egkahi riya te paa te, “Sikew ini se paa, ne warà atag nu kayi te kediey!”

<sup>22</sup> Su iyan benar ne ke pepatà te lawa ta ne iyan ta itungan ne warà atag din, ugaid ne dekelà ma se atag din su warà meimames ini se lawa ta embiya warà arà.

<sup>23</sup> Ne ke menge pepatà te lawa ta ne iring te warà atag din ne iyan ta maa ed-upianan nevenar. Ne ke menge pepatà te lawa ta ne ebpekeyeyà keyta ne edtelevan ta te meupiya su apey kenà egkekita.

<sup>24</sup> Ugaid ne ruen menge pepatà te lawa ta ne meupiya ne edtengtengen misan kenà ta en edtelevan te meupiya. Iyan kineveeli te Eleteala dut te lawa ta te iring kayi su apey ta metuganur te meupiya arà se menge pepatà te lawa ta ne iring te reisek se egkeetahan din dut te ruma ne pepatà te lawa ta.

<sup>25</sup> Midlimbag te Eleteala ke menge pepatà te lawa ta su apey warà seveka rà ketà ne rekelà pà se pantag din dut te ruma rin su langun ne pepatà te lawa ta ne ebpemekedtevangà.

<sup>26</sup> Embiya egkesekitan ke seveka ne pepatà te lawa ta, ne langun te lawa ta ne egeram te mesakit. Ne engketà ded dema ke embiya ruen seveka ne pepatà te lawa ta ne egkereyù, ne langun dan ne egkehalew.

<sup>27</sup> Engketà be arà ne sikitew ke mibperetiyaya ki Hisu Kristu ne iring kiyu te lawa rin su uman seveka keytew ne pepatà en te lawa rin.

<sup>28</sup> Ne uman seveka rut te sikitew ne ubpu en te lawa rin, ne mibehayan en te Eleteala te kandin ne helevek. Ne ke neuna ne mid-ulaula te Eleteala ne mibpemilì te menge kedserihan din ne ebpemesabut dut te Meupiya ne Tudtul. Ne ikeruwa, ne imbehey rin ke helevek dut te menge etew ne ebpelambas te lalag din. Iketelu, ne imbehey rin ke helevek dut te menge etew te kepbenurù te lalag din. Ne edtundug ketà ke menge etew ne ebaal te mekegeyip wey ke menge etew ne ebpemawì te ebpenderaru wey ke edtavang te menge ruma ran wey ke ebpeneheewit te ruma ran ne mibperetiyaya ki Hisus wey ke edlalag te kinehayan ne kenà dan egkesebutan.

<sup>29</sup> Su netueanan niyu te kenà langun tew ne mibperetiyaya ki Hisus ne kedserihan din, ne kenà langun ne ebpelambas te lalag din. Ne kenà langun ne ibpeheleveke te ebpenerù mekeatag kandin. Ne kenà langun ne ebpekevaal te mekegeyip.

<sup>30</sup> Ne kenà langun ne ebpemawì te ebpenderaru. Kenà langun ne ebpekelalag dut te kinehayan ne kenà egkesebutan, ne kenà langun ne ebpekeluwas dut te kinehayan ne kenà egkesebutan.

<sup>31</sup> Ne ini se menge ketau ne ibehey te Kedesenan ne Ebpetuntul te Menusiyà, ne iyan niyu itahù te hinawa ke enkey se beripantag ne buyua niyu te kegketevangi niyu te menge ruma niyu.

Meupiya ini, ugaid ne ruen pà muntus kayi ne ibpekita ku en keniyu.

## 13

### *Ini ne Mekeatag te Kebpelimlimuey Tew ne ke Muntus ne Pegitungan*

<sup>1</sup> Su misan metau a te ebpekelalag dut te merakel ne kinehayan kayi te ampew te dunya wey misan ke kinehayan te suluhuen te Eleteala ne riya te langit, ugaid ne embiya warà limù ku te menge ruma ku ne warà pantag din ke ebpekelalag ku rut te merakel ne kinehayan. Su iring a rà te ebpekeuringer ne ebedtingen ne ahung etawa luyung te kayu ne ebesalen.

<sup>2</sup> Ne misan metau a ne ebpelambas te Lalag te Eleteala, ne misan ruen impayag te Eleteala kediey ne in-eles din dut te ruma ne etew, ne misan nesebutan ku ke langun ne benar ne penurù, ne misan engkey pà se kerekelà te sarig ku te Eleteala su apey ku egkekehiyan ke buvungan te ibpearat, ugaid ne embiya warà limù ku rut te menge ruma ku ne warà egkepentehan ku riya te etuvangan te Eleteala.

<sup>3</sup> Ne misan ibehey ku ke langun ne pekearen ku riya te menge ayuayu, ne misan idluhut ku ne egketutung ke lawa ku ugaid ne kenà egenat dut te limù ku rut te menge etew, ne warà egketelimà ku ne behey te Eleteala ne idlalew rin.

<sup>4</sup> Su embiya benar se limù ta te minge ruma ta, ne iyan ta egked-ulaula ne ebpekeninigker ki, ne ebpeketulanged ki, ne warà kegkeima ne idtahù ta te hinawa ta, ne kenà iyan ta ebpemengaan se kegkeryui ta, wey kenà ki ebpendantal.

<sup>5</sup> Embiya senep se limù ta ne kenà ki tewasak, kenà ki ebpenehel te keyta ne kiyug, kenà ki melemu ne egkeepes, ne kenà deisek kerù dà ne idtahù te en te hinawa ta.

<sup>6</sup> Embiya benar se limù ta te ruma ta ne kenà ta igkehalew ke meraat ne ulaula ran, ugaid ne iyan ta igkehalew ne ke metidtu ne ulaula ran.

<sup>7</sup> Embiya benar ke limù ta ne ruen ketigker ta te misan engkey ne kemerehenan, ne kenà ki ebpemivig wey kenà egkeawà ke sarig ta dut te minge ruma ta. Ne kenà ki edsuli te ibped-ulaula te ruma ta ne meraatey, ugaid ne editgkeran ta en.

<sup>8</sup> Su ke langun ne ketau ne imbehey te Eleteala dut te minge etew, ne ruen hewii ne egkeawà. Ugaid ne ke limù, ne kenà egkeawà taman te taman. Su ruen hewii ne ebpekeuma ne ke ketau te kebepesabut dut te impesabut kandan te Eleteala ne egkeawà. Ne ke kebpekelalag te kinehiyan ne kenà egkesebutan ne egkeawà dema. Ne engketà ded dema ke minge etew ne ebpekesabut te meralen ne penurù ne egkeawà ded.

<sup>9</sup> Su ke nesebutan tew guntaani ne kenà pà impit wey ke ketau tew te ebpemesabut te Lalag te Eleteala ne kurang pà dema su warà pà meuma ke ked-imesara te Eleteala.

<sup>10</sup> Ugaid ne ketà te keuhetan din ne hewii te ked-imasag en dut te Eleteala, ne ke langun ne warà pà mepasad ne egkeawà.

<sup>11</sup> Rengan te batà e pà ne ke kedlalag ku ne iring te batà, ne ke kebpegitung ku wey ke kegingginawa ku ne ulaula pà te kevetaan. Ugaid ne gunteani te lukes ad ne in-awà ku ke ulaula ne kevetaan.

<sup>12</sup> Ne taman te kayi ki pà te ampew te dunya ne iyan te rà nesebutan ne iring te edtengteng ki riyà te pehelungan ne egkempuran en su kenà utew mepayag se kedtengteng ta. Ugaid ne keuremà ne kenà alung dà se egkekita ta su iyan ta egkekita ne si Hisu Kristu. Ne misan ini se nesebutan ku guntaani ne kenà pà meimpit, ne ruen hewii ne ebpekeuma ne ed-imesaren te Eleteala ke nesebutan ku iring dut te nesebutan din mekeatag kediey.

<sup>13</sup> Na, ruen ini se tetelu ne kenà egkeawà kayi te keyta: ini se kebperetiyya ta te Eleteala, ini se kebpenareng ta te kegketuman dut te impasad te Eleteala kenita wey ini se limù ta te minge ruma ta. Ugaid ne iyan ebpekeuma kayi ne ke limù ta te minge ruma ta.

## 14

*Ke Ketau te Ebpenurù te Impesabut te Eleteala ne Muna pà dut te Kebpekelalag te Etew te Kinehiyan ne Kenà din Egkesebutan*

<sup>1</sup> Engketà be arà, ne iyan niyu ipeuna te hinawa ne arà se kegkelimù te minge ruma niyu. Ugaid ne meupiyya rema ke ebuyù kew te minge ketau te Kedesenan ne Ebpetuntul te Menusiya, ne muna pà ke ketau te kebpenurù niyu rut te impesabut keniyyu te Eleteala ne kenà ke kebpekelalag te kinehiyan ne kenà egkesebutan.

<sup>2</sup> Su embiya ruen etew ne ebpekelalag te kinehiyan ne kenà din egkesebutan, ne iyan din ebpekidlelahan ke Eleteala, kenà ke minge ruma rin su kenà dan egketueanan ke engkey arà se egkehiyen din. Su ke etew ne edlalag te iring ketà ne ibpekahi rut te Kedesenan ne Ebpetuntul te Menusiya te tudtul ne riyà ebpuun te Eleteala ne in-eles dut te ruma su warà ebpekesabut.

<sup>3</sup> Ugaid ne ke etew ne ebpenurù dut te impesabut kandin te Eleteala ne iyan din edlelahan ke minge ruma rin ne egketevangan dan kayi te edlelahan din wey kebpekeiseg te kebperetiyya ran ki Hisus wey ebmevajer ke hinawa ran te kedtigker dut te langun ne kemerehenan dan.

<sup>4</sup> Ne arà se etew ne edlalag te kinehiyan ne kenà egkesebutan, ne ke hinawa rin dà se egketevangan din. Ugaid ne ke etew ne ebpenurù dut te impesabut kandin te Eleteala, ne egketevangan din mulà ke minge ruma rin ne mibperetiyya ki Hisus.

<sup>5</sup> Ne egkiyuhan ku ne langun niyu ne egkevehayan te ketau te kedlalag te kinehiyan ne kenà din egkesebutan, ugaid ne muna pà ne egkiyuhan ku ne igkevehey keniyyu arà se ketau te ebpenurù dut te impesabut te Eleteala su apey ebpeketavang dut te minge ruma niyu. Su iyan pà dekelà se atag din ke ebpenurù dut te impesabut te Lalag te Eleteala tumin de be rut te ebpekelalag te kinehiyan ne kenà egkesebutan embiya warà metau ne edluwas te kinehiyan din ne kenà egkesebutan.

<sup>6</sup> Minge suled, embiya ebpekeuma a keniyan ne iyan ku rà idlalag keniyyu ne arà se kinehiyan ne kenà egkesebutan, ne engkey se igketavang din keniyyu? Warà! Ugaid ne embiya ebpekeuma a keniyan ne idseysey ku keniyyu ke impesabut kedì te Eleteala,

etawa idseysey ku keniyu ke benar ne penurù te Eleteala, ne embiya kenà arà ne ruen ibpenurù ku keniyu ne ini se nesebutan ku mekeatag kandin, etawa ruen penduan ne impenurù kedi ne ibpesabut ku keniyu, ne arà pà ne ruen dalan te kekgetevangi ku keniyu.

<sup>7</sup> Embiya idsempità ta ke etew ne ebpekelalag te kinehiyan ne kenà egkesebutan, ne ebpekeiring te etew ne ebpemulendag etawa etew ne ebpengutiyapi. Embiya kenà egketau ne ed-epad, ne ke minge ruma rin ne kenà dan egketuanan ke engkey arà se ed-eparen din.

<sup>8</sup> Ne iring ded dema te etew ne ebasal te ahung su ebpesabut te minge ruma rin te ebpekibunù dan en. Embiya iyan din kebasal se ruen idsawug din ne iring te deregkuwalà dā, ne kenà ebpemiehen dut te merakel ne etew.

<sup>9</sup> Ne sikiyu rema, minge suled, embiya edlalag kew te kinehiyan ne kenà egkesebutan, ne engkey ve se kebpekesabut dut te minge ruma niyu? Su embiya kenà egkesebutan te ruma niyu ke edlehan niyu ne iring te keramag ne edsahad dā.

<sup>10</sup> Ne merakel se kinehiyan kayi te ampew te dunya, ne warà seveka rà ne kinehiyan ne wawet su ruen ded ebpekesabut ketà.

<sup>11</sup> Ugaid ne embiya ruen ebpekidlalag kedi ne kenà ku egkesebutan ke engkey se egkehien din, ne iring sikandin te riyà ebpuun te meriyù ne inged su kenà key ebpekesebutà.

<sup>12</sup> Na geina te egkiyug kew ne egkevehayan kew te minge ketau te Kedesean ne Ebpetuntul te Menusiyà, ne iyan niyu buyua ne minge ketau ne ke kebpekeiseg te kebperetiyaya te minge ruma niyu te eduma ki Hisus.

<sup>13</sup> Tembù be arà se etew ne edlalag te kinehiyan ne kenà egkesebutan, ne iyan iya se ibpengeningeni rin te ebehayan sikandin te ketau te kedluwas ketà te edlelahen din te ruma rin.

<sup>14</sup> Su embiya iyan ku kebpengeningeni te kinehiyan ne kenà egkesebutan, ne kayi te hinawa ku ne ebpengeningeni ugaid ne ke itungan ku ne kenà eduma ketà.

<sup>15</sup> Na embiya iring ketà ne engkey se ed-ul-ulaan ku? Iring kayi. Ebpengeningeni a te Eleteala dut te lalag ne ibpekahi kedi dut te Kedesean ne Ebpetuntul te Menusiyà, ugaid ne ebpengeningeni a rema te lalag ne egkesebutan ku. Ne egkanta a su edeyù te Eleteala te lalag ne ibpekahi kedi dut te Kedesean ne Ebpetuntul te Menusiyà, ugaid ne egkanta a rema te lalag ne egkesebutan ku.

<sup>16</sup> Su embiya edeyù ki te Eleteala te kinehiyan ne kenà egkesebutan ne ruen minge ruma tew te egkevurun ne kenà ebpekesabut dut te egkehien ta te edeyù te Eleteala, ne kenà dan ebpekeamung keytew te edeyù te Eleteala su kenà dan ma egkesebutan ke kinehiyan tew.

<sup>17</sup> Misan ke kedeyù tew te Eleteala ne meupiya nevenar, ugaid ne ke minge ruma tew ne warà mekesabut ne kenà dan egketevangian.

<sup>18</sup> Ebpeselamat a te Eleteala su imbehey rin kedi ke ketau te kebpekelalag te kinehiyan ne kenà egkesebutan, ne muna pà dut te sikiyu.

<sup>19</sup> Ugaid ne embiya riyān a te egkevurungan te minge mibperetiyaya ki Hisus ne iyan dā tumù ne egkekahi ku keniyu se lelina ne tahà ne ebpeketavang keniyu su nesebutan niyu tumin dut te ngivungivuwān ne lalag ne warà seveka ketà ne egkepurut niyu ne ebpeketavang keniyu.

<sup>20</sup> Minge suled, kenà niyu ebetā se kebpegitunga niyu kayi. Iyan niyu rà iringi te kebpegitung te batà ne ke itungan dan ne kenà pà ebpekesinaru riyà te meraatey ne ulaula. Ugaid ne ke pegitungan niyu mekeatag dut te minge ketau ne riyà ebpuun te Kedesean ne Ebpetuntul te Menusiyà, ne iyan niyu kebpegitung ne iring te lukes.

<sup>21</sup> Su ruen impesurat ne Lalag te Eleteala rengān ne egkahi te,

“Ruen edsuhuen ku ne minge etew

ne senge bias se kinehiyan dan

su apey ku ibpepenudtul

dut te minge etew ne mibpemili ku

ke engkey se ebpeesebutan ku kandan.

Ugaid ne misan engketà se ed-ul-ulaan ku,

ne kenà dan ebpemieh.”

<sup>22</sup> Engketà be arà ne ke ketau te etew te edlalag te kinehiyan ne kenà din egkesebutan ne ibpetuus ini dut te minge etew ne kenà ebperetiyaya ki Hisus te ini ne minge etew ne benar ne mibperetiyaya en. Kenà tuus ini dut te minge mibperetiyaya en. Ugaid ne ke minge ebpelambas te Lalag te Eleteala ne ebpesabut dut te impesabut kandan te Eleteala, ne ibpetuus ini dut te minge etew ne mibperetiyaya en ki Hisus te benar ne mibperetiyaya ran en. Kenà tuus ini dut te minge etew ne kenà ebperetiyaya.

<sup>23</sup> Tembù be embiya egkevurunburun kew ke langun ne mibperetiyyaya ki Hisus ne iyan niyu edlelahen ke kinehiyan ne kenà egkesebutan ne ruen дума ketà ne kenà ebperetiyyaya, ne iyan dan pegitungan ne ebpengevuneg kew su warà dan mesebuti.

<sup>24</sup> Ugaid ne embiya iyan niyu ed-ul-ulaan se ebpesabut dut te impesabut keniyu te Eleteala ne ruen midlusud ketà te kegkevurun niyu ne kenà pà ebperetiyyaya ne egkering dan ke Lalag te Eleteala ne ibpesabut niyu, ne ketà puunan ne egketuenan dan te ruen mid-ulaula ran ne meraat, ne egketuenan dan dema te edusaan dan te Eleteala dut te salà dan.

<sup>25</sup> Su igkepayag dan ke meraat ne netahù te hinawa ran ne nekeeles dut te menge etew. Ne ketà ne ebpekedsendit dan ne ed-arap dan te Eleteala se egkahi te, "Benar ves iya ne iyan ebpetuntul keniyu ne ke gehem te Eleteala!"

*Iyan tew Ed-ul-ulaan se kegkeatur te Ulaula diyà te Baley ne Ebpengeningenian*

<sup>26</sup> Engketà be menge suled, ne ini se egkehiyan ku keniyu. Embiya egkevurun kew te ebpengarap te Eleteala, ne iyan meupiya ne ruen egkanta se edeyu te Eleteala. Ne ruen ruma ne ebpenurù. Ne ruen дума ne ebpesabut te impesabut kandin dut te Eleteala. Ne ruen дума pà ne ebpekelalag te kinehiyan ne kenà egkesebutan, ne ruen ded dema metau ne edluwas ketà. Ugaid ne langun te ed-ul-ulaan niyu ne iyan niyu iya ul-ulaa ne ke kebpekeiseg dut te ebperetiyyaya niyu te keduma ki Hisu Kristu.

<sup>27</sup> Embiya ruen ebpekelalag te kinehiyan ne kenà egkesebutan, ne iyan dà egkepakey ne egkereruwa etawa egketetelu ne kenà dan ebperedredseey. Ne iyan iya se ruen ded metau ne edluwas.

<sup>28</sup> Ugaid ne embiya warà metau ne edluwas, ne kenà egkepakey ne ruen edlalag ketà te kinehiyan ne kenà egkesebutan diyà te kevurunan. Su embiya warà metau ne edluwas ne egkepakey red ne ebpekidlalag te Eleteala asal ed-ekinen din dà te warà дума rin.

<sup>29</sup> Ne embiya ruen ebpesabut dut te impesabut kandan te Eleteala, ne iyan meupiya se deruwa etawa tetelu se edlalag. Ne langun dan ne mebpemineg su pegpegitunga ran arà se edlelahen.

<sup>30</sup> Ugaid ne embiya ruen ketà te kevurunan ne ruen impesabut kandin te Eleteala te edlalag pà ke ruma rin, ne iyan meupiya ne ed-engked pà arà se edlalag.

<sup>31</sup> Su langun niyu ne egkepakey ne edlalag, ugaid ne mebpesembayey su apey ke langun ne ebpmineg ne ebpekehuru wey egkevag-et ke hinawa rin.

<sup>32</sup> Su ke etew ne ebpesabut dut te impesabut kandin te Eleteala, ne ed-erenen din ke kedlalag din.

<sup>33</sup> Su kenà egkiyuhan te Eleteala ne ebpekeuringer kiyu, ugaid ne iyan din egkiyuhan se egkevansà ke langun ne ulaula tew.

Na iring dut te betasan te menge sakup dut te Eleteala ne ebpengarap diyà te ebelàbelà ne menge inged,

<sup>34</sup> ne ke menge meritan ne kenà iyan ebpenurù ke egkevurun kew riyà te baley te Eleteala te ebpengeningeni. Kenà dan ebpekepenurù su ruen impesurat diyà te penduan te menge Hudiyanan ne kenà egkepakey ne ke meama ne iyan egkamal ke meritan.

<sup>35</sup> Embiya ruen kenà egkesebutan dut te meritan ne kenà din i-insà diyà te baley ne egkevurunan ugaid ne riyà din id-insà te esawa rin embiya ed-uli dan en. Su mekeyayà ke ulaula te meritan ne edlalag diyà te kegkevurun te menge etew ne mibperetiyyaya.

<sup>36</sup> Menu, kenà kew ebperumaruma rut te migkahi ku? Iyan niyu ves nepegitung ne riyà ebpuun te keniyu ke Meupiya ne Tudtul etawa neketelimà kew rà kayi.

<sup>37</sup> Embiya ruen etew ne iyan din nepegitung ne ruen impesabut kandin te Eleteala, etawa egkahi te ruen ketau rin ne imbehey kandin dut te Kedesenan ne Ebpetuntul te Menusiya, ne iyan iya se mesebuti rin ini se insurat ku keniyu ne suhù ini ne riyà ebpuun te Eleteala.

<sup>38</sup> Ugaid ne embiya kenà din ebpminehen ini se egkehiyan ku, ne kenà niyu en iya pemineha se egkekahi rin.

<sup>39</sup> Na menge suled, iyan niyu ipeuna te hinawa niyu ne ke kebpmesabut niyu te Lalag te Eleteala. Ugaid ne kenà niyu en dewaya ke ebpekelalag te kinehiyan ne kenà egkesebutan.

<sup>40</sup> Ne langun te ed-ul-ulaan niyu te kegkevurun niyu ne ul-ulaa niyu ke engkey se edait wey kegkeatur din.

<sup>1</sup> Na munge suled ku, ebpetentenanur ku keniyu ke migkahi ku en keniyu mekeatag ki Hisu Kristu. Su arà se Meupiya ne Tudtul ne impesabut ku keniyu, ne mibperetiayaya niyu wey mid-itindehan niyu te mevaher.

<sup>2</sup> Ne egenat dut te ini se Meupiya ne Tudtul ne impenurù ku keniyu ne ebpekeliyu kew rut te kedusa te Eleteala keniyu embiya ibpeiseg niyu ke kegawed niyu te mevaher wey kenà meluvey se kebperetiayaya niyu ki Hisu.

<sup>3</sup> Ne ini ke impesabut kediey ne impenurù ku rema keniyu su iyan ibpeuna ne penurù ini dut te langun. Mibpeimatey si Hisu Kristu su apey ki igkepeliyu nikandin dut te salà tew iring dut te impesurat te Eleteala ne Lalag din dengan.

<sup>4</sup> Ne impesabut ku rema keniyu te inleveng si Hisu ne ketà te iketelu ne hewii ne mibanew te Eleteala sikandin, su ini ne impesabut ded ne Lalag te Eleteala ne impesurat din dengan.

<sup>5</sup> Impesabut ku keniyu te guna su nevanew en sikandin ne mibpekita ki Pedro, ne arà pà ne mibpekita diyà te langun ne kedserihan din.

<sup>6</sup> Neipus arà ne mibpekita sikandin diyà te nevurun ne munge sakup din ne labi lelima nehatus. Ruen en minatey kandan, ugaid ne taman guntaani ne merakel pà kandan se biviyag.

<sup>7</sup> Neipus arà ne diyan en maa mibpekita sikandin te ki Santiago, ne arà pà ne riyà te langun ne kedserihan din.

<sup>8</sup> Siaken ke mewri ne pinekita rin. Su embiya idsempità ku, ini se kineperetiayaya ku ki Hisu ne iring a te vatà ne netehel se ked-enaka kandin su misan kenà e pà perem ebperetiayaya ne nekeperetiayaya ad ketà.

<sup>9</sup> Su ke langun ne kedserihan din ne siaken en iya se pinekemevavà. Kenà dait ne ed-ingaranan a te kedserihan din su rengan te warà e pà mebperetiayaya ki Hisu ne mibpekesekitan ku ke munge etew ne mibperetiayaya kandin.

<sup>10</sup> Ugaid ne ke raat te nanam te Eleteala kedì se puunan te kenà dineg dà te ebpengumew se kineparin te ulaula ku. Ne ruen nepentahan din ke kintera te nanam din kedì su mibaluy a rin ne kedserihan din, ne ketà puunan ne iyan pà dekelà se nehelevek ku rut te langun ne kedserihan ni Hisu. Ugaid ne misan iring ketà se helevek ku, ne kenà ku arà egkegaga su arà ne tavang ded te Eleteala kedì.

<sup>11</sup> Arà se Meupiya ne Tudtul ne impesabut ku keniyu, misan siaken etawa ke ruma pà ne kedserihan, ne nekede-iring se ibpesabut dey, ne arà ke mibperetiayaya niyu.

*Ini ne Mekeatag Dut Te Kebanew te Eleteala te Munge Minatey*

<sup>12</sup> Iyan dey impesabut keniyu ne si Hisu ne nevanew en te kinepatey rin. Na meambe ke ruen kenihan te keniyu se egkahi te ke minatey ne kenà en egkevanew te Eleteala keuremà?

<sup>13</sup> Su embiya benar ini se egkehiyen niyu te kenà egkevanew te Eleteala ke munge minatey keuremà, ne iyan din meana ne warà mevanew en te Eleteala si Hisu.

<sup>14</sup> Ne embiya warà mevanew si Hisu te kinepatey rin, ne warà pantag din te kebperesabut dey keniyu wey warà ded lavew pantag din ke kebperetiayaya niyu.

<sup>15</sup> Ne kenà ketà dà taman su embiya benar te warà mevanew si Hisu, ne nekedarù key su nekahi rey keniyu te mibanew si Hisu te Eleteala. Ugaid ne embiya kenà egkevanew te Eleteala ke munge minatey keuremà, ne warà din dema mevanew si Hisu.

<sup>16</sup> Su embiya kenà egkevanew te Eleteala ke munge minatey, ne iyan din pè be mevanew si Hisu.

<sup>17</sup> Ne embiya warà mevanew si Hisu, ne warà pantag din ke kebperetiayaya niyu kandin wey warà kew mekepeliyu dut te kedusa te salà niyu.

<sup>18</sup> Ne ruma pà, ne ke langun ne mibperetiayaya ki Hisu ne minatey en ne warà dan mekepeliyu rut te kedusa te salà dan.

<sup>19</sup> Su embiya kayi rà te biviyag ki pà se duen egkepenareng tew ki Hisu ne keupianan atag dut te kebperetiayaya tew, ne iyan ki en mekeyruwiru dut te langun ne munge etew.

<sup>20</sup> Ugaid ne iyan benar se nevanew en iya si Hisu. Sikandin ke neuna ne nevanew ne ibpepehimbenar arà te egkevanew iya ke langun te munge minatey keuremà.

<sup>21</sup> Su ebpuun te salà te senge etew ne si Adan ne langun ne munge etew ne ebpmatey red. Ne engketà ded dema arà se mid-ulaula te senge etew, si Hisu Kristu, ne langun ne munge minatey ne egkevanew keuremà.

<sup>22</sup> Na geina te inenakan kiyu ni Adan ne langun tew ne ebpmatey, ne engketà ded dema ke langun ne mibpekidseveka ki Hisu Kristu ne egkevanew keuremà.

<sup>23</sup> Si Hisu Kristu ke neuna ne nevanew su arà se edait. Ugaid ne ketà te hewii te kedlived din kayi te ampew te dunya ne langun tew ne ke sakup din ne ibpetundug kandin te egkevanew.

<sup>24</sup> Embiya egkeuma en arà se hewii ne mibpetedtavan din kayi te dunya, ne id-awà ded ni Hisu Kristu ke langun ne kunterà din ne edatù ne ruen gehem dan te kedwayawayà. Egkeipus ketà ne id-uli din ke kedatù dut te langun ne edetuan din diyà te Amey rin ne Eleteala,

<sup>25</sup> su edatù pà si Hisus taman te kenà din edtelawen ke langun ne kunterà din.

<sup>26</sup> Ne ketà te edtelawen en ni Hisu Kristu ke langun ne menge kunterà din, ne ke mewri ne id-awà din ne ke kemetayan.

<sup>27</sup> Netuenan ta ini su ruen impesurat ne Lalag te Eleteala rengan ne egkahi te, “Si Hisu Kristu se mibehayan te Eleteala te kegkamal te langun taman.” Ne kayi ebpuun te ini ne mepayag nevenar te warà mekeragkes ke Eleteala dut te egkemalan ni Hisus su Eleteala red ma se mibehey ki Hisus te kebpekekamal din.

<sup>28</sup> Ne embiya si Hisus ke Anak te Eleteala se ebpeketalew dut te langun ne kunterà din, ne ketà ne id-uli din arà diyà te Eleteala ne mibehey kandin te langun. Ne idragkes din ke hinawa rin su apey ke Eleteala se edatù dut te langun taman.

<sup>29</sup> Na, kayi ta maa egkehiya te kegkevanew rut te menge minatey su embiya kenà egkevanew ke menge minatey, ne engkey be se meana rin ke betasan dut te menge etew ne mibunyahan kun su timbang te sikandan ded arà ke ruma ran ne minatey en? Su embiya kenè egkevanew te Eleteala ke menge minatey, ne meambe ke arà se betasan ne edumaan dan?

<sup>30</sup> Ne ruma pà ne meambe ke idluhut dey te layun kebpekesekiti kenami kayi te kebpekesabat dey mekeatag ki Hisus embiya kenà egkevanew ke minatey?

<sup>31</sup> Su uman gewii, menge suled, ne netuenan te Eleteala te iyan ku egkeperateng ne ke kemetayan ku! Ne netuenan dema te Eleteala te sikiyu se igkehalew ku atag dut te kebperetiyaya niyu ki Hisu Kristu.

<sup>32</sup> Kayi te inged ne Ipisu ne ke menge kunterà ku ne iring te menge mehintelunan ne binatang ne egkesuatan e ran te eadaa. Ne meambe ke edtigkeran ku pà se iring kayi embiya ebpatay a ne kenà a egkevanew? Su embiya warà egkeperateng ku keuremà, ne iyan pà tumù se ebpemengà a te kehelawan ku iring dut te beseanan ne egkahi te,

“Na ed-inum wey egkaan kiyu en ebpatay su kalu ke mehaan kiyu en ebpatay ne id-anew kiyu en langun.”

<sup>33</sup> Ugaid ne kenà kew egkeekali ketà. Su tentenuri niyu ke beseanan ne egkahi te, “Embiya ebpekeruma kew rut te menge etew ne meraat se ulaula rin, ne egkopenehewit kew ran dema te ebaal te meraat.”

<sup>34</sup> Gimerata niyu en ke mata niyu su apey kew ebpekeimaman, ne engkeri niyu en ke ulaula niyu ne meraatey. Migkehiyan ku sikiyu kayi su apey kew egkeyeyai su ruen keninyan te keniyu ne reisek pà se netuenan din mekeatag te Eleteala!

*Ini ne Mekeatag te Behu ne Lawa ne Ibehey Keytew te Eleteala Ketà te Kegkevanew Tew*

<sup>35</sup> Ne kalu ke ruen etew ne ed-insà te, “Memenu se kegkevanew te menge minatey? Ne engkey se paras te lawa ran?”

<sup>36</sup> Ne iyan ku tavak te warà buwa itungan ketà ne etew. Su upama ke ibpemula tew ke beni diyà te tanà, ne kenà ini edtuvù ke embiya kenà egkesalin ke lawa te beni. Su egkereetan pà ke beni ne arà pà ne edtuvù.

<sup>37</sup> Ne arà se beni ne ibpemula tew ne lahas dà iya, kenà arà ke lawa dut te kedtuvù din, misan parey etawa ruma ne ibpemula tew.

<sup>38</sup> Ne intahù en te Eleteala te itungan din ke engkey se paras te lawa ne egkepakey te uman eberangan te lahas ne impemula. Uman senge lahas ne beni ne ruen en kandin ne kebpeparas te lawa rin embiya edtuvù en.

<sup>39</sup> Ne iring ded dema ketà ke langun ne ruen hinawa rin kayi te ampew te dunya, su ke paras dan ne warà memeked-iring-iring. Su ke paras te menusiya ne senge bias dut te paras te menge binatang. Ne engketà ded dema ke paras te menge pepenug ne senge bias dut te paras te menge serà.

<sup>40</sup> Merakel se midlimbag te Eleteala kayi te ampew te dunya wey riyà te langit, ne langun ketà te midlimbag din ne meupiya ne edtengtangan ugaid ne kenà ebpemeked-iring se kedtengtengi te keupiya rin. Su senge bias se keupiya te kedtengtengi rut te midlimbag din riyà te langit wey ke midlimbag din kayi te ampew te dunya.

<sup>41</sup> Misan ke riyà te langit ne ke keupiya te rayag te andew ne sengebias dut te rayag te bulan. Ne ke keupiya te rayag dut te menge bituen ne idsengebias dema. Misan ke merakel ne bituen ne warà memeked-iring ke kesihey te rayag dan.

<sup>42</sup> Ne engketà be rema te kebanew rut te Eleteala te munge minatey ne egkesembian ini se lawa ta. Su ke lawa ta kayi te ampew te dunya ne ebpaty ne idleveng. Ugaid ne ke lawa ne ebenawen te Eleteala ne kenà en ebpaty.

<sup>43</sup> Ne ini se lawa ta dutun te kinekeleveng en ne kenà meupiya ne edtengtengan ne warà en pantag din, ugaid ne ketà te kegkevanew en ne merayirayi ran en. Misan meluvey ke lawa ta guntaani, ne embiya behu en ke lawa ta ne ruen en gehem din.

<sup>44</sup> Ini se lawa ta ne idleveng ne lawa rà te kememenusiyai, ugaid ne embiya egkevanew en te Eleteala ne behu en maa ne lawa su edait en ne ed-ubpà diyà te langit. Su netuenan ta te ruen lawa ta ne edait dà ne ed-ubpà kayi te ampew te dunya, ne ruen ded dema lawa ta ne edait ne ed-ubpà diyà te langit.

<sup>45</sup> Netuenan tew ini su ruen impesurat ne Lalag te Eleteala ne egkahi te, "Si Adan ke neuna ne etew ne midlimbag te Eleteala ne mibehayan sikandin te lawa wey ginawa ne dait dà ne ed-ubpà kayi te dunya." Ugaid ne si Hisu Kristu ne nevaluy ne etew ne mid-ingaranan te mewri ne Adan, ne iyan sikandin ebehey te umur ne warà edtemanan din su apy kiyu mekeubpà diyà te langit.

<sup>46</sup> Su ke behu ne lawa ne ibehey keyta rut te kegkevanew ta ne kenà ke neuna ne lawa su ke neuna ne lawa ne ke lawa ta ne ebpaty, ne arà pà ne ruen behu ne lawa ta riyà te langit.

<sup>47</sup> Si Adan ke neuna ne etew ne nelimbag ne iyan din limbahan se tanà. Ugaid ne si Hisu Kristu ne mid-ingaranan te ikeruwa ne Adan ne diyà ebpuun te langit.

<sup>48</sup> Ne geina te ne inenakan kiyu ni Adan ne tanà ded dema ke limbahan ta, su tanà ke limbahan te lawa rin. Ugaid ke langun tew ne mibpekidseveka ki Hisus, ne ruen umur din ne kenà edtaman iring dut te umur ni Hisus.

<sup>49</sup> Gewii te kayi ki pà te ampew te dunya ne ke lawa ta ne iring dut te lawa te neuna ne etew ne iyan din limbahan se tanà. Ugaid ne egkeuma arà se hewii ne ke lawa ta ne ebpekeiring te lawa ni Hisus, ke riyà ebpuun te langit.

<sup>50</sup> Iyan meana kayi, munge suled, te migkahi ku ne ini se lawa ta kayi te ampew te dunya ne kenà ebpekeamung ketà te edetuan te Eleteala keuremà. Su kenà egkepakey ne ini se lawa ta ne ebpaty ne ebpekeamung dut te kenà ebpaty taman te taman.

<sup>51</sup> Ne pemineha niyu ve ini se in-eles dengan ugaid ne impesabut en te Eleteala. Ini se egketemanan dut te langun ne mibperetiyya ki Hisus. Kenà langun ne ebpaty, ugaid ne sikitew langun ne seguguneey se kegkesalin te lawa tew.

<sup>52</sup> Su arà se kegkesalin te lawa tew keuremà ne megmehaan dà su seperek mata rà ke ebperehingen en ke budyung te Eleteala su tuus te ebpetedtavan en ke dunya. Su ebpedehingen arà se budyung ne egkevanew en ke munge minatey ne mibperetiyya ne egkesembian en ke munge lawa ran te kenà en ebpaty. Ne sikitew se biviyag pà ne egkesalin en dema ke lawa tew.

<sup>53</sup> Su ini se lawa ta ne ebpaty ne edsembian te lawa ne kenà en ebpaty. Uya, ini se lawa ta ne egkeredak ne edsembian te lawa ne kenà en egkeredak.

<sup>54</sup> Ne embiya ini se lawa ta ne ebpaty wey egkeredak ne egkesembian en te Eleteala te lawa ta ne kenà en ebpaty, ne ketà ne egketuman en ke impesurat ne lalag te Eleteala ne egkahi te,

"In-awà en te Eleteala ke kepepaty ne ebpekeuma kayi te langun ne munge etew!"

<sup>55</sup> "Ne endei en ke ketehel te kepepaty?"

In-awà en te Eleteala!

Ke ketehel din ne ebpekeandek te etew ne nepupus en!"

<sup>56</sup> Iyan kegkeandek te munge etew te kepaty su netuenan dan te embiya ebpaty ran en ne edusaan dan dut te salà dan. Ne ke kevaher dut te salà ne idusa te munge etew su sabap dut te midlangkad dan ke penduan te Eleteala.

<sup>57</sup> Ugaid ne edeyù kiyu te Eleteala su in-awà din en ke ketehel te kepepaty ne kenà ki en egkeandek te kepaty su impeliyu ki en ni Hisu Kristu ke Kerenan tew.

<sup>58</sup> Engketà be arà munge suled ne rekelà te hinawa ku, ne itindehi niyu te mevaher ke keperetiyya niyu dut te Kerenan tew ne si Hisu Kristu ne kenà niyu perina ke itungan niyu misan duen pengeram ne ebpekeuma kayi te keniyu. Ne pegelepi niyu te edtuman ke kiyug din su netuenan tew te ruen keupiya rin ke langun ne ed-ul-ulaan tew diyà te kandin.

## 16

*Ini ne Mekeatag te Ibehey ne Tavang Diyà te Ruma dut te Munge Mibperetiyya ne riyà te Inged ne Hirusalim*



<sup>1</sup> Na ruen pà ini ibpesabut ku keniyu ne ini ne mekeatag te kebehey niyu te tavang dut te minge mibperetiyya ki Hisus ne egkepesangan diyà te inged ne Hirusalim. Iyan niyu dumai ke impesabut ku en dut te minge mibperetiyya ne riyà te lusud te inged ne Gelasiya.

<sup>2</sup> Uman Akad ne penehana kew te ibehey niyu riyà te Eleteala, ne diyà egkelevat dut te nepentiyari niyu ne isivey niyu en neraan ke langun ne kandin dema. Buruna niyu ini neraan su embiya ebpekeuma a ne apey melemu rà se kedtimua ku.

<sup>3</sup> Su embiya ebpekeuma a ne edsuhuen ku ke minge etew ne nepemili niyu ne ebpekeewit dut te imbehey niyu riyà te inged ne Hirusalim. Ne ibpeewit ku rema ini se surat ku kandan su apey ke minge etew ne ebpeketelimà ketà ne egketuenan dan ke engkey se elin ne lakew rut te minge etew ne mid-ewit.

<sup>4</sup> Ne embiya iyan ku egkepegitung ne iyan meupiya ne ebpendiyan a te inged ne Hirusalim, ne ebpekeruma ran en kediey.

<sup>5</sup> Ebpengkeniyan a te keniyu ugaid ne ed-una a ebpevayà diyà te lusud te inged ne Mesidunya, su diyan a iya ebpevayà.

<sup>6</sup> Ne embiya ebpekeuma a kenihan te keniyu ne malù pà meuhet se ked-ubpàubpà ku kenihan, su kalu ke kenà e pà edlaus taman te ebpekesahad arà se ked-uran-uran. Ne meupiya ke embiya egketevangan a niyu ketà te ked-awà ku en riyà te keniyu.

<sup>7</sup> Su kenà ku egkesuatan ne mehaan dà se kebpekebalak tew, ugaid ne iyan netahù te itungan ku ne malù meuhet ke embiya idluhut te Eleteala.

<sup>8</sup> Ugaid ne kayi a ed-ubpà te inged ne Ipisu taman te kenà egkeuma ke hewii ne ed-ingaranan te Pintikust.

<sup>9</sup> Su ruen pà merakel ne etew kayi ne egkiyug ne ebpepinge te kebpenurù ku, ne ibpemesabut ku kandan misan merakel se egkunterà te Eleteala kayi.

<sup>10</sup> Ne embiya ebpekeuma si Timoteo kenihan te keniyu ne gelhelaa niyu sikandin su egelevak ded dema sikandin te Kerenan iring kediey.

<sup>11</sup> Su iyan iya se ibpekita niyu ke ked-adat niyu kandin. Ne tevangi niyu sikandin te ked-awà din en su apey egkehalew se hinawa rin te kedlived din kayi te kediey. Su ebpeneregen dey sikandin rut te minge suled tew te kebperetiyya ki Hisu Kristu.

<sup>12</sup> Ne si Epulus ne suled tew rema te kebperetiyya ki Hisus, ne kepipira ku en buyua kandin te meduma sikandin dut te minge suled tew ne ebpepingenihan te keniyu. Ne kenà pà egkiyug guntaani, ugaid ne ebpepingenihan ded sikandin embiya warà en ebpekevangan kandin.

### *Ke Mewri ne Penduan ni Pablo*

<sup>13</sup> Na guntaani ve, minge suled ku, ne uram kew te keduma niyu ki Hisus. Ne itindehi niyu te mevaher ke kebperetiyya niyu ki Hisu Kristu. Kenà niyu igkeyeyai ne ibpekita niyu ke keduma niyu te kiyug te Eleteala, ne kenà niyu igkeandek te keduma kandin misan egkerehenan kew.

<sup>14</sup> Kayi te langun ne ed-ul-ulaan niyu ne ibpekita niyu ke limù niyu te ruma ne etew.

<sup>15</sup> Na minge suled ku, netueenan niyu te iyan neuna ne mibperetiyya riyà te lusud te inged ne Gerisya ne telteleanak ne ensi Istipanya. Ne egenat dà ketà ne kenà dan eduwaruwa se edtavang dut te minge ruma ran ne mibperetiyya.

<sup>16</sup> Tembù be, minge suled, ebuyuen ku keniyu ne dumai niyu ke lagag dut te etew ne iring ketà wey misan engkey ne ruma ran ne edtavang te ibpehelevak kandan.

<sup>17</sup> Ne ingkehalew ku te nekeuma en si Istipanya, si Fortunatu wey si Ekeykus, su iring te migkurang ke keggelimegawii ku keniyu.

<sup>18</sup> Ne inneupiya sikandan te hinawa ku wey iring te inneupiya te ginawa niyu. Dait ne ed-edatan niyu se iring kayi ne minge etew.

<sup>19</sup> Ne ebpepinginsà keniyu ke langun ne mibperetiyya kayi te langun ne inged te lusud te inged ne Asiya. Ne ebpepinginsà rema keniyu si Ekila ki Prisila abpeg din ke langun ne mibperetiyya ki Hisus ne egkevurun diyà te valey ran kayi te Ipisu, su uman kew ran dà egkepegitung su sabap dut te kebpekidseveka niyu ki Hisus.

<sup>20</sup> Langun ne ruma ku ne mibperetiyya kayi ne ebpepinginsà dan dema keniyu.

Ne sikiyu rema kenihan ne mebbeed-edatey wey mebbelimlimuey kew.

<sup>21</sup> Ini ve se egkehiyen ku kayi te ketepusan te surat ku, ne siaken si Pablo se edsurat kayi, ne ebpepinginsà a keniyu langun.

<sup>22</sup> Ne ke minge etew ne engkungkun ne mibperetiyya ugaid ne warà limù te hinawa ran ki Hisu Kristu, ne edusaan dan te Eleteala taman te taman.

"Marana tha," ne iyan din meana ne, "Hisu Kristu ke Kerenan tew, lived ke en te mehaan!"

<sup>23</sup> Ne iyan ku kiyug ne ebpepingenihan kew perem ni Hisu Kristu ke Kerenan tew.

<sup>24</sup> Ne ke limù ku ne kenà meawà diyà te keniyu sabap dut te mibpekidseveka kiyu ki Hisu Kristu.  
Arà dà taman. *Pablo*

## **Ke Ikeruwa ne Surat ni Pablo Riyà te Menge Etew ne Mibperetiyaya Te Inged Ne Kurintu**

<sup>1</sup> Siaken si Pablo ki Timoteo ke suled tew te kebperetiyaya se edsurat ini. Edsuratan ku sikiyu ke langun ne mibperetiyaya kenian te inged ne Kurintu wey riyà te langun niyu ne mibperetiyaya diyà te ruma ne inged ketà te lusud te Gerisya. Su egenat te kiyug te Eleteala ne nepemili a ne kedserihan ni Hisu Kristu.

<sup>2</sup> Kiyug ku ne egkepenaub kew te Eleteala ke Amey tew wey si Hisu Kristu ke Kerenan, ne egenat kandan ne kenà meseleti te meraat ke hinawa niyu.

*Ke Eleteala se Edtavang dut te Langun ne Menge Etew ne Egkemerehenan*

<sup>3</sup> Edeyuen tew ke Eleteala, ke Amey ni Hisu Kristu ne Kerenan tew. Su sikandin ne iiruwen ne Amey tew wey sikandin dema ke edtavang keytew kayi te langun ne kemerehenan tew.

<sup>4</sup> Su misan engkey se egkerumpak tew ne kemerehenan ne edtevangen kiyu rin su apey kiyu ebpekehuru riyà te kandin ne iring be rema ketà se kedtevangi tew ke minge ruma tew ne egkerehenan.

<sup>5</sup> Su embiya dekelà se kemerehenan tew iring dut te kemerehenan ni Hisu Kristu, ne rekelà dema se kedtavang te Eleteala keytew su ke kinepekidseveka tew ki Hisu Kristu.

<sup>6</sup> Su embiya egkerasey key dut te kebperetiyaya dey te Meupiya ne Tu dtul, ne iyan din kedresey kenami su apey kew metevangi wey mebmilit ke kebperetiyaya niyu ki Hisus. Ne iring din ded dema embiya edtevangen key te Eleteala, su ke tavang din kenami ne iring ded dut te tavang din keniyu su apey niyu metigkeri en ke merasey ne iring dut te imbaya dey.

<sup>7</sup> Engketà be arà ne kenè en egkeuru se hinawa rey mekeatag keniyu, su netueanan dey se embiya ebpevayà kew te kemerehenan iring dut te impevayà dey, ne edtevangen kew red dema te Eleteala iring dut te kinetevangi rin kenami.

<sup>8</sup> Na minge suled, ebpeketeenan dey keniyu se midrasey key dut te minge etew ne riyà te inged ne Asiya. Kenà dey egketueanan te ebpegusaring ke taman ne impepekaid dan kenami, su iyan dey pegitungan ne kenà dey en egkegaga te edtigker ke imped-ulaula ran kenami su kunaan dey ke ibpatey rey en.

<sup>9</sup> Uya, su kunaan dey ke arà en ke tedtab te umur dey. Ne iyan dan kinaped-ulaula kayi kenami su apey key kenà mekesarig te kenami rà ne keteheh, ugaid ne riyà key edsarig te Eleteala ke ebanew te minge minatey.

<sup>10</sup> Ne iring key te riyà mekeitendeg te tibtilvan te kalut te kedtahad te kemetayan dey te kinetevangi kenami te Eleteala, ne netueanan dey te kenà ed-engked ne edtavang su makin ne ed-iseg. Su rekelà se kedsarig dey kandin su kenà key rin ed-engkeran te edtavang.

<sup>11</sup> Ne egketevangan key niyu te ibpepevayà te kebpereningeni niyu kenami. Su embiya merakel niyu se ebpereningeni kenami ne ibehey te Eleteala keniyu ke ebuyenan niyu, ketà ne merakel se ebpekereyu te Eleteala mekeatag te tavang din kenami.

*Mibpenudul ni Pablo ke Meambe ke Nesalin ke Itungan din Mekeatag te Kebpendiyà Din te Inged ne Kurintu*

<sup>12</sup> Nehalew key te netueanan dey ne warà meraat ne mid-ulaula rey diyà te minge etew, labi en kayi te keniyu. Ini se ed-ul-ulaan dey ne metidtu su iyan dey edtumanen ke kiyug te Eleteala. Ne kenà kememenusiyai rà ne ketau se edumaan dey, su iyan dey edsarahan ne ke tavang te Eleteala kenami su apey iyan dey ed-ul-ulaan ne ke ebpekesehat.

<sup>13-14</sup> Langun te idsurat dey kenian te keniyu ne egkevasa niyu wey egkesebutan niyu su warà duma ne udsud ketà te surat ne nekeeles. Gunteani ne wuen en egkesebutan niyu mekeatag te betasan dey, ugaid ne egkiyuhan dey ne egkeumanan pà lavew taman te kenà egkeuma ke hewii te kedlived ni Hisu Kristu ke Kerenan tew su apey igkehalew key niyu iring dut te kegkehalew rey keniyu.

<sup>15-16</sup> Geina te netueanan ku nevenar se nehalew kew mekeatag kenami ne iyan ku itungan ne ed-awet key kenian te keniyu ketà te ebpendiyà key te inged ne Mesidunya, ne ed-awet key red maa ketà te ked-uli dey. Su kiyug ku ne ebpekibalak a keniyu te egkeruwaan a su apey egkereruwa se kedtavang ku keniyu. Ne embiya ed-awà ad diyà te keniyu te kebpendiyà te inged ne Hudiya, ne meupiya embiya egketevangan a niyu.

<sup>17</sup> Ne geina te warà a meketuman te ebpengkeniyan te keniyu, ne kalu ke egkahi kew te edsalinsalin ke itungan ku. Kunaan niyu vuwa ke iring dà ke itungan ku rut te itungan te menge etew ne iyan dà ebayàbayà kandan ke itungan ne kememenusiyai, su kunaan niyu ke arà te kegkahi ku te, "Uya, ebpengkeniyan a te keniyu," ne kayi rà te bèbà ku.

<sup>18</sup> Ugaid ne kenà a iring ketà. Su iyan dey egkehiyen ne benar ne iring dut te egkehiyen te Eleteala ne benar.

<sup>19</sup> Su ke Anak te Eleteala ne si Hisu Kristu ke impesabut dey keniyu ki Silas wey si Timoteo ne egkeserihan sikandin su kenà egkepakey ne kenà din edtumanen ke nekahi rin.

<sup>20</sup> Su sikandin ke midtuman te langun ne impasad te Eleteala mekeatag te kebpekepeliyu te menge etew. Ketà be ne kayi egenat te si Hisu Kristu ne egkepakey ne egkahi ki te langun ne pasad te Eleteala ne benar iya, su ketà ne egkereyù tew ke Eleteala.

<sup>21</sup> Su ke Eleteala ne iyan mibag-et te kebperetiyya tew ki Hisu Kristu, ne sikandin se mibpemili keytew ne menge etew rin ne egelevek kandin.

<sup>22</sup> Ne mibpesebutan din keytew te sikitew ne nevaluy ne menge anak din ibpepevayà dut te Kedesenan ne Ebpetuntul te Menusiyà ne impeubpà din kayi te hinawa tew su tuus te edtumanen din ke langun ne impasad din keytew.

<sup>23</sup> Ugaid ne egkehiyen ku keniyu ke meambe ke warà a medlaus se ebpengkeniyan te keniyu. Warà a mebpengkeniyan su apey ruen hewii ne ebpedsendit kew ne warà en kebpegingawà te edtiduwen ku pà ke menge ulaula niyu. Ne netuenan te Eleteala ne benar ini.

<sup>24</sup> Ne kenà dey iyan itungan ne ebayvayaan dey sikiyu ke engkey se kebperetiyya niyu mekeatag ki Hisu Kristu, su netuenan dey te nekesuhat ke kebperetiyya niyu. Ugaid ne iyan dey kiyug ne edtavang key keniyu su apey ebpekeiseg ke kegkehalew niyu te keduma ki Hisu Kristu.

## 2

<sup>1</sup> Engketà be arà, ne iyan en netahù te itungan ku ne kenà ad ebpengkeniyan su apey kenà ku en ebhayan te kemutuwan ke hinawa niyu iring dut te neuna ne kinepengkeniyan ku te kebpetidtuwa ku keniyu.

<sup>2</sup> Su embiya ebhayan ku pà sikiyu te kemutuwan niyu, ne warà en ebpekevehey te kehalew ku liyu te sikiyu. Su kenà kew ebpekehalew kedi embiya ruen kemutuwan niyu.

<sup>3</sup> Tembù be, ini se mid-ulaula ku se mibpepewitan ku sikiyu te surat su apey niyu meawà ke meraat ne perangey niyu. Su kenà ku egkiyuhan ne ebpekepengerkeniyan e pad embiya ebpekevehey te mutu te hinawa ku atag dut te menge perangey niyu. Su sikiyu perem ke ebpekevehey te kegkehalew ku! Su netuenan ku se embiya egkehalew a rut te perangey niyu, ne egkehalew rema.

<sup>4</sup> Tembù arà te kinepewiti ku keniyu te surat ne nemutuwan a nevenar su iring ma te ebpekesinsinehew en se direlemen ku ne warà ku en metigkeri ke menge luwà ku ne eguriper. Ne kenà iyan meana rut te surat ku se ebhayan ku sikiyu te kemutuwan, ugaid ne ibpekita ku te rekèlà ku sikiyu te hinawa.

*Ini ne Mekeatag te Ebpesahad Ki te salà te Menge Ruma ta*

<sup>5</sup> Ne arà se etew ne nekevaal te salà keniyuan, ne kenà siak se nesekitan din su sikiyu red ke menge etew ne mibperetiyya keniyuan te Kurintu. Ne embiya kenà langun ne sikiyu ne ruen iyan keniyuan te keniyu. Ugaid ne kenà ku en ed-umanan ini se lalag ku ne ibenar kandin.

<sup>6</sup> Su netuenan ku te merakel en keniyuan te keniyu se mibehayan te kerusaan din, ne kenà ku en ed-umanan.

<sup>7</sup> Na gunteani ve ne pesaharan niyu en sikandin wey up-upiani niyu sikandin te ebpehayuk su apey ke sarig din te Eleteala ne kenà egkeawà.

<sup>8</sup> Ne ebuyuen ku keniyu ne ipekita niyu kandin te rekèlà niyu te hinawa.

<sup>9</sup> Su midsuratan ku rà sikiyu su apey ku egkekita kayi ke benar ne eduma kew rut te langun ne penduan ni Hisu Kristu ne impenurù ku keniyu.

<sup>10</sup> Ne embiya ebpeseharen niyu sikandin, ne ebpeseharen ku red dema. Su embiya mibpesahad niyu en, ne ebpeseharen ku rema su apey kew egketevangi, ne netuenan ni Hisu Kristu te benar ini se egkehiyen ku.

<sup>11</sup> Ne ini se ed-ul-ulaan ta su apey ki kenà mepeneheewit ni Setanas ke datù te pekaid, su netuenan ta ne metau te liyuk te kegkeekali ta.

*Neuru si Pablo diyà te Inged ne Teruwas su atag te Warà Din Metuen si Tito ke Suled Din te Kebperetiyya*

<sup>12</sup> Na guna su nekeuma a te kinependiyà ku te inged ne Teruwas te kebpemesabut ku rut te Meupiya ne Tudtul mekeatag ki Hisus, ne nekita ku se ruen en ralan ne neveelan te Eleteala ketà te kebpevengew ku rut te impehelevek din kedì.

<sup>13</sup> Ugaid ne iyan ingkepeguru te hinawa ku ne warà ku metuen ke suled tew ne si Tito. Geina te warà ku metuen sikandin, ne mibpemehetew ad dut te langun ne mibperetiyya ketà su midlaus ad diyà te inged ne Mesidunya.

*Ini ne Sempità Mekeatag te Sikitew ne Ebpemesabut Dut te Meupiya ne Tudtul Mekeatag ki Hisus ne Imperahid te Periyemut*

<sup>14</sup> Ne misan pà nekebmutu ke hinawa ku ketà, ne dekelà se kinereyù ku te Eleteala. Su netuenan ku ne neseveka kiyu riyà te ki Hisu Kristu ne iring be ketà ne kenà iyan ku edumaan ke kiyug te kememenusiyai su ke kiyug te Eleteala ke edtumanen ku. Su ke Eleteala se ebpetuntul keytew su apey piya endei ki ebpesinaru su ebpesabut te Meupiya ne Tudtul, ne iyan mibperehiran te Eleteala keytew te ebpeeneb dut te Meupiya ne Tudtul ne iring te periyemut ne egkearek dut te menge etew.

<sup>15</sup> Su ini se ibpemesabut ta ne ke Meupiya ne Tudtul mekeatag ki Hisus ne ini ke puunan te kebmeemut ta, ne riyà te etuvangan te Eleteala ne meemut se ked-ereka rin. Ne egkearek dut te menge etew ne ebpekepeiyu, ne egkearek ded dema dut te menge etew ne ebpekependiyà te apuy ne rakà.

<sup>16</sup> Ne ke ked-ereka rut te menge etew ne ebpekependiyà te apuy ne rakà su kenà dan ebperetiyya, ne warà en egkeregidan din su iring te egkeevul ne minatey. Arà be ne nekesuwey en te Eleteala taman te taman. Ugaid ne ke ked-ereka rut te menge etew ne ebpekepeiyu ni Hisus ne meupiya se ked-ereka ran su nekevehey kandan te umur ne warà edtemanan din. Tembù be iring kayi ne helevek te kebpemesabut dut te Meupiya ne Tudtul ne merehen iya, ne engkey rà se etew ne edtakur ne egelevek kayi?

<sup>17</sup> Ayan se menge etew ne ebpemenurù te Lalag te Eleteala ne iring te ibpementiyari ran, ne kenà dan edtakur te iring kayi ne helevek. Ugaid ne sikami ne kenà iring ketà su midsuhù key te Eleteala, arà be se kebpemenudtul dey ne metidtu su mibpekidseveka key ki Hisu Kristu. Tembù be layun dey edtentenuri te ke Eleteala se edtengteng kenami rut te langun ne helevek dey.

### 3

<sup>1</sup> Maa, engkey se pegitungan niyu mekeatag kediey kayi egenat te ini se migkahi ku en? Kunaan niyu vuwa ke idantal ku rà ini. Maa, iyan din kemeyidan ne ruen pà ibpekita rey keniyyu ne surat ne riyà ebpuun te ruma ne etew se tuus te meupiya ini se ulaula rey? Etawa maa, duen pà surat ne keniyan egenat te keniyyu ne ed-ewiten dey riyà te ruma ne inged te kebpenurù dey?

<sup>2</sup> Sikami mulà ne kenà en arà kemeyidan su iring kew te surat ne ebpeeneheewiten dey mekeatag dut te meupiya ne helevek dey, su sikiyu en iya ke titihus atag dut te kinesalin te ulaula niyu su sabap dut te kineperetiyya niyu en ki Hisus. Uya, arà iya ke benar ne titihus su egkekita te ruma ne etew.

<sup>3</sup> Ne egkekita kayi te ed-ul-ulaan niyu te nesembian en ni Hisu Kristu ke hinawa niyu sabap dut te impesabut dey keniyyu mekeatag kandin. Ne sikiyu ne timbang te tidtu ne surat ne kenà belad dà se midsurat, ugaid ne ibpepevayà dut te helevek te Kedesean ne Ebpetuntul te Menusiyà. Ne kenà diyà dà insurat te melumpipi ne batu iring dut te penduan ne intahak ki Moises dengan, ugaid ne surat ini ne riyà din en mulà insurat te hinawa niyu.

<sup>4</sup> Ini se nekahi ku su rekela se sarig dey te Eleteala sabap dut te kebpekidseveka rey ki Hisu Kristu.

<sup>5</sup> Ne mekeatag dut te langun ne nehelevek dey, ne kenà dey egkekahi se kenami rà ne ketehel se kebpekegaya rey ketà su arà ne ketehel ne riyà ded ebpuun te Eleteala.

<sup>6</sup> Ne sikandin ded be ke mibehey kenami te ketau te kebpemesabut dey dut te behu ne pasad din. Ne ini se behu ne pasad ne kenà iring dut te neuna ne penduan ne imbehey te Eleteala ki Moises, ugaid ne imbehey ini impepevayà dut te Kedesean ne Ebpetuntul te Menusiyà. Su arà te neuna ne penduan ne insurat ne netuenan tew se nekesalà ki ne riyà ki egkepeneheewit te kepepatay ne warà edtemanan din. Ugaid ne ke Kedesean ne Ebpetuntul te Menusiyà se ebehey keytew te umur ne warà edtemanan din.

*Ini ne Mekeatag dut te Behu ne Pasad te Eleteala ne Iyan pà Mevaher se Gehem din dut te Neuna ne Penduan*

*Ne Imbehey rin ki Moises*

<sup>7</sup> Rengan te kineuhing te Eleteala te penduan din ki Moises diya te melumpipi ne batu, ne nelikuvungan te merayag ne raman te Eleteala ke paras ni Moises. Ne ke menge etew ne kenà dan egkevutatek te edtengteng si Moises su egkesirang dan dut te raman din ne misan iring ketà ne midshahad dà. Arà te neuna ne penduan te Eleteala ne imbehey rin ki Moises ne riyà ki egkepeneheewit te kepepatey ne warà edtemanan din su mevaher se gehem din,

<sup>8</sup> ne iyan pè be kenà muna pà se kevaher te gehem din ini se behu ne pasad ne imbehey te impepevayà dut te Kedesenan ne Ebpetuntul te Menusiyà.

<sup>9</sup> Uya, arà te neuna ne penduan ne imbehey te Eleteala ki Moises ne ruen gehem din su egkepeyahan tew ke salà tew ne iyan ebpeheewit keytew riyà te nerakà, ugaid ne ke behu ne pasad ne muna en se kevaher te gehem din su ebpetidtu keytew diya te etuvangan te Eleteala su apey kiyu ebpekeubpà diya te kandin taman te taman.

<sup>10</sup> Su misan mevaher se gehem din ke neuna ne penduan, ne mibpelilipatan en ke gehem din su ke behu ne pasad ne muna pà se kevaher te gehem din.

<sup>11</sup> Su misan duen gehem din ke neuna ne penduan ne ruen tedtab din, ne iyan pè be kenà muna pà se kevaher te gehem din ini se behu ne pasad ne warà tedtab din.

<sup>12</sup> Geina te rekela te hinawa rey se kedsarig dey dut te behu ne pasad ne warà kegkeawà din, ne kenà dey igkeandek se kebpekesabat dey rut te Meupiya ne Tudtul mekeatag ki Hisus.

<sup>13</sup> Ne kenà key iring ki Moises te guna su ed-elum en ke merayag dut te paras din ne mid-elangan din en ke paras din su apey kenà mekita te menge ruma rin ne Hudiyanen, ke menge kevuwaran ni Israyil, te ed-elum en ke merayag.

<sup>14</sup> Ugaid ne warà mesebuti dut te menge Hudiyanen su meresen se ulu ran. Ne misan guntaani ne embiya ebase ran dut te penduan ni Moises ne iring te nepintuan pà ke itungan dan su kenà dan egkesebutan. Ne kenà egkevukaan arà se itungan dan taman te kenà dan ebperetiyya ki Hisus.

<sup>15</sup> Uya, benar ini su misan gunteani ne embiya ebase ran te penduan ni Moises ne kemuluwan pà lavew ne nepintuan ke itungan dan su kenà dan egkesebutan ke tidtu ne meana rin.

<sup>16</sup> Ugaid ne embiya ebperetiyya ran dut te Kerenan, ne egkevukaan arà se nepintuan ne itungan dan ne ebpekesabat en ke Lalag te Eleteala.

<sup>17</sup> Su arà se Kerenan ne ke Kedesenan ne Ebpetuntul te Menusiyà ne ed-ubpà diya dut te menge etew ne mibperetiyya. Ne sikandin ke ebpeleyu te menge etew su apey ran kenà en egkepunguripen dut te salà wey ke keduma ran dut te insuhù te penduan ni Moises.

<sup>18</sup> Tembù be warà nekealang te itungan dut te langun tew ne mibperetiyya ki Hisu Kristu su neawà en. Ne iring dut te paras ni Moises ne neenlahan dut te raman te Eleteala, ne sikitew ke ebpeandlag dut te raman te Kerenan tew. Ne ke Kerenan ke Kedesenan ne Ebpetuntul te Menusiyà, ne iyan din egeleveken ne edsembian din ke ulaula tew taman te egkeawà ke ulaula te kememenusiyai ne iyan dè be egkekita ne iring dut te ulaula ni Hisus kayi te keytew.

## 4

*In-upama ni Pablo ke Helevek Dan te Ebpekesabat te Meupiya ne Tudtul ne iring dan te Kuren se Kevavà din su apey Mepeyahi*

*Ke Gehem dut te Meupiya ne Tudtul ne Kenà Kandan dà su riyà te Eleteala*

<sup>1</sup> Geina te Eleteala se mibehey kenami kayi ne helevek, ne kenà egkeawà ke kegkevaget dey te egeleveken te mevaher.

<sup>2</sup> Ne iyan se ibpegelesà ne ulaula ne ebpekeyeyà ne mid-engkeran dey. Kenà dey ed-ululaan se kebpegekalà. Kenà dey edsembian ke Lalag te Eleteala, ugaid ne iyan dey egkehiyen ne ke benar. Iyan dey rà ed-ululaan ne ibpekita te menge etew te warà meraat ne itungan dey, ne netueanan ini te Eleteala su sikandin se ed-usisa te langun ne ulaula rey.

<sup>3</sup> Su ini se Meupiya ne Tudtul ne ibpekesabat dey, ne embiya nekeeles ini ne riyà dà mekeeles dut te menge etew ne warà medtelimà te kebpekeliyu ran dut te kepepatey ne warà edtemanan din.

<sup>4</sup> Ne iyan dan kenà kebpekeperetiyya su mibpintuan ke itungan dan ni Setanas ke datù te pekaid ne ebpegerapen dut te menge etew ne kenà ebperetiyya kayi te ampew te dunya. Tembù be kenà dan egkekita ke raman ne ed-anlag dut te Meupiya ne Tudtul, su egenat dut te raman te Meupiya ne Tudtul ne egkekita ke kebpepurù ni Hisu Kristu, ne kayi te ulaula ni Hisus ne egkekita ke ulaula te Eleteala su sikandin ke paras te Eleteala.

<sup>5</sup> Kenà dey iyan ibpesabut ne mekeatag kenami, ugaïd ne mekeatag ki Hisu Kristu su sikandin ke mibpemili te Eleteala ne egkamal te langun. Ne sikami ne iring te sugsuहुen te kedtavang dey keniyu kayi te kedtuman dey te idsuhù din kenami.

<sup>6</sup> Su rengan te kinelimbaha te Eleteala kayi te dunya ne migkahi sikandin dut te merusirem ke sikandin te, "Mebmerayag su apey meawà ini se merusirem!" Ne engketà ded dema ke mid-ulaula rin kenami su ke itungan dey ne mibmerusirem, ne mibpekerayag din su apey rey egkekita ke kepurù te Eleteala ne kayi rin impayag te ki Hisu Kristu.

<sup>7</sup> Su sikami ne iyan din iring ne kuren ne midtehuan te belielehà ne tamuk ne insarig kenami te Eleteala ne ini se Meupiya ne Tudtul ne ibpemesabut dey. Insarig din ini kenami te kevevan ne etew su iring te kuren, su apey mepeyahi ke rekela ne gehem ne ibpekita rut te Meupiya ne Tudtul ne kenà kayi rà ebpuun te kenami su riyà ebpuun te Eleteala.

<sup>8</sup> Su merakel se ibpeyayà dey ne kemerehenan, ugaïd ne kenà ebpekekurang dut te kedsarig dey. Ne ruen pà arà se egked-ulaula rey ne iring key te edtuntul te ralan ne merakel se belvelekanan din ne kenà dey egketueanan ke endei key dapit edtuntul, ugaïd ne kenà key ma egkesanggal.

<sup>9</sup> Su kenà kepepira key rà pemekeiri te munge etew, ugaïd ne ke Eleteala ne kenà edsuwey kenami. Ne kenà kepepira key rà ebpenruuha nikandan su samà dà ne ebpmatey key, ne ke Eleteala se mibpekalang kenami.

<sup>10</sup> Lelayun dey idselakan ini se lawa rey te kepepatey iring dut te netemanan ni Hisus. Iyan kegked-ulaula te langun kayi ne apey mepayahi te langun ne etew te biviyag en si Hisus su sikandin se edtavang kenami.

<sup>11</sup> Su uman gewii ne kenà egkeawà kayi te kenami ke kedtiviltilvil te umur dey su mekeatag te kebpmesabut dey kayi te Meupiya ne Tudtul mekeatag ki Hisus. Ned-ulaula ini su apey ke gehem ni Hisu Kristu ne egkekita te kedselelangi rin te umur dey te misan etew rà ne warà gehem din.

<sup>12</sup> Uya, benar ne edtiviltilvil se umur dey te kebpmesabut dey te Meupiya ne Tudtul su apey ruen keupianan niyu, ne ebpekekuwa kew te umur ne warà edtemanan din.

<sup>13</sup> Duen nekesurat dutun te Lalag te Eleteala ne egkahi te, "Mibperetiyyaya a rut te lalag te Eleteala ne engketà be arà ne ibpesabut ku."

Ne engketà ded arà se kebperetiyyaya ku, su misan egkemerehenan a ne ibpesabut ku red lavew ini se kineperetiyyaya ku.

<sup>14</sup> Su netueanan dey te mibanew te Eleteala si Hisu Kristu ke Kerenan tew, ne engketà ded be ne ebenawen key rin dema keuremà su sabap dut te kinepekidsveka rey ki Hisus. Ne eburunen din ke langun ne mibperetiyyaya kandin diyà te etuvangan din.

<sup>15</sup> Tembù be edtigkeran dey en ke langun ne kemerehenan su wey rey metevangi sikiyu. Su embiya merakel en se ebpekeuman dut te ebperetiyyaya ki Hisus, ne ed-iseg pà ke kerakel te ebehey te peselamat diyà te Eleteala su apey sikandin se egkereyù.

*Duen egkepenareng ni Pablo diyà te Akir Din ne Hewii ne Muna pà dut te Kemerehenan ne Egkeheram din kayi te Ampew te Dunya*

<sup>16</sup> Tembù be kenà ebmeluvey te hinawa rey te kebpmesabut dey. Su misan ini se lawa rey ne egkelukes wey ebmeluvey, ugaïd ne meilut se kebperetiyyaya rey te uman gewii.

<sup>17</sup> Ne ini se kemerehenan ne igkerasey rey guntaani ne edsahad dà, ugaïd ne ke kedtigker dey te keresayan ne ruen egkeperateng dey ketà te akir din ne hewii ne ibehey rin keytew ne muna pà dut te igkerasey rey.

<sup>18</sup> Su kenà iyan egketutub te hinawa rey ne ini se egkekita ne langun taman kayi te ampew te dunya, ugaïd ne iyan benar ne neketahù te hinawa rey ne arà se kenà egkekita. Su ini se egkekita tew ne mehaan ne id-anew te mata tew, ugaïd ne arà se kenà tew egkekita ne ibehey te Eleteala keytew ne kenà id-anew te mata taman te taman.

## 5

<sup>1</sup> Netueanan ta te embiya egkereetan en ini se lawa ta kayi te ampew te dunya su iring ini te sabung ta, ne ruen behu ne lawa ne ibehey keyta te Eleteala ne riyà te langit ne kenà en ebpatay taman te taman.

<sup>2</sup> Taman te kayi kiyu pà te ampew te dunya ne ruen kemerehenan tew, ne rekela perem te hinawa tew te ibehey te Eleteala arà se behu ne lawa ne riyà ebpuun te lesang te langit.

<sup>3</sup> Su embiya egkeseluuvan kiyu en ketà te behu ne lawa ne ruen en egkeubpaan te himukud ta.

<sup>4</sup> Su taman te kayi kiyu pà te ampew te dunya, ne merakel se egkeheram ta ne merasey. Ne kenà ku iyan egkehiyen ne egkiyug ad ne mehaan ebpatay su apey ku egkeawai ini se lawa ku ne ruen kegkerundus din, ugaid ne iyan ku igkesuat ne igkevehey rin en ke behu ne lawa ku ne riyà ebpuun te langit. Su embiya igkevehey rin en ke behu ne lawa ta ne kenà ebpatay, ne nepupus en ke ketehel dut te kemetayen.

<sup>5</sup> Ke Eleteala se ebpenehana keytew te ebpekekuwa ki te behu ne lawa ta keuremà, ne impeubpà din kayi te keyta ke Kedesenan ne Ebpetuntul te Menusiyà su tuus te edtumanen din.

<sup>6</sup> Tembù be lelayun mevag-et se hinawa ta. Netuenan ta te taman ne kayi kiyu pà ed-ubpà te ampew te dunya, ne nekepekeriyù kiyu pà te ked-ubpà ta ki Hisu Kristu ke Kerenan tew.

<sup>7</sup> Su taman te ed-ubpà kiyu pà kayi te ampew te dunya, ne eduma kiyu ki Hisu Kristu ibpepevayà te sarig ta kandin misan kenà ta egkekita sikandin.

<sup>8</sup> Uya, lelayun mevag-et se hinawa ta, su iyan ta egkiyuhan ne egkeawaan ta ini se lawa ta ne kayi rà te ampew te dunya su apey kiyu riyà mekeubpà te ki Hisu Kristu ke Kerenan tew.

<sup>9</sup> Ugaid ne misan endei kiyu meketahù kayi te ampew te dunya etawa riyà te langit, ne iyan ta edumaan ne ke kiyug te Eleteala.

<sup>10</sup> Su langun tew ne ebpengetuvang ki Hisu Kristu keuremà su edtimbangan din ke ulaula te uman te seveka. Ketà be ne egketelimà dut te uman seveka ke lalew rin ne edait dut te ulaula rin te kayi pà sikandin mekeubpà te ampew te dunya. Su meupiya etawa mereatey ke ulaula rin, ne arà imbe ke egketelimà din.

*Duen dalan te Kebpekidseveka te Menge Etew diyà te Eleteala su atag te Kinepatey ni Hisu Kristu Mekeatag dut te Salà dan*

<sup>11</sup> Geina te netuenan dey se kedtimbangana ni Hisu Kristu ke Kerenan tew ne mekeandek, ketà be ne egkiyuhan dey ne egkepuyuk ke langun te kebperetiyyaya kandin. Ne netuenan te Eleteala se metidtu ini se ed-ul-ulaan dey, ne egkiyuhan dey ne egketuenan niyu rema.

<sup>12</sup> Ini se munge lalag dey ne kenà dey egkiyuhan ne sikami ne egkereyù niyu. Ugaid ne iyan dey egkesuatan ne egketuenan niyu ini se benar su apey kenà key egkeyeyaan ne idtindeg niyu diyà te munge etew ne ed-isuhat kenami su iyan den dà edtengtengan ne paras te etew ne kenà ke ulaula rin ke meupiya ve etawa ke kenà.

<sup>13</sup> Upama ke ruen munge etew ne iyan dan itungan mekeatag kenami ne nevuneg key, ugaid ne embiya nevuneg key ne sabap te edtumanen dey ke impehelevak te Eleteala kenami su apey rey egkereyù sikandin. Ne embiya iyan dan kebpegitung ne meupiya se itungan dey, ne meupiya arà. Su ini se helevek dey ne keupianan niyu.

<sup>14</sup> Iyan dey kegeleveka te mevaher su netuenan dey te ke limù ni Hisu Kristu ne iyan ebpekevigkat kenami. Su netuenan dey te mibpebpatay si Hisus te selidig dut te langun ne munge etew, ketà be ne iring te langun ne munge etew ne nekeunung kandin te kinepatey rin.

<sup>15</sup> Iyan din impatey ne kedselidig din dut te langun ne munge etew su apey kenà dan en med-ulaula te kandan dà ne kiyug. Ugaid ne iyan dan edtumanen ke kiyug ni Hisus ke minatey ne nevanew su apey ran mekepeliyu rut te kedusa te salà dan.

<sup>16</sup> Ketà te warà a pà mebperetiyyaya ki Hisu Kristu ne ke munge etew ne edsudian ku te kebpeparas dan wey ke kebevelegkasan dan, ne engketà ded dema ke nepegitung ku ki Hisu Kristu. Ugaid ne gunteani ne nesalin en ke itungan ku.

<sup>17</sup> Su ke etew ne mibpekidseveka en ki Hisu Kristu ne midsambì en dut te daan ne ulaula te behu ne ulaula rin. Su iring maa te arà pà ne midlimbag sikandin te Eleteala su mibehayan en te behu ne itungan.

<sup>18</sup> Ne ini se behu ne itungan ne riyà ebpuun te Eleteala. Su sabap dut te mid-ulaula ni Hisu Kristu, ne in-awà dut te Eleteala ke ked-engkenà tew kandin. Ne insarig din keytew ne munge mibperetiyyaya te ebpesebutan dut te munge etew mekeatag te mid-ulaula rin su apey rin egketelimà sikandan.

<sup>19</sup> Iyan dey ibpemesabut ne midsuhù te Eleteala si Hisu Kristu su apey ruen dalan te kebpehad din te mense salà tew su apey ebpekidseveka kiyu kandin. Ini se Meupiya ne Tudtul ne insarig din kenami te kebpepemesabut diyà te munge etew.

<sup>20</sup> Arà be ne midsuhù key ni Hisu Kristu se ebpemesabut mekeatag kandin. Ne ebuyuen dey keniyyu te iring te si Hisus se ebuyù keniyyu te ivehey niyu ke hinawa niyu diyà te Eleteala su apey kew ebpekidseveka kandin. Su ke Eleteala se ebuyù keniyyu kayi te ibpemesabut dey ini,



<sup>21</sup> su midsuhù din si Hisu Kristu ne warà salà din te ibpevava kandin ke langun ne salà tew. Iyan kineengketaa te Eleteala ne apey ketà ebpuun te kebpekidseveka tew ki Hisus ne ruen en kebmetidtu tew riyà te etuvangan te Eleteala.

## 6

<sup>1</sup> Engketà arà ne mid-amung key dut te Eleteala te egelevek dut te helevek din kayi te ampew te dunya. Ne ebuyuen dey keniyu ne ibpekita niyu te mid-upianan niyu ke daat te nanam din keniyu su apey kew ebpekeliyu.

<sup>2</sup> Su ke hewii ne kedtavang te Eleteala dut te minge etew ne ruen tedtab din. Iring dut te impesurat ne Lalag te Eleteala ne egkahi te,

“Neumaen ke hewii

ne ibpekita ku ke kegkeyru ku keniyu,

ne nerineg ku ke kebpengeeningeni niyu.

Uya, impekita ku ke daat te nanam ku keniyu,

ne midtevangin ku sikiyu te kebpeleiyu keniyu.”

Na itaan niyu ve ke telinga niyu kayi te ini se egkehiyen ku. Su ini en ke hewii ne intail din te kedtavang keniyu. Uya, ini en ke hewii te kebpeleiyu rin dut te minge etew ne mibperetiyya kandin.

<sup>3</sup> Ne kayi te helevek dey te Eleteala ne ed-up-upianan dey ini su apey warà igkesawey kenami te misan engkey ne etew. Ed-uram key nevenar su apey warà liwahì te etew te kenà din keduma dut te penuruan dey mekeatag te Eleteala.

<sup>4</sup> Su langun ne ed-ul-ulaan dey ne ibpekita rey te benar ne sugshuen key te Eleteala. Su misan engkey en se kesemukan, kemerehenan wey kemeresayan, ne edtigkeran dey en.

<sup>5</sup> Midtigkeran dey misan mibpemedasan key, ne uman key rà egkevilanggù, ne edsemuken key rut te minge etew ne egkiyug ne ed-imatey kenami. Ruen hewii ne neruahan key te kegelevek dey, ne nepurang key wey nevitil key.

<sup>6</sup> Ne impekita rey te benar ne sugshuen key te Eleteala kayi te ketilak te ulaula rey wey ke kedsebuta rey rut te Meupiya ne Tudtul ne ibpemesabut dey wey ke kedtigker dey wey ke kedtulanged dey. Ne egkekita red dema te ke Kedesenan ne Ebpetuntul te Menusiya se ebpetuntul kenami, ne ke limù dey te ruma rey ne kenà kayi rà te bebà dey su benar.

<sup>7</sup> Iyan pà duma ne egkekita kayi te helevek dey ne ke ibpemesabut dey ne benar iya su ke gehem te Eleteala se edtavang kenami. Ne iyan iring ne metarem ta ne ke ketidtu te ulaula ta. Ne arà se id-atu ta te kebunuey ne ebpekealang keyta dut te kunterà ta.

<sup>8</sup> Edlaus key te egelevek te Eleteala misan ed-edatan key etawa ebpegkeyaan key, misan edeyuen key etawa edsudian key. Ne misan ruen egkahi te teruen key, ne iyan benar ini se ibpemesabut dey.

<sup>9</sup> Ruen duma ne egkahi te warà atag dey, ugaid ne ruen duma ne netuenan dan ke benar mekeatag kenami. Duen hewii ne edtiviltivil se umur dey ugaid ne uuyag key red ma. Duen arà se edresayan key te Eleteala su kebpetidtuwa rin kenami rut te ulaula rey, ugaid ne warà key red imetayi.

<sup>10</sup> Ne misan duen merakel ne igkemereheni rey, ugaid ne kenà egkeawà ke kegkehalew rey. Iring key en te egkeayuayu, ugaid ne kayi ebpuun te ibpenurù dey ke Meupiya ne Tudtul ne igkewasa te ruma ne etew. Iring te warà kearen dey kayi te ampew te dunya, ugaid ne nehaked dey ma ke langun taman ne intail te Eleteala kenami diyà te langit.

<sup>11</sup> Ne sikiyu ke minge suled dey ne an te inged ne Kurintu, warà in-eles dey keniyu ne neketahù te itungan dey su rekela dey nevenar sikiyu te hinawa.

<sup>12</sup> Su kenà kew gimbis dà te hinawa rey, ugaid ne sikiyu se kurang se hinawa rin kenami.

<sup>13</sup> Ini ve se egkehiyen ku keniyu ne iring kew en te tuney ne minge anak ku. Ne iyan be dema meupiya ne ibpekita niyu ke kegkelimù niyu kenami.

*Ke Menge Etew ne Mibperetiyya ne Iyan iya se Kenà Ed-iring dut te Menge Etew ne Kenà Ebperetiyya*

<sup>14</sup> Ruma ne egkehiyen ku, ne kenà kew med-esawa te minge etew ne kenà ebperetiyya ki Hisus. Su kenà egkepakey ne ebpekidsawug ke etew ne metidtu se ulaula rin dut te etew ne kenà metidtu se ulaula rin. Su kenà egkepakey ne ebpeked-amur ke merayang dut te merusirem.

<sup>15</sup> Kenà egkeseveka te pegingawà si Hisu Kristu wey si Setanas ke datù te pekaid. Engketà ded dema ke minge etew ne mibperetiyya ki Hisus wey ke kenà ebperetiyya su kenà egkeseveka ke pegingawà ran.

<sup>16</sup> Ne kenà egkepakey ne ruen tarù ne ebpengerapan ne id-amung dut te baley ne ebpengeninyan te Eleteala. Engketà ded dema ke sikitew ne mibperetiyya, su iring kiyu te baley ne ed-ubpaan te Eleteala. Su migkahi ke Eleteala te, “Ebeluyen ku ne ed-ubpaan ku ke menge etew ku, ne ebpekiduma a kandan.

Su siak ke Eleteala ran ne ed-erapen dan, ne sakup ku en sikandan.”

<sup>17</sup> Tembù be migkahi ke Eleteala te,

“Ewai niyu ke menge etew ne meraat.

Kenà kew pekiduma kandan.

Kenà kew ebpekiduma rut te meredsik ne betasan dan, ne ketà ne edtelimaan ku sikiyu.

<sup>18</sup> Ne siak ne egkevaluy ne Amey niyu, ne sikiyu ke menge anak ku.”

Arà ke migkahi te Eleteala ne ebyàbyà te langun.

## 7

<sup>1</sup> Na menge suled, geina te iring ketà ke impasad te Eleteala keytew, ne id-awà ta ke langun ne meraat ne ulaula ta wey langun ne meraat ne neketahù te itungan ta. Ne egenat kayi te ked-adat ta te Eleteala ne idtepeney ta ke hinawa ta te keduma rut te kiyug din.

*Ke Limù ni Pablo Dut te Menge Etew diyà te Inged ne Kurintu*

<sup>2</sup> Na ini maa se egkehiyen mekeatag te sikami ne itahù key nikiyu te hinawa su warà meraat ne mid-ulaula rey te misan endei keniyu. Warà senge etew rà ne nerupang dey, ne warà etew ne midlimbungan dey keniyu.

<sup>3</sup> Kenà ku iyan keppekekahi kayi ne ruen idsawey ku keniyu. Su benar arà se nekahi ku en ne rekelà ku sikiyu te hinawa su keuyag kepatyey rey ne kenà kew egkeawà kayi te hinawa rey.

<sup>4</sup> Rekelà se kedsarig ku keniyu, ne lelayun ku rema egkereyù sikiyu. Misan merakel se kemerehenan ku, ne warà lavew mepiley ke itungan ku su rekelà nevenar se kinekehalew ku keniyu.

<sup>5</sup> Ne misan nekeuma key en te inged ne Mesidunya ne merasey se hinawa rey su nerehenan key te merakel ne samuk. Ne nerehenan key dut te kunterà dey su ed-usig kenami, ne neuru a mekeatag dut te menge etew ne mibpenurù ku ke embiya edlekà dan dut te kepberetiyya ran.

<sup>6</sup> Ugaid ne ke Eleteala se ebehey te melintad ne hinawa te menge etew ne egkerehenan, ne neveelan din se kegkehalew te hinawa rey ketà te keppekeuma ni Tito.

<sup>7</sup> Ne kenà iyan dey rà kegkehalew se keppekeuma rin, ugaid ne ke tudtul din kenami te kinekehalew rin mekeatag keniyu. Su intarem din kenami se kiyug niyu te ebpekepengerapan a te keniyu su ebuyù kew te ebpeharehan ku sikiyu. Ne elin dema ne tudtul din ne rekelà te hinawa niyu se keduma niyu rut te egkehiyen ku, ketà be ne rekelà se kinekehalew ku.

<sup>8</sup> Su misan pà iring ketà te surat ku ne nekebmutu kew, ugaid ne warà a mekedsendit te kinesurat ku ketà. Ke pehaney ne nekedsendit a te kinesurat ku su nevaluy ne impekebmutu niyu te misan mehaan dà.

<sup>9</sup> Na gunteani ne nehalew a te kenà sabap ketà te kinepekebmutu niyu, ugaid ne ke kinepekettidu te ulaula niyu sabap dut te kinepekebmutu niyu. Ne arà se kinepekebmutu niyu ne riya ebpuun te Eleteala, tembù be keupianan niyu arà se surat ku.

<sup>10</sup> Su ke kemutuwan ne ibehey te Eleteala ne egkegaga rin te kepbedsendit te menge etew te kegkesembii te hinawa ran te kebpekeliyu ran te kedusa te salà dan. Ne kenà dait ne ibpedsendit tew ke kemutuwan ne riya ebpuun te Eleteala. Ugaid ne ke kemutuwan te menge etew ne kenà eduma te Eleteala su kenà dan ebpedsendit, ne riya dan ded egkepeneheewit te kepepatyey ne warà edtemanan din.

<sup>11</sup> Ugaid ne sikiyu ne surimana niyu ke meupiya ne neveelan te Eleteala sabap dut te kemutuwan niyu, su ketà puunan ne mid-iseg ke kebmetidtu te ulaula niyu. Ne rekelà te hinawa niyu se kegketuani te menge etew te warà kew meduma rut te ulaula te etew ne nekesalà. Su ingkeepes niyu arà se mid-ulaula rin ne meraat, ne ingkeandek niyu su kema ke ebpekeragkes kew te kedusa kandin te Eleteala. Ne utew en ne egkelimengawan kew kedì su mid-iseg se kedtumana niyu rut te impenurù ku keniyu. Ne seguneeey se kinerusaì niyu kandin, arà se etew ne mid-ulaula te meraat. Ne

putaanan kayi te langun ne impekita niyu se warà kew med-amung ketà te mid-ulaula rin ne meraatey.

<sup>12</sup> Ne misan midsurat a keniyu ne kenà ku iyan kedsurati keniyu ne mekeatag keniyau te etew ne nekeval te salà wey ke etew ne neselaan din. Ugaid ne netuenan te Eleleala te iyan kinesurati ku keniyu ne apey niyu metueni ke endei taman ke limù niyu kenami.

<sup>13</sup> Ketà puunan ne rekela se kegkehalew ku.

Ne mid-iseg se kegkehalew ku te nekita ku ke kinekehalew ni Tito, ne iyan din kegkehalew su nekita rin ke meupiya ne minge ulaula niyu kandin ne nevag-et se hinawa rin.

<sup>14</sup> Ingkapedantal ku sikiyu ki Tito te warà pà sikandin mebpengkeniyau te keniyu, ne warà e red mekegkeyà su nekita rin te ini ne benar. Ne langun ne impenudul ku keniyu ne benar, ne engketà ded dema ke migkahi ku ki Tito mekeatag keniyu ne benar.

<sup>15</sup> Arà be se in-iseg te kerekela te limù din keniyu su embiya egketenuran din se keduma niyu rut te lalag din wey ke kinekehalew niyu kandin, misan engketà te utew en ne ingkekiyab te hinawa niyu se kebpekeuma rin su ke kegkeandek niyu ke ruen warà niyu metuman.

<sup>16</sup> Ne kayi ebpuun te ini ne nehalew a nevenar ne kenà en duwaruwa se kebpekedsarig ku keniyu.

## 8

### *Ini ne Mekeatag te Kedtavang dut te minge Mibperetiyya Diyà te minge Ayuayu*

<sup>1</sup> Minge suled, egkiyuan dey ne egketenuran niyu ke meupiya ne neveelan dut te minge mibperetiyya riyà te inged ne Mesidunya egenat dut te tavang te Eleleala kandan.

<sup>2</sup> Su misan nekepevayà dan te utew mepait ne egketemanan, ugaid ne ingkehalew ran nevenar su rekela se ingkevehey ran ne tavang diyà te minge ruma ran ne mibperetiyya misan egkeayuayu ran.

<sup>3</sup> Su iyan ku egkekahi ke taman ne nekita ku ne mibeelan dan ke taman ne egkegaga ran te ebehey, ne netuenan ku te ruen pà kiyug dan te ebehey liyu rut te imbehey ran. Ne ini se kebehey ran ne warà ku impemandu kandan su ibehey ran de duen,

<sup>4</sup> su mibuyù dan kenami te kebpekeamung dan te ebehey te tavang dut te minge etew ne mibperetiyya diyà te inged ne Hudiya.

<sup>5</sup> Ne mibehey ran te labi pà dut te nepegitung dey ne ibehey ran. Ugaid te warà den pà mebehey te tavang ne in-una ran imbehey ke lawa ran wey ke niyawa ran diyà te Eleleala te kedtuman dan dut te kiyug din abpeg te midsarig dan kenami.

<sup>6</sup> Na geina te si Tito ke midrudsu te helevek keniyau te keniyu te kedtimua rin dut te idtavang niyu rut te minge etew ne mibperetiyya diyà te inged ne Hudiya, ne migkehiyan dey en sikandin te ipelaus din en. Su iyan meupiya ne egketevangan kew rin ded dema dut te kegkepasad te tavang niyu rut te minge etew ne mibperetiyya ne riyà te Hudiya.

<sup>7</sup> Netuenan ku te mevantug kew en atag dut te mevaher ne kebperetiyya niyu ki Hisus, ne metau kew en te kedseyseya te Lalag te Eleleala, ne nesebutan niyu en ke benar ne penuru ne metinevangan kew te ruma niyu, wey rekela ke pengelimuman niyu kenami. Engketà be arà ne kiyug dey ne egkevantug kew rema kayi te kebpekita niyu te tavang dut te minge mibperetiyya riyà te Hudiya.

<sup>8</sup> Kenà ku suhù ini keniyu, ugaid ne ebpeketenuran ku rà keniyu te rekela dema se kiyug dut te ruma ne mibperetiyya te kebpeketavang dan te ruma ran su apey ku egkekita embiya benar se sarig niyu te Eleleala.

<sup>9</sup> Netuenan niyu te rekela ke tavang ni Hisu Kristu ke Kerenan tew su ketà te ked-ubpà din diyà te langit ne sikandin ke kemuney te langun taman, ugaid ne mid-awà sikandin ketà su mibpengkayi te ampew te dunya ne mibpevaluy sikandin ne etew su atag dut te limù din keytew. Ned-ulaula arà su apey ruen dalan te ebpekeamung ki kandin te egkemuney dut te keupianan diyà te langit.

<sup>10</sup> Iyan kayi te kedi ne itungan ne imesara niyu ke kebehey niyu rut te minge ayuayu ne mibperetiyya riyà te inged ne Hirusalim ke midrudsuan niyu rut te neuna ne rahun. Su sikiyu ke neuna ne migelevek kayi, ne sikiyu red ke egelevek te mevaher te kegkepasad din.

<sup>11</sup> Engketà be arà ne heleveka niyu se kegkepasad din ne endei taman se egkegaga niyu. Rekela se kegkehalew niyu te kinerudsui niyu ketà, ne iyan meupiya ne engketà ded se kegkehalew niyu te ked-imasad niyu en.

<sup>12</sup> Embiya dekelà se hinawa niyu te kebehey niyu te tavang ne endei rà se taman ne egkegaga ne arà dà ke ibehey niyu ne igkehalew te Eleteala. Su kenà din ebuyen keniyu ke kenà niyu igkevehey, ugaid ne iyan din ebuyen ne endei rà se egkegaga niyu te ebehey.

<sup>13-14</sup> Ne kenà ku iyan kiyug ne egkerasey kew su apey kew ebpeketavang dut te ruma niyu ne egkepesangan, ugaid ne iyan ku egkiyuhan se geina te rekela se kearen niyu ne tavang kew rut te minge ruma niyu ne mibperetiyyaya ne egkepesangan guntaani. Su kema ke keuremà ne iyan kew egkepesangan ne egketevangan kew ran dema. Su embiya ebpemekedtevangà kew, ne warà kegkerasey niyu.

<sup>15</sup> Su iring te impesurat ne Lalag te Eleteala rengan se egkahi te, “Ke etew ne rekela se nekuwa rin, ne warà ded lavew sawad din. Ugaid ne ke etew ne reisek se migkuwa rin, ne warà ded dema megkurang kandin.”

*Impendiyà ensi Tito diyà te Inged ne Kurintu*

<sup>16</sup> Wey ebpeselamat key te Eleteala su imbehey rin ki Tito ke kerekela te hinawa rin te kedtevangi rin keniyu iring dut te kenami ne kedtavang keniyu.

<sup>17</sup> Nehalew nevenar sikandin ketà te kinekerineg din ne netahù be te itungan ku se kedsuhua ku kandin kenian te keniyu, su sabap dut te kinekesuat te hinawa rin ne iyan din nepegitung se edlived kenian te keniyu.

<sup>18</sup> Ne ibperuma rey kandin ini se senge etew ne suled tew ne minge mibperetiyyaya ne ed-edatan nevenar dut te langun ne mibperetiyyaya su sabap dut te kepemesabud din dut te Meupiya ne Tudtul.

<sup>19</sup> Ne kenà ketà dà taman su nepemili sikandin dut te langun ne minge mibperetiyyaya diyà te ebelàbelà ne inged te eduma kenami te kebpeneheewita rey rut te tavang niyu diyà te minge mibperetiyyaya te Hirusalim. Iyan dey ebpeneheewita su apey mereyù ke Eleteala, ne apey ran metueni ke kegkesuat dey te kedtavang.

<sup>20</sup> Ne ed-uram key ketà te rekela ne ibehey niyu ne egkepeneheewit dey su apey warà ebpekepangantap kenami te ruen in-eles dey.

<sup>21</sup> Su kiyug dey ne ini se ebeelan dey ne metidtu riyà te etuvangan te Eleteala, ne kenà sikandin dà su egkekita rema te minge etew se metidtu ke langun ne ebeelan dey.

<sup>22</sup> Ne ruen pà suled tew ne mibperetiyyaya ne ibperuma rey engki Tito. Ne uman ku rà edsipata sikandin ne rekela te hinawa rin se kebpeketavang din dut te minge etew ne mibperetiyyaya. Ne muna pà kerekela te kiyug din guntaani te edtavang keniyu geina te rekela se kedsarig din keniyu.

<sup>23</sup> Si Tito, ne sikandin ke ruma ku te egelevек te kedtavang dey keniyu. Ne ini se deruwa ne minge suled tew ne eduma kandin te ebpengkenian ne suhù dema dut te ruma tew ne mibperetiyyaya te ebelàbalà ne inged. Su egenat te meupiya ne ulaula te ini se deruwa ne etew ne si Hisu kristu se layun egkereyù.

<sup>24</sup> Ipekita niyu ve kandan ke limù niyu su apey metueni rut te langun ne mibperetiyyaya te misan endei ne inged se benar iya ke limù niyu rut te minge ruma niyu. Engketà be arà ne egketuenan dan dema se benar iya ke kinereyù dey ne metidtevangi kew.

## 9

*Idseysey pà maa ni Pablo ke Mekeatag te Keditimù te Idtavang*

<sup>1</sup> Kenà en duhaya ne edsuratan ku pà sikiyu ke engkey se meupiya ne ed-ul-ulaan niyu te kedtavang dut te minge ruma tew ne mibperetiyyaya riyà te inged ne Hudiya.

<sup>2</sup> Su netuenan ku ne rekela se kiyug niyu te kedtavang. Tembù impereyùdeyù ku sikiyu riyà te minge mibperetiyyaya te Mesidunya se egkahi te, “Ke minge suled tew riyà te inged ne Gerisya ne egenat dà dut te neuna ne rahun ne netegeges en ke hinawa ran te ebehey.” Guna su nering dan ke nepenuktul kandan atag keniyu ne mid-iseg ke kiyug dan te kedtavang dema.

<sup>3</sup> Na guntaan ne edsuhuen ku kenian ini se minge suled tew te mibperetiyyaya ne migkahi ku su ed-inteng dan ke netimù en ke ibehey niyu su apey ke migkahi ku mekeatag te meupiya ne ulaula niyu ne egkekita, wey su embiya ebpengkenian a ne nepenehana en iring dut te migkahi ku.

<sup>4</sup> Su embiya ebpengkenian a ne ruen etew kayi te Mesidunya ne eduma kedi ne egkekita ran se warà kew pà meandam dut te ibehey niyu, ne ebpekegkeyà a ne ebpekegkeyà kew rema su sabap dut te ingkahi ku kandan ne andam kew en.

<sup>5</sup> Engketà be arà ne iyan ku nepegitung se ebuyen ku kayi te tetelu ne suled tew ne ebpekeuna ran en kedi te ebpengkenian su apey kew metevangi te edtimù dut te ibehey niyu. Su embiya egketegeges en te kebpekeuma ku, ne egkekita te langun te iyan niyu kebehey ne kenà kew egkepehesan, su ibehey niyu te lila ne hinawa niyu.

<sup>6</sup> Tentenuri niyu ini te embiya reisek se igkepemula ta, ne reisek dema se egkesebpet ta. Ugaid ne embiya rekela ke ibpemula ta, ne dekelà ded dema ke egkesebpet ta.

<sup>7</sup> Engketà ded dema ke etew ne ebehey, iyan meupiya ne ed-unaan din te ebpegitung te endei rà taman se egkegaga rin te ebehey. Ne ketà ne ibehey rin te lila ne hinawa rin ne kenà te ebpehesen sikandin su igkehalew te Eleteala ke etew ne ebehey te mehalew ne hinawa rin.

<sup>8</sup> Su ebpekegaga ke Eleteala ne ebehey keyta te muna pà dut te pegingawà ta su apey warà kurang ta te ebehey riyà te minge ruma ta ne ruen kurang dan.

<sup>9</sup> Iring dut te impesurat ne Lalag te Eleteala mekeatag te etew ne kenà leheren, ke sikandin te,

“Pinedlabi rin te ebehey te tavang diya te minge ayuayu.

Tembù ke meupiya ne ebeelan din ne warà edtemanan din.”

<sup>10</sup> Su iyan ebehey keyta te beni ne ibpemula ne Eleteala su apey ruen egkekaan ta. Sikandin ded ke ebehey keyta te sawad ne beni ne ibpetuvù din te meupiya su apey rekela se egkesabpet ta sabap dut te ketidtu te ulaula ta te kedtavang ta te ruma ne minge etew.

<sup>11</sup> Uya, sikandin se ebpeiseg te kegkeuyag ta su apey ruen dekelà ne ibpeketavang ta ketà te minge etew ne ruen kurang din. Ne ketà te egkeewit dey ke idtavang niyu diyà te minge etew ne ruen kurang dan, ne rekela se kebpeselamat dan te Eleteala su atag dut te tavang niyu.

<sup>12</sup> Su ini se tavang ne ibehey niyu ne kenà iyan din dà neetahan se kedtevangi niyu rut te minge mibperetiyya ki Hisus, ugaid ne egenat kayi ne ebmerakel ne etew se ebpeselamat te Eleteala.

<sup>13</sup> Su ketà te egketuanan te minge etew te metulanged kew, ne ebpeselamat dan te Eleteala su atag dut te keduma niyu te minge suhù din wey ke mevaher ne sarig niyu rut te Meupiya ne Tudtul mekeatag ki Hisus. Iyan elin ne ibpeselamat dan te Eleteala ne ke kedtevangi niyu kandan wey ke kedtevangi niyu rema te ruma ne etew.

<sup>14</sup> Ne ibpengeningeni kew ran dut te kerekela te hinawa ran keniyu su nekita ran te arà se ibehey niyu ne Eleteala se midtavang keniyu.

<sup>15</sup> Engketà be arà ne edeyù kiyu nevenar te Eleteala su imbehey rin keytew ke Anak din ne warà repeng te kepurù din.

## 10

### *Midtindahan ni Pablo ke Idsawey Kandin Mekeatag te Helevek Din*

<sup>1</sup> Na siaken ini si Pablo ne ruen suhù ku keniyu. Su siaken kun ne telawen ke embiya riyana te keniyu, ugaid ne meharang kun ke minge lalag ku keniyu embiya riyana te meriyu ne iyan ku kebpekidlalag keniyu ne kayi te surat. Ne ini se suhù ku guntaani ne iyan ku ed-iringan se kebpekidlalag ni Hisus Kristu ne kenà meharang su menanew,

<sup>2</sup> su ebuuyen ku keniyu ne peketidtuwa niyu ke ulaula niyu su apey kenà ebmeharang se kebpekidlalag ku keniyu embiya kenian ad. Su ruen gaga ku te ebpekita te kevrut dut te minge etew ne egkahi te kayi te helevek ku ne iyan ku edumaan ke kiyug te menusiya.

<sup>3</sup> Kenà benar arà su misan etew a rà ne ed-ubpà kayi te ampew te dunya, ugaid ne ini se ralan te ked-atu rey dut te langun ne meraat ne egkuntera te Eleteala ne kenà ke itungan dey rà te kememenusiya.

<sup>4</sup> Su ini se iring metarem dey ne id-atu rey te meraat, ne kenà kebpekidlawan ne kayi rà ebpuun te itungan te etew ugaid ne riyà egenat te gehem te Eleteala ne warà repeng din. Su ini se metarem dey ne kenà egkeetuanan te misan engkey ne kebpekidlawan te kuntera te Eleteala, misan engkey se kevaher din.

<sup>5</sup> Su ini se ebmeteremen dey ne ibpeketalew rey ketà te tarù ne kebpekidlawan te minge mepereyu ne etew ne kenà eduma te benar ne penduan te Eleteala. Ne edtelawen dey ke langun ne ibpeitindeg dan ne itungan ne ebelavag dut te kegkesebuti ran mekeatag te Eleteala. Ketà be ne edtelawen dey ke kebpekidlawan dan su apey ran egkepeneheewit te kebperetiyya ki Hisus Kristu.

<sup>6</sup> Ne embiya ibpekita niyu te benar ke keduma niyu te penduan ni Hisus Kristu, ne ketà ne ebpedselaan ku ke minge mibperetiyya ne kenà eduma ki Hisus Kristu embiya te ebpekeuma ad kenian.

<sup>7</sup> Sikiyu ne warà mekesuhat se itungan niyu su iyan niyu edtengtangan ne ke kebpeparas te etew, ugaid ne iyan niyu kenà egkekita ke riyà te lusud te hinawa rin.

Su ruen keniyen te keniyu ne iyan dan itungan ne sikandan dà ke benar ne sugsuhen ni Hisu Kristu, ugaid ne iyan meupiya ne egkesebutan dan te sikami ne benar dema ne sugsuhen din.

<sup>8</sup> Ne misan ke merakel ku egkehiya te ruen kebayaàbayaà dey keniyu ne kenà ku igkeyeyai su si Hisu Kristu ke mibehey kedi ketà. Ne kenà din iyan kinevehayi kedi te kebayaàbayaà se kedereeti rut te kebperetiyaaya niyu, ugaid ne ebaher wey ked-iseg te kebperetiyaaya niyu.

<sup>9</sup> Kenà ku egkiyuhan ne iyan niyu pegitungan se ebpemeliendeken ku sikiyu kayi te minge surat ku.

<sup>10</sup> Su ruen keniyen te keniyu egkahi te, “Embiya edsurat kenami si Pablo ne mepasang wey meilut se lalag din, ugaid ne embiya kayi sikandin te kenami ne ke lalag din ne meluvey ne kenà ibpememantag sikandin.”

<sup>11</sup> Ugaid ke etew ne edlalag te iring ketà ne dait ne egkesebutan din te ini se egkehiyen ku kayi te surat ne iring din ded ke embiya kenyan ad te keniyu.

<sup>12</sup> Arà se minge etew ne ebpereyùdeyù te ruma ne minge etew, ne egkeyeyaan a ne ed-iring kandan. Utew kurupew se itungan dan! Su ebpeiringan dan ke ulaula ran dut te minge etew ne neked-iring se itungan dan. Su warà te itungan dan ke engkey se egkehiyen te Eleteala ne meupiya.

<sup>13</sup> Ugaid sikami ne kenà dey egkehiyen ne migelevek dey ke warà dey mehelevek. Su arà se imbehey kenami te Eleteala ne ed-ul-ulaan dey, ne arà se egkehiyen dey ne migelevek dey, abpeg din ke helevek dey riyà te keniyu.

<sup>14</sup> Ne warà ku pesehari ke suhù te Eleteala ketà te kebpesabut ku keniyu su insuhù din kedi te ebpesabut dut te Meupiya ne Tudtul mekeatag ki Hisu Kristu, tembù be siaken ke neuna ne ebpengkeniyen te keniyu.

<sup>15</sup> Kenà ku ibpendantal ke helevek ne neveelan dut te minge etew ne riyà te ruma ne inged te warà a ketà suhwa te Eleteala te egelevek, ugaid ne sikiyu ne neaming en dut te helevek ne imbehey kedi te Eleteala. Ne iyan ku we egkiyuhan ne ebpekeiseg pà te kebmevahir din ke kebperetiyaaya niyu te Eleteala su apey a niyu egkeemungi rut te helevek ku riyà te inged niyu.

<sup>16</sup> Engketà be arà ne egkepakay en ne ibpemesabut ku ke Meupiya ne Tudtul diyà te minge inged ne meriyù pà dut te keniyu. Su kenà ku egkiyuhan te ed-ahew wey edantal ke helevek ne neveelan te etew riyà te ruma ne inged ne kenà ku helevek.

<sup>17</sup> Su ruen impesurat ne Lalag te Eleteala ne egkahi te, “Kenà dait ne ruen etew ne edantal te kandin dà ne hinawa, ugaid ne iyan din idantal ke neveelan te Eleteala.”

<sup>18</sup> Su ke etew ne edeyù te hinawa rin ne kenà tuus arà te benar ke egkehiyen din, ugaid ne ke kedeyù te Eleteala kandin ne arà se tuus te meupiya ne etew sikandin.

## 11

*Si Pablo ne Kenà Iring Dut te Menge Etew ne Engkungkun ne Kedserihan ni Hisu Kristu*

<sup>1</sup> Iyan ku egkiyuhan ne tigkeri a niyu misan iring a te egkevengùbengù su igkahi ku keniyu ke kayi te hinawa ku.

<sup>2</sup> Ini se egkehiyen ku keniyu ne ebpekepengelikud a keniyu iring te kebpekepengelikud te Eleteala keniyu embiya eduma kew te ed-arap te tarù ne ebpengerapan. Embiya idsempità ta ne iring kew te senge etew ne raha ne mibpenelenggunian ku en ketà te senge etew ne kenakan ne si Hisu Kristu. Kiyug ku ne lunsey en se hinawa niyu diyà te kandin.

<sup>3</sup> Ne egkeipeng a keniyu su kema ke edsuwey ke hinawa niyu te keduma ki Hisu Kristu, ne kenà egkseveka ke hinawa niyu kandin. Iring te ned-ulaula rengan ki Eba ne mid-ekalan dut te uled ne metau ne edliyuk ne si Setanas.

<sup>4</sup> Iyan ku igkeipeng keniyu ke igkehalew niyu te ebpemineg ke ruen ebpengkeniyen te keniyu ne ebpesabut mekeatag te ruma pà ne Hisus ne kenà ke Hisu Kristu ne impemesabut dey. Etawa ebpenurù dan te ruen nekebira ne Kedesenan ne Ebpetuntul te Menusiyà dut te impemesabut dey en ne igkeuru ku ke egkiyug kew ne ebpemineg ketà.

<sup>5</sup> Ne ini se uvag kun ne minge kedserihan ni Hisu Kristu ne mibpengkeniyen ne kunaan niyu ke utew ran en ne nekelavew, ugaid ne netuenan ku se kenà dan ebpekelavew kedi.

<sup>6</sup> Su misan iring te egkesisimeng a te edlalag diyà te etuvangan te minge etew, ne kenà kurang mulà ini se netuenan ku mekeatag te Eleteala su ke langun ne ibpemenurù ku ne nekita niyu te benar wey metidtu.

<sup>7</sup> Ruen id-insà ku keniyu. Menu iyan niyu ve nepegitung ne nekesalà a su geina te warà a mebuyù te sukey ku ketà te impemesabut ku ke Meupiya ne Tudtul mekeatag te Eleteala? Iyan ku kebpeembavà te iring ketà su apey kew egketevangi kayi te ibpenurù ku ne kenà kew egkepesangan te edsukey kedi.

<sup>8</sup> Uya, warà migkuwa ku riyà te keniyu, inemulà te iyan mibehey kedi ne ke riyà te ruma ne inged ne mibperetiyya gewii te kebpesabut ku keniyu. Iring a te mibpemenakew te igkeuyag ku riyà te kandan asal dà ne metevangi ku sikiyu.

<sup>9</sup> Su ke keniyàn e pà te keniyu ne warà a mebuyù te misan engkey ne peginawà ku su iyan mibehey kedi te misan engkey ne kurang ku ne ke menge etew ne mibperetiyya riyà te inged ne Mesidunya. Warà a mebuyù keniyu wey kenà a iya ebpekeuringer keniyu te misan keenu ne hewii.

<sup>10</sup> Ne ini se egkehiyen ku keniyu ne egkeserihan iring dut te lalag ni Hisus ne egkeserihan. Su misan endei a ebpesinaru, riyà te keniyu etawa ruma pà ne inged lusud te Gerisiya, ne egketuman ini se pasad ku te kenà a ebuyù te misan engkey.

<sup>11</sup> Menu, iyan niyu buwa egkepegitung ne geina te nekahi ku ini ne warà limù ku keniyu? Ugaid ne netuenan te Eleteala ke kerekelà te limù ku keniyu!

<sup>12</sup> Ne kenà ku iya ed-engkeran ke nekahi ku te kenà a ebuyù keniyàn te keniyu su apey kenà edantal ayan se menge etew ne uvag kun ne kedserihan ni Hisu Kristu ne egkahi te mibpesukey a iring dut te ulaula ran.

<sup>13</sup> Ayan se menge etew ne egkahi te kedserihan dan ni Hisu Kristu ne kenà benar. Egkehiyen dan ne si Hisu Kristu se midsuhù kandan, ugaid ne ed-akal dan keniyu su uvag kun te kedserihan dan ni Hisu Kristu.

<sup>14</sup> Kenà ku ini igkeselekawi su iring dan ki Setanas ke datù te pekaid ne egkegaga rin te edsalin ke paras din te ebpekeiring dut te suluhuen te Eleteala.

<sup>15</sup> Engketà be arà ne kenà ki egkeinuinu embiya ke sugsuhen dut te datù te pekaid ne uvag kun en ne sugsuhen te Eleteala ne midsuhù din te ebpenurù te metidtu. Ugaid ne keuremà ne edusaan dan te endei se dait dut te meraat ne mid-ulaula ran.

*Ke Kemerehenan ni Pablo rut te Helevek din ne Kedserihan ni Hisu Kristu*

<sup>16</sup> Ne edseupan ku te egkahi te kenà niyu iyan kebpegitung kedi ne egkevangübengù a su sabap dut te kegkehiya ku atag te kedi ne hinawa. Ugaid ne misan arà se egkepegitung niyu, ne tigker kew se ebpemineg te kedi ne keeetawi.

<sup>17</sup> Na ini se egkehiyen ku keniyu ne kenà diyà ebpuun te ki Hisu Kristu, su ke kedleleha ku te kedi ne hinawa ne ebpekeiring dut te lalag ne egkevangübengù.

<sup>18</sup> Su geina te ruen merakel ne edantal te helevek dan kayi te ampew te dunya, ne egkepakey red dema ke ruen deisek ne egkekahi ku te kedi ne keeetawi.

<sup>19</sup> Metampas kew ve iya maa nevenar su metau kew ne edtigker te menge lalag dut te ebpevangübengù diyà te keniyu!

<sup>20</sup> Uya, su ebperumaruma kew rut te edsuhùsuhù keniyu, misan ed-ehawen dan ke menge kearen niyu. Etawa misan edlimbungan kew ran, ne edsudi dan keniyu wey edtebpian kew, ne iring dà te warà te hinawa niyu.

<sup>21</sup> Ne arà se ed-ul-ulaan dan, ne igkeyeyai ku te ed-iring! Su kenà iring ketà se kevrut ku!

Geina te warà kegkeandek dan te kedantal, ne kenà a rema egkeandek ne edantal misan iring a te egkevangübengù.

<sup>22</sup> Ne embiya edantal ayan se menge etew te Hudiyanen dan ne ed-ingaranan te Hibruwanen, ne siaken dema ne Hibruwanen. Ne embiya edantal dan te inenakan dan ni Israyil, ne siaken dema ne inenakan ni Israyil. Ne embiya edantal dan te inenakan dan ni Ebrahim, ne siaken dema ne inenakan a ni Ebrahim.

<sup>23</sup> Ne egkehiyen dan ne menge sugsuhen dan ni Hisu Kristu, ugaid ne siaken ne muna e pà ne meperumaruma ne sugsuhen ni Hisu Kristu. Su misan iring a te egkevangübengù kayi te kedlalag ku mekeatag te hinawa ku, ne benar su iyan pà mevaher se nehelevek ku kandan. Su kayi te kebpeemesabut ku te Lalag te Eleteala ne kenà kepipira e rà mevilanggù dan! Ne uman e rà edruuha te muna pà kandan! Ne merakel se hewii ne editiveltivel se umur ku te muna pà kandan!

<sup>24</sup> Kelelima ad pendruuha rut te menge Hudiyanen ne ketetelu nepulù wey siyew a lambita.

<sup>25</sup> Ketetelu a nikandan bedasi te tuked, ne ruen pà hewii ne mibpendrumbag a te batu. Ketetelu en nekahem se avang ne mid-unturan ku. Ne keseveka ne iyan ku rà neheweran se tevì te papan ne gentungan ku te senge keandew wey senge kerukileman diyà te kalud te rahat.

<sup>26</sup> Ne kayi te ked-ipenewà ku ne nepevayaan ku en se merakel ne kemerehenan. Keseveka ne ruen kedalem te wayig, ne ruma ne ruen menge tulisan. Duen pà idrasey kedi te menge ruma ku red ne menge Hudiyanen wey ke kenà Hudiyanen. Duen kegkerasey ku riyà te rekela ne inged, ne ruen diyà te kengkenawan, ne ruen diyà te kalud te rahat wey riyà te engkungkun ne menge mibperetiyya.

<sup>27</sup> Ne ruen se midrumerasey a te egelevek, ne ruen arà se egkepurang a, ne ruen se egkevital a wey ebpekeinum a. Ruen arà se warà egkekaan ku, ne ruen arà se utew ad ne egkeadsil su kurang se kebevelegkasan ku.

<sup>28</sup> Ne kenà arà dà taman su ruen pà lavew ebpekeuman te kegkerasey ku su ke kepeneheewita ku rut te langun ne mibperetiyya diyà te ebelàbelà ne inged.

<sup>29</sup> Su embiya ruen mibperetiyya ne ebmeluvey se sarig din, ne iring te egeramen ku rema ketà te kegkeuru ku. Ne embiya ruen egkeewit te kebpekedsalà, ne iring te ebpiruwen ke pusung ku kandin.

<sup>30</sup> Kenà ku egkiyuhane se idantal ku ke hinawa ku, ugaid ne embiya ebperentalen a ne iyan ku ibpentalen ne ke langun ne kemerehenan ne impebpevayà ku su apey niyu egketueni te siaken ne meluvey.

<sup>31</sup> Ne ini se egkehiyan ku ne kenà tarù su netueanan dut te Eleteala ne Amey tew ne ke Amey ni Hisu Kristu ne Kerenan tew. Ne edeyuen tew sikandin taman te taman!

<sup>32</sup> Ne ruma pà ne netemanan ne impebpevayà ku ketà te riyane a te inged ne Demasku ne insuhù dut te gubinedur te ebpeventayan te menge sundaru ke langun ne bengawan su embiya edlihawang a ne apey a mesigkem. Ne iyan migkirketau ketà te gubinedur ne ke pengulu te langun ne gubinedur ne si Eritas.

<sup>33</sup> Ugaid ne ruen menge etew ne midtavang kediey su in-awuk a ran diyà te rekela ne bukag ne midtuntun a ran diyà te budsi te metikang ne pehalad ne nekellingut dut te inged dan, ne arà dà se kebpekeliyu ku ketà.

## 12

### *Ke Impekita ki Pablo rut te Kerenan*

<sup>1</sup> Netueanan ku se warà pantag se kegkehiya ku te keeetawi ku, ugaid ne iring te ebpekehiyan a mekeatag keniyane te menge etew ne edantal atag te helevek dan diyà te keniyu. Ketà be ne egkehiyan ku keniyu ini se impayag kedi ne impekita ni Hisu Kristu ke Kerenan tew.

<sup>2</sup> Necedsepulù wey epat ne rahun en egenat ketà ne nevatun a riyà te langit ne ke ed-uppaan te Eleteala. Ne warà ku metueni ke himukud ku rà se nevatun etawa nekeruma ke lawa ku. Eleteala rà se netau ketà.

<sup>3</sup> Uya, nevatun a diyà te ed-uppaan te Eleteala ne ed-ingaranan te Paraisu, ugaid ne Eleteala rà se netau ke nekeruma ke lawa ku ketà etawa warà.

<sup>4</sup> Ne riyà te langit ne ruen nerineg ku ne kenà ku en egketueanan te egkahi, ne kenà idluhut rema te Eleteala te ibpemenudtul ku arà.

<sup>5</sup> Ne ini se netemanan ku ne misan duen ketengdanan ku te edeyù mekeatag ketà, ne kenà a egkiyug su iyan ku igkahi ne ke keluvey ku.

<sup>6</sup> Ugaid ne misan egkiyug a ne edantal ne kenà egkepakey ne egkehiyan niyu se iring a te egkevengübengü, su ini se idantal ku ne benar. Ugaid ne kenà a edantal su apey warà etew ne iyan a ebpeleviyen dan. Ugaid ne iyan ku egkiyuhane ne ke gelevek ku wey ke menge penurù ku ne ketà ebpekepuun ke pegitungan dan mekeatag kedi.

<sup>7</sup> Su kenà egkiyug ke Eleteala ne ibpereyüdeyü ku ke utew meupiya ne impekita rin kedi diyà te langit. Ne inluhut din te sugshuhen ni Setanas te edresayen a te sakit su apey kenà ad ebpekepereyüdeyü.

<sup>8</sup> Ne ketetelu ku en impengeningeni riyà te Eleteala te ebuyuen ku ne id-awà din.

<sup>9</sup> Ugaid ne warà din iawà su iyan din migkahi se, "Piya engkey ne keresayan ne ibpevayà nu, ne ebpekegaga nevenar ini se tavang ku keykew. Su embiya ebmeluvey ka ne ketà nu egkeheram ke keilut dut te gehem te tavang ku." Arà se migkahi rin kedi. Tembù be ingkehalew ku nevenar te iyan ku egkehiyan ini se keluvey ku su apey egkekita te ruma ne etew te ruen gehem ni Hisu Kristu ne edtavang kedi.

<sup>10</sup> Ketà be ne ingkehalew ku su piya engkey se ebpekerumpak kedi iring te meluvey se lawa ku, kebpekeyaa kedi, kemerehenan ku, kebpesipelaa kedi, etawa kemeresayan ku su atag te kedsarig ku ki Hisu Kristu, langun kayi ne egketigkeran ku su embiya ebmeluvey a ne ebeheren a rin dut te gehem din.

### *Ke Kegkemutu ni Pablo mekeatag dut te Menge Mibperetiyya diyà te Inged ne Kurintu*

<sup>11</sup> Ne iring a te egkevengübengü su ingkahi ku keniyu ke kedi ne keeetawi, ugaid ne sikiyu se puunan te kinepekekahi ku kayi. Su iyan dait ne sikiyu perem se edeyù kediey



diyà te etuvangan ketà te minge etew ne edlalag te meraatey mekeatag kedi. Su misan ruen keluvey ku, ne ayan se minge etew ne uvag kun te kedserihan ni Hisu Kristu ne kenà dan ded ebpekelavew kedi.

<sup>12</sup> Arà te riyen e pà te keniyu ne nekita niyu te benar ne kedserihan a ni Hisu Kristu kayi te langun ne mibeelan ku. Su misan engkey se kemerehenan ne midtigkeran ku, ne nekita niyu ke minge mekegeyip wey ke minge mekeinuinu ne mibeelan ku su tuus te benar ne kedserihan a ni Hisu Kristu.

<sup>13</sup> Ne ini se kedtavang ku keniyu ne iring ded dut te kedtavang ku rut te minge mibperetiyya te ruma ne inged. Ugaid ne iyan din dà ebiraan se warà a mebuyù keniyen te keniyu te misan engkey ne kurang ku. Na menu, salà ku ve arà keniyu?

<sup>14</sup> Ne andam ad te kebpengkeniyen ku, ne iketelu en ini se kebpengkeniyen ku te keniyu. Ne iring ded dut te neuna ne kenà a ebuyù keniyu te tavang su apey kew kenà egkepesangi, su kenà ke tavang niyu se egkiyuan ku ugaid ne ke limù niyu kediey. Su iring kew en te tuney ne minge anak ku ne kenà iyan ed-uyag dut te lukes ke minge anak din, ugaid ne ke lukes se ed-uyag dut te minge anak din.

<sup>15</sup> Ne igkehalew ku te ibehey ke minge kearen ku wey ed-eminen ku ke resen ku te edtavang keniyu. Ugaid ne misan mid-iseg te kerekelà ke limù ku keniyu, ne sikiyu ne lemban ne edustus se limù niyu kediey.

<sup>16</sup> Ne misan netuenan niyu te warà a mebuyù keniyu ne ruen keniyen egkahi kun te ruen impegelesà ne ralan te kedlimbung ku keniyu.

<sup>17</sup> Ne embiya iring ketà, ne peketueni niyu kediey ke engkey se ralan. Maa, midlimbungan kew ran te kedsuhua ku te minge ruma rey keniyen te keniyu? Warà!

<sup>18</sup> Mibuyù ku ki Tito te ebpengkeniyen te keniyu ne imperuma ku kandin ini se senge etew ne suled tew te ebperetiyya. Engkey, midlimbungan kew ran? Warà! Su si Tito wey siaken ne megidsan ded se petiralan dey wey ke ed-ul-ulaan dey ne langun ne metidtu.

<sup>19</sup> Kunaan niyu vuwa ke kayi te merakel ne migkahi ku keniyu ne idtindeg ku ke hinawa ku, ugaid ne kenà arà benar. Su riyà te etuvangan te Eleteala ne langun te migkahi ku keniyu ne edait dut te etew ne sugshuen ni Hisu Kristu. Ne langun kayi ne insurat ku, minge suled, su apey metevangi kew te kedua niyu ki Hisu Kristu.

<sup>20</sup> Ne ebpekebmutu te hinawa ku su kalu ke ebpekeuma a keniyen ne ruen egkekita ku ne ulaula niyu ne kenà ku igkesuat. Ne kalu ke ruen ed-ul-ulaan ku ne kenà niyu igkesuat su ke kedsawey ku rut te meraat ne ulaula niyu. Iyan ebpekebmutu te hinawa ku ne kalu ke ebpekeuma a ne ruen egkwaha keniyu, ruen ebpekelikud, ruen melemu ne egkepees, ruen lelegawen, etawa ruen metehel ne ebpegekayà te ruma rin, ruen serupeten, ruen mepereyù wey ruen kenà egkepegumpung.

<sup>21</sup> Uya, ebpekebmutu te hinawa ku su kalu ke ebpekeuma ku keniyen ne egkeyayaan a riyà te etuvangan te Eleteala su sabap dut te ed-ul-ulaan niyu ne kenà ebpekesuhat kandin. Ne ketà ne ebpekesinsinehew se direlemen ku te kegkemutu ku embiya ruen keniyen te keniyu ne minge mibperetiyya ne warà mebpedsendit dut te meredsik ne mid-ulaula ran dengan, ke kebpengingniyug wey ke kegkiyugà dan.

## 13

*Ebpedselaan ni Pablo ke Minge Etew Diyà te Inged ne Kurintu Embiya Kenà Dan Ebpedsendit dut te Meraat ne Mid-ulaula Ran*

<sup>1</sup> Iketelu ku en ini te kebpengkeniyen te keniyu. Na upama ke ruen etew ne ebpekukum kedi, ne iyan impesurat ne Lalag te Eleteala se egkahi te, "Embiya ruen nekevaal te kukuman dut te ruma rin ne iyan ebpegingawà se ruen deruwa etawa merakel pà ne ebpenitihus te benar arà."

<sup>2</sup> Ketà te ikeruwa ku te mibpengkeniyen ne migkehiyen ku ke minge etew ne mereatey se mid-ulaula ran wey ke ruma ne minge etew te ketà te kedlived ku ne embiya warà den pà mebpedsendit ne ebpedselaan ku sikandan. Ne edseupan ku en maa te egkahi keniyu kayi te surat ku te warà e pà mebpengkeniyen ne embiya ebpekeuma a keniyen ne piya engkey se ruen ulaula rin ne meraatey ne kenà ebpekeelihu te kebpedselaa ku kandin.

<sup>3</sup> Geina te iyan niyu kiyug ne ruen tuus te si Hisu Kristu ke midsuhù kedi, ne ebpekita ku keniyu ke kewayà ku embiya ruen en ebpedselaan ku. Su si Hisu Kristu ne eduma kedi ne warà keluvey rin te edusa te etew ne nekedsalà su dekelà se gehem din.

<sup>4</sup> Su misan duen etew ne egkahi te warà gehem ni Hisu Kristu rut te kineimetayi kandin diyà te pinebelavag ne kayu, ugaid ne ke kegkevanew rin wey ke kegkevehayi rin te behu ne umur ne tuus te ke gehem te Eleteala ne riyen en te kandin. Engketà ded

dema ke sikami ne mibpekidseveka kandin, su iring te warà gaga rey. Ugaid ne embiya ruen ebpedselaan ku riyà te keniyu, ne egkekita te ruen gaga ku iring dut te gehem ni Hisu Kristu ne egenat te Eleteala.

<sup>5</sup> Na susiya niyu ke hinawa niyu embiya benar ke kebperetiyaya niyu ki Hisu Kristu etawa kenà. Menu, warà niyu ves metueni se kenian med-ubpà si Hisu Kristu te hinawa niyu? Ne embiya warà sikandin diyà te hinawa niyu, ne kenà benar ke kebperetiyaya niyu.

<sup>6</sup> Ugaid ne iyan ku kiyug ne egkesebutan niyu te siaken ne tidtu ne kedserihan ni Hisu Kristu su sikandin se midsuhù kedi.

<sup>7</sup> Ne ibpengeningeni ku riyà te Eleteala te warà meraat ne ed-ul-ulaan niyu. Kenà be iyan ku kebpengeningeni ini keniyu su apey metueni te menge etew te edtumanen niyu ke impenurù ku keniyu. Su kemenu ve ke kenà niyu idtahù te hinawa te siaken iya ne kedserihan ni Hisu Kristu, asal su iyan niyu ed-ul-ulaan ke endei se metidtu.

<sup>8</sup> Su embiya metidtu ke ed-ul-ulaan niyu ne siaken ne kedserihan ni Hisu Kristu ne warà kemeyidan din te ibpekita ku ke kewayà ku keniyu su wey ku rà ibpekita ke kewayà ku ke embiya ebpekesurang kew te tidtu ne penurù ne egenat te Eleteala.

<sup>9</sup> Ketà be ne igkehalew ku embiya warà kebpegingawà te kebpekita ku rut te kewayà ku te ebpedsalà su warà nekesurang dut te sikiyu. Su beleharen ke embiya ruen egkahi te warà kewayà ku asal ebmevaher kew te ed-ulaula te meupiya. Ibpengeningeni ku te Eleteala te ibpeiseg din ke meupiya ne ulaula niyu.

<sup>10</sup> Tembù be edsuratan ku sikiyu te warà e pà mebpengkenian su apey ketà te kebpekeuma ku ne warà en kebpegingawà te ibpekita ku keniyu ke kewayà ku te ebpedsalà keniyu. Su kenà iyan kinevehey te Eleteala kedi te kewayà ku te kedereeti rut te sarig niyu, ugaid ne ibag-et ku rut te sarig niyu.

<sup>11</sup> Na menge suled ku, ini se egkehiyen ku kayi te ketepusan te surat ku. Ibpeiseg niyu pà ke meupiya ne ulaula niyu, ne pemineha niyu ke insuhù ku kayi. Ne medseveka kew te hinawa niyu su apey kew mebmelintad. Su embiya ini se ed-ul-ulaan niyu ne ke Eleteala ne egkelimù keniyu wey ebehey te kebmelintad te hinawa niyu se ebpekiduma keniyu.

<sup>12</sup> Ne pelimlimuey kew su tuus te megeget te kebperetiyaya niyu.

<sup>13</sup> Langun ne mibperetiyaya ki Hisu Kristu kayi ne ebpenginginsà keniyu.

<sup>14</sup> Ne kiyug ku perem ne egkeheram niyu ke tavang ni Hisu Kristu ke Kerenan tew, wey ke limù te Eleteala keniyu, wey ke kebpekidseveka niyu rut te Kedesenan ne Ebpetuntul te Menusiyà ne ed-ubpà diyà te keniyu.

Arà dà taman. *Pablo*

## Ke Surat ni Pablo Riyà te Menge Etew te Inged ne Gelasiya

<sup>1-2</sup> Siaken ini se edsurat ne si Pablo. Ne ibpeewit ku ini riyà te menge etew ne mibperetiyaya en ki Hisus ne egkevurun diyà te menge valey te Eleteala diyà te inged ne Gelasiya. Langun dey kayi ne mibperetiyaya en ki Hisus ne ebpenginginsà te sikiyu.

Senge etew a ne kedserihan ni Hisu Kristu, ugaid ne ini se kinesuhù kedi ne kenà kiyug dà te etew etawa insuhù dan kedi su suhù a ni Hisu Kristu wey ke Amey ne mibanew ki Hisus dut te kinepatey rin.

<sup>3</sup> Iyan ku kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala ne Amey tew wey si Hisu Kristu ke Kerenan tew.

<sup>4</sup> Su si Hisus ne midtuman din ke kiyug te Eleteala ke Amey tew rut te kinepatey rin su apey sikandin ke ralan te kebpekeliyu tew rut te nekeiket keytew te langun ne sala tew kayi te ampew te dunya.

<sup>5</sup> Ketà be ne Eleteala se edait ne egkereyù taman te taman. Ne egketuman ini.

### *Ruen Seveka Rà ne Benar ne Meupiya ne Tudtul*

<sup>6</sup> Menge suled ku, ingkeinuinu ku nevenar sikiyu kenian su warà dà meuhet ne mid-iniyug kew en kun te Eleteala ne midtawag keniyu te ebpeperetiyaya su atag dut te tavang ni Hisu Kristu. Ne gunteani ne senge bias en maa se penduan ne edumaan niyu ne egkehiyen kun ne Meupiya ne Tudtul.

<sup>7</sup> Ugaid ne warà en duma pà ne Meupiya ne Tudtul ke kenà ini rà se penduan mekeatag ki Hisus ne impenurù ku keniyu. Ugaid ne ruen menge etew ne ebpeketarin te itungan niyu, su edsembian dan te tarù ini se Meupiya ne Tudtul mekeatag ki Hisus.

<sup>8</sup> Ugaid ne egkehiyen ku keniyu te embiya ruen ebpenurù te ebpekevira dut te Meupiya ne Tudtul ne impenurù ku keniyu, ne edusaan sikandin te Eleteala diyà te apuy nerakà. Misan siaken etawa suluhuen ne riyà ebpuun te langit ne ebpeked-apuy nerakà ded.

<sup>9</sup> Migkahi ku en ini rengan ne huntaan manen ne edseupan ku en maa te egkahi, "Embiya ruen ebmandù te tudtul ne nekevira rut te Meupiya ne Tudtul ne impemandù ku keniyu ne mibperetiyaya kew, ne edusaan sikandin te Eleteala diyà te apuy nerakà."

<sup>10</sup> Kenà niyu pegitunga te ruen kiyug ku te edeyuen a te menge etew, su iyan ku kiyug ne ebpekesuhat a te hinawa te Eleteala. Uya, warà te hinawa ku se ebpelimbentuhan a te menge etew, su embiya arà se pegingawà ku ne kenà si Hisu Kristu se perumdumaan ku.

### *Mibpenudtul ni Pablo ke Endei Ebpuun ke Kewagib Din te Nevaluy ne Kedserihan Sikandin*

<sup>11</sup> Menge suled ku, ruen ini ibpesabut ku keniyu: ini se Meupiya ne Tudtul mekeatag ki Hisu Kristu ne impenurù ku keniyu ne kenà ebpuun te itungan te etew.

<sup>12</sup> Su warà ku ini mehuruwi diyà te etew rà dè duen wey warà etew me mibpenurù kedi, ugaid si Hisu Kristu rà se migkeketau kedi.

<sup>13</sup> Nering niyu red ke pehaney ne ulaula ku gewii te meilit se keduma ku ketà te penduan te Hudiyenen. Su langun ne menge etew te Eleteala ne mibperetiyaya en ki Hisus ne mibpekesekitan ku te warà kegkeyru ku kandan, su kiyug ku ne ebpekeengked dan te keduma ran ki Hisus.

<sup>14</sup> Diyà te menge ruma ku ne Hudiyenen ne iring ku te kenguwed, ne warà repeng ku se kedtanud din te penduan ne intahak ni Moises keytew. Su pinelavi ku te menge ruma ku se kedtuman te betasan dut te keep-epuan dey.

<sup>15</sup> Ugaid ne misan iring ketà se meraat ke ulaula ku, ne sabap dut te dekelà ne limù te Eleteala ne mibpemili ad nikandin ne egkevaluy ne edsugsuhuen din te warà e pà in-anak.

<sup>16</sup> Ne guna su neuma en ke hewii te kebpayag kedi dut te Eleteala te si Hisu Kristu ke tuney ne Anak din su apey ku ibpesabut diyà te kenà menge Hudiyenen ke Meupiya ne Tudtul mekeatag ki Hisus, ne warà a mebpendiyà te senge etew rà te ebmandù kedi.

<sup>17</sup> Ne warà a remà mebpendiyà te inged ne Hirusalim se ebpepemandù dut te neuna ne kedserihan ni Hisu Kristu. Ugaid ne diyan a mibpesinaru te inged ne Arabiya, ne ampà ne midlived a riyà te inged ne Demasku.

<sup>18</sup> Guna su neketedetelu en ne rahun se kineuli ku riyà te Demasku, ne arà pà ne mibpendiyan a te inged ne Hirusalim su ebpekibalak a ki Pedro. Ne deruwa ne pedian se kineubpà ku riyà.

<sup>19</sup> Ne warà pà ruma ni Pedro te kedserihan ni Hisus ne nekita ku liyu te si Santiago ke ari ni Hisu Kristu ke Kerenan tew.

<sup>20</sup> Ini se idtarem ku keniyu ne benar en iya, su ke Eleteala se netau ne warà tarù kayi.

<sup>21</sup> Guna su mid-awà a riyà te Hirusalim, ne mibpendiyan a te ruma ne minge inged lusud te Siriya wey Silisiya.

<sup>22</sup> Ugaid ne arà ne hewii ne warà e pà mekilala dut te minge mibperetiyya riyà te inged ne Hudiya, su warà e pà nikandan nekita.

<sup>23</sup> Ne diyan e rà netueni nikandan te nerineg dan dut te ruma ran se egkahi te, “Arà se etew ne si Pablo ke laus ne ebpekesakit keytew rengan te mibperetiyya en ki Hisus. Ugaid ne gunteani ne sikandin en maa se ebpesabut dut te penduan ne ebpeengkeran din keytew rengan.”

<sup>24</sup> Ugaid ne guna su netueanan dan te mibehu en ke hinawa ku, ne mideyù dan nevenar ke Eleteala!

## 2

*Ke Keburun ni Pablo rut te Menge Unuten te Menge Mibperetiyya Diyà te Inged ne Hirusalim*

<sup>1</sup> Guna su nekedsepulù en wey epat na rahun ne midlived a riyà te Hirusalim. Mibperumeey key ki Bernabe ne miduma ku red dema si Tito.

<sup>2</sup> Iyan ku kinelived diyà su impayag te Eleteala kedi se ebpendiyan a su edseysayen ku kandan te minge mibperetiyya riyà ke penurù ku rut te meupiya ne Tudtul diyà te kenà minge Hudiyanen. Nekeuma key riyà ne ke minge unuten te minge mibperetiyya ne miburun ku, su mid-una ku te edseysey kandan ini se Meupiya ne Tudtul ne impenurù ku su apey ku egketueni ke nesebutan dan ini etawa warà. Su embiya warà dan mesebuti, ne iring te ini se migelevek ku wey ke kebpenurù ku riyà te minge etew ne kenà Hudiyanen ne warà atag din.

<sup>3</sup> Ne ketà ne migkiyug ke minge unuten ne metidtu ini. Su misan ke kebpenurù ku ne ini se etew ne kenà Hudiyanen ne mibperetiyya ki Hisus ne kenà ebpehesen te eduma rut te penduan te minge Hudiyanen, ne migkiyug dan ne benar. Misana kenà Hudiyanen ini se ruma ku si Tito, ne warà dan pehesa te ed-etus iring dut te nekahi te penduan ne intahak kandan ni Moises.

<sup>4</sup> Ugaid ne ruen ruma ne minge Hudiyanen ne midtelavuk ne uvag kun se mibperetiyya ran en ki Hisus ne migkahi te iyan iya se ed-etusan sikandin. Iyan kinetelavuk dan su apey ran ebpenitipi embiya sikami se mibperetiyya ki Hisus se eduma red te penduan ni Moises. Su iyan dan igkesuat ne ebpekeruma key pà kayi te penduan ni Moises misan impeliyu key ni Hisu Kristu ne kenà en arà se penduan ne edumaan ta.

<sup>5</sup> Ugaid ne warà key meduma te misan deisek dà dut te kiyug dan, su iyan dey kiyug ne warà tarù ne ibpenurù ne ebpekesalet dut te benar ne Meupiya ne Tudtul ne impenurù ku keniyu.

<sup>6</sup> Wey merineg dut te minge unuten te mibperetiyya en ki Hisus arà se penurù ku, ne warà insawey ran. Ugaid ne misan sikandan se ibpetindeg ne egkeunuten diyà te minge ruma ran, ne netueanan ku ne riyà te etuvangan te Eleteala ne warà ebiraan din su warà ibpelabi te Eleteala te ruma.

<sup>7</sup> Benar, ne warà insawey ran te impenurù ku. Su riyà te itungan dan ne insarig kedi te Eleteala te ebmandù dut te Meupiya ne Tudtul mekeatag ki Hisus riyà te minge etew ne kenà Hudiyanen, iring dut te kinesarig din ki Pedro pehaney te ebpenurù mekeatag ki Hisus riyà te minge Hudiyanen.

<sup>8</sup> Su sabap dut te gehem te Eleteala ne midsuhù din si Pedro te ebpesabut dut te Meupiya ne Tudtul riyà te minge etew ne Hudiyanen. Ne iring ded dema ketà se kinesuhù din kedi te ebpesabut dut te Meupiya ne Tudtul riyà te minge etew ne kenà Hudiyanen.

<sup>9</sup> Si Santiago, si Pedro wey si Juan, arà se minge unuten riyà te Hirusalim, ne netueanan dan ne ini se helevek ku ne insarig te Eleteala kedi. Ne neumpung key langun te siaken ki Bernabe ne riyà ibpepesabut ke Meupiya ne Tudtul te minge etew ne kenà Hudiyanen, ne sikandan se ebpepesabut dut te Meupiya ne Tudtul diyà te minge Hudiyanen. Ketà be ne mibpekemkemustaey key ne tuus te telteleduma key te edtuman te kiyug te Eleteala.

<sup>10</sup> Ne iyan den dà mibuyù kenami se edtevangan dey ke minge mibperetiyya en ne ayuayu. Ne arà en iya rema ke netahù te hinawa ku.

*Midsewayan ni Pablo si Pedro diyà te Antiyuka*

<sup>11</sup> Ne guna su nekeuma si Pedro riyà te inged ne Antiyuka, ne ruen mid-ulaula rin ne kenà meupiya. Tembù be midsewayan ku sikandin diyà te etuvangan te menge etew.

<sup>12</sup> Su aney ne nekeuma sikandin ne meupiya se mid-ulaula rin su mibpekidtuhen te egkaan rut te menge mibperetiyaya ne kenà Hudiyanen. Ugaid ne wey mekeuma ke menge mibperetiyaya ne Hudiyanen ne midsuhù ni Santiago, ne mid-engked si Pedro se egkaan ne ebpekidtuhen dut te kenà Hudiyanen su neandek ke ruen idsawey kandin dut te menge ruma rin ne Hudiyanen. Su ke betasan dan ne kenà dan ebpekid-amur dut te menge etew ne kenà Hudiyanen ne warà etusi.

<sup>13</sup> Tembù be ruen ruma ne Hudiyanen ne mibperetiyaya en riyà te Antiyuka ne miduma te ulaula ni Pedro su neandek dan. Misan si Bernabe ne elin neandek ne mid-engked se ebpekidtuhen te egkaan dut te menge mibperetiyaya en ne kenà Hudiyanen.

<sup>14</sup> Ne wey ku metueni se kenà dan edumaan ke benar ne penurù te Meupiya ne Tudtul ne migkehiyan ku si Pedro diyà te etuvangan te langun ne menge etew te, "Misan tidtu ka ne Hudiyanen ne iring ka te kenà, su mid-engked ka te betasan te ruen idsawey kenà ebpekidtuhen te egkaan te menge etew ne kenà Hudiyanen. Ne embiya Hudiyanen ka se kenà eduma te penduan tew te menge Hudiyanen, ne meambe ke ebpehesen nu ke kenà menge Hudiyanen te eduma ketà?"

*Ke menge Hudiyanen wey ke Kenà menge Hudiyanen ne Ebpekeliyu te Kedusa te Salà dan Ibpepeyaya te Kebperetiyaya Ran ki Hisus*

<sup>15</sup> Ne midlaus a te egkahi te, "Sikami ne Hudiyanen, nesebutan dey te penduan te Eleteala. Kenà key iring dut te kenà menge Hudiyanen.

<sup>16</sup> Ugaid ne netuenan dey ne kenà ini se keduma rey te penduan se ralan te kebmetidtu rey riyà te etuvangan te Eleteala. Ugaid ne sabap dut te kedsarig dey ki Hisu Kristu se kebmetidtu rey riyà te etuvangan te Eleteala. Tembù be misan Hudiyanen key ne kenà ke penduan ne intahak ki Moises se edserihan dey, ugaid ne sabap dut te kedsarig dey ki Hisu Kristu ne mibmetidtu key riyà te etuvangan te Eleteala. Su netuenan dey se warà etew iya ne ebmetidtu te eduma rut te penduan ne intahak ni Moises.

<sup>17</sup> "Na, geina te ini se kebperetiyaya rey ki Hisu Kristu se edserihan dey ne ebmetidtu key riyà te etuvangan te Eleteala, ne ruen menge etew ne egkahi te nekedsalà key kun iring dut te kenà menge Hudiyanen. Tembù be ed-isuhat dan ki Hisu Kristu su sabap dut te ini se sarig dey kandin. Ugaid ne kenà iya salà ini!

<sup>18</sup> Su iyan tidtu ne salà embiya edlived e red dut te impenurù ku rengan ne iyan iya se edumaan ta te penduan ne intahak ki Moises su apey kiyu ebmetidtu riyà te etuvangan te Eleteala.

<sup>19</sup> Su netuenan ku ne kenà a ebmetidtu diyà te etuvangan din sabap dut te keduma ku te penduan ni Moises. Tembù be mid-engkeran ku ke keduma ku rut te penduan su apey ke kiyug dà te Eleteala se edumaan ku.

<sup>20</sup> Ne sabap dut te kinesarig kud ki Hisus ne iring te nekeamung ad te kinepatey rin diyà te pinebelavag ne kayu. Su ingenat ketà ne kenà ke kiyug ku se edwayawayà kedi, ugaid ne ke kiyug ni Hisu Kristu su sikandin se ed-ubpà kayi te hinawa ku. Ne taman te kayi e pad ed-ubpà te ampew te dunya ne idtepeney ku ke umur ku te edtuman dut te kiyug ni Hisus ke Anak te Eleteala ne egkelimù kedi ne midselidig kedi te kebpatay.

<sup>21</sup> Su embiya edlived e red te keduma rut te penduan ne intahak ki Moises, ne ed-iniyug a te tavang te Eleteala ne midtelimà ku pehaney. Su embiya iyan kebmetidtu te etew ne eduma dut te penduan ni Moises, ne warà en pantag din ke kinepatey ni Hisus."

### 3

*Ke Kedsarig te menge Etew ki Hisus ne Iyan Ebpekiyu Kandan te Kedusa dut te Salà dan*

<sup>1</sup> Ala! Sikiyu ne menge etew riyà te Gelasiya, iring te warà itungan niyu! Meambe ke mibpeming kew ketà te kebpenurù te menge etew ne ibpekesuway niyu rut te benar ne impenurù ku keniyyu? Su mibpetuntayan kud te kebpenurù keniyyu mekeatag te kinepebpatay ni Hisus.

<sup>2</sup> Duen id-insà ku keniyyu. Menu, iyan niyu kinetelimà dut te Kedesenan ne Ebpetuntul te Menusiya su ke miduma kew rut te penduan ne intahak ni Moises? Kenà en iya! Ugaid ne iyan kinevehey rut te Eleteala ketà te Kedesenan ne Ebpetuntul te Menusiya ne atag dut te nerineg niyu ke Meupiya ne Tudtul ki Hisu Kristu ne mibperetiyaya niyu en.

<sup>3</sup> Sikiyu iya maa se menge etew ne warà rantek din! Su ke aney en ne mibperetiyaya kew ki Hisus, ne midsarig kew rut te Kedesenan ne Ebpetuntul te Menusiya te edtavang

keniyu. Ugaid ne gunteani ne kunaan niyu ke ketà kew en ebmetidtu te eduma rut te penduan ne intahak ni Moises.

<sup>4</sup> Menu, warà atag din ke langun ne penaub te Eleteala ne imbehey keniyu gewii te midsarig kew kandin? Duen iya!

<sup>5</sup> Meambe ke imbehey keniyu te Eleteala Ke Kedesenan ne Ebpetuntul te Menusiyà? Ne endei mibpuun ke menge geyip ne mid-ulaula rin keniyu? Kenà en iya arà sabap dut te kineruma niyu te penduan ni Moises, ugaid ne sabap dut te nerineg niyu ke Meupiya ne Tudtul mekeatag ki Hisus ne mibperetiyya niyu en.

<sup>6</sup> Id-upama ku ini ne iring dut te nekahi te insurat te Lalag te Eleteala mekeatag ki Abraham ke keep-epuan tew rengan. “Mibperetiyya iya si Abraham dut te ingkahi kandin te Eleteala ne egenat ketà se kebperetiyya rin ne midtelimà din ne mibmetidtu sikandin riyà te etuvangan te Eleteala.”

<sup>7</sup> Tembù be netueanan tew te langun ne menge etew ne mibperetiyya en te Lalag te Eleteala iring ki Abraham, ne sikandan se ebelayen te Eleteala ne iring te in-enakan ni Abraham su apey ran egkevehayi dut te impasad te Eleteala ki Abraham.

<sup>8</sup> Su ruen Lalag te Eleteala rengan ne impesurat din te misan ke menge etew ne kenà Hudiyenen ne ebelayen din ne ebmetidtu embiya edsarig dan kandin. Mibpeketuenan din ki Abraham ini se Meupiya ne Tudtul se egkahi te, “Ibpepevayà keykew ne edtevangen ku ke langun ne etew kayi te ampew te dunya,” ke se Eleteala.

<sup>9</sup> Ne benar iya ne midtevangen te Eleteala si Abraham su mibperetiyya sikandin dut te langun ne ingkahi te Eleteala kandin. Ne engketà ded dema embiya ebperetiyya ki iring kandin, ne edtevangen ki te Eleteala.

<sup>10</sup> Ugaid ke langun ne menge etew ne iyan dan edserihan te kebmetidtu ran te edtuman dut te penduan ni Moises, ne nekukum dan en te kedusa te Eleteala. Su ruen impesurat ne Lalag te Eleteala ne egkahi te, “Langun ne menge etew ne kenà edtuman dut te langun ne penduan ni Moises, ne edusaan te Eleteala.”

<sup>11</sup> Ketà be ne netueanan ta te warà senge etew rà ne metidtu diyà te etuvangan te Eleteala igenat te kinetuman din dut te penduan ni Moises. Su ruen impesurat ne Lalag te Eleteala ne egkahi te, “Ke etew ne egkevaluy ne metidtu riyà te etuvangan te Eleteala ne ke etew ne ebperetiyya rut te Lalag te Eleteala, ne sikandin ne egkevehayan te umur ne warà edtemanan din.”

<sup>12</sup> Su kenà ke kedsarig tew rut te penduan ni Moises se ibmetidtu tew riyà te etuvangan te Eleteala, ugaid ne ke kedduman ta rut te penduan. Su ruen impesurat ne Lalag te Eleteala ne egkahi te, “Ke etew ne edsarig dut te penduan ni Moises ne iyan iya se edtumanen din ke langun ketà su apey egkevehayan te umur ne warà edtemanan din.”

<sup>13</sup> Ugaid ne impeliyu ki en ni Hisus Kristu su apey ki kenà edusaan su sabap te kenà ki ebpekegaga ne edtuman dut te langun kayi ne penduan. Impeliyu ki en ni Hisus su sikandin ke nerasey dut te kedusa keyta su migaked din ke kerusaan ta ketà te inlansang sikandin diyà te pinebelavag ne kayu. Su ruen impesurat ne Lalag te Eleteala ne egkahi te, “Misan engkey en ne etew ne mid-imetayan ne ibitin dut te pinebelavag ne kayu, ne tuus arà te merasey ne kedusa te Eleteala.”

<sup>14</sup> Ibpepevayà te kegaked ni Hisus Kristu te kerusaan ta ne arà se tavang ne impasad te Eleteala ki Abraham dengan ne nekeuma en diyà te langun ne menge etew misan kenà dan Hudiyenen su apey ki ebpekettelimà dut te Kedesenan ne Ebpetuntul te Menusiyà ne impasad te Eleteala dut te langun ne menge etew ne ebperetiyya.

*Ke Tavang ne Impasad te Eleteala ne Muna pà dut te Penduan Din*

<sup>15</sup> Menge suled ku, ruen idsempità ku keniyu. Embiya ruen deruwa ne etew ne ebaal te pasad dan, ne kenà en egkepakey ne edsembian embiya nekesur en ke ngaran dan. Warà etew ne ebpekesambi ketà, ne warà etew ne edwaraan din.

<sup>16</sup> Ini se sempità ku ne iring dut te Eleteala su ruen impasad din ki Abraham wey riyà te senge etew ne inenakan din. Kenà diyà te langun ne inenakan ni Abraham arà te impasad te Eleteala, ugaid ne riyà te senge etew te inenakan din ne si Hisus Kristu.

<sup>17</sup> Ini se ibpesabut ku keniyu kayi te sempitaku. Duen impasad te Eleteala ki Abraham dengan ne edtevangen din ke langun ne menge etew egenat te senge etew ne inenakan ni Abraham. Guna su neked-epat nehatus wey tetelu nepulù en ne rahun ne arà pà ne impesurat te Eleteala ke penduan ne intahak ki Moises rut te langun ne menge Hudiyenen. Ugaid ne misan duen en ke penduan din ne intahak ki Moises, ne ini se impasad din ki Abraham ne kenà egkewarà su midtelimà dan ke pasad. Su kenà egkepakey ne ini se impasad din ne kenà din edtumanen.

<sup>18</sup> Ugaid ne upama ini, embiya arà se impasad te Eleteala ne ibehey rin ki Abraham su egenat te keduma ni Abraham te penduan ne intahak ki Moises, ne arà se tavang ne

impasad din ne warà atag din. Ugaid ne kenà iring ketà su arà se impasad te Eleteala ne ibehey rin ki Abraham, ne imbehey rin dà dè duen su impasad din.

*Imbehey te Eleteala ke penduan din Impepevayà dut te Menge Suluhuen Din ne riyà ebpuun Te Langit su Tuus te Kenà utew Beripantag dut te Impasad din*

<sup>19</sup> Embiya ve iring en ketà, ne engkey se atag te imbehey rin ke penduan? Idtarem ku keniyu. Guna su ingkevehey en te Eleteala ke pasad din ki Abraham ne mid-umanan din pà ke penduan din ki Moises su apey egketueni rut te langun ne etew se edusaan din sikandan dut te salà dan. Ugaid ne ke keuhet te keduma ran dut te penduan ni Moises ne taman te ebpekeuma si Hisu Kristu ke senge etew ne inenakan ni Abraham ke impasad te Eleteala. Guna su imbehey te Eleteala ke penduan, ne impepevayà din dut te menge suluhuen din ne riyà ebpuun te langit ne ebehey riyà te ki Moises. Ne si Moises ne nevaluy ne tehutau su sikandin se mibpesabut dut te menge Hudiyänen.

<sup>20</sup> Ugaid ne ketà te hewii ne imbehey en te Eleteala ke impasad din ki Abraham, ne warè en tehutau su sikandin en iya ke midtarem.

*Ruen Atag dut te Penduan ni Moises te Ebantey te menge Etew su apey ran kenà Ed-ulaula te Meraat*

<sup>21</sup> Kenà niyu pegitunga ne kayi te penduan te Eleteala ne midwarà din en ke impasad din. Kenà iring ketà! Su embiya ma ruen penduan ne ebpekevehey keyta te umur ne warà edtemanan din, ne arà en ke dalan te kebmetidtu tew riyà te etuvangan te Eleteala.

<sup>22</sup> Ugaid ne kenà egkepakey su ruen impesurat te Lalag te Eleteala ne egkahi te, "Warà etew kayi te ampew te dunya ne warà salà din su langun ne neiketan dut te salà din." Ne benar arà. Ugaid ne egenat dut te sarig dan ki Hisu Kristu, ne egkevehayan dan te tavang ne impasad te Eleteala ne ini se umur ne warà edtemanan din.

<sup>23</sup> Dut te warà pà mekeuma ke hewii ne edsarig ke menge etew ki Hisu Kristu su apey ran egkevehayan te umur ne warà edtemanan din, ne iring ki te nevilanggù su neruhen ki rut te penduan ni Moises su apey ki kenà ed-ulaula te meraat. Ne neruhen ki ketà te penduan taman te nekeuma ke hewii ne impekita te Eleteala te si Hisu Kristu ke edserihan tew.

<sup>24</sup> Tembù be ke penduan ni Moises se mibantey rut te menge etew su apey ran egkesebuti ke engkey se salà taman te nekeuma si Hisu Kristu kayi te ampew te dunya. Nekeuma sikandin ne ruen en ralan te ebmetidtu ke menge etew riyà te etuvangan din su sabap dut te kedsarig dan ki Hisus.

<sup>25</sup> Na gunteani te ini en si Hisus ne midsarig ki en kandin, ne warà en atag dut te penduan ne ebantey keyta.

*Langun ne Menge Etew ne tidtu ne Mibperetiyya en ki Hisu Kristu ne Nevaluy ne menge Anak te Eleteala*

<sup>26</sup> Ketà be ne egenat te sarig niyu ki Hisus ne nevaluy kew rema ne anak te Eleteala.

<sup>27</sup> Su mibperetiyya kew en ki Hisus ne mibpebunyang kew en tuus te miduma kew kandin. Tembù be ke ralan te ked-ubpà niyu guntaan ne ruen en ulaula niyu ne iring kandin.

<sup>28</sup> Su ke menge etew ne mibperetiyya en, ne warà ebraan din diyà te etuvangan te Eleteala ke menge etew ne Hudiyänen wey ke kenà Hudiyänen. Warà biraan din ke etew ne uripen wey ke etew ne kenà. Warà biraan din ke meama wey ke meritan. Su riyà te etuvangan te Eleteala ne midserepeng langun su sabap dut te kedsarig dan ki Hisus.

<sup>29</sup> Su embiya tidtu kew ne mibpekidseveka ki Hisus, ne nevaluy kew ne iring te inenaken ni Abraham ne ebpekeamung kew rema te edtelimà dut te impasad te Eleteala kandin.

## 4

*Sempità ne Id-upama te ruen Helevek dut te Penduan ni Moises Taman te nekeuma en si Hisus Kayi te ampew te Dunya*

<sup>1</sup> Id-upama ku ini se penduan ni Moises. Iring te anak dut te kewasa ne etew ne minatey en, ne sikandin se egkemuney rut te langun ne tamuk te amey rin. Ugaid ne embiya deisek pà sikandin ne iring te uripen dà misan sikandin ke kemuney, su warà pà kewaris din.

<sup>2</sup> Iring te uripen dà sikandin su ruen midtepenayan te amey rin ne egaat kandin wey ebantey te tamuk din taman te egkeuma arà se mibpetedtavan din.

<sup>3</sup> Ne ebpekeiring kiyu be ketà. Taman te nekeuma en si Hisus ne nesebutan dey ke benar, ne iring kiyu te batà pà. Su uripen ki rut te betasan te keep-eupan tew te ebpekesuhat te hinawa rut te tumitimà kayi te ampew te dunya.

<sup>4</sup> Ugaid ne wey mekeuma ke hewii ne mibpetedtavan te Eleteala rengan, ne midsuhù din ke Anak din kayi te ampew te dunya ne pinebaluy ne etew. Su ibpeanak din si Hisus te senge etew ne meritan ne Hudiyanen ne miduma sikandin dut te penduan te menge Hudiyanen ne intahak ki Moises

<sup>5</sup> su apew sikandin se ebpeleyu keyta rut te penduan ni Moises ne nekeruhen keyta, ne ketà ne egkepakey ne egkevaluy kiyu en ne menge anak te Eleteala.

<sup>6</sup> Ne ketà te nevaluy kew en guntaani ne anak te Eleteala, ne midsuhù din en ke Kedeseenan ne Ebpetuntul te Menusiya su ebpeubpaan din diyà te hinawa niyu. Ne egkepakey en ne ed-Amey kew te Eleteala ketà te kebpengeningeni niyu.

<sup>7</sup> Su kenà kew en iring te uripen, ugaid ne anak kew te Eleteala. Na geina ve ne ne anak kew en nikandin, ne ebpeketelimà kew rema rut te langun ne ibehey rin dut te anak din.

*Neuru si Pablo su atag dut te Ulaula te Menge etew diyà te Inged ne Gelasiya*

<sup>8</sup> Rengan te warà niyu pà metueni ke tidtu ne Eleteala, ne mibpengunguripen kew rut te ebperetiayaan niyu ne tumitimà ne kenà tidtu ne Eleteala.

<sup>9</sup> Ugaid ne gunteani te netuen niyu en ke tidtu ne Eleteala, ne netuen kew rin en dema, ne meambe ke egkiyug kew ne edlived ne eduma ketà te kiyug dut te tumitimà ne warà gehem din te ebpeleyu keykew? Meambe ke egkiyug kew te edlived ne uripen din?

<sup>10</sup> Iring te midteligkuran niyu ke Eleteala ne iyan niyu en edumaan ke kedtanud rut te menge Hudiyanen iring te kedtanud dan te menge hewii, ke behu ne sevang, wey ke irerahun.

<sup>11</sup> Embiya ini se ed-ul-ulaan niyu ne egkeuru a nevenar, su iring te warà atag din ke langun ne impenurù ku keniyu.

<sup>12</sup> Menge suled ku, iyan ku ebpemuyuen ne ed-iring kew te ulaula ku. Su misan Hudiyanen a, ne egenat te kedsarig ku ki Hisus ne warà ad meduma rut te keytew ne penduan ne intahak ki Moises, su nevaluy a ne iring keniyu te kenà menge Hudiyanen ne kenà eduma rut te penduan te menge Hudiyanen. Kenà ku egkelipatan ke meupiya ne mid-ulaula niyu kedì dut te riyana te keniyu.

<sup>13</sup> Ne egketenuran niyu ke aney en ne kinependiyà ku ne ruen sakit ku ketà, tembù be impenuru ku ke Meupiya ne Tudtul keniyu.

<sup>14</sup> Ne misan merehen en keniyu su atag dut te mepasang ne sakit ku, ne warà a nikiyu sudii, ne warà a nikiyu pinedtarey, ugaid ne midtulengeran a nikiyu. Su midtelimà a nikiyu iring te suluhuen te Eleteala riyà te langit. Uya, midtelimà a nikiyu iring dut te kinetelimà niyu ki Hisu Kristu.

<sup>15</sup> Kenà ku igkesempità ke kinekehalew niyu te keniyana. Netueanan ku ne embiya egkepakey rà ne edlesikan ke mata niyu su idsambi kayi te mata ku ne arà se ed-ul-ulaan niyu. Ugaid ne gunteani ne meambe ke iring te nesembian ke hinawa niyu?

<sup>16</sup> Menu iyan niyu egkepegitung ne kunterà a nikiyu su atag dut te migkehiyan ku sikiyu te benar?

<sup>17</sup> Ne arà se menge etew ne mibpenurù keniyu te ebperumaan kew rut te penduan ni Moises, ne melana ke lagag dan su apew kew meunggi, ugaid ne kenà meupiya se pegungayà dan diyà te keniyu. Su iyan den dà egkiyuhan te ederaat ini se kegkeseveka te hinawa tew su apew kew riyà mekeruma te kandan.

<sup>18</sup> Ne meupiya ke ruen ebpekita te inesa ran keniyu embiya meupiya rema ke pegungayà dan, misan ketà te lius ku en.

<sup>19</sup> Menge anak ku egenat dut te ebperetiayaan ta, ne mibmesakit ke hinawa ku su atag dut te ed-ul-ulaan niyu. Embiya idsempità ta ini se kebmesakit, ne iring dut te meritan ne egeram en te belilit. Su iring ketà se kedrehehi ku gewii te edtehad a te keduma niyu en nevenar rut te ulaula ni Hisu Kristu.

<sup>20</sup> Iyan ku perem kiyug ne ebpeketuney a keniyana te keniyu ebpekibitiyara. Su iring beneng te merehen kayi te kedsarig ku ke engkey se dait ne egkehiyan ku su kegkeuru ku keniyu.

*Sempità ne Id-upama te Deruwa ne Pasad te Eleteala*

<sup>21</sup> Na sikiyu ne menge etew ne egkiyug ne eduma rut te penduan ni Moises, ne maa egkesebutan niyu ke nekahi rut te penduan? Pemineha niyu su igkahi ku keniyu.

<sup>22</sup> Su riyà te impesurat ne Lagag te Eleteala ne ruen guhud mekeatag te deruwa ne anak ne meama ni Abraham. Ini se seveka ne anak din ne in-anak dut te uripen din ne



meritan ne mid-esawa rin, si Hagar. Ne ke seveka ne in-anak ni Sara, ke esawa rin ne kenà uripen.

<sup>23</sup> Ini se seveka ne anak din ne in-anak dut te esawa rin ne uripen, ne warà ebiraan din dut te andang ne ralan te ked-anak. Ugaid ne ke seveka ne in-anak te esawa rin ne kenà uripen, ne warà in-anak embiya kenà impasad te Eleteala su lukes en.

<sup>24</sup> Ini se miguhud ku ne iring te sempità su ke deruwa ne meritan ne iring dut te deruwa ne pasad te Eleteala kayi te menge etew. Ke seveka ne pasad te Eleteala ne iyan din in-upama ne si Hagar su uripen sikandin. Ne ini se pasad din ne imbehey te Eleteala riya te buvungan ne ed-ingaranan te Sinay su arà imbe ke inged dut te kinevehay te Eleteala rut te penduan ne intahak ki Moises. Ne langun ne etew ne eduma ketà ne iring te uripen.

<sup>25</sup> Ini se buvungan ne Sinay ne riya te lusud te inged ne Erabiya ne arà imbe rema ke ed-ingaranan dan te Hagar dut te menge etew ketà. Ne ke menge etew ne in-upama se uripen ne ke menge Hudiyanen su uripen si Hagar abpeg dut te langun ne inenaken din, ne langun ne menge etew ne eduma rut te penduan ne intahak ki Moises ne nengeuripen en.

<sup>26</sup> Ugaid ne ke esawa ni Abraham, si Sarah, ne kenà uripen, ne sikandin imbe ke mid-upemaan dut te pasad te Eleteala ne imbehey rin ne egkahi te edtevangen din ke menge etew ne ebperetiya. Ne langun tew ne mibperetiya en ki Hisus ne iring te menge inenakan dut te ini se meritan ne kenà uripen su kenà kiyu uripen dut te penduan ni Moises.

<sup>27</sup> Su ruen impesurat ne Lalag te Eleteala ne egkahi te,  
 “Kehalew ka ne meritan ne warà mekepevaya te ked-anak!  
 Misan kenà ka ed-anak, ne dereg-ey ka!  
 Su misan mid-ewaan ka rut te esawa nu,  
 ne iyan pà merakel se anak nu  
 dut te meritan ne warà ewai te esawa rin.”

<sup>28</sup> Ne arà be menge suled ku, sikitew ne mibperetiya en dut te impasad te Eleteala ne menge anak din en. Ne iring kiyu ki Isaac, ne in-anak ni Sara, su sikandin ke anak ne impasad te Eleteala ki Abraham.

<sup>29</sup> Ugaid ne ketà te hewii rengan, ne ini se anak ni Abraham ne in-anak te tavang dut te Kedeseenan ne Ebpetuntul te Menusiya ne midrasey dut te kakey rin, ke in-anak te kiyug te menusiya. Ne iring ded guntean, edresayen kiyu rut te menge etew ne mibpeuripen dut te kedtanud te penduan ni Moises.

<sup>30</sup> Ugaid ne engkey se nekahi rut te impesurat ne Lalag te Eleteala? Iyan migkahi te Eleteala ki Abraham ne, “Ipeawa nu ke uripen wey ke anak din, su kenà egkepakey ne ke anak te uripen se ebpekehaked dut te tamuk te amey rin. Su iyan dà ebpekehaked ne ke anak dut te kenà uripen.”

<sup>31</sup> Ketà be menge suled ku, netuenan ta te kenà ki iring ketà te anak dut te uripen, su iyan tew egkeiringan ke anak dut te kenà uripen.

## 5

*Sikitew ne Mibperetiya en ne kenà en egkepenguripen dut te Penduan ni Moises su nekeliyu ki en*

<sup>1</sup> Kenà kiyu en uripen dut te penduan ne intahak ni Moises, su nekeliyu kiyu en. Kenà niyu lipati ini ne itindehi niyu su apey kew kenà mekelived te kegkeuripen dut te penduan.

<sup>2</sup> Pekeluaha niyu ke telinga niyu kayi se egkehiyen ku. Embiya ini se ked-etusi keniyu ne nekahi rut te penduan te iyan niyu edserihan su apey kew ebmetidtu diya te etuvangan te Eleteala, ne warà atag din ke kebperetiya niyu ki Hisus Kristu.

<sup>3</sup> Ne edseupan ku pà maa te egkahi te embiya ruen etew ne edsarig te kinepeetus din su iyan ibmetidtu rin diya te etuvangan te Eleteala, ne rumai rin ke langun ne nekesurat dut te penduan.

<sup>4</sup> Ne misan engkey keniyu se kunaan din ke ebmetidtu sikandin diya te etuvangan te Eleteala dut te keduma rin te penduan ni Moises, ne mid-iniyug en sikandin ki Hisus Kristu, ne kenà sikandin igkeamung dut te tavang te Eleteala te kebpekeliyu te menge etew.

<sup>5</sup> Ugaid sikami mulà, ne iyan dey egkepenareng ne kebmetidtu rey riya te etuvangan te Eleteala sabap dut te kedsarig dey ki Hisus Kristu, ne ke Kedeseenan ne Ebpetuntul te Menusiya se edtavang kenami gewii te edteharan dey te edtuman en.

<sup>6</sup> Su embiya egkeseveka ki ki Hisu Kristu, ne kenà ke kebpeetus ta etawa ke kenà ta kebpeetus se dalan ne ebmetidtu key riyà te etuvangan te Eleteala. Ugaid ne iyan kiyug te Eleteala ne ibpekita ta te benar se kedsarig tew ibpepevyà te kebpeelimimuey.

<sup>7</sup> Pehaney ne ke keduma niyu ki Hisu Kristu ne meupiya. Ugaid ne gunteani ne engkey se mibaal te nesalin ke hinawa niyu su apey kew kenà en eduma rut te benar ne penurù?

<sup>8</sup> Ini se kinesuwey niyu rut te benar ne penurù ne kenà ebpuun te Eleteala ne mibpemili keniyu te eduma kandin.

<sup>9</sup> Uram kew su misan deisek ke tarù ne penduan ne ebpekeeneb dut te langun ne itungan niyu. Su iring te beseanan ne egkahi te, "Misan ibukbuk niyu ke reisek dà ne pelevag dut te tapung ne ebeelan ne pan, ne langun ketà ne edlevag."

<sup>10</sup> Ugaid ne dekelà se sarig ku te egenat te mibpekidseveka ki ki Hisus ke Kerenan tew ne edlived kew red te eduma rut te benar ne penurù din. Ne arà iya se menge etew ne edlived te itungan niyu egenat te penurù ne kenà benar, ne edusaan te Eleteala.

<sup>11</sup> Menge suled, duen dema menge etew ne migkahi te warà ku meengkeri te ebpenurù te iyan iya se ebpeetusan ki su apey kiyu ebmetidtu riyà te etuvangan te Eleteala. Ugaid ne kenà benar arà, su embiya benar ne kenà e red edresayen dut te menge ruma ku ne Hudiyanan atag dut te penurù ku mekeatag te kinepatey ni Hisu Kristu riyà te pinebelavag ne kayu. Ne geina te kenà a ebpenurù te sikitew ne ebpeetusan, ne ingkepes a nikandan.

<sup>12</sup> Iyan se menge etew ne edlived te itungan niyu rut te kebpenurù dan te kebperumaa keniyu dut te penduan ni Moises, ne kiyug ku perem ne egkepitass dan en diyà te keniyu!

<sup>13</sup> Menge suled ku, mibpemili kew te Eleteala su apey kew ebpekeliyu rut te keduma niyu te penduan ni Moises. Ne misan nekeliyu kew en ketà, ne kenà niyu iyan idtahù te hinawa te egkepakey ne eduma kew rut te misan engkey ne egkiyuhan niyu. Iyan pà mentag se iyan niyu ipeiseg ke kebpetebtevangay niyu su sabap dut te kebpeelimimuey niyu.

<sup>14</sup> Su ke langun ne menge penduan ne intahak ni Moises ne nevagkes kayi te seveka ne penduan ne egkahi te, "Ikelimù nu ke ruma ne etew iring dut te kegkelimù nu te hinawa nu."

<sup>15</sup> Ugaid ne embiya iring kew te asu ne ebpekegkehatey su sabap dut te ebpekedlewanà kew, ne urami niyu ke ebpekereraat kew rut te kedseveka te hinawa niyu te keduma ki Hisus.

*Ke Kiyug dut te Kedeseanan ne Ebpetuntul te Menusiya te Ed-ul-ulaan te Menge Etew ne Nekebira dut te Egkiyuhan ne Ed-ul-ulaan te Menge Etew*

<sup>16</sup> Iyan ku egkehiyen ne iyan niyu pekemala te hinawa niyu ke Kedeseanan ne Ebpetuntul te Menusiya su apey kew kenà egkepeneheewit dut te kiyug te kemenusiya.

<sup>17</sup> Su ke kiyug te kemenusiya wey ke kiyug rut te Kedeseanan ne Ebpetuntul te Menusiya ne kenà ebpekedsebutà. Su egkunterà dan, tembù be egkeliyalia se hinawa tew ne kenà tew egkeveelan ke egkiyuhan tew ne meupiya.

<sup>18</sup> Ugaid ne embiya egkepeneheewit ki rut te Kedeseanan ne Ebpetuntul te Menusiya, ne kenà ki egkesakup rut te penduan ne intahak ki Moises.

<sup>19</sup> Melemu ta ne egkekilala ke ulaula ne egenat te kiyug te kemenusiya su edlangkadlangkad te esawa ran, egkiyugà dan, meredsik ke perangey ran,

<sup>20</sup> ebpegarap dan te kenà tidtu ne Eleteala, edlambus te ruma ran, ebpekunkuntereey ran, ebpelewelewaney ran, ebpepengelikurey ran, ebperengrengitey ran, iyan den dà egkepegitung ke kandan ne hinawa, ebpetintindehey ran ne kenà dan edtevangangan ke ruma ran,

<sup>21</sup> imaan dan, pelehubug dan, ne ed-ulaula te piya engkey ne egkiyuhan dan, wey ruma pà ne meraat ne ulaula ne iring ketà. Ingkahi ku en ini pehaney ne gunteani maa ne ibaag kud keniyu te ke etew ne ebpegula-ula te iring kayi ne kenà dan ebpekeamung dut te Edetuan te Eleteala.

<sup>22</sup> Melemu tew rema ne egkekilala ke ulaula te etew ne egkepeneheewit dut te Kedeseanan ne Ebpetuntul te Menusiya. Su ke etew ne egkepeneheewit te Kedeseanan ne Ebpetuntul te Menusiya ne melimù te ruma rin, mehalew sikandin, melintad se hinawa rin, metigker te ruma rin, metiyakapen te ruma rin, metulanged te ruma rin, egkeserihan te ruma ne etew,

<sup>23</sup> mepeembavà ke hinawa rin te ruma rin, ne ruen kedtigker din te hinawa rin. Embiya ini se ed-ul-ulaan din, ne warà penduan te Eleteala ne egkesurang din.

<sup>24</sup> Su ke etew ne tidtu se kebpesakup din ki Hisu Kristu, ne mid-awaan din ke langun ne meraat ne mid-ulaula rin dengan, su apey kenà en eduma rut te kiyug te lawa rin.

<sup>25</sup> Ne geina te mibehayan ki te behu ne umur dut te Kedesenan ne Ebpetuntul te Menusiya, ne iyan iya se ibehay ta ke hinawa ta kandin te iyan ebayabayà.

<sup>26</sup> Iyan iya se kenà kiyu ebpereyüdeyü, ne kenà kiyu melemu ne egkepes, ne kenà kiyu ebpepengelikurey.

## 6

### *Ebpetebvangey Kiyu*

<sup>1</sup> Menge suled, embiya ruen дума niyu ne mibperetiya en ne egkekita niyu se ed-ulaula te meraat, ne sikiyu se nepeneheewit dut te kegkamal te Kedesenan ne Ebpetuntul te Menusiya ne tevangi niyu sikandin te ebpetuntey su apey mekeuli ded sikandin te ul-ulaan te meupiya. Ugaid ne menanew se kebpetuntey niyu kandin, ne uram kew su kema ke sikiyu se ebpeked-ulaula te iring ketà.

<sup>2</sup> Ne sikiyu ne menge mibperetiya ne petebtevangey kew te ebpeneheewit dut te keduma niyu ki Hisus. Su embiya ini se ed-ul-ulaan niyu ne edumaan niyu ke suhù ni Hisu Kristu ne egkahi te pelimlimuey kew.

<sup>3</sup> Embiya ruen etew ne ebpegitung te sikandin mulà ne kenà beledtila, ne midlimbungan din se hinawa rin.

<sup>4</sup> Uman senge etew ne pegpegitunga rin se kandin ne mid-ulaula. Su embiya id-amin din ke hinawa rin te eduma rut te metidtu, ne ebmelintad sikandin. Su kenà meupiya ne idrepeng din ke ulaula rin te ruma rin su apey rin egkereyü ke hinawa rin.

<sup>5</sup> Su uman senge etew ne ruen keluvey te ebpekedsalà, tembù be dait ne ed-uram sikandin.

<sup>6</sup> Ne ruen pà idtarew ku keniyu. Ke etew ne nepemandù dut te Meupiya ne Tudtulan, ne kenà egketuen te wagib te kenà din ebhayan te meupiya ke etew ne mibpemandù kandin.

<sup>7</sup> Ne ruen pà maa egkehiyen ku. Kenà niyu limbungi ke hinawa niyu. Su misan engkey ne ibpemula te etew, ne arà ded imbe se egkesebpet din.

<sup>8</sup> Iring ded be imbe ketà te ulaula te etew. Su ke etew ne iyan din edtumanen ke kandin ne kiyug, ne iyan din egketelimà ke kepepatey ne warà edtemanan din. Ugaid ne ke etew ne edtuman dut te kiyug te Kedesenan ne Ebpetuntul te Menusiya, ne arà ne etew ne ebhayan din te umur ne warà edtemanan din.

<sup>9</sup> Tembù be kenà kiyu egkeuvir ne ed-ulaula te meupiya, su embiya kenà ki egkeuvir ne ruen hewii ne ebpekeuma ne ruen lalew ta.

<sup>10</sup> Ini be te kayi ki pà te ampew te dunya, ne edsemikar kiyu te ed-ulaula te meupiya dut te langun ne menge etew, muna en ke menge ruma ta ne mibperetiya en ki Hisus.

### *Ke Mewri ne Lalag ni Pablo kayi te Surat Din*

<sup>11</sup> Kayi te kebupusa ku te surat ku keniyu ne siaken en ini si Pablo se edsurat, su egkekita niyu ini se derekelà ne surat ku.

<sup>12</sup> Ne ayan se menge etew ne egkiyuhan dan se ebpeetus kew, ne iyan dan kiyug ne egkereyü dan dut te menge ruma ran ne Hudiyanan su sabap te edtumanen dan ke betasan dan. Su embiya iyan dan ibpenurù ne ke kinepatey ni Hisus riyà te pinebelavag ne kayu ne ebpegegaga te ebpeiyu keyta rut te salà ta, ne ketà ne ebpekesekitan dan dut te menge ruma ran ne Hudiyanan. Tembù be ebpenurù dan te ke penduan ni Moises ne ebperumaan dema.

<sup>13</sup> Ugaid ne misan mid-etusan dan, ne kenà dan edumaan ke langun ne penduan ni Moises. Kiyug dan ne ed-etusan kew su apey egkerineg dut te menge ruma ran ne Hudiyanan ne egkereyü dan su дума kew en ma nikandan.

<sup>14</sup> Ugaid ne siak mulà, ne iyan ku rà igkesuati ne edeyuen ku ne ke Kerenan tew si Hisu Kristu. Su sabap dut te kinepatey rin diyà te pinebelavag ne kayu su atag te salà tew, ne neekaran ad dut te nekeiket kedi ne kiyug te kememenusiya kayi te ampew te dunya, su warà en atag din kayi te kedi.

<sup>15</sup> Su kenà ke ebpeetus ta etawa kenà ta kebpeetus se beripantag, ugaid ne iyan beripantag ne egkehaked tew ke behu ne umur ne warà edtemanan din.

<sup>16</sup> Kiyug ku perem ne ke langun ne menge etew ne eduma kayi te penurù ku ne insurat kayi ne egkeheram dan ke iru wey kerinew te hinawa ran ne riyà ebpuun te Eleteala. Su menge etew ran te Eleteala misan Hudiyanan dan etawa kenà.

<sup>17</sup> Ne igenat dè be gunteani ne kenà ku egkiyuhan ne ruen senge etew rà ne kenà ebpehimbenar te siaken ne sugsuhen a ni Hisu Kristu. Su ruen kayi te lawa ku menge tulak sabap te kebpekesekiti kedi dut te menge egkunterà ki Hisus, ne tuus ini te nerasey a sabap dut te keduma ku kandin.

<sup>18</sup> Menge suled, iyan ku ebbingeningeniyen ne ebpeneuven kew ni Hisu Kristu ke Kerenan tew.

Ini rà taman.

*Pablo*

## **Ke Surat ni Pablo Riyà te Menge Etew te Inged ne Ipisu**

<sup>1</sup> Siaken ini se edsurat ne si Pablo. Ne ibpeewit ku ini riyà te langun niyu ne an te inged ne Ipisu ne mibpesakup te Eleteala ne edlaus te kebperetiyaya rin. Senge etew a ne kedserihan ni Hisu Kristu, ne warà duma ne puunan te kedserihi rin kedì ke kenà ke kiyug te Eleteala.

<sup>2</sup> Iyan ku kiyug ne egkeheram niyu ke tavang wey kebmelinew te itungan niyu ne riyà ebbpuun te Eleteala ne Amey tew wey si Hisu Kristu ke Kerenan tew.

*Ke Tavang te Eleteala Keytew ne Egenat dut te Kebpekidseveka Tew ki Hisu Kristu*

<sup>3</sup> Edeyuan tew ve ke Eleteala ne Amey ni Hisu Kristu ke Kerenan tew. Su egenat dut te mibpekidseveka kiyu ki Hisu Kristu, ne rekela se tavang te Eleteala keytew su mibehayan kiyu rin te langun ne keupianan ne riyà dà egenat te kandin ne riyà te langit.

<sup>4</sup> Su misan ketà te warà pà melimbag te Eleteala ini se dunya, ne raan kiyu en ne mibpemili nikandin ne kandin ne tunei ne anak. Mibpemili kiyu rin su apey egkevaluy ke hinawa tew ne metilak atag dut te kebpekidseveka tew ki Hisu Kristu su apey warà salà ne idsawey rin kenitew.

Su sabap dut te dekelà ne limù din kenitew,

<sup>5</sup> ne kiyug din ne egkevaluy kiyu ne kandin ne tunei ne anak ibpepevayà dut te kebpepatey ni Hisus su arà ke kandin ne kiyug.

<sup>6</sup> Ketà be ne edeyù kiyu te Eleteala dut te mepmeupiya ne tavang din ne imbehey rin dè duen kenitew, su impengkayi rin te kenitew ke Anak din ne ingkelimù din nevenar ne si Hisu Kristu.

<sup>7</sup> Ne ketà te kebpepatey ni Hisu Kristu diyà te pinebelavag ne kayu, ne ini se ebpekepeliyu keyta rut te kedusa te salà tew su ebpepeharan en te Eleteala ke salà tew. Su sabap dut te limù din ne warà tedtab din,

<sup>8</sup> ne rekdekelà se tavang din kenitew ne warà repeng din. Ne ke Eleteala se netau te langun su metampas sikandin,

<sup>9</sup> ne kayi ve ne ebpekesabut kiyu en te Eleteala te netahù te itungan din ne in-eles din pehaney ke engkey se netahù te itungan din ne edtumanen din dut te kedsuhù din ki Hisu Kristu.

<sup>10</sup> Ne ini se netahù te itungan din. Embiya egkeuma arà se hewii ne netelaan din, ne edsevekaan din ke langun ne mibeelan din diyà te langit wey ke langun ne kayi te ampew te dunya, ne iyan din ne ibpevayàbayà te langun ne si Hisu Kristu.

<sup>11</sup> Langun taman ne egked-ulaula ne netahù en te Eleteala te itungan din ne egked-ulaula ini. Tembù be mibpemili ki en nikandin rengan te warà pà melimbag ini se dunya su apey ki egkevaluy ne sakup din sabap dut te kebperetiyaya tew ki Hisus.

<sup>12</sup> Geina te sikami ini se Hudiyanen ne neuna ne midsarig ki Hisus su rengan pà ne dekelà se kebpenareng dey dut te kebpekeuma rut te impasad te Eleteala, ne sikami ke ralan te kegkeedati kandin su apey ke kandin ne keupiya ne egkereyù nevenar.

<sup>13</sup> Ne sikiyu rema kenian ne kenà Hudiyanen ne nekeamung ded ketà te itungan din su nerineg niyu rà ke benar ne penurù, ini se Meupiya ne Tudtul mekeatag te kebpekeliyu rut te salà tew, ne mibperetiyaya kew en ki Hisu Kristu. Ketà be ne imbehey keniyu dut te Eleteala ke Kedesenan ne Ebpetuntul te Menusiyà iring te impasad din, su tuus ini te sikiyu rema ne sakup din.

<sup>14</sup> Ne ini se ked-ubpà dut te Kedesenan ne Ebpetuntul te Menusiyà kayi te kenitew, ne ini se tuus te edtumanen ded te Eleteala ke langun ne impasad din kenitew te menge anak din, tembù be netuanan tew ne ed-imesaren din ke kebpeeliyu rin keyta. Ne arà be ne kenà ki ed-engked se edeyù te Eleteala dut te keupiya rin!

*Ke Kebpengeningeni ni Pablo Mekeatag dut te Menge Mibperetiyaya diyà te Inged ne  
Ipisu*

<sup>15</sup> Ne arà be menge suled ku te aney ku rà merineg se midsarig kew en ki Hisu Kristu wey ruen dema dekelà ne limu niyu dut te langun ne menge ruma niyu ne mibperetiyaya,

<sup>16</sup> ne warà en ked-engked-engked ku te kebpeselamat te Eleteala atag keniyu. Uman ku rà idragkes sikiyu ke ebpengeningeni a.

<sup>17</sup> Ne elin dema ne ebpengeningeniyen ku te Eleteala ne ke egkereyù ne Amey tew ke midsuhù ki Hisu Kristu, ne menu ke iyan mebehey keniyu ke Kedesenan ne Ebpetuntul

te Menusiya su apey sikandin se ebehey keniyu te ketau, ne sikandin se kebpekesabot niyu mekeatag te Eleteala su apey egketuenan niyu nevenar sikandin.

<sup>18</sup> Ne ebpengeingeniyen ku rema te sikandin se ebpayag te itungan niyu apey niyu metueni ke langun ne keupianan ne egkepenareng niyu su nevaluy kew ne sakup te Eleteala sabap dut te nepemili kew rin. Egkiyuhan ku rema ne egkesebutan niyu ke penaub din ne warà repeng din ne impasad din dut te menge sakup din.

<sup>19</sup> Ne ruma ne ebuyuen ku ne menu ke egkeheram niyu ke engkey se kerekelà te gehem te Eleteala te kegawed din te langun ne sikitew ne sakup din. Su impekita te Eleteala ke kerekelà te gehem din ne warà repeng din

<sup>20</sup> dut te kebanew rin ki Hisu Kristu ne impepinuu rin en sikandin dut te rapit te egkekewanan din diyà te langit.

<sup>21</sup> Ne ketà be ne riyà si Hisu Kristu te langit ne ebayàbayà dut te langun ne ruen gehem din te ebayàbayà. Su warà mepurù pà dut te sikandin diyà te langun ne mekegehem ne edatù kayi te ampew te dunya wey riyà te langit, misan ke egkekita te etew wey ke kenà ta ruma, misan te guntaanì en wey ketà te kegkesembii kayi te dunya.

<sup>22</sup> Su impepurù te Eleteala si Hisu Kristu ne ebayàbayà dut te langun taman, ne sikandin iya ke midtendù te Eleteala ne Kerenan dut te langun ne sikitew ne mibperetiyya en.

<sup>23</sup> Su langun te sikitew ne mibperetiyya en, ne sikitew ke iring te lawa rin ne sikandin ke pengulu tew. Ne sabap dut te mibpesakup kiyu kandin ne warà kurang din, su piya endei dut te langun ne midlimbag din diyà te langit wey kayi te tanà ne ed-imesaren din ded.

## 2

*Ke Eleteala rà se Ebehu te Umur ta sabap dut te Kebpekidseveka Tew en ki Hisu Kristu*

<sup>1</sup> Pehaney te warà kew pà mibperetiyya ki Hisu Kristu, ne iring kew te minatey su atag dut te warà kew meduma te penurù din wey meraat ke ulaula niyu.

<sup>2</sup> Su rangan ne iyan niyu midumaan ke meraat ne betasan dut te menge etew ne iyan dan edumaan ke kiyug den dà kayi te ampew te dunya. Ne ketà ne iyan niyu nerumaan ne ke datù te pekaid, ini se unuten dut te langun ne busew, su sikandin imbe ke egawed te hinawa rut te menge etew ne kenà eduma te Eleteala.

<sup>3</sup> Ne langun tew ne neked-iring ded pehaney, su iyan tew rà edumaan te kiyug tew. Iyan ebayàbayà kenitew ke kebpatà te nanam tew wey piya engkey ne meraat ne ebpekepemula te itungan tew ne arà se edtumanen tew. Ne ketà ne warà ded mibiraan tew dut te ruma, su warà duma ne ebpesineruwan tew ke kenà edusaan kiyu te Eleteala iring dut te langun ne menge etew ne kenà eduma kandin.

<sup>4</sup> Ugaid ne misan iring ketà ne iyan pà dekelà ne kegkeyru te Eleteala keyta ne warà tedtab din wey ke limù din ne kenà edtaman.

<sup>5</sup> Su misan iring ki te minatey sabap dut te meraat ne mid-ulaula ta, ne inragkes kiyu red te Eleteala rut te kineuyag din ki Hisu Kristu su mibehayan ki red dema nikandin te behu ne umur sabap dut te mibpekidseveka kiyu ki Hisus. Ne nekeliyu kiyu rut te salà tew egenat dut te tavang te Eleteala kenitew.

<sup>6</sup> Ne kenà be ketà dà taman te inkeragkes kiyu rin ki Hisu Kristu te mid-uyag dut te Eleteala te minatey, su sabap dut te kebpekidseveka tew ki Hisus ne inragkes kiyu rema te ed-amung kiyu kandin te edatù diyà te langit.

<sup>7</sup> Ini se mid-ulaula te Eleteala su apey taman te taman ne ke kerekelà te tavang din ne egkekita kayi te limù ne impekita rin keyta ibpepeveyà dut te kebpatay ni Hisus.

<sup>8</sup> Ne warà duma ne puunan te kebpekeliyu tew te salà tew ketà te kedsarig tew en ki Hisu Kristu ke kenà ke tavang dà dut te Eleteala. Warà ed-ul-ulaan tew ne ebpekegaga te kebpekeliyu tew su imbehey rà dè duen te Eleteala.

<sup>9</sup> Tembù be kenà egkepakey ne ruen etew ne ebpendantal te ini se ulaula rin ne iyan ebpekepeliyu kandin.

<sup>10</sup> Su ke Eleteala rà se mibehu te umur tew ketà te mibpekidseveka ki en ki Hisu Kristu su apey iyan tew egkerumaan ke meupiya ne netahù te itungan din dengan ne ed-ul-ulaan tew.

*Midseveka ni Hisu Kristu ke Hinawa dut te Langun ne Ebperetiyya kandin misan Hudiyanen etawa kenà*

<sup>11</sup> Sikiyu ne menge etew ne kenà Hudiyanen ne ed-ingaranan te Hintil, ne tentenuri niyu ke pehaney te warà kew pà mebperetiyya ki Hisu Kristu. Ne edsudian kew te menge Hudiyanen su egkehiyen dan ne kenà kew sakup te Eleteala su warà kew meduma rut te betasan dan te ebpeetus. Ne sikandan kun ke benar ne sakup te Eleteala

su mibpeetus dan, ugaid ne ke lawa ran dà se ruen tuus din su ke itungan dan ne warà mesembii.

<sup>12</sup> Pehaney iya rema ne mebmeriyù kew ki Hisu Kristu ne warà kebpenareng niyu te kebpekeuma rin, su kenà kew Hudiyanen ke inenakan ni Israyil ne mibpemili te Eleteala ne menge etew rin. Tembù be kenà kew ebpeketelimà dut te keupianan ne impasad te Eleteala kandan te edsuhù sikandin te ebpekepeliyu kandan ne ed-ingaranan ki Hisu Kristu. Ne pehaney te miduma kew pà te meraat ne ulaula rut te menge etew kayi te ampew te dunya, ne warà egkepenareng niyu ne tavang te Eleteala su warà niyu ma metueni ke engkey se benar ne Eleteala kayi te ampew te dunya.

<sup>13</sup> Ugaid ne guntaani ve ne nesembian en ke egketemanan niyu sabap dut te kinesarig niyu ki Hisu Kristu. Ne sikiyu ayan se pehaney ne mebmeriyù te Eleteala, ne guntaani ne nekeuvey kew en su sabap dut te kinepatey ni Hisus ne mibpetudà te lengesa rin mekeatag keniyu.

<sup>14</sup> Ketà be ne si Hisu Kristu ke kegkeseveka te sikami ne Hudiyanen wey sikiyu ne kenà Hudiyanen ne nevaluy ki en ne telteleduma. Uya, egkepakey en be ne sikitew ne ebpenusuled en su ketà te kinepatey ni Hisus ne in-awà din ke kebpekedrerendingey tew.

<sup>15</sup> Su ketà te kinepatey ni Hisus ne impeliyu kiyu en nikandin te eduma rut te penduan ne intahak ki Moises wey langun ne betasan ne mibperumaan din dut te sikami ne Hudiyanen rengan su apey Eleteala rà se edumaan dut te sikami ne Hudiyanen wey sikiyu ne kenà Hudiyanen. Ne ketà be ne in-awà din en ke kenà tew kebpekedsuhatey, ne sikitew ke deruwa ne susun ne bansa ne mibaluy rin en ne seveka rà.

<sup>16</sup> Su ketà te kinepatey rin diyà te pinebelavag ne kayu, ne in-awà din ke kebpekunkuntereey tew. Su midseveka rin ke hinawa tew ne menge mibperetiyya misan Hudiyanen etawa kenà, su apey kiyu ebpekeuvey te Eleteala.

<sup>17</sup> Ketà be ne mibpengkayi si Hisu Kristu te ampew te dunya su ebpesabut ke engkey se kebmelintad te hinawa tew riyà te Eleteala. Ne ini se midseysey rin diyà te sikiyu ne kenà Hudiyanen ne ke itungan niyu ne mebmeriyù te Eleteala wey sikami ne Hudiyanen ini se lelayun kun ebpemegitung te Eleteala.

<sup>18</sup> Ne sabap dut te mibpekidseveka kiyu ki Hisu Kristu, ne egkepakey en ne ed-uvey kiyu te Eleteala ke Amey tew ibpepevayà dut te tavang te Kedeseenan ne Ebpetuntul te Menusiyà, negidsan te Hudiyanen etawa kenà Hudiyanen.

<sup>19</sup> Na sikiyu ve ne kenà Hudiyanen ne misan ke pehaney ne warà kew mekeamung te sakup te Eleteala, ne guntaani ne duma kew en dut te sakup din ne mibpemili din. Kenà kew en birang ne liyu ne etew te Eleteala, su tuney kew en ne anak din.

<sup>20-21</sup> Ne sikitew ini se mibperetiyya en ne iring te nekeuman kiyu te pengawid te baley ne ibpeitindeg te Eleteala. Si Hisu Kristu ne iring sikandin dut te menge pelaus su sikandin se edtihel te kegawed din dut te baley, ne ke menge etew ne kedserihan te Eleteala wey ke menge ebpelambas te lalag din ne iring dan dut te impenangan ne pengawid dut te baley su sikandan ke neuna ne mibpesabut mekeatag ki Hisus. Ne langun ne mibperetiyya en ne mibpekidseveka ki Hisus, ne iring dan dut te pengawid ne ebravira ugaid ne ruen atag din dut te valey ne insivey ne ubpaan te Eleteala.

<sup>22</sup> Ne sikiyu ne kenà Hudiyanen, ne nekeamung kew red dema ne pengawid dut te baley ne ibevaley te Eleteala ne ubpaan din ibpepevayà dut te Kedeseenan ne Ebpetuntul te Menusiyà.

### 3

*Impendiyà si Pablo te menge etew ne kenà Hudiyanen su ibpepesabut din mekeatag te Eleteala*

<sup>1</sup> Ne sabap dut te langun ne impenudtul ku keniyu, ne siaken ini si Pablo se ebpeneningeni mekeatag te sikiyu. Su impevilanggù a sabap dut te kegelevak ku ki Hisu Kristu wey ke kebpesabut ku mekeatag kandin diyà te keniyu ne kenà Hudiyanen.

<sup>2</sup> Nerineg niyu en ma buwa ke helevek te Eleteala ne insarig din kediey te ebpesabut keniyu ne kenà Hudiyanen mekeatag te tavang din ne ibehey keniyu.

<sup>3</sup> Su impayag te Eleteala kediey ke warà metueni rengan, ne ini en ke nekahi ku kayi te surat ku.

<sup>4</sup> Ne embiya ebasaan niyu ini, ne egketuanan niyu ini se nesebutan ku mekeatag te netahù te itungan te Eleteala ne edtumanen ni Hisu Kristu ne warà pà metueni pehaney.

<sup>5</sup> Warà pà impayag te Eleteala ini diyà te menge apù tew, ugaid ne guntaani ne impesabut din en dut te menge kedserihan din wey ke menge ebpelambas te lalag din ibpepevayà dut te Kedeseenan ne Ebpetuntul te Menusiyà.

<sup>6</sup> Ini ve imbe ke impesabut din en. Kenà sikami rà ne Hudiyanen se ebpeketelimà te keupianan ne impasad te Eleteala dut te menge etew rin, su sikiyu rema ne kenà Hudiyanen ne mibperetiyaya rut te Meupiya ne Tu dtul mekeatag ki Hisu Kristu ne ebpekeamung ded dema. Su egenat te kebperetiyaya niyu ki Hisus ne nevaluy kew en ne menge sakup te Eleteala, ne nekeamung kew rut te ebeyveyaan ni Hisus elin dut te menge Hudiyanen, ne ebpeketelimà kew red dema rut te langun ne impasad te Eleteala.

<sup>7</sup> Midsuhù a te Eleteala su ebpesabut dut te Meupiya ne Tu dtul, ne imbehey rin kediey ke ketau te ebpesabut ibpepevayà te gehem ne imbehey rin kediey.

<sup>8</sup> Su misan siaken se pinekemevavà dut te langun ne etew rin, ne siaken ded se mibpurut din te ebpesabut diyà te sikiyu ne kenà Hudiyanen kayi te Meupiya ne Tu dtul ne kenà egketembu se taman ne keupiya rin.

<sup>9</sup> Su ke Eleteala ne midlimbag te langun taman, ne insuhù din kedì te ebpesabut dut te langun ne etew ke engkey se ed-ul-ulaan din te edtuman dut te netahù te itungan din ne warà mibpeyahan din dengan

<sup>10</sup> su apey egkekita dut te menge mepurù te suluhuen wey ruma ne mekegehem diyà te langit ke merakel ne edsusunan te ketampas din ne dekelà kayi te mepmeupiya ne ed-ul-ulaan din dut te langun tew ne mibperetiyaya.

<sup>11</sup> Mid-ulaula te Eleteala ini su ini se netahù te itungan din ne raan en te warà pà melimbag ini se dunya. Ne guntaani ne midtuman din en su impeng McKayi rin en ke Kerenan tew ne si Hisu Kristu.

<sup>12</sup> Ne tehaad te mibpekidseveka kiyu en ki Hisu Kristu sabap dut te kedsarig tew kandin, ne kenà ki egkealang-alang ne ebpengarap kandin su netueanan tew ne egkerineg din ke kebpengeingeni tew.

<sup>13</sup> Ne ini ve ne ebpemuyuen ku keniyu te ini se keresayan ku mekeatag keniyu ne kenà medlugkà se hinawa niyu, su ini se igkerasey ku ne keniyu ne keupianan.

*Ini ne Mekeatag te Kerekelà te Limù ni Hisu Kristu keytew ne kenà Egketegkad*

<sup>14</sup> Ne embiya egketenuran ku ke langun ne tavang dut te Amey tew ne Eleteala kayi te keytew, ne ebpenimbuel a se ebpengeningeni mekeatag keniyu.

<sup>15</sup> Su sikandin ke ed-ingeranan te Amey su sikandin ke ebpuunan dut te langun ne kayi te ampew te dunya wey ke riyà te langit.

<sup>16</sup> Ne ebuyuen ku kandin se egenat dut te gehem din ne warà repeng din, ne menu ma ke ebeheren din ke hinawa niyu ibpepevayà dut te Kedesenan ne Ebpetuntul te Menusiyà

<sup>17</sup> su apey egkeheram niyu nevenar te si Hisu Kristu ne riyen en ed-ubbà te hinawa niyu sabap dut te sarig niyu kandin. Ne ibpengeningeni ku rema ne ke limù niyu ki Hisus abpeg dut te kebpeylimuey niyu ne midtamel en.

<sup>18</sup> Su embiya midtamel en, ne ke hinawa niyu ne midtua en su apey sikiyu abpeg dut te langun ne menge etew te Eleteala ne egkesebutan niyu ke engkey se taman ne kerekelà te limù ni Hisu Kristu keniyu ne kenà egketegkad.

<sup>19</sup> Uya, kiyug ku ne egkesebutan niyu nevenar arà se kerekelà te limù ni Hisu keniyu, misan kenà langun din ne egkesagkew te itungan niyu. Su ketà te kegkeheram niyu te limù din ne kenà egketegkad, ne ini se ibehey te Eleteala keniyu su apey kew eduma rut te kiyug din ne ed-umanan pà su apey arà se kegkevaluy niyu ne iring te Eleteala ne ed-imesaran din.

<sup>20</sup> Edeyù kiyu te Eleteala ne mekegehem ne ke edtavang keytew, su misan engkey se ebuyuen tew kandin ne ebpekegaga sikandin te ebpelebiyen din pà ke ebuyuen tew ne muna pà dut te egkesagkew te itungan tew.

<sup>21</sup> Langun tew ne mibperetiyaya, ne edeyù kiyu kandin su atag dut te midseveka kiyu rin wey atag dema dut te ki Hisu Kristu. Tembù be edeyù kiyu te Eleteala taman te taman! Ne egketuman ini.

## 4

*Ini ne Mekeatag te Kebpekidseveka rut te Langun ne Mibperetiyaya ki Hisu Kristu*

<sup>1</sup> Ne siaken ne ini te bilengguan su mekeatag te kebpesabut ku ki Hisus ne Kerenan tew, ne iyan ku ebuyuen keniyu ne edtumanen niyu ke langun ne dait ne ulaula dut te mibperetiyaya en su arà se kiyug te Eleteala dut te kebpeimilì din keniyu.

<sup>2</sup> Ke ulaula niyu ve imbe ne iring kayi: peembavà kew te hinawa niyu, medtultulanged kew wey ebpesahad te igkeepes keniyu te ruma niyu. Ipekita niyu ke kedlimù niyu dut te langun te kenà niyu idtahù ke sakit te hinawa niyu dut te menge ruma niyu.

<sup>3</sup> Su Ke kedesenan ne Ebpetuntul te Menusiyà, ne sikandin se kegkeseveka tew, ne arà be ne iluta niyu se keduma kandin su apey niyu kenà egkereeti arà se kegkeseveka niyu.



<sup>4</sup> Su sikitew ke langun ne mibperetiyaya en ki Hisu Kristu ne iring kiyu en te seveka rà ne lawa, ne seveka rà dema se Kedeseenan ne Ebpetuntul te Menusiyà ne ed-ubpà kayi te keytew. Ne seveka rà dema arà se keupiyanan ne ebpenerengen tew su sabap dut te ke Eleteala se mibpemili keytew.

<sup>5</sup> Seveka rà ke Kerenan tew, ne ruen arà seveka rà ne dalan te kebperetiyaya ne ebpekeamung kiyu riyà te Eleteala, ne iyan tuus te mibperetiyaya kiyu en ne seveka rà dema arà se kinebunyahi keytew.

<sup>6</sup> Ne ruen dema seveka rà ne Eleteala ne ke Amey rut te langun tew, ne sikandin ke mepurù ne ebayàbayà te langun ne sikitew. Sikandin dà ke ebayàbayà dut te langun tew su piya endei kiyu ed-ubpà ne ketà ed-ubpà sikandin, ne kayi red te kinawa te langun tew.

<sup>7</sup> Ne misan seveka rà ke ralan te kebperetiyaya tew, ne ke ketau ne imbehey keytew ni Hisu Kristu ne warà memeked-iring su uman senge etew keytew ne mibehayan din te dait ded dut te sikitew.

<sup>8</sup> Su ini ve ne nesevian en mekeatag ki Hisu Kristu dut te impesurat te Eleteala ne egkahi te,

“Ketà te kebetuna kandin diyà te langit  
su mid-etuwan din ke minge kunterà din,  
ne merakel se neviyag ne ed-ewiten din.  
Ne ruen dema ketau ne imbehey rin  
te minge etew rin.”

<sup>9</sup> Engkey ve se egkesebutan ta kayi te nekahi se kinevetuna kandin diyà te langit? Iyan din meana ne pehaney ne mid-ewaan din ke ubpaan din diyà te lesang te langit su mibpengkayi sikandin te ampew te dunya.

<sup>10</sup> Su warà duma ne mibpengkayi te ampew te dunya ke kenà si Hisu Kristu rà, arà se nevatun maa diyà te lesang te langit, su apey sikandin se mepurù ne ebayàbayà te langun taman.

<sup>11</sup> Su sikandin se mibehey te ketau te langun ne minge etew rin su apey iyan dan ed-ul-ulaan ne ke kiyug din. Ruen mibehayan din te helevek ne egkevaluy ne minge kedserihan din, ruma ne mibaluy rin ne ebpelambas te Lalag te Eleteala. Ruen ruma ne mibehayan din te ketau te ebpesabut dut te Meupiya ne Tudtul mekeatag ki Hisu Kristu. Ne ruen duma rema ne mibehayan din te ketau te ebpeneheewit te minge mibperetiyaya en wey ebpemenurù kandan.

<sup>12</sup> Iyan din kinevehey kayi te minge ketau ne apey langun tew te mibperetiyaya en ne ruen sangkap din te edtuman te piya engkey ne kiyug te Eleteala ne ed-ul-ulaan tew, su apey ke kebperetiyaya rut te langun ne sakup din ne iring te lawa rin ne ebpekeiseg.

<sup>13</sup> Su ibpepevayà ketà ne arà se nesebutan tew mekeatag dut te Anak te Eleteala ne si Hisu Kristu ne egkeum-umanan taman te ini se kebperetiyaya tew ne egkeseveka rut te netuenan tew. Ketà be ne ke sarig tew ki Hisu Kristu ne metua en, ne metua rema ke ulaula tew su ed-iseg ebpekeiring te ulaula ni Hisu Kristu.

<sup>14</sup> Su embiya iring kayi se egketemanan tew, ne kenà kiyu en ebpekeiring te vatà ne melemu ne ebperetiyaya te piya engkey ne penurù ne iring dut te utan te ralan ne eduma te edsungu wey ed-uli. Su kenà kiyu ebpelembung dut te minge etew ne metau ne edliyuk te tarù ne penurù dan.

<sup>15</sup> Ne sikitew ve mulà ne iyan tew ibpekidlalag te minge ruma tew ne ke benar ne penurù su atag dut te kebpelemlimuey tew su apey tew egkeiringi ke ulaula ni Hisu Kristu ne edlingekaan tew,

<sup>16</sup> ne sikitew ke mibperetiyaya en ne iring te lawa rin. Su langun dut te pepatà te lawa ne nekebpikit, tembù be piya endei dapit kayi te lawa ne ruen gelevek din ne embiya egkeseveka ran se eduma rut te kiyug te ulu ne ebpekeiseg se kebmevaher dut te lawa. Ne iring din ded dema kayi te kenitew su embiya uman senge etew ne edtuman dut te kandin ne helevek ne ed-iseg ke kebmevaher dut te langun kayi te lawa su atag dut te kebpelemlimuey tew.

*Ini ne Mekeatag te Ebehuwen te Eleteala ke Umur ta su apey ki Ed-ulaula te Metidtu ne Ulaula ne Ebpekesuhat te Hinawa rin.*

<sup>17</sup> Geina ne iring kayi te langun tew ne iring te lawa ni Hisu Kristu, ne ruen be ini ebperumaan ku keniyu su riyà ebpuun ki Hisus ke Kerenan tew. Kenà niyu ul-ulaa ke perangey dut te minge etew ne kenà ebperetiyaya te Eleteala, su iyan den dà edtumanen ke itungan dan dà ne warà rantek din.

<sup>18</sup> Su sikandan ne warà en iya pepaleng dan ke engkey se benar ne ralan. Ne warà en iya kandan ketà te umur ne warà edteman din ne riyà ebpuun te Eleteala su warà ma deisek dà ne kiyug dan te ebpemineg te kiyug te Eleteala su meresen ke ulu ran.

<sup>19</sup> Ne engketà be ne kenà dan en egkeyeyaan ne ed-ulaula te piya engkey ne meraat, ne kenà dan en ed-erenen ke kiyug te kememenusiyai, su iyan dà nekepenù te itungan dan se ed-ulaula te meredsik.

<sup>20</sup> Ugaid ne sikiyu mulà ne iyan niyu nehuruwan mekeatag ki Hisu Kristu ne kenà iring ketà.

<sup>21</sup> Su nerineg niyu en ma ke benar ne impenurù dey mekeatag kandin, ne nesebutan niyu en su sikandin se edumaan niyu.

<sup>22</sup> Tembù be ewai niyu en ke neuna ne perangey niyu ne iyan puunan te ulaula niyu ne meraat. Su ini ne edlimbung keniyu te keduma rut te kiyug dà te hinawa niyu ne ederaat keniyu.

<sup>23</sup> Iyan niyu ul-ulaa ne ebpehuwan niyu te Eleteala ke hinawa wey itungan niyu.

<sup>24</sup> Buyua niyu te Eleteala ne ebheuwen din ke umur niyu su apey ke ulaula niyu ne ebpekeiring kandin. Su embiya arà se ed-ul-ulaan niyu ne egkekita te mibehu en ke umur niyu su kayi te ed-ul-ulaan niyu ne metidtu ne ebpekesuhat te hinawa te Eleteala.

<sup>25</sup> Tembù be kenà kew edtarùtarù. Ne iyan niyu rà kehiya te ruma niyu ne ke benar su langun tew te mibperetiyya en ne nekeamung dut te lawa ni Hisus.

<sup>26</sup> Embiya egkeepes kew rut te minge ruma niyu, ne uram kew su apey kew kenà ebpekedsalà kayi te ulaula niyu ne meraat. Ne kenà kew ebpetegtehuey te sakit te hinawa niyu su kenà niyu en pesendlepi te andew ke kegkeepes niyu.

<sup>27</sup> Kenà kew edluhut te ralan ki Setanas ke datù te pekaid te ebpesuwey keniyu te ebped-ulaula te meraat.

<sup>28</sup> Ne embiya ruen kenyan te keniyu tekawen pehaney te warà pà mibperetiyya, ne med-engked en imbe sikandin. Ne megelevek sikandin su apey ruen igkeuyag din wey ruen dema igkevehey rin dut te ruma ne egkerehenan.

<sup>29</sup> Wey kenà kew rema edlalag te meraat su iyan niyu rà leleha se ebpeketavang dut te ebpemineg su apey egkevaher wey ebpeketuntul ke itungan dan dut te lalag niyu.

<sup>30</sup> Ne kenà niyu ul-ulaa arà se kenà ebpekesuhat te itungan te Kedeseenan ne Ebpetuntul te Menusiyà, su ke ked-ubpà din diyà te hinawa niyu ke tuus te sikiyu ne angkun en te Eleteala. Ne tuus dema te sikandin se ebpayag ketà te hewii ne edlived si Hisus kayi ne ebpekeuman kew rut te minge etew ne mibpeliyu en.

<sup>31</sup> Ketà be ne engkeri niyu se ebpetegtehuey te sakit te hinawa, ne engkeri niyu se ebpemeked-epesey wey ebpekunkuntereey. Engkeri niyu se ebpetugtugkiyangey wey ebpegkeyà te ruma niyu, wey ke ebpelelahey te ebpekererangit.

<sup>32</sup> Ugaid ne iyan niyu iya ul-ulaa ne meupiya, ne pelimlimuey kew wey ipekita niyu ke kegkeyru niyu te ruma niyu. Ne pesehara niyu ke igkeepes niyu dut te minge ruma niyu iring te kinepesehad dut te Eleteala te salà niyu atag dut te kinepatey ni Hisu Kristu.

## 5

### *Ke Ulaula te Eleteala se Ed-iringan dut te Sikitew ne Nerayahan en se Itungan Din*

<sup>1</sup> Ne geina ve te sikiyu ne minge anak kew en te Eleteala ne igkelimù din, ne iringi niyu ke ulaula te Eleteala su apey ke ulaula niyu ne iring kandin.

<sup>2</sup> Ne pelimlimuey kew iring dut te limù ni Hisus kenitew. Su ke limù din kenitew ne impekita rin ketà te imbeliwas din ke umur din su apey ke Eleteala se ebpeliyu kenitew te kedusa rin te minge salà tew. Ne ini se kinebeliwas din te umur din ne iring te indrenà ne ibehay te Eleteala ne nekesuhat te hinawa te Eleteala.

<sup>3</sup> Sikiyu ini se sakup en te Eleteala ne kenà kew iya ebpingingniyug, kenà kew ed-ulaula te temperasà, ne kenà kew egkeeram-am, su langun kayi ne kenà dait ne ulaula te etew ne mibperetiyya en ki Hisus. Kenà egkepakey ne ruen iring kayi ne egkekahi mekeatag te sikiyu.

<sup>4</sup> Kenà dema edait te sikiyu ne meredsik se kebpechèbà din, etawa edlalag te warà rantek din, etawa edwaliwalì te temperasà. Ugaid ne iyan niyu rà leleha ke lalag ne ebpekereyù te Eleteala.

<sup>5</sup> Su tentenuri niyu ve ini su benar, ke etew ne ebpingingniyug, ke etew ne ed-ulaula te temperasà wey ke etew ne egkeeram-am ne kenà ebpekeamung sikandin dut te minge etew ne edetuan ni Hisu Kristu wey ke Eleteala. (Su ke etew ne egkeeram-am, ne arà se kegkeeram-am din se ebperengaran din ne kenà ke Eleteala.)

<sup>6</sup> Kenà kew ve imbe egkeekali kenyan ke ruen egkahi te ayan ne minge ulaula ne warà dà diyà te itungan te Eleteala su ebpeseharen din dà. Su ketà ebpuun ne minge ulaula

ne ayan se minge etew ne warà meduma te Eleteala ne ed-isuhaten din su mid-ulaula ran ke igkeepes te Eleteala.

<sup>7</sup> Ketà be ne kenà kew ve ebpekiduma te minge etew ne iring ketà.

<sup>8</sup> Su rengan ne iring te ke itungan niyu ne merusirem, su warà niyu pà metueni ke ralan te Eleteala. Ugaid ne guntaani ve ne ke itungan niyu ne nereyahan en su midsarig kew en ki Hisu Kristu ke Keranan tew. Tembù be iyan niyu ul-ulaa ne dait ne ulaula rut te etew ne kayi en te kerayahan.

<sup>9</sup> Su embiya nereyahan en ke itungan niyu, ne egkekita kayi te ulaula niyu ke langun ne meupiya wey ketidtu wey arà se benar.

<sup>10</sup> Langun ne perangey niyu ne surimana niyu ke ebpekesuhat be te hinawa te Eleteala etawa kenà, ne iyan niyu rà ul-ulaa arà se kiyug din.

<sup>11</sup> Kenà kew ed-amung-amung dut te ulaula ne warà keupianan din, su arà ke perangey dut te minge etew ne merusirem pà ke itungan din. Ugaid ne iyan niyu ul-ulaa ke metidtu su apey ran egkekita ke keraat dut te ulaula ran. (

<sup>12</sup> Su misan ke kegkepengasak dà dut te ibpegelesà ne ulaula ran ne mekeyeya nevenar.)

<sup>13</sup> Su embiya ke ed-ul-ulaan diyà te merusirem ne egkerayahan, ne egkekita ke benar dut te ed-ul-ulaan dan embiya meupiya etawa meraat.

<sup>14</sup> Ne ketà te egkekita ran ke meraat, ne egkepayahan dan te itungan dan ne edtidtuwen dan. Tembù be ruen beseanan ne egkahi te,

“Sikew ke iring te edlipereng, imaman kad;  
Uya, su iring ke en te minatey, ne mevanew kad;  
Ne edtayawan ni Hisu Kristu ke itungan nu.”

<sup>15</sup> Tembù be urami niyu nevenar ke ed-ul-ulaan niyu. Kenà kew ed-ulaula iring dut te minge etew ne warà nesebsebutan din, ugaid ne iyan niyu ul-ulaa ne iring dut te metampas ne minge etew.

<sup>16</sup> Su gunteani ne hewii ne ke minge etew ne metehel ne ed-ulaula te meraat, ugaid ne sikiyu ve mulà ne kenà kew alang-alang te edtuman te meupiya ne ed-ul-ulaan.

<sup>17</sup> Kenà kew ed-ulaula te warà atag din, ugaid ne pemengaa niyu ke engkey se ed-ulaan niyu ne ebpekesuhat te kiyug te Keranan tew ne si Hisus.

<sup>18</sup> Kenà kew ve ed-inum te ebpeketevereg su ayan ne ebpekegkeraat keniyu. Ugaid ne iyan niyu peveybeyaa te hinawa niyu ke Kedesenan ne Ebpetuntul te Menusiyà.

<sup>19</sup> Embiya egkevurun kew ne beyuka niyu ke Lalag te Eleteala kayi te iringà niyu su apey ebpekereyù ki Hisu Kristu ke Keranan tew. Ne arà se kedeyù niyu ki Hisus ne egenat imbe te mehalew ne hinawa niyu.

<sup>20</sup> Ne peselemati niyu ke Eleteala ne Amey tew misan engkey se egketemanan niyu su atag dut te mid-ulaula ni Hisu Kristu ke Keranan tew.

*Ini ne Mekeatag te Ulaula ne Edait dut te Tiwaley*

<sup>21</sup> Layun kew pekita te kebpeed-edatey niyu su geina te iyan niyu ibpeuna te hinawa niyu ne si Hisu Kristu.

<sup>22</sup> Sikiyu ne minge meritan, ne perumaruma kew dut te esawa niyu iring te kebperumaruma niyu ki Hisu Kristu.

<sup>23</sup> Su ke meama ne iyan ebayàbayà dut te esawa rin iring ki Hisu Kristu ne iyan ebayàbayà te langun tew ne mibperetiyaya en. Su ke langun tew ne mibperetiyaya en ne iring te lawa rin ne sikandin en ke mibpeliyu keytew.

<sup>24</sup> Ketà be ne ke minge meritan ne ebperumaruma dut te esawa ran iring dut te langun tew ne mibperetiyaya ki Hisu Kristu ne ebperumaruma kandin.

<sup>25</sup> Sikiyu ne minge meama, ne iyan iya se limui niyu ke esawa niyu iring dut te kegkelimù ni Hisu Kristu te minge etew rin. Su imbeliwas din ke umur din te kebpeiyu rin keytew.

<sup>26</sup> Mid-ulaula rin ini su apey kiyu ebmetilak dut te langun ne salà tew. Su iring te midlùlan din ke minge salà tew, ne ke tuus te midtilak kiyu en ne arà se kinebunyahi kenitew wey ke Lalag te Eleteala ne edumaan tew.

<sup>27</sup> Uya, midtilak kiyu rin dut te minge salà tew te kebpenehana rin kenitew su apey meupiya se kedtengteng din kenitew ketà te hewii ne kedlived din kayi su ed-angey keyta, ne warà idsawey rin kenitew misan deisek dà.

<sup>28</sup> Ketà be ne sikiyu ne minge meama, na iyan iya se limui niyu ke esawa niyu iring te kegkelimù niyu te lawa niyu, su ke esawa nu ne iring ded te lawa nu.

<sup>29</sup> Su warà etew ne kenà din ebpedtumuen ke lawa rin su edtugenuren din. Engketà be imbe ke kedtugenura ni Hisu Kristu dut te langun ne sikitew ne mibperetiyaya kandin,

<sup>30</sup> su sikitew ini ne nevaluy ne iring te pepatà te lawa rin.

<sup>31</sup> Su iring dut te impesurat ne Lalag te Eleteala ne egkahi te, “Embiya ed-esawa ke meama, ne ed-ewaan din ke amey rin wey ke iney rin ne ebpekidampung sikandin dut te esawa rin su ebpekidseveka sikandin.”

<sup>32</sup> Ne ke meana ne impesabut dut te Eleteala kayi te ingkesurat ne lalag din ne mekegeyip. Ne iyan ku ebpeiringan ne si Hisu Kristu wey langun ne mibperetiya en kandin.

<sup>33</sup> Ne kenà arà dà se meana rin su ebpenurù dema te sikiyu ne tiwaley. Tembù be sikiyu ne minge meama ne iamin niyu ke hinawa niyu te edlimù te esawa niyu iring te kedlimù nu te hinawa nu. Ne engketà dema ke meritan, edati niyu rema ke esawa niyu.

## 6

*Ini ne Mekeatag te Dait ne Ulaula te minge vatà diyà te Lukes Dan wey ke Dait ne Ulaula te Lukes te Kebpetidtu ran dut te minge anak dan*

<sup>1</sup> Sikiyu ne minge anak, perumaruma kew dut te minge lukes niyu su ini ke dait ne ed-ul-ulaan dut te mibperetiya en ki Hisu Kristu.

<sup>2</sup> Su ruen penduan te Eleteala mekeatag ketà ne egkahi te, “Edati niyu ke amey niyu wey ke iney niyu.” Ne ini ve ke neuna ne penduan din ne ruen impasad din ke edtumanan niyu.

<sup>3</sup> Su egkahi ketà te, “Embiya edtumanen niyu ini, ne meupiya se egketemanan niyu wey ebereumur kew kayi te ampew te dunya.”

<sup>4</sup> Sikiyu ne minge lukes, kenà niyu layun igkeepesi ke minge anak niyu; ugaid ne ipetidtu niyu sikandan te edait ne ulaula rut te minge etew ne mibperetiya en ki Hisu Kristu ke Kerenan, ne penurua niyu sikandan dut te kiyug din kandan.

*Ini ne Mekeatag te Ulaula ne Edait dut te Minge Sugsuhuen wey ke Edsuhùsuhù kandan*

<sup>5</sup> Sikiyu ne minge edsugsuhuen, perumaruma kew dut te edsuhùsuhù keniyu kayi te ampew te dunya. Edati niyu sikandan ne ipehenat niyu te hinawa niyu ke kedtuman niyu dut te helevek niyu iring te si Hisu Kristu ke edsuhù keniyu.

<sup>6</sup> Kenà wey kew rà ed-upiya te helevek niyu ke ebentayan kew pà apey kew egkereyù nikandin. Ugaid ne ul-ulaa niyu ve ke kiyug te Eleteala te egenat imbe te hinawa niyu su iyan niyu itahù te itungan ne edsugsuhuen kew ni Hisu Kristu.

<sup>7</sup> Iyan niyu kegelevek dut te edsuhù keniyu ne lila te hinawa niyu, su iyan benar ne egelevekan niyu ne si Hisu Kristu ne kenà etew rà.

<sup>8</sup> Su netuenan niyu ne ruen lalaw ne ibehey te Kerenan tew dut te langun ne ed-ulaula te meupiya, misan edsugsuhuen etawa kenà.

<sup>9</sup> Ne sikiyu rema ne ruen edsugsuhuen din, ne iring ded dema ketà se ul-ulaa niyu dut te edsugsuhuen niyu. Kenà kew ebpehandek kandan su netuenan niyu te seveka rà ke Eleteala riyà te langit ne Kerenan niyu abpeg ded dut te edsugsuhuen niyu. Ne sikandin ne warà ibpeuna rin.

*Ini ne Mekeatag te Iring te Adir ne Ibehey te Eleteala Kenitew su ibpekibunù tew rut te Datù te Pekaid wey ke minge Sugsuhuen òn*

<sup>10</sup> Ne ini se mewri ne egkehiyen ku. Na geina te mibpekidseveka kew ki Hisu Kristu, ne nganey kew kandin te ebmevahir ke sarig niyu su sikandin ke ruen dekelà ne gehem din te edtawang.

<sup>11</sup> Su iring te ebpekibunù kiyu dut te kunterà tew ne si Setanas ke datù te pekaid ne metehel ne edlimbung keytew. Tembù be idseluub tew ke langun ne adir te kebunuey ne in-adir te Eleteala kenitew su apey kenà kiyu egketalew dut te ked-akal din.

<sup>12</sup> Su ke kunterà tew ne kenà etew, ugaid ne ke datù te pekaid wey ke sugsuhuen din ne minge busew wey ke ruma ne kenà egkekita abpeg ke ruen gehem din diyà te kewkewangan ne ed-ulaula te meraat. Su ruen kebayaà dan dut te minge etew kayi te ampew te dunya ne diyà pà ke itungan dan te kerusireman.

<sup>13</sup> Tembù be seluub kew te langun ne adir te ebpekibunù ne in-adir te Eleteala kenitew su apey kew ebpekenehana ke keenu ran egemew. Ne ketà ne misan ebmemenuwen kew dut te datù te pekaid, ne kenà kew egkeirud dut te mid-itindehan niyu.

<sup>14</sup> Ketà be ne layun kew ebpenehana. Iring te sundaru ne inebitan din ke adir te ebpekibunù, ne iyan niyu sebitan ne layun niyu edumai ke benar. Ne ke ed-ul-ulaan niyu ne metidtu ne iyan iring te limbutung ne id-alang te kumeng niyu.

<sup>15</sup> Ne iyan iring te telumpà niyu ne ke layun niyu kebpenehana te kebpenemudtul niyu te ruma niyu te Meupiya ne Tudtul mekeatag ki Hisus ne iyan kebmelintad te hinawa ran.

<sup>16</sup> Ne iyan ruma pà ne adir niyu ne ke kedsarig niyu ki Hisu Kristu ne iring te kelung ne layun niyu ibpetirung su apey kew egkeelangi dut te mekeandek ne ibped-ulaula ni Setanas ke datù te pekaid su iring ini te panà ne regreg ne ibpanà din keniyu.

<sup>17</sup> Ne ke sarig niyu te si Hisu Kristu ke mibpeliyu keniyu rut te kedusa te salà niyu ne iyan iring te putew ne sepiyu ne id-alang te ulu niyu. Ne ke Lalag te Eleteala ne imbehey keniyu dut te Kedeseenan ne Ebpetuntul te Menusiya ne iyan iring te sundang niyu.

<sup>18</sup> Ne ketà te inseluub niyu ke langun ne adir, ne layun kew pengeningeni riyà te Eleteala te ebuyù te tavang din te piya engkey ne egketemanan niyu. Warà be edsamaan niyu ugaid ne langun taman ne ipengeningeni niyu riyà te Eleteala, ne iyan niyu ipengeningeni ke ibpepegitung keniyu dut te Kedeseenan ne Ebpetuntul te Menusiya. Kenà kew kebangas te kebpengeningeni niyu, wey kenà niyu lipati te edragkes te pengeningeni niyu ke langun ne mibperetiya.

<sup>19</sup> Ne iragkes a nikiyu te kebpengeningeni niyu su apey a egketevangi te Eleteala te ebpenurù kedì rut te dait ne egkehiyen ku kayi te ibpesabut ku ke lalag din. Ne seveka rema ne apey a kenà egkeandek te ebpesabut kandan dut te Meupiya ne Tudtul mekeatag ki Hisu Kristu, ini se pehaney ne warà pà metueni.

<sup>20</sup> Su midsuhù a te Eleteala te ebpesabut kayi te Meupiya ne Tudtul ne ini en iya ke puunan te ini a te bilengguan guntaan. Tembù be ebperagkes a keniyu te pengeningeni su apey kenà a egkeandek te ebpesabut dut te insuhù te Eleteala kedì.

*Ke Mewri ne Lalag ni Pablo Kayi te Surat Din*

<sup>21</sup> Ne si Tikikus se ebpeewiten ku keniyu su apey sikandin en be se ebpenudtul keniyu te langun ne egketemanan ku kayi. Suled tew sikandin te ebperetiya ki Hisu Kristu ne igkelimù ku nevenar, ne egkeserihan ku sikandin te edtavang kedì kayi te helevek ku.

<sup>22</sup> Su tembù ma iya edsuhuen ku sikandin su apey rin igkepenudtul ke langun ne egketemanan dey kayi ne ebeheren din dema ke itungan niyu.

<sup>23</sup> Menge suled ku, iyan ku ebpengeningeniyen diyà te Eleteala ne Amey tew wey ki Hisu Kristu ne Kerenan tew ne menu ma ke ebeheran dan ke kedsarig niyu kandan su apey niyu egkeheram ke melintad ne itungan wey ke kebpelimlimuey niyu ne riyà ebpuun te kandan.

<sup>24</sup> Ne ebuyuen ku rema te Eleteala te menu ke peneuva kew nikandin, langun ne sikiyu ne kenà egkeawà ke limù din ki Hisu Kristu ke Kerenan tew.

Arà dà taman.

*Pablo*

## Ke Surat ni Pablo Riyà te Menge Etew te Inged ne Pilipus

<sup>1</sup> Sikami ne si Pablo ki Timoteo ne minge sugshuen ni Hisu Kristu se edsurat ini riyà te keniyu te minge ebpenheewit dut te minge mibperetiyyaya keniyen te inged te Pilipus abpeg ke ed-amung kandan wey ke langun niyu ne mibpesakup en te Eleteala sabap te mibperetiyyaya kew ki Hisu Kristu.

<sup>2</sup> Iyan dey kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala ne Amey tew wey si Hisu Kristu ke Kerenan tew.

*Ke Kebpengeningeni ni Pablo Mekeatag te Menge Etew Riyà te Inged ne Pilipus*

<sup>3</sup> Uman ku egkepegitung sikiyu ne ebpeselamat a te Eleteala,

<sup>4</sup> ne uman ku ibpengeningeni sikiyu ne egkehalew a nevenar

<sup>5</sup> su egketenuran ku ke kinetavang niyu kedi te helevek ku te ed-eneb dut te Meupiya ne Tudtul. Su igenat dut te aney kew rà mibperetiyyaya ne midtavang kew en kedi ne warà en mepitas taman guntaan.

<sup>6</sup> Ne netuenan ku se ayan se behu ne itungan niyu ne imbehey te Eleteala te kinerudsù niyu te mibperetiyyaya su apey kew ed-ulaula te meupiya, ne ed-um-umanan din en su apey warà kurang niyu ketà te hewii ne edlived si Hisu Kristu kayi.

<sup>7</sup> Dekelà kew te hinawa ku! Ne dait ini se egkepegitung ku mekeatag keniyu. Su aney en taman guntaani ne mid-unungan a nikiyu te edtinged kayi te Meupiya ne Tudtul mekeatag ki Hisu Kristu piya engkey ne kerehenan, ne misan ini ad te bilengguan ne edtavang kew red lavew. Tuus be te nekeamung kew te kebaher te tavang te Eleteala kediey.

<sup>8</sup> Su netuenan te Eleteala ne egkelimengawan a nevenar keniyu su warà meamin te lawa ku se limù ku keniyu iring dut te kegkelimù ni Hisu Kristu keniyu.

<sup>9</sup> Iyan ku ibpengeningeni keniyu ne ebuyuen ku te Eleteala ne ibpeiseg din ke limù niyu kandin abpeg ke kebpelimlimuey niyu su apey arà se nesebutan niyu mekeatag te kiyug te Eleteala ne med-iseg pà dema wey ke kedtimbangtimbang te itungan niyu su apey niyu egketueni ke benar.

<sup>10</sup> Ne ketà be ne egketuenan niyu en ke iyan pà meupiya ne ulaula niyu ne ebpekesuhat te hinawa rin. Su apey ketà te kedlived ni Hisus ne warà en ibenar keniyu su warà meraat ne nekesawug te ulaula niyu.

<sup>11</sup> Su ketà ne langun te ed-ul-ulaan niyu ne metidtu sabap dut te kedtavang ni Hisu Kristu keniyu, su sikandin dà se ebpekegaga te ked-ulaula niyu ketà. Ed-ul-ulaan din ini su apey egkereyù ke Eleteala wey egkeedatan sikandin.

*Ke Kegkevilanggù ni Pablo se Neketavang te Kebpesabut din dut te Meupiya ne Tudtul*

<sup>12</sup> Menge suled, ebpeketuenan ku keniyu te kenà egkevangan ne ed-iseg ke Meupiya ne Tudtul ne ibpesabut ku misan ini a te bilengguan, su nasi ne mid-iseg pà.

<sup>13</sup> Su langun dut te sundaru ne ebantey te turuhan te datù kayi wey langun ne minge etew kayi, ne nekeringet te warà duma ne ibpuun kedi te mibelanggù ke kenà ke kepperetiyyaya ku ki Hisu Kristu.

<sup>14</sup> Guna te netuenan dut te kerekelan te minge suled tew ne mibperetiyyaya te ini a te bilengguan, ne mid-iseg ke kedsarig dan ki Hisu Kristu ke Kerenan tew. Nasi pà se neawà ke andek dan ne kenà dan en egkealang-alang ne ebpesabut dut te lalag te Eleteala.

<sup>15</sup> Benar ne ruen duma ne minge etew ne ebpesabut te Lalag te Eleteala su egkesihiran kedi, ne arà ke dalan te kebpکید-ampew ran. Ugaid ne ruen ruma ne etew ne kenà, su iyan dan kebpesabut te Lalag te Eleteala ne egenat te hinawa ran en iya.

<sup>16</sup> Uya, su igkelimù a nikandan su netuenan dan te midserihan a ni Hisu Kristu te helevek te edtinged dut te Meupiya ne Tudtul.

<sup>17</sup> Su ayan ne minge etew se egkesihiran kedi, ne ebpenurù dan mekeatag ki Hisu Kristu su apey sikandan ke ebpekekamal dut te minge etew. Iyan dan kunean ke ayan se ed-ul-ulaan dan ne ebpekeruntu te keresayan ku kayi te bilengguan.

<sup>18</sup> Ugaid ne misan iring ketà, ne ebeleharen. Su meupiya meraat pà se ed-epasan dan asal ne ibpesabut dan ke Meupiya ne Tudtul mekeatag ki Hisu Kristu, ne ketà ne egkehalew a. Uya, ne warà mulà sanggel din se kegkehalew ku,

<sup>19</sup> su netuenan ku te misan egkerehenan a ne ebpekeliyu a ibpepevayà te kebpengeningeni niyu kedi wey ke tavang dut te Kedesenan ne Ebpetuntul te Menusiya ne ke tavang ded ni Hisu Kristu.

<sup>20</sup> Su dekelà se egkepenareng ku wey ke sarig ku te ebpeketuman a rut te langun ne insarig te Eleteala kediey su apey warà kegkeyeyai ku. Nasi pà se iyan ku kiyug ne ed-iseg pà ke kewalew ku te ebpesabut te Meupiya ne Tudtul su apey guntaani wey ketà te hewii ne ebpekeuma ne siaken se puunan te kegkeryù ki Hisu Kristu taman te biviyag e pà etawa misan ebpatay a.

<sup>21</sup> Su gewii te kayi e pà te ampew te dunya, ne si Hisu Kristu rà se dekelà te hinawa ku. Ugaid ne embiya ebpatay a ne meupiya pà su ebpekelintad a diyà te kandin.

<sup>22</sup> Ne embiya kiyug te Eleteala se ked-ubpà ku pà lavew kayi te ampew te dunya, ne tembù pà engketà su ruen pà ibpehelevek din kedi. Embiya ebpepemilien a te ebpeubpaan pà kayi te dunya etawa ebpatay, ne kenà ku egketueanan ke endei rapit kayi se meupiya.

<sup>23</sup> Su iring te nevaad se hinawa ku, su ruen arà se egkesuat ad ne ed-awà kayi te ampew te dunya ne ebpekiduma en ki Hisu Kristu su arà en iya ke meupiya te langun.

<sup>24</sup> Ne ruen ded maan arà se hinawa ku te ed-ubpà pà lavew kayi te ampew te dunya su apey ku egketevangi pà sikiyu.

<sup>25</sup> Ne geina te ruen pà lavew egkeetehan ku keniyu, ne netueanan ku te kiyug te Eleteala se kebpekeubpà ku pà kayi te ampew te dunya su apey a ebpeketavang pà te kebmeilut te sarig niyu wey apey ebpekeiseg dema ke kehelawan niyu ki Hisu Kristu.

<sup>26</sup> Ini se kiyug ku su apey ketà te ebpekebalak kiyu en ne ebpekeryù kew ki Hisu Kristu su mekeatag te ini.

<sup>27</sup> Na memekebalak kiyu ve se kenà, ne itahù niyu te itungan se iyan niyu rà ul-ulaa ke edait ne ulaula rut te minge mibperetiya te Meupiya ne Tudtul mekeatag ki Hisu Kristu. Ketà ne misan ebpendiyan a te keniyu etawa kenà, ne ke tudtul mekeatag keniyu ne ebpekeuma kayi te kedi ne warè en ebpekesawug ne meraat su seveka rà ne neuyun kew en dut te sarig niyu ki Hisu Kristu, ne ebpetebtevangey kew en te edtindag dut te Meupiya ne Tudtul ne mibperetiya niyu.

<sup>28</sup> Ne kenà niyu igkeandek ke kunterà niyu. Su embiya kenà kew egkeandek kandan ne arà ke tuus ne ibpekita te Eleteala kandan te edtevanan dan ne edusaan dan te Eleteala, ugaid ne sikiyu ne ebpeketalaw su Eleteala se edtavang keniyu.

<sup>29</sup> Su mibehayan kew en te Eleteala te ralan te kebperetiya ki Hisu Kristu su apey sikandin se egkeryù. Ugaid ne kenà arà dà se ralan te kebperetiya se imbehey rin, su mibehayan kew rema nikandin te ralan te kebpekid-unung te keresayan din su apey sikandin se egkeryù.

<sup>30</sup> Na ketà be ne nekeamung kew kedi te ebpekibunù ki Setanas iring te nekita niyu ma ke kebpekibunù ku dut te riyani e pà te keniyu wey ini se egkerineg niyu guntaani mekeatag te keresayan ne ebpevayaan ku.

## 2

### *Ke Kebpeembavà ni Hisu Kristu se Ed-iringan Tew*

<sup>1</sup> Netueanan ku te mibmevaher se hinawa niyu egenat te kegkeseveka niyu ki Hisu Kristu wey nehalew kew su ingkelimù kew nikandin. Ne egkeheram niyu ke tavang ne riyà ebpuun te Kedesenan ne Ebpetuntul te Menusiya su ke ked-ubpà din kayi te lawa niyu, ne ebpekita kew en te kegkeyru niyu wey kebpelelimimuey.

<sup>2</sup> Na ed-upiyan niyu nevenar ke hinawa ku kayi te ibpeiseg niyu pà ke kegkeseveka te itungan niyu, ke kebpelelimimuey niyu wey ke kegkeuyun te hinawa niyu te ebpesabut dut te Meupiya ne Tudtul.

<sup>3</sup> Kenà be egkepakey ne iyan niyu ed-ul-ulaan ne ed-umamin te langun taman etawa ebpendantal. Ugaid ne ipeembavà niyu ke hinawa niyu, ne edati niyu ke minge ruma niyu.

<sup>4</sup> Kenà iyan niyu rà pegitunga ke keupianan niyu su pegitunga niyu red dema ke keupianan te ruma niyu.

<sup>5</sup> Iringi niyu si Hisu Kristu su mibpeembavà ke hinawa rin.

<sup>6</sup> Misani igenat dà te pehaney ne Eleteala si Hisus, ne warà din pegitunga te intindag din te sikandin ne Kerenan.

<sup>7</sup> Ugaid ne mid-ewaan din ini riyà te langit,

ne mibpeembavà sikandin

su mibpebaluy ne etew,

etew ne iring te kevevaan ne sugsuhen.

<sup>8</sup> Ne ketà te kebpebaluy rin ne etew

ne mibpeembavà sikandin  
 kayi te kebperumaruma te Amey rin ne Eleteala  
 taman te kinepatey rin  
 te kinelansang kandin  
 diyà te pinebelavag ne kayu.

<sup>9</sup> Tembù be impepurù sikandin te Eleteala  
 diyà te pinekemepurù te langun,

<sup>10</sup> su apey ke langun ne edeyù kandin  
 misan ke ed-ubpà diyà te langit  
 etawa kayi te ampew te dunya  
 etawa ayan se keninyan te insekednar,  
 langun ne ebpenimbuel diyà te sineruwan ni Hisus  
 se edeyù kandin.

<sup>11</sup> Ke langun ne edsamasama egkahi te  
 si Hisu Kristu ke Kerenan dut te langun  
 ne ketà ne egkereyù dan ke Eleteala ne Amey tew.

*Ini ne Mekeatag te Sikitew ne Menge Mibperetiyya ne Iring te sulù ne Egkerayahan ke Merusirem kayi te Ampew te dunya*

<sup>12</sup> Engketà be menge suled ne igkelimù ku, iring dut te kebperumaruma ni Hisu Kristu te Amey rin ne Eleteala ne ebperumaruma kiyu rema. Gewii te keninyan e pà te keniyu ne mibperumaruma kew rut te penurù ku keniyu, ne wey kew pè be maa kenà mebperumaruma dut te penurù ku ke warà ad. Ibpereyun niyu te ed-ulaula ke kedtuman niyu te kiyug te Eleteala keniyu, ne arà se kegkepasad te kebperetiyya niyu. Ne ul-ulaa niyu ini egenat te dekelà ne adat niyu te Eleteala wey ke kegkeandek niyu te edsurang te lalag din.

<sup>13</sup> Su ke Eleteala ne ed-ubpà diyà te hinawa niyu ne edtavang keniyu, su sikandin se ebehey keniyu te kiyug te ebperumaruma kandin wey ke baher te kedtuman ketà.

<sup>14</sup> Ne kayi te langun ne ed-ul-ulaan niyu, ne ul-ulaa niyu te warà pemivihan ne kenà kew pekidlawan,

<sup>15</sup> su apey warà ed-isuhat keniyu, nasi pà te ebpuun dut te meupiya ne perangey niyu ne egkekita ran te sikiyu ne anak te Eleteala. Misan ed-ubpà kew rut te menge etew ne bigkug se itungan wey meraat se perangey ran kayi te ampew te dunya, ne iyan iya dait ne egkekita ran ne metilak se hinawa niyu wey metidtu se ulaula niyu su sikiyu ne iring te bituen ne edsilaksilak te merukilem.

<sup>16</sup> Su ketà ne ebpesebutan niyu kandan ke Meupiya ne Tudtul ne ebehey te umur ne warà edtemanan din. Embiya ini se ed-ul-ulaan niyu ne ruen kewagib ku te edantal mekeatag keniyu ketà te hewii ne kedlived ni Hisus su sikiyu ke tuus te miberepantag ded ke kinerumerasey ku.

<sup>17</sup> Kalu ke ed-imetayan a mekeatag kayi te helevek ku te Eleteala, ugaid ne embiya ini se ibped-ulaula kedi ne ini se lengesa ku ne edtudà ketà te ked-imetayi ran kedi ne iring ini dut te inumen ne idtahù tew rut te idrenà ne ibehey te Eleteala su apey egkepasad. Ne ke sarig niyu ne iring te arà se idrenà ne ibehey niyu te Eletela, tembù be kenà a egkemutu nasi pà te egkehalew a elin keniyu su ke kebpatay ku ne arà se ed-imasad te idrenà ne ibehey niyu te Eleteala.

<sup>18</sup> Engketà be arà ne misan ebpatay a ne kenà kew kemutu ugaid ne kehalew kew elin kedi.

*Ini ne Mekeatag ki Timoteo wey si Ipapruditu ne Ibpependiyà ni Pablo te menge etew te Inged ne Pilipus*

<sup>19</sup> Duen kiyug ku te kenà meuhet ne ibpepengkeniyan ku si Timoteo te keniyu embiya idluhut te Kerenan tew ne si Hisu Kristu, su apey ketà te kedlived din kayi ne egkerineg ke tudtul mekeatag te sikiyu ne arà se igkehalew ku.

<sup>20</sup> Sikandin dà dut te menge ruma ku kayi se ebpekepegitung te keupianan niyu.

<sup>21</sup> Su ke menge ruma ne iyan dan ibpeuna te itungan ne ke kandan ne keupianan ne kenà arà ke ibpeulaula kandan ni Hisu Kristu.

<sup>22</sup> Ugaid ne si Timoteo ini ne netuenan niyu en te ke ulaula rin ne meupiya, su iring sikandin te tuney ne anak ku te edtavang kedi te ebpesabut dut te Meupiya ne Tudtul.

<sup>23</sup> Tembù be embiya egketueanan ku ke engkey se egkepesaran te kukuman kedi, ne arà dà ne sikandin se ibpepengkeniyan ku te keniyu.

<sup>24</sup> Ne menu ma ke idluhut ni Hisu Kristu ke Kerenan tew ne kenà meuhet ne ebpekepengkeniyan a rema te keniyu.



<sup>25</sup> Ugaid ne ini se suled tew ne si Ipapruditu ne ibpeuli ku en te mehaan. Sikandin ini ne iring en iya te tidtu ne ari ku su midtavang sikandin kedi te kebpekibunu ki Setanas dut te kebpesabut dey rut te Meupiya ne Tudtul, ne sugshuen niyu sikandin ne impepengkayi niyu te edtavang kediey.

<sup>26</sup> Ne ibpeuli ku sikandin su egkelimengawan en keniyu, ne neu ru sikandin su nerineg niyu te nekedaru sikandin kayi.

<sup>27</sup> Ne benar rema ne midaru si Ipapruditu su deisek samà ne ebpatay, ugaid ne ingkeyru sikandin te Eleleala ne neulian ded. Ne kenà sikandin dà se ingkeyru te Eleleala su siaken dema, su embiya nememenu sikandin ne dekelà pà maa ne kemutuwan ku.

<sup>28</sup> Tembù be iyan ku kiyug ne ibpeuli ku en sikandin su apey kew egkehalew ketà te ebpekebalak kew. Ne embiya egkehalew kew ne egkeawà en ke kegkeuru ku.

<sup>29</sup> Ne ketà te kebpekeuma rin ne gelhelawa niyu sikandin su tidtu ne suled tew sikandin egenat te kebperetiyya rin te Kerenan tew. Ipekita niyu te ked-adat niyu te menge etew ne iring ki Ipapruditu.

<sup>30</sup> Su deisek dà ne ebpatay en sikandin te kedtuman din dut te helevek din ki Hisu Kristu. Ne inselakan din ke umur din te edtavang kedi su apey sikandin ke timbang sikiyu ne edtavang kedi.

### 3

#### *Etditduwen kiyu te Eleleala Egenat te Kedsarig tew ki Hisu Kristu*

<sup>1</sup> Na menge suled, ruen pà ebpetenturan ku keniyu, layun kew kehalew te mibpekidseveka kew en ki Hisu Kristu ke Kerenan tew. Kenà ku igkebungas te misan egkesulit ku en ke neuna ne lalag ku keniyu su embiya edumaan niyu ini ne baag keniyu ne kenà kew egkeekalan.

<sup>2</sup> Uram kew dut te menge etew ne ed-ingaranan ku te menge asu su meraat se ed-ul-ulaan dan su ibpehes dan dut te penuru dan te embiya kenà kew ebpeetus ne kenà kew kun egkevaluy ne sakup te Eleleala.

<sup>3</sup> Ne up-upiyya kew ve su kenà arà ke tuus te tidtu ne sakup te Eleleala, su ke tidtu ne sakup din ne sikitew se ebpengarap kandin ibpepevayà te tavang te Kedeseenan ne Ebpetuntul te Menusiyà wey ruen kegkehalew te hinawa tew egenat ki Hisu Kristu. Su sikandin dà se edserihan tew su apey kiyu mekeliyu te kedusa te salà tew, ne kenà ke kedtuman te penduan iring te kebpeetus te lawa tew.

<sup>4</sup> Su embiya ke ed-ul-ulaan tew rà se edserihan tew te ebpekeliyu, ne ebpekeliyu ad iya. Ne embiya ruen etew ne iyan din pegitung ne ebpekepeliyu sikandin sabap dut te ed-ul-ulaan din, ne neliyuwan ku pà sikandin.

<sup>5</sup> Iyan ku kegkahi ketà su tidtu ne Hudiyanen a su ke lukes ku ne Hudiyanen, tembù be dut te ikewalu pà ne hewii dut te kineenaka kedi ne mibpeetusan ad. Ini se menge lukes ku ne inenan ni Binhamin ne anak dut te kepuun dey ne si Israyil. Uya tidtu a ne Hudiyanen ne midtuman ku ke penduan ne intahak ki Moises su senge etew a ne Paresiyu.

<sup>6</sup> Mid-amin ku se kedtuman ku taman te mibpemekeiran ku ke menge etew ne mibperetiyya en ki Hisus su kenà dan edtuman dut te penduan. Warà senge etew rà ne ebpekeisuhat kedi mekeatag te penduan su netuman ku langun.

<sup>7</sup> Ugaid ne langun arà se midserihan ku pehaney te ruen atag din, ne guntaani ne birang warà en atag din. Na midsembian ku en be arà te dekelà se lalaw rin ne helevek ku ki Hisu Kristu.

<sup>8</sup> Ne kenà arà dà su langun en ne birang warà en atag din su geina te neimemanan ku en te warà repeng din arà se kedsarig ku ki Hisu Kristu ke Kerenan tew. Su ketà te midsarig ad ki Hisus ne mid-engkeran ku en ke langun ne midumaan ku su timbang ripet ne intumbag en su apey a eduma ki Hisus

<sup>9</sup> wey apey a ebpekidseveka kandin. Su kenà ke keduma ku rut te penduan ne iyan kedtengteng te Eleleala kediey ne metidtu, ugaid ne ke kedsarig ku rà ki Hisu Kristu. Su ibpetidtu a te Eleleala su sabap dut te kedsarig ku ki Hisu Kristu.

<sup>10</sup> Su iyan ku rà kiyug ne egkeheram ku ke tavang ni Hisu Kristu kayi te kediey wey ke gehem din guna su nevanew en sikandin dut te minatey. Egkiyuhan ku rema te edtigker ke rasey iring ki Hisus misan ibpatay ku iring kandin,

<sup>11</sup> su egkepenareng ku te embiya ebpatay a ne ebenawen e red te Eleleala su apey a ebpekeubpà diyà te kandin.

*Insempità ni Pablo te langun tew ne mibperetiyya ne iring kiyu te Etew ne Mid-amung te Egkuya ne Ebpelelahuy taman te Edtemanan*

<sup>12</sup> Kenà be iyan ku kegkahi ne neketuman ad te langun wey kenà ku egkekahi te warè en kurang ku te keduma ku ki Hisus. Ugaid ne ebpeketehele e pa se edtuman te kiyug ni Hisu Kristu su apey a ebpeketelema dut te intail din kedi su mibaluy a nikandin ne sakup din.

<sup>13</sup> Menge suled ku, kenà ku ebpegitungen te netuman ku en ke langun, ugaid ne ini rà se netahu te hinawa ku ne ebeleharan ku en ke mid-ulaula ku su edtemtemanen ku pa se hinawa ku te edtuman te kiyug ni Hisu Kristu kedi.

<sup>14</sup> Su iring dut te etew ne ed-amung te egkuya ne editilangeng e pa su apey ku egkekuwa arà se ibehey te Eleleala kedi ne arà se behu ne umur tew su apey ki ebpekeubpa kandin diyà te langit sabap dut te mid-ulaula ni Hisu Kristu.

<sup>15</sup> Arà ne itungan ne iyan din dait te langun ne sikitew ne midtamel en se peretiyya rin. Ugaid ne embiya ruen keniyen te keniyu ne kenà egkeuyun, ne ke Eleleala se ebpesabot kandin dut te benar.

<sup>16</sup> Ugaid ne iyan iya se ebperumdumaan tew ke langun ne nesebutan tew ne egkiyuhan din.

<sup>17</sup> Menge suled ku, iyan niyu iringi ne ulaula ku. Impekita rey keniyu ke nekesuhat ne ulaula, tembù be sipata niyu ke menge etew ne eduma en kayi.

<sup>18</sup> Ruen nekahi ku en keniyu pehaney te ruen merakel ne etew ne ed-ulaula te meraat ne egkunterà dan ki Hisu Kristu su edsudian dan ke kinepatey rin riyà te pinebelavag ne kayu. Kenà kepipira ku rà ini intarem keniyu ne misan guntaan ne igkahi ku keniyu te egurebpad se luwà ku.

<sup>19</sup> Ayan ne menge etew ne iyan dan egketemanan se apuy nerakà, su iyan ebayabayà kandan ne ke kedtuman dan dut te kiyug te kememenusiyai. Ibpereyudeyù dan ke ebpekeyeyà kandan, ne iyan dan dà igkeinesa ke egkiyuhan dut te menge etew kayi te ampew te dunya.

<sup>20</sup> Ugaid ne langun tew te tidtu ne mibperetiyya ki Hisus ne kenà iring ketà, su misan ed-ubpa kiyu kayi te ampew te dunya ne ebpendiyà ki te surugà ne ke tidtu ne ubpaan tew. Ne riyà ebpuun dema ini se ebperengen tew ne Kerenan tew ne si Hisu Kristu ne mibpeliyu kenitew.

<sup>21</sup> Ne ketà te kedlived din, ne ebeluyen din ke lawa tew ne ebpatay iring dut te lawa rin ne kenà ebpatay. Egkegaga rin te ed-ulaula ini ibpepevyà dut te gehem din te ebayabayà dut te langun taman.

## 4

*Migkehiyan ni Pablo ke menge Etew Riyà Te Inged ne Pilipus te Mebmeilut se Kegawed Dan ki Hisu Kristu*

<sup>1</sup> Engketà be menge suled, ne embiya iyan tew rekela ne ebperengen si Hisu Kristu, ne ibmeilut se kegawed tew kandin ne edtinidtuwanan tew se keduma kandin. Dekela ku sikiyu te hinawa ne kiyug ku ne ebpekebalak kiyu en su sikiyu se igkehalew ku wey sikiyu red ke timbang tendan te helevek ku.

<sup>2</sup> Ebuyen ku te sikiyu Udiya ki Sintiki ne mebpetunteyey kew en su edsuled kew sabap dut te kedsarig niyu ki Hisu Kristu.

<sup>3</sup> Ne sikuna ne megeget ne ruma ku, ne tavang ka te ebpedtuntey kandan. Su imamin dan ke hinawa ran te edtavang kedi te ebpesabot dut te Meupiya ne Tudtul. Uya, sikandan engki Klimen wey ruma pa ne layun edtavang kedi. Nekesurat en te Eleleala ke ngaran dan ketà te riberu ne edsuratan din te menge ngaran te etew ne nevehayan en te umur ne warà edtemanen din.

<sup>4</sup> Ne layun kew mebmehalew su atag dut te mibpekidseveka kew ki Hisu Kristu ke Kerenan tew. Ne egkesulit ku pa maa te egkahi te layun kew mebmehalew.

<sup>5</sup> Peketulanged kew dut te langun ne etew. Mehaan en edlived si Hisu Kristu ke Kerenan tew.

<sup>6</sup> Kenà kew egkeuru te misan engkey en, ugaid ne ipengeningeni niyu riyà te Eleleala mekeatag te langun ne egketemanan niyu. Buyua niyu diyà te kandin te langun ne kurang niyu, ne peselemati niyu sikandin dut te ibehey rin.

<sup>7</sup> Embiya arà se ed-ul-ulaan niyu ne ebeyan kew te Eleleala te merinew ne itungan, ne arà se kerinew ne ibehey rin ne kenà egkesagkew te itungan dà te etew. Ini se ed-ul-ulaan te Eleleala su ebentayan kew nikandin apey warà meraat ne ebpeketevù diyà te itungan niyu sabap dut te mibpekidseveka kew ki Hisu Kristu.

<sup>8</sup> Na ini rè be, menge suled, se mewri ne igkahi ku keniyu. Iyan niyu pegpegitunga ke menge ulaula ne meupiya ne dait ne egkereyù, ke menge ulaula ne benar, ke menge ulaula ne ruen atag din, ke menge ulaula ne metidtu, ke menge ulaula ne metilak su warà

amut din ne meredsik, ke munge ulaula ne igkeeyami wey munge ulaula ne egkeedatan su metinevangen.

<sup>9</sup> Ne langun dut te nehuruwan niyu kayi te penurù ku abpeg ke nerineg niyu kayi te kedì wey ke nekita niyu ne ulaula ku, ne arà be se dumai niyu. Su embiya ini se ed-ul-ulaan niyu, ne ebpekerinewen te Eleteala ke hinawa niyu su sikandin ne keninyan te keniyu.

*Mibpeselematan ni Pablo ke munge etew diyà te Inged ne Pilipus dut te Tavang ne Impeewit dan kandin*

<sup>10</sup> Nehalew a nevenar ne dekelà se kinereyù ku ki Hisu Kristu ke Kerenan tew su misan neuhet en ne ruen en maa nekeuma ne ibpekita niyu te ruen ded hinawa niyu te edtavang kedì. Netuenan ku se kenà a niyu egkelipatan, ugaid ne guntaani pà ne nekeuma su warà dalan te kebpeewit niyu.

<sup>11</sup> Ne kenà ve iyan ku kegkahi kayi ne ebpeketuenan ku se ruen kurang ku, su nelayaman ku te edtigker se piya engkey se egketemanan ku.

<sup>12</sup> Neseharan ku en se meninit, ne neseharan ku en se warà egkepemengà. Ne nehuruwan ku te Eleteala te edtigker te piya engkey en se egketemanan ku, egkevulung e pà se egkevital etawa ed-uraren wey meirù.

<sup>13</sup> Misan engkey en se ebpekerumpak kedì ne egketigkeran ku su ke gehem ni Hisu Kristu ne iyan edtavang kedì.

<sup>14</sup> Ugaid ne misan iring ketà ne meupiya nevenar ini se impeewit niyu su edtavang kew te keresayan ku.

<sup>15</sup> Su sikiyu ne munge etew ne an te Pilipus ne netuenan niyu te igenat pà dut te kinerudsù ku te ebpenudtul te Meupiya ne Tudtul keninyan te keniyu ne misan ketà te kineawà ku en riyà te inged ne Mesidunya ne warà ruma pà ne midtavang kedì ke kenà sikiyu rà. Sikiyu rà ne mibperetiyaya se midtavang kedì te kurang ku.

<sup>16</sup> Ne misan ketà te riyān ad te Tiselunika, ne kenà kew keseveka rà mibpeewit te tavang kedì.

<sup>17</sup> Kenà iyan ku kineravit dut te tavang niyu kedì ne egnganey e pà lavew keniyu, ugaid ne iyan ku igkehalew dut te tavang niyu ne arà se idtendan te Eleteala ne ibehey keniyu riyà te surugà.

<sup>18</sup> Na guntaani ne warà en egkepemengà ku ketà te impeewit niyu ki Ipapruditu su midsawadsawad en. Ne ini se imbehey niyu kedì ne iring te ruen imbehey niyu te Eleteala ne meemut se kegkearek din ne midtelimà din su nekesuhat te hinawa rin.

<sup>19</sup> Ne ke Eleteala ne edserihan ku ne ke kemuney rut te langun taman ne sikandin se ebehey keniyu te langun ne kurang niyu sabap te mibpekidseveka kew ki Hisu Kristu.

<sup>20</sup> Tembù be ke Eleteala ne Amey tew se edeyuen taman te taman.

*Ke Mewri ne Lalag ni Pablo Kayi te Surat Din*

<sup>21</sup> Ebpeketuenan te langun ne munge sakup te Eleteala ne ebperetiyaya ki Hisu Kristu keninyan te keniyu ne ebppingingsà a kandan. Ne ini se munge suled tew te ebperetiyaya ne ini te kedì ne ebppingingsà dema keniyu.

<sup>22</sup> Langun ne munge sakup te Eleteala kayi te inged ne Ruma labi en ke munge suled tew ne egelevek kayi te turuhan ni Caesar ke datù kayi ne langun dan se ebppingingsà keniyu rema.

<sup>23</sup> Iyan ku ebppingeningeniyen keniyu ne ebpeneuven kew langun ni Hisu Kristu ke Kerenan tew.

Taman dà ketà ke egkehiyen ku.

*Pablo*

## **Ke Surat ni Pablo Riyà te Menge Etew te Inged ne Kulasi**

<sup>1</sup> Siaken ini se edsurat ne si Pablo. Senge etew a ne midsuhù ni Hisu Kristu ne kedsrihan din, ne ini se kinesuhù din kedì ne kiyug te Eleteala. Edsurat key ki Timoteo ini se suled tew te ebperetiyya ki Hisus

<sup>2</sup> kenyan te keniyu ne minge metinumanen ne sakup te Eleteala diyà te inged ne Kulasi ne mibpekidseveka ki Hisu Kristu.

Iyan ku kiyug ne egkeheram niyu ke tavang wey merinew ne itungan ne riyà ebpuun te Eleteala ne Amey tew.

*Ke Kebpengeningeni ni Pablo wey ke Kebpeselamat din te Eleteala Mekeatag dut te minge Etew diyà te Inged ne Kulasi*

<sup>3</sup> Uman key ebpengeningeni keniyu ne layun key ebpeselamat te Eleteala ne Amey ni Hisu Kristu ke Kerenan tew.

<sup>4</sup> Iyan dey kebpelelemati kandin ne nepenudtulan key rut te tidtu ne kedsarig niyu ki Hisu Kristu wey ke limù niyu rut te langun ne sakup te Eleteala.

<sup>5</sup> Ini se ed-ul-ulaan niyu su nevag-et ke hinawa niyu te ruen en intail te Eleteala keniyu riyà te langit. Ne ini se mibpenareng niyu igenat dà dut te pehaney en ne nerineg niyu ke benar mekeatag ki Hisu Kristu ne ini se Meupiya ne Tudtul.

<sup>6</sup> Ini imbe se Meupiya ne Tudtul se ibpemenudtul en id-eneb kayi te ampew te dunya, ne langun ne etew ne ebperetiyya ne egkevelvelewanan ke ulaula ran iring ded dema keniyu. Su nevelvelewanan ke ulaula niyu te nerineg niyu wey neheram niyu ke tavang te Eleteala keniyu.

<sup>7</sup> Ne si Ipapas iya ini ke mibpenurù te Meupiya ne Tudtul diyà te keniyu, ne senge etew rema sikandin ne egkeserihan ne sugsuhuen ni Hisu Kristu ne igkelimù dey nevenar. Ne sikandin ini ke midserihan dey ne edsuhuen su ebpenurù keniyu.

<sup>8</sup> Ne sikandin ke midtarem kenami mekeatag dut te limù niyu riyà te minge ruma niyu, arà ne limù ne riyà ebpuun te Kedesenan ne Ebpetuntul te Menusiyà.

<sup>9</sup> Tembù be igenat dà te nerineg dey arà ne layun dey en ebpengeningeni sikiyu. Ini se ebpuun dey te Eleteala keniyu ne menu ke mepayahi niyu ke engkey se kiyug te Eleteala wey menu ke mepemulai ke hinawa niyu te metidtu ne itungan su apey niyu egkekilala ke ketau ne ibpayag keniyu rut te Kedesenan ne Ebpetuntul te Menusiyà.

<sup>10</sup> Ini se ebpengeningeni rey su apey kew ebpekemanan te kiyug te Eleteala wey langun ne ed-ul-ulaan niyu ne ebpekesuhat te hinawa rin. Ketà ne ini se meupiya ne ed-ul-ulaan niyu ne ed-iseg wey ke nesebutan niyu mekeatag te Eleteala ne egkeumanan.

<sup>11</sup> Ebpengeningeni dey rema ne ke gehem te Eleteala ne warà repeng din ne ebeheren kew rin su embiya ebpekeanuyanuy kew te kemerehenan ne igalewhalew niyu rà se kedtigker niyu.

<sup>12</sup> Ne seveka pà ne kiyug ku ne deyrea niyu ke Eleteala ne Amey tew su nekeamung kew rin ne minge sakup din su apey kew egkevehayan ketà te intail din dut te minge etew ne eduma kandin ne nerayahan en ke itungan dan.

<sup>13</sup> Su impeliyu kiyu en nikandin te kerusireman ne ebeyvayaan ni Setanas ke datù te pekaid, ne in-arat kiyu nikandin ketà te kerayahan ne iyan ebayàbayà ke Anak din ne si Hisu Kristu ne igkelimù din nevenar.

<sup>14</sup> Su sabap dut te kinepatay ni Hisu Kristu ne arà imbe te nekepeliyu keyta te kedusa rut te salà tew, ne ketà ne kenà en ebpenundug ke Eleteala te salà tew.

*Langun ne Nelimbag te Eleteala ne Impepevayà din ki Hisu Kristu, ne impepevayà kandin te Kinepatay rin Mekeatag dut te Salà tew ne arà se Ralan te Kebpeked-ulit tew te Eleteala*

<sup>15</sup> Nevaluy ne etew si Hisu Kristu apey sikandin se ibpekita keytew te paras dut te Eleteala ne kenà egkekita. Ne raan en si Hisus dut te langun ne nelimbag te Eleteala ne sikandin se mepurù dut te langun ketà,

<sup>16</sup> su ibpepevayà kandin ne midlimbag dut te Eleteala ke langun ne neketahù diyà te langit wey langun ne nekeriken kayi te ampew te dunya, langun ne egkekita wey langun ne kenà egkekita, abpeg ke minge suluhuen wey ke ruma ne ruen gehem din te ebayàbayà. Langun ne nelimbag te Eleteala ibpepevayà ki Hisu Kristu su apey sikandin se egkereyù.

<sup>17</sup> Daan en si Hisu Kristu te warà pà melimbag te misan engkey en, ne langun ne nelimbag din ne kemulu pà guntaani su sikandin se mevaher ne egawed.

<sup>18</sup> Sikandin ke ulu rut te langun tew ne mibperetiyyaya, ne sikitew ne iring dut te lawa rin. Su sikandin ke Anak te Eleteala ne ebpuunan dut te behu ne umur ta su nevanew rin ded maa te minatey, ketà ne langun ne mibperetiyyaya kandin ne egkevehayan te umur ne warà edtemaninan din. Na kayi ve imbe ne netuenan tew te sikandin ke mepurù te langun taman.

<sup>19</sup> Su kiyug te Eleteala ne langun ne riyà te kandin ne riyà ded dema te Anak din si Hisu Kristu, ne ketà ne ke kegkeeteala ran ne neked-iring.

<sup>20</sup> Ne kiyug te Eleteala rema ne langun ne riyà te langit wey kayi te ampew te dunya ne ebpekidseveka maa kandin su midsuwey ran en kandin. Ne ke kebehey rin dut te Anak din si Hisu Kristu te ebpatay riyà te pinebelavag ne kayu ke ralan ne mibeelan din te ebpeked-ulit ke menge etew riyà te kandin.

<sup>21</sup> Ne sikiyu rema, pehaney ne nekepekeriyù ke itungan niyu te Eleteala su kunterà kew rin dut te ulaula niyu wey itungan niyu ne meraat.

<sup>22</sup> Ugaid ne gunteani ne imped-ulit kew en te Eleteala su sabap dut te kinepatay rut te Anak din diyà te pinebelavag ne kayu. Ne egenat ketà ne ebpekeuwey kew en te Eleteala su nelùluan en ke salà niyu, ne midtilak din en ke hinawa niyu, ne warè en igkesawey keniyu.

<sup>23</sup> Ugaid ne iyan iya se pegelepi niyu te ebpekeiseg ini se sarig niyu ki Hisu su apey kenà egkekisù ke kebperetiyyaya niyu. Kenà niyu edsuweyi ini se Meupiya ne Tudtul ne neendihan en te hinawa niyu te aney en te nerineg niyu, su warà duma ne egkepenareng tew te ebpesabut keytew te si Hisu Kristu ke ebpeleyu kenitew ke kenà ini se Meupiya ne Tudtul. Ne ini iya se Meupiya ne Tudtul ne nekeeneb en mekepenudtul kayi te dunya ne senge etew a ne si Pablo ne ebpenheewit kayi.

*Ke Tavang ni Pablo dut te Menge Mibperetiyyaya*

<sup>24</sup> Ne misan mibilanggù a su atag te kepenerù ku keniyu te kenà menge Hudiyanen, ne kenà a egkeuru su nasi pà te egkehalew a. Su egenat kayi ne keresayan ku ne egkeheraman ku ke keresayan ne kiyug ni Hisu Kristu ne egkepevayaan ku su apey egketevangan ke menge ruma tew ne mibperetiyyaya ne iring te lawa rin.

<sup>25</sup> Ne arà be se kinevehey te Eleteala kayi te gelevek ku su ebpeketavang dut te langun ne menge mibperetiyyaya, labi en ke sikiyu ne kenà Hudiyanen. Su ruen kiyug din ne ebpesabut a keniyu te langun ne nekahi rin diyà te Lalag din.

<sup>26</sup> Su igenat dà rengan ne warà etew ne netau te pegitungan te Eleteala, ugaid ne gunteani ne impayag en keytew ne menge sakup din.

<sup>27</sup> Ne sikiyu rema ne kenà menge Hudiyanen ne nekeamung ketà te mibpeyahan din. Ne warà pasar din ne keupianan ini se netahù te itungan din te ibpeuppà din si Hisu Kristu kayi te hinawa tew, ne ini se tuus te sikita ne id-amung din dut te kepurù te Eleteala diyà te langit.

<sup>28</sup> Ini ve se kedtantu rey te ebpesabut te langun ne etew mekeatag ki Hisu Kristu. Ibpemenudtul dey wey edseysayan dey ini diyà te kandan su apey ran ebpehimbena, su iyan dey kiyug ne uman senge etew ne edtamel se kedsarig din ki Hisu Kristu.

<sup>29</sup> Ini iya se ebpegelepan ku te egelevek ne embiya kediey rà ne kenà ku ini egkegaga, ugaid ne ke baher ni Hisu Kristu se ibpekegaga ku.

## 2

<sup>1</sup> Sikiyu langun ne mibperetiyyaya ne riyà te inged ne Kulasi wey keniyen te Liyudisiya abpeg ke langun ne warà pà mekekilala kedi, kiyug ku ne egketuenan niyu ke engkey se kebpegelep ku te ebpengeningeni mekeatag te sikiyu.

<sup>2</sup> Su kiyug ku ne ebmeilut ke hinawa niyu te kedsarig ki Hisu Kristu wey egkeseveka ke itungan niyu atag te kepbelimlimuey. Su embiya ini se ed-ul-ulaan niyu ne egkesebutan niyu nevenar ne kenà duwaruwa se hinawa niyu rut te benar ne nesebutan niyu mekeatag ki Hisu Kristu, ini se behu en ne impayag te Eleteala.

<sup>3</sup> Su ruen diyà te ki Hisu Kristu ke itungan wey langun ne ketampas te Eleteala, tembù be sikandin dà se ebpekesabut te ini diyà te menge etew.

<sup>4</sup> Egkehien ku ini keniyu su apey kew kenà egkeekalan dut te metau ne ebpenurù te kenà metidtu.

<sup>5</sup> Su misan warà a keniyen te keniyu, ne keniyen ded ke hinawa ku. Ne nehalew a ketà te nerineg ku ne egkeseveka se itungan niyu wey ebmeilut se kedsarig niyu ki Hisu Kristu.

*Insempità ni Pablo ke Etew ne Mevajer se Kebperetiyyaya Rin ki Hisu Kristu ne Ebpekeiring te Kayu ne Ebpekedalid ne Meupiya se Kegueyhuey Rin*

<sup>6</sup> Benar iya ne midserihan niyu si Hisu Kristu ne Kerenan niyu, ketà be ne ul-ulaa niyu ke dait te etew ne mibpekidseveka kandin.

<sup>7</sup> Embiya tidtu se sarig niyu kandin ne iyan pegingawà se ebpekeiring ka te kayu ne ebpekedalid en ne meupiya se kegueyhuey rin. Tentenuri niyu ke impesabut keniyu mekeatag kandin su apey ebpekedalid ke kedsarig niyu ne ed-iseg te meupiya. Ne layun kew peselamat te Eleteala dut te langun ne ibehey rin keniyu.

<sup>8</sup> Pemiya piya kew ve rut te minge etew ne ebpekehuyud te inesa niyu te ebpepeming dut te lalag dan ne engkungun ne meralen su apey kew egkeekali wey apey kew ebperumaruma kandan. Ugaid ne warà pantag dut te minge lalag dan su iyan dan dà ebpenurù ke betasan te minge keep-epuan dan ne riyà dà ebpuun te itungan dut te minge etew rà dè duen, su ini se ibpenurù dan ne kenà riyà ebpuun te ki Hisu Kristu.

<sup>9</sup> Ketà te mibpebaluy ne etew si Hisu Kristu ne kayi red te kandin ke langun ne riyà te Eleteala.

<sup>10</sup> Tembù be ke gehem ni Hisu Kristu se muna pà dut te langun ne mekegegehem ne ebayà bayà, ne sikandin se mepurù dut te langun ne mekegegehem. Ne sikiyu ne mibperetiya kandin, ne warà kurang niyu su ruen keykew dut te langun ne riyà te kandin sabap dut te mibpekidseveka kew kandin.

<sup>11</sup> Ruen betasan te minge Hudiyanen ne ebpemeetus dan su tuus te sikandan ne minge etew te Eleteala. Ugaid ne ke tuus ne mid-ulaula ni Hisu Kristu kayi te keytew te mibperetiya kiyu kandin ne impeliyu kiyu nikandin dut te ebpengunguripen keytew ne meraan ne pegitungan tew.

<sup>12</sup> Su ketà te kinepebunyag tew ne iring te nekeruma kiyu ki Hisus te minatey wey inleveng. Ne ketà maa se kinehemew tew en kayi te wayig ne iring maan arà te nekeruma kiyu ki Hisus te neuyag te behu ne umur su sabap dut te kedsarig tew te gehem te Eleteala ne iyan mibanew ki Hisu Kristu dut te minatey.

<sup>13</sup> Su pehaney ne iring kew te minatey riyà te etuvangan te Eleteala su warà kew pà mekeliyu dut te salà niyu wey warà netuenan niyu mekeatag te impasad te Eleteala su kenà kew ma Hudiyanen. Ugaid ne gunteani ne nevehayan kew en te Eleteala te behu ne umur iring ki Hisu Kristu, su sabap dut te kedsarig tew kandin ne pinesahad kiyu en dut te langun ne salà tew.

<sup>14</sup> Pehaney ne ruen penduan te Eleteala ne ebperumaan din keytew, ugaid ne geina te nekerimpas kiyu ketà te insuhù din ne arà be imbe se ked-isuhata te Eleteala keytew te kewagib. Ugaid ne gunteani ne in-awà en te Eleteala ke ked-isuhat din keytew te minge mibperetiya su sabap dut te kinapatey ni Hisus ketà te pinebelavag ne kayu.

<sup>15</sup> Ne sabap dut te kinapatey rin ne midtalew rin si Setanas wey ke minge edsugsuhuen din, ketà ne impekita ni Hisus te in-awà din ke ketehel dan su midtalew rin sikandan diyà te etuvangan te langun.

<sup>16</sup> Na tembù be arà, kenà kew pemineg te idsawey ran keniyu te kenà kew eduma te edtanud te merakel ne liyen mekeatag te egkeenen wey inumen wey ke ebperumaan kew nikandan te edtanud te minge hewii ne edtenuran dan mekeatag te behu ne sevang wey minge hewii ne edtenuran dan te ebpegevururan wey hewii ne edtenuran dan te id-imeley ran.

<sup>17</sup> Su langun kayi ne upama ke impenurù dengan mekeatag te engkey se ebpekeuma. Ne si Hisu Kristu ne ke ketumanan dan ne nekeuma en, tembù be eduma kiyu kandin.

<sup>18</sup> Kenà kew egkeekali dut te minge etew ne egkahi te warà pantag niyu ne kenà niyu dait se edtuney ebpengeningeni riyà te Eleteala ne kayi kew rà tawag te minge suluhuen su apey sikandan kun se ed-ewit dut te ebuuyen niyu diyà te Eleteala. Egkehiyen dan ne impeseilew te Eleteala kandan ini se penurù dan, ugaid ne kenà kew ebpehimbena su ini ne minge etew ne minge mepereyù su iyan dan ibpenurù ne kayi rà dè duen te itungan dan ne kenà egenat te Eleteala.

<sup>19</sup> Su ke etew ne iring ketà ne kenà en eduma ki Hisu Kristu ne iyan tew ulu te langun tew ne mibperetiya kandin ne sikitew ne iring te lawa rin. Ne si Hisus ke ulu ne ebehey te lawa te langun ne kebpekepeiseg din ibpepeyavà te uhat wey keseg din apey ebmetua iring te kiyug te Eleteala ne ebpetemanan kenitew.

*Ne Sikitew ne Tidtu ne Mibperetiya ki Hisus ne Iring te Nekeunung ki Kandin te Kinapatey rin wey Neuyag ki rema te Kinekeuyag din*

<sup>20</sup> Na sikiyu ne mibperetiya ki Hisus ne iring te nekeunung kew te kinapatey rin. Ne arà be se impeliyu kew rut te betasan te minge etew ne edtanud te suhù te minge ruma ta ne kenà egkekita. Ne meambe ke ebpepeming kew lavew te liyen dan ne egkahi te,

<sup>21</sup> "Pemeli ne egewaran ini, ne pemeli ne egkeenen arà."?

<sup>22</sup> Ayan ne pemelii ne mibèbeelan dà te etew. Su iyan benar, ne upama ke egkeenen wey inumen ne warà atag te liiyen. Su imbehey te Eleteala ne ibpekaan wey ibpeinum din kenitew ne embiya egkeamin en ne warè en.

<sup>23</sup> Kayi te itungan te menge etew ne edtanud te liiyen ne ruen keupianan dan. Su egkahi ran te dait ne igkerupet te lawa ran se edtumana ran te liiyen wey ibpeembavà dan te hinawa ran ne tuus te ebpengarap dan te suluhuen te Eleteala. Ugaid ne ini se kedtanud dan te liiyen ne kenà ini se ebpeketavang kandan te ed-eren te kiyug dan te kememenusiyai.

### 3

<sup>1</sup> Na ketà te neuyag ded si Hisu Kristu, ne sikitew se mibperetiyyaya kandin ne nekeamung en dema su duen en behu ne umur tew. Tembù be iyan tew ibpeuna te itungan tew ke impenehana rin kenitew riyà te langit, su riyà si Hisu Kristu te rapat te egkekewanan te Eleteala se ed-amung te ebayàbayà kandin.

<sup>2</sup> Ne arà be imbe se riyà tew rà te langit ke igkenuhumi tew, ne kenà kayi te ampew te dunya.

<sup>3</sup> Su sikitew ini se mibperetiyyaya ne ebpekeiring te nekeunung ki te kinepatey ni Hisus, ugaid ne neuyag ded ma. Su ruen behu ne umur tew ne warà pà mebpayag ne ebentayan en te Eleteala su atag ki Hisu Kristu.

<sup>4</sup> Ne si Hisu Kristu se ebehey keytew te behu ne umur, ne ketà te kedlived din kayi ne egkeheram tew rema te raman te keupiya rin su ebpekeruma kiyu kandin.

*Ini ne Mekeatag te Daan en ne Mid-ulaula tew te warà ki pà Mehperetiyyaya wey ke Behu ne Ed-ul-ulaan tew guntaan te Mibperetiyyaya ki en*

<sup>5</sup> Tembù be engked kew se ed-ulaula te meraat ne ke daan en ne ulaula te menge etew kayi te ampew te dunya iring dut te kebpengingniyug wey langun ne meredsik ne ulaula ne igkesuat te menusiyà. Ne engkeri niyu ne betasan ayan se kegkeima, su embiya kenà niyu ed-engkeran ne ke kearen ne igkesuati niyu ne arà se egkevaluy ne kerenan niyu.

<sup>6</sup> Ini ve imbe ne menge ulaula se ked-isuhat te kedusa te Eleteala rut te menge etew ne ed-ulaula ketà.

<sup>7</sup> Ne sikiyu te warà kew pà mehperetiyyaya ne neked-ulaula kew red dema te ini ne menge ulaula.

<sup>8</sup> Na ini te mibperetiyyaya kew en, ne engkeri niyu en ayan ne menge ulaula. Kenà kew egkeepes, kenà kew egkererengiti, wey iawà niyu te itungan niyu se kebpepekaid te ruma niyu. Engked kew se edlivak te ruma niyu, ne kenà kew egkahikahi te misan engkey en ne temperasà.

<sup>9</sup> Kenà kew ebpetarù su ke daan ne ulaula niyu ne mid-ewaan niyu en,

<sup>10</sup> ne neketelimà kew en te behu ne itungan ne imbehey te Eleteala keykew. Ne arà be imbe se ked-um-umani te Eleteala su apey ki ebpekesabut mekeatag kandin wey apey ki egkevaluy ne iring kandin.

<sup>11</sup> Ke langun tew ne mibperetiyyaya ne warà biraan din diyà te etuvangan te Eleteala, Hudiyanen sikandin etawa kenà Hudiyanen, neetusan sikandin etawa warà, nekepengadi sikandin etawa warà nekepengadi, uripen sikandin etawa kenà uripen. Su langun tew ne mibperetiyyaya ki Hisu Kristu ne mibpekidseveka kiyu kandin, ne sikandin se ed-ubpà kayi te keytew.

<sup>12</sup> Sikiyu ke menge mibpemili te Eleteala ne nevaluy ne menge sakup din ne igkelimù din nevenar, tembù be iyan niyu ul-ulaa ke ebpekesuhat kandin. Pekita kew te kegkeyru niyu diyà te menge ruma niyu, ne peketulanged kew kandan. Ne kenà niyu ibpeuna ke hinawa niyu, ugaid ne ipeembavà niyu ke hinawa niyu rut te menge ruma niyu apey ran egkekita se keamuk niyu wey kedtigker niyu.

<sup>13</sup> Kenà kew melema rà ne egkeepes te ruma niyu misan ruen ibpuun niyu kandan, ugaid ne pesehara niyu. Iring ki Hisus te kenà din en ebpenunduhen ke salà tew, ne iring kew red dema ketà.

<sup>14</sup> Wey ke kerekdekelaan din ne ed-ul-ulaan niyu ne ke kebpelimlimuey niyu, su ini se kebpelimlimuey niyu se ebpekevagkes keniyu te kegkeseveka te hinawa niyu.

<sup>15</sup> Ne iyan niyu ebpeveyveyaan te hinawa niyu ne ke kerinew ne itungan ne riyà ebpuun te ki Hisu Kristu su apey kew egkevagesbagkes. Su arà ke kiyug te Eleteala ne mibpekidseveka kenitew ne menge mibperetiyyaya ki Hisu Kristu su iring kiyu te lawa rin. Wey kenà kiyu edlipat ne ebpeselamat kandin.

<sup>16</sup> Itahù niyu nevenar te hinawa ke langun ne nerineg niyu ne impenurù ni Hisus apey niyu egkeherami ke engkey se keupiya rin, ne ini se nehuruwan niyu ketà ne ipenurù niyu wey ibpesabut niyu rut te menge ruma niyu. Pemeyveyuka niyu ke keupiya te

Eleteala kayi te iringà niyu apey kew ebpeketavang te ruma ne etew, ne peselamat kew ve te Eleteala kayi te iringà niyu egenat dut te dekelà ne hinawa niyu.

<sup>17</sup> Ne ke langun ne ed-ul-ulaan niyu, kayi te lalag niyu etawa gelevek niyu, ne tentenuri niyu te sakup kew ni Hisu Kristu ke Kerenan tew. Ne deyrey kew te Eleteala ke Amey tew ibpepeyavà ki Hisu Kristu.

<sup>18</sup> Sikiyu ne minge meritan, edati niyu ke esawa niyu su ini ke dait ne ulaula te sikiyu ne mibperetiyyaya.

<sup>19</sup> Sikiyu rema ne minge meama, igkelimù niyu ke esawa niyu, ne kenà niyu ed-ey-eyuwa sikandan.

<sup>20</sup> Sikiyu ne minge anak, perumaruma kew te langun ne suhù te minge lukes niyu su ini se ebpekesuhat te hinawa te Eleteala.

<sup>21</sup> Sikiyu rema ne minge lukes, kenà niyu ebpengunuti se ked-ehet niyu te minge anak niyu, su kema ke edereha ke hinawa ran.

<sup>22</sup> Ne sikiyu ne minge sugshuen, perumaruma kew rut te langun ne lalag dut te edsuhùsuhù keniyu. Kenà wey kew rà ed-upiya te helevek niyu ke ebentayan kew pà su apey kew egkereyù nikandan, ugaid ne ipehenat niyu kayi te hinawa niyu su ini se dait ne ulaula dut te etew ne eduma te Eleteala.

<sup>23</sup> Ketà be ne misan engkey se egeleveken niyu, ne upiani niyu iring te ke Eleteala se edsuhùsuhù keniyu ne kenà etew rà.

<sup>24</sup> Tentenuri niyu te ruen idlalew te Kerenan tew keniyu ketà te mid-ulaula niyu, su si Hisu Kristu ke tidtu ne edsuhùsuhù keniyu ne sikandin se ebehey keniyu dut te impenehana rin.

<sup>25</sup> Ne piya engkey ne ed-ulaula te meraat, ne egkesabpet din ded su riyà te Eleteala ne warà ibpeuna rin dut te kekukum din te minge etew.

## 4

<sup>1</sup> Na sikiyu ne minge etew ne ruen sugshuen, ne up-upiani niyu wey peketidtu kew te kebpenheewit niyu kandan. Su tentenuri niyu te ruen ded dema mepurù niyu riyà te langit.

### *Ruma pà ne Pemandù ni Pablo ne Ebperumaan Din*

<sup>2</sup> Na layun niyu ibpelevundus ke kebpeneningeni niyu ne kenà kayi rà te bèbà niyu su egenat imbe te hinawa niyu, ne kenà kew lipat se ebpeselamat te Eleteala.

<sup>3</sup> Kenà kew rema lipat se ebpengeningeni kenami su apey key ebehayi te Eleteala te ralan te kebpsabut dut te tudtul ne warà pà mepayahì dengan mekeatag ki Hisu Kristu. Su tembù be imbe ini a te bilengguan su atag te kebpemesabut ku dut te tudtul.

<sup>4</sup> Ne pemuyù kew rema te Eleteala se egketevangan a su apey ini se kebpenurù ku ne melemu ne egkesebutan.

<sup>5</sup> Na up-upiya kew te ulaula niyu kenyan te minge etew ne warà pà mibperetiyyaya ki Hisu, kenà kew alang-alang se ebpemenudtul kandan dut te Meupiya ne Tudtul.

<sup>6</sup> Pegpegitunga niyu kayi te lalag niyu su apey ed-iseg ke inesa ran te ebpeming. Ne pegpegitunga niyu rema ke engkey se idtavak niyu ke ruen id-insà dan mekeatag te keniyu ne peretiyyaya.

### *Ke Ketepusan te Surat ini ni Pablo*

<sup>7</sup> Si Tikikus ini se edsuhuen ku kenyan te keniyu ne idtarem din keniyu ke tudtul mekeatag kedì. Suled tew sikandin ne igkelimù ku, ne ruma rey kayi te kebpsabut te lalag te Eleteala, ne benunuyan sikandin te helevek din.

<sup>8</sup> Iyan ku kedsuhua kandin ne apey niyu egketueni ke egketemteman dey kayi ne ebmeluag ke hinawa niyu.

<sup>9</sup> Si Unisimus ke senge etew ne ruma niyu kenyan te inged niyu se eduma kandin. Suled tew sikandin te ebperetiyyaya ne igkelimù dey, ne benunuyen sikandin dema. Sikandin ini deruwa ne edtarem keniyu ke engkey se egked-ulaula rey kayi.

<sup>10</sup> Si Aristarkus ini se ruma ku kayi te bilengguan ne ebpenginginsà ke memenu red se egketemteman niyu kenyan. Wey elin dema si Marcos ini, ke suled ni Bernabe. (Embiya ebpekeuma sikandin kenyan te keniyu ne gelhelawa niyu sikandin su arà ke ingkahi ku keniyu.)

<sup>11</sup> Si Josue ini se ed-ingaranan dema ki Jestis ne ebpenginginsà dema keniyu. Kayi te langun ne Hudiyanan ne mibperetiyyaya kayi ne ini rà se tetelu, si Aristarkus, si Marcos, wey si Josue se midtavang kedì te ebpesabut mekeatag te Edetuan te Eleteala. Ne nehalew se hinawa ku kayi te dekelà ne tavang dan.

<sup>12</sup> Si Ipapas ini ne senge etew ne ruma niyu red kenyan te inged niyu ne ebpenginginsà dema mekeatag te sikiyu. Sugshuen dema sikandin ni Hisu Kristu ne



layun ebbingeningeni te mevaher mekeatag keniyu. Ebpemuyuen din te Eleteala se ebmeilut ke sarig niyu kandin ne igkehat niyu te tivang se kedtindeg niyu embiya ruen ebpesuwey keniyu su apey warà duma ne ed-ul-ulaan niyu su ke kiyug dà te Eleteala.

<sup>13</sup> Nekita ku se mibpegelep nevenar si l'papras se edtavang keniyu wey ke menge etew riyà te Liyudisiya wey Hirapulis.

<sup>14</sup> Si Lucas, ini se duktur ne igkelimù dey langun, wey si Demas se ebbinginginsà mekeatag keniyu.

<sup>15</sup> Peketueni niyu rà dut te menge suled tew te ebperetiyaya riyà te Liyudisiya te ebbinginginsà a rema kandan. Wey riyà dema te ki Nimpa abpeg ke menge mibperetiyaya ne egkevurun ketà te valey rin.

<sup>16</sup> Embiya egkepasad niyu en te ebase ini se surat ku ne ipelaus niyu rà diyà te inged ne Liyudisiyu su apey ran egkevasa dut te ebpengevrungan te menge mibperetiyaya riyà. Ne engketà ded dema arà se surat ku riyà te kandan ne ibpeewit dan keniyu, ne besaa niyu rema kenyan te inged niyu.

<sup>17</sup> Ne kehiyi niyu pè be si Arkipus te mebpegelep sikandin se ed-ipus dut te helevek ne impehelevek te Eleteala kandin.

<sup>18</sup> Ne siaken imbe ini si Pablo se edsurat dut te ngaran ku kayi te ketepusan, ne ebbinginginsà a dut te langun ne sikiyu. Na kenà niyu lipati se ini a te bilengguan.

Iyan ku kiyug ne egkeheram niyu ke tavang ne riyà ebpuun te Eleteala.

Arà dà taman.

*Pablo*

## Ke Neuna ne Surat ni Pablo Riyà te Menge Etew te Inged ne Tiselunika

<sup>1</sup> Siaken ne edsurat ini ne si Pablo duma ni Silvanu wey si Timoteo. Ne idsurat dey ini diyà te keniyu te inged ne Tiselunika ne mibperetiyaya te Eleteala ke Amey tew wey ki Hisu Kristu ke Kerenan tew.

Iyan dey kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala.

<sup>2</sup> Su sikami, ne layun dey ebpeelemati diyà te Eleteala mekeatag te langun niyu wey layun dey idragkes sikiyu te kebpeneningeni rey.

<sup>3</sup> Su uman key ebpeneningeni mekeatag keniyu diyà te Amey tew ne egketenuran dey ke meupiya ne ed-ul-ulaan niyu su tuus te mibperetiyaya kew iya ki Hisu Kristu. Ne egketenuran dey rema ke dekelà ne limù niyu kandin ne egkekita te meilut se gelevek niyu kandin. Ne kenà dey egkelipatan ke kedtigker niyu te keresayan su dekelà ne ebpeneregen niyu ne edlived si Hisu Kristu ke Kerenan tew kayi te ampew te dunya.

<sup>4</sup> Netuenan dey, menge suled, ne ingkelimù kew te Eleteala su sikandin se mibpemili keniyu ne egkevaluy ne menge etew rin.

<sup>5</sup> Netuenan dey ini su ke kebpekesabatut dey dut te Meupiya ne Tudtul riyà te keniyu ne kenà kayi te lalag dey rà, ugaid ne midumaan dut te gehem te Kedesenan ne Ebpetuntul te Menusiya. Ne neheram niyu ini, tembù be mibperetiyaya kew rut te kebpekesabatut dey. Ne nekita niyu rema ke meupiya ne betasan dey te riyà key med-ubpà te keniyu su langun ne mid-ulaula rey ne ke keupianan niyu.

<sup>6</sup> Ne sikami se mid-iringan niyu wey ke Kerenan tew ne si Hisu Kristu. Ne miduma kew rut te insuhù ne Lalag te Eleteala misan mibpekesekitan kew, su nengehalew kew egenat dut te Kedesenan ne Ebpetuntul te Menusiya.

<sup>7</sup> Tembù be sikiyu se nevaluy ne egkeiringan dut te mibperetiyaya diyà te inged ne Mesidunya wey Gerisiya.

<sup>8</sup> Su ibpepeyavà te kebperetiyaya niyu ne nekeeneb en ke Lalag te Eleteala diyà te menge etew te inged ne Mesidunya wey Gerisiya. Ne kenà riyà dà te kandan su medmerakel pà ne menge inged se nekerineg dut te kebperetiyaya niyu te Eleteala. Tembù be misan kenà dey en ibpenudtul, ne netuenan dan en.

<sup>9</sup> Su sikandan en se ebpmenudtul mekeatag te kegalàhalà niyu kenami ketà te kebpekeuma rey kenian te keniyu. Ne ebpmenudtul dan mekeatag dut te kebpekeengked niyu te ebpengarap te ledawan dà ne kenà tidtu ne Eleteala su apey kew ebpengarap dut te tidtu ne Eleteala ne warà kemetayen din.

<sup>10</sup> Ne ebpmenudtul dan dema mekeatag dut te kebpenareng niyu te kedlived te Anak din ne si Hisu Kristu ne egenat diyà te langit. Su si Hisu ini ke mibanew rin, ne sikandin ke ebpeiyu keyta su apey kenà kiyu edusaan te Eleteala ketà te hewii ne egkukumen din en ke kelibutan.

## 2

### *Ini ne Mekeatag te Helevek ni Pablo Riyà te Inged ne Tiselunika*

<sup>1</sup> Menge suled, netuenan niyu te kinepengkeniyan dey te keniyu ne neketavang keniyu su nevaluy ne keupianan niyu.

<sup>2</sup> Ne netuenan niyu rema ke egketemanan dey diyà te inged ne Pilipus te warà key pà mekepengkeniyan te keniyu, su mibpekesekitan key nikandan wey mibpegkeyà key. Ugaid ne misan iring ketà ne ke Eleteala se midtavang kenami, su mibag-et din ke hinawa rey te ebpgkeniyan ne ebpesabatut keniyu dut te Meupiya ne Tudtul ne riyà ebpuun te kandin.

<sup>3</sup> Su ini se impesabatut dey keniyu ne kenà egenat te tarù etawa iyan dey lakew se meraat, ne kenà dema ralan te ked-akal dey keniyu su impesabatut dey ke benar ne penurù.

<sup>4</sup> Su ini se impesabatut dey keniyu ne iyan insuhù kenami te Eleteala, su sikandin se mibpemili kenami ne insarig din kenami te ebpmesabatut dut te Meupiya ne Tudtul mekeatag ki Hisus. Tembù be ini se impesabatut dey su apey ebpekesuhat te hinawa te Eleteala ne kenà ke menge etew rà. Ne netuenan te Eleteala ne benar ini su netuenan din ke engke se kayi te hinawa tew.

<sup>5</sup> Netuenan niyu ne metidtu se kedlalag dey keniyu ne kenà dey midigdig dà sikiyu su apey niyu edumai ke ebuyuen dey, ne kenà ki engkungkun ne meupiya su apey ruen egkekuwa rey. Netuenan te Eleteala te benar ini.

<sup>6</sup> Kenà ke kedeyua niyu kenami etawa ke kedeyù te ruma ne etew se mibpemengà dey,

<sup>7</sup> misan sikami ke kedserihan ni Hisu Kristu ne dait ne edeyuen niyu. Warà dey ul-ulaa se iring ketà, ugaid ne midtuganur dey sikiyu iring te metulanged ne iney ne edtuganur te minge anak din.

<sup>8</sup> Ne geina te dekelà se limù dey keniyu ne kenà ke Meupiya ne Tudtul rà ne egenat te Eleteala se impesabut dey, su nepenehana rey te ebpatey su apey niyu egketueni mekeatag te Eleteala. Su dekelà dey sikiyu te hinawa rey.

<sup>9</sup> Ne egketenuran niyu red buwa, minge suled, ke ralan te kebpementiyari rey su merukilem meandew ne migelevek key su apey warà keniyu ebpekevayad te kegkeuyag dey te kebpemesabut dey te Meupiya ne Tudtul ne riyà egenat te Eleteala.

<sup>10</sup> Su ketà te riyà key pà te keniyu ne netuenan niyu wey ke Eleteala rema ne netuenan din te meupiya se ed-ul-ulaan dey keniyu ne minge mibperetiyyaya. Warà igkesawey te ed-ul-ulaan dey su mid-ulaula rey ke ebpekesuhat te hinawa te Eleteala.

<sup>11</sup> Ne netuenan niyu te uman seveka keniyu ne midtevangang dey iring dut te amey ne edtavang te minge anak din.

<sup>12</sup> Su mibag-et dey ke itungan niyu, ne midlangan dey ke hinawa niyu wey mibpenurù key te ed-ul-ulaan niyu ke engkey se ebpekesuhat te hinawa te Eleteala. Su nepemili kew nikandin su apey kew mekeamung dut te Edetuan din wey ke kedeyua kandin.

<sup>13</sup> Ne egkehiyen ku maa te layun dey ebpelelati te Eleteala te midtelimà kew te Lalag din. Su ketà te kebpsabut ku kayi riyà te keniyu ne warà niyu kehiya te lalag ini ne mibèbeelan dà te etew, ugaid ne mibpemingew kew ne midtelimà kew te ini ne Lalag iya te Eleteala. Su ini se Lalag din, ne ruen gehem din te edtavang te minge mibperetiyyaya su apey ran ed-ul-ulaa ke engkey se metidtu.

<sup>14</sup> Ne ini se netemanan niyu, minge suled, ne nekeiring dut te netemanan te minge etew te Eleteala ne mibperetiyyaya ki Hisu Kristu diyà te minge inged te Hudiya. Su mibpekesekitan kew rut te minge ruma niyu te inged iring dut te kebpekesekiti kandan dut te minge ruma ran ne Hudiyanen ketà te inged

<sup>15</sup> ne iyan mid-imatey ki Hisus ke Kerenan tew wey ke minge mibpelambas te Lalag te Eleteala rengan, wey mibpekeseakit keyta. Tembù be neumanan ke keepes te Eleteala kandan! Egkunteraan dan te langun ne minge etew!

<sup>16</sup> Su ibpeengked dan perem ke kebpemesabut dey te Meupiya ne Tudtul mekeatag ki Hisus dut te minge etew ne kenà Hudiyanen su apey egkepeneheewit dan te kebpekliyu ran. Tembù be mid-umanan ke salà dan taman te neuma ke edtemanan din. Ne nekeuma en ke epe te Eleteala kandan!

*Ini ne Mekeatag te Kegkelimengawi ni Pablo dut te Minge Mibperetiyyaya diyà te Inged ne Tiselunika*

<sup>17</sup> Minge suled, misan warà pà meuhet ke kineawà dey keniyu ne keniyu ne egkelimengawan key nevenar keniyu. Ugaid ne misan warà key en keniyu, ne kayi kew red lavew te itungan dey. Ne egkiyuan dey nevenar te ebpekekebalak kiyu maa.

<sup>18</sup> Su egkiyug key ne ebpengkeniyu te keniyu, ne siaken embe iya si Pablo se egkiyug nevenar. Merakel en ne hewii ne ebpengkeniyu a perem, ugaid nevangen key dut te datù te pekaid.

<sup>19</sup> Benar ini, su ke kebpereetiyyaya niyu rut te Lalag te Eleteala ne impesabut dey se inlalew kenami wey ibmehalew rey. Ne sikiyu iyan se kenà dey igkeyeyai, ugaid ne idantal dey mekeatag te kebpereetiyyaya niyu diyà te etuvangan te Kerenan tew ne si Hisus ketà te hewii ne kedlived din kayi.

<sup>20</sup> Uya, sikiyu se puunan te idantal dey mekeatag keniyu wey sikiyu se igkehalew rey.

### 3

<sup>1</sup> Ketà te kenà dey en egketigkeran ke kegkelimengawi rey keniyu, ne netahù te itungan dey te ebpelintetahak key diyà te inged ne Etenas

<sup>2</sup> ne ibpepengkeniyu dey te keniyu si Timoteo ne suled tew ne sugshuen te Eleteala ne edtavang kenami te kebpemesabut dut te Meupiya ne Tudtul mekeatag ki Hisu Kristu. Su midsuhù dey sikandin te ebag-et te hinawa niyu wey ebpeiseg dut te kebpereetiyyaya niyu,

<sup>3</sup> su apey warà keniyu ne ed-engked dut te kebpereetiyyaya sabap dut te kebpekesekiti keniyu ketà te inged. Su netuenan niyu en te ruen kebpekesekiti keyta ne idtuhut te Eleteala ne ebpekeuma kayi te keyta.

<sup>4</sup> Su gewii te kenian key pà te keniyu ne impemenundtul dey neraan te ruen kebpekesekiti keyta, ne netuenan niyu te benar su ned-ulaula en ini.

<sup>5</sup> Tembù be ketà te nerineg ku mekeatag te kebpekesekiti keniyu ne warà a meketigker, ne impepengkenian ku si Timoteo su apey ku metueni mekeatag dut te kebperetiyaya niyu. Su neu ru ad su kalu ke negaga kew en rut te penggeram ni Setanas ke datù te pekaid, ne ketà ne ke helevek dey te ebpemesabut te Lalag te Eleteala ne warà atag din.

<sup>6</sup> Na guntaani ne mid-uli en si Timoteo se ed-ewit te meupiya ne tudtul mekeatag keniyu. Su impenundtul din te mid-iseg pà ke kebperetiyaya niyu wey engketà ded dema ke kedlimù niyu dut te minge ruma niyu. Ne impenundtul din ded te layun niyu red egketenuri te sikami ne egkiyuhan niyu te ebpekibalak, iring te sikami rema ne egkiyuhan dey ne ebpekegekita kiyu.

<sup>7</sup> Tembù be, minge suled, beleharen te nerasey key wey mibpekesekitan key, su nevag-et se hinawa rey ketà te nerineg dey te mid-iseg se kebperetiyaya niyu.

<sup>8</sup> Su guntaani ne iring key te midluungan te melihet ne kumbalà su netuenan dey te meilut pà ke kebperetiyaya niyu ki Hisu Kristu ke Kerenan tew.

<sup>9</sup> Kenà dey egketuenan ke edlelahen dey te dekelà ne kebpeelemati rey te Eleteala mekeatag keniyu, su ke igkehalew rey ne ebpuun kandin ne rekdekelà su atag dut te meilut ne kebperetiyaya niyu.

<sup>10</sup> Ne merukilem meandew ne layun key ebpengeningeni te ebpekekebalak kiyu, su apey rey ed-umani embiya ruen kurang dut te kebperetiyaya niyu.

<sup>11</sup> Ne guntaani ne ibpengeningeni rey te Eleteala ne Amey tew wey ki Hisu Kristu ne Kerenan tew te ebpenehana te ralan te kebpengkenian dey te keniyu.

<sup>12</sup> Ne ibpengeningeni rey lavew te Eleteala ne ed-umanan din pà ke kebpelelimimuey niyu wey ke limù niyu te piya engkey ne etew iring dut te kerekelà te limù dey keniyu.

<sup>13</sup> Su embiya iring ketà se limù niyu, ne ebeheren din ke hinawa niyu su apey niyu ed-ul-ulaa ke engkey se ebpekesuhat te hinawa dut te Amey tew ne Eleteala. Ne ketà ne ebmetilak kew riya te etuvangan din su apey warà idsawey rin keniyu dut te hewii ne edlived si Hisu Kristu ne Kerenan tew ne edumaan dut te langun ne minge etew rin.

## 4

### *Ini ne Mekeatag dut te Minge Ulaula ne Ebpekesuhat te Hinawa te Eleteala*

<sup>1</sup> Na minge suled, ketà te kenian key pà te keniyu ne impenurù dey en keniyu ke engkey se ulaula te ked-ubpà ne ebpekesuhat te hinawa te Eleteala, ne ini ne midumaan niyu en. Ne guntaani ne ebuyen dey te umani niyu pà ke meupiya ne ulaula niyu su ini se migkahi keyta rut te Kerenan tew ne si Hisu Kristu.

<sup>2</sup> Su netuenan niyu te iyan dey impenurù ne arà se impenurù dut te Kerenan tew ne si Hisu.

<sup>3</sup> Ne ini se kiyug te Eleteala ne engked kew rut te piya engkey ne ulaula ne meraat wey pekeriyù kew rut te kebpengingniyug.

<sup>4</sup> Sikiyu ne minge meama, ne iyan nu ul-ulaa diyà te esawa nu ke edait diyà te etuvangan te Eleteala wey edait diyà te etuvangan te minge etew.

<sup>5</sup> Su apey ke ulaula niyu ne kenà iring dut te minge etew ne kenà ebperetiyaya te Eleteala ne iyan ebayàbayà kandan ne ke kiyug te lawa ran.

<sup>6</sup> Tembù be uram kew su apey kew kenà ebpekedsalà diyà te minge ruma niyu su iring kayi ne egkepenggiekan niyu ke kevenar dut te ruma niyu. Su egketenuran niyu red te imbaag dey keniyu te piya engkey ne ed-ulaula te iring ketà ne edusaan dut te Eleteala ne Kerenan tew.

<sup>7</sup> Su ke Eleteala ne kenà din iyan kebpelemi keyta ne egkevaluy ki ne minge anak din ne ed-ulaula te meraat, ugaid ne apey ta iyan ed-ul-ulaa ne ke metilak diyà te etuvangan din.

<sup>8</sup> Tembù be ke etew ne kenà eduma te ini ne ibpenurù ku ne kenà penurù te etew se id-engkenà din su iyan din id-engkenà ke penurù te Eleteala ne mibehey keniyu te Kedesean ne Ebpetuntul te Menusiyà.

<sup>9</sup> Na mekeatag be dut te kebpelelimimuey niyu te minge ruma niyu ne mibperetiyaya, ne kenà en dait ne edsurat a pà keniyu su ke Eleteala se mibpenurù keniyu mekeatag te kedlimù niyu.

<sup>10</sup> Ne benar ini su kenà ke minge ruma niyu rà kenian te inged niyu, ugaid ne langun ne minge etew te ruma pà ne inged te Mesidunya. Ugaid ne iyan dey ebuyen, minge suled, ne ed-ilutan niyu pà ke kebpelelimimuey.

<sup>11</sup> Ne ruen ruma pà ne ebuyen ku te iyan niyu itahù te hinawa ne kemelinew ne betasan. Ne kenà kew ed-amung-amung te ulaula te minge ruma niyu, ugaid ne

peketeהל kew se egelevek su apey ruen keuyahan niyu iring dut te impenurù dey keniyu.

<sup>12</sup> Su embiya ini se ed-ul-ulaan niyu ne kenà kew ebpekevuyù te igkeuyag niyu diyà te minge ruma niyu, ne egkereyù kew rut te minge etew ne warà pà mibperetiyyaya.

*Ke Kebpenurù Mekeatag dut te Kedlived ni Hisus*

<sup>13</sup> Menge suled, duen pà egkehiyen dey su apey niyu egketueni ke egked-ulaula dut te minge mibperetiyyaya ne minatey en. Ibpenuđtul dey ini su apey kew kenà egkeuru iring dut te minge etew ne warà ebpenerengen dan ne umur ne warà edtemanan din.

<sup>14</sup> Su sikita ne mibperetiyyaya ki te minatey si Hisus, tembù be ebperetiyyaya ki te ke minge mibperetiyyaya kandin ne minatey en ne ebenawen te Eleteala su apey ran ebpekeruma ki Hisus ketà te kedlived din kayi.

<sup>15</sup> Ini se impenurù dut te Kerenan tew ne si Hisus ne ibpenudtul dey keniyu: embiya kenà ki pà ebpatay dut te hewii te kedlived din kayi, ne kenà sikita se egkeuna te ebalak kandin dut te minge ruma ta ne mibperetiyyaya ne minatey en su ebpekeredsà ki.

<sup>16</sup> Su iyan egked-ulaula te arà ne hewii ne ed-umewan dut te Kerenan tew ke minge mibperetiyyaya diyà te kandin. Ne egkerineg ta rema ke ked-umew rut te pinekemepurù ne suluhuen te Eleteala wey ke dahing dut te budyung te Eleteala. Ketà ne ebpemenaug si Hisu Kristu ke Kerenan tew ne ebpuun te langit. Dutun ne egkeuna egkevanew ke langun ne mibperetiyyaya ne minatey en.

<sup>17</sup> Egkeipus arà ne edtawehen ni Hisus ke langun ne mibperetiyyaya ne warà pà minatey, ne ebpekeruma ran dut te behu pà ne nevanew en diyà te sehulapun su apey ran ebpeketelavuk dut te Kerenan tew diyà te kewkewangan. Ne diyà ki te kandin taman te taman.

<sup>18</sup> Tembù be, ini ne impesabut ku keniyu ne ibpenurù niyu te minge ruma niyu ne mibperetiyyaya su apey ran kenà egkeuru.

## 5

*Ini ne Mekeatag te Kebpenehana tew rut te Kedlived ni Hisus Kayi te Ampew te Dunya*

<sup>1</sup> Menge suled, embiya mekeatag te hewii ne kebpekeuma ni Hisu Kristu su egkukum dut te minge etew, ne kenà en dait ne idsurat ku pà.

<sup>2</sup> Su netueanan niyu en te egketekew se Hewii te kebpekeuma rut te Kerenan tew iring dut te kebpekeuma te tekawen te merukilem ne kenà egketuenan.

<sup>3</sup> Su ketà te hewii te kedlived ni Hisus ne iyan itungan te minge etew ne ebmelinew se ked-ubpà dan ne warà igkeuru ran. Ugaid ne egketekew ne ebpekeuma ke kegkereeti kandan ne warà ralan te kebpekeliyu ran. Su ke kebpekeuma dut te kegkereeti kandan ne iring te egketekew ne ebpekeuma ke belilit te meritan ne ed-anak.

<sup>4</sup> Ugaid ne sikiyu, minge suled, ne warà kew en med-ubpà diyà te kerusireman iring dut te minge etew ne kenà ebperetiyyaya ki Hisus. Tembù be ketà te ebpekeuma arà ne hewii ne kenà niyu en igketekawi iring dut te etew ne warà mebpenehana te kebpekeuma dut te tekawen.

<sup>5</sup> Su langun te sikita ne mibmerayag en ke itungan ta ne kenà iring dut te merusirem ne itungan te minge etew ne kenà ebperetiyyaya ki Hisus.

<sup>6</sup> Tembù be iyan iya se kenà ki ed-iring dut te minge etew ne edlipereng, ugaid ne ibpelevundus ta ke meupiya ne ulaula ta wey ebpenehana ki rut te kebpekeuma rin.

<sup>7</sup> Su iyan dà dait ne idlipereng te minge etew ne merukilem. Ne ketà dema ne nelayaman te minge etew te egkehubug.

<sup>8</sup> Ugaid ne nekevira en ke sikita ne mibperetiyyaya ki Hisus su mibmerayag en ke itungan ta. Tembù be ed-uram ki su apey ke kedsarig ta ki Hisus wey ke kebpelelimuey ta ne arà ke iring limbutung ta ne ebpekealang keyta dut te kebpeggeram keyta te datù te pekaid. Ne ke penerengen ta te kebpekeliyu ta rut te kedusa te Eleteala ne arà ke iring sepiyu ta ne putew ne ebmelinew ke itungan ta wey ebpekeiseg ke kebperetiyyaya ta.

<sup>9</sup> Su ke Eleteala ne kenà iyan intahù te itungan din te kebpelemi din keyta ne egkevaluy ne minge anak din apey ki edusaan ketà te kegkukum din en te kelibutan. Ugaid ne iyan din intahù te itungan ne ebpekepeleiyu keyta ibpepevyà te Anak din ne si Hisu Kristu ke Kerenan tew.

<sup>10</sup> Su sikandin se mibpeimatey mekeatag keyta su misan minatey ki en etawa biviyag ki pà te arà ne hewii te kedlived din kayi, ne ed-ubpà ki riyà te kandin taman te taman.

<sup>11</sup> Na geina te ini se edtaharan ta, ne beg-eta niyu ke hinawa dut te minge ruma niyu wey petebtevangey kew.

*Ke Mewri en ne Pemandu ni Pablo Kandan*

<sup>12</sup> Ne ini pà se ebuyuen ku keniyu, munge suled, edati niyu ke munge etew ne egelevek keniyau te keniyu ne pekilukesen. Su sikandan se nepemili te Eleteala ne ebpeneheewit wey ebpenurù keniyu mekeatag te keduma niyu ki Hisus.

<sup>13</sup> Ipekita niyu ke limù niyu kandan wey edati niyu su atag dut te helevek dan. Ne ruma pà ne ebuyuen ku ne petultulengerey kew.

<sup>14</sup> Ne ebuyuen ku lavew, munge suled, te suhua niyu ke pehulen ne egelevek. Beg-eta niyu ke hinawa dut te munge etew ne egkeandek, ne tevangi niyu ke munge etew ne melemu ne egkegaga te penggeram dut te datù te pekaid. Ne iyan iya se menanew se kedlalag niyu dut te kedtevangi niyu te munge etew.

<sup>15</sup> Embiya ruen ed-ulaula keniyu te meraat ne kenà kew edsuli kandan, ugaid ne iyan niyu ul-ulaa ke engkey se meupiya diyà te langun ne munge etew.

<sup>16-18</sup> Na geina te mibpekidseveka kew ki Hisu Kristu ne iyan kiyug te Eleteala keniyu ne merukilem meandew ne ruen kegkehalew niyu, ne layun kew ebpengeningeni, ne piya engkey se egketemanan niyu ne peselamat kew te Eleteala.

<sup>19</sup> Ne kenà niyu selesangi ke idsuhù dut te Kedeseenan ne Ebpetuntul te Menusiyà,

<sup>20</sup> kenà niyu sudii ke egkehiyen dut te munge ebpelambas te Lalag te Eleteala,

<sup>21</sup> ugaid ne surimana niyu embiya benar ne ebpuun ini diyà te Lalag te Eleteala, ne dumai niyu ke langun ne meupiya,

<sup>22</sup> ne pekeriyui niyu ke langun ne meraat.

<sup>23</sup> Ne iyan ku kiyug ne ke Eleteala ne ebehey te kebmelintad te hinawa tew, ne menu ma perem ke edtilaken din ke ulaula niyu, ke hinawa niyu wey ke langun ne itungan niyu su apay ketà te kebpekeuma ni Hisu Kristu kayi ne warà igkesawey keniyu su ebmetilak kew riyà te etuvangan din.

<sup>24</sup> Ne egkeserihan ke Eleteala ke egketuman ini su sikandin se mibpemili keyta ne egkevaluy ne munge anak din, ne edtumanen din ini se lalag din.

<sup>25</sup> Munge suled, pengeningeni kew rema te Eleteala mekeatag kenami.

<sup>26</sup> Ikahi niyu rà diyà te langun ne munge ruma ta ne mibperetiyaya mekeatag dut te limù dey kandan.

<sup>27</sup> Ruen suhù ku keniyu, su kedserihan a ni Hisu Kristu, te besaa niyu ini se surat diyà te langun ne munge suled tew keniyau.

<sup>28</sup> Iyan dey egkiyuhan ne ebpeneuven kew dut te Kerenan tew ne si Hisu Kristu.

Arà dà taman.

*Pablo*

## **Ke Ikeruwa ne Surat ni Pablo Riyà te Menge Etew te Inged ne Tiselunika**

<sup>1</sup> Siaken ne edsurat ini ne si Pablo duma ni Silvanu wey si Timoteo. Ne idsurat dey ini kenihan te keniyu te inged ne Tiselunika ne mibperetiyyaya te Eleteala ke Amey tew wey si Hisu Kristu ke Kerenan tew.

<sup>2</sup> Iyan dey kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala ne Amey tew wey si Hisu Kristu ke Kerenan tew.

*Ini ne Mekeatag te Kegkukum te Eleteala ne Metidtu*

<sup>3</sup> Menge suled, kenà egkepakey ne kenà key layun ebpeselamat diyà te Eleteala mekeatag keniyu. Ne dait ini se ed-ul-ulaan dey su layun ebpekeiseg ke keilut dut te kebperetiyyaya niyu ki Hisu wey ke kebpelimlimuey niyu ne ebpekeiseg lavew.

<sup>4</sup> Tembù be diyà te langun ne minge kevrungan te minge ruma tew ne mibperetiyyaya te Eleteala ne indantal dey ke gkehalew rey mekeatag keniyu. Uya, indantal dey mekeatag te kebperetiyyaya niyu ne mibmeilut misan egkerasey kew dut te kebpkesekiti keniyu.

<sup>5-6</sup> Ne ke kedtigker niyu te keresayan ne iring ketà ne arà se egkevaluy kew ne edait te ebpekeamung kew dut te Edetuan te Eleteala, ne edusaan din ini se ebpekesakit keniyu. Ketà be ne egkekita ke metidtu ne kegkukum te Eleteala.

<sup>7</sup> Su ebpekeuma ke hewii ne ibpeengked te Eleteala ke keresayan ne egkeheram ta guntaani, su ebpeimelayen ki ketà te kedlived ni Hisu kayi ne edumaan dut te mekegehém ne suluhuen dín.

<sup>8</sup> Ketà te kebpkeuma rin ne iring te egkeregreg ne apuy ini se lawa rin. Ne edusaan din ke minge etew ne mid-engkenà te Eleteala, ini se kenà ebperumaruma rut te Meupiya ne Tudtul mekeatag ki Hisu Kristu ke Kerenan tew.

<sup>9</sup> Ne ke kedusa kandan ne ibpeawà dan dut te etuvangan te Eleteala ne edresayen dan nikandin taman te taman su kenà dan egkekita ke kepurù din ne warà ebpekerepeng.

<sup>10</sup> Ini ne egked-ulaula ketà te kedlived ni Hisu Kristu kayi te ampew te dunya, su arà ne hewii ne langun ne minge mibperetiyyaya ki Hisu ne edeyù wey ed-adat kandin. Ne ebpekeamung kew su midumaan niyu ke impenurù dey.

<sup>11</sup> Tembù be layun dey ibpengeningeni sikiyu diyà te Eleteala su apey ke ulaula niyu te keduma ki Hisu Kristu ne edait dut te minge etew ne mibpemili te Eleteala. Ne ebpengeningeni key rema te ibpepevayà rut te gehem te Eleteala ne edtevangán kew su apey ebpekegaga kew te edtuman te misan engkey en ne meupiya ne ulaula ne egkiyuhan niyu wey langun ne ed-ul-ulaan ne nerudsuan niyu mekeatag dut te kebperetiyyaya niyu ki Hisu.

<sup>12</sup> Iyan dey kebpengeningeni te iring ketà su apey si Hisu Kristu ke Kerenan tew se edeyuen su ke meupiya ne ed-ul-ulaan niyu, abpeg te sikiyu ne igkeamung kandin te ed-edatan sabap te sikiyu ne sakup din. Egked-ulaula ini su atag dut te penaub keyta ne kenà egkerepengán ne impekita keyta dut te Eleteala tew wey ke Kerenan tew ne si Hisu Kristu.

## **2**

*Ini ne Mekeatag te Engkey se Egked-ulaula te Kenà pà Edlived si Hisu*

<sup>1</sup> Na minge suled, duen ebpesebután dey keniyu mekeatag te kedlived dut te Kerenan tew ne si Hisu Kristu wey mekeatag dut te keburun din keyta te minge mibperetiyyaya su apey ed-ubpà ki riyà te kandin taman te taman.

<sup>2</sup> Iyan dey ebuyuen ne kenà kew metekawi dut te tudtul ne egkerineg niyu te nekeuma en kun ke Hewii te Kedlived dut te Kerenan tew. Kenà metarin se itungan niyu ketà te tarù misan ibpekahi kun kandin dut te Kedesenan ne Ebpetuntul te Menusiyà, etawa ruen ebpenurù keniyu te ini, etawa ruen egkahi te ruen surat kun ne kayi ebpuun te kenami ne egkahi ketà.

<sup>3</sup> Uram kew su apey kew kenà egkelimbungi su kenà pà ebpekeuma arà ne hewii te warà pà med-ulaula ini se mevaher ne kegkunterà te minge etew dut te Eleteala, ne arà ded ne hewii ne edlepew ke etew ne nepenù te meraat. Ketà te kedlepew rin ne egkunteraan din ke langun ne meupiya ne egkiyuhan te Eleteala. Ne sikandin se edereetan te Eleteala riyà te apuy ne rakà.

<sup>4</sup> Ini se etew ne ketà te kedlepew rin ne igkeepes din ke Eleteala wey langun ne sakup te Eleteala wey misan engkey ne ed-erapen dut te minge etew te Eleteala. Su egkahi te sikandin ne iyan pà mepurù dut te langun ne ed-erapen. Ne misan diyà te Nekebpuru ne Valey te Eleteala riyà te Hirusalim ne ebpinuu ketà ne egkahi te sikandin kun ke tidtu ne Eleteala.

<sup>5</sup> Warà niyu pà buwa melipati te migkahi ku ini langun te kenian e pà te keniyu.

<sup>6</sup> Ne netuenan niyu te meambe ke warà pà med-ulaula ini, su ruen ed-eren te arà ne etew ne nepenù te meraat. Tembù be kenà pà edlepew sikandin te warà pà mekeuma ke hewii ne intendù te kedlepew rin.

<sup>7</sup> Ugaid ne misan warà pà medlepew arà se igkeepes te Eleteala, ne ebpenitip en ke gehem din kayi te kelibutan su edlimbungan din ke minge etew. Ugaid ne kenà edlepew sikandin taman te kenà ed-awà ini se ed-eren kandin.

<sup>8</sup> Na ketà te ed-awà en ke ed-eren kandin, ne edlepew en arà se etew ne nepenù te meraat. Ugaid ne embiya ebpekeuma en ke Kerenan tew ne si Hisus, ne edereetan din arà se etew dut te kebpekita rin te kepurù din, su ke hinawa rin se ibpeimatey rin.

<sup>9-10</sup> Ne ketà te kebpekeuma te arà se etew ne nepenù te meraat ne ruen gehem din ne egenat dut te datù te pekaid ne si Setanas, tembù be metau sikandin ne edlimbung su ebpekevaal te minge ulaula ne mekegeyip su apey egkelimbungi ke minge etew. Ne ini se melemu ne egkelimbungan ne sikandan ke kenà eduma dut te benar ne penurù mekeatag te Eleteala. Su embiya mibperetiyaya ran ne ebpekeliyu ran ugaid ne kenà dan ebperetiyaya, tembù be edusaan sikandan.

<sup>11</sup> Ne geina te ed-engkenà dan dut te benar, ne idtuhut te Eleteala kandan te egkelimbungan su apey ran mebperetiyaya dut te kenà benar.

<sup>12</sup> Tembù be egkukumen te edusaan dan su kenà dan ebperetiyaya te benar, su iyan dan egkiyuhan ne ebayàbayà kandan ne ke meraat.

*Ini ne Mekeatag te Kegawed ta te Meilut dut te Benar ne Penurù*

<sup>13</sup> Ugaid ne sikiyu, minge suled ne igkelimù te Eleteala, ne kenà egkepakey ne kenà dey layun ebpeselemati te Eleteala mekeatag keniyu. Ebpesalamat key su igenat te rudsuan ne mibpemili kew en te Eleteala ne ebpekeliyu. Ini ne benar, su ketà te mibperetiyaya kew en rut te benar ne nevaluy kew ne minge etew rin ibpepevayà dut te gehem te Kedesanan ne Ebpetuntul te Menusiya.

<sup>14</sup> Su ketà te kebpesabut dey keniyu dut te Meupiya ne Tudtul, ne ke Eleteala se migketetau te itungan niyu su apey kew medtelimà dut te kebpeiyu rin keniyu. Uya, mibpemili kew nikandin su apey kew ebpekeamung dut te kebmeperurù te Kerenan tew ne si Hisu Kristu.

<sup>15</sup> Tembù be, minge suled, beg-eta niyu ke kebperetiyaya niyu, ne geweri niyu te meilut ke benar ne impenurù dey te kenian key pà te keniyu wey ke penurù ne insurat dey keniyu.

<sup>16-17</sup> Iyan dey egkiyuhan ne ke Kerenan tew ne si Hisu Kristu wey ke Eleteala ne Amey tew se ebag-et dut te hinawa niyu wey ebaher keniyu su apey langun ne ed-ul-ulaan niyu wey langun ne egkehien niyu ne ebmeupiya su dekelà se limù te Eleteala keytew. Ne egenat dut te limù din wey ke kebpenaub din ne ibehey rin ke kevag-et dut te itungan tew wey ke keupiya ne ebpeneregen tew ne egketuman.

### 3

*Iyan Ebuyuen ni Pablo ne Ibpengeningeni Sikandin dut te Minge Mibperetiyaya*

<sup>1</sup> Na, minge suled, duen pà ebuyuen ku keniyu. Iyan ku ebuyuen ne ipengeningeni niyu te Eleteala mekeatag te sikami su apey ebpekeeneb en te mehaan ini se Lalag te Eleteala ne ibpemesabut dey, su apey ke minge etew ne ebpekerineg kayi ne mehalew se kedtelimà dan iring keniyu.

<sup>2</sup> Pengeningeni kew rema te Eleteala te ed-elangan key nikandin dut te meraat ne minge etew ne edsurang kenami, su kenà langun ne minge etew ne ebperetiyaya te Eleteala.

<sup>3</sup> Ugaid ne si Hisu Kristu ke Kerenan tew ne egkeserihan, ne sikandin ke ebaher keniyu wey ed-alang keniyu dut te meraat ne ulaula te Datù te Pekaid.

<sup>4</sup> Ne geina te mibpesakup kew ki Hisu Kristu ke Kerenan tew, ne kenà duwaruwa se hinawa rey te sikandin se edtavang keniyu su apey edumaan niyu ke insuhù dey keniyu.

<sup>5</sup> Iyan dey ebuyuen te Kerenan tew ne edtavang keniyu su apey ke nesebutan niyu mekeatag dut te kerekelà te limù te Eleteala keniyu wey ke kedtigker niyu rut te keresayan ne ebpekeiseg.



*Iyan iya se Egelevek ki*

<sup>6</sup> Menge suled, duen pà duma ne idsuhù dey keniyu su ini se insuhù dut te Kerenan tew ne si Hisu Kristu te kenà kew ebpekiduma rut te minge ruma niyu ne pehulen ne kenà eduma dut te impenurù dey keniyu.

<sup>7</sup> Su netuenan niyu te kenà dey igkepehuli te kegelevek te kenian key pà te keniyu, ne arà imbe se iringi niyu.

<sup>8</sup> Warà key mebuyù te igkeuyag dey, su langun ne mibayaran dey. Merukilem meandew ne mibpegelep key se egelevek su apey sikami en se edtuganur dut te minge kurang dey ne kenà key niyu igkereheni.

<sup>9</sup> Ne kenà te warà kevenar dey te ebuyù keniyu. Su iyan warà dey kebuyù te igkeuyag dey riyà te keniyu su apey kenà arà se ed-iringan niyu, ugaid ne arà se helevek dey se ed-iringan niyu.

<sup>10</sup> Su ketà te kenian key pà te keniyu ne ruen migkahi rey keniyu te, “Embiya ruen etew ne pehulen ne egelevek, ne kenà niyu pekeena.”

<sup>11</sup> Egkehiyen dey ini su nerineg dey te ruen kenian te keniyu ne pehulen ne egelevek, ne warà duma ne ebeelan din su ebangen dà dut te minge ruma rin ne egelevek.

<sup>12</sup> Tembù be iyan kiyug rut te Kerenan tew ne si Hisu Kristu ne idsuhù dey ketà ne minge etew te kenà dan medlauglaug ne ebangen dut te minge ruma ran, ugaid ne iyan se mebpegelep dan se egelevek dut te kegkeuyag dan.

<sup>13</sup> Na sikiyu, minge suled, kenà niyu igkebungas te ed-ulaula te meupiya.

<sup>14</sup> Ne embiya ruen kenà eduma kayi te suhù ne insurat dey keniyu ne turiki niyu sikandin. Ne belehara niyu sikandin su apey egkeyeyai.

<sup>15</sup> Ugaid ne kenà niyu igkeepes sikandin, su pemendua niyu te meupiya iring te kebpemandù niyu te suled niyu.

*Ke Mewri ne Lalag ni Pablo Kayi te Surat Din*

<sup>16</sup> Iyan dey egkiyuhan ne ke Kerenan tew ne si Hisu Kristu se ebehey te kebmelinew te hinawa niyu piya engkey se egketemanan niyu su sikandin se ebpuunan te itungan ne melinew. Ne dumai kew rema nikandin.

<sup>17</sup> Ne ini se egkehiyen ku kayi te ketepusan te surat ku ne siaken imbe ini si Pablo se edsurat kayi, ne ebpenginginsà a keniyu langun. Ini se ed-ul-ulaan ku kayi te langun ne surat ku su apey niyu egketueni te benar ne kayi ebpuun te kediey.

<sup>18</sup> Iyan dey egkiyuhan ne menu ma perem ke ebpeneuven kew dut te Kerenan tew ne si Hisu Kristu.

Arà dà taman.

*Pablo*

## Ke Neuna ne Surat Ni Pablo Riyà te Ki Timoteo

<sup>1</sup> Siaken ini se edsurat ne si Pablo. Senge etew a ne kedserihan ni Hisu Kristu igenat dut te suhù te Eleteala ne ebpeliyu keytew wey si Hisu Kristu ke ebpenerengen tew.

<sup>2</sup> Ne edsuratan ku sikew, Timoteo, ne iring en te tuney ne anak ku egenat dut te kebperetiyyaya nu ki Hisu Kristu.

Iyan ku kiyug ne egkeheram nu ke tavang wey kegkeyru te Eleteala ne Amey tew wey si Hisu Kristu ke Kerenan tew, ne egenat kandan ne ebmerinew ke itungan nu.

### *Ke Menge Etew Ne Ebpenerù Te Kenà Benar Ne Med-engked*

<sup>3</sup> Kenà nu lipati, Timoteo, ke migkahi ku keykew te ked-awà ku en te ebpependiyà te Mesidunya. Migkahi a te med-ubpà ka pà diyà te inged ne Ipisu su ruen menge etew ne ebpependiyà te kenà benar, ne peengkerà nu sikandan.

<sup>4</sup> Ikahi nu kandan se med-engked dan se ebpependiyà dut te menge guhud ne mibèbeelan dà te menge apù dan wey ke layab ne guhud te kepuunpuun te apù dan. Su ini se kebpenareng dan dut te warà tapek din ne ebpekevaal dà te kebpelelewane, ne kenà dan egketuen ke tidu ne ibayà ne kayi ran dà egketuen te kedsarig dan te Eleteala.

<sup>5</sup> Iyan ku idsuhù ini su apey ran ebpelelimuey. Ini se kebpelelimuey ne egenat te hinawa ran ne midtilak te Eleteala su apey warà ebpekesawug ne meraat te itungan dan wey kenà alang-alang se kedsarig dan ki Hisu Kristu.

<sup>6</sup> Ugaid ne arà se ebpependiyà te kenà benar ne nekesuwey en ketà te tidu ne ibayà, ne iyan dan ne ebpuungan ne ebpelelewane te warà rantek din.

<sup>7</sup> Egkesuat dan ne ebpependiyà te penduan ne impesurat ki Moises dengan, ugaid ne warà dan ma mesebuti ke engkey se meana rin ini se penduan ne idtehel dan ibpenurù te menge etew.

<sup>8</sup> Netuean ta ne meupiya ini se penduan ke embiya iyan ta kedumai ne ke enget dà ne atag din.

<sup>9</sup> Ne netuean ta rema se kenà iyan din egkesuhat te penduan ne ke menge etew ne metidu, ugaid ne iyan din egkesuhat ke menge etew ne edsumbaker te penduan wey ke menge etew ne ed-engkenà te lalag te Eleteala, ke menge etew ne warà te itungan dan se Eleteala wey ke mekesesalà, ke menge etew ne meraat se itungan dan wey ke menge etew ne edsumpalit te Eleteala, ke menge etew ne eburnu te amey ran wey iney ran wey ruma ne menge etew ne teremunù.

<sup>10-11</sup> Benar ne iyan din imbe egkesuhat ini se penduan ne menge etew ne mesalàsala, menge meama ne ebpeunturey ke elin meama wey ke ebpeunturey ke elin meritan, menge etew ne ebpegepà su ebpesaan, menge etew ne teruen wey ke menge etew ne ebpetitihus te tarù, wey misan engkey en ne meraat ne ulaula ne ebpekesuwey rut te tidu ne penduan te Eleteala. Iring be imbe kayi ne menge etew se egkesuhat kayi te penduan su kenà dan eduma kayi te tidu ne penurù. Ini se tidu ne penurù ne kayi te Meupiya ne Tudtul ne ebpesabut keyta mekeatag te Eleteala ne dait ne edeyuen, ne insarig din kedi te ebpependiyà ini riyà te menge etew.

### *Ke Kebpeselamat Ni Pablo Rut Te Eleteala*

<sup>12</sup> Ebpelelimetan ku si Hisu Kristu ke Kerenan tew ne layun ebehey kedi te keeg kayi te gelevek ku. Uya, ebpelelimetan ku kandin su edsarahan a rin, ne midtendù a rin ne egelevek kandin.

<sup>13</sup> Misan engketà te rengan ne meraat se lalag ku mekeatag kandin, ne mibpemekeiran ku ke menge etew ne mibperetiyyaya kandin, ne midtekudì ku sikandin, ugaid ne neyruwan a te Eleteala su warà e pà mekesabut te meraat ke ulaula ku su warà e pà mibperetiyyaya ki Hisu Kristu.

<sup>14</sup> Melimù nevenar si Hisu Kristu ke Kerenan tew su mid-uluhan a rin te raat te nanam, ne pinesarig a rin kandin, ne midtehuan a rin te kegkelimù ku kayi te menge ruma ku egenat dut te kinepekidseveka ku kandin.

<sup>15</sup> Benar iya ini ne egkehiyen mekeatag te iyan impengkayi ni Hisu Kristu te ampew te dunya, ne dait ini ne ebperetiyyayan te langun. Su iyan din impengkayi apey ebpelelimetan rin ke menge etew dut te kedusa te salà dan. Ne siaken en iyan se nekeunauna ne belisalà.

<sup>16</sup> Misan engketà te siaken en iya se nekeunauna ne belisalà, ne ingkeyru a te Eleteala su apey siaken se igkepekita ni Hisu Kristu te metmetigker sikandin dut te menge etew ne belisalà. Apey ruen ebpelelelawan dut te merakel ne etew te warà etew ne belisalà

ne kenà egkepesahad ni Hisu Kristu, ne ketà ne sikandan ke upama ebperetiyya ran ne ebpekehaked te umur ne warà edtemanan din.

<sup>17</sup> Ne edeyrey kiyu ve te Eleteala taman te taman su sikandin dà se Eleteala. Ne sikandin se ebayabayà te langun taman te warà ketepusan din. Kenà sikandin egkekita su rangen ne daan en sikandin su warà rudsuan din ne warà kemetayen din.

<sup>18</sup> Na sikew, Timoteo ne iring te anak ku, ini se igkahi ku kenikew. Tentenuri nu ke ingkahi rut te ebpelambas te lalag te Eleteala rangen mekeatag dut te helevek nu. Tentenuri nu ve apey ebmetihel ke hinawa nu te edtuman dut te insuhù keykew su apey ka ebpenehana te ed-atu rut te meraat.

<sup>19</sup> Kemalí nu te mevaher ke sarig nu ki Hisus, ne kenà ka ulaula te meraat su apey kenà ka egkeyeyaan diyà te etuvangan te Eleteala wey diyà te etuvangan te menge etew. Su ruen menge etew ne misan netuenan dan ded se meraat ke ulaula ran ne ed-iseg den pà lavew, ne ini ve se sarig dan ne warà en misan daan en ne mibperetiyya ran.

<sup>20</sup> Iyan iring kayi ne en si Himinyu wey si Alejandro. Midlekaan ku sikandan su apey egkeveyeyai en ni Setanas ke datù te pekaid apey ran metueni te kenà iya egkepakey ne edsumpeliten se Eleteala.

## 2

### *Ke Menge Suhù Mekeatag Te Ebpengevrungan Te Ebpengarap*

<sup>1</sup> Iyan ku id-una igkahi keykew ne layun kiyu ebpengevingeni te Eleteala ke langun ne etew piya engkey en sikandan. Ebpemuyuen tew te Eleteala te behayi sikandan te langun ne kurang dan, ne kenà ki edlipat te ebpeselamat te Eleteala dut te tavang din.

<sup>2</sup> Ibpengeningeni tew te Eleteala ke menge mepurù ne ebayabayà kenitew wey langun ne menge ruma ran ne ruen gaga ran te ed-ewit kenitew. Ibpengeningeni tew te Eleteala sikandan apey meupiya se ked-ewit dan keytew su apey ebmelinandang se ketemanan tew wey apey ruen kesig tew te eduma te Eleteala wey ed-ulaula te metidtu.

<sup>3</sup> Iring imbe kayi ne pengeningeni se meupiya ne igkesuat dut te Eleteala ne ebpekiyu keytew rut te salà tew.

<sup>4</sup> Su iyan din igkesuat ne langun te menge etew ne ebpekietun te tidtu ne ralan diyà te Eleteala wey ebpekeliyu ran dut te kedusa te salà dan.

<sup>5</sup> Su Eleteala ne sebseveka rà, ne sebseveka rà dema se edteyekupan tew te menge etew riyà te etuvangan te Eleteala ne warà liyu rin ke kenà si Hisu Kristu ne nevaluy ne etew.

<sup>6</sup> Iyan din mid-ulaula te kinepengkayi rin te ampew te dunya ne imbeliwas din ke umur din te kebpekiyu rin te langun tew rut te kedusa te salà tew. Mid-ulaula rin ini dut te enget en ne hewii ne midtendù te Eleteala rangen su tuus be ini te kiyug te Eleteala ne langun ne menge etew ne ebpekeliyu.

<sup>7</sup> Tembù be mibpemili a ni Hisu Kristu ne kedserihan din ne ibpemenudtul ini se tidtu ne lalag mekeatag kandin diyà te menge etew ne kenà Hudiyane apey ran ebpekeperetiyya. Ini ve iya se egkehiyen ku ne kenè en be iya ini egkedtarù su benar!

<sup>8</sup> Ne duen pà ebuyuen ku keniya. Iyan ku kiyug ne piya endei en egkevurun ke menge etew ne mibperetiyya ki Hisus, ne ke menge meama se ebpenheewit keniya te ebpengevingeni. Ugaid ne id-awà den pà neraan ke epes dan te ruma ran wey ke kebpelewelewaney ran apey iyan dan ibpeuna te hinawa ran ne ke Eleteala.

<sup>9</sup> Ne engketà ded dema ke menge meritan, duen erangan te kebpedadit dan te kebevelegkas dan. Kenà kayi rà te mepurù ne velegkas dan etawa kayi te kebpuputus dan etawa menge rayandayan ne bulawan egketueni se keupiya ran te menge meritan.

<sup>10</sup> Ugaid ne kayi egketueni te meupiya ne ulaula ran. Su arà se dait dut te menge meritan ne egkekahi ne mibperetiyya te Eleteala.

<sup>11-12</sup> Ne kenà ku idluhut ne iyan ebpenurù se meritan dut te menge meama diyà te kevurungan niyu etawa ebpenheewit kandan. Iyan meupiya ne mebpeeng-eneng ke meritan se ebpevineg dut te ebpenurù kandan su apey ran ebpekehuru. Iyan dà kandan ne mebpeeneng-eneng.

<sup>13</sup> Su iyan neuna ne midlimbag te Eleteala ne si Adan ne arà pà ne si Eva.

<sup>14</sup> Ne kenà si Adan se nelimbungan ni Setanas ke datù te pekaid su ke esawa rin ne si Eva, ne ketà puunan ne nekedsalà sikandin.

<sup>15</sup> Tembù be egkerasey ke meritan ke ed-anak, ugaid ne egketevangan dan te Eleteala su apey ran ebpekeliyu embiya egkamal dan te mevaher te peretiyya ran kandin wey ebpelelimuey ran wey ebpeketidtu ran te ulaula ran ne ebpekesuhat te Eleteala.

## 3

*Ini Ne Mekeatag Te Betasan Dut Te Menge Unuten Te Menge Mibperetiyya*

<sup>1</sup> Benar iya ini se besenan ne egkahi te, "Embiya ruen etew ne egkiyug ne ebpenheewit te menge etew ne mibperetiyya ki Hisus, ne meupiya nevenar arà se helevek ne egkiyuhan din."

<sup>2</sup> Ugaid ne ke etew ne ebpenheewit te menge mibperetiyya ki Hisus ne iyan din kemeyidan ne warà ulaula rin ne meraat ne igkesawey kandin, ne seveka rà se esawa rin. Iyan din kemeyidan ne kenà mekalas se kebpennunen din te keuyahan, ugaid ne erangan se ed-ul-ulaan din su apey langun ne ulaula rin ne meupiya. Iyan din kemeyidan ne mesakew te piya engkey en ne etew, ne metau sikandin ne ebpenurù.

<sup>3</sup> Kenà sikandin metehel ne ed-inum te ebpeketeveveg. Ne kenà sikandin edretem te meraat dut te menge ruma rin wey kenà lelengeten, ugaid ne metigker wey metulanged, ne kenà lelegawen te pirak.

<sup>4</sup> Iyan din kemeyidan ne egkeveyveyaan din ke sikandan ne telteleanak, wey ke menge anak din ne meperumaruma su meadat kandin.

<sup>5</sup> Su embiya kenà din egkegaga te ebpenheewit ke kandin ne menge anak, ne iyan din pè be megaga te ebpenheewit se merakel ne etew ne mibperetiyya ki Hisus.

<sup>6</sup> Kenà dema egkepakey ke behu pà sikandin ne mibperetiyya ki Hisus su kema ke ibpereyüdeyü din ke ketengandan din, ne ketà ne edusaan sikandin te Eleteala iring te kinedusai te Eleteala ki Setanas.

<sup>7</sup> Ne iyan din kemeyidan ne ini se etew ne ebpenheewit te menge etew ne mibperetiyya ki Hisus ne egkeedatan dut te menge etew ne warà pà mebperetiyya ki Hisus. Su embiya ruen meraat ne ulaula rin, ne edsewayan sikandin su arà ke idselaid ni Setanas kandin.

*Ini Ne Mekeatag Te Betasan Dut Te Edsukendul Te Menge Unuten*

<sup>8</sup> Iring ded be kayi rema ke menge etew ne edsukendul dut te menge unuten, iyan din kemeyidan ne ebpengeedatan rema ini ne menge etew wey ebpengeserihan se lalag dan. Kenà dan metehel ne ed-inum te ebpeketeveveg, ne kenà dan lelegawen te kearen.

<sup>9</sup> Ey-eyari ran te egawed ke kebpereyiyaya ran dut te penurù ne impayag te Eleteala mekeatag ki Hisus, ne kenà eduwaruwa se hinawa ran dut te kebpereyiyaya ran su netuenan dan ne warà idselipsip dan ne meraat kayi te kebpereyiyaya ran.

<sup>10</sup> Embiya ruen etew ne egkiyug ne edsukendul dut te menge unuten, ne egkeintengan pà se ulaula rin. Ne embiyà warà meraat ne ulaula rin, ne arà pà ne ebpekesukendul sikandin dut te helevek.

<sup>11</sup> Engketà ded ke menge esawa ran, iyan din kemeyidan ne ed-ulaula ran te meupiya su apey ran egkeedati, ne kenà dan serupeten. Ne kenà dema mekalas se kebpennunen din te keuyahan. Ne ebpengeserihan te piya engkey en ne ed-ul-ulaan dan.

<sup>12</sup> Ini se menge etew ne edsukendul ne seveka rà se esawa rin, ne egkevayvayaan din ke sikandan ne telteleanak wey langun ne ed-ubpà te valey.

<sup>13</sup> Su embiya meupiya se helevek kayi te menge etew ini ne edsekundul, ne kenà egketuen te wagib se kenà ed-edatan dut te menge etew ne ketà dema ne kenà egkealangan sikandan ne ebpesabut te ruma mekeatag te kebpereyiyaya ran ki Hisu Kristu.

*Ke Rekela Ne Penurù Te Eleteala Mekeatag Ki Hisus Ne Warà Din Impayag Dengan Ugaid Ne Guntaani Ne Impayag Din En*

<sup>14</sup> Kiyug ku ne kenà meuhet ne ebpekelambas a keniyani te keniyu, Timoteo. Ugaid ne iyan ku kedsurat kenikew

<sup>15</sup> Ne kema ke mevangan a, ne ini ve se surat ku ne ebpekepenurù keykew ke engkey se meupiya ne ed-ul-ulaan tew te sikitew ne mibperetiyya te Eleteala ne warà kemetayan din, su anak kiyu en nikandin. Su langun tew ne mibperetiyya te Eleteala ne iring ki te baley te Eleteala ne ed-ubpaan din. Ne iring ki red te pelaus dut te baley rin su sikitew se edtinged dut te benar ne penurù din.

<sup>16</sup> Netuenan tew langun ne ke kerekela te penurù te Eleteala ne impayag din keyta ne mibperetiyya rey en. Egkahi te,

Nevaluy si Hisu Kristu ne etew  
ne mid-ubpà kayi te ampew te dunya,  
ne ke Kedesenan ne Ebpetuntul te Menusiya,  
se iyan midtitihus te tuney sikandin ne Anak te Eleteala,  
ne nekita sikandin te suluhuen te Eleteala.  
Ne impemenudtul sikandin  
diyà te langun ne menge etew kayi te ampew te dunya,

ne merakel se nekeperetiyyaya kandin  
ini te lusud te dunya,  
ne mibpeliendud si Hisus diyà te Amey rin diyà te langit.

## 4

*Mibaag Si Pablo Ki Timoteo Mekeatag Te Menge Etew Ne Ebpenurù Te Tarù Ne Ebpekelimbung Te Menge Etew*

<sup>1</sup> Na Timoteo, mepayag nevenar ke migkahi dut te Kedesenan ne Ebpetuntul te Menusiyà te ruen menge etew ketà te ketepusan ne hewii ne edsuwey rut te kepperetiyyaya ran ki Hisu Kristu. Su iyan dan en maa edumaan ke busew ne metau ne edlimbung, ne ebperetiyyaya ran te tarù ne ibpenurù te menge vusew.

<sup>2</sup> Ne ruen engkungkun ne metidtu ne menge etew ne ebpenurù dut te tarù ne lalag te menge busew. Ne ini se ebpememandù te meraat, ne warà en te itungan dan se meraat ini su nelayaman dan en wey iyan en ma ebayabayà te itungan dan ne si Setanas ke datù te pekaid.

<sup>3</sup> Ini se ebpememandù te tarù, ne edawey ran te ebpees-eseweey wey ruen egkekaan ne ibpemandù dan te kenà ibpekaan. Ugaid ne ini se egkekaan ne mibpengaren te Eleteala ne egkeenen tew, labi pà ke sikitew ne mibperetiyyaya kandin wey nekesabut dut te tidtu ne penurù asal id-una tew pà te ebpengeningeni ne ibpeselamat te Eleteala se egkeenen.

<sup>4</sup> Su langun taman ne mibpengaren te Eleteala ne meupiya. Warà kenà egkekaan embiya id-una tew pà ebpengeningeni te kebpenelamat,

<sup>5</sup> su ke egkeenen tew ne pekegkeupiya egenat dut te Lalag te Eleteala wey ke kebpengeningeni tew kandin.

*Ke Dait Ne Ed-ul-ulaan Dut Te Menge Etew Ne Egelevek Ki Hisu Kristu*

<sup>6</sup> Embiya ibpenurù nu ini se migkahi ku kayi, Timoteo, diyà te menge mibperetiyyaya keninyan te keniyu, ne tuus arà te egkeserihan ka ne suhù ni Hisu Kristu ne ebpesabut te lalag din. Ne tuus dema te mid-iseg ke sarig nu su intahù nu te hinawa ke tidtu ne penduan wey midumaan nu te arà arè en.

<sup>7</sup> Kenà ka sehupà te layab ne guhud te kepuun su warà pantag din ne kenà diyà ebpuun te Eleteala. Ugaid ne pegitunga nu te mevaher ke engkey se ulaula ne ebpekesuhat te Eleteala.

<sup>8</sup> Meupiya se kedlumbad ta te lawa ta su apey ki ebmevaher, ugaid ne iyan pà muna ne ibaher tew te itungan tew se keduma tew te Eleteala. Su embiya ini se ed-ul-ulaan tew, ne ruen keupianan te kegkeuyag tew kayi te ampew te dunya wey ruen ded dema ketà te keuhet din ne hewii diyà te langit.

<sup>9</sup> Benar imbe iya ini se migkahi ku ne iyan meupiya ne ebperetiyyayaan te langun.

<sup>10</sup> Tembù be ebpegelep te egelevek te Eleteala su edsarig ki te Eleteala ne warà kemetayan din ne iyan ebpekepeliyu te langun ne menge etew, labi en ke menge etew ne mibperetiyyaya kandin.

<sup>11</sup> Ini se migkahi ku, Timoteo, ne ini ve se ipenurù nu dut te menge etew ne mibperetiyyaya ki Hisus, ne itarem nu kandan se ini se dumai ran.

<sup>12</sup> Na Timoteo, kenà nu idluhut se kedsudian ka misan engkeninyan te menguwed ke pà, ugaid ne iledawan nu rut te langun ne menge ruma niyu ne mibperetiyyaya. Ipekita nu ke keupiya ne egkeiringan dan kayi te lalag nu wey ke ed-ul-ulaan nu. Pekita ka te limù dut te menge ruma nu wey ke tidtu ne sarig nu te Eleteala, ne ipekita nu kandan te warà meraat ne netahù te itungan nu su apey sikuna se egkeiringan.

<sup>13</sup> Taman te kenà e pà ebpekeuma keninyan te keniyu, ne iyan nu ibpeuna te itungan nu ne ke kebasa te Lalag te Eleteala diyà te egkevurun ne menge mibperetiyyaya ki Hisus. Seysaya nu up-upiani wey ipesabut nu kandan apey ran egkerumai.

<sup>14</sup> Ne kenà nu lipati ke ketau nu te ebpenheewit te menge mibperetiyyaya ne imbehey te Eleteala keykew ketà te midampen ka rut te menge pekilukesen te menge mibperetiyyaya ne impengeningeni ka rin. Su iyan dan migkahi ke impesabut kandan dut te Ebpelambas te Lalag te Eleteala.

<sup>15</sup> Sevekaa nu se itungan nu kayi te migkahi ku keykew, ne dumai nu ini su apey egkekita te langun se ked-iseg din ke keduma nu te kiyug te Eleteala.

<sup>16</sup> Urami nu ke ed-ul-ulaan nu wey ke kebpenurù nu. Su embiya edumaan nu ini se migkahi ku, ne kenà sikuna rà se ebpekeliyu rut te kedusa te salà nu su misan imbe rema ke ebpemineg keykew ne ebpekeamung.

## 5

*Ini Ne Mekeatag Te Dait Ne Ed-ul-ulaan Dut Te Menge Ebpenheewit Te Menge Mibperetiyya*

<sup>1</sup> Duen ruma pà ini ne kiyug ku ne rumai nu. Kenà nu rengrengiti ke menge lukes ne meama, ugaid ne neyneyui nu sikandan iring te tunei ne amey nu. Ne ke menge kenakan, ne penurua nu sikandan iring te menge suled nu.

<sup>2</sup> Ne ke menge meritan ne lukes pà keykew, ne penurua nu sikandin iring te tunei ne iney nu. Ne ke menge raha, ne penurua nu sikandan iring te etevey nu. Ne iyan nu pegitunga kandan se warà misan deisek dà ne meraat ne kayi te itungan nu.

*Ke Kebpenurù Mekeatag Te Menge Valu Ne Meritan*

<sup>3</sup> Na Timoteo, tevangi niyu ke menge valu ne meritan ne warà egkepesineruwan dan te kegkeuyag dan.

<sup>4</sup> Ugaid ne embiya ruen anak din etawa apù din ini se valu, ne iyan dan en ebptugenuren kayi te lukes dan ne tuus te keduma ran te Eleleala wey apey ran ebpekevaras te lukes dan wey apù dan. Su ini se ulaula ne ebpekesuhat te Eleleala.

<sup>5</sup> Ne ini se valu ne meritan ne sebseveka rin su warè en edtuganur kandin, ne Eleleala rà se egkedserihan din ne merukilem meandew ne layun ebpengeningeni sikandin diyà te Eleleala su ebpemuyù te tavang.

<sup>6</sup> Ugaid ne ke balu ne iyan din dà igkesuat ne ke kiyug te kememenusiyai, ne misan biviyag pà sikandin ne iring te minatey en su warà kayi te kandin ke umur ne ibehy te Eleleala ne warà edtemanan din.

<sup>7</sup> Ipenurù nu ve ini se suhù ku mekeatag te menge valu ne meritan diyà te menge etew ne mibperetiyya te Eleleala su apey warà meraat ne lalag ne ebpekesuhat kandan.

<sup>8</sup> Su ke etew ne kenà edtuganur te menge suled din, labi en ke sikandan ne telteleanak, ne midlekaan din ke kebperetiyya rin ki Hisu Kristu. Ne tuwas pà lavew sikandin dut te etew ne warà mebperetiyya.

<sup>9</sup> Ne embiyà idsurat nu ke menge valu ne meritan ne ebpeketavang dut te menge mibperetiyya, ne iyan nu rà isurat ke menge valu ne labi enem nepulù se rahun din ne keseveka rà mekesawa.

<sup>10</sup> Iyan dà egkepakey ne valu ne ke ed-edatan su meupiya ke helevek din iring be te kinepeneheewit din te meupiya te menge anak din, kinetirapan din te ebpekaan dut te menge etew ne sumeseharey, kinetavang din te menge etew ne mibperetiyya te Eleleala, labi en ke menge etew ne ebpekeanuyanuy te kerehenan wey misan engkey en ne ketulengeran din ne impekita rin diyà te menge ruma rin.

<sup>11</sup> Ke menge valu ne meritan ne sesangen pà, ne kenà niyu iamung te edsurat. Su embiya egkeumaan dan te kiyug te kedsaup den pà maa ked-esawa, ne ed-ewaan dan ke helevek dan ki Hisu Kristu.

<sup>12</sup> Ne ketà ne edsewayan sikandan, su warà dan medtuman te pasad dan ne kenà dan ed-esawa edsaup su apey ran egelevek ki Hisu Kristu.

<sup>13</sup> Ketà be ne kenà meupiya embiya ini se egketevangan su kalu ke ebpehulen ne ebpedmedlakit diyà te idsehumbelayà. Ne kenà arà dà su egkevaluy ran ne serupeten wey ebpedmedlakit, ne ebpenlalag te kenà dait ne egkelalag dan.

<sup>14</sup> Embiya ke kediey rà kayi te menge valu ne sesangen pà, ne medsaup den pà mebpeesawa ne tugenura ran ke sikandan ne telteleanak apey warà meraat ne egkekahi rut te menge etew ne warà mebperetiyya ne ebpekesuhat kandan.

<sup>15</sup> Iyan ku kegkahi su ruen menge valu te misan gunteani en ne midsuwey en se ebperetiyya ki Hisu Kristu ne si Setanas en ke datù te pekaid se edumaan dan.

<sup>16</sup> Tembù be ke ruen mibperetiyya te Eleleala ne ruen suled din ne valu, ne tugenura rin. Kenà din pegitunga se iyan edtuganur ke langun ne mibperetiyya, su iyan dan edtugenuren ke menge valu ne warà edtehikur kandan.

*Ke Kebpenurù Mekeatag Te Menge Mibpenheewit Dut Te Menge Mibperetiyya*

<sup>17</sup> Duen pà egkehiyen ku, Timoteo, mekeatag te menge etew ne ebpenheewit te menge mibperetiyya ki Hisus. Embiya meupiya se kebpenheewit dan, ne edati niyu sikandan wey edsukayan sikandan te meupiya. Labi en be ke etew ne mibpenamantaman sikandin te kebpenurù din wey kebpesabut din te Lalag te Eleleala.

<sup>18</sup> Su ruen impesurat ne Lalag te Eleleala rengan ne egkahi te,  
 “Kenà nu pungesa ke sapi ne egiek te parey  
 su apey ebpekekaan.”  
 Ne ruen pà maa Lalag te Eleleala ne egkahi te,  
 “Ke etew ne egelevek,

ne dait ne edsukayan.”

<sup>19</sup> Embiya duen ebpekesuhat te etew ne ebpeneheewit te minge mibperetiya te Eleteala ne meraat ne ulaula, ne kenà niyu pehimbena ke kenà duen deruwa etawa tetelu ne ebpeketitihus te arà ne ulaula rin.

<sup>20</sup> Ne embiya benar ne mid-ulaula ini se etew te meraat, ne riyà niyu pengeheti te etuvangan dut te langun ne mibperetiya su apey ke ruma ne egkeandek ne ed-iring.

<sup>21</sup> Na Timoteo, pemineha nu up-upiani ini se penduan ku keykew ne tentenuri nu te ke Eleteala, si Hisu Kristu wey ke suluhuen te Eleteala se titihus te kedsuhù ku keykew. Embiya ebpedtuney ka te deruwa ne etew, ne warà remihi nu kandan ugaid ne tidtuwa nu ke kegkukum nu.

<sup>22</sup> Ne embiya ruen edtenduen nu ne ebpepeneheewiten nu rut te minge mibperetiya, ne kenà ka ed-una edampen kandin taman te kenà nu egkepeniyap se ulaula rin. Su embiya ruen ulaula rin ne meraat ne nerampen nu sikandin, ne ebpekeunung ka te salà din. Tembù be uram ka ke ebpekeamung ka rut te salà.

<sup>23-25</sup> Su ruen minge etew ne ed-ulaula te meraat ne egkepayahan en, tembù be egketuenan nu ke betasan dan te warà nu pà mekita sikandan. Ne ruen дума ne ed-ulaula te meraat ne kenà egkepayahan taman te meuhet. Iring ded dema te minge etew ne meupiya se ulaula rin ne melemu ne egkepayahan. Ugaid ne misan kenà egkepayahan ke meupiya ne ulaula rin, ne egketuenan ded te meuhet ne hewii. Na ruma pà, Timoteo ne kenà iyan nu rà inuma se wayig su inum ke red te reisek ne binu su ibawì te mesakit ne getek nu wey ke ruma pà ne sakit nu ne layun nu egkeheram.

## 6

### *Ke Kepenurù Diyà Te Menge Mibperetiya Ne Nengeuripen*

<sup>1</sup> Ini ve ne penduan ku dut te minge etew ne nebpa ne neuripen. Misan sugsuhuen sikandin, embiya mibperetiya ki Hisu Kristu ne med-adat sikandin dut te edsuhùsuhù kandin apey warà etew ne ebpekekahi te meraat mekeatag te Eleteala wey ke ibpenurù tew ne riyà ebpuun te kandin.

<sup>2</sup> Ne embiya ke sugsuhuen wey ke edsuhùsuhù ne elin mibperetiya ki Hisu Kristu, ne kenà dait ne ebpegitungen dut te edsugsuhuen ne geina te edsuled dan te kebperetiya ran ne egkepakey ne egkurangan din ke adat din kandin. Nasì pà se up-upiani rin ke gelevek din dut te edsuhùsuhù kandin wey edati rin su mibperetiya en dema te Eleteala ne elin dan igkelimù te Eleteala.

### *Ke Etew Ne Egelevék Ki Hisu Kristu Ne Kenà Meperateng Te Ke Kewesai Rin*

Ini ve imbe, Timoteo, se ibpesabut nu te meupiya kandan su apey ran egkerumai.

<sup>3</sup> Embiya ve ruen ebpenurù te senge bias su kenà iring kayi te tidtu ne penduan ne impenurù ni Hisu Kristu ke Kerenan tew,

<sup>4</sup> ne meperayù sikandin ne warà nesebutan din mekeatag te tidtu ne penurù. Iyan din dà igkesuat ne ebpekidlewaney te lalag, ugaid ne warà rantek din ini su iyan din dà egketemanan ne ebpein-indihà, kewahaan, ebpetemptempeleey, peen-entapà

<sup>5</sup> wey ebpeep-epuley ran su ini ke ulaula rut te minge etew ne nereetan en ke itungan dan ne warè en iya meketahù te itungan dan ke tidtu ne penurù ni Hisu Kristu. Su iyan dan kunaan ke kebpesakup dan te Eleteala ne ebpegekewasa kandan.

<sup>6</sup> Ne benar ne sikitew ne mibperetiya en te Eleteala ne ruen ke kewesai tew, ugaid ne kenà kearen ini. Su iyan dekelà te hinawa tew ini se kebpesakup tew te Eleteala wey kebmeupiya te hinawa tew ke misan deisek dà ne kearen tew.

<sup>7</sup> Su pehaney en te kinehemew tew kayi te ampew te dunya, ne warà en iya nerimbitrimbit tew misan deisek dà. Ne engketà ded maa ke ebpatay kiyu en, warà en iya deisek dà ne egketapik tew.

<sup>8</sup> Ketà be ne embiya maa duen ded egkekaan tew wey duen belegkas tew, ne edupianen tew en te hinawa tew.

<sup>9</sup> Ugaid ne ke minge etew ne egkesuat ne egkewasa ne merakel se ibpenggeram kandan. Su ini se kegkesuat dan ne warà rantek din ne ebpekekaid kandan ne iring te telebpi kandan ne kenà dan ebpekeliyu. Ne kayi te ini ne egkevinasa ran dut te kedusa ne kenà edtaman.

<sup>10</sup> Su ini se kegkenuhun te kureta dut te minge etew, ne ini se puunan te merakel ne meraat ne ulaula ran. Su duen minge etew ne midsuwey se kebperetiya ran te Eleteala su ini imbe iya se kiyug dan te kegkewasa. Ne iyan dan egketemanan se nekevaal te dekdekelà ne kemutuwan dan.

### *Ke Suhù Ni Pablo Diyà Te Ki Timoteo*

<sup>11</sup> Ugaid ne geina te sikuna ini, Timoteo, ne etew ne eduma te Eleteala, ne uram ka apey kenà ka ebpekeiring kayi te menge etew ini. Penamantaman ka te kebmétidtu te ulaula nu wey itungan ne ebpekesuhát te Eleteala. Ilaus nu ke kedsarig nu te Eleteala. Ikelimù nu ke menge ruma nu, ne misan engkey en kerehen din ne tigkeri nu, ne ipekita nu ke ketulengeran nu kandan.

<sup>12</sup> Misan ebpekeanuyanuy ka te kemerehenan, ne ikehat nu te tivang se keduma nu te Eleteala su apey nu egkehaked arà se umur ne warà edtemanan din. Su arà imbe ke impasad te Eleteala kenikew ketà te kinetawag din keykew ne migkahi ka riyà te etuvangan te merakel se mibperetiyaya ke en.

<sup>13</sup> Na duen pè be maa ini igkahi ku keykew ne ke Eleteala ne mibehey te niyawa te langun ne eginginawa se ebpekevanteý keyta wey si Hisu Kristu ke mid-itindeg dut te benar diyà te etuvangan ni Poncio Pilato se ebanteý rema. Tembù be igkahi ku keykew

<sup>14</sup> ne perumdumai nu ke langun ne insuhù keykew su apey warà meraat ne ebpekesawug te ed-ul-ulaan nu ne egkesewayan ka. Dumai nu ve ini langun taman ketà te kedlived ni Hisu Kristu kayi.

<sup>15</sup> Ini ve se kebbelived te Eleteala ki Hisus kayi ne kedtumana rin dut te enget ne hewii ne mibpemili din. Su sikandin dà se keupianan te ebayàbayà te langun. Sikandin ke mepurù ne ebayàbayà dut te langun ne menge datù wey sikandin ke mepurù ne ebayàbayà dut te langun ne menge pengulu.

<sup>16</sup> Sikandin dà se warà kemetayan din, ne riyà med-ubpà sikandin te ebpeneringsing ne rayag ne kenà egkeuvey te menge etew. Warà etew ne ebpekekita kandin su sikandin ne kenà egkekita. Edeyù kiyu ve kandin su sikandin ke ebayàbayà taman te taman! Egketuman ini.

<sup>17</sup> Na Timoteo, kehiyi nu ke menge etew ne kewasa te kenà dan ibpereyùdeyù, ne kenà dan serihi ke kekewesai ran su ini ne edsahad dà. Ugaid ne iyan dan serihi ne Eleteala su ebhayan kiyu nikandin te pengelimuan din ne sesangan apey ki egkehalew.

<sup>18</sup> Kehiyi nu ke menge kewasa ne med-ulaula ran te meupiya wey medtavang dan dut te menge ruma ran, su igkesuat te Eleteala ne ebpekeumun ded sikandan dut te imbehey rin kandan.

<sup>19</sup> Su embiya ini se ed-ul-ulaan dan, ne iring dut te edtahù dan te kekewesai ran diyà te langit ketà te akir din ne hewii su apey ran ebpeketelima te umur ne warà edtemanan din.

<sup>20</sup> Na Timoteo, tugenura nu ke keppenurù nu ne insarig te Eleteala kenikew. Kenà nu ed-emungi ke menge etew ne ebpengasak te lalag ne kenà ebpekesuhát te Eleteala wey ebpelelewaneý te warà rantek din. Su iyan dan kunaan ne metau ran, ugaid ne ke lalag dan mekeatag te Eleteala ne kenà benar.

<sup>21</sup> Uram ke ve kayi te penurù dan su ruen menge etew ne mibperetiyaya kayi ne iyan dan netemanan ne midsuwey se peretiyaya ran ki Hisu Kristu.

Iyan ku kiyug ne egkeheram nu ke tavang te Eleteala.

Arà dà taman.

*Pablo*



## Ke Ikeruwa ne Surat Ni Pablo Riyà te Ki Timoteo

<sup>1</sup> Siaken ini se edsurat ne si Pablo. Senge etew a ne kedserihan ni Hisu Kristu egenat dut te kiyug te Eleteala. Su midsuhù a rin te ebpesabut mekeatag te umur ne warà edtemanan din ne impasad din dut te langun ne menge etew ne ebpekidsuveka ki Hisu Kristu.

<sup>2</sup> Edsuratan ku maa sikew, Timoteo, ne igkelimù ku iring te tuney ne anak ku.

Iyan ku kiyug ne egkeheram nu ke tavang wey kegkeyru te Eleteala ne Amey tew wey si Hisu Kristu ke Kerenan tew, ne egenat kandan ne ebmerinew ke itungan niyu.

### *Ke Limengew ni Pablo ki Timoteo*

<sup>3</sup> Ebpeselamat a te Eleteala atag keykew, Timoteo, te kebpengengeni ku kandin, ne edumaan ku sikandin wey ebpekesuhat kandin iring dut te mid-ulaula te menge apù ku rengan. Uya, merukilem meandew ne idragkes ku sikew te pengeningeni ku.

<sup>4</sup> Netenuran ku ke mibpengampet ne luwà nu te kinepekedsuwey ta en, Timoteo, ne dekelà se kiyug ku te kebpkebalak ta su apey a egkehalew nevenar.

<sup>5</sup> Ne warà ku melipati ke tidtu ne sarig nu ki Hisu Kristu iring ded iya dut te kedsarig te apù nu ne si Loida wey ke iney nu ne si Eunice. Ne netuenan ku te ruen dema sarig nu iring dut te kandan ne sarig.

<sup>6</sup> Tembù be egkehiyen ku keykew te pegelepi nu te egamit arà se ketau te ebpeheewit te menge mibperetiyya ne imbehey te Eleteala kenikew ketà te kinerampen ku keykew.

<sup>7</sup> Su mibehayan kiyu en te Eleteala te Kedesenan ne Ebpetuntul te Menusiya apey ki kenà egkeandek, nasi pà te mibehayan ki rin te gehem te edtuman te kiyug din wey ke limù ta rut te menge ruma ta wey ke ketau te ed-erangan te langun ne ed-ul-ulaan ta.

<sup>8</sup> Ketà be ne kenà nu we ikeyeyai te ebmemenuitul mekeatag ki Hisus ke Kerenan tew, ne kenà nu rema ikeyeyai su ini a te bilengguan su iyan ku kinekevilanggu ne keduma ku ki Hisus. Ugaid ne telimaa nu se piya engkey ne rasey ne ebpekeuma keyta atag dut te kebpesabut ta kayi te Meupiya ne Tudtul su iyan ebaher keyta ne Eleteala.

<sup>9</sup> Su iyan mid-ulaula te Eleteala keytew ne impeliyu ki rin dut te kedusa te salà tew, ne midsuhù ki nikandin te ed-ulaula te ebpekesuhat kandin. Ugaid ne kayi te kinepeliyu rin wey ke kinetawag din kenitew ne kenà egenat te meupiya ne ulaula tew su belidsalà ki. Ugaid ne impeliyu ki rin su dekelà se kiyug din te edtavang kenitew. Su rengdengani te warà din pà melimbag se piya engkey en, ne intahù din en te itungan din se ibehay rin si Hisu Kristu su tavang din kenitew.

<sup>10</sup> Ne guntaani ne netuman en ke tavang din kenitew su impengkayi rin en si Hisu Kristu ke ebpeiyu keytew. Ne ketà te nevanew sikandin dut te kinepatay rin ne kayi rin be iawà ke andek tew te kepatay wey impesabut din kayi te Meupiya ne Tudtul te ruen umur ne warà edtemanan din.

<sup>11</sup> Ne midtendù a te Eleteala ne kedserihan ni Hisu Kristu te ebmemenuitul kayi te Meupiya ne Tudtul mekeatag kandin wey ibpemesabut ini.

<sup>12</sup> Tembù be egkerasey ad ini te bilengguan. Ugaid ne kenà ku igkeyeyai su netuenan ku se Eleteala ma se edsarahan ku. Ne netuenan ku rema se ebpekegaga sikandin ne edtuganur kedì te langun ne helevek ne insarig din kedì taman ketà te hewii ne kedlived din te egkukum kenitew.

<sup>13</sup> Na Timoteo, ini se impenurù ku keykew ne elin-elin benar, ne ini imbe se rumai nu su iring te pelupandù nu. Ne itahù nu te hinawa ke kedsarig nu te Eleteala wey ke kedlimù nu te menge ruma nu su arà ke dait ne ulaula rut te sikitew ne mibpekidsuveka ki Hisus.

<sup>14</sup> Uram ka te kenà egkesembian ke benar ne penurù mekeatag ki Hisus ne insarig keykew dut te Kedesenan ne Ebpetuntul te Menusiya ne ed-ubpà kayi te keyta ne edtavang keyta.

<sup>15</sup> Neringe nu ke merakel ne mibperetiyya kayi te Asya ne mid-iniyuhan a ran en abpeg en si Pihilyu wey si Hirmuhinyu.

<sup>16-18</sup> Ugaid ne si Unisipiru ne kenà mulà maa iring ketà, su kenà egkeyeyaan sikandin ne ebayà kedì misan kayi te bilengguan. Su ketà te kinepekeuma rin kayi te inged ne Ruma ne mibpemengà a rin taman te netuen a nikandin. Ne layun a rin ebayai kayi te bilengguan, ne ketà ne ebpekehinawa a te meluag. Ne netuenan nu rema ke dekelà ne tavang din kedì te riyà a pà te inged ne Ipisu. Iyan ku kiyug ne ibpekita te Eleteala

ke tavang din kandin te telteleanak wey egkeyruwan din sikandan ketà te hewii ne kegkukuman te minge etew.

## 2

*Insempità ni Pablo ke dait ne Ulaula dut te Menge Etew ne Eduma ki Hisus*

<sup>1</sup> Sikew, Timoteo, ne iring te tunej ne anak ku, iluta nu ke kedsarig nu su iyan edtavang keykew ne si Hisu Kristu genat te mibpekidseveka ka kandin.

<sup>2</sup> Ne ke nerineg nu ne impenurù ku keykew diyà te sineruwan te merakel ne etew, ne arà be se ipenurù nu diyà te minge etew ne egkeserihan apey ran dema ikepenurù diyà te ruma pà ne etew.

<sup>3</sup> Ne kenà ka egkeandek ne edtelimà te kemerehenan ne ebpekeuma kayi te kenita atag te keduma ta ki Hisu Kristu, ugaid ne ikehat nu te tivang, ne ipandled nu iring dut te egkeserihan ne sundaru ni Hisu Kristu.

<sup>4</sup> Su ke sundaru ne ebpenunuhat te mepurù din ne kenà ed-amung te duma ne helevek su iyan din dà edurungulan ke suhù te mepurù din kandin.

<sup>5</sup> Ne idsempità ta rema te etew ne egkuya te ebpelelahuy. Su misan sikandin pà se meabet ne ebpelelahuy, ne kenà sikandin egkevehayan dut te idlalew kandin ke warà din dumai ke pepatà kandin dut te mepurù din te kinerudsù dan.

<sup>6</sup> Iring kiyu red dema te etew ne ebpegelep te kebpengengawid din, warà duma ne egkeuna ne egkeuntungan dut te egkeehani rin ke kenà sikandin ded.

<sup>7</sup> Pegpegitunga nu ini se migkahi ku kayi te minge sempità ku ne ke Kerenan tew ne si Hisus se ebpesabut keykew.

<sup>8</sup> Na Timoteo, itahù nu ini te itungan nu mekeatag ki Hisu Kristu. Tentenuri nu te mibpebaluy sikandin ne etew egenat te kevuwaran ni David ke apù tew rengan. Ne neuyag din maa sikandin dut te kinepatey rin. Ini ve ke Meupiya ne Tudtul ne ibpemenudtul ku diyà te minge etew.

<sup>9</sup> Tembù be egkerasey a guntaan su nevilanggù a iring te medmeraate ne etew. Ugaid ne misan mibakù a te sengkali kayi, ne kenà dan egkevangan ke kebpmenudtul te Lalag te Eleleala.

<sup>10</sup> Ketà be ne edtigkeran ku en ma lavew piya engkey ne egketemanan ku apey ke minge etew ne mibpemili te Eleleala ne ebpekerineg te lalag din ne egketau te si Hisus ne ebpeleyu kandan, su kiyug ku ne ebpekeliyu ran dema egenat te kebperetiyaya ran ki Hisu Kristu ne ebpeketedimà dan te umur ne warà edtemanan din wey warà pasar din se keupiya rin neraan en ne impenehana te Eleleala kandan.

<sup>11</sup> Ini se beseanan ne benar nevenar:

Embiya neseveka ki en ki Hisus

ne tuus te nekeunung ki en kandin te minatey,  
ne ruma ki en nikandin te ed-ubpà taman te taman.

<sup>12</sup> Embiya edtigkeran tew ke kerasey

atag te peretiyaya tew kandin,  
ne ebpekeamung ki kandin te ebayàbayà.

Ugaid ne embiya ibparew tew te ruma kiyu nikandin,  
ne ibparew ki rema nikandin ne kenà ki edsehipaan.

<sup>13</sup> Ne misan ke itungan tew ne layun egkesembii,

ne sikandin mulà ne egkeserihan nevenar  
su kenà edsalin sikandin dut te nekahi rin.

*Ed-up-upiya kiyu te Edtuman te Kiyug te Eleleala su apey kiyu Ebpekesuhate te Hinawa Rin*

<sup>14</sup> Na ipetahù nu te itungan dut te minge etew ini se penurù ku, ne tegtehami nu sikandan te ebaag te id-etuvang te Eleleala te med-engked dan se ebpelelewawany te lalag ne warà tapek din. Su ayan imbe ne warà en iya keupianan din, nasi pà te ebpekereraate dut te peretiyaya te etew ne ebpemekerineg.

<sup>15</sup> Up-upiani nu ve se kedtuman nu te kiyug te Eleleala su apey ka ebpekesuhate te hinawa rin. Su embiya ini se ed-ul-ulaan nu, ne warà igkeyeyai nu mekeatag te helevek nu diyà te etuvangan din su ke kebpenurù nu rut te benar ne Lalag te Eletaala ne titay batang dà.

<sup>16</sup> Kenà ka ebpemekid-ubpu rut te minge etew ne ebpemengasak te warà tapek din te Eleleala. Su ke minge etew ne iring ketà ne ed-ebpet te kebpekepekeriyù te hinawa te ruma ran diyà te Eleleala.

<sup>17</sup> Ini ve se penurù dan ne ebpekeiring te it-it su edradnas taman te edteredak en ke lawa te etew. Iring embe iya ketà ke penurù ni Himeneo wey si Fileto.

<sup>18</sup> Su midsuwayan dan ke tidtu ne penurù su egkehiyan dan te neipus en ke hewii te kebanew te Eleteala te minge etew ne minatey. Tembù be ini ve se ebpmenuadtulen dan ne ebpekeliveg te itungan dut te ruma ne mibperetiya.

<sup>19</sup> Ugaid ke tidtu ne penurù te Eleteala ne insevetad din ne kiter ne kenà en iya ebparin. Su ruen imbe kayi ne lalag din ne egkahi te netuanan din ke langun ne mibpekidseveka kandin. Ne ruen pà maa lalag din ne egkahi te embiya egkahi ka te mibpekidseveka ka kandin, ne kenà nu en imbe surii ke meraat ne betasan nu.

*Insempita ni Pablo ke atag kayi te Sikita ne Mibperetiya ki Hisus Ebpekeriring te Pekeediran te Baley*

<sup>20</sup> Ke baley ne rekelà ne merakel se edsusunan te pekeediran ketà te lusud. Ruen ketà pekeediran ne mibeelan te bulawan wey pirak, ruen pà lavew mibeelan te kayu wey ruma ne midiyun ne tanà. Ruen pekeediran ne belielehà ne wey ren dà ibpehemew ke ruen kevurunan, ugaid ne ke pekeediran ne mibeelan den dà te kayu wey ke midiyun dan ne ini ke uman gewii ne egemiten dan.

<sup>21</sup> Sikitew ne minge mibperetiya ne iring imbe ketà te minge pekeediran. Embiya egkiyug kiyu ne ebrepantag te Eleteala ke edtehikemuney keytew, ne ed-elihuwan tew en ke meraat ne mid-ulaula tew pehaney su apey kiyu ebpekeiring te belielehà ne pekeediran ne igkenuhuni te kemuney. Su embiya arà se ed-ul-ulaan ta ne warè en idtila keytew diyà te etuvangan te Eleteala, ne duen atag tew te Eleteala su andam kiyu en misan ebmemenuwen kiyu nikandin.

<sup>22</sup> Na Timoteo, kenà nu ve ebpengunuti se kenguwed te hinawa nu. Ugaid ne itahù nu te itungan nu ke ulaula ne metidtu, ne ke kebpeiseg te sarig nu, ke kedlimù nu te minge ruma nu wey ke melintad ne hinawa nu riyà te kandin. Langun imbe kayi se ed-ul-ulaan nu elin te minge etew ne ebpengeningeni te Kerenan tew egenat te hinawa ne midtilak.

<sup>23</sup> Ne idsulit ku pà igkahi keykew ini te kenà ka ed-amung-amung dut te minge etew ne ebpeep-epuley te layab te warà tapek din. Su netuanan nu te iyan din dà egketemanan ne kerimburan.

<sup>24</sup> Su ke etew ne edsugsuhuen te Kerenan ne kenà egkepakey ne epulen. Nasi pà se edtumpis te minge ruma rin, ne ebpekenenawen ke lalag din te ebpenurù, ne kenà din edsulian ke edaatdaat kandin.

<sup>25</sup> Embiya ruen ed-apul dut te ibpenurù din, ne ebpetuntayan din te menanew su kema ke edsambian te Eleteala ke itungan dan ne ebpedsendit dan ne ebpeketuntul dan en dut te benar.

<sup>26</sup> Ne ebpekeimaman dan en ne ebpekeliyu ran en ketà te selaid ni Setanas ke midlimbung kandan su apey ran ebpekeruma te kiyug din.

### 3

*Ke Imbaag ni Pablo Mekeatag te Minge Etew ne Engkungkun ne Eduma te Eleteala*

<sup>1</sup> Tendai nu ini se lalag ku su ketà te egkepupus en ini se dunya ne merakel se keresayan ne ebpekeuma kayi te minge etew.

<sup>2</sup> Ruen minge etew ne ginawa ren dà se ebpegitungen dan, ed-umamin dan te kearan dan, dekarak dan wey mepereyù, meharang se kebpengahikahi ran ne kenà dan en iya ed-adat te minge lukes dan. Embiya ebbehayan etawa edtevangangan dan ne warà te hinawa ran, ne warè en iya te itungan dan se kebpegeleteala.

<sup>3</sup> Warà limù dan te ruma ran, ne embiya ruen igkeepes dan ne kenà dan egkepesehad ne edtevù dan te ruma ran, ebpegudar dan te mepait meraras ne lalag su warà angka te ulaula ran, ne misan engkey en ne keupianan ne kenà dan egkiyuhan.

<sup>4</sup> Kenà dan egkeserihan, ne warà metapid ne ed-ul-ulaan dan, ne sahad se kepereyù dan, ne iyan dan edtumuen se kepata dan te nanam ne ke Eleteala ne keluran en iya te itungan dan.

<sup>5</sup> Engkungkun ne mibperetiya ran te Eleteala ugaid ne kayi rà te ampew su kenà dan ebperetiya te ruen gehem te Eleteala. Na pekeriyù ka te minge etew ne iring ketà.

<sup>6</sup> Duen kayi te minge etew ini ne ebpemenayik diyà te ruma ne valey se ebpenurù te kenà metidtu apey ran egkelimbungi te minge meritan ne melemu ne ed-ay-ayunen. Ne ini se meritan ne nehuket en ke hinawa rin su ini se salà dan ne ke kedtuman dan te piya engkey ne kiyug dan.

<sup>7</sup> Tembù be melemu ran ne eduma rut te piya engkey ne ebpenurù kandan, ugaid ne kenà dan en iya ebpekesabut ke engkey se benar ne penurù.

<sup>8</sup> Ne ini se ebpenenurù te kenà metidtu ne iyan den dà kebpenurù ne edlantung dan dut te benar ne penurù iring ki Iyanis wey Iyanbiris dengan te midlantung ki Moises. Su langun dan ne nelayam en te itungan ne meraat, ne ke sarig dan ne warà ebuwatan din.

<sup>9</sup> Ugaid ne ini ne minge etew ne kenà ebpekeiseg te meuhet su egkepayehan te langun ne etew ke kereatey te ulaula ran iring dut te egketemanan ni Iyanis wey si Iyanbiris dengan.

*Edlevundus kiyu se Ebperetiyya Misan Egkerehenan ki*

<sup>10</sup> Ugaid ne sikuna, Timoteo, netueanan nu en te kenà a iring ketà su netueanan nu en ke engkey ke impenurù ku wey ke ed-ul-ulaan ku wey engkey se mibpegelepan ku te egelevek. Netueanan nu en ke kedsarig ku te Eleteala, ne netueanan nu rema ke kebpinginum ku te meadsil wey ke kinepekita ku te limù dut te ruma ne minge etew wey ke kedtigger ku te merasey.

<sup>11</sup> Ne netueanan nu rema ke nerasey a te kinepekesekiti kedì diyà te minge inged ne Antiyuka, Ikuniyum wey Listra. Ugaid ne ke Kerenan tew se mibpeliyu kedì dut te langun.

<sup>12</sup> Ne sikuna ne warà nu kepensevi te misan engkey ne etew se ebpenunuhat ki Hisu Kristu egenat te kinepekidseveka rin kandin ne ebpekesekitan.

<sup>13</sup> Ne ayan se minge meraat ne etew wey ayan se ebpenenurù te kenà benar, ne ke keraat te perangey ran ne ed-isab pà. Edlimbung dan te ruma ne etew, ne egkelimbungan dan ma rema.

<sup>14</sup> Ugaid ne sikew, Timoteo, kemali nu te mevaher ke langun ne impenurù keykew ne neperetiyya nu en, su netueanan nu ke minge etew ne mibpenurù keykew ne egkeserihan.

<sup>15</sup> Ne netueanan nu te reisek ke pà taman te rekelà ke en ne nepenurù ke en dut te impesurat te Eleteala ne lalag din. Ini ve imbe se impesurat te Eleteala se nekevehey keykew te itungan su apey ka ebpekehaked ketà te umur ne wara edtemanana din embiya si Hisu Kristu se mibperetiyya nu.

<sup>16</sup> Su langun ne lalag te Eleteala ne impesurat din ne riyana en iya ebpuun te kandin. Ne dekelà se atag din kenita su iyan ebpayag kenita te tidtu ne penurù mekeatag kandin wey ke kiyug din, wey edawey keyta te meraat su apey ki ebpekeengked. Ne ebmandù dema kenita te ulaula ne ebpekesuhat kandin apey ki ebpekeruma te metidtu.

<sup>17</sup> Ini se atag dut te impemandù ne lalag ne impesurat te Eleteala su apey ke minge etew ne ebpekeperetiyya te Eleteala, nasi pà se ebpekepenehana te ed-ulaula te langun ne meupiya.

## 4

*Ruma pà ne Suhù ni Pablo ki Timoteo*

<sup>1</sup> Na Timoteo, tehaad te si Hisu Kristu se edlived kayi su ebayàbayà te langun wey egkukum dut te minge etew ne biviyag wey ke minatey en, ne ruen idsuhù ku kenikew diyà te etuvangan te Eleteala wey si Hisu Kristu.

<sup>2</sup> Iyan ku idsuhù keykew ne kenà ka engked se ebpesabut kayi te lalag te Eleteala. Misan endei ka egketahù wey misan engkey ne hewii, ne iluta nu se kebpenemudtul nu rut te minge etew. Penurua nu ke minge etew ne ebpekesuwey. Iluta nu ve ke kebpesabut nu taman te egkerumaan dan ke lalag te Eleteala. Ne beg-eta nu ke hinawa rut te minge etew ne mibperetiyya gewii te ebpenurù ka kandan te menanew.

<sup>3</sup> Iyan ku kedsuhù keykew kayi su mehaan en egkeuma arà se hewii ne ke minge etew ne kenà edtelimà dut te benar ne penurù egenat te Eleteala. Su iyan dan egkiyuhan te ebpeming ne ke penurù ne ebpekeayun rut te kiyug dan, su ebpememengà dan te piya engkey ne etew se ebpenehàtahà te ebpekegkeupiya te telinga ran ne arà se ebpeming dan.

<sup>4</sup> Kenà dan edtelimaan ke benar ne penurù su iyan dan edtumuen ke mibèbeelan dà ne guhud misan kenà benar.

<sup>5</sup> Ugaid ne sikew, Timoteo, ipetireng nu se keduma nu kayi te tidtu ne penurù. Ne penehana ka neraan te kedtigger te kemerehenan. Es-eseka nu neraan se hinawa nu te kebpesabut nu rut te tudtul mekeatag ki Hisus te meriyù merani, ne pengimasara nu ke helevek ne imbehey keykew te Eleteala.

<sup>6</sup> Su siaken, ne mehaan en egkepupus ke ebpeneytayan ku. Ugaid ne misan ebpatay a ne meupiya su imbehey ku te Eleteala ke niyawa ku su sikandin se kemuney kedì.

<sup>7</sup> Ne iring te etew ne egkuya te ebpelelahuy, ne mibpegelepan ku te ed-ipus ke helevek ne imbehey kedi te Eleteala. Ne misan merehen en ne mid-upianan ku arà taman te dungguan, ne warà a mekesuway dut te benar ne penurù misan deisek da.

<sup>8</sup> Engketà be ne ruen arà impenehana te Kerenan tew ne idlalew rin kedi su metidtu se keduma ku kandin. Ini se ibehey rin ketà te akir din ne hewii te kegkukum din te menge etew, ne sikandin dà se egkukum te metidtu nevenar. Ne kenà siaken dà se edlelawan su langun te etew ne egkelimù kandin wey ebpenareng te kedlived din ne ruen dema kandan.

*Ke Menge telaan ni Pablo ki Timoteo*

<sup>9</sup> Ay-ayuna nu pè be se kebpengkayi nu te mehaan.

<sup>10</sup> Su mid-awà en si Demas kayi te kedi ne mibpendiyà te Tiselunika. Su iyan din pinedlabi ke keupianan din kayi te ampew te dunya. Si Kirisin se mibpendiyà te Galasiya wey si Tito se mibpendiyà te Dalmasiya.

<sup>11</sup> Si Lukas dè be ini se ruma ku. Dumaa nu pè be si Marcos ke ebpengkayi ka su ebpeketavang sikandin kedi.

<sup>12</sup> Si Tikikus ne impendiyà ku te Ipisu.

<sup>13</sup> Embiya ebpengkayi ka ne ewita nu rà ke kumbalà ku ne mekepal ne netehak ku riyà te en ki Karpus riyà te Teruwas. Ewita nu ve rema ke menge riberù ku, lavi en arà se menge surat ku.

<sup>14</sup> Uteid meraat se imped-ulaula kedi ni Alejandro ke ebpandey te galang. Uteid ne Eleteala se edsuli kandin dut te ulaula rin ne meraat.

<sup>15</sup> Na ingat ka kayi te etew ini su dekelà nevenar se kedlantung din kayi te penurù tew mekeatag ki Hisus.

<sup>16</sup> Pehaney ne kineetuvang ku riyà te kukuman ne warà en iya senge etew rà ne edtavang kedi. Mid-ewaan a rut te langun ne ruma ku. Uteid ne ebuyuen ku te Eleteala ne kenà din arà penunduha se mid-ulaula ran.

<sup>17</sup> Uteid ne misan mid-ewaan a nikandan ne si Hisu Kristu ke Kerenan tew ne warà med-awà kedi. Kayi sikandin te uvey ku ne sikandin se mibaher te hinawa ku su apey ku igkeeneb igkepesabut ke tudtul mekeatag kandin diyà te langun ne menge etew ne kenà Hudiyanen. Ne sikandin be se mibpeliyu kedi ketà te ebpekekaid kedi su iring te mibigkat a rin kayi te bèbà te buaya.

<sup>18</sup> Ne netuenan ku te misan engkey se egketemanan ku ne meraat ne egketevangan a rin, ne ed-ewiten a rin diyà te edetuan din diyà te langit. Iyan be meupiya ne kenà kiyu ed-engked se edeyrey kandin taman te taman! Ne metuman be ini!

<sup>19</sup> Menu ensi Priscila wey si Akila wey en si Unisipiru langun dan te telteleanak?

<sup>20</sup> Si Irastu ve maa ne riyà ded te Kurintu, ne si Terupimu ne netehak ku riyà te Militu su nekedaru sikandin.

<sup>21</sup> Na ay-ayuna nu pè be te kebpengkayi nu te kenà pà egkeuma se kebmeadsil kayi.

Ensi Yubulu, si Pudanti, si Linus, wey si Claudia wey ke langun ne menge mibperetiyaya kayi se ebpengginginsà ke engkey en se egketemanan nu.

<sup>22</sup> Iyan ku kiyug ne layun ka rumai ni Hisu Kristu ke Kerenan tew, ne langun niyu ne ebpekeheram te tavang ne riyà ebpuun te Eleteala.

Arà dà se edlelehan ku.

*Pablo*

## Ke Surat ni Pablo Riyà te Ki Tito

<sup>1</sup> Siaken ini se edsurat ne si Pablo. Sugsuhuen a te Eleteala wey senge etew ne kedsrihan ni Hisu Kristu.

Nepemili a ne impeewit ne edtavang te munge etew ne mibpemili te Eleteala apey egkevaget ke sarig dan wey apey ebpekeiseg ke nesebutan dan mekeatag te tidtu ne penduan dut te peretiyaya tew.

<sup>2</sup> Elin dema ne insuhua kedì ne apey ran ebpekesabut te ruen ebpenerengen tew ne umur ne warà edtemanan din. Inì se umur ne warà edtemanan din ne impasad te Eleteala rengan ne kenà egketuen te wagib se edtarùtarù sikandin. Su impenehana ini neraan te Eleteala te warà pà melimbag ini se kelibutan,

<sup>3</sup> ne ketà te midtendù din ne hewii ne impayag din en ini kayi te lalag din. Na ini ve imbe se tudtul se ibpesabut ku mekeatag dut te impasad din, su midsuhù a te Eleteala ke ebpeiyu kenitew te salà tew.

<sup>4</sup> Edsuratan ku sikuna, Tito, su iring ka en iya te tunei ne anak ku su seveka kiyu riyà te peretiyaya tew ki Hisu Kristu.

Iyan ku kiyug ne egkeheram ni su te tavang wey kelinew te itungan ne riyà ebpuun te Eleteala ne Amey tew wey si Hisu Kristu ne ebpeiyu kenitew dut te salà tew.

*Ini ne Mekeatag te Helevek ni Tito ne Ebpendù te Menge Pekilukesen te ebpeneheewit te Menge Mibperetiyaya diyà te Punul ne Krita*

<sup>5</sup> Iyan ku kinetahak keykew diyà te inged ne Krita ne apey nu egkeatur ke engkey se warà pà mepasad wey apey ka ebpekependù te munge pekilukesen ne ebpeneheewit dut te munge mibperetiyaya te uman senge inged iring dut te ke impemandù ku keykew mekeatag kayi.

<sup>6</sup> Iyan nu tendua ne etew ne warà meraat ne ulaula rin ne igkeisuhat kandin, ne seveka rà se esawa rin, ne ke munge anak din dema ne mibperetiyaya ki Hisu ne kenà dan egkelalaglalag te munge etew su kenà dan ed-ulaula te kiyug dan dà wey kenà dan mengetunger.

<sup>7</sup> Su ke etew ne egketendù ne ebpeneheewit dut te munge mibperetiyaya ne iyan din egweraan ne helevek te Eleteala, tembù be warà med-ulaula sikandin te meraat ne igkeisuhat kandin. Kenà kandin dà se ebpengetketengen din, ne kenà sikandin melemu ne egkelengetan, kenà sikandin metehel ne ed-inum te ebpeketevereg, ne kenà sikandin edretem te meraat, ne kenà lelegawen te pirak ini se etew ne egketendù ne ebpeneheewit.

<sup>8</sup> Ugaid ne iyan pà mulà se mesakew sikandin te piya engkey en ne etew, ne igkesuat din ke piya engkey en ne meupiya ne ed-ul-ulaan. Ne ed-erangan se ed-ul-ulaan din, metidtu sikandin, ke ulaula rin se ebpekesuhat te Eleteala, ne ed-eren te kiyug te lawa rin.

<sup>9</sup> Ne ke ulaula rin ne kenà ebpekesuwey rut te tidtu ne penurù ne ingkepenuruen kandin ne egkeserihan. Su apey arà se kebpenurù din te metidtu ne ebpekepehimbenaar te munge etew, wey embiya ruen ebparew rut te tidtu ne ibpenurù din ne igkepekita rin kandan ke kenà dan kebpeketuntul.

<sup>10</sup> Su merakel ne etew kenian te Krita ne kenà ebpemineg dut te tidtu ne penurù, labi en ayan se nekeruma te penurù te Hudiyanen ne ebpeetusan ke munge mibperetiyaya, ne neekalan te ruma ran kayi te penurù dan ne warà rantek din.

<sup>11</sup> Ne peengkera nu sikandan su merakel se tiwelayà ne nehuvar dut te kebpenurù dan ne kenà tidtu su mekeyeyà se dalan dan te kebpeymentiyari te pirak.

<sup>12</sup> Duen mevantug ne etew te sikandan ded iya ne munge etew te Krita se midlalag mekeatag kandan se egkahi te, "Ini se munge etew te Krita ne munge teruen, iring sikandan te mevurut ne binatang, munge mepauk ne iyan den dà ketehelan se egkaan."

<sup>13</sup> Ne benar iya arà se migkahi ketà te senge etew, ne arà be imbe ne pekebaher ka se edaway kandan su apey ebpeketidtu sikandan te peretiyaya ran.

<sup>14</sup> Ne med-engked dan se eduma rut te layab ne guhud ne mibèbeelan dà dut te munge Hudiyanen wey med-engked dan se eduma rut te suhù te munge etew ne mid-awà en ketà te tidtu ne penurù te Eleteala.

<sup>15</sup> Su embiya mibmelinis en te Eleteala ke hinawa te etew, ne langun ne melinis diyà te kandin. Ugaid ne ke etew ne warà pà mibmelinis se hinawa rin te Eleteala su warà

pà mibperetiya, ne warà dema melinis diyà te kandin su ruen meraan ne netahù te hinawa wey itungan din ne kenà din egketuanan ke engkey se meupiya wey meraan.

<sup>16</sup> Menge etew ne iring ketà ne engkungun ne eduma te Eleteala, ugaid ne ke ulaula ran ne kenà ebpekedruyud dut te lalag ne egemew kayi te bèbà dan. Liyuliyu se kerupangan dan, ne kenà dan eduma dut te idsuhù kandan, ne ketà ne warà en iya meupiya ne egked-ulaula ran.

## 2

### *Ke Impemandù ni Pablo Ki Tito*

<sup>1</sup> Ugaid ne sikuna, Tito, ne iyan nu rà ipenurù ne ke titay batang dà dut te benar ne penurù te Eleteala.

<sup>2</sup> Igkahi nu rut te menge lukes ne meama ne ed-erangan dà te ed-ul-ulaan dan, ne ed-ulaula te endei se egkeedatan dan wey med-eren dan te kiyug te lawa ran. Ne mehmetidtu se kebperetiya ran te Eleteala, medlimù dan te menge etew, ne mebbekeantus dan se edtigker te kemerehenan.

<sup>3</sup> Engketà ded maa ke kebpenurù nu rut te lukes ne memeritan te iyan dan ul-ulaa ne ebpekesuhat te hinawa te Eleteala. Kenà dan medseserupet, kenà dan med-inum te ebpeketevereg. Iyan pà mulà se mebpenurù dan te meupiya ne ulaula

<sup>4</sup> su apey imbe ini se egehuruwan dut te menge menguwed pà ne memeritan te kedlimù te esawa ran wey menge anak dan.

<sup>5</sup> Ebpemenduan dan dema ke menge menguwed pà ne memeritan te med-eren dan te kiyug dan dut te itungan wey lawa ran. Ne iyan dan dà edurungulan ne kedtuganur te baley ran wey meadat te esawa ran wey ke lalag te esawa ran ne ebpeminehan dan. Su embiya ini se ed-ul-ulaan dan ne kenà egkesumpalit ke lalag te Eleteala.

<sup>6</sup> Engketà ded dema ke kebpenurù nu te menge kenakan te med-eren dan te kiyug te itungan wey lawa ran.

<sup>7</sup> Ne sikuna imbe, Tito, ne ipekita nu se meupiya ne ulaula nu ne egketularan su sikuna se egkeiringan dan. Ne embiya ebpenurù ka, ne tidtu te hinawa nu te kebpenurù su apey ran egkekita se tidtu se keykew ne peretiya.

<sup>8</sup> Ne uram ka te kebpengahikahi nu ne egenat dut te tidtu ne peretiya ta su apey kenà egkesewayan. Su embiya ini se ed-ul-ulaan nu, ne egkeyeyaan ke kunterà nu ne ebpekeawà su warà ma idsawey ran dut te penurù ta.

<sup>9</sup> Ne ke menge sugsgusuhuen ne mibperetiya en, ne igkahi nu kandan te mebperumruma ran dut te langun ne suhùsuhù kandan su apey ini se ebpengemuney kandan ne egkesuat. Kenà dan mebpenumpun.

<sup>10</sup> kenà dan mebpemenakew, ugaid ne layun dan mebbekita te langun ne ulaula ran ne egkeserihan. Su embiya iring ketà ne langun ne ed-ul-ulaan dan ne meupiya, ne ed-iseg se kegkeinesa rut te menge etew kayi te tidtu ne penurù te Eleteala ne ebpekiyu kenitew.

<sup>11</sup> Su impekita en kenitew te Eleteala ke tavang din su apey langun te menge etew ne ebpekiyu dut te kedusa te salà dan.

<sup>12</sup> Ne ini se tavang ne impekita te Eleteala kenitew se mibpenurù en kenitew te ed-engkeran ke ulaula ne kenà ebpekesuhat te hinawa rin, abpeg ke langun ne kiyug te lawa tew kayi te ampew te dunya. Ne ed-erenen tew ke kiyug te itungan wey lawa tew su apey langun ne ulaula tew taman te kayi ki pà te ampew te dunya ne metidtu wey ebpekesuhat te hinawa te Eleteala.

<sup>13</sup> Ini rà be se ed-ul-ulaan tew te kedtihad tew ketà te meupiya ne Hewii ne ebpenerengen tew ne egkekita ta ke ed-andlag ne raman din dut te kedlived te Eleteala ne mekegehem ne si Hisu Kristu ke ebpekiyu kenitew.

<sup>14</sup> Ne imbeliwas din ke lawa rin ketà te kinepatay rin su apey mekeliyu kiyu te kinekeuripen te salà tew wey apey ebmetilak ke hinawa tew. Ne insivey ki nikandin ne kandin ne sakup ne mibehayan ki nikandin te kiyug te ed-ulaula te meupiya.

<sup>15</sup> Ne ini imbe iya te migkahi ku, Tito, se ipenurù nu te menge etew kenian. Begeta nu sikandan ne kenà ka alang-alang ne ebangan te ulaula ran ne meraan, su ruen ketengdanan ne imbehey kenikew te Eleteala. Kenà meupiya ne egkesudian ka te menge etew.

## 3

### *Penduan ne Ibped-ulaula te Menge Mibperetiya*

<sup>1</sup> Igkahi nu, Tito, rut te minge mibperetiyya kenian te med-adat dan dut te minge mepuru te inged dan wey ke minge ruma ne ruen ketenglanan din. Medtuman dan dut te minge suhuan kandan, ne layun dan mebpenehana te ulaula ne meupiya.

<sup>2</sup> Igkahi nu kandan te kenà dan med-ituk te ruma ran, ne kenà dan medretem te meraat. Ugaid ne iyan dan ul-ulaa ne ebpeed-edatey wey mebpsesgshippey ne ibpekita ke ketulengeran dan te langun ne minge etew.

<sup>3</sup> Su sikitew ne minge mibperetiyya ne rengan ne minge merupangdupang ki, kenà ki meperumaruma, ne warà ki meketuntul ke tidtu ne penuru. Nengeuripen ki rut te langun ne kiyug tew rà, ne iyan dà neketahù kayi te hinawa ta ne meraat ne ebpekesakit te hinawa te ruma ta wey ebpesigsihiyey. Neepesan ki te minge etew, ne neepes ki red dema kandan.

<sup>4</sup> Ugaid ne ketà te neumaan ki en dut te kegkeyru wey limu te Eleleala ke ebpeleyu kenitew,

<sup>5</sup> ne ketà kiyu nikandin impeliyu dut te salà tew. Ne kenà egenat dut te meupiya ne mid-ulaula tew se kebpeleyu rin kenitew, ugaid ne egenat en te kandin ne kegkeyru. Impeliyu ki nikandin dut te salà tew impepevayà te midlulan ki nikandin ne impesau ki pà maa impeanak sabap dut te gehem te Kedesean ne Ebpetuntul te Menusiyà ne mibehey kenitew te behu ne umur.

<sup>6</sup> Su mibehayan ki en te Eleleala te dekelà ne tavang din su pinepengkayi rin en ke Kedesean ne Ebpetuntul te Menusiyà impepevayà ki Hisu Kristu ke ebpeleyu kenitew.

<sup>7</sup> Ne ketà be te tavang din kenitew impepevayà te kinepatey ni Hisu se kinemetidtu tew riyà te etuvangan din, ne nevaluy ki nikandin ne minge anak din. Tembù be ebpekehaked ki te umur ne warà edtemanan din ne ke ebpeneregen tew.

<sup>8</sup> Ini ve iya, Tito, se langun ne minge lalag ku ne benar.

Kiyug ku ne idtahamtahan nu ini ibpenuru su apey ke minge etew ne mibperetiyya te Eleleala ne egkeinesa ne ebpegelep te ulaula ne meupiya, su keupianan ini wey berepantag dema te langun dan.

<sup>9</sup> Ugaid ne kenà ka ed-amung-amung dut te ibpelewlewaney ne warà rantek din wey layab ne minge guhud te kepuunpuun. Ne kenà ka ebpemekid-ubpu dut te kenà ebpemekedsuhatey ne lalag wey ke ibpelewlewaney te minge etew mekeatag te penduan ne intahak ki Moises rengan. Ini ne kenà ebpeketavang su warà en iya rantek din!

<sup>10</sup> Ne embiya ruen etew ne eguvar te ed-upekatan te minge mibperetiyya, ne dewaya nu. Ne embiya kenà ebpemineg, ne seupi nu dewaya. Ne embiya kenà pà ebpemineg, ne behara nu en.

<sup>11</sup> Su ketà ne egketuenan nu ne nereetan en se itungan din ne eberedusaen sikandin, ne ke salà din se tuus te nekesuwey sikandin.

*Ke Mewri ne Penduan ni Pablo*

<sup>12</sup> Embiya ebpekeuma si Artimas etawa si Tikikus se edsuhuen ku kenian te keniyu, ne penamantaman ka te kebpekibalak nu kedi diyà te inged ne Nikapulis su nekepegitung a te ed-ubpà e pà riyà taman te ebpekesahad ke hewii ne meadsil.

<sup>13</sup> Penamantaman ka rema te endei se kegaga nu te edtavang ki Sinas ke ebugadu wey si Apulu te ked-ipanew ran, ne tugenura nu ke ruen kurang dan.

<sup>14</sup> Ne penuraa nu ke minge suled tew kenian te meguru ran te ebpegelep te ulaula ne meupiya su apey ran ebpeketavang te minge etew ne egkepesangan su apey ke keupiya te peretiyya ran ne egkekita.

<sup>15</sup> Langun te minge ruma ku kayi ne elin ebpeginginsà mekeatag te sikuna kenian. Ne ebpeginginsà a rema rut te minge ruma tew kenian ne mibperetiyya ke engkey en se egketemtemanan dan?

Iyan ku kiyug ne langun niyu ne ebpekeheram te tavang te Eleleala.

Arà dà taman.

*Pablo*



## Ke Surat ni Pablo Riyà te Ki Filemon

<sup>1</sup> Siaken ini se edsurat ne si Pablo elin si Timoteo ke suled tew te ebperetiyyaya. Ini ad te bilengguan su atag dut te kebpesabut ku mekeatag ki Hisu Kristu.

Edsuratan dey sikuna, Filemon, ne sepekat ne igkelimù dey ne ruma rey dema te ebpesabut mekeatag ki Hisus,

<sup>2</sup> wey riyà dema te ki Epiya ne senge etew ne meritan ne suled tew te ebperetiyyaya, wey ki Arkipus dema ne ruma tew te ebpekibunù ki Setanas ke datù te pekaid, wey taman dut te langun ne mibperetiyyaya ne egkevurun keninyan te baley nu.

<sup>3</sup> Iyan ku kiyug ne egkeheram niyu te tavang wey kelinew ne itungan ne riyà ebpuun te Eleteala ne Amey tew wey si Hisu Kristu ke Kerenan tew.

*Ini ne Mekeatag te Kedsarig ni Filemon ki Hisus wey ke limù din dut te langun ne Mibperetiyyaya*

<sup>4</sup> Filemon, uman a ebpengeningeni te Eleteala ne idragkes ku sikuna, ne ibpeselamat ku rema kandin mekeatag kenikew.

<sup>5</sup> Su tatap ne egkerineg ku ke limù nu rut te langun ne mibperetiyyaya keninyan wey ke kedsarig nu ki Hisu Kristu ke Kerenan tew.

<sup>6</sup> Iyan ku ebpengeningeni kenikew ne ke kegkevagkes te hinawa niyu te menge mibperetiyyaya se ebpeiseg apew egkeumani ke nesebutan niyu dut te langun ne keupianan tew ne kayi ebpuun te kebpekidseveka tew ki Hisu Kristu.

<sup>7</sup> Su ketà te nerineg ke mekeatag te limù nu, Filemon, dut te menge ruma nu, ne nehalew a nevenar wey ke hinawa ku ne neegaran su midtihel nu kun ke hinawa rut te langun ne mibperetiyyaya.

*Ke Pemuyù ni Pablo diyà te ki Filemon Mekeatag ki Unisimus*

<sup>8</sup> Na Filemon, duen ini ignganey ku kenikew. Ne kenà a egkealang-alang te edsuhù kenikew te ed-ulaula ke engkey se dait ne ulaula su atag dut te ketehel ku te kedserihan a ni Hisu Kristu,

<sup>9</sup> ugaid ne ignganey ku rà su sabap te rekela ne limù ku kenikew. Ne lukes ad dema ne guntaani ne ini a te bilengguan atag dut te kebpenurù ku mekeatag ki Hisu Kristu.

<sup>10</sup> Tembù be ini se ignganey ku kenikew ne mekeatag ki Unisimus ne iring te anak ku. Uya, iring en sikandin te tuney ne anak ku su ke peretiyyaya rin ne sabap te penurù ku gewii ku ini te bilengguan.

<sup>11</sup> Rengan ne si Unisimus ini ne iring te warà pantag din kenikew, ugaid ne gunteani ve ne duen en pantag din uman kenikew wey kediey.

<sup>12</sup> Na ibpeuli ku pè be sikandin diyà te kenikew misan merasey en te hinawa ku se kebpekedsuwey rey.

<sup>13</sup> Egkesuat a perem ne kayi ebpekeubpà sikandin te kedi su apew a rin egketevangi timbang sikuna taman te ini e pà te bilengguan su mekeatag te kebpesabut ku rut te Meupiya ne Tudtul.

<sup>14</sup> Ugaid ne kenà ku ve ini ed-ul-ulaan ke kenà keninyan ded ebpekepuun te kenikew su kenà ku ebpengunaan ke hinawa nu. Su iyan meupiya ne egenat en te keputian te atey nu se kedtavang nu kedi.

<sup>15</sup> Kalu ke iyan kinepekeawà ni Unisimus keninyan te kenikew te mehaan dà ne ketau red te Eleteala su apew edlived sikandin keninyan te kenikew ne egkekemuney nu red su edtireneb en.

<sup>16</sup> Na guntaani ve ne kenà uripen nu rà dè duen sikandin su suled nu en sabap dut te peretiyyaya nu ne igkelimù nu. Ne dekelà ku en sikandin te hinawa! Ugaid ne iyan ka pè be edlewanan se kenà uripen nu rà su suled nu en dema te ebperetiyyaya te Kerenan tew ne si Hisus!

<sup>17</sup> Na engketà be arà embiya benar pà ne edsuled ki, ne telimaa nu sikandin iring te siaken ded.

<sup>18</sup> Ne embiya ruen meraat ne mid-ulaula rin kenikew, etawa ruen utang din kenikew, ne ed-ekuwen ku en.

<sup>19</sup> Na intengi nu ini se surat ku ne egkahi te: Siak imbe si Pablo se ebayad kenikew. Kalu ke warà atag din te kebpetanud ku kenikew te ruen utang nu kediey su embiya kenà kayi ebpuun te kediey ne penurù ne warà nu merineg ke kebpeleyu te Eleteala te menge etew.

<sup>20</sup> Tembù be, suled ku, kelimùlimù be ne ul-ulaa nu ini kedì su neseveka ki ki Hisu Kristu ke Kerenan tew. Helawa nu ke hinawa ku su edsusuled kiyu te kebperetiyya tew kandin.

<sup>21</sup> Ne kenà eduwaruwa se hinawa ku kayi te kedsurati ku kenikew ne edumaan nu ini se mibuyù ku kenikew, ne netuenan ku rema se kenà arà dà se igganey ku kenikew se ed-ul-ulaan nu ugaid ne lavi pà maa.

<sup>22</sup> Seveka maa ne kelimùlimù ne penehana ke en te edetengan ku su dekelà se penerengan ku te egketavak te Eleteala ke pengeningeni niyu mekeatag kedì ne ebpekeliyu a kayi apey a ebpekeliwed keniyen te keniyu.

<sup>23</sup> Si Ipapas ini se дума ku kayi te bilengguan se ebpenginginsà mekeatag te sikiyu keniyen, su nevilanggù sikandin dema sabap dut te kedsarig din ki Hisu Kristu.

<sup>24</sup> Elin si Marcos, si Aristarkus, si Demas, wey si Lucas ne minge ruma ku te ebpesabut te lalag te Eleteala ne ebpenginginsà dan dema te sikiyu keniyen.

<sup>25</sup> Iyan ku kiyug ne langun niyu ne ebpekeheram te tavang ne riyà ebpuun te Kerenan tew ne si Hisu Kristu.

Arà dà taman.

*Pablo*

## Ke Surat Diyà te Menge Hibruhanen

*Ke Eleteala se Impepenudtul ke Anak din te Kiyug din ne Ibpesabut diyà te menge Etew*

<sup>1</sup> Rengan ne ruen impesabut te Eleteala riyà te menge keep-epuan tew. Merakel se impesabut din kandan ne merakel dema se impetiralan din kandan, ugaid ne kayi te menge etew ne mibpelambas te lalag te Eleteala ne impesabut din ini su apey sikandan se ebpmenuudtul diyà te menge etew.

<sup>2</sup> Ugaid ne guntaani manen, ne iyan en maa ibpesabut dut te Eleteala kenitew ne ibpepevayà din dut te Anak din si Hisus. Su sikandin se impelimbag din kayi te dunya, ne sikandin dema ke nepemili te Eleteala ne ebpegekemunayen dut te langun taman.

<sup>3</sup> Ne ke anlag dut te raman te Eleteala ne egkekita en kayi te Anak din, ne langun ne riyà te Eleteala ne kayi en dema te Anak din. Warà mibiraan dan iya. Ne sikandin se egawed dut te langun ne nelimbag kayi te dunya su kayi ebpuun te gehem dut te lalag din. Ne sikandin dema se mibaal te ebpekepeleyu te menge etew dut te salà din. Ne guna su nepasad din en, ne mid-uli en diyà te langit ne riyà mibpinuu te egkekewanan te Eleteala ne warà repeng te kedatù din.

*Ke Anak te Eleteala se Mepurù pà Dut te Menge Suluhuen*

<sup>4</sup> Ketà be ne ke Anak te Eleteala ne iyan pà mepurù dut te langun ne suluhuen. Ne misan ke ngaran ne imbehey te Eleteala kandin ne mepurù pà ini dut te ngaran ne imbehey rin dut te menge suluhuen din.

<sup>5</sup> Su warà megkahi ke Eleteala diyà te menge suluhuen din iring te migkahi rin te Anak din, ke sikandin te,

“Sikew ke Anak ku,  
guntaani ne ebpeketuenan ku se siak se Amey nu.”

Ne warà din mekahi diyà te suluhuen te,

“Siaken ke Amey nu,  
ne sikuna ke Anak ku.”

<sup>6</sup> Ugaid ne ketà te kedsuhua en dut te Eleteala dut te mekegehem ne Anak din kayi te ampew te dunya ne iyan din migkahi se,

“Sikiyu ne menge suluhuen ku,  
ne erapa niyu sikandin.”

<sup>7</sup> Ne iyan nekahi te Eleteala mekeatag dut te suluhuen din se,

“Sikandan se edsuhuen ku  
iring te keramag etawa regreg te apuy  
se edtuman te kiyug ku.”

<sup>8</sup> Ugaid ne iyan migkahi te Eleteala dut te Anak din mulà se,

“Ke kedatù nu, Eleteala,  
ne warà edtemanan din.

Ne ke kedatù nu dut te menge etew nu  
ne metidtu rà nevenar.

<sup>9</sup> Su iyan nu kiyug ke metidtu ne ulaula,  
ne igkeepesi nu ke ulaula ne meraat.  
Tembù be siaken ke Eleteala nu se mibpemili kenikew,  
ne imbehey ku keykew ke kehelawan  
su mid-edatan ku sikew  
muna pà dut te menge ruma nu.”

<sup>10</sup> Ne ruen pà duma ne migkahi te Eleteala diyà te Anak din te,

“Pehaney ne sikuna, Kerenan,  
se midlimbag kayi te dunya,  
ne sikuna red se mibaal te langit.

<sup>11</sup> Langun ketà ne egkerundus,  
ugaid ne sikuna mulà ne warà kegkeparin nu.  
Su iring te velegkas ne daan en se kegkerundus dut te langit wey tanà.

<sup>12</sup> Su iring te kedluklukuna nu te belegkas  
se kedluklukuna nu te langit wey tanà  
su edsembian nu te vehu.

Ugaid ne sikuna mulà, ne warà kegkeparin nu,  
ne ke umur nu ne warà mulà edtemanan din.”

13 Ne warà suluhuen te Eleteala ne migkehiyan din iring te migkahi rin dut te Anak din, ke sikandin te,  
 “Kayi ka pinuu te egkekewanan ku taman te kenà ku pà ebpenggiekan ke kunterà nu ne egkevaluy ku sikandan ne ebpemunasan te paa nu.”  
 14 Su ini se menge suluhuen te Eleteala, ne edsugsuhuen din dà iya sikandan su ebpetevangen dut te menge etew ne midtelimà dut te umum ne warà edtemanana din.

## 2

*Ebpemineg Kiyu iya rut te Migkahi ni Hisus Mekeatag te Kebpeliyu Keytew*

<sup>1</sup> Ne engketà be te iyan impesabut dut te impayag te Eleteala kenitew ne ke Anak din, ne egawed kiyu te benar dut te impayag kenitew su apey ki kenà egkepeneheewit te kebpekesuwey tew.

<sup>2</sup> Ke menge suhù te Eleteala ne nebpenheewit dut te menge suluhuen din diyà te keep-epuan tew ne egkeserihan nevenar; tembù be ke etew ne warà meduma ketà, ne edusaan sikandin te endei se taman ne kevahat te salà ne neveelan din.

<sup>3</sup> Ne embiya iring ketà, ne iyan pè be kenà muna pà se kedusa te Eleteala keytew embiya kenà ki eduma rut te tudtul mekeatag te mepmeupiya ne ralan te kebpeleiyu te Eleteala rut te menge etew. Su si Hisus en iya ke Kerenan tew se neuna ne nekepenudtul te kebpeleiyu kenitew, ne ke menge etew ne nekerineg kandin se nekepenitihus dan te ini ne benar iya.

<sup>4</sup> Ne impekita rema te Eleteala se benar ini se mibpemenudtul dan kayi te mekegehém ne tuus, menge mekegeyip wey mekeinuinu ne ulaula ne mibpeveelan din kandan. Ne ruma pè ne impekita rin se benar ini su ruen menge ketau dut te Kedeseenan ne Ebpetuntul te Menusiya ne imbehey rin diyà te menge mibperetiyaya su migkiyuhana din.

*Mibpeembavà si Hisus ne Mibpebaluy ne Etew ne Mibpebpatey su imbeliwas din te Langun tew*

<sup>5</sup> Na kenà ke suluhuen te Eleteala se mibpemili din te kedatù diyà te behu ne dunya keuremà su ini se edlelehan ku kayi.

<sup>6</sup> Ugaid ne iyan din mibpemili ke menge etew rin ne edatù. Su iring dut te impesurat diyà te Lalag te Eleteala ne ruen migkahi te,

“Na Eleteala, meambe ke edtentenuran nu ke menge etew?  
 Ne meambe ke igkelilingey nu nevenar se etew rà dè duen?”

<sup>7</sup> Su pehaney ne mibeelan nu sikandan ne mevavà pà dut te menge suluhuen.  
 Ugaid ne mehaan dà ini;  
 su ibpepurù nu en sikandan  
 te egkereyù wey egkeedatan

<sup>8</sup> su sikandan se ebperetuen nu rut te langun taman.”

Kayi te migkahi te Eleteala ne ebperetuen din ke menge etew dut te langun taman, ne nesebutan tew te warà misan engkey en ne kenà dan ebpekevayàbayà keuremà. Ugaid ne warà pà meuma arà, su taman en guntaani ne warà tew pà mekita ke menge etew ne ebayàbayà te langun taman.

<sup>9</sup> Ugaid ne iyan tew netuenan ne ke kinedatù en ni Hisus, misan mehaan dà ne hewii se kinepeembavà kandin rut te menge suluhuen te Eleteala. Su egenat dut te dekelà ne tavang te Eleteala dut te sikitew ne menge etew, ne mibpebaluy si Hisus ne etew ne mibpebpatey su imbeliwas din te langun tew ne menge etew. Na guntaani ne sikandin en se egkereyù wey egkeedatan su ke kinekerasey rin te kebpeatey rin atag dut te langun ne menge etew.

<sup>10</sup> Netahù te itungan din ke Eleteala ne arà se ed-ul-ulaana din su ke Eleteala se midlimbag te langun taman, ne mibeelan din ini su edeyù kandin. Ne metidtu nevenar ke mid-ulaula rin su apey ke merakel ne anak din se ebpekeubpà diyà te kandin ne ebpekeamung dut te kebpuurù kandin. Mid-ulaula rin ini dut te kinesuhua rin ki Hisus kayi te ampew te dunya se edresayan su apey rin ibpekita te warà deisek dà ne kurang ni Hisus te kebpekeliyu tew wey apey sikandin se egkevaluy ne egkeunutan tew ne ebpekeewit kenitew te ed-ubpà diyà te Amey rin.

<sup>11</sup> Eleteala se Amey ni Hisus ne editlak te hinawa te menge etew rut te salà dan, ne Eleteala rema se Amey dut te langun tew ne midtilak en ni Hisus ke salà tew. Tembù be kenà din igkeyeyai sikandin te egkahi te sikitew ne menge suled din.

<sup>12</sup> Su ruen ingkesurat ne migkahi rin dut te Eleteala te,

“Na Eleteala, ebpeketuenan ku rut te minge suled ku mekeatag keykew; ne ebpemayukbayuk a te kedeyua ku keykew diyà te kevrunan dan.”

<sup>13</sup> Ne ruen pà ruma ne migkahi rin te,

“Egkeserihan ku te Eleteala.”

Ne ruen pà ne migkahi rin te,

“Ini a ebpekiduma te minge anak te Eleteala ne insarig din kediey.”

<sup>14</sup> Ayan se mid-ingaranan ni Hisus te minge anak te Eleteala ne sikitew red ne etew rà dè duen, tembù be mibpebaluy si Hisus ne etew iring kenitew. Mid-ulaula rin ini su apey rin egketalew ke datù te pekaid ne ed-ingeranan dema ki Setanas. Ne netalew rin sikandin ketà te kinepebpatay rin atag kenitew, su kayi te kinepatay rin ne in-awà din ke gehem dut te datù te pekaid te ed-ewit te minge etew riyà te kepepatay ne warà edtemanan din.

<sup>15</sup> Ne kayi te mid-ulaula rin ini ne mibaal sikandin te ralan su apey meawà ke andek te minge etew te kepepatay, su igenat te kegketautau ran ne nengeuripen dan en te andek dan te kepepatay.

<sup>16</sup> Engketà be ne mepayag nevenar ne kenà iyan din midtevangan ne minge suluhuen, ugaid ne iyan din midtevangan ne sikitew ke minge inenakan ni Abraham.

<sup>17</sup> Tembù be mibpebaluy sikandin ne etew iring dut te sikitew ne minge suled din. Mid-ulaula ini su apey rin egkeherami ke langun ne igkerasey tew apey ebmetau sikandin ne egkeyru kenitew wey apey sikandin se egkevaluy ne mepurù dut te terebpepengesa ne egkedserihan ne ebpeninindeg kenitew diyà te etuvangan te Eleteala su apey egkepesahad te Eleteala ke salà tew.

<sup>18</sup> Engketà be ne netuenan din en se kedtavang din nevenar dut te minge etew ne ebpenggeraman, su sikandin dema se mibpenggeraman wey midrasey.

### 3

#### *Iyan pà Mepurù si Hisus ki Moises*

<sup>1</sup> Na minge suled ku ne mibperetiyya en ki Hisus, ne nepemili en dema te Eleteala te egkevaluy ne minge etew rin, ne iyan niyu pegpegitunga ne si Hisus. Su sikandin ke mid-suhù te Eleteala kayi te ampew te dunya te ebpesabut mekeatag te kebpekeperetiyya tew wey apey sikandin ke mepurù te terebpepengesa ne ebpeninindeg kenitew diyà te Eleteala.

<sup>2</sup> Ne ini te mid-ulaula rin dut te impehelevek kandin te Eleteala, ne mid-up-upianan din se kinetumana rin dut te langun iring ki Moises dengan te mid-up-upianan din se kinetumana rin dut te impehelevek kandin te Eleteala te kinepeneheewita rin dut te minge etew te Eleteala ne ebpekeiring dut te sakup te lusud te valey te Eleteala.

<sup>3</sup> Ugaid ne iyan pà mepurù si Hisus ki Moises, su iring dut te etew ne ebvealey ne iyan pà sikandin egkevantung, kenà ke imbevealey rin.

<sup>4</sup> Su langun te baley ne ruen mibaal ketà, ugaid ne ke Eleteala ne iyan mibaal te langun taman.

<sup>5</sup> Na misan sugsuhuen dà te Eleteala si Moises, ne mid-up-upianan din se kineruma rin te Eleteala te kinepeneheewita rin dut te minge etew ne ebpekeiring te sakup dut te lusud te valey te Eleteala. Su sikandin se ebpenudtul mekeatag te ibpesabut te Eleteala keuremà.

<sup>6</sup> Ugaid ne si Hisu Kristu, ne sikandin ke Anak te Eleteala ne ebpengemuney dut te valey, ne mid-up-upianan din dema se kinetumana rin dut te langun ne mibpeveelan kandin te Amey rin. Ne sikitew ve ke дума ki Hisus, ne ebpekeiring kiyu te sakup te lusud te valey te Eleteala embiyya mevaher se kinepereetiyya tew kandin wey kenà kiyu eduwaruwa atag te ebpeneregen tew ne impasad te Eleteala.

#### *Ke Inged ne Ed-imelayan te Kemerehanan ne Impenehana te Eleteala rut te Ebperetiyya Kandin*

<sup>7</sup> Engketà be ne ed-ulaula kiyu te iring te nekahi rut te Kedesenan ne Ebpetuntul te Menusiyyà ne egkahi te,

“Na, embiyya egkerineg niyu ke Lalag te Eleteala,

<sup>8</sup> dumai niyu ne kenà kew pekeresen te ulu niyu

iring dut te keep-epuan niyu rengan

ne mid-atu te Eleteala.

Su gewii te riyà dan te tanà ne kenà egkeubpaan te etew,

ne migeraman dan ke Eleteala  
ke edusaan din sikandan dut te salà dan.”

<sup>9</sup> Ne iyan nekahi te Eleteala mekeatag kandan se,  
“Misan pà te nekita ran en  
ke mekegeyip ne ulaula ku  
lusud te neked-epat nepulù ne rahun,  
ne impeiseg den pà lavew  
ke kebpenggeram dan kedi.

<sup>10</sup> Tembù be neepes a kandan ne migkahi a te,  
‘Ini se menge etew ne layun edsuwey ke hinawa ran kedi  
ne kenà dan edumaan ke impemandù ku.’

<sup>11</sup> Uya, neepes ad iya ne mibpenendan ad te,  
‘Kenà dan iya nevenar ebpekelusud  
ketà te inged ne ebpekeimeley ran dut te kemerehan  
ne ibehey ku perem kandan.’ ”

<sup>12</sup> Engketà be menge suled ku, uram-uram kew nevenar su apey warà seveka keniyu  
ne eduma te meraatey ne itungan ne ed-awà se peretiyaya rin te Eleteala, su arà se  
kebbekepekeriyù tew rut te Eleteala ne warà kemetayen din.

<sup>13</sup> Ugaid ne taman te ruen pà gewii tew te keduma te Lalag te Eleteala ne tevengaani  
niyu te ebpeiseg te peretiyaya niyu su apey kenà ebmeresen te ulu niyu ne kenà kew  
eduma te Eleteala su mid-ekalan niyu sikandin dut te salà niyu.

<sup>14</sup> Su embiya egewaran tew te mevaher ini se sarig tew te behu ki pà mebperetiyaya ki  
Hisus taman te ketepusan, ne ebpekeruma ki kandin dut te langun ne imbehey kandin  
te Amey rin.

<sup>15</sup> Su ini se impesurat ne Lalag te Eleteala ne egkahi te,  
“Na, embiya egkerineg niyu ke lalag te Eleteala,  
dumai niyu ne kenà kew pekeresen te ulu niyu  
iring dut te keep-epuan niyu rangen  
ne mid-atu te Eleteala.”

<sup>16</sup> Ne engkey ve ayan se menge etew ne nekerineg te lalag te Eleteala, ugaid ne mid-  
atu kandin? Ew, sikandan ke menge Hudiyanan ne mibpeneheewit ni Moises te kineawà  
dan diyà te inged ne lhiptu rut te kinepengunguripena kandan.

<sup>17</sup> Ne engkey pè be maa arà se menge etew ne nepeukan te Eleteala lusud te neked-  
epat nepulù ne rahun? Ew, sikandan ke mid-ulaula te meraatey, tembù be midusaan  
dan te Eleteala te kinepematey ran diyà te tanà ne kenà egkeubpaan te etew.

<sup>18</sup> Ne engkey ve arà se menge etew ne midtendanan te Eleteala te kenà dan iya nevenar  
ebpekelusud ketà te inged ne ebpekeimeley ran ne ibehey rin perem kandan? Sikandan  
ded iya ayan se menge etew ne mid-atu kandin.

<sup>19</sup> Engketà be ne netuanan tew se ayan ne menge etew rangen ne warà en iya  
mekelusud ketà te inged ne impenehana te Eleteala kandan su warà dan mebperetiyaya  
kandin.

## 4

<sup>1</sup> Na in-amung ki en rema te Eleteala dut te impasad din te ebpekelusud dut te inged  
ne impenehana rin ne ebpeimelayan din te menge etew rin. Tembù be ed-uram kiyu su  
apey warà seveka rà ne egketahak te kedlusud ketà te inged ne ed-imelayan ne impasad  
din.

<sup>2</sup> Su sikitew rema, ne nerineg tew en ke Meupiya ne Tudtul iring dut te keep-epuan  
tew rangen. Ugaid ne misan nerineg dan arà, ne warà keupianan ne netelimà dan su  
matag dan pemineha ne warà dan peretiyayaa.

<sup>3</sup> Na sikitew ve mulà se mibperetiyaya en, ne ebpekelusud kiyu en ketà te inged ne  
egkeimelayan ta ne impasad din. Su ruen migkahi te Eleteala mekeatag te keep-epuan  
tew rangen, ke sikandin te,  
“Neepes ad iya ne mibpenendan ad te,  
‘Kenà dan iya nevenar ebpekelusud  
ketà te inged ne ebpekeimeley ran dut te kemerehan  
ne ibehey ku perem kandan!’ ”

Migkahi ini te Eleteala te misan neipus din en te ebpenehana ini se inged ne  
ebpeimelayan din egenat dut te kinekeipus din te edlimbag kayi te dunya.

<sup>4</sup> Netuanan tew se impenehana rin en ini su ruen impesurat ne lalag din ne egkahi te,  
“Ketà te ikepitu rin ne hewii ne mid-imeley ke Eleteala su langun ne helevek din ne  
neipus en.”

<sup>5</sup> Ne misan neandam en ini se inged ne ed-imelayan ne kenà ebpekelusud ke menge etew ne kenà ebperetiyyaya su ruen pà maa kayi te Berekat ne Surat ne impesurat din mekeatag te ini se inged ne ed-imelayan ne egkahi te, “Kenà dan nevenar ebpekelusud ketà te inged ne ebpekeimeley ran ne ibehey ku perem kandan.”

<sup>6</sup> Su rangen ne ke neuna ne menge etew ne nekerineg dut te Meupiya ne Tudtul mekeatag ketà te inged ne ebpeimelayan, ne warà dan mekelusud su warà den ma mebperetiyyaya. Ugaid ne ruen ded lavew ketà se ebpekelusud te inged ne ebpeimelayan ne impenehana rin.

<sup>7</sup> Su mibehayan pà maa lavew te Eleteala ke menge etew te hewii te kedtelimaa ran dut te impasad din te ke hewii ne ini en. Netuean ta arà su guna su nekeppipira en nehatus ne rahun se midsahad ketà te hewii ne warà mekelusud ayan se menge etew ne meresen se ulu rin ne ruen impekahi te Eleteala ki David ne egkahi te,

“Na embiya egkerineg niyu ke lalag te Eleteala, dumai niyu ne kenà kew pekeresen te ulu niyu.”

<sup>8</sup> Ne kayi te lalag ni David ne netuean tew te kenà ke meupiya ne inged ne Kanaan ne mibpenehewitan ni Josue rut te menge Hudiyanen se inged ne ebpeimelayan ne impasad te Eleteala. Su embiya arà en ke ebpeimelayan din ne inged ne nekahi te Eleteala, ne warà din en maa kehiya se duen pà duma ne andew.

<sup>9</sup> Ketà be ne netuean tew te ruen pà hewii dut te menge etew te Eleteala te kebpekelusud ketà te inged ne ebpeimelayan iring dut te kineimeley te Eleteala ketà te ikepitu rin ne hewii te nekeipus sikandin te kinelimbaha rin te langun taman kayi te dunya.

<sup>10</sup> Su langun ne edlusud ketà te inged ne ebpeimelayan ne impasad te Eleteala, ne ed-imeley rema sikandan dut te helevek dan iring dut te kineimeley te Eleteala rut te kinehelevek din te kinelimbaha rin te dunya.

<sup>11</sup> Engketà be ne ebpenemaran tew su apey kiyu ebpekelusud ketà te inged ne ebpeimelayan ne impasad te Eleteala. Ne ed-uram kiyu su apey kenà kiyu mekeiring dut te menge etew rangen ne warà dan mekelusud su warà dan peretiyyaya ke migkahi te Eleteala kandan.

<sup>12</sup> Ke Lalag te Eleteala ne ebpekeiring te biviyag su mekegehem. Ne lavi pà se keharang te Lalag te Eleteala dut te memeharang ne sundang ne idtibas te etew ne medmeralem se id-uteng din. Ebpekeiring ketà su idtempayar din ke itungan wey ke kiyug dut te menge etew ne ed-eles te hinawa rin.

<sup>13</sup> Su warà misan engkey en ne nelimbag te Eleteala ne ebpekeeles kandin, su langun ne mepmepayag diyà te etuvangan din. Ne ketà te kegkukum din kenitew ne egkepenudul iya diyà te kandin ke langun ne ned-ulaula tew kayi te ampew te dunya.

#### *Si Hisus se Ebpeninindeg Kenitew diyà te Etuvangan te Eleteala*

<sup>14</sup> Engketà be ne egewaran tew te mevaher ke kebperetiyyaya tew ki Hisus ke Anak te Eleteala. Su mibpendiyan en ke Mepurù te Terebpelengesa tew te langit ne riyang en te etuvangan te Eleteala se ebpeninindeg kenitew.

<sup>15</sup> Ne ini se ebpeninindeg kenitew ne nesebutan din se kebmeluvey tew su piya engkey en ne eberangan te kebpenggeram ni Setanas kenitew ne neheraman din en dut te hewii rin pà kayi te ampew te dunya, ugaid ne warà en iya megaga sikandin.

<sup>16</sup> Geina ve te sikandin se Mepurù ne Terebpelengesa tew, ne kenà kiyu eduwaruwa te hinawa tew te kebpengeningeni te ked-uvey tew riyà te etuvangan te Eleteala su egkiyuhan din te ebpekita ke limù din kenitew. Su iiruwen sikandin kenitew ne ebpeketavang sikandin dut te kemerehenan tew.

## 5

<sup>1</sup> Ke etew ne nepemili ne Mepurù te Terebpelengesa te menge Hudiyanen, ne nepemili sikandin dut te menge ruma rin ne intendù sikandin ne ebpeninindeg te keupianan dut te menge ruma rin diyà te etuvangan te Eleteala. Su sikandin se ebpesevetaren dut te ibehey te menge etew riyà te Eleteala wey sikandin se ebpelengesa dut te menge binatang su apey Eleteala se ebpehad dut te salà dan.

<sup>2</sup> Tehaad te ini se Mepurù te Terebpelengesa ne etew red dema ne melemu ne ebpekedsalà, ne netuean din se kedtigker te kebpenehewita rin dut te menge etew ne nekedsalà su warà dan metueni ke tidtu ne ed-ul-ulaan dan.

<sup>3</sup> Ne tehaad te etew red dema sikandin ne ebpekedsalà ded dema, ne ebpelengesa te binatang te kandin ne salà iring te kebpelengesa rin mekeatag te salà te menge etew.

<sup>4</sup> Warà etew ne ebpekepemili te kandin ne hinawa te kegkevehayi te ketengdanen ne Mepurù te Terebpepengesa, su Eleleala rà ke ebpekepemili ketà te etew iring dut te kinepemilia rin ki Arun ke neuna ne Mepurù te Terebpepengesa rengan.

<sup>5</sup> Ne iring din ded be rema ketà si Hisu Kristu su kenà sikandin ke mibpemili te hinawa rin te kegkevehayi te ketengdanen ne Mepurù te Terebpepengesa. Ugaid ne Eleleala se mibpemili kandin se egkahi te,

“Sikew ke anak ku,

guntaani ne ebpeketuenan ku se siak se Amey nu,”

ke sikandin.

<sup>6</sup> Ne migkahi rin dema diyà te ruma pà ne minge surat te,

“Ibpehelevek ku keykew

se kedterebpepengesa nu taman te taman

iring dut te kineterebpepengesa

ni Milkisidik rengan.”

<sup>7</sup> Gewii pà ni Hisu kayi te ampew te dunya ne miguriper se luwà din te kegkulyà din dut te pengeningeni rin diyà te Eleleala, su Eleleala rà se ebpekegaga te kepeliyu kandin dut te kemetayen din. Ne nerineg ke pengeningeni rin te Eleleala su ke kinepeembavà din te hinawa rin wey ke kepberumaruma rin dut te kiyug te Eleleala.

<sup>8</sup> Su misan Anak en sikandin te Eleleala ne nekepevayà pà sikandin te keresayan ne kayi rin mehuruwi te kepberumaruma rin te Eleleala.

<sup>9</sup> Ne geina te warà misan deisek dà ne igkesawey kandin dut te langun ne mid-ulaula rin, ne sikandin se dait ne ebpepatey dut te salà te langun ne minge etew su apey langun ne eduma rut te lalag din ne egkevehayan te umur ne warà edtemanan din.

<sup>10</sup> Engketà be ne midtendù en sikandin te Eleleala ne iyan Mepurù te Terebpepengesa ne ebpeninideg kenitew, iring dut te kedterebpepengesa ni Milkisidik rengan te kepbeninideg din.

*Ed-uram kiyu su apey kiyu kenà Ebpekesuwey dut te Kepberetiyaya tew*

<sup>11</sup> Ne ruen pà maa dekelà ne ibpesabut ku perem keniyu mekeatag te kinedterebpepengesa ni Milkisidik wey si Hisu, ugaid ne iyan din kerehenan te kedseysey ku su merehen kew ne ebpekesabut.

<sup>12</sup> Iyan perem dait ne sikiyu se ebpepemandù dut te minge ruma niyu su neuhet kew en ne mibpemandù, ugaid ne warà kepekayan din. Inemulà se iyan din pà dait ne edseupan kew pà maa te ebpenurù su misan ke neuna ne penurù mekeatag te Eleleala ne kenà niyu pà egkesebutan. Iring kew te minge vatà ne kemulu pà ne edsusu su kenà pà egkepakey ne egkaan te mekehal.

<sup>13</sup> Ne ke etew ne ebpekeiring te vatà ne edsusu pà ne kenà pà ebpekekaan te mekehal, ne kenà din pà egketuenan te kepbedsusun dut te meraat wey meupiya ne ulaula.

<sup>14</sup> Ugaid ke etew ne nekekaan en te mekehal ne ke etew ne midsukud en ne midtua en se itungan din, su netuenan din en te kepbedsusuna rin dut te meraat wey meupiya ne ed-ul-ulaan din.

## 6

<sup>1</sup> Engketà be arà ne kenà kiyu ed-ulit-ulit dut te melemu rà ne penurù mekeatag ki Hisu Kristu ne nehuruwan ta en pehaney su apey ki ebpekeiseg te eguru rut te metua ne penurù ne edait dut te metua en ne etew. Su warà keupianan ne egketelimà tew embiya iyan tew rà ed-ul-ulitan ke neuna ne penurù mekeatag dut te kepbedsendit wey ke kepberetiyaya te Eleleala

<sup>2</sup> wey ke penurù mekeatag te kepbebunyang wey ke kedampen te purù te etew te ibpengeningeni ran sikandin, su ini ne penurù ne netuenan ta en. Ne netuenan ta en dema ke penurù mekeatag te kebanew te Eleleala keyta wey ke penurù mekeatag te kegkukum din kenitew ne ke ebpetemanan din kenitew ne kenà egkesembian taman te taman.

<sup>3</sup> Ketà be ne iyan tumù se ed-iseg ki se eguru rut te ruma ne penurù mekeatag ki Hisu apey ebpekeiseg pà ke peretiyaya tew. Ne ed-ul-ulaan tew ini embiya idluhut te Eleleala.

<sup>4</sup> Su ke minge etew ne nesebutan dan en nevenar ke Meupiya ne Tudtul ne nerayahan en ke itungan dan te Eleleala, ne neheraman dan en ke meupiya ne tavang ne imbehey kandan te Eleleala wey ke gehem dut te Kedesenan ne Ebpetuntul te Menuisiyà ugaid ne mid-engked dan en te kepberetiyaya ran, ne kenà en egkepakey ne edsaup dan en maa ebpedsendit.



<sup>5</sup> Su embiya neheraman dan en nevenar ke keupiya dut te lalag te Eleteala, ne neheraman dan en dema ke gehem te Eleteala iring dut te ibpayag din ketà te ketepusan ne hewii

<sup>6</sup> ugaid ne ed-iniyuhan dan en maa ke Eleteala wey ke langun ne neheraman dan, ne kenà en egkepakey ne edsaup dan en maa ebpedsendit. Su embiya mid-iniyuhan dan en ke kebperetiyyaya ran ki Hisus, ne iring te impelansang dan en maa ke Anak te Eleteala diyà te pinebelavag ne kayu ne mibpegkayà dan sikandin diyà te etuvangan te merakel ne etew.

<sup>7</sup> Ne langun tew ne menge etew ne ebpekeiring te tanà. Igkeupiani te Eleteala ke tanà ne edsenepan te uran ne ebmeames-ames ne meselinuvù te pinemula rin. Meupiya ke tanà ne iring ketà su ebpekegkeupiya rut te kemuney ketà.

<sup>8</sup> Ugaid ne embiya iyan dà edtuvù se ilemunen wey ruhiyen ne sagbet, ne warà pantag din arà se tanà. Arà be ne edereetan te Eleteala su ebinsulan din iring dut te ibped-ulaula rin te etew ne mid-iniyug se peretiyyaya rin te Eleteala.

<sup>9</sup> Na menge suled ku ne igkelimù ku, ne misan pà te iring kayi se menge lalag ku keniyu ne netuenan ku te kenà iring ketà se ibped-ulaula keniyu. Su netuenan ku ne ebpeketuntul kew red dut te ralan te kebpekeperetiyyaya te Eleteala, tembù be iyan ibehey keniyu ne meupiya.

<sup>10</sup> Su ke ulaula te Eleteala ne metidtu, tembù be kenà din egkelipatan ke meupiya ne ulaula niyu wey ke limù niyu kandin ne impekita niyu rut te kedtevang niyu rut te menge ruma niyu ne mibperetiyyaya taman guntaan.

<sup>11</sup> Ne iyan ku kiyug ne langun niyu ne ebpenamar te ed-ulaula kayi se taman te kedlived ni Hisus su apey niyu egketelimà ke ebpenerengen niyu riyà te Eleteala.

<sup>12</sup> Tembù be kenà kew ebpepepehul te keduma niyu te Eleteala, ugaid ne iringi niyu ke ulaula te menge etew ne mevaher se sarig dan te kedtehad dan dut te impasad te Eleteala kandan.

*Ke Impasad te Eleteala ne Edtumanen Din Nevenar*

<sup>13</sup> Na iyan niyu tentenuri ne si Abraham. Su rengan ne ruen impasad te Eleteala kandin, ne kiyug din ne egketuenan ni Abraham se egketuman ini se impasad din. Tembù be ruen impenendan din te mevaher. Ne geina te warè en mepurù kandin, ne ini se kinepenendan din ne impepeyà din dut te kandin ne ngaran.

<sup>14</sup> Migkahi rin ki Abraham te,

“Idtarem ku kenikew  
te ebpeneuven ku nevenar sikew  
ne ebpekerekelen ku  
ke menge inenakan nu.”

<sup>15</sup> Ne warà medtakas si Abraham te kedtihad din dut te impasad te Eleteala kandin, tembù be netelimà din ke langun ne impasad te Eleteala kandin.

<sup>16</sup> Na, embiya ruen etew ne egkiyug ne egketuanan din te egketuman iya arà se impenendan din, ne ini se impenendan din ne ibpepeyà din dut te ngaran te etew ne mepurù pà kandin. Ne embiya iring ketà se ulaula te etew ne ebpenendan, ne egkeperetiyyaya te ruma ne etew ne metidtu ini se pasad din ne ketà be ne warè en ebpeep-epuley.

<sup>17</sup> Iring ketà se mid-ulaula te Eleteala. Su kiyug din ne egketuanan te langun ne menge etew te kenà din edsembian ke itungan din mekeatag dut te impasad din kandan, tembù be impenendan din ini impepeyà te kandin ne ngaran.

<sup>18</sup> Engketà be arà ne ruen deruwa ne ulaula te Eleteala ne kenà egkesembian te misan engkey en. Seveka ne ke impasad te Eleteala kenitew, ne ke ikeruwa ne impenendan din se kedtumana rin ketà impepeyà te ngaran din. Ne kayi te ini se deruwa ne mid-ulaula rin, ne netuenan tew te kenà din edsembian ke migkahi rin su ke Eleteala ne kenà teruen. Tembù be sikitew ne nekeaput en kandin, ne kenà meduwaruwa se itungan tew te kedtelimà tew rut te ebpenerengen tew kandin.

<sup>19</sup> Ini se ebpenerengen tew ne impasad te Eleteala kenitew se mevaher ne ebpeunsaran su apey ki kenà ebpekesuwey su edtuman ini nevenar. Uya, edtumanen iya te Eleteala ini su diyan en si Hisus te etuvangan din ne ebpeniniddeg keytew.

<sup>20</sup> Mid-una sikandin kenitew riyà su edtavang kenitew. Nevaluy sikandin ke Mepurù ne Terebpepengesa ne ebpeniniddeg kenitew taman te taman diyà te etuvangan te Eleteala iring dut te kineterebpepengesa ni Milkisidik dengan.

7

<sup>1</sup> Si Milkisidik ini ne ratù sikandin dengan diyà te inged ne Salim, ne terebpelengesa rema sikandin ne ebpenindeg te menge etew rut te Eleteala ne warà repeng te kinemepurù din. Ne ketà ne hewii te kineulì ni Abraham te ebpekibunù dut te menge kunterà din ne epat ne retuan ne nengepatey rin, ne midsinuhung sikandin ni Milkisidik ne impengeningeni rin sikandin te ebpeneuven te Eleteala.

<sup>2</sup> Ne si Abraham ne imbehey rin ki Milkisidik ke ikeseputu ne umun dut te langun ne netavan din te kinebunuey rin. Ne iyan din meana kayi te ngaran ni Milkisidik ne “Datù te Metidtu se Ulaula Rin.” Ne geina te ratù dema sikandin te inged ne Salim, ne neingaranan ded sikandin te “Datù te Kerinew” su iyan meana te Salim ne kerinew.

<sup>3</sup> Ne diyà te Lalag te Eleteala ne impesurat din ne warà lalag mekeatag te amey ni Milkisidik etawa ke iney rin etawa ke menge keep-epuan din. Ne warà mekesurat dema mekeatag te kineanaka kandin etawa ke kinepatey rin. Tembù be iring te warà rudsuan din wey warà ketepusan din. Ne ebpekeiring sikandin te Anak te Eleteala ne warà ketepusan se kedterebpelengesa rin.

<sup>4</sup> Ne ketà be ne netueanan ta se kepurù ni Milkisidik su misan si Abraham ini se mevantug ne keep-epuan te sikami ne Hudiyenen ne mibehey ki Milkisidik te ikeseputu ne umun dut te langun ne netavan din te kinebunuey rin.

<sup>5</sup> Ne ini se terebpelengesa te Hudiyenen ne menge inenakan ni Levi wey menge inenakan dema ni Abraham. Ne insuhù kandan dut te penduan ni Moises ne egkevehayan dan te ikeseputu ne umun dut te nesabpet te menge ruma ran ne Hudiyenen misan sikandan ke menge inenakan ded ni Abraham.

<sup>6</sup> Ne si Milkisidik ne kenà inenakan mulà ni Levi, ugaid ne misan iring ketà ne mibehayan ni Abraham sikandin te ikeseputu ne umun dut te netavan din. Ne ruen ruma pà ne ibpekita te kepurù ni Milkisidik su misan ruen en impasad ki Abraham te Eleteala, ne impengeningeni pà sikandin ni Milkisidik te ebpeneuven te Eleteala.

<sup>7</sup> Ne netueanan ta ne ke etew ne ibpengeningeni te egkepenaub ne ruma rin ne iyan pà mepurù dut te etew ne ibpengeningeni rin te egkepenaub.

<sup>8</sup> Ne ruma pà, ne mepurù pà si Milkisidik dut te menge terebpelengesa ne inenakan ni Levi ne midtelimà dut te ikeseputu ne umun, su minatey red sikandan su etew rè ma rema sikandan. Ugaid ne si Milkisidik ke midtelimà dut te ikeseputu ne umun ne imbehey ni Abraham, ne iring te viviyag ded lavew sikandin su warà ingkesurat dut te Lalag te Eleteala mekeatag te kemetayen din.

<sup>9-10</sup> Ne misan si Levi ne mepurù ne etew su sikandin se puunan dut te langun ne menge terebpelengesa te menge Hudiyenen ne iyan nevehayan dut te ikeseputu ne umun te menge ruma rin, ne mepurù pà si Milkisidik kandin. Su ketà te kinesinuhunga ki Abraham ni Milkisidik ne imbehey en ni Abraham kandin ke ikeseputu ne umun dut te netavan din, ne iring te nekeamung si Levi ki Abraham te ebehey misan warà pà ianak sikandin su diyà pà sikandin te lawa ni Abraham ke apù din.

*Kenà Ebpekegaga ke Kinedterebpelengesa dut te Inenakan ni Levi te Ebpeliyu te Menge Etew dut te Salà dan, tembù be Midsuhù te Eleteala ke Anak din si Hisus ne Terebpelengesa tew ne Ebpenindeg Kenitew diyà te Etuvangan Din*

<sup>11</sup> Ne netueanan ta te rutun te kinevehey te Eleteala te penduan din diyà te menge Hudiyenen, ne ke menge inenakan ni Levi se midtendù din ne menge terebpelengesa se ebpetumanen dut te penduan, ne si Arun se neuna ne terebpelengesa. Ne embiya nekegaga dut te kinedterebpelengesa ran te ebpeiyu ke menge etew rut te salà dan su apey ki ebpekeuvey te Eleteala, ne warà en atag din te ruen pà maa ebpelepawen ne senge bias ne terebpelengesa ne kenà iring te kinedterebpelengesa ni Arun. Ugaid ne tehaad te kurang en se kinedterebpelengesa ni Arun, tembù be midsuhù te Eleteala ke terebpelengesa tew ne senge bias su iring en te kinedterebpelengesa ni Milkisidik, ne kenà si Arun.

<sup>12</sup> Ne geina te nesembian te Eleteala ini se kinedterebpelengesa ne ebpenindeg dut te menge Hudiyenen, ne ke penduan ne ibpetuman din kandan ne egkesembian ded dema.

<sup>13-14</sup> Ne netueanan ta te nesembian ini se edterebpelengesa su si Hisu Kristu ke Kerenan tew ini se edlehan ku kayi ne kenà riyà ebpuun te inenakan ni Levi su senge bias en. Su riyà ebpuun sikandin te inenakan ni Huda, ne warà inenakan ni Huda ne nevaluy ne terebpelengesa ke kenà si Hisus dà. Ne warà iya kehiya ni Moises ketà te lalag din mekeatag te kedterebpelengesa te ruen riyà ebpuun.

<sup>15</sup> Ne mepayag en nevenar te tehaad te nesembian te Eleteala ke menge terebpelengesa ne inenakan ni Levi, ne nesembian din dema ke penduan su nepemili din se senge bias ne terebpelengesa ne iring dut te kedterebpelengesa ni Milkisidik.

<sup>16</sup> Ne ketà te nepemili te Eleteala si Hisus ne terebpepengesa ne ebpeninindeg kenitew, ne warà din dumai ke penduan te menge Hudiyanen ne kayi rà ebpekepuan te inenakan ni Levi ke terebpepengesa. Ugaid ne mibpemili din sikandin su atag dut te gehem te umur din ne warà edtemanen din.

<sup>17</sup> Su ruen impesurat ne Lalag te Eleteala mekeatag kandin ne egkahi te, “Sikew ke terebpepengesa ne ebpeninindeg te menge etew kayi te kedì taman te taman, iring dut te kinedterepepengesa ni Milkisidik dengan.”

<sup>18</sup> Ne egenat ketà ne netueanan ta te midsembian en te Eleteala ke raan ne penduan ne intahak ki Moises su meluvey, ne warà gehem din te edtavang.

<sup>19</sup> Su ke keduma dut te menge etew te penduan ne kenà ebpekegaga te ebmetidtu ke menge etew su apey ran ebpekeuvey te Eleteala. Ugaid ne guntaani te si Hisu Kristu en se insambi dut te raan ne penduan, ne ruen mepmeupiya pà ne ebpenerengen tew su ruen en ralan te kebpekeuvey tew te Eleteala.

<sup>20-21</sup> Ne kenà ketà dà taman se keupiya te kinepekesambi ni Hisus ne terebpepengesa, su ketà te kinpemili te Eleteala ki Hisus ne terebpepengesa ne ruen impenendan din ki Hisus se egkahi te,

“Siak ke Eleteala ne ibpenendan ku sikew te sikuna ke terebpepengesa ne ebpeninindeg te menge etew kayi te kedì taman te taman.

Ne ini se itungan ku ne kenà en iya egkesembian.”

Ugaid ne pehaney te iyan midtendù te Eleteala ne ke inenakan ni Levi se menge terebpepengesa, ne warà impenendan din mekeatag kandan.

<sup>22</sup> Ne kayi te kinepenendan te Eleteala mekeatag te kedterepepengesa ni Hisus, ne netueanan ta te ini se behu ne ralan te kebpekeuvey ta te Eleteala ne impasad din ne meupiya pà dut te raan ne penduan ne intahak din ki Moises, su si Hisus ke tuus te ini se behu ne pasad ne egketuman en.

<sup>23</sup> Ne kenà dutun dà taman se kinebira rin dut te kinedterepepengesa te menge inenakan ni Levi wey ke kedterepepengesa ni Hisus su ini se menge terebpepengesa ne inenakan ni Levi ne merakel dan su embiya ruen ebpatay kandan ne egkesembian dut te ruma, su ke kinedterepepengesa ran ne ruen tedtab din.

<sup>24</sup> Ugaid ne ke kedterepepengesa ni Hisus ne warà mulà ketepusan din. Warà kegkesembii rin su ke umur din ne warà ketepusan din.

<sup>25</sup> Tembù be ebpekegaga nevenar si Hisus te ebpeleyi te langun ne ed-uvey te Eleteala su ebuyù te tavang su atag dut te sarig dan kandin, su warà ma ketepusan din se kebuyù din te tavang kenitew riyà te Eleteala.

<sup>26</sup> Engketà be ne si Hisus ke Mepurù ne Terebpepengesa tew riyà te etuvangan te Eleteala ne sikandin se ebpekevehey kenitew te langun ne kurang tew. Metidtu nevenar sikandin, ne warà salà din misan deisek dà ne meraat ne ulaula. Nekebira nevenar sikandin dut te langun tew su belisalà ki. Ne impepurù sikandin te Eleteala dut te langun taman misan diyà te langit.

<sup>27</sup> Ne kenà iring sikandin dut te neuna ne menge terebpepengesa su ruen menge binatang ne ibpepengesa ran te uman gewii, ne ed-unaan dan pà te ebpepengesa ke ibehey ran te Eleteala su apey ke salà dan ne egkepesehad, ne arà pà ne ruen ibpepengesa ran mekeatag te salà te ruma ran. Ugaid ne si Hisus ne warà salà din, tembù be seveka rà se impelengesa rin te iyan din imbehey ke kandin en ne hinawa te ebpepatay su apey ke langun ne salà te menge etew ne egkepesehad.

<sup>28</sup> Ketà te miduma red ke menge etew rut te penduan ne intahak ki Moises dengan, ne ke menge ruma ran ne mekesesalà iring ded kenitew se nevaluy ne terebpepengesa ne ebpeninindeg kandan diyà te Eleteala. Neuhet pà dutun ne nesembian te Eleteala ke penduan, ne impenendan din se ebpemilien din ke Anak din te sikandin ke terebpepengesa tew ne ebpeninindeg kenitew. Su ke Anak din, ne ke ketidtu rin ne warà kurang din taman te taman su midtuman din en langun.

## 8

*Ini ne Mekeatag te si Hisus en ke Mepurù ne Terebpepengesa tew ne tuus te ruen behu ne Pasad te Eleteala Kenitew*

<sup>1</sup> Iyan meana kayi rut te langun ne migkahi ku ne ruen en Mepurù ne Terebpepengesa tew ne ebpeninindeg kenitew diyà te Eleteala. Ne diyan en sikandin ebpinpinuu te dapit te egkekewanan te Eleteala diyà te langit.

<sup>2</sup> Edtumanen din ini se kebmeperù din te kedterebpelengesa rin diyà te etuvangan te Eleteala diyà te Punggus ne Berekat ne Ruhu diyà te baley ne mibeelan ne ebpengeningeniyen te Eleteala. Ne kenà etew se mibaal kayi ugaid ne Eleteala ke Kerenan tew.

<sup>3</sup> Ne langun ne menge Mepurù te Terebpelengesa ne ebpenindeg dut te menge etew diyà te Eleteala ne netendù sikandan te ebehey dut te ibpelengesa ne menge binatang wey ke ruma pà ne ibehey te menge etew riyà te Eleteala. Ne iring din ded dema si Hisus ke Mepurù ne Terebpelengesa tew, su ruen ded dema ibpekevehey rin diyà te Eleteala.

<sup>4</sup> Ne sikandin ke Mepurù ne Terebpelengesa tew riyà te langit, ugaid ne embiya kayi pà sikandin te ampew te dunya ne kenà egkedterebpelengesa sikandin su kenà sikandin inenakan ni Levi ne igenat dà te ruen terebpelengesa ne sikandan se ebehey te Eleteala te edumaan dan ke suhù te penduan ne intahak ki Moises rengan.

<sup>5</sup> Ugaid ne ke helevek dan te terebpelengesa kayi te ampew te dunya ne iyan din iring ne alung dà wey limbahan dà dut te tidtu ne ed-ul-ulaan diyà te langit. Duen dema baley ne ebpengeningeniyen dan te terebpelengesa ne alung dà dema dut te benar ne diyà te langit. Su ruen migkahi te Eleteala ki Moises te kebpeitindag din en ketà, ke sikandin te, “Dumai nu nevenar ke langun ne impekita ku keykew te riyà ki te buvungan.”

<sup>6</sup> Ugaid ne ini se helevek ni Hisus te kedterebpelengesa ne mepurù pà dut te nengehelevek te menge terebpelengesa rengan. Ne iring din ded dema ke keupiya ini se behu ne pasad te Eleteala te si Hisus se terebpelengesa tew ne ebpenindeg kenitew su muna pà se keupiya rin ketà te neuna ne pasad te Eleteala. Iyan din ked-una te keupiya ini se behu ne pasad su ruen impenendan din mekeatag ketà ne mepmeupiya pà nevenar.

<sup>7</sup> Su embiya ke neuna ne pasad te Eleteala ne ebpekegaga, ne kenà din en edsembian te behu.

<sup>8</sup> Ugaid ne nekita te Eleteala te midsurang ke menge etew dut te suhù te penduan ne intahak ki Moises. Tembù be midsewayan din sikandan te egkahi te, “Ruen hewii ne ebpekeuma ne ebeelan ku ke behu ne pasad

dut te menge etew ne inenakan ni Israyil  
wey ke menge etew ne inenakan ni Huda.

<sup>9</sup> Ne kenà iring ini dut te neuna ne pasad ku  
riyà te menge keep-epuan dan dengan  
te kinetevangi ku kandan

te ed-awà dut te inged ne Ihiptu,  
su warà dan tumana

ke neuna ne impasad ku kandan,  
tembù be mid-ewaan ku sikandan.

<sup>10</sup> Ugaid ne ini se behu ne pasad ku  
ne ebeelan ku keuremà dut te menge inenakan ni Israyil,

ne ibpetahù ku ini se suhù ku te itungan dan  
ne ibpesurat ku ini te hinawa ran

su apay ran egkerumai egenat te hinawa ran.

Ne ketà be ne siak ke Eleteala ne edtewehan dan,  
ne sikandan ke menge etew ku.

<sup>11</sup> Su ketà be ne hewii ne kenà en ebpegingewaan  
te ebpenuruen den pà ke menge ruma ran mekeatag kediey.

Su langun dan egenat te kevevan taman te kepuruan  
ne egketau en kediey.

<sup>12</sup> Ne ebpeseharen ku sikandan,  
ne kenà ku en ebpenunduhan ke meraat ne ulaula ran.”

<sup>13</sup> Ne ketà te impesabut en te Eleteala te ruen en behu ne pasad din, ne nesebutan tew en te nesembian din en arà se raan ne penduan su neipus en. Ne embiya ke raan ne nesembian en, ne egkeawà en su warà en pantag din.

## 9

*Iyan Dan Mid-ulaula te Eduma Rut te Neuna ne Pasad Te Eleteala diyà te Baley ne Ebpengerapan te menge Hudiyanen*

<sup>1</sup> Ketà te neuna ne pasad ne mibeelan te Eleteala dut te menge etew ne ruen munge suhù mekeatag te daif ne ed-ul-ulaan dut te munge Hudiyanen te kebpengarap kandin. Ne ruen dema baley ne mibpeveelan te Eleteala te munge etew ne ebpengerapan dan kandin.

<sup>2</sup> Impeitindeg dan ke valey ne ebpengerapan ne lundis te binatang, ne deruwa se ruhu rin. Ne ke neuna ne ruhu ne edlusud dan ketà ne ed-ingeranan te Berekat ne Ruhu. Ne ketà ne ruen intahù ne sulù wey lemisaan ne edtehuan dan te pan ne ibehey riyà te Eleteala.

<sup>3</sup> Ne ruen mekepal ne saput ne impehelet dut te ikeruwa ne ruhu. Ne ini se ikeruwa ne ruhu ne ed-ingeranan te Punggus ne Berekat ne Ruhu.

<sup>4</sup> Ne iyan intahù ketà ne lemisaan ne vulawan ne edtutungan dan te rukut. Ne ruen dema ketà ne iring te kavan ne midsepuwan te bulawan ne midtehuan dut te deruwa ne melumpayà ne vatu ne midsuratan te penduan ne imbehey ki Moises te Eleteala. Ne ruen ketà dema ke bulawan ne kelalew ne netehuan te egkeenen ne ed-ingeranan te mana ne imbehey kandan te Eleteala rengan. Ne rutun dema neketahù ke tuked ni Arun ne mibpeneringsing te dawun.

<sup>5</sup> Diyà te divavew te kavan ne ruen deruwa ne ledawan ne iring dut te paras te suluhuen ne neverat se pakpak dan ne tuus te ketà ke Eleteala. Neverat en ke pakpak dan su ed-elungan dan ke divavew te kavan su riyà ibpirik ke lengesa dut te impelengesa su apey egkepesehad ke salà dut te menge etew. Ugaid ne kayi ku rà edtemana ini su kenà pà ini timpu te edseysey.

<sup>6</sup> Ne arà be ke kinepedtandang dut te langun diyà te baley ne ed-erapan. Ne edlusud ke menge terebpepengesa dut te neuna ne ruhu te uman gewii su edtumanan dan ke impehelevek kandan te Eleteala.

<sup>7</sup> Ugaid ne ke ikeruwa ne ruhu ne iyan dà ebpekelusud ketà ne ke Mepurù ne Terebpepengesa, ne keseveka rin dà ed-ul-ulaa ini te uman rahun. Ne kenà egkepakey ne ebpekelusud sikandin ketà embiya kenà ed-ewit te lengesa rut te impelengesa ne ibehey riyà te Eleteala su atag dut te salà din wey ke salà dut te menge etew ke embiya ruen mid-ulaula ran ne warà dan metueni ne salà.

<sup>8</sup> Ne igenat ketà ne ruen ipesabut kenitew dut te Kedeseenan ne Ebpetuntul te Menusiyà te ketà ebpuun te mekepal ne saput ne impehelet dut te Punggus ne Berekat ne Ruhu. Iyan din ipesabut kenitew ne gewii te ruen pà suhù mekeatag dut te neuna ne ruhu ne edtumanan dan pà, ne warà pà mekeuma ke hewii ne egkepakey ne edlusud ke menge etew ketà te ruhu ne rutun en ke Eleteala.

<sup>9</sup> Ne idledawan arà se ibpenurù kenita te misan ruen pipira ne ibpelengesa ne binatang wey ruma pà ne ibehey ran te Eleteala, ne kenà ini ke ebpekeawà dut te salà te menge etew ne ebpengeningeni ketà.

<sup>10</sup> Su ini, ne miduma ran dà te menge penduan mekatag te betasan te kegkaan, ked-inum wey ke mid-ulaula ran te ebmelinis ke lawa ran te warà dan pà mekeuvey te Eleteala. Su langun kayi ne suhù ne idlinis dà dut te lawa ran, ugaid ne kenà egkegaga te edilak ke hinawa ran. Ne langun kayi ne ruen egkeetahan din se taman dà ketà te hewii ne edsembian te Eleteala ke behu ne ralan.

<sup>11</sup> Na guntaan te ruen en ini se behu ne ralan su nekeuma en si Hisu Kristu ne sikandin en ke Mepurù ne Terebpepengesa tew, ne ibpepeveyà kandin ne muna pà se keupianan ne nekeuma kayi te kenitew. Su ke ebpengerapan ne midlusuran din te egelevek te ebpeninindeg kenitew, ne muna pà se keupiya rin su kenà baley ne mibeelan te etew su kenà kayi rà te ampew te dunya.

<sup>12</sup> Ne ketà te midlusud si Hisus diyà te Punggus ne Berekat ne Ruhu ne dutun en ke Eleteala, ne keseveka rà mulà medlusud sikandin. Ne kenà iyan din mid-ewit ke lengesa te kambing etawa sapi. Ugaid ne iyan din mid-ewit ne ke kandin ne muney ne lengesa su ke kinepatey rin se nekepeliyu kenitew dut te kedusa te salà tew taman te taman.

<sup>13</sup> Su ke lengesa dut te kambing wey sapi wey ke ibmuk dut te midtutung ne nati ne sapi ne nekebira se atag din. Su nekahi te penduan se embiya ruen etew ne midsinggur dut te etew ne minatey, ne ke terebpepengesa se ebpirik kandin dut te lengesa etawa edsawed kandin te ibmuk dut te midtutung ne nati ne sapi su apey egkeawà ke kerededik din apey sikandin ebpekeuvey te Eleteala.

<sup>14</sup> Engketà be ne embiya ebpekegaga ne ed-awà te meredsik te etew arà se lengesa rà te menge binatang, ne iyan pà be kenà muna pà se kebpekegaga rin ini se lengesa en ni Hisu Kristu te kebpeeliyu rin kenitew rut te salà tew. Su egenat te tavang te Kedeseenan ne Ebpetuntul te Menusiyà, ne imbehey ni Hisus ke hinawa rin ne ebpebpatay misan warà deisek dà ne salà din su ini ke ibehey rin te Eleteala. Ne ini se lengesa rin se edlinis kenitew apey ki edsangur te Eleteala ne warà kemetayan din. Tembù be kenà ne ebpegingewaan te edumaan ta ke iring dut te menge Hudiyanan ne kenà ebpekegaga te ebpeuvey kenitew te Eleteala.

<sup>15</sup> Ne tehaad te ruen gaga te lengesa ni Hisus iring ketà, ne sikandin ke ebpeninindeg kenitew riyà te Eleteala su edtumanan dut te behu ne pasad su apey ke langun ne menge

etew ne midtawag te Eleteala ne ebpekettelimà dut te penaub ne impasad din ne warà edtemanan din. Ne egketelimà ini sabap dut te kinepatey ni Hisu Kristu ne nekepeliyu kandan dut te salà ne neveelan dan gewii te kineruma ran te neuna ne pasad.

<sup>16</sup> Upama ke ruen etew ne ruen kearen din ne idalem te epidavit ke engkey se egkevehayan te kearen din embiya ebpatay en sikandin. Ugaid ne taman te biviyag pà sikandin ne kenà egkepenelipun ini rut te menge etew ne ebehayan dut te kearen din, su kenà egkepakay ne ebpenelipunen dan ini se taman ne ruen tuus te minatey en ini se kemuney.

<sup>17</sup> Su ini se epidavit, ne warà igkevehey rin taman ne biviyag pà ke kemuney te kearen. Iyan din kebpekevehey ke minatey en ke kemuney te kearen.

<sup>18</sup> Ne iring din ded dema ke neuna ne pasad te Eleteala, su iyan din ingawà ne ruen lengesa rut te mibpeimetayen su apay ebpekeipanew en ke pasad te Eleteala.

<sup>19</sup> Ne arà se mid-ulaula ni Moises rengan. Pehaney ne mibpesabut din te menge etew ke langun ne penduan ne imbehey kandan te Eleteala. Arà pà ne migkuwa rin ke lengesa te menge nati ne sapi wey menge kambang ne impelengesa ne mid-emutan din ini te wayig. Na migkuwa rin ke tangkey te pinemula ne ed-ingaranan te hisup ne ruen bulvul te bilibili ne midtinà te merihà ne mibegkesan ketà, ne in-ered din ini ketà te lengesa ne impirik din dut te riberù ne midsuratan te penduan ne impirik din dema dut te menge etew.

<sup>20</sup> Ne gewii rin te ebpemirik ne egkahi sikandin te, “Tuus ini se lengesa te behu ne pasad ne mibeelan te Eleteala keytew apay kiyu rin egketelimà, ne insuhù din ne edumaan tew kayi te nekahi rin.”

<sup>21</sup> Ne iring din ded dema ne mibpemirikan ni Moises ke baley ne ebpengerapan wey ke langun ne kesengkapan ketà te kebpegarap.

<sup>22</sup> Su nekahi te penduan ne timalù te langun ketà ne iyan pegingawà ne egketilak dut te lengesa. Ne iring din ded dema ne kenà egkepesehad ke salà te menge etew embiya kenà duen ibpelengesa.

<sup>23</sup> Ini se ebpengerapan te menge Hudiyanen ne mibeelan te etew kayi te dunya wey ke langun ne neketahù ketà ne ebpekeiring dà ini dut te tidtu ne ebpengerapan diyà te langit, ne iyan pegingawà ne ini ne egketilak dut te lengesa te binatang. Ugaid ne ke tidtu ne ebpengerapan diyà te langit ne iyan pegingawà ne mepmepiya pà ne ibpelengesa ketà.

<sup>24</sup> Su si Hisu Kristu ne kenà ke valey ne ebpengerapan ne mibeelan dà te etew kayi te ampew te dunya se midlusuran din su ini ne ebpekeiring dà dut te ke tidtu riyà te langit. Ugaid ne sikandin ne midlusud diyà te langit ke tidtu ne ed-ubpaan te Eleteala, ne diyan en guntaan sikandin te etuvangan te Eleteala se ebpeninindeg kenitew.

<sup>25</sup> Ne ke Mepurù te Terebpepengesa te Hudiyanen ne uman rahun ne edlusud sikandin te Punggus ne Berekat ne Ruhù ketà te baley ne ebpengerapan kayi te ampew te dunya su ibehey rin ke lengesa rut te binatang ne impelengesa. Ugaid ne si Hisu Kristu mulà ne warà din isaupsaup te ebehey ke lengesa rin te Eleteala su keseveka rà iya.

<sup>26</sup> Su embiya uman en rahun ne ebehey sikandin te lengesa rin, ne utew merakel se keresayan din te kebpebpatey rin te igenat dà dut te kinelimbaha kayi te dunya taman guntaan. Ugaid ne kenà iring ketà se mid-ulaula rin, su keseveka rà se kinepengkay rin ne ini en ke telanged ne hewii ne midtendù te Eleteala. Nevaluy sikandin ne etew ne imbehey rin ke hinawa rin te ebpebpatey su apay egkeawà ke salà dut te langun ne menge etew.

<sup>27</sup> Ne langun tew ne menge etew ne keseveka rà ebpatay, ne an pà ne egkukumen kiyu te Eleteala.

<sup>28</sup> Ne iring ketà ne keseveka rà imbehey ni Hisus ke hinawa rin te ebpebpatey su apay ke salà dut te langun ne menge etew ne egkeawà. Ne edlived pà maa kayi te ampew te dunya, ugaid ne kenà maa edsaup ebpebpatey te salà tew. Inemulà te ed-engayen din ke sikitew ne edtahad kandin.

## 10

### *Ke Rekelà ne Mid-ulaula ni Hisu Kristu su apay ki Ebpekeuvey te Eleteala*

<sup>1</sup> Iyan dan midumaan dut te penduan ne imbehey te Eleteala ki Moises dengan ne alung-alung dà su in-upama rà dut te tidtu ne keupianan ne ebpekeuma. Ne ke tidtu ne keupianan ne nekeuma en kayi te kenitew impepevayà ki Hisus. Su nekahi te penduan ne uman rahun ne iyan pegingawà ne ruen menge binatang ne ibpelengesa ne ibehey riyà te Eleteala su apay egkeawà ke salà dut te menge etew. Ugaid ne misan iring ketà

se ed-ul-ulaan dan taman te taman, ne warà mekegaga arà te kebmetidtu te menge etew su apey ran ebpekeuvey te Eleteala.

<sup>2</sup> Su embiya benar ne ebpeketilak dut te salà dan arà te lengesa te binatang ne ibehey ran te Eleteala, ne warà en atag din te edsaupsaup dan te uman rahun su ebmelilintad en perem ke hinawa ran dut te salà dan ne nepesehad en.

<sup>3</sup> Inemulà te arà se lengesa ne ibehey ran te Eleteala te uman rahun ne ke kebpetenuri rà kandan te salà ne neveelan dan.

<sup>4</sup> Su ke lengesa te menge sapi wey kambing ne warà nevenar kebpekegaga rin ne ed-awà dut te salà dan.

<sup>5</sup> Tembù be guna su mehaan en ebpengkayi si Hisu Kristu te ampew te dunya ne migkehiyan din ke Amey rin ne Eleteala te,

“Kenà nu iyan egkiyuhan

ke menge binatang ne impelengesa

wey ke ruma pà ne ibehey ran keykew;

ugaid ne iyan nu kiyug

ne egkevaluy a ne etew,

tembù be impenehana nu en ke lawa ku.

<sup>6</sup> Uya, kenà nu igkesuati

ke menge binatang ne edtutungen,

wey ke lengesa ne ibehey ran keykew

te id-awà dut te salà dan.

<sup>7</sup> Engketà be arà ne egkehiyen ku te,

‘Ini ad, Eleteala, te edtuman dut te kiyug nu

iring dut te nekahi

ne impesurat nu mekeatag kediey.’ ”

<sup>8</sup> Mid-unaan ni Hisu te egkahi te kenà ke menge binatang ne ibpelengesa ran wey ke ruma pà ne ibehey ran te Eleteala ne ebpekesuhat te hinawa rin. Ne kenà din ded dema igkesuat ke menge binatang ne edtutungen wey ke lengesa ne ibehey ran kandin te igkeawà dut te menge salà dan. Ne migkahi rin ini misan netuenan din en te langun ne ibehey ran su atag dut te edumaan dan ke nekahi te penduan ni Moises.

<sup>9</sup> Ne midtunduhan din en maa te edlalag te, “Ini ad, Eleteala, te edtuman dut te kiyug nu.” Ne arà te lalag ni Hisu ne netuenan tew en te in-awà en te Eleteala ke neuna ne pasad din mekeatag te kebehey kandin te menge binatang ne ibpelengesa su midsembian din en te behu su ke kinpelengesa ni Hisu Kristu rut te lawa rin se insambi dut te menge binatang ne ibpelengesa.

<sup>10</sup> Su si Hisu Kristu, ne midtuman din ke kiyug te Eleteala su midumaan din ke langun ne insuhù kandin. Ne ke kinevehey rin te lawa rin te keseveka rà mekeatag te salà te langun tew ne nekegaga arà te kinekeawà te salà tew.

<sup>11</sup> Ketà te baley ne ebpengerapan te menge Hudiyänen, ne uman gewii ne egelevelk ke menge terebpelengesa te ebehey te Eleteala te binatang ne ibpelengesa ran ne edseupseupan dan te ed-ulaula ini. Ugaid ne kenà ded lavew ini ebpekegaga ne ed-awà dut te salà te menge etew.

<sup>12</sup> Ugaid ne kenà iring ketà se kinevehey ni Hisu Kristu te lawa rin diyà te Eleteala te ebpepatey, su keseveka rà mulà se kinevehey rin te lawa rin dut te salà te menge etew ne ebpekegaga arà taman te taman. Neipus arà ne mibpinuu sikandin diyà te egkekewanan te Eleteala diyà te langit.

<sup>13</sup> Ne riyà guntaan edtahad si Hisu taman te edtevanan te Eleteala ke kunterà din ne ebpegiekan te Eleteala kandan.

<sup>14</sup> Su ke kinevehey ni Hisu Kristu te lawa rin ne ebpepatey te keseveka rà, ne midtidtu rin ke menge etew wey midtilak din dut te lengesa rin su apey riyà te etuvangan te Eleteala ne ebmetilak dan taman te taman.

<sup>15</sup> Ne benar ini su ruen dema impesabut dut te Kedesenan ne Ebpetuntul te Menusiyà ketà te impesurat din ne egkahi te,

<sup>16</sup> “Ne ini se behu ne pasad ku

ne ebeelan ku rut te menge etew ku keuremà.

Ne ibpetahù ku ini se suhù ku diyà te itungan dan

ne ibpesurat ku diyà te hinawa ran

su apey ran egkerumai egenat te hinawa ran.”

<sup>17</sup> Ne migkahi pà maa te,

“Ne kenà ku en ebpenunduhén ke meraat ne ulaula ran.”

<sup>18</sup> Na geina te kenà ebpenunduhén te Eleteala ke salà te menge etew, ne kenà en ebpegingawà te ruen pà ibpelengesa ne ibehey te Eleteala te ked-awà dut te salà dan.

*Egkepakéy en ne Ebpekeuvey ki te Eleteala su atag dut te Kinepebpatey ni Hisu Kristu Kenitew*

<sup>19</sup> Engketà be, minge suled ku, ne atag dut te kinepebpatey ni Hisu kenitew, ne ruen en dalan te ebpekelusud ki riyà te Punggus ne Berekat ne Ruhu ne dutun en ke Eleteala.

<sup>20</sup> Su ketà te kinevehey ni Hisu ke hinawa rin te ebpebpatey, ne mibeelan din ke behu ne ralan te ebpekeuvey ki te Eleteala. Ne ebpekelusud ki riyà te Punggus ne Berekat ne Ruhu ibpepevayà ki Hisu ne mibpebpatey ugaid ne biviyag ded iya. Su in-awà din arà se impehelet kenitew te ed-uvey te Eleteala ne in-upama ketà te mekepal ne saput ne impekalang dut te ed-uppaan te Eleteala diyà te baley ne mibeelan te minge Hudiyanen te ebpengarap te Eleteala.

<sup>21</sup> Ne guntaani ne sikandin ke mepmeupiya pà ne ebpenindeg kenitew diyà te Eleteala, ne sikandin se ebpekemalen dut te langun tew ne minge etew te Eleteala.

<sup>22</sup> Tembù be ed-uvey kiyu en te Eleteala se egenat te keputian te atey tew ne kenà eduwaruwa se kebperetiyya tew kandin. Ed-uvey kiyu kandin su ke lengesa ni Hisu ke midtilak te hinawa tew rut te meraat ne ulaula ne igkevenari te hinawa tew, ne iring te midlulan din ke lawa tew rut te metingew ne wayig.

<sup>23</sup> Ne ebpetihel kiyu se egawed dut te kebpenareng tew te impasad te Eleteala, ini se kebpenareng ne nekahi tew en te ebperetiyyaan tew. Su egkeserihan sikandin ne edtuman ke impasad din kenitew.

<sup>24</sup> Ebpevegbeg-etei kiyu te ebpekita te limù te minge ruma tew, ne ebpetebtevangey kiyu te ed-ulaula te meupiya.

<sup>25</sup> Ne kenà tew edlipatan ke kegkevurun tew te ebpengarap te Eleteala apey ki kenà ebpekeiring dut te ulaula te ruma pà ne minge etew. Ugaid ne iyan tew ed-ul-ulaan mulà ne ebpekevaher ki te kebperetiyya rut te ruma tew su netueanan tew se mehaan en se kedlived ni Hisu Kristu kayi te ampew te dunya.

<sup>26</sup> Su embiya nesebutan tew en ke benar ne penurù mekeatag ki Hisu Kristu ugaid ne edtivevaan tew pà manen te ed-ulaula te meraat, ne warà en be egkepenareng tew te kebpekeliyu tew pà te salà tew.

<sup>27</sup> Inemulà te iyan tew rà egkepenareng ne kegkeandek dut te hewii te kegkukuma te Eleteala kenitew. Su ketà ne ke langun ne mid-engkenà kandin ne edtutungen diyà te edsindrew ne apuy.

<sup>28</sup> Su rengan ne misan engkey ne etew ne warà meduma rut te penduan ne intahak ki Moises, ne ruen deruwa etawa tetelu ne etew se nekekita ini ne ebpeketiitus te kinepekesurang din te penduan, ne ebpeimetayan te warà kegkeyruwi.

<sup>29</sup> Ne embiya iring ketà se egketemanan dut te etew ne midsurang dut te penduan ni Moises, ne labi pà se kesusai rut te etew ne ed-engkenà ki Hisu ke Anak te Eleteala! Su ketà ne impekita rin se warà din peberepentaha ke lengesa ni Hisu ne imbehey te kinepatey ni Hisu su apey egketuman ke behu ne pasad te Eleteala ne ebpeketilak dut te salà din. Uya, labi pà se kesusai kandin su iring te pingkeyà din ke Kedesenan ne Ebpetuntul te Menusiya ke ebpayag dut te tavang te Eleteala kenitew.

<sup>30</sup> Su netueanan tew ne ke Eleteala se migkahi te,

“Siaken se ebpenulisulì.

Siaken se edusa te minge etew ne ed-ulaula te meraat.”

Ne migkahi pà maa te,

“Siaken ke egkukum te minge etew ku.”

<sup>31</sup> Ne mekeandekandek nevenar embiya ebpekepevayà ki te gehem te kukuman te Eleteala ne warà kemetayan din.

<sup>32</sup> Tentenuri niyu ke hewii te behu kew pà ne mibperetiyya ki Hisu ne nerayahan en ke itungan niyu. Su ruen merakel ne keresayan niyu, ugaid ne warà meawà ke kerinew te hinawa niyu.

<sup>33</sup> Su ruen hewii ne mibpegkeyà kew wey meraat se imped-ulaula ran keniyu riyà te etuvangan te merakel ne etew. Ne ruen pà hewii ne impenindeg niyu ke ruma niyu rut te meraat ne imped-ulaula kandan.

<sup>34</sup> Ne impekita niyu ke kegkeyruwi rut te nengevilanggù su midtevangan niyu sikandan. Ne misan pà te mid-ahew ke minge kearen niyu ne warà nemutu ke hinawa niyu. Uya, su netueanan niyu se ruen pà beripantag ne kearen niyu ne edtahad diyà te langit ne kenà egkeahew keniyu taman te taman.

<sup>35</sup> Engketà be ne tigkeri niyu ke keresayan ne kenà niyu engkeri ke sarig niyu te Eleteala, su rekelà se keupianan ne egketelimà niyu ne impasad te Eleteala keniyu.

<sup>36</sup> Iyan ungayà se edtigker kew te kemerehanan apey niyu egketuman ke kiyug te Eleteala ne ebpeketimà kew rut te keupiya ne impasad te Eleteala.

<sup>37</sup> Su ruen impesurat ne Lalag te Eleteala ne egkahi te,



“Warè en keuhetan din  
ne iyan ebpengkayi ne ke ebpekeuma.  
Ne ke kebpekeuma rin  
ne kenà din edsenggelen.

<sup>38</sup> Ne ke menge etew ne metidtu kayi te etuvangan ku  
ne editgkeran dan te piya engkey se kemeresayan  
su atag dut te kebperetiyyaya ran kediey.

Ugaid ne embiya ruen etew ne ed-engked se eduma kediey,  
ne warà iya kegkehalew ku kandin.”

<sup>39</sup> Ugaid ne sikitew ne kenà iring ketà se ulaula tew, su kenà kiyu en ed-iring dut te  
menge etew ne mid-engked ke kebperetiyyaya ran ne edusaan te Eleteala. Su mevaher  
se kegawed tew te kebperetiyyaya tew ne ketà be ne ebpekeliyu kiyu.

## 11

### *Ini ne Mekeatag te Tidtu ne Sarig*

<sup>1</sup> Na, embiya duen tidtu ne sarig tew te Eleteala, ne netueanan tew iya se egketelimà  
tew ke meupiya ne ebpenerengen tew. Su egenat te sarig tew ne netueanan tew en rema  
se benar ini se keupiya rin misan kenà ta egkekita.

<sup>2</sup> Ne ke menge etew rengan ne nekesuhat te hinawa te Eleteala su egenat dut te sarig  
dan kandin.

<sup>3</sup> Ne sikitew rema, ne egenat dut te kedsarig tew ne netueanan tew te ini se kelibutan  
wey ke langun ne nekeriken kayi ne nelimbag te Eleteala egenat te lalag din dà. Engketà  
be ne ke langun ne egkekita tew kayi te dunya ne riyà ebpuun dut te kenà egkekita.

<sup>4</sup> Si Abel rengan, ne egenat te kedsarig din te Eleteala ne iyan nevirangan te Eleteala ke  
imbehey rin kandin ne meupiya pà dut te imbehey te kakey rin ne si Kain. Ne sabap dut  
te kedsarig din ne midtelimà sikandin ne metidtu riyà te etuvangan te Eleteala, tembù  
be midtelimà te Eleteala ke imbehey rin. Ne misan engketà te rengan dà ne minatey si  
Abel, ne ruen pà lavew egkepenurù kenitew kayi te kedsarig din.

<sup>5</sup> Ne iring din ded dema ke kedsarig ni Enoc te Eleteala rengan. Su sapat dut te kedsarig  
din ne warà mekepevyà te kepepatey sikandin su mid-ewit sikandin te Eleteala riyà te  
langit. Ne misan mibpemengà te menge etew sikandin, ne warà dan en mekita su riyen  
en ma te Eleteala. Ne ruen impesurat ne Lalag te Eleteala te kayi pà si Enoc te dunya ne  
nekesuhat sikandin te hinawa te Eleteala.

<sup>6</sup> Ne warà iya etew ne ebpekesuhat te hinawa te Eleteala embiya warà sarig din  
kandin. Su ke etew ne egkiyug ne ebpekeuvey te Eleteala, ne iyan ebpegingewaan ne  
ebperetiyyaayan din nevenar te ruen Eleteala wey ebperetiyyaayan din dema se edtavang  
ke Eleteala rut te etew ne ebpekeuvey kandin.

<sup>7</sup> Engketà ded be rema ke kedsarig ni Noe te Eleteala rengan. Su sapat dut te kedsarig  
din ne mibperetiyyaya sikandin dut te imbaag te Eleteala ne ruen rimas ne ebpekeuma,  
misan warà din pà mekita te iring ketà. Ne midumaan din ke lalag te Eleteala su  
mibeelan din en ke rekela ne avang ne ed-ingaranan te arka ne mid-untud dan en  
ketà se telteleanak. Ne ketà te kinelampey kayi te dunya, ne warà dan meherà. Su  
sabap dut te kedsarig din te Eleteala, ne nevirangan sikandin te Eleteala ne metidtu.  
Ugaid ne ke ruma pà ne menge etew ne midusaan te Eleteala te kepepatey su warà dan  
mebperetiyyaya.

<sup>8</sup> Ne si Abraham dema rengan, ne sabap dut te kedsarig din te Eleteala ne midumaan  
din ke insuhù te Eleteala kandin te ebpeewaan dut te inged din su ebpendiyanen te  
inged ne impasad kandin te Eleteala, misan warà din metueni ke inged ne ebpevyayan  
kandin.

<sup>9</sup> Su ke kinesarig din te Eleteala ne mid-ubpà dan ketà te inged ne impasad kandin te  
Eleteala iring dut te ked-ubpà te nekererepuan dà ne menge etew. Ne ke menge baley  
ne midelesan dan ne mibeelan dut te lundis te binatang. Ne iring din ded dema te mid-  
ubpà ketà ke anak din ne si Isaac wey ke apù din ne si Jacob su ingkeragkes dan ded  
dema dut te impasad kandan te Eleteala.

<sup>10</sup> Ne midtigkeran ni Abraham te iring ketà ne ked-ubpà, su ruen ebpenerengen din  
ne inged ne kenà bulug egkereetan ne mibeelan te Eleteala diyà te langit.

<sup>11</sup> Ne si Sara ke esawa ni Abraham ne midsarig rema te Eleteala. Su misan lukes  
en sikandin ne warà en kearus din te ed-anak, ne sabap dut te sarig din te Eleteala te  
edtumanen din ke impasad din kandin ne nekeanak ded sikandin.

<sup>12</sup> Ne si Abraham dema ne lukes en nevenar ne warè en kearus din te ebpekeanak  
den pà ki Sara. Ugaid ne misan iring ketà, ne si Abraham se nevaluy ne apù dut

te medmerakel ne inenakan ne kenà egkeviring su ke kinekevuwad din ne iyan mibpeiringan se minge bituen diyà te langit wey ke kerakel te pantad diyà te beyvey te rahat.

<sup>13</sup> Langun kayi ne minge etew te migkahi ku geina ne warà migkurang ke sarig dan te Eleteala taman te minatey ran, misan warà den pà medtelimà arà se impasad kandan te Eleteala te biviyag den pà. Su netuenan dan se ebpekeuma ke hewii te edtumanen te Eleteala ke impasad din kandan, ne taman be te biviyag den pà ne impesabut dan te sikandan ne nekererepuan den dà kayi te ampew te dunya.

<sup>14</sup> Ne ke minge etew ne egkahi te nekererepuan den dà kayi te dunya ne ibpekita te ruen pà ebpenerengen dan ne tidtu ne inged dan diyà te langit ne ed-ubpaan dan taman te taman.

<sup>15</sup> Ne warà dan en pegpegitunga eni Abraham ke inged ne mid-ewaan dan en, su embiya ed-ul-ulaan den pà arà ne egkepakey ne edlived dan ketà.

<sup>16</sup> Inemulà se iyan dan egkiyuhan ne arà se inged ne muna pà se keupiya rin dut te mid-ewaan dan, su ini ne inged ne riyà te langit. Ne geina te arà se egkiyuhan dan ne kenà igkeyeyai rut te Eleteala ne edtewahan sikandin te Eleteala ran su ruen en inged ne impenehana rin kandan te ed-ubpà.

<sup>17-18</sup> Ne sabap dut te sarig ni Abraham te Eleteala ne mibperumaruma sikandin te kinesuhua kandin te Eleteala te ibehey ini se anak din si Isaac ne ibpelengesa te Eleteala. Insuhù kandin ini te Eleteala dut te hewii te kinebetelua kandin te Eleteala ke engkey se taman ne kevaher te kedsarig din te Eleteala. Ne misan sikandin se mibpesaran te Eleteala te sabap dut te ini se anak din si Isaac ne egkevuwad ke minge inenakan din, ne misan iring ketà ne malumalù din ed-imetayi ini se budtung ne anak din si Isaac su ibehey rin ne ibpelengesa te Eleteala.

<sup>19</sup> Su nepegitung ni Abraham se misan ed-imetayan din ke anak din si Isaac su ibehey rin te Eleteala, ne ruen gehem te Eleteala te ebenawen din ded sikandin. Ne benar ne ebpekeiring te nevanew sikandin, su embiya warà ungena te Eleteala si Abraham ne nepatey rin en ke anak din.

<sup>20</sup> Ne guna su lukes en si Isaac ne impengeningeni rin ke minge anak din si Jacob wey si Esau ne intarem din kandan se ruen ibpenaub te Eleteala ne egketelimà dan keuremà. Intarem din ini su midserihan din se edtumanen te Eleteala ke impasad din dengan.

<sup>21</sup> Ne si Jacob dema ne midsarig te Eleteala, su guna te lukes en sikandin ne mehaan en ebpatay ne impengeningeni rin te ebpeneuven te Eleteala ke deruwa ne apù din ne minge anak ni Jose. Ne ketà ne midurungul te tuked din se ebpengarap te Eleteala.

<sup>22</sup> Ne iring din ded dema ke kedsarig ni Jose te Eleteala, su ketà te mehaan en te kepatey rin ne mibperetiyaaya rin ded nevenar se edtumanen iya te Eleteala ke langun ne impasad din. Tembù be migkahi rin te ruen hewii ne ebpekeuma ne id-awà te Eleteala ke langun ne minge inenakan ni Israyil diyà te inged ne Ihiptu. Ne migkahi rin dema te ketà te hewii ne kebpekeawà dan en ne ibpeewit kandan ke minge tulun din su riyà ded ibpeleveng te inged ne ebpesineruwan dan.

<sup>23</sup> Ne ke minge lukes ni Moises dema, ne ruen tidtu ne sarig dan te Eleteala. Su rut te hewii te kineenaka ki Moises ne ruen suhù te ratù te Ihiptu ne ebpeimetayan ke langun ne minge vatà ne meama te minge Hudiyanen. Ugaid ne warà meandek ini se lukes ni Moises te kenà eduma rut te suhù te datù su in-eles dan sikandin taman te nekedtetelu ne vulan su nekita ran se merayirayi ini se anak dan.

<sup>24</sup> Ne netuntun te si Moises ne ruen sarig din ded dema te Eleteala. Su guna su midekelà en ne impekita rin ini te mid-ewaan din ke meupiya ne egketemanan din diyà te baley te bai ne anak te ratù te Ihiptu, su kenà din igkesuati ne birang sikandin ne anak dut te bai ke mid-anak-anak dà kandin.

<sup>25</sup> Su iyan din midtumù ne egkerasey sikandin su riyà ded mebpekiduma rut te minge ruma rin ne Hudiyanen, ke minge etew te Eleteala, tumin dè be ke egkeamung-amung sikandin dut te meraat ne ulaula te minge etew te Ihiptu. Su netuenan din ne arà se minge ulaula ne pekerediyaan dà su edsahad dà.

<sup>26</sup> Su nepegitung din te iyan pà meupiya se edtigkeran din ke meraat ne ibped-ulaula kandin su atag dut te kepperetiyaaya rin ki Hisu Kristu ke ebperetuen te Eleteala keuremà, tumin dè be ke ebpekekuwa sikandin te langun ne kekewesai te inged te Ihiptu. Su ruen lalaw ne ebpenerengen din ne ibehey kandin te Eleteala keuremà.

<sup>27</sup> Ne sabap dut te sarig din te Eleteala ne mid-ewaan din ke inged ne Ihiptu ne warà meandek dut te epes te datù kandin. Ne misan pà merasey en se ibpevyà din ne warè en sikandin medlived su iring ma te egkekita rin en ne eduma ke Eleteala kandin, ne ke kenà ma egkekita.

<sup>28</sup> Ne sabap te sarig din dema te Eleteala ne iyan din midumaan ke insuhù te Eleteala kandin. Tembù be ebpetenuran din te minge Hudiyanen ke ed-ingaranan te “Kedsahad te Suluhuen te Eleteala.” Su edsumbali dan te bilibili ne ibpirik ke lengesa rin diyà te gumawan te minge baley ran su apey edsehari rà te suluhuen te Eleteala ne kenà ed-imetayan ke pengenayan ne anak dan ne meama.

<sup>29</sup> Ne sabap dut te kedsarig dan dema te Eleteala, ne nekerapas dan te rahat ne ed-ingaranan te Merihà ne Rahat ne iring ded dut te memara ne tanà se ked-ipanew ran. Ugaid ne guna su migeraman dut te tegeihiptu te edtundug sikandan te edrapas ketà, ne nengelened dan en.

<sup>30</sup> Ne sabap dut te kedsarig dan dema te Eleteala ne ke kutà ne nekelingut dut te inged ni Hiriku, ne minge kunterà dan, ne nehuvar arà su midtuman dan ke nekahi te Eleteala te ebplinguten dan ketà se inged taman te pitu ne hewii.

<sup>31</sup> Ne sabap dut te sarig te senge etew ne meritan ne ed-ingaranan ki Rahab ne mid-ubpà ketà te inged ne Hiriku, ne misan meritan sikandin ne warà keeleran din te warà pà mebperetiyyaya sikandin, ne warà mekeragkes sikandin dut te mibpematey ne minge ruma rin te arà ne inged. Su ketà te kinepekeuma rut te deruwa ne etew ne midsuhù ni Josue te ebpepenitipen ke inged ne Hiriku ne midtevangangan din sikandan su atag dut te sarig din te Eleteala. Ketà ne warà imetayi sikandin.

<sup>32</sup> Ne kayi ku rà be edtemana ini se guhud ku mekeatag te etew ne midsarig en te Eleteala su edtendey e pà te meuhet ne hewii te keguhura ki Gideon, si Barak, si Samson, si Jepte, si David, si Samuel wey ke minge mibpelambas te lalag te Eleteala rengan.

<sup>33</sup> Su sabap dut te kedsarig dan te Eleteala ne midtevangangan dan te Eleteala. Su ruen mibpekibunù te derekelà ne inged ne midtavan dan. Ne ruen mibayàbayà te inged dan ne metidtu se ulaula ran, ne netelimà dan ke impasad kandan te Eleteala. Ne ruen imbehey te Eleteala ne gehem te edtelawà ke mewaraw ne erimaung su iring te pinediitem ke bèbà dut te erimaung su apey ran kenà mekekahat.

<sup>34</sup> Ne ruen rumà pà ne intimbag te apuy ne warà mengetutung, inemulà te neevukan ke apuy. Ruma pà maa ne nekeliyu te kegkeimetayi kandan. Misan meluvey sikandan, ne mibaher dan te Eleteala. Ne mevurut dan se ebpekibunù su midtevanan dan ke kunterà dan te meriyù ne inged.

<sup>35</sup> Ne sabap dut te sarig te minge meritan ne ke minge anak dan ne minatey ne nevanew red maa.

Duen дума pà ne minge etew ne mevaher se sarig dan te Eleteala ne nesigkem wey mibpekesekitan. Ne misan pà te nerasey ran taman te kinepatey ran ne iyan dan pinedtumù se ebpatay tumin dè be ke ebpekeengked dan dut te kebperetiyyaya ran, su netuenan dan ne egkevanew red maa te Eleteala ne meupiya pà se ked-ubpà dan diyà te kandin.

<sup>36</sup> Ruen pà ruma ne mibpegkeyà wey mibpenruug. Ne ruma pà ne mibakù te kedina ne impevilanggù.

<sup>37</sup> Ne ruen pà lavew mid-imetayan te ebpenrumbehan te batu, ruen edtemperen ke lawa ran te havas, ne ruen pà se ibpetibas. Ruen дума ne nengesegeg dut te ubpaan dan ne ebpekelauglaug dan en se iyan den dà ibevelegkas se lundis te minge kambing wey bilibili. Neayuyay ruen nevenar, ne nerehenan dan, ne meraat se imped-ulaula kandan.

<sup>38</sup> Ne ebpekelauglaug dan su warà netail ne ubpaan dan. Ne riyà dan med-ubpà te lawed etawa riyà te buvungan etawa riyà te surung te dempilas wey riyà te vudsi te tanà. Ne geina te ruen sarig dan ne iring ketà, ne kenà dait ne ebpekiduma ran dut te minge meraat ne etew kayi te dunya.

<sup>39</sup> Langun kayi ne minge etew ne nehuhud ku geina, ne sabap dut te sarig dan te Eleteala ne nekesuhat dan nevenar te hinawa rin misan warà den pà metelimà ke impasad te Eleteala kandan.

<sup>40</sup> Su ruen pà maa meupiya ne netahù te itungan te Eleteala ne ini se kiyug din te sikandan se ebpeteheran pà kenitew su apey ke langun tew ne keseveka rà ebpekettelimà dut te impasad din ne arà se kedtiduwa rin kenitew.

## 12

*Insempità te ini se keduma tew te Eleteala kayi te Ampew te Dunya ne Ebpekeiring dut te Egkuya kiyu*

<sup>1</sup> Ne sikitew ke edsarig te Eleteala, ne ini se keduma tew kandin kayi te ampew te dunya ne ebpekeiring te egkuya ki te ebpelelahuy. Ne ke merakel ne minge mibperetiyyaya rengan se mibpesabut kenitew te egkeserihan nevenar ke Eleteala, ne iring te sikandan

ke edtengteng kenitew kayi te keggkuya tew. Tembù be ed-engked kiyu en iya te piya engkey en ne meraat ne ulaula ne ebpengunguripen kenitew. Uya, ed-engkeran tew ke langun ne ebpekevangan kenitew su apew meabet se kebbelelahuy tew taman dut te edtemanan.

<sup>2</sup> Ne kenà kiyu ebpenlingilingi te keduma tew ki Hisus su sikandin ke ed-iringan tew su sikandin ke rudsuan te kedsarig tew wey sikandin ded ke edtemanan. Midtigkeran din en ke keresayen te kinelensanga kandin diyà te pinebelavag ne kayu, ne warà din ingkeyeyai te ked-imetayi ran kandin ketà su netuenan din te ruen igkehalew rin embiya egkeipus din ini se helevek din te ebpeiyu kenitew. Ne guntaani ne ebpepinuuwen en sikandin diyà te egkekewanan ketà te ebpinuuwan te Eleteala ne edatù.

<sup>3</sup> Iyan niyu pegpegitunga ne ke rasey ne impevayà ni Hisus dut te ulaula te menge mekesesalà ne etew ne mid-engkenà kandin. Iyan niyu pegpegitunga ne apew kew kenà egkeperà wey apew kew kenà ed-engked te ebperetiyyaya.

<sup>4</sup> Su arà te ked-engked niyu te meraat ne ulaula ne ibpenggeram keniyu, ne warà seveka rà ne ed-imatey keniyu atag dut te kebperetiyyaya niyu.

<sup>5</sup> Menu, nelipatan niyu en ke impesurat ne Lalag te Eleteala ne ebag-et keniyu ne menge anak din? Su migkahi rin te,

"Anak ku, pemineg ka

embiya ebpetidtuwen te Eleteala ke ulaula niyu.

Ne kenà kew pekeluvey te eduma kandin

ke embiya edsewayan kew rin.

<sup>6</sup> Su ebpetidtuwen din ke ulaula rut te langun ne igkelimù din ne ebpekesekitan din ke langun ne egkeviringan ne menge anak din ke embiya ed-ulaula ran te meraat."

<sup>7</sup> Engketà be, ne tigkeri niyu ke kemerehenan su Eleteala se ebpenurù keniyu iring dut te ed-ul-ulaan te amey dut te anak din. Tigkeri niyu su arà se kemerehenan ne tuus te anak kew nikandin. Su ke amey, ne kenà din ebbeddayen ke anak din ne ed-ulaula te meraat, ugaid ne ebpekesekitan din ke anak din su apew ke ulaula rin ne ebpeketidtu.

<sup>8</sup> Su embiya kenà kew ebpekesekitan te Eleteala rut te meraat ne ed-ul-ulaan niyu iring dut te ulaula rin te ruma pà ne menge anak din, ne iring te in-anak kew te ingkehingey rà ne kenà kew venar ne menge anak din.

<sup>9</sup> Su kayi te ampew te dunya ne ebpekesekitan ki te amey tew, ugaid ne ed-edatan tew red lavew sikandan. Na, iyan pè be kenà ta edati wey perumdumai ke Eleteala ne Amey tew riyà te langit, su kayi te keduma tew kandin ne ebpekehaked ki te umur ne warà edtemanan din.

<sup>10</sup> Su ke amey tew kayi te dunya ne mibpekesekitan ki ran te mehaan dà ne hewii te batà ki pà, ne endei rà ke ingkeupiani te itungan dan mekeatag kenitew ne arà dà ke edumaan dan. Ugaid ne ke Eleteala ne Amey tew riyà te langit, ne iyan din kebpekeseakit kenitew su netuenan din ne arà se ebpekegkeupiyya kenitew su apew ki egkevaluy ne metidtu iring kandin.

<sup>11</sup> Ne embiya ebpekesekitan ki te Eleteala ne kenà tew igkesuati su igkereheni ta gewii te ebpekepevayà ki ketà. Ugaid ne ke egketemanan tew ne meupiyya ne sabap dut te kinepekeseakit din kenitew ne ebmetidtu ke menge ulaula tew ne rutun ne ebmelintad ke hinawa tew.

<sup>12</sup> Engketà be arà ne ehetheta niyu ke kedsarig niyu te Eleteala su apew misan ebpekepevayà kew te kemerehenan ne kenà medlugkà se peretiyyaya niyu.

<sup>13</sup> Ne kenà niyu engkeri te tidtu ne ralan ne ed-ikulen niyu su apew kenà medlugkà ke menge ruma niyu ne meluvey se kebperetiyyaya rin ki Hisus, inemulà se ebpekevaher dut te kebperetiyyaya ran.

<sup>14</sup> Ne uram kew te kenà kew ebpekevaal te kewahaan su apew ke itungan niyu dut te langun ne menge etew ne ebmelintad. Ne heleveka niyu te mevaher se kebmetidtu te ulaula niyu ne ebpekesehat te hinawa te Eleteala, su embiya kenà iring ketà se ulaula tew ne kenà ki egkekita te Eleteala.

<sup>15</sup> Uram kew te kenà kew ebpekeiniyug dut te tavang wey limù te Eleteala. Su ke etew ne ed-ulaula te iring kayi se ebpekepenehewit te ruma pà ne etew su iring en be te sagbet ne ebehas te mepait ne ebpekeilu.

<sup>16</sup> Ne uram kew te kenà kew ed-ulaula te meredsik etawa ke ebpekewaraan niyu te hinawa niyu ke Eleteala iring ki Esau rengan. Su geina te pingenayan si Esau rut te amey rin ne ruen impasad kandin te Eleteala, ugaid ne insambi din dà ini se kewaris din te pingenayan te egkeenen ne keseveka rin dà egkeena.

<sup>17</sup> Ne neiseg-iseg dutun ne netuenan ta te nepegpegitung din se ebpekelived ded diyà te kandin ke kewaris te pungenayan su apey red dema egkepenaub sikandin te Eleteala. Ugaid ne kenà en egkepakey ne ebpekelived pà ini se kewaris ne insambi din su arà se ned-ulaula rin ne kenà en egkesembian, misan pà te midsinehew sikandin te kinepeksendit din.

<sup>18</sup> Ne kayi te ini se behu ne ralan te kebpekeuvey tew te Eleteala, ne kenà kiyu egkeandek iring dut te impepevayà dengan te minge Hudiyanen. Su ketà te kineuvey ran te buvungan ne ed-ingaranan te Siney, ne ruen nekita ran ne egkeregreg ne apuy, ne ruen mevandes ne keramag, ne mibmerusireman dan misan meandew pà.

<sup>19</sup> Ne nerineg dan ke ebperiyupen ne budyung wey ke merahing. Ne guna su nerineg dan en ke Eleteala, ne mibuyù dan en te ibpeengked su nengeandek-andek dan,

<sup>20</sup> su nengeandek dan ketà te migkahi te Eleteala te, "Embiya ruen ed-uvey kayi ne misan binatang dà ne ebpeimetayan te edrumbahen te batu."

<sup>21</sup> Ne ketà te mekeandek ne nekita ran ne migkahi si Moises te migkerker sikandin te kinekeandek din.

<sup>22</sup> Ugaid ne sikitew ve guntaan, ne ini ke ralan te kebpekeuvey tew te Eleteala ne kenè en iring dut te minge Hudiyanen dengan su iring te nekeuma ki en dut te buvungan ne ed-ingaranan te Siyun ne ed-ubpaan te Eleteala ne warà kemetayan din. Ne ini se inged ne riyà te langit ne ed-ingaranan te Behu ne Hirusalim ne ruen egngivungivuwan ne minge suluhuen din dema ne edeyù kandin.

<sup>23</sup> Ne nekeamung kiyu en dut te ruma pà ne mibperetiyaya te Eleteala ne ke minge ngaran dan dema ne ingkesurat en diyà te langit, su langun tew ne minge anak te Eleteala. Ne iring te nekeuvey kiyu en ketà te langun ne mibperetiyaya ne minatey en ne mibmetidtu en nevenar te Eleteala riyà te langit. Ne iring te nekeuvey kiyu en dema te Eleteala ne egkukum dut te langun ne minge etew

<sup>24</sup> wey riyà te ki Hisus ke midtuman dut te behu ne pasad te Eleteala, su impepevayà dut te lengesa rin ne netilak kiyu rut te salà tew. Su ke lengesa ni Hisus ne imbùbù din dut te kinepatey rin, ne muna pà se keupiya rin su tuus ini te limù te Eleteala te kebpeleyu kenitew, kenà iring dut te lengesa ni Abel rengan su ke lengesa rin ne tuus te kedusa te Eleteala rut te suled ni Abel ne mid-imatey kandin.

<sup>25</sup> Na itaan niyu ve ke telinga niyu te eduma rut te lalag te Eleteala. Su ke minge etew rengan ne warà mebpemineg dut te kedseysey kandan ni Moises te penduan te Eleteala, ne midusaan dan te Eleteala. Na iyan ki pè be kenè ki dusai embiya kenè ki ebperumaruma rut te impenudtul din kenitew te Anak din ne riyà ebpuun te langit.

<sup>26</sup> Su rengan te mibpekidlalag ke Eleteala ki Moises diyà te buvungan te Siney, ne nekugal ke dunya rut te kerekelà te suwara rin. Ugaid ne guntaani ne ruen pasad din te, "Ne egkugalan ku red maa te kenà ke dunya rà su misan ke langit dema."

<sup>27</sup> Ini se migkahi te Eleteala te keuremà ne egkugalen din ded maa ke dunya ne ibpesabut din te ini se dunya ne nelimbag din dengan ne egkepupus en su edsembian din te behu pà ne kenà egkepupus.

<sup>28</sup> Engketà be ne ebpeselamat ki te Eleteala su ebpekeamung ki kandin te edatù ketà te behu ne dunya ne kenà egkevinasa taman te taman. Ebpeselamat ki wey ed-erapen tew ke Eleteala dut te ulaula ne ebpekesuhat te hinawa rin. Ne ed-edatan tew sikandin ne iduma se kegkeandek,

<sup>29</sup> su ke Eleteala tew ne ruen gehem din te kedusa iring te regreg te apuy ne ebpeketutung te langun taman.

## 13

### *Menge Suhù dut te minge Mibperetiyaya*

<sup>1</sup> Na sikiyu ke ebpenusuled te kineperetiyaya ne iyan niyu ibpeiseg ne ke kebpeylimuey niyu.

<sup>2</sup> Ne kenà niyu lipati se kegalàhalà niyu rut te minge etew ne ebpekepemenayik diyà te baley niyu misan kenà niyu sikandan egkekilala. Su rengan ne ruen nehalàgalà te minge etew ne warà dan metueni te suluhuen te Eleteala ne egenat te langit ini.

<sup>3</sup> Ne kenà niyu lipati se kedtavang niyu te ruma niyu ne riyà te bilengguan su iyan niyu kebpegitunga ne sikiyu red dema arà se nevilanggù. Ne tevangi niyu red dema ke minge ruma niyu ne egkerasey iring te sikiyu red ke egeram ketà.

<sup>4</sup> Ne edati niyu ke kedtiwelayà niyu ne kenà kew edlangkadlangkad dut te esawa nu. Su edusaan te Eleteala ke etew ne ed-iring ketà misan nekeesawa sikandin etawa kenà.

<sup>5</sup> Uram kew te kegkiyug niyu te pirak, ne endei rà taman se nearen niyu ne igkehalew niyu en arà. Su migkahi te Eleteala te,

"Kenà ku sikiyu ed-ewaan,  
ne kenà ku sikiyu ebpedterayen."

<sup>6</sup> Tembù be kenà ki egkeyeyaan te egkahi te,  
"Ke Eleteala se edtavang kedi,  
tembù kenà a egkeandek  
misan engkey se ibped-ulaula  
te menge etew kediey!"

<sup>7</sup> Kenà niyu lipati ke menge mibpeneheewit keniyu ne mibpenurù keniyu te Lalag te Eleteala. Iyan niyu pegpegitunga ke meupiya ne ulaula ran wey ke sarig dan ne warà mebparin taman te minatey ran, ne arà be se iringi taman.

<sup>8</sup> Su ingenat dà te warà pà limbaha ini se dunya taman guntaan en ne warà mebparin si Hisu Kristu, ne iring ded lavew sikandin taman te taman.

<sup>9</sup> Uram kew ke egkepeneheewit kew rut te merakel ne kenà tidtu ne penurù su ini ke kebpekesuwey niyu rut te benar ne impenurù keniyu. Ne warà duma ne ebpekevaher te kedsarig niyu te Eleteala ke kenà ke tavang din keniyu ne kenà kayi te keduma niyu te suhù mekeatag te liyen te egkeenen, su ke kedtanud niyu ketà ne kenà ebpeketavang te kebperetiyyaya niyu ki Hisus.

<sup>10</sup> Sikitew ke mibperetiyyaya en ki Hisus ne ruen en ingkepelengesa rin ketà te kinepebpatey rin ne mid-awà dut te salà tew. Ugaid ne sikandan ke eduma pà te penduan ni Moises mekeatag te ebpelengesa te binatang diyà te ebpengerapan te menge Hudiyanen, ne kenà dan ebpekeamung dut te langun tew ne nekepeliyu ni Hisus te menge salà.

<sup>11</sup> Embiya ruen ibpelengesa te Mepurù te Terebpelengesa mekeatag te salà te menge etew, ne ke lengesa rut te impelengesa rin ne ed-ewiten din diyà te lusud te Punggus ne Berekat ne Ruhu su ibehey rin te Eleteala. Ugaid ne ke lawa rut te impelengesa rin ne ed-ewiten dan diyà te liyu te inged dan ne ketà dan be edtutunga.

<sup>12</sup> Ne ke netemanan ni Hisus ne iring din ded dema ketà su mid-ewit dan sikandin diyà te liyu te inged te ked-imetayi kandin, ne ketà ne ke lengesa rin ne impetudà din se kedtilak dut te salà te menge etew.

<sup>13</sup> Engketà be ne impeliyu ki en dut te suhù te penduan ne intahak ki Moises. Ed-awà kiyu langun ketà ne ebpekeamung kiyu en ki Hisus dut te kinepekegkeyà din te kebpebpatey rin diyà te liyu te inged te menge Hudiyanen misan ebpekesekitan ki atag dut te keduma tew kandin.

<sup>14</sup> Su ini se ampew te dunya ne eranà tew rà su kenà ini se ubpaan tew taman te taman. Ugaid ne ruen ebpeneregen tew ne inged ne egkeubpaan tew riyà te langit.

<sup>15</sup> Ne ketà te kedtavang ni Hisus kenitew ne kenà kiyu ed-engked te kedeyù tew te Eleteala. Ne diyà dut te lalag tew ne ibpesabut tew ke kesebenaran te si Hisu Kristu rà ke Keranan tew, su iring te ini se ibehey tew riyà te Eleteala.

<sup>16</sup> Ne kenà niyu lipati ke meupiya ne ulaula niyu rut te menge ruma niyu wey ke kebpetebtevangey niyu su ini ne timbang te ibehey niyu te Eleteala ne ebpekesuhat te hinawa rin.

<sup>17</sup> Perumaruma kew te idsuhù dut te menge etew ne ebpeneheewit te menge mibperetiyyaya keniyu. Su sikandan ke midsuhù te Eleteala te edtuganur keniyu te meupiya, ne ruen hewii ne ebpekeuma ne ebpengetuvang dan diyà te Eleteala se ebpenudtul ke engkey se kinepenurù dan keniyu. Ne embiya edumaan niyu ke idsuhù dan, ne egkevag-et ke hinawa ran te edtuman dut te ibpehelevek kandan te Eleteala. Ugaid ne embiya kenà kew ebpemineg te suhù dan, ne egkerehenan dan ne warà keupianan ne egketelimà niyu.

<sup>18</sup> Ne kenà kew ed-engked te kebpeneningeni niyu kenami. Melintad se hinawa rey su warà netuean dey ne mid-ulaula rey ne meraat, ne iyan dey kiyug ne layun ki metidtu rut te ulaula tew.

<sup>19</sup> Ne ebuyuen ku keniyu te ipeningeni a te Eleteala te mehaan ku kebpekeuli keniyu te keniyu.

#### *Ubpu te Surat*

<sup>20-21</sup> Ne ke Eleteala ke mibanew ki Hisu Kristu rut te kinepatey rin, ne sikandin en ke pinekemepurù ne egkeunutan tew ne iring sikandin te tumetuganur dut te sikitew ne bilbilili rin. Su ke lengesa rin ne impetudà ketà te kinepatey rin diyà te pinebelavag ne kayu ne arà ke tuus dut te behu ne pasad te Eleteala keytew, ini se pasad din ne warà kegkesembii rin taman te taman. Ne ibpeneningeni ku te Eleteala ne ebehey te melintad ne hinawa, ne ibehey rin kenitew ke langun ne ebpeketavang kenitew te kebpekeiseg te kedtumana tew te kandin ne kiyug. Ne ibpeneningeni ku red dema te sikandin se

edtavang keniyu su apey kew ed-ulaula te ebpekesuhat te hinawa rin ibpepevayà dut te tavang ni Hisu Kristu keniyu. Ketà be ne edeyù kiyu ki Hisu Kristu taman te taman. Ne metuman be ini!

<sup>22</sup> Menge suled ku, up-upiani niyu te ebpeming ini se migkahi ku ne ibag-et te hinawa niyu su kenà be ini melayat se surat ku.

<sup>23</sup> Iyan dema ibpesabut ku keniyu te si Timoteo, ke suled tew, ne nekeliyu en te kinekevilanggù din. Embiya mehaan ne ebpekeuma sikandin kayi, ne edumaan ku sikandin te ebpengkeniyan a te keniyu.

<sup>24</sup> Ne penudtuli niyu ke langun ne ebpeneheewit te menge mibperetiyaya riyà wey langun ne menge etew te Eleteala ne ebpengpengingsà key kandan. Ini se menge ruma tew te ebperetiyaya ne riyà ebpuun te Italya ne ebpengpengingsà dema keniyu.

<sup>25</sup> Iyan ku kiyug ne langun niyu ne ebpekeheram te tavang te Eleteala.

## Ke Surat Ni Santiago

<sup>1</sup> Siaken ini se edsurat ne si Santiago. Sugsuhuen a te Eleteala wey ke Kerenan tew ne si Hisu Kristu.

Edsuratan ku sikiyu, ke langun ne minge Hudiyenen ne mibperetiyya ki Hisu Kristu ne nekesivurak kayi te ampew te dunya ne ebpengingsà a keniyu.

*Ini ne Mekeatag te Kedtigker ta te Kemerehenan su apey Ed-iseg ke Peretiyya Ta*

<sup>2</sup> Menge suled, misan merakel ne kemerehenan ne ebpekeuma riyà te keniyu ne pekehalew kew,

<sup>3</sup> su netuenan niyu ne ini se kemerehenan ne penggeram dut te peretiyya niyu su apey ebmevajer ke hinawa niyu te kebmetigker.

<sup>4</sup> Na peketigker kew nevenar su apey mevag-et ke kebperetiyya niyu. Su embiya ini se ed-ul-ulaan niyu, ne kenà kew ebpekesurang ne warà idsawey keniyu su metua en ke peretiyya niyu wey warà kurang te ulaula niyu.

<sup>5</sup> Ugaid ne embiya duen kenyan te keniyu egeram te kemerehenan su kenà din egketuenan ke engkey se meupiya ne ed-ul-ulaan din, ne mebuyù sikandin te Eleteala te behayi te ketampas te pegitungan din. Su ke Eleteala se ebehey te langun ne etew ne ebuyù kandin, su metulanged sikandin ne ebehey ne kenà din dema ebpegkeyaan sikandan.

<sup>6</sup> Ne embiya ruen ebuyuen niyu te Eleteala, ne kenà eduwaruwa se hinawa niyu ugaid ne peretiyya wey te ebhayan kew te Eleteala dut te ebuyuen niyu. Su ke etew ne eduwaruwa se hinawa rin ne edsambisambi ke itungan din iring te baleg te rahat ne edumaruma te keramag piya endei edsamber.

<sup>7-8</sup> Ne embiya iring ketà, ne duwaruwa rema se peretiyya rin wey kenà egkeserihan ke langun ne ed-ul-ulaan din. Ne kunaan din ke ebhayan te Eleteala.

*Ini ne Mekeatag te Kehelawan dut te Ayuayu wey Kewasa*

<sup>9</sup> Ne sikiyu ne minge ayuayu ne mibperetiyya ki Hisus ne galewhalew kew su mibelielehà kew riyà te etuvangan te Eleteala.

<sup>10</sup> Engketà ded dema ke sikiyu ne minge kewasa ne mibperetiyya, iyan meupiya ne egkehalew kew embiya ebpendereiseken kew te Eleteala, su ke Eleteala se serihì niyu ne kenà ke kewasai niyu. Su ke kewasa ne etew ne mehaan egkeawà iring dut te kevukaran te sagbet ne mehaan ne egkeleyùlù.

<sup>11</sup> Su embiya egkevuntarà te mèmeinit ne andew, ne egkehangu en ke sagbet ne egkepadpad en ke kevukaran din ne neawà en ke keupiya rin. Iring be imbe kayi te egketemanan dut te kewasa ne etew, su gewii ran te ebpegelep te kekewesai ran ne egketekew se kemetayen dan ne langun ne kearen dan ne egketahak en.

*Ini ne Mekeatag te Ebpuunan te Kebpenggeram kenita*

<sup>12</sup> Na ke etew ne misan ebpekeanuyanuy te kemerehenan ne eduma red lavew te Eleteala, ne sikandin ne ruen kehelawan din. Su netuenan din se egkeipus ke kedtigker din te kemerehenan, ne ebpeketalimà te lalew rin ne arà se umur ne warà edtemanan din ne impasad dengan te Eleteala dut te langun ne egkelimù kandin.

<sup>13</sup> Ugaid ne embiya ruen etew ne ebpenggeraman te ed-ulaula te meraat su atag dut te kemerehenan ne ebpekeuma kayi te kandin, ne kenà din kehiya se egenat te Eleteala ini se ebpenggeram kandin. Su kenà ebpenggeraman ke Eleteala, ne kenà sikandin dema ebpenggeram te misan engkey ne etew.

<sup>14</sup> Su iyan ebpenggeram te etew te ed-ulaula te meraat ne ke kiyug din ne meraat ne iyan ebpekelitag kandin.

<sup>15</sup> Ne embiya edumaan din arà se kiyug din ne meraat, ne ebpekevaal sikandin te salà. Ne embiya edsaup pà maa ebaal te salà, ne iyan din egketemanan se edusaan sikandin te Eleteala taman te taman.

<sup>16</sup> Na minge suled ne igkelimù ku, kenà kew pegitung te Eleteala se ebpeketuyuk te etew te ked-ulaula te meraat, su kenà benar arà.

<sup>17</sup> Su iyan ebehey ke Eleteala te kenà meraat, su nasi pà te langun ne meupiya. Ne warà dema kurang te ibehey rin su langun ne riyà ebpuun te Eleteala ne riyà te langit. Ne sikandin se midlimbag te langun ne edsilà diyà te langit. Ne misan edsambisambi dan se edsilà diyà te langit, ne ke Eleteala ne kenà ebparin misan deisek dà su warà ebpekeralung te keupiya rin, ne langun ne ibehey rin ne meupiya.



<sup>18</sup> Ne sabap dut te kandin ne kiyug ne ebeluyen ki rin ne anak din ketà te kebperetiyyaya ta te benar ne impenurù din. Ini se mid-ulaula rin su apéy ke sikita se belielehà dut te langun ne midlimbag din.

*Ebperumaruma kiyu te Lalag te Eleteala ne Egkeringeg Tew*

<sup>19</sup> Menge suled ne igkelimù ku, tentenuri niyu ini. Iyan meupiya ne langun niyu ne tegtehami niyu te ebpemineg ke lalag te Eleteala. Ne iyan meupiya ne kenà kew pà edtekew edlalag su pigitunga niyu pà, na kenà kew melemu ne egkeepes.

<sup>20</sup> Su embiya edlanget se etew, ne kenà ebpekeruma dut te metidtu ne ulaula ne ebpekesuhat te Eleteala.

<sup>21</sup> Tembù be id-awà niyu ke langun ne meredsik ne netahù te itungan niyu wey ke meraat ne ulaula niyu. Ne ipeembavà niyu ke hinawa niyu su apéy ke lalag te Eleteala ne intahù din te hinawa niyu ne mibperetiyyaya niyu se egkerumaan niyu, su ini se ebpekepeliyu keniyu rut te salà niyu.

<sup>22</sup> Na dumai niyu nevenar ke lalag te Eleteala. Su embiya ebpemineg kew rà ne kenà kew eduma, ne egkeekalan kew te hinawa niyu.

<sup>23</sup> Su embiya ruen etew ne matag dà ebpemineg dut te lalag te Eleteala ne kenà din edumaan, ne iyan din egkeiringan se etew ne ed-aalung dut te pehelungan,

<sup>24</sup> ne iyan din dà kegkekita dut te paras din se ebpepehalung pà, ugaid ne mid-awà dà ne nelipatan din en ke paras din. Iring ketà se etew ne ebpemineg te lalag te Eleteala ugaid ne kenà ma eduma.

<sup>25</sup> Ugaid ne ke etew ne ebpemineg dut te impemandù te Eleteala ne kenà din egkelipatan su edumaan din iya, ne arà imbe ke etew ne egketevangan te Eleteala te piya engkey ne ed-ul-ulaan din. Su ke impemandù te Eleteala ne meupiya nevenar, ne ini se ebpekepeliyu kenitew wey iyan edtavang te kenà tew kebpekedsalà.

<sup>26</sup> Na embiya ruen etew ne egkahi te eduma te Eleteala ugaid ne kenà ed-uram te kedlalaglalag din, ne warà atag din se kinekahi rin te eduma te Eleteala su nelimbungan din ke hinawa rin.

<sup>27</sup> Su ke etew ne edtelimà dut te Amey tew ne Eleteala ne metidtu nevenar se kebperetiyyaya rin ne arà imbe ne etew ne metau ne edtavang te menge ilu wey ke menge balu ne egkerehenan. Ne kenà dema sikandin eduma rut te meraat ne ed-ul-ulaan te menge etew kayi te ampew te dunya.

## 2

*Kenà Meupiya ne ke Ked-elit-elit ta te Menge Etew ne Kenà Ebpeked-iring*

<sup>1</sup> Menge suled, sikiyu ne mibperetiyyaya en ki Hisu Kristu ke Kerenan tew ne mepmepurù, ne kenà meupiya ne ke ked-elit-elit niyu te langun ne menge mibperetiyyaya ne kenà megidsan misan ayuayu etawa kewasa.

<sup>2</sup> Upama ke ruen edlusud te kevruran niyu te ebpengeningeni te Eleteala ne kewasa ne etew ne ebevelegkas te meupiya wey edsising te bulawan, ne egkeiseg-iseg ne ruen ayuayu ne edlusud dema ne ebevelegkas te ebpndriteyritey,

<sup>3</sup> ne embiya ed-el-eliten niyu arà se mibevelegkas te meupiya ne egkahi te, "Kayi ka pinuu te meupiya ne ebpinnuwan," ugaid ne ke ayuayu ne egkahi ka te, "Itindeg ka riya etawa pinuu ka kayi te saag ne uvey te ebpinnuwan ku,"

<sup>4</sup> na embiya ini se ed-ul-ulaan niyu, ne meraat arà su ke ked-elit-elit niyu te menge ruma niyu ne mibperetiyyaya ne warà meked-iring su kunaan niyu ke kewasa ne etew ne iyan pà belielehà dut te ayuayu. Ne ini se mid-ulaula niyu ne ebpuun arà te meraat ne itungan niyu.

<sup>5</sup> Na menge suled ku ne igkelimù ku, pemineg kew kayi te egkehiyen ku. Misan ke kearen dut te menge ayuayu kayi te ampew te dunya ne reisek dà, ne sikandan dema iya ke menge etew ne nepemili te Eleteala su apéy ke sarig dan kandin ne edekdekelà, ne sikandan dema se edlusud dut te Edetuan din su ini se impasad din dut te langun ne egkelimù kandin.

<sup>6</sup> Ugaid ne sikiyu, ne warà niyu el-elita ke menge ayuayu su iyan niyu ed-el-eliten ke menge kewasa. Meambe warà niyu metenuri te ke kewasa se mibpenlupig keniyu wey mid-ewit keniyu diya te kukuman?

<sup>7</sup> Ne sikandan se ebpennalag te meraat mekeatag ki Hisu Kristu ke Kerenan tew ne igkelimù tew.

<sup>8</sup> Na iyan meupiya ne ed-ul-ulaan niyu ne edumaan niyu ke dekelà ne penduan te Eleteala ne impesurat din ne egkahi te, "Ikelimù nu ke ruma nu iring ded te kegkelimù nu te hinawa nu."

<sup>9</sup> Ugaid ne embiya iyan niyu ed-el-eliten ne ke kewasa ne etew, ne ke ayuayu ne warà niyu el-elita, ne nekedsalà kew ne egkesuhat kew te kedusa te Eleteala su nekerimpas kew rut te penduan din.

<sup>10</sup> Su ke etew ne eduma te merakel ne penduan te Eleteala ugaid ne nekerimpas sikandin te seveka rà, ne nekedsalà sikandin diyà te etuvangan te Eleteala iring dut te etew ne nekerimpas te langun ne penduan.

<sup>11</sup> Su migkahi ke Eleteala dut te penduan din te, “Kenà ka edlangkadlangkad te esawa nu,” ne migkahi red maa te, “Kenà ka imatey.” Misan warà ka medlangkadlangkad te esawa nu ugaid ne nekepatay ka, ne nekesalà ka ne nekerimpas ka rut te penduan te Eleteala.

<sup>12</sup> Tembù be uram kew te kedlalaglalag niyu wey ke ulaula niyu apey kew kenà ebpekerimpas te penduan din. Su ke penduan te Eleteala se ebpekepeliyu te etew te salà din. Ne Eleteala se egkukum te langun ne etew keuremà mekeatag te keduma ran te penduan din, ne iyan din igkukum ne ke kandin ded ne penduan.

<sup>13</sup> Ne ketà te kegkukum te Eleteala te langun ne etew ne kenà din igkeyru ke etew ne warà meyrù te minge ruma rin kayi te ampew te dunya. Ugaid ne ke etew ne egkeyru nevenar te minge ruma rin ne kenà egkeandek te Eleteala ne egkukum kandin.

*Tidtu ne Peretiyaya ne Egkekita kayi te Ulaula Ta*

<sup>14</sup> Menge suled, embiya ruen etew ne egkahi te mibperetiyaya rin si Hisu Kristu ke Kerenan tew ugaid ne kenà egkekita kayi te ulaula rin, ne warà atag din arà te kinekahi rin te mibperetiyaya rin su arà se kegkahi rin te mibperetiyaya sikandin ne kenà ebpekegaga ne ebpekiyu kandin dut te salà din.

<sup>15</sup> Upama ke ruen minge ruma nu ne mibperetiyaya ne egkerehenan su warà belegkas dan wey warà egkeakaan dan,

<sup>16</sup> ne ebpendiyà ka se egkahi te, “Kerenan en se metau keniyu! Kukumbalà kew su apey kew kenà egkeadsil ne kaankaan kew!” Na embiya iring ketà se migkahi nu kandan ugaid ne warà ka medtavang te kerehenan dan, ne warà ded atag din arà te kinekahi nu.

<sup>17</sup> Ne iring ded dema ke kedsarig tew. Embiya egkahi ki te ebperetiyaya ki te Eleteala ugaid ne kenà egkekita kayi te ed-ul-ulaan tew, ne kenà benar arà se peretiyaya tew.

<sup>18</sup> Na kema ke ruen egkahi te, “Senge etew se ebperetiyaya te Eleteala su apey ebpekeliyu, ne seveka se ed-ulaula te meupiya su apey ebpekeliyu.” Ugaid ne ini se tavak ku ketà te etew ne edlalag te iring ketà. Iyan meupiya ne ebperetiyaya ki, ugaid ne kenà tidtu se peretiyaya ta embiya kenà egkekita kayi te ed-ul-ulaan ta. Iyan meupiya ne ibpekita ta ini se peretiyaya ta ibpepevayà dut te meupiya ne ed-ul-ulaan ta.

<sup>19</sup> Embiya egkahi ka te mibperetiyaya ke en te sebseveka rà ke Eleteala ne meupiya arà, ugaid ne kunaan nu ke ebperetiyaya nu se ebpekegaga. Misan ke busew ne ebperetiyaya ne egkerkeren dan te kegkeandek dan kandin, su netuenan dan se edusaan dan pà te Eleteala.

<sup>20</sup> Kenà metau ne ebpegitung ke etew ne edlalag te iring ketà! Ebpe sebutan ku pè be sikiyu kayi te ebperetiyaya ta, embiya kenà egkekita ibpepevayà te ulaula ne meupiya, ne warà rantek dìn ke peretiyaya ta.

<sup>21</sup> Tentenuri nu ke apù tew rangen ne si Abraham su nevaluy sikandin ne metidtu diyà te etuvangan te Eleteala su ke mid-ulaula rin, su midumaan din nevenar ke insuhù te Eleteala kandin ne indenà din ke anak din si Isaac diyà te ebpelengesaan te minge binatang ne ibehey ran te Eleteala.

<sup>22</sup> Kayi ta ve imbe egketueni se tidtu se peretiyaya ni Abraham su impekita rin kayi te mid-ulaula rin. Ne ini ve se kineduma rin dut te kiyug te Eleteala se kinemevaher te sarig din.

<sup>23</sup> Ketà be ne ke lalag te Eleteala ne impesurat din dengan ne netuman en, ke sikandin te, “Mibperetiyaya si Abraham te edtumanen te Eleteala ke impasad din kandin, tembù be nevirang te Eleteala si Abraham ne metidtu.” Ne arà imbe se kineingerani kandin te sepekat te Eleteala.

<sup>24</sup> Ketà ne nesebutan ta te ke etew ne metidtu diyà te etuvangan te Eleteala ne arà se etew ne eduma te lalag din. Su riyà te Eleteala ne arà se egkahi ki te ebperetiyaya ki ne kenà ebpekegaga embiya kenà egkekita kayi te ed-ul-ulaan tew.

<sup>25</sup> Iring ded dema ketà ke sarig ni Rahab ke sundal ne meritan dengan. Mibmetidtu sikandin diyà te etuvangan te Eleteala su sabap dut te meupiya ne ulaula rin su mibpepemenayik din ke deruwa ne suhù ni Josue ne nekeuma su edsirib te inged din ne Hiriku, ne midtevangin din sikandan apey ran ebpekepelelahuy se ed-uli ibpepevayà te sengebias ne ralan.

<sup>26</sup> Na ini se kebperetiyya tew te Eleteala ne iring te lawa te etew, su embiya warà hinawa rin ne warà atag din su minatey. Iring din ded dema se peretiyya tew, su embiya warà ed-ul-ulaan tew ne meupiya ne edruyud te peretiyya tew ne warà atag din ke peretiyya tew.

### 3

#### *Ini ne Mekeatag te Kebpengahikahi ne Erangan*

<sup>1</sup> Menge suled, iyan meupiya se kenà merakel keniyu se egkesuat ne ebpenurù, su netuenan tew te sikami ne ebpenurù ne embiya kenà ebpekeruyud ke ulaula rey dut te ibpenurù dey ne iyan pà dekelà se kekkukum te Eleteala kenami.

<sup>2</sup> Na sikitew ne menge etew, merakel se ibpevyà te kegkesayep tew su layun ki ed-ulaula te meraat wey ebpengahikahi te meraat. Ugaid ne embiya ruen etew ne kenà egkesayep se kebpengahikahi rin ne warè en idsawey kandin su metau en sikandin ne ed-erangan te langun ne ed-ul-ulaan din.

<sup>3</sup> Pegpegitunga niyu ke kudà su misan dekelà se lawa rin ne eduma te etew piya endei ta ibpepevyà su arà se reisek ne kakang ne ingkakang kayi te bèbà din.

<sup>4</sup> Ne engketà ded dema ke kapal ne diyà te rahat. Misan dekdekelà ne kapal ne egkeewit dut te mevandes ne keramag, ne egketandang te etew se ibayà din su ibpepevyà ketà se reisek ne pura ne ibpengulin piya endei se kiyug dut te kepitan ne ebpesineruwan.

<sup>5</sup> Iring din ded be rema arà se rilà te etew, su misan deisek ini kayi te lawa ta, ne pulù nedantal se kebpengahikahi.

Pegpegitunga niyu ma ini te misan meluag ke ketelunan, ne langun din ne egkevinsulan dut te reisek dà ne apuy.

<sup>6</sup> Na, iring te apuy ini se dilà te etew. Su ke dilà ta se ebpuunan te langun ne edsusunan te meraat ne ebpekereraat kenitew. Misan deisek nevenar ke dilà kayi te lawa ta, ne embiya edlalag te meraat ne ebpekereraat te itungan wey hinawa ta. Igenat te batà ki pà taman te hewii te kebpatay ta, ne ini se dilà ta se ebpekegaga ne ederaat kenita, su iring te apuy ne riyà ebpuun te apuy nerakà.

<sup>7</sup> Netuenan ta te ke etew se ebpekelayam te langun ne susunan te binatang kayi te ampew te dunya, su ruen merakel ne leew ne binatang wey merakel ne pepenuk wey merakel ne serà wey misan menge uled ne nelayamen te etew.

<sup>8</sup> Ugaid ne warà etew ne ebpekegaga ne ed-eren te dilà din. Su ini se dilà ta ne ebpekeiring te bisa dut te uled ne ebpekepatey, ne kenà edsanggal se kebpengahikahi rin te meraat.

<sup>9</sup> Ini se dilà ta se ebales te kebpeselamat ta te Amey tew ne Eleteala ne ke Kerenan tew riyà te langit, ne ke dilà ta red maa se ebales te kebpenrawak ta te ruma ta misan Eleteala se midlimbag kandan iring te paras din.

<sup>10</sup> Iyan din meana ne kayi ebpuun te sebseveka ne bèbà ne egemew ke lalag ne ebpeselamat ki te Eleteala wey ke lalag ne ebpenrawak ki te ruma ta. Menge suled, kenà meupiya arà!

<sup>11</sup> Su upama ke tuhanan, ne kenà egkepakey ne ruen mepait wey meremismis se edtevir ne wayig ketà.

<sup>12</sup> Iring ded dema dut te merakel ne edsusunan te kayu. Su upama ke manggà ne kenà ebehas te kelemunding. Engketà ded dema ke beyabas, kenà ebehas te berungkut. Ne iyan pè be iya ke tuhanan ne mepait kenà edtevir se meemis ne wayig.

#### *Ini ne Mekeatag te Metampas ne Itungan ne Riyà Egenat te Eleteala*

<sup>13</sup> Ne embiya ruen etew riyà te keniyu ne metampas wey dekelà se netuenan din, ne iyan meupiya se ibpekita rin ini se egenat te meupiya ne ed-ul-ulaan din ne edumaan te kebpeembavà te hinawa rin. Su kayi ve imbe egkekita se dekelà se netuenan din.

<sup>14</sup> Ugaid ne embiya egkesihi ke etew wey mepereyù, ne kenà meupiya ne ibpendantal din mekeatag dut te meupiya ne ulaula rin wey ke dekelà ne nesebutan din su teruen sikandin wey nekerimpas sikandin dut te tidu ne penurù.

<sup>15</sup> Ne embiya iring ketà, ne kenà arà se metampas ne itungan ne riyà ebpuun te Eleteala, ugaid ne riyà ebpuun te datù te pekaid wey ke itungan te etew rà dè duen kayi te ampew te dunya ne kenà ebperetiyya te Eleteala.

<sup>16</sup> Su embiya ruen etew ne egkesihi wey mepereyù, ne arà se puunan te kegkehuvar wey merakel ne meraat ne ulaula.

<sup>17</sup> Ugaid ne ke etew ne riyà ebpuun te Eleteala se ketampas din, ne arà se etew ne metidtu diyà te etuvangan te Eleteala. Mehalewhalew se hinawa rin dut te menge ruma rin, melimù sikandin, ne laus ne edsepekat. Igelimù din ke menge ruma rin, ne layun

meupiya se ed-ul-ulaan din diyà te kandan. Warà ebpelebieh din su negidsan se ulaula rin dut te langun. Ne kenà asal-asal dà se peretiyaya rin su tidtu se hinawa rin.

<sup>18</sup> Ne ini se meupiya ne ulaula ne ebpekesuhat te hinawa te Eleteala, iring arà dut te bahas dut te impemula te etew ne ebped-ulit te minge ruma rin su apey ke ked-ubpà dan ne merinew.

## 4

*Kenà kiyu Eduma te Kiyug te Menge Etew ne kayi rà te Ampew te Dunya ne Egkunterà te Eleteala*

<sup>1</sup> Na duen minge etew kenian te keniyu ne ebpemekidrimbur wey ebpekidlewaney. Ne igkahi ku keniyu ke endei ebpuun ini, su ini ne ebpuun te kiyug te lawa niyu te ed-erehey rà kayi te ampew te dunya ne egkunterà te kiyug niyu te ebpekesuhat te hinawa te Eleteala.

<sup>2</sup> Su upama ke ruen igkesuati niyu nevenar ugaid ne kenà niyu egkekuwa, ne ebpebpatey kew en. Ne embiya kenà niyu egkekuwa ke igkeima niyu dut te minge ruma niyu, ne egkeepsan niyu wey edrimburen niyu. Iyan niyu kenà kebpekekuwa su kenà niyu ebuyuen te Eleteala.

<sup>3</sup> Ne misan Eleteala se ebuyuan niyu, ne kenà kew ebehayan su kenà meupiya se ebpeetahan niyu su ke ebuyuen niyu ne ibpatà niyu rà te nanam.

<sup>4</sup> Meraat kew ne minge etew su mid-awà kew te Eleteala iring dut te etew ne ed-awà te esawa rin su apey ebpengingniyug! Meambe ke warà niyu metueni te ke etew ne eduma rut te meraat ne kiyug te minge etew kayi te ampew te dunya, ne arà se etew ne egkunterà te Eleteala? Ketà be ne piya engkey ne etew ne egkiyug ne eduma rut te meraat ne ulaula te minge etew kayi te ampew te dunya, ne egkevaluy sikandin ne kunterà te Eleteala.

<sup>5</sup> Kenà niyu pegitunga te kenà benar ke lalag te Eleteala ne impesurat din ne egkahi te, "Ke hinawa ne imbehey te Eleteala kenitew rengan, ne nevaluy ne igkesuat din se meraat ne ulaula."

<sup>6</sup> Ugaid ne ke kedtavang te Eleteala kenitew ne mevaher pà su apey ki kenà ebpekeruma dut te meraat ne kiyug te lawa tew. Su ruen dema ini se lalag din ne impesurat din ne egkahi te, "Egkunteraan te Eleteala ke etew ne mepereyù, ugaid ne edtevangin din ke etew ne ebpeembavà te hinawa rin."

<sup>7</sup> Ketà be ne perumaruma kew nevenar te Eleteala. Ne embiya kenà niyu ibpememantag ke datù te pekaid, ne ebpekepelahuy sikandin.

<sup>8</sup> Embiya ed-uvey kew te Eleteala, ne iring ded dema ketà ke ked-uvey rin keniyu. Sikiyu ne mekesesalà, ne engkeri niyu ke ed-ul-ulaan niyu ne meraat. Ne sikiyu ne asal-asal dà ne ebperetiyaya, ne peketidtuwa niyu ke hinawa niyu te kebperetiyaya.

<sup>9</sup> Iyan meupiya ne keuru kew wey sinehew kew rema su atag dut te meraat ne neveelan niyu. Kenà kew ed-engit, ugaid ne sinehew kew. Uya, kenà kew egalew, ugaid ne rungkug kew.

<sup>10</sup> Su embiya ibpeembavà niyu ke hinawa niyu riyà te Eleteala ne sikandin se ebpuurù keniyu.

*Ini ke Imbaag ni Santiago Mekeatag te Kedsawey ta te minge Ruma ta ne Mibperetiyaya*

<sup>11</sup> Minge suled ku, kenà kew ebpeserserupetey su ke etew ne edseserupet wey ebpendeisek te ruma rin ne mibperetiyaya, ne timbang te ebpendeiseken din ke dekelà ne penduan te Eleteala. Ne embiya ebpendeiseken niyu ke penduan te Eleteala, ne kenà kew ebperumaruma te suhù din su iring kew te iyan ebayàbayà dut te penduan.

<sup>12</sup> Na seveka rà se ebpuunan te penduan ne ke Eleteala rà, ketà be ne sikandin ded ke egkukum te langun ne minge etew. Ne sikandin dà se ruen gehem din te kedusa etawa kebpeleyi te minge etew. Tembù be sikitew ne warà ketengdanan tew te egkukum wey edsawey te ruma ne etew.

*Ini ke Imbaag ni Santiago Mekeatag te Kedantal Ta*

<sup>13</sup> Na embiya ruen diyà te keniyu ne egkahi te, "Guntaan etawa keremà ne ebpendiyà key te senge inged su ebpendahang key taman te senge rahun apey key ebpekeuntung," na pemineg kew kayi te egkehiyen ku.

<sup>14</sup> Kurang kew pà te pegitungan niyu, su warà etew ne raan din en ne egketueanan ke engkey se egketemanan din keremà. Su ke umur tew kayi te ampew te dunya ne edsahad dà su iring dut te sehulapun ne egkekita te mehaan ne iseg-iseg dà ne warà en.

<sup>15</sup> Iyan på meupiya ne egkehiyen niyu arà se, “Embiya edluhut ke Eleteala ne biviyag ki på ne egketuman ini se ed-ul-ulaan dey.”

<sup>16</sup> Ugaid ne sikiyu mulà ne minge mepereyù su idantal niyu ke ed-ul-ulaan niyu. Ne meraat arà se idantal niyu diyà te etuvangan te Eleteala.

<sup>17</sup> Tentenuri niyu ini se egkehiyen ku te embiya ruen etew ne netuenan din ded ke engkey se kiyug te Eleteala kandin ugaid ne warà din ul-ulaa, ne nekedsalà sikandin diyà te etuvangan te Eleteala.

## 5

### *Ke Ibpenerù ni Santiago dut te Menge Etew ne Kewasa*

<sup>1</sup> Na sikiyu ne minge kewasa, pemineha niyu ini se egkehiyen ku. Peninehew kew wey penderawit kew su ke kemerehenan ne ebpekeuma kenyan te keniyu ne rekela.

<sup>2</sup> Su ke kearen niyu ne egkereetan wey ke belegkas niyu ne egketketen te kekava.

<sup>3</sup> Ne misan ke bulawan wey pirak niyu ne edtengisen su tuus te salà niyu su midtibpes niyu rà. Ne arà se ederaat keniyu iring dut te etew ne egketutung te apuy. Midrerapug kew te rekela ne kearen ketà te kegkepupus te dunya.

<sup>4</sup> Midlimbungan niyu ke minge etew ne egelevék diyà te pengengewiran niyu su warà niyu mesukayi sikandan. Menu, nerineg niyu ke pemivihan dan? Ne ini se ebpengehani keniyu, ne ke Kerenan ne Eleteala ne mekegehem se nekerineg te id-isuhat dan keniyu.

<sup>5</sup> Sikiyu ne minge kewasa, ne warà kurang niyu su ebpekegaga kew te piya engkey ne kiyug niyu wey ke ked-ubpà niyu kayi te ampew te dunya ne meupiya nevenar. Ugaid ne iring kew te binatang ne impelambù su edsumbelien su kunaan niyu ne ke kedusa te Eleteala ne kenà ebpekeuma riya te keniyu.

<sup>6</sup> Ne misan ke minge metidtu ne etew ne mid-ewit niyu diyà te kukuman ne mid-isuhat niyu sikandan su apey ran edusai. Ne ruen mid-imetayan niyu misan warà dan med-atu.

### *Ini ne Mekeatag te Kedtigker te Kemerehenan*

<sup>7</sup> Na minge suled ku, tigkeri niyu ke minge kemerehenan taman te kedlived te Kerenan tew. Pegitunga niyu ke etew ne ebasuk su edtigkeran din se edtahad taman te edseppet arà se impemula rin su berepantag diyà te kandin. Edteharan din ke uran ne ebpetuvù te pinemula rin, ne edteharan din dema se kebmetsan te pinemula rin su apey rin ed-eheniyen.

<sup>8</sup> Ne sikiyu rema, ne peketigker kew te kedtahad dut te kedlived ni Hisus. Beg-eta niyu ke kebperetiayaya niyu su ke Hewii te kedlived te Kerenan tew ne mehaan en.

<sup>9</sup> Menge suled ku, kenà kew pepempemivihey su apey kew kenà edusai te Eleteala. Mehaan en ebpekeuma ke egkukum su iring te edtiviltivil en an te gumawan.

<sup>10</sup> Na minge suled ku, pegitunga niyu ke minge ebpelambas te lalag te Eleteala ringan. Misan ke Kerenan ne Eleteala se midsuhù kandan te ebpemenudtul te lalag din, ne merakel se kemerehenan ne midtigkeran dan. Na, iringi niyu ve rema ke kedtigker dan.

<sup>11</sup> Ne netuenan tew te nehalew ran mulà su midtigkeran dan ke kemerehenan dan. Ne netuenan niyu rema ke kinetigker ni Job dut te kemerehenan din, ugaid ne warà medlugkà ke sarig din. Ne ketà te kegkeipus ke kemerehenan din, ne meupiya se imbehey te Eleteala kandin su impékita rin ke kegkeyru rin wey ke tavang din su iring ketà ke ulaula te Eleteala dut te minge etew ne edsarig kandin.

<sup>12</sup> Na minge suled ku, ini se dekelà dut te langun ne suhù ku keniyu. Kenà kew edsesapà. Embiya ruen ibpasad niyu te minge ruma niyu, ne kenà kew edsesapà te langit etawa tanà etawa piya engkey en, su langun ne lalag niyu ne tidtuwa niyu. Kehiya niyu rà se “Uya” etawa “Kenà” su apey kew kenà egkeumai te kedusa te Eleteala.

<sup>13</sup> Na embiya duen diyà te keniyu egkerehenan, ne iyan meupiya ne ebpengeeningeni sikandin te Eleteala. Ne embiya ruen egkehalew, ne iyan meupiya ne ebpembeyveyuken din te kebpeselamat din te Eleteala.

<sup>14</sup> Ne embiya ruen ederaru, ne iyan meupiya ne ed-engayen ke minge pekilukesen dut te langun niyu ne minge mibperetiayaya kenyan su apey ran ebpengeeningeni sikandin, ne edsepuwan dan te lana sikandin gewii te ebpengeeningeni ran wey edtawag dan te ngaran te Kerenan.

<sup>15</sup> Ne ini se kebpengeeningeni ran ke embiya tidtu se kedsarig dan se igkeulii te ederaru, su ke Kerenan ne Eleteala se ebawì kandin. Ne embiya duen salà ne neveelan din, ne ebpeseharen en te Eleteala.

<sup>16</sup> Ketà be embiya ruen salà nu ne mibeelan nu te ruma nu, ne idtarem nu kandin su apey rin egkepesehad ke salà nu. Ne pengeeningeni kew rema te minge ruma niyu su

apey ke etew ne ederaru ne meulii. Su ke kebpengeningeni rut te etew ne metidtu diyà te etuvangan te Eleteala ne ebpekegaga nevenar.

<sup>17</sup> Pegitunga niyu si Elias dengan. Misan etew rà sikandin iring kenitew, ne mibpengeningeni sikandin te midsepuntung din se hinawa rin te kenà med-uran ne warà dema med-uran lusud te tetelu ne rahun wey tengà.

<sup>18</sup> Netaman ne mibpengeningeni maa sikandin medsaup su apey ed-uran, ne ketà ne mid-uran te merehes ne nengeuyag ded ini se pinemula.

<sup>19</sup> Menge suled ku, embiya ruen etew riyà te keniyu ne nekesuwey rut te tidtu ne penurù, iyan meupiya ne ruen etew ne edtavang kandin su apey ebpekelived ded sikandin te tidtu ne penurù.

<sup>20</sup> Ne tentenuri niyu ini se egkehiyen ku. Embiya edtevangannu nu ke etew su apey rin ed-engkeri se keduma rin te meraat, ne ibpepeliyu nu sikandin su apey kenà edusai taman te taman. Ne egenat ketà, ne Eleteala se ebpehad dema dut te merakel ne salà din.

## Ke Neuna ne Surat Ni Pedro

<sup>1</sup> Siaken si Pedro ne edsurat kayi. Ne epustul a ni Hisu Kristu ne iyan din meana ne kedserihan a nikandin. Ne idsurat ku ini riyà te keniyu ne minge mibperetiya ki Hisu ne nepemili te Eleteala ne nekesivurak diyà te minge inged ne Puntu, ne riyà te Gelasiya, Kepedusiya, Asiya wey Bitanya.

<sup>2</sup> Su rangen ne nepemili kew te Eleteala ke Amey tew su ini se netahù te itungan din. Nepemili kew nikandin ne egkevaluy ne minge etew rin ne lunsey se hinawa ran egenat te gehem te Kedesenan ne Ebpetuntul te Menusiya. Ne iyan din kebpmili keniyu su apew kew egkevaluy ne minge etew ne eduma ki Hisu Kristu ne ebmetilak ke hinawa niyu rut te lengesa rin ne impetudà din keniyu ketà te kinepeimatey rin su apew egkeawà ke salà niyu.

Iyan ku ibpengeningeni ne ebpeneuven kew nikandin wey ebmelintad nevenar se hinawa niyu.

*Ini se mekeatag te kenà eduwaruwa se Hinawa ta te Kebperetiya tew*

<sup>3</sup> Ne edeyuen tew ke Eleteala ke Amey rut te Kerenan tew ne si Hisu Kristu. Dekelà se kegkeyru rin keyta su egenat te kebanew rin ki Hisu Kristu ne mibehayan kiyu rin te behu ne umur ne nevaluy ki ne minge anak din. Tembù be ruen ebpeneregen tew ne egkevanew ki red te Eleteala ne ebeyahan te umur ne warà edtemanan din diyà te ubpaan din.

<sup>4</sup> Ne elin dema egkepenareng tew ini se imegadir te Eleteala ne intail din keytew riyà te langit. Ne ini se keupiya ran ne kenà egkesembian su riyà ne kenà egkereetan, ne kenà egkeawà.

<sup>5</sup> Ne ini se imegadir din ne kenitew en. Ne sabap te kedsarig ta te Eleteala ne ebentayan ki rin egenat dut te gehem din su apew kenà ki ebpemekedsuwey gewii te edteharan tew ini se ibehay rin keyta ketà te mewri ne hewii.

<sup>6</sup> Ne egenat dutun ne egkehalew kew en misan egkemutuwan kew te mehaan guntaani su sabap te merakel ne keresayan ne egketigkeran niyu.

<sup>7</sup> Su ini se keresayan ne iyan ibpenggeram rut te kebperetiya niyu embiya meilit etawa kenà. Su misan bulawan ne ebpenggeraman diyà te apuy su apew egkevaluy ne lunsey ne bulawan ne warà sawug din, ne ini se bulawan ne edsahad dà. Ugaid ne muna pà ne belielehà ini se kebperetiya niyu rut te bulawan. Tembù be embiya meilit pà se kebperetiya niyu rut te kebpenggerami te keresayan ne ebpekeuma riyà te keniyu, ne egkereyù kew wey ibpurù kew te Eleteala ketà te hewii ne edlived si Hisu Kristu kayi te ampew te dunya.

<sup>8</sup> Ne misan warà niyu pà mekita si Hisu ne ikelimù niyu sikandin, ne ebperetiya kew kandin misan kenà niyu egkekita sikandin guntaani. Ne egkekita ini dut te dekelà ne kegkehalew niyu ne kenà egkerepangan wey kenà igkeupama.

<sup>9</sup> Ne iyan kegkeiring ketà su ruen umur ne warà edtemanan din ne egketelimà niyu sabap te mibperetiya kew kandin.

<sup>10</sup> Ini se kebpeiyu keytew rut te kedusa te salà tew ne rangen dà ne nekahi en ini rut te minge ebpelambas te lalag te Eleteala, tembù be layun dan ebppededii te meupiya mekeatag kayi.

<sup>11</sup> Su ruen mibpekietuan kandan neraan dut te Kedesenan ne Ebpetuntul te Menusiya ne riyà ebpuun te ki Hisu Kristu te ruen kemeresayan ne egkeheraman ni Hisu Kristu kayi te ampew te dunya, ne embiya egkeipus arà ne egkekita ini se kebmeperù din. Ne mibpekid-inseey ran te keenu ed-ul-ulaa te Eleteala ini wey engkey se ralan te ini ne egketuman.

<sup>12</sup> Ne mibpekietuan dema te Eleteala dut te minge ebpelambas te lalag din te ini se egked-ulaula ne kenà egketuman dut te hewii ran pà, ugaid ne kayi te sikitew en guntaani ne egketuman ini. Ne benar arà. Su ini se nekahi ran neraan ne ini se Meupiya ne Tudul ne impesabut en diyà te keniyu dut te ini se ebpenemurù keniyu guntaan. Ne ke Kedesenan ne Ebpetuntul te Menusiya ne impepengkayi te Eleteala egenat te langit se ebpesabut kandan te ini se ibpenemurù dan. Ne misan ke minge suluhuen te Eleteala riyà te langit ne egkiyug dan ne egkesebutan ini.

*Ini se Mekeatag dut te Ked-iring tew ki Hisu Kayi te Ed-ul-ulaan tew*

<sup>13</sup> Tembù be iyan iya se ibpenehana tew ke hinawa ta neraan te keduma te suhù te Eleteala. Ne ebpekerumbahat ki rut te langun ne ed-ul-ulaan tew su apew iyan dekelà

te hinawa ta ne ini se meupiya ne ibehey te Eleteala keytew ketà te hewii ne edlived si Hisu Kristu kayi te ampew te dunya.

<sup>14</sup> Ne iyan iya se edtumanen tew ke kiyug te Eleteala su apey kenà ki en edlived dut te meraat ne kiyug te hinawa ta ne nelayaman tew rengan te warà ta pà metueni ke benar ne penurù te Eleteala.

<sup>15</sup> Su ke Eleteala se mibpemili te sikitew ne egkevaluy ne menge anak din. Ne embiya ke Eleteala ne warà nekesawug ne meraat dut te langun ne ed-ul-ulaan din, tembù be iyan iya se warà ebpekesawug ne meraat kayi te ed-ul-ulaan ta.

<sup>16</sup> Su ruen impesurat ne Lalag te Eleteala ne egkahi te,

“Siaken ne warà iya salà ku, tembù be siaken se iringi niyu.”

<sup>17</sup> Ne embiya egkehiyen ta ne Eleteala ke Amey tew ketà te kebpengeningeni tew ne iyan iya se meilit se ked-edati ta kandin taman te ini ki pà te ampew te dunya. Su metidtu se kegkukum din, ne edtuntul te langun ne ed-ul-ulaan tew ne warà ibpelabirin.

<sup>18</sup> Ne netuean ta ne mibelukasan ki te Eleteala rut te kegkeuripen tew te menge ulala tew rengan ne warà rantek din ne intetahak te menge keep-epuan tew. Ugaïd ne sika se imbelukas kenitew ne kenà bulawan etawa pirak ne egkeawà ke elehà din.

<sup>19</sup> Su iyan din imbelukas keytew ne ke impelengesa ne Anak din ne si Hisu Kristu. Ne sikandin ne iring te nati te bilibili ne nepemili dan su warà sarir din ne ibpelengesa ran su ibehey te Eleteala. Ne iring ketà si Hisu Kristu su sikandin ne warà iya salà din.

<sup>20</sup> Ne rengan te warà pà limbaha ke kelibutan ne intail en si Hisu te Eleteala ne ebpeimatey su ebpeiyu keytew rut te salà tew. Ne ketà te nekeuma en ke netendù ne hewii te Eleteala te ed-ul-ulaan din ini, ne nekeuma en sikandin su apey kiyu mevelukasi.

<sup>21</sup> Ne geina te ini se mid-ulaula ni Hisu ne nekeperetiyaya kiyu te Eleteala. Su sikandin ke mibanew ki Hisu wey mibpepurù dema kandin diyà te langit. Tembù be sikitew ne iyan tew ebperetiyayaan wey edserihan ne Eleteala ne ebanew keytew rema keuremà.

<sup>22</sup> Na geina te mibperumaruma ki en dut te tidtu ne penurù ne egkepekey ne meilit se limù tew rut te menge ruma tew te ebperetiyaya su mibmetidtu ke itungan tew. Tembù be ebpeimlimuey ki egenat te hinawa ta ne kenà kayi rà te bèbà ta.

<sup>23</sup> Su ketà te mibperetiyaya ki te Lalag te Eleteala ne nevaluy ki ne anak din su iring te insaup ki in-anak, ne kenà etew se iyan mid-anak kenitew su Eleteala ne warà kemetayen din. Ne ini se behu ne umur ta ne ibpepevayà din ini dut te lalag din ne mibperetiyaya key ne ebpekevehey te umur ne warà edtemanan din wey kenà egkesembian.

<sup>24</sup> Su ruen impesurat ne Lalag te Eleteala ne egkahi te,

“Kenà melayat se umur dut te menge etew, su iring te sagbet ne mehaan ne egkehangu.

Ne ke kevantug din ne iring te kevukaran su kenà meuhet se egkekita nu, ne egkeleyùlù en.

<sup>25</sup> Ugaïd ne ke Lalag te Eleteala ne kenà iring ketà su warà edtemanan din.”

Ne ini se Lalag te Eleteala ke Meupiya ne Tudtul ne iyan impesabut en keniyu.

## 2

<sup>1</sup> Na embiya nevaluy ki en ne menge anak te Eleteala, ne ed-engkeran ta ke langun ne meraat ne ed-ul-ulaan ta. Kenà ki en edtarütaru, kenà asal-asal dà te keupiya ta, ibpekeriyù ta ke kegkesihi, ne kenà ki edlalag te meraat mekeatag te menge ruma ta.

<sup>2</sup> Su embiya iyan ta kiyug ne ed-iseg ini se peretiyaya ta, ne ed-iring ki te deisek ne batà ne layun edsusu su apey edekelà. Ne embiya iring ketà se egkiyuhan ta te ebpengadi ke Lalag te Eleteala ne ebmeilit se kebpertiyaya ta te Eleteala ne mibpeiyu keytew.

<sup>3</sup> Iyan ta ed-ul-ulaan ne iring ketà su neheraman dey ke limù te Eleteala keytew.

*Ini se Mekeatag te Segkad ne Berepantag ne kenà Egkiyuhan te Menge Etew ne Ibpengawid te Baley ran*

<sup>4</sup> Egawed kiyu en rut te Kerenan tew ne si Hisu ne iyan ebehey te umur ne warà edtemanan din. Su sikandin ne iring te pelaus ne intimbag dut te menge ebpevaley su kunaan dan ke warà rantek din, ugaïd ne iyan en iya ini ne pemili te Eleteala ne segkad ne berepantag dut te valey.

<sup>5</sup> Ne sikami ne mibehayan te umur ne warà edtemanan din, ne iring key rema te menge pelaus ne ibpengawid te Eleteala te baley ne ibpeitindeg din. Ne iring key rema te menge terebpelengesa rin ne ebpelengesa su ibehey riyà te kandin. Ne iyan dey



ibehey kandin ne ini se kebpeselamat dey wey ke kedeyù dey kandin, ne edtelimaan din su sabap te ned-ulaula ni Hisu Kristu.

<sup>6</sup> Su ruen impesurat ne Lalag te Eleteala ne egkahi te,

“Duen mibpemili ku ne edatù  
ne iring te pelaus ne berepantag  
ne iyan segkad dut te baley  
ne ibpeitindeg ku riyà te inged ne Siyun.

Ne piya engkey ne etew ne ebperetiyaya kandin  
ne kenà ebpekedsendit dut te kebperetiyaya rin kandin.”

<sup>7</sup> Ne ini se segkad ne mibpemili te Eleteala ne si Hisu Kristu, ne mepmepurù kayi te sikami ne mibperetiyaya kandin. Ugaid ne ke menge etew ne kenà ebperetiyaya kandin ne sikandan se edtuman dut te impesurat ne Lalag te Eleteala ne egkahi te,

“Ini se pelaus ne intimbag dut te ebpemevaley  
su kunaan dan ne warà rantek din,  
ne iyan en iya ini nepemili ne segkad dut te baley.”

*Ini se Mekeatag te Edresayan ta te Ulaula ta ne Meupiya*

<sup>8</sup> Ne ruen dema impesurat ne Lalag te Eleteala ne egkahi te,  
“Ne sikandin ne iring te batu

ne nesitud te menge etew ne ebpekepiley kandan.”

Iyan dan kebpekesiud su warà dan mebperetiyaya te Lalag te Eleteala mekeatag dut te ini se Impasad din ne Ebperetuen te langun, tembù be ini se kedusa kandan se netahù te itungan te Eleteala.

<sup>9</sup> Ugaid ne sikami ne mibperetiyaya kandin ne mibpemili te Eleteala ne egkevaluy key ne menge anak din. Ne iring key te menge terebpelengesa ne egelevek diyà te Eleteala ne datù tew. Ne sikami rema ke ebeyveyaan dan, ne sikami red dema se nepemili din ne kandin ne menge etew su apey rey ibpemenudtul ke meupiya ne mid-ulaula rin keyta. Su rangen ne iring key te riyà te merusirem, ne guntaani ne Eleteala se midrayag kenami.

<sup>10</sup> Su rangen ne warà key pà mevaluy ne menge etew te Eleteala, ugaid ne guntaani ne menge etew key en nikandin. Rengan ne warà dey pà meherami ke kegkeyru te Eleteala kenami, ugaid ne guntaani ne neheraman dey en.

<sup>11</sup> Menge suled ku ne igkelimù ku, ebpenahaad ki pà kayi te ampew te dunya. Su kenà ini se kelibutan se tidtu ne ubpaan tew su riyà te langit. Tembù be ebuyuen ku keniyu te kenà niyu dumai ke meraat ne egkiyuhan te lawa niyu, su ini se kebpeneheewit niyu te salà ne ebpekessanggel te keduma niyu te Eleteala.

<sup>12</sup> Iyan iya se meupiya ke ed-ul-ulaan niyu su apey egkekita dut te menge etew ne warà pà mibperetiyaya. Su misan ke egkehiyen dan ne meraat se ed-ul-ulaan niyu, ne egkekita ran ded te ini se ed-ul-ulaan niyu ne meupiya ne ketà te hewii ne edlived si Hisus kayi te ampew te dunya ne edeyù dan te Eleteala su atag dut te meupiya ne ed-ul-ulaan niyu.

*Ini se Mekeatag te Eduma ki rut te Egkamal keyta*

<sup>13</sup> Na geina te mibperetiyaya ki ki Hisus, ne eduma kiyu te menge ureding dut te menge egkamal keytew. Ebperumaruma ki rut te piya engkey en ne ebpengulu te inged tew.

<sup>14</sup> Ne ke ruma pà ne egkamal dema, ebperumaruma ki kandan. Su sikandan se midsuhù dut te pengulu te ebpedsalà te menge etew ne edsurang te ureding wey edeyuen dan dema ke menge etew ne ed-ulaula te meupiya.

<sup>15</sup> Su ini se egkiyuhan te Eleteala ne ed-ul-ulaan tew ne meupiya su apey egkeengked ke menge lalag ne warà rantek din dut te menge etew ne egketalengtaleng ne edtarùtarù mekeatag keytew.

<sup>16</sup> Ne geina te impeliyu ki en dut te salà ta ne egkepakey ne sikita se ebpemili ke engkey se ed-ul-ulaan tew. Ugaid ne kenà egkepakey ne iyan tew ebpegitungen ne ini se kebpekeliyu keytew ne idaleb ta dut te meraat maa ne ed-ul-ulaan ta. Ugaid ne ebperumaruma ki te Eleteala su sikita se sugshuhen din guntaani.

<sup>17</sup> Ed-edatan ta ke langun ne menge etew. Ne edlimuan ta rema ke menge ruma ta ne mibperetiyaya. Iring din dema ne igkeandek ta ke ed-ulaula ki te kenà ebpekessuhat te hinawa te Eleteala. Ne ke pengulu rema dut te inged ta ne ed-edatan.

<sup>18</sup> Ne sikiyu ne menge uripen, iyan se med-adat kew rut te tehiuripen keniyu ne perumaruma kew kandan. Ne kenà ke metulanged dà ne tehiuripen su ke tehiuripen dema ne meraatdaat.

<sup>19</sup> Embiya edtigkeran ta ke keresayan ne ebpekeuma keyta misan pà te warà ki mekesalà, ugaid ne edtigkeran te pà lavew su edumaan ta ke kiyug te Eleteala, ne ebpekessuhat ini te hinawa te Eleteala ne edlelawan kiyu rin.

<sup>20</sup> Ugaid ne embiya sabap dut te salà ta ne ebpekesekitan ki, ne misan edtigemkan ta ne warà idlalew rin keyta. Ugaid ne embiya edtigemkan ta te keresayan ne ebpekeuma su atag dut te meupiya ne ed-ul-ulaan ta, ne ebpekesuhat te hinawa te Eleteala ne ini se kedtigem ta.

<sup>21</sup> Su iyan egkiyuan te Eleteala keyta ne edtigemkan ta te misan engkey ne keresayan ne ebpekeuma keyta. Su netuenan ta ne si Hisu Kristu ne nerasey nevenar mekeatag kenitew, ne sikandin se ledawan ne ed-iringan ta.

<sup>22</sup> "Su sikandin, ne warà iya salà din, ne warà misan seveka ne tarù ne migkahi rin."

<sup>23</sup> Su misan ke menge etew ne midsumpalit kandin, ne warà din tevaka te meraat. Ne iring ded ketà te mibpekesekitan sikandin, ne warà sikandin migkahi te edsuli. Insarig din dà diyà te Eleteala ne iyan metidtu ne egkukum dut te langun ne egketemanan din.

<sup>24</sup> Su ketà te mibpeimatey si Hisus diyà te pinebelavag ne kayu ne mid-ewit din ke langun ne menge salà ta su sikandin se midusaan mekeatag te salà tew. Iyan din mid-ulaula te iring ketà su apew tew ed-engkeri ke ed-ul-ulaan ta ne meraat ne edtidtuwen ta ini se ed-ul-ulaan ta te ulaula ne meupiya. Su ketà te kegkepelii rin ne impeliyu ki rut te kedusa te menge salà ta.

<sup>25</sup> Su rengan te warà ki pà mebperetiya ki Hisus, ne iring ki te menge bilibili ne nengetarin. Ugaid ne guntaani ne impeuli ki en diyà te Tumetuganur ne si Hisu Kristu ne iyan ebantey keytew.

### 3

#### *Ini se Mekeatag te Penurù te Teledesawa*

<sup>1</sup> Ne sikiyu rema ne menge meritan, iyan iya se ebpesakup kew rut te esawa niyu. Su embiya ruen warà pà mibperetiya te Lalag te Eleteala ne kalu ke ebpekeperetiya ran dema ke egkekita ran ini se ed-ul-ulaan niyu ne meupiya. Misana warà en egkehiyen niyu ne ebpenheewit kandan,

<sup>2</sup> ne egkepakey ne egkepeneheewit dan te ebperetiya ki Hisus kayi te egkekita ran ne mepmeupiya ne ed-ul-ulaan niyu wey ke dekelà ne ked-adat niyu te Eleteala.

<sup>3</sup> Ne ruma pà, menge meritan, kenà niyu pegitunga te ini se ibmerayirayi niyu ne ini se pegadir dut te lawa niyu iring te kebputus te bulvul niyu, wey dayandayan te lawa niyu te bulawan, wey mepurù ne menge belegkas.

<sup>4</sup> Ugaid ne iyan tidtu ne ibmerayirayi niyu ne meupiya ne ulaula ne ebpuun te hinawa niyu ne warà kegkeawà din. Su iyan belielehà diyà te etuvangan te Eleteala ne arà se mepened se hinawa niyu wey meredan ne betasan.

<sup>5</sup> Su iring kayi iya se kebmerayirayi dut te metinumanen ne menge meritan rengan ne insarig ke hinawa ran te Eleteala wey mibpesakup dan te esawa ran.

<sup>6</sup> Ne iring kayi si Sara rengan, ke esawa ni Abraham, su mibpesakup sikandin te esawa rin ne mid-edatan din iring te mepurù din. Ne iring kew te menge inakan ni Sarah embiya ed-iringan niyu ini se ulaula rin ne mepmeupiya wey embiya kenà niyu idtuhut ke itungan niyu ne egkesamuk dut te kegkeandek.

<sup>7</sup> Ne iring din ded dema ke sikiyu ne menge meama, ne upiani niyu ke kebpenheewit niyu te esawa niyu. Tugenura niyu sikandan ne edati niyu rema su kenà mevaher sikandan iring te meama. Ne tentenuri niyu te sikandan ne ebpeketalimà dema te limù te Eleteala ne ini se umur ne warà edteman din iring te sikiyu. Tembù be edati niyu sikandan su apew warà ebpekealang te kebpeneningi niyu.

#### *Ini se Mekeatag te Edresayan ta te Ed-ul-ulaan ta ne Meupiya*

<sup>8</sup> Ne ruen dema egkehiyen ku keniyu te langun ne menge mibperetiya, iyan iya se medseveka se itungan ta wey ke hinawa ta. Pelimlimuey kiyu rut te menge ruma ta iring te telteledsuled, ne ebpetultulengerey kiyu ne kenà ki mepelevawen.

<sup>9</sup> Embiya ruen etew ne ed-ulaula te meraat kayi te keyta etawa ed-undaunda keyta, ne kenà ki edsuli ugaid ne iyan ta ed-ul-ulaan diyà te kandan ne meupiya. Su ini se kiyug te Eleteala keyta ketà te ebpekeperetiya ta su apew kiyu rin metevangi te meupiya.

<sup>10</sup> Su ruen impesurat ne Lalag te Eleteala ne egkahi te,  
"Piya engkey ne etew ne egkiyug

te meupiya se ked-ubpà din kayi te ampew te dunya ne egkehalew te hinawa rin ne melinew, ne iyan iya se edtiemen din ke bèbà din ne ed-engked sikandin se edtarùtarù.

<sup>11</sup> Ne med-engked sikandin dut te meraat ne ulaula ne iyan din ed-ul-ulaan ke meupiya,

ne layun din ebpemengaa te meupiya ne kederepità dut te menge ruma rin.

<sup>12</sup> Su ke etew ne ed-ulaula te meupiya diyà te etuvangan te Eleteala, ne arà se ebentayan din, ne ebpeminchen din ke kebpengeningeni rin.

Ugaid ne igkeepes din arà se ed-ulaula te meraat.”

<sup>13</sup> Na embiya meilut se kegeweri ta rut te meupiya ne ed-ul-ulaan, ne engkey se ebpemekaid keyta!

<sup>14</sup> Ugaid ne misan ebpeketicger ki te kegkesihi te menge etew atag dut te ed-ul-ulaan ta ne meupiya, ne kenà ki ed-engked su egkehalew ki. Iyan meupiya ne kenà ki egkeandek wey kenà ki egkeururu.

<sup>15</sup> Ugaid ne iyan ta ibpeuna te hinawa ta ke ked-adat tew ki Hisu Kristu su sikandin se Kerenan ta. Ne ed-andam ki neraan ke engkey se idtavak ta te menge etew ne ed-insà mekeatag dut te kebperetiyaya ta.

<sup>16</sup> Ugaid ne kayi te kedtavak ta ne mananew se kedlalag ta ne ed-adat ki kandan. Ne iyan meupiya ne ed-uram ki ne warà salà te ulaula ta ne ebpekesamuk te hinawa ta su apey ke menge etew ne edsumpalit keyta mekeatag te kebperetiyaya ta ne egkeyeyaan dan dut te migkahi ran.

<sup>17</sup> Embiya kiyug te Eleteala ne egkerasey ki su atag dut te meupiya ne ed-ul-ulaan ta, ne iyan pà meupiya rut te iyan ta egkerasey te ed-ulaula te meraat.

<sup>18</sup> Su misan si Hisu Kristu ne warà salà din ne mibpeimatey sikandin su atag dut te sikitew ne mekesesalà su apey ibpelived ta ke hinawa ta diyà te Eleteala. Keseveka rà se kinepatey rin atag dut te salà ta, ne kenà en edseupan su nepasad en. Ugaid ne misan mid-imetayan te menge etew ke lawa rin ne biviyag ded sikandin su warà mibpatey ke gimukud din,

<sup>19</sup> ne mibpendiyà ke gimukud din te bilengguan te gimukud dut te menge minatey ne mibpatey rengan su mibpesabud kandan te Lalag te Eleteala.

<sup>20</sup> Ne ini ke menge gimukud dut te menge etew rengan ne warà mibperetiyaya te Eleteala ketà te hewii ni Noe. Rengan te biviyag den pà ne midtigkeran dut te Eleteala ke meraat ne ulaula ran su midtahad sikandin embiya ebpekeperetiyaya ran gewii te ebelayan pà ni Noe ke avang ne ed-ingaranan te arka. Ugaid ne guna su nekeipus si Noe te arka ne mid-urug ke ralem, ne ruen walu rà ne menge etew ne mibperetiyaya kandin ne midlusud te arka ne nekeliyu ran dut te egkelened.

<sup>21</sup> Ne ini se kebpekeliyu ran ne egkeirangan ta ini te kebunyahi ta su tuus te kebpekeliyu ta te kedusa te Eleteala dut te salà ta. Su ini se kebunyahi keyta ne kenà ke kedlùlù te puting kayi te lawa ta, ugaid ne tuus ini te iyan ta ebuyuen te Eleteala ne id-awà din ke menge salà ta ne edilaken din ke hinawa ta su apey kenà ki egkeyeyaan te ed-itindeg diyà te etuvangan din. Ne iyan din kebpeleiyu keyta su minatey si Hisus su atag dut te salà ta ne mibanew rin.

<sup>22</sup> Ne guntaani ne diyà si Hisus mid-uli te langit ne ebpinuu diyà te rapit te egkekewanan te Eleteala. Ne langun ne suluhuen te Eleteala wey langun ne ruma pà ne ruen gehem dan ketà ne sikandin se ebayàbayà kandan.

## 4

### *Ini se Mekeatag te Ed-ul-ulaan ta ne Ebpekesuhat te Hinawa te Eleteala*

<sup>1</sup> Ne netueanan ta te nerasey si Hisu Kristu gewii te kayi pà sikandin te ampew te dunya, ne iyan iya se ed-andam ki te editgker te keresayan iring kandin. Su ke etew ne editgkeran din te keresayan ne iring te egkeawà ke kiyug din te ed-ulaula te meraat.

<sup>2</sup> Tembù be taman te kayi ki pà te ampew te dunya ne iyan ta ed-ul-ulaan ne kiyug te Eleteala, ne kenà iyan ta edumaan ke kiyug te sikitew ne menge etew.

<sup>3</sup> Ustuen ketà te hewii ne mid-usar ta te iyan ta ed-ul-ulaan ne engkey se kiyug te ed-ul-ulaan te menge etew ne kenà ebperetiyaya te Eleteala. Su rengan ne ruen ed-ul-ulaan ta ne meredsik, wey ini se ulaula ne ebpatà ki te nanam. Lelayun ki ed-inum te ebpeketevereg wey ke kebpengingniyug ta. Ne ruen betasan ta ne egkevurun ki su edhubghubug wey ke kebpengarap ta te ledawan dà ne kenà tidtu ne Eleteala ne medmeraata ini diyà te etuvangan din.

<sup>4</sup> Ugaid ne guntaani, ne ini se menge etew ne kenà ebperetiyaya te Eleteala ne neinuini ran te meambe ke kenà ki eduma kandan te ed-ulaula te meraat wey ini se ulaula ne ebpatà te nanam. Tembù be edsumpiliten ki nikandan.

<sup>5</sup> Ugaid ne ketà te akir din ne hewii ne ebpekeetuvang dan te Eleteala su ed-insaan din sikandan te meambe ke mid-ulaula ran te meraat. Su mibpenehana en ke Eleteala su egkukum dut te minge ulaula te langun ne minge etew ne biviyag pà wey ke minge minatey.

<sup>6</sup> Tembù be ke minge minatey en ne daan ne ke Meupiya ne Tudtul se impesabut kandan su apey ruen ebperetiyya te ini se gimukud dan se ed-ubpà diyà te Eleteala. Ugaid ne misan mibperetiyya ran ne nekeragkes dan te kebpatéy te lawa ran su iyan kegkukum te Eleteala dut te langun ne minge etew.

<sup>7</sup> Mehaan en se kegketapus kayi te dunya, tembù be sikita ne minge etew ne iyan iya se editihel ki rut te egketuenan ta ne ibpevayà ta wey ibmeupiya te hinawa ta su apey warà ebpekealang te kebpengegeni ta te Eleteala.

<sup>8</sup> Ne iyan ta ibpeuna te hinawa ta ne egeweran ta te meilut ini se kedlimù ta dut te minge ruma ta ne minge mibperetiyya. Su embiya tidtu se limù ta dut te minge ruma ta ne misan duen salà dan keyta ne egkepakey ne ebpeseharen ta.

<sup>9</sup> Iyan ta iya ed-ul-ulaan ne egalàhalà ki rut te minge ruma ta ne minge mibperetiyya ne ebpepemenayik ki rut te valey ta.

<sup>10</sup> Su sikita ne ruen edsusunan te ketau ne imbehey te Eleteala te uman senge etew keyta. Ne iyan din kebehey su apey kiyu mekedtevangéy, ne iyan iya se id-usar ta te meupiya ini se insarig din keyta.

<sup>11</sup> Embiya ruen keyta ne nevehayan te ketau te ebpesabut se Lalag te Eleteala, ne iyan iya se edtentenuran din te ini se Lalag te Eleteala ne ibpesabut din. Ne embiya ruen ketau ta te edtavang te minge ruma ta, ne iyan iya se kenà ta egkelipatan ne ini se kevaher ta te edtavang ne riyà ebpuun te Eleteala. Piya engkey en ne helevek ne imbehey keyta te Eleteala ne ebeelan ta, ne iyan iya se ed-ey-eyaran ta te ebaal egenat dut te tavang ne ebpuun ki Hisu Kristu su apey Eleteala se edeyuen dut te minge etew. Su sikandin dà se edait ne edeyuen, ne sikandin dà se warà ebpekerepeng dut te gehem din taman te taman.

*Ke Kedrumerasey ta Atag dut te Ed-ul-ulaan ta ne Meupiya*

<sup>12</sup> Minge suled ku ne igkelimù ku, kenà kew meinuinu rut te mepasang ne keresayan ne nekeuma en kayi te keniyu su sabap dut te kebperetiyya niyu ki Hisus. Su Eleteala ke ebpeggeram keyta ke engkey kerekelà se kedsarig ta kandin.

<sup>13</sup> Ne iyan meupiya ne egkehalew ki kayi te keresayan ta te keduma ta ki Hisu Kristu su iring te ebpekeamung ki te egeram dut te ingkerasey rin. Ne embiya edtigkeran ta iring te sikandin, ne ebpekeamung ki rema te kehelawan din ketà te akir din ne hewii ne ibpekita te Eleteala ke raman dut te kinepepurù din ki Hisus.

<sup>14</sup> Ne embiya edsudian ki su sabap dut te keduma ta ki Hisu Kristu ne tuus arà te kayi en te keyta ke Kedesenan ne Ebpetuntul te Menuisiyà ne iyan ke raman te Eleteala, tembù be egkehalew ki.

<sup>15</sup> Ne ed-uram ki su apey warà kayi te keyta ne ebpekesekitan su sabap dut te ed-ul-ulaan ta ne meraat iring te ebuunù, etawa ebpenakew, etawa misan engkey ne ulaula ne mereatey, etawa ed-amung-amung te warà kandin.

<sup>16</sup> Ugaid ne embiya ke keduma ta ki Hisus se puunan te igkerasey ta, ne kenà ta igkeyeyai. Ugaid ne edeyù ki te Eleteala su sikandin ke mibpebaluy keyta ne minge etew ne mibperetiyya ki Hisu Kristu.

<sup>17</sup> Su iyan kedtuhut te Eleteala ne egkerasey ki su ini en ke hewii ne edrudsu ke Eleteala te egkukum dut te minge etew ne iyan ed-unaan ke minge etew ne eduma kandin. Ne embiya iring ketà se egketemanan te sikami ne minge anak din ne iyan pè be kenà merasey ke egketemanan dut te minge etew ne kenà ebperetiyya te Meupiya ne Tudtul te Eleteala.

<sup>18</sup> Su ruen impesurat ne Lalag te Eleteala ne egkahi te,  
 “Embiya merehen ne ebpekeliyu dut te kedusa te Eleteala  
 ke metidtu ne minge etew,

ne iyan pè be mekeliyu ke minge etew  
 ne warà kayi te hinawa ran ke Eleteala  
 wey meraat se ulaula ran!”

<sup>19</sup> Tembù be, minge suled, embiya edrumerasey ki su sabap dut te kiyug te Eleteala keyta, ne kenà ta igkebungas te kedtigker ta. Ugaid ne idsarig ta ke hinawa ta te Eleteala ne iyan midlimbag keyta, su kenà ki ed-engkeran nikandin ne ke impasad din ne edtumanen din kayi te keyta.

## 5

*Ke Kedtugenura dut te Menge Etew ne Mibperetiya te Eleteala*

<sup>1</sup> Ne ruen egkehiyen ku riyà te keniyu ne minge pekilukesen te minge mibperetiya su siaken ne pekilukesen a rema iring keniyu. Ne nekita kayi te mata ku ke kegkerasey ni Hisus, ne netuenan ku ne ketà te akir din ne hewii ne egkekita ke kebmeperù ni Hisus ne ebpekeamung ki ketà te kebmeperù din. Tembù be iyan niyu tumana ini se ebuyuen ku

<sup>2</sup> ne tugenura niyu ke minge mibperetiya te Eleteala su iring sikandan te minge bilibili ne insarig din keyta ne edtugenuren. Ne iyan meupiya ne mehalew ki se edtuganur kandan su ini se kiyug te Eleteala keyta. Ne arà te kedtugenura ta kandan ne kenà meupiya ne ke puunan te kedtawang ta ne sabap te edsukayan ki, ugaid ne sabap dut te limù ta te kedtawang ta kandan ketà te keduma ran te Eleteala.

<sup>3</sup> Ne arà te kebpenheewit ta kandan ne kenà ki edsuhù dà. Ugaid ne iyan meupiya ne ibpekita ta kandan ke ulaula ne meupiya su apey sikita ne iyan dan ed-iringan.

<sup>4</sup> Su ketà te kedlived ni Hisu Kristu kayi, ne iyan meperù ne tumetuganur, ne ebpekeamung ki dut te ed-andlag ne raman te kebpeperù kandin ne kenà egkurang ke raman din.

<sup>5</sup> Ne sikiyu ne minge menguwed, ne iyan iya se pevayàbayà kew rut te pekilukesen. Su iyan meupiya ne langun tew ne mebpeembavà te hinawa ta ne ebpesugsuhuey ki rut te minge ruma ta. Su ruen impesurat ne Lalag te Eleteala ne egkahi te,

“Egkunteraan te Eleteala ke minge etew ne mepereyù,

ugaid ne edtevangin din te rekela

ke minge etew ne mebpeembavà te hinawa ran.”

<sup>6</sup> Tembù be ebpeembavà ki te hinawa ta diyà te Eleteala ne warà repeng te gehem din su apey ibpeperù ki nikandin embiya egkeuma ke hewii ne kiyug din.

<sup>7</sup> Ne idsarig ta te Eleteala ke piya engkey ne kemutuwan ta su iyan sikandin ke edtuganur keyta.

<sup>8</sup> Ne ed-uram ki ne ebantey ki rut te langun ne ed-ul-ulaan ta su ini se kunterà tew ne si Setanas ke datù te pekaid ne egkiyug ne ebpekesuwey ki te keduma ta te Eleteala. Su edlauglaug sikandin ne ebpemengà te etew ne egkepeneheewit din te ed-ulaula te meraat iring dut te mekeandek ne erimaung ne ebpemengà te egkekaan din.

<sup>9</sup> Tembù be ed-iluten ta ke kebperetiya ta te Eleteala su apey ebmevajer ke hinawa ta te ed-atu ki Setanas. Ne netuenan ta te kenà sikami rà se egeram te keresayan su langun ne minge ruma ta ne mibperetiya te piya endei ne inged.

<sup>10</sup> Ugaid ne mehaan dà ini se keresayan ne egeramen ta. Ne embiya egkeipus en ne ed-iluten te Eleteala ke kebperetiya ta su apey mevajer se hinawa ta te edtuman ki iya te keduma ta kandin. Su sikandin ke ebpuunan te langun ne tavang keyta. Ne sikita ne mibpemili din su apey ebpekeamung ki dut te raman din duma ki Hisu Kristu.

<sup>11</sup> Ne edeyù ki te Eleteala ne warà ebpekerepeng te gehem din taman te taman.

*Ke Ketepusan dut te Neuna ne Surat ni Pedro*

<sup>12</sup> Ini se mevavà ne surat ku riyà te keniyu ne impesurat ku ki Silvano. Ruma ta sikandin te mibperetiya ki Hisus ne dekelà se kedsarig ku kandin. Iyan ku kedsurat keniyu su apey ebeg-eten ku ke kebperetiya niyu wey apey ibpesabut ku keniyu te benar ini se impenurù ku keniyu mekeatag te melimù ne kedtawang te Eleteala keniyu. Tembù be iyan se idsarig niyu iya ke hinawa niyu ketà se melimù ne kedtawang din keniyu.

<sup>13</sup> Ne ini se minge ruma ta te mibperetiya kayi te inged ne Bebilunya ne mibpemili rema te Eleteala iring keniyu, ne ebpeginginsà keniyu. Ne si Marcos ne iring te anak ku ne ebpeginginsà rema keniyu.

<sup>14</sup> Ne iyan meupiya ne ketà te egkevurun kew ne ebpesegshepaey kew su ibpekita niyu te edsusuled kew. Na langun niyu ne mibperetiya ki Hisu Kristu, ne egkiyuhan ku ne ebmelinawen te Eleteala ke itungan niyu.

Arà dà taman.

*Pedro*

## Ke Ikeruwa ne Surat Ni Pedro

<sup>1</sup> Siaken si Simon Pedro ne edsurat kayi. Sugsuhuen a ni Hisu Kristu wey epustul din dema ne iyan din meana ne kedsérihan a nikandin.

Edsurat e red maa dut te sikiyu ne minge ruma ta te mibperetiyya ki Hisu. Ne ini se kebperetiyya rut te langun tew ne neked-iring su ebpuun ded langun te Eleteala wey si Hisu Kristu ne mibpeliyu keyta. Su sikandin, ne iyan din ed-ul-ulaan ne metidtu, ne warà misan engkey ne etew ne ibpelavi rin.

<sup>2</sup> Na iyan ku egkiyuhan ne ed-iseg ini se kebpekesabut niyu mekeatag te Eleteala wey si Hisu Kristu ke Kerenan tew. Su embiya ibpeiseg niyu ini, ne ibpeiseg te Eleteala rema ke keppeaub din keniyu, ne ibpeiseg din ded dema ke kebmelinawen dut te itungan niyu.

*Ini se Impenurù ni Pedro Mekeatag dut te Kebpeliyu te Eleteala keyta*

<sup>3</sup> Ne sabap dut te rekela ne gehem te Eleteala ne sikandin se edtavang keyta su apey ebmetidtu ke langun ne ed-ul-ulaan ta te ked-ubpà ta kayi te ampew te dunya. Egkepakey ne ed-ulaula ki kayi su netuenan ta en si Hisu Kristu ne iyan midtawag kenita su apey ki ebpekeamung kandin dut te kepurù din wey ke keupiya rin.

<sup>4</sup> Ne sabap te netuenan ta en si Hisu, ne imbehey te Eleteala keyta ke rekdekela ne tavang din ne belielehà ne impasad din. Ne kayi se kedtavang din keyta ne ruen gaga ta te ed-engked dut te arà se meraat ne kiyug te kememenusiayi ne ebpekederaat keytew su apey ki ebpekeiring te metidtu ne ulaula te Eleteala.

<sup>5</sup> Ne geina te ini se intavang din keyta, ne iyan iya se ebeelan ta ke taman ne egkegaga ta su apey ke kebperetiyya ta ne meilut ne ebpekesumpat ke meupiya ne ed-ul-ulaan ta. Ne igkesumpat ta rema ke ketampas te itungan

<sup>6</sup> su apey edtihelan te hinawa ta, abpeg ke kedtigker ta dut te keresayan. Ne kenà arà dà su igkesumpat ta te id-amin te hinawa ta te keduma te kiyug te Eleteala.

<sup>7</sup> Ne kayi te ked-amin ta te hinawa ta te keduma te kiyug te Eleteala ne igkesumpat ta red maa ke kebpesegsehipaey ta su ibpekita te edsusuled ki, ne igkesumpat ta ketà ke limà ta rut te minge ruma ta ne mibperetiyya.

<sup>8</sup> Ne embiya id-iseg ta te ed-ulaula te langun kayi ne embiya kenà ki egkebungas ne ruen dema dekelà ne atag din ke kebperetiyya tew rut te Kerenan tew ne si Hisu Kristu.

<sup>9</sup> Ne embiya ruen etew ne mibperetiyya ugaid ne kenà din ed-ul-ulaan ini, ne iring te nelekevan se itungan din su warà din pà mesebuti te arà ne kinepeliyu kandin te Eleteala. Ne warà te hinawa rin te mibpeliyu sikandin dut te raan ne minge salà din.

<sup>10</sup> Tembù be, minge ruma ku ne mibperetiyya, iyan iya se mebbegelep ki te eduma te Eleteala wey mekita te benar iya ini se kebpelemi din keyta. Su embiya ini se ed-ul-ulaan ta, ne warà ebpekesuwey keytew te keduma ta te Eleteala.

<sup>11</sup> Ne embiya iring ketà, ne Eleteala se egalàhalà keyta ketà te kedtelimà din keyta te edlusud dut te Edetuan ni Hisu Kristu ke Kerenan tew ne mibpeliyu keytew. Ne ini se Edetuan din ne warà edtemanin din.

<sup>12</sup> Tembù be ebpetentenan ku ini keniyu misan nerineg niyu en ini se meilut se kebperetiyyaa niyu rut te benar ne tuluuwen ne impenurù ku keniyu.

<sup>13</sup> Su taman te kayi e pà te ampew te dunya ne iyan meupiya ne ebpetentenan ku keniyu ini su apey kenà niyu melipati.

<sup>14</sup> Su netuenan ku te mehaan en egkepupus ini se umur ku kayi te ampew te dunya su ini se impesabut kedì dut te Kerenan tew ne si Hisu Kristu.

<sup>15</sup> Tembù be idsurat ku ini riyà te keniyu su embiya warà a kayi te keniyu ne kenà niyu egkelipatan ini se impenurù ku keniyu.

*Ini se Lalag ni Pedro su apey Egketuenan ta te Benar ke Impesabut mekeatag ki Hisu Kristu*

<sup>16</sup> Ne ini se impesabut dey keniyu mekeatag te kebmepurù ni Hisu Kristu ke Kerenan tew ketà te kedlived din kayi te ampew te dunya, ne kenà mibèbeelan dà dut te itungan te menusiya dà dè duen. Ugaid ne ini se impesabut dey keniyu ne benar su nekita rey iya ketà te kebpepurù kandin te Eleteala.

<sup>17</sup> Su gewii te kayi pà si Hisu te ampew te dunya ne miduma key kandin dengan te ebpendiyà te arà ne buvungan ne impekita te Amey tew ne Eleteala ke kedeyua rin ki Hisu wey ke rekela te kebpepurù din kandin. Su nerineg dey ke lalag dut te Eleteala ne

Amey rin ne iyan pinekemepurù te langun, ke sikandin te, “Ini se Anak ku ne dekelà te hinawa ku; ne ebpekesuhat sikandin te hinawa ku kayi te langun ne ed-ul-ulaan din.”

<sup>18</sup> Uya, nerineg dey iya ke suwara te Eleteala su miduma key ki Hisus dengan te eppendiya te buvungan te mid-uvey te Eleteala kandin.

<sup>19</sup> Ne arà se nekita rey wey nerineg dey te riyà key te buvungan, ne arà se mibpeketulan keyta ne benar iya ini se migkahi neraan dut te mibpelambas te Lalag te Eleteala rengan mekeatag te si Hisus se ebperetuen te Eleteala. Tembù be iyan meupiya ne ey-eyari niyu rema te ebpeming kayi te lalag dan, su ini se mibpenudtul dan ne iring dut te sulù ne ebpekerayag diyà te merusirem taman te edsilà ke mekebangas embiya egkeriwaswas en. Su ketà te egkeriwaswas en ne egkerayahan ki rut te mekebangas ne iyan din meana ne egkeuma en ke kegketuman te kedlived ni Hisus kayi te keyta.

<sup>20</sup> Na, itahù niyu nevenar ini te itungan niyu su apey kenà niyu melipati. Warà misan senge etew rà ne metau ne ebpesabut te lalag te ebpelambas te Lalag te Eleteala rengan embiya kayi rà te itungan din dà su iyan iya se medsarig sikandin dut te Kedesenan ne Ebpetuntul te Menusiyà te ebpesabut kandin.

<sup>21</sup> Su ini se Lalag te Eleteala ne impesurat dut te ebpelambas te Lalag te Eleteala rengan ne kenà ebpuun diyà te itungan den dà dè duen su ke Kedesenan ne Ebpetuntul te Menusiyà se mibpesabut kandan ke engkey se idsurat dan.

## 2

### *Ini se Mekeatag dut te Menge Etew ne Engkungkun ne Ebpenerù te Lalag te Eleteala*

<sup>1</sup> Duen dengan menge etew ne engkungkun ne ebpelambas te Lalag te Eleteala. Ne iring ded dema guntaan ne ruen menge etew ne edlepep ne deisekdeisek ne ebpenurù te tarù diyà te keniyu. Iyan dan ibpenurù ne ederaat te kebperetiyaya niyu te Eleteala su kenà dan ebperetiyaya te si Hisu Kristu ke Kerenan tew ne mibpeliyu keyta te kedusa te salà ta. Tembù be ruen hewii ne ebpekeuma ne egketekew ne edereetan dan te Eleteala.

<sup>2</sup> Ne misan iyan dan ibpenurù ne meraat, ne ruen merakel ne menge etew ne egkeekalan kandan ne eduma te menge ulaula ran ne meredsik. Ne sabap dut te keduma ran kandan dut te ulaula ne meredsik ne ke duma ne menge etew ne edsumpelitan ke benar ne dalan te Eleteala ne edumaan ta su kunaan dan ke iyan ed-ul-ulaan te sikami ne menge mibperetiyaya ne meraat.

<sup>3</sup> Ne ini se ebpenurù te tarù ne merakel se ibpenurù dan ne ebèbeelan den dà su ebpementiyari ran kayi te keniyu su egkeeram-am dan te pirak. Ini se menge etew ne neuhet dà ne impenehana te Eleteala ke kedusa rin kandan. Ne kenà edlipereng ke Eleteala, tembù be ke kedusa rin kandan ne ebpekeuma iya.

<sup>4</sup> Uya, benar ne edusaan te Eleteala sikandan su midusa rin ke menge etew rengan ne mid-ulaula te meraat. Su misan ke menge suluhuen din diyà te langit ne nekedsalà dengan ne warà din pedtedaya, ugaid ne in-antug din sikandan diyà te apuy nerakà ne ebekuen dan te sengkali diyà te mermerusirem taman te ebpekeuma ke hewii te kedusa kandan te Eleteala.

<sup>5</sup> Ne iring din ded dema ke menge etew rengan te hewii ni Noe ne medmeraat se mid-ulaula ran. Warà pedtedaya te Eleteala sikandan su mibperalem din ke wayig kayi te ampew te dunya ne neherà dan langun ke mid-ulaula te meraat. Ne iyan dà nesamà ne warà nelened ne si Noe wey ke telteleanak ne pitu ne etew. Su si Noe ne mibpesabut din te ulaula ne metidtu.

<sup>6</sup> Ne midusaan dema te Eleteala ke menge etew diyà te menge inged ne Suduma wey Gumura rengan su midereetan din ini te apuy su sabap dut te salà te menge etew ne mid-ubpà ketà. Ini se mid-ulaula rin su apey egkekita te langun ne menge etew ke kedusa te Eleteala ne ebpekeuma ketà te menge etew ne kenà ebperetiyaya kandin.

<sup>7</sup> Ugaid ne si Lut se mibpeliyu rin su metidtu ne etew sikandin. Ne neuru nevenar sikandin mekeatag dut te meredsik ne mid-ulaula te mekesesalà ne menge etew ne mid-ubpà ketà ne menge inged.

<sup>8</sup> Su ini se metidtu ne etew ne mid-ubpà diyà te kandan. Ne gewii te ked-ubpà din ketà ne langun ne nekita rin wey nerineg din ne arà se meredsik ne mid-ulaula ran, tembù be merasey nevenar se hinawa rin dutun.

<sup>9</sup> Ne iring te kebpelelyu te Eleteala ki Lut se ed-ul-ulaan te Eleteala dut te menge etew ne eduma kandin su metau sikandin te ibpevayà din te kedtavang kandan ketà te keresayan dan. Ne ini se menge etew ne kenà eduma kandin, ne impenehana en ke kedusa rin kandan ketà te Hewii ne Egkukum kandan.

<sup>10</sup> Na iyan pè be kenà din dusaa ke menge etew ne iyan den dà edumaan ke kiyug te lawa ran abpeg ke menge etew ne ed-engkenà dut te kebakayàya te Eleteala kandan.

Ne ini se migkahi ku ne menge etew ne ebpenurù te tarù ne warà kegkeyeyai ran wey mepereyù. Warà ed-edatan dan nasi pà te edsumpeliten dan ke menge suluhuen te Eleteala diyà te langit.

<sup>11</sup> Ugaïd ke menge suluhuen te Eleteala, misan mepurù pà sikandan wey rekela pà se gehem dan dut te ini se ebpenurù te tarù, ne kenà dan mulà edsumpeliten ke menge ruma ran embiya ruen idsumbung dan diyà te etuvangan te Eleteala.

<sup>12</sup> Ugaïd ne arà se menge etew ne ebpenurù te tarù ne iring sikandan te leew ne binatang ne warà itungan su iyan dan ed-ul-ulaan ke piya engkey ne nelayaman dan, ne iyan dan dà atag se edsigkemen su edsumbelien. Iring din ded dema ke menge etew ne ebpenurù te tarù su edsumpeliten dan ini se kenà dan egkesebutan, ne iyan dan egketemanan ne egkeherà dan iring dut te leew ne binatang.

<sup>13</sup> Ne edresayen dan dema su atag te daan ne kedrasey ran dut te menge ruma ran. Su sikandan ne misan meandew ne kenà dan egkeyeyaan te ed-ulaula te kiyug dan ne meraat ne ibpatà te nanam dan. Kenà edait ne ebpekidtuhan dan diyà te kevruran niyu su mekeyayà se ulaula ran, su iyan dan kiyug ne ed-ekalan kew ran mekeatag te meredsik ne ed-ul-ulaan dan.

<sup>14</sup> Warà ruma ne ebpemengaan dan ke kenà ke menge meritan ne meredsik, ne ke kiyug dan te eopatà te nanam dan ne kenà dan igkevulung. Ebaal dan te litag ketà se ed-ul-ulaan dan su apey ran mepeneheewit te ebpekedsalà ke menge etew ne warà pà mekedalid se kebperetiyya ran. Iring din ded dema ne egkeeram-am ke hinawa ran, ugaïd ne nepenehana en ke kedusa kandan te Eleteala.

<sup>15</sup> Midsuwey ran dut te tidtu ne ralan ne nengetarin en su miduma ran dut te ralan ne ed-ikulen ni Belaam dengan ne anak ni Busur. Si Belaam ini ne senge etew ne ebpelambas te Lalag te Eleteala rengan, ugaïd ne iyan dekelà te hinawa rin ke kureta ne egkekuwa rin dut te ked-ulaula rin te meraat.

<sup>16</sup> Ne ruen kudà din ne impekahi te Eleteala iring te suwara te etew ne midawey ki Belaam dut te meraat ne ed-ul-ulaan din. Tembù be warà din ilaus ke merupangdupang ne ed-ul-ulaan din.

<sup>17</sup> Ne embiya idsempità ta ini se menge etew ne ebpenurù te tarù ne iring dan te tuhanan ne neiratan ne warè en pantag din, etawa iring dan te kivel ne idlayap te keramag ne warà misan senge tihis dà ne uran. Impenehana en te Eleteala ini se medmerusirem diyà te apuy nerakà ne ed-ubpaan dan.

<sup>18</sup> Engkungun te sikandan ne meralen se lalag dan, ugaïd ne warà benar dutun. Ne ebpehuyatan dan ke menge etew ne behu pà ne mid-engked dut te raan ne ulaula ran ne meraat ketà te mibperetiyya ran. Su egkahi ini se ebpenurù te tarù te kenà kun meraat ke eduma dut te egkiyuhan te lawa ta. Tembù be egkepeneheewit maa ke menge etew te Ebpekedsalà.

<sup>19</sup> Su iyan dan ibpenurù ne embiya ruen etew ne eduma rut te ibpenurù dan ne warè en penduan ne ebpekeiket kandan. Ugaïd ne sikandan se ebpenurù te tarù ne ed-uripenen dut te menge ulaula ran ne meraat ne ederaat dema kandan. Su netuenan ta ne uripen iya ke etew dut te piya engkey ne ebayàbayà kandin.

<sup>20</sup> Ke ruen menge etew ne mid-awà dut te daan ne ulaula ran ne meraat su atag dut te mibperetiyya ran ki Hisu Kristu ke Kerenan tew, ne ebpekeliyu ran dut te meraat ne ulaula kayi te ampew te dunya ne ederaat kandan. Ugaïd ne embiya edlived dan ded maa dut te meraat ne nelayaman dan ne ingkeuripen dan, ne tuwas pà ne meraat se egketemanan dan dut te warà den pà mibperetiya.

<sup>21</sup> Ne iyan pà meupiya ke warà dan metueni ke tidtu ne ralan te Eleteala tumin dè be te ruen netuenan dan ugaïd ne ed-engkenà dan dut te insuhù kandan te Eleteala ne impesabut din.

<sup>22</sup> Su ke etew ne ed-ulaula te iring ketà ne ebpekeiring te beseanan ne egkahi te, "Ke asu ne egkeenen din ded se utà din." Iring din ded dema "Ke bavuy ne misan midihù en, ne edtunà en maa."

### 3

#### *Ini se Mekeatag te Kedlived ni Hisu Kristu kayi te Ampew te Dunya*

<sup>1</sup> Menge suled ku ne igkelimù ku, ini se ikeruwa ne surat ku diyà te keniyyu. Iyan ku kedsurati keniyyu su ebpetentenuran ku keniyyu maa ke benar ne penurù ne nerineg niyu su apey egkepekew ke itungan niyu mekeatag ketà.

<sup>2</sup> Egkiyuhan ku ne kenà niyu melipati ke impesabut dut te menge ebpelambas te Lalag te Eleteala rengan, abpeg ke insuhù dema ni Hisu Kristu ke Kerenan tew ne ebpekiyu keytew, su ini se suhù din ne impepeyayà dut te menge kedserihan din.



<sup>3</sup> Ini se egkeuna ne ebpesebutan ku keniyu. Ketà te mehaan en ebpekeuma ke mewri ne hewii kayi te ampew te dunya, ne ruen menge etew ne edlepew ne iyan ebayàbayà kandan ke meraat ne kiyug te lawa ran. Ne edsumpелiten kew ran se egkahi te,

<sup>4</sup> “Kenà be migkahi ni Hisus te edlived sikandin kayi te ampew te dunya? Ne endei buwa sikandin? Mibpenareng kandin ke menge keep-epuan tew rengan ne neuhet dà ne minatey ran en, ugaid ne taman guntaani ne warà nesembian kayi te inged tew egenat dut te rudsuan te kinelibag te Eleteala kayi.”

<sup>5</sup> Iring kayi se egkehiyen dan su kenà dan ebpehimbentar te pehaney en ne ke Eleteala se midlibag te langit wey tanà ibpepevayà te lalag din dà. Ne ketà ne nevaluy rin ke wayig ne tanà, su ini se tanà ne riya ebpuun te wayig. Ne iring din ded dema ke wayig ke puunan te igkeuyag dut te langun ne kayi te tanà.

<sup>6</sup> Ne ibpevayà te wayig dema ne langun ne menge etew rengan ne neherà ketà te nekeuma en ke dalem.

<sup>7</sup> Ne kayi te Lalag te Eleteala rema ne ebpesebutan din te ebpeiseg pà ini se langit wey tanà ne egkekita ta guntaani taman te edereetan din ketà te akir din ne hewii, ugaid ne kenà wayig su apuy se idsuhù din ne ederaat. Ne edereetan din iya ke menge etew ne ed-ulaula te meraat, ne idtehaad din dà ke ebpekeuma ke hewii te kegkukum din kandan.

<sup>8</sup> Na menge suled ku ne igkelimù ku, iyan niyu pegitunga ne diyà te itungan te Eleteala ne ke senge hewii ne warà ebiraan din dut te sengivu ne rahun, su diyà te itungan din ne noked-iring se keuhet din.

<sup>9</sup> Ne misan egkahi ke menge etew ne edlanganlangan ke Kerenan ne edtuman te impasad din te edlived kayi te ampew te dunya, ne iyan din kenà pà kebengkayii su ke Eleteala ne mid-inuman din te meadsil mekeatag dut te menge etew. Su iyan din egkiyuhan ne warà seveka rà ne kenà ebpekeliyu rut te kedusa rin, ugaid ne kiyug din ne langun ne menge etew ne ed-engked dut te meraat ne ulaula ran ne ebpeneheewit kandan te kegkereeti ran.

<sup>10</sup> Ugaid ne benar iya ne edlived ke Kerenan tew ne si Hisu Kristu kayi. Ne ketà te Hewii te Kedlived Din ne egketekew ke menge etew su iring te kebpekeuma te tekawen ne kenà egketuanan. Ne egkerineg dan te dekelà ne edriyubriyub, ne ketà dà ne egketunag en ke langit dut te apuy wey ke langun ne egkekita ketà ne egkeamin-amin egketutung. Iring din ded dema ke tanà wey ke langun ne egkekita kayi ne egketutung en.

<sup>11</sup> Na embiya netuenan tew te ruen hewii ne edereetan te Eleteala ke langun ne egkekita ta, ne iyan se nasi ne ke meupiya se ed-ul-ulaan tew. Iyan iya se eduma ki te Eleteala su apey ini se ulaula ta ne metidtu diyà te etuvangan din

<sup>12</sup> gewii te edtehad ki pà dut te arà se Hewii Rin. Ne id-amin ta ke baher ta te egelevelk dut te ini ne impehelevelk din keyta su apey mehaan ne ebpekeuma arà se Hewii Rin. Na benar iya ini se migkahi ku ne egkeamin-amin egketutung ke langit ne langun ne egkekita ketà ne egketunag te apuy.

<sup>13</sup> Ugaid ne sikitew, ne edtehad ki rut te ebpenerengen tew ne behu en ne tanà wey langit ne impasad keytew te Eleteala. Ne iyan edatù ketà ne si Hisus ne metidtu se kedatù din.

<sup>14</sup> Na menge suled, tehaad te arà ne hewii se edteharan tew, ne id-amin tew ke hinawa tew te ed-ulaula te kiyug te Eleteala su apey warà meraat kayi te keytew ne igkesawey rin ketà te kebpekeuma rin wey apey melinew se hinawa ta diyà te kandin.

<sup>15</sup> Na kenà niyu lipati te iyan kenà pà kedlived ni Hisus ke Kerenan tew kayi su apey ruen hewii dut te menge etew ne warà pà mebperetiyya ne ebpekedsendit ne ebpekeliyu rut te salà dan. Ne iring din ded dema ke impesabut keniyu te suled tew ne si Pablo diyà te surat ne impeewit din keniyu su insurat din ke impesabut kandin te Eleteala.

<sup>16</sup> Diyà te langun ne surat din ne impenudtul din mekeatag te ini se hewii te kedlived ni Hisu Kristu kayi. Duen dema impenurù din diyà te menge surat din ne merehen ne egkesebutan, tembù be ke menge etew ne warà netuenan dan dut te benar ne penurù wey ke menge etew ne melemu ne eduma dut te kenà benar su mibèbeelan dà ne ebpekesuwey ran dut te meana rin. Ne kenà arà dà se insurat ni Pablo ne midsuwey ran dut te meana rin su iring ded se mid-ulaula ran dut te ruma ne impesurat ne Lalag te Eleteala. Tembù be edusaan dan te Eleteala kayi te mid-ulaula ran.

<sup>17</sup> Ugaid ne sikiyu ne menge suled ku, tehaad te impenudtul ku en keniyu neraan mekeatag te ini se ebpenurù te tarù, ne uram kew su apey kew kenà ebpekeruma dut te tarù ne penurù dan. Su embiya ebperumaruma kew kandan, ne egkereetan kew su ke benar ne penuruan ne mibperetiyya kew ne egkeawà diyà te keniyu.

<sup>18</sup> Na iyan meupiya ne edtentenuran tew ne ibpeiseg tew pà ini se neheraman tew ne penaub ni Hisu Kristu ke Kerenan tew ne mihpeliyu keytew su apey ini se nesebutan tew mekeatag dut te impesabut din ne ibpeiseg dema. Ne sikandin dema ke edeyuen ta guntaani wey taman te taman.

Ini rà taman se surat ku.

*Pedro*

## Ke Neuna ne Surat Ni Juan

*Mibpebaluy ne Etew si Hisu Kristu ke ed-ingaranan ne Lalag te Eleteala*

<sup>1</sup> Ini se surat ku riyà te keniyu ne mekeatag ki Hisu Kristu ne iyan ed-ingaranan te Lalag ne ebpuunan te umur ne warà edtemanan din. Daan en sikandin te warà pà limbaha misan engkey en ne nelimbag. Ne ketà te mibpebaluy sikandin ne anak te menusiya ne nekita rey ini se ed-ul-ulaan din, ne nerineg dey ke lalag din, ne midsinggur dey sikandin ne tidtu ne etew.

<sup>2</sup> Uya, ketà te nevaluy rin ne etew, ini se ebehey te umur, ne nekita rey sikandin. Tembù be ebpuanudul key keniyu ini se nekita rey ne ibpesabut dey mekeatag te sikandin ne ebpuunan te umur ne warà edtemanan din. Daan en sikandin ne ruma dut te Amey rin ne Eleteala, ne mibpengkayi ne mibpekita kayi te kenami.

<sup>3</sup> Na ini se nekita rey wey ini se nerineg dey ne ini en se ebpuanudul dey keniyu su apew sikiyu ne duma rey su mibpekidseveka key rut te Amey tew ne Eleteala wey ke Anak din ne si Hisu Kristu.

<sup>4</sup> Tembù be edsuratan ku sikiyu su apew ruen keilut te kehalew tew.

*Ke Eleteala ne Ebpuunan te Rayag*

<sup>5</sup> Iyan dey nerineg diyà te ki Hisu Kristu ne ini se ibpesabut dey riyà te keniyu: ne Eleteala ke ebpuunan te rayag su warè en misan deisek ne merusirem diyà te kandin.

<sup>6</sup> Ne embiya egkehiyen ta ne mibpekidseveka ki en te Eleteala ugaid ne diyà ki pà ed-ubpà te merusirem ne iyan din meana ne meraat pà se ulaula ta, ne edtarutarù ki su ini se ed-ul-ulaan ta ne kenà eduma te kiyug te Eleteala.

<sup>7</sup> Ugaid ne embiya ed-ubpà ki riyà te rayag iring te riyà te rayag ke Eleteala, ne ruen meupiya ne kedsusuled ta. Ne ebmelinis ki rut te langun ne salà ta su atag dut te lengesa ni Hisus ke Anak din ketà te kinepatey rin.

<sup>8</sup> Embiya egkahi ki te warà salà ta, ne edlimbungan ta ini se hinawa ta ne ke benar ne tuluuwen ne kenà kayi te hinawa ta.

<sup>9</sup> Ugaid ne embiya ebpehimbenar ki riyà te Eleteala te ruen salà ta, ne ebpeseharen din ini se salà ta ne ed-ihewanan din ke hinawa ta rut te langun ne ulaula ta ne meraat. Su ini se migkahi rin ne edtumanen din ini se impasad din.

<sup>10</sup> Ugaid ne embiya egkahi ki te warà salà ne mid-ulaula ta, ne ebpehinteruan ta ke lalag te Eleteala ne warà te hinawa ta ke lalag din.

## 2

*Ini ne Mekeatag te si Hisu Kristu ke Edtindeg Keyta diyà te Eleteala*

<sup>1</sup> Edsuratan ku sikiyu, minge anak ku, su ralan te edtavang keniyu su apew kenà kew mekedsalà. Ugaid ne embiya ruen ebpekesalà, ne ruen edtindeg keytew diyà te Amey tew ne Eleteala ne si Hisu Kristu ini ne metidtu nevenar se ulaula rin.

<sup>2</sup> Su sikandin se midtihis se lengesa rin dut te kinepatey rin apew meawà ini se salà ta, ne kenà ini rà se salà ta su misan ke salà dema dut te langun ne minge etew kayi te ampew te dunya.

<sup>3</sup> Ne iyan egkekita ne benar ini se mibpekidseveka ki en te Eleteala ne ini se edumaan tew te idsuhù din.

<sup>4</sup> Ne embiya ruen egkahi te mibpekidseveka sikandin te Eleteala ugaid ne kenà din edumaan te idsuhù te Eleteala kandin, ne edtarutarù sikandin ne ke benar ne tuluuwen ne kenà riyà te hinawa rin.

<sup>5</sup> Ugaid ke etew ne eduma te lalag te Eleteala, ne sikandin se ruen meilut ne limù te Eleteala. Ne egkekita te benar ne mibpekidseveka ki te Eleteala.

<sup>6</sup> Piya engkey en ne etew ne egkahi te mibpekidseveka sikandin te Eleteala, ne iyan iya se metidtu se ed-ul-ulaan din iring te ketidtu ne ed-ul-ulaan ni Hisus te kayi pà sikandin te ampew te dunya.

*Ini ne Mekeatag te Behu ne Suhù*

<sup>7</sup> Na minge suled ku ne igkelimù ku, ini se suhù ne idsurat ku en keniyu kayi ne kenà behu pà su rengan ini se impenurù keniyu. Su egenat te behu kew pà ne mibperetiyaya ki Hisus ne nerineg niyu ini se suhù mekeatag te kebpelimimuey tew.

<sup>8</sup> Ne misan daan en ini se suhù ne iring te behu pà su iyan nesebutan ta mekeatag te ini se suhù ne neumanan pà maa te impekita ni Hisus ini kayi te kinepatey rin ne ini se

suhù se edumaan niyu rema. Su egkeawà en ke kerusirem kayi te keyta, ne egkerayahan ki rut te tidtu ne tuluuwen.

<sup>9</sup> Ne embiya ruen egkahi te riya sikandin te kerayahan ugaid ne ebpekidkunterà sikandin te minge ruma rin te ebperetiyyaya, ne kayi red sikandin te kerusireman.

<sup>10</sup> Su ke etew ne ruen limù din te ruma rin, ne arà imbe ke ed-ubpà diyà te merayang ne warà netahù te hinawa rin ne ebpekedsalà ke ruma rin.

<sup>11</sup> Ugaid ne ke etew ne ebpekidkunterà te ruma rin, ne sikandin ne diyà pà lavew te merusirem. Su iring te ebpekeyangapyangap sikandin, ne kenà din egketueanan ke endei sikandin ebpesinaru su nerusireman ini se itungan din.

<sup>12</sup> Edsuratan ku sikiyu, minge anak ku, su etew kew en ne nepesehad se minge salà dan su atag dut te kinepatey ni Hisu Kristu.

<sup>13</sup> Ne sikiyu ne minge lukes ne meama, edsuratan ku sikiyu su mibpekidseveka kew en ki Hisu Kristu, ne daan en sikandin te warà pà limbaha te misan engkey en. Ne sikiyu ne minge menguwed, edsuratan ku sikiyu, su warà kew megaga te kebpenggeram dut te datù te pekaid.

<sup>14</sup> Na, minge anak ku, edsuratan ku sikiyu su netueanan niyu en ke Amey ta ne Eleteala.

Ne sikiyu ne minge lukes ne meama, edsuratan ku sikiyu su mibpekidseveka kew ki Hisu Kristu, ne daan en sikandin te warà pà limbaha te misan engkey en. Ne sikiyu ne minge menguwed, edsuratan ku sikiyu su meilut se kebperetiyyaya niyu, ne intahù niyu te hinawa niyu ke Lalag te Eleteala ne warà kew megaga te kebpenggeram dut te datù te pekaid.

<sup>15</sup> Kenà niyu ipeuna te hinawa niyu ke meraat ne betasan kayi te ini se dunya etawa ini se igkenuhuni rut te minge etew kayi te ampew te dunya. Su embiya ruen etew ne ini se rekela te hinawa rin, ne egkekita se warà limù din dut te Amey tew ne Eleteala.

<sup>16</sup> Su langun ne igkenuhuni rut te minge etew kayi te ampew te dunya iring te ini se egkiyuhan dut te lawa ran, ke ebpatà te nanam dan wey kebpereyùdeyù dan mekeatag te kearen dan, ne langun kayi ne kenà riya ebpuun te Amey tew ne Eleteala su kayi rà ebpuun dut te minge etew te ampew te dunya.

<sup>17</sup> Ne ini se kelibutan wey langun ne igkenuhuni rut te minge etew kayi ne egkeawà. Ugaid ke etew ne edtuman dut te kiyug te Eleteala ne kenà egkeawà su ed-ubpà diyà te Eleteala taman te taman.

*Ini ne Mekeatag te Iyan Ed-ingaranan te Egkunterà ki Hisu Kristu*

<sup>18</sup> Minge anak ku, mehaan en ne ebpekeuma ke ketepusan dut te ini se dunya. Ne nerineg niyu en te embiya mehaan egkepupus ini se dunya ne ruen edlepew ini se ed-ingaranan te Kunterà ni Hisu Kristu. Na guntaani en ruen merakel ne midlepey iring kayi ne egkunterà ki Hisus, tembù be netueanan tew ne mehaan en ke kegkewarà kayi te dunya.

<sup>19</sup> Ne ini se minge kunterà ni Hisu Kristu ne engkungkun ne minge ruma tew te egkevurunan te minge mibperetiyyaya ki Hisus, ugaid ne midsuwey ran kayi te keyta su kenà dan tidtu ne ruma tew te ebperetiyyaya. Su embiya sikandan se tidtu ne ruma tew te ebperetiyyaya, ne warà dan medsuwey keyta. Ugaid ne midsuwey ran, ne kayi te ini se kedsuwey ran ne egkekita te kenà dan tidtu ne ruma tew te ebperetiyyaya.

<sup>20</sup> Ugaid ne sikiyu ne kenà iring ketà su midtelimà kew en dut te Kedeseanan ne Ebpetuntul te Menusiya ne midsuhù ni Hisu Kristu, tembù be netueanan niyu langun ini se tidtu ne penurù.

<sup>21</sup> Kenà ku iyan kedsurati keniyu su warà niyu mesebuti ke tidtu ne penurù, ugaid ne iyan ku kedsurati keniyu su nesebutan niyu en. Ne nesebutan niyu rema ne warà misan deisek ne tarù ne riya ebpuun te benar ne penurù.

<sup>22</sup> Engkey rapat se teruen embiya kenà ini se etew ne egkahi te kenà si Hisus ke Impasad te Eleteala ne Ebperetuen te langun. Su piya engkey se egkahi te iring ketà ne kunterà sikandin ni Hisu Kristu, ne kenà din edtelimaan ke Amey tew ne Eleteala wey ke Anak din.

<sup>23</sup> Su piya engkey ne etew ne kenà ebperetiyyaya ki Hisus ke Anak te Eleteala, ne kenà ded ebperetiyyaya dut te Amey rin ne Eleteala. Ugaid ke etew ne mibperetiyyaya ki Hisus ke Anak te Eleteala, ne sikandin dema se intahù te hinawa rin ke Eleteala.

<sup>24</sup> Tembù be ini se penurù ne impesabut keniyu te pehaney kew pà mebperetiyyaya ki Hisus, ne ini se penurù ne iyan niyu idtahù te hinawa niyu. Su embiyya kenà egkeawà ini se neketahù te hinawa niyu, ne kenà egkepakey ne kenà kew red egkeseveka rut te Amey tew ne Eleteala wey ke Anak din ne si Hisu Kristu.

<sup>25</sup> Ne ini se impasad ni Hisu Kristu keyta ne ibehey rin ini se umur ne warà edtemanan din.

<sup>26</sup> Ini ne ebpesebutan ku keniyu kayi te surat ku ini su atag dut te ini se menge eppenurù te tarù ne edlimbung perem keniyu.

<sup>27</sup> Ugaid ne sikiyu, ne midtelimà kew en dut te Kedesenan ne Ebpetuntul te Menusiyyà ne kenian ded te keniyu. Tembù be kenà kew ebpekepemengà te eppenurù keniyu su sikandin ne kenian ded te keniyu se eppenurù keniyu te langun ne egkiyuhan te Eleteala ne ebpesebutan keniyu. Ne iyan din ibpenurù ne kenà tarù ugaid ne tidtu nevenar. Tembù be dumai niyu ini se ibpesabut din keniyu su apey kew ebpekidseveka ki Hisu Kristu.

<sup>28</sup> Uya menge anak ku, embiyya layun meilut se kebpekidseveka niyu ki Hisu Kristu ne kenà ki egkeandek ne kenà ki egkeyeyyaan ne ed-itindeg diyà te etuvangan din ketà te kedlived din kayi.

<sup>29</sup> Netuenan ta te metidtu si Hisu Kristu, dutun ne netuenan ta rema te piya engkey ne etew ne metidtu se ed-ul-ulaan din ne nevaluy en sikandin ne anak te Eleteala.

### 3

#### *Ini ne Mekeatag te Menge Anak te Eleteala*

<sup>1</sup> Dekelà nevenar se limù dut te Amey tew ne Eleteala keyta! Su sabap dut te ini se rekela ne limù din ne ed-ingaranan kiyu rin te menge anak din, ne benar ne menge anak kiyu rin. Ugaid ke menge etew te ampew te dunya ne egkunterà kandin ne kenà dan egkesebutan te anak kiyu rut te Eleteala su warà dan medtelimà kandin.

<sup>2</sup> Menge suled ku ne igkelimù ku, menge anak kiyu en te Eleteala. Ne misan warà dey pà metueni se egkevaluy ki keuremà, ugaid ne netuenan ta te ketà te kedlived ni Hisus kayi ne egkesembian ki iring kandin su ketà ne egkekita tew en sikandin.

<sup>3</sup> Tembù be piya engkey ne etew ne edsarig te edtumanen te Eleteala ini se penareng din, ne iyan iya se mebantey te hinawa rin su apey warà ebpekesawug ne meraat dut te ed-ul-ulaan din iring te warà misan deisek ne meraat ne nekesawug dut te mid-ulaula ni Hisu Kristu.

<sup>4</sup> Piya engkey ne etew ne nekesalà ne midsurang dut te penduan te Eleteala. Su ke ulaula ne ed-ingaranan te salà ne piya engkey ne ulaula ne edsurang te penduan te Eleteala.

<sup>5</sup> Netuenan niyu en te mibpebaluy si Hisu Kristu ne etew kayi te ampew te dunya su apey ebpepatey ne egkeawà ke salà dut te langun tew ne menge etew. Ne netuenan niyu rema ne warà misan deisek ne salà din.

<sup>6</sup> Tembù be ke etew ne iyan se layun meilut se kebpekidseveka rin ki Hisus, ne kenà din idlaus ke ked-ulaula rin te meraat. Ugaid ke etew ne idlaus din ke ked-ulaula rin te meraat, ne ini se etew ne warà din intahù te hinawa rin te iyan kinepengkayi ni Hisus, ne warà din pà peretiyyaya sikandin.

<sup>7</sup> Menge anak ku, ne uram kew su apey warà etew ne ebpekesuwey keniyu. Su ke etew ne iyan din ed-ul-ulaan ini se metidtu iring ki Hisus, ne sikandin se metidtu.

<sup>8</sup> Ugaid ke etew ne idlaus din ke ked-ulaula rin te meraat, ne si Setanas ke datù te pekaid se ebayàbayà kandin su igenat dà te rudsuan din dà te ini se kelibutan ne iyan ed-ul-ulaan ni Setanas ne ke meraat. Tembù be mibpengkayi te dunya ke Anak te Eleteala su apey egketalew rin ini se gehem te ulaula ni Setanas.

<sup>9</sup> Piya engkey ne etew ne nevaluy ne anak te Eleteala ne kenà din idlaus ini se ked-ulaula rin te meraat, su ketà te nevaluy en ne anak te Eleteala ne midubpù sikandin te Amey rin ne Eleteala. Ne geina te iyan din Amey rin ke Eleteala, ne kenà egkepakey ne idlaus dan pà ke ked-ulaula ran te meraat.

<sup>10</sup> Tembù be egketuasan ke menge etew ne midubpù te Amey ran ne Eleteala wey ke menge etew ne anak ded ni Setanas. Su ke etew ne kenà ed-ulaula te metidtu wey warà limù din te menge ruma rin, ne kenà sikandin ke anak te Eleteala.

#### *Ini ne Mekeatag te Kebpelimlimuey tew*

<sup>11</sup> Iyan impenurù keyta egenat te rudsuan te kebperetiyyaya ta ne ebpelimlimuey ki.

<sup>12</sup> Kenà ki med-iring ki Kain te midtuhut ne si Setanas se mibayàbayà te hinawa rin, ne mibunù din ini se ari rin. Ne meambe ke mibunù din ini se ari rin? Mibunù din

kayi te kegkesihi rin su iyan mid-ulaula te ari rin ne metidtu, ugaid ne ke ulaula rin ne meraat.

<sup>13</sup> Tembù be minge suled, kenà kew meinuinu embiya ebpekidkunterà keniyu ini se minge etew kayi te ampew te dunya ne warà pà mibperetiayaya.

<sup>14</sup> Ugaid ne sikami ne minge mibperetiayaya ne mid-awà key rut te raan ne mibpesekupan dey te iyan dey rà egkepenareng ne kemetayen, su ketà te mibpesakup key te Eleteala ne nekekuwa key te umur ne warà edtemanan din. Netuenan tew ini su ruen en limù tew te minge ruma tew. Ne ke etew ne warà limù din dut te minge ruma rin ne iyan din pà egkepenareng ne kemetayen ne warà edtemanan din.

<sup>15</sup> Su piya engkey ne etew ne ebpekigkunterà te ruma rin, ne riyà te etuvangan te Eleteala ne iring te terevunù. Ne netuenan tew te ini se etew ne ebunù, ne warà din pà metelimà te umur ne warà edtemanan din.

<sup>16</sup> Iyan tuus te tidtu ne limù ne ke kinepebpatey ni Hisu Kristu su apew ebpeleyu keytew dut te salà tew. Tembù be iyan iya se ruen limù tew rut te minge ruma tew misan ibpatey ta sabap te tavang ta kandan.

<sup>17</sup> Ne embiya ruen etew ne ruen id-uyag din ne egkekita rin ini se ruma rin ne kurang nevenar ugaid ne kenà din edtevangsan su warà kegkeyru rin, ne kenà egkepakey ne ruen limù din te Eleteala.

<sup>18</sup> Minge anak ku, ini se ralan te kebpekita ta te limù ta kayi te minge ruma ta ne kenà kayi rà te lalag ne egemew te bèbà ta, ugaid ne kayi te kedtavang ta kandan ne egenat te limù ta.

<sup>19</sup> Na embiya iring ketà se kebpeylimuey tew ne egketuenan tew te sikitew iya ne minge anak dut te tidtu ne Eleteala. Ne ebmelintad ke hinawa tew riyà te etuvangan te Eleteala

<sup>20</sup> misan iyan ta egkesenditan ke hinawa ta su atag dut te daan en ne salà tew. Melintad ke hinawa tew su netuenan tew te iyan pà dekelà ke Eleteala su netuenan din te langun taman.

<sup>21</sup> Na minge suled ku ne igkelimù ku, embiya ini se hinawa ta ne kenà edsendit keyta, ne ruen kegkesirih keyta embiya ebpengeningeni ki riyà te Eleteala

<sup>22</sup> ne piya engkey ne ebuyuen ta riyà te kandin ne ibehey rin keyta su ini se idsuhù din ne iyan ta edtumanen ini se kiyug din ne iyan edumaan ta.

<sup>23</sup> Ne iyan din insuhù kenitew ne ebperetiayaya ki rut te Anak din ne si Hisu Kristu wey ebpeylimuey ki iring dut te insuhù dema ni Hisu Kristu keyta.

<sup>24</sup> Ne piya engkey ne etew ne edtuman te suhù te Eleteala, ne mibpekidseveka en te Eleteala wey riyà ed-ubpà ke Eleteala te kandin. Netuenan ta te kayi ed-ubpà ke Eleteala te keyta su atag dut te tavang te Kedeseenan ne Ebpetuntul te Menusiyà ne imbehey rin keyta.

## 4

<sup>1</sup> Minge suled ku ne igkelimù ku, kenà kew peretiayaya dut te langun ne egkahi ne impekahi ran kun te Kedeseenan ne Ebpetuntul te Menusiyà. Ugaid ne perisaan niyu pà ke ebpenurù dan apew niyu metueni ke riyà be ebpuun ini te Eleteala etawa kenà. Su merakel se midlepew kayi te ampew te dunya ne uvag kun te ebpelambas sikandan te Lalag te Eleteala.

<sup>2</sup> Ne iyan dalan te kegketueni niyu embiya ke Kedeseenan ne Ebpetuntul te Menusiyà ne riyà ebpuun te Eleteala se ebpekahi kandan ne ini. Embiya egkahi ke etew te impeanak te menusiyà kayi te ampew te dunya si Hisu Kristu, ne riyà ebpuun te Eleteala ke lalag din.

<sup>3</sup> Ugaid ne embiya ruen egkahi te warà impeanak te menusiyà si Hisu Kristu, ne kenà riyà ebpuun te Eleteala se lalag din ugaid ne ini se ebpenurù din ne riyà ebpuun te Egkunterà ki Hisu Kristu. Su nerineg niyu en te ini se Egkunterà ki Hisu Kristu ne ebpekeuma, ne guntaani ne ruen kandin ne minge etew ne ini en.

<sup>4</sup> Ugaid ne sikiyu, minge anak ku, sikiyu ne nevaluy ne minge anak te Eleteala, tembù be netalew niyu ini se uvag kun ne ebpelambas te Lalag te Eleteala su warà kew melimbungi rut te lalag dan ne kenà ebpuun te Eleteala. Su ke Eleteala ne ed-ubpà diyà te hinawa niyu ne muna pà se gehem din dut te ki Setanas ne ed-ubpà ketà te hinawa te ini se minge etew rà kayi te ampew te dunya ne egkunterà ki Hisus.

<sup>5</sup> Su sikandan ne uvag kun ne ebpelambas te Lalag te Eleteala ne iyan dan ebpenurù ne kayi rà dè duen te itungan te minge etew te ampew te dunya. Tembù be ini se minge etew te ampew te dunya ne kenà eduma te Eleteala ne idtaan dan ke telinga ran te kegkesuat dan te ebpemingeg.

<sup>6</sup> Ugaid ne sikitew, nevaluy kiyu en ne mence anak te Eleteala, tembù be ke mence etew ne kiyug ne eduma te Eleteala ne idtaan dan ke telinga ran su ebpeming dan te penurù ta. Ugaid ke mence etew ne kenà egkiyug ne eduma te Eleteala, ne kenà dan ebpeming te penurù ta. Ketà be ne egketuasan tew ke mence etew ne eduma rut te penurù ne benar wey ke mence etew ne eduma rut te tarù.

<sup>7</sup> Mence suled ku ne igkelimù ku, pelimlimuey kiyu iya su riyà ebpuun te Eleteala ini se limù. Ne ke mence etew ne ruen limù dan te mence ruma ran, ne ini ke mence etew ne nevaluy ran ne mence anak te Eleteala ne midtelimà dan sikandin.

<sup>8</sup> Ugaid ne ini se warà limù dan te mence ruma ran, ne tuus te warà dan medtelimà te Eleteala. Su kayi te langun ne ed-ul-ulaan te Eleteala ne egkekita ke limù din.

<sup>9</sup> Impekita rin ke limù din keyta kayi te midsuhù din ke budtung ne Anak din kayi te ampew te dunya su apey ruen umur tew ne warà edtemaninan din kayi egenat te kinepeimatey rin.

<sup>10</sup> Na ini ke tidtu ne limù. Su kenà sikita ke midlimù te Eleteala, ugaid ne sikandin ke midlimù keyta kayi te insuhù din ke Anak din su apey ebpekepeiyu keyta rut te kedusa te salà tew sabap dut te kinepebpatey ni Hisus kenita.

<sup>11</sup> Mence suled ku ne igkelimù ku, geina te iring kayi te rekelà ne limù te Eleteala kenitew, ne sikitew iyan iya se ebpelimlimuey ki.

<sup>12</sup> Warà etew iya ne nekekita te Eleteala. Ugaid ne embiya ebpelimlimuey ki, ne egketuasan ne kayi en te hinawa tew ke Eleteala, ne ebpeiseg ini se limù din kayi te hinawa tew taman te meilut.

<sup>13</sup> Ne netueanan tew te mibpekidseveka ki te Eleteala wey kayi en te keyta sikandin su atag dut te Kedeseenan ne Ebpetuntul te Menusiyà ne impeubpà din kayi te hinawa ta.

<sup>14</sup> Nekita rey kayi te mata ta ke Anak te Eleteala ne midsuhù din kayi te ampew te dunya ne ebpebaluy ne etew su apey ebpeiyu te mence etew te kedusa te salà dan. Ne ini se nekita rey ne ebpemenudtulen dey diyà te mence etew.

<sup>15</sup> Ne piya engkey ne etew ne egkahi te si Hisus iya ke Anak te Eleteala, ne kayi en ke Eleteala te kandin ne iring din ded ne mibpekidseveka sikandin te Eleteala.

<sup>16</sup> Ketà be ne netueanan tew te igkelimù kiyu rin ne miduran ki kayi te limù din keyta. Su kayi te langun ne ed-ul-ulaan te Eleteala ne egkekita ke limù din. Ne ke etew ne ruen limù din te Eleteala wey ke mence ruma rin, ne meilut se kebpekidseveka rin te Eleteala wey riyà dema te kandin ne ed-ubpà ke Eleteala.

<sup>17</sup> Ne ini se limù ta te Eleteala wey kayi te mence ruma ta ne ed-ilutan te Eleteala su apey ki kenà egkeandek ketà te ed-itindeg ki diyà te etuvangan din dut te hewii ne kedtumbang din keyta. Iyan dey kenà kegkeandek su ini se ulaula ta misan kayi ki red te ampew te dunya ne ebpekeiring kiyu ki Hisus.

<sup>18</sup> Su embiya tidtu se limù ta te Eleteala, ne kenà ki egkeandek su warà andek ne nekesawug dut te tidtu ne limù. Ugaid ne ke etew ne egkeandek, ne ini ke etew ne ebpenareng te kedusa te Eleteala ne ebpekeuma kayi te kandin ne tuus ini te warà pè meilut ini se limù din.

<sup>19</sup> Duen limù ta te Eleteala su sikandin ke neuna ne nelimù keyta.

<sup>20</sup> Ne embiya ruen etew ne egkahi te igkelimù din kun ke Eleteala ugaid ne warà limù din dut te ruma rin, ne teruen sikandin. Su embiya warà limù din dut te ruma rin ne egkekita, ne iyan pè be ikelimù din ke Eleteala ne kenà din egkekita?

<sup>21</sup> Su iyan insuhù keyta te Eleteala te piya engkey ne etew ne ruen limù din te Eleteala ne iyan iya se igkelimù din dema ini se ruma rin.

## 5

*Engkey se Kebpeketalew ta te Penggeram dut te Datù te Pekaid Kayi te Ampew te Dunya?*

<sup>1</sup> Piya engkey ne etew ne mibperetiyya te si Hisus ke Impasad te Eleteala ne Ebperetuen te langun, ne anak en sikandin te Eleteala. Ne piya engkey ne etew ne egkelimù dut te Amey tew ne Eleteala ne egkelimù dema ini se mence anak din.

<sup>2</sup> Ne embiya tidtu se kedlimù tew te Eleteala wey ke kedtuman tew dut te insuhù din, ne egketueanan tew te tidtu rema ini se kedlimù tew te ruma tew ne mence anak te Eleteala.

<sup>3</sup> Su ke tuus te igkelimù tew ke Eleteala ne iyan keduma tew rut te insuhù din. Ne kenà merehen ini se keduma tew rut te insuhù din

<sup>4</sup> su sikitew langun ne nevaluy ne anak te Eleteala ne ebpeketalew ki rut te penggeram te datù te pekaid ne ebayabayà kayi te ampew te dunya. Su iyan tew kebpeketalew kandin ne ini se kedsarig tew ki Hisu Kristu.

<sup>5</sup> Uya, ke etew rà ne mibperetiyyaya te si Hisus iya ke Anak te Eleteala se ebpeketalew dut te datù te pekaid ne ebayàbayà kayi te ampew te dunya, warà ruma.

*Ini ne Mekeatag te Iyan Edtitihus keyta te si Hisu Kristu iya ke Anak te Eleteala*

<sup>6</sup> Ne si Hisu Kristu ke Anak te Eleteala ne impepengkayi te ampew te dunya. Egketuusan ini kayi te mibpebunyag te wayig wey mibpetudà te lengesa rin kayi te kinepebpatay rin. Kenà kayi rà te kebpebunyag din te wayig se tuus su kayi rema te kebpetudà din te lengesa rin. Ne ke Kedesenan ne Ebpetuntul te Menusiya se iyan edtitihus kayi te keyta te si Hisus ke Anak iya te Eleteala, ne netuenan ta te sikandin ne kenà edlalag te tarù.

<sup>7</sup> Ketà ne tetelu ini se ebpesabut keyta te si Hisu Kristu ke Anak iya te Eleteala:

<sup>8</sup> ruen ke Kedesenan ne Ebpetuntul te Menusiya, ke wayig, wey ke lengesa rin ne impetudà din. Ne neuyun ini se tetelu kayi te impesabut dan keyta.

<sup>9</sup> Embiya ebperetiyyaya ki ke kedtitihus kayi te minge etew rà duen, ne lavi pà ne ebpekeperetiyyaya ki te kedtitihus te Eleteala. Ne sikandin se mibpesabut keyta te si Hisus iya ke Anak din.

<sup>10</sup> Ketà be embiya ruen etew ne mibperetiyyaya kayi te Anak te Eleteala, warà keduwaruwa te hinawa rin te benar ini se kedtitihus te Eleteala mekeatag ki Hisus su intahù te hinawa rin. Ugaid ke etew ne kenà ebperetiyyaya dut te migkahi te Eleteala te si Hisus ke Anak din, ne iring te mibpehinteruan ke Eleteala kayi te ini se etew ne kenà ebperetiyyaya te benar ne impesabut dut te Eleteala.

<sup>11</sup> Su iyan impesabut te Eleteala keyta ne ruen umur ne warà edtemanan din ne imbehey rin keyta, ne imbehey rin ini se umur impepeyayà te Anak din ne si Hisus.

<sup>12</sup> Dutun ne piya engkey ne mibpekidseveka ki Hisus ke Anak te Eleteala, ruen umur din ne warà edtemanan din. Ugaid ne piya engkey ne warà mebpekidseveka ki Hisus ke Anak te Eleteala, warà umur din ne warà edtemanan din.

*Ini ne Mekeatag te Umur ne Warà Edtemanan Din*

<sup>13</sup> Langun kayi ne insurat ku keniyu ne mibperetiyyaya en dut te Anak te Eleteala su apey mevag-et se kegketuani niyu te ruen en umur niyu ne warà edtemanan din.

<sup>14</sup> Ne mevag-et se kedsarig tew ke ebpengeningeni ki riyà te Eleteala, su netuenan tew te piya engkey ne ebpemuyuen tew ne egkeayun rut te kiyug din ne ibehey rin.

<sup>15</sup> Su netuenan tew ne ebpehinehen din ke langun ne ebpemuyuen tew riyà te kandin, dutun ne netuenan tew rema ne imbehey rin en kenitew ini se ebpemuyuen tew.

<sup>16</sup> Ne embiya egkekita nu te nekesalà ini se ruma nu te ebperetiyyaya ugaid ne ke rimahas te salà din ne kenà iyan ebpekeated kandin diyà te kemetayen ne warà edtemanan din, ne ipengeningeni nu te Eleteala sikandin te ebpehad te Eleteala kandin ini se salà din. Ne ebpekevehey kandin te Eleteala te umur ne warà edtemanan din embiya ini se salà din ne kenà iyan ebpekeated kandin diyà te kemetayen ne warà edtemanan din. Ne embiya ruen etew ne nekesalà te iyan ebpekeated kandin diyà te kemetayen ne warà edtemanan din, ne kenà ku egkehiyen te ini ne etew ne ipengeningeni nu te Eleteala.

<sup>17</sup> Langun ne meraat ne ed-ul-ulaan ne salà, ugaid ne ruen salà ne iyan rimahas din ne kenà ebpekeated kandin diyà te kemetayen ne warà edtemanan din.

<sup>18</sup> Netuenan tew te warà etew ne nevaluy ne anak din ne edlaus te ed-ul-ulaan ne meraat, su ke Anak te Eleteala se edtuganur kandin su apey kenà meewit sikandin ni Setanas.

<sup>19</sup> Netuenan tew ne minge anak ki en te Eleteala. Ugaid ne ini se minge etew dè duen kayi te ampew te dunya, ne ebeyveyaan sikandan ni Setanas.

<sup>20</sup> Ne netuenan tew rema te ke Anak te Eleteala se mibpengkayi te ampew te dunya su ebperayan te itungan ta su apey egkeheraman te hinawa ta ke tidtu ne Eleteala. Ne mibpekidseveka ki en kandin ne iyan tidtu ne Eleteala su mibpekidseveka ki en dut te Anak din si Hisu Kristu. Sikandin ke tidtu ne Eleteala ne sikandin ke ebpuunan te umur ne warà edtemanan din.

<sup>21</sup> Menge anak ku, pekeriyù kew te ked-erapa niyu rut te langun ne kenà iya tidtu ne Eleteala.

Arà dà taman.

Juan



## Ke Ikeruwa ne Surat Ni Juan

<sup>1</sup> Siaken se edsurat ini ne pekilukesen dut te minge mibperetiyaya ki Hisus. Ne idsurat ku ini riyà te keykew ne meritan ne nepemilì te Eleteala wey ke minge anak nu. Su rekela ku sikiyu te hinawa, ne kenà siaken dà se rekela se hinawa rin keniyu su langun ne nekesabut en dut te benar ne penurù mekeatag ki Hisus ne rekela kew red dema nikandan te hinawa.

<sup>2</sup> Ne iyan din atag te rekela te hinawa rey sikiyu su sabap dut te benar ne penurù ne neketahù kayi te hinawa tew ne warà kegkeawà din taman te taman.

<sup>3</sup> Ne ebpeneuven ki rut te Amey tew ne Eleteala wey ke Anak din ne si Hisu Kristu, ne igkeyru ki nikandan wey ebehayan kiyu red te melintad ne hinawa. Su ini se ibehay kenitew ne mibperetiyaya en te tidtu ne penurù wey ebpeylimimuey.

<sup>4</sup> Nehalew ad utew te netuenan ku ne ruen minge anak nu ne eduma en te tidtu ne penurù ne insuhù keytew dut te Amey tew ne Eleteala.

<sup>5</sup> Tembù be ruen ebuyuen ku keykew, Bayi, te sikitew ne minge mibperetiyaya ne iyan iya se ebpeylimimuey ki. Ne kenà behu pà ini se suhù ne idsurat ku kayi, ugaid ne ebpetentenan ku keniyu ke suhù ne imbehey keytew te pehaney ne mibperetiyaya ki ki Hisus.

<sup>6</sup> Su kayi te kebpelimlimuey tew ne edumaan tew ke insuhù te Eleteala kenitew. Ne ini se insuhù din kenitew ne nerineg niyu te pehaney en, ne iyan iya se ebpeylimimuey kiyu.

<sup>7</sup> Su ruen merakel guntaani ne midlepew kayi te ampew te dunya ne ebpenurù te tarù, su iyan dan ibpenurù ne warà kun in-anak si Hisu Kristu ne etew. Ne ini se ebpenurù te iring ketà ne sikandan ke edlimbung te minge etew wey egkunterà ki Hisu Kristu.

<sup>8</sup> Tembù be uram kew su apey kenà meawà diyà te keniyu ini se lalew rut te migelevek niyu, ugaid ne ebpekekuwa kew te langun ne impenehana te Eleteala keniyu.

<sup>9</sup> Su ke etew ne edsuwey rut te benar ne impenurù ni Hisu Kristu etawa ed-umanan din pà maa te tarù, ne warà mebpekidseveka sikandin te Eleteala. Ugaid ne ke etew ne iyan din egeweran te mevaher ke benar ne impenurù ni Hisu Kristu, ne mibpekidseveka sikandin dut te Amey tew ne Eleteala wey ke Anak din.

<sup>10</sup> Tembù be embiya ruen ebpekeuma riyà te keniyu ne kenà ebpenurù te ini se tidtu ne penurù ni Hisu Kristu, ne kenà niyu ipepemenayik diyà te baley niyu. Ne kenà niyu rema gelhelawa sikandin.

<sup>11</sup> Su misan kegalewhalew niyu rà sikandin, ne iring te ed-amung ka rut te ulaula rin ne meraat.

<sup>12</sup> Merakel perem se egkehiyen ku keniyu, ugaid ne kenà ku en idsurat kayi. Su ruen pegitungan ku ne ebpendiyan e red te keniyu apey kiyu ebpekekebitiyara su apey meilut se kegkehalew tew.

<sup>13</sup> Ne ebpinginginsà keniyu ini se minge anak dut te etevey nu ne nepemilì dema te Eleteala iring keniyu.

Ini rà se egkehiyen ku.

*Juan*

## Ke Iketelu ne Surat ni Juan

<sup>1</sup> Siaken se edsurat ini ne pekilukesen dut te minge mibperetiyya ki Hisus. Ne idsurat ku ini riyà te keykew, Gayu, ne meheget ne suled ku ne rekela kayi te hinawa ku.

<sup>2</sup> Suled ne meheget, ibpengeningeni ku sikew te Eleteala ne meupiya se egketemtemanan nu wey ebehayan ka te meupiya ne kedlelawa nu, su netuenan ku ne mevaher se kebperetiyya nu.

<sup>3</sup> Nehalew a nevenar dut te kebpekeuma kayi te minge suled tew riyà se ebpenudtul te meilit se keduma nu rut te tidtu ne penuruan, su ke langun ne ulaula nu kun ne ebpekeayun iya rut te benar.

<sup>4</sup> Su warà en ebpekelawan ne ebpekehalew kediey embiya ke kenà ke keringe ku ne ke minge anak ku te ebperetiyya ne edlaus te keduma ran dut te tidtu ne penuruan.

<sup>5</sup> Ne suled ku ne meheget, egkeserihan ka nevenar dut te kedtuganur nu te minge ruma tew te ebperetiyya ne mibpelinawet diyà te kenikew, su misan warà nu mekilala sikandan ne midtuganur nu red.

<sup>6</sup> Su ketà te mid-ulì dan kayi ne mibpenudtul dan dut te nengevurun ne mibperetiyya atag dut te limù ne impekita nu kandan. Embiya ed-awet dan pà maa diyà te keniyu, ne iyan meupiya ne edtevangen nu sikandan su apey ran mekelaus dut te ipanewan dan. Su ini imbe ke ebpekesuhat te hinawa te Eleteala.

<sup>7</sup> Su ini se ipanewan dan ne ebpemesabut dan te Meupiya ne Tudtl mekeatag ki Hisu Kristu, ne kenà dan edsarig te tavang dut te minge etew ne warà pà mibperetiyya.

<sup>8</sup> Tembù be iyan iya meupiya te sikami ne minge mibperetiyya se edtuganur te kurang dut te minge etew iring ketà su apey kiyu red dema ebpekeamung dut te helevek dan te kebperemesabut dut te tidtu ne penuruan.

<sup>9</sup> Ne ruen insurat ku mekeatag te ini riyà te minge mibperetiyya ne egkevurun ketà. Ugaid ne si Diyutripis ne kenà din ebpeminehen ini se lalag ku, su iyan din igkesuat ne sikandin se edlingeakan dut te minge mibperetiyya riyà.

<sup>10</sup> Tembù be embiya ebpekeuma a riyà te keniyu, ne ibpenudtul ku ini se langun ne meraat ne ed-ul-ulaan din wey ke tarù ne livakan din kedi. Ne kenà pà dutun dà taman, su kenà din edtugenuren ke minge ruma tew te ebperetiyya ne ebpekeuma riyà te keniyu. Ne embiya ruen edtuganur kandan ne ebengen din su kenà din idtuhut te ebpekeamung dan ketà te kegkevurun niyu te minge mibperetiyya.

<sup>11</sup> Na suled ku ne rekela te hinawa ku, kenà nu dumai ke minge meraat ne ulaula iring ketà, ugaid ne iyan nu dumai ne endei ke ulaula ne meupiya. Su ke etew ne ed-ulaula te iyan ebpekesuhat te hinawa te Eleteala, ne sikandin ke mibpesakup te Eleteala. Ugaid ke etew ne edlaus pà te ini ne ed-ul-ulaan ne meraatey, ne warà diyà te hinawa rin ini se Eleteala.

<sup>12</sup> Ugaid ne si Dimitriyu ne nereyù sikandin dut te langun. Su nekita ran en ne ingenat dà te rudsuan ne midumaan din ke benar ne impenurù kandin. Ne misan sikami ne edeyuen dey rema sikandin, ne netuenan nu se benar ini se egkehiyen ku.

<sup>13</sup> Merakel pà perem se egkehiyen ku keniyu, ugaid ne kenà ku en idsurat kayi.

<sup>14</sup> Su ruen pegitungan ku te kenà en meuhet ne ebpendiyan e red te keniyu, ne ketà ne ebpekebitiyara kiyu.

<sup>15</sup> Iyan ku kiyug ne ebehayan ka te kebmelilintad ne hinawa nu.

Langun ne minge suled ta kayi ne ebpengingsà kenikew. Ne ipeingguma nu red dema riyà te langun ne ruma ta riyà ini se pengingsà ku kandan.

Ini rà taman se egkehiyen ku. *Juan*

## Ke Surat Ni Hudas

<sup>1</sup> Siaken ini se edsurat ne si Hudas ne suled ni Santiago wey sugshuen ni Hisu Kristu. Ne edsuratan ku sikiyu ne mibpemili te Eleteala ne Amey tew ne nevaluy ne menge etew rin ne igkelimù din, ne ebentayan dema ni Hisu Kristu.

<sup>2</sup> Iyan ku kiyug ne egkeheraman niyu ke kegkeyru te Eleteala wey kebmelinew te itungan niyu wey limù ne egenat diyà te kandin.

*Ini ne Mekeatag te Egketemanan Dut te Ebpenurù te Kenà Metidtu*

<sup>3</sup> Menge suled ne igkelimù ku, mibpenemaran ku se kedsurat ku keniya mekeatag te peretiyaaya tew ne egkeheram te langun tew ne mibperetiyaaya. Ugaïd ne iyan migavan te itungan ku ne edsuratan ku pà sikiyu te kegkevag-et te itungan niyu te ed-itindeg dut te peretiyaaya niyu su ini se penurù se imbehey te Eleteala dut te menge etew rin ne kenà en egkeumanan te misan deisek dà.

<sup>4</sup> Su ruen menge etew ne warà adat dan te Eleteala ne nekeamung te kevrunan niyu ne engkungkun ne ebperetiyaaya te Eleteala ne ebpenurù te senge bias dut te peretiyaaya tew ne egkahi ran te neked-iring ded. Ed-eratan dan perem ke benar ne penurù mekeatag te kegkeyru te Eleteala su ebpenurù dan te egkepakey ne ed-ul-ulaan tew te meraat su egkeyru nelaus ke Eleteala ne kenà ki kun edusaan nikandin. Kenà dan ebperetiyaaya te si Hisu Kristu rà ke edumaan ne Kerenan tew. Ugaïd ne rangen dà ne impesurat en te Eleteala se kedusa rin kandan.

<sup>5</sup> Na ruen ebpetenuran ku keniya ne netuenan niyu en atag dut te mid-ula-ula te Eleteala rangen. Su midtevangen din ke langun ne inakan te Israyil te ebpeiyu rut te kinpengunguripen kandan te inged ne Ihiptu. Ugaïd ne netaman ne langun dut te kenà ebperetiyaaya ne neherà.

<sup>6</sup> Ne tentenuri niyu rema arà se menge suluhuen te Eleteala diyà te langit dengan ne mid-una dut te ketengdanan ne imbehey kandan te Eleteala su mid-ewaan dan ke kandan ne ubpaan. Ne nevilanggù sikandan te Eleteala riyà te merusirem, ne mibakù dan te sengkali ne kenà egkepeka taman te kenà pà egkeuma arà se hewii ne kegkukum din ne kedsai kandan.

<sup>7</sup> Ne tentenuri niyu rema ke menge inged ne Suduma wey Gumura wey ke menge inged ne nekelingut ne nereatan en. Su iring se mid-ulaula ran dut te menge suluhuen te Eleteala rangen ne nekesahad se keredisik te perangey ran te edsalàsala ne ebpeulirey ke elin ded meama. Ne edresayen te Eleteala sikandan diyà te apuy nerakà ne kenà egkeevukan su apey egkeendekan ke menge etew ne ed-iring ketà.

<sup>8</sup> Iring ded be iya ketà ke egketemanan dut te menge etew ne ebpenurù te kenà benar diyà te keniya. Edtumanen dan dà ke meraat ne kiyug te lawa ran su ingkahi kun kandan te tehinep dan. Ne edsumpeliten dan su kenà dan eduma te lalag te Eleteala, ne edsudian dan ke ketulusan ne suluhuen diyà te langit.

<sup>9</sup> Ne misan si Miguel ke mepurù te menge suluhuen te Eleteala ne kenà iring ketà se mid-ulaula rin. Su ketà te kinepatey ni Moises ne mibpelewaney en si Miguel ki Setanas ke engkey kandan se egkuwa rut te bangkey ni Moises, ne warà megaga ni Miguel te ed-isuhat te meraat ne lalag si Setanas su iyan din dà migkahi ne, "Eleteala en se ed-isuhat kenikew."

<sup>10</sup> Ugaïd ne ini se menge etew ne ebpenurù te kenà benar, ne misan engkey en ne kenà dan egkesebutan ne edsumpeliten dan. Ne iyan dan nelayaman ne ke meraat ne ulaula iring dut te perangey te asu, ne ini ve iya se kegkekeiri ran.

<sup>11</sup> Mekeandek nevenar se egketemanan dan! Su ini se ulaula ran ne warà bira rin dut te ki Kain dengan. Ne iring dan dema ki Bilam rangen te misan netuenan din ded se meraat ne mibpenguwa te pirak te dalan te tarù din. Ne iring ded dema ke ulaula ran ki Kura rangen su mibpekidlawan sikandin ki Moises ne mibpemekeiran sikandin te Eleteala, ne iring ded be imbe se kegkekeiri ran ketà.

<sup>12</sup> Su egenat dut te meraat ne ulaula ran ne ebpekekaid dut te kevrunan niyu te edturan niyu ke kinepatey wey kinekevanew ni Hisus. Warà angkà te kegkaan wey ked-inum dan su iyan den dà ed-epasen ke kegkaan dan. Ne iring dan dema te dadtem ne kivel ne kunaan ke ebpekeuran, ugaïd ne inlayap te keramag. Ne iring dan ded dema te kayu ne nevuwar en su misan timpu te kepemeahas ne warà bahas din su nehangu en.

<sup>13</sup> Ne iring dan ded maa lavew te dekdekelà ne baleg te rahat ne kenà ebpeeneng-engeng su ke meraat ne ulaula ran ne iring dut te meredsik ne ebpekeampil te buràburà diyà te kilid te rahat. Ne ruma pà maa ne iring dan te menge bituen ne neparin dut te ebpinuwan din ne kenà en egkepakey ne edtenuran te menge etew. Ne ruen en intail te Eleteala kandan ne meitem en te kerusirem din ne ubpaan ne kenà dan ebpekeawà ketà taman te taman.

<sup>14</sup> Su si Enoc ne ikepitu ne kevuwaran igenat te si Adan se impekahi te Eleteala rengan mekeatag te egketemanan dan ne ini se impekahi rin, "Ebpekeuma si Hisus ke Kerenan tew ne edumaan te suluhuen din ne egnvivungivuwan

<sup>15</sup> apey egkukumen din ke langun ne menge etew wey ed-isuhaten din te kevenar ke langun ne menge belidsalà dut te ulaula ran ne meraatey wey atag dut te meraat ne lalag dan ne id-isuhat kandin!"

<sup>16</sup> Ini se menge etew ne ed-engkenà dut te benar, ne merehen egkesukul se hinawa ran wey metehel ne ebpemivig. Iyan den dà edumaan ke meraat ne kiyug te lawa ran. Sahad se kepereyù dan, ne metau ran ne edlana te hinawa te ruma ran su dalan ini te kedsikep dan.

*Ke Menge Imbaag wey Impemandù ni Hudas*

<sup>17</sup> Ugaid ne sikiyu kenihan ne menge suled ku, tentenuri niyu ke ingkahi rut te menge kedserihan dengan ni Hisu Kristu ke Kerenan tew.

<sup>18</sup> Su migkahi ran te, "Ketà te egketketapus en ini se kelibutan ne ruen menge etew ne egemew ne edsumpalit keniyu ini te ebperetiyaya ki Hisus. Menge etew ini ne iyan dan edtumanen ke kiyug te lawa ran ne igkeepes te Eleteala."

<sup>19</sup> Ne sikandan se puunan te kegkehuvar dut te neseveka ne menge mibperetiyaya. Su iyan dan ma edtumanen ne ke kandan dà ne kiyug, ne ke Kedesenan ne Ebpetuntul te Menusiyà ne warà te hinawa ran.

<sup>20</sup> Ugaid ne sikiyu ne menge suled ku, ne ibpeunsad niyu ke langun ne ed-ul-ulaan niyu kayi te sarig ne imbehey kenitew te Eleteala. Ne kayi te kebpengeningeni tew te Eleteala ne igganey tew rut te Kedesenan ne Ebpetuntul te Menusiyà te iyan mebayàbayà te itungan tew su apey ta egketueni ke engkey se egkiyuhan te Eleteala ne kebpengeningeni tew.

<sup>21</sup> Ne ikehat niyu te tivang ke rekela ne limù te Eleteala keniyu apey kew egkevaher gewii niyu te edtahad ketà te hewii ne edlived si Hisu Kristu ne Kerenan tew. Su ketà ne hewii ne ibpekita rin kenitew ke iru rin su ebhayan kiyu en te umur tew ne warà edtemanan din.

<sup>22</sup> Upiani niyu te ebpesabut ke menge etew ne alang-alang pà se kebperetiyaya ran apey ran kenà en mevangen te ebperetiyaya

<sup>23</sup> ne ke menge ruma niyu ne riya ebpekesinaru te apuy nerakà, ne tevangi niyu su iring te edsekedlawen niyu sikandan diyà te apuy. Ibpekita niyu ke kegkeyru niyu te menge etew, ugaid ne inteng kew imbe ke ebpekeiring kew rut te meredsik ne perangey ran.

*Kebpengeningeni ne Edeyù te Eleteala*

<sup>24</sup> Ne arà be ne edeyrey kiyu te Eleteala su sikandin dà se ebpekegaga ne edtavang kenitew apey kenà ki mekesuwey riya te kandin. Ne sikandin dà se ebpekegaga ne ebpeiyu kenitew su apey warà meraat ne egkekita rin kayi te kenitew ketà te hewii ne ed-itindeg ki diyà te etuvangan te raman din ne ed-andlag te kesihey rin ne dekelà imbe ne kehelawan tew.

<sup>25</sup> Kenà kiyu ed-engked se edeyrey te Eleteala su sikandin dà se benar ne Eleteala ne ebpeiyu kenitew su sabap dut te mid-ulaula ni Hisu Kristu ke Kerenan tew. Su sikandin dà se mepurù te langun ne warà repeng dut te keupiya wey gehem din, su mibayàbayà sikandin te aney en te warà pà limbaha ini se kelibutan taman guntaani en ne warà ketepusan din taman te taman! Ne metuman be ini.

Arà dà taman.

*Hudas*

## Ke Imperayag Ni Hisu Kristu Ki Juan

<sup>1</sup> Ini se insurat ne imperayag ni Hisu Kristu. Imbehey ini kandin dut te Eleteala su apey igkpesabut diyà te minge mibperetiyyaya te Eleteala ke engkey se mehaan ne egkenged-ulaula. Impayag ini ni Hisu Kristu diyà te ki Juan ne sugshuhuen din ibpepevyà te suluhuen din ne midsuhù din diyà te kandin.

<sup>2</sup> Ne insurat ni Juan ke langun ne impekita kandin. Ne ini se insurat ni Juan ne ke Lalag te Eleteala wey ke benar ne impekita ni Hisu Kristu.

<sup>3</sup> Ne dayirayi ke etew ne ebase kayi te insurat ini ne egkenged-ulaula, ne dayirayi rema ke minge etew ne ebpeping wey edtuman te insuhù kayi su mehaan en ke hewii ne egketuman ini.

### *Ke Minge Surat Diyà te Minge Mibperetiyyaya te Pitu ne Minge Inged*

<sup>4-5</sup> Siak si Juan ke midsurat kayi. Ini se insurat ku ne riyà te langun niyu ne minge mibperetiyyaya ne diyà te pitu ne minge inged te pruvinsiya ne Asiya.

Egkiyuhan ku ne ebpepeneuven kew rut te Eleteala wey ke Kedeseenan ne Ebpetuntul te Menusiya wey si Hisu Kristu. Egkiyuhan ku rema ne ebmelintad ke hinawa niyu mekeatag kandan. Ini se Eleteala ne daan en sikandin te warà pà limbaha ke misan engkey en, ne kemulu pà sikandin guntaan wey sikandin ded lavew taman te taman. Ne ke Kedeseenan ne Ebpetuntul te Menusiya ne pitu se ralan te kebpekita rin dut te gehem din ne diyà ed-ubpà te etuvangan te ebpinuwan te kedatù te Eleteala. Ne si Hisu Kristu ke egkeserihan ne titihus mekeatag te Eleteala. Sikandin ke neuna ne mibanew te Eleteala dut te kebpatay rin, ne sikandin rema ke benar ne datù ne ebayàbayà dut te langun ne ruen kebayaàbayà din kayi te ampew te dunya.

Dekelà ke limù din keytew, ne ketà te imbùbù din ke lengesa rin kenitew dut te kinepatay rin ne sikandin ke mibpeliyu keytew rut te kedusa te Eleteala te salà tew.

<sup>6</sup> Ne nekelusud ki rut te edetuan din wey mibaluy ki nikandin ne iring te minge terebpepengesa su apey egelevek ki rut te egkiyuhan te Eleteala ne amey rin. Tembù be iyan meupiya ne edeyuen sikandin ne edatù sikandin te warà kegkepupus din. Egketuman ini.

<sup>7</sup> Na kelimùlimù ne pegitunga niyu ini.

Ebpekeuma si Hisu Kristu

ne edumaan dut te minge sehulapun.

Egkekita sikandin dut te langun ne menusiya

abpeg dut te mid-imatey kandin.

Ne ebpepenehew ketà ke langun ne minge etew

kayi te ampew te dunya

su egkeandek dan te kegkukuma rin kandan.

Egketuman ini.

<sup>8</sup> Ini se Kerenan tew ne Eleteala ne mekegehem, ne daan en sikandin te warà pà limbaha ke misan engkey en ne kemulu pà sikandin guntaan wey sikandin ded lavew taman te taman. Tembù be migkahi te, "Siaken ke Alfa wey Omega." Ne ke meana kayi ne warà kurang din su sikandin ke ebpuunan te langun taman ne sikandin dema ke ebpeengked dut te langun.

### *Ke Kebpekita ni Hisu Kristu ki Huan*

<sup>9</sup> Na si Juan a ne midsurat kayi ne suled niyu te ebperetiyyaya ki Hisus. Ne iring a keniyu su midtigkeran ku rema ke kemeresayan ne nekeuma kediey su atag dut te kebpesakup ku te Edetuan te Eleteala. Su neepes ke gubirnu te ini se kebpenudtul ku te Lalag te Eleteala wey ini se kebpenurù ku te imperayag ni Hisus, ne midsegseg a te ebpendiyà te punul ne ed-ingaranan te Patmus.

<sup>10</sup> Ne ketà te hewii ne edeyù ki te Kerenan, ne midlumun kediey ke Kedeseenan ne Ebpetuntul te Menusiya ne ruen merahing ne suwara ne nerineg ku diyà te iniyuhan ku ne iring te dahing te budyung.

<sup>11</sup> Ne migkahi te, "Tsurat nu ini se egkekita nu ne ibpeewit nu diyà te minge mibperetiyyaya diyà te pitu ne minge inged: diyà te inged ne Ipisu, Ismirna, Pirgamu, Tiyetira, Sardis, Piledilpiya wey riyà te inged ne Lewdisiya."

<sup>12</sup> Ne guna su nerineg ku ini se merahing ne suwara, ne midlingey ku su apey ku egkekita ke engkey se edlalag kediey, ne ketà ne iyan ku nekita ne ini se pitu ne sulù ne bulawan.

<sup>13</sup> Ne riyà te luuk dut te minge sulù ne ruen nekita ku ne iring te paras te menusiya. Ne mibevelegkas te melayat su nekeuma te paa rin ne ruen inselauy kayi te kumeng din ne vulawan.

<sup>14</sup> Ini se bulvul din ne mepmeputi iring te gapas, ne ke mata rin ne iring te regreg dut te apuy.

<sup>15</sup> Ne ini se paa rin ne iring te galang ne intuug diyà te apuy, ne ke suwara rin ne iring te dehuus dut te wayig te sampew.

<sup>16</sup> Kayi te kewanan ne belad din ne ruen migeweran din ne pitu ne bituen, ne ruen migemew te bèbà din ne sundang ne meharang. Ne ke buked din ne ebpekesirang iring te rayag te neudtu ne andew.

<sup>17</sup> Nekita ku rà sikandin, ne midlumpeng ad diyà te sineruwan din iring te minatey. Ugaid ne indampen din kediey ke kewanan ne belad din ne migkahi te, “Kenà ka meandek su siaken ke ebpuunan te langun taman ne siaken dema ke ebpeengked dut te ketepusan te langun taman.

<sup>18</sup> Siaken ke ruen umur din ne warà edtemanan. Ne misan mid-imetayan a nikandan ne nevanew a iya, ne guntaani ne kenà ad ebpatay. Siaken ke egawed dut te umur te minge etew, ne siaken ded ke ebayàbayà dut te Iveyaan.

<sup>19</sup> “Na isurat nu ini se ebpekita ku kenikew ini, se egked-ulaula guntaan wey ke egked-ulaula pà keuremà.

<sup>20</sup> Na ibpesabut ku kenikew ke meana rut te pitu ne bituen ne nekita nu ne migeweran ku kayi te kewanan ne velad ku wey ke meana rut te pitu ne sulù ne vulawan. Ini se pitu ne bituen, ne ini ke pitu ne suluhuen te Eleteala ne ebantey rut te pitu ne inged ne minge mibperetiyya. Ne ini se pitu ne sulù, ne ini ke pitu ne inged ne minge mibperetiyya.”

## 2

### *Ke Surat diyà te Menge Mibperetiyya te Inged ne Ipisu*

<sup>1</sup> Migkahi si Hisus te, “Surati nu ke suluhuen ne ebantey rut te minge mibperetiyya diyà te inged ne Ipisu, ne ini se minge lalag ne isurat nu.

“Ini se minge lalag ku keniyen te keniyu. Siaken ke egawed te pitu ne bituen kayi te kewanan ne belad ku, ne siaken ded ke ed-ipanew kayi te luuk te pitu ne bulawan ne sulù.

<sup>2</sup> Netuenan ku ini se langun ne ed-ul-ulaan niyu. Netuenan ku rema ne metehel kew ne egelevek ne metigker kew te kemerehenan su atag dut te kebperetiyya niyu kediey. Ne netuenan ku rema te kenà kew edtuhut te ruen minge ruma niyu ne meraat se ed-ul-ulaan din, su migeraman niyu ke minge etew ne egkahi te kedserihan dan ni Hisus ne rutun ne netuenan niyu ne kenà benar ne kedsrihan su midtarùtarù dan.

<sup>3</sup> Netuenan ku te midtigkeran te hinawa niyu ke keresayan ne mibpekesekitan kew su atag dut te kebperetiyya niyu kediey, ne misan iring ketà ne warà niyu engkeri ke kebperetiyya niyu wey keduma niyu kediey.

<sup>4</sup> “Ugaid ne ruen en ed-ul-ulaan niyu guntaani ne idsawey ku keniyu. Ketà te pehaney ne mibperetiyya kew kedì ne dekelà se limù niyu kediey, ugaid guntaani ne nasi en ne mideisek.

<sup>5</sup> Tentenuri niyu ke dekelà ne limù niyu kedì dut te pehaney, ne pedsendit kew dut te meraat ne ed-ul-ulaan niyu guntaani ne lived kew dut te neuna ne limù niyu kediey. Su embiya kenà kew ebpedsendit, ne ebayaan ku sikiyu ne id-awà ku ke sulù niyu diyà te netuhan din.

<sup>6</sup> Ugaid ne duen ed-ul-ulaan niyu ne ebpekesuhat te hinawa ku su neepes kew te meraat ne ed-ul-ulaan dut te minge etew ne eduma ki Nikulayi ne ingkeepes ku rema.

<sup>7</sup> “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiya diyà te langun niyu ne mibperetiyya. Piya engkey ne etew ne kenà egkegaga dut te penggeram te datù te pekaid, ne edtuhutan ku ne ebpekekaan dut te bahas te kayu ne ebpuunan te umur ne warà edtemanan din ne impemula ketà te ed-ubpaan te Eleteala.”

### *Ke Surat diyà te Menge Mibperetiyya te Inged ne Ismirna*

<sup>8</sup> Ne ketà ne migkahi pà maa si Hisus te, “Surati nu red ke suluhuen ne ebantey dut te minge mibperetiyya diyà te inged ne Ismirna, ne ini se minge lalag ne isurat nu.

“Ini se minge lalag ku keniyen te keniyu. Siaken ke ebpuunan te langun taman ne siaken rema ke ebpeengked dut te langun. Minatey a ugaid ne nevanew a red.

<sup>9</sup> Netuenan ku te dekelà se kebpekesekiti keniyu ne neheraman niyu. Netuenan ku rema ne minge ayuayu kew, ugaid ne misan iring ketà ne kewasa kew iya riyà te langit. Ne netuenan ku ke meraat ne edlelahen mekeatag keniyu dut te minge etew ne

engkungkun ne tidu ne menge Hudiyanen, ugaid ne kenà ma benar su sakup dan ni Setanas ke datù te pekaid.

<sup>10</sup> Kenà kew meandek dut te keresayan ne mehaan en ne ebpekeuma keniyu. Ugaid ne pemineha niyu ini se egkehiyen ku su ruen keniyen te keniyu ne ebilengguen dut te datù te pekaid su ebpengeraman din ke kebperetiyyaya niyu, ne edresayen kew te mehaan iring te menge sepulu ne hewii. Ugaid ne kenà kew edlekà te kebperetiyyaya niyu kediey misan ibpatey niyu pà su ruen lalew ne ibehey keniyu ne umur ne warà edtemanan din.

<sup>11</sup> “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiya diya te langun niyu ne mibperetiyyaya.

“Piya engkey ne etew ne kenà egkegaga dut te penggeram te datù te pekaid ne kenà ibpendiya te Eleteala te apuy nerakà ne arà ke ikeruwa ne kemetayen.”

*Ke Surat diya te Menge Mibperetiyyaya diya te Inged ne Pirgamu*

<sup>12</sup> Ketà ne migkahi en maa si Hisus te, “Surati nu red ke suluhuen ne ebantey dut te menge mibperetiyyaya diya te inged ne Pirgamu, ne ini se menge lalag ne isurat nu.

“Ini se menge lalag ku keniyen te keniyu. Siaken ke ruen meharang ne sundang ne egemew kayi te bèbà ku.

<sup>13</sup> Netuenan ku ne riyà kew ed-ubpà te inged ne ruen merakel ne etew ne edetuan ni Setanas ke datù te pekaid. Ugaid ne misan iring ketà ne metidu ke keduma niyu kediey, ne warà kew medlekà dut te kebperetiyyaya niyu kediey misan dut te ked-imetayi ran ki Antipas dengan, arà se metinumanen te ebpemendutl te lalag ku ne mid-imetayan dan diya te inged niyu ne edetuan te datù te pekaid.

<sup>14</sup> “Ugaid ne ruen dema ed-ul-ulaan niyu ne kenà ku egkesuatan su ruen keniyen te keniyu ne eduma te impenurù ni Belaam dengan. Si Belaam ini, ne impenurù din dengan ki Balak ke ralan te kebpenheewit dut te menge etew ne kevuwaran ni Israyil te kebpekedsalà. Su mibpenheewit din sikandan te egkaan dut te egkeenen ne inrenà ne siparat diya te ledawan dà ne kenà tidu ne Eleteala wey mibpenheewit din dema sikandan te kebpingniyug.

<sup>15</sup> Ne ruen dema keniyen te keniyu ne eduma rut te tarù ne penurù te menge etew ne Nikuleyta.

<sup>16</sup> Engkeri niyu ini se meraat ne ed-ul-ulaan niyu, su embiya kenà ne mehaan ku ebeyai sikiyu ne edusaan ku ini se menge etew kayi te sundang ne egemew te bèbà ku.

<sup>17</sup> “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiya diya te langun niyu ne mibperetiyyaya.

“Piya engkey ne etew ne kenà egkegaga dut te penggeram te datù te pekaid, ne ebhayan ku te egkeenen diya te langit ne warà pà mekita te menge etew. Ne ebhayan ku rema sikandin te meputi ne batu ne insurat dutun ke behu ne ngaran din ne iyan dà netau ne ke ebhayan.”

*Ke Surat diya te Menge Mibperetiyyaya te inged ne Tiyatira*

<sup>18</sup> Ketà ne migkahi en maa si Hisus te, “Surati nu red ke suluhuen ne ebantey dut te menge mibperetiyyaya diya te inged ne Tiyatira, ne ini se menge lalag ne isurat nu.

“Ini se menge lalag ku keniyu ne siaken ke Anak te Eleteala. Ke mata ku ne iring te regreg te apuy, ne ke paa ku ne iring te galang ne intuug diya te apuy.

<sup>19</sup> Netuenan ku ke langun ne ed-ul-ulaan niyu. Ke limù niyu kediey ne dekelà ne ke kebperetiyyaya niyu kediey ne mevaher. Metinevangen kew te menge ruma niyu ne mibperetiyyaya, ne metigker kew te kemeresayan. Netuenan ku rema ne guntaani ne mid-iseg ini se meupiya ne ed-ul-ulaan niyu rut te pehaney.

<sup>20</sup> Ugaid ne ruen en ed-ul-ulaan niyu ne idsawey ku keniyu su ke meritan ne si Isibil ne engkungkun ne ebpelambas te Lalag te Eleteala ne edtuhutan niyu ne ebpenurù keniyu. Ne kayi te penurù din ne midlimbungan din ke menge sakup ku su mibpenheewit din sikandan te egkepakey ne ebpengingniyug dan wey egkaan te egkeenen ne inrenà ne siparat diya te ledawan dà ne kenà tidu ne Eleteala.

<sup>21</sup> Neuhet en ne midtigkeran ku su apey rin meengkeri na ebpekedsendit dut te meredsik ne ed-ul-ulaan din, ugaid ne kenà din ed-engkeran.

<sup>22</sup> Tembù be idadsang ku sikandin diya te ed-irehaan din su ebpederuwen ku abpeg ke menge ruma rin. Ne egkeheram dan te memasang ne keresayan embiya kenà dan ed-engked ne ebpekedsendit dut te meredsik ne mid-ulaula ran su atag dut te ini se meritan.

<sup>23</sup> Ne ed-imetayan ku rema ke menge etew ne eduma rut te impenurù din su apey egkekita te langun ne mibperetiyyaya te siaken ke netau te langun ne netahù te itungan

dut te minge etew wey ke egkiyuan dan dema. Ne edusaan ku red dema ke uman seveka kandan te piya engkey se edait dut te minge ulaula ran.

<sup>24</sup> “Ne ruen igkahi ku keniyu te minge ruma ne riyà te inged ne Tiyetira ne warà pà meduma rut te meraat ne penurù kayi te meritan ini, su warà kew pà medtelimà te iyan din egkehiyen ne metampas ne itungan misan riyà ebpuun te ki Setanas ke datù te pekaid. Ne iyan ku igkahi keniyu ne warà en duma pà ne ebpeveelan ku keniyu,

<sup>25</sup> ugaid ne iyan iya se geweri niyu te mevaher ke kebperetiyaya niyu kediey taman te ebpekeuma a.

<sup>26-27</sup> Ne piya engkey ne etew ne kenà egkegaga dut te penggeram te datù te pekaid ugaid ne edumaan din ke kiyug ku taman te kepatey, ne arà se etew ne ebhayan ku te gehem iring dut te gehem ne imbehey kediey dut te Amey ku ne Eleleala su ebhayan ku sikandan te kebayaàbaya te edatù dut te langun ne inged kayi te ampew te dunya.

Ne ke kebayaàbaya dan ne mevaher

iring te kevaher dut te putew ne kenà egketamped.

Uya kayi te kedtevani ran dut te minge inged

ne edrupeten dan iring te kuren.

<sup>28</sup> “Ne sikandan ne eduma kediey taman te kemetayen ne ibehey ku rema kandan ke mekebangas ne bituen ne edsilà te egkeriwaswas.

<sup>29</sup> “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyaya.’ ”

### 3

*Ke Surat diyà te Minge Mibperetiyaya te Inged ne Sardis*

<sup>1</sup> Ketà ne migkahi en maa si Hisus te, “Surati nu red ke suluhuen ne ebantey dut te minge mibperetiyaya diyà te inged ne Sardis, ne ini se minge lalag ne isurat nu.

“Ini se minge lalag ku kenian te keniyu. Ke Kedesenan ne Ebpetuntul te Menusiyà ne pitu ne ralan ne ebpekita te gehem din ne ini en te kediey. Ne kayi en dema ke pitu ne bituen ne egeweran ku. Netuenan ku ini se langun ne ed-ul-ulaan niyu. Ne misan nevantug kew te ruen behu ne umur niyu ne kenà egkekita kayi te ed-ul-ulaan niyu.

<sup>2</sup> Tembù be himerat kew ne geweri niyu te mevaher ini se reisek dà ne kebperetiyaya niyu su apey kenà egkeawà ini. Su netuenan ku ne ini se ed-ul-ulaan niyu ne kenà ebpekesuhat te hinawa te Eleleala.

<sup>3</sup> Kenà niyu lipati ke benar ne penurù ne nerineg niyu wey midtelimà niyu, ne dumai niyu ini wey engked kew dut te meraat ne ed-ul-ulaan niyu. Su embiya kenà kew ebpekedsendit, ne ebpekeuma a te warà kew mebpenehana su edusa keniyu. Ne ini se ebpekeuma ku ne iring te kebpekeuma dut te tekawen ne kenà egketuenan ke kedlepew rin.

<sup>4</sup> Ugaid ne ruen duma niyu diyà te inged ne Sardis ne warà mevuringi ke belegkas din. Ne iyan din meana ne warà med-amung te meraat ne ulaula. Ne sikandan se ebpekeruma kediey ne ebevelegkas te meputi, ne edait ini su mid-up-upiya ran te ed-ul-ulaan dan.

<sup>5</sup> Ne piya engkey ne etew ne kenà egkegaga dut te penggeram te datù te pekaid ne ke ibevelegkas din ne meputi, ne kenà ku id-awà ke ngaran din dut te riberù ne midsuratan te minge ngaran te langun ne egkevehayan te umur ne warà edtemanan din. Ne egkehiyen ku riyà te etuvangan te Amey ku ne Eleleala wey ke minge suluhuen din te ini ne sakup ku.

<sup>6</sup> “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyaya.’ ”

*Ke Surat diyà te Minge Mibperetiyaya te Inged ne Piledilpiya*

<sup>7</sup> Ketà ne migkahi en maa si Hisus te, “Surati nu red ke suluhuen ne ebantey dut te minge mibperetiyaya diyà te inged ne Piledilpiya, ne ini se minge lalag ne isurat nu.

“Ini se minge lalag ku kenian te keniyu. Siaken ke ed-ulaula te metidtu, ne egkeserihan a. Ne mibehayan a te kebayaàbaya su apey edatù te iring dut te kedatù ni David dengan. Ne embiya ebpuwasan ku ke gumawan su apey ruen etew ne ebpekelusud ketà te edetuan ku, ne warà etew ne ebpekelekeb kayi. Ne embiya edlekevan ku ini su apey warà etew ne ebpekelusud, ne warà ded maa etew ne ebpekepuwas kayi.

<sup>8</sup> Netuenan ku ini se ed-ul-ulaan niyu. Ne netuenan ku rema te sikiyu ne kenà kew utew merakel ne ke gaga niyu ne reisek dema, ugaid ne metinumanen kew te keduma rut te impenurù ku keniyu ne warà in-eles niyu ne sakup niyu kediey. Ketà ne ruen



iring te gumawan ne mibpuwasan ku su apey kew ebpekelusud, ne warà ebpekegaga ne edlekeb su kenà dan ebpekevangan dut te ibpeulaula ku keniyu.

<sup>9</sup> Ne arà ne minge etew ne engkungun ne tidtu ne minge Hudiyanen ugaid ne tarù su sakup dan ni Setanas ke datù te pekaid, ne ibpeembavà ku sikandan ne ibpepenimbuel ku diyà te etuvangan niyu su apey ran egketueanan te sikiyu ne minge etew ne igkelimù ku iya.

<sup>10</sup> Ne sabap te keduma niyu rut te insuhù ku keniyu te edtigkeran niyu ke kemerehenan, tembù be ebentayan ku sikiyu su apey kenà ebpekeuma kayi te keniyu arà se keresayan ne ebpekeuma kayi te ampew te dunya ketà te hewii ne ebpengeraman te Eleteala ke minge etew.

<sup>11</sup> “Na mehaan ad edlived kayi te ampew te dunya. Tembù be geweri niyu te mevaher ini se kebperetiyyaya niyu kediey guntaani su apey warà etew ne edlimbung keniyu ne ebpekekuwa dut te lalew ne intail keniyu.

<sup>12</sup> Ne piya engkey ne etew ne kenà egkegaga dut te penggeram te datù te pekaid, ne arà ne etew ne ebeelan ku ne iring te pelaus ne metigker diyà te nekebpurù ne baley te Eleteala diyà te langit ne ed-ulpà ketà taman te taman. Ne idsurat ku riyà te kandin ke ngaran dut te Amey ku ne Eleteala wey ke ngaran dut te inged te Eleteala ne ed-ingaranan te Behu ne Hirusalim, ini se inged ne ebpenaug diyà ebpuun te Eleteala diyà te langit. Ne idsurat ku rema diyà te kandin ini se behu ne ngaran ku.

<sup>13</sup> “Itaan niyu ke telinga niyu ne pemineha niyu ini se egkehieny dut te Kedesenan ne Ebpetuntul te Menusiyà diyà te langun niyu ne mibperetiyyaya.’ ”

*Ke Surat diyà te Menge Mibperetiyyaya te inged ne Lewdisiyya*

<sup>14</sup> Ketà ne migkahi en maa si Hisus te, “Surati nu ke suluhuen ne ebantey rut te minge mibperetiyyaya te inged ne Lewdisiyya, ne ini se minge lalag ne isurat nu.

“Ini se minge lalag ku keniyen te keniyu. Siaken ne mid-ingaranan te “Amin” su egkedserihan a wey benar iya ke minge lalag ku. Ne langun taman ne nelimbag te Eleteala ne impepeyavà din kayi te kediey.

<sup>15</sup> Netuenan ku ke langun ne ed-ul-ulaan niyu. Netuenan ku ne iring kew te ed-inumen ta ne kenà meinit ne kenà ded maa meadsil su eduwaruwa ke hinawa niyu kayi te keduma niyu kediey. Angin perem ke egkeseveka se hinawa niyu iring te wayig ne meinit nevenar etawa meadsil.

<sup>16</sup> Ugaid ne geina te iring kew te ed-inumen ne mehelimendew rà, ne idsempilà ku sikiyu.

<sup>17</sup> Egkahi kew te, “Kewasa ki en ne meupiyya ini se kebpekesavuk ta ne warè en kurang ta te misan engkey.” Ugaid ne warà niyu rà metueni te mekeyruwiru kew ves. Su iring kew te minge etew ne nepisek, ne egkeayuayu wey etew ne warà belegkas din.

<sup>18</sup> Tembù be ibpemandù ku keniyu ne pemesaa niyu kayi te kedì ini se tidtu ne bulawan ne intuug diyà te apuy ne in-upama te kebperetiyyaya niyu kediey su apey ke kegkewasa niyu ne benar. Ne pemesaa niyu rema kayi te kedì ini se meputi ne belegkas su apey ibevelegkas niyu ne egkeawà ke kegkeyeyai niyu te nekegkedew. Ne pemesaa niyu rema kayi te kedì ini se bawì te mata su apey ibawì te mata niyu ne ebmerayag se kedtengteng niyu.

<sup>19</sup> “Na ke langun ne minge etew ne igkelimù ku ne ebpenuruen ku, ne edusaan ku rema sikandan su apey ke ed-ul-ulaan dan ne ebmeupiyya. Tembù be pedsendit kew ne engkeri niyu ke meraat ne ed-ul-ulaan niyu.

<sup>20</sup> Pemineha nu, su ed-itindeg a kayi te gumawan te baley nu ne ed-umew a kenikew. Embiyya ebpemineg ka kediey ne ebpuwasan a nikuna, ne edlusud a ne ebpetuheny ki te egkaan.

<sup>21</sup> “Ne piya engkey ne etew ne kenà egkegaga dut te penggeram te datù te pekaid ne ebpepinuuwen ku kayi te uvey ku ketà te edetuan ku su ed-amung kedì te edatu. Iring dema kediey te warà a megaga te penggeram te datù te pekaid ne mibpepinuu a diyà te uvey te Amey ku ne Eleteala su ed-amung a te edetuan din.

<sup>22</sup> “Itaan niyu ke telinga niyu ne pemineha niyu ini se egkehieny dut te Kedesenan ne Ebpetuntul te Menusiyà diyà te langun niyu ne mibperetiyyaya.’ ”

## 4

*Ke Ebpinuuan dut te Edatu te Langit ne Nekita ni Juan*

<sup>1</sup> Ketà ne ruen pà maa ruma ne imperayag kediey te Kerenan su nekita ku te ruen gumawan diyà te langit ne mibpuwasan en. Ne ini se midlalag kediey geina te merahing ne suwara iring dut te budyung ne midlalag pà maa kediey ne migkahi te, “Pengkayi ka su ibpekita ku keykew ke engkey se egketemanan dut te akir din ne hewii.”

<sup>2</sup> Arà dâ ne midlumunan a rut te Kedesenan ne Ebpetuntul te Menusiyâ ne ruen impekita rin kediey su riyâ te lusud te langit ne nekita ku ini se ebpinuuwan dut te edatù te langit ne ruen mibpinuu ketâ.

<sup>3</sup> Ne mesihey ke paras din iring dut te ebpengilak-ilak ne menge batu ne mepurù ne ed-ingaranan te hasper wey karnila. Ne ruen neketerung ketâ te ebpinuuwan din ne meilem ne beluntu iring te paras te mepurù ne meilem ne batu ne ed-ingaranan te ismiralda.

<sup>4</sup> Ruen deruwa nepulù wey epat ne ebpinuuwan ne nekelingut kayi te ebpinuuwan din ne ruen deruwa nepulù wey epat ne pekilukesen ne ebpinuu ketâ. Mibevelegkas dan te meputi ne ruen inseluluy ran ne bulawan.

<sup>5</sup> Ne egkesuvid ke kilat diyâ te ebpinuuwan din te edatù ne ruen nerineg ku ne eduruhung wey eb pemberansi. Ruen pitu ne sulù ne egkeregreg diyâ te etuvangan te ebpinuuwan din, ne ini ke tuus te ruen pitu ne ralan te keppekita dut te Kedesenan ne Ebpetuntul te Menusiyâ te gehem din.

<sup>6</sup> Ne ruen dema nekita ku diyâ te etuvangan te ebpinuuwan din ne iring te meluag ne rahat ne metmetingew iring te pehelungan.

Ne ruen dema epat ne nelimbag din ne ed-itindeg diyâ te epat ne pediyulu dut te ebpinuuwan din. Ne neeneb ke lawa ran te mata kayi te sineruwan wey riyâ te peka ran.

<sup>7</sup> Ruen seveka ketâ te nelimbag ne iring te paras te erimaung, ne ke ikeruwa ne iring te paras te nati ne sapi, ne ke iketelu ne iring te paras te etew, ne ke ikeepat ne iring te paras te banug ne edlayang.

<sup>8</sup> Ne uman seveka ketâ te epat ne nelimbag ne ruen enem ne pakpak din. Ne neeneb te mata ini se lawa ran misan kayi te diralem te pakpak dan. Merukilem meandew ne iyan dan eb pulungan ne egkekanta. Ke se bayuk dan te, "Metmetidtu nevenar ini se ed-ul-ulaan te Eleteala.

Ne sikandin ke Kerenan ne ebayabayâ te langun.

Dengan dâ sikandin,

ne kemulu pà sikandin guntaani wey taman te taman."

<sup>9</sup> Ini se bayuk dut te kanta kayi te epat ne nelimbag ne edeyù wey ebpeleman dan arâ se ebpinuu diyâ te ebpinuuwan din te kedatù, arâ se warâ kemetayen din. Ne ketâ te kegkanta ran,

<sup>10</sup> ne edlumpeng dema ini se deruwa nepulù wey epat ne pekilukesen diyâ te etuvangan dut te ebpinuu ne edatù se eb pengarang kandin arâ se warâ kemetayen din. Ne inrenâ dan ke seluluy ran ne bulawan diyâ te etuvangan te ebpinuuwan din se egkahi te,

<sup>11</sup> "Na, ke Kerenan dey ne Eleteala, mepmepurù ka,

tembù be edeyuen ka wey egkeedatan,

su ke gehem nu ne dekdekelâ.

Su sikuna se midlimbag dut te langun taman,

uya, nebiviyag dan su sabap dut te kiyug nu."

## 5

### *Ke Midlulun ne Kelatas wey ke Nati te Bilibili ne ruen Gaga rin te Eberat*

<sup>1</sup> Ketâ ne nekita ku te ruen migeweran dut te ebpinuu riyâ te ebpinuuwan din te edatù. Ne riyâ te kewanan ne belad din ne ingawed din te midlulun ne kelatas ne ruen insurat ketâ te idsengeriveluyâ, ne ruen pitu ne tuus ne impereket dutun su apey kenâ egkeverat.

<sup>2</sup> Ne nekita ku ne ruen mevaher ne suluhuen te Eleteala ketâ ne mibpekerahing te suwara rin se egkahi te, "Engkey se egkepakey ne id-awâ din ini se tuus su eberaten din?"

<sup>3</sup> Mibpemengâ dan diyâ te langit, kayi te ampew te dunya, wey diyâ te insekedar, ne warâ netuen dan ne egpekegaga te id-awâ din arâ se pitu ne tuus su apey egkeverat wey ebpekevasa ketâ.

<sup>4</sup> Tembù be nekesinehew a su warâ netuen dan ne ebpekegaga ne ebekar dut te kelatas su apey ebpekevasa ketâ.

<sup>5</sup> Ketâ ne ruen seveka rut te deruwa nepulù wey epat ne pekilukesen ne midlalag kayi te kediey se egkahi te, "Kenâ ka edsinehew, su ini se ed-ingaranan te Erimaung ne si Hisu Kristu su ke baher din ne dekelâ, ne sikandin ke inenakan dut te bansa ne Huda wey ke inenakan ni David dengan. Ne sikandin ke neketalew en ki Setanas ke datù te

pekaid, tembù be sikandin se ebpekegaga ne ed-awà dut te pitu ne tuus wey ebekar kayi te kelatas ne midlulun.”

<sup>6</sup> Ketà ne ruen nekita ku ne iring te Nati te Bilibili ne ed-itindeg diyà te luuk dut te ebpinuuwan te edatù wey ke epat ne nelimbag wey ke deruwa nepulù wey epat ne pekilukesen. Arà se Nati te Bilibili ne iring te nekepeyaya en te minatey su ruen menge tulak dut te pali din te kineimetayi kandin. Ruen pitu ne sidung wey pitu ne mata rin ne tuus dut te pitu ne ralan ne ibpekita rut te Kedesenan ne Ebpetuntul te Menusiyà ke gehem ne idsuhù din diyà te lusud te ampew te dunya.

<sup>7</sup> Ne ketà ne mid-uvey ke Nati te Bilibili diyà te ebpinuuwan dut te edatù, ne migkuwa rin ke kelatas ne midlulun ne migeweran te kewanan ne belad dut te ebpinuu te ebpinuuwan te edatù.

<sup>8</sup> Guna su egkuan din en, ne midlumpeng en ini se epat ne nelimbag wey ke deruwa nepulù wey epat ne pekilukesen diyà te etuvangan din su ebpengarap te sikandin ke Nati te Bilibili. Ne uman seveka rut te pekilukesen ne ruen kandin ne egkeviten ne ed-ingaranan te harpa, ne ruen dema migeweran dan ne lediyà ne bulawan ne nepenù te rukut ne edtutungen su ke evel ne ed-itindeg ketà ne arà ke iring te kebpengeningeni rut te menge sakup te Eleteala.

<sup>9</sup> Ne migkanta ran te behu pà ne kanta, ke se bayuk dan te, “Sikuna rà ke ebpekegaga ne ebpekekuwa te midlulun ne kelatas ne ebpekeawà dut te menge tuus ne impereket ketà.

Su mid-imetayan ka rengan  
ne sabap dut te kektudà te lengesa nu  
ketà te kineimetayi keykew,  
ne mid-awun nu ke menge etew  
ne meraat se ed-ul-ulaan din

dut te langun ne menge inged, bansa wey kinehiyan  
su apey sikandan ne egkevaluy ne sakup te Eleteala.

<sup>10</sup> Ne in-amung nu sikandan dut te menge etew ne edetuan nu  
ne in-amung nu rema sikandan ne menge terebpelengesa  
ne egelevek dut te egkiyuhan te Eleteala,  
ne eberpetuen nu sikandan kayi te ampew te dunya.”

<sup>11</sup> Ketà ne midtengteng a ne ruen menge suluhuen te Eleteala ne nekita ku wey nerineg ku ne egkanta. Egngivuwan dan ne nekelingut se ed-itindeg ketà te ebpinuu te ebpinuuwan te edatù, ke epat ne nelimbag wey ke deruwa nepulù wey epat ne pekilukesen.

<sup>12</sup> Ne mibmerahing ke suwara ran se egkanta te,  
“Ini se ed-ingaranan te Nati te Bilibili ne mid-imetayan dan,  
sikandin ke dait ne ebpengerapan,  
ne sikandin ke ed-edatan tew wey edeyuen.  
Su ke gehem din ne mevaher,  
ne warà tedtab dut te kekewesai rin,  
ke itungan din ne metampas,  
ne edatù sikandin te langun.”

<sup>13</sup> Ketà ne nerineg ku ke kegkanta rut te langun ne ed-ubpà diyà te langit, langun ne ed-ubpà kayi te ampew te dunya, langun ne riyà te insekednar wey langun ne ed-ubpà diyà te rahat. Langun ne nelimbag te Eleteala kayi te linengkevan ne migkanta te,  
“Edeyuen tew ini se ebpinuu kayi te ebpinuuwan te edatù,  
wey edeyuen rema ini se Nati te Bilibili.

Ed-edatan tew sikandan  
ne ibpepurù tew sikandan taman te taman,  
su sikandan dà ke warà ebpekerepeng te gehem din.”

<sup>14</sup> Ne dutun migkahi ke epat ne nelimbag te, “Egketuman ini.” Ne midlumpeng ke deruwa nepulù wey epat ne pekilukesen ne mibpengarap kandan.

## 6

*Mid-awà dut te Nati te Bilibili ke Enem ne Tuus ne Impereket dut te Midlulun ne Kelatas*

<sup>1</sup> Rutun ne nekita ku ne in-awà dut te Nati te Bilibili ke ikeseveka ne tuus ne impereket dut te midlulun ne kelatas, ne nerineg ku ke lalag dut te seveka dut te epat ne nelimbag. Merahing se kedlalag din su iring te dahing te eduruhung ne migkahi te, “Gaangaan ka kayi.”

<sup>2</sup> Ne nekita ku te ruen meputi ne kudà ne migemew ne ini se ed-untud dutun ne migawed te panà. Ne ruen mibehey kandin te seluluy ne impeipanew rin en su ebpekibunù dut te menge kunterà din diyà te ampew te dunya ne edtavan sikandin.

<sup>3</sup> Ketà ne in-awà kayi te Nati te Bilibili ke ikeruwa ne tuus ne impereket dut te midlulun ne kelatas, ne nerineg ku ke lalag dut te ikeruwa kayiteapatnenelimbagseegkahite, “Gaangaan ka kayi.”

<sup>4</sup> Ne ruen migemew maa ne kudà ne merihà. Ne ini se ed-untud dutun ne insuhù kandin te ebpekevaal te kebunuey diyà te ampew te dunya su apey ebpekekebpetajà te menge menusiya. Ne imbehey kandin ke kempilan.

<sup>5</sup> Ketà ne in-awà dut te Nati te Bilibili ke iketelu ne tuus ne impereket dut te midlulun ne kelatas. Ne nerineg ku ke lalag dut te iketelu kayi te epat ne nelimbag se egkahi te, “Gaangaan ka kayi.” Ne nekita ku ne ruen migemew maa ne kudà ne meitem, ne ini se ed-untud ketà ne ruen timbangan ne ed-ewiten din.

<sup>6</sup> Ne ruen iring te suwara ne nerineg ku ne riyà ebpuun te epat ne nelimbag se migkahi te, “Tengà dà te gentangan ne bahas se egkepemasa dut te idsukey te senge hewii, ne senge hantang wey tengà dà ne ginaling se egkepemasa dut te idsukey te senge hewii. Ugaid ne kenà niyu ipeiseg ke elehà dut te lana wey vinu.”

<sup>7</sup> Ketà ne in-awà dut te Nati te Bilibili ke ikeepat ne tuus ne impereket dut te midlulun ne kelatas. Ne nerineg ku ke lalag dut te ikeepat kayi te epat ne nelimbag se egkahi te, “Gaangaan ka kayi.”

<sup>8</sup> Na nekita ku ne ruen migemew maa ne kudà ne meputiputi. Ini se ed-untud ketà ne ed-ingaranan ki Kemetayen, ne si Iveyaan se ngaran dut te edtundag kandin. Ne imbehey kandan te kebayaà te kebengimatey te ikeepat ne vaad dut te langun ne menusiya. Ebpengimatey ran ibpepevaya te kebunuey, bitil, daru wey menge leew ne binatang.

<sup>9</sup> Ketà ne in-awà dut te Nati te Bilibili ke ikelima ne tuus ne impereket dut te midlulun ne kelatas, ne iyan ku nekita ke ebpelengesaan te menge binatang ne ibehey ran diyà te Eleteala ne riyà te siyung ne ruen menge gimukud dut te langun ne menge etew ne mid-imetayan su sabap dut te kepsepasabut dan te Lalag te Eleteala wey atag dut te kebpepenudtul dan te lalag din.

<sup>10</sup> Ne mibpemensag dan langun se egkahi te, “Sikuna rà ke Kerenan ne dekdekela se gehem din, ne langun ne ed-ul-ulaan nu ne metidtu ne egkeserihan ka. Engkey se keuhet din se kedtahad dey te kedsuli nu te menge etew kayi te dunya atag dut te ked-imatey ran kenami? Keenu nu edusaa sikandan te ked-imetayi ran kenami?”

<sup>11</sup> Ne ketà ne mibehayan dan te meputi ne belegkas ke uman seveka kandan, ne midlalag ke Kerenan kandan te medtehad dan pà te mehaan taman te egkepatay te menge ruma ran te eduma te Eleteala iring dut te ked-imetayi kandan.

<sup>12</sup> Ne nekita ku ne in-awà dut te Nati te Bilibili ke ikeenan ne tuus ne impereket dut te midlulun ne kelatas. Ne netekew ne midlinug te mevaher, ne mibmeitem ke andew iring dut te saput ne meitem, ne mibmerihà ke bulan iring te lengesa.

<sup>13</sup> Ne langun ne bituen diyà te langit ne nengeulug kayi te ampew te dunya iring dut te menguwed pà ne bahas te kayu ne igira su nesuhat te mevandes ne keramag.

<sup>14</sup> Ne neawà ke langit iring dut te kelatas ne midlulun, ne langun ne menge buvungan wey menge punul ne neawà diyà te netehuan din.

<sup>15</sup> Ne dutun ne langun ne menge etew kayi te ampew te dunya ne neandek piya ke edatù, ne ke ruma pà ne egkamal, ke egkeunutan te menge sundaru, ke kewasa ne menge etew, ke menge etew ne ruen gaga rin wey langun ne menge uripen etawa kenà ne mid-eles dan diyà te menge surung wey diyà te menge ringkab diyà te buvungan.

<sup>16</sup> Ne migkehiyan dan ke menge buvungan wey ke menge rekela ne batu te, “Ketempahi key en ne buvungan ne kevnunbuni key en su apey key kenà egkekita rut te Eleteala ne ebpinuu ne edatù wey kenà key en meumai rut te kedusa te Nati te Bilibili.

<sup>17</sup> Su neuma en ke hewii ne kedusa ran keytew ne warà en iya ebpekeliyu ketà.”

## 7

*Ke Mehatus wey Epat nepulù wey Epat Nengivu ne Menge Etew ne Hudiyannen ne Midtiyapan su tuus te Miduma ran te Eleteala*

<sup>1</sup> Neipus arà ne ruen nekita ku ne epat ne suluhuen te Eleteala ne ed-itindeg dut te epat ne pedyulu kayi te ampew te dunya, ne mibangen dan ke epat ne keramag su apey kenà edsamber kayi te tanà, rahat wey menge kayu.

<sup>2</sup> Ne ruen ruma pà ne suluhuen te Eleteala ne nekita ku ne migemew riyà te edsilaan ne mid-ewit te tumbuk te Eleteala ne warà kemetayen din. Ne mibmerahing se kegkahi

rin dut te epat ne suluhuen ne mibehayan te Eleteala te gehem te edereetan ke tanà wey rahat.

<sup>3</sup> Migkahi rin kandan te, “Kenà niyu pà dereeti ini se tanà, rahat wey menge kayu taman te kenà dey pà egketiyapan ke menge buked dut te langun ne menge etew ne eduma te Eleteala tew.

<sup>4</sup> Dutun ne nerineg ku ke kerakel te menge etew ne netiyapan te buked dan ne mehatus wey epat nepulù wey epat nengivu ran, ne riyà dan ebpuun te sepulù wey deruwa ne bansa rut te menge inenakan ni Israyil.

<sup>5</sup> Sepulù wey deruwa nengivu ne menge etew se netiyapan dut te inenakan ni Huda. Ne iring ded dema ne sepulù wey deruwa nengivu ne menge etew riyà te inenakan ni Rubin wey sepulù wey deruwa nengivu ne menge etew riyà te inenakan ni Gad.

<sup>6</sup> Ne sepulù wey deruwa nengivu ne menge etew riyà te inenakan ni Asur, ne sepulù wey deruwa nengivu ne menge etew riyà te inenakan ni Neptali, ne sepulù wey deruwa nengivu ne menge etew riyà te menge inenakan ni Manasis,

<sup>7</sup> ne sepulù wey deruwa nengivu ne menge etew riyà te inenakan ni Simeon, ne sepulù wey deruwa nengivu ne menge etew riyà te inenakan ni Levi, ne sepulù wey deruwa nengivu ne menge etew riyà te inenakan ni Isakar,

<sup>8</sup> ne sepulù wey deruwa nengivu ne menge etew riyà te inenakan ni Sabulun, ne sepulù wey deruwa nengivu ne menge etew riyà te inenakan ni Jose, wey sepulù wey deruwa nengivu ne menge etew riyà te inenakan ni Benjamin.

*Ke Denda ne Menge Etew ne Mibevelegkas te Meputi ne Kumbalà*

<sup>9</sup> “Neipus arà ne ruen nekita ku ne denda ne menge etew ne kenà egkeviring. Riyà dan ebpuun te langun ne edsusunan te menge etew, diyà te langun ne bansa, diyà te langun ne inged wey langun ne kinehiyan te menge etew. Mid-itindeg dan diyà te etuvangan te ebpinuwan dut te edatù wey riyà te etuvangan dut te Nati te Bilibili. Ne mibevelegkas dan te melayat ne meputi ne kumbalà ne mid-ewit dan te dawun te niyug.

<sup>10</sup> Ne mibmerahing se lalag dan se egkahi te, Edeyuen ta ke Eleteala ini se ebpinuu ne edatù, ne edeyuen ta rema ini se Nati te Bilibili, su sikandan ke mibpeliyu keyta rut te kedusa te menge salà ta.”

<sup>11</sup> Ne ruen ketà langun ne menge suluhuen te Eleteala ne midlingut med-itindeg dut te ebpinuwan te edatù wey ke deruwa nepulù wey epat ne pekilukesen wey ke epat ne nelimbag. Ne midlumpeng dan diyà te etuvangan te ebpinuwan te edatù ne mibpengarap dan te Eleteala

<sup>12</sup> se egkahi te,

“Egketuman ini.

Edeyuen tew ke Eleteala tew.

Ebentuhen tew sikandin.

Ne ed-edatan tew sikandin

su ke itungan din ne metampas,

ne ke kebayàbayà din te edatù ne dekelà

wey ke gehem din ne mevaher.

Ebpeselematan tew sikandin taman te taman.”

<sup>13</sup> Ne migkehiyan a rut te seveka te menge pekilukesen, ke sikandin te, “Engkey ini se menge etew ne mibevelegkas te meputi ne kumbalà ne endei ran ebpuun?”

<sup>14</sup> Ne midtavak a te, “Kenà ku egketuenan, Datù. Ugaid ne kehiya nu su sikuna se netau.”

Ne migkahi rin te, “Ini se menge etew ne nekepevayà dan te mepasang ne kemeresayan diyà te ampew te dunya. Ne mibpemipian dan en ini se menge kumbalà dan dut te lengesa te Nati te Bilibili su apey ran ebmepmeputi, ne iyan din meana ne neawà en ke menge salà dan.

<sup>15</sup> Tembù be

diyà dan ebpekeitindeg te etuvangan

dut te ebpinuwan te edatù,

su apey egeleveke dan kandin

diyà te Nekebpuru ne Valey rin

te merukilem meandew.

Ne ke Eleteala ne ebpinuu ne edatù se edtuganur kandan.

<sup>16</sup> Ne kenà dan en egkevital,

ne kenà dan en ebpekeinun.

Kenà dan en egkepesangan dut te meinit me andew etawa piya engkey ne meinit.

<sup>17</sup> Su ini se Nati te Bilibili ne kayi te etuvangan te ebpinuwan dut te edatù, ne sikandin se edtuganur kandan, wey ebpeheewit kandan diyà te ebpuunan te minge wayig ne ebpekevehey te umur ne warà edtemanan din. Ne ke Eleteala ne id-awà din ke kemutuwan dan ne kenà dan en ebpekesinehew."

## 8

*In-awà dut te Nati te Bilibili ke Ikepitu ne Tuus ne Impereket dut te Midlulun ne Kelatas*

<sup>1</sup> Dutun ne in-awà dut te Nati te Bilibili ke ikepitu ne tuus ne impereket dut te midlulun ne kelatas. Neipus arà ne mibpeeneng-eneng ke langun ne riyà te langit lusud te tengà te uras.

<sup>2</sup> Ne nekita ku ini se pitu ne suluhuen te Eleteala ne ed-itindeg diyà te etuvangan din, ne ruen budyung ne imbehey rut te uman seveka kandan.

<sup>3</sup> Ne ruen pà ruma ne suluhuen te Eleteala ne nekita ku ne mid-ewit te bulawan ne edtehuan te rukut, ne nekeuma sikandin ne mid-itindeg diyà te uvey rut te ebpelengesaan te minge binatang ne ibehey ran diyà te Eleteala. Ne ruen dekelà ne rukut ne imbehey kandin su edtutungen su apey ke meemut ne ngareg din ne ebped-umanen dut te kebpengeningeni te minge etew ne mibperetiyyaya te Eleteala. Ne edtutungen ini riyà te ebpelengesaan ne mibeelan ne bulawan ketà te etuvangan te ebpinuwan dut te edatù.

<sup>4</sup> Dutun ne ini se evel te rukut ne midtutung dut te suluhuen ne ed-itindeg diyà te etuvangan te Eleteala ne mibpevayà ini diyà te Eleteala seretà din te kebpengeningeni dut te minge etew ne mibperetiyyaya te Eleteala.

<sup>5</sup> Dutun ne migkuwa dut te suluhuen te Eleteala ini se edtehuan te rukut ne mid-ipenù din te baha ne ebpuun dut te ebpelengesaan, ne in-antug din ini diyà te ampew te dunya. Ne ketà ne miduruhung, ne mibpemberansi, ne migkikilat, wey midlinug.

*Ini ne Mekeatag dut te Pitu ne Suluhuen te Eleteala ne Ebperiyup te Budyung dan*

<sup>6</sup> Na ini se pitu ne suluhuen te Eleteala ne neimes dan te ebperiyup dut te budyung dan.

<sup>7</sup> Ne ini se neuna ne suluhuen te Eleteala ne mibperiyup en te budyung din, ne netekew ne ruen midadsang diyà te tanà ne biyew wey apuy ne nekesawug te lengesa. Ne netutung ke iketelu ne baad kayi te kelibutan abpeg ke minge kayu wey ke langun ne sagbet ketà.

<sup>8</sup> Ne mibperiyup en te budyung din ini se ikeruwa ne suluhuen te Eleteala, ne ruen in-antug diyà te rahat ne iring te metikang ne buvungan ne egkeregreg. Ketà ne ke iketelu ne baad dut te rahat ne nevaluy ne lengesa,

<sup>9</sup> ne ke iketelu ne baad dut te langun ne ed-ubpà te rahat ne minatey, ne ke iketelu ne baad te minge kapal diyà te rahat ne nereetan.

<sup>10</sup> Na mibperiyup te budyung din ini se iketelu ne suluhuen te Eleteala, ne ruen neulug ne riyà ebpuun te langit ne dekelà ne bituen ne neregreg iring dut te sulù. Neulug ini riyà te iketelu ne vaad ne lawa te minge wayig wey minge tuhunan.

<sup>11</sup> (Ke ngaran kayi te bituen ini ne neulug ne "Mepait.") Ketà ne iketelu ne vaad dut te langun ne wayig diyà te ampew te dunya ne ebmepait, ne ruen merakel ne minge etew ne minatey su nekeinum dan ketà te wayig ne mibmepait.

<sup>12</sup> Na mibperiyup te budyung din ini se ikeepat ne suluhuen te Eleteala ne iketelu ne vaad dut te andew ne nereetan, ne iketelu ne vaad dut te vulan ne nereetan wey iketelu ne vaad dut te minge bituen. Ketà ne iketelu ne vaad dut te kerayag dan ne neawà. Ne merusirem ke iketelu ne vaad dut te meandew su warà rayag te andew, ne iring ded dema ne merusirem ke iketelu ne vaad dut te merukilem su warà en rayag te bulan wey minge bituen.

<sup>13</sup> Ne gewii te edtengteng e pà, ne nerineg ku ke lalag dut te banug ne edlayang diyà te kewkewangan. Ne ketetelu rin leleha te merahing se egkahi te, "Mekeyruwuru ke egketemanan dut te minge etew ne ed-ubpà diyà te ampew te dunya! Uya," ke sikandin pà maa, "mekeandek ke keresayan ne ebpekeuma riyà te kandan ketà te edahing ke budyung dut te ini se tetelu pà ne suluhuen te Eleteala!"

## 9

<sup>1</sup> Na mibperiyup te budyung din ini se ikelima ne suluhuen te Eleteala ne iyan ku nekita ne iring te bituen te langit ne neulug diyà te tanà. Ne ruen imbehey kandin ne gungsi ne ibpuwas dut te liyang ne ebpendiyà te diralem te tanà ne warà edtemanan te keralem din.

<sup>2</sup> Ne mibpuwasan dut te bituen ini se liyang dut te tanà, ne ruen midlepew ne dekelà ne evel iring te evel te dekelà ne apuy. Dutun ne neelangan ke kedsilà te andew dut te mekepal ne evel ne mibmerusirem ke ampew te dunya te evel ne midlepew dut te liyang te tanà.

<sup>3</sup> Ne rutun te evel ne ruen merakel ne tepuri ne nekeuma diyà te ampew te dunya. Ne nevehayan dan te bisa te ebpekekaid te minge etew iring dut te bisa te selipitsipit.

<sup>4</sup> Ne intelaan kandan te kenà dan dereeti ke minge sagbet, ke minge pemulaan etawa ke minge kayu, ugaid ne iyan dan pemekeiri ke minge etew ne warà tiyapi te Eleteala ke buked dan.

<sup>5</sup> Intuhut kandan te kedresaya dut te minge etew lusud te lelima ne vulan, ugaid ne kenà egkepakey ne ed-imatey ran kandan. Ne ke kedresaya ran te minge etew ne iring dut te kesakit te kegkahaht te selipitsipit.

<sup>6</sup> Ne rutun te hewii te ini se lelima ne vulan ne egkiyug ke minge etew ne ebpatay ran en perem, ugaid ne kenà egked-ulaula. Uya, kiyug dan te ebpatay ran, ugaid ne ed-elihu kandan ke kepatay.

<sup>7</sup> Ne ke lawa dut te minge tepuri ne iring te lawa te kudà ne ed-unturan te etew ne ed-amung te ebunuey. Ugaid ne ke paras dan ne iring te paras te etew, ne ruen iring te bulawan ne seluluy diyà te ulu ran.

<sup>8</sup> Ne melayat se bulvul dan iring dut te bulvul te meritan, ne ke ngipen dan ne iring dut te ngipen te erimaung.

<sup>9</sup> Nelepisan ke kumeng dan te iring te putew ne limbutung. Ne kedweweheswes dut te kebpeperakpak dan ne iring dut te kedebakdebak te merakel ne kudà ne eguyud te minge kerumata te ed-amung te ebunuey.

<sup>10</sup> Ini se ikug dan ne egkahaht iring dut te kegkahaht te ikug te selipitsipit. Ne kayi te kegkahaht te ikug dan ne edresayan dan ke minge etew lusud te lelima ne vulan.

<sup>11</sup> Ruen egkeunutan dan ne mid-ewit kandan ne ke sugsuhuen dut te datù te pekaid ne si Setanas ne egkamal dut te liyang te tanà ne warà edtemanan te keralem din. Ini se ngaran din ne si Abadan dut te kinehiyan ne Hibruhanen, ne Epuliyun se ngaran din dut te kinehiyan ne Gerisiyanen (ne iyan din meana ne "Ebpenderaat").

<sup>12</sup> Na ini se neuna ne merasey ne egketemanan ne ebpekeuma dut te minge etew kayi te ampew te dunya ne neipus en, ugaid ne ruen deruwa pà ne merasey ne egketemanan ne ebpekeuma.

<sup>13</sup> Dutun ne mibperiyup te budyung din ini se ikeenem ne suluhuen te Eleteala ne ruen nerineg ku ne midlalag diyà te epat ne pediyulu rut te bulawan ne ebpelengesaan diyà te etuvangan te Eleteala.

<sup>14</sup> Midlalag diyà te ikeenem ne suluhuen te Eleteala, ke sikandin te, "Ibpeawà nu ke epat ne sugsuhuen dut te datù te pekaid ne mibakù diyà te dekelà ne wayig ne ed-ingaranan te Yupratis."

<sup>15</sup> Ketà ne impeawà din ini se epat ne sugsuhuen. Impenehana ran neraan te ini ne rahun, ini ne vulan, ini ne hewii, wey ini ne uras su apey ran meimetayi ke iketelu ne vaad dut te langun ne minge etew te dunya.

<sup>16</sup> Ne intarem kediey ke kerakel te minge sundaru ran ne egkukudà, ne ke kerakel dan ne sepulù nengivu midtakep dut te deruwa nepulù nengivu.

<sup>17</sup> Ne kayi te imperayag kediey ne nekita ku ke minge kudà wey ke minge ed-untud ne ke paras dan ne iring kayi. Nelimbutungan arà se ebpengukudà te merihà ne iring ke rihà din te apuy, ruen meilem ne iring dut te mepurù ne batu ne ed-ingaranan te Sapira, ne ruen mekelawag dema ne iring dut te sendawà. Ne ke ulu rut te minge kudà ne iring te ulu te erimaung, ne ruen egemew dut te bèbà dan ne apuy, evel, wey sendawà ne egkeregreg.

<sup>18</sup> Ne neherà ke iketelu ne vaad dut te minge etew te dunya ibpepevayà te ini se tetelu ne ibpemekaid, ke apuy, evel, wey ke sendawà ne egkeregreg ne migemew rut te bèbà te minge kudà.

<sup>19</sup> Su ruen ibpemekaid dut te minge kudà kayi te bèbà dan ne duen dema diyà te ikug dan, su ruen ulu diyà te ikug dan ne iring dut te ulu te uled ne ebpemekaid te minge etew.

<sup>20</sup> Ugaid ne ke nesamà ne minge etew ne warà mebpatay rut te kinepekaid te minge kudà, ne warà dan med-engked dut te meraat ne ed-ul-ulaan dan. Warà dan

dema med-engked te ebpengarap te busew wey ke menge ledawan ne mibeelan dan te bulawan, pirak, galang, batu wey kayu. Ne ini se ledawan ne mibpengarap dan ne kenà ebpekekita, ne kenà ebpekerineg, wey kenà ebpekeipanew.

<sup>21</sup> Ne warà dan dema med-engked te kebpengimatey ran te menge etew, ke delemetan dan, ke kebpengingniyug dan, wey ke kebpenakew ran.

## 10

*Ini ne Mekeatag te Reisek ne Kelatas ne Migeweran dut te Suluhuen te Eleteala*

<sup>1</sup> Dutun ne nekita ku ne ruma pà ne mevaher ne suluhuen te Eleteala ne mibpenaug ne egenat te langit. Ne iring te mibevelegkas te sehulapun, ne neterungan ke ulu rin te beluntu. Ke buked din ne iring te ebpeneringsing ne andew, ne ke menge paa rin ne iring dut te pelaus ne regreg.

<sup>2</sup> Diyà te velad din ne migawed te reisek ne kelatas ne neverat en. Guna su nekerenà en sikandin ne ingiek din ke kewanan ne paa rin diyà te rahat, ne ke divaluy ne paa rin ne ingiek din diyà te tanà.

<sup>3</sup> Ne mibmerahing se kedlalag din iring dut te ked-iniher te erimaung. Ketà te kedlalag din ne midsulian te pitu ne duruhung te beransi.

<sup>4</sup> Neipus ke eduruhung ne idsurat ku en perem ini se nerineg ku, ugaid ne ruen edlalag diyà te langit ne nerineg ku ne egkahi te, "Kenà nu isurat ini se ibpesabut dut te pitu ne eduruhung, ugaid ne itahù nu rà te hinawa nu!"

<sup>5</sup> Dutun ne ini se suluhuen te Eleteala ne nekita ku ne ed-itindeg diyà te rahat wey tanà, ne migkayew te kewanan ne belad din.

<sup>6</sup> Ne ruen mevaher ne impasad din diyà te Eleteala ne warà kemetayen din taman te taman ne iyan midlimbag te langit, tanà, rahat wey langun taman ne netahù ketà. Migkahi ke suluhuen te, "Kenà en iya ed-ug-uheten!"

<sup>7</sup> Su ketà te ebperiyup en ke ikepitu ne suluhuen te Eleteala te budyung din, ne edtumanen en dut te Eleteala ini se netahù te itungan din ne in-eles dengan, ini se impesabut din dut te menge sugsuhuen din ne mibpelambas te lalag din dengan."

<sup>8</sup> Dutun ne midlalag maa ini se nerineg ku ne edlalag kediey diyà te langit. Ke sikandin te, "Pendiya ka te suluhuen te Eleteala ne ed-itindeg diyà te rahat wey tanà ne kua nu arà se deisek ne kelatas ne egeweran din ne neverat en."

<sup>9</sup> Ne mibpendiya a te suluhuen te Eleteala ne mibuyù ku en ke reisek ne kelatas ne neverat en ne egeweran din. Ne migkehiyan a rin te, "Kua nu ini ne keena nu. Meemis su iring te nanam te teneb diyà te bèbà nu, ugaid ne embiya ed-ivelengen nu en ne ebmepait diyà te hetek nu."

<sup>10</sup> Ne migkuwa ku arà se reisek ne kelatas diyà te belad din ne migkaan ku, ne meemis ini kayi te bèbà ku su iring te teneb. Ugaid ne ketà te mid-iveleng ku en, ne mibmepait kayi te hetek ku.

<sup>11</sup> Ne rutun ne migkehiyan a nikandin te, "Ibpmenudtul nu pà maa ke Lalag te Eleteala ne impesabut din keykew mekeatag te egked-ulaula dut te menge egkeunutan wey ke menge etew ne riyà ebpuun te langun ne menge edsusunan te menge inged ne nekebira ke paras dan wey kinehiyan."

## 11

*Ini ne Mekeatag dut te Deruwa ne Etew ne Ebpesabut Mekeatag te Eleteala*

<sup>1</sup> Neipus arà ne ruen tembu ne iring te tuked ne imbehey kediey ne migkehiyan a te, "Pendiya ka ne tembuwa nu ke Nekebpuru ne Valey te Eleteala wey ke ebpelengesaan ketà te menge binatang ne ibehey ran te Eleteala, ne biranga nu ke menge etew ne ebpengarap en ketà.

<sup>2</sup> Ugaid ne kenà nu tembuwa ke lama dut te Nekebpuru ne Valey te Eleteala. Belehalen su ibehey en arà diyà te menge etew ne kenà Hudiyänen. Su lusud te epat nepulù wey deruwa ne vulan ne edtektaken dan en arà se inged ne Hirusalim, ke inged te Eleteala.

<sup>3</sup> Ne ketà te epat nepulù wey deruwa ne vulan, ne sengivu wey deruwa nehatus wey enem nepulù ne hewii ini, ne ruen deruwa ne etew ne edsuhuen ku ketà su apey ran ebpesabut mekeatag kediey. Ne iyan dan igkukumbalà ne sakù ne tuus te iyan iya se ebpekedsendit ke menge etew ne ebpebuten dan."

<sup>4</sup> Na, ini se deruwa ne etew ne edsuhuen dut te Eleteala ne ebpmesabut mekeatag kandin ne ini ke egkesuhat dut te sempità dengan mekeatag te deruwa ne kayu ne Ulivu. Ne sikandan dema ke egkesuhat dut te sempità mekeatag dut te deruwa ne sulù ne intahù diyà te etuvangan te Eleteala ne Kerenan dut te langun ne menge etew.



<sup>5</sup> Ne embiya ruen ebpemekaid kandan, ne ruen apuy ne egemew rut te bèbà dan su apey egketutung ke etew ne egkunterà kandan. Tembù be ed-imetayan ke piya engkey ne ebpemekaid kandan.

<sup>6</sup> Ne ruen gehem dan dema te ebangen te kivel su apey kenà ed-uran dut te hewii ne ebpesebutan dan ke Lalag te Eleteala. Ruen ded dema gehem dan apey ke menge wayig ne egkevaluy ne lengesa, ne ruen ded dema gehem dan te edresayan dan ke langun ne menge etew kayi te ampew te dunya te biasbias ne menge keresayan piya keenu se kiyug dan.

<sup>7</sup> Ne ketà te kebpekeipus dut te deruwa ne ebpemesabut te Lalag te Eleteala, ne ruen ebpekibunù kandan ne mekeandek ne binatang ne egemew ketà te liyang ne ebpependiyà te diralem te tanà ne warà edtemanan te keralem din. Ne ini se mekeandek ne binatang se edtavan ne ed-imatey kandan.

<sup>8</sup> Ne ke menge bangkey rut te deruwa ne diyà dà mekeirehà te ralan dut te rekelà ne inged ne mevantug su ketà inlansang te pinebelavag ne kayu ke Kerenan dan dengan. Ne riyà te sempità mekeatag ketà ne inged, ne ed-ingaranan te Suduma wey Ihiptu su ke ulaula kayi te inged dan ne meraat iring dut te meraat ne ulaula ketà te deruwa ne menge inged.

<sup>9</sup> Merakel ne menge etew ne riyà ebpuun te langun ne inged wey langun ne bansa wey langun ne kinehiyan wey langun ne edsusunan te menge etew ne edtengteng dan dut te deruwa ne bangkey ne minatey en lusud te tetelu wey tengà ne hewii, ne kenà dan idtuhut ne igkeleveng.

<sup>10</sup> Su igkehalew rut te langun ne menge etew te kelibutan su atag dut te ked-imetayi ketà te deruwa. Tembù be ruen kevruran dan wey ruen ibpevegbehayà dan su minatey ini se deruwa ne ebpelambas te Lalag te Eleteala, ini se puunan te kedresaya kandan.

<sup>11</sup> Ugaid ne embiya egkeipus en ke tetelu wey tengà ne hewii, ne ibpeulit en dut te Eleteala ke hinawa ran su egkeuyag ded ne ed-itindeg. Ne egkeandek nevenar ke langun ne menge etew ne ebpekekita kandan.

<sup>12</sup> Dutun ne egkerineg dut te deruwa ne ebpelambas te Lalag te Eleteala te ruen edlalag te merahing diyà te langit, ke sikandin te, "Kayi kew en te langit." Ne egkevatun dan diyà te langit te edumaan te menge sehulapun, ne egkekita ini rut te langun ne menge kunterà dan.

<sup>13</sup> Arà dà ne edlinug te mevaher, ne ikesepulù ne baad dut te inged ne egkereetan wey pitu nengivu ne etew se egkeherà. Ne ke nesamà dut te menge etew ne egkeandek nevenar, tembù be edeyù dan te mekegehem ne Eleteala diyà te langit.

<sup>14</sup> Ini se kegkeipus dut te ikeruwa ne merasey ne egketemanan ne ebpekeuma kayi te menge etew te ampew te dunya, ugaid ne ke iketelu ne mehaan en ebpekeuma.

*Mibperiyup te Budyung din ke Ikepitu ne Suluhuen te Eleteala*

<sup>15</sup> Dutun ne mibperiyup te budyung din ini se ikepitu ne suluhuen te Eleteala, ne ruen neringe ku ne merakel ne menge suwara ne merahing diyà te langit ne migkahi te, "Egenat guntaanì ne warà en дума pà ne edatù kayi te kelibutan ke kenà ke Kerenan ne Eleteala wey ke Impasad din ne Ebperetuen te langun ne si Kristu, ne edatù sikandin taman te taman.

<sup>16</sup> Dutun ne ini se deruwa nepulù wey epat ne pekilukesen ne ebpinuu diyà te etuvangan te Eleteala ne midlumpeng dan ne mibpengarap te Eleteala.

<sup>17</sup> Ne migkahi te,

Is, Kerenan ne Eleteala rey,

sikuna rà ke ebayàbayà te langun.

Sikuna ne daan en te warà pà limbaha te misan engkey en,

ne sikuna pà lavew taman guntaan.

Ebpeselematan dey nevenar sikuna,

su impekita nu ke dekelà ne gehem nu

ne nekerudsù ke en te edatù kayi te ampew te dunya.

<sup>18</sup> Misan neepes nevenar ke menge kunterà nu

ne nekeuma en ke hewii te kedusa nu kandan,

wey ke hewii te kedtimbang nu

rut te ulaula te menge etew ne minatey en.

Ne nekeuma en rema ke hewii te kedlalew nu

rut te langun ne menge sugsuhuen nu ne mibpelambas te lalag nu,

ne langun ne menge sakup nu

wey langun ne ed-adat keykew,

misan mepurù mevavà.

Uya nekeuma en ke hewii ne edereetan nu ke langun ne mibaal te kederaat kayi te dunya.”

<sup>19</sup> Dutun ne nekita ku ke Nekebpuru ne Valey te Eleteala diyà te langit ne mibpuwasan, ne nekita ku ketà ke baul ne ruen intahù ke menge surat dut te impasad te Eleteala diyà te menge etew rin dengan. Netezew ne egkesuvid se kilat, ne miduruhung, ne mibpemberansi, ne midlinug, wey mid-uran te biyew ne mekepal.

## 12

*Ini ne Mekeatag dut te Meritan wey Tendayag*

<sup>1</sup> Ketà ne ruen dekelà ne tuus ne mekegeyip ne nekita ku riyà te langit. Su ruen meritan ne nekita ku ne iring te mibevelegkas te andew ne ed-itindeg diyà te bulan, ne ruen seluluy rin ne sepulù wey deruwa ne bituen.

<sup>2</sup> Mehingey sikandin ne nekeerang su ebeliliten en.

<sup>3</sup> Ne ruen seveka maa ne dekelà ne tuus ne mekegeyip ne nekita ku riyà te langit. Ruen dekdekelà ne merihà ne tendayag ne pitu se ulu rin wey sepulù se sidung din ne diyà te uman seveka ne ulu rin ne ruen seluluy rin.

<sup>4</sup> Ne midrapey kayi te ikug din ke iketelu ne baad ne menge bituen diyà te langit, ne in-antug din diyà te ampew te dunya. Ne ed-it-itindeg diyà te sineruwan te meritan ne mehaan en ed-anak su egkaan dut te batà embiya egemew en.

<sup>5</sup> Ne mid-anak ke meritan te meama, ugaid ne warà mekaan dut te tendayag ke vatà su migègeenan geweri dut te Eleteala ne mibatun din diyà te ebpiniuwan din te edatù diyà te langit. Su sikandin se ebperetuen dut te langun ne menge etew te ampew te dunya, ne warà ebpekegaga ne ed-atu kandin su mevaher se kedatù din.

<sup>6</sup> Ne mibpelahuy ke meritan diyà te tanà ne kenà egkeubpaan te etew su ketà ne ruen ed-ubpaan din ne mibpenahana te Eleteala kandin. Ketà ne sikandin ne edtugenuren te Eleteala lusud te sengivu wey deruwa nehatus wey enem nepulù ne hewii.

<sup>7</sup> Dutun ne ruen gira diyà te langit. Si Miguel, ke seveka ne egkeunutan dut te menge suluhuen te Eleteala, wey ke menge ruma rin ne menge suluhuen se mibpevunuey dut te tendayag. Ne mibpekibunù dema ini se tendayag wey ke menge sakup din.

<sup>8</sup> Ugaid ne netevanan dan ne impeawà dan en diyà te langit.

<sup>9</sup> Su in-antug dan diyà te ampew te dunya ini se rekelà ne tendayag wey langun ne sakup din. Su ini se tendayag ne arà se engkungkun ne uled te rengdengani rà nevenar ne ed-ingaranan ki Setanas ke datù te pekaid, ne metau ne edlimbung te langun ne menge etew kayi te ampew te dunya.

<sup>10</sup> Dutun ne ruen nerineg ku ne midlalag te merahing diyà te langit ne migkahi te,

“Ini en ke hewii te kebpeiyu rut te Eleteala te langun ne menge etew,  
ne impekita en te Eleteala ke gehem din te edatù.

Ne iring ded dema ke Impasad din ne Ebperetuen te langun,  
ne impekita ke baher din te edatù.

Su impeawà din si Setanas diyà te langit,

arà se egkunterà te menge ruma ne mibperetiyaya diyà te dunya,  
su merukilem meandew ne edsambung kandan

diyà te etuvangan te Eleteala.

<sup>11</sup> Ugaid ne ke menge mibperetiyaya te Eleteala

ne midtevanan dan arà se edsambung kandan

impepevayà dut te lengesa ni Hisus

ke ed-ingaranan te Nati te Bilibili

ne mid-imetayan diyà te pinebelavag ne kayu.

Uya, midtevanan dan si Setanas

impepevayà dut te benar ne penurù

ne ibpemenudtul dan.

Ne warà dan menuhuni ke umur dan

misan ibpatey ran su atag dut te kebperetiyaya ran.

<sup>12</sup> Tembù be sikiyu ke langun ne ed-ubpà diyà te langit,

ne egkehalew kew su impeawà si Setanas!

Ugaid ne egkeyruwan kew ne ed-ubpà diyà te tanà wey rahat

su in-antug en si Setanas diyà te keniyu!

Ne neepes nevenar sikandin su netueanan din

te mehaan en egkepupus ke hewii rin

te ebaal te meraat.”

<sup>13</sup> Ketà te netueanan dut te tendayag te impeawà en sikandin diyà te langit ne in-antug kayi te tanà ne midlayas din ke meritan ne mid-anak te batà ne meama.

<sup>14</sup> Ugaid ne ini se meritan ne ruen imbehey te Eleteala kandin ne deruwa ne pakpak te dekelà ne banug su apey ebpekelayang sikandin diyà te ed-ubpaan ne impenehana kandin diyà te tanà ne kenà egkeubpaan te etew. Su riyà ne kenà egkesaut sikandin dut te tendayag su edtugenuren te Eleteala lusud te tetelu wey tengà ne rahun.

<sup>15</sup> Ne ini se tendayag, ne mibpehemew te rekelà ne wayig diyà te bèbà din su apey egkeanud arà se meritan.

<sup>16</sup> Ugaid ne ke tanà se midtavang dut te meritan su migintaang ini se tanà ne ketà midsenep ke wayig ne riyà ebpuun te bèbà te tendayag.

<sup>17</sup> Tembù be dekdekelà se kegkeepes dut te tendayag kayi te meritan, ne mibayaan din ke ruma ne inenakan dut te meritan su ebpekibunù kandan. Ne ini se menge inenakan dut te meritan ne ini ke menge etew ne eduma dut te insuhù te Eleteala wey meilut se kegawed dan dut te benar ne impenurù ni Hisus.

<sup>18</sup> Neipus arà ne mibpendiyà ke tendayag te beyvey te rahat ne mid-it-itindeg ketà.

## 13

### *Ini ne Mekeatag dut te Deruwa ne Mekeandek ne Binatang*

<sup>1</sup> Neipus arà ne ruen nekita ku ne mekeandek ne binatang ne mibpantew riyà te rahat. Ruen sepulù ne sidung din wey pitu ne ulu rin. Ne diyà te uman seveka ne sidung din ne ruen seluluy rin, ne diyà te uman seveka ne ulu rin ne ruen meraat ne menge lalag ne idsumpalit te Eleteala ne insurat ketà.

<sup>2</sup> Ne ini se mekeandek ne binatang ne nekita ku ne iring dut te paras te dekdekelà ne tinggalung ne ed-ingaranan te liyupardu. Ugaid ne ke paa rin ne nekevira su iring te paa te binatang ne ed-ingaranan te biyir, ne ke bèbà din ne iring te bèbà dut te erimaung. Ne ke tendayag se mibehey kayi te mekeandek ne binatang te gehem din, ke edetuan din wey ke kebayaàbaya din te edatù.

<sup>3</sup> Diyà te seveka ne ulu rut te mekeandek ne binatang ne ruen dekelà ne tulak din su nepelian te ibpatey rin, ugaid ne neulian en. Tembù be negeyip ke langun ne menge etew te ampew te dunya, ne miduma ran ketà te binatang.

<sup>4</sup> Ne mibpengarap dut te langun ne menge etew ke tendayag su sikandin se mibehey te kebayaàbaya dut te mekeandek ne binatang. Ne mibpengarap dan dema ke mekeandek ne binatang, ke sikandan te, "Warà ebpekerepeng kayi te mekeandek ne binatang! Warà ebpekeatu kandin!"

<sup>5</sup> Ne lusud te epat nepulù wey deruwa ne vulan ne midtuhutan dut te Eleteala arà se mekeandek ne binatang te edatù wey edantal te hinawa rin ne edsumpalit te Eleteala.

<sup>6</sup> Uman egkevekà se bèbà din ne edsumpalit te Eleteala wey ke ed-ubpaan te Eleteala diyà te langit wey langun ne sakup te Eleteala ne ed-ubpà diyà te langit.

<sup>7</sup> Ne midtuhutan dema te Eleteala te ked-atu dut te mekeandek ne binatang kayi te menge sakup din ne ebpeketalew kandan. Ne midtuhutan te Eleteala te ruen kebayaàbaya dut te mekeandek ne binatang te edatù te langun ne menge etew diyà te langun ne menge inged ne nekebira se kinehiyan wey paras dan.

<sup>8</sup> Sikandin se ebpengerapan te langun ne menge etew te ampew te dunya ne warà ngaran din ne insurat diyà te riberù ne nesuratan te menge ngaran te langun ne menge etew ne mibehayan te umur ne warà edtemanan din. Ini se riberù ne midsuratan dut te Nati te Bilibili ne mibpeimatey, ne ini ne insurat din en neraan te warà pà limbaha ini se kelibutan.

<sup>9</sup> Itaan niyu ke telinga niyu ne pemineg kew.

<sup>10</sup> Ke etew ne ibpepevayà te Eleteala te egkesigkem, ne edsigkemen iya.

Ne ke etew ne ibpepevayà te ebpatey te sundang, ne sundang iya se ibpatey rin.

Tembù be langun tew ne sakup te Eleteala ne iyan iya se edtigker kiyu te keresayan wey idsarig ke egked-ulaula tew te Eleteala.

<sup>11</sup> Ne ruen ded maa mekeandek ne binatang ne nekita ku ne migemew riyà te tanà. Ruen deruwa ne sidung din iring dut te sidung te bilibili, ugaid ne ke lalag din ne iring dut te kedlalag te tendayag.

<sup>12</sup> Ne migheluan din ke kebayaàbaya dut te neuna ne mekeandek ne binatang ne iyan midsuhù kandin. Mibpehes din ke langun ne menge etew te ampew te dunya te ebpengarap dan dut te neuna ne mekeandek ne binatang, arà ne nepelian te ibpatey rin ugaid ne neulian en.

<sup>13</sup> Ruen merakel ne mekegeyip ne ed-ul-ulaan ne mibeelan dut te ini se ikeruwa ne binatang su misan apuy ne ebpuun te langit ne impeuran din ne nekita rut te langun ne menge etew.

<sup>14</sup> Ne sabap dut te mekegeyip ne ed-ul-ulaan ne mibpeveelan kandin dut te neuna ne binatang, ne nelimbangan din ke langun ne menge etew kayi te ampew te dunya. Ketà ne insuhù din kandan te ebaal te ledawan ne ebpekeiring te paras dut te neuna ne mekeandek ne binatang ne ebpengerapan dan, arà se binatang ne nepelian te sundang ugaid ne neulian en.

<sup>15</sup> Ne ini se ikeruwa ne mekeandek ne binatang ne mibehayan te gehem te ebpekeginawa ke ledawan te paras dut te neuna ne mekeandek ne binatang. Tembù be ebpekelaag ke ledawan ne insuhù din te ebpeimatey ke langun ne kenà ed-arap kandin.

<sup>16</sup> Ne mibpehes dema dut te ikeruwa ne binatang ke langun ne menge etew te ebpetiyap kayi te kewanan ne velad dan etawa riyà te buked dan misan mepurù mevavà ne menge etew, kewasa wey ayuayu, uripen etawa kenà.

<sup>17</sup> Su warà etew ne ebpekepemasa etawa ebpekepemendehang embiya kenà dan ed-una te ebpetiyap te ngaran dut te neuna ne mekeandek ne binatang etawa ke rumiru ne tuus te ngaran din.

<sup>18</sup> Iyan dà ebpekesabut dutun ne ke etew ne mibehayan te Eleteala te metampas ne itungan. Ne ke etew ne metampas se itungan din ne egketueanan din ke meana dut te rumiru te arà se mekeandek ne binatang su ngaran arà te etew, ne arà se rumiru rin ne enem ne hatas wey enem nepulù wey enem.

## 14

*Ke Nati te Bilibili wey ke Mehatus wey Epat Nepulù wey epat Nengivu ne Menge Etw ne Impeliyu Rin*

<sup>1</sup> Neipus arà ne nekita ku ke mid-ingaranan te Nati te Bilibili ne ed-it-itindeg diyà te buvungan te Siyun. Ne ruen ruma rin ne mehatus wey epat nepulù wey epat nengivu ne menge etew ne ruen insurat diyà te buked dan ke ngaran dut te Nati te Bilibili wey ke ngaran dut te Eleteala ke Amey rin.

<sup>2</sup> Ne ruen nerineg ku ne edlalag diyà te langit ne iring dut te dehuus te dekelà ne wayig te sampew wey iring dema dut te eduruhung te beransi. Ne arà se suwara ne nerineg ku ne iring dema dut te meupiya ne ebpeminehen te merakel ne egkevit te harpa.

<sup>3</sup> Na ini se mehatus wey epat nepulù wey epat nengivu ne menge etew ne riyà mid-itindeg te etuvangan te ebpinnuwan te ebpinnu ne edatù wey ke epat ne nelimbag wey ke menge pekilukesen. Ne migkanta ran te behu ne kanta ne sikandan dà se metau ne ed-iring ketà te behu ne kanta su sikandan ke impeliyu rut te Nati te Bilibili te salà dan diyà te ampew te dunya.

<sup>4</sup> Ne ini se menge etew ne metilak se ulaula ran su warà dan mebpengingniyug ne warà dan med-esawa. Ne edurumaruma ran dut te Nati te Bilibili te piya endei ebpesinaru. Impeliyu ran nikandin dut te salà dan diyà te ampew te dunya, ne sikandan ke neuna ne ibehay riyà te Eleteala wey riyà te Nati te Bilibili iring dut te edsewitan ne parey.

<sup>5</sup> Ne warà tarù ne migemew te bèbà dan, ne warà ded dema ne igkesawey kandan.

*Ini se Migkahi rut te Tetelu ne Suluhuen te Eleteala*

<sup>6</sup> Neipus arà ne ruen pà suluhuen te Eleteala ne nekita ku ne edlayang diyà te kewkewangan ne ebpemenudtul dut te Meupiya ne Tudtul. Ibpemenudtul din ini te warà kegkepupus din diyà te langun ne menge etew dut te ampew te dunya piya engkey ne edsusunan ne menge etew, piya engkey ne bansa, piya engkey ne kinehiyan te menge etew, wey piya endei ne menge inged.

<sup>7</sup> Ne midlalag sikandin te merahing se egkahi te, "Edati niyu ke Eleteala wey deyua niyu ke gehem din su nekeuma en ke hewii te edtimbangan din ke menge ulaula rut te langun ne menge etew. Pengarap kew kandin ke midlimbag te langit, tanà, rahat wey menge wayig."

<sup>8</sup> Ketà ne ruen ikeruwa ne suluhuen te Eleteala ne nekita ku ne migkahi te, "Na, nereetan en! Nereetan en ini se dekelà ne inged ne ed-ingaranan te Bebilunya! Su mid-ewit din ke langun ne menge etew te ampew te dunya te ed-inum te binu rin ne ebpeketevereg su tuus ini te meredsik ne ed-ul-ulaan din su mid-ubpaan en te karang ini se inged."

<sup>9</sup> Na ruen iketelu ne suluhuen te Eleteala ne nekita ku ne neketundug ne midlalag te merahing se egkahi te, "Embiya ruen etew ne ebpengarap dut te binatang wey ke

ledawan ne iring te paras din, ne embiya ebpetiyap sikandin dut te tuus te binatang diyà te buked din etawa belad din,

<sup>10</sup> ne ebpeinumen din dut te mepait ne binu ne warè nekesawug ne wayig. Ne ini se mepait ne binu ne tuus te dekelà se kegkeepes te Eleteala. Uya, piya engkey ne etew ne ebpengarap dut te binatang ne sikandin ne edresayen diyà te apuy nerakà wey sendawà ne egkereg, ne ke Nati te Bilibili wey ke menge suluhuen te Eleteala ne edtengteng ketà te egked-ulaula.

<sup>11</sup> Ne ini se apuy ne edrasey kandan ne egkeregreg taman te taman. Ne ini se keresayan dan te merukilem meandew ne kenà egkeawà su mibpengarap dan ke binatang wey ke ledawan ne mibeelan dan ne iring te paras din, ne mibpetiyap dan dema dut te tuus te ngaran te binatang.”

<sup>12</sup> Tembù be sikiyu ne menge sakup te Eleteala ne eduma en te suhù din wey egeweran te mevaher ke kebperetiyya niyu ki Hisus, ne iyan iya se tigkeri niyu se keresayan.

<sup>13</sup> Ne ketà ne ruen suwara diyà te langit ne nerineg ku ne edlalag kediey ne migkahi te, “Isurat nu ini: Igenat guntaani ne egkehalew ke menge etew ne ebpatay embiya mibperetiyya en ki Hisus ke Kerenan.

“Benar iyan,” ke migkahi te Kedesenan ne Ebpetuntul te Menusiyà. “Egkehalew ran su ebpeimeley ran dut te mepasang ne helevek dan su ruen lalew ran dut te meupiya ne mid-ulaula ran.”

*Ini ne In-upama Mekeatag dut te Ked-ehani kayi te Ampew te Dunya*

<sup>14</sup> Na nekita ku ke meputi ne sehulapun ne ruen mibpinuu ketà ne iring te paras te menusiya. Midseseluluy te bulawan ne migawed te meharang ne garab.

<sup>15</sup> Ne ruen ruma pà ne suluhuen te Eleteala ne migemew rut te Nekebpuru ne Valey te Eleteala ne mibmerahing se suwara rin te edlalag te mibpinuu diyà te sehulapun se egkahi te, “Garab ke en su neuma en ke hewii te ked-ehani su iring te pareyanan ne melutù en ini se kelibutan.”

<sup>16</sup> Dutun ne midsuyaver te garab din ini se suluhuen te Eleteala ne mibpinuu diyà te sehulapun ne mid-ehani rin ini se kelibutan.

<sup>17</sup> Na ruen ruma pà maa ne suluhuen te Eleteala ne migemew rut te Nekebpuru ne Valey te Eleteala ne ruen dema meharang ne garab din.

<sup>18</sup> Ne ruen pà ruma ne suluhuen te Eleteala ne migemew dut te ebpelengesaan diyà te Nekebpuru ne Valey te Eleteala ne sikandin se ebantey te apuy ketà. Ne midlalag te merahing ne suwara diyà te suluhuen te Eleteala ne migawed te meharang ne garab se egkahi te, “Garab ke en ne eheniya nu ke livas dut te pemulaan ne ed-ingaranan te paras diyà te kelibutan su nelutuan en.”

<sup>19</sup> Ne mibpendiyà ini se suluhuen te Eleteala se egarab dut te paras diyà te kelibutan, ne intahù din diyà te mibeelan ne edtehuan te egkekeres te bahas te paras su tuus ini te kedusa te Eleteala ne ebpekeuma riyà te menge etew ne egkunterà kandin.

<sup>20</sup> Ne ini se edtehuan te egkekeres ne bahas te paras ne riyà te liyu te inged. Ne ruen lengesa ne midtudà ketà iring te dalem ne nekeuma te tetelu nehatus wey deruwa nepulù ne kilumitru, ne ke keralem din ne senge meysterù wey tengà.

## 15

*Ke Pitu ne Suluhuen te Eleteala ne Ed-ewit te Pitu ne Susun ne Keresayan dut te Menge Etew*

<sup>1</sup> Ketà ne ruen дума pà maa ne tuus ne mekegeyip nevenar ne nekita ku riyà te langit. Ruen pitu ne suluhuen te Eleteala ne ed-ewit te pitu ne susun ne idrasey ran te menge etew. Ne embiya egked-ulaula ini ne ini en ke ketepusan te kedusa te Eleteala te menge etew dut te ampew te dunya.

<sup>2</sup> Dutun ne ruen nekita ku ne iring te ranew ne metingew nevenar su iring en te pehelungan, ugaid ne nekedsawug te apuy. Ne nekita ku rema ketà ke langun ne menge etew ne neketavan dut te mekeandek ne binatang, su warà dan mebpengarap kandin ne warà dan mebpengarap te ledawan ne iring dut te paras din, ne warà dan dema mebpetiyyap te tuus ne rumiru te ngaran din. Ne ebpengitindeg dan diyà te beyvey te ranew ne metingew, ne ruen egkeviten dan ne ke ed-ingaranan te harpa ne imbehey kandan te Eleteala.

<sup>3</sup> Ne egkanta ran te bayuk ni Moises ini se miduma te Eleteala rengan, wey ke bayuk dut te Nati te Bilibili, ke sikandan te,

“Is Eleteala ne Kerenan dey  
ne rekela se kebakabayà nu.

Langun ne ed-ul-ulaan nu ne rekdekelà wey mekegeyip.

Sikuna se edatù dut te langun ne menge inged,  
ne metidtu wey nekesuhat ke langun ne ed-ul-ulaan nu.

<sup>4</sup> Is Kerenan, sikuna ke ed-edatan  
wey edeyuen dut te langun ne menge etew  
su sikuna rà ke ed-ulaula te metidtu nevenar.  
Tembù be ke menge etew diyà te langun ne menge inged  
ne ed-uvey keykew ne ebpengarap,  
su impekita nu en kandan  
ke langun ne mid-ulaula nu ne metidtu nevenar.”

<sup>5</sup> Neipus arà ne nekita ku ne nepuwasan ini se Nekebpuru ne Valey te Eleteala diyà te langit, ne nekita ku diyà te lusud te ruhu ne tuus te ke Eleteala ne dutun.

<sup>6</sup> Ketà ne nekita ku ne midlihawang ini se pitu ne suluhuen te Eleteala ne ed-ewit te pitu ne susun ne idrasey ran te menge etew. Mibevelegkas dan te mèmeputi ne velegkas ne ebpeneringsing, ne inselauy ran te kumeng dan ke vulawan.

<sup>7</sup> Guna su nekelihawang dan en ne ruen seveka rut te arà se epat ne nelimbag ne mibehey te pitu ne bulawan ne lediyà diyà te pitu ne suluhuen te Eleteala. Ne ini se pitu ne lediyà ne nepenù te kegkeepes te Eleteala ne kenà ebpatay taman te taman.

<sup>8</sup> Neipus arà ne nepenùpenù te evel ini se Nekebpuru ne Valey te Eleteala su atag dut te raman te Eleteala wey ke gehem din. Ne warà ebpekelusud diyà te Nekebpuru ne Valey te Eleteala taman te kenà egkeipus ke pitu ne kedresaya te menge etew ne mid-ewit dut te pitu ne suluhuen te Eleteala.

## 16

*Ini ne Mekeatag te Ked-ulà dan dut te Pitu ne Bulawan ne Lediya ne Neteahuan te Kegkeepes te Eleteala*

<sup>1</sup> Rutun ne ruen nerineg ku riyà te Nekebpuru ne Baley te Eleteala ne midlalag diyà te pitu ne suluhuen te Eleteala. “Pendiya kew te ampew te dunya,” ke sikandin, “ne ulai niyu ini se intahù te pitu ne bulawan ne lediyà su ini ke kegkeepes te Eleteala.”

<sup>2</sup> Na mibpendiyà ini se neuna ne suluhuen te Eleteala ne mid-ulaan din ke idrasey ne netahù dut te lediyà din diyà te tanà. Ketà te ked-ulà din ne langun ne menge etew ne netiyapan te tuus te ngaran dut te mekeandek ne binatang wey langun ne mibpengarap te ledawan ne iring te paras din ne midtuvuan te tepal ne memawù wey mesmesakit.

<sup>3</sup> Iring ded dema ke ikeruwa ne suluhuen te Eleteala ne mid-ulaan din ke idrasey ne netahù te lediyà din diyà te rahat. Ketà ne nevaluy ke rahat ne iring te lengesa te etew ne nevnunù, ne langun ne netahù ketà ne mibpematay.

<sup>4</sup> Na ini se iketelu ne suluhuen te Eleteala ne mid-ulaan din ke idrasey ne netahù te lediyà din diyà te menge wayig wey menge tuhanan, ne nevaluy ne lengesa.

<sup>5</sup> Ne nerineg ku ke lalag dut te suluhuen te Eleteala ne edtuganur te menge wayig ne migkahi te,

“Is, Eleteala, sikuna rà ke ed-ulaula te metidtu nevenar.  
Sikuna ne daan en te warà pà limbaha ke misan engkey en,  
ne kemulu pà sikuna taman guntaan,  
ne ke kedusa nu ne nekeuma kayi te ini ne menge etew  
ne metidtu nevenar.

<sup>6</sup> Su sikandan se mibpeimatey dut te menge etew  
ne mibperetiyaya keykew,  
wey ke mibpelambas te Lalag nu rangen.  
Tembù be lengesa se ibpeinu nu kandan guntaan  
su ini se edait ne idsuli kandan.”

<sup>7</sup> Ne ruen pà maa nerineg ku ne edlalag diyà te ebpelengesaan te menge binatang ne ibehey te Eleteala ne migkahi te,  
“Uya, Kerenan ne Eleteala, ne ruen dekdekelà ne kebayabayà din,  
ini se kedusa nu te menge etew  
ne nekesuhat wey metidtu nevenar.”

<sup>8</sup> Na ini se ikeepat ne suluhuen te Eleteala ne mid-ulaan din diyà te andew ke idrasey ne netahù te lediyà din. Tembù be mibmèmèinit nevenar ke andew ne ebpeketutung dut te menge etew.

<sup>9</sup> Ne netutung dan dut te mèmèinit nevenar ne andew ne midsumpalit dan ke Eleteala su sikandin se ebayabayà ketà te kedresaya kandan. Ugaid ne warà dan med-engked dut te meraat ne ed-ul-ulaan dan, ne warà dan dema med-adat se Eleteala.

<sup>10</sup> Na ini se ikelima ne suluhuen te Eleteala ne mid-ulaan din ke idrasey ne netahù te lediyà din diyà te ebbinuwan te mekeandek ne binatang ne ebbinu se edatù. Netekew ne mibmerusirem ke langun ne inged ne edetuan din. Ne ini se menge sakup din, ne nengekahat dan ke dilà dan su atag dut te keresayan ne nekeuma diyà te kandan.

<sup>11</sup> Ne midsumpalit dan ke Eleteala diyà te langit su atag dut te mesakit ne neheram dan wey atag dut te tepal dut te lawa ran. Ugaid ne warà dan med-engked dut te meraat ne mid-ulaula ran.

<sup>12</sup> Na ini se ikeenem ne suluhuen te Eleteala ne mid-ulaan din ke idrasey ne netahù te lediyà din diyà te dekelà ne wayig ne ed-ingaranan te Yupratis, tembù be neiratan ini se wayig su apey egkepenehana ke ibayà te menge datù ne egenat te Edsilaan.

<sup>13</sup> Dutun ne ruen nekita ku ne tetelu ne busew ne mekeandek ne iring te paras te bakbak. Seveka se migemew rut te bèbà te tendayag, ke ikeruwa ne migemew rut te bèbà te mekeandek ne binatang, ke iketelu ne migemew rut te bèbà te ebbpelambas te lalag ne tarù ni Setanas ke datù te pekaid.

<sup>14</sup> Ini se tetelu ne busew ne ruen gehem dan te ebaal te mekegeyip. Ne sikandan se nesuhù dut te datù te pekaid diyà te langun ne menge datù te ampew te dunya su ibpevurun kandan ke menge sundaru su ebpekibunù dan te Eleteala ne mekegehém embiya ebpekeuma en ke mevantug ne hewii te kedatù te langun ne menge etew.

<sup>15-16</sup> Dutun ne miburun dut te tetelu ne busew ke menge datù wey ke menge sundaru ran diyà te ed-ingaranan te Armegidun te kinehiyan te Hibruhanen.

Na midlalag si Hisu Kristu se egkahi te, "Tentenuri niyu ini. Ini se kedlived ku," ke sikandin, "ne iring te kebpekeuma te tekawen su warà etew ne netau ke endei egketahù ke andew ne ebpekeuma a. Egkehalew ke etew ne kenà edlipereng ketà te kedlived ku su ebpenareng kediey. Uya, egkehalew ke etew ne mibpenehana te belegkas din se ebpenareng kediey su apey warà kegkeyeyai rin ketà te kebpekeuma ku."

<sup>17</sup> Na ini se ikepitu ne suluhuen te Eleteala ne mid-ulaan din diyà te kewkewangan ke idrasey ne netahù te lediyà din. Ne ruen merahing ne suwara ne nerineg ku ne riyà ebpuun te ebbinuwan dut te edatù diyà te Nekebpuru ne Valey te Eleteala diyà te langit ne migkahi te, "Nepupus en!"

<sup>18</sup> Dutun ne migkikilat ne miduruhung ne mibpemberansi ne midlinug te mevaher. Warà etew ne nekeheram te linug ne iring ketà egenat dà dut te kinelimbaha te Eleteala te menge etew su newaleng ke tanà te mevaher.

<sup>19</sup> Ne ke rekela ne inged ne Behilunya ne migintaang ke tanà te tetelu ne vaad, ne langun dema ne menge inged te ampew te dunya ne nereetan en. Uya, warà melipati te Eleteala ke meraat ne ed-ul-ulaan dut te menge etew te inged ne Behilunya, tembù be ibpeinum din kandan ke binu diyà te basù din ne tuus te kegkeepes din su midusa rin sikandan te mevaher.

<sup>20</sup> Langun ne menge punul riyà te rahat ne warè en, ne ke menge buvungan ne nengetempag.

<sup>21</sup> Ne mid-uranaan ke menge etew te derekelà ne biyew, ne menge lelima nepulù ne kilù se kevehat dut te uman senge timan. Dutun ne nasi midsumpalit dut te menge etew ke Eleteala su midrasey kandin te derekelà ne biyew ne idusa te Eleteala kandan.

## 17

### *Ini ne Mekeatag dut te Mevantug ne Tengerihen ne Meritan*

<sup>1</sup> Ketà ne ruen seveka rut te pitu ne suluhuen te Eleteala ne mid-ewit te menge lediyà ne mid-uvey kediey ne migkahi te, "Kayi ke en su ibpekita ku keykew ke kedusa te Eleteala ketà te mevantug ne tengerihen ne meritan ne ed-ubpà ketà te inged ne ruen merakel ne wayig.

<sup>2</sup> Ne mibpengingniyug kandin ke langun ne menge datù dut te ampew te dunya, ne langun ne menge etew dut te ampew te dunya ne mibpeewit dema kandin kayi te binu rin ne mibpearig kandan."

<sup>3</sup> Dutun ne midlumunan a dut te Kedesenan ne Ebpetuntul te Menusiyà ne mid-ewit a rut te suluhuen te Eleteala diyà te tanà ne kenà egkeubpaan te etew. Ketà ne ruen nekita ku ne meritan ne ed-untut te merihà ne binatang, ne pitu se ulu rin ne sepulù ke sidung din. Ne riyà te lawa dut te mekeandek ne binatang ne ruen merakel ne lalag ne insurat ketà ne edsumpalit te Eleteala.

<sup>4</sup> Ne ini se meritan ne mibevelegkas te merihà wey mehuridtem ne iring te belegkas te bai, ne ruen indayandayan te lawa rin ne mibeelan ne bulawan wey mepurù ne menge batu wey pirlas. Ne ruen migeweran din ne bulawan ne basù ne nepenù te meraat wey meredsik ne ulaula rin dut te kebpenarig din.

<sup>5</sup> Diyà te buked din ne ruen insurat ne minge lalag ne ruen meana rin ne in-eles se egkahi te,  
 “Bebilunya ke inged ne mevantug.  
 Kebpuunan te langun ne Tengerihen  
 wey langun ne meredsik ne ulaula  
 dut te ampew te dunya.”

<sup>6</sup> Ne nekita ku rema ne netevereg ini se meritan kayi te lengesa ne mid-inum din, ini se lengesa dut te minge etew ne mibperetiyya te Eleteala ne mibpeimetayan din su kenà dan ed-engked dut te kebperetiyya ran ki Hisus.

Ne ketà te nekita ku ini se meritan ne neinuinu a nevenar.

<sup>7</sup> Ugaid ne midlalag kedi ke suluhuen te Eleteala ne migkahi te, “Meambe ke egkeinuinu ka? Na ipesabut ku kenikew ke in-eles ne meana mekeatag kenihan te meritan wey ke binatang ne ed-unturan din ne ruen pitu ne ulu rin wey sepulù se sidung din.

<sup>8</sup> Ayan se binatang ne nekita nu ne biviyag dengan ne minatey en. Ugaid ne kenà dà egkeuhet ne egkeuyag ded ne egemew rut te liyang ne warà edtemanan te keralem din. Ne ketà te kegemew rin, ne id-antug diyà te apuy nerakà su edusaan. Ne dutun ne egkeinuinu ke langun ne minge etew te ampew te dunya ne warà mekesurat ke ngaran dan diyà te riberu ne ruen en insurat ne minge ngaran te langun ne ebahaya te umur ne warà edtemanan din te warà pà limbaha ke kelibutan. Uya igkeinuinu ran su biviyag dengan ayan se binatang, ne minatey en, ugaid ne egkeuyag ded maa.

<sup>9</sup> “Ne iyan dà ebpekesabut dutun,” ke se suluhuen te Eleteala, “ke etew ne mibehayan te Eleteala te metampas ne itungan. Iyan in-upama dut te pitu ne ulu te binatang ne ini ke pitu ne buvungan ne rutun ebpinuu ini se tengerihen ne meritan. Ne kenà ketà dà taman su iyan in-upama maa ne ini se pitu ne datù.

<sup>10</sup> Ne lelìma ran se minatey en, ne kemulu pà edatù ke seveka guntaan, ne ke senge etew ne datù ne warà pà mebpinuu te kedatù. Ugaid ne embiya ebpekeuma ke hewii rin te edatù ne kenà meuhet se kedatù din.

<sup>11</sup> Ne ini se mekeandek ne binatang ne biviyag dengan ne minatey en, ne arà ke ikewalu ne datù ne duma rut te pitu ne datù kayi te ini se pitu ne edetuan, ne ketà te egkeipus din ke ikeruwa ne kebpinuu rin te edatù ne edusaan ded dema sikandin diyà te apuy nerakà.

<sup>12</sup> “Na ini se sepulù ne sidung ne nekita nu ne ini ke sepulù ne datù ne warà pà mebpinuu te kedatù, ne ebpinuu ran te edatù elin ke mekeandek ne binatang ugaid ne mehaan dà.

<sup>13</sup> Ne egkeseveka se itungan dut te sepulù ne datù ne ebpesakup dan dut te mekeandek ne binatang ne eduma ran dut te suhù din kandan.

<sup>14</sup> Ne ebpekibunù dan dut te Nati te Bilibili, ugaid ne ini se Nati te Bilibili wey ke minge sakup din se edtavan kandan. Su sikandin dà ke Mepurù dut te langun ne kerenan wey sikandin se Mepurù dut te langun ne minge datù. Ne langun ne sakup din ne ke minge etew ne mibpemilì te Eleteala ne mibpeperetiyya wey metinumanen kandin.”

<sup>15</sup> Ne midlalag pà maa kediey ini se suluhuen te Eleteala ne migkahi te, “Ini se minge wayig ne nekita nu ne rutun mibpinuu ke tengerihen ne meritan, ne in-upama ini te minge etew diyà te langun ne minge inged, wey ke langun ne edsusunan te minge etew, wey ke langun ne minge bansa, wey ke langun ne minge kinehiyen te minge etew.

<sup>16</sup> Na ini se sepulù ne sidung ne nekita nu ne in-upama te sepulù ne datù, ne sikandin wey ke mekeandek ne binatang ne igkeepes dan ke tengerihen ne meritan ne ed-hawan dan ke langun ne kearen din taman te warà nesamà misan belegkas din, ne egkeenen dan ini se sapù din wey ebinsulan dan sikandin.

<sup>17</sup> Arà se ed-ul-ulaan dan su behey kandan te Eleteala ke pegitungan su apey egketuman dan ke kiyug din. Tembù be egkeseveka se itungan dan ne ebpesakup dan dut te mekeandek ne binatang ne eduma ran te suhù din taman te egketuman ke langun ne migkahi te Eleteala rengan.

<sup>18</sup> Na ini se meritan ne nekita nu ne in-upama ini te inged ne mevantug ne iyan ebayàbayà te langun ne minge datù dut te ampew te dunya.”

## 18

*Ini se Meraat ne Egketemanan dut te Inged ne Bebilunya*

<sup>1</sup> Dutun ne ruen nekita ku ne ruma pà maa ne suluhuen te Eleteala ne mibpenaag ne ebpuun te langit. Ne ini se kebayaàbayà din ne rekelà ne ke keluag dut te ampew te dunya ne egkerayahan te raman din.



<sup>2</sup> Ne midlalag te merahing se egkahi te,  
 “Na nereetan en!

Nereetan en ini se mevantug ne inged ne Bebilunya!  
 Guntaani ne neubpaan te langun ne mekeandek ne menge busew,  
 ne neubpaan dema te meraat wey meredsik ne pepenuk.

<sup>3</sup> Uya, arà se egketemanan din  
 su neewit din ke langun ne menge etew  
 te ebpetevereg dut te binu rin;  
 ne mibpearig kandan  
 te ed-amung te ulaula rin ne meraat.  
 Ne mibpengingniyug kandin ke langun ne menge datù  
 dut te ampew te dunya;  
 ne migkewasa ke menge ebpemendehang  
 kayi te kiyug dut te meritan  
 ne mepurù ke kebpmasa rin.”

<sup>4</sup> Na ruen pà ruma ne suwara diyà te langit ne nerineg ku ne migkahi te,  
 “Sikiyu ne menge sakup ku,  
 ne awà kew en keniyen te inged!

Pelahuy kew su apey kew kenà ebpekeruma  
 te meraat ne ed-ul-ulaan ketà te meritan,  
 su apey kew kenà ebpekeragkes te kedusa ku kandin.

<sup>5</sup> Upama ke idtambù ta arà se menge salà din,  
 ne egkesugkur din en ke langit su medmerakel en.  
 Ne warà melipati te Eleteala  
 arà se meraat ne mid-ulaula rin.

<sup>6</sup> Arà se meraat ne mid-ulaula rin keniyu  
 ne iyan ded dema ed-ul-ulaan diyà te kandin,  
 ugaïd ne edtekepen arà se kedsulli kandin.  
 Ne ke basù din ne nepenù te mepait ne binu  
 ne impeinum din te menge etew,  
 ne edtekepen arà se kepait din te ibpeinum kandin  
 ne idledawan te kedusa te Eleteala kandin.

<sup>7</sup> Su mibpereyùdeyù sikandin ne midtuman  
 dut te meraat ne kiyug din,  
 ne arà rema se kevehat dut te keresayan wey kemutuwan  
 ne ebpekeuma kandin.

Su migkahi arà se meraat ne meritan  
 ne in-upama te arà ne inged, ke sikandin te,  
 ‘Tring a te bai su warè en egkepemengà ku.  
 Kenà a balu, tembù be warè en keresayan  
 ne ebpekeuma kayi te kedi!’

<sup>8</sup> Ne geina te arà se pegitungan din,  
 tembù be egketekew ne ruen ebpekeuma diyà te kandin  
 ne merakel ne keresayan.

Su lusud te senge andew rà  
 ne ruen menge daru, kemutuwan wey bitil ne ebpekeuma.  
 Ne edtutungen dema sikandin su dekelà se gehem  
 dut te Kerenan ne Eleteala ne edusa kandin.”

<sup>9</sup> Na ini se menge datù dut te ampew te dunya ne mibpengingniyug kandin wey  
 miduma rut te meraat ne kiyug din ne ebpeninehew wey ebpemenderawit te egkekita  
 ran ke evel dut te arà se inged ne edtutungen ne in-upama te tengerihen ne meritan.

<sup>10</sup> Ne ebpekeriyù dan se edsandeng su egkeandek ke ebpekeragkes dan dut te kedusa  
 kandin ne egkahi ran te,

“Ey mekeyruwiru ini se egketemanan nu,  
 sikew se mevantug wey mevaher ne inged ne Bebilunya,  
 su lusud dà te senge uras  
 ne nekeuma en ke kedusa te Eleteala keykew!”

<sup>11</sup> Ne ini se menge ebpemendehang kayi te ampew te dunya ne ebpeninehew wey  
 ebpemenderawit dema su atag dut te kedereeti te arà ne inged su warè en ebpmasa te  
 menge dehang dan.

<sup>12</sup> Uya, warà en ebpmasa te dehang dan ne bulawan, pirak, menge mepurù ne batu,  
 menge pirlas, menge saput ne meputi wey mehuridtem, menge sida, menge meemut ne

kayu, wey menge pekearen ne neveelan dut te ungal te elipanti, pekearen dut te mepurù ne kayu, pekearen dut te galang wey putew, wey pekearen dut te senge susun ne batu ne ed-ingaranan te marbil.

<sup>13</sup> Warè en dema ebpemasa te ibpemendahang dan ne menge edsusunan te peninù, menge periyemut ne ed-ingaranan te insinsu wey mira wey frankinsin, menge binu, menge lana, menge tapung wey menge trigu, menge sapi, menge bilibili, menge kudà wey menge kerumata, wey menge uripen ne ibpemendahang dan.

<sup>14</sup> Ne egkahi rema ini se menge ebpemendahang ketà te inged ne in-upama te meritan ne tengerihen, ke sikandan te, "Langun ne kearen ne migkiyuan niyu ne midereetan en. Ini se kekewesai niyu wey ke impereyüdeyü niyu ne nereetan en dema, ne kenà en egkekita maa."

<sup>15</sup> Ne ini se ebpemendahang ne migkewasa rut te kepemendahang dan ketà te inged ne ebpekeriyù dan se edsandeng su egkeandek ke ebpekeragkes dan dut te kedusa kandin. Ne ebpeninehew ran wey ebpemenderawit

<sup>16</sup> se egkahi te,  
 "Ey mekeyruwiru arà se egketemanan din  
 dut te arà se mevantug wey mevaher ne inged ne nereetan en!  
 Rengan ne mibevelegkas ke menge etew ketà  
 te kumbalà ne sida ne mehuridtem wey merihà.  
 Ne ruen indayandayan te lawa ran ne mibeelan te bulawan,  
 mepurù ne menge batu wey menge pirlas.

<sup>17</sup> Ugaid ne lusud dà te senge uras  
 ne neamin nereeti ke langun ne kekewesai rin!"

Dutun ne langun ne menge kepitan te menge kapal wey ke menge etew ne ed-untud ketà, ne ke menge etew ne ebpenggelevak te ke kapal abpeg dut te menge etew ne ebpenginsedà diyà te rahat ne ebpekeriyù dan

<sup>18</sup> se edsandeng dut te evel te arà ne inged ne netutung ne ebensag dan se egkahi te,  
 "Warè en inged ne ebpekerepeng te kevaher te ini ne inged!"

<sup>19</sup> Ne ebpemeluhu ran te lipupuk te kegkemutu ran ne ebpeninehew wey ebpemenderawit dan se egkahi te,

"Ey mekeyruwiru ini se egketemanan din  
 su ini se mevantug wey mevaher ne inged ne nereetan en!  
 Su ini se kekewesai rin se igkewasa  
 rut te langun ne kemuney te menge kapal.  
 Ugaid ne lusud dà te senge uras  
 ne neamin nereeti ke langun ne kekewesai rin.

<sup>20</sup> Ugaid ne sikiyu ne ed-ubpà diyà te langit,  
 ne egkehalew kew su nereetan en ini se inged.  
 Ne egkehalew rema ke sikiyu ne mibperetiyaya te Eleteala  
 wey sikiyu ne menge kedserihan ni Hisu Kristu  
 wey sikiyu ne mibpelambas te Lalag te Eleteala,  
 su midusa en te Eleteala ini se inged  
 atag dut te mid-ulaula rin ne meraat keniyu."

<sup>21</sup> Dutun ne ruen ruma pà ne mevaher ne suluhuen te Eleteala ne migkuwa rin ke batu ne iring dut te kerekelà te gelingan ne in-antug ini diyà te rahat. Ne migkahi te,  
 "Iring ketà se kegkereeti dut te mevantug ne inged ne Bebilunya  
 su egketekew egkereeti ne kenè en egkekita.

<sup>22</sup> Kenè en egkerineg ini ne inged  
 ke egkevit te menge harpa wey ke kegkanta te menge etew,  
 wey ke ebpemulendag wey ebpembudyung.  
 Kenè en egkekita ne ruen etew ne metau  
 ne ebpandey te misan engkey en.

<sup>23</sup> Ne iring ded dema ne kenè en egkerineg ke gelingan.  
 Ne warè en rayag dut te sulù ne egkekita ketà,  
 ne warè en egkerineg ne mehalew ne menge lalag  
 diyà te kevruran te kewingan.  
 Ini se kedusa te inged ne Bebilunya  
 su ke menge etew ne ebpemendahang diyà te inged din  
 ne mevantug wey sikandan se migkewasa  
 dut te langun ne menge etew te ampew te dunya.  
 Ne ruma pà maa ne midlimbung dan te kedwelweliyan dan  
 dut te langun ne menge etew te ampew te dunya.

<sup>24</sup> Edusaan ke menge etew dut te inged ne Bebilunya su sikandin se mibpeimatey dut te menge ebpelambas te Lalag te Eleteala wey ke menge sakup din. Uya su rutun ne egkekita ke lengesa rut te langun ne mibperetiyaya te Eleteala ne mibpeimatayan atag dut te kebperetiyaya ran te Eleteala diyà te ampew te dunya."

## 19

<sup>1</sup> Dutun ne ruen nerineg ku ne iring te kehurub te denda ne menge etew diyà te langit se egkahi te,

"Edeyuen tew ke Eleteala, su sikandin dà se ibpurù tew, uya, sikandin dà se ruen dekelà ne gehem din, ne sikandin dà se ebpeiyu keyta rut te salà tew.

<sup>2</sup> Su ini se kegkukum din ne metidtu wey egkeserihan. Ne midusa rin ayan se mevantug ne tengerihen ne meritan, su mibpearig sikandin te langun ne menge etew te dunya te ebpeamung te meraat ne ed-ul-ulaan din.

Midusa en sikandin te Eleteala, su mibpeimetayan din ke menge etew ne miduma en te Eleteala."

<sup>3</sup> Ne mibensag dan maa se egkahi te, "Edeyuen tew ke Eleteala, su ke apuy ne ebpekevinsul kenian te inged ne ed-evel taman te taman."

<sup>4</sup> Ketà ne midlumpeng ke deruwa nepulù wey epat ne pekilukesen wey ke epat ne nelimbag te Eleteala su ebpengarap te Eleteala ne ebpinuu diyà te ebpinuwan din te edatù. Ne migkahi ran te, "Egketuman ini. Edeyuen tew ke Eleteala!"

*Ini ne Mekeatag te Kevuruan te Kewingan dut te Nati te Bilibili*

<sup>5</sup> Dutun ne ruen midlalatag diyà te uvey te ebpinuwan te Eleteala ne edatù ne migkahi te,

"Deyua niyu ke Eleteala tew, langun niyu ne eduma te Eleteala tew, ne langun niyu ne ed-adat kandin misan ke mepurù mevavà, deyua niyu sikandin!"

<sup>6</sup> Ne ruen nerineg ku ne iring te kehurub te denda ne menge etew su iring ke suwara ran te kedehuus te dekelà ne wayig, ne iring dema dut te eb pemberansi. Ne migkahi ran te,

"Edeyuen tew ke Eleteala, su ini se Kerenan ne Eleteala tew ne iyan edatù te langun.

<sup>7</sup> Egkehalew ki ne edeyuen tew ke Eleteala, su ke kewingan te Nati te Bilibili ne nekeuma en. Ne ini se raha ne eb pengesawaan ne ini ke menge etew ne mibperetiyaya kandin ne mibpegadir en.

<sup>8</sup> Ne ruen imbehey kandin ne belegkas ne mepmeputù wey mesihey ne mepmeputù wey mesihey te eb pengesawaan." (Ne iyan meana dut te mepmeputi ne belegkas din ne ke metidtu ne ed-ul-ulaan te menge etew ne mibpesakup te Eleteala.)

<sup>9</sup> Ne migkehian a ketà te suluhuen te Eleteala, ke sikandin te, "Tsurat nu ini. Langun ne menge etew ne impemetelavuk ketà te kewingan te Nati te Bilibili ne mehalew ran nevenar." Ne migkahi pà maa sikandin te, "Ini ke benar ne menge lalag te Eleteala."

<sup>10</sup> Ne midlumpeng ad diyà te sineruwan din su ebpengarap a kandin. Ugaid ne midawey a nikandin se egkahi te, "Kenà ka eb pengarap kediey. Iyan dait ne eb pengarapan nu ne ke Eleteala rà su siaken ne seveka a ne sugsuhen te Eleteala iring

kenikew wey ke menge ruma nu ne eduma rut te benar ne tuluuwen ne impesabut ni Hisus.”

Su ini se benar ne tuluuwen ne impesabut din ne ini rema ke impenurù dut te ebpelambas te Lalag te Eleteala.

*Ini ne Mekeatag dut te Etew ne Ed-untud dut te Meputi ne Kudà*

<sup>11</sup> Neipus arà ne nekita ku ke langit ne nepuwasan ne ruen ketà meputi ne kudà. Ne iyan ngaran dut te mid-untud ketà ne si Kedserihan wey si Benar su ini se kekkukum din ne metidtu ne ini se ked-atu rin dut te menge kunterà din ne metidtu red dema.

<sup>12</sup> Ini se mata rin ne iring te apuy ne egkeregreg, ne ruen seluluy rin ne merakel. Ne ruen dema ngaran ne insurat diyà te kandin, ugaid ne ke meana ketà ne iyan dà sikandin netau.

<sup>13</sup> Ne ini se belegkas din ne iring te in-ered diyà te lengesa, ne ke ngaran din ne “Lalag te Eleteala.”

<sup>14</sup> Langun dan ne diyà te langit ne ebpeninundug kandin iring te menge sundaru ne edtinundug dut te mepurù dan. Ne ebpenguntud dan dema te meputi ne menge kudà, ne mibpembelegkas dan te memeputi ne velegkas ne mesihey.

<sup>15</sup> Ne ini se edtunduhun dan ne ruen migemew te bèbà din ne meharang ne sundang, ne arà se metarem din su apey edtavan sikandin dut te etew diyà te langun ne menge inged te ampew te dunya ne egkunterà kandin. Ne ini se kebayàbayà din kandan ne mevaher su kenà egkepakey ne kenà edumaan ke langun ne menge lalag din. Ne ini se egkunterà kandin ne edusaan din iring dut te etew ne egkeres te paras su ebaal te binu, su ibpekita rin ke rekela ne kekkepes te Eleteala ne iyan ke rekela se kebayàbayà din.

<sup>16</sup> Iyan insurat diyà te kumbalà din wey diyà te buvun din ne, “Datu dut te langun ne menge datù wey Mepurù dut te langun ne ruen bayàbayà din.”

<sup>17</sup> Ketà ne midlingakà a ne ruen suluhuen te Eleteala ne nekita ku ne ed-itindeg diyà te andew. Ne mibmerahing se ked-umew rin te langun ne menge pepenuk ne riyà edlayang te kewkewangan, ke sikandin te, “Sikiyu ne edsusunsunun ne menge pepenuk ne burun kew kayi su ruen idsavud te Eleteala keniyu.

<sup>18</sup> Burun kew ne penuktuka niyu ke sapù dut te menge datù, menge kepitan wey menge sundaru. Penuktuka niyu rema ke sapù dut te menge kudà wey ke menge ed-untud ketà. Burun kew ne penuktuka niyu ke sapù te langun ne menge etew, uripen se kenà uripen, mepurù se mevavà.”

<sup>19</sup> Ketà ne nekita ku arà se mekeandek ne binatang ke mibpantew diyà te luuk te rahat wey arà se menge datù te ampew te dunya ne edumaan te langun ne menge sundaru ran. Ne nevrun dan su ebpekibunù dan ketà te ed-untud diyà te meputi ne kudà wey ke menge sundaru rin ne riyà ebuun te langit.

<sup>20</sup> Guna su mibpekibunù dan ne nesigkem arà se mekeandek ne binatang wey arà se mibpelambas te farù ne lalag ni Setanas ke datù te pekaid, arà se mibaal te mekegeyip ibpepevayà dut te gehem te mekeandek ne binatang. (Su kayi te arà se ulaula rin ne mekegeyip, ne nelimbangan din ke langun ne menge etew ne netiyapan dut te mekeandek ne binatang wey langun ne menge etew ne mibpengarap dut te ledawan iring te paras din.) Ketà ne in-antug te biviyag pà arà se mekeandek ne binatang wey ke ebpelambas ki Setanas diyà te apuy nerakà ne egkeregreg ne sendawà.

<sup>21</sup> Ne mid-imetayan ini se menge sundaru rin dut te sundang ne migemew rut te bèbà ketà te mid-untud te meputi ne kudà. Ketà ne langun ne pepenuk ne nevlung dan dut te sapù te menge etew ne minatey.

## 20

*Ini ne Mekeatag te Kegkedina ki Setanas ke Datù te Pekaid Taman te Sengivu ne Rahun*

<sup>1</sup> Neipus arà ne ruen suluhuen te Eleteala ne nekita ku ne ebpenaug egenat te langit ne egawed te rekela ne sengkali wey gunsì dut te liyang te tanà ne warà edtemanan te keralem din.

<sup>2</sup> Ne midsigkem din arà se rekela ne tendayag arà se uled te rengdengani rà nevenar ne iyan ke datù te pekaid ne ed-ingaranan ki Setanas, ne migkedinaan din taman te sengivu ne rahun.

<sup>3</sup> Neipus te kekkedina rin ketà ne in-antug din diyà te liyang ne warà edtemanan te keralem din, ne midlibpeng din arà se liyang ne midtehuan din te tuus su apey kenà egkepuwasi. Arà se mid-ulaula rin su apey kenà egkelimbungi ke menge etew dut te ampew te dunya taman te egkepupus ke sengivu ne rahun. Egkeipus arà ne ibpelihawang si Setanas te mehaan dà.

<sup>4</sup> Ketà ne nekita ku arà se menge ebpinuwan te edatù, ne arà se ebpeminuu ketà se mibehayan te bayàbayà te kegkukum. Ne nekita ku ketà ke menge gimukud dut te menge etew ne mid-imetayan su atag dut te kebpemenudtul dan te ini se impayag ni Hisus wey ke kebpemesabut dan te Lalag te Eleteala. Mid-imetayan dan su kenà dan ebpengarap dut te mekeandek ne binatang wey ke ledawan ne iring te paras din wey warà dan mebpetyap te tuus dut te binatang diyà te buked dan etawa belad dan. Neviviyag dan wey imperatù dan duma ni Hisu Kristu lusud te sengivu ne rahun.

<sup>5</sup> Ne ini se kegkevanew ran ne ini ke neuna ne kegkevanew rut te menge minatey. (Ugaid ne ke ruma ne menge minatey ne kenà pà egkevanew taman te kenà egkepupus arà se sengivu ne rahun.)

<sup>6</sup> Ne ke langun ne menge etew ne neamung te neuna ne kebanew te Eleteala dut te menge minatey, ne egkehalew ran nevenar wey ebpeneuven dan. Su sikandan ne kenà dan en ebpekeamung dut te ikeruwa ne kemetayen te menge etew ke in-upama te kedusa te Eleteala te menge etew diyà te apuy nerakà. Ugaid ne sikandan ne menge terebpelengesa te Eleteala su apey egelevek dut te egkiyuhan te Eleteala wey si Hisu Kristu, ne edatù dan dema duma ki Hisus lusud te sengivu ne rahun.

*Ini ne Mekeatag dut te Ked-antug ki Setanas Ke Datù te Pekaid diyà te Apuy Nerakà*

<sup>7</sup> Na, embiya egkepupus en arà se sengivu ne rahun, ne ibpelihawang dan pà si Setanas ke datù te pekaid ketà te liyang ne mibilengguan kandin.

<sup>8</sup> Ne edlihawang sikandin ketà ne edlimbungan din ke menge etew dut te langun ne menge inged te epat ne pediyulu te ampew te dunya. Ne arà se menge etew ne egkelimbungan ne sikandan ke egkunterà te Eleteala ne ed-ingaranan dan te Gug wey Migug. Ketà ne eburunen dan ni Setanas ke datù te pekaid su ebpekibunù te Eleteala, ne medmerakel dan su kenà egkevirang iring dut te pantad te beyvey te rahat.

<sup>9</sup> Ne ebengkar dan dut te ampew te dunya su edlingutan dan arà se inged ne Hirusalim ne ingkelimù te Eleteala ne ed-uppaan te menge sakup din. Ugaid ne mid-uranaan dan te apuy ne riyà ebpuun te langit ne neherà dan.

<sup>10</sup> Ne si Setanas ne midlimbung kandan, ne id-antug sikandin diyà te apuy nerakà ne egkeregreg ne sendawà, ne dutun ke mekeandek ne binatang wey ke ebpelambas te tarù ni Setanas ne in-antug en. Ne merukilem meandew ne egkeresay ran taman te taman.

*Ini ne Mekeatag te Kegkukum dut te Eleteala ketà te Mewri ne Hewii*

<sup>11</sup> Neipus arà ne ruen nekita ku ne meluag ne ebpinuwan ne meputi ne ruen ebpinuu ketà. Ne neawà ini se tanà wey langit diyà te etuvangan din ne kenè en egkekita.

<sup>12</sup> Ne nekita ku ke langun ne menge minatey ne nevanew en ne mepurù mevavà ne ed-itindeg diyà te etuvangan te ebpinuwan dut te edatù. Ruen menge riberù ne miberat wey arà se riberù ne ruen insurat ne menge ngaran dut te menge etew ne mibehayan te umur ne warà edtemanan din ne miberat dema. Ketà ne midreanan din te kukuman ke langun ne menge etew su atag dut te insurat kayi te menge riberù mekeatag te mid-ulaula ran te biviyag dan pà su langun ketà ne insurat diyà te menge riberù.

<sup>13</sup> Uya, langun ne riyà te Hades te Ivayaan ne nevanew en misan mibpatay ran kayi te tanà etawa nelened ran diyà te rahat, ne nepasad en te kukuman kandan su atag dut te mid-ulaula ran te biviyag dan pà.

<sup>14</sup> Neipus arà ne in-antug ke Kemetayen diyà te apuy nerakà wey arà se Ivayaan dema ne ed-ingaranan te Hades. (Ne ini se apuy nerakà ne ed-ingaranan te ikeruwa ne kemetayen.)

<sup>15</sup> Ne ke menge etew ne warà mekesurat ke ngaran dan diyà te riberù ne midsuratan te menge ngaran dut te langun ne mibehayan te umur ne warà edtemanan din, ne id-antug dan diyà te apuy nerakà.

## 21

*Ini ne Mekeatag te Behu ne Langit wey Behu ne Tanà*

<sup>1</sup> Dutun ne nekita ku ke behu ne langit wey tanà su neawà en ke raan ne langit wey tanà, ne warà en rahat.

<sup>2</sup> Nekita ku ke inged ne ed-uppaan te Eleteala ne ed-ingaranan te Behu ne Hirusalim ne ibpéhunrenen te Eleteala genat te langit. Mekempet ini se inged su iring te raha ne mekempet se belengkas din su mibpegediran su ed-esawaan.

<sup>3</sup> Ketà ne ruen merahing ne suwara ne nerineg ku ne riyà ebpuun te ebpinuwan dut te edatù ne migkahi te, "Na, ke ed-uppaan te Eleteala guntaanì ne diyan en te menge etew. Ed-ubpà sikandin diyà te kandan ne egkevaluy ran ne menge sakup din. Uya, sikandin se ebpekiduma kandan ne sikandin ke Eleteala ran.

<sup>4</sup> Ne id-awà din ke kedsinehew ran su warè en ebpatey. Ne warè en kemutuwan dan, ne warà kebpekesehew ran. Ne warè en dema keresayan dan su neawà en arà se raan ne kelibutan.”

<sup>5</sup> Na migkahi ini se ebpinuu diyà te ebpinuwan te edatù, ke sikandin te, “Guntaani ne ebehuwen ku ke langun taman.” Ne migkahi rin maa kediey te, “Isurat nu ini su langun kayi te lalag ku ne benar wey egkeserihan.”

<sup>6</sup> Ne migkahi rin ded maa te, “Nepupus en ini se langun. Siaken ke Alpa wey Umiga su siaken se ebpuunan te langun taman ne siaken dema ke ebpeengked dut te langun taman. Piya engkey en ne ebpekeinum, ne ebpeinumen ku te wayig ne kenà egkepemasa ne ebpuun te tuhunan ne ebehey te umur ne warà edtemanan din.

<sup>7</sup> Ne piya engkey ne kenà egkegaga rut te penggeram te datù te pekaid ne ibehey ku kandin ini se umur, ne siaken ke Eleteala rin ne anak ku rema sikandin.

<sup>8</sup> Ugaid ne ke langun ne negaga rut te penggeram te datù te pekaid ne iring dut te menge etew ne kenà edtikà ne eduma kediey, ne ke menge etew ne ed-engkenà te kebperetiyya ran kediey, ne ke menge ebpengingniyug wey ke menge mekeyeyà se ulaula rin ne id-antug diyà te apuy nerakà. Ne iring din ded dema ke menge terevunù, ke duen menge ketuenan din, ke menge ebpengarap te ledawan ne kenà tidtu ne Eleteala wey langun ne menge teruen ne iyan dan egketemanan ne id-antug diyà te apuy nerakà ke egkeregreg ne sendawà ne ke ed-ingaranan te ikeruwa ne kemetayen.”

*Ini ne Mekeatag te Inged ne Ed-ingaranan te Behu ne Hirusalim*

<sup>9</sup> Guna su neipus din te egkahi arà ne ruen seveka rut te pitu ne suluhuen te Eleteala ne mid-ewit te pitu ne lediyà ne netehuan te pitu ne mewri ne idrasey te menge etew ne mid-uey kedi ne migkahi te, “Kayi ke en su ibpekita ku keykew ini se ed-esewaan dut te Nati te Bilibili.”

<sup>10</sup> Ketà ne midlumunan a rut te Kedeseenan ne Ebpetuntul te Menusiya ne mid-ewit a dut te suluhuen diyà te metikang ne buvungan. Impekita rin kediey ke inged ne ed-ubpaan te Eleteala ne ed-ingaranan te Behu ne Hirusalim ne impehunerrenà te Eleteala diyà te langit.

<sup>11</sup> Ebpeneringsing nevenar ini se inged su ke raman te gehem te Eleteala ne ketà. Ed-anlag ini iring dut te mepmepurù ne batu ne ed-ingaranan te hasper ne metmetingew iring te pehelungan.

<sup>12</sup> Ne metikang nevenar ini se pehalad ne nekelingut dut te inged ne sepulù wey deruwa se bengawan din, ne ruen suluhuen te Eleteala ne ebantey ketà te uman seveka ne bengawan. Ne ruen insurat ketà te uman seveka ne bengawan ne menge ngaran dut te sepulù wey deruwa ne menge bansa te inenakan ni Israyil.

<sup>13</sup> Ruen epat ne pesahì dut te pehalad te inged, ne uman senge pesahì ne ruen tetelu ne bengawan. Ruen tetelu ne bengawan diyà dapit te edsilaan, ruen tetelu ne riyà dapit te edsenlepan, duen tetelu ne riyà dapit te ebelevahan wey tetelu te riyà dapit te ebelengkayan.

<sup>14</sup> Ruen sepulù wey deruwa ne batu ne mibpeunsaran dut te pehalad te inged. Ne ruen insurat ketà ne menge ngaran dut te sepulù wey deruwa ne kedserihan dut te Nati te Bilibili.

<sup>15</sup> Ne ini se suluhuen te Eleteala ne mibpekidlalag kediey ne migawed te tembu ne bulawan su edtembuwen din ini se inged, ne ke menge bengawan din wey ke pehalad din.

<sup>16</sup> Ne midsurungsurung ini se inged su ke tilenduwan din wey se belevahan din ne neked-iring. Arà se kedtembu rin te ini se inged ne ke tilenduwan din ne deruwa nengivu wey epat nehatus ne kilumitru, ne arà dema ke belevahan din wey ke ketikang din.

<sup>17</sup> Ne midtembu rin dema arà se pehalad dut te inged, ne enem nepulù wey epat ne miterù se ketikang din. Ne ke kelayat dut te tembu rin ne iring dut te tembu te menge etew.

<sup>18</sup> Ne arà se pehalad ne mibeelan te mepmepurù ne batu ne ed-ingaranan te hasper, ne ke inged ne mibeelan te lunsey ne bulawan ne metmetingew iring te pehelungan.

<sup>19</sup> Ini se sepulù wey deruwa ne rekela ne menge batu ne mibpeunsaran dut te pehalad ne ruen indayandayan ne merakel ne susun ne mepurù ne menge batu. Ini se neuna ne rekela ne batu ne indayandayan ne batu ne ed-ingaranan te hasper. Ne ke ikeruwa ne rekela ne batu ne indayandayan ne batu ne ed-ingaranan te sapira. Ne ke iketelu ne rekela ne batu ne indayandayan ne agata, ke ikeepat ne rekela ne batu ne indayandayan ne ismiralda,

<sup>20</sup> ke ikelima ne rekela ne batu ne indayandayan ne unisi, ke ikeenem ne rekela ne batu ne indayandayan ne karnila, ke ikepitu ne rekela ne batu ne indayandayan ne

kelisulitu, ke ikewalu ne rekela ne batu ne indayandayan ne berilu, ke ikesiyew ne rekela ne batu ne indayandayan ne tupasu, ke ikesepulu ne rekela ne batu ne indayandayan ne kelisupelasu, ke ikesepulu wey seveka ne rekela ne batu ne indayandayan ne hesintu, wey ke ikesepulu wey deruwa ne rekela ne batu ne indayandayan ne amatista.

<sup>21</sup> Na, ke sepulu wey deruwa ne bengawan ne sepulu wey deruwa ne pirlas, su uman seveka ne gumawan ne mibeelan te seveka ne rekela ne pirlas. Ne ke menge ralan ketà te inged ne mibeelan te lunsey ne bulawan ne metmetingew iring te pehelungan.

<sup>22</sup> Warà nekebpuru ne valey te Eleteala ne nekita ku ketà te inged su iyan iring dut te nekebpuru ne valey te Eleteala ne ke Kerenan ne Eleteala ne mekegehem wey ke Nati te Bilibili ne dutun en.

<sup>23</sup> Warà en atag din ke rayag te andew wey bulan su egkerayahan din dut te raman te Eleteala ne iyan din sulù ne ke Nati te Bilibili.

<sup>24</sup> Ne langun ne menge etew te ampew te dunya ne egketayawan dut te rayag ketà ne inged. Langun ne menge datù te ampew te dunya ne ed-ewit te menge kearen dan dutun te inged.

<sup>25</sup> Ne arà se menge bengawan din ne warà en gewii ne kegkelekevi rin, ne kenà en edlekevan su warè en merukilem dutun.

<sup>26</sup> Ne ed-ewiten dut te langun ne menge etew te ampew te dunya ke menge mepuru ne kearen dan su ibehey ran ketà.

<sup>27</sup> Ne warà piya engkey ne meredsik ne ebpekelusud ketà te inged, ne engketà ded dema ke menge etew ne ed-ulaula te mekeyeyà wey ke menge teruen. Su iyan dà ebpekelusud ketà ne ke menge etew ne ruen ngaran din ne insurat diyà te riberù te Nati te Bilibili ne nesuratan te menge ngaran dut te menge etew ne mibehayan te umur ne warà edtemaninan din.

## 22

<sup>1</sup> Ketà ne impekita kediey dut te suluhuen te Eleteala arà se wayig ne ed-ingaranan te Wayig ne Ebpekevehey te Umur ne Warà Edtemaninan din. Metmetingew arà se wayig iring te pehelungan ne riyà ebpuun ini te ebpinuuwan te Eleteala ne arà ded ke ebpinuuwan dut te Nati te Bilibili.

<sup>2</sup> Ne edtudà arà se wayig ketà te luuk te ralan te inged. Ne riyà te idsengeriveluyà dut te wayig ne ruen menge kayu ne impemula ne ebpekevehey te umur. Lusud te senge rahun ne ebahas te kesepulu wey deruwa su uman bulan ne ebahas. Ne arà se dawun din, ne ebpekevawì te langun ne menge etew dut te ampew te dunya.

<sup>3</sup> Warè iya meraat ketà te inged diyà te etuvangan te Eleteala.

Ne ketà te inged ke ebpinuuwan te Eleteala ne iyan ded ebpinuuwan dut te Nati te Bilibili, ne ebpengerapan ke Eleteala dut te langun ne menge sakup din.

<sup>4</sup> Ne egkekita ran arà se paras din, ne midsuratan ini se menge vuked dan te ngaran din.

<sup>5</sup> Warè en kerukileman ketà ne warè en atag dut te sulù etawa rayag te andew, su ke raman dut te Kerenan ne Eleteala se ebpekerayag kandan. Ne edatù dan duma kandin taman te taman.

*Ini ne Mekeatag te Kedlived ni Hisus kayi te Ampew te Dunya*

<sup>6</sup> Ketà ne migkahi ke suluhuen te Eleteala kediey, ke sikandin te, “Langun ne menge lalag ne nering nu ne benar iya ne egketuman en. Su ke Kerenan ne Eleteala ne mibpelumunan din dut te Kedesenan ne Ebpetuntul te Menusiyà arà se menge mibpelambas te Lalag din dengan ne sikandin se midsuhù te suluhuen din kayi te kediey su apey a ebpesabud dut te langun ne menge sakup din ke engkey se mehaan en ne egked-ulaula.”

<sup>7</sup> Ini se lalag ni Hisus, ke sikandin te, “Pemineha niyu ini su mehaan ad edlived. Ne langun ne menge etew ne miduma en dut te lalag ne insurat kayi te ini se riberù ne egkehalew ran nevenar!”

<sup>8</sup> Siaken si Juan ke nekerineg ne nekekita te langun ne insurat ku kayi. Guna su nering ku wey nekita ku ini, ne midlumpeng a riyà te sineruwana te suluhuen te Eleteala su ebpengarap a kandin te ini se impekita rin kediey.

<sup>9</sup> Ugaid ne midawey a nikandin se egkahi te, “Kenà ka ebpengarap kediey. Su siaken ne seveka ne sugsuhuen te Eleteala iring keykew wey ke menge ruma nu ne ebpelambas te Lalag te Eleteala wey iring dut te langun ne eduma rut te insurat kayi te ini se riberù. Iyan dait ne ebpengerapan nu ne ke Eleteala rà.”

<sup>10</sup> Ne migkahi red maa te, “Kenà nu ieles ini se menge lalag ku ne imperayag ku kenikew ne insurat nu kayi te riberù ini su langun din ne mehaan en egketuman.

<sup>11</sup> Ne embiya edrudsù en ini se egketemanan, ne ke menge etew ne ed-ulaula te meraat ne ed-iseg pà ed-ulaula te meraat wey ke menge etew ne ed-ulaula te mekeyeyà ne ed-iseg pà ed-ulaula te mekeyeyà. Ugaid ke menge etew ne metidtu se betasan din ne ibpelevundus din ke ed-ul-ulaan din ne meupiya. Uya, ke menge etew ne sakup te Eleteala ne ibpelevundus dan te ed-ulaula te kiyug te Eleteala.”

<sup>12</sup> Na ke si Hisus, “Pemineha niyu ini. Mehaan ad edlived, ne ruen lalew ne ibehey ku rut te uman seveka su sabap dut te mid-ulaula rin.

<sup>13</sup> Siaken ke Alpa wey Umiga su siaken se ebpuunan te langun taman ne siaken dema ke ebpeengked dut te langun taman.”

<sup>14</sup> Ne ke menge etew ne mibpemipi te belegkas dan ne in-upama te menge etew ne edlinis dut te salà dan ne egkehalew nevenar, su egkepakey ran ne edlusud dut te bengawan ketà te inged te Eleteala wey egkepakey ran ne egkaan ketà te bahas te kayu ne ebpekevehey te umur.

<sup>15</sup> Ugaid ne iyan kenà ebpekelusud ketà te inged te Eleteala ne ke langun ne mekeyeyà se ed-ul-ulaan din, ne ke duen menge ketuenan din, ke menge ebpengingniyug, ke menge terevunù, ke menge ebpengarap te ledawan dà ne kenà tidtu ne Eleteala, ke menge teruen, wey ke menge limbungen. Warà etew ne ed-ulaula te iring ketà ne ebpekelusud ketà te inged.

<sup>16</sup> Ne migkahi pà maa si Hisus te, “Siaken si Hisus ne midsuhù te suluhuen ku su ibpesabut din ini se lalag ku riyà te keniyu ne menge mibperetiyaya kediey. Siaken se kevuwaran dut te Datù rengan ne si David ne siaken dema ke mesihy ne mekebangas ne bituen ne edsilà te egkeriwaswas.”

<sup>17</sup> Ketà ne ke Kedeseenan ne Ebpetuntul te Menusiyà wey ke menge etew ne mibperetiyaya ne in-upama rut te ed-esawaan te Nati te Bilibili ne ed-umew ran se egkahi te, “Kayi kew en su apey kew ebpekeamung.”

Iring ded dema ke langun ne nekerineg kayi ne iyan iya se med-umew ran dema se egkahi te, “Kayi kew en.” Langun niyu ne ed-umew ran keniyu su apey piya engkey keniyu ne ebpekeinum ne egkiyug ne ed-inum kayi te wayig ne mebpengkayì su ibehey ini dè duen, ne ebehey te umur ne warà edtemanan din.

*Ini ne Mekeatag te Ketepusan ne Menge Lalag ni Juan*

<sup>18</sup> Siaken si Juan ne ruen ibpetiraan ku te langun niyu ne nekerineg kayi te imperayag kediey ne impesabut ku kayi te riberù ini. Embiya ruen etew ne ed-uman te lalag kayi, ne ed-umanan dema te Eleteala te kedusaa kandin kayi te keresayan ne impesabut ku kayi te riberù ini.

<sup>19</sup> Ne embiya ruen etew ne ruen id-awà din kayi te menge lalag ne nekesurat kayi, ne id-awà dema te Eleteala ke kegkepakey rin te egkaan dut te bahas te kayu ne ebpekevehey te umur, ne id-awà din dema te kegkepakey rin te edlusud ketà te inged te Eleteala ne impesabut ku kayi te riberù ini.

<sup>20</sup> Na si Hisus ke mibperayag te langun ne insurat ku kayi ne migkahi te, “Uya, benar iya ne mehaan ad edlived!”

Egketuman ini! Is, Hisus ne Kerenan ku, egkiyuhan ku ne ebpengkayì ke en!

<sup>21</sup> Na egkiyuhan ku te langun niyu ne sakup te Eleteala ne ebpeneuven dut te Kerenan tew ne si Hisus.

Ini rà se langun ne lalag ku.

*Juan*